


Ja øgyajpxy ja ømyadya'aky midi xukpaajtimp
ja nitso'ok'ajtin



New Testament in Mixe, Tlahuitoltepec (MX:mxp:Mixe,
Tlahuitoltepec)

**Ja ɔgyajpxy ja ɔmyady'aky midi xukpaajtɨmp ja
nitso'ok'ajtin
New Testament in Mixe, Tlahuitoltepec (MX:mxp:Mixe,
Tlahuitoltepec)**

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mxp], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Tlahuitoltepec

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

422dcf73-46a5-5403-b423-8406ed76ac1d

Contents

MATEO	1
MARCOS	69
LUCAS	114
JUAN	185
HECHOS	239
ROMANOS	306
1 CORINTIOS	334
2 CORINTIOS	362
GÁLATAS	379
EFESIOS	389
FILIPENSES	398
COLOSENSES	405
1 TESALONICENSES	412
2 TESALONICENSES	418
1 TIMOTEO	422
2 TIMOTEO	430
TITO	435
FILEMÓN	439
HEBREOS	441
SANTIAGO	460
1 PEDRO	467
2 PEDRO	475
1 JUAN	480
2 JUAN	487
3 JUAN	488
JUDAS	490
APOCALIPSIS	492

JA ØGYAJPX̄Y JA ØMYADYA'AKY MIDI JA MATEO YJAÄY

Ja Jesucristo tyety'aptøjk

¹ Ja' idø'øn ja yiknajtskajpx̄ip pøn jaty ja nwindson'ajtim Jesucristo tyety'apip ku ja teety'api ja Abraham jøts ja David,

² ku Abraham t'u'ngi ja Isaac, jøts ja Isaac t'u'ngi ja Jacob, jøts ja Jacob t'u'ngi ja Judá. Namay ja'adi møøt y'uch myigu'ukti.

³ Ja Judá møøt ja ñidø'øxy Tamar ja'ats t'una'jk'ajttip ja Fares jøts ja Zara. Jøts ja Fares t'u'nk'aty ja Esrom, jøts ja Esrom t'u'nk'aty ja Aram.

⁴ Jøts ja Aram t'u'nk'aty ja Aminadab, jøts ja Aminadab t'u'nk'aty ja Naasón, jøts ja Naasón t'u'nk'aty ja Salmón.

⁵ Jøts ja Salmón møøt ja ñidø'øxy Rahab tmajnk'atti ja Booz, jøts ja Booz møøt ja ñidø'øxy Rut tmajnk'atti ja Obed, jøts ja Obed t'u'nk'aty ja Isaí.

⁶ Jøts ja Isaí t'u'nk'aty ja rey David, jøts ja rey David møøt ja tø'øxyøjk midi ja Urías wyinaty tø'atsnidø'øxy'aty, ja'ats idø'øn tmajnk'ajttip ja Salomón.

⁷ Jøts ja Salomón t'u'ngi ja Roboam, jøts ja Roboam t'u'nk'aty ja Abías, jøts ja Abías t'u'nk'aty ja Asa.

⁸ Jøts ja Asa t'u'ngi ja Josafat, jøts ja Josafat t'u'ngi ja Joram, jøts ja Joram t'u'nk'aty ja Uzías.

⁹ Jøts ja Uzías t'u'ngi ja Jotam, jøts ja Jotam t'u'nk'aty ja Acaz, jøts ja Acaz t'u'ngi ja Ezequías.

¹⁰ Jøts ja Ezequías t'u'ngi ja Manasés, jøts ja Manasés t'u'ngi ja Amón, jøts ja Amón t'u'nk'aty ja Josías.

¹¹ Jøts ja Josías t'una'jk'aty ja Jeconías, namay ja'adi møøt y'uch myigu'ukti. Winet ets ja israelit jaä'y idø'øn yiknajtswa'wigyøjxtøø jam jadu'ukpi etjotp midi yiktejp Babilonia.

¹² Tøts ja jade'en wyinaty y'ukjaty ku ja Jeconías tpaajty ja y'u'nk midi txøøw'ajtp Salatiel, jøts ja Salatiel ja Zorobabel ja y'u'ngip.

¹³ Jøts ja Zorobabel t'u'ngi ja Abiud, jøts ja Abiud t'u'ngi ja Eliaquim, jøts ja Eliaquim t'u'ngi ja Azor.

¹⁴ Jøts ja Azor t'u'ngi ja Sadoc, jøts ja Sadoc t'u'ngi ja Aquim, jøts ja Aquim t'u'ngi ja Eliud.

¹⁵ Jøts ja Eliud t'u'ngi ja Eleazar, jøts ja Eleazar t'u'ngi ja Matán, jøts ja Matán t'u'ngi ja Jacob.

¹⁶ Jøts ja Jacob t'u'ngi ja José midi tñidø'øxy'ajtp ja María midi tyaagip ja nwindson'ajtim Jesús, ja Cristo midi yiknitsokp.

¹⁷ Makmajkts najtska'axits idø'øn ja tpaajty ku ja cho'onda'aky Abraham ñikøjxp jøts ja ttamigugøxi ja David. David ñikøjxpts jadu'uk cho'onda'aky jøts ja jadu'uk jade'en ñajtska'axidyøø kunim ja israelit jaä'y yikwaanøjktøø aguwan'ampy jam Babilonia. Winetnimts jadu'uk cho'ondaajky, ja'ats najtska'axidøø jaduk jadine'en ja makmajkts najtska'axi kunim kyaxi'jky ja Cristo ja yiknitsokpi.

Ku ja Jesucristo kyaxi'jky

¹⁸ Yide'en idø'øn y'ejxi tyiyi sã jaty yjajty kyubejty ku nwindson'ajtim Jesucristo ojts kyaxi'iky: Ja María midi tyaagip, ja' idø'øn wyinaty najts'awani'ejtnip jøts ja tmøøt'amajtskit ja José; nawyaawajnidipnim ja

wyinaty ku ja María jam tnikøjxp'ajtni ja mutsk, Dios idø'øn ja tuujnip jøts ja Espíritu Santo myøk'ajtin jade'en tyikmajada'aky.

¹⁹ Øy yikxonts ja José yjaa'y'aty midí idø'øn ñiyaa'y'ajtpy, ka'ap ja pøn sa tjadyimñøjmi jøts ja María kyayikpøky'ext; myajtstu'utwampy ja' jøts ja ka'ap pøn ttuknijawíwya'añ.

²⁰ Exam idø'øn ja wyinaty jade'en wyinmay ku ja ojts agumaa'y'ampy tyuk'ijxyi ja Dios y'ankilis jøts ja ojts ñi'mxyi:

—José, metsxi mdeety'amøjip ja David, kidits mdsø'øgi, møøt amajtski yø María. Yikaxø'økwapmy mutsku'nk tu'uk, Dios y'Espíritu Santo jade'en myøk'ajtin tyikwingaxø'økp.

²¹ Mixyu'nk ja yikaxø'økp, ja'ats meets ja xyøøw mbiktaajkip JESÚS. Jade'en'ampy idø'øn ja jade'en txøøw'att ja'agøjxp ku ja pojkpítumbi jaa'y ja ttuknitso'ok'att ja pyøky.

²² Tyimyjajt tymgyubajts idø'øn ja jade'en sa nwindson'ajtim Dios wyinaty tø tyikwa'añ ja kyugajpxy ku ja wya'añ:

²³ Jøtpyip tu'uk ja kiixye'dø'øxy midí amaay tsinaapy, yikaxø'økpts ja tu'uk myajnkun'k,

Emanuel ja xyøøw'atp, midí ayuujk pidsømp: Dios adøm møøt.

²⁴ Xjats kuts ja José ojts ñiwijy, jøts idø'øn ja jade'en tpaduun sa Dios y'ankilis ja wyinaty tø y'ane'emyyi, jøts ja ojts tniðø'øpxyiky ja María.

²⁵ Jøts idø'øn ja ka'ap jade'en tmøøtsøøninim sam amajtsk'ajtin ñaxy kunim ja tø'øxy tyikaxi'iky ja myijawyeenu'nk; jøts ja ojts txøðijy JESÚS.

2

Ku ja wijyjaa'y ojts t'ats'ejxti ja maxu'nk Jesús

¹ Jam ja Jesús ojts kye'exy Belén, jam kajpjotp midí Judeit etjotp, ja Herodes idø'øn jam wyinaty windsøn'ajtp, ja' wyinaty tuki'iyi tñitanaapy ja naajx jøts ja kajp. Xjats jam Jerusalén yja'attøø winaagin wijyjaa'dyi midí tsoø'ndip xøøbidsimy,

² ja'ats jam ojts tyikniðøwidi, yide'en ja wyandøø:

—¿Ma dø'øn ja tø kye'exy ja' pøn tniwindsøn'atp ja ya'it israelit jaa'y? Tøts øøts ja n'ejxpaajti ja myaadsa' ma øø tø ndsøøn, ixyaats øøts ja tø nnimiñ jøts øøts ja nwindso'øgiwya'añ.

³ Kuts ja windsøn Herodes ja ojts jade'en tñimadøy jøts ja tyatøjkiyi ja jotmay, nayide'en niduki'iyi ja Jerusaléngit jaa'dyi.

⁴ Winets ja windsøn Herodes tñankñamyujki niduki'iyi ja israelit teety windsøndøjkti jøts nayide'en pøn jaty tkajpxwejttip ja jaa'y, ja'ats idø'øn ja ojts ttiibyiky ma et idø'øn ja Cristo wyinaty kyaxø'økwa'añ.

⁵ Xjats ja tñimaadyøø:

—Jam Judeit etjotp ma kajp jam txøøwi Belén; pø yide'enimxi ja Dios kyugajpxy jekyip tjaadyañ:

⁶ Ja kajp midí yiktejp Belén, midí jam Judá etjotp, kidi tymñugo kajpip yø' sam o midí kajp ma jaty jam yikutukti ja windsøndøjkti wine'enin yjam'atti jam Judá;

jam ja kyaxø'økt tu'uk ja møj windsøn, midí øts nIsraelit kajp x'ejx'ejtip.

⁷ Winets ja Herodes amaa'tsk twaadsøøy ja wijyjaa'dyi midí idø'øn jam wyinaty tø choondi xøøbidsimy, jøts ja ojts ttiibyiky juuni dø'øn ja wyinaty tø t'ejxpaatti ja maadsa'.

⁸ Jøts ja ojts tkexy jøts ja ñøjkxtit jam Belén, yide'en ja tñimaay:

—Nøjkxti jam, øyim yikxonim idø'on xyiknidøwidit ja mixyu'nk; kuts xpaattit, jatyi's meets ja xnigajpxt jøts meets ja xukmado'ot, jøts øts ja nayide'en n'atswindsø'øgit.

⁹ Kuts idø'on ja windsøn Herodes ja jade'en ñimaajyidøø, xjats idø'on ja wijyjaa'y choo'ndøø. Jøts ja maadsa' ja wyinyø'øyiidi midì ja jam wyinaty tø t'ejxti ma dø'on ja jam choo'ndi xøøbidsimy, yø'øpy idø'on ja' kunim ja yja'jty jam ma dø'on ja mutsku'nk Jesús wyinaty, jamnimts ja yø'øy'amøjkiyii'ñ.

¹⁰ Ku dø'on ja wijyjaa'y ja jade'en t'ejxti ja maadsa', xjats ja yjanty-imxyondaktøø;

¹¹ Kuts ja tyøjkidøø jam tøjktotp, japt's ja tpaattøø t'ejxtøø ja mutsku'nk jøts ku ja tyaak María ja jap møøt. Winets ñaguxendyaajkidøø jøts ja twindsø'jkidøø ja mutsku'nk. Ojts ja tyikni'awa'atsti ja oori, ja poom, jøts ja pa'akxuu'kpi midì tyejtíp mirra. Jade'en ja tyikni'awa'atstøø, ja'ats ja ojts ttamay'atti, ja' ja ojts ttawindsø'øgidi.

¹² Kuts idø'on ja wyinaty jade'en tø t'ukwindsø'øgidi, xjats ja yiktuk-madoodøø agumaa'yjøtpy jøts ku ja ka'ap nayide'en y'ukwimbejtñidit midì ja wyinaty tø tñendi, ma ja windsøn Herodes ja jam wyinaty tø t'ukpaatti. Xjats idø'on ja wyimbejtñidøø, abiktyuu' t'pøjktøø jøts ja ñøjkxnidi jam pyuxkøjxp kyajpkøjxp.

Ku ja maxu'nk Jesús ojts yiknigüe'exy jøts yikminijky jam Egipto

¹³ Tøts idø'on ja wijyjaa'y jam wyinaty choondi, ku ja nwindson'ajtim ja y'ankilis ñanky'eixøø jøts ja José ja agumaa'yjøtpy ojts t'ixy, yide'en ankilis ja ñimaajyøø:

—Tsojk pidø'øk, møøt tsoon yø mutsk møøt yø tyaak jøts mgaknøjkxtit jam Egiptit etjotp, taa'nidi jam. Pøni wine'en jam mdaa'nidi øtsnim ja kø'øm nnigajp xp, ja'agøjxp ku Herodes yø t'ixa'awa'añ yø mutsk jøts yø tyik'ookwa'añ.

¹⁴ Xjats ja José ojts pyidi'iky, jøts ja ojts koots ttsa'angue'eky ja mutsku'nk, jøts ja tmøødiyøø ja tyaak jøts idø'on ja ojts tmøøtnijky jam Egipto.

¹⁵ Jam ja chinaadyi jeky kunim ja Herodes y'ø'jky. Jade'en'ampy idø'on ja jade'en tyimyjaty ti mibaat ja Dios kyajpxy jadi'iñi y'uknaxt pø patyxi wyinaty yide'en tø tyikwaañ ja kyugajpxy: “Egiptit etjotp øts ja n'U'nk nyiktsø'ñ ku øts ja nwaadsøø.”

Ku ja Herodes tyikutuky jøts ja mutsk mixyuna'jk y'oo'køxtit

¹⁶ Kuts ja Herodes tñija'wiyii'ñ jøts kudam ja wijyjaa'y ja wyinaty tø wyin'iñiyi, xjats ja yjantyimy'ambijky; jøts ja ojts tni'ane'emy ku y'oo'køxtit ja mixyuna'jk. Majtsk jumøjtpibaat ja ojts tñankyik'øøgyiyi wine'enin ja mixyuna'jk jam wyinaty Belén, jøts nayi wine'en ja kajp jam tñiwingon'aty. Ja jumøjt idø'on ja pyayø'øpy sa ja wijyjaa'y ja wyinaty tø tyukmadøyi.

¹⁷ Ka'pxy idø'on ja jade'en yjajty sa ja kugajpxy Jeremías wyinaty ja nøky tø tja'ay ku ja wyaañ:

¹⁸ Yikmadoop ayuujk jam Ramá, sam yjawi øy pøn ti tpaji'y tpaya'axy; ja tø'øxyøjk Raqueldam idø'on y'u'nk y'una'jk tpajii'py tpayaxp jade'en, jøts ja ka'ap tkupiky jøts ja yikpa'ayo'ot, pø tøxi y'u'nk y'una'jk ja y'oo'køjxni.

¹⁹ Xjats ku y'ø'jky ja Herodes, winets nay'agumaa'yjøtpy tja'wiyii'ñ ja José jøts ku t'ijxy tu'uk ja Dios y'ankilis jam Egiptit etjotp, jøts ja ñimaajyøø:

20 —Pidø'ok, jøts xmøødit yø mixyu'nk yø Jesús møøt yø tyaak, wimbejtñidi nøjknidi jam Israelit etjotp, tø ja y'oo'køjxnidi pøn jaty y'ijty tyik'ookwandip yø mutsku'nk.

21 Winets ja José pyidi'jky jøts ja tyiktsøø'ñ ja mutsku'nk. Ja Jesús idø'øn yikwaadso'omp møøt ja tyaak jøts ja ojts ñøjkxti jam Israelit etjotp.

22 Kuts ja José tñija'wiyii'ñ jøts kudam ja Arquelao jam wyinaty wyindsøn'aty Judeit etjotp, ja tyeety Herodes ja kyudanaapy ku dø'øn ja wyinaty tø y'øøky, jøts ja José tsø'jkip ja', jade'ents ja jade'en'ampy kyanijky; tøts idø'øn ja wyinaty yiktukmadoogojmi agumaa'y'ampy jøts ja ojts ñøjkxti jam Galileit etjotp.

23 Kuts idø'øn ja jam yja'attøø, jøts ja ñøjkxti tsinaabyi ma kajp txøøwi Nazaret. Ka'pxy idø'øn ja jade'en tyuujni yjajty sa Dios kyugajpxy wyinaty tø wya'andi jøts ku ja nwindsøn'ajtim Jesús jam kyugajpi Nazaret.

3

Ku ja Juan Bautista kya'amaay jam abak etjotp

1 Tøts ja tiempi wyinaty ñaxy jøts ja Juan Bautista mido yiknøbajtp, jam wya'kaxi'jky Judeit y'abak'etjotp, jøts ja jam kyajpxwa'kxy,

2 yide'en ja jam wya'añ:

—Jawidi mbøky, yiktigajtsti mdsinaa'yindi, ja wyingøñ ja Dios kyutujk mido ja tyanitanaapy ja yjaa'y.

3 Yø Juan idø'øn ja' mido ja kugajpxy Isaías ñigajpx ku ja yide'en tjaadyaañ: Yikmadoop ayuujk jam abak etjotp ku wya'añ møk'ampy:

“Awejxidi ja nwindsøn'ajtim y'ixpøjkin; yiktøwdi yiktuuda'akti mwimmaa'ñ.”

4 Kameeyi pøjk idø'øn ja Juan jam wyinaty wyet'ajtpy, jøts jiyujk'ak tendsum'aty, ja mu' dø'øn ja jam chu'chpy jøts jiyujk pa'ak ja tji'kxy mido jam muum ujtjotp, ja'ats idø'øn ja jam ñidsinaapy.

5 Jøts idø'øn ja jam øy pøn jaa'y ñimiñyi jøts ja tmadowdi sa wya'añ, mendip ja' pøn tsoo'ndip jam møj kajpkøjxp Jerusalén, nayide'en wine'enin jam pøngapøn chøønidi jam Judeit etjotp, mido tmiwingon'ajtp ja nøø mido txøøwip Jordán;

6 kuts idø'øn ja jaa'y ja pyøky tmayatsti, jøts ja Juan ja tyiknøbety ma ja Jordángit nøø jam.

7 Jøts ku dø'øn Juan ojts t'ixy jøts ku ja fariseotøjk may'ampy yjanchmendi nøbajtpi møøt ja saduceotøjkiti, jøts ja tñimaay:

—iMee miku'! ¿Pøn mee tø mnii'mxyi jøts ku jade'en mgayiktabayø'odyit ja mbøky, jøts ku yø'øyi chøkyi ku meets ya nøbajtpi tø mmiñ?

8 Yikxon idø'øn mjaay'y'attit, wan idø'øn tyik'ijxy jøts ku ja mdsinaa'yin tø xyiktigatsti,

9 jøts kidi mee køøm mnawya'añidi namyikajxim: “Tixi ka'ap ti chøkyi kumi ja Abraham adøm n'apteety'amø'ajty'ndip”; jøts ka'ats yjade'eni ti Dios kamajyip øy ja pøn ttukmigu'uk'att ja Abraham pøni pøn ja køøm y'a'ejxip.

10 Jøts tsojk ja nøjxk yiktiidyuñ pøn jaty tkami'øy'ajtip ja Dios.

11 Tiy janch ixym ndyimdyukmadowdi jøts ku øts yø'øyi tø nnimiñ jøts meets nøø nduktanøbattit. Jade'en'ampy yiknijawit jøts ku mdsinaa'yindi tø xyiktigatsti; jats øts tu'uk ix'oojk xpamiñ pøn meets Espiritu Santo mduktatøkiyip jøts ja' tmime'ent ja tidiyu'unin. Møk'ampy kutujk ja tmimiñ, nijuuni øts ja møøt nganamyibaat'atit.

¹² Jade'en ja ttu'unt ja naxwii'ñit jaa'y sam ariindøøm yikwigumy'in, abiky ja tpiктаajkit ja y'ak jøts ja tñitø'ty ja jøøn midi nijuuni kape'tsp, jøts ja ariinbajk abiky yikpøkjø'økt. Jade'ents idø'øn ja jaa'y yiktu'undit sa pønjabøn tmi'øy'aty tkami'øy'aty ja Dios.

Ku ja Jesús ñøbejty

¹³ Xjats idø'øn ja Jesús yja'jty jam ma ja Jordánk nøø, jam ja chøøn Galileit etjotp jøts idø'øn ja jam yja'jty ma ja Juan wyinaty, ja' ja ñinijxpy jøts ja yiknøbatit.

¹⁴ Ka'ap ja Juan ja twa'añ jøts ja tyiknøbatt, yide'en ja Jesús yiknimaay:

—¿Jawyeen me xtsøky jøts me nyiknøbatt? Pø metsxi dø'øn ndijy xyiknøbatp.

¹⁵ Yide'en ja Jesús y'adsøøy:

—Wan idø'øn t'ukjaty; jade'en ne'egi ndymdyøø'jint jøts ku ja'ayi nbadu'unint sa Dios Teety tyiy'ajtin wya'añ.

Kyupøjk idø'øn ja Juan ja jade'en.

¹⁶ Ja'ayi ja Jesús ñøbejty, jøts ja pyidsiimy jam nøøjotp. Winets nay jatyi adsu'jky y'awaajch ja tsajp, jøts ja ojts t'ejxpaatti ja Dios y'Espíritu Santo ku ja ñigida'agyi sam tsapakin jøts ja tyakakpajti.

¹⁷ Winets ja Dios Teety y'ayuujk yikmadøøy, yide'en ja jap tsajpøtpy wya'añ:

—Ya'at øts idø'øn n'U'nk'ajtpy, yø' øts idø'øn ndsøky'ajtpy, njantya-jotkujk'ajtpyts øts yø'.

4

Ku ja Jesús yikjot'amutsk'ejxwa'añ

¹ Xjats ja Dios y'Espíritu Santo ojts yiknijkxyi ja Jesús jam abak etjotp, jøts miku' ja jam yjot'ejxit.

² Wixijkxyøøw wixijxchuu' idø'øn ja jam y'ayuu'ajty, jøtsnim yuu ja pyaajti.

³ Winets miku' ja jam ñimeejni jøts ja yikpøkyunwa'añi, yide'en ja ojts ñii'mxyi:

—Pøni janch ku me mjanchdiosu'ngi, yiktsapkaakyjat yø tsaa.

⁴ Xjats ja Jesús y'adsøøy:

—Yide'en Dios kyajpxy wya'añ: “Kuuyi Dios kyajpxy myøji, kidi ja'ajip naxwii'ñit jaa'y nugo tyajuiky'attip ti jatyi yikjøø'kxp.”

⁵ Winets miku' ja ojts yiknijkxyi jam Jerusalén midi Dios kyunuu'kxkyajp'ajtpy, jamts ja ojts yikøxpetyi tsaptøjk kubajk

⁶ jøts ja ojts ñii'mxyi:

—Pøni janch Dios U'nk mets, kajtswoon ya; pø nømpxi ja Dios kyajpxy jøts ku:

Ja tnøjmit y'ankilis jøts me myik'ejx'ett jøts ku me ka'ap ti mjattit.

Jøts ku mets ja ankilis mdsa'anjø'økit,

jøts mdeky tsaa kyakumit kyayo'odsit.

⁷ Xjats ja Jesús t'adsøøy jøts ja tnimaay:

—Janch nayinømts Dios kyajpxy: “Kidi mDios xjot'ixy.”

⁸ Xjats ja miku' ja ojts wyaanøjkxkojmiyi jam møj kojpkøjxp, jøts ja jam tyuk'ejxøø wine'en ja kajp naxwiñ jøts ku janchkumeeñ janchjotkujk;

⁹ yide'en ja ojts ñii'mxyi:

—Ngøyajkøjxp øts yø kajp tuki'iyi jøts mets yø xja'bøkøxt, pøni xwinguxanaapy øts, pøni xwindsø'jkip øts.

¹⁰ Winets ja Jesús wyaañ jøts ja tnimaay:

—Miku', jiwā'ak, kidi øts yā xwin'ixy, pø yide'ents Dios kyajpxy wyā'añ: “Ja Dios Teety tu'ugyi mwindsø'øgip, ja' mbadu'ump pøni sa ja wyā'añ.”

¹¹ Xjanimts ja nwindson'ajtim Jesús ja miku' myajststujtyøø, jøts ja ankilis ja ñimeejnøø, ja'ats ja ojts pyudøkiyi.

Ku ja Jesús tpadøjkiyī'ñ ja tyunk

¹² Kuts ja nwindson'ajtim Jesús tñimadøøy jøts ku ja Juan jam wyinaty puxøjkjotp, winets ja ojts ñijkxy jam Galileit etjotp.

¹³ Jøts nika'ap ja tyāā'niyīī'ñ jam Nazaret, ne'egi ja ojts ñijkxy tsinaabyi mā ja kajp jam mejy'am midī Zabulón etjotp jøts Neftali etjotp, jam idø'øn ja ojts ñijkxy Capernaumit kajpkøjxp.

¹⁴ Ka'pxy idø'øn ja jade'en tyuujni yjajti sa ja Dios kyugajpxy Isafas wyinaty tø wyā'añ ku ja yide'en tjaadyāā:

¹⁵ Meets Zabulónit jāā'y, meets Neftalīt jāā'y,

mā tuu' wingon ñaxy jam mejy'am, midī yiknido'onip xøøbidsimy ku nnøjkxint jam Jordán.

Meets Galileit tsinaabyidi, pøn ka'israelit jāā'dyi.

¹⁶ Jade'en meets x'ejxpaattit midī Dios Teety ñajtskajxp sam ja jājin pøn wimbeets kugoots tyimy'eitnidip,

nisudso mgawinmaa'nbyaatti pøni sadam idø'øn ja Dios mdsøkyidi, tøts ja tyikujajtaāgi tyikudøø'kxaāgi pøn ja pyøky tmi'ookwanidip jādī'iñi, jøts tø ja Dios mduu'mø'yidi sudso mnitso'ok'attit.

¹⁷ Kuts ja Jesús ja'ayi jam Capernaum kyajpkøjxp yja'aty, yide'en ja kyajpxwā'kxnibøjkiyīī'ñ:

—Jawidi mbøky, yiktigatsti mdsinaa'yindi, ja'agøjxp ku ja wyingøn ja Dios kyutujk midī ja tyanitanaapy ja ñaxwīī'ñit jāā'y.

Ku ja Jesús twaādsøøy nimaktaxk ja ajkxmajk

¹⁸ Jam ja Jesús wyinaty ñaxy mejpya'am midī jam Galilea etjotp, ku ja t'ejxpaajty namajtsk ja jāā'y midī ttukmiga'ax'ajttip, tu'uk txøøw'aty Simón, nayi yikxøømøøpy ja Pedro, jøts jadu'uk Andrés. Ajkxmajk idø'øn ja tyunk'ajttip ixam ja wyinaty tyimñiwejtspatti ja tya'ajkxmajk.

¹⁹ Winets ja nwindson'ajtim Jesús ja ñimaajyidøø:

—Mada'akti, møøt widettik øts jøts nduknijawidit sudso jāā'y ja nitso'ok'ajtin tpaatt.

²⁰ Jøts idø'øn ja nay jatyi tñajtswøjdidøø ja tya'ajkxmajk jøts ja ojts tmøødidi.

²¹ Tø wyinaty waani yø'ødyi, jamts ja Jesús ojts t'ejxpatkojmi nayi namajtsk ja jāā'dyi midī tukjāā'dyi: tu'uk yJacobø'aty jøts jadu'uk Juan txøøwi, ja Zebedeo dø'øn ja y'unā'jk. Jam ja wyinaty møøt ja tyeety barkijotp, ja tya'ajkxmajk ja jam wyinaty y'adajkidip. Winets Jesús ja ojts yaajxyidi,

²² jøts ja nay jatyi tmajstuttøø ja tyeety jam barkijotp, jøts idø'øn ja tmøødidøø ja Jesús.

Ku ja Jesús tyik'ixpiky ja mayjāā'y

²³ Øy ja Jesús øy mādsoo tyimwyidity jam Galileit etjotp, ku ja øy magajp yja'aty jøts ja yik'ixpiky jam tsaptøjkjotp, jøts ja tkajpxwā'kxy ja Dios y'øgyajpxy midī ja tyanitanaapy ja yjāā'y, jøts ja øy pønjabøn tyiktsø'øky pøn jam tigati pa'am pøjkip.

²⁴ Jøts ja Jesús yiknija'wiyīī'ñ, ñija'wigyøjxtøø ja' pønity tsinaadyip jam Siria etjotp, ja'ats ojts ja pyamaa'y tyikmendi pøn jatyi jam o tigati pa'am pøjkidip ajnidip, jøts ñayikmemidi ja' pøn ja miku' tø tyatøkiyidi jøts pøn ja mø'ødyi

pa'am pøjkidip, pøn køxujxtip pakxujxtip. Xjats idø'øn ja nwindson'ajtim Jesús ja tyiktsokijxy.

²⁵ Jøts idø'øn ja mayjaa'y jam jade'en yja'atti choondi pøn tso'ondip jam Gaileit etjotp, jøts ja yikpawidity ja Jesús. Jam ja'adi pøn kugajp'ajttip ma jaty ja kajp midi kyutujktaajk tjagyajtpit Decápolis jøts Jerusalén, jøts nayide'en pøn tso'ondip Judeit etjotp, jøts nayide'en jamidi pøn kugajp'ajttip jaduktamajñ'ampy ma ja Jordánit nøø tyañ.

5

Ku ja Jesús ojts kya'amay jam kojpkøjxp

¹ Xjats ku ja Jesús ojts t'ixy ja mayjaa'y jam, winets ja ñijky kojpkøjxp jøts ja jam y'ixaajky, jamts pyabøjkpitøjk ja ñachinaa'y'awidejtøø,

² jøts ja ojts yide'en tyik'ixpøjktøki:

Ja' pøn nekim t'ejxtip

³ —Tya'øy'ajtidip ja' Dios kyunuu'kxin pøn ja y'amutsk'ajtin yja'wip, ja'ats pyaattip ja Dios kyutujk midi ja tyanitanaapy ja yjaa'y.

⁴ Tya'øy'ajtidip Dios kyunuu'kxin ja'adi pøn jotmayaxtip pøn jotmay'oo'ktip, ja' idø'øn Dios ayo'ejxidip.

⁵ Tya'øy'ajtidip ja' Dios kyunuu'kxin pøn myiduda'aky'ajttip ja y'aweix'ajtin, ja'ats pyaattip ja øy'ajtin midi ja Dios tøn'adsowi.

⁶ Nayide'ents ja tta'øy'ajtmidi ja Dios kyunuu'kxin pøn tjantyimtyojktip ja øy'ajtin ja tiy'ajtin midi Dios yja'ajip, pudøkiyidipts ja' jøts ja jade'en ttu'undit sam idø'øn ja ttsokti.

⁷ Nayi tya'øy'ajtidip Dios kyunuu'kxin ja'amidi pøn t'ayo'ejxtip ja myigu'uk, ayo'ejxidipts Dios ja nayide'endi.

⁸ Tya'øy'ajtidip Dios kyunuu'kxin ja'adi pøn ja yjanchja'win tu'ugyi yik'ejttip, kuwanits ja Dios ja tpaattit.

⁹ Tya'øy'ajtidip Dios kyunuu'kxin ja'adi pøn yikxon tkajpx'øydip jøts tsep tkananktyuñidi, ja'abi jaa'y idø'øn Dios u'nk'atidip una'jk'atidip.

¹⁰ Nayi tya'øy'ajtidip Dios kyunuu'kxin ja'amidi pøn tku'ayo'ombaajtidip ja øy chinaa'yin, jøts yikjemandi yiktedundi, ja'abits idø'øn paat'ajtidip ja Dios kyutujk midi ja tyanitanaapy ja yjaa'y.

¹¹ Nayi tya'øy'ajtidip Dios kyunuu'kxin ja'amidi pøn yikjemnimaadyip yiktenimaadyip uk yikjemandi yiktedundi, yikniwambatti a'øy'ampy øts køjxp.

¹² Kidits xkumayjawidi, nonjajti jotkujk'atti meets, møj'ampy meets ja nøjcx mwingaxø'jkxyi jap tsajpøtpty, pø nayide'enxi ja yikjemandøø yiktedundøø pøn jaty tø y'atstøøniidi y'atstanidi pøn kugajpxy'ajtidip ja Dios.

Ja' pøn jade'en naxwiñ tundip sam ja jaj tyuñin sam ja kaan tyuñin

¹³ Jade'en meets idø'øn sam kaan tyuñin midi wa'ats midi naxwii'ñit jaa'y yiktundip jøts chu'jch kyawindigø'ødyit. Nayide'en idø'øn ndejint mdunkpaattit ku mmigu'uk xukmado'odit ja Dios yja' sudso'ampy y'anmija'win kyawindigø'ødyit. Kuts ka'ap jade'en mdu'undit tø wyinaty mbidsømdi ejxim ja kaanin midi kawa'ats midi katump.

¹⁴ Kuwani myik'ejxtit myiknijawidit nayide'en sami kajp yik'ijxyin midi jam ejxin'am midi jam kojpkøjxp. Jade'en meets idø'øn ejxpajt mwā'andip sam jaj yajyin tyii'kxyin.

15 Kidi ja'apxi yø jaj tniðøbyøki jøts ja yikpikta'akt kajuun patki'py, pø ja'axi ja wya'ant jøts ja yikpikta'akt jam ejxin'am ma ja tyikujajit tyikudøø'kxit pøn jaty tsinaadyip jam tøjkjotp.

16 Nayide'ents meets idø'ønmi, tuk'ejxti ja jaa'y ja øy'ajtin ja xondaajkin jøts t'ejxtit tniyawidit jøts kudam meets xuñ ja tiy'ajtin, mjaotwamp tam meets, myijawidipts kyunuu'kxyjawidipts ja' ja Dios Teety midì mee mnitanaajyip o madsoo midì jap tsajpjøtpy.

Ku ja nwindson'ajtim Jesús tniğajpxy sa tyu'unt ja Moisés kyutujk

17 'Kidi meets jade'en mwinmaañidi jøts ku øts ja' tø nnimiñ jøts øts ja Moisés kyutujk jøts øts ja Dios kyugajpxy y'ixpøjkin nyikudigøjyidit; kidi ja'apts ø tø nnimiñ, ja'axi ø nnimimpy jøts øts ja jade'en yikxon njaaktyimñigajpxy sa jaty ja tø wya'andi.

18 Janch øts idø'øn nwa'añ, pøni wine'en iiy tyaa'ni yø naajx yø tsajp, niwine'enints ja kutujk kyagudigøty kunim ja tuki'iyi ka'pxy jade'en tyimyjatt pøni ti jaty idø'øn tunipnim.

19 Paty ja ka'ap yikmøj'ext ku Dios kyutujk ttanitanit ja yjaa'y pøni pøn yiin waan tkayikmøjip ja Dios kyutujk, kuts ja myigu'uk ja nayide'n ttukpabiky sam ja kø'øm tpaduñ yiin waan, ja'ats idø'øn ja Dios kamøj'ejxip nayide'en. Pønts ka'pxy tpadump jøts myigu'uk ja nayide'en ttukpabiky, møj'ejxipts Dios ja' ku kyutujk ja ttanitanit ja yjaa'y.

20 Paty mee ndukmadø, pøni ka' øy yikxon mjaaj'y'atti, pøni mdundip nayide'en sam yø fariseotøjkti sam yø kajpxwejpitøjkti, nijuunits meets Dios kyutujk jade'en xkapaajtiyidit midì yjaa'y ja tyanitanaapy.

Ku ja Jesús tniğajpxy sa kya'øyi ja aki jøts ja jotma'jtin

21 'Tøxi xnimadowdi ku ja n'apteety'amøj yiknimaadyøø: "Kidi myikjaa'y'øøky, pøni pøn yikjaa'y'oo'kp yiktiidyu'ump ja'."

22 Yide'ents mee nnøjmi pøni pøn ja myigu'uk tmi'ambøjpk, nayi yiktiidyu'ump ja'. Uk jam o pøn ja myigu'uk tjemnøjmi ttenøjmi, tiidyunidipts ja' ja kutujk adsinaabyidi ma ja kutujktaajk jam; uk pøn tniimaapy ja myigu'uk jøts ku ja myø'øty, paat'ajtip ja' jøts ja y'ayo'ot ma jøøn jap ayodaajkjotpy.

23 'Paty pøni mbiktā'akwandip ja myøxy jam altajrwemp, kuts jam mja'atti jøts winet xja'myatsti jøts kudam ja mmigu'uk jap tu'uk pøn mmidsep'ajtip,

24 jamyits ja altajrwemp xmajststuttit midì myoxwandip, jøts ja jawyeen x'atskajpx'øyidit møøt ja mmigu'uk. Pøni ti dø'øn mnadyani'ambøjkidip jøts mnamyijotjimbetidit xem yam møøt ja mmigu'uk, winetnims jadigojk mnøjkxt jam altajrwemp, jøtsnims ja xyoxtit midì jam tø x'ukyiknøjkxti.

25 'Ku pøn mni'øøniwya'añidi jøts ja myiknøjkwā'añidi jam kudunk wyindum, namga'anin jam myiknijkxyidi, tiku yikxon xkakajpx'øyidi jøts ja møøt mnamyijotjimbetidit jadigojk, jøts kidi myiknijkxyidi jam windsøn tiidyumbi wyindump. ¿Ja ti nø'ømp ja windsøn jam? Pø mgøyakidipxi ja jam jøts mee myikøyakt ma ja tajk mayojr jamdi, ja'ats mee myikpuxøjktøkiiyip jøts mee myiktsu'umt.

26 Øts idø'øn wamp, jøts ku jaanim mbidsø'ømdit ku wyinaty tø ja multi xkubatkjøxti.

Ku ja Jesús tniğajpxy pøn tø'øxy yaa'y nabyøjkkidip

27 'Tø meets inet ja xnimadøy ku jekyip yide'en yjawa'andi: "Kidi mmigu'uk ñiyaa'y ñidø'øxy xpøjkkxyi."

28 Yide'ents øts nwa'añ, pøn ja'ayi t'ejxkip ja tø'øxyøjk øy ja nugo y'am yjotp yjawanmay, pøktyumpts idø'on ja jade'en.

29 Pøni ka'ap yø mween y'øyi ku yø mduktunk'aty jøts myikpøktyunwa'añ, jade'en ne'egi mdyimdyø'øt jøts ku mnawyenjuudit, jøts jagam xpikta'akt ja mween; ne'egi øy'ajtp jade'en ku ja'ayi wyindigø'øty midi myikpøktyunwajnip, jøts kidi amuum mwindigøøgyixy, jøts kidi amuum mnijkxy jap ayodaajkjotpy.

30 Uk nayide'ents mgø' myikpøktyunwa'añi, ne'egits xkajtspoott jøts køtuk mda'ant; ne'egi øy'ajtp jade'en ku ja'ayi wyindigø'øty midi myikpøktyunwajnip, jøts kidi amuum mwindigøøgyixy, jøts kidi amuum mnijkxy jap ayodaajkjotpy.

Ku ja Jesús kyajpxwiyj sudso ja amajtsk'ajtin ñaxy

31 'Nayi tø jekyip yiknigajpxy: "Pøni pøn ñidø'øxy tmajtsu'utwamp, tøy'ajtingøjxpts ja tminawya'kxit, kojpp tu'uk ja nøky."

32 Yide'ents ø nwa'añ, ku pøn yaa'dyøjk ñidø'øxy tminawya'kxyi a'øy'ampy, ku ka'ap ja wyinaty ja wenk yaa'dyøjk tmøøt'aty, møj tundigø'øyin ja tyumpy, jøts ja tø'øxy pyøktuyñ ku ja wenk yaa'dyøjk ja møøt y'amajtskimyi. Nayi pøky ja yaa'y nayide'en taja'jtipp pøni myøøt'amajtskip ja tø'øxyøjk ja' midit tø wyinaty yikmajtsu'uty.

Ku ja Jesús tñigajpxy ku ka'ap Dios køjxp nugo ndaay'ajtint

33 'Nayi tøts inet xnimadowdi ku ja mdeety'aptøjk jekyip yiknimaadyi: "Pøni ti mni'adso'owip Dios wyingujpp, kidits meets ja xka'ukyik'adujkni ja mgajpxy ja m'ayuujk."

34-35 Øtsts wamp jøts pøni ti ja mmigu'uk mdamini'adso'owip, ka'ap ja Dios nugo xyiktestig'att. Ni xkakajpxpaattit ja tsajp jøts ja naajx, jabi Diosxi ja nayide'en yja'ajtpy; ni ja Jerusalén kajp xkakajpxpaattit, jabi nay ja Dios møj yikutujkpixi kyajp ja'.

36 Uk kø'ømbaatt mgubajk x'awanidi ku ja kyayikmibiky midit mjaduk-janchjawiwyandip o pøn, kidits jade'en nugo mwa'andi, kidi kø'ømpixi meets mwaay mgubajk xyik'øyi, pø nay Dios ja jade'en kø'øm mmøøjyidip.

37 Ka'ap nugo ti xkajpxjimbettit xkajpx'adøjtitt pøni ka'adam ja ka'pxy xnijawidi, jade'ents idø'on ja miku' ja tyunkjøøjp tyikyø'øky ku xkajpxyondi.

Ku ja Jesús tñigajpxy sa pøn ja pyøky ñanktyukubetyidi

38 'Nayi tø net xnimadowdi ku ojts jekyip yide'en yiknigajpxy: "Jøts nayide'en pøngapøn ja myigu'uk tyik'ayo'ombaaatt pøni ti ayo'on ja jade'en ttuñ, nayide'ents idø'on ja tyimiyktu'unt."

39 Yide'ents ø nwa'añ: Jøts kidi mee nayide'en xuñ sam ja ka'øyjaa'yindi; pøni mgojxip mdse'jkipp, ja' øy ku xmaa'kxuktit.

40 Kuts øy pøn mniwambatwa'añidi jøts adsepjøjpx myikpøjkwya'andi ja mnijan, mo'odits, jøts pøni yjaaktyimbyøkwampy ja yukwop, kidits ayuujk nugo xyikyondi, mo'odi.

41 Pøni myiktaguwa'anidip jøts tsimy xpadsø'ømdit, jøts ja jam xyikja'attit pøni mæ t'a'ejxidi, mjaaktyimdyuujnidipst ja may'ajt ja' jøts ja jawaani jagam xyikja'jtiddit.

42 Pøni myik'amidoodip øy ti, mo'odits, kidi meets ja kamø'øyin x'ixy; nayide'en pøni pøn anuu'kxy øy ti m'amidojiddip, kidi mee tø mwa'akjimbejtni jøts mmigu'uk møj may x'adsowdi.

Sudso yikminamayait ja midseptøjk

⁴³ 'Nayi tɔ xnimadowdi ku jekyip yide'en yiknigajpxy: "Ja' mɔɔt mnamyayit pɔn mɔɔt mnamyigu'ukwə'añi, jɔts ja kawin'lijxim xjawit pɔn mɔɔt mnamyidsep'atyi."

⁴⁴ Yide'en ɔ nwa'añ: Jɔts xtsoktit xmiuyuj'attit ja mmidseptɔkti, ɔdyejti ja' pɔn mga'ɔdyejyidip, pudɔki ja mmigu'uk pɔn mjami'ajkidip mjamiɔtma'jtidip, ku'amidowidi meets ja' pɔn mjemnimaaɔyidip mdenimaaɔyidip, pɔn mjemduujnidip mdeduujnidip.

⁴⁵ Jade'en'ampy meets ja Dios Teety tsajpjɔtpit mja'bɔkidit jɔts ja m'u'nk'atidit; pɔ tum ja'axi tyikni'amp tyiknijap ja ɔyjaə'y ja ka'ɔyjaə'y, uk ku tyu'uy ja'ats ja nɔɔ tuu tkajxp.

⁴⁶ Kuts meets ja'ayi mɔɔt mnamyayi pɔn mee mmiuyuj'ajtɔp, ɔtits ja jade'en ñi'wya'ant, ti may'ajt meets ja jade'en myiktagumɔyɔp? Pɔn ja jade'en tkajajtp, yikugubajtpi paat ja jade'en ttuñ.

⁴⁷ Uk xkajpxpoo'kxtits ja'ayi pɔn jaty mmigu'uk'ajtɔp pɔn tu'ugyi ja mdsinaə'yin mɔɔt ñabyaədyi, ɔti ɔy'ajtin meets idɔ'ɔn jade'en mdumpy? Ti pɔn ja jade'en tkajajtp, pɔ nayide'enxi ja y'adɔ'ɔtsti pɔn Dios tka-janchja'widip.

⁴⁸ Yikxonts mjaə'y'attit ɔy wa'ats, nayide'en sam ja mgunuu'kxtyeety midɔp tsajpjɔtpy.

6

Ku ja Jesús tnanky'ixpikyɔ ja ɔdyu'unin

¹ ɔyim x'ejxtit, jɔts kidi mdsinaə'yin nugo xa'ɔdyɔki ñadyijyi ja mmigu'uk xuk'ejxti ɔy paat. Pɔni m'adɔ'ɔtswandipts jade'en, ni'wine'enints meets Dios Teety may'ajtin ja mgadagumɔyidit ja' midɔp tsajpjɔtpy.

² Paty ku xpudɔkidit ɔy pɔn ayooɔi jaa'y, kidits meets ja niduki'iyi jaa'y xamimadyakixy, kidi mee nayide'en m'adɔtsni sam ja jaa'dyi midɔp tsajpjɔtkjɔtp, midɔp jam nɔɔ'am tuu'am win'ɔɔ'ndip. Jade'en'ampy idɔ'ɔn ja jade'en y'adɔ'ɔtsti jɔts ja kajxa'aky pyidsɔ'ɔmdit, jade'eñits myay'ajtin ja tɔpɔkti.

³ Jɔts ku xmo'ot ɔy ti ja ayooɔi jaa'y, tunts idɔ'ɔn jade'en jɔts kidibaat ja xuknijawi pɔn me mjadyimjamɔmigu'uk'ajtpy,

⁴ ne'egi ɔy ku ka' pɔn xuknijawit ku jade'en xu'unt. Jɔts ja Dios Teety wa'ats ja t'ixy ti jaty me mdumpy ɔy ja pɔn xjagaduknijawi, mbaajtipts mets ja myay'ajtin ja'.

Ku ja Jesús tnanky'ixpikyɔ ja Dios'ajot'ajtin

⁵ Jɔts ku mdsapkajpxtit, kidi jade'en xundi sam ja jaa'y midɔp win'ɔɔ'ndip, ja' midɔp tsojktip jɔts ja tani Dios'ajot'attit jap tsajpjɔtkjɔtpy, uk ma jaa'y y'ejxidit jɔts ja jade'en yikajxa'aktit. Jade'eñits ja kɔ'ɔm ñadyukpikyidi ja myay'ajtindi.

⁶ Kuts ja Dios x'ajot'attit, tɔkidi mdɔjkjɔtpy, agɔ'ɔdi ja mdɔjk jɔts xminuu'kxa'aktit anadyu'uk'ampy ja mDios Teety, pɔ ixajpxi ja nayide'en jɔts y'ijxpy ja' ti jaty mee mdumpy, ɔy meets ja pɔn xjagaduknijawi.

⁷ Jɔts ku dɔ'ɔn jade'en ja Dios x'ajot'attit, kidi ja xkajpxjimbetti xkajpx'adɔjti midɔp xja'ukajpxti, kidi jade'en m'adɔtsnidi sam ja jaa'dyi pɔn Dios tkanija'widip, pɔn winmaadyip ku ja y'ɔɔmayidit kyajpxmayidit winets Dios ja myadowidit.

⁸ Kidits meets nayide'en m'adi'ich sam ja y'adɔ'ɔtstin; pɔ wa'atsxi Dios Teety ja ne'egi tnijadi pɔni ti meets idɔ'ɔn mga'ejtxip, pɔni ti meets idɔ'ɔn mdsɔjkpy, wa'ats ja tnija'wiñi yam meets ja xka'amidɔynim.

⁹ Paty idɔ'ɔn yide'en ja Dios x'ajot'atti:

Dios Teety tsajpjotpit,
kuuyi mets jadu'uk øy wə'ats.

¹⁰ Øyts ku xmimiñ ja mgutujk midi mdanitanaapy ja mjaay'y.

Yikjatts ya naxwiin nayide'en kə'ømdsojkingøjxp pəni sə xamidsøky nayide'en sam jap xuin tsajpjotpy.

¹¹ Møøkyts øøts ixyam ja ngaajyik n'uujkik midi øøts xka'ejtjxip.

¹² Maa'kxik øøts ja nga'øy'ajtin ti jaty øø tø nduñ, kumi tø øøts nayide'en nmaa'kxuky pən øøts xjemdump xedump.

¹³ Agidyujk øøts axajtujk øøts, kidi øøts xmajtstu'uty jøts kidi myajada'aky ja miku' yja'.

Pø metsxi ja' mgutujk midi ja mjaay'y mdanitanaapy, mets amuum mək'ajtin, jøts ja øy'ajtin xondaajkin midi xemikøjxp. Jade'en idø'on ja yjatt.

¹⁴ 'Pəni mmaa'kxuktip ja jaa'y pən mjemduujnidip mdeduujnidip, nayide'ents meets ja Dios Teety mmaa'kxukidit pən jap tsajpjotpy;

¹⁵ kuts pən xkamaa'kxuktit, ka'ats meets ja Dios Teety mbojkip'maa'kxidit.

Ku ja Jesús tnigajpxy ja amaay'ajtin

¹⁶ 'Jøts ku m'amaay'attit ku ø xkagugayidit xkagu'uugidit, kidi meets jot-may'øøgyim x'ejxnidi, kidi meets ja jade'en xyiknigaxi'iky sam y'adø'øtsti ja win'øø'mbi jaa'dyi; jade'en'ampy ja jade'en tundi jøts ja tuk'ejxti øy pən jaa'y ku ja jade'en y'amaay'atti. Jade'eñi ja tpaatti ja may'ajtin jøts ja ka'ap Dios yja' tpaajtidi.

¹⁷ Kuts mee m'amaay'att, nawyoogi nagaaxi, puj mween m'aaw,

¹⁸ jøts ja jaa'y kidi tnijawidi jøts kudam me m'amaay'aty. Ja Dios Teety ja tu'ugyi tnija'wip, pø ixajpxi mets ja møøt. Øy mets ti xuñ xkajpxy, ñija'wipts ja wa'ats; nay ja'ats mets ja may'ajtin mmo'ojip.

Ja kunuu'kxy jujky'ajtin midi jap tsajpjotpy

¹⁹ 'Kidi meen kidi pikta'aky ya naxwiin nugo x'abøjktøkidi ma ja'ambi jøø'kxpi tyikudigøy ja pikta'aky, jøts ma maa'tspi kadye'ebyi tyøkidi jøts ja tuki'iyi tyikpidsømguixy ja pikta'aky.

²⁰ Ne'egi øbyidsø'omp jade'en ku xjəp'ijxy'attit jøts xpaattit ja jujky'ajtin midi jap tsajpjotpy, midi ka'ap mwindigø'xiyidip.

²¹ Pəni ma xnajtsjawidi xpaatwa'andi ja jujky'ajtin, nay japts meets ja mwinmaa'ñ y'ity.

Ja øy jaj midi ja jaa'y tyikja'gyukip

²² Xjats ja Jesús yjaakwaañ:

—Jade'en idø'on yø mween n'ukpiktaajkint sam ja jain, yø'øts tyikujajtaajkip tyikudøø'kxaajkip amuum ja mne'kx mgojpk; kuts ja mween y'øy'aty, nayide'ents ja amuum tjaгыepy ja ne'kx ja kojpk, ka'ap ja ttuktuñ ja kya'øybi;

²³ kuts ja mween kya'øyi, nayide'ents ja tyikjaty ja ne'kx ja kojpk sam pən kube'ets kugoots y'ity. Pəni jamts ja jaj xmøødi jøts kuts ja xjaaktyimyik'ookni ku ja jade'en yjaaktyimyjajtni sam kyoots'ityin, ijaaktyimyjajnxpts ja' yam ja tø yjakoodsimy!

Ku ka' tuk'ojkyi majtskjøjp n'ajot'ajtin jade'en ja Dios jøts jade'en ja meen

²⁴ 'Ka' pən tumbi namajtsk wyindsøn tmiðuñ, ku ja jade'en ttu'unt, tu'ukts ja pyidsø'ømt pən ja wyinjawip, jøts ja yjadu'ukpi ja tkawinjawit, tu'uk ja t'ømyidu'unt jøts ja yjadu'ukpi ja tka'ømyidu'unt. Paty nayide'en ka' pyaat'aty; jøts nmidu'unin ja meen ixyadamts Dios njamidu'unma'andi, tu'ugyi Dios n'ajot'ajtin.

Ku ja Dios t'ejx'ity pøn jaty ja y'u'ngip y'una'jkip

²⁵ Ja'agøjxp øts idø'øn nwa'añ, jøts kidi xjotmay'atti pøni ti dø'øn mga'adyip m'luuktip, pøni ti dø'øn mdajuky'attip, ni ja mwet mnaamy xkajotmay'attit ti dø'øn mnadyaxoxidip. ¿Ti jade'en ja juiky'ajtin yikpaaty sami kaaky jii'kxyin? Pø ka'axi. ¿Jøts ja wet naamy mibaat ja t'uk'amibaat nayide'en pøni sa dø'øn ja ne'kx ja kojpk yikmøø'aty?

²⁶ Ejxti yø joon, ejxti yø jiyujk midi kakwidejttip jam tsajpwemp, ka'axi yø ñe'epti kyojti, ka'axi pyikta'aky yø tyikpidø'økti, ka'axi pyikta'aky yø tpøkjø'økti jøts tpikta'aktit jap tsa'jxjøtpy; øy yø jade'en yjagatundi, yik-møødyipts yjii'kxy yø, ja' yø tmøøpy pøn mee m'ajot'ajttip, ja Dios Teety pøn jap tsajpjøtpy. ¿Tits mee mdsow sa ja jiyujk jade'en ja yja' yikmo'odi!

²⁷ ¿Pøn kø'ømdsøky tyimy'uknankyojnip jagujkp metrin, øy ja mabaat jade'en tjadyimyjatsøky?

²⁸ ¿Jøts tiku xjotmay'atti ja wet ja xox? Ejxti yø ujts ejxti yø pijy midi yomp aayjøøjty ujtsjøøjty, ka'axi yø pyeetti kyojti, ka'axi yø ti ttundi;

²⁹ jøts øts idø'øn yam wamp, jøts ku ni ja rey Salomón jade'en ojts kyanadyaxøxyi ja xyox ti jaty ja jam wyinaty myøø'ajtpy, sam yø ujts sam yø pijy tmidsujkaxi'iky ja xyox.

³⁰ Pøni xyøjxpy tamts Dios jade'en ja ujts midi ja ixyam yomp ja aayjøøjty ja ujtsjøøjty, øy ja jabom wixøjpk yjayiknitsaañit, jtits mee mdsow sa ja ujts sa ja pijy jade'en yjaakykxøxy, meets kaja'gyukibidi meets ka'ajot'ajtpidi!

³¹ Paty kidi mmaydi mdajti, jøts kidi mwa'andi: “¿Ti dø'øn ngaa'yim njøø'kxim? uk ¿ti dø'øn n'uujkim? uk ¿ti dø'øn nwet'ajtim nnaamy'ajtim?”

³² Tum yø yjade'embi pikta'aky pyawinmaadyip ja jaa'y pøn Dios yja' tkaja'gyukiyidip; meetsts mjagyajpip ja Dios Teety midi jap tsajpjøtpy, ja' ja tnija'wip pøni ti mee mga'ejtxip.

³³ Ja'ats meets jawyeen mjotmay'atp sa xpaattit ja Dios kyutujk midi ja tyanitanaapy yjaa'y, jøts nayide'en ja y'ø'y'ajtin chuj'ajtin midi yja'ajtpy, mbaatpts meets ja yjade'embi pikta'aky tuki'iyi.

³⁴ Paty kidi nugo xjotmay'atti pøni ti me'emp kida'akp jabom wixøjpk, jabi kø'ømxji ja ñanky'ejxit ñankñijawiyit ja jabomit'ajtin.

7

Kidi pøn o ti xawindsø'ødyi

¹ Kidi pøn nugo o ti xapøky'ejxti, jøts Dios nayide'en mgapøky'ejxidit.

² Nayide'en meets Dios ja mdagubatiyit pøni sa meets ja mmigu'uk xuñ, nay ja'ats ja yik'awetsp.

³ ¿Sudsø dø'øn ja mmigu'uk pyøky x'ejxpaajtyi, jøts ja mja' ne'egi xka'ixy kudam ja jawaani møj?

⁴ Jøts, ¿sudsøts mets idø'øn namyikajxibim xkajpx'øyiwyaa'ñ yam mets ja mdsinaa'yin øy xkayikyø'ø'y?

⁵ ¡Meets win'øø'mbi ataadyi! yik'øyiidi jawyeen ja mga'øchinaa'yindi, winetnims ja mmigu'uk chinaa'yin xkajpx'øyi'yidit.

⁶ Jøts kidi nugo ajawi øy pøn xmo'odi midi ja Dios yja'ajip, kidi jade'en xundi sam uk'otigati nugo ajawi yikmøø'ø'y, ku ja nay ja'ayi m'uktanibidø'jkniyidit, jøts tsojk tatsu'utsa'am m'ukyik'ejxnidit. Jøts kidi nugo ajawi xukmadowdi Dios kyajpxy pøn tkaja'gyukidip, ku ja nugo t'uk'amnixeknidi t'uktsaachnixeknidi, taxi'iky nugo tjawidi.

Amidowdi pøktowdi, ix'a'adi kugajpxidi øy ma

⁷ 'Amidowdi pøktsowdi, jøts Dios mmo'ojidit; ıxa'adi pøni ti mga'ejtxidip, mdukpaađipts meets Dios ja'; uk ku mgugajpxidit muum, yik'awa'atspts øy pøn ja tøj'aaaw.

⁸ Ti ja kidyimy'ukyikmøøpy pøn t'amidoop pøn tpøktsoop, pyajtpy ja' pøn tigati t'ıxaapy; uk ku pøn kyajpxwidity kyugajpxi, øy muum yik'awa'ajtsıxyıpts ja tøj'aaaw ja øy pøn.

⁹ 'Ti wan meets ja ndejin winaagin pøn y'u'nk y'una'jk tmøøpy tsaa ku ja t'amidøy tsapkaaky?

¹⁰ ;Uk tmø'øy tsaa'ñ ku ja t'amidøy ajkx tsaa'y?

¹¹ Øyts mee mabaat mjagatyimy'øyjaa'y'atti, mjađtıpts ku xmo'odit m'u'nk m'una'jk midi øy tsuj pidsømp, įtıts Dios tyungip pø tsajpjøtpyxi ja', myo'opts ja' ja øy'ajtin ja tsuj'ajtin pøni pøn ja amido'oxıyıp!

¹² 'Jade'en idø'øn xun'ettit, meets idø'øn ja mmıgu'uk mwındsø'øgıp sam meets ja kø'øm xjatsøky ja nawyındsø'øgi; kumi yø' idø'øn ja Moısės kyutujk ñı'ane'empy, jøts nayıde'en wya'añ ja kugajpxtyøjka ja ñøktyi.

Ja mutsk tøj'aaaw

¹³ 'Jap idø'øn mdøkıdit ma ja tøj'aaaw kadanaxyım midi mutsk midi xu'uts. Møj ñıdøj'aaaw ja', møj ñıduu' ja' midi nøjkxp jap ayodaajkjøtpy manım idø'øn tuki'ıyı wyındıgøøgyıxy, may ja' pøn jap tøjkidıp;

¹⁴ jøts ja tøj'aaaw, jøts ja tuu' midi nøjkxp jap ma tsınaa'yın xemıkøjxp nbaajtındıt, mutsk ja' xu'uts ja', niwaani ja iıdyı pøn idø'øn ja tøjkidıp.

Pøni sa wyımbıdsımy øy ti, ja'ats tyıkwıngaxø'kp pøni sa ti y'øyi kya'øyi

¹⁵ 'Øyım mnay'ejx'etıdıt, øyım x'ejxtıt ja jaa'y pøn wın'øø'ndıp, ñadyıyıwya'andı jøts ku Dios yja' ja tkajpxıdı. Ñadyıyı ja mnınyıkjxyıdı amyuyj tsaachuyj, ja' y'aaawıdıp yjotıdıp ja kubety'ajtin, ja' wyınmaa'ñ'ajtıp ja kya'øybı.

¹⁶ 'Ja' meets ja mda'ejkxap pøni ti jaty tyundıp, pøni sa jaty y'adø'tstı; ka'axı uvı tsaa'm yıkwıduky jam kujp kıpkyøjxp, ni iıgi tsaa'm kyawınaky jam kujp'aaıyıpkyøjxp.

¹⁷ Paty idø'øn ja kipy midi øy, pøni øgyıpy ja', nayıde'ents tyøøm ja øy tyıkpıdsımy; mıdı'ıts ka'øy, nayıde'ents tyøøm ja tyıkwıngaxı'ıky ka'øy.

¹⁸ Ka'ap ja øgyıpy tyøøm tyıkwımbıdsımy ka'øy, ni ja ka'øgyıpy ka' tyøøm tyıkwıngaxø'økmi janch øy.

¹⁹ 'Ja kipy mıdı jaty ja tyøøm ka'øy, jøts kumi nayıde'en idø'øn ja kipy kya'øyi, yıkpootp ja' jøts ja ñıtø'oty jap jønıjøtpy.

²⁰ 'Jade'en meets idø'øn ja jaa'y x'ejxkapt, ja' ja tıgajpxp pøni ti jaty tyundıp pøni sa jaty y'adø'tstı.

Ku ka'ap pøn nugo ajawı tyøkit ma Dios ja kyutujk ja naxwıı'ñıt jaa'y ttanıanı

²¹ 'Pøni pøn jaty øts jade'en nugo xkajpxpatp, jøts nıka'ap ja Dios Teety yja' tpađuınyıdı, ja'ats ka' tpaattı ja Dios kyutujk.

²² 'Ku tpaatt ja'abi tiempi, ku yja'att ja xøøw jumøjt, may øts ja jaa'y xnøjmidıt: "Wındsøn'ajtım, wındsøn'ajtım, ja'ats øøts tø ngajpxwa'kxy mets ja mja', mets køjxp øøts ja jade'en tø nduı ku øøts ja mıku' tø ngajpxpıdsımy jøts øøts jaa'y ja ndukmajtstu'uty, jøts ku øøts ja mılagrı nayıde'en may'ojk tø nduı."

²³ Kuts ja jaa'y jade'en xnøjmit, winets n'adso'ot: "Ka'axi mee mā mōøt nnay'ijxy'atyi, jīwa'akti ya kidi øts ya xwin'ejxti, ku meets kawine'en tō mgawindiy'aty jøts xundi ja kya'øybi."

Majtsk jøøp ja pøch kyojpk

²⁴ Pøn ø xnimadoop jøts jade'en ttuñ sã nwa'añ, jade'en idø'øn ja' sam ja jaa'y midi wijy midi tyøjk tkojpx tsaagøjxp, tum tsaa ja amuum tyukojpk'ajtpy.

²⁵ Kuts ja tuu myiñ, jøts ja nøgom pyidi'jky, amuum ja nøø'aaw nøøjoojt kyombejty, jøts ja poj jadi'iñi tyikpojwimbetwani ja tøjck; jøts ja nigidi kyidaay, kumi tum tsaa ja jap wynaty amuum kyojpk'ajtpy.

²⁶ Pønts ø xkamimadoop ku ka'ap jade'en ttuñ sã nwa'añ, jade'en idø'øn ja' sam ja jaa'y midi tkaja'gyukip o ti, midi ja tyøjk ojts tkøjy jam pu'jotp.

²⁷ Ku ja tuu ojts myiñ, jøts ja nøø'aaw nøøjoojt kyøømy, jøts ja poj jadi'iñi tyikpojwimbetjni ja tøjck, ojts ja tøjck kyiday. ¡Adso'jkibim ja ojts yjanchkujeti!

²⁸ Ku dø'øn ja nwindson'ajtim Jesús kyajpx'abajtyi'iñ jøts ja jaa'y janchñigyumaap tjawidøø ja xpxøjkin;

²⁹ pø jade'enxi ja yik'ixpikyidi sam o pøn møk'ampy kutujk tjagyepy, ka'ap ja jade'en yik'ixpikyidi sam ja kajpxwejpitøjkti.

8

Ku ja Jesús tyiktsøøjky ja jaa'y pyu'uts

¹ Ku Jesús chøø'n jam kojpkøjxp jøts kyidaajky, may jaa'y ja ojts pyadsøøñi.

² Xjats jaa'y ja ojts tu'uk wingon ñinijxxyi, møj pu'uts pa'am ja pøjkip, ja'ats idø'øn jam ojts ñagyuxendya'agyi jam nwindson'ajtim Jesús wyingujkp, jøts ja tnimaay:

—Teety, mmøøt'ajtpy ja møk'ajtin jøts xyiktso'okt, yiktsokts øts mdsojck'ajtingøjxp.

³ Xjats ja ojts ja'ayi tkønixajy, yide'en ja tnimaay:

—Ndsøky'ajtpy øts jøts mdso'okt. Tsokni.

Ja'ayi ja jade'en wyaañ, jøts ja pu'uts pøjkibi jatyi ñajxy ja pya'am, jatyi tyaagyijxy ja pyu'uts.

⁴ Jøts nwindson'ajtim ja ojts ñi'i'mxyi:

—Øyim x'ext, kidi pøn xukmadø; øy ja'ayi xninøjkxt ja teety ja', ja'ayi m'atspaatp jøts ja myøxy ja'ayi xpikta'akt midi ja Moisés ojts tni'ane'emy, jøts ja jaa'y t'ejxtit jøts ku tō mdsø'øky.

Ku ja Jesús tyiktsøøjky ja romanit soldadi tyumbi

⁵ Xjats ku ja Jesús kyajptøjkiyi'iñ mā ja kajp jam txøøwi Capernaum, jamts ja tu'uk ñimejni ja romanit jaa'y midi wynaty tniwindsøn'ajtp nidukpiky ja soldadidi, ja'ats ja møk'ampy nimajyøø,

⁶ yide'en ja wyaañ:

—Teety, ixajp øts tu'uk ndumbi pa'am tmi'go'kni ndøjkjøtpy, jadi'iñi tō myujkni xyujkni, yjanchkupijky idø'øn ja jap ja jajyi tøøyi.

⁷ Winets ja nwindson'ajtim Jesús ja tnimaay:

—Øy øts ja n'atsyiktso'okt.

⁸ Jøts ja jaa'y yide'en y'adsowimbijty midi idø'øn twindsøn'ajtp nidukpiky ja soldadidi:

—Teety, ka'ap ø xpaat'aty jøts mets mdøkit ndøjkjøtpy; ana'am ja'ayi jøts cho'okt øts ja ndumbi.

⁹ Nayide'en øts ane'emy n'ity, nay jats øts ndumbimi midi ø n'ana'amp. Ku øts nidu'ugin nnøjmidi, nøjkx, nøjkpts ja jatyi; uk nnøjmits øts jadu'uk jøts

mye'ent, mempts ja jaty; uk nduktunwa'añ øts ja ndumbi øy ti pøn øts jadi'iñi ñyiktumpy ndøjkøtpy, tyumpts ja' pøni sa øts ja n'ane'emy.

¹⁰ Xjats ku Jesús ja jade'en tmadøøy, ñigyumaap ja tjä'wiyii'ñ, jøts ja tnimaay pøn jaty ja jam wyinaty payø'øyyiip:

—Janch øts idø'øn nwa'añ, ni Israelit jaa'y øts ya ma jade'en ngapaadynim sam ya'at jaa'y tmøødin ja janchja'win møk'ampy.

¹¹ Øts idø'øn wamp jøts ku may nayjade'embi jaa'y øy maðsoo choondit, jøts møøt jujky'ajtpi y'ixä'aktit ja Abraham, ja Isaac jøts ja Jacob; yik'ejxti jap ma Dios kyutujk ttanitani ja yjaa'y;

¹² Jøts pøn japaat'ajtidip jøts ja yjap'attit ma Dios kyutujk ttanitani ja yjaa'y, yikajxpidsø'ømdipts ja jap jøts ñøjkxtit ma kube'ets kugoots, jøts ja jap chabaawidettit y'amdøtskaattit chaachtøtskaattit.

¹³ Jøts idø'øn ja nwindson'ajtim Jesús tnimaay ja jaa'y midi tnäwindsøn'ajtp tukpiky ja soldadidi:

—Nøjkxni mdøjkwindum, jøts sa tø xjanchjaw i yiktu'umpts ja jade'en.

Jøts ja tumbi nay jaty; myøkpiky.

Ku ja Jesús tyiktsøjky ja Pedro tyaaqmø'jt

¹⁴ Winets ja Jesús ojts ñijky Pedro tyøjkwindum, jøts ja jam ojts tpaajti ja tyaaqmø'jt, jøts kudam ja møk jømba'am ja jam tmigo'kni.

¹⁵ Ojts ja tnixaji kyø'køjxp, jøts jømba'am ja ojts jaty; ñiwa'achiyi; ojts ja jaty; wya'kuki jøts ja nay jaty; wyindsø'jkidyøjkiyidøø.

Ku ja Jesús tyiktsøjky ja maabyamaq'y

¹⁶ Xjats ku kyoodsiyi'ñ, jøts ja nwindson'ajtim Jesús may'ampy ja jaa'y yiktanimiñi midi ja miku' wyinaty tø tyatøkiyidi; jøts ja ojts ja'ayi tuk'aagwyi tmigajpxy, ja'ayits ja tyuktapidsøøm ja maamyiku' jøts ja tyikmøkøpøkiyxi niduki'iyi ja pamaq'y.

¹⁷ Jade'en'ampy idø'øn ja jade'en yjajty, jøts idø'øn ja jade'en tyimyjaty sa wyinaty tø tnigajpxy ja kugajpxy Isaias, ku ja yide'en wyaañ: “Ja' tuki'iyi tmidanaagyøjxp adøm n'ayo'on, nay ja' tmidanaapy adøm ja nbøjkin n'aa'nin.”

Ja jaa'y midi wyinaty tpawidewamp ja Jesús

¹⁸ Xjats ku ja nwindson'ajtim Jesús ojts t'ixy ku mayjaa'y ja yjanchtamukniyi, winets ja ojts wya'añ jøts ttanaxtit ja nøø jøts ñøjkxtit jam jaduktamajñ.

¹⁹ Winets tu'uk ja kajpxwejp; myiñ ma ja Jesús jam wyinaty, jøts ja Jesús ojts yiknøjmi:

—Windsøn, tsoomp øts, nbanøjkxp mets øy maðsoo pøni ma me mniikxy.

²⁰ Jøts ja nwindson'ajtim Jesús y'adsøøy, yide'en ja wyaañ:

—Ne'egi jaa ja waa'jx yjut, ne'egi jaa ja joon pya'an; øtsts, niti ø xka'ejxti øyik øts idø'øn ma n'øøni'int.

²¹ Xjats ja jaa'y jadu'uk wyami midi ja wyinaty pyabøjkpi'ajtpy, yide'en ja ñimaajyøø:

—Windsøn'ajtim, tniikxy øts jawyeen ja ndeety t'atsyiknaøøki.

²² Winets ja Jesús y'adsøøy jøts ja wyaañ:

—Møødik øts, majtstu'ut yø oo'kpi, wan ja tyikpidø'økti ja myi'oo'kpi pøn y'anmija'win jajuky; tø tyik'oo'knidi.

Ku ja Jesús tyiknajxy ja møk poj jøts ku ja tyik'amøkiy'ñ ja mejy

²³ Jøts ja nwindson'ajtim Jesús tyøjkiñaa jam barkijotp møøt ja pyabøjkpitøjk.

24 Winets ja poj mək'ampy yjantyimyiiñ jam mejyjtöp, jadi'iñi ja nөө yjanchtojmjə'kni jəts jap barkijətpy yjanch'ayə'əyini. Maəpts ja nwindson'ajtim Jesús wyinaty.

25 Winets pyabəjkpitəjk ja ojts yuxyiyi, yide'en ja ojts ñii'mxyiyi:

—jWindsə'n'ajtim, ejx əə nnəjəə'kxni, yiknitsok əəts! iPə nədəjkij'adəjtsnəmpt!

26 Jəts ja t'adsəy yide'en:

—ǰTi mdsə'jkidip ku mdsə'əgidi? jJanch yii'nim meets ja janchja'win xməə'taty!

Xjats ja tyanaagyukiyii'ñ, jəts ja ojts tnəjmi ja poj jəts wan tnaxy jəts ja mejy kya'uk'adətsnit; jəts idə'on ja jadi'iñi myəəñ, nayide'en jotkujk'atyim tyaañ sam idə'on ku ja et kyapəjy.

27 Jəts ñigyumaap ja tyimyja'widəə, nəmdip ja':

—ǰTi pəñ jaa'y yə jade'en, mimadoojipaət poj yə', mimadoojipaət mejy yə'?

Ja Gadarit jaa'y pəñ wyinaty ja miku' tə tyatəkiyi

28 Xjats ku ja nwindson'ajtim Jesús yja'jty jaduktamajñ mejy'agə'əom, jamts ñaxwimbidsəmdəə Gadara y'etjətpi, winets jaa'y namajtsk pyidsəmdəə jam kamsəntijətp mə oo'kpə ñaxəkidi, jəts ja ojts tñimendi ja nwindson'ajtim Jesús. Miku' ja wyinaty tə tyatəkiyidi tum jade'en ja namajtskti, janch tyimgyubetyts idə'on ja'adi, ka'ap idə'on ja jam əy pəñ tkunaxi jam tuu'am.

29 Jəts ja yjanchabaabinaxwə'aktəə:

—ǰTi əə xanibəjkip, ti tsepxik adəm njagyejpyim, mets Jesús, mets Dios U'nk? ǰJa' mets yə tə xnimiñ jəts əəts ixymyi xtyimyk'ayo'ombəatwəngəjy?

30 Nay jamyts idə'on wingon wyinaty y'ojkwidəjtmiđi maagyuch;

31 winets ja miku' nuu'kxaajkingəjxp t'amidəəəə ja Jesús, yide'en ja tñimaadyəə:

—Pəni xyikpidsəmwəmp əəts, wants əəts yə' kuch ttətəki.

32 Xjats ja Jesús wyaəñ, yide'en ja tñimaay:

—Nəjkxti.

Jəts idə'on ja miku' jade'en pyidsəmdəə, ojts tmajtstu'utti ja jaa'y jəts ja maagyuch ja ttəjkidyəə; winets ja kuch niduki'iyi yjanchnabyagunaxidəə jap jaa'jətpy jəts ñaxkidəktəə jap nəəjətpy, jəts ja ñəəjəə'kxkəjxtəə.

33 Jəts ja jaa'y midī wyinaty kuch'ejxtip, ojts ja kya'akti, janch tsə'jkidip ja', jəts ku ja jam kajpjətp yja'ttəə, jamts ja tuki'iyi tñimadyəkəjxtəə sə wyinaty ja jaa'y tə yjatti kyubatti pəñ ja miku' wyinaty tə y'uktatəkiyidi.

34 Winets ja jaa'y niduki'iyi chə'ondəə pəñ jaty jam wyinaty kajpjətpi, jəts ja ojts nəjkxti mə ja Jesús jam wyinaty; kuuyits ja ojts t'ejxti, jəts ja tñimaadyəə mək'ampy jəts ja jam tyimbyidsə'əomt ja' y'etjətpi.

9

Ku ja Jesús tyiktsəəjkjy ja kəxujxpī pakxujxpī

1 Xjats ja Jesús tyəjkiiyi'ñ barkijətp, jəts ja ojts ñijky jam jaduktamajñ, ojts ja ñəənaxy jəts ja yja'jty kyajpkəjxp.

2 Jamts jaa'y ja ojts tu'uk yiktaninijky midī kəxujxp pakxujxp, ki'iy ja jam ojts tyiknəjkxti. Jəts ku də'on ja nwindson'ajtim Jesús ojts jade'en t'ixy ja jaa'y jəts kudam ja mək'ampy ja janchja'win tjanchməədidī, jəts ja pamaə'y ja tñimaay:

—Kidi u'nk nugo mdyimyjətmay'əəky; nbəjkpimee'kxpy mets.

3 Winets winəəgin ja kajpxwejpitəjk wyinmaadyəə jəts ja wyəndəə: “Dios yə jade'en kya'əmyigajpxpy, pə nugo jaa'yxi yə'.”

⁴ Jøts kumi wə'ats ja nwindson'ajtim Jesús ja tnijawí sá jaty ja wyinmaydi, jøts ja tniimaay:

—¿Tigøjxp ku jade'en ka'øwyinmaa'ñ xjagyapti?

⁵ ¿Ja ti ne'egi jawaani jajtni, kuts yø pa'amjaa'y nnøjmit: “Nmee'kxpy øts yø mbøky”, uk ku nnøjmit: “Wə'kuki, pøkmukni yø mmaabajt jøts nøjxni mdigam”?

⁶ Ixyamnim meets inet x'uk'ext mabaat øts idø'øn ja møk'ajtin nmøø'taty ja naẏwiiñ jøts ø nmaa'kxt ja pøky.

Xjats ja tniimaay ja køxujxpi pakxujxpi:

—Pidø'kni wə'kukiñi, wejtsjø'øk yø mmaabajt jøts mnøjxnit mdigam.

⁷ Winets ja pamaa'y jatyí wya'kukiyí'ñ jøts ja ojts ñijxxy jam tyøjkwindum.

⁸ Kuts ja mayjaa'y ja ojts jade'en t'ejxti, xjats ja yjancho'jkiñidi, winets ja tjə'myajtsi ja Dios jøts ja tmøja'widøø tkunuu'kxyja'widøø, ja'agøjxp ku ja jade'en t'ejxti jøts kudam ja Dios Teety myøk'ajtin tmøø'tajtti, pø niñugo jaa'yxi ja ttejti.

Ku ja Jesús tpawaay ja Mateo

⁹ Xjats ja nwindson'ajtim Jesús jam ojts chøøñ, jøts ja ojts t'ejxpaaty tu'uk ja jaa'y pøn txøøw'ajtp Mateo, jam ja wyinaty chøøni ma ja yikugubajtpi y'ixa'akti, jøts idø'øn ja tniimaay:

—Mada'ak, møøt widetk øts.

Winets ja Mateo tyanaagyukiyí'ñ, jøts ja ojts pyadsøøñiyi.

¹⁰ Ku wyinaty ja nwindson'ajtim Jesús jam kyay Mateo tyøjkjotp, winets ja mayjaa'y jam mendøø pøn yikugubajtip, møøt ja'adi pøn ka'øy jaa'y yiktejtíp. Ja'ats idø'øn ojts yjam'atti, jøts ja tmøø'tixaktøø jam kaadyaajk windum møøt ja Jesús jøts ja pyabøjkpitøjkti.

¹¹ Ja'ayi ja fariseotøjk ja ojts jade'en t'ejxti, xjats ja nwindson'ajtim Jesús pyabøjkpitøjk yik'amidoodøø:

—¿Tigøjxp ku yø mwindsøn tmøøtkay yø yikugubajtpitøjkti møøt yø kawindiyyaa'dyi?

¹² Ojts ja nwindson'ajtim Jesús ja tmadøy, xjats ja kø'øm tniimaay ja fariseotøjk:

—Pøn møk pøn kasajajtpi, ¿ti ja tyikwə'andit ja tsøøyibi? Ja' ja ttsojktíp pøn pøjkidíp.

¹³ Kidi ja'ajip ø tø nnimiñ pøn øy pøn wə'atsti, ja' ø tø nnimiñ pøn pøkyundíp jøts ja chinaa'yin tyiktigatstít. Nøjxkti jiwə'akti, pamaadyi padajti pøni ti dø'øn tyijpy ya'at Dios kyajpxy: “Ja' ø ndsøjkpy jøts xmøø'tattit ja pa'ayo'owin ja ayo'ejxin, jøts ne'egi kidi xyik'ookti yø jiyujk yø tsakaa midí jaty myojxtíp.”

Ku ja Jesús yiktíbyijky tigøjxp ku ja kya'ayuu'atti

¹⁴ Winets ja Juan Bautista tyumbi myendøø ma ja nwindson'ajtim Jesús jam wyinaty, jøts ja ojts tyiktøwdi, yide'en ja tniimaadyøø:

—¿Tigøjxp ku øø n'amaay'aty møøt ja fariseotøjkti, ngakay nga'uuky øøts jøts mets yø mbabøjkpitøjk jaayi yjanchkaydi yjancho'økxti, niwine'en kya'amaay'atti?

¹⁵ Xjats ja nwindson'ajtim Jesús y'adsøøy jøts ja tniimaay:

—¿Ma meets jade'en tø x'uknijawí jøts ku tø'øxñigaabyi tø'øxñi'ukpi winet y'amaay'atti winet kyakaydi kya'uukti ku ja jemyaa'y jamni? Abikñimts ja tiempi tyimya'tmit ku ja jemyaa'y wyinaty kya'uk'ejtni ku ja jam wyinaty tø cho'oni, jaanímts idø'øn tiy pøn kya'ukaañit kya'uk'uknit; jaanim idø'øn ja y'amaay'attit.

16 'Ka'axi pøn wyetpach tta'agi:yi jemwyet midi tyimyjemñim, ku ja jade'en yiktu'unt jøts kumi mujkpi ja jemwyet jøts ja tjaaktyimgyøø'tsni ja wetpach, jaaktyimyiwenip ja kyøøts'ajtn ja'.

17 Jøts nayide'en ka' y'oyi jøts yikpikta'akt ja vino jap po'dukjøtpty midi namii'kxñim; ku ja jade'en ndu'unint, takøø'tspts ja po' jøts jade'en nugo wyindigøy, windigøøpy ja po' jøts nayide'en ja vino. Paty ja vino midi namii'kxñim nda'ada'amyin ja jembyo'ak jøts jade'en nimidi kyawindigøø'ty.

Ja Jairo ñøøx, jøts ja tøøxyøjk pøn ja Jesús ja wyet ojts ttojni

18 Exam idø'øn ja nwindson'ajtim Jesús jade'en wyinaty wya'añ, ku yja'jty tu'uk ja windsøn pøn tñigubajk'ajtip ja israelit jaa'y, jøts ja ojts ñagyuxendya'agyi:yi ja' wyingujkp, jøts ja ñimaajyøø:

—Tø øts nnøøxu'nk y'øøky tyimyi'ixanim; kudsik mets inet ja'ayi mme'ent jøts waani xkønixajt, jujkpyøjkp inet ja jadigojk.

19 Xjats ja nwindson'ajtim Jesús wya'kukiyii'ñ jøts ja ojts tmøødi ja jaa'y møøt ja pyabøjkpitøjk.

20 Winets tu'uk ja tøøxyøjk myiññ jam nwindson'ajtim Jesús yjixkø'øm jøts wyet pa' ja ojts yiktøñ. Myakmajtsk jumøjtíp idø'øn ja wyinaty tø pyaajtni:yi ja taxnaxyi jøts ja jadine'en tmi'ity;

21 jøts kumi yide'en idø'øn ja wyinmay: “Ja'ayik øts ja wyet inet yø ndojnit jøts øts inet ndso'okt.”

22 Jøts ja nwindson'ajtim Jesús ojts wya'kjimbity, ojts ja tyimyi'ixy ja tøøxyøjk jøts ja tñimaay:

—Kidi u'nk mdsø'øgi; ja'agøjxp tø mdsø'øky ku ø tø xjanchjawi.

Jøts idø'øn ja nay jatyi myøkpjiky.

23 Kuts ja nwindson'ajtim Jesús yja'jty jam israelit windsøn tyøjkwindum, jøts ojts t'ixy ku ja xuxpi ixapnidi, ja oo'kpi ja yikpidø'økwandip, jøts ja mayjaa'y xem yam yjanchya'a'xti,

24 xjats ja tñimaay:

—Pidsømdi; ka'ap yø kiixyu'nk y'øøgyi, maap yø ja'ayi.

Jøts ja yjanchyikniixjky ku dø'øn ja jade'en wyaañ.

25 Kuts ja tyikpidsømgjxy ja mayjaa'y, winets ja tyøjkjyii'ñ jøts ja ojts kyø'køjxp tmach ja kiixyu'nk, jøts ja nay jatyi pyidi'jky.

26 Jøts idø'øn ja jam jade'en øy mā yiknija'wiyii'ñ ja kajpxy ja ayuujk midi wyinaty tø tyuñi.

Ku ja Jesús tyikwin'ejxwa'kxy ja winap jaa'y

27 Kuts ja nwindson'ajtim Jesús jam chøø'ñ, winets ja winap jaa'y namajtsk tuu'ajy pyadso'oniyi, møk ja yjanchnømdi:

—i Rey David me m'ap'ajtip, ayø'ejxk øøts!

28 Kuts ja Jesús tyøjkjyii'ñ jap tøjktøtpty, winets ja namajtskpi winap jaa'y ñimejni, xjats ja tñimaay jøts ja ttiibyijky:

—¿Mwandip idø'øn amumjoojt jøts ku øts yø yjade'emb: xma'aty?

Jøts ja ñømdøø:

—Windsøn'ajtim, wamp øøts idø'øn jade'en.

29 Winets ja nwindson'ajtim Jesús ja mimøj twingudo'oniyii'ñ, yide'en ja tñimaay:

—Wan idø'øn jade'en tjaty pøni mabaat mee nayide'en ja mjanchja'win xmøøt'aty.

30 Jøts wyeen ja øy tyandøø, ojts ja wyin'ejxpøkti. Jøts ja nwindson'ajtim Jesús ja møkta'aky tñimaay:

—Øyim mnay'ejxidit jøts kidi pøn xuknijawidi.

³¹ Jøts ja'ayi ja jap ñibi yidsømdøø, ojts ja tñimadya'køxti sã nwindson'ajtim Jesús ja wyinaty tø yikmøkpi kyidi, ojts ja tñimadya'akti øy maðsoo wine'enin ja et jam.

Ku ja Jesús tyikajpxpiky ja uum jaa'y

³² Kuts ja jam wyinaty wya'kpidsømdi, winets winaagin ja jaa'y ttanimendi ja nwindson'ajtim Jesús tu'uk uum jaa'y, miku' idø'on ja wyinaty mi'ejtijip, ja'ats ja ka'ukyikajpxniyip.

³³ Ja'ayits ja nwindson'ajtim Jesús tyikpidsimy ja miku', jøts ja uum jaa'y jaty jadigojk y'awijy. Jøts idø'on ja mayjaa'y ñigyumaap yjajtøø, yide'en ja wyandøø:

—Ka'aním yã Israel pøn jade'en t'ixxñim sam icyam yik'ixyjin.

³⁴ Ja fariseotøjkti yide'en ja wyamidi:

—Jade'en'ampy yø jaa'y tyikpidsimy yø miku' ku yø nayi' wyindsøn myøk'ajtin tyiktuujnyi.

Ku ja Jesús t'ayo'ixy ja mayjaa'y

³⁵ Widejtp idø'on ja nwindson'ajtim Jesús øy maðsoo wan tkamjotpi wan tkajpjotpi, jøts ja yik'ixpiky ma jaty ja tpaaty ja tsaptøjk kajp kajp. Ja Dios y'øgyajpxy y'ømyadya'aky ja kyajpxwã'kxip sã ttanitanit ja yjaa'y, jøts ja tyiknaxy øy ti pa'am, øy ti pøjkin aa'nin.

³⁶ Ku ja ojts t'ixy ja mayjaa'y, jøts ja ojts t'ayo'ixy ku ja tsaach'ixyimdi, janchjotmay'oo'ktip ja', nugo ja jadi'iñi myondi tyukti, jade'en ja yjawi yjajtnidi sam borreek ñi'ejxpi kya'ejtxiyidi.

³⁷ Xjats ja tñimaay ja pyabøjkpitøjk:

—Janch øts idø'on nwa'añ, ku ja jaa'y may pøn tnijawiwyaandip ja Dios yja', jats ka'ejtíp pøn ttukmadowidip.

³⁸ Paty x'amido'odit ja Dios Teety jøts ja tyumbi ttanigaxt ja'abi jaa'y.

10

Ku ja Jesús twiwijch nimakmajtsk pøn wyinaty kyudanaabyi'atwampy

¹ Xjats ja nwindson'ajtim Jesús tyaxmujky ja pyabøjkpitøjk midí nimakmajtskti, jøts myøk'ajtin ja ojts tmø'øy, ja'ats ja ttuktabsø'ømdit ja miku' jøts ja tyikmøk'øktit pøn øy tigati pa'am pøjkidip.

² Yide'en idø'on ja nimakmajtskpi pabøjkpitøjk ja xyøøwdi: tu'uk Simón txøøwi, nayi yiktejp ja Pedro, jøts ja y'uch txøøwi Andrés; Jacobo møøt ja y'uchmi midí txøøw'ajtp Juan, ja Zebedeo y'unajlk;

³ Felipe, Bartolomé, Tomás, jøts Mateo ja yikugabajtpi; jøts ja Alfeo myajnk pøn txøøw'ajtp Jacobo; jøts Lebeo pøn nayi yiktejp Tadeo;

⁴ jøts jadu'uk Simón cananista; jøts ja Judas Iscariote pøn tnankmyajtsip ja nwindson'ajtim Jesús.

Ku ja Jesús tkexy ja pyabøjkpitøjk kajpxwã'kxpi

⁵ Yide'en ja nwindson'ajtim Jesús t'ane'emy ja ñimakmajtskpi pabøjkpitøjk ku ja ojts tkajxtsøø'ñ:

—Kidi jam etjotp mnøjkxti ma chøøniði pøn ka'israelit jaa'dyi, ka'abaat mnøjkxtit ma jaty ja kajp jam Samaria;

⁶ ja'ayi mee mninøjkxp midí yã Israelit na'xjøøjtý, ja' idø'on ejtnidip sam ja borreek tyigøydi.

⁷ Nøjkk xkajpxwã'kxti jøts ku Dios kyutujk wyingøñ midí ja tyanitanapa yjaa'y.

⁸ Yiktso'okti pøn pøjkip ja møk pu'uts pa'am, jøts pøn tigati jajtīdip, yikju-kpyøkti ja oo'kpīdi, jøts kajpxpīdsømdi ja miku' jøts tmajtstu'utt ja jaa'y. Meets idø'on yø yjade'embī møk'ajtin tø mniyikmøøy; nayide'ents xyik-tunkpaattit sam tø myikmo'odi.

⁹ Kidi ti meēn xkondi, ni oori, ni plati, ni cobre,

¹⁰ ni pejnbaat xkawetstī. Mnimdajk niti xkako'ondit, tu'ugyi mwet xminøjkxtī midī ixa mwet'ajttip; tumbixi mnøjkxti, mgaabyaatp meets.

¹¹ 'Ku øy mā mja'attit wan tkamjotpi wan tkajpjotpi, jamts x'ixa'adit tu'uk ja jaa'y midī nijawi, midī tsojpk ja Dios yja', ja' tyøjkjotp mja'da'aktit kunim mdsøondit jam kajpjotp, winetnimts jam mbīdsø'ømdit.

¹² Ku mdøkidit tøjkjøtpy, kajpxpoo'kxti ja jaa'y.

¹³ Pøni m'adsojīdip ja jaa'y, øy'ajtp; kuts ja ka' t'adsojimbity, majtstu'uttits ja'.

¹⁴ Jøts ku pøn mgagupøkidit, uk ka' paat tmadowa'andi pøni sa me mjawa'añ, pīdsømdits jam ja'abi tøjkjotp uk ja'abi kajp. Winapti ja pu'ux midī jam mdekyøjxp, jøts jade'eñi xuk'ejxtit jøts ku jade'eñi tø mnañiwa'achidi.

¹⁵ Øts idø'on wamp ku wyinaty yja'aty ja tiidyu'unin, ne'egi kajaa yø yjade'embī jaa'y ja ayo'on tyimbyaattit, jøts nigīdi jade'en y'ayo'ombaatit ne'egi ja kawīdiy jaa'dyi pøn jam tsinaadyøø jam Sodoma jøts jam Gomorra.

Ku ja yiknigajpxy jøts ku ja pabøjkpitøjk yikmatswa'andit

¹⁶ 'Øyim xmado'odit jøts xnijawīdit jøts ku meets jam nguexy mā ka'ap nugo ajawi øy pøn tyøki! Mjadyimñay'ejx'etidip, yikxonim mnañiwijy'atīdit, kidi øy ti xtsepøkti, yujy kø'øm mnabyikta'agīdit.

¹⁷ Øyim x'ejxtit, øyxi dø'on jaa'y mgøyakīdit mā kudunktøjk jamdi, jøts myikwinwoptit myikjøpwoptit jam tsaptøjkjotp.

¹⁸ Myiknøjkxi paat meets ja jaa'y jam mā jaty ja møj windsøn yikutukti, ja'agøjxp ku øts nja' xpabøjkīdi; jats idø'on ja ñībīdsømit jøts meets ja xuk-mado'ot pøni sa øts idø'on ja n'ixpøjkin, ja'abaat meets xukmado'odit pøn ka'israelit jaa'dyi.

¹⁹ Kuts myikøyaktit jam kudunk wyīdumdi, kidi xkumayjawīdi, kidi meets ja xpamaañi xpadajni pøni ti dø'on jam mgajpxtip, uk pøni sa dø'on jam mwa'andit; ja'ayi ja y'ukja'att pøni juuni dø'on mgajpxtit, nagyø'ømts Dios mmo'ojīdit ja ayuujk pøni sa dø'on mwa'andit.

²⁰ Kidi meedsipxi ja mmiwinmaa'nbyaatp ku mee mgajpxt, pø ja Dios Teetyxi y'Espīritu Santo myikajpxīdip.

²¹ 'Jade'en nøjx jaty kyubety pøni pøn øts nja' wyinaty xkupøjkiyīp, jøts ja myīgu'uk paat ja tyamidsepøkit jøts ja tñankyik'ooogit, jøts ja u'nkteety jøts ja u'nktaak nayide'en ttumīdit ja y'una'jk nay ja'agøjxp ku øts nja' janchpabøjkīdi nidu'ugin; jøts ja u'nk una'jk nayide'ents ttumīdit ja tyeety tyaak, tyik'ooktit paat ja'adi.

²² May jaa'y mee mmi'akiyīp mmijotma'adiyīp ja'agøjxp ku meets nja' xpabøjkiyī; pønts tmīdanaapy øy wine'en paat, ja yjade'embī jaa'yts idø'on nitso'ok'atp.

²³ Ku myiktabawīdetit ja kipy ja tsaa, kaknøjkxtits mā kajp jam jadu'uk; øts idø'on wamp, jøts ku øts wyinaty jawyeen tø nmeni yamnim meets ja kajp xka'ayøø'y'abīdsømdi midī jaty ja israelit jaa'y kyajp'ajttip.

²⁴ 'Ka' pøn ixpøjkpi tjaaktyimyjīnaxy ja mya'estri, jøts ni ja tumbi tkajīnaxy ja wyīndsøn.

²⁵ Tyajotkujk'attip idø'øn ja xɔpøjkpi, janch møj idø'øn ja wyinaty ku yja'attit jade'en sam ja mya'estri, jøts ja tumbi sam ja wyindsønin. Pøni miku'dam ø nyiktijy ku mee nniwindsøn'aty, çtits meets mdsow, ti meets jade'en mjaakayiktejp?

Ja' midi yiktsø'øgip

²⁶ 'Paty ka' pøn xtsø'øgidit. Ka'axi ti kyanigaxi'iky øy pøn ti tjadyimy'ama'atsk'aty, ka'ats ja kyayiknijawi øy pøn ti tjadyimyjayu'uch'ity.

²⁷ Pøni ti mee nda'agajpxip, tukmadowdits meets ja jaa'y ja'; nigajpxtits ja yixkon pøni mā x'a'ejxidi myikmadowdi ømyadsowi.

²⁸ Kidi yikjaa'y'oo'kpi xtsø'øgidi, pø ka'axi anmija'win ja tjadyimyik'ookti; ja Dios ja' idø'øn tiy ne'egi mdsø'øgidip, pø ja'axi møk'ajtjin tjagyajp jøts ja jaa'y tyikwindigøy møøt ja y'anmija'win jap ayodaajkjøtpy.

²⁹ 'O dø'øn ja joon mabaat kyidyimchobaaty, nayide'en idø'øn ja Dios Teety ja t'ejx'ity. Ni tu'ugin ja kyawindigøy pøni ka'ap ja kø'øm tyikutuky.

³⁰ Tu'uk tu'uk meets mwaay machøy y'ity.

³¹ Kidi mdsø'øgidi, ne'egi jawaani jinaxy mee mnibayø'øyi, çti ti meets mdsow, ti sa ja mayjoon chobaaty?

Pøn tmøjpiktaktip ja Jesucristo jam mayjaa'y agujkp

³² 'Pøn jaty ø xpukajpxip, pøn wamp mayjaa'yjøøjty jøts ku øts ja xpabiky, nayide'ents øts ja møk nnitaniit jam Dios Teety wyingujkp pøn jap tsajpjøtpy.

³³ Pønts ø xkabukajpxip, pøn wamp mayjaa'yjøøjty jøts ku øts ja ka' xpabiky, nayide'ents øts ja niwine'enin nga'ejxjimbett, niwine'enin nganitanit jam Dios Teety wyingujkp.

Jesús køjxp ja jaa'y ñawya'kxyidi

³⁴ Kidi mee mwani jøts ku øts jaa'y kuwani xtyimyjatytajotkujk'attit, pø may idø'øn ja nøjxx kyanachokidit øts køjxp.

³⁵ Jade'en ja tpaatni jøts jaa'y ja y'u'nk y'una'jk y'ukmidsepøjkniyit, ja u'nk ja xa'kxy ja u'nk ja nøøx ñamyatsidit;

³⁶ tukmigu'uk ja jade'en y'uknamyidsepøjkniyidit.

³⁷ 'Pøn tyeety tyaak jawaani tyikmøjtøjkip sam ø ka'ap xmøjpiktā'agyin, ka'ap øts ja mibaat nja'aty; jøts nayide'en pøn y'u'nk y'una'jk jawaani tyikmøjtøjkip jøts nigidi ka'ap øts, nayide'en øts ja ka'ap mibaat nja'biky;

³⁸ jøts pøn ø xkagu'ayo'ombaaadiwyamp ku jaa'y yik'ookwa'anit, jøts øts ja nja' jade'en xkatunwajni, ka'ats øts ja mibaat nja'bøkt.

³⁹ Pøn kasajatyim nay'ejxip, pøn nabya'ayojip, ka'ap ja mibaat ja nitso'ok'ajtjin tpaaty; pønts kanabya'ayojip wan tjaty sa yjaty øts køjxp, ja'ats idø'øn tpaatp ja nitso'ok'ajtjin.

Ja may'ajt

⁴⁰ 'Ja jaa'y pøni pøn mgupøjkidip, øts idø'øn ja wyinaty jade'en xkupøjktip; jøts pøn øts jade'en xkupøjkk, ja'ats ja nayide'en kyupijppy pøn ø xkajxp.

⁴¹ Pøni pøn tkajpxkyupøjkp ja Dios kyugajpxy, jøts kumi Dios ja kajxip, nayide'en ja jaa'y yikmay'att sam ja Dios kyugajpxy yikmay'atyin; jøts pøn tkajpxkyupøjkp ja øyjaa'y ja'agøjxp ku y'øyjaa'y'aty, nayide'en ja yikmay'att sam ja øyjaa'y yikmay'atyin.

⁴² Jøts pøn ø xmøjyyp ja n'u'nk n'una'jk øy tukvasin ja tsujxx nøø jøts kumi øts ja nja'ajtjy, jøts janch øts idø'øn nwa'añ ku ja nayide'en yikmay'att.

11

Ja jaa'dy:pøn ja Juan Bautista ojts tkexy

¹ Xjats ku nwindson'ajtim Jesús tta'ana'am'abajtyii'ñ ja nimakmajtskpi pabøjkpitøj, winets ja ojts chøøñ, jøts ja ñijkxy yik'ixpøjkpí kajpxwá'kxpi má jaty ja kajp jam ja'abi etjotp.

² Jøts ja Juan Bautista, ku ja jam wyinaty puxøjkjotp, jøts ja tñija'wiyii'ñ ti jaty wyinaty tyump ja Cristo ja yiknitsokpi, winets ja tkejxy namajtsk ja pyabøjkpí jøts ja t'ats'ejxtit ja nwindson'ajtim Jesús,

³ jøts ja t'atsyiktø'ødit yide'en:

—¿Mjanchjacristo mets idø'øn, ja yiknitsokpi midi tijy menwamp, uk nøp'ejxp øøts idø'øn jadu'ukpi?

⁴ Xjats ja nwindson'ajtim Jesús y'adsojimbity:

—Nøjxkti jøts jade'en xukmado'odit ja Juan sá jaty ti jaty m'ejxtip mnija'widip.

⁵ Tamimadya'akti sa winap jaa'y wyin'ejxwá'kxti, sa pakma'at jaa'y yø'øyj'økti, sá yø pu'uts pøjki'bi cho'okti tuki'iyi, sá nat jaa'y myadoobøkti, sá oo'kpi yjujkyøkti, jøts sá ayoobi jaa'y ja Dios kyajpxy yiktukmadowdi.

⁶ Nekim ja'adi pøn tu'ugyi ja janchja'win tmøøt'ajttip, ka'ap winguwopi jøpkuwopi tmijattit ku ø xjanchjawidi.

⁷ Ìxanim idø'øn ja wyinaty tymchoondi ja Juan Bautista yjaa'y midi ja pyabøjkpí'ajtpy, ku ja nwindson'ajtim Jesús tñimadyaktøjkiyi'ñ ja Juan, yide'en ja tñimaay ja mayjaa'y:

—¿Ti ojts x'ejxti jam abak etjotp ku jam ojts mnøjxkti? ¿Ojts meets jam yjawi x'ixy tu'uk ja jaa'y midi jade'en jajtp sam kapy pyojimbity pyoj'adijy? Pø ka'axi, pø tu'ugyixi ja tmi'ity ja wyinmaa'ñ.

⁸ ¿Tits idø'øn ojts x'ats'ejxti? ¿Uk ojts x'ejxti tu'uk ja jaa'y midi janchweti janchnaamyi, midi janch tsuj ja wyet tø tyikpety? Pø wa'atsxi xnijawidi pøn jade'en naxyojxidip jøts ku ja jam ñachøkyidi má ja windsøndøj jam chøøñidi.

⁹ ¿Tits inkwan idø'øn mjantyim'ats'ejxtøø? ¿Tu'uk ja Dios kyugajpxy? Janch ja'ats idø'øn pøn jawaani tjaaktyimyøj, nigidibaat ja yjadu'ukpi jade'endi.

¹⁰ Ja Juan idø'øn jade'en yiknigajpx ku wya'añ Dios kyajpxy yide'en: Ngajxjawyenip øts, u'nk, ja ngugajpxy tu'uk,

jøts ja jaa'y ja wyinmaa'ñ ja tyiktøøjit tyiktuudaajkit, jøts mets ja m'ixpøjkin yikjøp'ext.

¹¹ Tyiiby øts idø'øn nmadya'aky, jøts ku ka'ap jade'en pøn myajada'akñim Dios kyugajpxy sam ja Juan Bautista; pøni pønts øts nja' xpaduujnip jøts ku tyøki má øts ngutujk ttanitanit ja jaa'y, ja'ats ne'egi yikmøjpiktaktip jøts nika'ap ja Juan Bautista.

¹² Jaayip ja Dios kyutujk cheptak'okwani ku yø Juan Bautista myiñ jøts ixymbaatnim kyakixy kyanaxy. Aguwani ja tjadyimy-jamajada'akwa'andi pøn nadya'aja'wiyidip ja yjotmøk'ajtindi.

¹³ Pøn ja Dios kyutujk yjawi tka'uknigajpxip, ni'ijtyi ja tñigajpxti pøn Dios kugajpxy'ajtidip, jøts nayide'en ja Moisés kyutujk tyikwa'añ jøts jaabaatnim ja tø yikni'amøn ku ja Juan Bautista yam tø myiñ;

¹⁴ jøts pøni mjantyimyjanchjawiwandip, ja Juan idø'øn ja' pøn yiknigajpxp jøts ku mye'ent jadigojk ja Dios kyugajpxy midi txøøw'ajtp Elías.

¹⁵ Pøni pøn yikxon tñimadoop, wants tja'gyuki.

¹⁶ Jade'en meets mdami'ejxi sam ja mutskuna'jk muum y'adø'øtsti jam maayjotp, ku ja myi'uná'jk nisudso'ampy tkagupøjkiyidi ja kyuyajtin midi ja yja' ttsøjky yjaguyatwampy, jade'en ja yikni'maadyi:

17 “Tø øø njaxu'luxy, ka'ats m'atswa'andi; tø øøts ja cancion jotmay'øøgyim nja'øømi, ni jade'ents tø mgaya'axti.”

18 Tøxi yø Juan myiñ jøts ka' yø kyay jøts ka' yø y'uuky, jøts mwā'andi jøts ku miku' yø myøøt'ajtpy.

19 Xjats ø tø njamemi, kaapy ukpts øts, jøts mwamidi jøts ku øts janchkaxim ngay n'uuky, jøts ku øts ja møøt nnamyayi pøn yiktejtjip jantyimbyo-jkpitumbijaa'dyi, jøts nayide'en møøt ja yikugubajtpitøjkti. Pøni pønts ja Dios yja' tkupøjkjip, ja'ats tjā'gyukjip sam ja Dios yja' tsøkyin.

Ja kajp midi kamadoodip

20 Xjats ja nwindson'ajtim Jesús ttamigajpxkijxy ja kajp mā jaty ja wyinaty tø ttuñ ja milagri'ajtin, ku dø'øn ja jaa'y jam ka' tyimykigtatstinim ja chinaa'yin. Yide'en idø'øn ja wyaāñ:

21 —iMjanch'ayøøy meets, Corazíngit jaa'dyi! iMjanch'ayøøy meets Betsaidit jaa'dyi! Ku jeexyip ja milagri'ajtin tyuñi jam Tiro jøts jam Sidón midi meets ya tø myiktu'unxi, ku ja jeexyip jam yiktuujnidi ja milagri'ajtin, windi'ixyip ja jeexyip tyiktigajtsnidi ja chinaa'yindi, ku ja pyøky tyeyyip tymchaachjawidi.

22 Øtsts yam wamp jøts ku nøjkx ja tiidyu'unin ñaxy, mgu'ayowip meets ja jinaxy, nika'ap ja ne'egi jade'en y'ayo'odit pøn tsinaadyip jam Tiro jøts Sidón.

23 Jøts meets Capernaumit jaa'dyi, ¿mā mee xijy mnøjkxti tsajpjøtpy? Pø japxi meets ayodaajkjøtpy mnøjkxtit. Ku jeexyip ja milagri'ajtin yiktuñ jam Sodoma midi meets ya tø myiktu'unxi, ne'egi nay jaa ja kajp jeexyip, ka'ap ja jeexyip sa yjaty.

24 Øtsts idø'øn tyimwyamp ku wyinaty ja tiidyu'unin ñaxy, ne'egi yikxon mee ne'egi mjaaktyimy'ayo'onbaatt, jøts nigidi jade'en pøn jaty tsinaadyøø jam Sodoma.

Yā mendi jøts mboo'kxtit

25 Xjats ja nwindson'ajtim Jesús yjaakwaañ:

—Dios Teety tsajpjøtpit, yikjujky'ajtpi ya naxwiñ, nmøja'wip mets ngunuukxyja'wip mets, ja'agøjxp ku tø xamidsøky o pøn ja mnitsoojkin jøts yø wijy jaa'y ja tø tkaja'gyukidi kø'øm, ne'egi tøts ja xuk'ixy xuknijawi pøn idø'øn ka'ejxiyimdi.

26 Jade'ents Teety tø xuñ sã kø'øm xamidsøky øy pøn.

27 Xjats ja Jesús tnimaay ja mayjaa'y:

—Tum ja' øts ndeety xuktump midi ja kø'øm tyunwampy. Ka'ap øts pøn jade'en xnijawi sam øts ndeety kø'øm xnijawi; nika'ats øts ndeety pøn wa'ats ñijawiyi sam øts ja kø'øm ndyimñijawi, jøts pøni pøn øts ja nduknijawiwyp, ja'ats tnijawidip ja Dios Teety.

28 Øts idø'øn xnime'endip pøn jaty agøjxtip jotkøjxtip, pøn jaty ø xku'ayo'ombaaajtjtidip, øts mee nyikpoo'kxp.

29 Kupøjkidik øts ja n'ixpøjkin jøts mwinnmaa'nbyaattit jade'en sã meets tø ndaniwinmayi, yujy øts winmaa'ñ njagyepy; pyaatpts meets ja m'anmija'win ja øy'ajtin ja kunuu'kx'ajtin.

30 Yø ixpøjkin midi meets yam nmøøpy, ka'ap yø chepi, jajtni yø', ja'ayi xka'ixmatsttit.

1 Tuu'yø'øpy ja nwindson'ajtim Jesús wyinaty, poo'kxin xøøwts idø'on, jøts ja jam wyinaty ñaxti ma kam jam. Janch yuu'oo'k'tipts ja pyabøjkpitøjk jøts ja ariin uun ja ttøjpinaxwa'ktøø, jøts ja pyajk ja tjøø'kxiyidi.

2 Xjats kuts ja fariseotøjk ja jade'en t'ejxtøø, winets ja ttamajstøø ja nwindson'ajtim Jesús:

—Ejx yø mbabøjkpitøjk jade'en y'adø'øtsti, jøts ka'ats pyaat'aty jøts yø jade'en y'adø'øtstit ku poo'kxin xøøw.

3 Xjats ja yide'en yiknimaadyøø:

—¿Ti ka'anin meets ja Dios kyajpxy x'ixy mididi tñigajpxp sa ja David tuk'ojk tmøø't'adijch ja myigu'uk, ku yuu ja wyinaty yik'ookwa'aniiyidi?

4 Tsaptøjkjotpyxi ja ojts tyøki, japts ja ojts tkay ja kunuu'kxy chapkaaky mididi ja Dios yiktamiyoxp, mididi ja ka'ap pyaat'aty jøts ja tka'aty, uk jøts ja ttuka'aty ja myigu'uk, ja'ayi ja paat'ajtidip pøn teety'ajtip.

5 ¿Jøts nigidibaatnim meets ja kutujk x'ejxn mididi ja Moisés yjaay, mididi wamp jøts ku teetyøjk ka' pyoo'kxti jap tsaptøjkjotpy ku poo'kxin xøøw, jøts nika'ats ja pyøkyi?

6 Øts wamp jøts ku ja jadu'uk jawaani møj, nika'ap tsaptøjk yja' jade'en.

7 Ka' meets yø xnimadøy pøni sa dø'on yø tjatijy ya'at Dios kyajpxy ku ja Dios Teety wyaan: “Ja' ø ndsøjkpy jøts xmøø't'attit ja pa'ayo'owin ja ayo'ejxin, jøts ne'egi kidi xyik'ookti yø jiyujk yø tsakaay mididi jaty myojxtip.” Kuk y'ijty xja'gyukidit, ka'abik mmigu'uk y'ijty xpøky'ejxtit øy ja ti pøky tjagatundi.

8 Ngudanaapy øts ja naxwii'ñit jaa'y jøts øts wamp ti paat'ajtip kapaat'ajtip yiktu'unt ku poo'kxin xøøw.

Ja jaa'y mididi ja kyø' jadi'iñi tøtsnip

9 Xjats ja nwindson'ajtim Jesús jam chøø'ñ jøts ja ojts ñijky, tyøjkiyii'ñ jam tsaptøjkjotp

10 ma wyinaty jam tu'uk ja jaa'y mididi ja kyø' jadi'iñi tøtsnip tuk-tamajñ; jøts kumi øy idø'on ja tyimy'ixa'adi ti ja yjadyimy'uktani'øønidip ja nwindson'ajtim Jesús, jøts ja tyiktøøddøø t'amidoodøø ñadyijyi:

—¿Kutujk yø' ku pamaa'y jaa'y nyiktsojkin ku poo'kxin xøøw, u ka'?

11 Jøts ja nwindson'ajtim Jesús ja ojts t'adsøy, yide'en ja tñimaay:

—¿Wan meets ja mborreek ndejin jadi'iñi xmajststutt ku ja wyinaty tø kyunaxy jap jutjotpy yam poo'kxin xøøw? Pø kuwanixi ja xninøjkxtit jøts ja x'atsjuuttit.

12 ¿Ti sats ja jiyujk jade'en yjaakyikjotmay'aty, jøts ja jaa'y jadi'iñi yikmajststutt? ¡Pø ka'axi, pø jaa'yxi ja! Paat'ajtip n'ødyu'unin øy pøn ku poo'kxin xøøw.

13 Xjats ja yiknimaay mididi ja kyø' wyinaty tøtsp:

—Xajtøw.

Jøts ku dø'on ja ojts xyajtiy, tyimyøkpøjk ja kyø' ja', nayide'en ja tyimya'wiyii'ñ sam ja yjadu'ukpi kø' mididi møk.

14 Winets ja fariseotøjk wya'kpidsømdøø, jøts ja tkajpxy'ajtpinibøjkidøø sudso ja tjadyimy'ukyik'ooktit ja nwindson'ajtim Jesús.

Ku ja Dios kyugajpxy Isaías tñigajpxy sa ja Jesús jyatwa'añ kyubatwa'añ

15 Kuts ja nwindson'ajtim Jesús ja tñija'wiyii'ñ, winets ja jam ojts cho'onni jøts mayjaa'y ja ojts pyadsøøni. Yikmøkpøjkixpy idø'on ja pamaa'y ja',

16 jøts ja yikxon ttukmadøy jøts ja ka'ap ñimadya'agidit pøni pøn idø'on ja'.

17 Jade'en'ampy idø'on ja jade'en yjaty, jøts ja jade'en ka'pxy tyimyjatt sa wyaan Dios kyugajpxy mididi Isaías'ajtp, ku ja yide'en wyaan:

18 Yø' øts idø'øñ tø n'a'ejxi, øts yø' ndumbi, yø' ø ndsøjkpy jøts yø' ø ndajotkujk'ajtpy. Nmo'op øts yø' ja nmøk'ajtin ja n'Espíritu Santo, jøts øts yø xñigajpxit ja ndiy'ajtin o magajp.

19 Ka'ap yø cheekt, ka'ap yø wyopt, ka'ap yø ya'axt yjokt, niduk'aawin yø kyayikmado'ot ja y'aaw y'ayuujk ja nøø'ajy tuu'ajy.

20 Ka'ap yø øy pøn nugo tyimdy'a'oo'kpety, ka'ap yø nugo tukmajada'ak tyimyajada'aky øy pøn mabaat tyimyjatundigøy, kunim yø yikxon tpikta'akt ja kyutujk ja tyiy'ajtin.

21 Jøts yø ødyimbyøngajpi y'ajot'attit.

Ku ja Jesús yiknimaqy jøts ku miku' myøk'ajtin ja tyiktuujni

22 Xjats ja nwindson'ajtim Jesús ojts yiktaninijkxy tu'uk ja jaa'y midi winap midi uum, jøts tø miku' ja wyinaty tyatøkiyi. Ojts ja tyikmøkpijky jøts ja jaa'y wyin'ejxwa'kxy jøts ja y'awijy jadigojk.

23 Jøts idø'øñ ja jaa'y ja ñigyumaap tyimya'widøø, yide'en ja ojts wya'andi: —¿Ti ya'at ndejin, ja rey David y'apip?

24 Xjats ja fariseotøjkti ja'ayi ja ojts jade'en tñimyadowdi, xjats ja wyandøø: —Jade'en'ampy ya'at jaa'y tyikpidsimy yø miku' kumi ja møj miku' myøk'ajtin yø yiktuujni, jøts yø ttuktabidsimy ja myimiku', yø'øts yø wyindsøn'ajtip.

25 Wa'ats ja nwindson'ajtim Jesús ja tñijawi sa jaty ja wyinaty wyinmaydi, jøts ja tñimaay:

—Nimidi'ibi kutujk kø'ømyi ñamyidsep'aty, kuts ja cheptundi ja xem yam jadi'ñits ja ñankyudigøyidi; u ku kajp u ku jaa'y tukmigu'uk ñamyidsepikyidi jøts ñawya'kxyidi, ka'ap ja yikjøp'ijxy'aty jøts ja jeky ñankchøøniyidi.

26 Jøts nayide'en jyaty ku ja møj miku' tyikpidsimy ja myimiku', tøts idø'øñ ñamyayi ñawya'kxniyi; ¿sudso'ampyts ja jade'en y'ett ja myøk'ajtin?

27 Pø jade'enxi mee mwa'añ jøts ku øts jade'en'ampy ja miku' nyikpidsimy ku øts ja møj miku' myøk'ajtin nyiktuujniyi; pøni janch jade'ents, ¿pønts meets ja mmigu'uk ja myøk'ajtin yiktuujni ku ja miku' ja nayide'en tyikpidsømdi? Ja'axi mee mni'øø'niyidip jøts ku nugo jade'en nugo mjadyimgyajpxigøydi.

28 Kuts øts, jade'en'ampy øts ja miku' nyikpidsimy ku øts ja Dios myøk'ajtin nyiktuujniyi, jade'ents meets idø'øñ yø xja'gyukit jøts ku Dios ja kyutujk tø mdanija'adyidi midi ja tyanitanaapy yjaa'y.

29 ¿Pønts øy nugo tyimy'uknidøjkip ja jaa'y jap tyøjkjøtpy midi janch kamaabyim, øy ja pøn tyimyjapøjkxiwyajni ja pyikta'aky? Jawyeenxi ja yikwøønt yikpakwøønt, winetnims ja yikpøjkjøxixit ja pyikta'aky, pø tøxi øts nayide'en ja miku' yja' nmimajada'aky.

30 'Pøn ø xkabudøjkip, ja' øts idø'øñ xmidsepwamp; jøts ku øts pøn ti møøt njapøkmukwa'añ, jøts ja jinaxy tpøkwa'kxy.

31 'Paty meets idø'øñ nnøjmi, jøts ku øy tyimyjapøni yikmaa'kxkøjxp ja' pyøky, pøni ti jaty pøn tyumpy kyajpxpy; kuts pøn tka'uk'ømyigajpxt ja Espíritu Santo, niwindem ja mibaat kyayikpojkpimee'kxy.

32 Jøts øy øts pøn xjaga'ømyigajpxy, jaakyikpojkpimaa'kxp ja'; jøts ja' pøn tka'ømyigajpxp ja Espíritu Santo, ka'ap ja mibaat yikpojkpimee'kxy ya ñaxwiñ, jøts øy tyimyjamaðso'ji.

Pøni sa wyimbidsimy øy ti, ja'ats tyiknigaxø'kp pøni sa ti y'øyi kya'øyi

33 'Ku kipy y'oyi, nayide'en ja oy tyoøm tyikwingaxi'iky; jøts midi ka'oy, nayide'ents tyoøm ja tyikwingaxi'iky ka'oy. Ja tyoømts ja kipy yikta'ejxkajp pøni sa oy ka'oy tyoømi.

34 ¡Meets win'øø'mbidi! ¿Sudso mee m'øgyajpxt jøts ka'ats m'øyjaa'yidi? Jøts pøni sa y'awa'kxy yø aaw, tum jamts yø chøøñ midi jam ujts abøki yikmøøt'ajtp jam amjotp.

35 Pøn oy jaa'y, jade'en'ampy ja tyikpidsimy ja øgyajpxy ja øwyinmaa'ñ, kumi tum'øwyinmaa'ñ ja yjagyeypy jam y'am yjotp; jøts idø'on ka'øyjaa'myidi jade'en'ampy tkayikpidsimy ja øwyinmaa'ñ, kumi tum ja ka'øybi ja jam myøøt'ajtpy y'am yjotp.

36 Øtsts mee nnimaapy jøts ku wyinaty ja tiidyu'unin ñaxy, ja'abi xøøwts tuki'iyi yikøyajkøxt ja øgyajpxy ja ka'øgyajpxy pøni sa pønjabøn tø wya'añ.

37 Pøni sa ja m'ayuujk pøni sa ja mwinmaa'ñ, nayide'ents myiktiidyu'undit, nay ja' myiktapøky'ejxtip, nay ja'ats mgayiktapøky'ejxtip.

Ku ja ka'øyjaa'y t'amidowdi jøts yiktuk'ejxtit ja milagri

38 Winets ja nwindson'ajtim Jesús ja fariseotøjk ñimaajyøø møøt ja kajpxwejpitøjkti:

—Windson, ja' øø n'ejxwampy jøts øøts xuk'ext tu'ugin ja milagri'ajtin, pøni janch ku mjanchdiosu'ngi:

39 Xjats ja nwindson'ajtim Jesús ja t'adsøøy:

—Ja' idø'on ja milagri'ajtin amidoodip pøn kawindiyjaa'y'ajttip; ka'ats ti milagri'ajtin y'ukyiktuk'ejxnidit, wan ja'ayi sa yajty kyubejty ja Jonás ja Dios kyugajpxy.

40 Nayide'en ja Jonás y'ijty tigøøk xøøw tigøøk tsuu jam ajkx yjotp jøts pyidsimy juky, nayide'ents øts idø'on jap naxpatki'py n'ett tigøøk xøøw tigøøk tsuu jøts nbidsø'ømt juky.

41 May'ampy pyidø'øktit ja jaa'y pøn jaty tsinaadyøø jam Nínive ku yja'att ja tiidyu'unin xøøw, ku yø jaa'y yiktiidyu'undit pøn jaty icyam tsinaadyip juky'ajttip ya naxwiiñ, yø'øts idø'on yikpøky'ejxtip; kumi ne'egi yiktigajstøø ja Nínive jaa'y chinaa'yindi ku ja Jonás ja ojts tyukmadøyidi ja Dios kyajpxy, jadyimy'ixyats idø'on ja' midi jawaani møj jøts nika'ap jade'en Jonás, jøts ka'ap meets ja xmøjpihta'aky.

42 Nayi pidø'økp nayide'en ja windsøndø'øxy ku tiidyu'unin xøøw, ku ya'at naxwii'ñit jaa'y yiktiidyu'undit jøts pyøky ja yiktani'øønidit; kumi jagam et ja ojts chøøñ, jøts ja ojts jadine'en tnimiñ ja Salomón ku ja tpatmadoowajni ja kyajpxwejin, icyats jadu'uk midi jawaani tnija'wip jøts nigidi jade'en Salomón, jøts ka'ap meets ja xmøjpihta'aky.

Ku ja miku' jadigojk t'awimbeti ja chinaadyaajk

43 'Ku miku' t'majstututy ja jaa'y, jøts ñijky widejtpi tø'øts etjotp, tja'ixa'ay ja pyoo'kxaajk; jøts kuts nima tkapaaty, xjats wyinmay:

44 “Nay ja ndøjk ø n'awimbetip ma ø tøndsoøn.” Kuts wyimbity, jøts ja jaa'y jade'en yikpaaty sam tøj tawa'ats, pe'ety jaaxy ja jap.

45 Xjats ja chøøñ, jøts ja tjaaktyimy'atsway ja niwixujk ja myimiku' midi jawaani ka'øydi, jøts ja niduki'iyi ttatøkidi ja jaa'y, tsinaadyaajk ja tyikwa'andi. Nayide'ents idø'on yø kawindiy jaa'y yjattit.

Ja Jesús tyaak jøts ja y'uch

46 Exam idø'on ja nwindson'ajtim Jesús wyinaty jade'en tmigajpxñim ja jaa'y, ku ja tyaak yja'ty jøts y'uchti myigu'ukti. Japyi ja ojts tøk'agui'py y'awejxti, ja' ja tyimyjamigajpxwändip.

⁴⁷ Jøts ja nwindson'ajtim Jesús yiktukmadøøy, jam idø'on ja pøngapøn tñigajpxkøjy:

—Ixap ja mdaak tøjkwimpy y'awixy møøt ja m'uch, jøts mets mmigajpxwajnip.

⁴⁸ Jøts ja tñimaay pøn wyinaty jade'en tø tyukmadøyi:

—¿Pøn øts ndaagip, pøn øts idø'on n'uchip?

⁴⁹ Winets ja tñigu'umiyii'ñ ja pyabøjkpitøjk jøts wyaañ:

—Yø' øts idø'on ndaagidip, yø' øts idø'on n'uchidip.

⁵⁰ Pøn øts ja ndeety kyutujk tpaduujniyip midi jap tsajpjøtpty, yø' øts idø'on nmigu'ugidip, yø' øts idø'on ndaagidip.

13

Ku ja Jesús tmadyakpaaty ja jaa'y pøn nøjx neppi

¹ Jøts ja nwindson'ajtim Jesús jam tøjkjotp pyidsiimy, jøts ja ojts ñijky jam mejy'am, jamts ja y'ixaajky.

² Jøts kumi janch may ja jaa'y ñamyukidi ma ja jam wyinaty, winets ja nwindson'ajtim Jesús tyøjkiyii'ñ jap barkijøtpty, japts ja y'ixaajky, jøts ja mayjaa'y jam niduki'iyi tyandøø nøø adsayjotp.

³ Xjats ja ttuk'ixpijky ja y'ixpøjkin, ñimyay idø'on ja ojts tñigajpxkøjy. Tum ejxpajtin madya'aky ja tyanimadyakpy pøni midi idø'on ja y'ukyiktamija'gyukip, yide'en ja wyaañ:

—Tu'uk ja jaa'y chøø'ñ neppi;

⁴ Jøts ku ja ojts twij ja tømmt, xjats ja tømmt winaagin ñaxkidaaajky jam tuu'am, ja'ats ja joon ojts tñimendi jøts ja wa'ats tpeemujkøjxtøø.

⁵ Winaagin ja tømmt ñaxkidaaajky jam tsaajotp ma ja naajx kyamajpxyi; ja'ats ojts tsojk myujxkojti kumi ka'ap ja naajx kyøjki.

⁶ Kuts ja xøøw ja'ayi pyidsiimy, ja'ats ja ojts chaa'yiyi, yats y'aats ja yjaakidyimy'ejtnidi, xjats ja tuki'iyi ojts tyøtskøjxni.

⁷ Jøts ja tømmt winaagin ñaxkidakmøø jam maagyujp'agujkp, jøts ku ja maagyujp yøøñ, ja'ats ja ojts ñi'aa'mbajtniyi.

⁸ Jøts ja tømmt ojts waani ñaxkidakmi ma øñaajx, ja'ats janch'øyiyii'ñ; winaagin magø'pxy pyajkpejty ja tu'ukpi tømmt, winaagints tugui'pxy, jøts winaagin ee'pxmajk.

⁹ Pøni pøn ja ja'gyukin tmøøt'ajtp, wan tjä'gyukidi.

Tigøjxp idø'on ja Jesús ejxpajtin madya'akyøjxp ja y'ixpøjkin tyaky

¹⁰ Winets ja nwindson'ajtim Jesús ja pyabøjkpitøjk ñimejniyi wingon jøts ja tyiktøødøø:

—¿Jadits ku yø jaa'y jade'en xamimadya'aky ejxpajtin madya'aky ku xyik'ixpiky?

¹¹ Jøts ja t'adsøøy:

—Meets Dios ja'ayi mduknija'wiyip ja kyutujk jap tsajpjøtpty midi pøn tkanija'wipnim; jøts ka' yø mibaat tñjawidit.

¹² Pønts tjagyajp ja ja'gyukin, jaaktyimyikmo'opts ja' jøts yikxon tyimya'gyukit; jøts pøn kaja'gyukip, jaaktyimyikpøjkxipts ja' pøni wine'en paadin ja jap tjaakjamøødi ja wyiy'ajtin.

¹³ Paty øts yø jade'en ndukmadowdi wenk madya'akyøjxp; yjadyimyejxtipxi jade'ents yjatti sam tø tkidyimy'ejxti, yjadyimjamadoodip jade'ents yjatti sam ti tkidyimñimadowdi, uk sam pøn ti tkidyimadøyin.

14 Jade'en idø'øn ıxyam tyimyjati sam wyaañ ja İsaıas ja Dios kyugajpxy, ku ja yide'en wyaañ:

Mjadyimyjamado'odip jøts ka' xnimado'odit;

mjadyimyja'ejxtip jøts jade'en mjattit sam pøn ti tkidyimy'ıjxñim.

15 Nısudsø'ampy yø yjade'embı jaa'y kya'ukmadoonıdı ja y'anmıja'win, tum ka'øy tımadowdı,

jøts wımbeets kugoots y'ejtnıdı;

ka'ap ja wyeen ttawın'ejxtı,

nıka'ap ja tyatsk ttamadowdı,

nıka'ap ja kyubajk yja'gyukıdı,

jøts ni øts xkanımendi øyık øts idø'øn nyıktso'oktı.

16 Xjats ja İesús tjaaknımaay ja pyabøjkpıtøjk:

—Meetsts idø'øn janchjotkujk'atyım, kumi mda'ejxtip ja mween jøts kumi mdamadoodip ja mdatsk.

17 Jøts janch øts idø'øn nwa'añ, jøts ku may ja jaa'y pøn jaty Dios ku-gajpxy'ajtıdı, pøn jaty øyjaa'y'ajtıp, jade'en tyımyjawemp'ejxwandı pøn meets ıxyam m'ıjxpy, jøts nıjuunıts tø tka'ejxtı; yjadyımyjamadoowandı ya'at jade'en mıdı meets ıxyam mmadøøpy, nıjuunıts ja tkamadowdı.

Ku ja İesús tnıgajpxy sudso dø'øn yıkja'gyukıt ku jaa'y neppi'ñıjky

18 'Ukpatmadowdıım meets, jøts xja'gyukıdıtı pøni sudso'ampy idø'øn ya'at madya'aky tıjy ku ja jaa'y chøø'ñ neppi.

19 Pøn tjamadojıdıp ja Dios kyajpxy sa ja ttanıtanıt ja yjaa'y jøts nıka'ap tmøjpıkta'aktı, ja'ats idø'øn jade'en jajtıp sam ja tømt mıdı naxkıdaajk jam tuu'am; jøts mıku' ja jatyi ñımiñıy; jøts ja pyøjkıy; ja Dios kyajpxy mıdı ja tø tja'ukja'gyukı.

20 Jøts ja tømt mıdı naxkıdaajk jam tsaajotp, jade'en idø'øn ja ñamyayı yjaty sam jadu'uk ja jaa'y pøn tpatmadojıdıp ja Dios kyajpxy jøts ja jotkujk'atyım tkupøjkotı,

21 jøts kumi jade'ents yjattı sam ja uıts y'aats kya'ejtxıy, jøts ja nıgıdı jeky tmi'etti; ku ja tku'ayo'ombaadıdı ja Dios kyajpxy uk yıktabawoptı paat, jøts ja jatyi tyımy'ayojıdı.

22 Jøts ja tømt mıdı yıkwøj jam maagyujp aguıkp, jade'en idø'øn ja n'ukpıktaajkın sam ja jaa'y pøn tpatmadojıdıp ja Dios kyajpxy, jøts ja pıkta'aky jøts ja jotkujk'ajtı ja' ne'egi yjotmay'ajtıp, ja' ja wın'øø'nıdıp, jøts ja Dios yja' tyıgøøñı jøts ja jaa'y ja yjanchja'win nıka'ap tyıkwıngaxı'ıky.

23 Ja tømt mıdı ojts ñaxkıda'aky jam øñaxjotp, jade'en ja nbıktaajkın sam ja jaa'y pøn tpatmadojıdıp ja Dios kyajpxy jøts yja'gyukıdıp, jøts yıkwıngaxø'øktıp. Jade'en ja wınaagındı sam ja tu'ukpı tømt pyajkpety magø'pxy, jøts wınaagin jade'en sam ja' mıdı pajkpajtp tugui'pxy uk ee'pıxmajk.

Ku ja arıın yıktamıneejpi ja ka'øy uıts

24 Jøts ja nwindson'ajtıım İesús tjaaktamımadyaajky jadu'uk ja madya'aky, jøts ja mayjaa'y yide'en tınımaay:

—Jade'en idø'øn ja Dios kyutujk mıdı yjaa'y ja tyanıtanaapy sam tu'uk ja jaa'y twıjyın ja ødyømt jam kyamjotp,

25 jøts ku ja wyınaty ıxjam myaanıdı nıduki'ıyı, wınets ja kugam myıdsep ojts tyatøjkıy; ja kyam, jøts ja ojts t'atswıjy ja ka'øy uıts jam arıınjotp.

26 Kuts ja arıın yøøñ ku ja y'uunıyıñ, jøts ja ka'øy uıts jam nayıde'en pyıdsıımy.

27 Wınets ja tumbı t'atsnımaadyøø ja wyındson: “Wındson, pø janch tum ødyømts mets ojts xıjy xwıjy jam mgamjotp, ımats yø ka'øy uıts tø chøøñ?”

²⁸ Jøts ja wyindsøn ja ñimaajyidøø: “Ja ta'ajkibi ja tajotma'tpi net jade'en tø y'adø'østsi.” Xjats ja tumbi tyiktøwdi jøts ja wyandøø: “¿Mdsøjkpy jøts øøts ja ka'øy ujts n'atswejkøxt?”

²⁹ Yide'ents ja ojts y'adsøyidi: “Ka', ku net ja ka'øy ujts yjayikwext, nayide'ents inet ja ariin yikwejxnit.

³⁰ Ne'egi tyimy'øy'atp jøts jade'en xmajtstu'uttit, wan jade'en tyondi, jaanim ku wyinaty tø tyimbyaaty jøts yikwejxnit; winets øts ja tumbi ngaxt jøts ja jawyeen twejmxujkøxtit ja ka'øy ujts, yikxon t'adsu'umdti tuk'øøxy jaty jøts ja jade'en yiknitsa'at, jøts ja ariin yikpøkjøøkt jap abøjk'ii'ñjøtpy.”

Ku ja Jesús tmadyakpaaty ja mortas tømt

³¹ Ñayi myadyaajk ja nwindson'ajtim Jesús jadu'uk ja madya'aky:

—Jade'en idø'øn ja Dios kyutujk mididi yjaa'y ja tyanitanaapy sam ja møj mortas tømndin mididi yjaa'y wyijpy kyamjøtpy.

³² Jøts kumi jaaktyimchuu'kxñi ja ñidømt yø', ka'ap jadu'uk jade'en ujts mididi yjamigu'uk'ajtpy; kuts yøñ, yikxon yjantyimyøñ møj tukmøj kipyin, janch møj idø'øn yøñ ti sa øy ti joon myendi kixy kida'aky, jøts ja ñabye'eñidi jam kipy awajkjøxp.

Ku ja Jesús tmadyakpaaty ja levaduri

³³ Ñayi tyamimadyaajk jadu'uk madya'aky:

—Jade'en idø'øn ja Dios kyutujk mididi yjaa'y ja tyanitanaapy sam ja levaduri mididi tøøxyøjk tyamimøø'kxyip ja ariin way ku ja tø tkijpxy tigøøk ojk a'ejxi, jøts ja jich yikxon yaa'kpiky.

Tigøjpx ku Jesús xumi jade'en tyik'ixpiky ja jaa'y ejxpajtin madya'akyøjpx

³⁴ Ejxpajtin madya'akyøjpx idø'øn ja nwindson'ajtim ja y'ixpøjkin tñigajpxy, jøts tum jade'en idø'øn ja tñigajpxy pøni ti dø'øn ja ñimadya'akwampy.

³⁵ Ja'agøjpx ja jade'en yjajty jøts ka'pxy wyimbidsøømt sa wyaañ ja Dios kyugajpxy ku ja yide'en tjaadyaañ: Ejxpajtin madya'aky ø nyiktu'ump ku ti ngajpxwa'ant; jøts nñigajpxp øts ja' mididi ka' pøn tñigajpxñim, wine'en yam kujk y'ity kuuyip ja Dios tyik'øyyii'ñ ja naxwii'ñit jøts ixymbaāt.

Ku ja Jesús tñigajpxy sudso dø'øn yikja'gyukit ku ja ariin yiktamineeppi ja ka'øy ujts

³⁶ Xjats ja nwindson'ajtim Jesús ojts tminawya'kxyi ja jaa'y jøts ja tyøjkii'ñi tøjkjøtpy, japts pyabøjkpitøjk ja ojts ñimiñiyi, jøts ja ñimaajyiyi:

—Tuknimadook øøts yikxon ja madya'aky ku tø xnimadya'aky ja ka'øy ujts mididi yomp jam kamjotp.

³⁷ Winets nwindson'ajtim Jesús ja ñimaajyidi:

—Ja tømt wøjpi, øts idø'øn ja',

³⁸ Jøts ja kam, naxwii'ñit ja'. Jøts ja ødyømt, ja jaa'dyidø pøn Dios kyutujk tpaduujnidip, jøts ja ka'øy ujts, ja jaa'yts ja'adi pøn ja miku' yja' tpaduujnidip,

³⁹ jøts ja ta'ajkibi tajotma'atpi mididi tnepp ja ka'øy ujts, nay ja miku' ja kø'øm. Jøts ku tpaaty ja ariin wejkk'aats, ja dø'øn ja' ku naxwii'ñit jaa'y yiktiidyu'undit, jøts pøn tpoøkmuktup ja pikta'aky, ja ankilis ja'adi.

⁴⁰ Nayide'en idø'øn yjatt ku naxwii'ñit kyøxt sam ja ka'øy ujts yikpøkmukyin, sam ja yikpikta'agyin jap jønjøtpy jøts ja jap ñitøy.

⁴¹ Ngaxp øts ja n'ankilis jøts ja twaamujkøxtit pøn jaty ja myigu'uk tyikpøkyundip, jøts pøn nayide'en ttunk'ajttip ja pøkyunk, jøts ja ttukmajtstu'uttit øts ja ngutujk jøts kidi miabaat ttatøkidi.

42 Jap ja møj jøndøodyajkjøtpy tpiкта'aktit ma ja yikxon tmijø'ødit tmia'axtit, tmiwingidsetstit tmi'agidsetstit ja jøøn.

43 Jøts pønts ja Dios tpadundip pøni sa ja wya'añ, ja'ats idø'øn jap ja møj kunuu'kxin tmøøt'ajttip ma ja Dios Teety ja kyutuujk ttanitani ja yjaa'y. Pøni mmøøt'ajttip ja ja'gyukin, ija'gyukidits!

Ku ja Jesús tmadyakpaaty ja meen' midi jaa'y yikyu'uch y'ijtpy naxjøtpy

44 'Nayide'en idø'øn ja Dios kyutuujk sam meen' yu'uch'ityin ya naxjøøjty kamjøøjty. Xjats jaa'y ja tpaaty jøts ja nay jap jadigojk tyu'uch; jøts kumi yjantyaxondakpy winets ñijkxy jøts t'atsto'okixy tuki'iyi ja pyikta'aky ti jaty jam yjagyeypy, jøts ja naajx tjuy ma tø t'ukyu'uch ja meen' midi tø tpaaty.

Ku ja Jesús tmadyakpaaty ja tsaa meen'

45 'Nayide'en idø'øn ja Dios kyutuujk midi yjaa'y tyanitanaapy sam tu'uk aju-ubyi agajpxpi, pøn t'ixaapy tum ja øybi tsaa meen' midi ja chow kawinmaañi,

46 kuts ja tpaaty tu'uk midi janch tsobatp, winets ñijkxy jøts tuki'iyi y'atsnawyidoo'kixyi ti jaty jam yjagyeypy, jøts ja tjuy ja tsaa meen'.

Ku ja Jesús tmadyakpaaty ja xuummy midi' yikta'ajkxmakp

47 'Nayide'en idø'øn ja Dios kyutuujk sam tu'uk ja xuummy midi yikta'ajkxmakp, kuts ja yiknøøwejtspety jam mejyotp, jøts ja tyikpidsimy køx kida'ak ja ajkx.

48 Jøts ku ja xuummy tø y'uch, winets ja ajkxmakpi ja twejtspidsømdi jøts ja tyiknøjkxti jam nøø'adsayotp, jøts jam y'ixa'akti jøts ja jam twi'ejxti ja ajkx; kachjøtpy ja tpiкта'akti midi janch tum'øy jøts ja ka'øy ajkx yik'ixwjiy.

49 Jade'ents idø'øn yjatt ku naxwii'ñit jaa'y kyøxt; nibidsømidip ja' ja ankilis jøts ja abiky pyikta'agidit pøni sa pønjabøn y'øyi kya'øyi,

50 jøts ja ka'øybi yikpiкта'aktit jap møj jøndøodyajkjøtpy ma ja yikxon yjø'ødit ya'axtit, wyingidsetstit y'agidsetstit.

Sa ja Dios kyutuujk nyiknigaxø'jka'ant

51 Winets ja nwindson'ajtim Jesús ja yiktøøjidi:

—¿Mnimadoodip idø'øn tuki'iyi?

Xjats ja wyandøø:

—Nnimadøøpy øø nwindson'ajtim yø'.

52 Winets ja ñimaajyidi:

—Ku tu'uk ja kajpxwejpi t'ukni'ixpøki sudso tnijawit ja Dios kyutuujk midi yjaa'y ja tyanitanaapy, jade'ents ja pyidsimy sam tu'uk ja windson'ajtim tjaajtp tyikwingaxø'kp ja yjotkujk'ajtin ku ja tnan'ky'ijxyi øy ti køx kida'ak, wan tjemyi wan tku'aamyi.

Ku ja Jesús yja'jty jadigojk Nazaretit kajpjotp

53 Xjats ku ja nwindson'ajtim Jesús jade'en tnmadyak'abajtyi'ñ, winets ja jam chøø'ñ

54 jøts ja ojts yja'aty jam kyø'øm etjotp ma ja kyugajpi. Jamts ja yik'ixpøjktøjkøø tsaptøjkjotp midi jam wynaty, jøts ja jaa'y ñigyumaap yjanchajtøø, yide'en ja wya'andi:

—¿Ma yø jaa'y jade'en tø tjaty yø'øbi ixpøjkin? ¿Sudso yø jade'en ttuñ mlagri'ajtin?

55 Pø ja tsajtspits yø' y'u'nk, jøts ja María ttaagi. Kidi ja Jacobo yø' y'ajhti, jøts ja José møøt ja Simón, jøts Judas.

56 Nayats ja y'uch kiixy yø chinaamyidi ma adøm ya. ¿Ti ma's yø jade'en tuki'iyi tø tjaty?

⁵⁷ Patyts idø'øn ja jade'en ka' tmøjpikta'akti. Xjats ja nwindson'ajtim Jesús ja ñimaajyidi:

—Tum yiktsojpk ja Dios kyugajpxy øy ma, kuts kyø'øm kajpkijxy ku kyø'øm tøjkjøøjt, ka'abimts ja tiy yiktsøky.

⁵⁸ Jøts idø'øn ja jam ka'ap jadine'en ttuun ja milagri, kumi ka'ap ja tjanchjawidi.

14

Ku ja Juan Bautista ja o'jkin tpaajty

¹ Nayi winet ets ja nwindson'ajtim Jesús yiknimadøøy jam Galilea, ja Herodes idø'øn ja tnmadoop pøn jam wyinaty windsøn'ajtp,

² jøts ja tñimaay pøn jaty ja wyinaty møøt tyuñ:

—Ja Juan Bautista net ja' midi y'ijty yiknøbajtp, ja' inet tø yjujkyiky jadigojk. Paty yø jade'en tmøøt'aty ja møk'ajtin jøts yø jade'en ttu'unt ja milagri'ajtin.

³ Jøts kumi ja Herodes ja Juan wyinaty tø chumyi, ja' ja wyinaty tø ñi'ane'emyi jøts ja pujx kadeen ja yiktagøwøønt yiktabakwøønt jap puxøjkjøtpy, ja'agøjxp ku ja ojts ttamigajpxy ja Herodias, pøn ja Herodes ja y'uch Felipe ñidø'øxy'ajtpy.

⁴ Yide'en idø'øn ja Juan wyinaty tø tñimaani ja Herodes:

—Ka' pyaat'aty jøts yø jade'en xtyimñidø'øxy'att.

⁵ Jøts idø'øn ja Herodes tyimyjayik'ookwa'añ ja Juan, ja mayjaa'yts chø'jkip; kumi tyumnija'widip ja' jøts ku ja Juan tum ja Dios yja' tkajpxi.

⁶ Kuts ja Herodes ja xyøøw ja yjumøjt txøduun, winets ja Herodias ñøøx pyidsiimy ajtspi ma ja mayjaa'y jam wyinaty tø yikwawdi yikwetsti migaabyi mi'ukpi, ja'ats ja Herodes yjantyaxondaajk,

⁷ jøts ja tñimaay møk'ampy jøts ku ja tmo'ot øy ti pøni ti ja kø'øm y'amidoowampy.

⁸ Xjats ja kiixy, tø tyaak ja wyinaty jawyeen y'agajpxiyi ku ja tñimaay ja Herodes:

—Møøky øts platijotp ja Juan Bautista kyubajk.

⁹ Ja'ats ja windsøn Herodes kyujotmaadyøjkii'i'ñ; jøts kumi tøts ja wyinaty kø'øm møk'ampy ñimy jøts ku ja tmo'ot øy ti, tøts ja jaa'y ja wyinaty tmadowdi pøn jaty jam wyinaty migaadyip mi'uktip, xjats idø'øn ja ojts wya'añ jøts yikmo'ot.

¹⁰ Ojts tyikutuky jøts ja Juan Bautista ja kyubajk y'atsyikajtsput jap puxøjkjøtpy;

¹¹ jaty diø'øn ja ojts tyikmendi jap platijøtpy jøts ja kiixy ja yikømøøy, jøts tyaak ja tmøøy.

¹² Xjats ja Juan Bautista yjaa'y yja'atti, ja'ats ja ñine'kx ja ojts yiktsoo'nxiyi jøts ja y'atsyiknitajt; kuts ja t'ukyiknaxøjkidøø, winets ja ñøjkxtøø jøts ja ojts t'atstukmadowdi ja nwindson'ajtim Jesús.

Ku ja Jesús tyikaay ja nimagoxk milbi jaa'y

¹³ Kuts ja tñija'wiyii'ñ, jøts ja chøø'ñ nadyu'uk jap barkijøtpy, jøts ja ñijky ma jam nipøn kya'ity. Jatyits ja jaa'y ja tñija'widøø, winets ja ojts choondi ma jaty ja kajp jam, jøts ja tpanøjkxti tekyjø'øm.

¹⁴ Kuts ja Jesús pyidsiimy jam barkijotp, jøts ja ojts t'ixy jøts kudam jaa'y jam wyinaty janch namaydi, jøts idø'øn ja ojts t'ayo'ixy, may tyikmøkpijky ja pamaa'y midi ja jam yiktanimeen.

15 Tsuu'jiñipts wyinaty, winets ja pyabøjkpitøjk ja ojts ñimiñiyi jøts ja ñimaajyøø:

—Tøts ja et chuu'jiñi, jøts ka' ya pøn chøøni. Kajxni yø jaa'y, jøts wan tnøjkxnidi ma jaty kajp jøts jam tju'udyit kyaaky tyojkx.

16 Xjats nwindson'ajtim Jesús ja tñimaay:

—Ka' yø ñøjkxtit; yikaydi meets yø'.

17 Jøts ja wyandøø:

—Ka'ap øøts ya ti nmøødi, ja'ay' tsapkaaky jap ja magoxkyi, jøts ajkx jamajtskyi.

18 Winets ja nwindson'ajtim Jesús ja ñimaajyidi:

—Ya yikmendi.

19 Jøts ja ojts tnøjmi jøts y'ixa'aktit jam miyjotp. Xjats ja tñixajiyii'ñ magoxk ja tsapkaaky jøts majtsk ja ajkx, jøts ja ojts tkunuu'kxy jøts ja ttatujkiyii'ñ, jøts ja tkømøøy ja pyabøjkpitøjk, ja'ats ja ojts tyikwä'kxti jøts ja tmøødyi ja mayjaa'y.

20 Niduki'yiyi ja kyaydi ku'uxy; jøts ja makmajtsk kach ujts wyindaañ ja aga'ak abu'xk.

21 Nimagoxk mil ja jaa'y kyaydi tum yaa'dyøjk, jøts abiky ja tø'øxyøjkti møøt ja mutsk una'jkti, ka'ap ja yikmachowdi.

Ku ja Jesús yø'øy jam mejwyingøjxp

22 Xjats ja nwindson'ajtim Jesús nay jatyi tyiktøjkiiyii'ñ ja pyabøjkpitøjk jap barkijøtpy, jøts ja ñøjkxtit jawyeen jam jaduktamajñ, yam ja ixjam tyañim jøts ja tminawya'kxit ja mayjaa'y.

23 Kuts ja t'ukminawya'kxøø, xjats ja nadyu'uk pyatøjkiiyii'ñ tsapkaajpxpi jam kojpkøjxp. Jøts ku kyoodsiñaã, ixjam idø'on ja wyinaty nadyu'uk,

24 jøts ja barki ixjamni ja mejkyujk'am jagamni ja wyinaty. Janch jadi'iñi ja jam yikwibejpyø'øñi ku ja nøø tyojmji'iky, jade'en'ampy ja poj myiñ midi ja ñøjkxtip.

25 Xjats ku yjøpkyoost'ajty, winets ja nwindson'ajtim Jesús ja jam ñimejnidøø, jadi'iñi ja yø'øy jam nøøwingøjxp.

26 Kuts ja pyabøjkpitøjk ja ojts jade'en y'ixxyiyi jøts ku ja yø'øy jam nøøwingøjxp, xjats ja yjantymchø'jkidøø, jøts nay ja tsø'øgi ja møk'ampy yikwajnidøø:

—iTi miku' yø jade'en!

27 Jøts ojts ja nwindson'ajtim Jesús ja myigajpxyidi, jøts ja ñimaajyidøø:

—iKidi mdsø'øgidi, yikmøjkidi m'aaw mjoøjt; øts idø'on wamp!

28 Winets ja Pedro wyaañ, xjats ja tñimaay:

—Windsøn'ajtim, pøni janch mets idø'on, yikyø'øky øts nøøwingijxy jøts øts xyiknøjkxt ma mets ixjam.

29 Xjats ja nwindson'ajtim Jesús ja ñimaajyøø:

—Men.

Winets ja Pedro pyidsiimy jam barkijotp, jøts ja yø'øchøø'ñ nøøwingøjxp, jøts ja ñijkxy ma ja nwindson'ajtim Jesús jam wyinaty.

30 Kuts tjä'wiyii'ñ ja møk poj, ja'ats chø'jkiñøø; jøts enkyi køjk yjøptäk'adøtsni, winets møk chabaguejky jøts wyaañ:

—iWindsøn'ajtim, yikpidsømk øts!

31 Jøts ja nwindson'ajtim Jesús nay jatyi tmajch kyø'køjxp, jøts ja tñimaay:

—¿Tyimwyinii'nxyip mets mjanchja'win? ¿Tiku tø mnayjøjpa'wiyi?

32 Xjats ku ja tyøjkidøø jap barkijøtpy, jøts ja poj jatyi y'amø'jty.

³³ Winets ja jaa'y ja wyinguxanaajyi pøn jaty jap wyinatyi jap barkijøtpy, yide'en ja wya'andi:

—Mets tam idø'øn mjantyimdiosu'nk.

Ku ja Jesús tyiktsøøjky ja mayjaa'y jam Genesaret

³⁴ Xjats ja ttanajxtøø ja mejy jøts ja naajx ja tpaattøø yja'ttøø Genesaret.

³⁵ Xjats ku ja jaa'y t'ejxkapti ja nwindson'ajtim Jesús pøn jaty jam kugajp'ajtip, ja'ats ja ayuujk tyikyø'odyøø, jøts tnija'wigyøjxtøø pøn jaty jam tsinaadyip ja'abi et, jøts ja tyikmendøø niduki'iyi pyamaa'y ma ja nwindson'ajtim Jesús wyinatyi.

³⁶ Møk ja ttanuu'kxa'akti øy ja ja'ayi tyukpaadidit ja wyet pa'; jøts pøn ja wet jade'en yjøjxtøø, møkpøjkøjxtøø ja'.

15

Ja ka'ø y winmaa'n ja jaa'y tyikpøkpyajtp

¹ Winets ja fariseotøjk winaa'in tnmendøø ja nwindson'ajtim Jesús, møøt ja kajpxwejpitøjkti midi jam wyinatyi tø choondi Jerusaléngit kajpkøjxp, jøts ja ojts yiktøwdi:

² —¿Tigøjxp ku yø mbabøjkpitøjk tkabadundi ja mōjaa'ychinaa'yin? Ka'ats ttundi ja windsø'jkin ku kyøbujti ku kyawya'andi.

³ Jøts ja nwindson'ajtim Jesús ja ojts nayide'en tyiktøøjimbity:

—¿Jøts tigøjxpts ku meets ja Dios Teety kyutujk xkamimadojyiyi, jøts ja' mee myikmajadakpy ja mōjaa'ychinaa'yin?

⁴ Jøts yide'ents Dios wyaañ: “Windsø'øgi mdeety mdaak”, jøts “Pøni pøn tyeety tyaak tka'ømyigajpxp, wan tpa'øøky.”

⁵ Jøts ka' meets jade'en mwā'añ, pø mnømpxi meets jøts wan jaa'y tnøjmi ja tyeety tyaak: “Niwine'enin ngabudøkit, tø øts Dios ndamay'ajtkøjxni ti jaty øts jap nmøøt'ajtpy”;

⁶ Jøts ku jade'en pøn wya'añ, ka'ats tyeety tyaak ja t'ukpudøjkiñi. Jade'ents meets ja Dios kyutujk xka'ukmøjpihtaajkniyi jøts meets ja mgostumbri xyikmajadakni.

⁷ Meets win'øø'mbidi! Yikxon yjawaañ ja Isaías ja Dios kyugajpxy jøts mdi meets msā meets, ku ja nøky ja yide'en tjaay:

⁸ Nugo aaw nugo ayuujk, yø' øts yø jaa'y xawindsø'jkidip, pø ma yø y'aaw yjoojt yø'ødi.

⁹ Jøts ti yø ñiwyā'ant øy øts yø wine'en xjawindsø'øgidi, pø ja'axi y'ixpøjkin'ajtip pøni sā jaa'y kø'øm tyikutuky.

¹⁰ Winets ja tyaxtsøø y ja mayjaa'y jøts ja tnimaay:

—Ukmadowdi meets jøts xja'gyukidit:

¹¹ Kidi yø'øjip jaa'y yikpøkpyajtp midi tøjkip y'aawjøtpy. Yø' jaa'y yikpøkpyajtp midi pidsømp y'aawjøtpy.

¹² Xjats ja pyabøjkpitøjk ja ñimejniyi, jøts ja ñimaajyøø:

—¿Tø x'ixy yø fariseotøjk, ku jade'en tø tmadowdi sā tø xnøjmi jøts yikxon tø yjantyimy'ambøkti?

¹³ Jøts ja Jesús yide'en y'adsojimbijty:

—Øy ja tyimyidi ixpøjkin, pøni ka'ap ja tminabyaadyi ja Dios yja' møøt, windigøøpy ja y'ity.

¹⁴ Ixmatsti; jade'en yjatti sam ja winap jaa'y ttuu'wawdi ja myiwinap jaa'dyi. Jøts ku ja winap jaa'y tjanch'uktuu'way ja myiwinap jaa'y, kuts jut ja tpaattit namajskts ja jap kyunaxtit.

15 Winets ja Pedro wyaañ, jøts ja tnimaay ja nwindson'ajtim Jesús:

—Tukmadook øøts ti yø yjade'embì madya'aky tyijpy.

16 Xjats ja nwindson'ajtim Jesús wyaañ:

—¿Ni meets paat yø xkanimadooni?

17 ¿Yø' idø'on mgaja'gyukidip, midì tøjkip aawjotpy jøts ja ñijkxy jam maat-jotp, jøts pyidsimy ku nnawiyiø'øyin?

18 Midì'its yø aaw yikpidsimpy, jam idø'on ja chøøñ amjotp; yø'øts idø'on jaa'y yikpøkpyajtip.

19 Jam ja amjotp chøøñ ja ka'øwysinmaa'ñ ku jaa'y myigu'uk tyik'øøky, ku jaa'y ñiyaa'y uk ñidø'øxy tpøjkxi, ku jaa'y kyawindi ywinmaa'ñ tyiktuñ, ku jaa'y myeech, ku jaa'y tyaa'y, jøts ku jaa'y øy ti tumjiwimbet tmadyaknaxy.

20 Yø yjade'embì winmaa'ñ idø'on ja jaa'y yikpøkpyajtidip; jøts kidi yø'øjip ku jaa'y tkatuñ jade'en ja windsø'jkin ku tkapujy ja kyø' ku kyaawya'añ.

Ku ja Tiro tø'øxyøjk tjanchja'wiyi'ñ ja Jesús

21 Xjats ja nwindson'ajtim Jesús jam choo'naa, jøts ja ojts ñijkxy ma ja jaa'y y'et jamdi, pøn kugajp'ajttip Tiro jøts Sidón.

22 Jøts tu'uk ja tø'øxyøjk myiñ midì tso'omp cananea, midì jam wyinaty tsinaapy ja'abi etjotp, jøts ja tnimiñ ja nwindson'ajtim Jesús, yide'en ja møk'ampy tnimaay:

—iWindsøn'ajtim, metsxi rey David m'u'nk'ajtip m'ap'ajtip, ayo'ejxk øts! Yø nøøx øts idø'on ja miku' tø tyatøjkiniyi, jøts yø' møk yjanchyik'ayoqip.

23 Jøts ja nwindson'ajtim Jesús ka'ap ja t'adsø yniwine'enin ja'agøjxp ku ja tkamigugajpi, winets ja pyabøjkpitøjk myendøø, jøts ja møkta'aky wyandøø, møkta'aky yiknimaay:

—Kajxni, janch na'ambim adøm yø xpayø'øyim.

24 Winets ja nwindson'ajtim Jesús wyaañ:

—Yø'øyi øts Dios Teety xanigajxp pøn ja Dios kyutujk kapaajtipnim ya Israelit naxjøøjty, ya Israelit kajpjøøjty.

25 Jøts ja tø'øxyøjk myiñ wingon jøts ja ojts wyinguxaniyi, yide'en ja wya'añ:

—iWindsøn'ajtim, pudøjkik øts!

26 Jøts yide'en nwindson'ajtim Jesús ja t'adsø yni:

—Ka' y'øyi ku u'nk una'jk yikpøjkxit ja chapkaaky jøts uk ja yikmo'ot.

27 Jøts ja tø'øxyøjk wyaañ:

—Nwindson'ajtim, janch jade'en idø'on ejx ixa mwā'añ; ja ukts yjøø'kxmukøxtip ja kaaky abu'xk midì ja wyindsøn yika'adip jap mesi patki'py.

28 Jøts ja nwindson'ajtim Jesús ja ñimaajyøø:

—janch møj mjanchja'win! Wan jade'en tyiktuñ sam idø'on xtsøky'aty.

Jøts ja nay jatyì myøkpjiky ja ñøøx.

Ku ja Jesús tyiktsøøjky ja mayjaa'y

29 Xjats ja nwindson'ajtim Jesús jam chøø'ñ, jøts ja ñajxy Galileit mejpya'am; winets ja pyatøjkii'ñ ma jam ja kojpk tu'uk jøts ja y'ixaajky.

30 Janch namay ja jaa'y jam yja'tti ma ja jam wyinaty, jade'en ja tyikmendi pøn tekmya'at, pøn winap, pøn uum, pøn koma'at, jøts pøn tigati pa'am pøjkidip. Jøts ja jam tyimwyingon tpiktaktøø ma ja nwindson'ajtim wyinaty, xjats ja tyikmøkpøjkijxy.

31 Janch ñigyumaap idø'on ja jaa'y ja tyimyja'widøø ku ja jade'en t'ejxti y'awijy ja uum jaa'y, jøts ku kyø' ja myøkpøkti pøn koma'atti, jøts ku

yø'øyjø'okti pøn tekmya'atti, jøts ja winap jaa'y wyin'ejxwa'kxti. Xjats ja tjanchtukmøja'widøø ja Dios Teety pøn ja Israelit jaa'y Dios'ajtip.

Ku ja Jesús tyikaqy ja ñimaktaxk milbi jaa'y

³² Winets ja nwindson'ajtim Jesús tyaxtsøø ja pyabøjkpitøjk jøts ja tnimaay:

—Njanch'ayo'ijxpy øts yø jaa'y, tigøøk xøøw øts yø kujk xmøøtsinaañidi, jøts tø ja kyaaky kyøjxnidi. Ka' øts yø ayuu ngaxwa'andi jam tyøjkwindum, kuts yø jadi'iñi tuu'ajy y'ukjotkøjxnidi.

³³ Xjats ja pyabøjkpitøjk ñimaajyiyi:

—¿Mats ya jadine'en nbøjkin ja kaaky ja jii'kxy jøts yø mayjaa'y jadine'en kya'adyit, jøts nipønts ya?

³⁴ Jøts ja ojts tyiibyikyidi:

—¿Winaak mdsapkaaky japti?

Jøts ja wyandøø:

—Wixujkyi, jøts ja ajkxuna'jk waani.

³⁵ Xjats ja wyaañ jøts ku ja jaa'y y'ixa'aktit,

³⁶ jøts ja tnixajiyi'iñ wixujk ja tsapkaaky møøt ja ajkx, jøts ttamøja'wiyii'ñ ja Dios Teety. Jøts ja ttatujkiyi'iñ jøts ja ojts tmø'øy ja pyabøjkpitøjk, ja'ats ja yikwa'kxti jøts ja tmøødyi ja mayjaa'y.

³⁷ Niduki'iyi ja jaa'y ojts kyaydi jøts niduki'iyi kyujxidi. Yjaaktyimbyøkmuiktinim ja' ja kaakwyindank ja wixujk kach.

³⁸ Nimaktaxk mil idø'on ja jaa'y ojts kyaydi tum yaa'dyøjk, abiky ja tø'øxyøjkti møøt ja mutskuna'jkti, ka'ap ja yikmachowdi.

³⁹ Jøtsnim ja nwindson'ajtim Jesús tminawya'kxi ja jaa'y, jøts ja ojts ttatøjkiñi ja barki jøts ja ñijkxy jam Magdala etjotp.

16

Ku ja fariseotøjk t'amidoodøø ja Jesús jøts ja ttuk'ejxtit ja myilagri'ajtin

¹ Kuts idø'on ja jam jade'en ñijkxy, xjats ja fariseotøjk ja nimejniyøø møøt saduceotøjkti, jøts ja nugo kyajpxy'ejxwa'añiyi. Ja' ja ojts t'amidowdi jøts ja myilagri'ajtin ja ttu'unt, jøts tyuk'ejxidit ja myøk'ajtin jam tsajpwemp, pøni janch ku dø'on ja y'ukdiosu'ngi.

² Jøts ja yide'en t'adsøøy:

—Ku ja et chuu'ji, pø mnømpxi meets: “Tø'kxwamp tam yø et, kumi tsajpts yø tsajp kyaxi'iky”;

³ jøts ku yjøpy'aty jøts mnømidi: “Ka' tam yø et yam tyø'kxwa'añ, kumi tsajpts yø tsajp kyaxi'iky jøts yoots møøt.” ¡Meets win'øø'mbidi! ¿Sa ja tsajp wa'ats xnijawidi ku ja jade'en kyaxi'iky, jøts meets øts nja' ka' xnija'wiyi ku ja mjayiktuk'ejxti?

⁴ Yø tsaachka'øyjaa'y øts idø'on jade'en x'amidoodip jøts yiktuk'ejxtit ja milagri; ja'ayits jadu'uk y'ukyiktuk'ejxnidit nayide'en sa ja Dios ttuuñ ja Jonás.

Xjats ja twinwa'ktuujty, jøts ja tyuu'døjkiyi'iñ.

Ja fariseit jaa'y y'ixpøjkin

⁵ Kuts ja pyabøjkpitøjk ñajxtøø jam nøø agø'øm jam jaduktamajñ, jøts ja tja'dyigøydi ja chapkaaky, ka'ap ja wynaty tø tkondi.

⁶ Winets ja nwindson'ajtim Jesús ja ñimaajyidi:

—Ukmadowdim; øyim mnay'ejx'etidit, ejxim yø fariseotøjk, ejxim yø saduceotøjk xkaajyidi yø chapkaaky midi wenk lewaduri møøt.

⁷ Jøts ja pabøjkpitøjk agø'ømyi ñawyambi ñaxwa'jkidøø:

—Ja'agøjxp yø jade'en wya'añ ku ndsapkaaky tø ngakø'øñindi.

⁸ Myadoow ja nwindson'ajtim Jesús ja', jøts ja tnimaay:

—¿Tigøjxp ku jade'en mwā'andi jøts ku mdsapkaaky kya'etti? ¡Niwine'enin meets ja janchja'win xkidyimyjagyepy!

⁹ ¿Ka'ap meets ja xja'gyuki, jøts ka' meets ja xja'myech ja tsapkaaky midi magoxk, midi øts ojts nyikwa'kxy, jøts øts ja ojts nmo'odi ja ñimagoxk milbi jaa'y, jøts ka' meets ja xja'myech winaak kach ojts xpøkmukti ja abu'xk?

¹⁰ ¿Jøts ni ja'baat xkaja'myatsti ja wixujkpi tsapkaaky midi ndagumaay ja maktaxk milbi jaa'y, jøts winaak kach ojts xjaakpøkmukti?

¹¹ ¿Sudso'ampyts ka' xja'gyukidi jøts ku øts ka' ndiij ja tymchapkaaky midi wenk levaduri møøt, midi yja'ajttip ja fariseotøjk møøt ja saduceotøjkti?

¹² Xjaanimts ja tjā'gyukidi jøts ku ja nwindson'ajtim Jesús kidi tyimy-jatsapkaagyip ja wyinaty tø tñigajpxy midi wenk levaduri møøt, pø ja ixpøjkinxi ja wyinaty tø tiji jade'en midi ñanky'ixpøjkidip ja fariseotøjkti møøt ja saduceotøjkti.

Ku ja Pedro wyaañ jøts ku ja Jesús yja'aji:yiknitsokp, ja Cristo

¹³ Xjats ku ja nwindson'ajtim Jesús yja'jty jam etjotp midi ja Cesarea de Filipit kajp y'etip, jamts ja tyiktiy ja pyabøjkpitøjk, jøts ja tnimaay:

—¿Sā jaa'y wya'andi, pønø øts?

¹⁴ Jøts ja wyandi:

—Jade'en winaagin wya'andi jøts ku mets Juan Bautista; jøts jadu'uk wyamidi jøts ku mets mElias, jøts pømbits wamidip jøts ku mets mJeremias, uk pøngapøn Dios kyugajpxy.

¹⁵ Winets ja Jesús tyiktiy:

—Jøts meets, ¿sā mee mwā'añ, pøn øts idø'øn?

¹⁶ Xjats ja Simón Pedro t'adsøøy:

—Ja yiknitsokpi mets, ja Cristo, ja Dios U'nk.

¹⁷ Jøts nwindson'ajtim Jesús ja t'adsøøy, jøts ja tnimaay:

—Mets Simón idø'øn janchjaakxøñim, Jonás myajnku'nk, ka' pøn jaa'yip mets yø jade'en mduk'ejxip, ja Dios Teetyxi dø'øn yø jade'en mduknija'wiyip pøn jap tsajpjøtpy.

¹⁸ Tiyy me mwinmay, møk me mwinmay, patyts idø'øn myikxømø'øyy Pedro midi tyijpy tsā. Tøts mets nikøjxp øts yam nyiktso'onda'akwa'añ ja nja'; jøts øts ja nyikmøjtā'akt, ni o'jkin niti ja mibaat kyamimada'agit.

¹⁹ Øts me nmøøpy ja kutujk'ajtim; pøni pøn mets ya ja pyøky maa'kxujkip, nayide'en ja tsajpjøtpy yikmaa'kxukt. Jøts pøni pøn mets ya mgamaa'kxujkpy, nayide'en ja tsajpjøtpy kyayikmaa'kxukt.

²⁰ Xjats ja nwindson'ajtim Jesús tnimaay møkta'aky ja pyabøjkpitøjk, jøts ja ka'ap pøn ttukmado'odit ku ja' Cristo, ku ja yiknitsø'øky.

Ku ja Jesús tñigajpxy ja y'o'jkin

²¹ Winetyipts ja nwindson'ajtim Jesús wa'ats tñigajpxøjkii'ñ, jøts ja ttukmadøyy ja pyabøjkpitøjk jøts ku ja ñøjkxt jam Jerusalén, jøts ku ja mōjaa'dyøjk ja yikxon yik'ayo'ombaadiyt møøt ja teetywindsøndøjkti jøts ja kajpxwejjpitøjkti. Ojts ja ttukmadøyy jøts ku ja yik'oogit, jujkpyøkpøts ja jadigojk, jøts ja kyidigøøk xøøw pyidsø'ømt jadigojk oo'kpi jutjøtpy.

²² Winets ja Pedro ja ojts yikniikxyi abiky, jøts ja møkta'aky ñimaajyi:

—¡Windsøn'ajtim, katsojknim Dios Teety jøts jade'en mjatt! ¡Ka'ap jade'en mdyimyjatt mdyimgyubatt!

²³ Xjats ja nwindson'ajtim Jesús tñiwa'kjimbijty ja Pedro, jøts ja tnimaay:

—iMets miku' jiwā'ak, majstutk øts!, nugo mets mjanchyik'adukti. Ka' mets jade'en mwinmay sam Dios Teety wyinmayin, jade'en me mwinmay sam øy pøn naxwiiñ'it jaa'y.

²⁴ Winets ja nwindson'ajtim Jesús tnimaay ja pyabøjkpitøjk:

—Pøni pøn tsojkin tmøø'tajtp jøts øts nja' jade'en xpaduujnit, ka' mibaat kø'øm ñadyunk'atit, ja'ayi ku amumjoojt ñadyamiyoxit ja ayo'on jøts idø'on jade'en tpadu'unt.

²⁵ Pønts kajade'enduñim nay'ejxip, niwindem ja tkapaaty ja nitso'ok'ajtin; jøts pøn ø xku'ayo'ombajtip, ja' idø'on tpaatp ja nitso'ok'ajtin.

²⁶ ¿Ja ti ja ñiwyā'ant øy ja jaa'y tjaja'bøjkixy ja naxwiiñ'ajtin, jøts ja y'anmija'win ne'egi wyindigøy? Jabi ka'axi mibaat ja ñitso'ok'ajtin ja tkuju'uty.

²⁷ Ja Dios Teety øts myø'k'ajtin nmimejnip møøt ja ankilistøjkti, jøts øts nwandu'undit sa jaty nidu'uk nidu'uk pyaat'aty yiktu'undit.

²⁸ Janch øts idø'on nwa'añ, jøts ku ya ja winaagindi pøn ka'ookitp kunim ja jawyeen tyimy'uk'ejxtit ku ø nmime'ent ja Dios Teety kyutujk midi yjaa'y ja tyanitanaapy.

17

Ku ja Jesús adsu'jky y'atstigajch, amuum chamambøjkijxy

¹ Xjats ku kyidudujk xøøw'ajty, winets ja nwindson'ajtim Jesús tmøødiyiiñ ja Pedro, jøts ja Juan møøt ja y'ajch Jacobo, jøts ja ojts ñøjkxti mā ja kojpk jam janch køjxp;

² Jamts ja ñanktyigajts, wemp am ja tyimy'ejxti ku wyeen y'aaw ja jade'en y'ajty sam xøøw y'añin, jøts ja wyet jade'en pyoobiyiiñ sam ja jajin.

³ Jøts ja jotmøñ t'ejxpaatti ja Moisés jøts ja Elías, ku nwindson'ajtim Jesús ja tmøøtmadya'aky.

⁴ Winets ja Pedro tnimaay ja nwindson'ajtim Jesús:

—Windsøn'ajtim, ityimy'ø'y'ajtp ku øø ndyimyam'aty! Pøni mdsøjkpy jøts øøts ujts'aadyøjk tigøøk nyik'øyt; tu'uk mets mja', tu'uk Moisés yja' jøts tu'uk Elías yja'.

⁵ Nay ixamnim ja Pedro jade'en wya'añ ku ja yoots jam yjal'ty janchyikwin'oo'kpm, jøts ja tuki'iyi tyik'adigøøy; jøts jap yootsjøtpy ja Dios Teety y'ayuujk yikmadøøy ku yide'en wya'añ:

—N'u'nk øts idø'on ya'at, yø' øts idø'on njaaktajotkujk'ajtpy. Mimadowdi pøni sa wya'añ.

⁶ Kuts ja jade'en tmadowdi, xjats ja winda'ak ñaxkidakti, yikxon ja yjanty-imchø'jkidøø.

⁷ Jøts nwindson'ajtim Jesús ja ñimejnidi, jøts ja tyojnidi, yide'en ja ñimaajyidi:

—Pidø'økti; kidi mdsø'øgidi.

⁸ Xjats ku ja y'ejxjø'øktøø nimā ja pøn tka'uk'ejxpatnidi, nadyu'uk ja nwindson'ajtim Jesús jam.

⁹ Jøts ja kyidaknidi, ku kojpkøjxp choondi, jamts ja nwindson'ajtim Jesús ja møktā'aky y'ana'amidøø:

—Kidi yø pøn xamimadya'akti midi tø x'ejxti, jaanim ku øts wyinaty tø njujukpyiky jadigojk.

¹⁰ Winets ja pyabøjkpitøjk ja tyiibyøjkiyi:

—¿Tigøjxpimts yø kajpxwejpitøjk jade'en wya'andi jøts ku ja Elías jawyeen mye'ent, jøts ix'oojknim ja yiknitsokpi?

11 Xjats ja nwindson'ajtim Jesús ja ojts yide'en t'adsøy:

—Janch me'emp idø'øn ja Elías, jøts ja tuki'iyi tyik'øyigyøxt.

12 Øtsts wamp jøts meets nnøjmi jøts ku Elías tø y'atsmengojmi, jøts nigidi tø t'ejxkapti, tø ja twandundi sam y'anmija'win tyimñekti. Nayide'ents øts yø yik'ayo'ombaattit.

13 Jaanims ja pyabøjkpitøjk ja tjā'gyukidøø, jøts kudam ja nwindson'ajtim Jesús ja ja' tyamimadya'agyidi ja Juan Bautista ku ja Elías tijy tø y'atsmengojmi.

Ku ja Jesús tyikmøkpjky tu'uk ja mixyu'nk pøn wyinaty ja miku' tø tyatøkiy:

14 Xjats ku ja ojts yja'atti mā jaa'y jam wyinaty, jamts ja nwindson'ajtim Jesús tu'uk ja jaa'y ñimejniyi jøts ja ojts wyinguxanay'øyiyi, yide'en ja ñimaajyi:

15 —Me teety, ayo'ejxik øts n'u'nk, adsu'jky adsu'jky mø'ødyi pa'am yø pyaadyiyi jøts tsaach'ixyim tyuñiyi; atsnaxkidakp may'ojk jam jønjoth, uk nøøjøthpaat ñødøki.

16 Ixyats mets yø mbabøjkpitøjk yø tø njadanimiñ, ka'ats yø myayidi jøts yø tyikmøkpøktit.

17 Jøts ja nwindson'ajtim Jesús y'adsøøy, jøts tnøjmi pøn jam wyinaty:

—iMee kajanchja'wibidi, yø mbøky nugo myikmajadaktip! ¿Ma windemnim meets ngajpxy n'ayuujk xpabøjkpit? ¿Jøts windemnim meets yø yjade'emb i xuktatso'okt ku øts yø ejtp njanchjanigajpx'ity? Meets, yikmen yø pamaa'y.

18 Jøts ja nwindson'ajtim Jesús ojts tkajxpidsimy ja miku', ojts ja ttukmajt-stu'uty ja mixy jøts idø'øn ja jade'en jaty tyimyøkpjky.

19 Winetnimts ja nwindson'ajtim Jesús ja pyabøjkpitøjk myigajpxi jibiky'ampy, jøts ja ojts yiktiiyiyi:

—¿Tigøjxp ku øøts yø miku' tø ngayikpidsimy?

20 Xjats ja nwindson'ajtim Jesús ja ñimaajyidi:

—Ja'agøjxp ku mjanchja'win kyamøkidi. Janch øts idø'øn nwa'añ ku jeexyip ja mjanchja'win ñiyjade'en xmøøt'atti sam mortas pajkin, øyts meets yø kojpk xnøjmit: “Jiwa'ak ya jøts mnøjxkt abikytsoo”; jiwa'akpts ja kojpk. Ka' mee ti mgamayit ku janchja'win møk xjanchmøøt'attit.

21 Yø yjade'emb i miku' ja yø iiy pyidsimy ku Dios n'ajot'ajtint, ku n'amaay'ajtint ngagugaa'yint ngagu'uujka'ant.

Ku ja Jesús tnigajpxy jadigojk ja y'o'jkin

22 Nay ixjamnim idø'øn ja wyinaty wyidetinim mā ja et txøøwi Galilea, ku ja nwindson'ajtim Jesús ja ojts tyukmadøyidi jøts ku mayjaa'y ja kyøyakit,

23 jøts ja yik'oogit, jujkpyøkpts ja jadigojk kyidigøøk xøøw. Ja'ats ja tyimchaachjotmayja'widøø ku ja jade'en tñija'widøø.

Ku ja tsaptøjk yikugubety

24 Xjats ku ja nwindson'ajtim Jesús tmøøtja'jty ja pyabøjkpitøjk jam Capernaumit kajpkøjxp, jamts ja jaa'dyi pøn yiktsaptøjkugubajttip, ja'ats idø'øn ojts tninøjkxti ja Pedro, jøts ja ojts tyiktøwdi:

—¿Ka' meets yø myik'ixpøjkpi tkugubety yø tsaptøjk?

25 Jøts ja Pedro y'adsøøy:

—Kyugubejtpyxi yø'.

Xjats ku ja Pedro tyøjkiy'ñ tøjjøthpy, japts ja nwindson'ajtim Jesús ja jawyeen ñimaajyi:

—¿Sa me Simón mwınmay? ¿Pøn yjawı yø windsøndøjk tyukugubajttip, ja kyø'ømiguk uk ja wenk jaa'y?

²⁶ Jøts ja Pedro y'adsøøy:

—Ja wenk jaa'y yø tyukugubajttip.

Jøts ja nwindson'ajtim Jesús y'adsowımbijty:

—Aaa ka'ats tam adøm idø'øn xpaat'ajtyim nyajkint ja tsaptøjk kugubajtin, pøni abiky jaa'y tyukugubajttip.

²⁷ Jøts nipøn ngayik'ambøjkin, nøjkx mejy'agø'øm jøts jam xjuutt ja ajkx, pøni midi inet mijawyeen mjuu'tpy, ja' y'aawjøtpyts inet meen xpaat tu'uk. Pyaattpts inet ja' jøts ja namajtsk ngugubajtin'ajtin; ja'ats myiknøjkxp jøts x'atsmo'ot ja yikugubajtpi.

18

Pøn idø'øn jawaani møj mā Dios ja yjaa'y ja kyutujk ttanitani

¹ Nĩñayi winets ja nwindson'ajtim Jesús pyabøjkpitøjk nĩmejnıyı, jøts ja ojts yiktııyıyı:

—¿Pømbi øø nidu'ugin ja tyımy'ukmøjtøkıp ku ja mgutujk xyiknaxkida'akt?

² Winets ja nwindson'ajtim Jesús tyaajxyıı'ñ tu'uk mutsk mixyu'nk, jøts ja tyikwa'k'øıyıı'ñ ja' y'agujk'amdı,

³ jøts ja tnımaay ja pyabøjkpitøjk:

—Janch øts idø'øn nwa'añ, pøni ka' meets ja mdsınaa'yın xyıktıgach, pøni ka' meets jade'en mnabyıkta'agıyı sam ne'egi mutskuna'jk yja'gyukındı, ka' mee mıbaat jade'en myıkupøkt jøts mdøkıdıt mā Dios ja kyutujk ttanitani ja naxwıı'ñıt jaa'y.

⁴ Patyts ja' myøjtøktı jam mā Dios ja kyutujk ttanitani ja naxwıı'ñıt jaa'y ja' pøn yik'ayowım jaa'y'ajtp, pøn jade'en nabyıktaajkıp sam ya'at mutsku'ngın.

⁵ Jøts øy pøn pøni xukpøjkıdıp øts ja nja' midi yik'ayowım jaa'y'ajttıp sam ya'at mutsku'ngın, øts idø'øn ja wyınaty kø'øm xkupøjkp.

Ja' midi yıkpøkyajtp

⁶ Jøts pøni pøn t'ukyıkpøkyu'ump øts ja nja' pøn ø xjanchja'wıdıp, ne'egi ja øyık y'ıjty jøts ja mejyjøtpy yıkuwıbejpıt, ku møj paandaak ja y'ukyıktaayukxøtsıt.

⁷ Janch kawındøøp yø naxwıı'ñıt ku ja y'ıty midi jaa'y tyıkpøkyajtp! Nøjkx naxpyım yø jade'en, jøts ıyjanç'ayøøy ja' pøn ja myıgu'uk yıkpøkyuındıp!

⁸ Paty nayıde'en pøni myıkpøkyajttıp mgø' mdeky, ja'ayı ku xtyımwyıboottıt jøts jagam xpıkta'aktıt; ne'egi øy'atp ku køtuk paktuk mdøkıt jap mā Dios jam, jøts kıdı ka'pxy xınııjkyxı ja mgø' mdeky jap infierno.

⁹ Jøts pøni yø mwıen myıkpøkyuujnıp, nawıyeenjuudıts jøts abıky xpıkta'akt; ne'egıts øy'atp ku ne'egi wıendu'uk mdøkıt jap mā ja Dios, jøts kıdı yø mwıen ka'pxy xıdıøki ku myıkuwıbejpıt jap jønjøtpy midi jap infierno.

Ku ja Jesús tmadyakpaajty tu'uk ja borreek midi tıgøøpy

¹⁰ Kıdıts øts ja n'u'nk n'una'jk xmıjotma'jtıdı. Janch øts idø'øn nwa'añ jøts ku y'ankılıs ja jap tsajpjøtpyıt Dios Teety wyıngujkpy.

¹¹ Pø ja'axı tø nnımıñ jøts øts ja nyıkıtso'ok'attıt pøn ja pyøky yıkwıındıgø'øıyıñıdıp.

¹² ¿Sa mee m'ukwa'añ? Ku jaa'y jam wyınaty tmøø'aty nımagø'pxy ja borreegi, jøts kuts ja tu'uk tyıgø'øty, ¿tı ka'ap ja t'ats'ıxa'at? Kuwanıxı ja jam køjpkøjxp tyıkta'ant ja nımakta'pxy myaktaxujkpi, jøts ja t'ats'ıxa'at midi tø tyıgøy.

¹³ Kuts ja tpaatt, ne'egi tyaxonda'akpts ja' midi tō y'uktigōy jōts nika'ap ja jade'en ne'egi yiktaxonda'akti ja ñimakta'pxy myaktaxujkpi midi kadigōōdyip.

¹⁴ Jade'ents meets idō'ōn ja Dios Teety mjāwiyidi pōn jap tsajpjōtpty, ka'ap ja ttsōky jōts y'u'nk y'una'jk ja jade'en tyigō'ōty.

Sq nmigu'uktōjk nmaa'kxuujkint

¹⁵ 'Pōni jam mmigu'uk mga'ōdyuñiyi, nagyajpxidits anadyu'uk jōts xukwinjawit ja pyōky. Pōni kyupijkpyts, tōts ja mja' wyinaty myajada'aky jōts ja pyōky nayide'en tkagu'ayo'ombaadit.

¹⁶ Kuts mgagupōkit ku ka' mmadoowa'anit, winets tu'uk majtsk jaa'y xwaadsō'ot jōts ja t'ejxtit tñijawidit pōni s̄a jam pōn wya'añ.

¹⁷ Kuts ja kyayikmōjpiktakmidit, winets xukmado'ot ja mayjaa'y pōn tjanchja'widip ja Dios; jōts ku ni ja'baat kyayikmōjpiktakmidit, winets ja jade'en xpikta'aktit sam ja jaa'y pōn Dios tkajanchja'widip, uk jade'en sam yikugbajtpitōjk yikwa'andi yiktejt̄i.

¹⁸ 'Janch meets idō'ōn nnōjmi, pōni pōn meets yā ja pyōky maa'kxuujkip, nayide'en ja tsajpjōtpty yikmaa'kxukt. Jōts pōni pōn mets yā mgamaa'kxuujkpy, nayide'en ja tsajpjōtpty kyayikmaa'kxukt.

¹⁹ 'Nayī ndukmadoodip ixyam, pōni pōn tu'uk majtsk nagyajpxidip, jōts t'amidoowa'andi t'pōktsōowa'andi t̄igati ja Dios Teety, mo'ojidipts ja'.

²⁰ Pōni mā tu'uk majtsk ñamyukyidi ja jaa'y ōts kōjxp, jamts ōts ja mōōt n'ity.

²¹ Xjats ja Pedro ojts tñinijky ja nwindson'ajtim Jesús, jōts ja t̄t̄ibiyiky:
—Windsōn'ajtim, ¿winaak ojkin ōts ja nmigu'uk nmaa'kxt ku ōts ja xka'ōdyu'unt kawinaak ojk? ¿Ōy ku wixujk ojkin?

²² Jōts ja nwindson'ajtim Jesús y'adsōōy:

—Ka'axi me nnōjmi jōts ku ja'ayi wixujk ojk. Nōmpxi ōts yam nwa'añ jōts kawinaak ojk pōni winaak ojk meets ja jaa'y mmidundigōyidi.

Ku ja Jesús tmadyakpaajty ja tumbi pōn tkamaa'kxujkp ja myigu'uk

²³ 'Jade'en idō'ōn ja Dios kyutujk sam tu'uk ja windsōnin pōn ja tyumbitōjk ojts tyojpayō'ōy.

²⁴ Exam idō'ōn wyinaty tñibōkinim, ku ja ojts yiktaniway tu'uk ja tyumbi midi ja wyinaty kawine'en miyoj'ajtiyip.

²⁵ Kumi ka'ats ja tyumbi myeeñ ti ja tyagubatp ja yoj, winets ja windsōn wyaañ jōts wan tyiknitookti mōōt y'u'nk ñidō'ōxy, jōts pōni ti jaty jam pyikta'aky'ajtip. Jōts pōni wine'en ja choobaatti, ja'ats ja yoj kyudōkip.

²⁶ Xjats ja tumbi tminuu'kxaajky ja wyindsōn, ojts ja twinguxani, yide'en ja t̄nimaay: "Windsōn, miduda'aky'ajtk ōts, ngubatp ōts ja tuki'iyyi."

²⁷ Xjats ja windsōn ja ojts y'ayo'ijxyi, jōts ja yoj ja tyamaa'kxuujkiyyi jōts ja yik'awa'atspidsōjmiyi.

²⁸ Kuuyi ja tumbi ja'ayi pyidsiimy, jōts ja ojts tu'uk t̄minabyaadyiyyi ja myigu'uk ja myōōtumbi, ja' ja miyoj'ajtiyip tu'uk pesi majtsk pesi. Yukpajkiixpy ja ojts tyimyach jōts ja jadi'iñi tyukpani, yide'en ja mōk'ampy t̄nōjmi: "i'Pe'tpy xkubatt ja yoj, yak putyi!"

²⁹ Winets ja myigu'uk ñagyuxendyaajkōō ja' wyindum jōts ja ojts myinuu'kxa'agyiyi: "Miduda'aky'ajtk ōts, ngubatp ōts ja tuki'iyyi."

³⁰ Jōts ja yjadu'ukpi, ka'ap ja tkupijky, ojts ja ñijky jōts ja ojts tpikta'aky ja myigu'uk jap puxōjkjōtpty kunim ja tyimgyubatt ja yoj.

³¹ Kuts ja yjadu'ukpi ja jade'en t'ejxtōō, tyimy'ayojidi ja' jōts ja ojts t'atstukmadowdi ja wyindsōn s̄a jaty ja wyinaty tō t'ejxti.

³² Winets ja windsøn ja tyumbi tñankwyaḍsojooḥ mididi idø'øn jade'en adøtsp, jøts ja tñimaay: "iMets miku!, burri! Tø mets ja myoj ndamee'kxy ku me tø xminuu'kxa'aky.

³³ Nayide'en me ndijy jeexyip ja mmigu'uk x'ayo'ijxy sa me tø n'ayo'ijxyin."

³⁴ Yikxon ja windsøn yjantyimy'ambijky, jøts ja tkejxy ayooḥi kunim ja myigubajtkøxit.

³⁵ Jøts ja nwindsøn'ajtim Jesús yide'en myadyak'abajtyiḥiñ:

—Nayide'en meets ja Dios Teety mduniyit pøni ka' amumjoojt xmaa'kxukti ja mmigu'uk.

19

Ku ja Jesús kyajpxwiyj sudso ja amajtsk'ajtin ñaxy

¹ Ku ja nwindsøn'ajtim Jesús jade'en wyinaty tø wya'añ, xjats ja chøøñ Galilea etjotp, jøts ja ñijky jam Jude'it etjotp mididi tamp nøøbukø'øm Jordán.

² May jaa'y ja pawidejtyip, jøts ja jam may tyiktsøøjky ja pamaa'y.

³ Winets ja fariseotøjk winaagin tñimendi ja nwindsøn'ajtim Jesús jøts ja tkajpxy'ejxwa'andi, ojts ja tyiktøwdi:

—¿Kutuky yø jade'en jøts øy pøn tmajtstu'tutt ñidø'øxy ku ja yiin waan tyundigøy?

⁴ Jøts ja t'adsøøy:

—¿Ka'anim meets ja Dios kyajpxy x'ejxi? Pø patyxi ja yaa'y ja tø'øxy tyik'øyiḥiñ pøn xyiktso'ondaajkindip.

⁵ Nayi nøøm ja': "Ja'agøjxp ja yaa'dyøjk ja tyeety ja tyaak tmajtstu'tutt, jøts ja ñidø'øxy ja møøt tu'ugyi ja'ayi chøønit."

⁶ Tu'ugyi ja ñamyayi tyimbyaaty øy ja jaa'y yjanamajtskidi, paty ka'ap pyaat'aty jøts jaa'y ja tñankñawya'kxiḥi mididi Dios tø ttanibiktaagi tu'uk yaa'y jøts tu'uk tø'øxy.

⁷ Xjats ja ttiibøjkti:

—¿Jøts tigøjxpts ja Moisés tyajky ja tiy'ajtin ja tø'øxyøjk jøts øy ja yikmajtstu'tutt?

⁸ Jøts ja nwindsøn'ajtim Jesús ja t'adsøøy:

—Meets jade'en ja mgawindiy'ajtin myikmajadakpy ku ja Moisés ojts tyikutuky jøts øy xminawya'kxidit ja mnidø'øxy; ka'aḥts yø y'ijty jade'en tso'onda'agyip.

⁹ Øts wamp, pøni pøn tminawya'kxiḥi ja ñidø'øxy a'ø'y'ampy, ku ja wenk yaa'dyøjk ja wyinaty tjagamøøt'aty, jøts ja tmøøt'amajtskigyojmi ja wenk tø'øxyøjk, ja' idø'øn pøktyump; nayi pøky ja nayide'en pøn tmøøt'amajtskiyip ja tø'øxyøjk mididi tø yikmajtstu'tuty.

¹⁰ Xjats ja pyabøjkpitøjk ja ñimaajjyiyøø:

—Pøni jade'endam yaa'dyøjk tmøøtsøøni ja ñidø'øxy, ne'egi øy tamts ja' ku nguidyimy'amajtska'ant.

¹¹ Jøts ja nwindsøn'ajtim Jesús ja ñimaajjyidøø:

—Pø janch jade'en, ka'aḥts niduki'iyi tkupøkti. Ka'ap ya'at winmaa'ñ pøn nugo ajawi tja'gyuki, ja'ayi dø'øn tkupøjktip pøn Dios møøjyidip.

¹² Ja mayjøøjp ja winmaa'ñ jøts jaa'y kya'amajtskidi: ku winaagin ka'pxy kyamendi naḥwiiñ, winaagints kø'øm ñadyuñidi ku ñay'isabikyidi jøts ka'y'amajtskidit, jøts ja winaagin pøn tkagu'amajtskip ja Dios kyutujk. Pøni pøn jade'en ttunwamp, wants jade'en ttuñ.

Ku ja Jesús tkunuu'kxy ja mutskuna'jk

13 Winets ja nwindson'ajtim Jesús yiktanímíiñ mutsk mixyuna'jkti jøts ja tkønixajt jøts ja tku'amidowit; jøts ja pyabøjkpitøjk yide'en ja tnimaay ja jaa'y pøn twaamendip ja mutskuna'jk jøts kyatøkidit ja mutskuna'jk.

14 Yide'ents ja nwindson'ajtim Jesús wyaañ:

—Majstustu'tti, wan øts yø mutskuna'jk xnimendi, kidi meets yø xkayiknaxni; yø' d'ø'øn Dios ja'ajtidip pøn jade'endi sam yø mutskuna'jkindi, ja'ats tpaattip ja Dios kyutujk.

15 Jøts ja ojts tkunuu'kxy ja mutskuna'jk, jøts ja jam ojts cho'oni.

Ja kumeeñ jaa'y

16 Tu'uk idø'øn una'jk jaa'y, ja'ats ojts t'ats'ixy ja nwindson'ajtim Jesús, jøts ja t'atsnimaay:

—Mets øyjaa'y yik'ixpøjkpi, ζti øy'ajtin ø ndu'ump jøts øts ja n'anmija'win ja jujky'ajtin tpaatt xemikøjxp?

17 Xjats ja nwindson'ajtim Jesús ja tnimaay:

—ζTiku ø xnøjmi jøts ku ø n'øyi? Tu'ugyi ja' midi øy, jøts ja Dios idø'øn ja'. Pøni mbaatwampyts ja jujky'ajtin xemikøjxp, paduujnits ja Dios kyutujk.

18 Jøts ja una'jk jaa'y wyaañ:

—ζMidi'ibi?

Jøts ja nwindson'ajtim Jesús tnimaay:

—Kidi myikjaa'y'øøky; kidi mmigu'uk ñidø'øxy xpøjxki; kidi mmeech; kidi pøn xwindaay'aty;

19 windsø'øgi mdeety mdaak; jøts tsok mmigu'uk sam kø'øm mnachøkyin.

20 Jøts ja una'jk jaa'y yide'en tnimaay ja nwindson'ajtim:

—Tø øts yø jade'en njatunguixy, jaayim øts yø jade'en mbaduñ ku nmutsk'aty. ζTits øts idø'øn njaaktu'ump?

21 Jøts ja nwindson'ajtim Jesús ja ñimaajyøø:

—Pøni øy yikxon mjaa'y'atwa'añ, nøjxx x'atsto'okjø'økixy ti jaty jam mjagyeypy jøts xmo'ot ja ñimeeñ ja ayooobi jaa'y, winets xpaatt ja øy'ajtin ja xondaajkin jap tsajpjøtpy; ku jade'en x'uktu'unt, winets mme'ent jøts ø xpawidett.

22 Xjats ku ja jade'en tmadøøy, jøts ja yjotmadyøjkiiy'iñ, kumi jantyim-gyumeeñ, kumi jantyimgyubiktä'aky idø'øn ja'.

23 Winets ja nwindson'ajtim Jesús tnimaay ja pyabøjkpitøjk:

—Øts yam tyimwyamp jøts ku møk y'adukyi jøts kumeeñ jaa'y tpaajttit ja Dios kyutujk midi jap tsajpjøtpy.

24 Jøts jaaktyimwyamp øts jøts ku ja kumeeñ jaa'y janch apeni ñaxti ma Dios ja kyutujk ttanitanit tuki'iyi, pø ne'egi tsojk ñaxt ja møj jiyujk jap xu'unjutjøtpy.

25 Kuuyi ja pyabøjkpitøjk ja jade'en tmadoodøø, janch ñigyumaap ja tyimya'widøø, jøts ja xem yam ñayiktøøjidøø:

—ζPønims idø'øn nitso'ok'atp?

26 Xjats ja nwindson'ajtim Jesús ja ojts y'ijxyidi, jøts ja ñimaajyøø:

—Ka'ap yø øy pøn jaa'y kø'øm ñankñitsø'ogiyit, ja Dios ja'ayi myøøt'ajtpy ja møk'ajtin sudso xyiknitsoojkint, niti Dios tkatsepjawi.

27 Xjats ja Pedro tyiktiiy:

—Windson'ajtim, tø øø tuki'iyi n'ixmajtskixy ti jaty øøts y'ity njagyeypy, jøts øø tø ndsøøñ jøts me myikpawidity. ζTits øøts idø'øn nbaatp, ti øøts idø'øn nbøkp?

28 Jøts ja nwindson'ajtim Jesús ja t'adsøøy:

—Janch øts idø'øn nwa'añ, ku yja'att ja xøøw ja jumøjt ku tuki'iyi yjemyigyøxt jadigojk, ku ø n'ixq'akt ngutujktaajkjøtpy ku øts ja møk'ajtin

nmi'ixa'akt, jøts meets wine'enin meets ixa xpawidity, xnayimøøt'ixa'akp meets nayide'en nimakmajtsk jap kutujktaajkjøtpty, jøts xiidyu'undit ja Israelit jaa'y niduki'iyi.

²⁹ Jøts nayide'en pøn jaty tømajtstutkøxti ja tyøjk, ja myigu'uktøjk, chø' y'uch, tyeety tyaak, y'u'nk ñidø'øxy, uk ñaajx kyam tmajtstu'uttibaat øts ngutujkjøxp, yikmo'odipts ja jinaxy jinaxy øy ti, jøts pyaattip ja' ja jujky'ajtin midi xemikøjxp.

³⁰ Jøts may ja wyindigø'ødyit pøn ixyam namyøjpiktaajkidip kø'øm; jøts pøn ixyam ne'egi windigøy'ejttip, ja'ats ne'egi nøjkk møjtøkidip.

20

Ku ja Jesús tmadyakpaajty ja tumbitøjk

¹ 'Jade'enin idø'on ja Dios kyutujk midi yjaa'y tyanitanaapy sam tu'uk jaa'y kyugam'atyn jøts ja chøøn jøpyi jøpyi tumbi ixaabyi jøts ja y'uivtsa'am pyidø'økt.

² Ojts ja tyikwin'øyidi møøt ja tumbitøjk, øy ja tmiju'uty tu'uk puxmeeñ tukxøøw, jøts ja ojts tkexy tumbi jam kyamjotp.

³ Jøts idø'on ja ojts cho'ongojmi, ja xøøw wyinaty tuk'ajopu'nk, jøts ja jap maayjotpty ojts tjaak'ixy ja jaa'y pøn awatsidip.

⁴ Yide'en ja tnimaay: "Nøjkk mee nayide'en mduñ jap kamjotpty, jøts nmiju'udyit nayide'en sam pyaat'aty." Winets ja ojts ñøjkxti.

⁵ Xjats ja windsøn cho'ongojmi ku ja xøøw kyukiyi'ñ, nayide'en winakxyøøw nay ja tumbi dø'on ja y'ats'ejxkojmip.

⁶ Jøts ku ja xøøw jawaani kyajajxni, xjats ja ojts cho'ongojmi tumbi ixaabyi, jøts ja ojts ñjkyx nay jap maayjotpty, jøts ja ojts tjaakpaaty ja jaa'y pøn wyinaty awatsidip, yide'en ja tnimaay: "¿Tiku meets ya nugo mxinaxy, ti kidi mee mdunwa'añ?"

⁷ Yide'ents ja y'adsoodøø: "Kumi ka'ap øø pøn xyiktunkpaatwa'añ." Xjats idø'on ja tnimaay: "Nay nøjkkxts mdundi øts ngamjotpty, jøts nmiju'udyit."

⁸ Xjats ku y'ux'ajty, winets ja windsøn tnimaay ja tyumbi midi yiktump: "Yaajxi yø tumbitøjk jøts xmo'ot myijuu'ñ yø' jawyenidip pøn ix'oojk tø tyøkidi tumbi, jøts ja ix'oojk xmiuju'uty pøn jawyeen tø tyøkidi tumbi."

⁹ Winets ja myendøø pøn wyinaty ix'oojk tø tyøkidi tumbi ku ja xøøw jawaani kyajajxni, jøts ja myijuu'ñ ja ojts ka'pxy t'axajidi tu'uk puxmeeñ nidu'uk nidu'uk.

¹⁰ Xjats ku yja' ja tyaja'jtidøø pøn wyinaty jawyeen tø tyøkidi tumbi, jade'en ja wyinmaydi yikmiju'udyip ja tijy jawaani tsowi; nayide'en myijuu'ñ ja ojts t'axajidi tu'uk puxmeeñ nidu'ukjaty.

¹¹ Ku ja jade'en ojts t'axajidi ja myijuu'ñ, xjats ja tmi'ambøjktøø ja wyindsøn,

¹² yide'en ja tnimaadyøø: "Pøn ne'egi oojk tø yja'atti, ja'ayi tø tyundi tuk'hori; jøts ne'egi nayide'en tø xmijuy sam øø tø xmijuyin, jøts tøts øøts yikxon nduñ jøts øøts yikxon tukxinaxy tø nni'añ."

¹³ Jøts ja windsøn y'adsøøy, yide'en ja winaagin yiknimaadyøø: "Ka' me migu'uk yam sa nduñ. ¿Ti kidi tø nnagyajpxyin jøts ku nmiju'uty tu'uk puxmeeñ?"

¹⁴ Axaji yø mmijuu'ñ jøts mnøjkxnit. Nayide'en øts yø nmijuuwy'añ pøn oojk tø tyøkidi tumbi sam mee tø myikmijuyin.

¹⁵ ¿Pøn øts yø ndejin jade'en xkaduktu'ump pøni sa øts nmeen kø'øm nyiktunkpaatwa'añ? ¿Uk yø' idø'on m'ama'at'ajtpy ku n'øyjaa'y'aty?"

16 Jøts ja Jesús jadigojk yide'en wya'añ:

—Jade'ents idø'øn ejx øts ja nwa'añ, pøn tandip ix'oojk, ja'ats ne'egi jawyenidip, jøts pøn jawyenidip, ja'ats ta'andip ix'oojk. Kumi may ja'adi pøn yiktukmadoodip jøts mye'endit, niwaanits ja'adi pøn yik'a'ejxidip jøts ty'a'andit. Nayide'ents ja Dios Teety ttu'unt ja naxwii'ñit jaa'y.

Ku ja Jesús tñigajpxy jadigojk ja y'o'jkin

17 Xjats ku ja nwindson'ajtim Jesús jam wyinaty tuu'amni midì Jerusalén nõjxpx, winets ja abiky tjiwaay ja pyabøjkpitøjk midì nimakmajtskti, jøts ja tnimaay:

18 —Eya tø nbejtyindi Jerusalén ma øts nyikøyakt, jøts øts ja teetywindsøndøjk, jøts øts ja kajpxwejpitøjk nyiktagidøkit pøn ø xyik'ooktip.

19 Ja'ats ø xkøyaktip jøts øts ja xagidøkidit pøn ka'israelit jaa'dyi, ja'ats ø xnixe'ektip xjaxe'ektip, ja'anim ø xwinwoptip xjipwoptip jøts øts ja xyikrus-pnattit; kidigøok xøwts øts ja o'jkin nmimada'akt jøts ø njujukpyøkt jadigojk.

Ku ja tøøxyøjk t'amidøø ja may'ajtin midì tyaak'ajtp ja Jacobo møøt ja Juan

20 Winets ja Zebedeo y'una'jk jam myendøø møøt ja tyaak ma ja nwindson'ajtim Jesús jam wyinaty. Ja Juan idø'øn ja' møøt ja Jacobo, ja'ats idø'øn ja tyaak jam ojts twinguxani ja nwindson'ajtim Jesús, jøts ja t'amidoowa'añ tu'uk ja may'ajt.

21 Jøts nwindson'ajtim Jesús ja ojts yiktiiyi:

—¿Ti dø'øn mdsøjkpy?

Jøts ja t'adsøø, yide'en ja tnimaay:

—Tun may'ajt, jøts øts n'u'nk xyik'ixajkit adsow aduuk ku mgutujk xyiknaxkida'akt, tu'uk aga'n jøts jadu'uk anajy, jøts jade'en ja kutujk tmida'andit.

22 Jøts ja nwindson'ajtim Jesús ja y'adsoojidøø:

—Ka' mee xnijawidi pøni ti mee m'amidoodip. ¿Mgupøkp meets ja ayo'on midì ø nbaatp?

Jøts ja wyandi:

—Ngupøkp øøts ja'.

23 Xjats ja tnimaay:

—Janch tiigyajpxy. Mgupøkp meets ja' sa jaty ø njatt ngubatt; jøts kuts øts idø'øn xmøøtsinaawya'andi tu'uk aga'n jøts jadu'uk anajy, ka'øtsip ja xpaat'ajtip jøts meets jade'en nyik'ixa'akt, ja' ja yikmo'odip pøni pøn ja Dios Teety kø'øm jade'en tø tyanibiktaagiyidi.

24 Xjats ku ja jade'en tmadowdi ja yjanimajkpidi, jøts ja tjantyimi'ambøjktøø ja ñamajtskpidi midì tukjaa'dyi.

25 Jøts nwindson'ajtim Jesús ja ojts yjayxniiyi midì duki'iyi, jøts ja ojts ñii'mxyidi:

—Jade'en sam x'ejxtin xnijawidi, ja jaa'y pøn tnitanaadyip ja naajx ja kajp, øy ja sagasa y'adøtsnidi pøni sa ja kø'øm tsokti; kuts jam pøngapøn møk yjaakyikutujkni, tu'ugyiys yja' ja tyikmøji.

26-27 Jøts ka' meets mja' jade'endi, ne'egi yide'en meets mja'. Pøni pøn namyøjpikta'akwajnip, ja' idø'øn paat'ajtip jøts ja tuki'iyi ttu'unt pøni ti myigu'uk ejtxidip ka'ejtxidip, ja' idø'øn ja twindsø'ogip,

28 jade'en sam ø nduñin, kaja'ajipxi ø tø nnimiñ jøts øts jawyeen nyikwindsø'ogit, pø ja'axi ø tø nnimiñ jøts øts ja windsø'jkin nyakt, jøts øts kø'øm ngudanit ja pojkipitumbi jaa'y pyøkyi, jøts ja may ñitso'ok'attit.

Ku ja Jesús tyikwin'ejxwa'kxy ja winap jaa'y

²⁹ Xjats ku ja jam wyinaty cho'onidi jam Jericó, jòts nwindson'ajtim Jesús may ja jaa'y ja ojts pyadsøøñiyi.

³⁰ Jamts wyinaty namajtsk winap jaa'y choonidi tuu'am, jòts ku ja tmadowdi ku ja nwindson'ajtim Jesús jam wyinaty ñaxy, jòts ja mòkta'aky tnimaadyøø:

—jWindsøn'ajtim, rey David y'u'nk y'ap, ayo'ejxk øøts!

³¹ Jòts ja mayjaa'y ja ojts y'øjyidi, ojts yiknøjmidi jòts y'amo'ondit, jòts ja tjaaktyimiyikjinajxtøø jawaani mòk:

—jWindsøn'ajtim, rey David y'u'nk y'ap, ayo'ejxk øøts!

³² Winets ja nwindson'ajtim Jesús wya'k'øyiyi'ñ, jòts ja tyaa'xixiyi'ñ ja winap jaa'dyi jòts ja ttiibiyiky, yide'en tnimaay:

—¿Ti dø'øn mdsøjktip, ti ø ndu'ump?

³³ Jòts ja ojts y'adsowdi:

—Windsøn'ajtim, jawin'ejxwamp øøts.

³⁴ Winets ja nwindson'ajtim Jesús ja jaa'y ojts t'ayo'ixy jòts ja ojts twinguxaji. Jòts ja winap jaa'y nay jatyi wyin'ejxwa'kxtøø, jòts ja ojts tpadsoondi ja nwindson'ajtim Jesús.

21

Ku ja Jesús kyajptøjkiyi'ñ Jerusalén

¹ Kuts jam Jerusalén wyinaty yja'atwanidi, jòts ja kajp ojts tpaatti midi txøow'ajtp Betfagé, midi jam tmiwíngon'ajtp ja kojpk midi yiktejp Olivos, winets ja nwindson'ajtim Jesús tkejxy namajtsk ja pyabøjkipi,

² yide'en ja tnimaay:

—Nøjxkti ixè kajpjøøjty ixè wíngon. Jamts inet buuri tu'uk xpaattit kuwiiñ mòøt y'u'nk. Ja'ats inet migajidip jòts ya xyikme'endit.

³ Jòts ku pøn sa wya'ant, jade'en xnøjmidit jòts ku ø ndsøky, jòts ku ø tsojk ngøyajkojmit.

⁴ Jade'en'ampy idø'øn ja jade'en yjajty, jòts tyimyjade'en yjatt sa wyaañ ja Dios kyugajpxy ku ja yide'en tjaay ja nøky:

⁵ Nøjmidi ja Israelit kajp:

“Ejx yø mwindsøn mnimiñiyi mnija'adyiyi, amyuyj tsaachuyuj, taku'xni byuuri'u'nk.”

⁶ Xjats ja pyabøjkipi ojts choondi jòts ja ojts ñøjxkti, ojts ja jade'en ttundi sa nwindson'ajtim Jesús ja wyinaty tø y'ane'emyidi.

⁷ Ojts ja twetsti ja buur mòøt y'u'nk, jòts ja ojts wyet ttajiba'andi jòts nwindson'ajtim Jesús ja ojts ttawaa'tspety.

⁸ Jòts ja jaa'dyi janch namay ja'adi, jòts ja ojts tya'apti ja wyet jam tuu'am; pømbi twidøjti ja ujts'aay jòts ja ojts tpikta'lakti jam tuu'am.

⁹ Jòts ja jaa'y mòk wyambinaxwa'ktøø pøn jawyeen yø'ødyip, jòts nayide'en pøn ix'oojk payø'odyip:

—jDios Teety tsajpjotpit! jKunuu'kx yø rey David y'ap y'u'nk pøn me tø kxexy! jKuuyi Dios Teety jadu'uk yjaak'øyi!

¹⁰ Xjats ku ja nwindson'ajtim Jesús kyajptøjkiyi'ñ jam Jerusalén jòts ja kajp kyajotkukidi, may ojts ja jaa'y wya'andi:

—¿Pøn yø jade'en?

¹¹ Jòts ja jaa'y wyandøø:

—Ja Jesús yø' ja Dios kyugajpxy, pøn kyugajp'ajtp Nazaret jam Galile'it etjotp.

Ku ja Jesús twojpidšomguixy ja too'kpitøjk jam tsaptøjkjotp

¹² Jøtsnim ja nwindšon'ajtim Jesús tyøjkijii'ñ møj tsaptøjkwimpy, jøts ja ojts tkajxpidsomguixy pøn jaty jap wyinaty too'ktip yajktip, juudyip kajpxtip jap tsaptøjkwimpy. Ojts ttejsapwajkixy ja mesi midi ja jaa'y yiktundip pøn ja myigu'uk myeen tkugojnidip, jøts nayide'en chinaabyajt ja yiktejimbejtøø ja paktø'kpidi;

¹³ jøts ja tnimaay:

—Yide'en jap nøyijxpy wya'añ, jøts ku ajot'ajtaajk ja chaptøjk wya'ant, jøts jade'ents meets yø tø xpiktakni sam maa'tspitøjk chinaadyøjkti.

¹⁴ Jøts ja nwindšon'ajtim Jesús jam tsaptøjkjotp winaagin ñimejniyi ja jaa'dyi pøn winapti pøn pakma'atti, jøts ja ojts tyikmøkpojkixy.

¹⁵ Kwis ja teetywindsøndøjk jøts ja kajpxwejpitøjk ojts t'ejxti ku ja jade'en ttuñ milagri, jøts ku ja ojts tmadowdi ku ja mutskuna'jk jap tsaptøjkjotpy møk wya'andi: “iDioskujuyip rey David y'ap y'u'nk!”, jøts ja yjantyimy'ambøjktøø

¹⁶ jøts ja ojts tnøjmidi ja nwindšon'ajtim Jesús:

—¿Madøøpy yø' ku yø ixa jade'en wya'andi?

Jøts ja nwindšon'ajtim Jesús ja t'adsøøy:

—Nmadøøpy øts yø'. ¿Ti ka'anim meets ja Dios kyajpxy x'ejxi ku yø tø tjanigajpxy? Yide'enxi ja wya'añ:

Tø ndanibiktaagi jøts øts mutskuna'jk xjanchjawidit
xjanchkunu'kxyjawidit.

¹⁷ Xjats ja Jesús tmajststuupty, jøts ja ojts chøøñ jam Jerusalén jøts ja ñijxxy Betania, jamts ja ojts mya'ay.

Ku ja Jesús ojts t'ayo'onmigajpxy ja iigi tsa'amguipy midi ja tyøøm ka'ejtp

¹⁸ Xjats ku yjopy'ajty, jøts ja wyimbejtkojmi ñøjkxkojmi jam kajpjotp, winets yuu ja ojts pyaadyiyi.

¹⁹ Xjats ja t'ejxpaajty tu'uk iigi kipy jam tuu'ba'am, jøts ja ojts tninijxxy, ojts ja kipy tjawi'ixy jøts ja ni tu'uk tyøøm tkapajtøø, nugo janchtum'aay ja'. Winets ja nwindšon'ajtim Jesús ojts tnøjmi ja iigi kipy:

—iNijuuni mga'uktøømiñit!

Jade'en ja ojts wya'añ, jøts ja iigi kipy jaty tyimdyiijch.

²⁰ Xjats ku ja pyabøjkpitøjk ja ojts jade'en t'ejxti, jøts ja jantyimyñigyumaap tjantyimyja'widøø, winets ja tyiktøødøø ja nwindšon'ajtim Jesús jøts ja tnimaadyøø:

—¿Sudso yø iigi kipy tsojk tø tyimdyi'ich?

²¹ Jøts ja nwindšon'ajtim Jesús ja t'adsøøy:

—Janch øts idø'on nwa'añ, pøni mjanchmøøt'ajttip ja janchja'win, jøts ku køøøm ka' xwinma'adyit majtsk'aaw majtskjoof, kidi yø'øyipts mee mjatp sam øts yø iigi kipy ixa tø nduñin, yø kojpk paat mee xnøjmit: “Jiwa'ak ya jøts mnøjkxt mejyjotp”, jantyimyjatpts idø'on ja jade'en.

²² Jøts ku øy ti x'amido'odit xpøktso'odit ajot'ajtingøjpx, pøni amumjoojt ja janchja'win xmøøt'atti, myikmo'odipts ja' pøni ti m'amidoodip.

Ja Jesús myøk'ajtin

²³ Jøts ja nwindšon'ajtim Jesús tyøjkijii'ñ tsaptøjkjotpy, ixap ja wyinaty yik'ixpiky ku winaagin jap myendøø ja teetywindsøndøjkti jøts ja møjaa'dyøjkti, jøts ja ojts tyiibykijiyi, yide'en ja ñimaajyøø:

—¿Pøn yø yjade'embø mdanigutujk'ajtip jøts yø jade'en xu'unt? ¿Pøn yø kutujk jade'en tømøø'øyi?

²⁴ Jøts ja nwindšon'ajtim Jesús t'adsøøy:

—Nayide'en meets yam nyiktøwami; jøts pøni m'adsowimbejtíp inet, winets meets ja ndukmado'ot pøni pøn øts yø jade'en xanigutujk'ajtp ku øts yø jade'en nduñ.

²⁵ ¿Pøn ojts Juan Bautista tyanigutukyiyi jøts ja ya yiknøbatt? ¿Dios, uk jaa'y? Jøts ja xem yam kø'ømyi tkajpxy'ajtpinaxwa'ktøø, yide'en ja ñawya'añidi:

—Ku net yø njanima'ayin jøts ku Dios ja tni'ane'emy, yide'en inet yø x'adso'owin: “Jøts ¿tigøjxp ku ja ojts xkajanchjawidi?”

²⁶ Jøts ku net njanima'amyá'an jøts ku nugo jaa'y ja ojts kyexyi yiknøbatpi, winets yø mayjaa'y xnibidø'jka'andit; kumi niduki'iyi yø jade'en tnija'widip jøts ku ja Juan tum ja' tkajpxy midí Dios yja'ajip.

²⁷ Jøts ja ojts nugo t'uknimaañidi ja nwindson'ajtim Jesús:

—Ka'ap øø nnijawi.

Winets ja ojts ñii'mxyidi:

—Ni øts meets inet ja ngadukmado'ot pøni pøn øts yø jade'en xanigutujk'ajtp ku øts yø jade'en nduñ.

Ku ja Jesús tmadyakpaajty namajtsk ja jaa'y tukmiga'axpi

²⁸ Xjats ja tjaaknimaay:

—¿Sa meets idø'øn x'ukja'gyuki ya'atpi ayuujk? Tu'uk idø'øn jaa'y, jamts namajtsk myajnk; jøts ja tu'uk tñimaay: “Mets u'nk, ixyam mnøjxkt tumbi jøts ø x'atstujkit ja n'uvi tsá'am.”

²⁹ Jøts ja myajnk ojts yide'en y'adsøiyi: “iKa' nnøjxwa'añ!” Winmaadyigajts ja jadigojk xjats ja ñijxky tumbi.

³⁰ Jøts ja u'nkteety ojts ja tñinijxky ja yjadu'ukpi majnk, jøts ja ojts nayide'en tnøjmi, jøts ja ojts yide'en y'adsojyi: “Øyip teety, øy ø nnøjxkt.” Jøts ja nigidi y'uknøjxni.

³¹ ¿Pømbits ja tpaduun jade'en sa ja møjaa'y tjatsøky?

Jøts ja wyandøø:

—Ja' midí ja jawyeen y'uknimaay.

Xjats ja nwindson'ajtim Jesús wyaañ:

—Janch øts idø'øn nwa'añ, jøts ku ja ne'egi jawyeen ja Dios kyutujk ttatøjkiyidit ja'adi pøn pøkyun'ejtkunajxtip, jøts nigidi meets.

³² Kumi ja' meets ja Juan Bautista tø mdanimiñiyi jøts ja mduk'ixpikyidi sa mdsønidit mdanidit sa mjujky'attit, jøts ka'ats ja tø xmibøkti; ne'egi ja' ja ojts tjanchjawidi ja jaa'dyi pøn pøkyun'ejtkunajxtip. Jøts kuts meets øy ja ojts jade'en xja'ejxti, ka' meets ja ojts xjanchjawidi, jøts ka' mdsinaa'yin xyiktigajstøø.

Ku ja Jesús tmadyakpaajty ja ka'ødyumbi

³³ 'Ukmadowdim jadu'uk ya'at madya'aky: Tu'uk ja jaa'y midí ja kam kaja'ampy tjagyajp, ja'ats ojts tni'ipy ja uvi kipy jam kyamjotp, jøts ja ojts tnaguemy; jøts ja ojts tyik'øyi tu'uk ja abøjk'ii'ñ ma ja uvi nøø yik'amøø'kxít, jøts tu'uk ja ne'ey janch køjxp ma ja kam yik'ejx'ett.

'Xjats ja ojts winaagin ja tyumbi tmø'øy ajuudyujk ja kyam, jøts ja ojts tkømø'øy jøts ja chøø'ñ widejtpi.

³⁴ Xjats ku tpaajty ja uvi tujk'aats, winets ja ojts tkexy winaagin ja tyumbi, jøts ja ttaniguexy ja yjadu'ukpi tumbidi midí ja wyinaty tyuk'ajuudyujkpy ja kyam, jøts ja yik'amido'odit ja pikta'aky midí ja paat'ajtyiyip.

³⁵ Ka'ap ja ñømdøø, ojts ja tñajtsi ja tumbi midí yikajxtip, pømbi yikwojpp yiktse'jk, pømbi o'jk jøts pømbi yikwinga'jts yikjøpka'jts.

³⁶ Jøts ja kugam ojts tjaakajxkojmi ja tyumbi jawaani namay, nigidi jade'en sam ja yjawyeembidi; nayide'ents ja kam ejx'ejtpi ja ojts tyungojmiyidi.

37 J'otsnim ja ojts tkexy ja kyø'm'u'nk, yide'en idø'øn ja y'ukwinmay: "Yikwindsø'øgip øts n'u'nk."

38 Jøts kuts ja ojts ja'ayi yik'ixy, winets ja kam ejx'ejtpi ñawyajnidøø: "Yø' yø kam yø' yø pikta'aky tmidanwängøjxp, yø' yø tmaabyøkwap; wan tyimykpa'ø'jkyindi jøts adøm yø nmidaängøjxint."

39 Xjats idø'øn ja tmajtstøø, jøts ojts tyikpidsømdi jam kamjotp, jøts ja ojts tyik'ookti.

40 Winets ja nwindson'ajtim Jesús ttiibyijky, jøts ja wyaañ:

—Ku mye'ent ja kugam, ¿sats ja tumbitøjk yiktu'undit midi kam'ejx'ejtpi?

41 Jøts ja teetywindsøndøjk jøts ja møjaa'dyøjk wyandøø:

—Niwine'en ja tkidyimy'ayo'ext yø yjade'embi ka'øy jaa'dyi, yikpa'ookp ja', jøts ja t'ayajknaxt jadigojk ja ñaajx, jøts ja abiktyumbi ja tmo'ot pøn ja mo'ojiyip ja pyikta'aky pøni wine'enin ja pyaat'atyi.

42 Winets ja nwindson'ajtim Jesús ja ñimaajyidøø:

—¿Niwindinin meets Dios kyajpxy xka'ejxi? Yide'enxi ja wya'añ:

Ja tsaa midi ja pojtspi kya'uk'a'ejxidøø,

ja'ats ne'egi ixyam tø y'ukyikpiktakni jam pøch kyubajkp jøts ja t'amajtsmujkixy ja pøch.

Ja Dios Teety idø'øn yø jade'en tø ttuñ,

øy yø ñigyumaap njaja'wandi.

43 Jade'ents ja Dios kyajpxy wya'añ, paty mee nnøjmi jøts ku ka' myikmo'odit jøts xatøjkidit ja Dios kyutujk, ja' ja ne'egi yikmo'odip pøn tyikwängaxø'jkidip ja Dios yja' midi ja yja'ajtpy.

44 Jøts ja tsaa ku jam pøn y'uknaxkida'akt, windigø'øpy ja ayoobi; jøts ku ja tsaa pøn y'uktanaxkidakpatit; yikpu'xkiyip ja'.

45 Kuts ja teetywindsindøjk jøts ja fariseotøjk jade'en tmadoodøø ja madya'aky midi ja nwindson'ajtim Jesús ja tamimadyaajkidip, ojts ja tja'gyukidi jøts ku ja' yiknimadya'akti.

46 Winets ja tjadyimyjamatwandøø, ja mayjaa'yts chø'jkidip pøn tnija'widip jøts ku ja nwindson'ajtim Jesús ja Dios Teety yja' tkajpxi.

22

Ku ja Jesús tmadyakpaajty sam tu'uk windsøn tyik'amajtski ja myajnk

1 Xjats ja nwindson'ajtim Jesús ojts jadigojk ttamimadyaktøjkigyoyomi jadu'uk madya'aky, yide'en ja wyaañ:

2 —Jade'en ja Dios kyutujk midi yjaa'y ja tyanitanaapy sam tu'uk windsøn pøn xødump jøts myajnk ja tyik'amajtski,

3 jøts ja tyumbi ja ttaniguexy pøn jaty ja yikaawyampy yik'uukwampy jøts ja t'atswa'adit, ka'ats ja jaa'y ja pyadsoo'nidøø.

4 Jøts ja ojts abiktyumbi tjanigajxkojmi, yide'en ja t'ukniamay: "Nøjkx ja x'atstukmadowdi pøn jaty ø nwaawampy, jøts ku ja kaaky jii'kxy ya abaadi y'ejtni. Tø øts ndsakaä nyik'øøky jøts tyimdyumjane'kxpi tyimdyumjay-eekpyi, abaadi a'ejxi y'ejtni, wan tmenidi tø'øxñigaabyi tø'øxñi'ukpidi."

5 Kidyimyøjpiktakti ja' pøn idø'øn jayikwaadsoodip migaabyi mi'ukpi. Pømbi nøjkxni kyamjotp, jøts pømbi tyunk tniyø'øyini ma jaty pøngapøn myeemyiky,

6 jøts pømbi axaji tyikja'jttøø ja windsøn tyumbi jøts ja tjemdunidi tedunidi, yik'oo'ktibaat ja'.

7 Winets ja windsøn yikxon yjantyimy'ambijky, jøts ja ojts tkexy syoldaditøjk jøts ja tyikpa'ookitit ja jaa'y pøn tyimyikjaa'y'oo'knidip, jøts ja tniitsaajyidit ja kyajp.

8 Winets ja tnimaay tyumbitøjk: “Tum ja abaadi y'ejtni jøts xøøw yiktu'unt, ka'adams yø yjade'embii jaa'y pyaat'atyidi jøts yø nyikmiga'ayin nyikmi'uujkin.

9 Nøjkxtits jam mā jaa'y ñaxy tyøki, jøts ja niduki'iyi xwā'adit tø'øxñigaabyi tø'øxñi'ukpi pøni pøn jaty jam mbattip.”

10 Jøts ja tumbi cho'ondøø ñøjkxtøø jam tuu'am, jøts ja ojts twaamukti pøn jaty ja jam pyattøø, jam øyjaa'byi ka'øyjaa'byi; jøts ja mayjaa'y jade'en tyik'ujtstøø ja tøjkojot.

11 Xjats ja windsøn jam tyøjkii'iñ jøts ja t'ejxwā'añ pøn jaty tø yja'atti migaabyi mi'ukpi, winets ja jap t'ejxpaaoty tu'uk ja yaa'dyøjk, jøts ku ja ka'ap jade'en xyøxyi sam idø'øn pyaat'atyidi ñaxyoxidit ja tø'øxñigaabyidi ja tø'øxñi'ukpidi.

12 Jøts ja tnimaay: “¿Sudso mets ya tø mdøki, jøts ka'ats jade'en mxøxyi sam idø'øn pyaat'atyi ku tø'øxñigaaky ku tø'øxñi'ukk ñaxy?” Jøts ja nisa kidyimwya'añ, amøñi ja y'ity.

13 Winets ja windsøn ja tnimaay pøn jaty jam wingiidyip wimbøjktip, yide'en ja tnimaay: “Ixe køwøøndi pakwøøndi jøts xwibøjpidso'ømdit, wan tniikxy agugootstujpy mā yjø'øt mā ya'a'xt, mā wyingidsetst y'agidsetst.”

14 Kumi may ja yjayikwaadsowdi øy pøn, jøts waanits ja'adi pøn yik'a'ejxidip.

Ku yikajpxy'aty ja kugubajt

15 Jøts ja fariseotøjk jam ojts choondi, jøts ja ojts tkajpxy'ejxwā'andi, ja'ats ja tyikpøky'attip jøts ja ttani'øønidit pøni sa yjadyimy'ukwā'añ.

16 Xjats ja jade'en winaagin tkajxtøø ja yjaa'y møøt ja Herodes yjaa'myi, jøts ja t'atstukniimaawya'andi ja nwindson'ajtim Jesús:

—Windsøn, tø øø nnijawi jøts ku tiy mgajpxy, jøts ku tiy janch ja Dios yja' xnigajpxiyi, ka' xmøjpkita'aky øy jaa'y sa yjawa'andi kumi ka' mets pøn xkupiky xkagupiky.

17 Tukmadookts øøts sa me m'ukwā'añ: ¿Nmo'op øøts kugubajt ja møj windsøn midi jam Roma tsinaapy? ¿Nmo'op øøts u ka'?

18 Yja'wiyi'iñts ja nwindson'ajtim Jesús ja' jøts ku ja kya'ødyunwā'añiyi, jøts ja tnimaay:

—Meets win'øømbidi, ¿tiku øts jade'en xkajpxy'ejxti?

19 Tuk'ejxtik øts ja meeñ midi myiktundip ku ja kugubajt xyakti.

Jøts ja ojts t'atskondi tu'uk ja pujxmeeñ.

20 Ku ja ojts t'uk'ixy ja nwindson'ajtim Jesús, jøts ja tyiktiy:

—¿Pøn yø' wyeen y'aaw, jøts pøn yø' xyøøw ixa kyøxja'ay'i?

21 Jøts ja t'adsoodøø:

—Ja nwindson.

Winets ja ñimaajyidi ja nwindson'ajtim Jesús:

—Yø'øts meets yø windsøn mmo'op midi yø yja'ajtpy, jøts Dios yø xmo'odit midi Dios yja'ajtpy.

22 Xjats ku ja jade'en tmadoodøø, ñigyumaap idø'øn ja tyimyajtøø; jøts ja ojts jade'eñi tmajtstut'utti jøts ja choo'nidi.

Ku ja jaa'y tyiktøwdi pøni janch idø'øn ja' ku oo'kpi jadigojky yujkpyøktit

²³ Jøts nay ja'abi xøøw ja saduceotøjk ojts t'ats'ejxti ja nwindson'ajtim Jesús. Jade'en idø'øn ja' ja wyinmaa'ñ tjagyapti jøts ku oo'kpi ka' y'ukjujkyøjknidit; paty ja yide'en tnimaadyøø ja nwindson'ajtim Jesús:

²⁴ —Windsøn, yide'en ja Moisés wyaañ: kuk pøn tku'ookt ñidø'øxy jøts ku ka' tyiktañ ni tu'uk y'u'nk, pøni jamts y'ajch uk y'uch, ja'ats ja ku'økytø'øxy tmøøt'amajtskip jøts ja tyika'axt, jøts ja myigu'uk kyagudigø'øty midi tø y'øøky.

²⁵ Jats øøts y'ity nmigu'uk tu'uk midi jaa'y'ajttip niwixujk yaa'y. Jøts ja jagyooop y'amajtskiy'ñ, o'jks ja'. Jøts kumi ka' y'u'nk y'una'jk tyiktaañ, jøts ja y'uch ojts tmidan ja kyap, ja ku'økytø'øxy.

²⁶ Jøts nayide'en yjajty ja myimajtskpi, jøts ja myidigøøkpi nayide'en, tum-jade'en ñajxkøjxti niwixujk.

²⁷ Jøts ku ja jade'en y'oo'køjxtøø, jøts ja tø'øxyøjk yjaaktyimy'ø'jky.

²⁸ Jøts kuts ja jadigojk pyidsø'ømdit jujky'ajtpi, ðmidi'ibits ja tnidø'øxy'atp, pø tøxi ja t'atsnidø'øxy'ajtkøxti?

²⁹ Jøts ja ojts yide'en y'adsøyidi ja nwindson'ajtim Jesús:

—Kajaa mdigøydi, ja'agøjxp ku ka' xnija'wiyidi ja Dios kyaajpxy, ni ja myøk'ajtim xkanija'wiyidi.

³⁰ Kuts jadigojk ja oo'kpi yjujkyøktit nipøn kya'uk'amajtskiñit, ka' pøn y'u'nk ñøøx tkøyakt jøts ja y'amajtskit, jade'ents ja chinaañidit sam ankilisti midi jap tsajpjøtpy.

³¹ Jøts ku ja oo'kpi yjujkyøkti, ðka'aním meets ja nøky x'ixy sã Dios kø'øm tø wya'añ? Nøømxí ja':

³² “Tum øts xDios'ajttip ja Abraham, ja Isaac, jøts ja Jacob.” Kidi oo'kpipts ja ñiDios'ajtpy, pø ja'axi ja ñiDios'ajtpy jøts ja tyikjujky'att øy pøn.

³³ Ku ja jaa'y jade'en tmadoodøø, jøts ja ñigyumaap tjã'widøø ku ja jade'en yik'ixpikyidi.

Ja møj kutujk midi ja Dios ñi'ane'empty

³⁴ Winets ja fariseotøjk ojts tnimadowdi jøts ku ja nwindson'ajtim Jesús wyinaty tø tyik'amøñ ja saduceotøjkti, jøts ja ñamyujkidøø;

³⁵ jamts tu'uk kajpxwejpi tmøødidi, ja'ats ja tjã'ukajpxy'ejxwaan ja nwindson'ajtim Jesús. Jøts ja tyiktiy:

³⁶ —Windsøn, ðmidi'ibi kutujk jawaani møj midi ja Dios kyutujk myøøt'ajtpy?

³⁷ Jøts nwindson'ajtim Jesús t'adsøøy:

—“Windsø'øgi ja Dios amumjoojt, jade'en xtsokt mabaat myajada'aky m'anmija'win, mabaat myajada'aky m'aaw mjoojt.”

³⁸ Yø' idø'øn møj jøts yø' idø'øn jawyenip.

³⁹ Jøts ñiñayjade'en ja myimajtskpi, yide'en ja wya'añ: “Jade'en mmigu'uk xtsokt sam kø'øm mnachøkyin.”

⁴⁰ Yø'øbi kutujk majtsk møj midi ja Moisés tø tjã'ay jap kyutujkjøtpy, jøts midi ñigajpxtip ja Dios kyugajpxy ku yik'ixpøkti.

¿Janch idø'øn ku ja David t'ap'aty ja Cristo?

⁴¹ Nay ixamnim ja fariseotøjk wyinaty amuki y'etinim,

⁴² jøts ja nwindson'ajtim Jesús ttiibiyjky:

—¿Sã mee mwinmay, pøn yø Cristo? ¿Pøn yø' y'u'nk?

Jøts ja tnimaadyøø:

—Ja rey David yø' y'ap.

⁴³ Winets ja nwindson'ajtim Jesús ja tnimaay:

—¿Jòts sudsomts ja rey David ja Espíritu Santo yikwajñøø jòts ja ojts tijj windsøn? Tiku ja David yide'en wya'añ:

⁴⁴ Nømp ja nwindson'ajtim ja Dios Teety ñimaajyøø:

“Putsinaaky øts n'aga'ñ'ampy,
kunim øts yø nmimajadakøxt pøn
jaty mmidsep'ajtip.”

⁴⁵ ¿Sudso ja Cristo ja yiknitsokpi, sudso ja David ja y'ap'aty, jòts yide'ents ja David kø'øm wya'añ jòts ku ja twindsøni?

⁴⁶ Jòts nipøn nisa kidyimwya'añ, jòts ja'abi xøøw ttamajstuttøø, jòts ka'ap pøn y'uktiiþyøjkniyi tigati.

23

Ku ja Jesús ttamigajpxy sa y'adø'øtsti ja fariseotøjkti møøt ja kajpxwejpitøjkti

¹ Xjats ja nwindson'ajtim Jesús tnimaay ja mayjaa'y jòts ja pyabøjkpitøjk:

² —Yø kajpxwejpitøjkti jòts yø fariseotøjkti, jade'en yø wya'andi jòts ku yø tyimbyaat'atyidi, yø' idø'øn ja tyimñigajpxtip wa'ats, yø' idø'øn ja tyimñija'widip ja Moises kyutujk.

³ Jade'ents meets yø xpadu'unt, tundi dø'øn jade'en tuki'iyi pøni sa mnii'mxyidi; kidits nayide'en m'adø'øtsti sam yø y'adø'øtsti, kumi jade'en'ajtip yø', wenk yø jaayi y'ukwa'andi jòts wenk y'adøtskojmidi.

⁴ Nugo tukmajada'ak myajada'akti midì janch kamaabyim, jòts ja'ats ja jaa'y tyukpadunwandip; jòts niwine'enin ja kø'øm jade'en tkatunwa'andi.

⁵ Jade'en'ampy jade'en y'adø'øtsti jòts ja kajp y'ejxidit, jòts ja mayjaa'y y'ejxidit. Wyet nikijxy tkøxja'adi wan jaty ja Dios kyutujk, jòts yik'agajpxtit ku ja tjantymbyadundi, jòts nayide'en ñachojkmiyidi jòts wyet tum yøñ tñajtskudiiyi tmiwidettit, ka'ap jade'en tyiktundi sam o pøn jaa'y.

⁶ Ja' chojktip jòts tum jam tyimy'ixa'aktit ma ja windsøn tsinaabyajt jam ku xøøw ku ti tyuñi tsaptøjkjøtpy,

⁷ jòts jade'en ttsokti jòts ja jaa'y nøø'ajy tuu'ajy wyindsø'øgiyidit kyajpxpoo'kxiyidit, jòts ja tyimyiktejtìt ku ja kyajpxwejti.

⁸ Jòts meetsts kidim jade'en jaa'y xnimaañidi jòts jade'en myiknøjmìdìt jòts ku mee mgajpxwijy, pø tu'ugyixi mee tum jade'en mnay'uch'atidit mnay'ajch'atidit, jòts tu'ugyits ja mgajpxwejpìdì midì mgajpxwejidip, ja Cristo ja', ja yiknitsokpi.

⁹ Jòts kidi pøn xejti teety ya ñaxwiiñ ñaxkijxy, tu'ugyixi meets mdeety ja' pøn jap tsajpjøtpy.

¹⁰ Jòts nika' mnawyindsøndejidit, pø tu'ugyixi ja' pøn mwindsøn'ajtip, ja Cristo, ja yiknitsokpi.

¹¹ Pøn ja myigu'uk twindsø'jkip, ja' idø'øn møj, ja' idø'øn nmigubajk'ajtidip.

¹² Pøn ja namyøjpikta'akwajniyip kø'øm, yik'amutski ja nøjxk yjaty, jòts pønts nabyiktaajkip yik'ayowim, ja'ats idø'øn nøjxk mõjtøjkip.

¹³ 'Ti jade'en mnadyatuujnidip meets kajpxwejpitøjkti meets fariseotøjkti, wine'enin win'øø'ndsoøni! Meets ja m'agajpxujkpy jòts mmigu'uk xkaduk-tatøkiwya'andi ja Dios kyutujk. Jòts ka'ats kø'øm mdøkidi, jòts nika' xyiktøkiwyamidi pøn ja tsojkin tjajagyajp.

¹⁴ 'iMjanch'ayøøy meets kajpxwejpitøjkti, meets fariseotøjkti, wine'enin xnidunk'atti ja win'øø'nk!, ku ja ku'øktø'øxy ja tyøjk ja pyikta'aky xpøjxkidi jòts ñadyijyi xkayiknigaxø'økti, ñadyijyi ja tsapkaixpy janch yøñ xkajpxti, yø' meets yikxon myiktatubatp.

15 'iTi jade'en mnadyatuujnidip meets kajpxwejpitøjkti, meets fariseotøjkti, wine'enin ja mmigu'uk xwin'øøndi! Mjantyimyijotigøødyip meets, jøts ja jaa'y xukupøktit ja mdsinaa'yindi sa mee m'adø'tøsti, jøts kuts ja jaa'y jade'en tø xundi, ne'egi jawaani ka'øy meets ja jaa'y xjaaktyimdyuñ, jade'en ja tpatni sa ja øy øy tyimñøjxjt jap infierno, jøts nigidi meets jade'en in mdyimyjatt.

16 'iMjanch'ayøøy meets tuu' niwaaabidi, jade'ents xundi sam winapjaa'yindi!, ku mee mwa'añ: "Ku pøn wyanda'aky jøts tyiktestigi'aty ja tsaptøjk, jade'ents ja yikpikta'aky sam pøn kyawanda'agyin; jøts pønts wandakp jøts tyiktestigi'aty ja oori midi ja tsaptøjk yja'ajtpy, ja'ats idø'øn tiy janchwandakp."

17 iMeets mo'otpidi, jade'en xundi sam winap jaa'yindi! ¿Midi'ibi dø'øn jawaani jaaktyimyoj: ja oori, uk ja tsaptøjk midi tyikunuu'kxy jajtp ja oori ku ja yikajpxpaaty?

18 Jøts nayide'en mwamidi: "Ku pøn wyanda'aky jøts tyiktestigi'aty ja altajr, ka'ap ja wyanda'agyi; kuts pøn wyanda'aky jøts tyiktestigi'aty ja limunsi midi yikyoyxp jam altajrkøjxp, ja'ats idø'øn tiy janch wanda'aky."

19 iMee mo'otpidi, mee wimbeets kugoots ejtpidi! ¿Midi'ibi jawaani jaaktyimyoj: ja yojxin, uk ja altajr midi tyikunuu'kxyajtp ti jaty jam yikyoyxp?

20 Jøts pønts tyiktestigi'ajtp ja altajr ku wyanda'aky, kidi ja'ayip ja nugo yiktestigi'ajtpy, nayide'en ja tystigi'aty ti jaty jam altajrkøjxp;

21 jøts pøn tyiktestigi'ajtp ja tsaptøjk, kidi ja'ayip ja nugo yiktestigi'ajtpy ku ja wyanda'aky, nayide'en Dios ja tyiktestigi'aty pøn ja chaptøjk'ajtpy.

22 Nayide'en pøn wandakp jøts tyiktestigi'aty ja tsajp, ja Dios idø'øn chinaadyaajk ja yiktestigi'ajtp, jøts ja Dios kø'øm midi jap tsinaapy.

23 'iMjanch'ayøøy meets kajpxwejpitøjkti, meets fariseotøjkti, ku ja win'øø'nk xunk'atti! Køx kida'ak meets xjanchkugubatkiy, jøts ka'ap ne'egi xpadu'xundi midi ja Dios kyutujk jawaani ne'egi yjani'ane'empy ku ja tsoyky ja ødyiidyu'unin, ja pa'ayo'ejxk jøts ja janchja'win. Ya'atpi meets idø'øn ne'egi jawaani mjapaat'ajtp mbadu'ump.

24 iMeets winap tuu'waaabidi, ku ti x'uukti tum axity ja xyiknaxti jøts ja uux jam kyatøki, jøts nika'ats xjawidi ja møjpi jiyujk ku ja amuum xjøøndi!

25 'iTi jade'en mnadyatuujnidip meets kajpxwejpitøjkti jøts meets fariseotøjkti ku xunk'atti ja win'øø'nk! Ja'ayi mee mjanchkamijotkukup sudso ja txy ja tas nikijxyi nadyijyi wa'ats y'ett, jøts ka'ap ja xunk'atti pøni sadam ja yjøtpy. Ni xkaja'gyukidi kudam m'amp mjotp tum ja axøøkpi yigaappi xjamøø't'atti, ku jaa'y nugo xwin'øøndi xwimaatsti.

26 Meets fariseo winapti: jawyeen yø mga'øy'ajtin xmajtstu'ttit, jøts jade'en ja m'anmija'win ttaniwa'ats'attit ejxim n'uk'ejxint tasi nyikwaaajtsin, jade'en nikijxy jade'en jøtpyi.

27 'iMjanch'ayøøy meets kajpxwejpitøjkti jøts meets fariseotøjkti, meets win'øø'mbidi!, jade'en mee mgaxi'iky sam ja oo'kpi nipotsin midi tø yikpoobi jøts ja janch tsuj nikijxy kyaxi'iky, jøts ku jap jøtpy ujts abøki oo'kpi pajk jap, jøts tum ja axøøk ja jap myøøt.

28 Jade'enxi meets idø'øn; wemp am ñadyijyi xuk'ejxti ja jaa'y jøts ku mee m'øyjaa'yi. Midi'its jap m'aawidip mjoojtidip, tum ja taay'ajtk, tum ja kya'øybi jap mwinmaa'ñ'ajttip.

29 'iMjanch'ayøøy meets kajpxwejpitøjkti jøts meets fariseotøjkti, meets win'øø'mbidi! Meetsxi ja Dios kyugajpxy ja ñipots myik'ø'yidip ku ja y'oookti, jøts ja xyo'om yik'øyidi wyingi'jy pøn tø y'ats'øyjaa'y'atti,

³⁰ jòts mjanch'uknømdi: “Kuk adøm jeexyip n'ukja'ajtyindi, ka'ap adøm ja møjaa'dyøjk jeexyip tøn budøjkindi ku ja tøy tyik'ookti ja Dios kyugajpxtyi.”

³¹ Yø'øyits meets kø'øm mnadyani'øø'niyip jòts ku ja xeety'apidi pøn ja Dios kyugajpxy tøy tyik'ookti.

³² ¡Yik'abaadidits inet midi ja mdeety'aptøjk tøy ttunjøpidi!

³³ ¡Meets win'øø'mbidi! ¡Meets kawindiyjaa'dyi! ¿Sudso meets xijy ja ayo'on m'ukni'waajtsniyidit midi jap ayodaajkjøtpy mbaattip?

³⁴ Yø'øgøjpx øts kugajpxy ngaxt møøt ja wijyjaa'dyi møøt ja yik'ixpøjkpidi. Jòts myik'ookpts meets ja winaagin jòts ja xyikruspattit, jòts pømbi yiktseekp yikwopp jap tsaptøjkjotp, jòts pømbi yik'ixa'ap yikpawidēt kajp kajp.

³⁵ Jade'ents meets ja pøky mdaja'adit, jòts ja xkubattit ku ja øyjaa'y kawine'en tøy xyik'oo'knidi, Abel ñikøjxp cho'onda'aky pøn øy pøn yikxon jaa'y'ajtp, kunim ja Zacarias ttamigugøxi pøn ja Berequias myajnk'ajtpy, pøn mee myik'o'jk jap tsaptøjkjotpy ma ja altajr'yity.

³⁶ Janch øts idø'on nwa'añ, ku jade'en yiktuñ yø'øbi pøky, yø ya'atpi jaa'y yø taja'adidip jòts yø yiktagubattit pøn jaty ja ixyam tsinaadyip.

Ku ja Jesús t'ayo'ijxy ja Jerusaléngit kajp

³⁷ ¡Jerusaléngit kajp, Jerusaléngit kajp, meetsxi myik'øø'kpy ja Dios kyugajpxy, jòts xwinga'atsti xjøpka'atsti pøn ja Dios kyajpxy tyikyø'øydip, pøn ja Dios mjadani'gaxidip! ¡Tø meets njapeemukwa'añ njakonmukwa'añ kawinaak øjk, sam tsikuna'jk ja tyaak ñimu'uxyi, ka'ats meets ja jade'en tøy xkupiky!

³⁸ Ejxtits inet ja tsaptøjk ku ja abak tyani;

³⁹ øts idø'on wamp jòts ku meets xka'uk'ejxnit tsojk, jòts ku meets jaanum x'ejxtit pøni juuni ja tiempi yja'aty ku mnø'ømdit: “Ejxik Dios ja kyunuu'kxyu'nk ñadyaguguexyi midi mmime'enxiyip ja kyutujk.”

24

Ku ja Jesús tnigajpxy jòts ku ja tsaptøjk kyida'att

¹ Xjats ja nwindson'ajtim Jesús pyidsiimy jam tsaptøjkjotp, jòts ixam ja wyinaty ñajxni ku ja pyabøjkpitøjk ja jam wingon ñimejniyøø, jòts ja tyukmadoobinaxwa'jkøø sa jaty ja tsaptøjk jam t'ijxy ku ja janch tsuj janch øy.

² Jòts nwindson'ajtim Jesús ja t'adsøøy:

—¿M'ejxtip ixa jade'en tuki'iyi? Øts wamp jòts ku ya nitu'ugin ja tsaa kyata'ant nikiibyety, kuja'jigyøxp yø tuki'iyi.

Ja ejxa'an midi yik'ejxp ku wyinaty yiktidyunwanidi ja naxwii'ñit jaa'y

³ Winets ja øjts ñjøkxti jam kojpkøjxp midi yiktejp Olivos; jòts ku ja nwindson'ajtim Jesús ixam wyinaty tøy y'ixa'aky, winets ja pyabøjkpitøjk ja øjts ñini'jxyiyi, jòts ja øjts ñimaajyidi amaa'tsk:

—Ja' øø ndsøjkpy jòts øøts xukmado'ot windem idø'on ja jade'en yjatt. ¿Ti ejxpajt ti ejxa'an øø n'ejxp jòts ku wyinaty mmenwa'añ, jòts ku wyinaty yja'atwa'añ ja tiidyu'unin xøøw?

⁴ Jòts nwindson'ajtim Jesús ja ñimaajyidøø:

—Øyim mnay'ejx'etidit jòts kidi øy pøn nugo mwin'iñidi.

⁵ Kumi may ja jaa'y mye'endit jòts ja jade'en ñadyejidit jòts ku ja y'øtsi, yide'en ja wya'andit: “Øts idø'on Cristo ja yiknitsokpi”; jòts mayts ja jade'en twin'øøndit ja jaa'y.

⁶ Jòts mmado'op meets jòts ku jaa'y tnigajpxtit ja tsep, uk tnigajpxtit sa jaty ja tsep yjaaktunit, sa jaty ja ayo'on yikpaatt; kidits mdsø'øgidi, jatp

idø'øn ja jade'en; ka'animts wyinaty tmibaat'aty jøts ja naxwii'ñit jaa'y yiktiidyu'undit.

⁷ Kumi tseptu'undip ja jaa'y pøn ki'abikñaaajx ki'abikyajpti jøts ñañbidø'øgidit xem yam, jøts ja windsøndøjk nayide'en cheptu'undit ja xem ja yam pøn jaty ja kajp ja naajx tñitanaadyip naxwii'ñ; etp yuu xøøw, jøts pa'am køx kida'ak jøts uyx ñaxt maawyeeen.

⁸ Tso'ondakpnm ja ayo'on wyinaty jade'en midi yikxon yik'ejxpnim.

⁹ Winets meets myikøyakt jøts myikjemdu'undit myiktedu'undit, jøts jaa'y yik'oogidit, jøts nipøn mgatsokidit o magajp, ja'agøjxp ku mee xjanchjawi.

¹⁰ Winet ets ja jaa'y may ja yjanchja'win t'ixmatstít, yja'dyigøøgyøxnidip ja Dios yja' ja'ami jøts ja myigu'uktøjk tkøyajknidit.

¹¹ May ja windaay'ajtpi pyidsø'ømdit, ñadyijiywa'andit jøts ku Dios yja' ja tñigajpxidi, jøts may ja myigu'uk twin'øndit.

¹² Kawine'en ñaxt ja ka'ødyu'unin jøts ja ka'øwynmaa'ñ, may ja jaa'y xem yam kawin'ijxyim ñayjawiyidit.

¹³ Jøts pøn tmidanaapy jøts pøn tu'ugyi winmaapy, ja'ats idø'øn nøjkk nitso'ok'ajtp ja y'anmija'win.

¹⁴ Jøts ya'at øy madsoo yikajpxwa'kxt wine'enin naxwii'ñit y'ity, ya'at Dios y'øgyajpxy y'ømyadya'aky, jøts naajx kajp ja møj ja mutsk tñijawidit; jats idø'øn tmibaat'att jøts naxwii'ñit jaa'y yiktiidyu'undit.

¹⁵ Ja Daniel, pøn ja Dios kyugajpxy'ajtpy, ja' yide'en tñajtsja'wiyii'ñ jøts tñigajpxy ti yikpøkpyajtp, ti midundigøøpy; jøts kuts x'ejxtit jøts ku ja'baat jap yik'ejxni yikpatni ma ja tsachjagunuukxy chaptøjk jap, japts ja mga'ukmaa'kxniyidit. Pøni pøn ya'atpi nøky kajpxp, wan tja'gyuki.

¹⁶ Wants ja tka'akti pøni pøn tsinaadyip jam Judea jøts kyaknøjkxtit jam kojpkøjxp.

¹⁷ Jøts pøni jam wyinaty pøngapøn tø pyety tyøjkøjxp ja'abi xøøw, ka'ats t'ukniwinajknit ok idø'øn ti tjaak'atsjuutt jap tyøjkjøtpy;

¹⁸ jøts pøni jam wyinaty pøngapøn wyidity kyamjotp, wan ka' t'ukwimbejtni, ni wyet ni ñaamy tka'atswetst.

¹⁹ Ja'ay'ijxyim ja tøøxyøjk yjanchjattit pøn jaty mutsk jam wyinaty tnikøjxp'ajttip, pøn jaty myaxu'nk jam wyinaty tø tyikaxø'økti!

²⁰ Amidowdi pøktsowdi Dios jøts kidi ja et mga'akti ku ja et y'amxuxy chaachxuxy, jøts kidi wyinaty yjaty ku poo'kxin xøøw;

²¹ møk ja ayo'on yik'ext sam ka' windi yjatyin wine'en ixyam kujk ñaxy ku ñaxwii'ñit cho'ondaajky. Jøts ku ja ñaxt ni kya'ukyik'ejxnit jadu'uk nayide'en.

²² Jøts ku Dios tyikjakt ja ayo'on jøts jeky y'ett, ka' pøn ñitsoojkin tpaatt; jøts ka'apts jade'en ttu'unt, ja'agøjxp ku ttsøky ja jaa'y jøts tpa'ayøy pøn ja kø'øm tø twi'ixy.

²³ Jøts ku winet pøn mnøø'mxidit: "Ejxti, ixya ja Cristo midi yiknitsokp", uk ñø'ømdit "Ejxti, ixem ja", kidi xmibøkti.

²⁴ May ja windaay'ajtpi mye'endit jøts myikwin'øøndit, ñadyijyi ja ñadyejidit Cristo midi yiknitsokp, uk ñadyijyi ja ñabyikta'agit jade'en sam ja jaa'y pøn Dios yja' tkajpxidip; jøts tñanky'ejxidit ja ejxa'an ja ejxpajt, ñadyijyi ttu'undit ja milagri jøts ja jaa'y ttawin'øøndit, ja'baat ja twin'øønwa'andit pøn ja Dios kø'øm tø wyi'ijxyidi.

²⁵ Patki'jyi meets yø ixyam ndukmadøy,

²⁶ kuxip myiknøjmimidit: "Ejxti, ixem ja abak etjotp", kidits jam mnøjkxti; uk mjayiknøjmidits; "Ejxti, ixyajp tam ja tøjkjøtpy", kidits meets ja xmibiky.

²⁷ Ku ø nme'ent, jade'en ø nme'ent sam wyidsukyin ku ja kyaxi'iky jam xøbidsimy, nayide'ents ja nay jatyi kyaxø'kmi xøjexy jam tsajpwemp.

²⁸ Niduki'iyi meets ja xnijawit ku nme'ent.

Sa mye'ent ja Dios ja myøjkudanaabyi ja yiknitsokpi

²⁹ Kuuyi ja ayo'on jade'en y'uknaxt, winets ja xøøw y'lookt, winets ja po'ka' y'uk'anit, jøts ja maadsa' kya'adit. Ku ja tsajp y'adøtspøjkøxnit, tuki'iyi tum jade'en yjattit ti jaty jam ejtp tsajpwemp.

³⁰ Winetnimts ja x'ejxtit jam tsajpwemp midi øts jawyeen nanky'ejxip, jøts ja naxwii'ñit jaa'y ni'ijtyi ya'axtit, jøts t'ejxtit jøts ku ø nmime'ent yootsjøtpy ja nmøk'ajtin jøts ja kunuu'kxin.

³¹ Winets ja puxujx yikmado'ot møk'ampy jøts ø ndanigaxtit ja anklisjøtk, ja'ats twaamukøjxp pøn jaty ø nja'ajtpy wine'en naxwii'ñit jaa'y amuum tuk'ojkyi tuktsajp'agida'aky.

³² Øy x'ukja'gyukidit yø madya'aky ku yø iigi kipy yiknimadya'aky: Ku ja y'awaj y'axeeñ u'nknim, jøts pyidsimy ja y'aay, jade'ents meets ja xnijawi ku ja y'anda'akwani.

³³ Nayide'ents idø'on ja nbiktaajki ku ja ayo'on jade'en x'ejxtit, jade'ents meets ja xnijawit jøts ku wyingøñ juuni ja tiidyu'unin ñaxkida'akt, tyim'yixaanid dø'on ja wyinaty jøts ja jade'en yjatt.

³⁴ Jade'en øts idø'on nwa'añ, jøts ku ja jaayi jade'en yjatt namga'anim y'oo'køxti pøn jaty ja juky'ajttip ixyam.

³⁵ Najxp y'ity yø naajx tsajp, øy yø juuni kyudigø'ty, jøts øts n'ayuujk nijuuni yø kyakixy kyanaxy kunim jade'en tyimyjatt.

³⁶ 'Ka'ats pøn tnijawi pøni ti xøøw pøni ti jumøjt ja jade'en yjatt, ni ja anklisjøtk ja tkanijawidi pøn jap tsajpøtpyti, jøts ni øts ja kø'øm nganijawi. Tu'ugyi ja Dios Teety ja tnijawi.

³⁷ Nayide'en sam ja Noé yajty, nayide'ents jadigojk yjatt ku ø nme'ent.

³⁸ Ku dø'on jekyip, ku ja ayo'onduu wyinaty ka'anim myiñ, jøts ja jaa'y wyinaty yikxon yjanchkaydi yjanch'uukti jotkujk, pømbi amajtskip, pømbi y'u'nk ñøøx jam tni'adso'owip jøts yaa'byøkt, jaabaat jade'en yjaaktyimy'adø'øtsti ku ja Noé tyøjkiyi'ñ jap møj barkijøtpy;

³⁹ jøts nigidiyi ja tyim'yejxtøø ku ja møktuu ku ayo'onduu myiñ, jøts ja nøøgom ja ojts yiktso'onguixyidi. Nayide'ents idø'on nøjx yjaty ku ø nmemit, ka'ap pøn xjøp'ejxtit.

⁴⁰ Winaagin jaa'y jam wyinaty namajtsk tyundi jam kamjotp; tu'uks ja ñitso'ok'att jøts jadu'uk wyindigø'ty.

⁴¹ jøts winaagin tø'oxyøjk jam wyinaty namajtsk yjøtsti; tu'uks ja ñayide'en ñitso'ok'att jøts jadu'uk wyindigø'ty.

⁴² Nayjøp'ejxidits meets, kumi ka' xnijawidi pøni juuni ø nme'ent.

⁴³ Ukmadowdam ya'at, ku n'ukmadyaajkint ku pøn kudøjk wyinaty t'uknijawi juuni yja'att ja maa'tspi ku koots, çti jats ja juky kyadsunaxt, ti jaa ja tmajtstu'utt ja tyøjk jøts wan ja maa'tspi tyik'awa'tsnidi?

⁴⁴ Paty idø'on nnøjmidi, jøts jøp'ijxy xyik'ettit yam meets ja xkagumay ku øts jotmøñ nme'ent.

Ja ødyumbi ejx'ejtpi

⁴⁵ Pømbi tumbi dø'on wijy, ja'ats idø'on ja tyim'yida'amp pøn jaty ja windsøn jam yiktsinaapy tyøjkjotp, jøts ja abaadi tmo'ot kyaaky yji'kxy.

⁴⁶ Çkidi ja'ajip nekim pøn ja wyindsøn paajtip, jøts ku ja ixam ka'pxy tpaduñ sa ja tø yik'ane'emy ku ja wyindsøn yja'aty?

47 Janch øts idø'øn nwa'añ, ja'abi tumbi dø'øn ja windsøn pyikta'akp jøts ja tuk'ejx'ett tuki'iyi pøni ti jaty ja jam yjagyeyjy.

48 Kuts ja tumbi kya'øy'att, ku nichøky wyinma'aty jøts ku wyindsøn ka' chojkja'aty,

49 jøts ja tjemdumbinaxwa'jki ttedumbinaxwa'jki ja wyindsøn tyumbi, uk myu'ugyi kyu'uxyi møøt ja amu'ukyjaa'dyi,

50 jøts kuts ja wyindsøn wyimbett agumoni yam ja tkajøp'ijxy ja'abi xøøw;

51 jøts ja yikxon tyagubatit, nayide'en yiktu'unt sam ja jaa'dyi pøn ja win'øø'nk ttunk'ajtip. Jøts ya'axt yj'øt tmiwingidsetst tmi'agidsetst ja ayo'on.

25

Ku ja Jesús tmadyakpaajty nimajk ja kiixye' una'jk

1 Jøts ja Dios kyutujk jade'en yjatt midi yjaa'y ja tyanitanaapy sam nimajk ja kiixye' una'jkindi, midi ja yjaj ojts t'ukondi jøts ja tminøjkxti mā ja jaa'y jam y'amajtskiwya'andi, jøts ja jemyaa'y twindsø'øgiwya'andi.

2 Nimagoxk ka' ti møj tjawidi, jøts ja nimagoxk janchwijy ja yjaa'y'atti.

3 Pønts ka' ti møj tjawidi ku ja tkondi yjaj, nika'ap ñøø ja ojts tkojnidi, ka'ap ja te midi ja tyukta'utstip jadigojk ku ja kyøxt ja yjaj;

4 pønts wijtyi ojts ja abiky tkondi ja nøø midi ja yjaj tyukatøødyip, jøts abiky ja' midi ja jaj jap yjaakmøø'tajty.

5 Jøts kumi ka'ap ja jemyaa'y chojkja'tni, xjats ja niduki'iyi maa'y'øøgyi pyaajtniyidøø, jøts ja ojts yjadyimy'ukma'oo'køjxnidi.

6 Xjats tsuu'm et tmadoodøø ja ayuujk kuk yjawi wya'añ møk: “iħxa myiñ ja jemyaa'y; pidsømdi jøts xjøpkubaadidit!”

7 Jøts ja kiixye' una'jk pyidø'køjxtøø, jøts ja yjaj ja t'a'ejxidøø.

8 Jøts ja ñimagoxkpi midi ka'ap øy ti tmøjawidi, ja'ats ja yjanimagoxkpi tnimaadyøø midi wijtyi midi winmaadyip: “Møøky øøts yø mjañnøø waani, oo'knip øøts yø njaj.”

9 Jøts ja ñimagoxkpi y'adsoodøø: “Ka' øøts yø nyaky, ku øøts inet yø nyakt ka' øøts inet nja' tpaatt, jøts ni meets inet mja' yø tkaatmit. Jam ne'egi mninøjkxtit mā tyøøgyi jøts jam mnadyanijuyidit.”

10 Īxam ja wyinaty tø tyimñøjkxti jøts ja t'atsjuuwya'andi ja jajnøø, ku ja jemyaa'y yja'jty. Jade'ents ja tøjkididi pøn a'ejxi nayjagyajpidip, jøts ja ojts tmøøtøkidi ja jemyaa'y mā ja jap y'amajtskiwya'añ, jøts ja tøjkaaw y'adujknaa.

11 Jøts ja yjanimagoxkpi kiixye' oojknim yja'ukja'tnidøø, jøts ja yja'ukwanidi: “iYik'awa'ats windsøn yø tøjk!”

12 Jøts ja ojts yide'en yik'adsowdi: “Ka'axi mee nnijawi pøni mbøn meets.”

13 Jøts idø'øn ja nwindsøn'ajtim Jesús ja pyabøjkpitøjki yide'en tnimaay:

—Jøp'ijxy mnanky'etidit, kidi nugo mdyimyaanøjkxti, kumi ka' xñijawidi pøni juuni øts ja tiidyu'unin nmime'ent.

Ku ja Jesús tmadyakpaajty ja tumbiktøjki pøn ja wyindsøn ja myeeñ tyaniipiki:

14 Nayide'en idø'øn Dios kyutujk midi yjaa'y ja tyanitanaapy, sam tu'uk jaa'y wyinaty choonwani, jøts ja ñøjkwani abiknaajx abikyajp, winets ja ojts twaadsøy pøn jaty ja jam yiktumpy jøts ja ttanipijky ja myeeñ.

15 'Tu'uk tmøoy magoxk mil, jøts jadu'uk majtsk mil, jøts jadu'uk tukmil, jade'en ja ojts tmøoy sa pønjabøn ja wijy'ajtin tmøodi. Jøts ja chøø'n ñijky widejtpi abiky'et.

16 Ja tumbi pøn ja meen yikmøoy magoxk mil, ojts ja tta'ajuy tta'agajpxy jøts ja tyik'u'nkjajty ja nayidinø'n.

17 Nayide'en jadu'uk ja meen ojts tyiktunkpatmi pøn yikmøoy majtsk mil, jøts jaa ja nayide'en tyik'u'nkjajty majtsk mil.

18 Pønts ja meen yikmøoy tukmil, myidso'on ja' jøts ja ayu'uch etjotp tu'uk ja jut tyik'ø'yiyi'ñ, japtis ja meen ja tñitajy.

19 'Xjats kyimjekñim ja tumbitøjk wyindsøn wyimbijty, xjats ja tyikwingukidi ja meen.

20 Jawyeen yja'jty pøn ja meen wyinaty tø yikmø'oy magoxk mil, jøts ja tjaakmøoy jamagoxk mil ja wyindsøn midi ja wyinaty tø tyik'u'ngi, yide'en ja tñimaay: "Magoxk milxi, windsøn, ojts xyaky ja meen, icyats jamagoxk mil midi tø nyik'u'ngi."

21 Xjats ja windsøn ja ojts y'adsøyi: "Øy'ajtp, øy idø'on mduñ jøts øy idø'on mjaa'y'aty; nayide'en sam øy tø x'ejx'ity yø meen øy yø kyamaabaadi, ndanipøkp inet ja myayjawibi. Jøts ya men, nax, jøts jawaani may xpøkt ja n'øy'ajtin."

22 Jøts jadu'uk yja'tmi pøn ja meen yikmøoy majtsk mil, jøts ja wyaañ: "Windsøn, icya ja meen majtsk mil midi øts ojts xmø'oy, jøts icya ja majtsk mil midi tø nyik'u'ngi."

23 Jøts ja wyindsøn ja y'adsoji: "Øy'ajtp, øy idø'on mduñ jøts øy idø'on mjaa'y'aty; nayide'ents sa tø x'ejx'ity yø meen øy yø kyamaabaadi, njaakmo'opts nayide'en jawaani may. Men, tøki ndøjkjøjty, paat ja m'øy'ajtin."

24 Jøts ku yja'jty ja tumbi pøn ja meen wyinaty tø yikmø'oy tukmil, yide'en ja tñimaay ja wyindsøn: "Windsøn, nnija'wipxi øts ku mets ka' ti jadi'iñi xnajtsjawí, ja'baat me xpayø'oy øy mets ja xjagaja'aji, myikpidø'økwambyaät mets ja pikta'aky øy me mjagani'ipy.

25 Paty ø ndsø'øgi, paty øts ojts n'atsyu'uch ja meen jap naxjøtpy. Ixyats ja', pø mja'ajtpxi yø'."

26 Jøts ja wyindsøn ja ojts yide'en y'adsøyiyi: "Tsaachnuuxjaa'y mets ka'ødyumbi, pøni mnija'wip tam ku øts jade'en njaa'y'aty, ku øts nbøkmuky midi ø ngapiktakpy, ku øts ja xijy nyikpidø'økt paat midi ø ka' nni'ipy,

27 jøts tti kuts øts ja nmeen tø xka'anuu'kxyajki, jøts ja meengyojpk ja jeexyit tø nbaaty møøt ja meen'u'nk ku tø nja'aty?"

28 Winets ja windsøn tñimaay ja jaa'y pøn jaty jam wyinaty jam'ajttip: "Pøjxidi yø meen midi tukmil, jøts ja xmo'odit pøn ja yja' majk mil.

29 Pøn ja yja' jam, jaaktyimyikmo'opts ja', jøts ja may'ampy tjagyapt; pønts niti tkamøøt'ajtp, jøts ku jap yii'nim tjaakjamøødi, ja'baats ja yjaaktyimyikpøjxit.

30 Yø yjade'embu tumbi midi niti kawamp, ixep wibejpidso'mdi agugootstupy, japtis ya'axt yjø'øt tñiwingidsetst tmi'agidsetst ja ayo'on."

Ku ja naxwii'ñit jaa'y yiktidyu'undit

31 'Ku ø nme'ent windsøn'ajtpi, ni'awidity niduki'iyi ja ankilistøjk nmøøtme'ent, jøts ø n'ixa'akt jam kunuu'kxy kyutujktaajk jøp'am.

32 Jøts ja naḡwii'ñit jaá'y niduki'iyi ñamyukidit øts nwingujkp, jøts øts ja nwejtswa'kxstit jade'en sam ja jiyujk'ejxpi ja byorreek t'awojpakyin møøt ja chiibi.

33 Aga'ñ'ampy øts ja borreek nbikta'akt jøts anajy'ampy ja chiibi ndejnt.

34 Jøts winets ø nnøjmít ja n'aga'ñ'ambyitti: "Ya mendi pøn tø tpaajtidi ja Dios Teety kyunuu'kxin; kupøjkidi ja Dios kyutujk midí yjaa'y ja tyanitanaapy, jaayip yø myiktanibiktaajkníyidi ku Dios ja naḡwii'ñit tyik'øiyii'ñ.

35 Tø nyu'øøky nxø'øøky, meetsts ojts xyikay; tø øts adøødsi n'ity, jøts meets ojts xyik'uuky; jøts ku øts ojts nja'aty ndsøøñ øy magajp, meets ojts xmø'øy nja'ataajk.

36 Ku øts nwet ojts xka'ejtxi, meets ja ojts xmø'øy; jøts ku øts ojts nbikyí, meets ojts x'atskajpxjot'amøki; ku øts ojts nyiktsumy, jap meets ojts xkugajpxi."

37 Jøts pønts wyinaty tø yikupøkti jøts øts ja xnøjmidit: "Windsøn'ajtim, ¿windixik me n'ijxy jøts ku me myu'øøky, jøts øø nyaky kaaky? ¿Uk windits me myik'ijxy mdøødsi, jøts øø nyaky ja nøø?

38 ¿Uk windits øø n'ijxy jøts ku me mja'aty mdsøøñ mā jaty kajp, jøts øø nyaky ja ja'taajk, uk windits øts ja wet naamy nyaky? ¿Juuni øøts ja tø n'uk'ixy jøts ku ja mga'ejtxiyi?

39 ¿Uk windits me m'ukyik'ijxy jøts ku me mbikyí, uk windi øø n'uk'ijxy ku me myiktsumy, jøts øø n'atsku'ejxi jap puxøjkjøtpy?"

40 Jøts yide'en ø n'adso'ot: "Janch øts idø'øn nwa'añ, øy yiini wyaani midí tø xuujnidi, midí øts tø xmøøjyidi ja nmigu'uk pøn ka'ejtxidip ja pudøjkin, øts idø'øn ja jade'en ñamyayi tø xundi."

41 'Winets øts ja nnøjmidit ja n'anajy'ambyitti: "Jiwa'akti, kidi øts ya xwin'ejxti meets kawindiidyumbidi; nøjkxti jap mā ja jøøn jap nijuuni kya'øøky, midí ja miku' yiktajøp'ejxtip møøt ja miku'ankestøjkti.

42 Tøxi ø nyu'øøky, jøts meets ojts ka' xmø'øy ja ngaaky; ojts ø ndøødsi, jøts meets ojts ka' xyik'uuky;

43 ojts ø nja'aty ndsøøñ mā jaty kajp, jøts mee ka' xyikja'taajky. Ku øts nwet ojts kya'ity, jøts meets ja nwet ojts ka' xmø'øy; ka' meets ojts xku'ejxi ku øts ojts nbikyí, ku øts ojts nyiktsumy."

44 Jøts øts ja xnøjmidit: "Windsøn'ajtim, ¿windixik me n'ijxy jøts ku mets wyinaty yuu xøøw myik'ookwa'aniyi, uk tøødsi wyinaty myik'ookwa'aniyi, uk ku me mja'aty mdsøøñ øy magajp, uk ku mwet mnaamy kya'ityxi, uk mbikyí m'añi, uk myiktsumy myiktiy, jøts øøts idø'øn niti pudøjkin nguidy-imdyuñ?"

45 Jøts øts ja yide'en n'adso'odit: "Janch øts idø'øn nwa'añ, øy yiini wyaani jøts ku ka' tø xuujnidi niti pudøjkin pøn ja ayo'on tyanaxpy, ni øts køjxp ja tø xkatuujnidi."

46 Winets ja jatyí ñøjkxtit ayoobi xemikøjxp, jøts pøn wyinaty yikupøkti jøts ja ñøjxmídit tsinaabyí xemikøjxp mā ja tpaajtidit ja Dios kyunuu'kxin jøts ja tsinaa'yin øy yikxon.

26

Ku ja Jesús yikajpxy'aty sudso ja yikmatst

1 Ku ja nwindsøn'ajtim Jesús jade'en y'ukwañ'abajtiyí'ñ, jøts ja tnimaay ja pyabøjkpøjk:

² —Mnija'widipxi jøts ku ja paski xøøw ja majtsk xøøwni; jade'ents ø nyikøyakt jøts øts jaa'y xyikruspattit.

³ Jøts ñiñajatyi ñamyujkidøø ja teetywindsøndøjkti, ja kajpxwejpitøjkti, jøts ja israelit møjaa'dyøjkti, jam ja tøjkwemp ñamyujkidøø ma ja Caifás jam kyutu-
jktaaajk midì ja teetywindsøndøjk wyindsøn'ajttip.

⁴ Jam ja ojts tkajpxy'atti jøts ja ttanibiktaajkidøø sudso ja yikniðaaayit ja nwindson'ajtim Jesús jøts ja tyimyatstit, jøts ja tyimyk'ooktit.

⁵ Jøts yide'en idø'øn ja wyandøø:

—Ka' y'øyt ku xøjøøjty jade'en ndu'unindit, jøts jaa'y kidi xem yam nañibidi'igyidi.

Ku ja Jesús yiktagutajmji'iky ja pa'akxuu'kp

⁶ Jøts ja nwindson'ajtim Jesús jam ja wyinaty Betania, jam Simón tyøjkwindum pøn ja møj pu'uts pa'am pøjkip;

⁷ Jøts tø'øxyøjk ja jam ñimejni pøn t'ukoon tukmøj abøjk'i'ñu'nk ja aceite midì pa'akxuu'kp, ujtskoni ja tmimiiñ jøts ja'abi midì idø'øn janch tsowi. Xjats ku ja nwindson'ajtim Jesús jam wyinaty tø twingu'ixaaagi ja mesi, winets ja tø'øxyøjk tpiktaajky ja aceite midì pa'akxuu'kp jam nwindson'ajtim Jesús kyubajkøjxp.

⁸ Jøts ku ja pyabøjkpitøjk jade'en ojts t'ejxti, jøts ja yjantyimy'ambøjktøø jøts ñømbinaxwa'ktøø:

—¿Jøts tigøjxp ku yø jade'en nugo wyindigøy?

⁹ Tøxik yø jeexyip yiktøøky jøts maamyeen jeexyip yikpøjpk, jøts ayoobi jaa'y ja jeexyip yiktabudøkidi.

¹⁰ Tyimyadoow ja nwindson'ajtim Jesús ja', jøts ja tnimaay ja pyabøjkpitøjk: —¿Tigøjxp ku yø tø'øxyøjk jade'en jotkøjxpim xnøjmidì? Pø yø'øxi dø'øn øy'ajtp ku øts yø jade'en tø xuñ.

¹¹ Jaakmibaat yø ayoobi jaa'dyi, ka'axi yø ma ñøjkxti, ejtpyim yø xmøø'tejtkunaxtit; øtsts ka', ka' mee xumi ya nwindsonaagyunaxt.

¹² Yø' midì'ibi yø tø'øxyøjk tø ttuñ, ku øts nne'kx aceite yø tø xpiktaajkiyi midì pa'akxuu'kp, ja'agøjxp yø jade'en tø ttuñ kuts ja n'o'jkin wyingoni.

¹³ Janch øts idø'øn nwa'añ, ømyadso'att pøni ma yikajpxwa'kxy ya'at øgyajpxy ya'at ømyadya'aky midì tnigajpxp sa nitso'ok'ajtin yikpaaty, jøts yiktukmidøy ja naxwii'ñit jaa'y, yikajpxpim yikmadya'akpim yø' midì yø tø'øxyøjk yam tø ttuñ.

Ku ja Judas ñay'awajniyi jøts ja tkøyakt ja Jesús

¹⁴ Xjats ja'adu'ugin ja ñimakmajtskpi pabøjkpitøjkti, pøn txøøw'ajtp Judas Iscariote, ja' ojts tñinijxy ja teetywindsøndøjkti, jøts ja ojts tminagyajpxyi,

¹⁵ yide'en ja tnimaay:

—¿Wine'en ø xmiju'udyit jøts øts ja nwindson'ajtim Jesús ngøyakt?

Xjats ja ojts tmijuydi ee'pxmajk, jade'en ja meeñ ja ojts tmo'odi tum puxplati.

¹⁶ Jøts jaayip ja Judas ja twinmaa'ñ'ajtni juuni ja tjadyimy'ukøyakt ja nwindson'ajtim Jesús.

Ku nwindson'ajtim yjaak'uk'a'ux'ajtni møøt ja pyabøjkpitøjk

¹⁷ Xjats ku ja xøøw midukxøøw tyuujnøø, ku ka' pyaat'aty jøts ja tsapkaaky yika'aty levaduri møøt, ja'abi xøøwts idø'øn ku ja nwindson'ajtim Jesús ja pyabøjkpitøjk ñimejniyi wingon jøts ja ojts tyiibyikyiyi, yide'en ja wyandøø:

—¿Ma xtsøky nyiknajxint ja paski a'ux jøts øøts ja n'a'ejxit?

18 Jøts ja tnimaay:

—Nøjkxti jam kajjotp ma chøøni ja jaa'y, tø xnijawidi pøni pøn, ja'ats mnøjmidi: "Yide'en ja windsøn wya'añ: Wingomp øts ja n'o'jkin, jøts mets mnøjkjøtp øts ja paski a'ux nyiknaçw'a'añ møøt øts ja nbabøjkpitøjk."

19 Jøts ja ojts jade'en tpadundi sa ja nwindson'ajtim Jesús ja wyinaty tø y'ane'emyidi, ojts ja tyik'øyiidi ja paski kaaky jøts ja yik'a'ux'att.

20 Xjats ku kyoodsiyi'iñ, winets ja nwindson'ajtim Jesús tmøøt'ixajky nimakmajtsk ja pyabøjkpitøjk ma ja mesi jam wyinaty;

21 jøts ixam wyinaty tyimgyaydi ku tnimaay ja pyabøjkpitøjk:

—Janch øts idø'øn nwa'añ jøts ku mee nidu'ugin amaa'tsk'ampy xkøyakw'a'añ.

22 Jøts ja yjotmadyøjkidøø, jøts xem yam wyandøjkidøø:

—Çøts me windsøn'ajtim ndejint xejp?

23 Jøts nwindson'ajtim Jesús ja ojts yide'en y'adsøyiidi:

—Pøn ø møøt tø ngay tø nji'i'kxy, ja'ats øts idø'øn xkøyakwamp.

24 Janch jajtp øts inet ixyam jade'en sam ja Dios kyajpxy wya'añ. iYjanch ayøøy ja jaa'y'u'nk pøn x'ukøyajk'oo'kp! Ne'egi tyimdyøøbik jeexyip ku jeexyip kyidyimgye'exy.

25 Winets ja Judas ojts kyajpxy, pøn idø'øn wyinaty køyakwajnip, jøts ja wya'añ:

—Windsøn, çti wan ja ndejin y'øtsi?

Jøts nwindson'ajtim Jesús ja t'adsøøy:

—Paty mets.

26 Ixam wyinaty kyaydi, jøts ja nwindson'ajtim Jesús tnixajiyi'iñ tu'uk ja tsapkaaky, jøts ja ttukmøja'wiyi'iñ ttukunuu'kxyja'wiyi'iñ ja Dios Teety, jøts ja ojts t'adujkpaky, winets ja tmøøy ja pyabøjkpitøjk, yide'en ja wya'añ:

—Kaydi ya'at; yø' øts idø'øn ñamyayi nne'kx'ajtpy.

27 Winets ja tnixajigyoyi tu'uk ja uuik'i'iñ, jøts ja ojts ttukmøjawi ttukunuu'kxyjawi ja Dios Teety, jøts ja ojts tmø'øy ja pyabøjkpitøjk, jøts ja t'ukwa'kxtit, yide'en ja tnimaay:

—Uukti ya'at niduki'iyi,

28 øts idø'øn yø' ñamyayi nni'jpy midi yam jadigojk tñankñamyi'øbyøjkp ja jaa'y møøt Dios, midi ø nyikwidsump nyikwidajpxy ja'agøjpx jøts pojkpitumbi jaa'y yikpojkipmaa'kxtit, jøts ja Dios Teety ja wyanda'aky jade'en tyik'adukt.

29 Janch øts idø'øn nwa'añ jøts ku øts ya'at uvi nøø ka' tsojk n'uk'uknit, jaanim jadigojk n'uujkindit jotkujk ku Dios Teety ja kyutujk tyiknaçkida'akt midi yjaa'y ja tyanitanaapy.

Ku Jesús ja ojts kø'øm tñigajpxy jøts ku Pedro ja kyu'øønyit

30 Xjats ku ja t'øøgøjxtøø ja iy midi ja Dios yja'ajpty, winets ja ñøjkxtøø jam kojpkjøxp midi yiktejp Olivos.

31 Jamts ja nwindson'ajtim Jesús ja ojts ñi'i'mxyidi:

—Kuwanì meets inet xmajstutkøxt ya'atpi koots; pø yide'enxi jap nøkyijpxy wya'añ: "Nyik'ookp øts ja borreegi ejxpi, wan ja byorreek jadi'iñi tyø'øwya'kxy."

32 Kuts øts ja o'jkin n'ukmimajada'akt ku øts jadigojk njujkpyøkt jøts ø nbidsøømt jap oo'kpi jutjøtpy, winets ø nnøjkxt jawyeen jam Galilea, namga'anì meets jam wyinaty mnijky.

33 Xjats ja Pedro ja ojts y'adsøyiidi:

—Øy me niduki'iyi jaa'y mjaaja'dyigøøgyixyi, øts niwindem ø ngaja'dyigøy.

³⁴ Winets nwindson'ajtim Jesús ja yide'en tnimaay:

—Janch øts idø'on nwa'añ, jøts ku yam koots inet ku ka'ap tsapni'aaw y'ayajxi'ikñim, tigøok ojk mets wyinaty tø xku'iñ jøts ku me xka'ijxy'aty.

³⁵ Jøts ja Pedro tjaaktyimñimaay ja nwindson'ajtim:

—Niжуuni øts jade'en nga'adi'ich, njadyimya'øoky me møøt.

Jøts ja yjadu'ukpimidi, nayide'en ja wyamidi.

Ku ja Jesús t'ajot'ajty ja Dios Teety jam Getsemani

³⁶ Jøts idø'on ja nwindson'ajtim Jesús tmøøtja'jty ja pyabøjkpitøjk ma ja et jam txøøwi Getsemani, jamts ja tnimaay:

—Ya awejxti, wan øts ja Dios Teety t'ats'ajot'aty.

³⁷ Jøts ja tmøødiyii'ñ ja Pedro møøt namajtsk ja Zebedeo y'una'jk, jøts ja jotmay yjanchtatøjkiniyi.

³⁸ Xjats ja tnimaay ja pyabøjkpi midi ja y'ukwaaw nidigøok:

—Janch køjxp øts njoajt jadi'iñi, o'jkin'ampy ø tø njotmaadyøki. Awejxtits ya, kidim mma'oo'knidi, møøtwijy'ejtik øts.

³⁹ Winets ja nwindson'ajtim Jesús jawaani yjaaknajtsyø'øyiyii'ñ, jøts ja ojts jadi'iñi ñagyuxendya'agiyi, jøts ja ojts t'ajot'aty ja Dios Teety, yide'en ja wyaañ:

—Dios Teety, øyik jade'en xjanchkayikjatt, jøts øts kidi jadine'en ayo'on ndyimbyaaty; øy idø'on kidyimjade'eni sam ø ndyimyjatsøkyin, jade'en øts idø'on ngupøkt pøni sa me xamidsøky.

⁴⁰ Xjats ja wyimbijty nay jam ma ja pyabøjkpi jam wyinaty nidigøok tø t'ukyiktañ, kuts ja tpaajty tødamik ja mya'oo'knidi; winets ja ojts tnøjmi ja Pedro:

—¿Niwine'enin mee tø mguidyimyjada'aky jøts meets jeexyip xmøøtwijy'ity?

⁴¹ Wejti kajti, ajot'ajtti ja Dios Teety, nay'ejx'etidi jøts kidi mmimajada'agidi ja ayo'on midi wingomp. Janch øts idø'on nwa'añ ku ja winmaa'ñ yjanchja'ødyunwa'añ, ja ne'kxts jaayi ja ka'øybi tumbi amutsk'ejxiyip.

⁴² Xjats ojts ñøjkxkojmi nay jam jadigojk, winets ojts yide'en t'ajot'aty ja Dios Teety:

—Dios Teety, pøni ka'ap jade'en xyikjaty jøts øts ja ayo'on xkadukpaatt, wants idø'on jade'en tjaty pøni sa me kø'øm xamidsøky.

⁴³ Xjats jam yjaakwimbijty jøts ja pyabøjkpitøjk jadigojk tpatkojmaa, janchmaa'dip ja jam, wimbeets ja tsuu ja yik'ejtniyidi.

⁴⁴ Jøts ja nay jam tnikejky, jøts midigøok ojk ñijxxy Dios Teety ajot'ajtpi, nayide'en wyangojmaa.

⁴⁵ Winetnimts ojts ñijxxy ma ja pyabøjkpitøjk jam wyinaty, jøts ja tnimaay:

—Tøts inet, maanidi poo'kxnsidi, wan jade'en tjaty. Tø dø'on tyimbyaaty jøts ku ø nyikøyakt jøts ø nyiktigidøkit ja pojkpitumbi jaa'dyi.

⁴⁶ Pidø'økti, wan tjaa'myindi; ixa wyingøñ pøn ø xkøyakwamp.

Ku ja Jesús yikmajch

⁴⁷ Nay ixamnim ja nwindson'ajtim Jesús wyinaty jade'en wya'añ ku yja'jty ja Judas, pøn ja y'ukpabøjkpi'ajtpy jøts ja møøt tyika'pxy nimakmajtsk ja pyabøjkpitøjk, ja'ats idø'on jam tmøøtmeen ja mayjaa'y tum tsujx møøt jøts tum kipkyapidi. Ja teetywindsøndøjk, ja israelit mōjaa'dyøjk, ja' dø'on ja kajxidip.

⁴⁸ Jøts ja Judas, pøn ja nwindson'ajtim tkøyajkp, yide'en ja wyinaty ja tiy'ajtin tø tyaky, yide'en ja wyinaty tø wya'añ:

—Pøni pøn øts inet ndsu'kxpy, ja' idø'on ja wyinaty; jøts ja' idø'on mmatstip.

49 Xjats ja myiñ jøts ja nwindson'ajtim Jesús yiknimiñ, yide'en ja tnimaay:
—¿Øts windsøn memp!

Jøts ja ojts ttsu'kxy.

50 Jøts ja nwindson'ajtim Jesús ja ojts yide'en y'adsøiyi:

—¿Ti migu'uk mnimimpy? ¿Ti mdsøjkpy?

Winets ja jaa'y ja wingon ñimejniyøø jøts yiknixajiyiñ ja nwindson'ajtim Jesús, ojts yikmajtsni.

51 Winets tu'uk ja nwindson'ajtim Jesús myigu'uk tju'jty tu'uk ja tsujx, jøts ja ojts ttaxikpo'otu'uty tu'uk ja teetywindsøn tyumbi.

52 Winets ja nwindson'ajtim Jesús ja tnimaay:

—Ødyuñ yø mdsujx nay jap xtyimbyiktá'akt ma yø tø xjuuty. Pøni pøn ttatseptump ja tsujx, nay ja'ats ja tya'ookp.

53 ¿Ka' xnijawi jøts ku øts jotmøn n'amido'ot ja Dios Teety, jøts øts ja xanigaxt ixamyi naxy nimakmajtsk piky ja ankilistøjk midi tseptundip?

54 Kuts ja jade'en yjatt, ¿ti jats jade'en y'adukt ja Dios kyajpxy? Pø yide'enxi ja wya'añ jøts ku tyimjade'en yjatt sa dø'on yam yjatwa'añin.

55 Xjats ja nwindson'ajtim Jesús tnimaay ja mayjaa'y:

—ja tsujx, ja kipy, ja tsaa meets yam x'uktanimenip, tø øts yjawi nmaa'tsni! Ejtp meets jam y'ijty jabom jabom nmøøt'ixakunaxy, jøts mee nyik'ixpiky jam tsaptøjkjotp, ¿tikuts øts jamyi xkamajstøø?

56 Ja'agøjpx ya'at jade'en yjaty jøts ka'pxy pyidsø'omt sa jaty ja Dios kyuga-jpxy wyandøø, ku ja tniqajpxidi ja Dios kyajpxy.

Winets ja nwindson'ajtim Jesús pyabøjkpitøjk ojts kyaakøxti jøts ja nadyu'uk y'ukyikmajstutnaa.

Ku ja Jesús yikwaañjky jam kutujktaajjotp

57 Jøts ja jaa'dyi pøn ja majtsiyi, jam ja tyiknøjkxti Caifás wyindum, ja teetywindsøndøjk myøjwindsøndi ma wyinaty tø ñamykyidi ja kajpxwejpitøjkti møøt ja møjaa'dyøjkti.

58 Jøts ja Pedro ja ojts pyanijkxyi, jagam ja pyayø'øyi jøts ja ojts tpaja'aty jap møj windsøn tyø'agui'py, jøts ja jap tyøjkijyiñ jøts ja tmøøt'ixaajky ja ejx'ejtpitøjkti, jøts ja t'ejxwa'añ sa dø'on ja yjade'embi yjadyimy'ukugøxit.

59 Jøts ja teetywindsøndøjkti, jøts ja møjaa'dyøjkti, jøts niduki'yiyi ja kutujk adsinaabyidi, ja' ja yjadyimy'ixaadyip ti ja yjadyimy'uktani'øønidip ja nwindson'ajtim Jesús, øy ja yjagajade'eni jøts ja ttaguwaniwya'andi ja o'jkin.

60 Ja'ats kyapattip sudso tyiidyøkit, may ja jaa'y yjamendøø, jøts ja tjadyimñi'øø'ndaagidi ja nwindson'ajtim. Xjats yja'tinim namajtsk ja ni'øø'ndaajkibidi midi ñadyijyi tsaach'a'ejxnaxtip,

61 jøts ja yide'en wyandøø:

—Yø jaa'y yide'en waan: “Ixe øts yø Dios chaptøjk nyikiday, jøts øts yø kyidigøøk xøøw nyik'øyigoyjmit.”

62 Winets ja teetywindsøndøjk myøjwindsøn wya'kukiyiñ, jøts ja nwindson'ajtim Jesús yik'amidøøy:

—¿Niwine'enin yø xka'adsowimbetwa'añ? ¿Ti dø'on yø'ixa jade'en myik-tani'øøni?

63 Jøts ja Jesús ka'ap ja ojts t'adsøy. Xjats ja wyindsøn ojts ñi'mxyi:

—Tuk'eix Dios, jøts xnigajpxt tiy janch. Tukmadook øøts pøni mets idø'on mjanchCristo pøn ja Dios Teety y'u'nk'ajtpy.

64 Jøts ja nwindson'ajtim Jesús ja tnimaay:

—Øts ja', sam ixa tø mwa'añin. Jøts nayi ndukmadoodip ixyam jøts ku ø x'ejxtit ku n'ixa'akt jam Dios Teety kyutujktaajj jøp'am.

⁶⁵ Winets ja teetywindsøndøjk myøjwindsøn ttakø'jtsiyii'ñ ja wyet, jøts ja wyaañ:

—Tø ya'at jaa'y tmigajpxigøj ja Dios; çti ejxpi ti ni ja'wibi jaaktsojkiyip? Tøxi xmadøjidi ja y'ayuujk jøts ku kya'øgyajpxy;

⁶⁶ çsa mee m'ukwa'añ?

Xjats ja wyandøø:

—Taja'jtíp pøky yø', wan t'øøky.

⁶⁷ Winets ja ojts twingutsujidi, jøts twojptøø jøts tsee'ktøø, pømbi ja kojxiyip wemp'am,

⁶⁸ jøts ja yiknøjmi:

—Pø metsxi mCristo, ÷uknajtsjaawits pøn tø mgøxyi!

Ku ja Pedro tku'iiñ jøts ku ja ka' t'ijxy'aty ja Jesús

⁶⁹ ÷ap idø'on ja Pedro chøøni tøjkwimpy, jøts ja tu'uk tø'øxyøjk ñimejni midi jam tump, jøts ja ojts ñii'mxyiyi:

—çKidi metsip y'ijty mmøøtwidijtpy yø Jesús midi Galileit etjotp tsoo'mp?

⁷⁰ Ka'ats ja Pedro ja tkupiky ma ja mayjaa'y jam wyinaty, yide'en ja wyaañ:

—Ka' nnijawi pø ti mets jade'en mgajpxpy.

⁷¹ ÷ap ja Pedro wyinaty pyidsømwani ma ja tøjkaaw, ku ja ojts jadu'uk ja tø'øxyøjk y'ijxyi, jøts ja ojts ttukmadøj pøn jam wyinaty:

—Yø jaa'yxi tmøøtwidejtp yø Jesús pøn Nazaret kugajpip.

⁷² Jøts ja Pedro jadigojk tkagupøjkojmi, yide'en ja tyimwyaañ:

—Ka' øts yø jaa'y n'ijxyi.

⁷³ Xjats ku jawaani y'ijty, jøts ja Pedro ja jaa'y ñimejnøø pøn jaty jam wyinaty, jøts ja ojts ñii'mxyiyi:

—Janch nayide'endam mets, nayi Jesús tam me mjanchmigu'uk'ajtpy, kø'ømts yø m'aaw m'ayuujk myikni gaxi'igy.

⁷⁴ Jøts ja Pedro janch wenk ja kø'øm ñawya'añi ñadyiyi, ka'ap ja tyim-gyupiky, tyuk'ejx ja Dios ja', tiy janch ja tyimwya'añ ku ja tka'ijxyi:

—Nguidyimy'ijxy'ajtpy øts yø jaa'y.

Winets ojts nay jaty y'aya'axy tu'uk tsapni'aaw.

⁷⁵ Xjats ja Pedro ja tja'myejchnim ku ja nwindson'ajtim Jesús ja wyinaty tø ñii'mxyiyi: “Yam ja tsapni'aaw kya'aya'axñim, tø mets wyinaty tigøø ojk mwani jøts ku me xka'ijxy'aty.” Jøts ja Pedro jam pyidsiimy, jøts ja nugo y'uk'amyaaxni y'uktsaachyaaxni.

27

Ku ja Jesús yiktagidøjkiyii'ñ ja Pilato

¹ Xjats ku yjøpy'ajty, jøts ja teetywindsøndøjk møøt ja israelit møjaa'dyøjkti ojts ja tkajpxy'atti, jøts ja tu'ugyi tniwinmaa'yidøø jøts ja tyik'ooktit ja nwindson'ajtim Jesús.

² Xjats ja køwiiñ tyiknøjkxti jøts ja yiktagøðøkiyii'ñ ja Poncio Pilato, pøn jam wyinaty windsøn'ajtp.

Ku ja Judas yø'jky

³ Jøts ku ja Judas ojts t'ixy, pøn tkøyajkp ja nwindson'ajtim, jøts ku ja nwindson'ajtim Jesús tø yiktaguwaañ'niñi ja o'jkin, ja'ats ja ojts jadigojk tsaachkuwinmayi jøts ja tyikwimbijty ja meeñ ee'pxmajk tum plati, jade'en ja tkømøøj jadigojk ja teetywindsøndøjk jøts ja israelit møjaa'dyøjkti,

⁴ yide'en ja tnimaay:

—Tø njantyimdyundigøy, møk ø tø njantyimdyundigøy ku øts yø tø ngøyaky jøts yø y'ookt, jøts niti tundigø'øyin yø tkamøøt'aty.

Jøts ja ojts yide'en yik'adsøy:

—Jøts, ζti øøts ja ndungi? ¡Mgø'ømwinmaa'ñxi mets yø!

⁵ Winets ja Judas tñajtswøjyñ'ñ ja meeñ jap tsaptøjkjøtpy, jøts ja chøø'ñ jøts ja ñijkyx nayuktsuujmibi.

⁶ Jøts ja teetywindsøndøjk tkonjø'ktøø ja meeñ jøts ja wyandøø:

—Ka'ap yø kyutujkyi jøts yø meeñ jap ngugo'ona'andit jap limunsi abøjk'ñ'ñjøtpy, kumi jaa'y chow yø'.

⁷ Jøts ja nay jatyi tkajpxy'ajttøø, tyiktunkpaatwa'andi ja meeñ jøts ja taju'udyit naajx jøts y'øyt jadu'uk kami santi ma ñaxøkidit ja jaa'y pøn tsø'ondip abikyajp. Campo del Alfarero, ja' ja naajx xyøøw.

⁸ Ja'agøjxpts ixymbaagt ja naajx yiktijy Ni'jpkjam.

⁹ Jade'ents ja Jeremías ja y'ayuujk tyiñy ku ja Dios ja wyinaty yide'en jekyip yikwa'añyi: “Jøts ja tñixajidøø ja meeñ ee'pxmajk tum plati (Ja' ñimeeñ midi ja Israelit jaa'y ja wyinaty tø pyiktaajkxiyi),

¹⁰ jøts ja ttajuudyøø ja naajx, jade'ents øts ja Dios Teety xnimaay.”

Ku ja Jesús twinguwa'jkijyñ'ñ ja Pilato

¹¹ Jøts idø'øn ja nwindsøn'ajtim Jesús ja jaa'y yiknøjkxiyi jam øyikutujkpi wyingujkp, jøts ja yide'en tyiñbyøjkxiyi:

—ζMets idø'øn israelit jaa'y mjanchniwindsøn'ajtpy?

Jøts ja nwindsøn'ajtim Jesús yide'en tñimaay:

—Janch jade'en idø'øn ja', sam ixa tø mwa'añin.

¹² Jøts ku ja teetywindsøndøjk kyajpxjø'ktøø møøt ja møjaa'dyøjkti, jantyimy'øø'ndip idø'øn ja', jøts ja nwindsøn'ajtim Jesús ja tkidyimy'adsøy.

¹³ Winets ja Pilato ja ñimaajyøø:

—ζKa'ap yø xmadøy sa jaty ixa myikni'øøni?

¹⁴ Jøts ja nwindsøn'ajtim Jesús ka'ap y'adsøy; ja'ats ja yikutujkpi ñigyumaap jya'wiyñ'ñ jøts ka'ap ja y'uktaabyatni.

Ku ja Jesús ñidujkiyñ'ñ jøts ja y'ookt

¹⁵ Jade'ents idø'øn ja yikutujkpi txumikostrumbri'aty ku xøøw tyuñi, jøts ja tu'uk tyik'awa'atspidsimy ja tsumyjaa'y, ja mayjaa'y ja kø'øm twi'ejxtip, pøni pøn ja chojktip ja'ats ja yik'awa'atspidsømdip.

¹⁶ Jamts idø'øn tu'uk ja tsumyjaa'y wyinaty, Barrabás ja xyøøw. Tyimy-janiñawi ja' ku ja møj tundigøøbyi;

¹⁷ jøts ku ja jaa'y ñamyujkøjxidøø, winets ja Pilato yiktiyi:

—ζPømbi mdsojktip jøts ø nyik'awa'atspidsø'ømt: yø Barrabás, uk yø Jesús, midi yiktejp Cristo?

¹⁸ Tøts ja wyinaty tñiñawi ja yikutujkpi jøts ku ja ja'agøjxp tkøyakti ku ja nawyinañxi tjawidi.

¹⁹ Ixam ja Pilato wyinaty chøøni kyutujktaajkjotp, ku ja ñidø'øxy ñimaajyøø: “Ti yø øyjaa'y tø xaniñøjkiñi; majtstu'ut, janch wenk ø ngumaay tsu'uuy yø'øgøjxp.”

²⁰ Jøts ja teetywindsøndøjkti møøt ja møjaa'dyøjkti ojts ja ttukmibøkti ja mayjaa'y jøts ja t'amido'odit jøts wan t'awa'atspidsimy ja Barrabás, jøts y'ookt ja nwindsøn'ajtim Jesús.

²¹ Xjats ja yikutujkpi ja jadigojk ñimaajyidøø, jøts ja ojts tyiktäy:

—ζPømbi mee ndsøjkpy jøts ø nyik'awa'atspidsø'ømt?

Jøts ja mayjaa'y ñømdøø:

—Wan yø Barrabás t'awa'atspidsimy.

22 Jøts ja Pilato tjaaktyiktiy:

—¿Jøts sa øts yø ndu'unt yø Jesús midi yiktejp Cristo?

Jøts ja ojts niduki'iyi y'adsowdi:

—iYikruspat!

23 Winets ja Pilato ja ñimaajyidøø:

—¿Ti tundigø'øyin yø tø ttuñ?

Jøts ja jadigojk jawaani møk wyandøø:

—iYikruspat!

24 Xjats ku ja Pilato ojts t'ixy jøts ku nisudso'ampy kya'øyi, ne'egi jinaxy ja jaa'y tseeni mo'tsni y'adøtsnidi, winets ja nøø ja ojts t'atsnanky'i'iyi, jøts ja kyø'buuj jam mayjaa'y wyingujkp, yide'en ja wyaañ:

—Kidi øtsip wamp jøts yø y'oøkt, ka' øts yø nbøky'ixy. Meets yø mnija'wip pøni sa yø xunwa'andi.

25 Xjats ja jaa'y niduki'iyi y'adsøødøø:

—iNiduki'iyi øøts yø xpaat'aty ja y'o'jkin, nayide'en ja møj ja mutsk, u'nk una'jk, pøn yø kapaadip!

26 Xjats ja Pilato tyik'awa'atspidsimy ja Barrabás; jøts ja ojts tni'ane'emy jøts ja nwindson'ajtim Jesús yikwopt, jøts ja ojts tkøyaky jøts wan tyikruspatti.

27 Jøts nay ja' ja syoldadi tyiknøjkxtøø ja nwindson'ajtim Jesús jam kutu-jktaajk agøø, jøts ja jam ojts twaamujkøxti niduki'iyi ja soldadi, jøts ja ojts tnabekidi ja nwindson'ajtim Jesús.

28 Jøts ja wyet ja ojts tjajniki, jøts ja tsajpts wet ja ttanijandøø,

29 jøts koroni ja ojts ttagujandi tum kujp awiity ja', jøts ja kipy ja ttagø'ajpidøø y'aga'ngyøjøø. Winets ja twinguxanaadyøø jøts ja ojts tjan-chaxe'ekti, yide'en ja tnøjmidi:

—iDios kunuu'kxip ya'at israelit jaa'y wyindsøn!

30 Jøts ja tnitsujidi, jøts ja jamyi tnixajidi ja kipy jøts ja ttaguwojppøøkti.

31 Xjats ku ja jade'en t'uktageyajtøø, t'uknixektøø t'uktaxeektøø, winets ja ttanijanduttøø ja tsajpts wet jøts tpiktaajkidi jadigojk ja kyøø, wet. Jøts ja tyiknøjkxti jøts ja kyiruspatt.

Ku ja Jesús kyiruspejty

32 Tyimy'ixam wyinaty tø choondi ku ojts tpaatti tu'uk jaa'y pøn kugajp'ajtp Cirene, Simón'ajtp ja'; ja'ats ja ojts ttaguwanidi jøts ja ttsøøjmit ja nwindson'ajtim Jesús kyirus.

33 Jøts idøø ja jade'en yja'ttøø ma ja et txøøwi Gólgota, midi yide'en ayuujk pidsøømp: Oo'kpi Kyubajk Pajk.

34 Jamts ja tmøødyi ja vino adaamuky møøt ja ujts ta'am nøø; kuts ja tja'gyajpy xjats ja nika'ap t'uujky.

35 Kuts ja wyinaty tø tyikruspajtnidi, winets ja soldadi tniguyajtidøø ja nwindson'ajtim Jesús wyet, jøts ja ojts twejtswa'kxti. Jade'ents ja Dios kyugajpxy tyimdyiy ja y'ayuujk ku ja wyaañ: “Tø øts nwet ja xwejtswa'kxidi, tø ja tniguyatti jøts ja t'ejxti pøn uktaja'atip.”

36 Winets ja jamyi y'ixaktøø jøts ja t'ejx'etwa'andi.

37 Jøts ja jam y'agubajkp ojts tkøxajyidi ja letri midi wamp jøts ti tyuku'o'jkidip. Yide'en ja wyaañ: “Ya'at idøø txøøw'ajtp Jesús, israelit jaa'y wyindsøndi.”

38 Namajtsk møj maa'tspi ja ojts tmøøtkruspety, tu'uk y'aga'ngyøjøø jøts tu'uk y'anajkyøjøø.

39 Jøts ku jam pøn ñaxy tum wenk ja myigajpxyi, tum kubajkwibejttip ja',

40 jøts ja wya'andi:

—Metsxi xijy tsaptøjk myikidaapy jøts jadigojk xyik'øyi kyidigøøkxøøwyi, wants mga'uk'øøky. Pøni njanchDiosu'nk tam mets, winak jam kruskøjxp.

41 Nayide'en ja tyaxejkmii ja teetywindsøndøjkti ja kajpxwejpitøjkti, ja fariseotøjkti, jøts ja møjaa'dyøjkti, yide'en ja agø'ømyi ñawya'añidi:

42 —Tø wyenkpi tyiktsø'øky, ka'ats tjaty jøts kø'øm ñankcho'ogit. Pøni janchts ku ja Israelit jaa'y tjanchwindsøni, wan jam t'ukwinaky kruskøjxp, jaanims idø'on njanchja'want.

43 Pø Diosxi y'ajoojtíp; wants inet idø'on t'ukpidøkiyi jøts kyayik'ooGIT, pøni janch ku ja yjanchøkyi; tøxi yø kø'øm wya'añ jøts ku yø Dios U'ngi.

44 Ja maa'tspibaat ja nayide'en yjanchka'uk'ømyigajpxmiiyi midí ja jam wyinaty møøt tø kyiruspety.

Ku ja Jesús y'ø'jky

45 Winets ja et kyoodsiyi'ñ kujkxyøøw, jøts møj winakxyøøwnim yjajtaajky jadigojk.

46 Jøts nay jatyi ja nwindsøn'ajtim Jesús møk wya'añ:

—Elí, Elí, ¿lama sabactani? —mídi yide'en tyijpy: Dios Teety, Dios Teety, ¿tigøjxp ku øts jade'en tø xnanktyuñi?

47 Ojts ja winaagin tmadowdi pøn jaty jam wyinatyi, jøts ja ñømdøø:

—Ja Elías yø jaa'y wyaadsøøpy, ja Dios kyugajpxy.

48 Winets ja jatyi nidu'uk putyi t'atskøøñ tu'uk ja tanøxe'jts, jøts ja ojts ttabadijy ja vino ta'am, winets ja kipy jøp'am tkøxkøøñ, jøts ja ojts ta'agonji'iky jøts ja txeetst.

49 Yide'ents abiky wyamidøø:

—Majtstu'ut; wan t'uk'ijxyim pøni janch nimejnip inet ja Elías jøts ja o'jkin kyadukpaadit.

50 Jøts ja nwindsøn'ajtim Jesús jadigojk ojts møk ja y'ayuujk pyidsimy, jøtsnim ja y'o'jky.

51 Winets ja møj tsaptøjk awejtstuk nay jatyi tyakø'øtsiyi'ñ, kubajkp ja kyø'øts'awiyi'ñ jøts ja ok'am kyø'øtskidaajky. Jøts ja uyx ñajxy jøts ja tsaa kyu'kx'awigyijxy,

52 ojts ja oo'kpi nipots may y'awa'ach; jujkpyøjktibaat ja oo'kpídi pøn wyinaty ja Dios tø tjanchjawídi ku ja yjujky'ajttøø.

53 Jøts ja pyidsømdi jap yjutjøtpy ku ja nwindsøn'ajtim Jesús wyinaty tø yjujkpyiky jadigojk, jøts ja kyajptøjkidøø jam Jerusalén mídi ja Dios kyunuu'kxkyajp'ajtpy, ma mayjaa'y ja ojts y'ijxyidi.

54 Xjats ku dø'on ja capitán pøn jaty ja jam wyinaty møøt t'ejx'ity ja nwindsøn'ajtim Jesús, ku ja ojts t'ejxti jøts ku ja uyx ñaxy jøts tuki'iyi sa jaty ojts yjaty, jøts ja yjadyimchø'jkidøø, yide'en ja wyandøø:

—Janch ja' tam yø jaa'y tø y'ity, ja Dios U'nk.

55 Jøts ja maadyø'øxyøjk jam wyinaty a'ejxujktíp jagam, tum ja' pøn jam wyinaty Galilea tø tpadsoondi ja nwindsøn'ajtim Jesús, jøts pøn jaty ja wyinaty tø pyudøkiyi.

56 Ja María Magdalena dø'on jam, jøts jadu'uk ja María pøn ja Jacobo tyaaGip møøt ja José, jøts ja Zebedeo ñidø'øxy.

Ku ja Jesús ja ñine'kx yikpiktaajky jap oo'kpi tsaa jutjøtpy

⁵⁷ Xjats ku ja et yjoo'xni jøts kyoodsiwyani, winets myiñ tu'uk kumeeñ jaa'y pøn txøow'ajtp José, jam ja kyugajpi Arimatea, jøts nayi tø dø'øn ja wyinaty tpabøjki ja nwindson'ajtim Jesús yja'.

⁵⁸ Ja'ats ojts t'ats'ixy ja Pilato jøts ja t'amidøoy ja nwindson'ajtim Jesús ñine'kx. Jøts ja Pilato ja ojts tyikutuky jøts wan tyikømo'øy.

⁵⁹ Winets ja José ja t'axajøø, jøts ja wa'ats wet ja tta'abijty,

⁶⁰ jøts ja t'atspiktaajky jam oo'kpi jutjotp midy ja wyinaty tø tyimyik-jemy'øyinim. Kø'øm jap y'uktøkwyañ mā ja tsaa jut jam. Xjats ku ja møj tsaa ja tu'uk t'ukta'agiñaa mā ja yiknidøki, jøts ja ojts ñøjkxni.

⁶¹ Nay ixam idø'øn ja wyinatymidi ja María Magdalena møøt jadu'uk ja María, jam ja wyinaty chøøniidi jam oo'kpi jut agø'øm.

Ja soldaditøjk pøn jam y'ejx'ejtipp ja oo'kpi jut

⁶² Xjats ku kyimjabom'ajty ku wyinaty tuki'iyi tø yik'a'ejxigyøxni, tum abaadi y'eitni ti jaty tsojkip ku poo'kxin xøow, winets ja teetywindsøndøjk møøt ja fariseotøjk ojts t'ats'ejxti ja Pilato,

⁶³ jøts ja t'atsnimaadyi:

—Windsøn, ja' øøts yam tø nja'myech ku yide'en wyaañ ja windaay'ajtpi jaa'y, ku ja wyinaty jaak ja yjujk'aty, ku ja tijy kyidigøøk xøow yjujkpyøkt jadigojk, jade'en pyidsø'ømt jadigojk jap oo'kpi jutjøtpy.

⁶⁴ Paty jade'en tigøøk xøow xjadyimñanky'ejx'etiti ja oo'kpi jut, jøts ja pyabøjkpitøjk kidi myendi koots jøts ja kidi tmaatsti ja oo'kpi ñine'kx ku ja tnøjmidit ja jaa'y: “Tø ja tmimajada'aky ja o'jkin, tø ja yjujkpyiky jadigojk.” Kuts jade'en tyaa'y'attit, yø'øts ne'egi janchka'ukmaañip, ne'egi ka'ap ja jawyeembi taay.

⁶⁵ Winets ja Pilato ja ñimaajyidøø:

—Ixyadi yø mdsoldadi ka'pxy niwine'enin yø y'ejx'etti. Nøjkxti meets jøts yikxon xyik'adujkøxti mabaat meets jam kø'øm x'ixy.

⁶⁶ Winets ja ñøjkxtøø jøts ja ojts yikxon tyik'adujkøxti ja oo'kpi jut, ojts ja t'axotsti ja tsaa midy tya'agiidyip jøts ja t'adsaadyøø, ojts ja seeyi tpiakta'akti jøts ja jam tyiktandøø ja soldaditøjk pøn jam ejx'ejtipp.

28

Ku ja Jesús yjujkpyiky jadigojk

¹ Xjats ku wyinaty tø ñaxy ja poo'kxin xøow, jøts wyinaty kyujajta'aky kyudøø'kxa'aky myidukxøow ja yjadu'ukpi samaan, winets ja María Magdalena møøt jadu'uk ja María tninøjkxti ja oo'kpi jut jøts ja t'ats'ejxwa'andi.

² Jøts jotmøn myiñ ja uix janch møk, ja nwindson'ajtimdamik ja y'ankilis jam wyinaty kidakp tsajpwemp, jøts ku ja ojts yja'aty mā ja oo'kpi jut jam, jøts ja tjigiuy ja tsaa midy ja tø yikta'agi'iy, jøts ja tta'ixakpejty.

³ Jade'en ja yjajy tyii'kxy sam widsukin, jøts ja wyet jade'en pyoobi sam tsap'øø'pkyin.

⁴ Xjats ku ja soldadi jade'en t'ejxtøø, jøts tsø'øgi ja yjanchyikmibejpnnyidi, jøts jade'en tyandøø sam ja jaa'y øøgyindi.

⁵ Winets ja ankilis tnimaay ja tø'øxyøjkti:

—Kidi mdsø'øgidi. Nnija'wip øts jøts ku ja nwindson'ajtim Jesús x'ixa'adi pøn kruskøjxp o'jk.

⁶ Ka'ap ja ya ukpøni, tø ja yjujkpyiky, tø ja tmimajada'aky ja o'jkin, tø ja jade'en yjaty sam ja ojts kø'øm tnigajpxyin. Men x'ejxti mā ojts yikpikta'aky.

⁷ Tsojk nõjkxti, jøts x'atstukmado'odit ja pyabøjkpitøjk jøts ku ja tø yju-jkpyiky jadigojk, jøts ku ja jawyeen nõjkxt jam Galilea jøtsnim mee mnøjkxt; jamts ja x'ejxtit. Yø'øyi dø'øñ ja ndukmadoowandip.

⁸ Xjats ja tø'øxyøjk jam putyi cho'ondøø mā ja oo'kpi jut jam, jade'en ja chø'øgidi jøts jade'en ja yjanchxondā'akti; jøts ja ojts tsojk tyiknøjkxti ja kajpxy ja ayuujk mā ja nwindson'ajtim Jesús pyabøjkpitøjk jam.

⁹ Exam ja wyinaty jade'en ñaxti ku ja nwindson'ajtim Jesús wya'kaxi'jky jøts ja ojts kyajpxpøø'kxyidi. Winets ja wingon twingunøjkxidøø jøts ja twinguxanaay'øyiidi, nagyumajtsidi ja' tyekyøjxp,

¹⁰ jøts ja yide'en ñimaajyidi:

—Kidi mdsø'øgidi. Nøjkx øts ja nmigu'uktøjk x'atstukmadojidi pøn jaty ø nbabøjkpi'ajtip jøts nõjkxtit jam Galilea, jam øts ja xpaa'ttit x'ejxtit.

Ku ja soldadi t'atstukmadowdi ja teetywindsøndøjk sa ja jut y'awajch

¹¹ Examnim ja tø'øxyøjk wyinaty yø'ødyi, jøts ja soldadi winaagin nõjkxtøø jam kajpjotp pøn ejx'ejttip, jøts ja t'atstukmadoodøø ja teetywindsøndøjk ti jaty wyinaty tø tyuñi.

¹² Winets ja teetywindsøndøjk ojts tninøjkxti ja mõjaa'dyøjk jøts ja tka-jpxy'ajtti kyijpxy kyajpxy; ojts yikxon ja maamyeeñ tmo'odi ja soldaditøjk,

¹³ jøts ja tnimaadyøø:

—Jade'en mee mwa'ant jøts ku koots, ixap mee wyinaty mma'ay, ku ja Jesús pyabøjkpitøjk ojts yja'atti jøts ja ojts t'atstmaatsti ja oo'kpi ñine'kx.

¹⁴ Jøts øy ja windsøn ja wyinaty tjanijawi, øøts ja mõøt nnagyajpxit jøts ja ka' sa wya'ant, jøts mee ka' ti pøky mdaja'adit.

¹⁵ Xjats ja soldaditøjk t'axajidøø ja meeñ, jøts ja ojts jade'en tpadundi sa jaty ja wyinaty tø yik'ana'amdi. Jøts jade'en ixymbaāt tñimadya'akti ja israelit jaa'dyi.

Ku ja Jesús ttaguwa'aníyü'ñ ja tunk ja pyabøjkpitøjk

¹⁶ Jøts jade'en nõjkxtøø ja ñimaktu'ukpi jaa'dyi jam Galilea, ja nwindson'ajtim pyabøjkpitøjk. Ja'ttøø ja jam kojpkøjxp midi ja wyinaty tø tyukmadøyiidi.

¹⁷ Jøts ku ja t'ejxpattøø ja nwindson'ajtim Jesús, jøts ojts ja ñagyuxendya'agyidi, øy ja jam winaagindi kø'øm pøn ja tkamibøjktip.

¹⁸ Winets ja nwindson'ajtim Jesús wingon wyingunøjkxiyidi jøts ja ñimaajyidi yide'en:

—Tø øts mõk'ajtin nyikmøø jøts øts ja nyiktu'unt wan tsajpjøtpyi jøts wan tnaxwiñi.

¹⁹ Ninøjkxtits ja jaa'y øy manajx øy magajp jøts ø xukpabøjkpi'attit; myiknøbattipts ja' Dios Teety køjxp, Dios y'U'nk køjxp, jøts Dios y'Espíritu Santo køjxp,

²⁰ jøts yik'ixpøkti jøts tpadu'undit tuki'iyi ti jaty mee tø ndani'ane'emy. Jøts nimadowdi jøts ku meets ejtp nmøø'tity øy juuni xøøw, kunim ø nme'ent jadigojk. Jade'en idø'øn ja y'ejxi.

JA ØGYAJPYX JA ØMYADYA'AKY MIDI JA MARCOS YJAAÿ

Ku Juan Bautista kya'amaay abak etjotp

1 Yide'en yiknimadyak'okwaañ ja øgyajpxy ja ømyadya'aky midi ja nwindson'ajtim Jesucristo yja'ajtpy, ja Dios U'nk.

2 Yide'en ja y'ejxi tyiyi tø dø'on ja Dios wyinaty kø'øm tnimaañi ja kyugajpxy Isaías, jøts ja yide'en tjaadya'ant ja ayuujk ku ja Dios Teety ja y'u'nk yide'en tnimaay:

Ngajxjawyeenip øts, u'nk, ngugajpxy tu'uk pøn nøjxpx jawyeen kuga-jpxy'ajtpi,

ja'ats ja naxwiifit jaa'y tnøjmip, jøts wan ja tyiktøwdi tyiktuuda'akti ja wyinmaa'ñ, jøts mets ja m'ixpøjkin jade'en yikupøkt.

3 Pø patyxi ja kugajpxy ñijxxy jawyeen abak etjotp jøts myigu'uk ja tnøjmit møk'ampy:

“Awejxidi Dios y'ixpøjkin, yiktøwdi yiktuuda'akti mwimmaa'ñ yikxon.”

4 Ja Juandam idø'on jam jade'en memp abak etjotp jøts jaa'y ja tyiknøbety, yide'en ja wya'añ jøts ku ja jaa'y tuki'iyi tja'dyigøøgyøxti ja kya'øyjaa'y'ajtin jøts wan tnøbajtkøxti, kuts idø'on ja jade'en ttu'undit winets ja yikpo-jkpimaa'kxtit.

5 Mayjaa'y idø'on ja jam nimejniyip jøts ja pyatmadøyi, mendip ja jaa'y jam pøn tsinaadyip Jude'it etjotp, jøts nayide'en pøn kugajp'ajtmidip Jerusalén; jade'en Juan ja mayjaa'y jam ñimiñiyi møj nøøjotp midi txøøw'ajtp Jordán, jøts ja jam ñøbatti ku pyøky ja tkajpxnaxkøxti.

6 Kameeyi pøjk wyet'ajtpy idø'on ja Juan wyinaty, jøts po'ak ja tsum'aty; ja' ja tø ñadyatsumyi jøts møj mu' ja jam tnidsøøni møøt ja jiyujk pa'ak, ja' ja jam jyii'kxpy.

7 Yide'en idø'on kya'amay mayjaa'y agujkp:

—Ja øts ja jaa'y tu'uk ix'oojk xpamiñ pøn møkta'aky yikutukp ja agøjxp ku kutujk ja tmimiñ møk'ampy, ka'ap øts ja nmi'abaaty jade'en sa yikutuky, nijuuni øts ja møøt nganamyi baat'atiyit.

8 Paty meets icyam tiy janch ndyimdyukmadøyi, jøts ku øts ja'ayi tø nnimiñ jøts meets nøø nduktanøbatt; jøts ku dø'on ja yja'att pøn øts idø'on ndijpy ix'oojk memp, jawaani øy ja tyunk ja ttu'unt kumi Espiritu Santo ja tyuktatøkip ja jaa'y.

Ku ja Jesús ñøbety

9 Xjats ja Jesús winet et chøø'ñ Nazaret, jam kajpkøjxp midi wyinaty Galile'it jaa'y y'etjotp, jøts ja ñijxxy nøbajtpi møj nøøjotp midi txøøw'ajtp Jordán, ma Juan ja yiknøbajti.

10 Xjats ku ja pyidsiimy møj nøøjotp, winets ja ojts t'ixy ja tsajp jøts ku ja y'awa'ach, jøts Espiritu Santo ja jade'en ñigida'agyi sam ja tsapak.

11 Xjats yikmadøøyi ja Dios Teety y'ayuujk jap tsajpøtpy, yide'en ja wya'añ: —Øts me n'u'nk'ajtpy; njanchøjkpy mets jøts njanchtajotkujk'ajtpy mets.

Ku ja Jesús miku' øjts yjot'ijxy

12 Winets ja Espiritu Santo yiknøjkxøø jam abak etjotp,

13 jøts ja Jesús jam wixijxxyøøw chinaay. Xjats ja miku' ja yikpo-
jkpítunwá'añi, jøts ja nijuuni tkamimadøøy. Jam idø'øñ ja chinaay mā ja may
awa'añ jiyujk jam chøønidi, xjats ja ankilis ja pyudøjkøø.

Ku ja Jesús tpadøjkjy#ñ ja tyunk

14 Jøts ku ja Juan wyinaty tø yikpiktakni jap puxøjkjøtpy, winets ja
Jesús chøø'ñ jøts ja ñijkxy Galile'it etjotp, mā ja tniga'amaay ja øgyajpxy ja
ømyadya'aky, midi ñigajpxpy sã Dios ja yjaa'y ttanitanit ja kyutujk.

15 Yide'en ja wyaañ:

—Tønim inet ja xøøw ja et yja'aty, wingomp icyam ja Dios kyutujk
midi yã tu'ump. Yiktigatsti ja mdsinaa'yindi, ja'dyigøøgyøxti tuki'iyi ja
mga'øyjaa'y'ajtindi, jøts janchjawidi ja øgyajpxy ja ømyadya'aky.

Ku ja Jesús twaadsøøy nimaktaxk ja ajkxmaktip

16 Jam idø'øñ mejpya'am midi txøøw'ajtp Galilea, jam ja Jesús wyinaty
ñaxy ku ja t'ejxpaajty namaajtsk ja jaa'y, ja Simón jam wyinaty møøt ja
y'uch Andrés. Ajkxmaktip idø'øñ ja tyunk'ajttip, xyuummy ja jam wyinaty
ñøøwejtspajttip midi ja tya'ajkxmaktip.

17 Xjats Jesús ja tnimaay:

—Mada'akti, møøt widettik øts jøts nduknijawidit sudso jaa'y ja
nitso'ok'ajtin tpaaty.

18 Ku ja jade'en yiknimaydi, winets ja jatyi tmajstuttøø ja xyuummy midi ja
wyinaty tya'ajkxmaktip, jøts ja tpadsoo'ndøø.

19 Jawaani ja Jesús ojts yø'øy xjats ja ojts t'ejxpaaty ja Jacobo, pøn ja
Zebedeo wyinaty myajnk'ajtpy. Ja' jam wyinaty barkijotp t'adajkyidip ja
xyuummy møøt ja y'uch Juan.

20 Xjats ja tyaajixiyi#ñ, wyaadsoow ja'; winets ja tyety ja tunk ja
tukmidandøø jam barkijotp møøt ja tyumbi, jøts ja Jesús ja tmøøtnøjkxti.

Tu'uk ja yaa'dyøjk pøn ja miku' wyinaty tø tyatøkiyi

21 Xjats ja ojts yja'atti Capernaum, jam møj kajpkøjpx; jøts ku poo'kxin xøøw
tpaajty, winet ja Jesús ñijkxy yik'ixpøjkpi jam israelit jaa'y chaptøjkjøtp.

22 Xjats ja jaa'y ja jam ñigyumaap tjawidi, ku Jesús ja jade'en yik'ixpikyidi
sam ja jaa'y pøn ja møk kutujk tmøøt'ajtp, ka'ap ja jade'en yik'ixpikyidi sam
ja kajpxwejpitøjk pøn yik'ixpøjktp jap israelit jaa'y chaptøjkjøtpy.

23 Japts wyinaty tu'uk ja jaa'y tsaptøjkjøtpy pøn wyinaty ja miku' tø ty-
atøkiyi, ja' møk yide'en waan:

24 —¿Mets Jesús, Nazaretit jaa'y, tiku øø tø xnimiñ, sã øø xunwá'añ? ¿Ja'
mets tø xnimiñ jøts øø xyikudigøøgyøxt? Wa'ats me n'ejxkapy pøni pøn mets.
Ka'axi me mbøkmyøødi, Dios jaa'yxi mets.

25 Xjats ja Jesús møk twingugajpxiyi#ñ ja miku', jøts ja tnimaay:

—iAmøñi, kidi nugo mgajpxy, tsojk majstut'ut yø jaa'y!

26 Xjats ja miku' møk'ampy tyikmibejpjiky ja jaa'y, jøts ja møk chabaay,
winets ja pyidsiimy.

27 Xjats ja mayjaa'y janchnigyumaap tja'widøø, jøts ja xem yam
ñadyiibyikyidi køøm, yide'en ja ñawya'añidi:

—¿Ti wenk ixpøjkin ya'at? ¿Ti tunk yø jade'en tyumpy? ¡Janch møk kutujk
tmøødi, mimadojip paat ja miku' yø' ku yø t'ane'emy!

28 Xjats ja jaa'y ja tnmadoogøxti pøni niwine'en ja jam wyinaty chøønidi
Galile'it etjotp. Niduki'iyi ja tnija'wigyøjxtøø ku ja Jesús jade'en t'ødyuñ ja
jaa'y.

Ku ja Jesús tyikmøkpiky ja Simón Pedro tyaaqmø'jt

²⁹ Xjats ku ja Jesús pyidsiimy jam tsaptøjkjotp, winets ja tmøøtnijkxy ja Jacobo møøt ja Juan jam Simón tyøjkwindum, mā ja wyinaty tmøøtsøøni ja y'uch Andrés.

³⁰ Jamts pamaa'y ja wyinaty tmøødidi, tyaaqmø'jt ja Simón wyinaty pøjkip, møwa'añ jømba'am ja yjanchpiky; jøts ja Jesús ja ttukmadowdi ku ja jade'en pyiky.

³¹ Xjats ja Jesús twingume'eniyi'iñ ja pamaa'y, jøts ja ojts twejtsji'iky; ja'ayi ja jade'en ttuun, winets ja pya'am jatyi ñiwaajtsøø; kuts ja jade'en yjajty, xjats ja tøøxyøjk ja yikaajyidi nayjaty ku ja chøøjky.

Ku ja Jesús tyikmøkpiky ja maabyamaa'y

³² Waani y'ijty ku ja xøøw yjejxy jøts ku kyoodsiñaa, winet ja Jesús yiktanimiñ ja mayaa'y pøn wyinaty pøjkidip, jøts ja jaa'y pøn wyinaty tmøøt'ajttip ja miku';

³³ niduki'iyi ja kajp jaa'y myendøø tøk'agø'øm mā ja Jesús jam wyinaty.

³⁴ Xjats ja may tyiktsøøjky ja pamaa'y pøn wyinaty tigati pøjkidip, ojts ja tyiktsokixy jøts ja miku' ja tyikpidsømgijxy midi ja jaa'y wyinaty myøøt'ajttip; jøts ka'ap ja miku' ja tyikajpxy, kumi ñija'wip ja' paty ja jade'en ttuñ jøts ja kyadamigajpxiyit jøts ku ja Dios U'ngi.

Ku ja Jesús kya'amaa'y

³⁵ Xjats ku yjøkyoots'ajty, jaakmøñim ja et wyinaty, winets ja Jesús myaabidi'jky jøts ja chøø'ñ jam kajpjotp, Dios Teety ja wyinaty y'ajot'atwampy, paty ja ñijkxy abak etjotp.

³⁶ Xjats ja Simón choo'ndøø ixaabyi møøt ja myigu'uk, jøts ja tpaatwa'andi ja Jesús,

³⁷ xjats ku ja tpattøø winets ja tnimaadyøø:

—Mdum'ixaajyip jaa'y ixyam.

³⁸ Winets ja ñimaajyidøø:

—Wan tjaa'myindi abikyajp midi wingon tandip, jøts øts jam nayide'en nniga'ama'aty ja øgyajpxy ja ømyadya'aky; kumi ja' ø tø nnimiñ jøts øts jade'en ndu'unt.

³⁹ Xjats ja Jesús jade'en t'ayøøy ja kajp midi jam wyinaty Galile'it etjotp, jøts ja kya'amay jam tsaptøjkjotp, jøts ja nayide'en tyikpidsimy ja miku' midi ja jaa'y wyinaty winaagin myøøt'ajttip.

Ku ja Jesús tyiktsøøjky ja jaa'y pyu'uts

⁴⁰ Xjats Jesús ja jaa'y tu'uk ñimejnøø pøn wyinaty axøø'kpim puts, jøts ja wyinguxanaajyi, yide'en ja wyaan:

—Møøt'ajtpy mets ja møk'ajtin jøts ø xyiktso'okt, yiktsokts øts mdsojk'ajtingøxp.

⁴¹ Xjats ja Jesús ja y'ayo'ejxi, jøts ja tnixajyi'iñ, yide'en ja tnimaay:

—Ndsøky'ajtpy øts jøts mdso'okt, tsokni.

⁴² Ja'ayi ja jade'en wyaan, xjats ja jaa'y ja pyu'uts jatyi ñiwaajtsiyøø jøts ja myøkpiky, møk møjaa'w ja ñajja'wiyøø.

⁴³ Winets ja Jesús ja pyagajxøø, yikxon ja y'ukyik'ane'emy, yide'en ja tnimaay:

⁴⁴ —Madow, kidi jaa'y xukmadøy, ka'ap pøn sa xnøjmit, nøjx jam teety wyindum jøts ja xuk'ext ku tø mdsø'øky, jøts nay jam idø'on mdamiyoxp ja Dios ja jiyujk sa Moisés jekyip tyikutuky, jade'en ja jaa'y tnijawidit jøts ku me tømjancho'øky.

45 Xjats ja jaa'y ñijkxy, jøts ja tuki'iyi ttamimadyakijxy ja mayjaa'y sudso pu'uts ja wyinaty tø ñiwa'achiyi. Paty ja Jesús øy ma kya'ukajptøjkini, jagam ja wyidity ma ja et janch abak; jamts ja øy magama pøn ñidsøøñi jøts ja yikninijkxy.

2

Ku ja Jesús tyikpidi'jky ja køxujxpi pakxujxpi

1 Ku wyinaty kawinaak xøøw tø ñajxni, xjats Jesús jadigojk kyajptøjkijy'iñ jam Capernaum; jøts jaa'y ja tñija'widøø ku ja wyinaty tø yja'aty jam tøjktotp.

2 Xjats ja mayjaa'y jatyi ñamyujkidøø, yikxon ja tøj yjanch'ujch, ka'ap ja y'uknibaajtini; jøts ja Jesús jam tñiga'amay ja øgyajpxy ja ømyadya'aky.

3 Winets ja jaa'y yja'ttøø nimaktaaxk pøn tkiyja'ttøø tu'uk ja pamaa'y pøn wyinaty køxujxpkakxujxpk.

4 Xjats ja Jesús ja tjaapatwa'andi, jøts kumi nima kya'awa'adsi kumi tø ja mayjaa'y wyinaty t'awa'kta'tsnidi ja tøjka'aw, winets ja tñitajtuttøø ja tøjktøts jut ja tyik'awatstøø. Japts pamaa'y ja tyikwinajktøø møøt ja myaabajt jap Jesús wyinduypy.

5 Xjats ku ja Jesús ojts t'ixy ja jaa'y pøn tyikmendøø ja pamaa'y jøts ku ja amuum yjanchjawiyi, winets ja pamaa'y ja tñimaay:

—Nbojkpimee'kxpy mets u'nk.

6 Jamts wyinaty ja kajpxwejpitøjktøø chøønidi pøn wyinaty ttuk'ixpøjktip ja Moisés kyutujk jam tsaptøjktotp, ja'ats yide'en winmaadyøø:

7 “¿Ti yø jaa'y jade'en kyuwa'anip, sa yjaty? ¿Tiku yø jade'en wya'añ? ¿Ka'ap idø'øn jade'en y'oyi! ¿Pøn ja øky yä t'ukmaa'kxp, kidi Diosip tu'ugyi tmaa'kxp ja øky?”

8 Xjats ja Jesús ñija'wip ja wa'ats ku ja jaa'y jade'en wyinaty wyinmaydi, winets ja tñimaay:

—¿Tiku jade'en nichøky mwinnmaydi?

9 ¿Ja ti ne'egi jawaani jajtni, kuts yø pa'amjaa'y nnøjmit: “Mee'kxpy øts yø mbøky”, uk ku nnøjmit: “Wa'kuki, øøkmukni yø mmaabajt jøts øøjkxni mdigam?”

10 Ixyamnim meets inet x'uk'ext mabaat øts idø'øn ja øøktajtni nnøøt'aty ya naxwiiñ jøts ø nmaa'kxt ja øky.

Xjats ja tñimaay ja køxujxpi pakxujxpi:

11 —Pidøkni, wa'kukiñi, wejtsjø'øk yø mmaabajt jøts mnøøjkxni mdigam.

12 Xjats ja pamaa'y jatyi pyidi'jky; ojts ja myaabajt ja twejtsji'iky, jøts ja jam cho'oni mayjaa'yjotp. Paty ja jaa'y niduki'iyi ñigyumaap tja'widøø ku ja pamaa'y jade'en wyøpjiky, xjats ja Dios ja ttamøja'widøø, jøts ja wyandøø:

—Nima ñiwindinim jade'en nga'ijxyindi.

Ku ja Jesús tpawaay ja Levi

13 Waani y'ijty, winets jadigojk chøøñi ja Jesús jøts ja ñijkxy jam mejy'agøø; jamts jaa'y ja yikxon yjanchniñi, jøts ja jam tyik'ixpiky.

14 Xjats ku dø'øn ja ojts ñijkxy, winets ja t'ejxpaajty ja Levi, ja Alfeo y'u'nk, jam ja wyinaty chøøni ma ja ttukugubety ja jaa'y ja pyikta'aky, xjats ja Jesús wya'añ jøts ja Levi yiknimaay:

—Wan tjaa'myim jøts øts n'ixpøjkin xpaabøjkt.

Winets ja Levi jatyi tyanaagyukiyi'ñ, jøts ja Jesús ja tpanijxky.

15 Xjats ja Jesús yikwaay migaabyi Levi tyøjkwindum, winets ja yikugubajtpi yja'tmidøø, møøt jadu'ukpi jaa'y pøn kyabadundip ja myigu'uk

chinaa'yin, jøts ja tu'ugyi twinguwa'ltsidøø ja kaabyajt møøt ja Jesús jøts ja pyabøjkpitøjk; janch namay ja jaa'y jam wyinaty pøn ja Jesús pawidejtiyip.

16 Xjats ku ja kajpxwejpitøjk jøts ja fariseotøjk jade'en t'ejxtøø jøts ku ja Jesús jam wyinaty tmøøtkay tum ja ka'øyjaa'dyi, winets ja tnimaadyøø ja pyabøjkpidi:

—¿Jadits ku yø mwindsøn tmøøtkay yø yikugubajtpidi jøts yø ka'øyjaa'dyi?

17 Xjats ku Jesús ja jade'en tmaadøøy, winets ja wyaañ:

—Ka'ap øts nyiktaniguexy jøts nbudøkit pøni pøn janch wa'ats ñayja'winiyip, ja'agøjxp ku ja pyøky kapøkyjawidi. Ja'ayi ja nbudøkip pøni pøn ñadyapøkyja'wiyidip ja pyøky. Nayide'en øts idø'on njaty sam ja tsøyibi kyanijxxy ma ja pamaa'y kya'ity. Jami ja ja'ayi ñijxxy ma ja pa'amjaa'y jam.

Ku ja Jesús yikt'ibyijky tigøjxp ku ja kya'ayuu'atti

18 Tuk'ojk idø'on yjajty, ixam idø'on Juan Bautista pyabøjkpitøjk wyinaty y'amaay'atti møøt ja fariseotøjk, ayuu'ajttip ja jam wyinaty, Dios idø'on ja jade'en wyindsø'jkidip, winets ja jaa'y winaagin tnmendøø ja Jesús ma ja wyinaty jøts ja ttiibyøkti, yide'en ja tnimaadyøø:

—¿Jadits ku Juan pyabøjkpitøjk y'amaay'atti jøts ja fariseotøjk nayide'endi, ka'axi ja kyaydi, jøts sudso mets yø mbabøjkpitøjk nayide'en kya'amaay'atti, sudso meets yjaw i amgujk jotkujk mgaydi? Ka'ap meets yjaw ti xkumay.

19 Jade'en ja wyandøø, xjats ja Jesús yide'en y'adsøøy:

—¿Winaak ojkimts meets jade'en tø x'uktani'ixy, winaak ojk meets jade'en tø x'uknijawi ku tø øxñigaabyi tø øxñi'ukpi tø y'uk'ayuu'atti ku ja jemyaa'y jam tø yja'tni? Ka'axi jade'en pøn y'ayuu'aty, ka'ap jade'en pøn tø t'amaay'aty.

20 Jaanin idø'on tiy yjanch'amaay'atti pøni ku ja wyinaty tø yiktawinwaadutnidi ja jemyaa'y, jam ja jade'en kyaydi amgujk jotkujk jøts ja jemyaa'y ja myidsep ja o'jkin jatyi tyuk'anøjkxiyi. ¿Pønts jade'en kidi yjotmay'øøky? ¿Sudso dø'on jotkujk ngaa'yint n'uujkint? Pø nayide'enxi øts idø'on yø nbabøjkpitøjk yam xjawidi ku njaakyam'aty.

21 'Ka'axi pøn wyetpach tta'agiyi jemwyet mididi tyimyjemñim; ku ja jade'en yiktu'unt, jøts kumi mujkpi ja jemwyet, jøts ja tjaaktyimgyøø'tsni ja wetpach, jaaktyimyiwenip ja kyøøts'ajtin ja'.

22 Jøts nayide'en ka' y'øyi jøts yikpikta'akt ja vino jap po'dukjætpy mididi nami'kxñim; ku ja jade'en ndu'unint, takøø'tsipts ja po' jøts jade'en nugo wyindigøøy, windigøøpy ja po' jøts nayide'en ja vino. Paty ja vino mididi nami'kxñim nda'ada'amyin ja jembyo'ak, jøts jade'en nimidi kyawindigøøty.

Ku ja Jesús pyabøjkpitøjk poo'kxin xøøw et y'ariindøjtøø

23 Tuk'ojk idø'on yjajty ku poo'kxin xøøw wyinaty tø tpaaty, winet et ja Jesús ja pyabøjkpitøjk tmøøtnajxy jam kamjotp ma ariingam jam wyinaty; jam idø'on ja wyinaty ñaxti ku ja pyabøjkpitøjk ttøjpinaxwa'ktøø ja ariindøøm.

24 Xjats ku ja fariseotøjk ja ojts jade'en y'ijxyidi jøts ku ja jade'en y'adø'øtsti, winet ja Jesús jatyi yiknimaay:

—¡Ejx yø mbabøjkpitøjk! ¿Tiku yø jade'en y'adø'øtsti, tiku ariin yø ttøjti, kumi ka'ap jade'en kyutuky jøts yø jade'en y'adø'øtstit ku poo'kxin xøøw?

25 Winets ja Jesús y'adsøøy, jøts ja wyaañ:

—Nugo meets mjanchkajpxy. Tø meets ja nøky xja'ixy mididi wamp jøts ku ja David yide'en y'adiijch møøt ja myigu'uk ku yuu ja pyaajt'idøø, ku ja wyinaty niti kya'ijtxyidi.

²⁶ Winets ja ñòjkxtøø jap tsaptøjkjotpy ma ja Abiatar jap wyinaty tyetywindsøn'aty, japts ja t'amidøø ja tsapkaaky midi ja Dios yja'ajtpy jap wyinaty. Ja'ats ja ojts tkaydi midi ka'ap kyutukyi jøts nugo jaa'y ja tka'adyit. ¿Jøts tiku døø'n ja jade'en y'adijch põni ka'adam ja jade'en kyutukyi? ¿Tiku myigu'uk ja nayide'en ttukaay ja tsapkaaky, põni jade'endam ja kyutukyi jøts ja ja'ayi tka'adyit põn teety'ajttip?

²⁷ Nayi waan ja Jesús yide'en:

—Ja'agøjxp ja poo'kxin xøøw yikpiktaajky jøts ja jaa'y yikpudøkit, kidi ja'ajip poo'kxin xøøw yiktanibiktaajkiyi'ñ jøts jaa'y niti kyidyimdyu'undit.

²⁸ Ngudanaapy øts ja naxwii'ñit jaa'y, jøts øts wamp ti paat'ajtip kapaat'ajtip yiktu'unt ku poo'kxin xøøw.

3

Ja jaa'y põn wyinaty ja kyø' jadi'iñi tøøtsnip

¹ Xjats ja Jesús jadigojk tyøjkiyi'ñ jam tsaptøjkjotp ma yaa'dyøjk ja tu'uk tpaajty, midi wyinaty tuktamajñ køxujxp.

² Jøts ja Jesús jam a'ejxuky y'ity, ja' ja jaa'y y'ejxwandip põni y'ukyiktsøkpy idøø'n ja jaa'y ku poo'kxin xøøw, winets ja jatyi tni'øønidit.

³ Xjats ja Jesús tnimaay ja yaa'dyøjk põn ja kyø' wyinaty xujxp:

—Pidø'øk jøts ixø nøjkk mdani kuk'ajy.

⁴ Xjats ja Jesús ttiibyijky ja jaa'y põn ja jam wyinaty a'ejxujkiyidip, yide'en ja tnimaay:

—¿Midi'ibi ixyam kutuky, ku jaa'y n'ødyu'unint, uk ku jaa'y nga'ødyu'unint? ¿nyiknitsoojkimp ja jaa'y, uk nyik'oo'kimp ku poo'kxin xøøw, midi'ibi øy?

Xjats ja jaa'y amøñi y'etti, nipøn sã kyawa'añ.

⁵ Winets ja Jesús ja twin'ejxji'jky ambøjkin'ampy, jøts ñiyjotmay'oo'kni døø'n ja Jesús y'ejxji'jky, ja'agøjxp ku ja jaa'y niwine'en tkaja'gyukidi. Jøts ja tnimaay ja jaa'y midi wyinaty køxujxp:

—Xajtøw.

Xjats ja xyajtiy, jøts ja kyø' ja møk tyaañ, ojts ja chø'øky.

⁶ Winets yø'øpyidsømdøø ja fariseotøjkti, jøts tminagyajpxidi ja Herodes myigu'uk, ja' ja kyajpxy'ajttøø sudso t'ukyik'ooktit ja Jesús.

Ja mayjaa'y põn jam wyinaty mejy'agø'øm

⁷ Xjats ja Jesús chøø'ñ, jøts ja pyabøjkpitøjk ja ojts tmøøtnijky jam mejy'agø'øm, winets mayjaa'y ja pyanøjxidøø põn jam wyinaty Galilea kugajp'ajttip.

⁸ Xjats ku mayjaa'y ja ojts tñimadowdi jøts ku ja Jesús jade'en tjanch'ødyuñ ja jaa'y, winets jam øy põn jaa'y myendøø, pømbi tsoo'ndip jam Jude'it etjotp, pømbi Jerusaléngit kajjotp, pømbi Idume'it etjotp, pømbi tsoo'ndip wingon ma ja møj nøø midi txøøw'ajtp Jordán, pømbi tsoo'ndip jam Tiro etjotp, jøts pømbi tsoo'ndip jam Sidón etjotp, jade'en ja mayjaa'y ja jam ñimejniyøø.

⁹ Ja'agøjxp ja Jesús ojts t'ane'emy ja pyabøjkpitøjk jøts ja jam tyik'awejxtit tu'uk ja barki, jøts mayjaa'y ja kya'adejmukiyit.

¹⁰ Kumi tø ja wyinaty kawinaak tyiktsø'øky ja jaa'y, tum jam ja pamaa'y wyinaty tø ñaxkida'akti ja' ñikøjxp jøts ja cho'okti.

¹¹ Jøts ku ja Jesús maamyiku' y'ejxpaadyiyi midi ja mayjaa'y jam myøøt'ajttip y'am yjotp, jatyi ja wyinguxaniyi jøts ja ñii'mxyi:

—Dios U'nk mets.

¹² Xjats ja møk tnøjmi jøts ja ka'ap ttukmado'odit ja mayjaa'y jøts ku ja Dios U'ngi.

Ku ja Jesús twiwijch ja jaa'y nimakmajtsk pøn ja wyinaty kyudanaabyi'atwampy

¹³ Xjats ja Jesús pyatøjkii'ñ kojpkøjxp, ma ja jaa'y ja twaadsøoy pøni pøn idø'on ja kø'øm chøjkpy, winets ja jam ñimejniyøø ja jaa'y pøn ja wyinaty tø twaadsøoy.

¹⁴ Jøts ja nimakmajtsk twiwijch pøn ja ejtp myøøtwidewampy, jøts pøn tniga'ama'adyip ja øgyajpxy ja ømyadya'aky;

¹⁵ xjats ja tkutujkmøoy jøts ja tyiktso'oktit ja pamaa'y, jøts ja miku' ja tyikpidsø'ømdit midit ja jaa'y winaagin myøøt'ajttip. Jade'en tyajky ja kutujk.

¹⁶ Nimakmajtsk idø'on ja jaa'y jam wyinaty: jam ja Simón wyinaty pøn nayide'en yiktejp Pedro;

¹⁷ jøts nay jam ja Jacobo wyinaty møøt ja y'uch Juan, ja Zebedeo y'una'jk midit xøbajtøø Boanerges, ja' idø'on tyijpy midit møk møk ja jaa'y myigajpxtip ejxim ja anaaw pyijy, ka'ap idø'on chø'øgidi;

¹⁸ Nay jam ja jaa'y wyinaty midit txøow'ajttip Andrés, Felipe, Bartolomé, Mateo, Tomás, Jacobo ja Alfeo y'u'nk, Tadeo, jøts ja Simón midit tsoo'mp canaangit jaa'y y'etjotp,

¹⁹ jøts nay jam ja Judas Iscariote wyinaty midit tkøyajk ja Jesús.

Ku ja Jesús yiknimaay jøts ku miku' myøk'ajtin ja tyiktuujni

Xjats ku ja Jesús wyimbijty kojpkøjxp, winets pyabøjkpitøjk ja tmøøtøjkii'ñ tøkjøtpy,

²⁰ jøts ja jaa'y yikxon ñamyujkidi jadigojk, nigidibaat ja Jesús y'ukaañidi møøt ja pyabøjkpitøjk.

²¹ Xjats ku ja Jesús myigu'uk ñimadojiyøø jøts ku ja jam wyinaty, winets ja ñimejni jøts ja yiktsoonwa'añi kumi jade'en ja wyinaty wyinmaydi jøts ku myøøty ja Jesús.

²² Nayi tøj ja kajpxwejpitøjk wyinaty myeemidi jam pøn tsoo'ndip Jerusalén, xjats ja wya'andi:

—Miku' windsøn yø jaa'y myøøt'ajtpy, ja Beelzebú, ja' yø tyamøj paty yø myayi jøts yø tyikpidsimy myimiku' midit yø jaa'y jadu'uk myøøt'ajttip.

²³ Xjats ja Jesús twaadsøoy ja jaa'y, jøts ja ttukwinjawiwya'añ tu'uk ja madya'aky, paty ja wya'añ:

—¿Sudso ndejint miku' kø'øm ñankpyidsømiyit aguwaniøkøjxp?

²⁴ Jøts nayide'en ku tu'uk kajp ñawya'kxyi, jøts ja tsep ttundi agøømyi, ka'ap ja kajp jeky y'ity, jaty: ja jaa'y jadi'iñi ñankyixyidi;

²⁵ nayide'en yjaty ku jaa'y ñachiigvidi ni'u'nk ni'una'jk, ka'ap ja jeky chøøni.

²⁶ Jøts ku miku' kø'øm ñañibidø'øgyiyit, tøj dø'on ja wyinaty kyawindiy, ñankyudigøjyip idø'on ja wyinaty kø'øm.

²⁷ Nipøn midsep jap jadi'iñi kyatøki jap jotmøk jaa'y tyøkjøtpy, kunim ja tkøwøøndit tpakwøøndit; winetnimts ja tpøkøjxidit ja pyikta'aky. ¿Ti sudso øts yø jaa'y jeexyip ja miku' ndukmajtsu'uty kuk øts ja miku' windsøn jawyeen tøj ngamimada'aky?

²⁸ Janch meets idø'on nnøjmi, jøts ku ja jaa'y ja pyøky tuki'iyi yikmee'kxy, tuki'iyi yikmaa'kxkixy ja ka'øñigajpxy ja ka'øñimadya'aky;

²⁹ ja' nijuuni kyayikpojkipimaa'kxp pøni pøn tka'øñigajpxp tka'øñimadyakp ja Espiritu Santo, ejtp ja pyøky ja tmi'ity.

³⁰ Ja'agøjxp ja Jesús jade'en wyaañ ku ja wyinaty jade'en tø yiktijy jøts ku miku' ja tmøødi, jøts Espíritu Santo tkamøøt'aty.

Ja Jesús tyaaq jøts ja y'uch

³¹ Waani y'ijty, xjats ja Jesús y'uch yja'ttøø møøt ja tyaaq, jøts ja jap tøk'agi'py wya'k'øyiidi, japts ja tñankwyaadsojidøø ja Jesús.

³² Winets Jesús ja jaa'y ñimaajyøø pøn ja jap wyinaty wingon windsinaajyip, yide'en ja wyandøø:

—Ixap ja mdaak y'awijxy tøk'agi'py møøt ja m'uch, mets myik'ixaapy.

³³ Xjats ja tñimaay:

—ǂPøn øts idø'øn xuktaak'ajttip, jøts pøn øts idø'øn xuk'uch'ajttip?

³⁴ Winets ja twin'ejxji'jky ja mayjaa'y, jøts ja tñimaay:

—Yø' øts idø'øn ndaak'ajtpy, jøts yø' øts idø'øn n'uch'ajtpy pøn øts ya wingon xwindsinaadyip.

³⁵ Ja' øts idø'øn n'uchip, jøts ja' øts idø'øn ndaagip pøni pøn tpadundip sa ja Dios chojkin.

4

Ku ja Jesús tmadyakpaaty ja jaa'y midi nøjcx neppi

¹ Xjats ja Jesús jadigojk yik'ixpøjktøjkiyi'ñ jam mejpya'am ma ja jaa'y ja ojts ñimiñiyi may'ampy, jøts ja jam ñañimukpajtidøø. Ku dø'øn ja jade'en janch namaydi, winets ja Jesús tyøjkiyi'ñ jam barkijotp midi wyinaty nøøjotp, jamts ja y'ixaajky jøts ja mayjaa'y jam nøø adsajotp tyandøø.

² Jamts ja tyik'ixpijky jade'en, may ja ejxpajtin madya'aky ja jam tñigajpxy, yide'en idø'øn ja tñimaay ja mayjaa'y ku ja jam yik'ixpijky:

³ —Øyim idø'øn xmado'odit: Tu'uk idø'øn jaa'y chøø'ñ ariin wøjpi.

⁴ Jøts ku dø'øn ja ojts twøjwidity ja tømmt, winet ja tømmt waani ñaxkidaajky jam tuu'ba'am, ja'ats ja joon jam ñimeen jøts ja wa'ats tpeemujkixy.

⁵ Nayide'en ja tømmt jam waani ñaxkidakmøø tsaajotp ma ja naajx øy kya'ity; xjats ja ariindømt jam janch tsojk myujxy, kumi ka'ap ja naajx wyinaty myajpxy.

⁶ Jøts ku ja xøø'an myiñ, winets ja tyiijch, ja'agøjxp idø'øn ja jade'en yjajty ku y'aats ajawi kya'ity.

⁷ Nayi naxkidaajk ja tømmt jam kujp agujkp; jamts ja yjanchni'aa'mbejty ku ja kujp yikxon yondøø jøts ja jade'en kyatøømiyi'ñ.

⁸ Nayi naxkidaajk ja tømmt jam øñaxjotp. Ojts ja yikxon yøñ, yikxon ja jam yjanchtøømiyi'ñ midi'ibi ee'pxmajk ja pyajkwimbejt tu'ukpi tømmt, midi'ibi tugi'pxy pajkiyi'ñ, jøts midi'ibi magø'pxy, jade'en ja ariindømt pyajkpejty.

⁹ Xjats ku ja Jesús jade'en myadyakijxy, winets ja tñimaay ja mayjaa'y:

—iPøni pøn ja'gyukiwampy, wan tjä'gyuki!

Tigøjxp idø'øn ja Jesús ejxpajtin madya'akyøjxp ja y'ixpøjkin tyaky

¹⁰ Xjats ku ja mayjaa'y choo'ndi, jøts ja Jesús jam tyaañ, winets ja tyiktøødi ja namakmajtsk pyabøjkpøjck, jøts nay ja pyabøjkpøjck pøn ja jam wyinaty myøøt'ajtpy, ja' ja ñija'wiwyandip ti dø'øn ja madya'aky jade'en tyijpy, sudso ja yikja'gyuki.

¹¹ Xjats Jesús ja ñimaajyidøø:

—Meets nugo myiktukmadoop ja' midi ka'ap y'ijty yikni'jawi pøni sa ja Dios kyutujk y'ejxi tyiyi midi ja tyanitanaapy ja yjaa'y; jøts pøn øts ngutujk xkababøjkidip ka'ap ja jade'en tiy yiktukmadowdi, ejxpajtin madya'akyøjxp ja yiktukmadowdi;

12 Jøts ja jade'en kyawinmaa'nbyaattit ku ja ti tjaniwinmayidi, ka'ap ja tmodoogukidit pøni sa jaty ja yjayiknøjmidi, paty idø'øn ja jade'en yjatti ku øts ja kø'øm xkajanchjawidi, kø'øm idø'øn ñadyuñidi paty ja pyøky kyayik-maa'kxtit.

Ku ja Jesús tñigajpxy sudso dø'øn yikja'gyukit ku jaa'y neppi ñijky

13 Winetnimts ja wyaañ:

—¿Ka'ap xja'gyukidi yø ejxpajtin madya'aky, sudsomts meets ja xjanchja'gyukigyøxt jadu'uk ja ejxpajtin madya'aky?

14 Pøn ja ariindømt twøjp, jade'en idø'øn ja n'ukpiktaajkint ejxim ja jaa'y midi ja øgyajpxy ja ømyadya'aky tkajpxwa'kxp.

15 Jøts winaagin jaa'y jade'endi ejxim ja tømt midi načkidaajk jam tuu'ba'am: y'amidoodujktip ja' ja øgyajpxy ja ømyadya'aky, jøts ku ja jade'en tmadowdi, winets ja miku' ja jaty ñimiñidi jøts ja pyøjkxyidi ja øgyajpxy ja ømyadya'aky midi ja wyinaty tø y'ukjotøkiyidi.

16 Nayide'en ja jaa'y winaagin n'ukpiktaajkma'ant ejxim ja tømt midi načkidaajk jam tsaajotp: pyatmadooip ja' ja øgyajpxy ja ømyadya'aky ñixyondakni, jøts kumi ka'ap ja tmimøk'etti,

17 jade'en ja yjatti ejxim ja ariin y'aats ajawi kya'ityin; ka'ap ja jeky tmi'etti ja'agøjpx ku ja tku'ayo'ombaa'didi ja øgyajpxy ja ømyadya'aky, winets ja tmajstsu'utti, ka'ap ja tu'ugyi tpadundi.

18 Nayide'en jaa'y winaagin yjatti ejxim ja tømt midi jam yikwøj kujp agujkp: yjapatmadooip ja' ja øgyajpxy ja ømyadya'aky,

19 jøts ja' ja ne'egi tyajotigøødyip ja pyikta'aktyi ja jujky'ajtindi midi ya naħwiin, ja' mo'jotøjkidip jøts ja tyikudigøp ja øgyajpxy ja ømyadya'aky, jøts ja jaa'y tkayikwingaxø'øktit ja Dios kyajpxy.

20 Ja jaa'y nayide'en winaagindi pøn tpatmadooip ja øgyajpxy ja ømyadya'aky jøts ja yjotøkiyidi, winets ja tyikwingaxø'øktit jade'en ejxim ja tømt midi yikwøjp jam øñaxjotp. Winaagin ja jaa'y jade'endi ejxim ja tømt midi tyøøm tyikwimbejtp may, midi'ibi ee'pxmajk pajkiyii'ñ, midi'ibi tugi'pxy jøts midi'ibi magø'pxy.

Niti jadi'iñi kyatañ, kuwañim ja tyimyiknijawi

21 Nayide'en pyabøjkpitøjk ja tnimaay:

—¿Ti ja' ndejint jaj wya'añ jøts ja yiknijupt jap kajuun patki'py, uk jøts ja yikpikta'akt jap maabajt patki'py? Ka'ap ja jade'en pøn tyiktun, køjxp ja yikpikta'aky, jamts ja yjajy.

22 Ti yjawi ka'ukyikpatp ku ti yjaju'uch'ity, ti tunk uk ti winmaa'ñ yjawi ka'ukyiknija'wip ku ti yik'amaa'tsk'aty.

23 Jamxi mdatskti, tamadowdi yikxon.

24 Nayide'en pyabøjkpitøjk ja tnimaay:

—Øyim xpatmado'odit yø ixpøjkin midi myiktukmadooip. Nayide'en meets ja wijy'ajtin myikmo'ot pøni sa meets ja jaa'y xukniweji ja Dios y'ixpøjkin; jøts mjaaktyimñijawip meets ja jawaani pø xmadoopxi meets yam kø'øm.

25 Jaaktyimyikmøøpy ja wijy'ajtin ja' pøn ja'gyukip; jøts pøn kaja'gyukip, jaaktyimyikpøkøjxip tuki'iyi ja' ja wijy'ajtin.

Ku yiknimadyaajky ja tømt midi mujxp jøts midi yomp

26 Nayide'en pyabøjkpitøjk ja tnimaay:

—Jade'en idø'øn ja Dios kyutujk midi ja tyanitanaapy ja yjaa'y, jade'en idø'øn ja n'ukpiktaajkint sa ja jaa'y yjatyin ku tyøømt ja twøjy naħjotp;

²⁷ mya'ay ja koots pyidi'iky ja jøpy, najxpts idø'øn ja xøøw tsuu jade'en, mujxp ja tømt jap, yomp idø'øn ja jap, jøts ja jaa'y ka'ap tnijaw'i tigøjxp idø'øn ja jade'en yjaty.

²⁸ Jøts kumi ja nãajx idø'øn ja jade'en ñamyayi kø'øm nanckyøømbidsøjmiyip; ku jawyeen pyidsimy ja ariindeky, jøtsnim ja kyojki, jøtsnim ja tyøømbajtni;

²⁹ kuts ja myijay, winets ja jaa'y choondi jøts ja twejxwa'andi, kumi tø ja ariin wejxk'aats tpaaty.

Ku ja Jesús tmadyakpaaty ja mortas tømt

³⁰ Nayide'en ja Jesús tnimaay ja pyabøjkpitøjk:

—¿Ti ja Dios kyutujk møøt ndami'ejxi'int midi ja tyani'tanaapy ja yjaa'y, ti ixpøjkin ti madya'aky ja ndamimado'owint?

³¹ Jade'en idø'øn ja n'ukpiktaajkint ejxim ja mortas tømt midi yikwøjp jam najjotp. Ka'ap jadu'uk ujtspajk te ya naxwiin midi janch mutsk sa ja møj mortas tøømdin;

³² jøts ku ja yikwiyj, janch yikxon ja yøñ, wyinajxkiyxy ja tuki'iyi ja ujts midi yikjagyajp jap kemyjøtpy, yikxon ja janch møj y'awaji y'axeeni, japts ja joon patki'py y'apts'o'kti.

Tigøjxp ku Jesús xumi jade'en tyik'ixpiky ja jaa'y ejxpajtin madya'akyøjxp

³³ May ja Jesús ja jaa'y jade'en ejxpajtin madya'akyøjxp tyik'ixpijky ku ja tnanky'ixpøjkøø ja øgyajpxy ja ømyadya'aky, jade'eni paat ja y'ijty tmadya'aky mabaat ja kø'øm tnajtsjawi ja jaa'y tnimadowdi.

³⁴ Jøts ejtp idø'øn ja Jesús jade'en tyik'ixpijky ja jaa'y ejxpajtin madya'akyøjxp, jøts tyukmadøøpy pyabøjkpitøjk ja wa'ats pøni ti dø'øn ja jade'en tyijpy.

Ku ja Jesús tyiknajxy ja møk poj, jøts ku ja tyik'amøkiy'iñ ja mejy

³⁵ Xjats ku kyoodsiyii'ñ ja et nay ja'abi xøøw, winets ja tnimaay pyabøjkpitøjk:

—iWan tjaa'myindi jaduktamajñ'ampy jam nøøba'am!

³⁶ Xjats ja jade'en tminawya'kxidøø ja mayjaa'y, jøts ja jap barkijøtpy tyiktsoo'ndøø ja Jesús mayim ja jap wyinaty, ojts abikbyarki ja pyadsøøñidi, ja' ja ojts tmøøtnøjkxti.

³⁷ Xjats ja poj jam janch møk myiin, jøts ja nøø møk'ampy y'adøtspinaxwa'jky, yikxon ja yjanchtojmji'jky jøts ja kom nøø tyøjkiyii'ñ jam barkijotp, ujtsnip ja wyinaty.

³⁸ Jamts ja Jesús wyinaty mya'ay barki ix'am, tø ja jam wyinaty ñagyukøyi; winets pyabøjkpitøjk ja ojts yuxyi, jøts ja ojts ñii'mxyi:

—iWindsøn! ¿Kidi mdsø'øgi ku nnøjøø'kxin uk ku n'oo'kin?

³⁹ Xjats ja Jesús pyidi'jky jøts ja møk twingugajpxiyii'ñ ja poj; jøts yide'en ja mejy tnimaay:

—iMimadook øts et, kidi m'adi'ich!

Winets ja mejy jatyi y'amøkiyii'ñ jøts ja tu'ugyi tyaañ.

⁴⁰ Xjats ja tnimaay pyabøjkpitøjk:

—¿Jadits ku mdsø'øgidi, tigøjxp ku ø xkajanchjawidi?

⁴¹ Winets ja yjanchø'jkidøø, yide'en ja kø'øm ñawyajnidøø:

—iPønimts idø'øn ya'at ndejint, sudso poj sudso mejy yø myimadøyi!

1 Xjats ja ttayø'ñajxtøø ja nøø, jøts ja yja'ttøø jam nøøba'am mā dø'øn ja naajx wyinaty txøøw'aty Gadara.

2 Xjats ku ja Jesús yø'øpyidsiimy jam barkijotp, winets jaa'y ja tu'uk ñimejnøø midi jam wyinaty tsoo'mp jam kami santijotp mā ja oo'kpi ñaxøkidi, miku' ja wyinaty myøøt'ajtpy.

3 Jam idø'øn ja wyinaty tyimchinaadyakni mā ja oo'kpi ñaxøkidi, jøts ka'ap idø'øn ja pøn pujx kadeen y'uktaxiçojtsiniyi y'uktakxojtsiniyi.

4 Kumi tø ja wyinaty kawinaak ojk jade'en yjayiktuñ, xjats ja jaty ttapoti, jadi'iñi ja pu'xk tanuki, ejtp idø'øn ja jade'en txumituñ jøts ja jade'en nipøn kyamayi.

5 Ejtp idø'øn ja xyumiwidity xinaxy tsunaxy, jam ja kojpkøjxp jam ja kami santijotp muum chabaawidity, jøts tsaa ja jam kø'øm yjanchnadyuktat-saachiyi.

6 Xjats ku ja jagamy t'ejxpaajty ja Jesús, winets ja ojts putyi tñiijxxy jøts ja twinguxanaay,

7 yide'en ja møk'ampy tñimaay:

—¿Jesús, Dios U'nk, ti ø xanimemp, sa ø xunwa'añ? Njanchminuu'kxakpy tun may'ajt Dios køjxpit, kidi ø xyik'ayo'ombaaty.

8 Ja' idø'øn ja jade'en kyuwa'aniiy'iñ kumi yide'en Jesús ja wyinaty tø ñii'mxyi:

—iMiku', majtstu'tut yø jaa'y!

9 Xjats ja Jesús wyangojmøø:

—¿Ti me mxøøw?

Winets ja miku' y'adsøøy jam jaa'y y'am yjotp, jøts ja wyaañ:

—Legión øø nxøøw, ja'agøjxp ku øø nnamayi.

10 Yikxon idø'øn ja tjanchminuu'kxa'jky ja Jesús, jøts idø'øn kyayika-xpidsø'ømt jam naçjotp mā ja wyinaty chøøni.

11 Jøts kumi jamdam magyuch wyinaty tyimyjøø'kxwidejtmidi jam kojpk wingon,

12 xjats ja miku' ñuu'kxaktøø, jøts ja wyandøø:

—Tanigajxk øøts yø kuch; wan øøts jam ttøki.

13 Xjats ja Jesús tyajky ja tiy'ajtin, yikjajt idø'øn ja jade'en, winets ja miku' tmajtstuttøø ja jaa'y, jøts kuch ja tñimajtskojmidi, ja' ja tyatøjkidøø. Namajtsk milin idø'øn ja kuch jam wyinaty tyanidi, ja'ats kø'øm ñanktyejmidøø jap jaa' jutjotpy jøts ja nøøjotpy tyimñaxkidaktøø, japts ja ñøøjøø'kxkøxtøø.

14 Xjats ja jaa'y ojts kyakøxti pøn jam wyinaty kuch'ejxtip, jøts ja t'atsnimadya'akwa'andi jam møj kajpjotp, jøts nayide'en jam kamjotp. Winets ja jaa'y myendøø, jøts ja t'ejxwa'andi tñijawiwya'andi ti dø'øn wyinaty tø tyuñi.

15 Ja Jesús idø'øn ja ñimendøø, winets ja ojts t'ejxti ja jaa'y pøn wyinaty t'ukmøøt'ajtp ja miku' jøts ku ja jam chinaañi wet xøøw, tø ja yikxon wyejni kyajni; winets ja jaa'y yjancho'jkidøø.

16 Pøn ja jaa'y wyinaty tø twin'ejxti, ja'ats ja tñimadyaktøø sa jaty ja wyinaty tø jyaty tø kyubety ja jaa'y pøn tmøøt'ajtp ja miku', jøts maagyuch ja nayide'en tñimadyaktøø ku ja wyinaty tø y'oo'køjxnidi.

17 Winets ja tminuu'kxakaktøø ja Jesús jøts wan ja jam tyimbyidsimy etjotp midi ja ñax'ajttip.

18 Xjats ku ja Jesús tyøjkiyi'iñ jam barkijotp, winets ja jaa'y ja ñimaajyøø midi ja miku' wyinaty jekyip t'ukmøøt'ajtp jøts ku ja pyadsoonwa'añiyi.

19 Xjats Jesús ka'ap tkupijky, yide'en ja tñimaay:

—Nøjxk mdøjkwindum, ninøjxk mmigu'uk jøts xukmado'tot ku Dios tø mjanchpudøkiyi, tamimadya'ak sudso Dios tø m'ayo'ljxyi.

²⁰ Xjats ja jaa'y ojts ñijky, jøts ja tñimadyakwidejtøjkiiyi'ñ kajp kajp jam Decápolis etjotp sa Jesús ja wyinaty tø yjanchpudøkiyi; winets jaa'y ja ñigyumaap tjanchja'widøø.

Ja Jairo ñøøx, jøts ja tø'øxyøjk pøn ja nwindson'ajtim Jesús wyet ojts ttojni

²¹ Xjats ku ja Jesús wyimbijty jap barkijøtpty, ku ja ojts ñijky jam nøøba'am, winets mayjaa'y ja jam ñimejnøø, jøts ja Jesús jamyi tyaañ.

²² Tø dø'øn ja jam wyinaty tyañ ku jaa'y jam tu'uk yja'jty midi yik'ixpøjkp jam tsaptøjkjotp. Jairo, ja' ja xyøøw'ajtpy. Xjats ku ja t'ejxpaajty ja Jesús, winets ja ñagyuxendyaajjkøø jam Jesús wyindum

²³ jøts ja tjanchminuu'kxaajky, yide'en ja tñimaay:

—Jotkøjxnip øts n'u'nk xjap; men mgø' xanixajy, jøts myøkpøkt jøts yju-ky'att.

²⁴ Xjats ja Jesús ojts tpanijky ja jaa'y; namay ja ñøjkxti, may jaa'y ja janchpadsø'nøø, yikxon ja yjanchyik'atejmujky.

²⁵ Jamts ja tø'øxyøjk wyinaty tu'uk jam mayjaa'yjotp midi wyinaty pøjkip, myakmajtsk jumøjtíp taxnaxyi ja wyinaty tø pyaajtniyi, jade'en jumøjt ja wyinaty kujk tmi'ity ja pa'am.

²⁶ Yikxon ja wyinaty tø tku'ayowi ja pya'am ku tsøyibi ja may tjayiktuñ, tø myeeñu'nk ja wyinaty tyik'oo'køjxni pøni wine'en ja jam wyinaty tmøødi, jøts niwine'en ja wyinaty tø tkadamøkpiky, ne'egi ja pa'am yjinax'adøtsni.

²⁷ Xjats ku ja ojts tñadøy jøts ku yikñimadya'aky ja Jesús, winets ja tpamiñ jam mayjaa'yjotp, jøts ja ttojni ja wyet.

²⁸ Kumi yide'en idø'øn ja ñawya'añiyi: “Ja'ayi øts wyet inet yø ndojnit, tso'okp øts inet jatyi.”

²⁹ Xjats ku dø'øn ja jade'en ttuñ, winets ja taxnaxyi jatyi y'amøkiyi'ñ; tyimya'wiyii'ñ ja kø'øm jøts ku ja wyinaty tø chø'øky ku pya'am ja wyinaty tø ñaxy.

³⁰ Xjats ja Jesús tja'wiyii'ñ, jøts kudam ja wyinaty tø tyiktsø'øky tu'uk ja jaa'y ku ja myøk'ajtin ja wyinaty tø tyik'awa'añ; xjats ja t'ejxwimbijty ja mayjaa'y, jøts ja ojts tyiktyi yide'en:

—¿Pøn øts nwet tø xojni?

³¹ Winets ja pyabøjkpitøjk y'adsoji:

—Jabi kawine'ents ja jaa'y mjanch'atejmuky, jøts mjanch'ukwa'añ: “¿Pøn øt xomp?”

³² Ejxwidejtp idø'øn ja Jesús, ja' ja tyimy'ejxwampy pøn idø'øn ja wyinaty tø yjatyim'yuktøñi.

³³ Winets ja tø'øxyøjk tsø'øgi yjanchyikmibejpniiyi, ñija'wipts ja' jøts ku ja wyinaty ja tyaxnaxyi tø ñaxy, xjats ja ojts twinguxanaay'øyi ja Jesús, tyamimadyakøjx ja tuki'iyi pøni sa jatyi ja y'ejxi tyiyi.

³⁴ Winets ja Jesús tñimaay ja tø'øxyøjk:

—Ja'agøjxp u'nk tø mdsø'øky ku ø tø xjanchjawi. Nøjxni, Dios mgunuu'kxip, jøts kidi pa'am m'ukpaajtniyi.

³⁵ Examnim ja Jesús jade'en wyinaty wya'añ, ku jaa'y jam yja'ttøø midi wyinaty tso'ondip jam møjaa'y tyøjkwindum, ja møjaa'y midi wyinaty tump jam tsaptøjkjotp, xjats ja yikñimaay:

—Tø ja mnøøx y'oo'kni. ¿Tiku yø windsøn nugo xyikjotkøjx'adi'ich?

³⁶ Myadøøpy idø'øñ Jesús ja' ku ja møjaa'y jade'en yiknøjmi, xjats ja tnimaay:

—Kidi mdsø'øgi; ja'ayi amunjoojt xjanchjawit.

³⁷ Jøts ja ojts ñøjkxti, ka'ap ja Jesús tkupijky ja mayjaa'y jøts ja myøøtwidetiyit, Pedro ja nugo myøøt'ajt, møøt ja Jacobo, jøts ja Juan midi ja Jacobo y'uch'ajtpy.

³⁸ Xjats ku ja jam yja'ttøø ma ja jaa'y jam wyinaty chøøni pøn tump tsaptøjkjotp, winets ja ojts t'ixy jøts ku ja jaa'y nugo xem yam y'adøtsnidi, pømbi jap waani yaxp, jøts pømbi jap janch møk yaxp.

³⁹ Xjats ja Jesús tyøjkyyi'ñ jap tøjkjøtpy, jøts ja tnimaay ja jaa'y:

—¿Tiku jadine'en mna'amdi, jadits ku mya'axti? Ka'ap yø kiixyu'nk y'øøky, maap yø'.

⁴⁰ Winets ja jaa'y ja ojts tnixe'ekti. Xjats ja Jesús t'ixkajxpidsømgijxy ja jaa'y, nugo u'nkteety u'nktaak ja ojts tmøødi jøts ja pabøjkpitøjk midi ja jam wyinaty myøøt'ajtpy, xjats ja tyøjkyyi'ñ ma ja kiixyu'nk jap wyinaty,

⁴¹ jøts ja ojts tnixaji kyø'køjxp, yide'en ja tnimaay:

—Talita, cumi —yide'en idø'øñ ja tijy: Mets u'nk idø'øñ nnimaapy, pidø'øk.

⁴² Xjats ja kiixyu'nk jatyi tyanaagyukyiyi'ñ jøts ja yø'øbyijky jadigojk, makmajtsk ja yjumøjt ja wyinaty. Winets ja jaa'y yjanchø'jkityigøødyøø ku ja jade'en t'ejxtøø.

⁴³ Jøts ja Jesús møk'ampy t'ane'emy ja jaa'y, jøts ka'ap pøn ttuknijawidit ku ja kiixy jade'en wyinaty tø yjujkyiky, yide'en ja møjaa'y yiknimaadyøø jøts wan kyaaky tmo'odi ja kiixyu'nk.

6

Ku ja Jesús yja'jty jadigojk Nazaretit kajjotp

¹ Xjats ja Jesús jam chøø'ñ jøts ja ñøjkxnimøø jadigojk y'etjotp, ja pyabøjkpitøjk ja myøøtnøjkx.

² Xjats ku tpaajty ja poo'kxin xøøw, winets ja yik'ixpøjktøjkyyi'ñ jam tsaptøjkjotp. Jøts ja mayjaa'y pøn ja wyinaty patmadojiyiyip, ñigyumaap ja tyimya'awidøø ku ja jade'en yik'ixpiky, xjats ja wyandøø:

—¿Ma yø jade'en tø y'ixpiky? ¿Ti wijy'ajtin yø jade'en tø yikmø'øy, jøts sudso yø jade'en ja tunk tjaty mido naxwii'ñit jaa'y ni tu'ugin kyajajtip?

³ ¿Ti kidi ya'at ja tsajtspi, ja Maryixi yø y'u'nk, ja Jacobo y'ajch, møøt ja José, møøt ja Judas, jøts ja Simón? Pø yø'øxi ja y'ajch'ajttip, jøts nayø' ja kiixyuna'jk y'ay'ajttip pøn ya tsinaadyip, ¿kidi?

Jade'en ja wyandøø, xjats ja jade'en tkamibøjkidøø ja Jesús y'ixpøjkin.

⁴ Winets Jesús ja ñimaajyidøø:

—Niduki'iyi jaa'y twindsø'øgidi ja Dios kyugajpxy, ja'ayi ja nugo kawindsø'jkyyiyip pøn ja myigugajp'ajtpy, pøn ja møøt tyukjaa'y'aty, jøts pøn ja myøøtsinaapy jam tyøjkjotp.

⁵ Xjats ja jam jade'en niti tkatuuñ, nugo ja waani tyiktsøøjky ja pamaa'y ku ja ojts tkønixajy.

⁶ Jøts nugo ja jadi'iñi tkumaa'yiyi'ñ tkudajiyi'ñ ku jaa'y ja kyajanchja'wiyøø. Xjats ja jade'en kajp kajp wyidiyty ma jaty ja kajp jam wyinaty wingon tyañ, jamts ja yik'ixpiky.

Ku ja Jesús tkexy ja pyabøjkpitøjk kajpxwa'kxpi

⁷ Ku dɔ'ɔn ja wyinaty jade'en tɔ yik'ixpiky, winets ja tyaa'jixiyi'ñ ja myak-majtskpi jaa'y, jɔts ja tpagejxy namajtsk jaty, ojts ja tkutujkmøgyixy sudso ja kuwani tyikpidsø'omdit ja miku'.

⁸ Yikxon ja ojts t'ane'emy jɔts ja niti tkako'ondit ñiduu'yø'ø'yik, nugo tyajk ja ja'ayi kyaptip. Ka'ap ja ti tminøjkxtit, ni pejni, ni tsapkaagy, ni meeñi, niti tkako'ondit.

⁹ Nugo kyø'øku'nk ja ja'ayi tuktawa'agidit, jɔts nijan tu'ugyi twetstet, ka'ap majtsk, jade'en ja yik'ana'amdøø.

¹⁰ Xjats ja yjaaktyimykniimaadyøø:

—Ku muum tøjkjøjty mdøkidit, tu'ugyi mja'ta'aktit, jam idø'ɔn mja'attit mdsoondit kunim mdsoondit jam kajpkøjxp, winetnimts mbidsø'omdit jam.

¹¹ Jɔts pøni magajp mgayikupøkt, pøni ma pøn niwine'enin mgapat-madoowa'añidi, jɔts ku jam mdsoondit, winets pu'ux xwinaptit mdekyøjxp, jɔts jade'eñi xuk'ejxtit jɔts ku jade'eñi tɔ mnañiwa'achidi. Janch øts idø'ɔn nwa'añ, janch meets idø'ɔn nnøjmi, ku Dios mye'ent tu'ukpi xøøw jɔts tiidyunwa'ant ja jaa'y, winets ja kajp nøjxk jinaxy yiktiidyuñ pøni ma mgayikupøkti, jɔts ne'egi ka'ap ja Sodomit kajp møøt ja Gomorrit kajp jade'en nøjxk yiktiidyundi sa ja nøjxk yiktiidyundi.

¹² Xjats ja pyabøjkpitøjk ojts choondøø, jɔts ja ojts yide'en kya'amaawyidetti jɔts wan ja jaa'y chinaa'yin tyiktigatsti, wan tja'dyigøgyøxti tuki'iyi ja kya'øyjaa'y'ajtindi pøni sa ja wyinaty tɔ chøøni.

¹³ Jɔts may ja nayide'en tyikpidsømdøø ja miku' midi jaa'y jam wyinaty myøøt'ajttip, jɔts ja nayide'en tyiktsøktøø may ja pamaa'y ku aceite ja ojts tajaaxti.

Ku ja Juan Bautista ja o'jkin tpaajty

¹⁴ Xjats ja windsøn Herodes ja tñmadøøy ku ja Jesús øy pøn jaa'y ñija'winiyi jɔts ku ja tyikutuky, winets ja Herodes wyaañ:

—Ja Juan midi ja jaa'y ojts tyiknøbety, ja' inet tɔ pyidsimy jadigojk jap oo'kpi jutjøtpy.

¹⁵ Xjats jadu'ukpi jaa'y ñømidi:

—Elías ja'.

Jɔts pømbi wamip:

—Dios ja' kyugajpxy, nayide'en sam jekyip myemidi ja Dios kyugajpxy.

¹⁶ Winets ja Herodes wyaañ ku ja jade'en tmadøøy:

—Ja Juan inet ja' pøn øts ojts nnankyajtspøødyi ja kyubajk, ja' inet yø tɔ pyidsimy jadigojk jap oo'kpi jutjøtpy.

Jade'en ja Herodes wyaañ.

¹⁷ Kumi ja' ja wyinaty tɔ tsumy, ja' ja wyinaty tɔ tkøwiiñ tprakwiiñ jap puxøjkjøtpy ja agøjxp jɔts ja Herodías yjotkujk'att, ja tø'øxyøjk pøn ja Felipe jawyeen y'atsnidø'øxy'ajt, pøn ja Herodes wyinaty tɔ t'atskap'aty. Ja'ats ja Herodes nugo myøøtsinaapy.

¹⁸ Paty ja Juan ja wyinaty yide'en tɔ ñii'mxyi:

—Ka'ap kyutuky jɔts m'uch ja ñidø'øxy nugo xmøøt'atit.

¹⁹ Xjats ja Herodías wyinaty jade'en tɔ tjanchmi'ambiky ja Juan jɔts ja tyimyk'ookwa'añ, xjats ja ka'ap tmwinmaa'nbyaaty sudso ja t'ukyik'ookt;

²⁰ kumi ñija'wip ja Herodes wyinaty jɔts ku ja Juan wyinaty øy tsuj yjaa'y'aty ku pøky tkamøødi, paty ja ttsø'øgi jɔts paty ja ñidø'øxy ja sa tkaduktuñ. Pyatmadooijp yikxon ja kyajpxy ku ja Juan janch tsuj myadya'aky, øy ja mabaat tjaganimadøø.

21 Xjats ja tiemp̄i tpaajty ku ja Herodias jotkumoni wyaañ sudso ja tyik'ookt ja Juan. Winet et ja Herodes twaadsøoy ja tyumbitøjk migaabyi mi'ukpi, ja'agøjxp ku syandi xøow ja wyinaty tyiknaxy. Ja may soldadi windsøn ja wyaadsow møøt ja riki jaa'y, jøts nayide'en ja møjaa'dyøjkti pøn ja kutujk jam wyinaty t'adsinaadyip Galilea.

22 Winets ja Herodias ñøøx tyøjkii'ñ jap ma ja jaa'y jap wyinaty kyaydi y'uukti jøts ja jap y'ejch, xjats ja Herodes ja ojts tjanchuj'ixy ja y'ajtsk, nayide'en ja jaa'myidi pøn ja jap wyinaty myøøtkaapy. Winets ja tñimaay ja kiixy midi jap wyinaty tø y'ech:

—Amidook øts pøni ti mdsøjkpy, nyakp øts inet øy midi.

23 Ojts Dios ja ttuk'ixy jøts ku ja tmo'ot pøni ti ja kiixy køøm y'amidøopy, pikta'aky paat kutujk paat ja kukwa'kxy tyakwa'añ.

24 Xjats ku ja kiixy jade'en tmadøoy winets ja pyidsiimy, jøts tyaak ja t'atsnimaay:

—¿Ti n'amido'op?

Xjats ja ojts ñii'mxyi:

—Ja Juan kyubajk m'amidooyip pøn ja jaa'y tyiknøbajt.

25 Winets ja kiixy jatyi tyøjkii'ñ nay jap ma ja windsøn jap wyinaty, jøts ja tñimaay:

—Ixymyi ndsøky ja Juan kyubajk pøn jaa'y tyiknøbajt, ja' øts kyubajk xmøøjyip txyjøtpy.

26 Winets ja windsøn yjanchjotmay'oo'kpijky ku ja kiixy jade'en wyaañ; jøts kumi tø ja wyinaty Dios ttuk'ejxni jøts ku ja tyakt tuki'iyi pøni ti ja kiixy y'amidøopy, tø migaabyi mi'ukpi ja wyinaty jade'en tmadowdi, xjats ja jade'en sa tñanimaay, kyupøjk ja' midi idø'on ja kiixy wyinaty y'amidøopy.

27 Jatyi syoldadi tu'uk tkejxy pøn wyinaty y'ejx'ejtip, jøts ja t'atsyikwinajkit ja Juan kyubajk, jøts tyikme'ent møkta'aky'ampy.

28 Xjats ja soldadi chøø'ñ, jøts ja ojts ñijkxy jap puxøjkjøtpy, japts Juan kyubajk ja ojts tkajtspo'jtiiy, jøts ja tyikmiñ txyjotp. Jade'en ja kiixy ja yikmøøy, jøts ja jade'en tmøøy ja tyaak.

29 Xjats ku ja Juan pyabøjkpitøjk ñija'wiyøø, winets ja yikpøkjø'knøø, ojts pyabøjkpitøjk ja yikpidø'øgiyi, ja' ja ojts yiknaxøkiyidi.

Ku ja Jesús tyikaay ja nimagoxk milbi jaa'y

30 Xjats ja Jesús ja kyudanaabyi tminabyaajtøø, jøts ja ojts tyamimadyakixyi ti jatyi ja wyinaty tø ttuudi, jøts ti ja wyinaty tø ttuk'ixpøkti ja jaa'y.

31 Xjats Jesús ja tñimaay:

—Mendi, wan tjaa'myindi poo'kxpi ma et abak.

Ja'agøjxp idø'on ja jam jade'en ñøjkxwa'andi ku ja mayjaa'y ja myiyø'owyimbityidi myiyø'y'adijyidi, niwine'enin ja yikxon kyakaydi kya'uukti.

32 Winets ja barki ja ttatøjkidøø, jøts ja ñøjkxtøø abak etjotp.

33 Mayjaa'y ja y'ejxidøø ku ja jade'en choo'ndøø. Yik'ejxkajp ja Jesús; xjats ja choo'ndøø pujtpim, kawinaak kajp ja jaa'y jam ñøjkxtøø jøts ja ojts t'anajxukti ja Jesús, jawyeen ja mayjaa'y jam ne'egi yja'ttøø ma ja wyinaty y'ukja'atwa'andi.

34 Xjats ku ja jam yja'ttøø, ku ja Jesús pyidsiimy jap barkijøtpy, winets ja t'ejxpaajty ja mayjaa'y, jøts ja ojts t'ayo'ixy ku ja jam yik'ayowim tyanidi mabyorreegin midi ñi'ejxpi ka'ejtp; jøts ja tyik'ixpøjktøjkii'ñ, jeky ja tyik'ixpijky.

35 Xjats ku ja et chuu'ñi, winets ja pyabøjkpitøjk ja wingon ñimejnøø, jøts ja ñimaajyøø:

—Tøts ja et chuu'ñi, pø ka'apts ya pøn chøøni.

36 Kajxni yø jaa'y, wan tnøjknidi kamjøøjty, wan tnøjknidi ma kajp wingon, jamts tju'udyit ja jii'kxy, kumi janch yu'oo'knidip yø'.

37 Winets ja Jesús y'adsøø yøts ja wyaañ:

—Ka'ap idø'on mwa'ant, mo'odi chapkaaky, yikaydi.

Xjats ja pyabøjkpitøjk wyandøø:

—¿Nøjkxp øøts jøts øøts tsapkaaky n'atsju'uty majtsk magø'pxy denario, jøts øøts yø jaa'y nyika'aty?

38 Winets ja Jesús wyaañ:

—¿Ja winaak jap mdsapkaaktyi? Nøjkx x'ats'ejxti.

Xjats ku ja t'ejxtøø, winets ja tnimaadyøø:

—Magoxk ja tsapkaaky jap jøts majtsk ja ajkx.

39 Xjats ja Jesús tyikutujky jøts wan ja jaa'y wanjaty t'ixa'lakti jam tsuxk miyjotp;

40 winets ja jaa'y y'ixaktøø tukpiky jaty, pømbi niwixikxmyajk ixaktøø, jøts pømbi nimagø'pxy.

41 Xjats ja Jesús magoxk tnixajiyii'ñ ja tsapkaaky jøts majtsk ja ajkx, winets ja ojts tpat'ixy yø tsajp, jøts ja ojts tkunuu'kxy ja tsapkaaky xjats ja ojts ttukwa'kxy, jøts ja pyabøjkpitøjk ja tmø'øy jøts ja ttaguma'adyit ja jaa'y jøts ja tyikwa'kxidit. Tuki'iyi ja jaa'y ajkx yiktagumaagyøjxtøø, ojts ja yikmøøgyøxti,

42 xjats ja kyaadyøø ku'uxyi;

43 winets ja tsapkaaky windank makmajtsk kach yikpøkmujky møøt ja ajkx windank.

44 Janch namay ja jaa'y jam wyinaty yjøø'kxti, ja yaa'dyøjk ja yikmachodøø nimagoxk mil.

Ku ja Jesús yø'øy jam mejwyingøjxp

45 Xjats ja Jesús ja pyabøjkpitøjk tkugajxigyijxy jap barkijøtpy, jøts ja ojts tyiknijkxy jawyeen jam Betsaida, kyajxjawyeeni jaa jøts ja nøø ja ttanaxtit. Xjats ja yjaaktaañ jøts ja jaa'y ja tminawya'kxixt.

46 Xjats ku ja jade'en tminawya'kxøø ja mayjaa'y, winets ja ñijkxy Dios'ajot'ajtpi kojpkøjxp.

47 Jøts ja barki jam ja wyinaty kujk ñaxy mejkyujk'am ku ja et kyoodsiyii'ñ, jøts ja Jesús jam wyinaty nadyu'uk tø tyañ jam naxkøjxp.

48 Xjats ja ojts t'ixy ja pyabøjkpitøjk jøts ku ja ka'ap y'ukmaa'niyidi sudso tkaaptit ja nøø, ja'agøjxp ku ja poj wyinaty yø'øy wimbet'ampy. Xjats ku yjøpkyoots'ajty winets ja Jesús ojts tninijkxy wingon ja pyabøjkpitøjk, jadi'iñi ja nøøwingøjxp yø'øy, jøts tyimy'ukwinaxwampy ja pyabøjkpitøjk ja wyinaty.

49 Ku ja ojts y'ejxpaadyi jøts ku ja yø'øy jam nøøwingøjxp, winets ja pyabøjkpitøjk yjanchabaagaktøø, miku' ja wyinaty tø tyimwyinmaydi;

50 kumi tø ja wyinaty niduki'iyi t'ejxti, janch tsø'jkidip ja'. Xjats Jesús ja ojts myigajpxyidi, yide'en ja ojts yiknøjmidi:

—jlotmøkpøkti; øts idø'on, kidi mdsø'øgidi!

51 Xjats ja kyøxpejty jam barkijotp ma ja jam wyinaty, jøts ja poj jaty ñajxy; ñigyumaap ja tyimya'widøø,

52 kumi ka'anin ja wyinaty tnijawidi yikxon pøni pøn ja Jesús, øy ja tsapkaaky ja' tjayikmayi, janch kujuun idø'on ja'adi, ka'ap idø'on ja tjä'gyukidi.

Ku ja Jesús tyiktsøjky ja mayjaa'y jam Genesaret

⁵³ Xjats ja ttanajxtøø ja mejy, jøts ja ojts yja'atti jam Genesaretit jaa'y y'etjotp, jamts byarki ja ojts tni xojtspatti nøøba'am.

⁵⁴ Ja'ayi ja pyidsømdøø jap barkijøtpy, winets ja Jesús jatyi yik'ejxkajpy.

⁵⁵ Jøts ja jaa'y jatyi ttukmadow'abidsømdøø ja myigu'uk ma jaty ja kajp jam wyinaty jøts ku ja Jesús tø yja'aty, xjats ja jaa'y tkiyja'tpinibøjkidøø maabajtkøjxp ja pamaa'y ma ja jam wyinaty tni jawidi ja Jesús.

⁵⁶ Jøts ku ja Jesús yja'jty ømyadsowi, ku ja tni yø'øyi ja kajp møj mutsk, uk ku ja yja'aty kamjotp, ejtp idø'on ja jaa'y tuu'am tpikta'akti ja pamaa'y, jamts ja tminuu'kxa'akti ja Jesús jøts wyetpaa' ja wine'enin tyukpaadidit; jøts pøni pøn ja wet paajtiyip, jatyi ja cho'okti.

7

Ja ka'øwyinmaa'n ja jaa'y tyikpøkyajtp

¹ Winets ja Jesús yiknimiin ma ja jam wyinaty, ja fariseotøjk ja ojts niimiin møøt ja kajpxwejpitøjk, pøn jam wyinaty winaagin tø choondi Jerusalén.

² Ja'ats t'ejxtøø kudam ja Jesús pyabøjkpitøjk kyøbujti ku kyaydi, jøts ka'ap idø'on ejxim ja møjaa'y chinaa'yin, ja'agøjxp ja ojts wenk tni gajpxti tni madya'akti.

³ (Kumi yide'en ja fariseotøjk kostumbri tmøøt'atti jøts nayide'en ja myigu'uk israelit jaa'y, ja' idø'on ja pyadundip pøni sa jaty ja møjaa'dyøjk wyinaty tø y'atsøonidi, ka' pøn kyay kunim ja kyagøbujti may ojk, winetnims ja wa'ats naja'wiyidi.

⁴ Nayide'en pøni pøn maayjotpy tsoo'mp, jøts pøni ku ja ka'ap kyøbujnim kawinaak ojk, ka'ap ja nayide'en kya'aty. May idø'on ja kostumbri jade'en mido ja pyadundip, ejtp idø'on yikpujy ujuk'i'i'n, tsajptsøø, møøt tery tas mido tum pujx, jøts maabajt, jade'en ja wa'ats tyik'etti.)

⁵ Paty fariseotøjk møøt ja kajpxwejpitøjk tni maadyøø ja Jesús:

—¿Tigøjxp ku yø mbabøjkpitøjk jade'en ja kyø' tkapujti ku yø kyaydi sa ja møjaa'y chinaa'yin wya'a'n?

⁶ Xjats ja Jesús y'adsøø jøts ja wya'a'n:

—Meets win'øø'mbi, yikxon ja Isaias mido Dios kyugajpxy'ajtpy ojts tja'ay ja Dios kyajpxy ku ja wya'a'n:

Nugo yø jaa'y jade'en y'aaw ttakajpxy ku øts yø xwindsø'øgi, jøts niwine'enin øts n'ayuujk yø xkaja'gyukiyi.

⁷ Niti yø kyawa'a'n jade'en, øy øts yø mabaat xjawindsø'øgi, ja'agøjxp ku tyikyø'ødyi ja jaa'y ixpøjkin jøts wya'andi kuts ja nja'aji.

⁸ Nayide'en ja Jesús wyami:

—Jøts meets idø'on jade'en, kumi jade'en meets Dios kyutujk x'ixwejtsi, jøts xpadundi mido jaa'y kyostumbri'ajtpy: ja terypuujk, ja terypuujk, jøts pøni ti jaty meets jade'en mdumpy.

⁹ Jade'en ja tni maay:

—Janch wijy mee mnayjawiniyi jøts ku mgostumbri jade'en xpadundi, m'ixwijchp meets ja Dios kyutujk.

¹⁰ Øy ja Moisés yide'en yjawa'a'n: “Windsø'øgi mdeety mdaak”, jøts “Pøni pøn tyety tyaaak tka'ømyigajpxp, wan ja jaty t'øøky.”

¹¹ Jøts ku meets, mdanigutujk'ajtpy meets ja jaa'y, ka'ap idø'on tyimy'aguwanikøjxpi jøts ja tyety tyaaak ja tyimwyindsø'øgit, wan ja tnojmido ja tyety ja tyaaak: “Ka'ap inet ixyam nbudøkit, ka' ti nmo'owa'a'n, ja'agøjxp

ku øts nbiktá'aky tmøøt'aty Corbán." (Corbán, ja' tyijpy ayuujk, tø ndamiyøxy ja Dios tuki'iyi nbiktá'aky);

¹² jøts ku ja jade'en wya'añ, nijuunits meets ja xka'uktukpudøjkyini ja tyeety ja tyaak.

¹³ Jade'en'ampy meets ja xka'ukyikmøjtøjkiñi ja Dios kyajpxy, ja'agøjpx ku ja mgostumbri xuk'ixpøkti xem yam ja u'nk ja una'jk, jøts nayide'en ja mdsinaa'yin xyikyø'odyi.

¹⁴ Xjats ja tyajxmujkøjx ja jaa'y jadigojk, jøts ja tnimaay:

—Patmadoodik øts ni'ijtyi, jøts xnimado'odit tu'uk ja ayuujk:

¹⁵ Niti jii'kxy jaa'y kyayikpøkpyetyi ku jaa'y ti tjii'kxy. Ja' jaa'y yikpøkpyajtjip midi tsoo'mp jam anmija'winjotp.

¹⁶ Madowdi yikxon, pø jamxi mdøtskti, yø'øts mdamado'odip.

¹⁷ Xjats ku ja Jesús tminawya'kxøø ja jaa'y, winets ja tyøjkiyiñ tøjkjøtpy, japts pyabøjkpitøjk ja ojts yiktiyi ti ja'abi madya'aky jade'en tyijpy.

¹⁸ Xjats ja tnimaay:

—¿Ni meets paat yø xkanimadooni? ¿Ka'ap xnijawidi ku jaa'y niti jii'kxy kyayikpøkpyetyi ku jaa'y ti tjii'kxy?

¹⁹ Ka'ap jii'kxy tyøki anmija'winjotp, maatsjotp ja jii'kxy tyøki ma ja tinch, jøts pyidsimy ku jaa'y ñijkxy nawiyø'oyibi.

Jade'en idø'on ja ojts tnigajpxy jøts ku jii'kxy tum wa'ats midi yikjøø'kxp, ka' yikpøkpyety.

²⁰ Yide'en ja wyaañ:

—Ja' jaa'y yikpøkpyajtjip midi pidsømp y'anmija'winjotp.

²¹ Kumi jam pyidsimy ja ka'øwiyinmaa'ñ ku jaa'y kya'øwiyinmay, jam pyidsimy ku jaa'y ñiyaa'y ñidø'øxy ñabyøjkxyidi, ku nadyu'uk jaa'y ñamyøøt'atyidi, ku jaa'y yikjaa'y'øøky,

²² ku jaa'y myeech, ku jaa'y wenk jaa'y pyikta'aky tsojkiyi, ku jaa'y ti tka'ødyuñ, ku jaa'y tyaay'aty, ku jaa'y najts'aaw najtsjoojt yaa'y'aty, ku jaa'y myigu'uk ti ttami'ama'at'aty, ku jaa'y pyagajpxy, ku jaa'y ñamyikexyi, ku jaa'y niti tkawinmaj.

²³ Tum anmija'winjotp yø ka'ødyunk jade'en chøøñ midi jaa'y tyikpøkpyajtp.

Ku ja Tiro t'øxyøjk tjanchja'wiyiñ ja Jesús

²⁴ Xjats ja Jesús jam chøø'ñ jøts ja ñijkxy Tiro jøts Sidón, jade'en ja et jam txøow'aty ma dø'on ja ñijkxy. Xjats ku tøjx ja jam tpaajty jamts ja tyøjkiyiñ, ka'ap ja pøn t'uktuknijawiwya'añ ku ja jam. Ma ka'ap ja jade'en yjajty ojts ja jatyi yiknijawi.

²⁵ Jatyi t'øxyøjk ja tu'uk ñija'wiyøø pøn ñøøxu'nk jam wynaty miku' tmøøt'ajtp; ja'ats jam meen jøts ja wyinguxanaajyi.

²⁶ Ojts ja t'øxyøjk wya'añ jøts ja Jesús tyikpidsøømt ja miku' midi ja kiixyu'nk jam wynaty myøøt'ajtpy, sirofenicysit jaa'y idø'on ja t'øxyøjk pøn jam jade'en meen, jøts griego ayuujk ja kyajpxy.

²⁷ Xjats ja Jesús y'adsøøy jøts ja wyaañ:

—Jawyeen øts ja israelit jaa'y nbudøkit, jøts meets ix'oojknim.

²⁸ Winets ja t'øxyøjk y'adsøøy jøts ja wyaañ:

—Janch jade'en teety, ka'ap kyajade'eni. Jade'en øts ixymn nnayjawi yi ejxim ja uke'ngin, jøts ja israelit jaa'y ndejint ejxim jaa'y una'jkin kyaydi, jøts ja kyaaky abu'xk tyika'adi jøts ja uku'nk ja jatyi tkaamyuky. Paty teety nnøjmi jøts mdu'ump may'ajtp jøts ø xpudøkit.

²⁹ Xjats ja Jesús tnimaay ja t'øxyøjk:

—Janch idø'øn mwā'añ; nøjkxti. Tø ja m'u'nk ja miku' myajtstuujtniyi.

³⁰ Xjats ja tø'oxyøk ojts ñijkxy tyøjkjotp, kuts ja jam yja'aty jøts ja ñøøxu'nk ja tpaajty maabajtkøjxp. Ka'ap miku' ja wyinaty t'ukmøøt'ajtni, tø ja wyinaty myajtstuujtniyi.

Ku Jesús ja nat jaa'y tyatsk tyik'awajtsiyi

³¹ Xjats ja Jesús jam choo'ngojmøø Tiro, jøts ja ñijkxy Sidón, tyimñajxts ja jam jøts magyajp ja ttanajxy jam Decápolis etjotp, jøts ja yja'jty mā ja mejy txøw'aty Galilea.

³² Jamts jaa'y jadu'uk yiktaniamiñ pøn wyinaty nat, pøn wyinaty atoojts, ka'ap ja y'øgyajpxy, winets ja yiknimaay jøts ja kyø' ja ttanixajt jøts ja tyik-tso'okt.

³³ Xjats Jesús ja ojts abiky tsoo tyiknijkxy, ojts ja nadyu'uk tjıway mā ja mayjaa'y jam wyinaty, jøts kyøtsa'jx ja ojts tkudeji jap nat jaa'y tyatskjøtpy, ojts kyø' ja ttsujyweey jøts jaa'y tyoojts ja ojts ttpaajti.

³⁴ Winets ja Jesús chajp'ixy, jøts ojts myøkxejy, xjats wyaañ:

—¡Efata! —mıdı ayuujk tyıjpy: ¡Awa'ats!

³⁵ Winets ja nat jaa'y jatyı ja tyatsk y'awaajch, jøts ja tyoojts nayıde'en y'øyiyi'ñ, xjats ja jade'en kyajpxijky øy, ojts ja yikxon y'awıjy.

³⁶ Winets ja Jesús yikxon ojts t'uk'ane'emy jawyeen ja mayjaa'y jøts ja pøn ka'ap ttukmado'odıt; ku ja jade'en tnımaay, ne'egi jınaxy ja ojts tnımadya'akti.

³⁷ Xjats ja jade'en ñıgyumaap tjawıdı, yıde'en ja wyandøø:

—Tyum'ødyumpy øy ti; yikmadøøpy nat jaa'y, jøts yik'awıjpy uum jaa'y.

8

Ku ja Jesús tyikaay ja ñımaktaxk milbi jaa'y

¹ Winet ets mayjaa'y jam wyinaty tø ñıamyukyıdı, jøts ja kyaajyık ja kya'etti. Xjats ja Jesús tyaaıxyı'ñ ja pyabøjkpitøjk, jøts ja tnımaay:

² —Njanch'ayo'ıjpxy øts yø jaa'y, kumi tyıgøøkxøwıpy øts yø ya xnımenıdı, jade'en øts yø ya kujk nmøøtsınaañıdı jøts ja kyaaky tø kyøjxnıdı.

³ Ku øts inet yø ayuu axøøw njakaxt jam tyøjkjotp, jadı'ıñı net yø muum yjotkøjxnıdı tuu'ajy, kumi ja wınaagın pøn tø choondi jagam et.

⁴ Xjats pyabøjkpitøjk ja ojts y'adsøy, jøts ja ñımaajyøø:

—¿Sudø yø jaa'y ya yjanchka'adyıt, pø ka'ats ya pøn chøøni?

⁵ Winets ja Jesús tyıktııy ja pyabøjkpitøjk, yıde'en ja tnımaay:

—¿Wınaak tsapkaaky jap xmøødıdı?

Winets ja wyandøø:

—Wıxujk.

⁶ Xjats Jesús tnımaay ja jaa'y jøts wan t'ıxakøxti jam naxkøjxp, winets ja tnıxajyı'ñ ja tsapkaaky, jøts ja ttamøja'wıyıı'ñ ja Dios. Xjats ja ojts ttukwa'kxy ja tsapkaaky jøts ja tmøøy ja pyabøjkpitøjk, winets ja ttagumaadyøjkıdøø ja jaa'y.

⁷ Jamts wınaagın ja mutsk ajkxu'nk ja wyinaty tmøøt'ajtmıdı, ja'ats ja Jesús ojts tkunuu'kxy, jøts pyabøjkpitøjk ja ttaguwa'anıyıı'ñ jøts wan ja jaa'y ja ttagumaagyøxti.

⁸ Xjats ja jaa'y nı'ıjtyı kyaagyøjxtøø, ojts yıkpøkmuky wıxujk kach.

⁹ Jøts ja jaa'y pøn wyinaty tø kyaydı, ñımaktaxk mılin ja jam wyinaty ñımay'atti. Xjats ja Jesús ja ojts tnınawya'kxnıyı,

¹⁰ jøts ja tyøjkinaa jap barkijøtpy møøt ja pyabøjkpitøjk, jøts ja ñøjkxtøø jam Dalmanutit jaa'y y'etjotp.

Ku ja fariseotøjk t'amidoodøø ja Jesús, jøts ja ttuk'ejxtit ja myilagr'ajtin

¹¹ Winets ja fariseotøjk jam myendøø, jøts ja tminagyajpxøjkidøø ja Jesús. Ja' ja ojts t'amidowdi, jøts ja Jesús ja dios'ajtin tyikwingaxø'økt ya naxwiiñ, nugo dø'øn jade'en tjot'ejxti.

¹² Xjats Jesús ja tkumøkxajiyii'ñ, jøts ja wyaañ:

—¿Tigøjxp ku jaa'y ya'atpi xøøw ya'atpi jumøjt t'amidowdi jøts yiktuk'ejxtit ja dios'ajtin? Janch meets idø'øn nnøjmi, jøts ku jade'embj jaa'y ni tuk'ojkin kyayiktuk'ejxtit ja dios'ajtin.

¹³ Xjats ja tmajtstuupty, jøts ja tyøjkiyii'ñ jap byarkijøtpy, jøts ja ñijky jaduktamajñ'ampy jam nøøba'am.

Ja fariseit jaa'y y'ixpøjkin

¹⁴ Nika'ap kyaaky ja wyinaty tø tkondi, tø ja wyinaty tja'dyigødy, tu'ugyi tsapkaakyu'nk ja wyinaty jap tkonidi jap barkijøtpy.

¹⁵ Xjats ja Jesús tnimaay ja pyabøjkpitøjk:

—Ejxim Herodes, ejxim fariseotøjk lyevaduri xkupøjkidi, øyim mnay'ejx'etidit.

¹⁶ Winets ja pyabøjkpitøjk jatyi myadyaktøjkidøø, yide'en ja ñawyajnidøø:

—Ja'agøjxp yø jade'en wya'añ ku adøm tsapkaaky tø ngayikmi'iñindi.

¹⁷ Wa'ats Jesús ja tnijawi ti ja wyinaty kyajpxy'ajttip. Ka'ap ja tsapkaaky ja tijy midi ñimadoodip ja pyabøjkpitøjk, ja Herodes ja fariseotøjk ndejnt ja y'ixpøjkin ja y'ayuujk tyijpy. Paty ja Jesús yide'en tyiktiy:

—¿Tiku mwa'andi ku mdsapkaaky xijy kya'etti? ¿Ka'anim xnimadowdi, jøts nika'ap xnijawidinim, janch juun mgubajk xmøødidi?

¹⁸ ¿Ka'anim mgø'øm ween xawin'ejxti, jøts ni mdatsk xkadamoodinim, niwine'enin xkaja'myatsti?

¹⁹ Ku øts ojts tsapkaaky magoxk nyikwa'kxy, jøts ojts nmø'øy ja magoxk milbi jaa'y, ¿winaak kach ja kaaky windank ojts xpøkmukti?

Xjats ja wyandøø:

—Makmajtsk kach.

²⁰ —¿Jøts mja'myajtstip nayide'en ku øts ojts ja tsapkaaky wixujk nyikwa'kxy, jøts øts ja myaktaxk milbi jaa'y ojts nmø'øy? ¿Jøts winaak kach ja kaaky windank xpøkmuktøø?

Xjats ja wyandøø:

—Wixujk.

²¹ Winets Jesús ja pyabøjkpitøjk tnimaay:

—Ka'anindam meets idø'øn xja'gyuki. Ja tsapkaaky yø meets ja'ayi mda-jotmay'øø'kpy.

Ku ja Jesús tyikwin'ejxwa'kxy tu'uk ja winap jaa'y jam Betsaida

²² Jawaani y'ijty, xjats ja yja'tti jam Betsaida ma ja kajp wyinaty jade'en txøøwi; jamts ja Jesús yiktanimitiñ tu'uk ja winap jaa'y, jøts ja ojts yikminuu'kxa'aky, jøts ja tnixajit jøts ja tyiktsø'økt.

²³ Xjats ja jade'en tnixajiyii'ñ kyø'køjxp, jøts ja tyikpidsiimy kajpjotp. Winets tsujy ja ojts ttawenjaaxy jøts ja tnixajiyii'ñ, xjats ja tyiktiy jøts pøni kujk wyinaty wine'enin t'ixy øy ti.

²⁴ Winets ja winap jaa'y wyin'ejxwa'kxy, jøts wyaañ:

—N'ijxpy øts yø jaa'y ku yø'ødyi, ja ku jade'en kyaxø'økti sa kipyin.

²⁵ Winets ja Jesús jadigojk twinguxajiyii'n ja winap jaa'y, jøts ja yikxon tyik'ejxmøkiyii'n, ojts ja winap jaa'y ja wyeen y'awa'a'ach, tum wa'a'ats ja t'ejxni øy tyii'ji.

²⁶ Xjats Jesús ja tkajxni jam tyøjkwindum, yide'en ja tnimaay:
—Kidi mgajptøki, jøts nipøn jam sa xkanøjmit.

Ku ja Pedro wyaañ jøts ku ja Jesús yja'aji yiknitsokp, ja Cristo

²⁷ Tø dø'øn ja jade'en wyinaty y'ukjaty, xjats ja Jesús ja pyabøjkpitøjk tmøøtsøø'n jøts ja ñøjkxti jam Cesarea Filipino. Jade'en ja et xyøøw ma dø'øn ja ñøjkxti. Xjats ja Jesús tuu'ajy ja pyabøjkpitøjk tø tnimaay, jøts ja tyiktiy:

—¿Pønik øts, sa jaa'y wya'andi?

²⁸ Winets ja pyabøjkpitøjk y'adsoodøø, jøts ja wyandøø:
—Winaagin jaa'y wya'andi jøts ku mets Juan Bautista, pømbi nømidip jøts ku mets Elias midi jekyibim yiknija'wip, jøts ku mets Dios kyugajpx'ajtpi midi jekyibim yiknigajpxp yiknimadyakp.

²⁹ Xjats ja kø'øm ja Jesús yiktøøjidøø yide'en:

—Jøts meets, ¿Sa meets m'ukwa'a'añ, pøn øts idø'øn?

Winets ja Pedro y'adsøøy jøts ja wyaañ:

—Ja yiknitsokpi mets, ja Cristo.

³⁰ Xjats Jesús ja ñimaajyidøø jøts ka'ap pøn ttukmado'odit jøts ku ja kyiristi.

Ku ja Jesús kø'øm tniagajpxy jøts ku ja y'oock

³¹ Xjats ja Jesús tyik'ixpøjktøjkiyii'n ja pyabøjkpitøjk, ja' ja tyukmadoow sa ja y'ayo'ombaatt ja Dios, ja naxwii'ñit jaa'y ja myøjkudanaabyi, kø'øm idø'øn ja jade'en ñadyijyi. Yide'en ja Jesús ttukmadøøy jøts ku ja møjaa'dyøjk, ku ja israelit jaa'y tyeetywindsøn, jøts ku ja kajpxwejpitøjk ja y'ixwetsiyit. Jade'en ja tnimaay ja pyabøjkpitøjk jøts ku ja ja' yik'oogit, tyukmadoow ja' ku ja jade'en y'oock jøts ku ja kyidigøøk xøøw pyidsø'omt jap oo'kpi jutjøtøpy ku ja yujkpyøkt.

³² Wa'a'ats ja ttukmadoogixy ja pyabøjkpitøjk. Xjats ja Pedro ka'ap t'øyja'wiyii'n ku ja wyinaty tø wya'añ kuk ja y'oock. Ja'agøjxp ja Pedro møk twingugajpxiyii'n ja Jesús.

³³ Xjats ja Jesús wya'kjimbijty, jøts ja pyabøjkpitøjk ja ojts twin'ixy, xjats ku Pedro miku'jin wyinaty tø kyajpxy, winets Jesús ja twingugajpxiyii'n nayide'en, jawaani møk'ampy ja tnimaay:

—¡Mets miku!, jiwa'ak, majstutk øts! Ka' mets jade'en mwinmay sam ja Dios Teety wyinmayin, jade'en me mwinmay sam øy pøn naxwii'ñit jaa'y.

³⁴ Winets ja Jesús ja pyabøjkpitøjk tyaaixiyii'n, tuki'iyi ja tyajxmukixy ja mayjaa'y jøts ja tnimaay:

—Pøni pøn tsojkin tmøøt'ajtp jøts øts ja nja' jade'en xpaduujnit, ka' mibaat kø'øm ñadyunk'atit, ja'ayi ku amumjoojt ñadyamiyoxit ja ayo'on jøts idø'øn jade'en tpadu'unt.

³⁵ Pønts kajade'enduñim nay'ejxip, niwindem tkapaaty ja nitso'ok'ajtin; jøts pøn ø xku'ayo'ombaajtip, ja' idø'øn tpaatp ja nitso'ok'ajtin.

³⁶ ¿Ja ti ja ñiwy'a'ant øy ja jaa'y tjaja'bøjkixy ja naxwii'ñit jøts ja y'anmija'win ne'egi wyindigøy?

³⁷ Jabi ka'axi mibaat ja ñitso'ok'ajtin ja tkuju'uty.

³⁸ Jøts pøni pøn ø xatsø'ødyump, pøni pøn øts n'øgyajpxy n'øy'ayuujk xatsø'ødyuujnip ya jaa'y wyinduujy midi jekyip t'ukpadundip ja Dios, ya pojkipi jaa'y wyinduujy, nayide'ents øts ja tsø'ødyumbi nøjx ndatsø'ødyuñ

ku ɔts ja Dios Teety kyutujk nmimejnit, ku ɔts ja ankilis nmøøtme'ent pøn tsinaadyip jap tsajpjøtpy. Ɔts idø'øn ja naxwii'ñit jaa'y nmøjkudanaabyi'ajtpy.

9

1 Janch meets idø'øn nnøjmi, ja jaa'y ya winaagin tyanidi pøn ka'ooktip kunim ja t'ejxtit tnijawidit ja Dios kyutujk ku ja tpiкта'akt møk'ampy.

Ku ja Jesús adsu'jky tuki'iyi'y'atstigajch, amuum chamambøjkijxy

2 Tyudujkxøøwip ja Jesús wyinaty jade'en tø wya'añ, xjats ja pyabøjkpitøjk ja nidigøøk t'ukwaay, ja Pedro ja y'ukwaaw møøt ja Jacobo jøts møøt ja Juan, jade'en ja ojts tmøøtnijxxy jam kojpkøjxp mā ja Jesús adsu'jky tyigajch, jamts ja pyabøjkpitøjk wyinaty t'ukmøøtani.

3 Yikxon wyet ja chamambijky janch poop ejxim tsap'øø'pkyin, nipøn jaa'y wyet ya jade'en tkayikwa'ach sa dø'øn wyet ja pyoobiyi'ñ.

4 Winets ja pyabøjkpitøjk t'ejxpattøø ja Elías møøt ja Moisés, jøts ku ja tmøøtmadya'akti ja Jesús.

5 Xjats ja Pedro tnimaay ja Jesús:

—Windsøn, ityimy'øy'ajtp ku øø nyam'aty! Nyik'øyip øøts ujts'aadyøjk, tu'uk mets mja', tu'uk Moisés yja', jøts Elías yja' tu'uk.

6 Tø ja pyabøjkpitøjk wyinaty yjancho'øgidyøjkinidi, ka'ap ja y'ukwinmaa'nbyatnidi sa ja tnøjmidit ja Jesús paty ja Pedro jade'en nugo y'ukwānaa.

7 Winets yoots myiiñ mā ja jam wyinaty, ja'ats ja ojts yik'adigøyidi, jøts jap yikmadøøy ja Dios y'ayuujk midi wāan:

—Ya'at n'U'nk ɔts idø'øn njanchøjkpy, mimadojidi pøni sa wya'añ.

8 Xjats ku ja jaty y'ejxjø'tkøø, winets ja nipøn tka'ejxpattøø mā ja Jesús jam wyinaty, ja'ayi jam wyinaty nadyu'uk tanaapy.

9 Xjats ku ja choo'nidøø jam kojpkøjxp ku ja kyidaknidi, winets Jesús ja tya'ana'amidøø, jøts ja ka'ap pøn ttamimadya'aktit midi ja wyinaty tø t'ejxti, jaanim ja tmadya'akyø'ødyit kunim ja kø'øm oo'kpi jutjøtpy pyidsø'ømt jadigojk, jaa pøn myøjkudanaabyi'ajtpy ja naxwii'ñit jaa'y.

10 Xjats ja pyabøjkpitøjk jade'en kø'ømyi t'amaa'tsk'ajttøø, kø'ømyi ja jade'en tkajpxy'atti ti dø'øn ja jade'en tyijpy ku ja pyidsø'ømt jap oo'kpi jutjøtpy jadigojk.

11 Xjats ja tyiktøødøø ja Jesús, yide'en ja tnimaadyøø:

—¿Tigøjxp ku ja kajpxwejpitøjk yide'en wya'andi jøts ku Elías jawyeen mye'ent, jøts ix'oojknim ja yiknitsokpi?

12 Winets ja Jesús y'adsøøy jøts ja tnimaay:

—Janch me'emp ja Elías jawyeen, ja'ats nøjx nayide'en tyikjajtp ja øgyostumbri midi Dios ojts tpiкта'aky. ¿Jøts sa ja Dios kyajpxy wya'añ, sa ɔts ja nyiknigajpxy pøn møj kudanaabyi'ajtp, sak njatt? Yide'en ja Dios kyajpxy wya'añ jøts kuk ø n'ayo'ombaatt, ka'abik ɔts ja jaa'y xtsokt, x'ixwetspik ɔts ja jaa'y.

13 Jøts ndukmadøøpy meets ixyam ku ja Juan Bautista tø y'atsmiñ, jøts tø kyugajpx'aty nayide'en ejxim Elíasin, jøts jaa'y ja ojts yjemduñi tyeduñi pøni sa y'anmija'win ja tyimñekti, jajt idø'øn ja jade'en sa Dios kyajpxy wyinaty wya'añ.

Ku ja Jesús tyikmøjkpijky tu'uk ja mixyu'nk pøn wyinaty ja miku' tø tyatøkiy:

14 Jawaani y'ijty xjats ja Jesús tmøøtja'aty ja nidigøøk ja myigu'uk mā ja pyabøjkpitøjk jam wyinaty tø yjaaktandi, jøts ja t'ejxpattøø ja mayjaa'y ku

ja pyabøjkpitøjk jam wyinaty tø yiknabejkinidi; jøts kajpxwejpitøjk ja jam tmøøtnay'øjyidi.

¹⁵ Xjats ku ja Jesús yik'ejxpaajty, winets ja jaa'y niduki'iyi ñigyumaap yjajtøø, jatyi ja tnibujtø'ktøø ja Jesús, jøts ja ojts tkajpxpoo'kxiti.

¹⁶ Xjats Jesús ja yiktøøjidøø, yide'en ja ñimaajyidøø:

—¿Sats yø nbabøjkpitøjk xnøjmidi, ti yø møøt mnadyamigajpxidip?

¹⁷ Winets ja mayjaa'y nidu'ugin y'adsøø y jøts ja wyaañ:

—Windsøn, ixya me tø ndanimiñ tu'uk nmajnku'nk pøn ja miku' tmøøt'ajtp, jøts ja' yø kayikajpxip.

¹⁸ Jatyi miku' yø myachi ku yø ma ñijxy, ja'ats yø yiknaxkidajkip, jamts yø yjanch'a'øøpy jøts yjanchtøtskaaty, jade'en'ampy yø tø yjanchwindigøøñi, ka'ap myøjaaaw yø ukteeni. Tø øts yø mbabøjkpitøjk njanøjmidi jøts tyikpidsø'ømdit yø miku' mididi øts yø n'u'nk myøøt'ajtpy, jøts ka'ap yø tø myayidi.

¹⁹ Xjats ja Jesús y'adsøø y jøts ja wyaañ:

—Mee kajanchja'wibidi, yø mbøky nugo myikmajadaktip. ¿Ma windemnim meets ja ngajpxy ja n'ayuujk xpabøjkít, jøts windemnim meets yø jade'embid xuktatso'okt ku øts yø ejtp njanchjanigajpx'ity?

²⁰ Winets ja tyikmendøø, xjats ku Jesús ja miku' y'ejxpaajti, winets ja mixy yikxidejtyø'jy møk'ampy, ja miku' ja ojts jade'en tyuñi, xjats ja kyidaay, kawinaak ojk ja kyibejp'awidipty jøts ja yjanch'a'øøpy.

²¹ Winets ja Jesús tyiktiy ja u'nkteety, yide'en ja tnimaay:

—¿Windii yø jade'en pyaadyi, windii yø jade'en yjajt'okwa'añ?

Xjats ja u'nkteety wyaañ:

—Jaayip yø pyaajtniyi ku yø myutsk'ajty,

²² may ojk ja miku' yø jønjøtpy tø yiktøkiyi, may ojk yø tø yiktøkiyi møj nøøjøtpy, jøts yø jade'en yik'ookwa'añi. Ukwanik sa xu'unt, ayo'ejxk øøts, pudøjkik øøts.

²³ Xjats ja Jesús wyaañ:

—Pøni mjanchja'wip ja Dios, tum'ø y jaa'y pyidsø'ømxiyi øy tyii'ji pøni ku tjanchjawi ja Dios.

²⁴ Winets ja mixy tyeety møk'ampy wyaañ:

—¡Njanchja'wip øts ja Dios; jøts pudøjkik øts jøts njaakjanchjavit!

²⁵ Xjats ku ja Jesús ojts t'ixy ja mayjaa'y jøts ku ja ñamyuk'adi'ichidi, winets ja møk'ampy twingugajpxiyi'ñ ja miku', yide'en ja tnimaay:

—Miku', mets ja jaa'y myik'uu'mpy jøts mets ja jaa'y myiknajtpy, øts nyiku-tujkpy jøts mbidsø'ømt; majtstu'ut yø mixy, jøts kidi m'uktøjkini jadigojk.

²⁶ Xjats ja miku' møk'ampy chabaaguejky, jøts ja mixy ojts møk'ampy yikxidejtyø'ø y, winets miku' ja ojts myajtstu'udyi, jade'en ja yiktaajni ejxim ja jaa'y y'øøky, may ja jaa'y wyanidi jøts ku ja tø y'oo'kni.

²⁷ Xjats Jesús ja ojts twejtsji'iky; jøts ja mixy tyanaagyukiyi'ñ.

²⁸ Winets ja Jesús tyøjkini tøjkjøtpy, jøts ja pyabøjkpitøjk ja yiktøøjyøø yide'en:

—¿Tigøjxp ku øøts yø miku' tø ngayikpidsimy?

²⁹ Xjats ja Jesús wyaañ:

—Yø miku' jade'en'ajttip, winet yø pyidsø'mdi ku ja Dios n'ajot'ajtin jøts ku yø ngu'amaay'ajtin.

Ku ja Jesús tnigajpxy jadigojk jøts ku ja y'ookt

³⁰ Xjats ku ja ojts choondi jam, winets ja ñajxtøø Galilea. Jøts ka'ap Jesús ja pøn ttukni jawi wya'añ ku ja jam wyinaty,

31 kumi yide'en ja pyabøjkpitøjk ja wyinaty yik'ixpiky, yide'en ja tnøjmi:

—Øts idø'on nmøjkudanaabyi'ajtpy ja naẏwii'ñit jaa'y, jøts meets idø'on nduknijawi sa njatt sa ngubatt ya naẏwiiñ. Jade'en øts ja jaa'y xkøyaakt, ku øts ja mayjaa'y xmatst jøts ø jaty: xyik'ookt; jøts ku jade'en n'uk'ookt, winets øts kyidigøøk xøøw nbidsø'omt jap oo'kpi jutjøtpy.

32 Xjats ja pyabøjkpitøjk ja ka'ap tnimadowdi ku ja jade'en yiknøjmidi, jøts tsø'jkidip ja' øyik idø'on ja tyiktø'ødit ti jade'en tyijpy.

Pøn idø'on jawaani møj ma Dios ja yjaa'y ja kyutujk ttanitani

33 Xjats ja Jesús jam tmøøtsøø'ñ ja pyabøjkpitøjk jøts ja yja'tti Capernaum, jade'en ja møj kajp xyøøw ma dø'on ja ojts yja'tti; jøts ku ja tyøjkidøø tu'ugyi tøjktjøtpy, japts ja Jesús pyabøjkpitøjk tyiktiy, yide'en ja tnimaay:

—¿Ti meets ukwan ja mgajpxy'ajtpy tuu'ajy?

34 Xjats ja pyabøjkpitøjk amøñi y'amidoodukti, ka'ap ja sa wya'andi, kumi ja' ja jam wyinaty tø tnadyamigajpxyidi pøn pyabøjkpitøjk idø'on ja tyimy-jawaani møj pidsømp.

35 Winets ja Jesús y'ixaajky jøts ja tyaaixiyi'ñ ja ñimakmajtskpi jaa'y pøn ixpøjktip, jøts ja tnimaay:

—Pøni pøn namyøjpikta'akwajnip, wan ja myigu'uk tpudøki, øy ti tunk ttu'unt ejxim ja jaa'y pøn ja ñitanaabyi ka'ejtp.

36 Winets ja tnixaajiyi'ñ tu'uk ja mutsku'nk jøts ja tpiktaajky jam agujk'am, jamts ja ojts tsa'anji'iky, jøts ja wyaañ:

37 —Pøni pøn tkupøjkp øy midi una'jku'nk øts køjxp, øts ja wyinaty jade'en xkupøjkp, kumi tum øts ja una'jk nja'ajtpy; jøts pøni pøn øts idø'on jade'en wyinaty xkupøjkp, kidi øtsip ja wyinaty nadyu'uk xtyimgyupøkp, nayi kyupøkp ja nøjkx pøn ø xkajx.

Ku ja Jesús wyaañ: Adøm ja' nbudøjkibi pøni ka'ap adøm ja xmidsep'ajtyindi

38 Winets ja Juan tnimaay ja Jesús:

—Windsøn, tø øøts ja jaa'y tu'uk n'ixy pøn tyiktump mets mmøk'ajtin, jøts miku' ja ttukmajtstu'uty ja jaa'y, jøts kumi ka'ap ja yik'ijxyi xjats øøts ja tø ndukmajtstu'uty jøts ja ka'ap jade'en y'uk'adøtsnit.

39 Winets ja Jesús wyaañ:

—Janch øy midi yø jaa'y tyumpy, kidi xukmajtstu'utti; pøni yø' ja jaa'y tyiktsojpk øts køjxp, sudso øts yø jadigojk xmigajpxigøøgyoymit.

40 Pøn adøm xkamidsep'ajtimp, xmigu'ukwa'animp adøm ja'.

41 Jøts ku pøngapøn ja tsuxk nøø mmo'ojidit tuktsemu'ngin, ku ja ttaguyakit øts køjxp, jøts kumi øts meets njaaktyimyjaa'y'ajtnip, wimbejtxiyip tigajtsxiyip ja nøjkx jawaani øy, kumi øts idø'on meets xkristi'ajtp.

Ja' midi yikpøkpyajtp

42 Øy pøngapøn pøni pøn øts n'una'jk nidu'ugin xyikpojkrpituuñiyip, pøni pøn øts n'una'jk nidu'ugin xyiktundigøjyiyip pøn jaty ø xjanchja'widip, ne'egi ja øyik y'ijty jøts paandaak yiktayukwøønt ja jaa'y pøni pøn jade'en adøtsp jøts ja mejjotp yikuwibepit.

43 Pøni miykpøkyuuñip yø mgø', ne'egi øy ku xkajtspoott jøts mjaakayikpojkrpitunit; ne'egi øy jade'en ku mgø' tuktamajñ xmidøkit jap tsajpjøtpy, jøts kidi xmidøki ka'pxy jap miku' ku'py ma jøønyow nijuuni kyapi'ich,

44 ma tinø'øk nijuuni kya'øøky.

45 Pøni myikpojkkpituujnip yø mdeky, ne'egi øy ku xkajtspoott jøts mjaakayikpojkkpitudit; ne'egi jade'en paktuk mdøkit jap tsajppjøtpy, jøts kidi myikpikta'aky ka'pxy møøt mdeky jap miku' ku'py,

46 ma tinø'øk niijuuni kya'øøky jøts ma jøøñ niijuuni kyapi'ich.

47 Jøts pøni ku yø mween myikpojkkpitudiyi, ne'egi øy jøts mnawyenjuudyit; ne'egi øy jade'en ku windu'uk mdøkit ma Dios kyutuujk tñitani ja jaa'dyi, jøts kidi myikpikta'aky miku' ku'py møøt mween ka'pxy,

48 ma niijuuni kya'øøky, ma jøøñ ejtp tyøøy.

49 'Niduki'iyi ja Dios yjaa'y nøjkk ayo'ombaaty ya naẏwiiñ, jøts ku dø'øn jade'en tpaaty t'ixy winets ja nøjkk jawaani øy pyidsømni. Jade'en idø'øn ndejint n'ukpiktaajkint ejxim ja jiyujk øxy ku ja kaan ja møøt yiktamiyoxi, jawaani øy ja nøjkk pyidsømni.

50 Kaan amuum tyik'øygøjxp o ti, nayide'en meets idø'øn ndejint m'ødyu'unt ku mmigu'uk xukmado'ot ja Dios yja' sudso y'anmija'win kyawindigø'ødyit. Kuts ka'ap jade'en mdu'undit, tø wyinaty mbidsømndi ejxim ja kaanin midi kawa'ats midi katump. Møøt mnamyayidi o pøngapøn.

10

Ku ja Jesús kyajpxwiy jøts kidi amajtsk jaa'y ñawya'kxyidi

1 Xjats ja Jesús jam chøø'ñ Capernaum, jøts ja ñijky Judea, jøts ku ja jam ñajxy winets ja mõj nøø ja ttanajxy midi txøøw'ajtp Jordán. Jøts ja tniyø'øyi ja kajp midi jam wyinaty tãmp jaduktamajñ'ampy, jamts ja jaa'y may'ampy ñamyukojmijidøø ma ja wyinaty, jøts ja ojts tyik'ixpiky jade'eñim sayim ja wyinaty jekyip tø ttuñ.

2 Xjats ja fariseotøjk winaagin tñimendøø ja Jesús jøts ja nugo tka-jpxy'ejxwa'andi, yide'en ja tñimadyi pøni øy idø'øn jade'en ku ñiyaa'y ja tmajtsu'utwa'añ ja ñidø'øxy, jade'en ja ojts tyiktøwdi.

3 Xjats ja Jesús y'adsøøy jøts ja wyaañ:

—¿Sa Moisés yikutujky?

4 Winets ja y'adsoodøø jøts ja wyandøø:

—Ojts Moisés tyikutuky jøts ja nøky tu'uk kyojt ku ja yaa'dyøjk tmajtsu'utt ja ñidø'øxy.

5 Xjats ja Jesús y'adsøøy jøts ja wyaañ:

—Ja'agøjxp ja Moisés jade'en tyikutujky ku mee niwine'enin mgamadøy, ku mee niwine'enin mgaja'gyuki.

6 Kumi Dios tyiktso'ondakijxy tuki'iyi ku yaa'dyøjk ku tø'øxyøjk tyiknajtskojyih'ñ jøts ja jaa'y y'amajtskidit.

7 Paty yaa'dyøjk kuwani tmajtsu'utt ja tyeety ja tyaaq, jøts ñidø'øxy tu'ugyi tmøøtsøønit nadyu'uk,

8 ku jaa'y y'amajtsk'atti ka'ap ja y'uknamajtskinidi, tu'ugyi ja ñamyayi ñabyaajtñiyidi.

9 Paty ka'ap y'øyi ku jaa'y tyiknawya'kxit midi ja Dios tø tyik'amajtski.

10 Xjats ku ja tyøjkidøø tøjkjøtpy, winets ja pyabøjkpitøjk tyiktøødøø jadigojk midi ja Jesús wyinaty tø tmadya'aky.

11 Ñigajpx idø'øn ja Jesús ja', yide'en ja wyaañ:

—Pøni pøn ja ñidø'øxy tmajtsutp jøts jadu'uk tmøøt'amajtskiyøjmi, ja jawyeen nidø'øxy idø'øn ja wyinaty kya'ødyumpy jøts ja pøkytuñ;

12 jøts ku ja tø'øxyøjk tmajtsu'uty ja ñiyaa'y, jøts ja tmøøt'amajtskimi ja wenk yaa'dyøjk, pøkytump idø'øn ja nayide'en.

Ku ja Jesús tkunuu'kxy ja mutskuna'jk

¹³ Xjats ja jaa'y y'una'jku'nk tyikmendøø, ja' ja tyuknimendøø jøts ja Jesús ja tkønixajt, jøts ja møjaa'y jade'en yja'attøø jam møøt ja mutskuna'jk; winets ja pyabøjkpitøjk ja ojts møk'ampy wyingugajpxiyidi.

¹⁴ Xjats ku ja Jesús ja jade'en ojts t'ixy ja pyabøjkpitøjk, winets ja yjanch'ambijky jøts ja wyaañ:

—Majtstu'tut yø una'jk, wan øts yø xnimendi, kidi xnøjmidi kuts yø xkanime'endit, kumi tum jade'embj jaa'y nøjxx nitanaajyip ja Dios kyutujk.

¹⁵ Janch øts idø'on nwa'añ, pøni pøn tkagupøjkp ja Dios kyutujk midj ja tyanitanaapy ja yjaa'y, niwindem xøøw ja jaa'y ja nøjxx tkadatøki jadigojk pøni ku ja wyinaty jade'en tø tkagupiky ejxim mutsku'nk yikupikyin.

¹⁶ Winets ja tsa'anji'jky ja mutskuna'jk jøts ja ojts tkunuu'kxy, ojts ja kyø' ja ttanixajkixy.

Ja kumeeñ jaa'y

¹⁷ Xjats ku ja yjaakwidijty, winets ja jaa'y ja tu'uk puty ñimejnøø jøts ja wyinguxanaajyi, yide'en ja ñimaajyøø:

—Mets øyjaa'y yik'ixpøjkpi, çti ø ndu'ump jøts øts n'anmija'win tpaatt ja nitso'ok'ajtin xemikøjxp?

¹⁸ Xjats ja Jesús wyaañ:

—çTi jade'en myikwajnip ku øts jade'en xnøjmi jøts ku øts janchty-imy'øyjaa'y? Ka'ap pøn y'øyjaa'y, tu'ugyi Dios y'øyi.

¹⁹ Mnija'wipxi dø'on ja Dios kyutujk midj nòm:p: “Kidi mmigu'uk ñiyaa'y ñidø'øxy xpøjkxi; kidi myikjaa'y'øøky; kidi mmeech; kidi mmigu'uk xwindaa'y'aty; windsøøgi mdeety mdaak.”

²⁰ Xjats ja jaa'y y'adsøøy jøts ja wyaañ:

—Windsøn, jaayip øts yø tuki'iyi nbadundøjkini ku nmutsk'aty.

²¹ Winets ja Jesús twin'ejxji'jky ja jaa'y amyuyj tsaachuyuj, jøts ja tnimaay:

—Jap jadu'uk midj mjaakabadumpy: nøjxx, tuki'iyi x'atsto'okixy ti jaty jam mmøøt'ajtpy, jøts ja ayoobi jaa'y xabudøkit, winets ja Dios mjetkujk'ajtin mmo'ojiyit jap tsajpøtpy; nøjxx x'atstuñ midj ndijpy, winets ø xpadosont.

²² Xjats ku ja jaa'y jade'en tmadøøy, winets ja nugo tkumaa'yiyi'ñ tkudajiyi'ñ, janch ñiyjotmay'oo'kpim ojts ñøjxxni, kumi janch kumeeñ jaa'y idø'on ja wyinaty.

²³ Xjats ja Jesús twin'ejxjø'kijxy ja jaa'y pøn ja jam wyinaty nidanaajyip, winets pyabøjkpitøjk ja tnimaay:

—iØy yjanchepi sudso ja kumeeñ jaa'y tkupøjkit ja Dios kyutujk midj yjaa'y ja tyanitanaapy!

²⁴ Xjats ja pyabøjkpitøjk jadi'iñi myondi tyukti ku ja Jesús jade'en wya'añ; winets ja Jesús wyaañ jadigojk:

—U'nk una'jkti, ijanch tyimchep sudso ja kumeeñ jaa'y ttatøkidit ja Dios kyutujk, kumi myeeñ ja amuum yikmøjtøjkidip!

²⁵ Ne'egi tsojk ñaxt tu'uk ja møj jiyujk jap xuu'ñ jutjøtpy, jøts nigidi tu'uk ja kumeeñ jaa'y tyøkit jade'en ma Dios kyutujk ttanitani ja yjaa'y.

²⁶ Xjats ku ja jade'en tjaaktyimyadoodøø ku ja Jesús wya'añ, winet ja tyimñigyumaap yjajttøø, jøts ja xem yam ñawajnidøø:

—çJøts pønims idø'on nitso'ok'atp?

²⁷ Xjats ja Jesús y'ejxji'jky, jøts ja wyaañ:

—Ka'ap yø øy pøn jaa'y kø'øm ñankñitso'ogiyit, ja Dios ja'ayi myøøt'ajtpy ja møk'ajtin sudso xyiknitsoojkint; ti Dios tkatsepjawi.

²⁸ Winets ja Pedro kyajpxøjkijyi'ñ jøts ja wyaañ:

—Tø øø tuki'iyi nmajtstutkixy ja nbikta'aky, jøts ixyam øøts idø'on jade'en nwidity mets møøt.

²⁹ Xjats ja Jesús y'adsøøy:

—Janch meets idø'on nnøjmi, pøni pøn tmajtstuttip tyøjk, pøn tmajtstuttip y'ajch y'uch, jøts chø', ja tyeety ja tyaak, uk ja y'u'nk ñidø'oxy tmajtstu'uty møøt ja naajx ja kam, pøni pøn jade'en tmajtstutp ja pyikta'aky øts køjxp, ja øgyajpxkøjxp ja ømyadya'akyøjxp,

³⁰ pyaatp ja nøjx ja tøjx may'ampy, may'ampy ja nøjx tpaaty y'uch y'ajch, ja tyeety ja tyaak, ja ñaajx ja kyam, øy ja tjaku'ayo'ombaadi øts køjxp; pøni myidanaapy idø'on ku sa yiktu'unt, winets y'anmija'win ñøjxkt ma Dios.

³¹ Jøts may ja jaa'y Dios nøjx yik'amutskiyidi, pøn nugo namyøjpikta'ejtip; ja' ne'egi ja Dios kajxa'aky yikpidsø'ømp, pøn yik'ayo'om'ejtp.

Ku ja Jesús tniğajpxy jadigojk jøts ku ja y'oock

³² Jam idø'on ja wyinaty pyatti ma jam ja tuu' pyety midi nøjxkp Jerusalén, ja Jesús wyinaty jawyeen yø'øpy jøts ja pyabøjkpitøjk ix'oock yø'ødyi. Xjats ja pyabøjkpitøjk ja ñigyumaap tjawidi ku ja Jesús jade'en ñijxxy, jøts janch tsø'jkidip ja'. Winets Jesús ja yjiwa'widøø nimakmajtsk, jøts ja ojts tyuk-madoowinibøjkidi jadigojk sa jaty ja wyinaty yjatwa'añ kyubatwa'Lgxañ.

³³ Yide'en ja ñimaajyidøø:

—M'ejtip ku ixyam nbejtyindi jøts nniyxxyindi jam Jerusalén ma øts jaa'y xkøyakt, pøn møj kudanaaby'ajtpy ja naaxwi'ñit jaa'y, jøts øts ja israelit jaa'y tyeetywindsøn jam xmatst jøts ja kajpxwejpitøjkti, ja'ats tyikutuktup jøts ø n'oock, jam øts ja xkøyaktit ma ja wenk jaa'y yikutukti møk'ampy.

³⁴ Yikxon ø nyiktaxe'ekt, yikwop yikoxp øts, xnidsujip øts ja jaa'y, jøts øts ja jaa'y xyik'oock; jøts ku øts wyinaty jade'en tø n'øøky, kyidigøøk xøøw øts jadigojk nbidsø'ømt jap oo'kpi jutjøtpy.

Ku ja Jacobo møøt ja Juan t'amidoodøø ja may'ajtn

³⁵ Xjats ja Jacobo, møøt ja Juan pøn ja Zebedeo myajnk'ajttip, ja' ojts tniimendi ja Jesús jøts ja tniimaadyi:

—Windsøn, ja' øø ndsøjkpy jøts øø xuujnit ja may'ajt, ja' øø n'amidoowampy.

³⁶ Winets ja Jesús tyiktiy yide'en:

—¿Ti dø'on mdsøjktip, ti ø ndu'ump?

³⁷ Xjats ja wyandøø:

—Xmøøtsøøni øøts ku myikutukt, adsow aduuk øøts xyiktsøønit mgutu-
jktajkjøtpy, jøts øøts ja jaa'y xwindsø'øgit.

³⁸ Winets ja Jesús wyaañ:

—Ka'ap meets yø xnijawi pø ti mee m'amidøøpy. Ngupøkp øts ja ayo'on jøts pøni sa øts ja jaa'y x'uktu'unt. ¿Jøts meets, mgupøktip meets nayide'en ja ayo'on jøts pøni sa meets ja jaa'y m'uktunin'?

³⁹ Xjats ja y'adsøodøø jøts ja wyandøø:

—Ngupøkp øøts, tiku øøts ndejint ngagupøkt.

Winets Jesús ja tniimaay:

—Janch jade'en, mjanchkupøkp meets nayide'en ja ayo'on midi ø ngupøkp, jøts mjanchkupøktip meets nayide'en pøni sa øøts ja jaa'y x'uktu'undit;

⁴⁰ tyimyo' ku meets xmøøtsinaawya'añ adsow aduuk, kidi øtsip meets ja nmo'op, ja Dios Teety ja tyakp jøts ja' ja myo'op pøni pøn ja jade'en tø ttamidsøky.

41 Xjats ku ja yjadu'ukpi pyabøjkpitøjk tmadoodøø jade'en, winets ja yjanch'ambøjktøø, jøts ja Jacobo yikmi'ambøjktøø møøt ja Juan.

42 Winets ja Jesús pyabøjkpitøjk tyajxmujky, jøts ja tnimaay:

—Yide'en'ampy ja jaa'y wyindsøn'aty pøn Dios kyajpxy tkabadundip, ja'ayi nugo ja jaa'y tyiktuñ, jøts ja tu'ugyi tja'abøjkøxni.

43 Jøts ka' mee nøjxx jade'en mjatti. Wenk meets mja'ami, pøni pøn namyøjpikta'akwajnip, ja' idø'on jade'en møjtøkip pøni pøn ja myigu'uk twindsø'jkp;

44 jøts pøni pøn tsuj windsøn'atwamp, ja' idø'on windsøndøkip pøni pøn tuki'iyi ja jaa'y jade'en tpudøjkp.

45 Ja'agøjxp ø nmiñ jøts ja jaa'y nbudøkit øy ti tunk ndu'unt, kidi ja'ajip øts tø nmiñ jøts øts jaa'y øy ti tunk xuujnit, ja' ø tø nmiñ jøts øts økyjaa'y ngubajtit ja pyøky ku n'oock winets ja mayjaa'y yikpojkipimaa'kxt. Øts idø'on ja' myøjkudanaabyi'ajtpy ja naxwii'ñit jaa'y.

Ku ja Jesús tyikwin'ejxwa'kxy ja winap jaa'y pøn txøw'ajtp Bartimeo

46 Xjats ja yja'ttøø Jericó. Jøts ku ja Jesús pyabøjkpitøjk jam wyinaty tmøøtpidsimy kajpjøtp møøt ja mayjaa'y, winets winap jaa'y ja tu'uk tpattøø pøn txøw'ajtp Bartimeo, ja Timeo y'u'nk, jam ja wyinaty chøøni tuu'am jøts ja tigati tyikmuky.

47 Xjats ku ja tmadøøy jøts ku ja Nazaretit jaa'y jam wyinaty ñaxy midi txøw'ajtp Jesús, winets ja winap jaa'y møk'ampy kyajpxkejky jøts ja wyaañ: —iWindsøn'ajtim, rey David y'ap y'u'nk, ayo'ejxx øts!

48 Xjats ja mayjaa'y ja møk'ampy wyingugajpxiyøø jøts ja y'amo'ont, ka'ap ja winap jaa'y y'amøn, ne'egi ja tjaakyikjinajx'adi'ich, yide'en ja wyaañ:

—iMets myimajtsk'ap'ajtp ja møj windsøn David, ayo'ejxx øts!

49 Xjats ja Jesús wya'k'øyyi#ñ, jøts ja pyabøjkpitøjk ja tnøjmi:

—Nøjxx x'atswawdi.

Winets ja winap jaa'y y'atsyikwaay, yide'en ja t'atsnimaadyøø:

—Tsojk, pidø'øk, ixam idø'on myikwaadsøy.

50 Xjats ja jaty'i tñajtswøjyiyi'ñ ja yukwop, wo'onjø'kp inet ja adsu'jky, jøts ja tñinijxxy ja Jesús.

51 Winets Jesús ja yiktøøjøø:

—¿Ti mdsøjkpy, sa me ndu'unt?

Xjats ja winap jaa'y y'adsøøy jøts ja wyaañ:

—Windsøn, ja win'ejxwamp øts.

52 Winets ja Jesús ja tnimaay:

—Nøjxxni; tø me mdsokni kumi tø me xjanchjawí.

Xjats ja winap jaa'y jaty'i wyin'ejxwa'kxy, jøts ja tpanijxxy ja Jesús jam tuu'am.

11

Ku ja Jesús kyajptøjkyi'ñ Jerusalén

1 Xjats ku ja jam wyinaty yja'atwanidi Jerusalén, winets ja tyandøø jam Betfagé midi ja kajp Betania wyinaty møøt ñamyiwingon'atyí, ja kajp midi jam wyinaty tandip kojpk ix'am midi txøw'ajtp Olivos, jamts ja Jesús pyabøjkpitøjk namajtsk tkajxtsøø'ñ,

2 jøts ja tnimaay:

—Nøjxxni ixem ma yø kajpu'nk wingon, jøts ku net jam mja'attit, jamts inet buuru'nk tu'uk kuwii'ñ xpæattit midi tsotsnim, midi ka'aním pøn ttatsøøni. Nøjxx x'atsmigajidi jøts xwejtsme'endit.

³ Jøts ku pøn myiktøwidit tiku jade'en m'adø'øtsti, jade'en xnøjmidit jøts ku t'anuu'kxwa'añ nwindson'ajtam, jøts ku ja jatyi tyikwimbejtkojmit.

⁴ Xjats ja pyabøjkpitøjk ñøjkxti, jøts ja buuru'nk ja ojts tjanchpaatti kuwiiñ jam tøk'agø'øm, jam ja tpaatti tuu'am jøts ja tmigajidøø.

⁵ Winets ja jaa'y winaagin tyiktøødøø pøn jam wyinatyi, yide'en ja ojts ñii'mxyidi:

—¿Ti mdundip? ¿Tigø'xp ku yø buur xmigajidi?

⁶ Xjats ja pyabøjkpitøjk y'adsoodøø jade'en sa Jesús ja wyinaty tø ñii'mxyidi; winets ja ojts yikmajstutu'utti jøts ja jam choo'ndi.

⁷ Xjats ja jade'en tyiktso'ondøø ja buur, jøts Jesús ja ojts ttaninøjkxti; winets ja wyet ja ttajiba'andøø ja buur, jøts Jesús ja ttawaa'tspejty ja jiyujk.

⁸ May jaa'y ja wyet ojts tya'apti jam tuu'am, jøts may ujts'aay ja ojts ttu'kxti jøts ja jam nayide'en tpiktaktøø, jøts ja Jesús jade'en tpaatsowa'andi ejxim møj windsønin.

⁹ Xjats ja niduki'iyi møk'ampy kyajpxkaktøø, jøts ja niduknax wyandøø:

—¡Dios Teety tsajpjotpit, kunuu'kx yø windsøn pøn me tø xkexy!

¹⁰ ¡Kunuu'kx yø windsøn midu mgutujk mimejniyip, wan ja tyeety'ap David tyikmøjtajjki ja kyutujk jadigojk! ¡Kuuyi ja Dios Teety jadu'uk yjaak'øyi!

¹¹ Xjats ja Jesús jade'en tyøjkii'ñ Jerusalén, jade'en ja yja'ty jam tsaptøjkjotp. Jøts ja ojts t'ejxkixy tuki'iyi ti jaty jam wyinaty ejtp; jøts ku ja ojts jade'en t'uk'ejxkixy, winets ja ñøjkxni jam Betania møøt nimakmajtsk pyabøjkpitøjk, ja'agø'xp ja ojts ñøjkxni ku ja et wyinaty tø chuu'ñi.

Ku ja Jesús t'ayo'onmigajpxy ja iigi tsa'amguipy midu ja tyøøm ka'ejtp

¹² Xjats ku ja Jesús kymjabom choo'ndøø Betania, winet yuu ja pyaajtøø.

¹³ Jøts ja jagam t'ejxpaajty tu'uk ja iigi kipy midu jam wyinaty janch'aamyøøt; xjats ja ojts tñinijxxy jøts ja t'ats'ejxwa'añ pøni jam idø'on ja tyøøm. Jøts ku ja ojts t'ixy, ni tu'ugin ja tyøøm ja tkapaajti, nugo ja wyinaty janch'aay ja ñaxy, kumi ka'anin ja tiempi wyinaty tpaaty ku ja iigi tyøømi.

¹⁴ Winets ja Jesús tmigajpxy ja iigi kipy, yide'en ja tñimaay:

—¡Nijuuni mga'uktøømiñi!

Ku ja Jesús jade'en wyaañ, myadowdi ja pyabøjkpitøjk ja'adi.

Ku ja Jesús twojpidso'nguixy ja too'kpitøjk jam tsaptøjkjotp

¹⁵ Jawaani y'ijty, xjats ja yja'ttøø jam Jerusalén. Jøts ku ja Jesús tyøjkii'ñ tsaptøjkjotp, winet ja t'ixwojpidso'ngijxy ja jaa'y pøn jap wyinaty too'kpitøjkjotp, midu jam wyinaty juudyip kajpxtiti, tuki'iyi ja t'ixkajpxidso'ngijxy. Nayi yikpidso'øm ja jaa'y ja' pøn jam wyinaty meen tkugondip, tuki'iyi myesi ja yiktejsapwajkøjxtøø, jøts nayide'en ja pak too'kpi chinaabyajt yiktejimbejtøjxtøø;

¹⁶ jøts ja Jesús ja jaa'y tka'uktuk'anajxni ja tsaptøjk ku ja jam tigati tjatsømnaxwa'andi.

¹⁷ Yide'en ja Jesús tñimaay ja jaa'y ku ja yik'ixpijky:

—Yide'en jap nøkyijpxy wya'añ: "Ja' øts ndøjk wya'ant jøts naxwii'ñit jaa'y jap t'ajot'attit ja Dios Teety"; jøts ka'ap meets ja jade'en ti xyiktuñ, maa'tstaajk meets ja' tø xyikwani.

¹⁸ Xjats ku ja jade'en tmadoodøø ja israelit jaa'y tyeetywindsøn møøt ja kajpxwejpitøjk, winets ja t'ixaadyøjkidøø ja taay jøts ja ttuku'oogiwya'andi, chø'jkidip idø'on jaa ku ja yjaa'y yikpøjkøxniyidit, paty ja jade'en tñidaayiwya'andi kumi tyumnija'winiyip ja mayjaa'y ja wyinaty ku ja janchnigyumaap yik'ixpiky.

¹⁹ Xjats ku ja et chuu'ñaa kyoodsiñaa, winets ja Jesús tmøotsoo'naa ja pyabøjkpitøjk jam møj kajpjotp, jøts ja jam ñøjkxti ma ja chøønidi.

Ku ja iigi tsa'amguipy tyijch

²⁰ Xjats ku kyimjabom'ajty, winets ja jam jøpyi ñajxtøø ma ja iigi kipy jam wyinaty tyani, jøts ja ojts t'ejxti ku ja wyinaty tø tyøjtsjø'kni y'aatsjøtpy.

²¹ Winets ja Pedro ja tja'myejch, jøts ja tnimaay ja Jesús:

—Windsøn, ejx ja iigi kipy tø tyøøtsni midi ojts x'ayo'onmigajxpy.

²² Winets ja Jesús y'adsøøy jøts ja wyaañ:

—Janchjawidi Dios møk'ampy.

²³ Janch meets idø'on nnøjmi, pøni pøn tnimaapy ya'at kojpk: “Nøjk mejjyotp, jamts mdøkit”, pøni ku anumjoojt jade'en mwinmay ku ka'ap mmay mdajy, jøts ku kø'øm xjanchjawi ja m'ayuujk pøni sa wyinaty tø mw'a'añ, jatp idø'on ja jade'en pøni ku wyinaty jade'en ja janchja'win xmøø'taty.

²⁴ Paty mee nnøjmi pøni ti jaty m'amidoodip ja Dios, pøni ti mgu'amidoowidip jøts ku xjøp'ejxtit jade'en, jatpts ja jade'en.

²⁵ Jøts ku mdios'ajot'attit, pøni jam ja mmidsepti, maa'kxukti, jøts Dios Teety nayide'en mbojkipmaa'kxidit pøn jap tsajpjøtpy.

²⁶ Pøni ku ka'ap xmaa'kxukti ja mmigu'uk, nayide'en meets ja Dios Teety mgapojkipmaa'kxit pøn jap tsajpjøtpy.

Ja Jesús myøk'ajtin

²⁷ Xjats ja jade'en jadigojk ñøjkxtøø jam Jerusalén. Jøts ku ja Jesús jap wyinaty wyidity jap tsaptøjkjøtpy, winets ja jap ojts ñimiñi ja teetywindsøn, ja kajpxwejpitøjk, jøts ja møjaa'dyøjkti pøn ja kutujk jam wyinaty t'adsinaadyip,

²⁸ ja'ats ja ojts yiktiyi, yide'en ja wyandøø:

—¿Pøn jade'en tø mdanigutujk'aty ku jade'en m'adi'ich ya tsaptøjkjøøjty? ¿Pøn mets jade'en mgutujkmø'øyi?

²⁹ Xjats ja Jesús y'adsøøy jøts ja wyaañ:

—Nayide'en mee nyiktøøwami; pøni x'adsoowimbejtjip øts inet, winets inet ndukmado'odit pøn øts yø jade'en tø xanigutujk'aty ku øts jade'en n'adi'ich.

³⁰ Ku ja Juan Bautista ojts yiknøbety, ¿pøn ja ojts tyanigutujk'aty ku ja jade'en y'adiijch? ¿Sa mee m'ukw'a'añ, Dios ja ojts tyanigutujk'aty jøts ja jade'en y'adøøtst? Adsoojimbejtik øts.

³¹ Winets ja kø'ømyi ñagyajpxkaajkidøø, yide'en ja ñawya'añidi:

—¿Sa njanch'uknimaay'int? Ku net yø njanimaay'int: “Dios ja ojts kyutujkmø'øyi”, yide'en adøm inet yø x'adso'owint: “¿Jøts tigøjxp ku ka'ap xjanchjawidi pøni jade'endam ja'?”

³² Jøts ja jaa'y inet xmi'ambøjkma'ant ku net njawa'anma'ant jøts ku jaa'y ja ojts kyutujkmø'øyi.

Jade'en ja kø'øm ñawyajnidøø, jøts kumi ñija'widip ja jaa'y wyinaty may ku ja Juan ja Dios kyugajpxy'aty, paty ja jade'en chø'jkidøø.

³³ Jøts ja yide'en tnimaadyi ja Jesús:

—Ka'ap øøts ja nnijawi.

Xjats ja Jesús tnimaay ja jaa'y:

—Nayide'en meets ja ka'ap ndukmado'ot pøn øts jade'en xanigutujk'ajtp ku øts jade'en n'adi'ich.

1 Winets ja Jesús tmigajpxøjkiy#i'ñ ja jaa'y ejxpajtin madya'akyøjxp, yide'en ja wyaañ:

—Jaa dø'øñ jaa'y wyinaty tu'uk pøn ja uvi tsa'am ojts tteefi kyamjotp; jøts ja yixkon tnaqueemy tnabijky, jøts ku ja jade'en t'uktuuñ winets ja tyik'øyi#i'ñ tu'uk ja uvi kumdaajk ma ja uvi tsa'am nøø ojts idø'øñ ja jade'en tyik'øyi, xjats ja tpojch tu'uk tøjch janch køjxp jam kyamjotp. Kam ejx'etaajk idø'øñ ja yik'øyi#i'ñ, ojts idø'øñ ja jade'en tyik'øyi#yixy.

W'inets ja tamuky tkøyajknaa ja kyam, tumbi ja ojts ttukmidañ, jøts ja ñøjxni abiky et.

2 Xjats ku ja tiempi tpaajty juuni cha'amy ja uvi tsa'am, winets ja windsøn tkejxy tu'uk ja tyumbi jam ma ja jaa'y ja tsa'amgam jam wyinaty tø tmidandi jøts ja jam t'atstuk'amidoowa'añ ja tsa'am kikujkp midi jam wyinaty ejtp kyamjotp.

3 Xjats ku ja tumbi jam yja'jty, winets ja jaty yikmajch jøts ja kam ejx'etpi ja ojts chiigyiyi, ka'ap ja ti yikmøø, jadi'iñi ja jam wyimbijty.

4 Winets ja kugam tkejxy jadu'uk tyumbi nay jam; ojts ja ñijky jøts ja jam nayide'en yiktuuñ, yixkon ja jam ojts tyika'ach, ojts ja chaachi kyubajki#jpxy, janchiktsepmigajpx ja jam.

5 Xjats ku ja nay jadi'iñi wyimbijty, winets ja kugam tjaakejxy jadu'uk tyumbi pøn ja kam ejx'etpi ojts tyik'oookti. Janch namay ja tumbi tmøø'taty jøts ja xyumikexy tu'uk jaty ja tsa'am tsømbi; ja'ats jam ojts ja kam ejx'etpi kya'ødyuñidi, pømbi yikwojp yikojx, jøts pømbi winaagin oo'ktøø.

6 Jamts ja kugam myajnku'nk wyinaty tø tmøø'tañ, tu'ugyi ja t'u'nk'aty, ja'ats ja jam kø'øm myøø'taan, ja'ayi ja yjanchøjkpy; xjats ja ojts ix'oojk tkexñim, yide'en ja wyaañ: "Yikwindsø'øgip yø kumi øts n'u'nk yø'."

7 Jøts ja tumbitøjk pøn jam wyinaty t'ejx'ejtipp ja tsa'amgam, ka'ap ja jade'en wyandøø jøts ja twindsø'øgidit, t'ixwibejpidsojmidøø ne'egi jinaxy ja ñawya'añidøø: "Ya'at inet ja' pøn kugam'atp; wan tyikpa'ø'jkyimp jøts adøm yø tsa'amgam nja'bøjkna'ant."

8 Xjats ja jade'en tmajtstøø, jøts ja tyik'oo'ktøø, ojts ja ñine'kx ja t'ixwibejpidsojmidøø jam tsa'amgamjotp.

9 Jøts, žti tyu'ump ja kugam kø'øm ku ja y'u'nk jade'en y'ø'jky? Kuwani ja kø'øm tnime'ent, winets ja tyikudigøøgyøxt ja kam ejx'etpi, jøts ja abikyjaa'y ja t'ixā'att, ja'ats ja myo'op ja cha'amgam.

10 '¿Ka'anim ja nøky xkajpxidi ma yide'en wya'añ?

Ja tsaā midi ja pojtspi kya'uk'a'ejxidøø, ja'ats ne'egi ixyam tø y'ukyikpiktakni pøch kyubajk jøts ja ttamajtsmujkixy ja pøch.

11 Ja Dios Teety idø'øñ jade'en tø ttuñ, øy yø nigyumaap njaja'wandi. Jade'en ja Dios kyajpxy wya'añ.

12 Winet et ja israelit tyeetywindsøn tmajtswandøø ja Jesús, ja'agøjxp ku ja wyinaty tø myigajpxyidi jade'en. Jøts kumi chø'jkidip ja mayjaa'y ja wyinaty, paty ja ojts jadi'iñi tmajtsu'utti, jøts ja jade'en choo'ñidøø.

Ku yikajpxy'aty ja kugubajt

13 Waani y'ijty, xjats ja Jesús winaagin yiktaniguejxy ja fariseotøjk møøt ja Herodes myigu'uk, jøts ja nugo yjot'ejxwa'añi, ja' ja nugo chojktip jøts ja kyajpxigø'øty, ja'ats ja yiktani'øøñip.

14 Ojts idø'øñ ja Jesús jam yiknimiñ, jøts ja yiknimaay:

—Windsøn, nnija'wip øøts jøts ku mets tiy janch mgajpxy, ku me ka'ap xmøjipikta'aky pøni sã jaty ja jaa'y wya'andi, jøts kumi ka'ap mets pøn

x'ejxkapy xka'ejxkapy, mdum'ejxkajpkijxpy mets ja jaa'y, jøts tu'ugyi mets tiy janch xuk'ixpiky ja jaa'y sudso nnøjkkxin mā Dios, paty øø nyiktøwə'añ: ¿Øy ku øøts ja windsøn César nmiyakt nmigubatt, uk ka'ap? ¿Nmo'op øøts ja meeñ, uk ka'ap?

15 Xjats kumi ñija'wip ja Jesús wyinaty jøts ku nugo yjot'ejxwə'añidi, winets ja tniṃaay:

—¿Tiku ø xjot'ejxti? Yakti tu'uk meeñ, wan ø tu'uk'ijxy.

16 Xjats ja ojts tmo'odi, xjats ku Jesús ja twin'ixy winets ja ojts tyiktiy, jøts ja wyaañ:

—¿Pøn ya'at ja wyeen y'aaw, jøts pøn ya'at ja xyøw ixya kyøjxja'ayi?

Xjats ja y'adsøødø jøts ja wyandøø:

—César yø' yja'.

17 Winets Jesús ja tniṃaay:

—Mo'odi ja César ja yja' pøni midi ja yja'ajtpy, jøts ja Dios xmo'odit pøni midi ja yja'ajtpy.

Jøts ku ja Jesús jade'en wyaañ, winets jaa'y ja ñigyumaap tjə'widøø ku ja jade'en y'adsøøy.

Ku ja jaa'y tyiktøwdi pøni janch idø'øn ja ku oo'kpi jadigojk jyujkpyøktit

18 Xjats ja Jesús ja saduceotøjk ojts ñimiñiyi. Ja' ñimejnyiyi pøn nømdip jøts ku oo'kpi nijuuni kya'ukpidsømmidit jap oo'kpi jutjøtpy; ja'ats ja ojts yiktiyi jøts ja ojts ñi'mxyi:

19 —Windsøn, yide'en ja Moisés ojts tjaadyañ tu'uk ja kutujk pøni pønik tku'oo'kpi ja ñidø'øxy, jøts ku ja y'u'nk ja ni tu'uk tkayiktañ, winets ja ku'økytø'øxy tmøøt'amajtskit ja ñiyaa'y oo'kpi myigu'uk midi nadyu'uk jøts ja jade'en yika'axiyit.

20 Jøts ja dø'øn ja jaa'y wyinaty niwixujkti, jade'en ja tyukjaa'y'atti. Xjats ja myøjpi jawyeen y'amajtskiyiñ, jøts ja jatyi tku'ø'jky ja ñidø'øxy, ka'anim ja y'u'nk ja wyinaty tpaatinim.

21 Ku dø'øn ja jade'en y'ø'jky, winets ja mutskpi midi ja oo'kpi wyinaty myijidsimy'ajtpy, ja' ojts tmøøt'amajtski ja ku'økytø'øxy, jøts ja nayide'en y'oo'knimøø, ni tu'ugin ja y'u'nk ja tkayiktaañ; nayide'en ja myidigøøkpi yaa'y yjajty.

22 Niduki'iyi ja tø'øxy ja tyiknajxkijxy ja yaa'dyøjk niwixujk yaa'y, jøts nipøn ja y'u'nk ja ojts kyadukpaadyi, nipøn ja y'u'nk tkayiktaañ. Xjats ja tø'øxyøjk nayide'en y'oo'knimøø.

23 Jøts ku ja jadigojk pyidsøømdit jap oo'kpi jutjøtpy, ¿pømbi ja tø'øxy nøjkk jadigojk tnidø'øxy'aty, kumi tø ja niduki'iyi t'atsnidø'øxy'ajtkøxti?

24 Xjats ja Jesús y'adsøøy jøts ja wyaañ:

—Ka' mee m'øwynmay, ja'agøjxp ku xkanijawidi ja Dios kyajpxy, ku xkanijawidi ja Dios myø'ajtin.

25 Ku dø'øn ja oo'kpi nøjkk pyidsømdi jadigojk jap oo'kpi jutjøtpy, nipøn nøjkk kya'uk'amajtskiñi, nipøn nøjkk kya'uktø'øxmyiyø'øñi, nipøn y'u'nk tka'ukyik'amajtskiñit. Jade'en ja tsinaa'yin ja nøjkk tyiknaxti ejxim ankilis pøn tsinaadyip jap tsajpjøtpy.

26 ¿Ka'ap meets xnijawi, jøts ku ja Dios kyajpxy wyaañ ku ja oo'kpi pyidsøømt jadigojk jap oo'kpi jutjøtpy? ¿Ka'anim ja nøky x'ixpøkti midi ja Moisés ojts tjə'ay, mā ja tniṃajpxy sudso Dios ja ojts myigajpxyi jam ujts aayjotp? Ku ja ojts ñi'mxyi: "Tum øts xdios'ajttip ja Abraham, ja Isaac jøts ja Jacob."

²⁷ Kidi oo'kpipts ja ñidios'ajtpy, pø ja'axi ja ñidios'ajtpy jøts ja tyikjujky'att øy pøn. Jøts mǵa'øwɪnmaapy meets idø'øn ku xkajanchjawidi.

Ja møj kutujk midi ja Dios ñi'ane'empy

²⁸ Xjats winet yja'jty tu'uk ja kajpxwejpitøjk ja myigu'uk midi wyɪnaty tømadvø ku ja Jesús jam jade'en tminagyajpxyi ja saduceotøjkti, jøts kumi ja wyɪnaty tñijawɪ ku ja Jesús wyɪnaty øy tø y'adsø, winets ja tyiktɪy, yide'en ja tñimaay:

—¿Midi'ibi ja Dios ja kyutujk jawaani møj jøts nmimado'owint?

²⁹ Xjats ja Jesús y'adsøø y jøts ja wyaañ:

—Ja' Dios jawaani møj kyutujk'ajtpy midi wamp yide'en: “Israelit jaa'y, ukmadowdi meets, tu'ugyi ja Dios pøn adøm ndios'ajtindip.

³⁰ Jøts tsokti ja jawaani ejxim niti jade'en xkatsokti, amumjoojt ja xwindsø'øgidit, ja' tu'ugyi mjotmay'attip, ja' tu'ugyi møk m'ajot'attip.” Ya'at idø'øn øgyutujk'ajtp.

³¹ Jøts jap jadu'uk midi ñiñayjade'en møj, yide'en ja wya'añ: “Tsok mmigu'uktøjk, windsø'øgi mmigu'uktøjk, jade'en xtsokt jøts jade'en xwindsø'øgit sa kø'øm mnachøkyi, jøts sa kø'øm mnawɪndsø'øgyi.” Ka'ap jadu'uk kutujk te midi jawaani møj sa ya'adindi.

³² Xjats ja kajpxwejpitøjk wyaañ:

—Windsøn, ka' me mgajpxigø. Tiy janch me mwa'añ jøts ku Dios ja tu'ugyi, ku ka'ap jadu'uk pøn.

³³ Janch me mwa'añ jøts ku Dios amumjoojt ndsojkint, jøts ku ja amumjoojt nwindsø'jkint, jøts ku ja tu'ugyi møk n'ajot'ajtant, tyimdy'igyaajpxy jade'en ku nmigu'uk ndsojkint jade'en sa kø'øm nnachøjkyi'imp. Ne'egi tyim'yø yø jade'en ne'egi Dios chøjkpy, jøts ka'ap jadine'en yiktsøky ku jiyujk ku ja ti ndawindsø'jki'int, ku ja ti ndamɪyøjxin jam altajrkøjpx.

³⁴ Xjats ku ja Jesús ojts t'ixy ja jaa'y ku ja Dios kyajpxy twɪnmadooji, ku ja yixxon øy tsuj y'adsoojyøø, winets ja tñimaay:

—Tyimyjawaani kya'ity jøts mets ja Dios kyutujk xkupøjkit midi yjaa'y ja tyanitanaapy.

Jøts jade'en ka'ap pøn y'uknay'a'ejxinɪyɪ jøts tyiktøø'adø'øtst øy tyii'ji.

¿Janch idø'øn ku ja David t'ap'aty ja Cristo?

³⁵ Jam ja Jesús wyɪnaty yik'ixpiky tsaptøjkjotp, jamts ja yide'en wyaañ:

—¿Sa dø'øn ja kajpxwejpitøjk wya'andi? ¿Pønik idø'øn tɪjy pøn ja Dios Teety ya pyiktaajk naxwiñ jøts wyɪndsøn'att? ¿Nugo ja møj windsøn David y'ap ja tɪjy, kidi?

³⁶ Janch jade'en wya'andi, ka'ap idø'øn ja kya'pxyi kumi kø'øm ja David wyaañ ku Espiritu Santo ja ojts y'agajpxyi, winets ja Dios kyajpxy ja ojts tjaajyi ma wyaañ yide'en:

Yide'en ja Dios Teety tñimaay ja nwindsøn'ajtim:

“ǻx'a'ak jøts ø xpudsøønit n'aga'ñ'ampy,

jøts øts yø mmidsep nmimajadakøxt.”

³⁷ ¿Pøni yø' wyɪndsøn'ajtim, sudso yø ndejnt nugo t'ap'att?

Jade'en ja Jesús wyaañ. Janch namay ja jaa'y jam wyɪnaty, jøts janch jotkujk ja jam wyɪnaty pyatmadøyi.

Ku ja Jesús ttamigajpxy sa y'adø'øtsti ja jaa'y midi yik'ixpøjktip jam tsaptøjkjotp

³⁸ Yide'en ja Jesús wyaañ ku ja jam wyɪnaty yik'ixpiky:

—Øyim mnay'ejx'etidit, ejxim meets kajpxwejpitøjkin, mnay'ejxniyidi pøn ja wyet yønjawī tpajidøjtipp ku yø'ødyi, pøn muum tuu'ajy nagyajpxpoo'kxi ttsojktip windsø'øgi winjawī,

³⁹ pøn ja øyi tsinaabyajt ttsojktip jap tsaptøjkjøtpy, pøn ja tsinaabyajt twi'ejxtip ku kyaawya'andi,

⁴⁰ jøts ja' ja ku'økyø'øxyøjk pyøjkidip ja myeeñ, jøts ja jaty tku'øø'ndi, ñadyijyi ja øy Dios'ajot'atti. Janch møk ja nøjcx tku'ayowidi ku jade'en y'adø'tsti.

Ku ja ku'økyø'øxy tpiktaajky ja lyimunsi

⁴¹ Tuk'ojk ja Jesús y'ixaajky jap møj tsaptøjkjøtpy, jap ja wyinaty chøøni jap kajuun windujpy ma ja jaa'y ja myeeñ tpikta'akti midi ja vojxtip, jap ja t'a'ejxuky ja jaa'y sa jaty jap pøn myeeñ wyinaty tpikta'akti, namay idø'on ja'adi.

⁴² Winets yja'jty tu'uk ja ku'økyø'øxy pøn wyinaty janch ayoop, pøn wyinaty niti ka'ejtxip. Ja'ats pyujxmeeñu'nk majtsk tkugo'oniyii'ñ jap meeñ abøjk'ii'ñjøtpy, tuki'iyi dø'on ja tpiktaajky midi ja wyinaty myøøt'ajtpy.

⁴³ Winets ja Jesús tyaa'xyii'ñ ja pyabøjkpitøjk, jøts ja tnimaay:

—Janch meets idø'on nnøjmi ku yø ku'økyø'øxy janch ne'egi jawī ndejnt ja myeeñ tø tyøxy. Nipøn jaa'y ja myeeñ jade'en tø tkayøxy pøn jaty ja myeeñ tø tja'agonidi jap kajuunjøtpy;

⁴⁴ kumi ja myeeñ windank yø jap nugo tø tpikta'akti; jøts yø tø'øxyøjk øy idø'on yø ayøy, ne'egi tø yø tpikta'akixy ja ñidsinaajky midi yø jam myøøt'ajtpy.

13

Ku ja Jesús tnigajpxy jøts ku ja tsaptøjk yjett

¹ Xjats ku ja Jesús pyidsiimy jam møj tsaptøjkjøtp, winet ja pyabøjkpitøjk ja tu'uk ñimaajyøø:

—jWindsøn, ejxik mets, ti tsaa yø jade'en jøts ti tøjx yø jade'en!

² Xjats ja Jesús y'adsøø y jøts ja wyaañ:

—¿M'ijxpy yø møj tøjx? Ni tu'ugin yo tsaa ja nøjcx kyatañ nikiibyety. Me'endip ja jaa'y jøts ja nøjcx tjaagøxtø tuki'iyi yø tøjx.

Ja ejxa'an midi yik'exp ku wyinaty yikt'idyunwanidi ja naxwii'ñit jaa'y

³ Xjats ja jade'en ñøjxxtøø jam kojpkøjxp midi txøøw'ajtp Olivos, ja kojpk midi jam wyinaty tsaptøjk awemp tamp. Jamts ja Jesús y'ixaajky, jøts pyabøjkpitøjk ja jam amaa'tsk yiktøøjiyøø, yide'en ja Pedro wyandøø møøt ja Jacobo, møøt ja Juan, jøts møøt ja Andrés:

⁴ —Ja' øø ndsøjkpy jøts øøts xukmado'ot windem idø'on yø tsaptøjk jade'en yjatt. ¿Ti tiy'ajtin øøts jawyeen n'exp jøts ku dø'on ja jade'en wyinaty yjatwa'añ?

⁵ Xjats ja Jesús y'adsøø y jøts ja wyaañ:

—Øyim mnay'ejx'etidit, ejxim mee pøn mw'in'øø'niyi.

⁶ Kumi may jaa'y nøjcx myendi jøts øts ja x'adunaxtit, jøts ja ñøø'mdit: "Cristo øts", mayjaa'y ja jade'en wyindaay'attip.

⁷ Jøts ku meets ja tsep øy ma xnimado'ot ku ja tsep wyingoni, kidi mdsø'øgidi kumi jatp idø'on ja jade'en, ka'ap ja ñaxt jøts ka'ap ja' t'idyu'unin xøøwi.

⁸ Kumi ja møj ja mutsk ja kajp nøjcx cheptundi xem yam, windsøndøjk ñañibidø'øgidit pøn jaty yikutujktip ya naxwiiñ; maawyeen ja uyx nøjcx ñaxy,

me'emp ja yuu, may'ampy ja jaa'y nøjx ja my'igu'uk tmidsepøkti a'øy'ampy pøn ja nugo tyikma'attip. Jøts ku dø'øn ja jade'en yjatt tso'ondakpnim idø'øn ja ayo'on wyinaty jade'en.

⁹ Jøts øyim mnay'ejx'etidit; kumi myikøyap meets mā kudunktøjk yikukti, jøts mee nøjx myiktsiiky myikwøpy jap tsaptøjkjøtpy. Mwinguwa'agip mee nøjx ja møy windsøndøjk; øts meets jap xkunøjkxip jøts ja windsøndøjk myikmadya'agidit, xjats meets idø'øn ja nja' xnigubøjkit.

¹⁰ Namga'anin ja tiidyu'unin xøøw tpaaty ku ja øgyajpxy ku ja ømyadya'aky øy magajp yikajpxwa'kxt.

¹¹ Jøts ku jade'en ja kudunk øy maðsoo myiktawinguwawidit, kidi xku-mayidi xkudajidi sudso x'adsojimbettit. Jade'en idø'øn mwa'andit pøni sa Espiritu Santo winet myik'ayukpaadyidi; kidi meedsip kø'øm mgajpxp, ja Espiritu Santo meets m'agajpxiyip.

¹² May ja jaa'y ttukniga'axwa'kxy ñagyøyakidit jøts y'ooktit, may ja u'nkteety ja y'una'lj nøjx tmidsepøkti jøts ja tkøyaktit, nayide'en ja una'lj nøjx tmidsepøkti ja tyeety ja tyaak kunim o'jkin ja ttukpaattit kø'øm.

¹³ Jøts mdumidsep'attip meets ja jaa'y ja'agøjxp ku meets øts xjanchjawi; jøts pøni pøn ja ayo'on jade'en tmidanaapy kunim y'ookt, ja' idø'øn nøjx nitso'ok'ajtp.

¹⁴ Jade'en ja Dios kyugajpxy Daniel tjaay tu'uk ja nøky mā ja ojts tñigajpxy midit ja jaa'y tyikma'atp, jøts ku meets ja jade'en x'ext ku ja mā tø yikpikta'aky mā ja kyapaat'aty —pøni pøn ya'at nøkyajpxy, wan tja'gyuki—, jøts pøni pøn jam Judea tsinaadyip wan tkaknøjkxti jam kojpkjøtp.

¹⁵ Jøts pøni jam wyinaty tø pyety tyøjkøjxp ja'abi xøøw, jøts ku ja wyinakt ka'ap ja yjaaktyimy'atstøkit jap tøjkjøtpy jøts ja tjaaktyikpidsø'ømt øy ti, ne'egi tø'øp ja' ku ja jadi'iñi yjaaka'akt;

¹⁶ Jøts pøni pøn jam wyinaty kyamjøtp, ka'ap ja y'ukwimbejtnit jam tyøjk windum jøts ja wyet ja tjaak'atswetst.

¹⁷ Ti yjanch'ayøøy ja tø'øxyøjk pøn wyinaty jøtpyti, pøn jam wyinaty myut-sku'nk tmøøt'ajttip ja'abi xøøw!

¹⁸ Ajot'att amidowdi ja Dios jøts kidi yja'aty ja tiempi winet et ku ja et wyinaty xyuxy, jøts kidi ja'abi xøøw mga'akti;

¹⁹ kumi ja dø'øn nøjx ja møk ayo'on tyuñiyi midit ka'anin yik'ixy nijuuni wine'en ñaxy kujk ja tiempi jaayip ku Dios tyiktso'ondaajky yø naxwii'ñit, nika'ap nøjx jadu'uk ja ayo'on jade'en yik'ixy sa ja'ajin midit idø'øn me'emp.

²⁰ Jøts ku Dios Teety ja jeexyip tø tka'agajpxuky kon ja ayo'on, ti pøn xijy jade'en nitso'ok'atp; jøts ja'agøjxp Dios Teety ja tø tyikøn ku ja ttsøky ja yjaaly pøn ja tø twiwich.

²¹ Pøni pøn mdukmadojidip, pøni pøn mnimaajyidip: “Ejxti, ixya dø'øn ja Cristo”, uk ku myiknøjmimidit “Ejxti, ixem ja Cristo tyani”, kidi xmibøkti.

²² Ja' idø'øn nøjx jade'en wandip pøn ñadyijyi jade'en sa Cristo sa ja Dios kyugajpxy, pøn ja miku' myøk'ajtin nøjx tyiktuujnidip jøts ja nayide'en ttu'unt sa Diosin, yjawan'ø'ømba'atwa'amp ja nøjx pøn ø tø nwiwich.

²³ Jøts nay'ejx'etidit meets, nayjøp'ejxidi jøts kidi mwindaay'atyidi ja miku'; patki'jyi meets yø yam ndukmadøy.

Sa mye'ent ja naxwii'ñit jaa'y myøjkudanaabyi

²⁴ Ku dø'øn ja tiempi ñaxt mā et ja ayo'on tyuniyit, winet ja xøøw y'ookt, winet ja po' y'ookt, jøts ja ka'ap y'uk'anidit,

²⁵ ka'agøjxp yø maadsa' jam tsajpwemp, jøts naxp ja uxp jam tsajpwemp.

²⁶ Xjats t'ejxtit ja naxwii'ñit jaa'y ja myøjkudanaabyi ku ja kyutujk tmime'ent møk'ajtingøjxp yoots agujkp.

²⁷ Winets øts ja n'ankilis ngajxwå'kxt, ja'ats øts ja njaa'y xwaamujkip pøn øts tø nwiwetsti øy maðsoo, yikwaamuktip ja' øy ja wyinaty ma tyimyjat-søøni.

²⁸ Uk patmadojidik øts ja n'ixpøjkin: Ku ja iigi kipy y'awaj y'u'nk'aty jøts ku ja kujk xyimumbøjkni, jade'en yiknijawi ja et jøts ku y'anda'akwani.

²⁹ Nayide'en idø'on ja n'ukpiktaajkint sa ja ayø'on nøjkk ñaxy; jøts ku ja jade'en x'ejxtit, jade'ents meets ja xnijawidit jøts ku øts wyinaty nmenwani.

³⁰ Janch meets idø'on nnøjmi, jatp idø'on ja jade'en namga'anin jaa'y wyinaty y'ookti.

³¹ Najxp yø naajx yø tsajp y'ity, jøts niwindem øts n'ayuujk kyanaxy.

³² Ka'ap ja et ja xøøw yiknijawi pøni juuni dø'on ja jade'en yjatt, nipøn ja tkanijawi, ni ankilis ja tkanijawi, jøts ni Dios U'nk ja tkanijawi. Ja Dios Teety ja tu'ugyi tnijawip.

³³ Jøts nayjöp'ejxidi meets ejtp, ejtp ja Dios x'ajot'attit kumi ka'ap meets ja xnijawi pøni juuni øts wyinaty nwimbejtkojmit.

³⁴ Jade'en idø'on ja ndejint n'ukpiktaajkint ejxim ja jaa'y mido nøjkk jagam widejtpi, jøts ku ja chøøn y'uk'ane'empy ja tumbi ja', tu'uk jaty tyumbi ja t'uktunkmøøy jøts y'ukpiktakpy tøj adinaabyi ja tu'uk, pøn t'ejx'etp ja tøj.

³⁵ Jøts ejtp idø'on mjöp'ejxtit, kumi ka'ap meets ja xnijawi pøni juuni yja'att ja mwindsøn mido kudøjk'ajtp, jotmøn ja yja'aty ux, uk jotmøn ja yja'aty tsuu'm, jotmøn ja yja'aty ku tsapni'aaw y'ayajxnidi, uk jotmøn ja yja'aty jøpkooos;

³⁶ ka' ti nnija'win pøni juuni ja yja'att, kuts meets ja jotmøn mmaagubaadiyit yam meets jap wyinaty mmaa'y.

³⁷ Midu mee ndukmadøøpy, niduki'iyi øts idø'on ja jaa'y jade'en nnøjmi jøts tjöp'ejx'ettit.

14

Ku ja Jesús yikajpxy'aty jøts ja yikmatst

¹ Ja majts xøøw wyinaty kya'ity jøts ja paski xøøw tpaatt ku ja jaa'y tkaydi ja tsapkaaky jadi'iñi mido ja lewaduri tkamøøt'ajtp. Winet et idø'on ja teetywindsøn møøt ja kajpxwejpitøj t'ixa'adi ja taay ja winmaa'n sudso ja tjadyimy'ukmatsttit ja Jesús awin'øøni'ampy, jøts ja tyik'ooktit.

² Xjats ja yide'en køøm ñawyajnidøø:

—Ka'ap ja jade'en y'ø'y'att ku ja nmajtsint xøøøjty, tsojk ja jaa'y jade'en xem yam pyidøøktit jøts adøm ja sagasa xu'unindit.

Ku ja Jesús yiktagutajmji'iky ja pa'akxuu'kpi

³ Jam ja Jesús wyinaty ma ja kajp txøøw'aty Betania, jam ja wyinaty tyøk'ayøøy Simón wyindum, ja jaa'y pøn wyinaty axøø'kpim putsp; jam ja Jesús wyinaty twindsøøni ja mesi ku tøøxyøjk tu'uk tmija'jty ja poop tsaa'du'jts mido wyinaty tmøøt'ajtp ja aceite mido janch pa'akxuu'kpi, jøts mido janch tsowi to'jkip. Ja'ats ja tøøxyøjk ojts tkupu'udu'uty, jøts ja Jesús kyubajk ja ojts ttanitajmiyi.

⁴ Winets ja jaa'y y'ambøjktøø pøn jam wyinaty winaaagindi, yide'en ja ojts ñawya'añidi:

—¿Tigøjxp ku yø pa'akxuu'kpi jade'en nugo tø wyindigøy?

⁵ Tø yø jeexyip ne'egi yiktøøky tigøøk magø'pxy denarios, jøts ayoobi jaa'y ja jeexyip ja meen' yiktabudøki.

Jøts ja tjanchmyi'ambøjktøø ja tø'øxyøjk.

⁶ Winets Jesús ja ojts ñii'mxyidi:

—Majtstu'utti; ¿ti yø mdamigajpxtip? Øts yø jade'en tø x'ødyuñ.

⁷ Kumi ejtp meets ayoobi jaa'y xpaatt x'ext, jøts ødyundi meets ja' pøni juuni meets ja kø'øm xmay'atwa'añ; jøts kidi xjøp'ejxti jøts øts meets ejtp xpaatt x'ext.

⁸ Tø øts idø'øn yø tø'øxyøjk jade'en xuiñ pøni sa øts idø'øn yø xamidsøkyin; tø øts ja pa'akxuu'kpi yø xanitemy kumi x'ookjøp'ejxnip øts idø'øn ja', paty idø'øn xyik'øø'yiiñi xyikpaajtiñi kumi wingonip øts ja n'o'jkin.

⁹ Janch meets idø'øn nnøjmi, ku øy madsoo yikajpxwa'kxt ja øgyajpxy ja ømyadya'aky ya naxwiiñ, nayide'en yø øy madsoo yiknimadya'akt ku øts yø tø'øxyøjk jade'en tø xmay'aty, yikja'myatsp yø øy juuni ku yiknimadya'akt.

Ku ja Judas ñay'awajniyi jøts ja tkøyakt ja Jesús

¹⁰ Winets ja Judas Iscariote chøø'ñ pøn ja Jesús pyabøjkpitøjk wyinaty møøt ñimakmajtsk'aty, jøts ja ojts tñinijxxy ja teetywindsøn, ja'ats ja møøt tkajpxy'ajty jøts ku ja tkøyakt ja Jesús.

¹¹ Xjats ku ja jade'en tmadoodøø, winets ja jyanchxondaktøø, jøts ja Judas ja meen' jaty yiktami'awa'aniiyiñ. Ja'agøjxpts ja Judas t'ixaay ja taay ja winmaa'ñ juuni et ja t'ukøyakt ja wyindsøn.

Ku ja nwindsøn'ajtim yjaak'a'ux'ajtni møøt ja pyabøjkpitøjk

¹² Xjats ku ja xøøw tpaajty midi ja israelit jaa'y yjanch'amaay'ajttip, ku chapkaaky ja jadi'liñi tkaydi midi levaduri tkamøøt'ajtp, ja'abi xøøw idø'øn wyinaty tø tpaaty jøts ku ja xøøw midukxøøw tyuñi, ja' ja tyejtíp paski, ja'abi xøøw idø'øn ja tyukni'o'jkidip ja borreegi maxu'unk, paty ja pabøjkpitøjk winet et tyiktøødøø ja Jesús jøts ja tñimaadyøø:

—¿Ma øøts ja paski a'ux nyik'awext jøts ni'amuki n'a'ux'ajtidit?

¹³ Xjats ja Jesús ja pyabøjkpitøjk namajtsk tkajxtsøø'ñ, yide'en ja t'uknimaay:

—Nøjkxti jam møj kajpjotp, jamts inet jaa'y tu'uk x'ejxpaattit pøn jam wyinaty tsiy tyanigo'onip, ja'ats mbanøjkxtip,

¹⁴ jøts pøni ma ja yja'aty, japts ja kudøjk xnøjmidit: “Yide'en ja windsøn wya'añ: ¿Mak idø'øn ja tøjkoajt, mak idø'øn ja pyabøjkpitøjk ja tmøøtka'aty tmøøt'uukt, mak idø'øn paski a'ux ja tka'adyit?”

¹⁵ Winets meets inet ja myiktuk'ext tu'uk ja tøjkoajt jap nipat tøjkiixpy midi jap a'ejxi abaadi ejtnip; japts meets ja jii'kxy xyik'øyidit midi njøø'kxindip.

¹⁶ Xjats ja pyabøjkpitøjk namajtsk ñjøkxtøø jøts ja ojts yja'atti jam møj kajpjotp, jamts ja jade'en tjanchpaattøø sa Jesús ja wyinaty tø tyukmadødyi, jøts ja jam tyik'øyidit ja paski a'ux, winets ja wyimbejtøø ma chøø'ndøø.

¹⁷ Xjats ku ja et kyoodsiyii'ñ, winets ja Jesús ja pyabøjkpitøjk nimakmajtsk jam tmøøtja'jty.

¹⁸ Jøts ku ja twinguwa'atsidøø ja kyaabyajt, kuts ja jam wyinaty kyaañidi, winets ja Jesús ja pyabøjkpitøjk tñimaay:

—Janch meets idø'øn nnøjmi jøts ku ja ixym nidu'ugin nmøøtkay pøn øts inet amaa'tsk'ampy xkøyakp.

¹⁹ Xjats ja pyabøjkpitøjk yjanchjotmay'oo'kpøjktøø, jøts ja nidu'uk jaty tyiktøødøø:

—¿Wan ja ndejint y'øtsi?

Nayide'en jadu'uk wyamøø:

—¿Øts ndejint jade'en adø'øtsp?

²⁰ Winets ja Jesús y'adsøøy jøts ja wyaañ:

—Tu'ugyi ja' pøn øts idø'øn jade'en xu'ump, jøts ka'ap ja yjagami, icya adøm idø'øn ja nmøøt'a'ux'ajtindi, nidu'ugin meets jade'en xunwa'añ.

²¹ Jade'ents idø'øn yjatt ja naxwii'ñit jaa'y myøjkudanaabyi sam ja Dios kyajpxy wya'añin; jøts iti ja jaa'y yjanch'ayøøy pøn øts jade'en xkøyækp amaa'tsk! Tø ja jeexyip ne'egi tyiy ku jeexyip kyidyimgye'exy.

²² Ku dø'øn ja jade'en ixam wyinaty kyaydi, winets ja Jesús tñixajiyii'ñ tu'uk ja tsapkaaky, jøts ja ttamøja'wiyii'ñ ja Dios Teety, xjats ku ja t'adujkpajky, winets ja tmøøy ja pyabøjkpitøjk, yide'en ja wyaañ:

—Kaydi, ya'at øts idø'øn ñamyayi nne'kx'ajtpy.

²³ Xjats ja nayide'en t'adam'ujch tu'uk ja uujk'ii'ñ, jøts ku ttamøja'wiyii'ñ ja Dios Teety, winets ja ttuk'uk'abidsiimy ja pyabøjkpitøjk midi ja wyinaty tø t'adami jap uujk'ii'ñjøtpy, niduki'iyi ja t'uktamujktøø.

²⁴ Yide'en Jesús ja ojts ñii'mxyidi:

—Yø øts idø'øn ñamyayi nni'jpy'ajtpy midi widsu'ump widæxp øts nnikøjxp øts ngubajkp ku nyikpikta'akt jam kruskøjxp. Ja'ats may jaa'y y'ajot'attip jøts ja ñitso'ok'attit. Jade'en'ampy idø'øn ja Dios Teety tyik'adukwa'añ ja wyanda'aky sam idø'øn ja ttami'awa'aniyii'ñ ja nitso'ok'ajtín.

²⁵ Janch meets idø'øn nnøjmi, jøts ku ka'ap n'uk'uknit yø vino, jaanim øts yø nøjx n'uuky jadigojk ku Dios kyutujk yja'att, ku kyutujk ja ttanitanit ja yjaa'y.

Ku ja Jesús kø'øm tñigajpxy jøts ku Pedro ja kyu'øøniyit

²⁶ Xjats ku ja t'øøgøjxtøø ja Dios kyajpxy, winets ja ñjøkxtøø jam kojpkøjxp midi txøøw'ajtp Olivos.

²⁷ Jøts ja Jesús pyabøjkpitøjk tñimaay:

—Niduki'iyi meets inet xatsø'ødyu'unt icyamgoots; kumi yide'en Dios kya-jpxy wya'añ: “Yikøyæp ja borreegi ejxpi jøts ja y'lookt, jøts ja borreegi jadi'iñi kyaakwa'kxnidit.”

²⁸ Jøts ku ø nbidsø'ømt jadigojk jap oo'kpi jutjøtpy, winets ø nnøjkxjawyenit jam Galilea, jamts mee xpaatt.

²⁹ Xjats ja Pedro tñimaay ja Jesús:

—Øy mets mbabøjkpitøjk niduki'iyi mjadatsø'ødyuñiyi, nijuuni me ngadatsø'ødyuñ.

³⁰ Winets Jesús ja ñimaajyøø:

—Janch mets idø'øn nnøjmi jøts ku yamgoots inet mnø'ømt ku me ka'ap x'ijxy'aty, ka'anim tsapni'aaw wyinaty myajtsk'aya'axy ku mets inet tigøøøk ojk mwä'ant jade'en jøts ku me ka'ap xñijawi.

³¹ Xjats ja Pedro møk'ampy tyimwyindani ja Jesús, yide'en ja tñimaay:

—Nja'øøky me møøt, nijuuni øts jade'en ngawa'ant.

Tum jade'en ja yjadu'ukpi pabøjkpitøjk wyandøø sam ja Pedro wyaañ.

Ku ja Jesús t'ajot'ajty ja Dios Teety jam Getsemani

³² Xjats ja yja'ttøø mā ja et txøøw'aty Getsemani, jamts ja Jesús pyabøjkpitøjk tñimaay:

—Ya tsøøniidi, wan ø t'ats'ajot'aty ja Dios Teety.

³³ Winets ja t'ukwaay ja Pedro, ja Jacobo, jøts ja Juan, jøts ja ojts tmøøtnijxxy, xjats ja Jesús yjantymchø'jkiiyii'ñ, ka'ap ja y'ukwinmaa'nbyatni, ja'agøjxp ku ja y'ayo'on wyingøñ.

³⁴ Jøts pyabøjkpitøjk ja tnimaay:

—Janch tyimyjotmay'oo'kp øts, øy øts yø yjaw i jadi'iñi ngu'oogit. Awejxti ya ejxim mma'oo'knidi, wijy m'ettit.

³⁵ Xjats ja Jesús jawaani yjaaknajtsyø'øiyii'ñ, japts ja ojts ñagyuxendya'agiyi, jøts Dios Teety ja ojts t'amidøy jøts ja jade'en kidi tyimy'ayo'ombaaty sa dø'øñ ja wyinaty yjatwa'añ ja'abi xøøw.

³⁶ Yide'en ja wyaañ ku dø'øñ ja ojts dios'ajot'aty:

—Mets Teety, øyik jade'en xjanchkayikjatt, jøts øts kidi jadine'en ayo'on ndyimbyaaty; øy idø'øñ kyidyimyjade'eni sam ø ndyimyjatsøkyin, jade'en øts idø'øñ ngupøkt pøni sa me xamidsøky.

³⁷ Ku ja jade'en wyaañ, xjats pyabøjkpitøjk ja tnimiiñ, maadip ja jap wyinaty ku ja ojts tpaaty; winets ja tnimaay ja Pedro:

—Simón, ¿tø me ma'oo'kni? ¿Niwine'en me waani tø mgawijy'ity?

³⁸ Wejti kajti jøts ja Dios x'ajot'attit, nay'ejx'etidi jøts kidi mmimajada'agidi ja ayo'on midi wingomp. Janch øts idø'øñ nwa'añ ku ja winmaa'ñ janchja'ødyunwa'añ, ja ne'kxts jaayi ja ka'øbyi tumbi amutsk'ejxyip.

³⁹ Xjats ja ñøjkxkojmøø Dios Teety ajot'ajtpi, nayide'en ja ojts wyangojmi sa ja wyinaty jaweyen tø wya'añ.

⁴⁰ Winets ja myengojmøø ma pyabøjkpitøjk ja jam, maagojmidip ja wyinaty ku ja tpaaty, kumi janchmaa'y'oo'ktip ja'.

⁴¹ Jøts ku ja tigøøk ojk ojts t'ixy ja pyabøjkpitøjk, jaanims ja tnimaay:

—Tøts inet, maanidi poo'kxnidi. Wan jade'en tjaty, tø dø'øñ tyimbyaaty jøts yikyøakt ja naxwii'ñit jaa'y myøjkudanaabyi.

⁴² Pidø'økti, niwejti, wan tjaa'myindi; ixa ja ixyam wyingøñ pøn øts inet xkøyakp.

Ku ja Jesús yikmajch

⁴³ Nay jamnim ja Jesús wyinaty jade'en wya'añ ku ja Judas yja'jty, pøn ja pyabøjkpitøjk wyinaty møøt ñimakmajtsk'atti, ja'ats ja mayjaa'y jam tmøøtja'jt tsujx møøt jøts kipkyapidi. Ja teetywindsøn idø'øñ ja wyinaty tø kyexyidi, møøt ja kajpxwejpitøjk, jøts møøt ja møjaa'dyøjkti.

⁴⁴ Yide'en idø'øñ ja Judas wyinaty tø wya'añ jøts ja tu'uk tpikta'akt ja ejxa'anin midi ja y'ejxtip ku ja tkøyakt ja Jesús, yide'en ja wyinaty tø wya'añ:

—Pøni pøn øts inet ndsu'kxpy, ja' idø'øñ ja wyinaty; ja'ats idø'øñ mmatstip, jøts ja xyiknøjkxtit ta'tspiky'ampy.

⁴⁵ Xjats ku dø'øñ ja jam jade'en yja'jty, winets ja twinguwa'jkiiy'ñ ja Jesús, yide'en ja tnimaay:

—Øts, windsøn, mEMP.

Jøts ja ojts jade'en ttsu'kxy.

⁴⁶ Xjats ja Jesús yiknaxajiyii'ñ, jøts ja jade'en yikmajch.

⁴⁷ Jøts ja jaa'y pøn ja Jesús jam wyinaty myøøt'ajtpy, ja' tsujx tu'uk tnixajiyii'ñ jøts ja ttaxikja'tstuujty ja teetywindsøn tyumbi, ojts ja tyatsk ja tyikwinajki.

⁴⁸ Winets ja Jesús tnimaay ja jaa'y pøn ja wyinaty tø myachi.

—¿Ti mee x'ejxni ku xanimenidi ja kipy jøts ja tsujx? ¿Ti mee x'ejxni, maa'tspi, ku meets jade'en xmatswa'añ?

⁴⁹ Jabom jabom meets jam y'ijty nyik'ixpiky tsaptøjkjotp, ¿ti kuts meets jam xkamajch? Paty idø'øñ ya'at ixyam jade'en jyaty kumi Dios kyajpxy jade'en wamp, ¿sudso'ampy idø'øñ ja kyatø'øt?

⁵⁰ Winets ja pyabøjkpitøjk tmatjstuttøø nadyu'uk ja wyindsøn Jesús, jøts ja ojts jadi'iñi y'agakpajknidi.

Ja una'jk jaa'y pøn jadi'iñi kaktigøø

⁵¹ Jamts ja Jesús wyinaty pyayø'øyi tu'uk ja una'jk jaa'y pøn ja poop wet wyinaty tyukwop'ajtp, ja'ats ja yikmach;

⁵² winets ja wyet ja tmajststuupty, jøts ja jadi'iñi niwa'ats kyejky.

Ku ja Jesús yikwaañikxy jam kutujktaajkotp

⁵³ Xjats ja Jesús yiknajtswa'awiyii'ñ jam møy windsøn wyindum pøn ja teety wyindsøn'ajtip, jam idø'øn ja windsøndøjk ñamyujkøjxidøø møøt ja møjaa'dyøjkti.

⁵⁴ Jagam idø'øn ja Pedro tpayø'ø y ja wyindsøn ku ja yiknajtswa'awiyii'ñ jam windsøn kyutujktaajk agø'øm, jade'en ja tpaja'jty, jamts ja Pedro tmøøt'ixaajky ja tajk, ja' ja jam myøøtjo'kxpjkkpy ma ja jøøn jam wyinaty tø myøji.

⁵⁵ Jøts ja teetywindsøndøjk møøt tuki'iyi ja kutujk adsinaabyidi t'ixaadyøø tu'uk ja pøky, jade'en ja t'ixaadyøø ja pøky jøts ja tuku'oogiwyā'andi ja Jesús; xjats ja niti tkapattøø.

⁵⁶ Kumi øy ja tigati ttaniwambatti jøts ja jade'en xem yam kyanabyaadyidi ja y'ayuujk.

⁵⁷ Winaagin pyidø'økti møk'ampy jøts ja nugo tni'øøniði øy ja yjagajade'eni, yide'en winaagin wyandøø:

⁵⁸ —Tø øøts yø nmadø y ku yø yide'en wyā'añ: “Nyikida'ap øts yø tsaptøjk midi yø jaa'y tø tyik'øyiði, jøts øts kyidigøøk xøøw jadu'uk nyikwa'kukit midi ja jaa'y kyayik'øyip.”

⁵⁹ Jøts ni jade'embaat ja kø'øm kyanagyupikyidi ku ja øy sa yjawa'andi.

⁶⁰ Winets ja teetywindsøn tyanaagyukyii'ñ jam mayjaa'yjotp, jøts ja tyiktiy ja Jesús, yide'en ja tnimaay:

—¿Ka' idø'øn m'adsø? ¿Ti dø'øn jade'en myiktani'øø'nip?

⁶¹ Xjats ja Jesús amøñi tyik'ity, jeky ja niwine'enin kyidyimy'adsøø. Winets ja teetywindsøn ja ojts jadigojk tyiibyikyiyi, yide'en ja ojts ñii'mxyiyi:

—¿Mets idø'øn ja' pøn Dios Teety pyiktaajky jøts mets mwindsøn'att? ¿Mets idø'øn ja Dios Teety m'U'nk'ajtip?

⁶² Xjats ja Jesús y'adsøø y jøts ja wyaañ:

—Øts idø'øn ja'. Øts idø'øn ja naẏwii'ñit jaa'y nmøjkudanaabyi'ajtpy, jøts x'ejxtip meets ku n'ixa'akt aga'n'ampy ma Dios Teety, jøts ku nayide'en ø nme'ent yoots agujkpy jap tsajpjøtpy.

⁶³ Winets ja teetywindsøn ja wyet kø'øm ttakø'jtsiyii'ñ ku ja y'oj'abajtiyii'ñ, ja' idø'øn tyijpy ku tø ja jaabaat y'oj'amø'øty, xjats ja wyaañ:

—¿Ti ejxpi ti nija'wibi jaaktsojkiyiyip?

⁶⁴ Tøxi xmadowdi sa tø wyā'añ ku ja Dios Teety yø tø twingajpxnaxy; ¿sa dø'øn xjawidi ku jade'en wya'añ?

Winets ja niduki'iyi ttanikajpxtøø ja o'jkin.

⁶⁵ Jøts winaagin jaty: tñidsujidøø, jaty: twinmajtstøø jøts ja ttsee'ktøø, yide'en ja wyañ'adø'øtsi ku ja jade'en ttundi:

—iNajtsjawi pøn tø mgøxyi!

Jøts ja tajk ja twingoxti tjøpkoxti awā'an'ampy.

Ku ja Pedro tku'iñ jøts ku ja ka' t'ijxy'aty ja Jesús

⁶⁶ Jap ja Pedro wyinaty tøk'agi'py ku yja'jty tu'uk ja tø'øxyøjk pøn ja teetywindsøn tyumbi'ajtpy;

⁶⁷ ja'ats ja ojts y'ijxyiyi ku ja jap wyinaty jøn'ajpy yjo'kxpiky, tøyim ja wyinaty wyin'ejxniyi xjats ja yide'en ñimaajyøø:

—Nayide'en mets y'ijty xpawidity ja Jesús ja Nazaretit jaa'y, ¿kidi?

⁶⁸ Xjats ja Pedro ja ka'ap tnigajpxy, yide'en ja wya'añ:

—Ka'ap øts ja n'ijxy'aty pø pøn ja', jøts nguidyimñija'wip øts pø ti me mgajpxpy.

Xjats ja jade'en yø'øpyidsimy jam tajyøp'am. Winets ja tsapni'aaw y'ayajxi'jky.

⁶⁹ Jøts ja tø'øxyøjk ojts twin'ixy jadigojk ja Pedro, xjats ja ttukmadoobinaxwa'jky ja jaa'y pøn jam wyinaty, yide'en ja wya'añ:

—Ya'at jaa'y tmøøtwidejtp yø Jesús.

⁷⁰ Winets ja Pedro ja ka'ap tkupijky jadigojk. Waani y'ijty, xjats Pedro ja jaa'y ñimaajyøø jadigojk pøn jam wyinaty:

—Mets inet mdyimyøøtwidijtpy yø Jesús; kumi Galile'it jaa'y mets, jøts jade'en me mgajpxy sa yø kyajpxti.

⁷¹ Winets ja Pedro kø'øm kyanay'ømyigajpxiyøø møk'ampy ja jaa'y yide'en:

—Tyimy'ijxpy ja Dios jøts ku nguidyimñijawø pøni pøn jaa'y meets jade'en mdiipy.

⁷² Xjats ja tsapni'aaw myajtsk'ayajxy. Winets ja Pedro tja'myejch ja Jesús y'ayuujk sa ja wyinaty tø ñi'mxyi: “Ka'anim wyinaty ja tsapni'aaw myajtsk'aya'axy ku mets inet wyinaty tigøøk ojk tø mwani ku me xka'ijxy'aty.” Jøts ja tkuyajxyi'ñ ku ja jade'en tja'myejch jøts ku ja wyinaty jade'en nichøky tø wya'añ.

15

Ku ja Jesús twinguwa'jkyi'ñ ja Pilato

¹ Xjats ku xyiijndyaaky, winets ja teetywindsøn ñamyujkidøø møøt ja møjaa'dyøjkti, møøt ja kajpxwejpitøjkti, tuki'iyi wine'en ja t'adsøøniidi ja kutujk jam tsaptøjkjotp. Jøts ja ojts tyiknøjkxti ja Jesús køwiiñ jam Pilato wyindum, jamts ja tkøyakti.

² Xjats ja Pilato tnimaay ja Jesús:

—¿Janch mets idø'øn windsøn'ajtp ya israelit jaa'y y'etjøøjty?

Winets ja Jesús y'adsøøy jøts ja wya'añ:

—Øts ja'.

³ Xjats ja teetywindsøn janch may ja øø'nin tpiktaktøø, yikxon ja Jesús yikni'øø'niyi'ñ.

⁴ Winets ja Pilato tyiktiy jadigojk, yide'en ja tnimaay ja Jesús:

—¿Ka'ap idø'øn m'adsøy? ¡Ejx! Yikxon mjanchyikni'øøni. ¡Ejx! Ja pøky kawinakjøøjp myiktani'øøni.

⁵ Jøts kyidyimy'adsoop ja Jesús ku Pilato ja jade'en ñi'mxyi; jøts ñigyumaap idø'øn ja Pilato ja kø'øm tjawi ku ja jade'en kyidyimy'adsøy.

Ku ja nwindsøn'ajtm Jesús ñidujkyi'ñ jøts ja y'oockt

⁶ Yide'en idø'øn ja Pilato wyinaty ja kostumbri tmøøt'aty ku ja paski xøøw tpaaj, winets ja tyik'awa'atspidsimy nidu'ugin ja tsumyjaa'y, pøni pøn ja mayjaa'y yik'awa'atspidsømwandip.

⁷ Jamts wyinaty tu'uk ja pøkyjaa'y tsumy pøn txøøw'ajtp Barrabás, ja' ja jap møøt chum'ity pøn ja wyinaty møøt tø yikjaa'y'øøky ku tsep ja wyinaty tø ttundi møøt ja kudunktøjk.

⁸ Xjats ja mayjaa'y jam jade'en myendøø, jøts ja t'amidoobinaxwa'aktøø ja Pilato jøts tsumyjaa'y ja tyik'awa'atspidsø'ømt nidu'ugin sa kyostumbri ja wyinaty tmøøt'aty.

⁹ Winets ja Pilato y'adsøøy jøts ja tnimaay:

—ǂSǂ mee m'ukwǂ'ǂñ, wan yǂ israelit windsǂn tyikmajtstu'uty?

10 Jade'en ja wyǂǂñ kumi tǂ dǂ'ǂn ja wyinaty tǂǂ'gyuki jǂts ku ja teetywindsǂn wyinaty nugo tǂ tkǂyǂkti ja Jesús tanejkingǂjxp.

11 Xjats ja teetywindsǂn tkǂjpxwejkǂxtǂǂ ja mayjaa'y. Ojts ja t'agǂjpxidi, jǂts ja wyǂ'ǂndit jǂts wan ja Barrabás t'awa'ǂtspidsimy jǂts ka'ap ja Jesús.

12 Xjats ja Pilato tyiktǂiy ja mayjaa'y, yide'en ja tnimaay:

—ǂǂtsimts yǂ israelit windsǂn, sǂ yǂ yiktu'unt?

13 Winets ja y'adsoodǂǂ jǂts ja wyǂndǂǂ mǂkta'ǂky:

—ǂYikruspat!

14 Xjats ja Pilato tnimaay ja mayjaa'y:

—ǂTi tundigǂǂ'yin yǂ tǂ ttuǂñ, ti yǂ kyubatp?

Winets ja tǂǂaktyimykǂinǂjxtǂǂ, mǂk'ampy ja yǂǂaktyimwyǂndǂǂ:

—ǂYikruspat!

15 Jǂts kumi yikjotkukiwyampy ja Pilato wyinaty ja mayjaa'y, xjats ja tyik'awa'ǂtspidsimy ja Barrabás; jǂts ku ja t'uknǂnkwyǂjǂǂ ja Jesús, winet ja ojts tkǂyǂky jǂts ja kyiruspatt.

16 Xjats ja soldǂditǂjk tyiknǂjkxtǂǂ ja Jesús jap kutujktaǂk'ǂgui'py mǂ ja ttejt Pretorio, mǂ ja masyoldǂdi jap wyinaty chǂǂnidi, jǂts ja myisoldǂdi ja twaǂmukǂxti.

17 Winets ja tsuu'nk wet ja ttuktatǂjkidǂǂ ja Jesús midi ja windsǂndǂjk nugo myiwindsǂn'ǂjttip, jǂts ja kujp awiity ttukoroni'ǂtti.

18 Jǂts ku ja jade'en t'uktundǂǂ, winets ja wyǂmbinǂxwǂ'ktǂǂ mǂk'ampy, yide'en ja tkǂjpxpǂ'kxtǂǂ:

—ǂMay xǂǂwim may jumǂjtim mdsǂǂnit mǂdanit mets israelit jǂǂ'y wyindsǂn!

19 Jǂts ja kipy ja ttaxikwojǂjǂ'ktǂǂ, ojts ja tndisujidi jǂts ja ñadyijyi twinguxanidi, ñadyijyi ja twindsǂǂǂgidi.

20 Xjats ku dǂ'ǂn ja jade'en t'uktaxektǂǂ, winets ja tsuu'nk wet ja ojts tjǂjnidi jǂts ja ttuktatǂjkidǂǂ ja wyet midi ja wyinaty wyet'ǂjtpy. Xjats ja jatyi twaǂbidsǂmdǂǂ jǂts ja kyiruspatt.

Ku ja nwindǂn'ǂjtim Jesús kyiruspejty

21 Xjats ku ja Cirenit jǂǂ'y jam wyinaty ñaxy pǂn txǂǂw'ǂjtp Simón, kyǂmjotp ja wyinaty chǂǂñ; ja'ats ojts yiktaguwǂni jǂts Jesús kyirus ja tǂadsǂmit, ja' idǂ'ǂn jade'en jǂjtp pǂn ja Alejandro mǂǂt ja Rufo tyeety'ǂjttip.

22 Xjats ja mayjaa'y tyiknǂjkxtǂǂ ja Jesús jam Gǂlgota, mǂ ja et jade'en txǂǂw'aty midi jade'en tyijpy ayuujk Oo'kpi Kyubǂk Pǂjk.

23 Jamts ja tmǂǂdyǂǂ ja vino midi wyinaty tǂ yik'adamuky mǂǂt ja tsǂǂy midi yiktejp mirra, ja' ja ojts tmo'odi ja Jesús, jǂts ja ka'ap tkupijky, ka'ap ja t'uujky.

24 Winets ja tyikruspǂjttǂǂ; jǂts ja soldǂditǂjk tyikwǂ'kxtǂǂ ja Jesús wyet, ojts ja tniguyatti, jǂts pǂni pǂn majadǂk ja'ats ja wet twestǂǂ.

25 Jǂǂ dǂ'ǂn ja xǂǂwu'nk wyinaty waani pyety ku dǂ'ǂn ja jade'en tyikruspǂjttǂǂ.

26 Jǂts letri ja jam tkǂxǂaadyi; yide'en ja tyikwǂ'ǂndi: "Israelit jǂǂ'y ya'ǂt ja wyindsǂn." Ja' dǂ'ǂn ja ojts ttagubatti kidi tǂi'ǂip.

27 Namajtsk ja mǂǂ'tspǂ ja tyikruspǂjttǂǂ nay jam mǂǂt ja Jesús, tu'uk ǂǂǂ'ñ'ampy jǂts tu'uk ǂǂǂ'y'ampy.

28 Jǂnch jǂjt idǂ'ǂn ja jade'en sǂ jap nǂkyijxpy wyǂ'ǂñ, ku yide'en wyǂ'ǂñ: "Mǂǂt ja yiktamimacho'owiyǂi'ñ ja mǂj ka'ǂy jǂǂ'y."

²⁹ Xjats ku dø'øn ja jaa'y jam ñaxti kruswemp, ka'ap ja tjanch'ømyigajpxti, wyibejptip ja kyubajk ja jam, jøts ja tnøjmidi:

—iJø! Metsxi xijy tsaptøjk myikidaapy, jøts mets ja xijy jatyi kyidigøøk xøøw xyiktanaagyukigyojmi,

³⁰ ñankñitso'ok'atits me kø'øm jøts mwinakt jam kruskøjxp.

³¹ Jade'en ja jaa'y wya'andi, nayide'en ja teetywindsøn wyamidi møøt ja kajpxwejpitøjkti, yide'en ja kø'ømyi ñawya'añidi:

—May abiky jaa'y tø tyiknitso'ok'aty, jøts ka'ap kø'øm tjaty sudso ñankñitso'ok'atiyit.

³² Pøni ku net njanch'ejxint yø Israelit jaa'y wyindsøn wyinakt jam kruswemp, winet inet njanchja'win jøts ku yø yjanchja'aji ja Cristo.

Ja jaa'ybaat ja kya'ømyigajpxøø pøn ja jam wyinaty møøt tø yjakruspety.

Ku ja nwindson'ajtim Jesús y'ø'jky

³³ Xjats ku kyujkxøøw'ajty, winets kyoodsiyii'ñ ja ñaxwii'ñit, jaanim ojts yjajta'aky møj winakxyøøw.

³⁴ Jøts ja Jesús møk'ampy wyaañ:

—Eloi, Eloi, ¿lama sabactani? —midi tyijpy: Dios Teety, Dios Teety, ¿jadits ku ø tø xnanktyuñi?

³⁵ Winaagin ja jaa'y jade'en tmadoodøø pøn jam wyinaty jøts ja wyandøø:

—Madowdi, ja Elías yø wyaadsøøpy.

³⁶ Xjats tu'uk myiñ janch pujtpim pøn tnixajiyii'ñ ja tanøxe'jts midi jade'en t'ejxp ejxim ja xa'akjoptsin, ja'ats ja ojts tyikxøøky jap vino ta'amjotpy jøts ja tpiaktaajky jam kipy jøp'am, winets ja jade'en tta'adejii'ñ ja Jesús jøts ja ttukwimuukwa'añ, yide'en ja wya'añ:

—Majststu'utti; wan t'uk'ijxyim pøni janch'ukyikwinajkip inet idø'øn ja Elías jam kruskøjxp ku inet ja mye'ent.

³⁷ Winets ja Jesús møk'ampy yaajxy, jøtsnim ja y'ø'jky.

³⁸ Jøts nay jatyi ja wet kujkwa'kxy y'akø'øtspaiky midi ja tsaptøjk jam wyinaty y'awejtstuk'ajtpy, kubajk'ampy ja kyø'øtstøjkii'ñ jøts ja kyø'øtskidaajky ok'am'ampy.

³⁹ Jøts ku ja soldadi windsøn jade'en ojts t'ixy pøn ja Jesús jam wyinaty twindanaapy, winets ja wyaañ ku ja Jesús wyinaty jade'en møk'ampy tø ya'axy, jøts ku ja wyinaty tø y'øøky, yide'en ja wyaañ:

—Janch tiy tam idø'øn Dios tam ya'at y'ity y'U'nk.

⁴⁰ Jam ja tø'øxyøjk wyinaty tyanaamyidi pøn jam jagam a'ejxujktip; ja Salomé, jøts ja María Magdalena jam wyinaty møøt jadu'uk ja María midi ja Jacobo tyaak'ajttip møøt ja José.

⁴¹ Ja tø'øxyøjk idø'øn wyinaty tø tpawidetti ja Jesús, jøts ja' ja wyinaty tø t'ejx'letti ku ja Jesús jam Galilea wyidijty. Jøts jam ja tø'øxyøjk wyinaty y'a'ejxujkmidi pøn ja Jesús jam wyinaty tø pyanijkxyi Jerusalén, møøt ja jam wyinaty tø yja'atti.

Ku ja nwindson'ajtim Jesús ñe'kx yikpiktaajky jap oo'kpi tsaa jutjotpy

⁴² Xjats ku chuu'wiyii'ñ ku ja poo'kxin xøøw wyinaty kyimjabom tpaatwani,

⁴³ winet ja José myiñ, ja Arimate'it jaa'y pøn wyinaty ja kutujk t'adsinaadyip. Ja'ats idø'øn tjøp'ejxp jøts ja ttatøkiwya'añ ja Dios kyutujk midi ja yjaa'y ja tyanitanaapy, jøts ja ojts amumjoojt myiñ ma dø'øn ja Pilato jam wyinaty, jøts ja t'amidooji ja Jesús ñe'kx ku ja wyinaty tø y'øøky.

⁴⁴ Xjats ja Pilato ñigymaap yjajty ku dø'øn ja wyinaty tø y'oo'kni, winets ja tyaajxyii'ñi ja soldadi windsøn jøts ja tyiktiy pøni janch ku dø'øn ja wyinaty tø y'øøky.

⁴⁵ Xjats ku ja soldadi windsøn ja ojts tñigajpxy jøts ku ja janch jade'en, winets ja Pilato tkøyajky ja oo'kpi jøts José ja yikmøøp.

⁴⁶ Xjats ja tjuuy tu'uk ja poop wet midi øy midi majpxy, jøts ku ja tyikwinajky ja oo'kpi, ja'ats ja tya'amojts, jøts ja tpiktaajky jutjøtpy midi ja wyinaty tø tyikjuty jam tsaajotp. Jøts ku dø'øn ja jade'en tpiktaajky, winets ja møj tsaä ja tta'agiiy.

⁴⁷ Ojts idø'øn ja María Magdalena møøt jadu'uk ja María, pøn ja José tyaak'ajtpy, t'ejxtøø mā ja Jesús wyinaty tø yikpikta'aky.

16

Ku ja nwindson'ajtim Jesús yujukpyiky jadigojk

¹ Xjats ku ja poo'kxin xøøw ñajxy, winet ja María Magdalena t'atsjuudyøø ja pa'akxuu'kpi møøt Jacobo tyaak, møøt ja Salomé, jade'en ja ojts t'atsjuudyi jøts Jesús ja t'atspikta'akwajjnidi ku ja wyinaty tø y'oo'kni.

² Xjats ja ojts ttaninøjkxti jøpyi ku ja samaan wyinaty tø y'abety, xøbidsimyu'nk ja yjā'ttøø jam møj tsaä agujkp mā ja Jesús jam wyinaty tø yikpikta'aky.

³ Yide'en ja kø'øm ñawyajnidøø:

—¿Pøn inet ja tsaä tjanch'agiidyu'tut jøts ndøjki'inet?

⁴ Xjats ku ja yjā'ttøø, winets ja t'ejxtøø ku ja møj tsaä ka'ap ja jap wyinaty ukteeni jap jut'agui'py, tø ja wyinaty yikiyø'øñi.

⁵ Jøts ku ja tyøjkidøø jap mutsk tøjktøpy, winets ja t'ejxpattøø tu'uk ja ankilis midi ja wyinaty pya'ajpy tsinaapy, jøts midi wyinaty nayide'en ja poop wet myøøt'ajtpy. Xjats ku ja t'ejxpattøø waajtyøjk ja tujy, jøts ja ojts jantymchø'jkidi.

⁶ Jøts ja ankilis ja ojts ñii'mxyidi:

—Kidi mdsø'øgidi; nnija'wip øts ku meets ja Jesús ja ñe'kx x'ixaajiyidi. Tø ja jadigojk yujukpyiky, øy xtyimy'ejxtit mā ja yikpiktaajky.

⁷ Nøjkx ja pyabøjkpitøjk xukmadojidi møøt ja Pedro, jøts ñøjkxtit jam Galilea; jams meets ja x'ejxtit jadigojk, jams meets ja xminabyaadiyt jade'en sã ja kø'øm mnimaajiyidøø.

⁸ Xjats ja choo'ndøø jam møj tsaä agujkp mā Jesús ja wyinaty tø yikpikta'aky, jøts ja ñøjkxtøø. Jadi'iñi tsø'øgi ja yjantyyikmibejpnnyidi jøts nãpøn ja sã tkanøjmidi, kumi jantymchø'jkidip ja wyinaty.

Ku ja Jesús ñanky'ejxøø jadigojk mā ja María Magdalena jam wyinaty

⁹ Ku ja Jesús domingi jøpy wyinaty tø pyidsimy jadigojk jap oo'kpi jutjøtpy, ja María Magdalena ja ojts jawyeen y'ijxyiyi, pøn ja wyinaty tø tyikpidsøjmi niwixujk ja miku'.

¹⁰ Ja'ats ojts ñijky jøts ja ojts t'atstukmadøø pøn jaty ja Jesús wyinaty tø tmøøtwidetti, pøn jam wyinaty jiidyip yaxtip, maadyip tajtip.

¹¹ Jøts ku ja jade'en tñimadoodøø ku ja Jesús yujuky'aty, ku ja tø'øxyøjk ja wyinaty tø t'ixy, ka'ap ja tjanchjā'widøø.

Ku ja Jesús ñanky'ejxøø jadigojk mā wyinaty ja namajtsk pyabøjkpitøjk

¹² Xjats ku dɔ'ɔn ja jade'en y'uknajxy, winets ja Jesús ñanky'ejxkojmiyøø abiky tsoo ku wyinaty ja pyabøjkpitøjk namajtsk yø'odyi jam tuu'am. Ka'ap idø'ɔn ja pyabøjkpitøjk y'ejxkapyidi kumi wenk idø'ɔn ja kyaxi'ljky.

¹³ Jawaani y'ijty, jøts ku ja t'ejxkajptøø winets ja jatyi jam wyimbejtøø kyamjotp, jøts ja ñøjkxtøø Jerusalén ma ja myigu'ukja t'atstukmadoowa'andi. Kuts ja jam yja'ttøø, winets ja myigu'uk tukmadoodøø jøts ja nika'yjanchja'wiyi.

Ku ja Jesús ttaguwa'aníyíñ ja tunk ja pyabøjkpitøjk

¹⁴ Waani et xøøw ñajxy, xjats ja Jesús ñanky'ejxkojmiyøø ku pyabøjkpitøjk ja jam wyinaty nimaktu'uk twindsøonidi ja kaabyajt; jamts ja møk'ampy twingugajpxiyíñ ja'agøxp ku ja niti janchja'win tkamøø'tatti ku ja jadine'en kyujuunidi, kumi ka'ap ja wyinaty tø tjanchjawidi ku ja yiktukmadoodøø jøts ku ja Jesús wyinaty tø yik'ixy, ku ja wyinaty tø jadigojk yujukpyiky.

¹⁵ Yide'en ja yiknimaadyøø:

—Niyø'øyigyøxti naxwii'ñit, jøts ja øgyajpxy jøts ja ømyadya'aky xkajpxwa'kxiti ma jaty ja jaa'y yujuky'atti.

¹⁶ Pøni pøn øts xjanchja'wip jøts pøni pøn nøbajtp, ja' nøjkx nitso'ok'ajtp ja y'anmija'win; jøts pøni pøn øts xkajanchja'wip, ja' yiktagubatp ja pyøky.

¹⁷ Ja jaa'y pøn øts xjanchja'widip, yide'en idø'ɔn ttu'undit øts køjpx: Yikpidsø'ømdip ja' ja miku'; kyajpxtip ja wenk ayuujk ja';

¹⁸ pøni ayo'ombattip ja', pøni tsu'utsidip ja' ja tsaa'ñ adsu'ljky, jøts pøni y'uuktip ja veneni ja', ka'ap idø'ɔn ja sa yjattit; jøts nayide'en ku pamaa'y ja ja'ayi tkønixajtit, jaty ja tyiktso'oktit.

Ku ja Jesús chajpejty

¹⁹ Xjats ku ja pyabøjkpitøjk ja jade'en t'uknimaay, winets ja chajpejty, ojts Dios Teety ja tsajpjøtpy yikpatøkiyi, jøts ja tpuwa'jtsiyíñ aga'ngyø'ampy.

²⁰ Xjats ja pyabøjkpitøjk choo'ndøø, jøts ja ojts tkajpxwa'kxiti ja øgyajpxy ja ømyadya'aky øy madsoo. Ja nwindson'ajtim Jesucristo ja køøm pudøjkkiyidip, jøts nay ja Jesús ja tmøøy ja myøk'ajtin jøts ja ttu'undit jade'en midí nípøn jaa'y ya naxwiiñ kyajajtpy, paty ja mayjaa'y ja tjanchja'widi dø'ɔn ja pyabøjkpitøjk ja kyajpxy. Jade'en idø'ɔn ja y'ejxi.

JA ØGYAJPXY JA ØMYADYA'AKY MIDI JA LUCAS YJAĀY

Ja Teófilo ya'at yiktanija'ayi

1⁴ Migu'uk Teófilo, may ja jaa'y tø tjajaadyanwa'andi tyimyjade'en ja madya'aky sam øøts ja nmigu'uk tø t'ejxti pøn ja Jesús kyudanaadyip. Nayide'en sam øøts ja tø nyiktuk'ejxyin, sam øøts ja tø n'ixpikyin, jade'ents ja tjaja'wa'andi pøn jaty t'ejxtøø tnija'widøø sa jaty cho'ondaajky. Ja'ats tø pyudøkiyidi jøts ja øgyajpxy ømyadya'aky ja tkajpxwa'kxtit. Nay tøts øts ja nbe-muky ngonmuky ti jaty tuujnøø ku ya'at øgyajpxy ømyadya'aky cho'ondaajky. Ixyamts mets ja jade'en ndyimdyanijayi, jøts wa'ats xnijawit ja tiy'ajtin, sa jaty tø myiknøjmi ku ja tø myiktukmadøy yø'øbi ixpøjkin.

Ku ja ankilis tnigajpxy jøts ku ja Juan Bautista kyaxø'økwa'añ

5 Ixyam idø'øn cho'onda'aky ja madya'aky. Ku dø'øn ja Herodes wyinaty rey'aty jam Judea, jamts ja teety wyinaty tu'uk chøøni pøn txøøw'ajtp Zacarías, ja' y'ijty møøt tyuñ tukpiky ja teetyøjkti pøn yiktejp Abías. Elisabet ja ñidø'øxy xyøøw, teety Aarón ja tyeety'ap'ajtmip.

6 Janch øy jaa'y idø'øn ja amajtskti, pyaduujnidip idø'øn Dios kyutujk ja' pøni ti ja yikta'ana'amdip. Jade'ents ja ka'ap pøn sa ñii'mxyidi, jade'en ja ka'ap pøn pyøky'ijxyidi.

7 Ka'ats ja y'u'nk ja teedi, ni ja Elisabet ka'ap ja y'u'nkpaaty, tyimyajaa'ñidi ja namajtsk wyinaty.

8 Xjats tuk'ojk ja Zacarías yjaa'y tyaja'jtidøø jøts ja ttuujnidit ja windsø'jkin ja Dios.

9 Jade'en idø'øn ja tkostumbri'atti ku ja teetyøjk ja jade'en tyaja'adyidi, winets ja tñiwøjti pøn jap uktøkip jap ma ja Dios yikwindsø'øgi, ma poom tyøy. Xjats Zacarías ja ojts tyimdyaja'adyi, ja' ja poom ojts tyiktøy.

10 Ixam ja poom wyinaty jade'en tyøy, jøts niduki'yiyi ja mayjaa'y ixap yjanchapkajpxmidi jap tsaptøjkwimpy.

11 Winets ja Zacarías t'ejxpaajty tu'uk ja Dios y'ankilis jøts ku ja jap aga'ñ'ampy tyani ma ja poom yikpikta'aky.

12 Ku Zacarías ja ojts jade'en t'ejxpaaty, ni sudso'ampy ja kya'ukwinmaa'nbyatni, tsø'øgi ja janchyik'o'jkniiyip.

13 Xjats ja ankilis ja ñimaa'jyøø:

—Zacarías, kidi mdsø'øgi, tø Dios mgajpxaajkin mmado'oxiyi jøts pyaätp mnidø'øxy Elisabet tu'uk ja mutsku'nk. Mbaätip m'u'nk tu'uk, Juan ja mdukxøøw'attip.

14 Mdaxonda'akp ja' mdajotkujk'atp ja', jøts may ja jaa'y ja nayide'en ttajotkujk'attit ku ja kyaxø'økt.

15 Ja'ats møk nøjx ja kunuu'kxin tmøøt'aty jam Dios wyingujkp. Niwine'enin ja nøø ja tkatunk'att, ka'ap ja y'amu'ukyjaa'y'att. Jaayip ja Espiritu Santo tyuktatøjkniiy ja wyinmaa'ñ yam ja ka'aním myiñ na'xwiñ.

16 Ja'ats ja Israelit jaa'y tyukja'myatsp tyukja'byaätp ja Dios Teety jadigojk.

17 Jawyeen ja Juan mye'ent, jaanímts ja nwindson'ajtim mye'ent. Nayide'en winmaa'ñ nayide'en kutujk ja tmime'ent sam ja Dios kyugajpxyin, ja Elias'ajtpi. Jade'ents ja u'nkteety u'nktaak ja tyikjotimbett, jøts ka' ti tsep niti aki møøt chøønidit y'u'nkti y'unaj'ikti, jøts ñayikmado'op ja' pøn

kidyimyadoodip. Jade'ents ja tyiktøøjit tyiktuudaajkit ja jaa'y wyinmaa'ñ jøts ja tjøp'ejxtit ja nwindson'ajtim.

¹⁸ Jade'en ja Zacariás yiknimaay, xjats ja ankilis ja t'amidøøy:

—¿Sudso'ampy øts ya'at ndajotkujk'att jøts ku yø tiy janch, pø tum møjaa'ñits øøts amajtsk?

¹⁹ Xjats ankilis ja y'adsojøø:

—Gabriel'ajtp øts, jøts Dios ø nmidumpy; ja' øts idø'øn tø xkexy jøts mets ya'at aaw ayuujk ndukmado'ot.

²⁰ Jabi ka'apxi jatyi tø xmibiky sa me tø nnøjmi, tants inet uum, jaanim me mgajpxt ku ja m'u'nk kya'axt. Jatp kubatp idø'øn ya'at jade'en sa ø tø nwa'añ.

²¹ Ixap idø'øn mayjaa'y t'awejxti ja Zacariás, maadyip tajtip ja jap ku ja jadine'en tya'ñini jeky jap tsaptøjkjøtpy.

²² Xjats ku ja pyidsiimy, ka'ap y'aaw y'ayuujk ja t'ukya'jkn, jøts ja tyimyjaty: tjä'gyukidøø kudamik ja wyinaty tø y'ejxjøøxy y'ejxmaa'ty jap tsaptøjkjøtpy. Nugo ja ja'ayi tnidoni, tøyi ja wyinaty y'uu'mni.

²³ Kuts xyøøw ja ojts tyika'pxy winaak xøøw ja wyinaty tø yiktaguwani t'adsøønit ja tsaptøjk, winets ja ñøjkxni tyigam.

²⁴ Jøts ja ñidø'øxy Elisabet ja nay jatyi yjōtpy'ajtni ku ja et ja xøøw jade'en y'uknajxy, magoxk po' ja y'ijty jap tyøkjōtpy jadine'en ja kya'ukpidsømni. Yide'en ja wyinmay jøts ja wya'añ:

²⁵ “Ja'agøjxp Dios tø tuñ ja may'ajtp jøts øts ja jaa'y xka'ukmi'ajkniiyt.”

Ku ja ankilis tnigajpxy jøts ku ja Jesús kyaxø'økwa'añ

²⁶ Xjats ja Dios kidudujk po' tkejxy ja y'ankilis Gabriel jam Galileit na'xjotp ma ja kajp txøøw'aty Nazaret,

²⁷ jøts ja t'ats'ext ja tø'øxyøjk pøn txøøw'ajtp María, øy yikxon ja yjaa'y'aty. Niwa'añ ja wyinaty y'ejtni jøts ja tmøøt'amajtskit tu'uk ja yaa'dyøjk midit txøøw'ajtp José, ja rey David y'aptatsk.

²⁸ Xjats idø'øn ankilis ja jam tnidøjkiyi'ñ ma ja jam wyinaty chøøni jøts ja tnimaay:

—¿Dios køjxp ngajpxpøø'kxy, tø ja mmay'atyiyi! Ixa mets ja nwindson'ajtim møøt m'ejtni; tø ja Dios njantyingyunuu'kxyi ku nadyu'uk tø myik'a'ejxi wine'enin mdø'øxyøjk'atti na'xwiiñ.

²⁹ Kuts ja twin'ejxpejty ja ankilis jøts ku ja jade'en myigajpxyi, ñigyumaap ja tyimyja'wyiyi'ñ, jade'en ja kø'øm ñawyinmaa'nyiyi ti ja jade'en ttakajpxpoo'kxyiyip.

³⁰ Jøts ja ankilis ñimaajyøø:

—María, kidi mdsø'øgi, tø Dios m'øy'ijxyiyi, mjanchtajotkujk'ajtp ja'.

³¹ Mjōtpyiyip mets, mbaatp tu'uk mmajnkun'k, JESÚS ja mduksøøw'atp.

³² Møk winmaa'ñ møk kutujk ja myøøt'atp; Dios U'nk ja yiktejt, yikutujkpi Dios Teety ja pyikta'agiyit sam ja y'apteety'amøj David,

³³ jøts ja wyindsøn'att jam Israelit y'etjotp xemikøjxp; niwindem ja kyutujk ja kyakøxt kyanaxt.

³⁴ Xjats ja María tyiktiiy ja ankilis:

—¿Ti sudso dø'øn ja ndejin jade'en yjatt? Pø ka'anims øts nniyaa'y nbaaty.

³⁵ Winets ja ankilis y'adsøøy jøts ja wya'añ:

—Ja Espiritu Santo mnimeniyip, jøts ja Dios Teety tsajpjōtpyit ja' myøk'ajtn jade'en mduniyip. Jøts paty ja niwine'enin tkayikpøkyu'unt, wa'ats ja y'ett midit idø'øn myika'axp. Tø ja jade'en ttanibiktaagi jøts ja Dios U'nk yiktejt.

36 Ñayi pyaãtp ja mmigu'uk Elisabet myajnkun'k tu'uk, øy idø'øn ja yjamøjaa'yiñi. Ixyam ja tudujk po' kujk ttsøm'ity ja y'u'nk yam ja ka' tyim'yukyikjöp'ijxy jøts y'u'nk ja tpaãt.

37 Ka' Dios ti kyamayiyi.

38 Xjats ja María wyaãñ:

—Ane'emy øts ja Dios xyik'ity; wan øts ja jade'en xuiñ sam ja tø wya'añin. Winets ja ankilis jatyi choo'naã.

Ku ja María ñijky jøts t'ats'ijxy ja Elisabet jam tyøjkwindum

39 Jøts ja María nayi winet et anøø adsu'jky ojts ñijky jam kojpkjotp ma ja kajp wyinaty tu'uk jam Judeit ñaxjotp,

40 jøts ja ojts tyøki Zacarías tyøjkjotp, jamts ja ojts tkajpxpøø'kxy ja Elisabet.

41 Kuts Elisabet ja jade'en tmadøøy ku María ja jade'en kyajpxpøø'kxyi, jatyi ja tyimya'wiyi'ñ jyotp ku ja mutsk y'adijch, winets ja Espiritu Santo ja amuum tyatøjkiyøø.

42 Jøts ja yide'en møk yjantyimwyaãñ:

—Tø Dios mjantyimgyunuu'kxyi ku tø myik'a'ejxi wine'enin ndø'øxyøjk'ajtindi naxwiñ, jøts yø m'u'nk nayide'en tø yikunuu'kxy.

43 jTyimdyi øts tyimbyøn øts ku øts nwindson'ajtim tyaagu'nk xkugajpxi!

44 Ja'ayi ja mgajpxpoo'kxin tø ndyimyadøøy, jatyi øts n'u'nk ja xonda'agy i tø yjantyimyk'adi'ichiyi.

45 Nekim xøñim mets ku ja tø xjanchjaw i xkunu'kxyjawi, jatp kubatp idø'øn yø jade'en sa yø Dios tø tyikutuky.

46 Xjats ja María wyaãñ:

Øy tsuj ngunu'kxyjawi ja nwindson'ajtim,

47 myinijkxpy øts n'aãw njojt ja nDios Teety Yiknitsokpi.

48 Tønim ja Dios tnijawi jøts tø t'ejxjimbity ja y'u'nk ja myaay,

yamnim øts inet ejtp ejtni xoni nyiktejt wine'enin ja naxwiñ'ñit jaa'y yja'atti ya naxwiñ.

49 Janch møj ja Dios myøk'ajtin ku øts ja jade'en tø xuiñ; pø wyandijpyts idø'øn yjanchwa'ads i janchkapøkmøødi.

50 Ejtp ja tpa'ayo'ot pøn jatyi ja windsø'jkijyp.

51 Tø tyikwingaxi'iky ja myøk'ajtin ku ja tø tmimajadaajki ja namyikaxi jaa'dyi wyinmaa'ñ.

52 Tø tyik'amutski pøn jatyi kamaabyim yikutujktip, jøts ja tø tyikjot'amøpkiky ja ayobidi pøn jatyi aay pista'ak yik'ejxtip.

53 Pøn jatyi ayoodip winmaadyip, tøts ja tmø'øy ja jotkujk'ajtin,

jøts ja kumeeñ jaa'y jadi'iñi wa'ats wiwøpy tø yikpagajxnidi.

54 Tø ja tpudøki ja Israelit kajp ejxim ja y'u'nk t'ejxkapyin;

ka'ap ja tja'dyigøøy paty ja tø t'ayo'ixy,

55 sam ja ojts yiktukmadowdin ja n'oktaakti ja n'apteetyi, møøt ja Abraham, ku ja y'u'nk y'una'jk jade'en kyakøxt kyanaxt.

56 Xjats ja María jam tmøøtaa'niyi'ñ tigøøk po' ja Elisabet; ku jade'en ñajxy, jaanims ja ñøjkxnaã tyøjkwindum.

Ku ja Juan Bautista kyaxi'iky

57 Xjats ja xøøw ja po' tpaajty juuni et ja Elisabet kya'axt. Jade'ents idø'øn yikaxi'iky tu'uk ja myajnk'u'nk.

58 Jatyi ja myigu'uktøjkti myigujøøndi myigudøjkti ñimejnidi. Janch yikajxakp ja' ku ja tnija'widøø jøts ku ja Dios wyinaty ja kunuu'kxin møj tø myø'øyyi.

⁵⁹ Jøts ja kiduktujk xøøw tyiknøjkxtøø ja maxu'nk jøts ja ejxa'an yikmo'ot ñe'kxkøjxp, jamts ja tpikta'akwajniidi ja xyøøw sam ja tyeety xyøøw'atyin Zacarias.

⁶⁰ Jøts ja tyaak, ka'ap ja tkupiky, yide'en ja wyaañ:

—Ka', ka'ap yø jade'en txøøw'att. Juan yø xyøøw'atp.

⁶¹ Xjats ja yikniimaay:

—¿Tiku yø jade'en yiktejt? Pø ka'ats ja mmigu'uktøjk jade'en pøn txøøw'aty.

⁶² Winets ja tyiktøødøø ja u'nkteety ti tyukxøøw'atp ja y'u'nk, nugo ja ttanidonidi.

⁶³ Jøts ja ojts t'amidøy tu'uk pedasi ja puu'y'u'nk ma ja tkøxajjyit ja xyøøw, xjats tpiktaajky: “Juan yø xyøøw.” Jøts ja jaa'y ñigyumaap yjanchjajttøø ku ja t'ejxtøø jade'en.

⁶⁴ Jøts ja Zacarias nay jatyi ojts y'awijy jadigojk, jatyi Dios ja tkajpxpøø'kxy, møk ja ttukmøjawi.

⁶⁵ Ja'agøjxp ja ñigyumaap tjä'widøø ja tøk'ayø'øbyidi, jatyi ja ojts tkajpxyø'øgyoiti sa wyinaty tø yjaty kyubety, jøts ja yiknija'wiyi'ñ wine'enin ja Judeit jaa'y jam chøøniidi y'etjotp.

⁶⁶ Pøn jatyi ja jade'en tñimadoodip, nugo ja tkumayidi tkudajidi jøts ja xem yam ñayiktiyidi ñay'amidøyidi:

—¿Ti yø tyu'ump, ti yø pyaatp yø mutsku'nk ku yø yaakt?

Jabi janchmøøjyipts ja Dios kyunuu'kxin yø'.

Ku ja Zacarias ja Dios yikajpxøø

⁶⁷ Xjats ja Zacarias ja Dios tyukajpxøø ja ayuujk ku ja wyinaty tø tyatøkiyi ja Espiritu Santo, jøts ja wyaañ:

⁶⁸ Janch møj ja Dios ja kyunuu'kxin tmø'øy ja Israelit kajp,

ku tø tñimiñ tñija'aty ja y'u'nk y'una'jk wine'enin adøm ja xja'ajtindi, tøts nitsoojkin ja xukpaajtyim.

⁶⁹ Tø ja tu'uk tkexy ja yikutujkpi pøn xuknitso'ok'ajtindip ja nbøky, nay ja David y'ap y'ok pøn y'ijty ja Dios tmidump.

⁷⁰ Jade'en sa ja Dios Teety jawyeenip ojts ttuknigajpxy ja kyugajpxy,

⁷¹ jøts ku ja xaniguwandujtin ja nmidsep ja nmi'ajkibi jøts niduki'iyi pøn x'øy'ejxim xka'øy'ejxim,

⁷² jøts ku ja ndeety'ap yik'ayo'ejxtit ku ja ka'ap tjä'dyigøy ja y'ayuujk.

⁷³ Ku ja wyinaty tø twanda'aky, jade'en ja ndeety'amøj Abraham yik-tamiwandaagi

⁷⁴ jøts ku ja xukmimadaajkin ja nmidsep,

jøts ja jotkujk nmidu'unin, nisudso ngatsø'jka'ant,

⁷⁵ øy tsuj tiy janch ndsinaa'yindit, jade'en ja nwindsø'jka'andit ejtp.

⁷⁶ Jøts mets u'nk, mets ja Dios tsajpjøtpyit mgugajpxy'atiyip,

kumi mets ja jaa'y wyinmaa'ñ ja myiktøøjip myiktuudaajkip jøts ja nwindsøn'ajtim yikjøp'ext,

⁷⁷ jade'ents ja jaa'y tñijawidit jøts ku ja mye'ent yiknitsokpi jøts ku ja pyo-jkpimaa'kxt.

⁷⁸ Jadine'en ja Dios xtsøjkyim xpa'ayø'øyindi jøts ja xanikejxyim ja y'u'nk ja yiknitsokpi,

⁷⁹ ja'ats xyikwejim xyikajim, kujaj kudøø'kx xyiktsinaa'yindit. Ja' xukmajt-stujtimp ja nga'ødyu'unin ja ngugoots'ajtin,

jøts ja xuk'ejxint xuknija'wa'ant ja tsinaa'yin midit øy midit tsuj, jotkujk'atyim Dios wyingujkp.

⁸⁰ Jade'ents ja mutsku'nk ye'ljky, møk møjaaaw, wijy quejy, jøts øy tsuj ja winmaa'ñ tjagyepy. Jøts ja y'atsinaay jawyeen jam abak etjotp ma niti kya'ity, winetnimts ja ñanky'ejxi ma ja Israelit jaa'y jamdi.

2

Ku ja Jesús kyaxi'iky

¹ Xjats ja møj windsøn Augusto winet et ojts tni'ane'emy møk'ampy jøts ja naxwii'ñit jaa'y niduki'iyi yikjaamyuktit.

² Ja Cirenio jam wyinaty Siria kudunk'ajtp ku dø'øñ ja jade'en miduk'ojk tjaamyuk'okwandøø ja jaa'xyøøw jøts ja jumøjt.

³ Xjats ja jaa'y jade'en ñøjkxti kyø'ømgajpkøjxpti, jøts ja xyøøw jøts ja yjumøjt tkøyaktit jam.

⁴ Jade'en'ampyts ja José jam Galilea chøø'ñ ma ja kajp txøøwi Nazaret, jøts ja ñøjkxtøø Belén jam Judeit y'etjotp ma ja David wyinaty tø kyaxi'iky, kumi ja' ja José tyeety'ap'ajtpy.

⁵ Patyts ja jam tmøøtnijkxy ja María jøts ja tkøyaktit ja xyøøw ja yjumøjt, tøts wyinaty ja kajpxy ttunidi jøts y'amajtskidit. Jøtpynim ja wyinaty.

⁶ Winets ja y'u'nk ja nay jam pyaajtøø, jam ja ojts pyo'ga'pxy.

⁷ Jøts ja tpaajty ja yjagyooobu'nk, ojts t'abity jøts ja ojts tkø'øky jam jiyujkøø'kx'i'i'ñjotp. Ka'ap ja ja'taajk jam wyinaty tø ñibaadi, patyts ja jami tyandøø.

Ku ja borreek'ejxpi ja ankilis pyaadyidi

⁸ Jamts wyinaty jiyujk'ejxpidi tsigi'ejxpidi wingon ma ja kajp txøøwi Belén, ja'ats t'ejx'ejttip tsunaxy'ampy ja byorreegidi.

⁹ Xjats ja jam jotmøñ t'ejxpatøø ja Dios y'ankilis. Jade'eñi ja jam tyimykjajtaajky ma ja wyinaty, jøts ja yjantymchø'jkidøø.

¹⁰ Nimaajyidibik ja ankilis inet ja'adi:

—Kidi mdsø'øgidi, øygajpxy øy'ayuujk ø nmimimpy. Ja' mee ndukmadoowampy, ni'ijtyi ja jaa'y ja tjantyaajotkujk'attit:

¹¹ tø ixyam kye'exy ja CRISTO, ja nwindson'ajtim, ja yikniitsoxpi ma ja David jam kyugajp'ajty, ja' kyajpkøjxp.

¹² Ja' idø'øn ja wyinaty ku inet xpaattit tu'uk ja maxu'nk mots'abidity kyø'øgyi jam jiyujkøø'kx'i'i'ñjotp.

¹³ Jaaktyimgyaxø'ktip inet ja may ankilis jam ma ja tyu'ukpi wyinaty, jøts ja Dios ja møk ttukmøjawidi ttukunuu'kxyjawidi, yide'en ja wya'andi:

¹⁴ Kunuu'kxy mets Dios Teety tsajpjotpit ku øy'ajtin tsuj'ajtin tyaky ya naxwiiñ naxkijxy, jøts ja jaa'y yikmo'odi pøn tmijotkujk'atwandip ja Dios!

¹⁵ Xjats ku ja ankilis wyimbejtnidøø ku ja ñøjknidøø jap tsajpjotpy, winets ja jiyujk'ejxpidi nixem niyam ñawyambinaxwa'jkidøø:

—Wants idø'øn tja'myindi Belén, jamts ja t'ats'ijxyindi midi Dios tø xuknijawindi.

¹⁶ Xjats idø'øn putyi ñøjkxtøø, jøts ja María jam ojts tjanchpaatti møøt ja José, janch jamdamik ja mutsku'nk tø yikø'øky jiyujkøø'kx'i'i'ñjotp.

¹⁷ Kuts ja jade'en t'ejxtøø, winets ja tñimadyaktøjkidøø sa ja ankilis ja wyinaty tø tyamimadya'agyidi ja maxu'nk,

¹⁸ jøts ja ñigyumaap yjanchajttøø pøn jaty jam wyinaty.

¹⁹ Jøts ja María ja'myech ja tyik'ity sa ja wyinaty tø yiknøjmi, ja' ja wyinmaa'ñ'ajtnip.

20 Xjats ja jiyujk'ejxpi wyimbejtnidøø. Møk ja Dios ja ttukmøjawidi ttukunuu'kxyjawidi ja'agøjx ku ja wyinaty jade'en tø t'ejxti tñijawidi jøts ku ja jade'en tø yjantymjyaty.

Ku ja maxu'nk Jesús y'atsyiktuk'ijxy ja Dios Teety tsaptøjkjotp

21 Kiduktujk xøøw ja mutsk ojts yikpiktaajki ja ejxa'an ñe'kxkøjx jøts ja yikxøømøøy JESÚS. Nay ja' ttukxøøw'ajty midi ja María ja ankilis wyinaty tø tyukmadøyi ku ja wyinaty ka'anim tjøtpy'aty.

22 Xjats ku ja tiempi tpaajty wine'en ja wyinaty tø t'a'ejxidi wya'atsti sam ja Moisés kyutujk wya'añin, winetnimts ja maxu'nk ja jam Jerusalén ttaninøjkxtøø ja Dios.

23 Jade'en'ampy idø'on ja jade'en ttundøø kumi yide'en ja Dios kyutujk yja'ayi: "Tum Dios ja mixyuna'jk yiktamiyoxtip pøn jagyoobi'ajtp."

24 Xjats idø'on ja jade'en t'atswindsø'jkidøø sam ja Dios Teety tø tyikutukyin: namajtsk naxpak, pøni ka'ats ja te winets ja tsapak nayide'en namajtsk yiktawindsø'øgit.

25 Jamts wyinaty ja jaa'y tu'uk chøøni Jerusalén pøn txøøw'ajtp Simeón. Janch øy jaa'y idø'on ja'. Yjanchja'myejchp idø'on Dios ja'. Ja'ats idø'on tjøp'ejx'ejtp ja Israelit kajp juunim idø'on ja yjadyimy'uknitso'ok'att. Jam ja Espíritu Santo ja wyinaty tmøødi,

26 jøts tø ja wyinaty twanda'aky jøts kunim ja jawyeen t'uk'ext ja Cristo pøn ja Dios Teety kyaxp, winetnimts ja y'ookt.

27 Xjats ja winet ñijxy tsaptøjkjotp, ja Espíritu Santo ja yiknøjkxip; kuts ja maxu'nk Jesús jam wyinaty ja tyeety tyaak tø yikniikxyi jøts ja jade'en tpadundi ja kutujk,

28 jøts Simeón ja jam tñixajiyi'ñ kyø'køjx jøts ja tsaa'ñ'ijty, jøts Dios ja ojts ttukmøjawidi ttukunuu'kxyjawi, yide'en ja wyaañ:

29 Dios Teety, tøts inet, wan øts inet jotkujk t'oo'kni.

Tø xpaduñ ja m'ayuujk sa ø xnimaay.

30 Tønim ø nwemp'ixy ja yiknitsokpi

31 midi tø xanibiktaagi ja naxwii'ñit jaa'y.

32 Yø' idø'on tu'lump ja may'ajtin jøts ja jaa'y mja'myatstit mja'byaadit pøn ka'y'Israelitjaa'yidi.

Yø'øgøjx idø'on yik'ejxkaptit ja Israelit kajp midi tø xwi'ixy.

33 Xjats ja José janchñigyumaap yjajtøø møøt ja ñidø'øxy ku Simeón ja mutsk jade'en tñigajpxy.

34 Winets Simeón ja kyunuu'kxmyigajpxidøø. Yikajxaktip ja' jøts ja María yiknimaay, ja Jesús tyaak:

—Ejx madow, ja' yø mixyu'nk tø yiktanibiktaagi jøts Dios Teety y'øy'ajtin ttukpaajtit may ja Israelit jaa'y. Nay mayts ja tkapaattit ku jaa'y yø may kyagupøkit.

35 Jade'ents idø'on ja yiknijawit sa pønjabøn wyinmay y'am yjotp. Mdyimchaachkuwinmayip mets ja øy, tyimchaachjawip mets m'anmija'win ja'.

36 Jamts wyinaty tu'uk Dios kyugajpxymi, Ana ja tø'øxyøjk xyøøw, ja Fanuel ñøøx, ja Aser ja y'aadsidip kyugojidip. Møjaa'tyigøynits idø'on ja'. Tyimy'unaj'kyi ja y'amajtskiyi'ñ jøts ja ja'ayi wixujk jumøjtyi tmøøtsinaay ja ñiyaa'y.

37 Makta'pxy myaktaxk jumøjts ja wyinaty, jøts ejtpts idø'on ja jap tsaptøjkjotpy tmiduñ ja Dios xinaxy tsunaxy, y'amaay'ajtpy idø'on ja', ka'ap ja tkugayi tku'uugi, ejtp Dios ja t'ajot'aty.

38 Ja Ana dø'øñ jap ojts myiñ winet, jøts ku Dios ja ojts ja t'uktukmøjawi t'uktukunuu'kxyjawi, winets ja t'nigajpxøjkii'ñ ja mixy Jesús. Ja' ja tyukmadøøpy pøn jaty wyinaty tjøp'ejxtip jøts ku ja Jerusaléngit jaa'y ñitso'ok'attit.

Ku ja wyimbettøø yja'ttøø jadigojk Nazaret

39 Xjats ja wyimbejtndøø ñøjknidi jam kyajpkøjxp Nazaret, jam Galileit y'etjotp, ku ja jade'en wyinaty tø tpadungøjxidi ja Dios kyutujk.

40 Jøts idø'øñ ja mixyu'nk jam jade'en yeeky, møj møjjaaw, wijy kejy. Dios ja amuum jantyimkyunuu'kxyip.

Ku ja mixy Jesús yikpaaty jam tsaptøjkjotp

41 Xumi nøjxktipts idø'øñ ja tyety tyaak jam Jerusalén winjumøjt ku ja paski xøøw jam tpaaty.

42 Jøts ku ja Jesús yjumøjt wyinaty makmajtskni, winets ja ojts ñøjxkti niduki'iyi Jerusalén, jøts ja xøøw ja t'anøjxkidi kumi jade'en ja kostumbri.

43 Xjats ku ja wyimbejtndøø xøøguixy, winets ja mixy Jesús jamyi tyaanaa Jerusalén, ka'ap ja José ja tkumaydi.

44 Jade'en ja wyinmaydi, jam ja tity pyamiñidi mayjaa'y agujkp, jøts ja jade'en yø'øxyinajxtøø; jøts ja tja'ixaadyøø tjayiktøødøø tjayik'amidoodøø ja myigu'uktøjkti pøn jaty ja møøt ñay'ijxy'atyidi,

45 nima ja tkapattøø. Xjats ja tniwimbejtøø jadigojk Jerusalén jøts ja jam t'ixaadyøjkidøø.

46 Kidigøøk xøønim ja tpatøø, jandamik ja wyinaty tsaptøjkjotp chøøni jam may kyajpxwejpi y'agujkp, jamik ja pyatmadøø jøts ja jam t'amidøø tyiktuy tyiktu'ugi.

47 Jøts ku ja jaa'y ja jade'en tmadoodøø, ñigyumaap ja tyimyja'widøø ku ja amwijy tsaachwijy, jøts ku ja tity janch y'adsøø.

48 Xjats ku ja tyety tyaak ojts y'ijxyi, ñigyumaap ja tyimyja'widøø jøts ja tyaak ojts ñii'mxyi:

—¿Ti, u'nk, jade'en myik'adøøjstip? ¿Ti øøts jade'en xjantyatump? Møk øø tø xjantyimykjotmadøøki wine'enin øøts ixa njawidity, mjayik'ixa'ay.

49 Xjats ja Jesús y'adsøø jøts ja wyañ:

—¿Tiku ø x'ixa'adi? ¿Ti kidi xnijawidi ku øts nDeety yja' nduujnyit?

50 Niwine'enin ja tkaja'gyukidøø ku ja jade'en ñimaajyidøø.

51 Xjanimts ja tmøødidøø Nazaret, etpts idø'øñ ja myimadøøyidi jøts ja tyaak nugo tja'myats'ijty sa yjajty.

52 Yaak'adøtspts ja Jesús, wej'adøtsp kaj'adøtsp ja'. Jade'ents Dios ja tyajotkujk'aty ku ja jade'en y'ijxyi, jøts myigu'uk nayide'en yjotkujk'atti.

3

Ku ja Juan Bautista kyajpxwa'kxy abak etjotp

1 Makmojkx jumøjt wyinaty kujk yikutuky ja møj windsøn Tiberio ku ja Poncio Pilato wyinaty wyindsøn'aty jam Judea, jøts ja Herodes jam Galilea, jøts ja myiga'ax Felipe jam Iturea jam Traconite, jøts ja Lisianas jam Abilinia wyindsøn'aty.

2 Ja Anás møøt ja Caifás ja' idø'øñ wyinaty møjteetywindsøn'ajttip ku ja Juan, ja Zacarías myajnk, ja Dios tyukmadoji ja y'øgyajpxy ja y'ø'y'ayuujk jam abak etjotp.

³ Xjats ja ojts t'ayø'øy'abidsimy ja et jam mõj nõøba'am midì txøøw'ajtp Jordán, jøts ja jaa'y ttukmadøy jøts ku ja ñøbattit, jøts ja tyiktø'ødit tyiktuuda'aktit ja wyinmaa'ñ, wan tyiktigtatsti ja chinaa'yindi winets ja yikpojkpimaa'kxtit.

⁴ Xjats ja jade'en yjanchtuuñøø yjanchjajtøø sà ja Dios kyugajpxy Isaías wyinaty tø tjaadyañ ja ayuujk ku ja wya'añ:

Paty ja kugajpxy ñøjxkt jawyeen jam abak etjotp jøts ja myigu'uk ja tnøjmit møk'ampy:

“Awejxidi ja Dios y'ixpøjkin, yiktøwdi yiktuuda'akti ja mwïnmaa'ñ yikxon.

⁵ Pønts ja kya'ukupøkp wan ja tyimyjapøni, ni'ijtyi ja tum jade'en tkupøkt.

Yik'øyip yiktuuda'akp ja' winmaa'ñ ku wyinaty pønjabøn tø wyinmaamya'aty.

⁶ Jade'ents ja naxwii'ñit jaa'y ni'ijtyi t'ejxtit sà dø'øn ja Dios tyaky ja nitsø'ok'ajtin.”

⁷ Xjats ku ja Juan ja mayjaa'y jam ñimejniyøø jøts ja tyiknøbatt, jøts ja tnimaay:

—iMee miiku! ¿Pøñ mee tø mni'i'mxyi jøts ku jade'en mgayiktabayø'ødyit ja mbøky, jøts ku yø'øyi chøkyi ku meets ya nõbajtpi tø mmiñ?

⁸ Yikxon idø'øn mjaa'y'attit, wan idø'øn tyik'ijxy jøts ku ja mdsinaa'yin tø xyiktigtatsti. Kidi mee kø'ømyi mnawya'añiyi: “Tixi ka'ap ti chøkyi, kumi ja Abraham adøm n'apteety'amø'ajtyindip”; jøts ka'ats yjade'eni, ti Dios kamaajyip, øy ja pøn ttukmigu'uk'att ja Abraham pøni pøn ja kø'øm y'a'ejxip.

⁹ Jøts tsojk ja nøjxk yiktiidyuñ pøn jaty tkami'øy'ajtip ja Dios.

¹⁰ Xjats ja mayjaa'y ja yiktøøjøø y'amidoojøø:

—¿Ti øø ndu'ump? ¿Sudso'ampy øø nwinmaa'nbyaatt?

¹¹ Jøts ja Juan y'adsojimbijty:

—Pøni pøn ja pyikta'aky, pøni pøn ja yjujky'ajtin may'ampy tjagyajtpip, wants ja tmo'odi kujkwa'kxy pøn niti kidyimy'ejtxidip; pønts ja kyaajyik yjøø'kxik jam, wan ja nayide'en møøt tjøø'kxwa'kxtit pøn ja kyaajyik y'uujkik kidyimy'ejtxidip.

¹² Winets ja yikugubajtpidi myemidi jam nõbajtpi, jøts ja Juan yik'amidøøy:

—Windsøn, jøts øøts, ¿ti øø ndu'ump?

¹³ Jøts ja Juan ja y'adsoojidøø:

—Kidi kugujuu'ñ ne'egi ne'egi x'amidowdi, ja'ayi dø'øn mbadu'undip sa kyutuky.

¹⁴ Jøts ja tseptumbidi winaagin tyiktøømidøø:

—¿Jøtsimts øøts, ti øø ndumip?

Xjats ja t'adsøøy:

—Kidi pøn o ti xpøjxidi aguwanikøjxp, kidi pøn o ti xanitàayibyatti; tajotkuk'atti ja mmijuu'ndyi.

¹⁵ Ixjam idø'øn ja mayjaa'y wyinaty y'awejxti, ja' ja tyajotkukiwyandip, yide'en idø'øn ja wyinmaydi jøts ku ja Juan ja' idø'øn Cristo.

¹⁶ Jøts ja Juan ojts tnigajpxy, ttukmadøøy ja mayjaa'y:

—Tiy janch ixyam ndyimyukmadowdi jøts ku øts yø'øyi tø nnimiñ jøts meets ja nõø nduktanøbattit; jats ø tu'uk ix'oojk xpamiñ pøn meets ja Espiritu Santo mduktatøkiyip, jøts ja' tñime'ent ja tiidyu'unin. Møk'ampy kutujk ja tmimiñ, nija'baat ø xkapaat'aty jøts øts ja nugo nwinaxt.

¹⁷ Jade'en ja ttu'unt ja naxwii'ñit jaa'y sam ariin yikwigumyïn. Abiky ja tpihtaajkit ja y'ak jøts ja tñitø'øty ja jøøn midì nijuuni kape'tsp, jøts ja ariinbajk abiky yikpøkjø'økt, jade'ents idø'øn ja jaa'y yiktu'undit sam pønjabøn tmi'øy'aty tkami'øy'aty ja Dios.

18 Jade'en idø'øn ja Juan ja t'ana'amin'aty, jade'ents ja ttukmadøy ja mayjaa'y ja øgyajpxy ja øy'ayuujk.

19 Nayi wyingugajpxiyi'ñ ja møk ja windsøn Herodes ku ja tñidø'øxy'aty ja Herodias, ja myiga'axy Felipe ja ñidø'øxy, jøts ñayi tyamigajpx ja' sã jaty ja jam wyinaty tyundigøy;

20 xjats ja Herodes ka'ap ja tmøjpikta'aky, jaaktyimdyundigøøy ja', ojts Juan ja tyikpuxøktøki.

Ku ja Jesús ñøbety

21 Ku ja Juan wyinaty ka'anim yiktsumy, ku ja jam tyiknøbejty ja mayjaa'y, winets ja Jesús jam ñøbajtmøø; ixjam ja wyinaty Dios'ajot'aty ku ja tsajp y'awaajch

22 jøts ja Espíritu Santo ja jade'en ñigida'agyi ejxim tsapak, wa'ats ja yik'ijxy, winets ja Dios Teety y'ayuujk yikmadøøy, yide'en ja jap tsajpjøtpty wya'añ:

—Øts me n'U'nk'ajtpy; ndsøky'ajtpy mets jøts njantyajotkujk'ajtpy mets.

Ja jaa'dyi pøn jaty ja Jesús tyeety'apip

23 Ee'pxmajkin ja Jesús wyinaty ja yjumøjt ku ja tyunk ja tjøpwa'jkiyi'ñ. Nømdip idø'øn jøts ku ja teedyi ja José. Jøts ja José tteety'aty ja Elí,

24 jøts ja' ja Matat, jøts ja Matat ja Leví. Jade'en ñbayøøyi Leví ja Melqui, Melqui ja Jana, Jana ja José,

25 José ja Matatías, Matatías ja Amós, Amós ja Nahum, Nahum ja Esli, Esli ja Nagai,

26 Nagai ja Maat, Maat ja Matatías, Matatías ja Semei, Semei ja José, José ja Judá,

27 Judá ja Joana, Joana ja Resa, Resa ja Zorobabel, Zorobabel ja Salatiel, Salatiel ja Neri,

28 Neri ja Melqui, Melqui ja Adi, Adi ja Cosam, Cosam ja Elmodam, Elmodam ja Er,

29 Er ja Josué, Josué ja Eliezer, Eliezer ja Jorim, Jorim ja Matat,

30 Matat ja Leví, Leví ja Simeón, Simeón ja Judá, Judá ja José, José ja Jonán, Jonán ja Eliaquim,

31 Eliaquim ja Melea, Melea ja Mainán, Mainán ja Matata, Matata ja Natán,

32 Natán ja David, David ja Isaí, Isaí ja Obed, Obed ja Booz, Booz ja Salmón, Salmón ja Naasón,

33 Naasón ja Aminadab, Aminadab ja Aram, Aram ja Esrom, Esrom ja Fares, Fares ja Judá,

34 Judá ja Jacob, Jacob ja Isaac, Isaac ja Abraham, Abraham ja Taré, Taré ja Nacor,

35 Nacor ja Serug, Serug ja Ragau, Ragau ja Peleg, Peleg ja Heber, Heber ja Sala,

36 Sala ja Cainán, Cainán ja Arfaxad, Arfaxad ja Sem, Sem ja Noé, Noé ja Lamec,

37 Lamec ja Musalén, Musalén ja Enoc, Enoc ja Jared, Jared ja Mahalaleel, Mahalaleel ja Cainán,

38 Cainán ja Enós, Enós ja Set, jøts Set tteedyi ja Adán, jøts ja Adán ja Dios Teety.

4

Ku ja Jesús ja miku' tyaguwaniyi jøts ja yikpøkyunwa'añi

¹ Xjats ja Jesús wyimbijty jam Jordángit nøø agø'øm. Tø ja Espíritu Santo ja tyatøjkiniyi jøts ja jam yiknøjkxøø tø'øts etjotp mā niti kya'ity.

² Jamts ja ojts chøøni wixijkxyøøw jøts ja miku' ja jam yjot'ejxwā'añi. Niti ja tkañi'kxy jadine'en jøtsnim ja pyaajtøø ja yuu.

³ Winets ja miku' ja ñimaajyøø:

—Pøni janch ku me mjanchDios U'ngi yik'øyi yø tsaa tsapkaaky.

⁴ Jøts ja Jesús t'adsojimbijty:

—Yide'en jap nøkyijxpy wyā'añ: “Kuuyi Dios kyajpxy møj, kidi ja'ayip ja naxwii'ñit jaa'y nugo tyajujky'ajttip ti jaty yikjøø'kxp.”

⁵ Xjats ja miku' ja ojts wyaanijkyi jam møj kojpkøjxp, jøts ja jam tyuk'ejxøø wine'enin ja kajp naxwiiñ.

⁶ Yide'en ja miku' ñimaajyøø:

—Nmøøgyøxp mets ya'at tuki'iyi wine'en øts yø kajp nnitani ja møj ja mutsk. Jade'en øts yø tø nyikmø'øy, øyts øts yø pøn ndyimyø'ot pøni pøn øts yø nmo'owampy.

⁷ Pøni xwinguxanaapy øts jøts ø xwindsø'øgit, winets mets yø tuki'iyi xja'ajtkøxt.

⁸ Xjats ja Jesús t'adsøøy:

—Miku' jiwā'ak. Kidi øts yā xwin'ixy, pø yide'ents ja Dios kyajpxy wyā'añ: “Ja Dios Teety tu'ugyi mwindsø'øgip, ja' tu'ugyi mduujnip ja yja' pøni sã ja wyā'añ.”

⁹ Xjats ja miku' ja wyaanøjkxkojmijyøø jam Jerusaléngit kajpkøjxp jøts ja tsaptøjkøjxp yikpajtiyøø, jøts ja ñimaajyøø:

—Pøni janch Dios U'nk mets, katswoon yā;

¹⁰ pø nømpxi Dios kyajpxy jøts ku ja tnøjmit ja y'ankilis jøts me myik'ejx'ett, jøts ku me ka'ap ti mjatit.

¹¹ Mets ja mdsā'anjø'øgit jøts mdeky ja tsaa kyakumit kyayo'odsit.

¹² Xjats ja Jesús t'adsøøy:

—Janch nayide'ents ja Dios kyajpxy wyā'añ: “Kidi mDios xjot'ixy.”

¹³ Jade'ents ja miku' nisudso'ampy kya'ukwinmaa'nbyatnaa sã ja tjaakjot'ejxkojt ja Jesús, jøtsnim ja jade'en ñimyajtstuujtøø.

Ku ja Jesús tjøptøki ja tyunk Galileit etjotp

¹⁴ Jøts ja Jesús ñøjkxnaa Galilea, møk'ampy ja Espíritu Santo ja wyinaty tø tyatøkiyi, jade'en ja tmøøt'aty, tum ja' idø'øn ja jaa'y wyinaty y'aawidip y'ayuujkidip o maðsoo.

¹⁵ Yåts ja yik'ixpiky mā jaty ja tsaptøjk jam, jade'ents ja o pøn kyaxā'agiyi.

Ku ja Jesús yja'jty jadigojk Nazaretit kajpjotp

¹⁶ Jøts ja ojts ñijky Nazaret, jam kojpkøjxp mā ja wyinaty tø myutsk'aty. Poo'kxin xøøw wyinaty ku ja tyøjkiy'ñ jam tsaptøjkjotp, jade'en idø'øn ja tkostumbr'aty, xjats ja tmiwā'kukiyy'ñ ja Dios kyajpxy jøts ja tkajpxy.

¹⁷ Ja nøky ja wyinaty tø yikmø'øy midt ja Dios kyugajpxy Isaias yjaay; jøts ku ja ojts t'agiibyaky, ja' ja jap pyaajt mā jap wyinaty yide'en kyøxja'ayi:

¹⁸ Dios Teety øts ja y'Espíritu Santo xpudøjkip,

ja' ø xmøøpy, ja' ø xpiktakp jøts øts ja ayoobi jaa'y ndukmado'odit ja øgyajpxy ja øy'ayuujk;

ja' ø tø xkexy jøts øts ja ngajpxjot'amøkidit pøn amjotmay'oo'ktip tsaachjotmay'oo'ktip,

jøts øts ja nyik'awa'atpidsø'ømdit pøn jade'en ejtnidip sam tsumy jaa'yindi, jøts øts ja nyikwin'ejxwā'kxtit pøn wimbeets kugoots ejttip;

jøts øts ja nyik'awa'atspidsø'ømdit pøn øy sagasa yiktundip;

¹⁹ Jøts øts ja Dios Teety ja yiknitso'ok'ajtin nnigajpxiyit.

²⁰ Winets ja Jesús t'agiimyujky ja nøky, jøts ja ojts tkømoø'y ja tumbi, jøts ja y'ixaajky, jøts ja mayjaa'y ka'ap ja y'ukni'eixujtniyi.

²¹ Xjats ja kyajpxøjkiiy'iñ jøts ja wyaañ:

—Ixamts idø'øn yø jade'en tø jyaty tø kyubety mee mwingujky sa ja Dios kyajpxy wya'añin.

²² Jøts ja ni'ijtyi t'ødeyjtøø ja Jesús, ñigyumaapts idø'øn ja tjawidi ku myadya'aky ja amdsuj tsaachuj pøni sa jaty ja ñi'mxyidi, jøts ja xem yam ñayiktiyidi:

—¿Kidi ja Joséjip idø'øn ya'at ja y'u'nk?

²³ Jøts ja Jesús wyaañ:

—Tiigyajpxy yide'en meets inet mdyimwya'añ: “Tsøøyibi, nachøøyi kø'øm”; mnayinømdipts inet: “Jade'en sa øø tø nnimadøy m'adi'ich jam Capernaum, tu'unts inet ya nayide'en mgø'ømnaxkijxy mgø'ømkajpxkijxy.”

²⁴ Jøts ja yjaakwaañ:

—Tiy janch meets idø'øn nnøjmi jøts ku ni tu'ugin Dios kyugajpxy kyayikupiky kyø'ømnaxkijxy kyø'ømgajpxkijxy.

²⁵ Tyimñømp øts, kawinaak ja ku'øktyø'øxy ja wyinaty ya Israelit etjøøjty ku ja Dios kyugajpxy Elías y'atsinaay, ku et kyatuuy tigøøk jumøjt jagujkp winets ja yuu yjanch'ijty o magajp;

²⁶ ni tu'ukts ja kyayiktanigajxtøø ja Elías ya Israel, ne'egi ja' Dios ja tyanigajx pøn jam wyinaty tsinaapy Sarepta, jam Sidón kajp wingon.

²⁷ Nay jats jaa'y wyinatymidi ya Israel pøn putstip ku ja Dios kyugajpxy Eliseo yjaa'ajty, jøts ja ni tu'ugin kyataadyøø ja pyu'uts. Pøn txøøw'ajtp Naamán, ja' ojts ne'egi ja yja' tyay pøn jam Siria kunaajx'ajtp kugajp'ajtp.

²⁸ Xjats ku ja jade'en tmadoodøø jøts ja yjantyimy'ambøjktøø pøn jaty jam wyinaty tsaptøjkjotp.

²⁹ Ojts ja tñibidø'økti ja Jesús, jøts ja tkajxpidsømdi jam kajpjotp, jøts ja tyiknøjxtøø jam kojpkubajkp ma jam tu'uk ja kats'aaw, jamts ja tkutejñaxwa'andi.

³⁰ Jøts ja Jesús jadi'iñi jam mayjaa'y agujkp ñajxy jøts ja jade'eñi chøø'ñ.

Tu'uk ja yaa'dyøjk pøn ja miku' tø tyatøkiyi

³¹ Jøts ja ojts ñijky Capernaumit kajpkøjxp midu jam Galileit etjotp tãmp, jamts ja tyik'ixpiky ja jaa'y ku poo'kxin xøøw.

³² Ñigyumaap ja tjawidi ku ja jade'en yik'ixpikyidi, kumi tum ja' ja kyajpxy midu kutujk møøt.

³³ Jamts tsaptøjkjotp wyinaty tu'uk ja jaa'y pøn ja miku' wyinaty tø tyatøkiyi, ja'ats ja møk yikwajnøø:

³⁴ —Majstutk øøts; ¿ti øø xanibøjkip, mets Jesús Nazaretit jaa'y? ¿Ja' me tø xnimeni jøts øø xyikudigø'øty? Wa'ats me n'ejxkapy mbøn mets, pø Diosxi me m'u'nk'ajtip.

³⁵ Xjats Jesús ja miku' t'adsøøy, yide'en ja tnimaay:

—iAmøñi et, kidi mgajpxy, jøts majtstu'ut yø jaa'y!

Winets ja miku' tyiknaxkidaajky ja jaa'y jøts ja ttawaajch ja jaa'y, nika'ap ja sa ttuun.

³⁶ Ni'ijtyi ja jaa'y yjantyimchø'jkidøø jøts ja xem yam ñawayjnidøø:

—¿Ti kajpxy ti ayuujk yø jade'en kyajpxy? iMøjta'aky yø t'ane'emy yø miku' jøts yø jaty chøø'gi!

37 Ja Jesús idø'øn yik'aawip yik'ayuuujkip øy maðsoo.

Ku ja Jesús tyikmøpkiky ja Simón Pedro tyakmøjt

38 Xjats ja pyidsiim jam tsaptøjkjotp jøts ja ojts ñijkxy jam Simón tyigam, jamts ja tyøjkii'ñ. Pøjkip tamik ja Simón jam wyinaty ja tyakmøjt, janty-imyjøn'oo'kp ja wyinaty. Winets ja Jesús yiknimaay jøts ja ttu'unt ja may'ajt jøts ja t'ext.

39 Jøts ja ojts t'ixy, ojts ja ñaxkøy ma ja pamaa'y jam wyinaty, jøts ja møk twingugajpxiyii'ñ ja jøømba'am, jøts ja jaty'i wyinaajky, jøts ja jaa'y nay jaty'i tyanaagyukiyii'ñ, jøts ja kø'øm t'ejxpinaxwa'aky ja kaaky ja jii'kxy.

Ku ja Jesús tyikmøpkiky ja maabyamaa'y

40 Kuts ja xøøw yjaxnaa, winets ja Jesús ojts yiktaninijkxy ja maabyamaa'y pønyty jam sagasa jajtp; jøts ja ojts tu'uk tu'uk tkønixajy, jøts ja jade'en tyiktsokijxy.

41 Nay jamts ja winaaginmidi pøn ja miku' ttawajtsidøø nayide'en, jøts ja yjanchnømdi møk:

—Dios U'nkxi mets.

Jøts Jesús ja møk twingugajpxiyii'ñ, ka'ap ja tyikjaty jøts ja kyajpxtit, pø ñijaa'widipxi ja' jøts ku ja' Cristo.

Ku ja Jesús kyajpxwa'kxy jam Galilea

42 Xjats ku xyiijndyaajky, jøts ja Jesús chøø'ñ kajpjotp jøts ja ñijkxy jam ma pøn kya'ity. Jøts ja mayjaa'y ja yjanch'ixa'ay jøtsnim ja yikpaajty ma ja jam wyinaty. Yikta'anwyandip idø'øn ja', ka'ap ja tmajtstu'utwa'andi jøts ja choont,

43 yide'ents Jesús ja ñimaajydøø:

—Nayi nnigajpxwampy øts ja Dios y'øgyajpxy y'ømyadya'aky o magajp, pø ja'agøjpxxi ø tø nyikexy.

44 Jøts ja Jesús jam jade'en kyajpxwa'kxy ma jaty ja tsaptøjk jam Galilea.

5

Ku ja ajkx may'ampy yikma'aky Jesús myilagri'ajtingøjxp

1 Tuk'oijk idø'øn ja Jesús jam yikpaajty mejy agø'øm ma txøøwi Genesaret; jamts ja mayjaa'y ja ñimejniyøø jøts ja t'amidodukwa'andi ja Dios y'øgyajpxy y'ømyadya'aky. Janch yik'atejmujknipst idø'øn ja Jesús jam wyinaty

2 ku ja t'ejxpaajty majtsk ja barki tawa'ats jam nøø adsay agø'øm, tø ja ajkxmaakpi jam wyinaty pyidsømgøxti, jam tya'ajkxmaajk ja wyinaty tpujti.

3 Winets ja Jesús tu'uk ja barki ttatøjkii'ñ midi ja Simón yja'ajtpy jøts ja tnimaay wan tnyikjiwa'aky waani jøts jam wingon kidyimdya'ant møøt ja tsayjoojt. Jøts ja jam jade'en y'ixaajky, jøts ja jam tyik'ixpøjktøjkii'ñ ja mayjaa'y.

4 Xjats ku ja kyajpx'abajtyii'ñ jøts ja tnimaay ja Simón:

—Yiknøjkx yø barki jam ma yø nøø køjnkjawi, jamts xniwejtspattit yø mda'ajkxmaajk.

5 Jøts ja Simón t'adsøøy:

—Windsøn, tuktsunaxy øø tø njanchjatuñ, ni tu'ukts øøts n'ajkx tø ngapaaty; nøøwejtspatp øts inet yø nda'ajkxmaajk jadigojk, pø tøxi me mwā'añ møk'ampy.

6 Jøts ku ja jade'en ttundøø, may ja ajkx ja ojts tmatsti, janch køøtswambim ja tya'ajkxmaajk ja'adi.

⁷ Winets ja tmiyamdøø ja myigu'ukti pøn jam wyinaty jade'upki barkijotp jøts ja pyudøkiyidit. Nøjkxti dø'øn ja jam, ojts ja barki ja majtsk tyik'ujtskøxti øy ja yjawi yjanchkøjnktøjkinidit.

⁸ Xjats ku ja Simón Pedro ja ojts jade'en t'ixy, winets ja twinguxanaay ja Jesús jøts ja tnimaay:

—Windsøn'ajtín, majtstutk øts, ka'ap øts yø xpaat'aty jade'en, pojkpitumbi jaa'y øts.

⁹ Janch tsø'jkiñip idø'øn ja Simón wyinaty jøts nayide'en ja myigu'ukti, ja'agøjxp ku ja ajkx ja wyinaty jadine'en tø tma'akti.

¹⁰ Nayi tsø'jkips idø'øn ja Jacobo møøt ja Juan, ja Zebedeo y'una'jkti pøn ja Simón møøt ñamyigu'uk'atyiyi. Jøts ja Jesús tnimaay ja Simón:

—Kidi mdsø'øgi, ixyamyi nduknijawidit sudso jaa'y ja nitso'ok'ajtin tpaatt.

¹¹ Jøts ja byarki ja jam nøøba'am tyikja'attøø, jøts ja jamyi tnikakøjxtøø tuki'iyi, jøts ja tmøødidøø ja Jesús.

Ku ja Jesús tyiktsø'øky ja jaa'y pøn jadi'iñi putsniip

¹² Kuts ja Jesús jam wyinaty tu'ukpi kajpjtøp, winets yja'jty tu'uk ja jaa'y, møj pu'uts pa'am ja øjkip, jøts ku ja Jesús yik'ejxpaajty jøts ja twinguxanaay. Jamyi ja ñamyujtstaa'jktøø jøts ja tminuu'kxaa'jky, yide'en ja tnimaay:

—Teety, mmøøt'ajtpy mets ja møk'ajtin jøts ø xyiktsø'okt, yiktsokts øts mdsøjk'ajtingøjxp.

¹³ Jøts ja Jesús ja ojts tkønixajy, yide'en ja tnimaay:

—Ndsøky'ajtpy øts jøts mdsø'okt, tsokni.

Ja'ayi ja jade'en wyaañ, jatyi ja pu'uts wyinajky.

¹⁴ Xjats ja Jesús møk'ampy tnimaay ja jaa'y jøts kidi ja pøn ttukmadøy. Yide'en ja tnimaay:

—Jamyi dø'øn mnøjkxt jam teety wyindum, jamts xpikta'akt ja myojxin midi ja Moisés ñi'ana'am, ja'agøjxp ku tø wya'ach ja mbu'uts. Jade'ents ja jaa'y ja t'ejxtit tñijawidit jøts ku tø mdsø'øky.

¹⁵ Yikmøjpiktak'adøtsp idø'øn ja Jesús, may ja jaa'y ja ñimen'adi'ichiyi, namay ja ñamyukyidi jøts ja pyatmadøyi, jøts ja tñankyiktsø'okwa'añidi ja pya'am.

¹⁶ Ja Jesús jam ja ñijkxy mā abak et mā niti kya'ity, jamts ja Dios Teety t'ajot'ajty.

Ku ja Jesús tyiktsø'øjky ja koxujxpi pakxujxpi

¹⁷ Tuk'ojk idø'øn, jam ja Jesús wyinaty yik'ixpiky, jamts idø'øn ja fariseotøjk møøt ja kajpxwejpitøjk wyinaty chøønidi wine'enin ja wyinaty tø choondi o magajp, pømbi mendip Galileit etjotp, Judeit etjotp, jøts Jerusaléngit etjotp; ku ja Jesús tñankyjay'ijxyi ja Dios Teety myøk'ajtin ku ja pamaa'y ja tyiktsø'øky.

¹⁸ Winets ja jaa'y tkiiyja'jttøø tu'uk ja pamaa'y pøn koxujxp pakxujxp, jøts ja jap tøjkjøtpy tyiktøkiwya'andi jøts ja ttawingugii'yidit ja Jesús.

¹⁹ Nima'ts kya'awa'adsi mā ja tøkidit kumi janch mayjaa'y jam wyinaty. Xjats ja tøjkiixpy pyajttøø, jøts ja ojts tnikidyu'utti ja tøj, japts ja tyikwinajktøø ja pamaa'y jøts ja ttawingugii'yidøø ja Jesús jap mayjaa'y agujkpy.

²⁰ Kuts ja Jesús ja ojts jade'en t'ixy kudam ja amumdu'uk ja yjanchja'win tjagyapti, jøts ja pamaa'y ja tnimaay:

—U'nk, nbøkmyee'kxpy mets.

²¹ Winets ja wyinmaadyøjkidøø ja kajpxwejpitøjkti møøt ja fariseotøjkti, yide'en ja wyinmaydi: “¿Pøn yø jaa'y jade'en, tigøjxp ku Dios yø jade'en

twingajpxnaxy? ¿Pøn ja pøky ya t'ukmaa'kxp, kidi tu'ugyip Dios pyo-
jkpimee'kxy?"

²² Wa'ats ja Jesús ja tñijawi sa ja wyinaty wyinmaydi, jøts ja tñimaay:

—¿Tigøjxp ku jade'en mwinmaydi?

²³ ¿Ja ti ne'egi jawaani jajtni, kuts yø pa'amjaa'y nnøjmit, "Mee'kxpy øts
yø mbøky", ad' ku nnøjmit: "Wa'kuki, pøkmukni yø mmaabajt jøts nøjkxni
mdigam"?

²⁴ Ixyamnim meets inet x'uk'ext mabaat øts idø'øn ja møk'ajtin nmøø'taty
ya naxwiin jøts ø nmaa'kxt ja pøky.

Xjats ja tñimaay ja køxujxpi pakxujxpi:

—Pidøkni, wa'kukiñi, wejtsjøk yø mmaabajt jøts mnøjkxnit mdigam.

²⁵ Jaty ja køxujxpi pakxujxpi pyidi'jky, jøts ja tyanaagyukiyiñ jam mayjaa'y
agujk. Wyejtsmujk ja myaabajt ja' mā ja jam wyinaty kyo'kni, jøts ja
nøjkxnaa tyøjkwindum, møk ja Dios ja ttamøjawi.

²⁶ Jøts ja ñigyumaap tja'widøø ni'ijtyi, ojts Dios ja ttukmøjawidi
ttukunuu'kxyjawidi, yide'en ja wyā'andi ja ñichø'øgi adøtsni:

—Ixyamnim inet ja tøn'ijxyindi midi niwindi kayik'ejxpnim.

Ku ja Jesús tpawaay ja Levi

²⁷ Ku ja jade'en y'ukajty, xjats ja Jesús jam pyidsiimy, ojts chøøn jøts ja
t'ejxpajty tu'uk ja yikugubajtpi, jam ja wyinaty chøøni mā ja ttukugubety
ja jaa'y øy tyii'ji, jøts ja tñimaay:

—Møødik øts, møøt widejtk øts.

²⁸ Winets ja jaty tyanaagyukiyiñ, jøts ja tuki'iyi tum jam tnikakijxy, jøts
Jesús ja tmøødiyiiñ.

²⁹ Jøts ja Levi xøøw ttuun jam tyøjkwindum jøts ja twindsø'jkiiñ ja Jesús,
mayts ja yikugubajtpi jam wyinaty møøt jadu'ukpi jaa'dyi. Jade'en ja jam
møøt twindsøønidi ja kaabayt.

³⁰ Xjats ja fariseotjkti møøt ja kajpxwejpitøjkti tpağajpxnibøjkidøø ja Jesús
pyabøjkpi, jøts ja tñimaadyøø:

—¿Tiku meets yø xmøøtkay yø yikugubajtpitøjkti møøt yø ka'øyjaa'dyi?

³¹ Winets ja Jesús y'adsøøy jøts ja tñimaay:

—Pøn tkaja'widip ja pyā'am, ti tsøøyibi ja t'ukyikwa'andit. Ja' ja
tyik'amaadyaktip pøn pamaa'dyi, pøn pyā'am tja'wiy'ejtipp.

³² Kidi ja'ajjpts ø tønimiñ pøn niwine'en kanabyøkyja'wiyidip. Ja' ø tønimiñ
pøn tja'widip ja pyøky jøts ku ja pyøkmøødidi, jøts tyiktigatstip ja
chinaa'yindi.

Ku ja Jesús yiktiiyiky tigøjxp ku ja kya'ayuu'atti

³³ Xjats ja tiibyøjktøø ja Jesús jøts ja tñimaadyøø:

—¿Tiku yø mbabøjkpitøjk janch nekim kyaydi tyøjxkti, jøts yø Juan yja'
yjanch'amaay'atti møøt yø fariseotjkti? Ni kyakaydi kyajøø'kxti, janch
tsapkajpx'ejtipp yø'.

³⁴ Winets ja Jesús t'adsøøy:

—¿Mā meets jade'en tøn'uknijawi jøts ku tø'øxy ñigaabyi tø'øxy ñi'ukpi
winet y'amaay'atti winet kyakaydi kya'uukti ku ja jemyaa'y jamni?

³⁵ Abikñimts ja tiemp' tyimija'tmit ku ja jemyaa'y wyinaty kya'uk'ejtni ku
ja jam wyinaty tøn'oni; jaanimts idø'øn tiy pøn kya'ukaaniit kya'uk'uknit,
jaanim idø'øn ja y'amaay'attit.

³⁶ Jøts ja nay ja'agøjxp ya'at ttanimadyaktøjkiiñ:

—Ka'axi pøn wyetpach tta'agiyi jemwyet midu tyimyjemñim, ku ja jade'en yiktu'unt jøts kumi mujkpi ja jemwyet jøts ja tjaaktyimgyøø'tsni ja wetpach, jaaktyimyiwenip ja kyøøts'ajntin ja'.

³⁷ Jøts ka'ap pøn vino tta'adami po'duk midu namii'kxñim, ku ja jade'en ndu'unint jaty'i ja tyikmigøødsi ja po'duk, windigøøpyts tuki'iyi, windigøøpy ja vino, windigøømyipts ja po'ak.

³⁸ Paty ja vino midu ñamii'kxñim nda'ada'amyin ja jembyo'ak jøts jade'en nimidi kyawindigøø'ty.

³⁹ Nayide'ents ka' pøn t'uukwa'añ ja vino midu namii'kxñim. Pøn tø t'uukyujni ja vino midu jekyip mii'kxñi, xumi ja' ja chøjkpy, kumi nømp ja tukajpxy: "Yø jekyip mii'kxyip tyimyo'y, ka'ap yø midu tmi'abaaty."

6

Ku ja Jesús ttøjtøø ja ariin yam poo'kxin xøøw

¹ Poo'kxin xøøw idø'on, winets ja Jesús jam wyinaty ñaxy jam kamjotp møøt ja pyabøjkpitøjk, ja'ats jam wyinaty ttøjtíp ja ariin tøøm; jøts ja twixatsti ja ariinbajk jøts ja tjøø'kxti.

² Jøts ja fariseotøjk winaaagin yiktøøjidøø, yide'en ja yiknimaadyøø:

—¿Tiku jade'en m'adøø'tsti midu ka'ap pyaat'aty yiktu'unt poo'kxin xøøw?

³ Xjats ja Jesús y'adsøøy:

—¿Ka'aním meets ja Dios kyajpxy x'ijxy midu tñigajpxp sa ja David tuk'ojk tmøøt'adijch ja myigu'uk ku ja wyinaty yjantyimyuu'ookti?

⁴ Pø tsaptoøjkøtppyimxi ja tyøjkii'ñi, japts ja tñixajiyi'ñi ja kunuu'kxy tsapkaaky, jøts ja tkaadyøø møøt ja myigu'uk pøn jaty ja jam wyinaty myøøt. Yam ja ka'ap yjapaat'atyidi jøts ja tka'adyit ja'abi tsapkaaky, ja teetyøjkti ja paat'ajtidip kya'adyip.

⁵ Nayide'ents ja wyaañ:

—Ngudanaapy øts ja naxwii'ñit jaa'y, jøts øts wamp ti paat'ajtip kapaat'ajtip yiktu'unt ku poo'kxin xøøw.

Ja jaa'y pøn ja kyøø'jadi'iñi tøtsniøp

⁶ Jadu'ukpi poo'kxin xøøwts idø'on ja'agøjmyi ku ja Jesús tyøjkii'ñi jam tsaptoøjkjotp, jamts ja yik'ixpøjkøjkii'ñi. Japts wyinaty tu'uk jaa'y midu y'aga'ngyø' xujxp;

⁷ Jøts ja kajpxwejpitøjk jam tpa'ejxti tpagowdi ja Jesús, ja' ja y'ejxwandip pøni y'ukyiktsøkpy idø'on ja pamaa'y ja' ku poo'kxin xøøw, jade'ents ja tni'øøniwya'andi.

⁸ Ti wa'ats ja tñijawi sa jaty ja wyinaty wyinmaydi jøts ja jaa'y ja tñimaay midu wyinaty kyøø' xujxp:

—Tani, jøts ixem nøjkx mdani kujk'am.

Jaty ja jaa'y tyanaagyukiyi'ñi jøts ja jam ñijky tanaabyi.

⁹ Winets ja Jesús tñimaay ja mayjaa'y:

—Nyiktøø'dip nyik'amido'odip inet yam: ¿Midi'ibi ndu'unimp ku poo'kxin xøøw, midi'ibi kutuky ku n'ødyu'unint u ku nga'ødyu'unint? ¿ku nyiktsoojkint u ku nyik'o'jkint?

¹⁰ Jøts ja twin'ejxkijxy pøn jaty ja jam wyinaty ttamujkiyip, jøts ja tñimaay ja pamaa'y:

—Xajtøw.

Tsoojk ja' jøts ja xyajtiy.

¹¹ Jøts ja yjadu'ukpi jaa'y yjanch'ambøjktøø, jøts ja xem yam ñawyajnidøø, agøømyi sudso'ampy ja tjadyim'yukyikpøky'a'adit ja Jesús.

Ku ja Jesús twiwijch nimakmajtsk pøn wyinaty kyudanaabyi'atwampy

12 Winet ets ja Jesús ñijkxy Dios'ajot'ajtpi jam kojpkøjxp, jam ja Dios Teety ja tmigajpxy tuktsunaxy.

13 Jøts ku xyiijndyaajky, jøts ja twaadsogijxy pøn jaty ja pabøjkip, jøts ja twiwijch nimakmajtsk pøn ja tyejtíp kudanaabyitøjkti.

14 Ja'ats idø'øn ja'adi ja Simón midí ja xyødejtigajts jøts ja tpiктаajky Pedro; møøt y'uch Andrés ja', møøt ja Jacobo, møøt ja Juan, møøt ja Felipe, jøts møøt ja Bartolomé.

15 Jam ja Mateo, Tomás, Jacobo pøn ja Alfeo myajnk'ajtpy; jøts ja Simón ja cananista;

16 jam ja Judas ja Jacobo y'uch; jøts ja Judas Iscariote, pøn wyinaty tkøyakwamp ja Jesús.

Ku ja Jesús tyik'ixpijky ja mayjaa'y

17 Xjats ja Jesús tmøøtkidaajky ja kyudanaabyitøjk, jøts ja tmøøtja'jty jap jøyjøtpy niduki'iyi møøt ja pyabøjkpitøjk; nay jam wyinaty øy pøndi pøn jaty tso'ondip jam Judea, jam Jerusalén, jøts jam mejy agø'øm jam Tiro jam Sidón. Ja' ja jam wyinaty tønimendi jøts ja tpatmado'odit ja Jesús, jøts ja pyamaa'y ja tnankyiktso'okwa'añidi.

18 Winaagin jam pøn ja miku' tø tyatøkiyidi, tsokøxtits ja'.

19 Jøts ja jaa'y ni'lijtyi tnixajiwya'andi ja Jesús. Pyaatwandip ja' ku ja ttuktatsø'øky ja myøk'ajtin ja pamaa'y.

Ja xondaajkin jøts ja ayo'owin

20 Winets ja Jesús y'ejxi'jky mā ja pyabøjkpitøjk jam wyinaty jøts ja tnimaay:

—Tya'øy'ajtidip ja' Dios kyunuu'kxin pøn ja y'amutsk'ajtin yja'wip, ja'ats pyaattip ja Dios kyutujk midí ja tyanitanaapy ja yjaa'y.

21 'Nay Dios ja tkunuu'kxp pøn yu'oo'ktip xø'oo'ktip, ja' ja tyiknajxkøjxp.

'Jøts pøn yaxtip jiidyip, kunuu'kxy Dios ja nayide'en yik'ityidi, ja'ats ja ttukpaadidip ja xondaajkin.

22 'Mgunuu'kxip meets Dios øy meets ja jaa'y mjamidsep'atyidi øts køjxp, øy ja mjabawøpyidi, øy ja mjaga'ømyigajpxyidi, øy mjagayiktsokti, øy mxøøw mguya'axy kamadøyim yjayikjawidi ja'agøjxp ku ø xpabøkti.

23 Kidits m jotmay'ookti, kidi x'ayoojidi, japnim ja tsajpjøtpy mwingaxø'økxiyidit; pøn jade'en mduujnidip, yø jade'embí jaa'y tyeety'ap tka'ødyundøø nayide'en ja Dios kyugajpxtyi.

24 'Jøts mjanch'ayøøy mee kumeeñ jaa'y, yaayi meets iiy jotkujk mdsinaagyotji.

25 'Mjanch'ayøøy meets pøn tum jaa o ti tmøøt'ajttip, mjanch'ayuu'ajttip mjanch'axøøw'ajttip meets nøjxk.

'M'ayøøy meets pøn yam agujk jotkujk yiknajxtip, mdaya'axtípts meets ja mwinmaa'ñ jadigojk.

26 'M'ayøøy meets ku mee myik'ødyijy myik'øñøjmi, pø nayide'ents ojts yiktejti yik'ødyejti pøn ojts nugo ñadyijyi ja Dios kyugajpxy.

Paat'ajtip jøts ja mmidsep yikmijotjimbett

27 'Ni'lijtyi madowdi wine'enin mja'atti: Tsokti miyuju'y'atti ja mmidseptøjki, pudøkidi ja' pøn mjagatsojkidip,

28 amidowdi ja Dios jøts tkunuu'kxt ja mmidsep pøn o sagasa mnimaajyidip, ku'amidowi pøni pøn mmi'ambøjkidip pøni pøn sagasa mdunwajnidip.

29 Pøni mgojxip mdse'ekip, ja' øy ku xmaa'kxuktit; jøts ku pøn mbøjkxidit ja yukwop, jaaktyimyo'odipts ja mnijan.

30 Kidi kanajtsjawim xjawidi ku tigati myik'amidowdi; jøts kidi jatyi o pøn xamatsti ku pøn o ti tønixaji.

31 Kidi meets ja jawyeen jade'en xjöp'ixy pøni sã mee xjatsøky, meets idø'øn mbaat'ajtip jawyeen mnajstunip sã dø'øn ja yjawi tsoktin jøts meets ja jade'en xu'unt.

32 Øy meets ja'ayi møøt mjanamyaawya'añiyidi pøn mee møøt mnachøkyiyi, çti øy'ajtints meets jade'en mdumpy? çTi ja' ja ka'øy jaa'y kyajajtip? Pø tyundixi ja nayide'en.

33 çTi øy'ajtin meets jade'en mdumpy øy meets ja'ayi xjamay'aty pøn mee nayide'en mdunxixiyip? Pø tyundixi ja ka'øy jaa'y ja nayide'en.

34 Uk ja'ats meets o tigati mduk'anuu'kxpy pøn mee m'a'ejxip tyikwimbetp jawaani mayjawi, çti øy'ajtints meets jade'en mdumpy? çTi ja ka'øy jaa'y ja jade'en tka'anuu'kxyajktip o tigati ja yja' jøts ja myiga'øy jaa'y ja nayide'en ttukubatti jawaani may?

35 Ka'ats meets idø'øn xmidsepøkt ja mmidsep, tsokti xmiyujy'attit, mdunip meets ja may'ajt ja'. Øy meets ja tigati xuk'anuu'kxt jadi'iñi, kidits meets ja xjöp'ixy'aty jøts ja mmigubajtxidit jawaani møj jawaani may. Møjts meets ja myikwimbetxixiyidit, ja Dios Teety tsajpøtpyit jade'en meets ja m'u'nktejyit; ti sã ja Dios Teety tmi'øy'aty nayide'en ja ka'øy jaa'dyi ja nanyikaxi jaa'dyi.

36 Mja'myatstip meets jøts mba'ayo'odip o pøn nayide'en sam ja Dios Teedyin ja tpa'ayøyin.

Kidi pøn o ti xawindsø'ødyi

37 'Kidi pøn nugo o ti xapøky'ejxti, jøts Dios ja nayide'en mgapøky'ejxidit. Maa'kxukti, jøts ja Dios nayide'en mmaa'kxukidit.

38 Mo'odi o ti pøn, winets o ti nayide'en mmo'ojidit ja Dios. Nayide'en meets ja mmo'ojit mgamo'ojit pøni sã meets ti xyaky xkayaky møj may o ti. Nayide'en meets ja Dios mdunit pøni sã meets mmigu'uk xuñ. Nay ja'ats ja yik'awetsp.

39 Xjats ja Jesús ttanimadyaktøjkiyii'ñ jadu'uk ja madya'aky, yide'en ja wyaan:

—çMa ja winap jaa'y tøn t'uktuu'niway ja myiwinap jaa'y? Pø namajtskxi dø'øn ja tyimgyunaxtit ku et'aaw ja ma tpaattit.

40 Uk kuts pøn, pøn tni'ixpøjkimiyidip o ti tunk, ka'axi mibaat twinaxtit ja yik'ixpøjkpidi; pø wan idø'øn jaanim wyinaty.

41 'Jøts meetsmi, çsudsø dø'øn ja mmigu'uk pyøky x'ejxpajtiyi jøts ja mja' ne'egi xka'ixy kudam ja jawaani møj?

42 Jøts, çsudsøts mets idø'øn nanyikajxibim xkajpx'øyiwy'añ yam mets ja mdsinaa'yin øy xkayikyø'øy? çMeets win'øø'mbi ataadyi! Yik'øyiidi jawyeen ja mga'øchinaa'yindi, winetnims ja mmigu'uk chinaa'yin xkajpx'øyiyidit.

Pøni sã wyimbidsimy øy ti, ja'ats tyikwingaxø'kp pøni sã ti y'øyi kya'øyi

43 'Ma meets øcha'amguipy tøn x'uk'ixy jøts ku ja tyiktøømi ja ka'øcha'am; uk ja ka'øcha'amguipy tyiktøømi ja øcha'am, nima.

⁴⁴ Ja tyøøm ja kipy yikta'ejxkajp pøni sã ja tyøømi øy ka'øý: ka'axi ja iigi tsa'am yikwiduky kujp kipkyøjxp, ni jam ja uvi tsa'am kyawinaky jam kujp aatskøjxp.

⁴⁵ Jade'ents idø'øn ja øyjaa'y pøn øyjaa'y, ka'ap ja t'aawí tjoojti ja ka'øýbi winmaa'n, ka'ap ja yjemwa'añ tyewa'añ kumi øyjaa'y ja!; pønts ka'øýjaa'y'ajtp ja ka'øýbits ja y'aawíp yjoojtip, yjemwa'andi tyewa'andi kumi jam idø'øn ja tyimyøðidi ja kya'øý'ajtindi y'am yjotp. Tum jam ja pyidsømguixy jøts ja tkajpxnaxti jade'en.

Majtsk jøøjp ja pøch kyojpk

⁴⁶ Niti øy'ajtin meets jade'en xkatuñ ku mee xjanøjmi, "Nwindsøn'ajtim, nwindsøn'ajtim", jøts ka'ats xpadundi pøni sã njawa'añ.

⁴⁷ Yã net ndukmado'odit pønín ja kyaxø'økti ja jaa'y pøn ø xnimemp jøts øts n'ayuujk ja xpatmadoojidi, jøts ja jade'en tpadundi sã nwa'añ:

⁴⁸ jade'enin idø'øn ja nbiktaajkin sam ja jaa'y tyøjkøjyín, jawyeen ja køjnk øy øy tñidajiyii'n ja tyøjk, jøts ja tsaã ja amuum ttukpøchkojpk'ajty. Xjats ku ja nørøgom jam wyinajky, aguwaní ja tyimykjø'jtjø'økwa'añ ja tøjk, jøts ja niwine'enin nisã tkatuuñ, kumi tsaã ja wyinaty tyeky'ajtpy.

⁴⁹ Pønts ø xjapatmadoojidíp ja n'ayuujk jøts ka'ap jade'en tpadundi sã nwa'añ, ja'ats idø'øn jade'endi sam ja jaa'y midí tyøjk tkoj xixñaxkijxy. Niti ja tkadukpøchkojpk'ajty, jøts ku ja møj nørøgom jam wyinaajky jatyi ja tmimajadaajky, ojts ja tyikiday jøts ja tyimyikudigøøy.

7

Ku ja Jesús tyiktsø'øky ja romanit soldadi ja tyumbi

¹ Xjats ku ja Jesús jade'en tñimaagyijxy ja jaa'y, winets ja ñijkxy Capernaum.

² Jamts wyinaty chøøni ja soldadi windsøn, romanit jaa'y ja!. Jamts tyumbi ja tu'uk midí ja janchkamajststu'udyim yja'wíp, møwa'añ ja yjançpiky, ookwaníp ja wyinaty.

³ Ku ja soldadi windsøn tñimadøøy ja Jesús, winets ja ttaniguejxy winaagin ja israelit møjaa'dyøjkti, jøts ja t'atstuk'amidoowa'añ ja may'ajt, wan tmiñ ja Jesús jøts cho'økt ja tyumbi.

⁴ Xjats idø'øn ja tñinøjkxtøø ja Jesús jøts ja ojts t'amidowdi ja may'ajt møk'ampy, yide'en ja tñimaadyøø:

—Paat'ajtip xpudøkit yø soldadi windsøn;

⁵ kumi chøjkpy yø' adøm ngajp, nayø'øts tø tñi'ane'emy jøts ja tsaptøjk tø kyøjy.

⁶ Winets Jesús ja tmøødiyii'n. Jøts ku ja jam wyinaty yja'atwanidi ma ja tøjk jam, jøts ja soldadi windsøn ttukjøpkubajtiyii'n pøn jaty ja minamyaaajyip, jøts ja ttuknimaay ja Jesús:

—Mets teety, kidi xka'øyjawi, ka'ap ø xpaat'aty jøts mets yã mdøkit ndøjkjøøjtjy;

⁷ paty ø kø'øm tø nganay'a'ejxiyi jøts mets jeexyip kø'øm tø n'ats'ixa'ay. Ana'am ja'ayi, jøts øts ja ndumbi cho'økt.

⁸ Ane'emy ø nayide'en nwindsøn xyik'ity, nay ja øts ndumbitøjkmidi pøn ø n'ana'amidip. Ku pøn nnøjmi: "Nøjkk", nøjkkxpts ja!. Uk nnøjmits øts yø ndumbi o ti, jatyiys yø jade'en tpaduñ.

⁹ Ja'ayi Jesús ja jade'en tñimadøøy ñigyumaap ja tja'wiyii'n ku ja jaa'y jade'en, jøts ja tñiwa'akjimbijty pøn jaty ja jam wyinaty payø'øyip, jøts ja tñimaay:

—Tyimyjanch, ni Israelit jaa'y øts ya ma jade'en ngapaadynim sam ya'at jaa'y tmøødin ja janchja'win møk'ampy.

¹⁰ Jøts ku ja waabi yja'ttøø møøt ja jøpkuyø'øyibidi jam tøjkotp ma ja pamaa'y jam wyinaty, tødamik ja wyinaty myøkpojki ja pamaa'y.

Ku ja Jesús tyikjujkyiky ja ku'økyø'øxy myajnu'nk jam Nain

¹¹ Ukjajts ja jade'en, xjats ja Jesús ñijkxy jam ma kajp txøøwi Nain, mayjaa'yts idø'on ja jam wyinaty pawidejtíp, may ja pyabøjkpítøjk ja jam tmøødi.

¹² Kuts ja yja'jty jam kajpwingon, jøts ja ojts t'ejxpaaty tu'uk ja oo'kpi yikpagi'y jøts ja y'atsnaxøkit, tu'umchi dø'on ja tø'øxyøjk ja tu'nk'aty, jøts ku'økyø'øxy ja'. Mayts ja yik'oo'kpi pidø'kpi jamdi.

¹³ Jøts ku ja nwindson'ajtim ojts t'ixy ja ku'oogi, yik'ayo'ijxyim, jøts ja tnimaay:

—Amon, kidi mya'axy.

¹⁴ Winets ja Jesús twingunøjkxyi'ñ ja oo'kpi, jøts ja kajuun ja tnixajiyi'ñ, jøts ja oo'kpi kibiya ja tkii'dyaktøø, jøts ja Jesús tnimaay ja oo'kpi:

—Mets u'nk idø'on nnimaapy: ¡Pidø'øk!

¹⁵ Xjats ja kyu'xkukiyi'ñ pøn idø'on wyinaty tø y'øøky jøts ja kyajpxpinibøjkxyi'ñ, xjats ja u'nktaak ja yiktagidøjkxyi'ñ ja y'u'nk, ja Jesús ja kømøøjyiyip.

¹⁶ Jøts ku ja jade'en niduki'iyi t'ejxtøø, jøts ja yjanchø'jkidøø, jøts ja tukmija'widøø ttukunuu'kxyja'widøø ja Dios, nømdip ja':

—Ya Dios ja myøjkugajpxy tø kyaxi'iky adøm njaa'yjøøjty.

Nayide'en ja wya'andi:

—Dios tø tnimiñ ja kyajp jøts tpudøkit.

¹⁷ Yiknija'wigyøjx ja jam wine'enin ja jaa'y jam chøønidi jam Judeit etjotp, ku wyinaty ja Jesús tø tyikjujkyiky ja oo'kpi.

Ku ja Juan Bautista tkexy ja kyugajpxy

¹⁸ Xjats ja Juan Bautista ja tnija'wiyi'ñ, nayide'en ja pyabøjkpi ja wyinaty tø tyamimadya'agiyyi, winets ja tyaa'jxyi'ñ namajtisk ja pyabøjkpi,

¹⁹ jøts ja ojts ttaniguexy ja Jesús, jøts ja t'atsyiktø'ødit pøni ja' idø'on janch Cristo pøn wyinaty menwamp yiknitsokpi. Uk kidi ka'ats, winets ja abikpyi ja tjøp'ejxtit.

²⁰ Jøts ja wingon twingunøjkxidøø ja Jesús pøn ja Juan wyinaty tø tyaniguexyidi, jøts ja tnimaadyøø:

—Ja Juan Bautista øø tø xkexy jidsik øø nyiktø'øt pøni janch ja Cristik mets idø'on midi yiknigajpxp menwamp yiknitsokpi. Pøni ka'ats, winets øøts jadu'ukpi njøp'ext.

²¹ Ku ja wyinaty tø yja'atti, winets ja Jesús nay jatyi tyiktsøøjky may ja jaa'y pømbi pa'am pøjkidip, pømbi o ti ja'ambi tmøøt'ajttip, pømbi ja miku' tmøøt'ajttip, ñayikwin'ejxwa'kxmip ja' ja may winap jaa'y.

²² Jøtsnim ja y'adsojimbijty jøts ja wyaañ:

—Nøjkxti jøts xukmado'odit ja Juan ti jatyi ya tø x'ejxti xmadowdi. Tamimadya'akti jade'en sa yø winap jaa'y wyin'ejxwa'kxti, sa yø pak-pamaa'y yø'ødyi, sa yø putspi cho'okti, sa jatyi yø nat jaa'y myadowdi, sa oo'kpi yjujkyøkti, jøts sa ayoobi jaa'y yiktukmadowdi ja øgyajpxy ja ømyadya'aky midi yiknitsokp.

²³ Ejtni xoni ja'adi pøn ø xmi'bøjktip, ka'ap twinmayimbettit twinmay'adøjtít sats ø xjanchjawidi.

24 Xjats ku ja wyimbejtnidøø midi ja Juan wyinaty tø tkexy, jaats ja Jesús ttamimadyaktøjkiyi'i'n ja mayjaa'y, ja Juan yiknimadyakp, yide'en ja wyaañ:

—¿Ti meets ojts x'ats'ixy jam abak etjotp? ¿Tu'uk ja jaa'y midi jade'en ejxim kapy midi poj yik'ø'y'imbejtíp yik'ø'y'adøjíp? Ka'axi ja yjade'eni, pø tu'ukyixi tmi'ity ja wyinmaa'n.

25 ¿Tits idø'øn ojts x'ats'ejxti? ¿Tu'uk ja jaa'y pøn janch øybi wet tø ñadyaxoxiyi? Pø wa'atsxi mee xnijawidi pøn tsuj wet nadyaxojxidip, pøn nekim taxondip pyikta'aky, jamts ja ñachojk'ityidi jam windsøn tyøjkjotpti.

26 ¿Tits idø'øn mjanch'ats'ejxtøø? ¿Tu'uk Dios kyugajpxy? Janch ja', ja' midi jawaaani møj, nika'ap yjade'eni sam yjadu'ukpidi.

27 Yø Juan idø'øn yiktejp ku Dios kyajpxy yide'en wyaañ:

Íxya ngajxjawyeni tu'uk ja nngugajpxy, pøn tyiktøjíp tyiktuudaajkip ja jaa'y wyinmaa'ndyi jøts myikupøkt ku ixpøjkin xminøjkt.

28 Ndukmadoodip ixyam jøts ku ni maðsoo ka'ap pøn jade'en pyidsimñim ja Dios kyugajpxy sam yø Juan Bautista; pøni pønts øts nja' xpaduujnip jøts ku tyøki ma øts ngutujk ndanitanit ja njaa'y, ja'ats ne'egi møj yikpiktakp jøts nika'ap ja Juan Bautista.

29 Jøts ku ja jaa'y ni'ijtyi jade'en tmadoodøø pøn jaty wyinaty tø yiknøbetyidi ja Juan, nayide'en ja yikugubajtpidi, jøts ja tjanchmibøjktøø ja Dios jøts kudam ja ka'ap jade'en mibaat wyinmaamy'a'aty;

30 ka'ats ja tmøjpiaktøø ja fariseotøjkti jøts ja kajpxwejpitøjkti sà Dios ja wyinaty tø tyamidsøkyidi, jøts ja ka'ap tkupøjktøø jøts Juan ja yiknøbatidit.

31 Jøts ja nwindson'ajtim wyaañ:

—¿Pønxi øts jade'en meets n'uktami'ejxip?

32 Jade'en meets ndami'ejxi sam mutsk una'jkindi muum y'adø'tstti jap maayjotpy ku myi'una'jk tkagupøjkiyidi ja kyuyajitn midi yjatsøjkpy yjaguyatwampy, jade'ents ja ñawya'añidi: “Tø øø yikxon njaxu'uxy jøts ni mga'atsti; tø øø jotmay'øøgyim nja'øømi, nijade'ents mgajotmay'oo'kmidi.”

33 Kuts ja Juan Bautista tø myiñ jøts ja kyakay kya'uuky ku ja ka'ap vino t'uuky, jøts meets mnimy jøts ku miku' ja myøøt'ajtpy.

34 Jøts ku ø tø njamemi jøts ku ø ngaamyi n'ukmi, jøts mnømididi jøts ku øts janch kaxim ngay n'uuky, jøts ku øts ja møøt namyigu'uk'atyiyi ja yikugubajtpidi møøt ja ka'øyjaa'dyi.

35 Pøni pønts ja Dios yja' tkupøjkip, ja'ats tja'gyukip sam ja Dios yja' ttsøkyin.

Ku ja Jesús jam fariseo tyøjkjotp wyinaty pøn txøøw'ajtp Simón

36 Xjats ja fariseit nidu'uk tnimaay ja Jesús jøts ja tmøødit kaabyi tyøjkwindum. Jøts idø'øn ja ojts tmøødi, ojts ñijxxy, tyøjkiyi'i'n jam fariseit tyøjkjotp, ja kaabyajt twinguwa'jtsiyi'i'n.

37 Winets ja tø'øxyøjk tu'uk pøn ka'øyjaa'y'ajtp midi jam tsinaapy jam kajpjotp, ku ja tnija'wiyi'i'n jøts ku ja Jesús wyinaty tø ñijxxy kaabyi jam fariseit tyøjkjotp, jamts ja ojts tmija'aty ja pa'akxuu'kpi, tsagueegi tu'jtsjotpy.

38 Ñiyaxpim ja twingugu'xiyi'i'n ja Jesús tyeky, jøts ja wyeenøø ja ttuk-taxø'jky. Jøts ja nay jatyi ja wyaay ttawibø'øty jøts ja ojts ttsu'kxy, ojts ja ttabaj'a'axy ja pa'akxuu'kpi.

39 Jøts ku ja fariseo ja ojts jade'en t'ixy pøn ja Jesús wyinaty tø wyayi migaabyi, yide'en ja wyinmaa'n ja jap tyikyø'øy: “Pøni janch Dios kyugajpxy yø jaa'y jeexyip, tø yø jeexyip tja'wyini pøn yø ixa tojnip majtsip, pøni pøn tø'øxyøjk yø', pø ejtpst yø yjantyimpøkyun'ity yø tø'øxyøjk.”

40 Winets ja Jesús tnimaay ja fariseo:

—Simón, nmigajpxwampy.

Jøts ja fariseo y'adsøøy:

—Yinet Windsøn.

⁴¹ Xjats ja Jesús wyaañ:

—Namajtsk idø'øn ja jaa'dyi pøn tmiyoj'ajttip tu'uk ja meeñ'anuu'kxyajkpi. Tu'uk tmiyoj'aty magoxk magø'pxy denario jøts jadu'uk wixijcxmyajk;

⁴² jøts kumi ka' idø'øn ja tkubatti nipøn tkagubety ja yoj, jøts ja meeñ'anuu'xyajkpi ka'ap ja sa tijy øy ja tkagubattit, ojts ja ttamee'kxy ja myiyoj. Nigajpxts inet, çpømbi ja jawaani tsojkip, pømbi ja jawaani taka-jxajkip?

⁴³ Jøts ja Simón y'adsøøy:

—Ja' yjawi pøn ja yoj kajaa tmøøt'ajtp.

Jøts ja Jesús wyaañ:

—Janch tiy idø'øn mwā'añ.

⁴⁴ Xjats ku ja Jesús ojts t'ixy ja tø'øxyøjk jøts ja tnimaay ja Simón:

—M'ijxpxyi yø tø'øxyøjk, ku tø ndøki ya mdøjkjøøjty ka' mets ja nøø tø xmo'øy ja ndekpyujik; tøts øts yø tø'øxyøjk ne'egi xapakpujy ja wyeenøø jøts ja wyaay yø tø ttuktati'ich.

⁴⁵ Ka'ats mets ndeky tø xtsu'kxi, jøts ku yø tø'øxyøjk, jaayip ku tø ndøki ixa øts ndeky yø jade'en xtsu'kxi.

⁴⁶ Ka' mets ngubajk aceite tø xpiktaajkxiyi, tøts øts yø tø'øxyøjk ja pa'akxuu'kpi ndeky xpiktaajkxiyi.

⁴⁷ Paty mets idø'øn nnøjmi, pøni pøn ja tsojkin waani tmøøt'ajtp nayide'ents ja waani yikpojkipimaa'kxt; jøts yø tø'øxyøjk møj ja tsojkin yø tmøøt'aty paty pyaat'aty jøts ja pøky yikmaa'kxkøxt.

⁴⁸ Jøts ja tnimaay ja tø'øxyøjk:

—Nmee'kxpy øts, u'nk, yø mbøky.

⁴⁹ Winets ja migaabyidi pøn jaty ja jam wyinaty møøtsinaayip yjanch-nawyambinaxwā'jkidøø:

—çPøn jaa'y ya'at ndejint, sudso pøky paat yø tnee'kxy?

⁵⁰ Jøts ja Jesús yide'en ja tnimaay ja tø'øxyøjk:

—Ja'agøjxp mets ja mbøky tø nmaa'kxi ku me tø xjanchjawi, nøjknits jotkujk.

8

Ja tø'øxyøjk pøn jaty ja Jesús pyudøjkidip

¹ Tøts ja wyinaty y'uknaxy jade'en, jøts ja Jesús t'ayø'øgyijxy ja kajp ja møj ja mutsk møøt ja pyabøjkpitøjk namakmajtsk, jøts ja tkajpxwa'kxy ja øgyajpxy ja øy'ayuujk midy yjaa'y ja tyanitanaapy.

² Nay jam idø'øn ja yjamyøøt'ajtmiyidi ja tø'øxyøjkmidi pøn ja wyinaty tø tyiktsø'øky, jøts pøn ja wyinaty tø tkajpxpidsøjmi ja miku' jøts ja ttukmajtsu'uty. Ja María dø'øn jam wyinaty pøn yiktejp Magdalena, pøn ja miku' wyinaty niwixujk tø myajtstu'udyiyi;

³ nay jam ja Juana wyinatymi, ja Chuza ñidø'øxy, ja' ñidø'øxy pøn ja Herodes tumbi'ajtip, pøn tuki'iyi t'ejxp tnija'wip ti jam ejtp ka'ejtp mā ja Herodes jam wyindsøn'aty; jam ja Susana wyinatymi jøts may abikpyi jaa'dyi pøn jaty ja tigati tabudøjkidyidip.

Ku ja Jesús tmaryakpaaty ja jaa'y pøn nøjkn neppi

4 May jaa'y ja Jesús jam ojts ñimiñiyi pøn jaty tsoo'ndip o ma abikyajp jøts ja Jesús yik'ejxwa'añ; jøts ku ja jaa'y may'ampy myujkpejty, jøts ja ttamimadyaktøjkijiyi'ñ tu'uk ja ejxpajtin madya'aky. Jøts ja wyaañ:

5 —Tu'uk idø'on ja jaa'y chøø'ñ tømtywøpi. Jøts ku ja twijy, øy ja tøm't o ma ñaxkidaajky. Midi'ibi ñajtswøjjiyii'ñ jam tuu'am, ja'ats yiktaa'nbu'uxkigyøjx jøts ja joon ja wa'ats tpeemujkijxy.

6 Midi'ibits ñajtswøjjiyii'ñ jam tsaag agujkp, ojts ja jam yjamuxy jøts ja jaty tyøtsjø'knaa ja'agøjxp ku ja naajx jam kyaneki.

7 Midi'ibits ñajtswøjjiyii'ñ ma ja magyujp jam wyinaty myuxwa'añ, ja'ats ja ojts ñi'aa'mbajtiniiyi. Ku ja myujxmi winet jøts ja niwine'en kyayiky-onmøjkijyøø.

8 Midi'ibits ñajtswøjjiyii'ñ jam pu'uty ñaxkøjxp, jøts ku ja yøøñ jøts ja ojts yixkon yjantyimdyøømi, magø'pxy magø'pxy ja pyajkpejty ja tu'ukpi tøm't.

Ku ja Jesús jade'en myadyak'abajtiyii'ñ, jøts ja møkta'aky wyaañ:

—Pøni pøn ja'gyukiwyamp, wan tjä'gyuki.

Tigøjxp idø'on ja Jesús ejxpajtin madya'akyøjxp ja y'ixpøjkin tyaky

9 Winets ja pyabøjkitøjk ja yiktøøjyøø ti dø'on jade'en tijjpy, sudso yikja'gyukit ja'abi madya'aky.

10 Xjats ja t'adsøoy jøts ja tñimaay:

—Meets yø Dios mduknija'wiyip ja y'ayu'uch winmaa'ñ sa ja' kyutujk midi ja tyanitanaapy ja yjaa'y, jade'ents meets ja mdyimyiktumadyø; ka'ats ja abiky jaa'y nayide'en madya'akyøjxp tñijawidit, ejxpajtin madya'akyøjxp øts yø ja'ayi ndamimadya'aktit jøts kø'øm tñimado'odit tkanimado'odit nayide'en pøni sa ø xpabøkti xkapabøkti.

Ku ja Jesús tñigajpxy sudso dø'on yikja'gyukit ku jaa'y neppi ñijky

11 Yide'en idø'on yø madya'aky tijy: Jade'en ja tøm't yikpikta'aky sam ja Dios kyajpxy y'ayuuikin;

12 jøts midi yiknajtswøjjiyii'ñ jam tuu'am jade'en ja yikpikta'aky sam ja jaa'y pøn ja tpatmadoodip ja Dios kyajpxy, jøts ku ja t'ukja'gyukidi xjats ja miku' ja jaty pyøjkixiyidi jøts ja ka'ap tñibøktit, jøts ja nisudso'ampy kyanitso'ok'attit.

13 Jøts ja tøm't jade'en yikpikta'aky midi yiknajtswøjjiyii'ñ jam tsaag agujkp sam ja jaa'yindi pøn tmadoodip ja øgyajpxy ja øy'ayuujk, jøts ja ejtni xoni t'ukpabøjkøiti y'ukjanchja'widip ja'; kuts ja yiin waan sa tkujatidi jøts ja jaty tñajstst'utti, jaty ja ñayjibikpyikta'agyidi ja'agøjxp ku ja jade'endi sam ja ujts kya'aa'tsmiweninim.

14 Jøts ja tøm't midi ñajtswøjjiyii'ñ jam kujp agujkp, jade'en ja yikpikta'aky sam ja jaa'dyi pøn tjamadoodip ja øgyajpxy ja øy'ayuujk, yjajanchja'widip jøts nika'ap t'ukpadunidi, ja' ja ne'egi yikmajadaktip ja pyikta'aky, ja myeeñ, ja yjingaap, ja yjotkujk'ajtindi. Jade'ents ja tka'ukyikmøjtøjkinidi ja øgyajpxy ja øy'ayuujk jøts ja niti tkayikwingaxø'økti Dios wyindum.

15 Jøts ja tøm't midi ñajtswøjjiyii'ñ jam pu'uty ñaxkøjxp, jade'en ja'amí sam ja jaa'dyi pøn amumjoojt nadyamiyojxidip ja Dios, jøts ja jade'en tpatmadojidi ja y'øgyajpxy y'øy'ayuujk. Møk ja yjanchja'win ja tpiakta'akti, ka'ap ja juuni ttamajstst'utti, ja'ats idø'on tyikwingaxø'ktip ja øgyajpxy ja øy'ayuujk.

Niti jadi'iñi kyatañ, kuwañim ja tyimykijnajwy

16 'Kidi ja'ajip ja jaj yiktaguno'kp jøts ja yikumutst uk jøts ja yikpikta'akt jap maabajt patki'py; ja' ja wya'añ jøts ja yikpikta'akt jam køjxp ma yjajt tyøø'kxt, jøts ku jam pøn tyøkit ka'ap ja jam kube'ets kugoots yja'attit.

17 Ti ka'ukuyikpatp ku ti yjayu'uch'ity. Øy kajpxy ayuujk yjagayiknigajpxwa'añ, kuwanits ja yiknijawi pøni sa ja y'ejxi tyiyi.

18 'Jade'ents idø'øn øy xmado'odit; pøn tpabøjktip jøts tmadogukiwya'andi øy øy, jaakuyikpudøkipts ja yikxondi jøts ja tja'gyukidit. Pønts ka', jaaktyimyikpøjkxidip ja' ja wyijy'ajtindi midi ja jaakjanadyaja'wiyidip jøts ja nisudso'ampy tkidyimya'gyukidit.

Ja Jesús tyaak jøts y'uch

19 Winets ja Jesús y'uch yja'ttøø møøt ja tyaak ma ja jam wyinaty, nika'ap idø'øn ja tpaatti wingon kumi janch mayjaa'y jam wyinaty.

20 Xjats ja Jesús yiktukmadøøy jøts ja yiknimaay:

—Ja mdaak møøt ja m'uchti ja' mmigajpxwajnip, ixap ja tøjkwimptyi.

21 Jøts ja t'adsøøy:

—Ja' øts idø'øn ndaagip, ja' øts idø'øn n'uchidip nmigu'ugidip, pøn tmadoodip ja Dios y'øgyajpxy y'øy'ayuujk jøts ja jade'en tpadundi pøni sa nwa'añ.

Ku ja Jesús tyiknajxy ja møk poj jøts ku ja tyik'amøkiyii'ñ ja mejy

22 Winets ja nay ja'abi xøøw tyøjkiyii'ñ barkijøtpy møøt ja pyabøjkitøjk, jøts ja tnimaay:

—Wan tjaa'myindi jam jaduktamajñ.

Jøts ja ñøjkxtøø,

23 jam ja wyinaty mejkyujk'amdi ku ja Jesus mya'oo'knaga. Jøts ja møk poj ja jam jotmøn pyaajtidøø, yikxon ja nøø jam barkijøtp yjanchtøjkyini øy ja tyiknitigøøñit.

24 Jøts ja tyujxtøø ja Jesús jøts ja tnimaadyøø:

—Windsøn! |Windsøn! |Nøøjøø'kxwaa'nindip!

Winets ja Jesús pyidi'jky jøts ja møk'ampy twingugajpxiyii'ñ ja møk poj ku ja nøø ja tyiktojmi'iky adsø'jkibim; jøts ja poj jatyi yjanch'amø'jty, jadi'iñi ja myøøñ.

25 Jøts ja tnimaay ja pyabøjkitøjk:

—¿Ma dø'øn ja mjanchja'windi xyiktunwa'andi?

Tø ja yjanchnichø'jkidyigøøñidi, ñigyumaap ja tyimya'widøø jøts ja xem yam ñawyajnidøø:

—¿Ti pønims ya'at jade'en, pø mimadojipst ja poj yø', pø mimadojipst ja nøø yø' ku yø t'ane'emy?

Ja Gadarit jaa'y pøn wyinaty ja miku' tø tyatøkiyi

26 Jøtsnim ja yja'ttøø jam Gadarit etjotp midi idø'øn ja jaduktamajñ tamp Galileit et wingon.

27 Jøts ku ja Jesús jam wyinaajky, yø'øpyidsiimy, jøts ja ñimejnøø tu'uk ja kugajp pøn ja miku' wyinaty jekyip tø tyatøjkiyi. Niwa'ats ixwa'ats ja wyidejtni, ka'ap ja tyøjktotp y'uktsinaañi, jam ja chinaadyakni ma ja oo'kpi ñaxøkidi.

28 Jøts ku ja t'ejxpaajty ja Jesús jøts ja jatyi twinguxanaay, yide'en ja tjantyimñøjmi møkta'aky:

—Jesús, Dios U'nk tsajpjøtpyit, ¿ti ø xanibøjkip? Tun may'ajt kidi xjanty-imy'ayo'onduñ.

29 Ja' idø'øn ja jade'en tyikwamp ku ja Jesús ja miku' møk'ampy t'ane'emy jøts ja jam pyidsø'ømt ja jaa'y y'am yjotp. Ejtp idø'øn ja miku' ja xyumimi'adi'ichiyi ku ja yjayiktagiwiiñ yjayiktapakwiiñ pujx kadeen; jatyi ja ttapojtiiguixy yam ja jaa'y ja jade'en tø yja'uktajotkuj'ajtmiyi jøts ja nima kyanøjkxt, jøts idø'øn ja miku' ja yikakwidityi o ma jam abak etjotp.

³⁰ Jøts ja Jesús yide'en tyiktiiy:

—¿Ti mxøøw?

Jøts ja y'adsøøy:

—Legión ø nxøøw.

Ja'agøjxp ja jade'en ñaxyøømø'øyi kumi janch may miku' ja wyinaty tø tyatøkiyi.

³¹ Ja'axi dø'øn jade'en kø'øm wandip jøts ja tnimaadyøø ja Jesús jøts ja ka'ap kyaxidit jap mā miku' y'ayo'ombaatti.

³² Jamts wyinaty ja kuch yjøø'kxwidejtmidi jam kojpkøjxp ku ja miku' ñuu'kxaktøø jøts ja ttatøkidit ja kuch; yikjajt idø'øn ja Jesús ja jade'en.

³³ Xjats ja miku' tmajstuttøø ja jaa'y jøts ja kuch ja ttatøjkidøø, winets ja jiyujk niduki'iyi yjanchepkuwo'ongøjxtøø jøts ja nøøjtpy ñaxkidakøjxtøø, japts ja ojts ñøøjøø'kxkøxti.

³⁴ Jøts ja jaa'y pøn wyinaty kuch'ejxtip ku ja jade'en t'ejxtøø yjatti kyubatti ja kyuch, jøts ja yjantyimchø'jkidøø, jøts ja kyaknøjkxtøø jam mā jaty pøngapøn chøøni kamjotp jøts nayide'en jam kajjotp, jamts ja tuki'iyi ttamimadyakøjxtøø.

³⁵ Jøts ja jaa'y ja tniðso'ongøjxtøø jøts ja t'ejxwa'andi pøni janch idø'øn jade'en. Jøts ku ja yja'ttøø jam mā ja Jesús jam wyinaty, xjats ja t'ejxpattøø ja jaa'y pøn ja maamyiku' wyinaty tø myajtstu'udyiyi jøts ku ja jam chøøni wijy kejy, xøxy piky ja jam mā ja Jesús wyinaty tyani, jøts ja yjantyimchø'jkidøø.

³⁶ Jøts ja jaa'dyi pøn wyinaty kø'øm tø tyim'yejxti, ja'ats ja tmadyaktøø sudso'ampy ja ja jaa'y wyinaty ja maamyiku' tø myajtstu'udyiyi.

³⁷ Ja'agøjxpts ja jaa'y ni'ijtyi ñuu'kxaktøø pøn jaty jam wyinaty tsinaadyip Gadara jøts ja Jesús jam pyidsø'ømt etjotp, pø jantyimchø'jkidipxi dø'øn ja'adi. Jade'ents ja Jesús ttatøjkiyi'ñ ja byarki jøts ja chø'jñ.

³⁸ Jøts ja jaa'y pøn wyinaty tø myajtstu'udyi ja maamyiku', ja'ats møk'ampy nuu'kxakmaa jøts ja yikmøødit jøts Jesús ja tmøøtnøjkxt, jøts ja ojts t'ane'emy jøts ku ja ne'egi tya'ant, yide'en ja tnimaay:

³⁹ —Nøjkx mdøjkwindum, jamts xnigajpxt xnimadya'akt sa Dios tø m'ødyuñiyi.

Nøjkx idø'øn ja jaa'y jøts ja ttamimadyaktøjkiyi'ñ amuum ja mayjaa'y sa Jesús ja wyinaty tø yikmøpkikyiyi yik'øy'atyyi.

Ja Jairo ñøøx, jøts ja tø'øxyøjk pøn ja Jesús wyet ojts ttojni

⁴⁰ Jøts ku ja Jesús wyimbejtñaā ñøjkxnimaa jam jaduktamajñ, pøkpaat may jaa'y ja jam yjançhja'wiyøø, pø tum awejxipxi ja jaa'y ja wyinaty.

⁴¹ Xjats tu'uk yaa'dyøjk yja'jty pøn txøøw'ajtp Jairo, ja' idø'øn jam wyinaty tniwindsøn'ajtp ja tsaptøjk. Jøts ja ñagyuxendyaajkøø jam Jesús tyekyjø'øm jøts ja tnimaay, ojts ja ñuu'kxa'aky jøts ja myøøtnøjkxyit jam tyøjkwindum.

⁴² Jam ja tyu'ukpi nøøxu'nk, makmajtskin ja' yjumøjt ja wyinaty, ja'ats jam wyinaty oo'kp ka'oo'kp. Jøts ku ja Jesús ojts ñijkxy, janch may jaa'y ja pyadso'onøø, janch yikxon ja yik'atejmuky.

⁴³ Jamts tu'uk tø'øxyøjk pamaay, myakmajtsk jumøjtyip ja tajxnaxyi ja pyaajtñiyi. Tø ja tniðya'ayodøjkini ku tsøøyibi ja jadine'en tjamijuy jøts ja nipøn yjançhakayitso'øgyiyi.

⁴⁴ Xjats ja ojts wingon tjiguyø'øyi ja Jesús, jøts ja wyet pa' ja ojts tjøjxi, jøts ja tyajxnaxyi ja nay jaty y'adujky.

⁴⁵ Jøts ja Jesús yide'en tyiktiiy:

—¿Pøn ø tø xøñ?

Kuts nipøn tkanigajpxy, jøts ja Pedro møøt ja my'igu'uk wyandøø:

—Windsøn, pø mjanchyik'atejmujkpts, nugots mjanchyiktejmiñ mjanchyiktejxipy, jøts mnimy: “¿Pøn ø tø xøn?”

⁴⁶ Jøts ja Jesús wyaañ:

—Tø ø nyiktøn, tøn njawi jøts ku øts nmøk'ajtjn tøn nduktamøkpiky tu'ugin ja jaa'y.

⁴⁷ Xjats ja tø'oxyøk, pø ja'axi tam idø'on yiktejp, jøts ja ojts ñimyibejpn ñichiyuuñi ñagyuxendya'agyi jam Jesús tyekyjø'øm, jøts ja ojts ttukmadøy jam mayjaa'y agujkp tigøjxp ku ja wyinaty tøn tøn jøts ku ja nay jatyi myøkpjiky.

⁴⁸ Winets ja Jesús ja ñimaajyøø:

—Ja'agøjxp u'nk tøn mmøkpiky ku ø tøn xjanchjawi. Nøjkxni amgujk jotkujk.

⁴⁹ Exam ja Jesús wyinaty jade'en wya'añim, ku yja'ljty tu'uk ja jaa'y pøn tsoo'mp jam tsaptøjk windsøn tyøjkwindum, ja Jairo. Jøts ja Jairo yiknimaay:

—Tøts ja mnøøx y'anuu'kxiñi, kidi yø windsøn nugo x'adsejp'adi'ich.

⁵⁰ Jøts ku Jesús ja jade'en tmadøøy, jøts ja tñimaay:

—Kidi mdsø'øgi, møk m'aaw mjoojt xpikta'akt, tu'ugyi ø xjanchjawit, jujkpyøk ja m'u'nk inet.

⁵¹ Jøts ku ja jam tøjkwindum yja'ttøø, ka'ap ja jap tøjkjøtpy pøn tyiktøjkiyi'ñ, ja Pedro ja ja'ayi myøøtøjkiyi'ñ møøt ja Jacobo møøt ja Juan jøts ja u'nkteety u'nktaak jade'eñi.

⁵² Janchyaxtip ja wyinaty, ja y'u'nk ja tymchaachpa'ayoodip. Jøts ja Jesús ja ñimaajyidøø:

—Kidi mya'axti; ka'ap yø kiixy y'øøky, maapts yø ja'ayi.

⁵³ Jøts ja yjanchyikniixijky, pø ñija'widipxi ja' jøts ku ja wyinaty tøn y'oo'kni.

⁵⁴ Xjats ja Jesús ja tmajch kyøjøp'am, jøts ja møk'ampy tñimaay:

—Pidø'øk, u'nk.

⁵⁵ Jøts ja yjujkpyjiky, nay jatyi ja pyidi'jky; jøts ja Jesús ja ojts tni'ane'emy jøts ku ja tyika'adyit.

⁵⁶ Ñigyumaap ja møjaa'y ja tyimya'widøø jøts ja Jesús ja tñimaay jøts ka' pøn ttukmado'odit ku dø'on ja wyinaty jade'en tøn tyuñi jyaty.

9

Ku ja ñimakmajtskpi pabøjkpitøjk yiktanipøkti ja tunk jøts ja yikajxtsoondi

¹ Xjats ja Jesús tñankñamyujkøø ñimakmajtsk ja pyabøjkpitøjk jøts ja myøk'ajtjn ja tmøøy, ojts ja tkutuujkmøøy jøts ja tyikpidsøjmidit ja jaa'y ja miku', jøts ja tyikmøkpøktit ja pamaa'y.

² Ojts ja tkexy jøts ja Dios y'øgyajpxy y'øy'ayuujk ja tkajpxwä'kxidit midit ja tyanitanaapy ja yjaa'y jøts ja tyiktso'oktit ja pamaa'y.

³ Jøts ja tñimaay:

—Ka' mniyø'øyik xko'ondit, niti xkako'ondit, ni tajk, ni pejn, ni tsapkaaky, ni meeñ. Tu'ugyi mwet xminøjkxtit midit ixja mwet'ajttip.

⁴ Jøts ku mdøjk'amido'odit o ma' pøni ma' mja'atti, tu'ugyits jam mja'ta'aktit kunim jam mdsøonditnim.

⁵ Jøts ku ma' pøn mgagupøkidit, tanaxtits ja kajp, ja'ayi ja pu'ux x'ukwinaptit jøts jade'eñi xuk'ejxtit jøts ku jade'eñi tøn mñañiwa'a'chidi.

⁶ Jøts idø'on ja yø'øwya'kxtøø, ñøjkxtøø o magajp, jøts ja jam tkajpxwä'kxti ja øgyajpxy ja øy'ayuujk jøts ja pamaa'y ja tyiktso'okti o ma'dsoo.

Ku ja Juan Bautista ja o'jkin tpaajty

⁷ Xjats ja windsøn Herodes ku ja tñija'wiyii'ñ sa jaty ja Jesús wyinaty y'adi'ich, jøts ja ka'ap ti tabyajitin tpaajty pømbi ja nimaajyip jøts ku ja Juan wyinaty tø yujukpyiky, ja' wyinaty tø pyidsimy jadigojk jap oo'kpi jutjøtpy.

⁸ Pømbits wandip jøts ku ja yja'aji ja Dios kyugajpxy Elías, jøts ku ja' wyinaty tø kyaxi'iky; pømbits nømidip jøts ku ja yja'aji ja Dios kyugajpxy pøn wyinaty windi'ixyip tø y'atmendí, ja' nidu'ugin tø pyidsimy jadigojk.

⁹ Jøts ja Herodes wyaañ:

—Pø øtsimpts ja Juan kyubajk kø'øm nankyikwinajkøø. ¿Pønts idø'on ndejin yø'ixa njamado'ity yiknimadya'aky janch ñigyumaap?

Jøts idø'on Herodes ja tjadyimwyin'ejxwaañ.

Ku ja Jesús yikaay ja nimagoxk milbi jaa'y

¹⁰ Xjats ku ja Jesús kyudanaabyi wyimbejtøø, ojts ja tyamimadyakixyi ti jaty ja wyinaty tø ttundi. Winets ja ojts twaadsøøñ jøts ja tmøøtnijkxy ma nipøn kya'ity jam Betsaida kajp wingon.

¹¹ Kuts ja jaa'y ja tñija'widøø, jøts ja ojts tpanøjkxti; kyupøjkts ja Jesús ja' jøts ja ojts ttamimadya'aky sa ja y'ejxi tyiyi ja Dios kyutuik midí ja tyanitanaapy ja yjaa'y, jøts ja tyiktsøjky may ja pamaa'y.

¹² Jøts ku ja et chuu'ñaa, xjats ja ñimakmajtskpi kudanaabyi ja ñimejnøø jøts ja ñimaajyøø:

—Kajxni yø mayjaa'y, jøts nøjkx pyoo'kxnidi jøts nøjkx t'ixaañidi ja kyaajyik jyøø'kxik o magajp midí ya wingon tamp, nitits ya kya'ity ma adøm yaadi.

¹³ Jøts ja Jesús ja ñimaajyidøø:

—Yikaydi meets.

Jøts ja tñimaadyøø:

—Ja'ayits tsapkaaky jap jamagoxkyi jøts ajkx majtskyi, pø winet inet idø'on pøni nda'ajuu'yigyøjxp øøts inet yø jaa'y ja kaaky ja jii'kxy.

¹⁴ Nimagoxk milin ja jaa'y jam wyinaty. Xjats ja Jesús tñimaay ja pyabøjkpitøjk:

—Yik'ixa'akti tukpik jaty niwixikxmyajk jaty.

¹⁵ Jøts idø'on ja jade'en tpadundøø, ojts ja jaa'y y'ixakøxti.

¹⁶ Winets ja Jesús tñixajiyii'ñ magoxk ja tsapkaaky jøts majtsk ja ajkx. Ojts chajp'ixy jøts ja ttamøja'wiyii'ñ ja Dios Teety. Jøts ku ja t'adujkpajky, jøts ja ojts ttagøðøki ja pyabøjkpitøjk jøts ja mayjaa'y ja ttaguma'adyit.

¹⁷ Ojts idø'on ja niduki'iyi kyay'abidsømdi, niduki'iyi ja kyujxidøø; jøts ja kaaky wyindank ja makmajtsk kach ujts ujts yikpøkmujky.

Ku ja Pedro wyaañ jøts ku ja Jesús yja'aji pøn yiknitsokp

¹⁸ Tuk'ojk idø'on ku ja Jesús jam wyinaty ja Dios Teety t'ajot'aty nadyu'uk, jamts idø'on pyabøjkpitøjk ja pyawidityiyi jøts ja tyiktaiy:

—¿Sa jaa'y wya'andi kyajpxti, pønik øts idø'on?

¹⁹ Xjats ja y'adsoodøø:

—Pømbi wandip jøts ku mets Juan Bautista; pømbits wamidip jøts ku mets m'Elías, nømidipts jadu'uk jøts ku me mja'aji ja Dios kyugajpxy pøn mendøø jekyiy jøts ja' nidu'ugin tø wyimbity jadigojk.

²⁰ Jøts ja tjaakyiktaiy:

—Jøts meets, ¿sa mee mwa'añ, pøn øts yjawi?

Jøts ja Pedro wyaañ:

—Cristoxi mets, ja yiknitsokpi, ja Dios U'nk.

Ku ja Jesús tñigajpxy ja y'o'jkin

²¹ Winets Jesús ja ojts møkta'aky t'ane'emy jøts ja ka'ap tmadyakyøðdyit.

²² Yide'en ja yiknimaadyøø:

—Møk øts ja ayo'on nbaatt, ka' øts ja mōjaa'dyøjk xkupøktit, ka' øts ja teetywindsøndøjk xkupøktit, ni ja kajpxwejpitøjk ø xkagupøktit. Xyik'ookitip øts ja', ja kidigøøk xøøwts ø nbidsøømt jadigojk oo'kpi jutjøtpy.

²³ Jøts ku ja jade'en wyaañ, winets ja tnimaay niduki'iyi pøn jam wyinaty:

—Pøni pøn ø xpabøkwamp, jawween ja kō'øm kyanabya'ayowit, jabom jabom øts ja xku'ayowit, ja'ats øts idø'øn xpabøjkp.

²⁴ Pønts kō'øm nabya'ayojip, pøn kasaduñim nay'ejxip, windigøøpyts y'anmija'win ja y'ity; pønts ø xku'o'jkip xkudigøøyip, ja'ats ja yja' nøjks nitso'ok'ajtp.

²⁵ ¿Ja ti ja ñiwyā'ant øy ja jaa'y tjaja'bøjkixy ja naaxwiiñ'ajtin jøts ja y'anmija'win ne'egi wyindigøy?

²⁶ Jøts pøni pøn ø xatsø'ødyump, pøni pøn øts n'øgyajpxy n'øy'ayuuik xatsø'ødyuujnip, nayide'ents øts ja tsø'ødyumbi nøjks ndatsø'ødyuñ, ku ø nme'ent yikutujkpi, ku øts ja ndeety kyunuu'kxy'ajtin nmimejnit møøt ja ankilistøjk yja'adi. Øts idø'øn ja naaxwii'ñit jaa'y nmøjkudanaabyi'ajtpy.

²⁷ Tiy janch mee nnøjmi jøts ku jaa' ja jaa'y ya winaagin tyanidi, pøn ka'ookitip kunim ja tyimy'uk'ejxtit sa Dios kyutuujk tmime'ent midi ja tyanitanip yjaa'y.

Ku ja Jesús adsu'jky y'atstigajch amuum chamambøjkixy

²⁸ Tø dø'øn ja wyinaty tyuktujkxøøwip jade'en y'ukjaty, jøts ja Jesús py-atøjkiiyi'ñ jam kojpkøjxp Dios'ajot'ajtpi, myøødiyii'ñ ja Pedro ja', møøt ja Jacobo jøts ja Juan.

²⁹ Kuts ja Jesús jam wyinaty Dios'ajot'aty, xjats ja wyeen y'aaw ja tyigajch, jøts ja wyet ja ñaamy ja pyoobiyii'ñ tøø'kxpim tsamambim.

³⁰ Winets jam kyaxøktøø namajtsk ja jaa'y, ja'ats ja jam møøt myadya'aky, ja Moisés idø'øn ja' møøt ja Elías,

³¹ nabejk'ampyaju'uk ja ñi'awidityidi jøts ja tkajpxy'atti ja o'jkin midi ja Jesús wyinaty pyaatwampy jam Jerusalén.

³² Øy ja Pedro møøt ja myigu'uk yjamaa'y'ookti, wijy'ejttip idø'øn ja'. Jøts ja ojts t'ejxidi ja Jesús y'aju'uk møøt ja ñamajtskpi yja' nayide'endi pøn ja jam wyinaty møøt tyani.

³³ Jøts ku ja jaa'y jam wyinaty jagamnidi, jøts ja Pedro tnimaay ja Jesús:

—Windsøn, ityimy'øy'ajtp ku øø nyam'aty! Nyik'øyip øø tigøøk ja ujts'aadyøjk; tu'uk mets mja', tu'uk Moisés yja', jøts tu'uk Elías yja'.

Ka'ap idø'øn ja Pedro y'aaw tjawi pø ti dø'øn ja kyajpxy.

³⁴ Exam ja jade'en wyaañ ku yoots jam ñaxkidaajky, jøts ja yjanchø'jkidøø ku ja jap yoots agujkpy ñay'ejxpajtidøø.

³⁵ Winets ja tmadoodøø ku jap yoots agujkpy kyajpxy ku jap ñimy:

—Øts idø'øn ya'at n'u'nk njanchøjkpy; mimadojidip pøni sa wyaañ.

³⁶ Ku ja wyinaty jade'en tø tmadowdiwyaañ, xjats ja t'ejxpattøø ja Jesús jøts ku ja jam nadyu'uk. Amøñi ja y'ejttøø, ka'ap ja pøn ttukmadowdi ku ja wyinaty jade'en tø t'ejxti.

Ku ja Jesús tyikmøkpiky tu'uk ja mixyu'nk pøn wyinaty ja miku tø tyatøkiyi

³⁷ Jøts ku kyimjabom'ajtpy, ku ja ojts kyidakñidi jam kojpkøjxp, jøts mayjaa'y ja Jesús yjøpkubajtiyøø.

³⁸ Jøts ja jam nidu'ugin møk'ampy ñimaajyøø:

—Windsøn, tun may'ajtp, win'ejxik øts n'u'nk, yø'øyi ø tu'ugyi n'u'nk'ajtpy;

³⁹ miku' idø'øn yø xumitatøjkiyip, jøts yø yjanchxumiyiktsabaayi, yikmo'jtniyip yø', jøts janchyik'a'oo'pniyip tnankwyinwøpyi tnankjyøpwøpyi. Nijade'ents kyamajst'u'dyi, am'ijxyim tsaach'ijxyim yjaty.

⁴⁰ Tø øts yø mbabøjkpi njanøjmidi jøts jeexyip yø miku' tyikpidsømdi, nika'ats yø tø myayidi.

⁴¹ Xjats ja Jesús wyaañ:

—iMee kajanchja'wibidi, yø mbøky nugo myikmajadaktip! ¿Ma windemnim meets ngajpxy n'ayuujk xpabøjkit? ¿Windemnim meets yø yjade'embí xuktatso'okt ku øts yø ejtp njanchjanigajpx'ity? Mets, yikmen yø m'u'nk.

⁴² Xjats ku ja mixy wingon myiñ, jøts ja miku' ja ojts yiknaxkida'agyiyi jøts ja tyukpatkojmiyi ja mø'odyi; winets ja Jesús ja miku' twingugajpxiyi'ñ jøts ja tyikmøøy møk møjaaaw.

⁴³ Ñigyumaap ja jaa'y ja ni'ijtyi tjä'widøø ku ja Dios ja myøk'ajtin jade'en tyikwingaxi'iky.

Ku ja Jesús tnigajpxy jadigojk jøts ku ja y'ooht

ixam idø'øn ja jade'en wyinatyi ku ja Jesús tnimaay ja pyabøjkpitøjk:

⁴⁴ —Madowdi ya'at, jøts kidi xja'dyigøydi nijuuni; øts, yikøyakp øts jøts øts ja mayjaa'y nyiktagodøkit.

⁴⁵ Jøts ja pyabøjkpitøjk ka'ap ja tjä'gyukidi ku ja jade'en wyaañ, jøts nika'ap idø'øn ja ttuknimadøy; tsø'jkimidipts ja' jøts ja tyiktø'ødit ti dø'øn ja jade'en tyijpy.

Pøn idø'øn jawaani møj ma Dios ja yjaa'y ja kyutujk ttanitani

⁴⁶ Xjats ja tkajpxy'ajtpinibøjkidøø pømbi jadyimy'ukmøjtøjkip,

⁴⁷ wa'ats ja Jesús ja tnijawi sa ja wyinaty wyinmaydi. Winets ja ojts tsa'anji'iky tu'uk ja mutsku'nk jøts ja ñadyawingudsaa'niyøø,

⁴⁸ jøts ja wyaañ:

—Pøni pøn øts ya'at mutsku'nk xkupøjkxip, øts idø'øn ja wyinaty xkupøjkp; pøni pønts øts jade'en xkupøjkp, ja'ats idø'øn ja wyinaty kyupijky pøn ø xkajxp. Pønts kanamyøjpiktaajkip wine'enin meets ixaadi, ja'ats idø'øn nøjkk møjtøjkip.

Ku ja Jesús wyaañ: Adøm ja' nbudøjkibi pøni ka'ap adøm ja xmidsøp'ajtyindi

⁴⁹ Xjats ja Juan tnimaay ja Jesús:

—Windsøn, tø øø n'ixy tu'uk ja jaa'y tyikpidsimy ja miku' mets mmøk'ajtingøjxp; tøts øøts ja ndukmajst'u'ty kumi ka'ap adøm ja xmøøtwidijtyim.

⁵⁰ Jøts ja Jesús ja ñimaajyøø:

—Kidi xuktamajst'u'tti; adøm ja' nbudøjkibi pøn ka'ap adøm ja xmidsøp'ajtyindi.

Ka'ap ja Jesús tyikjaty sa wya'andi ja Jacobo møøt ja Juan

⁵¹ Jøts ku ja et ja xøøw tpaajty ku ja Jesús wyinaty ñøjkwani tsajpøtpy, xjats ja jotmøk'ampy chøø'ñ jøts ja ñijky jam Jerusalén.

⁵² Ojts ja tkajxjawyeni kyugajpxy, jøts ja ñøjktøø jam Samariit etjotp jøts ja jam t'ixaajyidit ja yja'taajk;

⁵³ ka'ats ja Samariit jaa'y ja tkupøjktøø ja'agøjxp ku ja tnija'widøø jøts ku ja ñijky jam Jerusalén.

⁵⁴ Kuts ja Juan ja jade'en t'ejxtøø møøt ja Jacobo midi ja pyabøjkpi'ajtpy, jøts ja ojts ñii'mxyi:

—Windsøn'ajtim, ¿tuñ øø nayide'en sam ja kugajpxy Elias y'adijch, n'amido'op øøts ja jøøn tsajpjøtpy, wan yø jaa'y tkudigøøgyøxti?

⁵⁵ Jøts Jesús ja nugo twin'ijxy jøts ja møk'ampy twingugajpxiyi'ñ, yide'en ja tnimaay:

—Ka' meets yjawi xja'gyukidi pøn meets myøk'ajtin mmøøt'ajtxiyip.

⁵⁶ Nmøjkudanaabyi'ajtpy øts ja naqxwi'ñit jaa'y, kaja'ajip ø tø nnimiñ jøts øts ja jaa'y nyik'ookt nyiktigø'øty, ja' ø tø nnimiñ jøts øts ja jaa'y nyiknitso'ok'att. Xjats ja choo'ndøø jøts ja ñøjkxtøø abikyajp.

Ja jaa'y pøn tpawidetwandip ja Jesús

⁵⁷ Jøts ku ja wyinaty jam tyuu'yø'odyi, jøts ja Jesús ja jaa'y tu'uk ñimaajyøø:

—Windsøn, tsoomp øts, nbanøjkxp mets o maðsoo pøni ma me mnijkxy.

⁵⁸ Jøts ja Jesús y'adsøøy:

—Ne'egi jaa ja waajx ja yjut, ne'egi jaa ja joon ja pya'an; jøts øts niti ø xka'ejtxi øyik øts idø'øn ma n'ønø'ønt.

⁵⁹ Xjats ja Jesús jadu'ukpi jaa'y tnimaay:

—Møødik øts.

Jøts ja wyaañ:

—Windsøn'ajtim, wan øts ndeety jawyeen t'atsyiknaøkxi.

⁶⁰ Jøts ja Jesús y'adsøøy:

—Majtstu'ut, wan ja tyikpidø'økti ja myi'oo'kpi pøn y'anmija'win jaju-kyi tø tyik'oo'knidi; jøts mets, nøjkx mets ja Dios y'øgyajpxy y'ø'yayuujk xkajpxwa'kxi.

⁶¹ Jøts ja jade'en ñimaajyøø:

—Windsøn'ajtim, nmøødiwyampy mets, nijkxy øts nmigu'uk t'atstukmadøy, nijkxy øts t'atsnagayjpxpidsimi jawyeen jap ndøjkjøtpy.

⁶² Jøts ja Jesús ja tnimaay:

—Ku jaa'y yu'uy, ja' ja y'ijxpy ja tyunk; pønts ejxjimbejt'adøtsp, tits ja nyikwa'anint. Jade'ents idø'øn ja Dios wyingujkp ma ja ttanitan kyutujk ja yjaa'y; pøn ja tu'ugyi amumjoojt kamiduujniyip, tits ja jam ñiwyaa'ant.

10

Ku ja Jesús tkajxwa'kxy ja ñidugui'pxmyajkpi jaa'y

¹ Jøts ku ja jade'en y'ukjajt, jøts ja nwindson'ajtim twiwijch ja nidugui'pxmyajk ja yjaa'y, jøts ja tpaguejxy namajtsk jaty. Jade'en ja ojts tyiknijkxy o magajp ma dø'øn ja kø'øm wyinaty ñøjkxwa'añ,

² jøts ja tnimaay:

—Janch may pikta'aky pyidø'økwa'añ, ka'ats ja tumbi myayidi. Paty mee x'amido'ot ja kubikta'aky jøts tjaakaxt ja tyumbi jøts pyidø'økt ja pyikta'aky.

³ Nøjkxtits meets; jade'enxi mee mnøjkxt sam borreek ñijkxy ma may miy'uk jamdi.

⁴ Ni mbejn xkawetstit, ni mmeen'abøjk'ii'ñ, ni mgø'øk, niti xkako'ondit; jøts kidi pøn xmi'øømayidi xmigajpxmayidi ku pøn xkajpxpoo'kxtit tuu'ajy.

⁵ Jøts ku ma mja'taajk x'amidowa'andit yide'en jawyeen mgajpxpoo'kxtit: “Ma meets, Dios mjagyepyidi.”

⁶ Pøni jamts pøn jotøjkiiyip ja Dios, ja'ats idø'øn Dios janchjagyapip; pøni ka'ats pøn m'adsojimbejtxiyidi ja mgajpxpoo'kxindi, anaxtits ja tøj.

⁷ Jøts jam mda'andit ja' tyøjkjotpti pøn Dios jotøjkiiyidip, mga'adyip mjøø'kxtip idø'øn pøni ti ja mmøøjyidip, mbaat'ajttip ku jade'en myikmo'odit. Kidits tøjkp tøjkp nugo mwidetdi.

⁸ Ku o magajp mja'attit, pøni ma myikupøkti mga'adyipts mjøø'kxtipts ja' pøni ti myikmøødyip;

⁹ myikmøpøktip ja pamaa'y jam, jøts ja jaa'y xnøjmidit: "Jaani Dios kyutujk ya midi ja tyanitanaapy yjaa'y, ja adøm ja nmøø'tajtna'andi."

¹⁰ Kuts ma ja kajp xpaattit ma mgayikupøktit, yø'øpyidsømdits jam jøts tuu'am mnø'ømdit:

¹¹ "Pu'uxpaat øø ndekyijxy tø tya'tspøjkni midi ya kajpjøøjty, ixyamts øøts nyikwa'ach meets køjxp, ejxti sa x'ejxti, nañiwaajtsip øøts jade'en. Ja ti winets xkanijawidit, jaa Dios kyutujk wyingøn midi ja tyanitanaapy ja yjaa'y."

¹² Ixymts mee ndukmadøy jøts ku nøjxx ja tiidyu'unin ñaxy, ne'egi kajaa yø yjade'embj jaa'y ja ayo'on tymbyaattit, jøts nigidi jade'en y'ayo'ombaattit ne'egi ja kawindiyy jaa'dyi pøn jam Sodoma kugajp'ajttøø.

Ja ayo'on midi tyanaxtip ja ka'øgyajp

¹³ 'iCorazingit jaa'dyi, Betsaidit jaa'dyi, mjanch'ayøøy meets, ti jade'en mnadyatuujnidip! Ku jeexyip jam kajpjotp jam Sidøn jam Tiro ne'egi yiktuñ ja milagri'ajtin midi meets ya tø myiktu'unxi, windi'ixyip ja jeexyip ja chinaa'yin tyiktigajtsnidi, ku ja pyøky jeexyip tymchaachjawidi.

¹⁴ Kuts nøjxx ja tiidyu'unin ñaxy, mgu'ayowipts meets ja jinaxy, nika'ap ja ne'egi jadine'en y'ayo'odit ja jaa'dyi pøn tsinaadyip jam Tiro jøts jam Sidøn,

¹⁵ jøts meets Capernaumit jaa'dyi, zma mee xijy tø mdyimyja'aty, tsajpjøtpy? Pø japxi meets ayodaajkjøtpy mnøjkxtit.

¹⁶ Jøts ja Jesús ja pyabøjkpitøjk ja tnimaay:

—Pøni pøn mbatmadojidip, øts idø'on ja wyinaty xpatmadoodip; pønts mgagupøjkidip, øts idø'on ja wyinaty xkagupøjktip; pønts øts jade'en xkagupøjkp, ja'ats idø'on ja wyinaty kyagupøjktip pøn ø xkajxp.

Ku wyimbejtøø ja ñidugui'pxmyajkpi jaa'y

¹⁷ Xjats ja ñidugui'pxmyajkpi jaa'y ejtni xoni yjanchwimbejtnidøø, jøts ja wyandøø:

—Windsøn'ajtim, tøbaat øøts ja miku' xmimadøy ku øøts ja tø ngajpxpidsimy mets mmøk'ajtingøjxp.

¹⁸ Jøts ja Jesús ja tnimaay:

—Janch jade'en, ojtsts øts ja miku' n'ixy ku ja kya'ukmajadakni ja myøk'ajtin ja'agøjxp ku ja pyidsiimy jap tsajpjøtpy.

¹⁹ Øtsts meets ja nmøk'ajtin tø nmø'øy jøts ka' sa mjattit. Øy meets ja tsaa'ñ øy meets ja kajpy xjadawa'kpety, øy meets ja miku' ja myøk'ajtin sa mjadatunwa'añidi, mimajadaajkip meets yja' ja' jøts meets ja ka' sa mdunit.

²⁰ Kadits yø'øyi tu'ugyi xajotkujk'atti ku yø miku' mmimadøyidi, ja' mda-jotkujk'attip ku ja Dios m'ejxkapyidi xemikøjxp jap tsajpjøtpy.

Ku ja Jesús xyonda'aky

²¹ Winets ja Jesús tjantjyaxondaajky ja Espiritu Santo, jøts ja wyaañ:

—Dios Teety tsajpjotpit, yikjujky'ajtpi ya naxwiñ, nmøja'wip ngunuu'kxyja'wip ja'agøjxp ku tø xamidsøky o pøn ja mnitsoojkin, jøts yø wijyjaa'y ja tø tkaja'gyukidi kø'øm, ne'egi tøts ja xuk'ixy xuknijawi pøn idø'on ka'ejxiyimdi. Jade'ents Teety tø xuñ sa kø'øm xamidsøky o pøn.

²² "Tum ja' øts nDeety xuktump midi ja kø'øm tyunwampy. Ka'ap øts pøn wa'ats xnijawi sam øts nDeety kø'øm xnijawin, nika'ats øts nDeety pøn wa'ats ñijawiyi sam øts ja kø'øm nnijawin. Jøts pøni pøn øts ja nduknijawiwampy, ja'ats ñijawidip ja Dios Teety.

²³ Winets ja pyabøjkpitøjk ja twin'ejxji'jky jøts ja yide'en ja'ayi yiknimaadyøø:

—Janch nekim meets ku meets ja kø'øm xtyimy'ijxy xtyimñijawi midi meets ixa kø'øm mdyimy'ijxpy mdyimbyatpy;

²⁴ may Dios kyugajpxy, may windsøndøjk yø kø'øm tja'ejxwåndøø tjanijawiwya'andi midi meets ixyam kø'øm m'ijxpy mnija'wip, nika'ats ja t'ejxtøø; ojts ja tjamadowa'andi midi meets ixyam kø'øm mmadøøpy, nika'ats ja tmadoodøø.

Ku ja samariit jaa'y yjotwa'añ

²⁵ Xjats tu'uk wya'kukiyii'ñ ja kajpxwejpidi jøts ja nugo kajpxy'ejxwa'añ ja Jesús, yide'en ja tyiktiy:

—Windsøn, ¿sudso ø ndu'unt jøts øts n'anmija'win ñitso'ok'att xemikøjxp?

²⁶ Jøts ja Jesús ja y'adsojimbejtøø:

—¿Kidimts jap tø x'ixy nøkyjøtpy midi ja Moisés kyutujk myøøt'ajtpy, sa ja xja'gyuki?

²⁷ Jøts ja kajpxwejpi y'adsøøy jøts ja wyaañ:

—“Amumjoojt x'ajot'att ja Dios, ma'in m'anmija'win ma'in mwimmaa'ñ myajada'aky jade'en ja xwindsø'øgit; jøts nayide'en ja mmigu'uk xpa'ayo'ot sam kø'øm mnabya'ayøyin.”

²⁸ Winets ja Jesús ja ñimaa'jyøø:

—Tiy janch idø'øn mjanchwa'añ. Pøni mbadumpy yø jade'en, nitso'ok'atpts ja m'anmija'win.

²⁹ Jøts ja kajpxwejpi ka'ap ja ttajotkuki ku ja jade'en yik'adsøy, jøts ja tnimaay ja Jesús:

—¿Pøndsik øts idø'øn ndsaachmigu'uk'ajtpy?

³⁰ Jøts ja Jesús y'adsøøy jøts ja tnimaay:

—Tu'uk idø'øn ja jaa'y, jam ja wyinaty kyida'aky ma ja Jerusaléngit tuu' jøts ja ñijky Jericó, xjats maa'tspi ja pyajttøø jøts ja wa'ats yikwimaa'tskijxy, wyet ñaa'ny yikpøjkijxy; øy øy yikwinwøjpy yikjøpwøjpy jøtsnim ja yiknikejky, jawaani ja tkayik'oo'knidi.

³¹ Xjats jam jotmøñ wyinaajky nay jam tu'uk ja israelit teety; øy ja tja'ijxy, wyininaajk ja'.

³² Jøts jadu'uk kyida'kmøø ja Leví yjaa'y jøts ja nayide'en twininaajkmaa, øy ja tja'ijxy.

³³ Winets jadu'uk ja tuu'yø'øbyi kyidaajky Samariit jaa'y, jøts ku ja ojts jade'en t'ixy xjats ja wyimmaa'ñ ja tyimchaachmiiñ ku ja jade'en yik'ayowim.

³⁴ Jøts ja wingon twingunøjkxiyii'ñ ja tsaachibi, xjats chaachi ja tsøøyiyi, ojts ja tpiaktaajki ja aceite møøt ja vino jøts ja t'adsujmi ja chaachi. Winets ja ojts tyikpety kyø'øm jiyujkøjxp jøts ja ojts tyikja'aty ja'taajkjotp, jamts ja tpa'am'ejx tsunajxy.

³⁵ Jøts ku kyimjabom'ajty ku ja samariit jaa'y wyinaty choonwani, jøts ja tju'jty majtsk ja myeeñu'nk jøts ja tkømmøøy ja kudøjk, yide'en ja tnimaay: “Ejx'et yø jaa'y, mo' pøni ti ka'ejtxip, jøts pøni ka' yø meeñ tpaaty ixa nmø'øy, yiktunts mgø'ømeeñu'nk, ja øts ja ngubatt ku nwimbett jadigojk.”

³⁶ Xjats ja Jesús tyiktiy:

—¿Pønts me m'a'ejxip migu'uk'ajtip ja jaa'y pøn ja maa'tspi yiktsaachidyøø?

³⁷ Jøts ja kajpxwejpi wyaañ:

—Ja' ja migu'uk'ajtip pøn ja ojts y'ayo'ijxy.

Jøts ja Jesús ja ñimaa'jyøø:

—Nøjxkts jøts nayide'en xu'unt, jøts nayide'en mjaa'y'att sam ja jaa'y'in pøn ja myigu'uk ojts t'ayo'ixy.

Ku ja Jesús yja'aty jam Marta jøts María tyøjkwindum

³⁸ Xjats ja Jesús jade'en wyidity jøts ja yja'jty ma kajp wyinaty tu'uk, jamts ja tø'øxyøjk ja tu'uk wyadsoojoø jøts ja ojts wyayi tyøjkjøtpy, Marta dø'øn ja xyøøw.

³⁹ Jamts myiga'ax ja tu'uk, María'ajtp ja', ja'ats twingu'ixajkiyi'ñ ja Jesús jøts ja tpatmadøy pøni sa ja wya'añ.

⁴⁰ Jøts ja Marta, ja' ja jam kyami'awatsip ja tyøjktunk, jøts ja tnimiñ ja Jesús jøts ja tnimaay:

—Windsøn'ajtim, ¿kidi sa mwa'añ ku øts yø nmigu'uk nadyu'uk xuk-tunwanguixy yø tunk? Nøjmi waani jøts ø xpudøkit.

⁴¹ Jøts ja Jesús y'adsøøy:

—Marta, Marta, yø' me nugo mdajotkijxpy mdajotmay'øø'kpy yø mdunk.

⁴² Ka' mets yø ne'egi x'øyjawi yø øybi winmaa'ñ midi xemikøjxp tamp, ja'ats yø María tø tja'gyuki midi paat'ajtip. Ti pønts yø xijy ukpøjkxiniyip jadigojk.

11

Ku ja Jesús tnanky'ixpiky ja Dios'ajot'ajtin

¹ Xjats idø'øn ja Jesús jam ja wyinaty ja Dios Teety t'ajot'aty, jøts ku ja y'abajtiyi'ñ, winets ja pyabøjkpitøjk ja nidu'ugin ñimaajyøø:

—Windsøn'ajtim, tukjajtk øøts ja Dios'ajot'ajtk, ti sa ja Juan ttukajty ja Dios'ajot'ajtk ja pyabøjkpitøjk.

² Jøts ja Jesús y'adsøøy jøts ja wya'añ:

—Ku mdsapkajpxtit, yide'en mwa'andit:

Dios Teety tsajpjotpit,
kuuyi mets jadu'uk øy wa'ats.

Øyts ku xmimiñ ja mgutujk midi mdanitanaapy ja mjaa'y.

Yikjatts ya naxwiñ nayide'en kø'ømdsojkingøjxp pøni sa xamidsøky nayide'en sam jap xuñin tsajpjøtpy.

³ Møøkyts øøts ixyam ja ngaajyik n'uujkik midi øøts xka'ejtxip.

⁴ Maa'kxik øøts nbøky, kumi tø øøts nayide'en nmaa'kxuky pøn øøts xjem-dump xedump.

Agidyujk øøts axajtujk øøts, kidi øøts xmajtstu'uty, jøts kidi myajada'aky ja miku' yja'.

⁵ Jøts ja yjaakwaañ:

—Jade'enin n'ukpiktaajkin jøts ku o pøn ja myigu'uk jam tu'uk, jøts ja tnidsøñ møjtsuu'm jøts ja t'atsnøjmi: “Migu'uku'nk, tun may'ajt t'uk'anuu'kxk øts tigøøk ja mdsapkaaky, ngubatp øts.

⁶ Nmigu'uk øts idø'øn tø yja'aty ndøjkjøtpy, ja'ats øts idø'øn njadukaawyampy, ka'ap øts nja' tyimñiti.”

⁷ Jøts ja yjadu'ukpi yide'en n'ukpiktaajkmant y'adsøy japyi tyøjkjøtpy: “Kidi øts jadine'en nugo xjanchnemy; aduky yø tøj k jøts ixyp øts n'unajk nmøøtmā'ay maabajtkijxpy; ka'ap øts yap nbidø'økwa'añ, jade'ents øts inet ka' ti nyakt.”

⁸ Yide'ents øts ja ndyimy'a'ejxi pø myigu'ukxi ja', øy ja yjagabidø'økwa'añ jøts ja t'atsmo'ot midi ja myigu'uk ja amidojyiyip, kuwanits ja tjanchnatu'unt jade'en, y'atsmøøgyøxp idø'øn ja' pøni ti jaty ja chøjkpy jøts ja jade'en ka'ap y'ukna'amniyit, pø naña'amixi ja kyatsøjkpy.

9 Paty mee yixxon ndukmadøy: Jøts x'amido'odit xpøktso'odit ja Dios, mmo'o'ojpts meets ja'; mdukpaadip meets ja' pøni ti meets mga'ejtxidip; myik'awaajtsxiyidip meets tøj'kaaw ja' ku øy ma mgugajpxidit.

10 Paty ku pøn o ti t'amidøy, yikmøøpyts ja'; ku pøn o ti t'ixa'ay, pyatpyts ja'; ku pøn tøj'agaj twingøxy, yik'awaajtsxiyipts ja o pøn.

11 '¿Ku mee wyinaty m'uk'u'nkteety'aty jøts ku m'u'nk m'amidowidit ja tsapkaaky, wan meets m'aaw mjoojt ndejin myajada'akt jøts meets tsaa ja xkøjyit? ¿uk xmo'odit ja tsaa'n yam meets ja ajkx ja mja'amidøyi?'

12 ¿uk xmo'odit ja kajpy yam meets ja tutu'uty ja tømja'amidøyi?'

13 Øyts mee mabaat mjagatyimy'øyjaa'y'atti, mjaajttipts ku xmo'odit ja m'u'nk m'una'jk midit øy tsuj pidsømp, itits ja Dios tyungip, pø tsajpjøtpxi ja', myo'opts ja' ja Espiritu Santo pøni pøn ja amido'oxiyip!

Ku ja Jesús yiknimaay jøts ku ja miku' myøk'ajtin ja tyiktuujni

14 Xjats idø'on jade'en ngøjmyi, jam ja Jesús wyinaty tyikpidsimy ja miku' midit jam wyinaty tyik'ejtnip uum tu'uk ja jaa'y; jøts ku ja miku' pyidsiimy jøts ja jaa'y jaty kyajpxijky. Jøts ja mayjaa'y janch ñigyumaap ja tyimyja'widøø ku ja jade'en,

15 jøts ja winaagin ñømdøø:

—Ja møj miku' yø jaa'y ja myøk'ajtin yiktuujnip, ja' yø tyuktapidsimpy yø myimiku' midit yø jaa'y myøø'ajtp, yø' wyindsøn myøk'ajtindi yiktuujnip.

16 Pømbits nugo ttatundip jøts ja tjøt'ejxwa'andi, ja milagri'ajtin ja y'amidoodip jøts ja tyimdyuk'ejxidit midit kidakp tsajpjøtpy.

17 Wa'ats ja tñjawi sa jaty ja wyinaty wyinmaydi, jøts ja tñmaay:

—O pøn windsøn, ku kyutujk ja chepta'aky jøts yjaa'y ja ñawya'kxyi kawinækpiky jøts ja xem yam cheptundi agøømyidi, nanxyøjxidipts ja jade'eñi jøts ni ja kutujk niti kya'ukwani, uk kuts tu'uk migu'uk agøømyi cheptundi jøts ja ñawya'kxniyidi, agøømyits ja xem yam ñanxyudigøyidi.

18 Nayide'ents miku'mi pøni nawyanwa'kxip ja køømyi jøts ja agøømyi ñanxy'ayo'ombaadyi, ¿windemts ja jeky y'ejtnit ja myøk'ajtin, kidi ja jaty kyudigøøñit? Yø' øts idø'on jade'en xyikwamp ku meets mw'a'añ jøts ku øts ja miku' myøk'ajtin nyiktuujniy ku øts yø jaa'y ja miku' ngajpxpidsøjmiy;

19 pøni ja'ats øts ja myøk'ajtin njanchyiktuujnip, ¿pønts meets mmigu'uk yja' yiktuujnidip ku ja tkajpxpidsømdi ja miku'? Pø yø'øxi mee køøm mni'øø'niyip jøts ku mee nugo mgajpxigøy.

20 Diosts øts ja myøk'ajtin nduktapidsøjmip yø miku'di, yide'en idø'on xja'gyukidit jøts ku ja Dios tøm tyikmeni ja kyutujk midit ja tyani'tanaapy yjaa'y.

21 'Ku tu'uk jotmøkjaa'y t'ejx'ity tyøjk, janch yixxon ja ta'tspiky tømøjmjøkixy ja ta'o'jk, pønts ja mayip jade'en, jade'ents pyikta'aky ja jap tøj'jøtpy jotkujk tyik'ity, ka'ap ja ti tkumay.

22 Jøts kuts jam jadu'uk jawaani jotmøk yja'aty jøts ja myimajada'agiyi, tuki'iyi tya'o'jk ja pyøjkxiyi midit ja y'uktamøj, jøts pyikta'aky ja yikja'abøkøjxni ti jaty ja jam yjagyejpy.

23 Pøn ø xkabudøjkip, ja' øts idø'on xmidsøpwap; jøts ku øts pøn ti møøt njapøkmuw'a'añ jøts ja jinaxy tøkwa'kxy.

Ku ja miku' jadigojk t'awimbeti ja chinaadyaajk

24 'Ku ja miku' tmajtstu'uty ja jaa'y, jøts ja nugo wyidity o ma tømøts etjøøjty, tja'ixa'ay ja pyoo'kxaaajk; jøts ku ja nima tkapaaty, jøts ja wyinmay: "Tiku øts ndøjk jadigojk nga'awimbeti ma tømndøøñ."

²⁵ Jøts ku ja wyimbity, jade'ents ja jaa'y ja tpaaty sam tu'uk ja tøj k tawa'ats, pe'ety jaaxy ja jap.

²⁶ Winets ja chøøn jadigojk jøts ja janıwıxujk tjaaktyımy'atsway ja myımıku' jawaani ka'øydi sam ja kyamajada'agyın, jøts ja jadıne'en ttatøkıdı ja jaa'y, tsınaadyaajk ja tyıkwa'andı, jøts ja jaa'y jade'en jınaxy myøwa'añ, nıgıdı ja y'ıjty jade'en øyım ıdø'øn wyınaty ja mıku' ja jam tjamøø'taty tu'umchi.

Pøn ja xemikøjxpıt xondaajkin myøø'tajtpy

²⁷ İxam ıdø'øn ja Jesús wyınaty jade'en wya'añ ku tu'uk tø'øxyøjk jam jaa'y agujkp møk'ampy wya'añ:

—Janch kawınmaañı tmøø'taty ja xondaajkin pøn tø myıke'exyı jøts pøn ja che'tsk tø mduktayeegyı!

²⁸ Xjats yıde'en ja Jesús y'adsøøy:

—Janch nekim ja'adı pøn tpatmadoodıp ja Dios kyajpxy jøts ja jade'en tpadundi!

Ku ja ka'øyja'y ttamıdowdı jøts yıktuk'ejxtıt ja mılagrı

²⁹ Namyuk'adøjtsıdıp ja jaa'y jam wyınaty ma ja Jesús, jøts ja tnımaabyınaxwa'jky:

—Nıwıne'en ja yambi jaa'y kya'øyıdı, ñadyıyı tnıjawıwya'andı pøni janch ku nDios U'ngı, paty t'amıdowdı jøts yıktuk'ejxtıt ja mılagrı'ajtıın; nıwıne'ents kya'ukyıkuk'ejxnıdı, wan ja'ayı mıdı ja kugajpxy Jonás ojts tyuk'ıjxyıdı.

³⁰ Nayıde'ents sa ja Jonás ojts t'ejxpaj'taty ja Nıııve jaa'dyı, nayıde'ents øts ya'atpı jaa'y x'ejxpaj'tatt.

³¹ Ku wyınaty kyutuky ja et ja xøøw, ku ya'atpı jaa'y nøjkk yıktııdyıdı, jøts ja windsøndø'øxy yø ñıdanaagyukyıdıdı jøts ja ñı'øønyıdıdı pøn tnıdsø'on jagam et ja Salomón, jøts ja t'ejxøø tnıja'wıyøø ja wyıy'ajtıın; ıxyats jadu'uk tø kyaxı'ıky jawaani wıy mıdı tjınajxp ja Salomón, nayıde'ents meets ja xkagupıky.

³² Nay jats ja Nıııve jaa'y wya'kukıdıtı ku ja tııdyu'unın ñaxt ku yıktııdyu'undıtı ya'atpı jaa'dyı, jøts yıknı'øønyıdıtı; ja'agøjxp ku ja Nıııve jaa'y ne'egı tyıktıgajstøø ja chınaa'yıdıtı ku ja Jonás ja ojts tyukmadøyıdı ja Dios kyajpxy ja Dios y'ayuujk; ıxyats jadu'uk tø kyaxı'ıky pøn tyımñıja'wıp wa'ats, nıgıdı ja Jonás y'ıjty jade'en tnıjawı, nayıde'ents meets ja yam xkagupıky.

Ja øy jaj mıdı jaa'y tyıkja'gyukıp

³³ Ka'axı pøn jaj ttuknıdøøbyøki jøts ja yıkyu'utst o ma, uk jøts ja yıkujupt kajuun patkı'py, ja'agøjxp ja tyøøbyıky jøts ja yıkpıkta'akt ma yjajıt, kuts jam pøn tyøkıt tyuk'ejxpaatpıs ja o tı.

³⁴ Jade'en ıdø'øn yø mween n'ukpıktaajkınt sam jajın, yø'øts tyıkujajtaajkıp tyıkudøø'kxaajkıp amuum ja mne'kx ja mgojpk; kuts ja mween y'ø'y'aty nayıde'ents ja amuum tjagyeypy ja ne'kx ja kojpk, ka'ap ja ttuktuñ kya'øybi.

³⁵ Øyımts x'ejxtıt jøts kıdı xyık'ooktı ja jaj mıdı wa'ats jajp, jøts kıdııı jade'en mjattı sam jaj kya'ıtyın, sam ja jajın mıdı kawa'atsajajp jøts yık'ayowın kube'ets kugoots.

³⁶ Pøni mwinmaa'nbyattıpts øy yıkxon, ja jajts ıdø'øn ndejınt mgayık'oo'ktıp jøts ka' jade'en m'etti sam o pøn kugootstujpy chøøının nıtı wınmaa'ñ, o nugo chaachjawın'ejx'ooktı. Kuts meets, wa'ats meets ja mduk'ejxpaadyıdı pøni tı dø'øn m'ejxwandıp, ka' tı jadu'uk chøjkyı, jade'en ja mıkujajtaagyıdı myıkudøø'kxaagyıdı sam jaj wa'ats mduk'ejxpaadyıdı o tı.

Ku ja Jesús ttamigajpxy sa y'adø'tsti ja fariseotøjkti møøt ja kajpxwejpitøjkti

37 Kuts ja Jesús jade'en kyajpx'abajtiyii'n, xjats fariseo ja tu'uk wyaajøø tyigam kaabyi. Kuts ja jam tyøjkiyii'n jøts ja y'ixaajky, kaabyajt twinguwa'atsiyii'n.

38 Jøts ja fariseo janch ñigyumaap tyimyja'wiyii'n ku ja t'ijxy ja Jesús kyagøbujy yam ja kyaawya'andi, jade'en idø'on ja tsinaa'yin'atti ka'ap ja nugo kyøbujti, yide'en ja tyikajpxti jøts ja' ja tyanawa'ats'ajttip ku ja kyøbujti, jøts ja kyapøkyatti.

39 Yide'ents nwindson'ajtim ja tnimaay ku ja jade'en t'ijxy wyinmay:

—Jade'en mee fariseotøjk mjaay'aty, ja'ayi mee mjanchkamijotkukip sudso ja texy ja tas nikijxyi nadyijyi wa'ats y'ett, jøts ka'ap ja xunk'atti põni sadam ja yjøtpy. Ni xkaja'gyukidi kudam m'amp mjotp tum ja axøøkpi yigaappi xjamøøt'atti ku jaa'y nugo xwin'øøndi xwimaatsti.

40 ¡Nugo mee mdyimyoøty! ¿Ka' xnijawidi ku tu'ugyi ja kojpi tø tyik'øyi ja m'anmija'windi jøts ja pikta'aky?

41 Jade'enii Dios mgupøkiyidit ku amumjoojt mdsojkingøjxp xunk'attit ja pudøjkin. Jade'en ja m'anmija'win ja wa'ats'ajtin tpaattit.

42 ¡Mjanch'ayøøy me fariseotøjkti! Køx kida'ak meets xjanchkugubatkixy jøts ka'ap ne'egi xpadu'uxxidi midu ja Dios kyutujk jawaani ne'egi yjani'ane'empy, ku ja tsøky ja øy tiidyu'unin, ja pa'ayo'ejxx, jøts ja janchja'win. Ya'atpi meets idø'on ne'egi jawaani mjapaat'ajtip mbadu'ump.

43 ¡Mjanch'ayøøy mee fariseotøjkti!, ku mee tum jam mnachøkyidi mdsinaawya'andi tsaptøjk'okp windsønin. Jøts ku tuu'ajy, øy paat meets ja nagyajpxpoo'kxi xtsokti, myikwindsø'øgip myikwinjawip meets, ejxim meets jadi'iñi myikwinajxni.

44 ¡Meets tsaach'ataayjaa'dyi, jøts m'ayøøy mee kajpxwejpitøjkmidi! Jade'en mee mnankyaxji'igy sam ja oo'kpi kajuunin øy nikøjx kyaxji'iky jøts ka' nadyijyi tyikaxji'iky põni sadam ja yjøtpy.

45 Xjats ja kajpxwejpitøjk nidu'uk y'adsøøy jøts ja wyaañ:

—Windsøn, ku jade'en mwa'añ xuk'ayojip øøts yø nayide'en.

46 Jøts ja Jesús yide'en y'adsøøy:

—¡Mjanch'ayøøy mee kajpxwejpitøjk nayide'endi!, ku ja kutujk xyik'øyidi kamaabyim, ka' meets ja køøm x'uktuni, ja pujx ja kajp meets ja mdukmidanaapy, kamadøyim meets ja x'ukja'wiñi.

47 ¡Mjanch'ayøøy meets!, ku yam xjanch'ukiy'øyidi xyikpaadidi ja oo'kpi nipøts põn ja m'apteety yik'ooktøø, ja Dios kyugajpxy.

48 Jade'en yø yikja'gyukiñi sam o ti põn kajpxy'aty tyik'ity, kajpxy meets ja yjawi xyik'ejtni møøt ja mdeety'apti ku ja tyik'oo'ktøø ja Dios kyugajpxy, jøts meets ixyam xyik'øyimi xyikpajtimyi ma ja ñaxøjkidøø. Mdsaaçpa'ayøøpy meets ja xijy jade'en.

49 'Paty tam idø'on ja Dios kyajpxy wya'añ yide'en: “Ndanigaxp meets ngugajpxy møøt ngudanaabyidi, myik'ookpts meets ja winaaçin; jøts põnts jaakjata'andip, myik'ayo'ombaattipts meets ja'.”

50 Meets Dios ja mdagubatidip wine'enin ixa mnaxwii'ñitjaa'y'atti ku ja m'apteetyi tø tyik'ookti ja Dios kyugajpxy. Tuki'iyi ja tpayø'øgyøxt, jaayip ja tpayø'øbyinaxwa'akt kuuyip ja naxwii'ñit cho'ondaajky,

51 kuuyip ja Abel t'oo'k'awiyii'n jabaat ku ja Zacarias y'o'jky, ku jaa'y ja yik'o'jkøø jap tsaptøjkjøtpy ma ja altajr jap. Paty me ndukmadøy jøts ku Dios ja ttabayø'øty ja yamit naxwii'ñit jaa'y.

⁵² 'iMjanch'ayøøy mee kajpxwejpitøjkti!, ku x'ama'at'ajtidi ja Dios kyu-tujk; kø'ømyi meets ja mnadyamidsøkyi, ni xkabadumidits ja', jøts ni xkaduknija'wimidits ja abikpyidi pøn ja tjanijawiwyañdip.

⁵³ Ku ja Jesús jade'en wyaañ, jøts ja kajpxwejpitøjk møøt ja fariseotøjk yjantyim'ambøjktøø. Jantyimyikm'ambøjk ja Jesús jøts ja tanejkin'ampy tjanityimyiktøwdi ñadyijyi tigati.

⁵⁴ Øyik idø'øn ja ti t'ukmado'odit, y'amaa'tsk'ejxwāndipxi ja' jøts ja jatyi ttani'øønidit pøni ti ja kya'uk'ømyadoodip.

12

Ku ja Jesús tñigajpxi ja fariseotøjk kya'øwiyinmaa'ñ jøts yikjøpjawit

¹ Yikxon ja jaa'y yjantyimñañimujkpajtidøø mill'ampy, nugo yjanch'adøtsnidi, xem yam yjanchnadyateefiidi. Jøts ja Jesús ja pyabøjkpitøjk tñimaabyinaxwa'jky:

—Øyim mnay'ejx'etidit ejxim yø fariseotøjk kya'øwiyinmaa'ñ mdawin'iiñidi ti sa yø iiy wyanidi, jabi wa'atsts yø iiy ñadyijyidi.

² Wants uk jade'en, ka'axi ma ti yu'uch'ity, kuwanixi ja øy juuni yjady-imyikpaaty; uk kuts o ti yjayik'amaa'tsk'aty, kuwanits ja yiknijawi.

³ Jade'en'ampy ja wa'ats nøjxk yiknijawi ti jaty mee mdumpy amaa'tsk, ti jaty mee mgayiknigaxji'kpy, adsu'jkyts ja y'uknigaxjø'knit sam o ti xinaxy wa'ats kyaxji'iky. O me ti amaa'tsk xjakajpxy, øy meets ja pøn xjaduk-madø, wa'ats ja nøjxk yikajpxnaxy ejxim ti tøjxøjxp yikajpxwa'kxyin jøts yiknijawit.

Ku ja Jesús tñigajpxy jøts ku ja tu'ugyi pøn yiktsø'øgip

⁴ 'Mee migu'uktøjkti pøn jaty ø xpabøjkp, meets idø'øn nnimaapy jøts kidi xtsø'øgidi ja yikjaa'y'oo'kpidi, pø ka'axi anmija'win ja tjadyimyik'ookti øy ja wyanat tø tjayik'øky ja ñine'kx.

⁵ Ja'ats mee ndukmadoowampy jøts ku ja' xtsø'øgidit ja Dios pøn tyikutujkp jøts mnøjxktit ayodaajkjøtpy yam meets ja o'jkin tø xja'ixy. Ja'ats idø'øn mdsø'øgidip.

⁶ 'Ka' meets Dios m'ejxigøyi, çti sa ja nimagoxkpi joon chobaaty jøts ja yiktagujuy majtsk ja puxmeeñ?

⁷ Machøybaat meets mwaay ja myik'ejtniyi. Paty ka' mdsø'øgidit, ti sa ja mutsk jonuna'jk ja tkaja'dyigøy; maçts meets ja ndejint mja'dyigøø'ñiyit.

Pøn jaty t'øñigajpxp t'øñimadyakp ja nwindson'ajtīm Jesucristo jam mayjaa'y agujkp

⁸ 'Yikxon mee x'ukmado'ot, pøn ø xpukajpxip, pøn wamp mayjaa'yjøøjty jøts ku øts ja xpabiky, nayide'ents øts ja møk nnitanit jam Dios wyingujkp ma myay'ankilis ja jam møøt;

⁹ pønts ø xkabukajpxip, pøn wamp mayjaa'yjøøjty jøts ku øts ja ka' xpabiky, nayide'ents øts ja niwine'enin nga'ejxkapt, niwine'enin nganitanit jam Dios wyingujkp ma may'ankilis ja jam møøt.

¹⁰ 'Jaakyikmaa'kxtip ja ne'egi pøn ø tø xkaguidyimy'ødyejti, ja'ats nima niwindem ja kyayikmaa'kxtit pøni pøn tka'ømyigajpxtip ja Espíritu Santo.

¹¹ 'Kuts pøn myiknøjxkdit jam tsaptøjkjotp uk myikwaanøjxktit ma kutu-jktaajk ma kudunk ma tiidyumbi, kidits meets ja xajotmay'oo'kni, kidi meets ja xkumayjawi sa dø'øn jap mwā'andit, sa dø'øn jap m'adso'odit,

12 pø ja Espiritu Santoxi meets ja mda'awa'aniiyip pøni sa dø'øn jap mwā'andit, ja' meets jap myikajpxiyip ku tpaatt ja et ja xøøw juuni mgajpxtit.

Sa ja kumeeñ'ajtin xyikwinmaa'nmya'jtint

13 Xjats jam tu'uk wyaañ jam mayjaa'y agujkp jøts ja tnimaay ja Jesús:

—Windsøn, nimaajjik øts yø nmigu'uk jøts wan ø xmø'øy ja nmaay.

14 Jøts ja Jesús wyaañ:

—Yikxon me waani m'ukjaa'y'att. Ka'axi ø pøn tø xpikta'aky jøts meets ja mbikta'aky nyikwa'kxyit, uk jøts øts jade'en ndu'unt samì kudungin.

15 Nayide'en ja wyaañ:

—Øyim x'ejxtit, nay'ejx'etidim jøts kidi o ti kayakyim x'ejxti, kaja'ajip jaa'y ja y'anmija'win tyajujky'ajtpy xemikøjxp ku pyikta'aky ja may'ampy tmøø'taty.

16 Jøts ja yide'en tmadyakpaajty tu'uk ja ejxpajtin madya'aky midì ja kø'øm ñajtsja'wip jøts ja yiktamija'gyukit midì ja ñimadya'akwampy, jøts ja wyaañ:

—Jaa dø'øn wyinaty tu'uk kumeeñ'jaa'y jøts jantyimy'ejtp idø'øn pyikta'aky ja jam kyamjotp.

17 Winets ja tniwinmaa'yiyi'ñ jøts ja wyaañ: “¿Ti sudso ndabyaatt, sudso øts yø nbikta'aky ndu'unt? Ka'ats øts n'abøjk'ii'ñ ma øts yø nbøkjø'økt.”

18 Jøts ja yjaakwaañ: “Tø nniwinmayi sudso øts yø ndu'unt. Yø ndsa'jx tam ø nyikida'ap jøts ø nyik'øyit jawaani møjpi, jajts øts ja nbikta'aky nbøkjø'køxt ti jaty øts ja nmøø'tajtpy.

19 Winets ø kø'øm nnañø'ømxyit: Ja tidsik winmaa'ñu'nk xijy mjadyimydadsøjkpy jabi ixyats may pikta'aky midì kawinaak jumøjt m'ajot'atp; poo'kx pøk mets, kay uuk mets jotkujk xoni.”

20 Yam ja wyinaty jade'en wyaañ jøts Dios ja ñimaajyøø: “Jaa'gyumo'tpi, ixyam koots inet m'ooknit; jøts midì jap tø xpøkji'iky, ¿pøn yø tjat'atp?”

21 Jade'en idø'øn jaa'y yjaty pøn ja pyikta'aky nugo tniøkpaajtp jøts ja ya jotkujk ttuktanaxy ja et ja xøøw, ayoopts ja y'anmija'win ja yjaty jam Dios wyingujkp ja'agøjxp ku pyikta'aky ja ya kø'ømyi tø t'ajot'aty.

Ku ja Dios t'ejx'ity pøn jaty ja y'u'ngip y'una'jkip

22 Xjats ja Jesús oojknim tnimaay ja pyabøjkpitøjk:

—Yikxon ndukmadowdi: Kidi nugo xpamaydi xpadajti ja mgaajjik m'uujkikti, ti mnidsøønìdip, ni ja mwet ni ja mnaamy mee xkaguma'aty ti mwet'attip.

23 ¿Ti jade'en ja jujky'ajtin yikpaaty sam ja kaaky jii'kxyin? Pø ka'axi. ¿Jøts ja wet ja naamy mibaat ja t'uk'amibaat nayide'en pøni sa dø'øn ja ne'kx ja kojpk yikmøø'taty?

24 Ejxti yø jøøky, ka'axi yø ñe'epti kyojti, ka'axi pyikta'aky yi tyikpidø'økti, ka'axi pyikta'aky yø tpøkjø'økti jøts tpikta'aktit jap tsa'jxjtpy; øy yø jade'en yjagatundi, ja Diosts yø yikjujky'ajtidip. ¡Tits mee mdsow sa ja jiyujk jade'en ja yja' yikmo'odi!

25 ¿Pøn kø'ømdsøky tyimy'uknankyojnìp jagujkp metrìn øy ja mabaat jade'en tjadyimyjatsøky?

26 Pøni ka'ats tam ja jade'en yjaty, ¿tigøjxpts ja yikmijotmay'ookt?

27 'Uk'ejxtim sa o ti pijy yøñ, ¿ti pee'tip kojtip yø'? Jøts tiy janch meets idø'øn nnøjmi jøts ku ja windsøn Salomón nijade'en kyanaxyojxøø sam yø pijyin, øy ja mabaat tjabiktakijxy ja xyox.

28 Sats idø'øn ja Dios jade'en txøxy ja pijy midì jaty ixyam o madsoo yondip øy ja jabom yjayiknitsaañit; kuts meets, ¿tiku meets idø'øn ja mgaxoxit? ¿Sudso meets ja xpamay xpadajy ti jaty mga'ejtxiyidip?

²⁹ Paty wingujk jotkujk mwidettit, kidi meets ja xkumayja'wiñi mā xpøktit ti mga'adyip m'uuktip.

³⁰ Jade'en naxwii'ñit jaa'y icyamdi pøn ja Dios yja' tkaja'gyukidip, ja' pyawidejtíp tparamydi tpadajti ja pikta'aky ti jaty chojktip; kuts meets, wa'ats meets Dios Teety mnijawiyidi ti jaty mga'ejtxidip.

³¹ Ne'egi kupøjkidits ja Dios chinaa'yin ja kyutujk midi ja tyanihanaapy yjaa'y, jade'ents meets ja mmo'ojidit ti jaty mga'ejtxidip.

Ja kunuu'kxy jujky'ajtin midi jap tsajpjøtpy

³² Kidits mdsø'ogidi, jade'en me n'ejx'ity sam pøn ja byorreegu'nk t'ixy; o meets idø'øn mganamayi, mdanitanitypts meets Dios Teety ja kyutujk, jade'en meets ja mdamidsøkyi.

³³ Tookti pøni ti jaty jam mmøøt'ajttip jøts ja Dios jade'en'ampy xamiyoxtit ku xmo'odit pøn jam ti ka'ejtxidip pøn ayoodip; jade'en y'øpyidsø'ømt ku xpaattit ja jujky'ajtin midi jap tsajpjøtpy, midi ka'ap mwindigø'xyidip.

³⁴ Pøni mā xnajtsjawidi xpaatwa'andi ja jujky'ajtin, nay japts meets ja mwinnmaa'ñ y'ity.

Ku ja Jesús wya'añ ku jøp'ejx'ity n'ejtindit

³⁵ A'ejxi abaadi mnanky'etidit.

³⁶ Jade'en sam tumbi tjøp'ixy ja wyindsøn ku ja ñijxxy tø'øxñi'ukpi, jøts kuts ja wyimbett jøts ja jaty tyik'awaajtsit ja tøjk'aaw ja'ayi ja yja'att, ja'ayi ja kyugajpxit.

³⁷ Nekim ja tumbidi pøn kajxa'aky pidsømdip ku ja wyindsøn ja pyaadyidi wijy kejy, ku ja kyama'adi kya'etti yam ja yja'aty; jøts tiy janch meets idø'øn nnøjmi, wan ja tka'uknagyumayi kø'øm jøts ja tyik'ixa'akt ja tyumbitøjk jøts ja ttukwinguwaadsit ja kaabyajt, wan ja tka'uktawindsø'øgi ja kaaky ja tojkk.

³⁸ Øy ja juuni yjaja'aty, yjaja'aty ja tsuu'm yjaja'aty ja jøpkyoots, kuts ja kyayikmaa'gyubaadidi ja'abi tumbits idø'øn nekim t'ejxtip.

³⁹ Ku o pøn pyikta'aky t'ejx'ity tyøjkjøtpy, ejtp ja tjøpja'wigyunaxy ja maa'tspi, ka'ap ja ñagyumaadigøyi pøni juuni dø'øn ja y'ukja'att.

⁴⁰ Nayide'ents meets idø'øn mjøp'ext ejtp; ku øts jade'en jotmøñ nme'ent yam ø ngayikumay, pøn ja naxwii'ñit jaa'y ja myøjkudanaabyi'ajtpy.

Ja tumbi pøn øy ejx'ejtp

⁴¹ Winets ja Pedro wyaañ jøts ja tyiktiy:

—Windsøn'ajtim, ¿øøts yø dø'øn yø jade'en xamimadyakp, uk niduki'iyi dø'øn xnøjmi?

⁴² Jøts ja nwindsøn'ajtim wyaañ:

—Ja tumbi pøn yiktump ku ja myadøy ku ja yja'gyuki, ja'ats ja wyindsøn tanipøjkip pøn jaty ja jap tyøjkjøtpy jøts ja tyika'aty sa pya'at'atyin.

⁴³ Nekims ja'adi pøn jade'en tpadundip ti jaty ja wyindsøn ja tø tyani'pikyidi. Øy ja juuni yja'aty, ixapts ja jade'en ttayø'øbyety, ixap ja jade'en tyundi.

⁴⁴ Ndyimñajtsja'wip øts jøts ku ja wyindsøn ja pyikta'agit jøts ja tyuk'ejx'etit tuki'iyi pøni ti jaty ja jam yjagyejpy.

⁴⁵ Pønts tkajøp'ejxp ja wyindsøn, pøn jade'en winmaapy, jekñim ja tijy yja'att, ku ja yiktaminikaagi ja myøøtumbi jøts ja jaty øy sagasa ttuñ ja myøøtumbi, ja yaa'y ja tø'øxy, ja'ayi ja chøøñ ja wyindsøn nekim ja winet kyay y'uuky, jøts ja myuktigøøñi,

46 kuts ja wyindsøn wyimbity øy juuni yam ja ka' tjøp'ixy yam ja niwine'enin tkagumay; ixjadam ja yjā'aty jøts ja tyagubetyi ja'agøjxp ku kya'øy'aty, çmā dø'øn ja yiktumbi jade'en?

47 Pønts wā'ats tjanija'wip sā dø'øn ja wyindsøn tjatsøky jøts ja nika' tjøp'ixy jøts ja nika' tmimadøy pøni sā ja yjawa'añ, yikxonts ja nøjcx yiktagubety, yikxon ja yjantyimykwojpmåtst.

48 Pønts tkidyimñija'wip pøni sā tam idø'øn ja wyindsøn ja tjatsøky, jøts ja ka'ap tjøp'ixy jøts ja ka'ap tmimadøy, ñiwyaanits ja ne'egi yiktagubatt, ka'ap ja ne'egi jadine'en yikwopt. Ti sā o ti jade'en pøn o ti may yikmøøpy, nayide'ents ja yik'amido'oxit may'ampy; pønts o ti yiktami'ajot'ajtjip, jinaxyts ja yikxon yiktabayø'ty.

Jesús køjxp jaa'y ñawya'kxyidi

49 'Ja tiidyu'unin øts ya tø nmimiñ naxwiiñ; janch tyimjyawamp øts idø'øn jøts ja jeexyip yam nyiktunkpatni!

50 Nnija'wip øts ku ndanaxt ja møj ayo'on, jndajotmay'oo'kunaxp øts ja jaanim kunim øts ja wyinaty tø ndanaxy!

51 Sā mee m'ukwinmay, çøy'ajtin xondaajkin ti øts yjawi tø ndanimiñ naxwii'ñit jaa'y? Nømp øts jøts ku ka', nanññawya'kxip øts jaa'dyi.

52 Yamnim inet tø cho'onda'aky, nøjcxp naxpts idø'øn jade'en tukmigu'uk xyiktepta'aktit øy ja tu'ugyi yjatsøonidi, nideety nidaakti, ni'u'nk ni'una'jkti. Pøn nimagoxkti, nawya'kxidipts ja', jøts ja ñayjibøkidit jagam ixkø'øm nama-jtsk jaty nidigøøk jaty.

53 Øts køjxp ja kawin'ijxyim ñayjawiyidit ja u'nkteety ja u'nktaakti møøt ja y'u'nk y'una'jkti, ja yaa'y ja tø'øxy, tum jade'en y'adø'østtit ja tsu' ja xa'kxy, ja u'nk ja møj't.

Ja ejxa'an sudso yiknijawit jøts ku wyinaty tø tmibaat'aty jøts kyøxt ja naxwii'ñit

54 Ñayi ñimaamyøø ja Jesús ja mayjaa'y:

—Ku x'ejxti ja yaak pyidi'iky mā xøøw yjexy winets mnømdi, tu'up tam inet, janchjajpts idø'øn ja jade'en.

55 O kuts ja poj wimbet'ampy yø'øy ku kyaxuxpyøjy, jats mnømdi, janch'anwamp tam, janch tøødipts idø'øn ja m'ayuujk, janchjajtpxi dø'øn ja jade'en.

56 ¡Mee win'øø'mbidi! Pøni mnija'widip tam sā kyaxi'iky ja et ja tsajp ku ti tyunwa'añi, çtikuts nayide'en xkanijawidi pøni ti dø'øn tunwajnip ya'atpi xøøw ya'atpi jumøjt ku ja møk'ajtin wyingaxi'iky jøts ja øy sagasā mjayik-tuk'ejxti?

Kajpx'øyidi jøts mnamyijotjimbetidit møøt ja mmidsep

57 'çTiku yikxon xkawinmagyukidi pøni sā dø'øn chøkyi, pøni sā dø'øn pyaat'aty?

58 Ku pøn mni'øøniwyā'añidi jøts ja myiknøjcxwā'añidi jam kudunk wyindum, namga'anin jam myiknijkxyidi tiku yikxon xkakajpx'øyidi jøts ja møøt mnamyijotjimbetit jadigojk, jøts kidi myiknijkxyidi jam tiidyumbi wyindum; çja ti nø'ømp ja windsøn jam? Pø mgøyakidipxi ja jam jøts mee myikøyakt mā ja tajk mā ja mayojr jamdi, ja'ats mee myikpuxøktøkiyip jøts mee myiktsu'unt.

59 Øts idø'øn wamp jøts ku jaanim mbidsø'ømdit ku wyinaty tø ja multa xkubatøxti.

13

Yajkpy øy'ajtin ja' ku ja tsinaa'yin tyigach

¹ Nayi winet et idø'øn ja Jesús jam ñimejnøø wingaagin ja jaa'dyi jøts ja ojts tyamimadya'agyi ku ja Pilato wyinaty tø tyik'øøky ja Galileit jaa'y, jøts ku ja jaa'ñi'jpy ja ttukmiyø'øyyii'ñ ja jiyujkni'jpy midu ja wyinaty kø'øm tø t'ukyik'ookti midu ja wyinaty kø'øm tø tyoxti.

² Jøts ja Jesús wyaañ:

—Jade'en mee mwinmay jøts ja' ja Galileit jaa'y kyujajtidip jade'en ku ja yjantymbyøkyundi sam jam jade'en ka' pøn jam y'etjotpti kyajpjtpti.

³ Øts wamp jøts ku ka'; ti pøn idø'øn ka'ookp, nayide'en mee m'ookt pøni ka' mdsinaa'yin xyiktigatsti.

⁴ Jade'en meets yjawi mwinmaa'ni, ja jaa'y pøn oo'ktøø nimaktuktujk ku ja pøch ja pyajtidøø midu wyinaty janch køjxp tanaapy midu yiktejp Siloé, jade'ents meets yjawi mwinmay jøts ja' ja kyubajtip ku ja jawaani pøky tyaja'adyidi sam ka' pøn pøn jaty jam Jerusalén tsinaadyip.

⁵ Nømpts øts ku ka'; nayide'en mee m'oo'køxt sam ja'ajindi pøni ka' mdsinaa'yindi xyiktigatsti.

Ku ja Jesús tmadyakpaaty ja iigi kipy midu' katøømiip

⁶ Xjats ja Jesús ttamadyakpaaty tu'uk ja ejxpajtin madya'aky jøts ja wyaañ:

—Tu'uk idø'øn jaa'y, jamts ja y'iigi tsa'am kam ja', ja'ats ja y'ats'ijxpy pøni tø dø'øn ja wyinaty tyøømi, jøts ja ni tu'ugin tkapaajtøø ja tyøømi.

⁷ Jamts idø'øn tyumbi tu'uk pøn ja kam t'ejx'ejtp jøts ja tnimaay: “Uk-madowim, tigøøk jumøjt øts ixyam kujk njamiyø'øyy jøts øts ja iigi tsa'am njatukwa'añ, ni juunits ø ni tu'uk ngapaatynim. Yikidaagøjxnits yø ñiguipy; nugøts ja naajx yø yjawi tyikwindujkni.”

⁸ Jøts ja kam ejx'ejtpi y'adsøyy jøts ja wyaañ: “Wanimts, windsøn, tjaak'uk'ity jadukjumøjt; n'ukuyu'up øts, n'uktajyuu'ngip øts yø naajx jøts øts ja pu'uty nbiktaajkit.

⁹ Kidi wan jade'en tyøømi; pøni ka'ats, winets yikpo'jtjø'økt.”

Ku ja Jesús tyikmøkpiky tu'uk ja tø'øxyøjk poo'kxin xøøw et

¹⁰ Jøts idø'øn ngøjmyi, poo'kxin xøøw wyinaty, jøts ja Jesús yik'ixpiky jam tsaptøjkjotp.

¹¹ Jamts idø'øn tu'uk tø'øxyøjk myaktuktujk jumøjtjip pa'am ja wyinaty tø pyaajtniyi. Jøts ja jadine'en kyatsø'øky, tø ja yjigujkxidyigøøni, miku' idø'øn ja wyinaty jade'en tø tyu'ni jøts ja niwine'enin kya'ukoogukini.

¹² Ku Jesús ja y'ejxi, winets ja yaajxiyi, xjats ja ñimaajyøø:

—Tø mba'am mniwaajtsniyi, møk møjaa'wni mets.

¹³ Jøts ja ojts tkønixajy, jøts ja tø'øxyøjk nay jaty kyoojukiyii'ñ jøts ja tiy tyaañ jadigojk, winets ja ttukmija'wiyii'ñ ttukunuu'kxyja'wiyii'ñ ja Dios.

¹⁴ Jøts ja møjaa'y midu tnigubajk'ajtp ja tsaptøjk tjantjami'ambijky ja Jesús, tigøjxp ku ja yiktsø'øky poo'kxin xøøw, jøts myigu'uk ja tnimaay:

—Paty tu'unin xøøw jaa tudujk xøøw tø yikpikta'aky jøts jaa ndu'unindit; mendits øy juuni nugo ku kyapoo'kxinxøøwi, jade'en mme'endit pøn jaty ja nankcho'ogi ttsojktip.

¹⁵ Jøts nwindsøn'ajtim yide'en t'adsøyy:

—Mee win'øø'mbidi, ¿m'ukyik'ijtpy meets mjiyujk mdsakaa miwø'ømbety, jøts adøødsi xyik'etti ku pyoo'kxinxøøwi? ¿Ti kidi meets ja xyikwinaky jøts meets nøø ja xaniwøpy?

¹⁶ Tits ya'at tɔ'oxyɔjk kyubatp ku yɔ kyatso'okt ku poo'kxɪn xɔɔw, pɔ Abrahamts yɔ tyety'apip jɔts ja miku' yɔ myaktuktujk jumɔjtɪp yikpa'ambajtniyi, ʒsuds'o'ampyts yɔ kyamɔkpɔkt ɔy yjapoo'kxɪnxɔɔwi?

¹⁷ Ku ja Jesús jade'en wyaañ, jɔts ja myidsep chɔ'dyunbattɔɔ; jɔts ja mayjaa'y tyaxondaktip ja' ku ja t'ejxti jade'en ja Jesús myɔk'ajtin tyikwingaxi'iky.

Ku ja Jesús tmadyakpaaty ja mortas tɔmt

¹⁸ Yide'ents ja wyaañ:

— ʒTixik ja y'ukyiktami'ejxip ja Dios Teety kyutujk midi ja tyanitanaapy yjaa'y? ʒTixik jade'en?

¹⁹ Jade'en idɔ'ɔn n'ukpiktaajkin ja' sɔ mɔj mortas tɔmt midi ja jaa'y wyɔjpy kyamjɔtpy, kuts ja myuxy jɔts ja jade'en yɔñ sɔm o ti mɔj kipy yɔñ paxax paxax, jamts ja joon kyɔkxe'eky jɔts tyik'ɔyibaat pya'an ja jam mɔj jaty y'awaj y'axeeñ ja jam.

Ku ja Jesús tmadyakpaaty ja levaduri

²⁰ Nayinɔɔm ja Jesús:

— Tixik ɔts jadu'uk n'uktami'ejxip ja Dios kyutujk midi ja tyanitanaapy yjaa'y.

²¹ Jade'en idɔ'ɔn ndejint sɔ ja levaduri midi yiktamimɔɔ'kxɪp ja ariin way jɔts ja amuum tyakaagiyit, jɔts ja jich yaakt.

Ja mutsk tɔjk'aaw

²² Xjats ja Jesús ñajxy jɔts ja jam ojts ñijkxy Jerusalén, yik'ixpɔjkp yik'ixpɔjkp idɔ'ɔn ja', pɔni mɔj jaty kajp ja tpaaty ja mɔj ja mutsk.

²³ Winets ja jaa'y ja tu'uk yiktɔɔjɔɔ:

— Windsɔn'ajtim, ʒjanch niwaani dɔ'ɔn ja jaa'y ñitso'ok'att?

Jɔts ja Jesús ja t'adsɔɔy:

²⁴ — Janch jade'en jaa ku jap ka' pɔn nugo ajawi ñaxti, ɔyimts x'ejxtit mɔj mdɔkɪdit, jade'en ja n'ukpiktaajkin sɔm jaa'y ttanaxy mutsk tɔjk'aaw; ɔy jap pɔn yja'uktɔkiwyaniidi, ka'ats ja y'uknɔjxnidit.

²⁵ Kuts ɔ ndanaagyukit, jade'en ɔ ndanaagyukit sɔm kudɔjk tyanaagyukin jɔts tɔjk'aaw ja t'atsyik'aduky. Pɔni tɔts meets jap wyinaty mɔndi tɔjkwimpy, mɔjagugajpxidi mɔtɔjkwingoxti meets jap, uk mjanɔmdi meets jap: “Windsɔn'ajtim, yiktɔɔjɔɔ ɔts.” Jade'ents mee nnɔjmit sɔ ja kudɔjk wya'añin: “Ka' mee nnijawi pɔ mbɔn meets, pɔ mɔj mee mdsɔɔñ.”

²⁶ Jats mee mwinambinaxwa'akt: “Tiku me ndejint ɔts xka'ijxy, jabi tɔts adɔm ngaamyujkin n'uukmujkin, jabi mets ojts o mɔdsoo myik'ixpiky.”

²⁷ Yide'ents mee n'adsɔ'ot: “Tɔ nwa'añ jɔts ku mee ka' nnijawi pɔni mbɔn meets. Jwa'akti ya, kidi ɔts ya xwin'ejxti, ʒpɔnxik ɔ x'abajxtip, kidi meedsip?”

²⁸ Japts mɔj'ɔdit mya'axtit, m'amdɔtskaattit mdaachtɔtskaattit ku x'ejxtit ja Abraham, ja Isaac, ja Jacob jɔts ku ja jap ne'egi mɔɔt niduki'iyi ja Dios kyugajpxy y'etti, mɔj Dios kyutujktaajk mɔj yjaa'y ja ttanitani kyutujk. Ka'ats meets jap jade'en mdɔkit.

²⁹ Yɔ'ɔmyujkɔxtip naxw'ñit jaa'dyi, o mɔdsoo choondit, jɔts ja tpaajtidit ja Dios myɔjkunuu'kxɪn midi nɪpɔn kyapatpynim, midi ja tya'awijxpy ja yjaa'y.

³⁰ Pɔn yam yik'ejxtip ka'ejxiyimdi, pyadundipts ja ne'egi sɔ nwa'añ, ja'ats idɔ'ɔn ne'egi nɔjx yikmɔjpiaktip, pɔnts ñadyijyi ixyam mɔj nija'wibimdi jɔts ja ka' tpadundi sɔ nwa'añ, ja'ats idɔ'ɔn yik'ayowim jattip.

Ku ja Jesús t'ayo'ijxy ja Jerusaléngit kajp

³¹ Jøts ja fariseotøjk nay ja'abi xøøw yjajtøø mā dø'øñ ja jam wyinaty jøts ja ñimaajyøø:

—Jade'en ne'egi tyimy'øy'att ku mnøjkxnit, myik'ookwajnipts ja Herodes.

³² Jøts ja t'adsøøy:

—Nøjkk x'atsnøjmidi ja tsaach wyax'atøøy jøts ku yamyi jabomyi wixøjkpyi njaaakajpxpidsimy ja miku', njaaakyiktsø'øky ja jaa'y jøtsnim ø n'abaadit.

³³ Nøjkkpimts øts jam Jerusalén, tuu'døjkip ø tosjk, ti mā Dios kyugajpxy abikyajp y'uk'øøky.

³⁴ iMets Jerusaléngit kajp, meets Jerusaléngit jaa'y, pø meetsxi myik'øø'kpy Dios kyugajpxy, meetsxi mnankya'jtsip pøn Dios kyajpxy y'ayuujk tyikyø'øyip ku Dios ja ya mjadaniguexyidi! iTø njapeemukwa'añ njakonmukwa'añ ja m'u'nk ja m'una'jk sam tsikuna'jk tyaaak ñimu'uxyi tu'ugyi, ka'ats jade'en tø xkupiky!

³⁵ Ejxtits inet ja mdsaptøjk abak tyandi; øts idø'øñ wamp jøts ku meets xka'uk'ejxnit tosjk jøts ku meets jaanim x'ext pøni juuni ja xøøw ja jumøjt wyinaty yja'aty ku mnø'ømdit: “Ejxik Dios kyunuu'kx u'nk ñadyaguguexyi midi mmimejnip ja kyutujk.”

14

Ku ja Jesús tyikmøkpiky ja jaa'y pøn wyinaty kexp

¹ Xjats idø'øñ yide'en yjajty ku poo'kxin xøøw tpaajty, ojts ja Jesús kaabyi ñijkxy jam windsøn tyøjkwindum pøn ja fariseotøjk wyindsøn'ajtip. Jamts idø'øñ ja'adi ja ti mā ja y'etti, jam ja tpa'ejxti tpagowdi.

² Jamts wyinaty tu'uk jaa'myi pøn ke'expa'am pøjkip.

³ Jøts ja Jesús tnimaay ja kajpxwejpitøjkti møøt ja fariseotøjkti, yide'en ja tyiktiy:

—iKutuky jøts ja pamaa'y cho'okt poo'kxin xøøw u ka'?

⁴ Jøts ka'ap ja y'adsowdi, amøñi ja y'etti. Winets ja tnixajiyi'ñ ja pamaa'y jøts ja tyiktsøøjky, yide'en ja tnimaay jøts ku ja ñøjkxnit.

⁵ Winets ja tnimaay ja fariseotøjkti:

—iPøn yjiyujk chakaa jatyi tka'ukyikpidsømp ku ja ja'jotpy kyunaxy øy yjapoo'kxinxøøwi?

⁶ Nika' idø'øñ y'adsojimbetti, nisa ja kyawa'andi.

Ja tø'øñigaabyi tø'øñi'ukpidi

⁷ Jamts idø'øñ ja Jesús t'ijxy ja migaabyidi jøts ku ja twi'ejxti ja chinaabyajti ku ja twinguwaadsidi ja kaabyajt jam, jam ja y'ixa'akti mā dø'øñ ja myøjtøkidit jøts ja ojts t'ane'emy:

⁸ —Ku pøn mwawidit tø'øñigaabyi tø'øñi'ukpi, kidi jam jatyi m'ixa'akti mā ja tsinaabyajt jam ja windsøn tø yiktanibiktaagi, jaa ku ja wyinaty yja'aty yam meets jam tø m'ixajkni;

⁹ jøts ja kujøøn kudøjk mnøø'mxiyidit pøn wyinaty tø mwayidi: “Tani me waani, wan ya'at jam tsøøni.” Xjats kuwani mjanchjajiwā'aktit tsø'ødyumbim jøts jam m'ixa'aktit mā o pøn y'ixa'akti.

¹⁰ Ku pøn jade'en mwawidit, ne'egi øyts ku m'ixa'aktit mā o pøn y'ixa'akti; kø'ømmimts ja kujøøn kudøjk ja mduknadowidit ku ja jam wingon mye'ent, jøts ja mnøø'mxidit: “Ya, migu'uk, na x mdsøøñidi mā jam yik'ayowim tø mdyimy'ixaknidi.” Jade'ents meets ja xajotkujk'attit ne'egi ku jade'en kø'øm myiktukmado'odit, yam ja jam chøøñidi pøn jatyi ja kaabyajt tø twinguwaadsidi.

11 Pøn kə'om namyøjpiktaajkip, yik'amutskpiktakpts ja nøjx, pønts kanamyøjpiktaajkidip pøn ka'ejxiyimdi, ja'ats ne'egi mõjtøkidip, ja' yikmøjpikta'aktip.

12 Nayi nimaay ja jaa'y ja' pøn ja wyinaty kaabyi tø wyayi:

—Ku pøn xyikaawya'ant, kidi ja'ayi nugo xway pøn jaty mõt mnamyayiyi, ni ja mmigu'uktøjk xkawa'at, ni ja kumeen' jaa'y xkawa'at pøn jaty jam mmigujøøn'ajtpy mmigudøjk'ajtpy. Ka'ap ja'ayi xwa'at pøn jaty miyiwimbejtxiyip pøni ti jaty mets myajkpy.

13 Ja ne'egi mwa'ap ja ayoobi jaa'y, ku ti xøøw xu'unt, waw ja' pøn kati'ejtxidip, pøn kyø' tyeky ma'atti, uk y'ejxidi sagasa, pømbi tyeky ka'ejtp, pømbi jam winap.

14 Ne'egi nekims jade'en mnayjawiyit, pø ka'axi ja mdunwimbejtxiyi nayide'en pøni ti mets ja tø xmø'øy, jaanims ja xwin'ext sa ja mwingaxøjkxiyit ku jadigojk jujky'ajtpi pyidsø'ømdit pøn jaty tø tpadundi pøni sa jaty pyaat'aty.

Ku ja Jesús tmadyakpaajty ja mõj a'ux

15 Xjats nidu'ugin ja fariseotøjk wyaan' pøn jam wyinaty tø twinguwaadsidi ja kaabyajt, jøts ja tnimaay ja Jesús:

—Nekim xønim ja'adi pøn ka'adyip jade'en ku Dios ja kyutujk ttanitanit ja yjaa'y.

16 Ja'ats ja Jesús tnimaay:

—Tu'uk idø'on jaa'y t'a'ejxiyii'n ja a'ux mõj'ampy, tøts ja wyinaty ttukmadøy ja mayjaa'y pøn jaty idø'on ja wyaawampy.

17 Kuts ja a'ux'aats tpaajty, xjats ja tkejxy tyumbi jøts ja t'atstukmadoowa'añ pøn jaty idø'on ja wyaawampy jøts ja t'atsnøjmit: “Jamtstik, jamik tuki'iyi a'ejxi abaadi y'ejtni.”

18 Jøts ja tum jade'en ñañikajpxu'udyidi jøts ku ja ka' ñøjkxtit, yide'en ja yjawyeembi wyaan': “Naajx ø tø njuy, ja'ats ø n'ats'ejxwampy, mee mjanch'ukmaa'kxp.”

19 Jøts jadu'uk yide'en wyaamaa: “Ndsakaa ø magoxk yuundi tø njuy, ja'ats ø n'ejxmatswampy pøni yuup idø'on uk ka'; mjanch'ukmaa'kxp inet idø'on, ka' øts inet ndsoont.”

20 Jøts jadu'uk wyamøø: “Tyimyjemy'amajtskipnim øts, patyts øts inet ka' nmajada'akt jøts øts inet ka' nnøjkxt.”

21 Kuts ja tumbi wyimbijty jøts ja ttukmadøøy ja wyindsøn sa jaty ja wyinaty tø yiknøjmi. Jøts ja windsøn yjantyimy'ambijky jøts ja tnimaay ja tyumbi: “Tsojk nøjx nøø'ajy tuu'ajy wine'en yø kajpoojt, jøts xwaame'ent ja ayoobi jaa'dyi mõt ja'adi pøn sagasa ejxidip, pøn kyø' tyeky ma'atti, pøn winapti.”

22 Jøts ja tumbi yjatso'ongojmi jøts ku wyimbijty jøts tnimaay ja wyindsøn: “Tø øts windsøn idø'on jade'en nduñ sa tø mwa'añin, jaakwindampts ja tsinaadyaajk ja poo'kxaajk.”

23 Winets ja windsøn ja tyumbi tnimaay: “Nøjx tuu' xkuyø'øy ma jaty paduu' ma jaty ti, jøts pøn jaty mbatpy mõk'ampyts ja xwaame'ent jøts ya xkuwawit, ujts øts yø ndøjkoojt n'ejxwa'añ.

24 Tyimñømp øts ixyam, kawindem xøøw øts ja xja'gyajpidi ja n'a'ux pøn jaty øts ja jawyeen tø njadanıway.”

Tuki'iyi nnadyamiyoxant ku Cristo nbadu'unıt

25 May jaa'y ja Jesús o madsoo padso'onip jøts ja pyawidityiyi; jøts ja tuk'ojk tniwa'k'awidijty jøts ja tnimaay:

26 —Pøn jaty øts ya xpawidejtip, pøni jaa pøngapøn, pøn tpa'ayoodip tyeety tyaak, y'u'nk ñidø'øxy, chø' y'uch, myigu'uktøjk, uk kø'øm paat ñabya'ayøyi, ka'ats øts ja mibaat nbabøjkpi'att.

27 Kaja'ajip ø nbabøjkpi'ajtpy pøn ja ayo'on tkamidanaadyip pøn ø xk-abaduujnidip ja nja', xjapawidetwandipts øts, ka'ats øts yjade'embj jaa'y nbabøjkpi'aty.

28 Ti ka' meets ja jawyeen xanipaaty, ku pøn pøch køjxp t'ukyikpidø'økwa'añ pøni ti jaty idø'øn tsojkip jøts ja y'abaadit pøni wine'enin ja chøkyi ja gasti, jawyeents ja yiktanipatkixy.

29 Kuts nugo ja pøchkojpk pyidø'økixy jøts ja nika' y'abaadi, janch nigajpxy nimadya'akts ja yjaty ku ja jade'en pøn t'ixy,

30 jøts ja wya'andi: “Tø yø jaa'y y'ukpojtsøøñ jøts yø nika' tø t'ukyik'abajtiñi.”

31 Uk kuts o pøn windsøn tsep t'uktunwa'añ møøt jadu'uk ja myiwindsøn midj ja syoldadi ja tyikmemp ni'ee'px mil, çti kidits ja jawyeen ttanibiktaagit pøni sudso dø'øn ja ttukwa'ktsot pøni ja'ayi tam ja syoldadi tmøøt'aty nimajk mil?

32 Pøni ka'ats ñay'a'ejxiyi, jøts ku jagamnim ja myidsep myiñ, kyaxpts ja tu'uk ja kyugajpxy jøts ja t'amido'ot jøts ka' cheptu'undit.

33 Nayide'ents meets pøni ka'ap jawyeen xpawinmaadyi pøni ti jaty idø'øn m'ixmatstip øts køjxp, ka'ap meets jade'en mibaat nbabøjkpi'att.

Sa kaan amuum tyik'øyigyjxy

34 'Kaan amuum tyik'øyigyjxy o ti, nayide'en meets idø'øn ndejint m'ødyu'unt ku mmigu'uk xukmado'ot ja Dios yja' sudso y'anmija'win kyawindigø'ødyit. Kuts ka'ap jade'en mdu'undit, tø wyinaty mbidsømdi ejxim ja kaanin midj kawa'ats midj katump.

35 Nimaj ja jade'en kyatu'unt ok naajx ok ti tyiktu'unt, ja ti nøø'mimp ok idø'øn ja nda'abu'jta'ant, pø nugoxi ja jadi'iñi ñiyik'ixkø'øy. Ja'gyukidi pøni mja'gyukiwyandip.

15

Ku ja Jesús tmadyakpaajty tu'uk ja borreegi midj tigøøpy

1 Nimejnip idø'øn ja Jesús jam ja yikugubajtpitøjkti, ja jaa'dyi pøn amuum tyimyktejtjtp øktyumbi jaa'dyi, jøts ja jam myendi amidodujkpi,

2 patyts ja fariseotøjkti møøt ja kajpxwejpitøjkti tjanchpagajpxti ja Jesús, jøts ja wya'andi:

—Tum ka'øy jaa'y yø kyupijky jøts yø jotkujk tmøøtkay tmøøt'uuky.

3 Ja'agøjxpts ja Jesús ttamadyakpaajty tu'uk ja ejxpajtin madya'aky midj yide'en wamp:

4 —Ku meets wyinaty x'ukyiktigøy tu'ugin ja mborreek midj nimagø'pxy, çti kidi meets ja ñimakta'pxy myaktaxujkpi borreek jam xyikta'ant jam pejyotp, jøts ja tyu'ukpi x'ats'ixa'adit kunim meets ja xpaatt?

5 Çjøts kidi meets ja saxonda'akt ku meets ja xpaatt? ÇTi kidi meets ja xkøxkapt mguejnkyøjxp? ÇPøn kidi jade'en xyonda'aky ku ja nbaajtin jadigojk midj tø y'uk'atstigøy?

6 Kuts jam mdøjkjotp mja'atti, ti kidi meets ja mmigu'uktøjk, ti kidi meets ja mgudøjk ja xukmadøy, jøts ti kidi meets ja xnøjmi: “Xonda'akti meets, tøts øts ja nborreek nbaaty midj tø y'atstigøy.”

7 Janch øts idø'ø'n nwa'añ jøts ku nayide'en yiktaxonda'aky jap tsajpjøtpty ja pojkpitumbi jaa'y ku ja tyiktigach ja chinaa'yin, jøts ja' ne'egi yiktaxondakp midu tu'uk jøts nigidi ja myakta'pxy myaktaxujkpi jaa'dyi pøn chinaa'yin tø tyiktigatsnidi, ñadyijyi øy ñayjawiyidi.

Ku ja Jesús tmadyakpaajty ja meeñ midu tigøøpy

8 '¿Uk pøn tø'øxyøjkts myeeñ tka'uk'ixaapy ku ja tyiktigøy tu'ugin yam ja majk t'ukmøøt'aty? Kuwanits ja tyiktøøbyiky ja yjaj jøts ja pyøknaxy yja'axnaxy jap tyøjkjøtpty, yikxonts ja tyimy'ixaadyøki jøts kunim ja tyim-byaatt.

9 Kuts ja tpaaty, jøts myigujøø'n myigudøjk jøts myigu'uktøjk ja ttukmadøy, yide'en ja tnøjmi: "Tø øts ja nmeeeñ nbaaty midu tø y'atstigøy."

10 Janch øts idø'ø'n nwa'añ jøts ku Dios møøt y'ankilis ttaxonda'aktit ja pojkpitumbi jaa'y pøn tyiktigajtsp ja chinaa'yin.

Ku ja Jesús tmadyakpaajty ja jaa'y y'u'nk pøn tyik'o'jkøjxp ja tyeety myeeñ

11 Nayide'en ja Jesús wyaañ:

—Tu'uk idø'ø'n jaa'y, namaajtsk myajnk'u'nk,

12 jøts ja mutskpi ja ñimaajyøø: "Teety, møøñik øts ja pikta'aky midu øts idø'ø'n nmaay'atp." Winets ja u'nkteety ja ojts tyikwa'kxy ja pyikta'aky jøts ja ttagamaay ja y'una'jk.

13 Niñamnim idø'ø'n ja wyinaty jade'en jyaty ku ja myutskmajnk tpo'kmujkni t'ejxmujkni ja pyikta'aky tuki'iyi jøts ja ojts ttoo'kni, jøts ja ojts abikyajp abikñaajx tminijkyx jam jagam, jamts ja ojts tyik'o'jkixy ja myeeñ kyawindiy'ajtingøjxp.

14 Kuts ja wyinaty tuki'iyi tø tyikøjxni, jøts ja yuu jam winet et jyanty-imdyøjkixy'ñ ma dø'ø'n ja naajx ja kajp jam, jøts ja y'ayodøjkiñaa.

15 Winets ja t'ixaay tunk ma ja kugajp jaa'y jam, jøts ja ojts kyexy kyamjøtpty kuch'ejxpi.

16 Janch tsojk jøø'kxkixyim ja t'ejxi ja kuch yji'kxy, kumi niti ja kyayikmø'øy.

17 Jøts jotmay ja tyatøjkixyøø, yide'en ja ojts ñawyinmaa'nxiyi: "Janch ku'uxy ndeety tyumbi net jam kyaydi yjøø'kxti, yikwindandip paat ja o ti, jøts øts ya yuu njanch'oo'kni!

18 Tiku øts ndeety nga'awimbeti ma ja jam chøøni, jøts øts ja jam nnøjmit: Tø teety Dios nmidundigøy; jøts mets, tø me nayide'en nmidundigøy;

19 ka'u'nk'atyim ø tø njantyimyjaty; yiktunkts ø nayide'en sam o pøn tumbi xyiktuñin."

20 Jøts idø'ø'n ja yjanchtuu'døjkixy'ñ jøts ja wyimbijty jam tyeety wyindum.

Jøts jøts tyeety ja jagamyi y'ejxpajttøø, xjats ja ojts y'am'ijxyi chaach'ijxyi. Jøts ja ñibujtjø'jkøø jøts ja ojts pyatsøyi, jigøxy jibi'kxy ja yja'jty.

21 Winets ja tnimaay ja tyeety: "Teety, tø øts Dios nmidundigøy møk'ampy, jøts nayide'en me tø nmidundigøy; ka'u'nk'atyim ø nnayjawiyi."

22 Jøts ja u'nkteety tnimaay ja tyumbitøjk: "Tsojk nøjx xjuutti ja øybi wet jøts suktatøkidit, piktaajkidi kyøjeets, tuktawa'agidi kyø'øk.

23 Nøjx x'atswetst ja tsakaa' midu yaa'kpidsømpnim jøts xyik'oøktit. jWan txøduu'ñindi, wan tkaa'yint t'uujkyindi!

24 Tø øts yø n'u'nk ndijy tyimy'oo'kni, ixysats jujky xwindanaa'yindi; tø jeky y'atstigøy'ity, ixysats jadigøjk tø nbaajtyindi." Jøts ja xyødundøjkidøø.

25 Jøts ja myøjmajnk jam wyinaty wyidity kamjøtp; kuts ja wyimbijty, yja'jty wingon ma ja tøjx jam, jøts ja tmadøøy ja iy ja ech.

²⁶ Winets ja tu'uk tyaajxyii'n ja tumbi jøts ja ttiibyijky ti dø'on jam jade'en tuujnip.

²⁷ Jøts ja tyukmadoojøø, yide'en ja ñimaajyøø: "Tøts ja m'uch yja'aty; tøts mdeety ja tsakaa tnankyik'øøgyiyi midu y'ity yaa'kpety, ja'agøjpx ku møk mōaaw tø yja'aty ja m'uch."

²⁸ Jøts ja myøjpi jyantyimy'ambijky, jøts ka'ap ja twa'añ jøts ja jap tyøkit, tyeetynim ja ojts kø'øm ñibidsimyi jøts ja møk ñimaajyøø jøts tyøkit tøjkjotpy.

²⁹ Xjats tyeety ja tnimaay: "Mnija'wipxi teety winaak jumøjt me tø nmiduñ, jøts juuni me nga'uknimadø, nijade'ents me tu'ugin xkamø'øy øyik chivi'u'nk øyik ti, jøts øts nmigu'uk jeexyip nmøøtxøduñ.

³⁰ Aa kudamts yø m'u'nk tø yja'aty, mdukn'i'ojkip tam meets yø' mdsakaa winet midu yikxon tø yaa'kpety, ku mmeen yø tø myik'o'jxxyi kawine'en mōøt kawindiy tø'øxyøjk."

³¹ Winets ja u'nkteety wyaañ: "Ti sa u'nk mjaty, pø yaayimpts me nmøødi, ti jaty øts ixa nmøøt'ajtpy tum mets yø' mja'.

³² Kuwanits pyaat'aty, çti ja ti nguidyimdyu'uñin? çti jadam yø nguidy-imyaxondaajkyim? Patyts ixyam nxødu'uñindi ku yø m'uch tø yja'aty, pø nøø'mimpts adøm jøts ku yø tø y'oo'kni, ixyats jujky xwin'ijxyim, jeky tø 'atstigø'y'ity, tøts inet nbaajtyim jadigojk."

16

Ku ja Jesús tmadyakpaajty ja ka'ødyumbi'ejx'ejtpi

¹ Ñayiiñimaay ja Jesús ja pyabøjkpitøjk:

—Ja dø'on wyinaty tu'uk kumeeñ jaa'y midu yiktump, jøts jats idø'on ja' tyumbi tu'uk wyinaty midu t'ejx'ejtp ja myøøtumbi, jøts ja windsøn yikniñimaay jøts ku pyikta'aky ja nugo yikwindigø'øxyiyi ja tyumbi.

² Winets ja windsøn tñajtswa'wiyii'n ja tyumbi jøts ja tnimaay: "çJanch idø'on ku dø'on jade'en myiknimadya'aky ti øts jade'en nnimadøøpy? Køyajkjøxni mdunk, ka' me n'ukyiktumbi'ejx'ejtnit."

³ Jøts ja tumbi'ejx'ejtpi yjanchmaañi yjanchtajni, yide'en ja kø'øm ñawya'añi: "çTits ø ndu'ump, ejx øts yide'en nwindson xka'ukyiktunwani? Ka'ats ø n'ukmajadakni øyik øts idø'on nyu'ut ndu'unt, tsø'ødyumipts øts ku øts inet njayiklimunsimujkmit."

⁴ Xjats ja tyabyaajty jøts ja wyaañ: "Tø ø nnijawi sudso ø ndabyaatt, sudso tøts pøngapøn xkupøkt tyøjkjotpy ku øts yø ndunk wyinaty tø yikpøjkni."

⁵ Winets ja tu'uk jaty tñajtswa'wiyii'n pøn jaty ja wyindsøn wyinaty miyoj'ajtp. Jøts ja yjawyeembi ja tyiktiy: "çWine'en øts nwindson xmiyoj'ajti?"

⁶ Jøts ja y'adsøø yøts ja wyaañ: "Magø'pxy tãmbi øts aceite ja ndamiyoj'aty." Winets ja tumbi'ejx'ejtpi wyaañ: "Ëxya ja ñinøky; pe'tpy ixa'ak jøts xjadyigatst, wixijxmyajk tãmbi ja'ayi xpikta'akt."

⁷ Jøts yjadu'ukpi ja tnimaay: "Jøts mets, çwine'en mets ja xmiyoj'aty?" Jøts ja ñimaajyøø: "Magø'pxy kyunchi ariin." Xjats ja tnimaay: "Ëxya ja ñinøky midu ojts xja'ay; wants tkajtswijchim jøts makta'pxy kyunchi nbiktaajkin."

⁸ Jøts idø'on ja windsøn tjanchnija'wiyii'n jøts kudam ja tyumbi'ejx'ejtpi yikxon o ti tñiwinmayi ku dø'on o ti tuñ. Jade'eñimts yiknijawidi pøn jaty Dios yja' tkababøjkidip, jikxon ja ne'egi tyimiyikyuyati ja tyaay yam nigidi jade'en wyinmaa'nbyaatti pøn Dios ja'ajtidip.

⁹ 'Kajpxwejin øts idø'on nyajkpy jøts kidi mbikta'aky nugo x'amnipøjkpatti xtsaaniipøjkpatti; pøni jam mbikta'aktyi, yikxon xyiktunkpaattit, øy yø' ka'

kya'oyi. Ku yaayi, xabudokidit o pøn, nugo ku xnijawidi tigøjxp idø'on ja jade'en xundi. Øy ja yjakixy, wa'atsts meets ja xnijawi jøts ku meets m'anmija'win yikupøkt jap tsajpjøtpy.

10 'Pøn øyjaa'y'ajtp, øyjaa'y'ajtpimpts ja øy ma, wan o ti tmayi tka-mayi nayide'ents ja øy yikxon tyiktunkpaaty; pønts kidyim'øyjaa'y'ajtpim, jade'eñimts ja øy ma, nayide'en ja ka'ap tyik'ødyunkpaaty ja pyikta'aky øy ja wine'en myayi kyamayi.

11 Pøni ka'ats yikxon xyiktunkpaatti ja mmeeñ ja mbikta'aktyi sa pyaat'atyi, çti sudsots meets Dios yja' mjaakmo'o'jyit midi ja yakwampy?

12 Pøni ka' meets mmigu'uk yja' xwingudsø'jkiiyi, çpønts meets ja mja' jade'en xijy tsø'øgiyip, pøn meets ja xijy mmo'owajnip o meets ja xjakø'mja'aji?

13 'Ka' pøn tumbi namajtsk wyindsøn tmiduñ; ku ja jade'en ttu'unt, tu'ukts ja pyidsø'omt pøn ja wyinjawip jøts ja yjadu'ukpi tkawinjawit, tu'uk t'ømyidu'unt jøts jadu'uk tka'ømyidu'unt. Jade'ents ka' y'øyi ku Dios yikmiduñ, ixyaptamts meeñ nayide'en myøjtøjkyimi. Paty ka' y'øyi adsow aduuk, tu'ugyi Dios n'ajot'ajtin.

14 Tyimyjade'ents idø'on ja fariseotøjk yjaa'y'atti, ja meeñ ja yjanchmøjmigu'uk'ajttip, ixamts idø'on ja wyinaty jade'en pyatmadowdi jøts ja jam tjanchpagajpxti ja Jesús.

15 Winets ja Jesús wyaañ jøts ja tnimaay:

—Meets idø'on jade'en mjaa'y'ajttip, ñadyijiyi mjanch'uknawya'atspikta'agyidi, ka' meets yjawi mbøktyuñ, jade'en ja mayjaa'y xwin'øøndi, wa'atsts ja Dios mnijawiyidi sa jaty mwa'andi mgajpxti m'am mjotp; yø' idø'on Dios kyatsøjkpy, ka' Dios jade'en tkupiky jøts ku jaa'y jade'en kø'øm ñamyøjpikta'agyidi.

Ja Moisés kyutujk jøts ja' midi Dios tyanitanaapy yjaa'y

16 'Ku ja Juan Bautista ya myiñ, jaayip ja kugajpxtyøjk ja y'aaw y'ayuujk y'adujktø. Nay jaabaat ja Moisés kyutujk kya'pxy sa Dios ja wyinaty tø myø'øyi. Jøts nay jatyi cho'onda'aky ja Dios y'øgyajpxy y'ø'y'ayuujk, yiknigajpxy yiknimadya'aky ja kyutujk midi ja tyanitanaapy yjaa'y, xjats jade'en kuwani o pøn tjanchjadatøkiwya'añ ja'abi kutujk.

17 'Kuwani dø'on jade'en yjatt kyubatt sa Dios kyutujk wya'añ, nijuuni ja jade'eñi kyakixy kyanaxy pø ne'egi køjxp najxp naajx tsajp jøts niwine'enin kyagudigøy ja kyutujk.

Ku ja Jesús kyajpxwiyi sa amajtsk'ajtin ñaxy

18 'Ku pøn tmajtstu'uty ñidø'øxy uk ja tø'øxy tmajtstu'uty ñiyaa'y, ja'ats idø'on møj pøky; uk kuts pøn yaa'dyøjk tmøøt'amajtski ja tø'øxy midi tø yikmajstu'uty, møj pøkyts ja nayide'en.

Ja kumeeñ jaa'y jøts ja Lázaro

19 'Tu'uk idø'on ja jaa'y janch kumeeñ, janch xøxy piky idø'on ja', tum ja y'øybi ja yikpejtpy jøts idø'on ja xyumixøduñ jabom jabom, pijy xuugyin tpikta'aky ja xyox.

20 Jamts idø'on jaa'y jadu'ukmi pøn txøow'ajtp Lázaro, janch ayoop janch pøktsoop ja' jøts janch amuum pu'uts ja', ka'ap ja myøjki jøts idø'on ja jam xyumi'ixa'aky jam kumeeñ jaa'y tyøk'agø'øm, jam ja kyu'uxnayiti.

21 Tsojkt kaagyixyim ja tja'ijxy ja kaaky abu'xk midi jam kumeeñ jaa'y kyaabyajt patkø'øm najtska'jip; jøts idø'on uk ja jam yjanchnimiñiyi jøts ja twiweedyi ja pyu'uts.

²² Jøtsnim idø'øn ja ayoobi y'ø'jky, winets ja ojts yiknijkxyi tsajpjøtpty ja ankilistøjk ma ja Abraham jap. Jøts ja kumeeñ jaa'y nayide'en y'oo'knimaa, ojts ja ñaxøki.

²³ Kuts idø'øn ja jap ayodaajkjøtpty tja'ejxni jøts kudam ja Abraham jam jagam møøt ja Lázaro.

²⁴ Winets ja møk'ampy wyaañ: "Teety Abraham, ayo'ejxk øts, kax yø Lázaro, wan tmiñ, wan yø kyø' tyikxøøky jøts øts yø ndoojts xuktaxujxit; janch møk øts yap jønjøtpty n'ayøy."

²⁵ Jøts ja Abraham ja ñimaaajyøø: "Ja' u'nk mja'myatsp, tøxi me xaxøñ ku me tø m'atsøøni m'atstani, ka' mets jade'en mjaty sa yø Lázaro tø y'ats'ayøyin, wants yø taxoni jøts me m'uk'ayoomit.

²⁶ Jøts ti tits nnidyu'unim, abikyxi meets jami, abikyts øøts yami; ma pøn y'uknaxt øy yam pøn yjamenwa'añ nidu'ugin, uk øyts jam pøn yjanøjkxwami, nisudso'ampyts pøn kyamajada'aky."

²⁷ Winets ja kumeeñ jaa'y wyaañ: "Tixi teety Abraham, pøni jade'en tunts may'ajt jøts yø Lázaro xkaxt jam ndeety tyøjkwindun,

²⁸ jaak jam øts nmigu'uk ja nimagoxk, jøts t'atstukmado'ot jøts kidi ya nayide'en myendi ayoobi ya ayodaajkjøøjty."

²⁹ Jøts ja Abraham wyaañ, yide'en ja tnimaaay: "Jøts timts ja wya'ant midi ja Moisés yjaa'y midi ja Dios kyugajpxtyøjk tø tnigajpxti. iTi wan ja jam tñijawidi pøni myøjjpiktaktip!"

³⁰ Jøts ja kumeeñ jaa'y y'adsøøy: "Janch ja jade'en teety Abraham ja', yjayiktigatstibik chinaa'yin ja y'ijtyi ku ja pøn jam jujky ñinøjkxidit pøn tø y'oo'knidi."

³¹ Jøts ja Abraham ñiimy: "Tixi pøni ka' ja tkupøjkti midi ja Moisés yjaa'y jøts sa jaty ja Dios kyugajpxy wyandøø, çti ja'ats ja yjaakjanchjawidip øy oo'kpi ja jujky yjaninijkyidi?"

17

Ja' midi yikpøkpyajtp

¹ Yide'en ja Jesús tnimaaay ja pyabøjkpitøjk:

—Juuni øy ti kya'ukyikpøktyuñ, kø'øm tsøkyts ja'. Pønts myigu'uk tyikwinmaa'nmya'atp jøts ja tyikpøktyuñ, ipø tinim sanim ja yjanchjatt y'anmija'win!

² Ne'egi tyimyjapaat'ajtip jøts ja mejyotp yikniwibejpatt ku møy paandaak ja y'ukyiktayukxotsit, jøts øts n'u'nk n'unaj'jk ja kidi mibaat xyikpøktyuujni.

³ Øyimts mnay'ejx'etidit jøts kidi nayide'en m'adø'øtsti sam o pøn y'ad'iichin.

Pøni m'ejxtip ku ja mmigu'uk mmidundigøyidi, tukmadowdits jøts kidi jade'en y'adø'øtsti, uk pøni nagyumaajyidipts, maa'kxuktits ja'.

⁴ Øy ja wixujk ojkin tjayiknipati, øy ja jade'en mjamidundigøyidi, pøni nadyagumaajyidipts ja nayide'en wixujk ojk pøni mnimaaajyidip ja': "Ka' øts jade'en n'uktunit", maa'kxpts meets ja'.

Ja møy janchja'win

⁵ Xjats ja nwindson'ajtim ja kyudanaabyitøjk ñimaaajyøø:

—Møøky øøts janchja'win møy.

⁶ Winets ja tnimaaay:

—Kuk meets jeexyip wine'enin xmøøt'aty ja janchja'win sam tu'uk mortas pajkin, tøts meets ya'at kipy jeexyip xnimaañidi: “Pidø'øk ya jøts mejyotp mnøjxt, jamts myo'ont”, nay jatyiys meets ja jeexyip tø mmimadøyi.

Ja tumbi tyunkjøøjp

⁷ Ku pøn ja tumbi t'ukyiktuñ kyamjotp, tyikyu'uy tyiktuñ uk tyiktsakaa'ixy ja jam, kuts ja wyimbity jam wyindsøn tyøjkjotp, ku ja jam yjā'aty, ζti jatyi ja jam tyimyknøjmi: “Ya tyimñax jøts mga'aty”?

⁸ Pø ka'axi ja jade'en yiknøjmi, pø yiknimaapyxi ja jam: “Yik'øyik øts n'a'ux jøts ø xwindsø'øgit, wan øts jawyeen tkay t'uuky jøtsnim me mga'aty m'uukt.”

⁹ Kuts ja tumbi ja jade'en tø tja'uktumi pøni sã dø'øn ja tø yik'ane'emy, ζja ti winets ja yiktakajxa'aky? Pø ka'axi.

¹⁰ Nayide'ents meets idø'øn Dios xmidu'unt, ku ti xun'abaadidit pøni ti ja mduktuujnidip jøts meets ja xnøjmit: “Ti tumbi øøts idø'øn, ja'ayi øøts iiy tø nduñ, midi paat'ajtip øø ndu'ump.”

Ku ja Jesús tyiktsøøjky nimajk ja jaa'y pøn jadi'iñi putsnidip

¹¹ Kuts idø'øn ja Jesús tyuu'døjkigyojmi jøts ja ñijkxy jam Jerusalén, najx idø'øn ja Samariit etjotp jøts nayide'en jam Galilea.

¹² Jøts kuts ja yjā'ity jam mā tpaajty tu'uk ja kajp, jamts ja pyajtøø nimajk ja jaa'dyi pøn pu'uts pa'am wyinaty pøjkidip, jøts ja jagamyi wya'k'øydøø,

¹³ jamts ja møk'ampy ñimaajyøø:

—;Windsøn Jesús, ayø'ejxk øøts, ejx øøts yide'en njaty!

¹⁴ Kuts ja t'ejxpaajty jøts ja tnimaay:

—Nøjxk x'ats'ejxti ja teetyøjkti.

Xjats ja jatyi ñøjkxtøø, jamnim ja wyinaty ñaxti ku ja tsø'øky ñayja'winiyidi.

¹⁵ Winets nayjatyi tu'uk t'ejxpaajty ja pyu'uts jøts kudam ja tø tyaagyøjxni, jøts ja jatyi wyimbity, møk ja Dios ja ttukmøja'wiyii'ñ ttukunuu'kxyja'wiyii'ñ, ñiyaxni nyjojkn ja wyimbity.

¹⁶ Jøts ja twinguxanay'øyiyii'ñ ja Jesús jøts ja jamyi ñamyujtstaajkøø, ttukmøja'wiyii'ñ ttukunuu'kxyja'wiyii'ñ ku ja wyinaty jade'en tø yiktsø'øgyi. Samariit jaa'y idø'øn jade'en tump.

¹⁷ Xjats ja Jesús wyaañ:

—ζTi kidimts meets nimajk tø mdsokixy? ζMā net ja yjanidaxujkpidi?

¹⁸ Jabyøø'kxyik øts ya ne'egi xnimemp nadyu'uk, yø'øjik øts ya ne'egi x'atskajxajkp.

¹⁹ Jøts ja tnimaay ja jaa'y:

—Wā'kuki jøts mnøjxniit; ja'agøjxp tø tyay yø mbu'uts ku ø tø xjanchjawi.

Sã ja Dios ja kyutujk tyikme'ent midi ja tyanitanaapy ja yjā'y

²⁰ Xjats idi'ingøjmyi, ja fariseøøjk tyiktøødøø ja Jesús juunin idø'øn ja yjā'att ja Dios kyutujk midi ja tyanitanaapy ja yjā'y, jøts ja t'adsøøy:

—Ka'ap ja ti ejxin pøni sã Dios ja kyutujk tyikja'aty.

²¹ Kidi xjøp'ijxy'atti jøts pøn wya'ant: “Ixya ja!”, uk ñø'ømdit “Ixem ja!”; ka'ats, pø jaanixi meets ja ya xjamøøt'ajtni.

²² Jøts ja tnimaay ja pyabøjkpitøjk:

—Ja'atp ja xøøw ja jumøjt ku mee tsojk ejxpaadyim xja'ejxwā'ant ja naxwii'ñit jaa'y ja myøjkudanaabyi, ka'ats meets ja jatyi x'ext.

²³ Mjadyimyjayiknøjmidi meets: “Ixya ja!”, uk møkñøjmidi meets “Ixem ja!”. Kidits xmibøkti.

²⁴ Ku ø nme'ent, wa'ats x'ejxtit xnijawidit jade'en sam ja et wyidsukyin xem yam tyikjajta'aky, jats idø'on wyinaty tmibaat'aty.

²⁵ Jawyeents ø n'uk'ayo'tot øy øy, ka' øts ja jaa'y xkupøktit pøn jaty ja icyam jujky'ajttip.

²⁶ Nayide'en ø njatt sam ja Noé yjajtyin ku ja ya y'atsinaay, nayide'en øy pøngapøn y'adø'øst.

²⁷ Kya'adyit y'uuktit sam ja y'adøtstøø, y'amajtskidi ja jotkujk, ja y'u'nk ja ñøøx ja tyik'amajtskidi tyimyaakja'abi xøøw ku ja Noé tyøjkijy'iñ jam barkijotp, kuts ja møk tuu myiñ xjats ja ojts ñi'ijtyi y'oo'køxti.

²⁸ Nayide'ents yjajty ku y'atsja'ajty ja Lot: jotkujk kyaydi y'uukti, yjuydi kyajpxti, yakti tyookti, ñe'epti kyojti, ña'adi pyotsti, ja tyøjk tyik'øyiidi jotkujk;

²⁹ kuts ja Lot jam Sodoma kajjotp ja'ayi pyidsiimy, jøts ja jøønduu jaty'i myiñ jøkmyøøt, jøts ja niduki'iyi tyikna'x'o'jkijxy ja jaa'y.

³⁰ Nayide'ents idø'on winet et yjatt ku ø x'ejxpæattit jotmøñ.

³¹ Pøni jam wyinaty øy pøn jam tøjköjxp tø pyety, ka'ats ja t'uk'atsnidøjkinit pøni ti jaty ja jap tyøjkjotpy myøøt'ajtpy jøts ja tøkøpidsømwa'ant; pøni pønts jam wyinaty widejtp kamjotp, ne'egi tø'øpts ku ja ne'egi kya'ukwimbejtnt tyøjkwindum.

³² Ja'myajtsidi ja Lot ñidø'øxy sa ja yjajty.

³³ Pøn kagu'øøgyim pyikta'aky t'ejxp, windigø'øpyts y'anmija'win ja' Dios wyingujk; pønts tkayikmøjtøjkip øy ti, pøn ø ne'egi tu'ugyi xnadyamiyojxip, ja'ats idø'on y'anmija'win nøjkx nitso'ok'ajtp.

³⁴ Øts idø'on wamp jøts ku jam wyinaty o pøn namajtsk ttaamaukti tu'ugyi ja maabajt, tu'ukts ja ja'ayi yikpøkjø'økt jøts ja yjadu'ukpi wyindigø'øty.

³⁵ Pøni jam tø'øxyøjk wyinaty namajtsk yjøjtsmukti, tu'ukts ja nayide'en yikpøkjø'økt ja y'anmija'win jøts ja yjadu'ukpi nayide'en wyindigø'øty.

³⁶ Nayide'en ja yaa'dyøjkmidi, pøni jam ja namajtsk wyinaty jam kamjotp, tu'ukts ja yikpøkjø'økt jøts ja yjadu'ukpi ka'.

³⁷ Kuts idø'on ja jade'en tmadoodøø jøts ja ojts tyiktøwdi:

—Ma windsøn'ajtim idø'on ja jade'en yjatt?

Jøts ja y'adsøøy:

—Kidi mwā'andi ku ja kyayiknijawit, jabi niduki'iyi meets ja xnijawit ku ø nme'ent.

18

Ku ja Jesús tmadyakpaajty ja ku'økyø'øxy jøts ja kudunk tiidyumbi

¹ Xjats Jesús ja ttamadyakpaajty tu'uk ja ejxpajtin madya'aky. Ja' idø'on ja tyukmadogukiwyampy jøts ja Dios'ajot'ajt'ettit jøts nijuuni kya'amutsk'attit.

² Jøts idø'on ja tñimaay:

—Jam idø'on kudunk tiidyumbi wyinaty tu'uk jam kajjotp, niwine'enints idø'on Dios ja tkidyimwyindsø'øgi, nipøn ja tkamøj'ijxy øy yjapøni.

³ Nayjamts idø'on ku'økyø'øxy tu'uk chinaamyi, ja'ats ja kudunk tiidyumbi jam tñiyø'øy'ejtp, ejtp ja yja'øø'ngunaxy, jøts idø'on ja tja'amidøy ja tiidyu'unin, ja myidsep tjani'øøni jøts ja yikpayø'øty.

⁴ Jeky idø'on kudunk tiidyumbi ja tkamøj'ikta'aky jøts ja ka'ap tpayø'øy, xjanimts ja wyinmaay: “Øy øts idø'on Dios ngawindsø'øgi, øy øts idø'on nipøn ngatunk'aty,

⁵ kuwanits øts idø'øn jade'en ndu'unt, pø ejtpts øts yø xjanchmiyø'øy'ity, janch møk ø xyikjotkixy, tikuts øts yø nganitani jøts jade'en kya'ukmenit jøts øts yø xka'ukyikjotma'tnit."

⁶ Jøts ja nwindson'ajtim yide'en yjaakwaañ:

—Ja ka'øy kudunk tiidyumbi dø'øn jade'en wamp.

⁷ Kuts idø'øn Dios, ¿ti jaa ja tkidyimñitanit ja yja' pøn ja xinaxy tsunaxy ja'myajts'ejttip? ¿Ti kidi ja jatyi tpuðjkiñit?

⁸ Øts idø'øn wamp jøts ku ja jatyi tñitanit ku ja jatyi tnikaipxu'utt. Kuts ø nme'ent, ¿windem øts naxwii'ñit jaa'y n'ukpaaty tum jade'en tu'ugyi ja yjanchja'win?

Ku ja Jesús tmadyakpaajty ja fariseotøjk jøts ja yikugubajtpi

⁹ Jøts ja Jesús tñanimadyaktøjkijyiññ jadu'uk ja madya'aky, jøts ja ttukmadøy pøn namyikaxi jaa'y'ajttip, kø'ømyi ñay'ødyiyidi ñay'øbyikta'agyidi jøts ja myigu'uk ja kawin'ijxyim tjawidi. Ja'ats idø'øn ja ñimaay:

¹⁰ —Namajtsk idø'øn ja jaa'y ñøjkxtøø Dios ajot'ajtpi jam tsaptøjkjotp: tu'uk fariseo, jøts ja yjadu'ukpi yikugubajtpi jaa'y.

¹¹ Tanaapy ja fariseo jøts ja yide'en tmigajpxy: “Dios Teety, ndukmøja'wip ndukunuu'kxyja'wip mets ku ø ka' nayide'en nduñ sam o pøn myaatsti kyawindiyjaa'y'atti, sam øy pøn axøøk pyøkyundi; ni ngajade'eni paat øts sam yø yikugubajtpi ixa tyani.

¹² Majtsk ojk me n'amaay'aty tuksamaan, ngagugayi ngagu'uugi mets, jøts ndamiyøjpxy mets nbikta'aky wan jatyi ti jatyi ø nbatpy n'ijxpy.”

¹³ Jøts idø'øn ja yikugubajtpi jagam ja ne'egi wya'k'øyiyiññ, ka'ap ja jadine'en y'aaaw yjoajt myajada'aky jøts ja wine'enin y'eixjø'økt jøts ja wine'enin chajp'ext, jøts ja ne'egi ñagyachkoxi, yide'en ja wya'añ: “iDios Teety, ayo'ejxk øts, janch pojkipitumbijaa'y øts!”

¹⁴ Xjats ja Jesús yide'en wyaañ: “Øts nømp jøts ku ja yikugubajtpi ojts ne'egi yikmee'kxy, jøts ja ojts wyimbejtñi ñøjkxni tyøjkwindum, tø ja yiktamee'kxy ja pyøky. Jøts ja fariseo nigidi yikmee'kxy pøn namyikaxi jaa'y'ajtip, pøn kø'ømyi nay'ødeyjidip nawya'atspiktaajkidip, ka'ats ja mibaat tminaxti ja wyinmaa'ñ jam Dios wyindum. Pønts tøkjya'widip ja pyøky, pøn yik'ayowim tminuu'kxaktip ja Dios, ja'ats idø'øn ne'egi møjtøjkidip jam Dios wyingujkp.”

Ku ja Jesús ojts tkunuu'kxy ja mutsk una'jk

¹⁵ Nayi yiktanimemp idø'øn ja Jesús ja mutsk una'jk jøts ja tkønixajt; jøts kuts ja pabøjkpitøjk jade'en t'ejxtøø, winets ja ojts møk twingugajpxidi pøn jaty ja mutsk una'jk tyikmendip.

¹⁶ Winets ja Jesús ja mutsk una'jk tyaajxmiññ, jøts ja pyabøjkpitøjk ojts tnøjmi:

—Wan yø mutsk una'jk tmendi, kidi meets yø xkadukniññ; ja yjade'embi jaa'y idø'øn Dios kyutujk nitanaajyidip.

¹⁷ Janch meets idø'øn nnøjmi, pøn tkagupøjkpi ja Dios kyutujk midi ja tyanitanaapy yjaa'y sam ja mutsk una'jk ja tkupikyin, niwindemts ja tkapaaty tka'ixy ja Dios ñitso'ok'ajtin pøni ka'ap ja tkupøkti.

Ja kumeeñ jaa'y

¹⁸ Jøts idø'øn ja Jesús tu'uk ja kumeeñ jaa'y ñimaajyøø:

—Mets øyjaa'y yik'ixpøjkpi, ¿ti ø ndu'ump jøts øts ja n'anmija'win tpaatt ja nitso'ok'ajtin xemikøjxp?

¹⁹ Jøts ja Jesús wyaañ yide'en:

—¿Ti jade'en myikwajnip jøts ku øts øy? Ka'ap mā pøn tu'ugin y'øyi sam Dios.

²⁰ Mnija'wipts ja Dios kyutujk sa ja wya'añ: “Kidi mmigu'uk ñiyaa'y ñidø'øxy xpøjkkxi; kidi myikjaa'y'øøky; kidi nmeech; kidi mmigu'uk xwin'iñ; windsø'øgi mdeety mdaak.”

²¹ Jøts ja jaa'y wya'añ:

—Jaayim øts yø jade'en nbaduñ ku nmutsk'aty.

²² Kuts ja Jesús ja jade'en tmadøøy, xjats ja tnimaay:

—Jap jadu'uk midi mgabadumpñim: too'køx ti jaty jam mmøøt'ajtpy jøts ayoobi jaa'y ja xabudøkit, jøts ja jap tsajpjøtpy nøjkk mwingaxø'jkkxi ja jujk'ajtin; winets mdsøont jøts øts xmøødit.

²³ Kuts ja jade'en tmadøøy jøts ja jaty yjanchjotmadyøjkijii'ñ kumi janch kumeen idø'øn ja', ka'ap ja tmajtstu'utwa'añ ja pyikta'aky.

²⁴ Kuts ja Jesús t'ijxy jøts ku ja jaa'y jade'en yjotmay'øøky, jøts ja wya'añ:

—iWindemnim ja kumeen jaa'y jade'en tpaajtniyidi ja Dios kyutujk midi ja tyanitanaapy yjaa'y!

²⁵ Ne'egi tsojk ñaxt tu'uk møj jiyujk jap xuu'ñ jutjøtpy, jøts nigidi tu'uk kumeen jaa'y tyøkit jade'en mā Dios kyutujk tñitani tuki'iyi.

²⁶ Pøn jaty ja jade'en tmadøøp, ja'ats wandøø:

—¿Pømbits idø'øn nitso'ok'atp?

²⁷ Winet Jesús ja ñimaajyidøø:

—Ka'ap yø øy pøn jaa'y kø'øm ñankñitso'ogiyit, ja Dios ja'ayi myøøt'ajtpy ja møk'ajtin sudso xyiknitsoojkint, niti Dios tkatsejawi.

²⁸ Jøts ja Pedro wya'añ:

—Windsøn'ajtim, tøts øøts nbikta'aky tuki'iyi nmajtstutkixy ti jaty øøts y'ijty nmøøt'ajtpy, icyats øøts jade'en nwidity møøt mets.

²⁹ Jøts ja t'adsøøy:

—Janch øts idø'øn nwa'añ, pøn yjøøn tyøjk tkaba'ayoop, pøn tyeety tyaak, y'uch myigu'uk, y'u'nk ñidø'øxy tkajotmay'ajtp, ja'agøjxp ku ja ne'egi tyikmøjji ja Dios kyutujk midi yjaa'y ja tyanitanaapy;

³⁰ pøni wine'enin ja ya naxwiiñ yjaaktsøøni, pyaajtipts Dios kyunuu'kxin ja' jøts nitso'ok'atp y'anmija'win ja xemikøjxp ku ja Dios jadu'ukpi tsinaa'yin ja myo'ojiyit.

Ku ja Jesús jadigojk tñigajpxy jøts ku ja y'ookt

³¹ Xjats ja Jesús abiky tyaajxiyii'ñ ja nimakmajtskpi pabøjkpitøjk, jøts ja tnimaay:

—Yamnimts inet jam Jerusalén nnøjkkindit, mā jade'en yjatt sa jaty ja kugajpxtyøjk tjaadyandøø jøts ja tñigajpxti ti ø ndu'ump, ti nbaatp.

³² Yikmatsp øts jøts ø nyikøyakt nyiktagodøkit pøn ø ngamigugajp, nyiknixe'ekt nyiktaxe'ekt øts, nyikwidsujt nyikjøptsujt, kawine'en nyik-jemnøjmit nyiktenøjmit.

³³ Ku øts jawyeen n'ukyikwinwopt n'ukyikjøpwopt, jøtsnim øts ja xyik'ooktit; pidsø'ømpst øts jap oo'kpi jutjøtpy kidigøøk xøøw.

³⁴ Jøts ja ka'ap tja'gyukidi nisudso'ampy, pø ti ja jade'en yiktamimadyaktip, nisudso'ampy ja tkaja'gyukidi.

Ku ja Jesús tyikwin'ejxwa'kxy ja winap jaa'y

³⁵ Kuts ja Jesús jam wyinaty Jericó yja'atwani, jøts jam tuu'pa'am tu'uk chøøni ja winap jaa'y, jam ja yiklimunsimuky.

³⁶ Kuts ja tmadøø y jøts ku ja mayjaa'y jam yjanchnaxti, jøts ja ojts tyiktiy ti dø'øn tuujnip jajtjip.

³⁷ Jøts ja yiktukmadøø y jøts ku ja Jesús jam wyinaty ñaxy pøn jam Nazaret tsoo'mp.

³⁸ Winets ja møk'ampy wyaañ:

—jEsús, mets m'aats'ajtpy mgugoj'ajtpy ja David, ayo'ejxk øts!

³⁹ Pønts jam wyinaty jawyeen yø'ødyip, ja'ats ja møk'ampy nimaajyøø jøts y'amo'ont, jøts yjaaktyimykjinajxpy ja', ka'ap ja y'amøñ, jinaxy ja wyan'adi'ich:

—jEsús, ayo'ejxk øts!

⁴⁰ Winets ja Jesús wya'k'øyyii'ñ jøts ja wyaañ jøts y'atsyikwa'at ja winap jaa'y. Kuts ja wyingume'enyiøø wingon, xjats ja tyiktiy jøts ja tñimaay:

⁴¹ —¿Ti dø'øn mdsøjkpy, ti øts idø'øn xuktunwamp?

Jøts ja winap jaa'y y'adsøøy:

—Windsøn'ajtim, win'ejxwamp øts.

⁴² Jøts ja Jesús ja ñimaajyøø:

—jWin'ejxts inet! Ja'agøjxp yø mween tø y'øyi ku ø tø xjanchjawi.

⁴³ Jøts idø'øn ja winap jaa'y jade'en wyin'ejxpijky, jøts ja tpadsø'ñ ja Jesús, møk ja ttukmøjawi ttukunuu'kxyjawi ja Dios. Jøts ja nayide'en wyamid pøn jaty jam ja jade'en t'ejxtøø.

19

Ja Jesús jøts ja Zaqueo

¹ Xjats ja Jesús yja'jty jam Jericó, kyajptøjkiyii'ñ,

² jamts kumeeñ jaa'y wyinaty tu'uk, Zaqueo ja xyøøw midi ja yikugubajtpitøjk wyindsøn'ajtip.

³ Ja'ats idø'øn tyimyjawin'ejxwamp ja Jesús jøts ja t'ejxkapt. Janch mayjaa'yts jam wyinaty nisudso'ampy ja tka'ext, jaa ku ja kon yjaaktyimtyanaañimi.

⁴ Xjats ja ojts jawyeen putyi t'anøjkxi ma dø'øn ja Jesús jam wyinaty ñaxwa'añ, jøts ja jam kipkyøjxp kyøjxpejty.

⁵ Kuts ja Jesús jam ñajxy, ixam ja Zaqueo kipkyøjxp, jøts ja Jesús pyat'ejxøø, yide'en ja ñimaajyøø:

—Zaqueo, putyi winak, jap øts icyam mets mdøjkjtpy nja'da'akwa'añ.

⁶ Jøts ja Zaqueo jaty wyinaajky, janch ejtni xoni dø'øn ja tyikja'jty ja Jesús jam tyøjkjotp.

⁷ Pøn jatyts ja jade'en t'ejxtøø, jøts ja pyagajpxpinaxwa'ktøø, ja' ja kyajpxtip jøts kuk ja Jesús jam wyinaty tø ñijxxy ma ja ka'øyja'y tyøjk jam.

⁸ Jøts ja Zaqueo wya'kukiyii'ñ jøts ja nwindson'ajtim yknimaay:

—Windsøn'ajtim, ndamay'atp øts ayoobi jaa'y kujkwa'kxy ti jaty øts ixja nmøøt'ajtpy; pøni tøts øts o pøngapøn o tigati nbøjkxi awin'øøni'ampy, nyik'u'nkipts øts ja' jøts øts ja jawaani may nyikwimbejtixit, maktaxk ojk tukjadine'en jaty y'u'nk'att pøni sa ja kyøjpk.

⁹ Xjats ja Jesús wyaañ jøts ja tñimaay:

—Ixyam ja nitso'ok'ajtin tø yja'aty ya tøjkjøøjty, kumi nay Abraham meets m'aadsip mgugojip.

¹⁰ Pø ja'abixi ø tø nnimendi jøts øts ja ndukpaattit nduk'ejxtit ja nitso'ok'ajtin pøn ja y'anmija'win y'ijty tigøy'ejtnidip.

Ku ja Jesús tmadyakpaajty ja meeñ kyøjpk

11 Exam ja mayjaa'y ja pyatmadøyyi ku ja jade'en wyā'añ, jøts ja ttanimadyaktøjkyyi'ñ tu'uk ja ejxpajtin madya'aky, ku ja jam wyinaty kujk wyingoni jam Jerusalén. Nømpxi dø'on ja jaa'y wyinmaydi, ja'ayi ja jam y'ukja'att jøts ja jaty wyindsøndøkit, jøts Dios kyutujk ja tyiktuujnit mididi ja tyanitanaapy yjaa'y.

12 Jøts idø'on ja tnimaay:

—Jaa dø'on jaa'y y'ijty tu'uk, jotkujk jaa'y. Ja'ats ojts abikyajp t'anøjkxi jøts ja jam y'atswindsøndøkit. Ku ja wyimbett, møjwindsøn ja wyinatyni.

13 Jøts idø'on tyumbi ja nimajk twaadsøoy ku ja wyinaty choonwa'añ, jøts ja nidu'uk jaty ttagøðøjkyyi'ñ tu'uk møj mukmyeeñ, jøts ja tnimaay: "Mda'aju'udyip mda'agajpxtip idø'on yø mmeeeñ, wan tmayi kunim ø nwimbett."

14 Mi'ajkiyipts idø'on ja jaa'y ja' pøn jaty jam tsinaadyip, jøts ku ja chø'jñ jøts kexy yø'øbyi ja yiktabaguejxy jøts ja jam yide'en y'atswa'andit: "Ka' øts ya'at jaa'y ndsøky jøts øøts yø nwindsøn'att."

15 Jøts yikpiktaajkim idø'on ja' jøts ja wyindsøn'att, winets ja wyimbijty jam ma ñaajx kyajp. Ku ja jam yja'jty jøts ja twaadsøoy ja tyumbi pøn jaty ja wyinaty tø tkømo'øoy ja meeñ, ja' ja' ñijawiwypy wine'en jaty ja wyinaty tø tyik'u'ngidi.

16 Jøts ja yjawyeembi myiñ jøts ja tyukmadoojøø: "Windsøn, majk ojk øts ja jadukjadine'en jaty tø nyik'u'nk'aty ja mmeeeñ."

17 Xjats ja wyindsøn y'adsøoy: "Øy'ajtp, øyxi dø'on jade'en mduñ, mjotwampxi dø'on jade'en; ti sa metsxi yjadini'iñibi meeñ jade'en tø xyik-mayi, ja'agøjxpts mets ndukwindsøn'atwa'añ majk ja kajp."

18 Jøts jadu'uk myiñ, ja'ats waan: "Windsøn, magoxk ojk øts jadukjadine'en jaty tø nyik'u'nk'aty ja mmeeeñ."

19 Jøts ja nayide'en yik'adsoomøø: "Windsøn'atp mets ja magoxkpi kajp."

20 Winets jam jadu'uk myiñ jøts ja wyaañ: "Windsøn, ixyaani ja mmeeeñ. Konji'iky øts yø nbaayjøtpy tø nyik'ity;

21 kumi nnija'wip øts jøts ku mets ka' ti jadi'iñi xnajtsjawi, ja'agøjxpts øts ndsø'øgi, ja'abaat me xpayø'øoy øy mets ja xjagaja'aji, myikpidø'økwambyaat mets ja pikta'aky øy me mjagani'ipy."

22 Winets windsøn ja ñimaajyøø: "Mets ka'ømyidumbi, kø'øm yø m'aaw mnadyani'øøniyi, yø' me kø'øm mdiidyujnip. Pøni nnija'wip tam ku øts jade'en njaa'y'aty ku øts ja nbøkmuky mididi ø ngabiktakpy, ku øts ja xijy nyikpidi'ikpyaat mididi njaganipy,

23 jøts, çti kuts øts ja mmeeeñ tø xka'anuu'kxyaky, jøts øts ja meengyojpk jeexyip tø nbaaty møøt ja meeñu'nk'?"

24 Jøts ja tnimaay pøn jaty jam wyinatyi: "Pøjkxidi yø meeñ, jøts ja xmo'odit pøn øts ja meengyojpk majk ojk tø xyik'u'nk'ajtyi."

25 Jøts ja wyandøø: "Pø jamimts windsøn ja' myeeñ, pø majkts meeñ muky ja jam tmøødi."

26 Jøts ja windsøn y'adsøoy: "Øtsts idø'on wamp, jøts ku ja yjaaktyimyikpudøkit pøn tyikmøjtakp ku ja o ti yiin waan yikmø'øoy; pønts kø'øm o ti tkidyimyikmøjtakp ku ja o ti yiin waan yjayikmø'øoy, jaaktyimyikpøjkøjxipts ja ne'egi tuki'iyi.

27 Jøts ja' pøn ø xmi'ajkidip pøn ø xkatsojktip jøts ø nwindsøn'att, nøjkxts ja x'atswawdi jøts ya xyikme'endit jøts ya xtyimyikpa'oøktit øts nwingujky."

²⁸ Kuts ja Jesús jade'en myadyak'abajtiyi'i'ñ, jòts ja ñajxy, jamxi ja Jerusalén ñijxxy.

²⁹ Jawaani ja jam wyinaty kyidyimya'atti jam Betfagé jòts jam Betania, jade'en ja kajpxøw jam, ku ja tkejxy namajtsk pyabøjkpi ku ja jam wyinaty wingondi ma ja kojpku'nk jam txøøwi Olivos,

³⁰ jamts ja tnimaay:

—Nøjkxti ixem kajpjotp, ixew wingon. Kuts inet jam mja'attit, jam inet buur tu'uk kuwiñ xpaattit midi ka'aním pøn ttatsøøni. Ja'ats m'atmigajidip jòts xyikme'endit.

³¹ Pøni pønts myiktøøjidip tigøjxp ku xmigajidi, nøjmidits jòts ku ø ndsøky.

³² Jòts idø'øn ja pyabøjkpi namajtsk ñøjkxtøø tpatøø jade'en sa Jesús ja wyinaty tø ñi'i'mxyidi.

³³ Jam ja wyinaty tyimygajidi ja kujyujk ku ja jiyujk ja ñimaajydøø jòts ja yiktøøjidøø:

—¿Tigøjxp ku yø jiyujk xmigajidi?

³⁴ Jòts ja t'adsoodøø:

—Kumi ja nwindsøn'ajtim yø ttsojpk.

³⁵ Jòts ja twejtsnøjkxtøø ma ja Jesús jam wyinaty y'awijxy, jamts wyet ja ttajiba'andøø jòts Jesús ja ttawa'atspejty.

³⁶ Kuts idø'øn ja Jesús wyingon'adøtsni, xjats wet ja nøø' tuu' yiktabatya'abi.

³⁷ Ku ja wyinaty wyingoni ja kajp, ku ja jam kyida'aky Olivos kojpkwemp, winets pyabøjkpitøjk ja ejtni xoni yjanchpaya'axyi yjanchpajøkyi, jòts ja møk'ampy ttukmøjawidi ttukunuu'kxyjawiidi ja Dios ku milagri'ajtin ja wyinaty jade'en tø tyuk'ijxyidi.

³⁸ Yide'en ja wya'andi:

—¿Y'ajtp ku Dios xuknimi'iñim kyunuu'kxy wyindsøn! jtotkujk'atyim idø'øn jap tsajpjøtpy! jkuuyi Dios jadu'uk yjaak'øyi!

³⁹ Winets ja fariseotøjk winaaagin tnimaadyøø ja Jesús pøn jam wyinaty jaa'y agujkpti:

—Windsøn, tiku waani sa xkanøjmi yø mbabøjkpitøjk.

⁴⁰ Jòts ja y'adsojøø ja Jesús:

—Øts idø'øn wamp jòts ku øts inet yø njayik'amo'ondit, wenkpits inet kajpxkojmidip møk'ampy, nijuuni yø kya'amondi øy yø pøn yjayik'amonwa'añidi.

⁴¹ Kuts ja t'ejxpaajty ja Jerusaléngit kajp ku ja jam wyinaty jawaani kyaja'atni, jòts Jesús ja tkudsaachwinma'ayiyi'i'ñ jòts ja yaajxy,

⁴² yide'en ja wyaañ:

—jKuk jeexyip iiy wine'enin xja'gyuki jòts ku ja mxøøw ja mjumøjt tø mjataja'adyi, jòts jeexyip ni'ijtyi ja mjaay' tpaatti ja Dios kyunuu'kxyin! Tøts ja tiempí ñaxy, iti jaa ja xijy, jatyí myiktami'awa'anigyojmit!

⁴³ Ja'atp ja xøøw ja jumøjt ku tiempí kya'øyt, ku mmidsep mdamukit, amuum myikna'awidejtkøxt, nimā awa'ats mgata'ant, ja xem ja yam myiknidøkit,

⁴⁴ naxjøtpy myikjaagida'akt jòts ja mjaay' may'ampy kyudigø'ødyit. Niwine'en niti kyata'ant; ja'agøjxp ku tø xkagupiky ja Dios ku ja køøm tø mjanimiñi.

Ku ja Jesús twojpidšømguixy ja too'kpitøjk jam tsaptøjk agøøm

⁴⁵ Xjats ja Jesús chaptøjktøjkyyi'i'ñ jòts ya tuki'iyi tyikpidsømbinaxwa'jky pøn jaty jam wyinaty yajktip too'ktip, juudyip kajpxtip,

⁴⁶ yide'en ja tnimaay:

—Yide'ents Dios kyajpxy jap kyøjxa'ayi: “Ja' øts ndsaptøjk wya'añ jøts øts njaa'y jap Dios'ajot'attit”; ma meets yø ya jade'en xyiktuni sa maa'tspi chinaadyaajkindi.

⁴⁷ Jabom jabom idø'øn ja Jesús jam tsaptøjkjotp yik'ixpijky; yam idø'øn ja teetywindsøndøjkti, møøt ja kajpxwejpitøjkti møøt ja møjaa'dyøjkti miditnigubajk'ajttip ja kajp, tniwinmayidi sudso ja yjadyimy'uk'ooktnim.

⁴⁸ Jøts ja nisudso tkamidabyaatti ti sa ja ttu'undit, pø amuumts ja jaa'y ja jam pyatmadøyiyi, ti pøn ja jam kabatmadøjyiyip.

20

Ja Jesús kyutujk

¹ Xjats idø'øn yide'en tuk'ojk yjajty ku ja Jesús jam wyinaty tsaptøjkjotp tyik'ixpiky ja mayjaa'y, ja øgyajpxy ja øy'ayuujk ja jam wyinaty kyajpxwa'kxpy sudso nnitso'ok'ajtin, ku ja teetywindsøndøjk jam yja'jttøø, møøt ja kajpxwejpitøjkti, møøt ja møjaa'dyøjkti pøn tnigugajp'ajttip ja kajp,

² ja'ats idø'øn jam yide'en wandøø:

—Yø' mnigajpxp pøn jade'en tø mdagutujk'aty; jøts jade'en m'adø'øtst. ¿Pøn yø kutujk jade'en tø mmø'øyi?

³ Winets Jesús ja t'adsojimbijty jøts ja tnimaagy:

—Nayide'en mee nyiktøøwami, jøts m'adso'odip idø'øn:

⁴ ¿pøn ja Juan ojts tya'ane'emyi jøts ja yiknøbatt? ¿Dios ja ojts jade'en tyanigutujk'ajtxyi, uk ja naxwii'ñit jaa'y?

⁵ Winets ja agø'ømyi tkajpxy'ajttøø, yide'en ja ñawya'añidi:

—¿Sa nnima'ayin? Ku net yø njanima'ayin jøts ku Dios ja tyanigutujk'ajttøø, yide'ents inet yø x'adso'owin: “Jøts ¿tigøjxp ku ja xkajanchja'widøø pøni jade'en tam?”

⁶ Jøts kuts inet yø njanima'amya'andit jøts ku ja yaayi jade'en yik-tanigutujk'aty, tsojk inet yø jaa'y xjanchka'tspa'o'jkindit, kumi wa'ats yø tnijawidi jøts ku ja Juan ja Dios kyexyi.

⁷ Xjats ja t'adsoodøø jøts ku ja ka' tnijawidi pøni pøn ja Juan jade'en wyinaty tø tyanigutujk'aty; jøts ja jade'en yiknøbatt.

⁸ Jøts Jesús ja ñimaajyidøø:

—Pøni jade'en tam, ni øtsts meets ja ngadukmado'ot pøni pøn øts jade'en tø xanigutujk'aty ku øts jade'en n'adi'ich.

Ku Jesús tmadyakpaajty ja ka'ødyumbidi

⁹ Winets ja Jesús tnimaabyinaxwa'jky ja mayjaa'y, yide'en ja ejxpajtin madya'aky ja tu'uk tnmadyaktøjkjy'ñ:

—Ja dø'øn jaa'y y'ijty tu'uk pøn jam kyamjotp tnejp ja uvi tsa'am, jøts ja ttukmidagañ ja tyumbi winaagin ku jeky'ampy widejtpi ñijky.

¹⁰ Kuts tpaajty ja uvi tsa'am tujk'aats, jats ja tkejxy tu'uk tyumbi jøts ja t'atstuk'amidowa'añ pøn ja kam jam wyinaty tø tmidandi jøts ja tyaktit ja nidsa'am ni'ipy, midit paat'ajttip jøts ja yikmo'ot. “¿Maa?” “Ka'ap.” Ja tumbi ñømdøø. Yikxon ja jam ojts yjantyimykwoy, jøts ja yikajximbijty wa'ats jadi'iñi.

¹¹ Xjats ja kugam tkejxy jadu'uk tyumbi; nayide'en ja ojts yikjemnøjmi yiktenøjmi, yikxon ja jam yjanchyikipwyøjpy jøts ja nayi wa'ats jadi'iñi yikajximbijty, niti ja kyayikmøøy.

¹² Jøts idø'øn ja ka' tmimøñ, ojts tyumbi ja jadu'uk tkajkxkojmi jøts ja jam nayide'en ttundøø, tyikwindsaachidi tyikjøptsachidøø jøts ja tyiakttøø.

13 J'ots yide'en ja kugam wyaañ: "¿Sudsom tsøky ndu'unt? Nmajnku'ngin n'ukaxp, ja ku yø t'ejxpaattit, ¿ja kidi yø ttsø'øgidit?"

14 Ja'ayi ja tumbitøjk ja ojts y'ejxpaadyiyi jøts ja xem yam ñawyajnidøø: "Ya'at yø kam tmidanwamp; wan tyikpa'o'jkyim jøts adøm yø kam nmida'anindit."

15 Winets ja tjidøjtpidsømdøø jam kamjotp jøts ja ojts tyik'ookti.

—¿Sats idø'øn kugam ja yjaw'i tyunidit?

16 Me'emp ja kø'øm jøts ja tyikugøxit ja yjade'emb'i tumbidi pøn jadyimy-jade'en'ajttip, jøts ja ne'egi tmo'ot ja kyam ja abiky tumbidi.

Ku ja nidaay'ajtibi ja jade'en tmadoodøø, jøts ja wyandøø:

—iPø katsojknim ja Dios!

17 Tiy Jesús ja wyin'ijxyidi, jøts ja yiknimaadyøø:

—¿Tits idø'øn yø Dios kyajpxy ñigajpxy ku yø jap yide'en yja'ayi? ¿Nugo yø jap jade'en wya'añ?

Ja tsaa' mid'i ja pojtspi kya'ejxidøø,

ja'ats yam ne'egi tø y'uknøjkxni jam pøch kyubajkp jøts ja' t'amajtsmujkøjxp yø pøch.

18 Ku ja y'ukyiktanaxkidakpatt ku jam o pøn y'uknaxkida'akt, pø mǎ ja nay'ejxpaadit; u kuts o pøn tyanaxkidakpattit ja tsaa, pu'uxints ja yiktawayit.

Ku yikajpxy'aty ja kugubajt

19 Xjats ja teetywindsøndøjk møøt ja kajpxwejpitøjk ja tjadyimy'ukmǎtswandøø ja Jesús, wǎ'ats ja tyimyjaja'gyukidi jøts ku ja ja'agøjxp ja madya'aky yikmadyakpaajty; yjadyimy'ukmǎtswandip ja' ja Jesús, ja jaa'yts ja chø'jkidip paty ja jade'en tkatundøø.

20 Winets ja tpiktaktøø myigu'uk pøn tpa'ejxtip tpaog'odip jøts ja ñadyiji nugo jade'en ñanky'ijxyidi sam øy jaa'y, ja'ats ja chojktip jøts ja tkajpxy'ejxtit kuuyi ja y'ukajpxigø'øty, ja'ats ja jatyi tyani'øønidip jøts ja jam tkøyaktit mǎ wyindsøn ja jamdi.

21 Paty ja yide'en tyiktøødøø:

—Windsøn, nnija'wip øøts jøts ku myik'ixpiky øy tsuj, tiy janch tuki'iyi xnigajpxy jøts ka' me pøn xkupiky xkagupiky ti sa me mwǎ'añ, ne'egi yikxon mets ja ne'egi xnǎnkñi'ixpøkiyi tiy janch ja Dios tyiy'ajtin sudso ja yiknijawit.

22 Tukmadookts øøts: ¿Nmo'op øøts kugubajt ja møj windsøn mid'i jam abiky'ampy nichøky tø myiñ yikutujkpi, uk ka'?

23 Yja'wiyii'ñ Jesús ja jatyi jøts ku ja kya'ødyunwa'añi, jøts ja tnimaay:

—¿Tiku øts jade'en xkajpxy'ejxti, tigøjxp ku øts jade'en xniwambatwǎ'andi?

24 Uktuk'ejxtik øts tu'uk meñ. ¿Pøn ja wyeen y'aaw yø jam myøøt'ajtip, jøts pøn ja xyøøw jam køxja'ay?

Jøts ja wyandøø:

—Ja møj windsønimts yø' yja'.

25 Xjats ja tnimaay:

—Ja'ats meets ja mmo'op mid'i ja yja'ajtpy, jøts ja Dios ja' xmo'odit mid'i ja paat'ajtmiiyip.

26 Jøts ja nisudso'ampy tkakajpxy'ejxti øyik idø'øn ja ttaniwambattit sa jatyi ja jam wyinaty wya'añ jam mayjaa'yjotp; jinaxy ja ñigyumaap yjajtøø ku ja jade'en yik'adsoodøø, jøts ja ne'egi y'aaw amøñi t'ukyik'ejtnidi.

Ku ja jaa'y tyiktøwdi pøni janch idø'øn ja' ku oo'kpi jadigojk yjujkyøktit

27 Jøts idø'øn ja saduceotøjk jam winaagin yja'tmidøø jøts Jesús ja t'ejxwǎ'andi. Ka'ap idø'øn ja saduceotøjk ja tkupøkti jøts ku oo'kpi

y'anmija'win jadigojk pyidsimy jujky'ajtpi xemikøjxp møøt ñine'kx; paty ja tnimaadyøø ja Jesús:

28 —Windsøn, yide'en ja Moisés tjaadyaañ, pønik ñidø'øxy ku'øøky tyiktamp yam ja ka'aním y'u'nk tpaati, pøni jamts ja' y'uch y'ajch, ja'adsik tmøøt'amajtskip ja ku'økytø'øxy jøts ja ttukpaatt y'u'nk, jøts ja jade'en tkayikudigø'øty ja myigu'uk.

29 Jats idø'on jaa'y y'ijtyi, niwixujk ja tyukyaa'dyøjk'atti jøts ja yjagyooði jawyeen y'amajtskiy'ñ jøts ja tku'ø'jky ja ñidø'øxy, nitu'uk y'u'nk ja ojts tkapaati.

30 Xjats ja mutskpi ja tmøøt'amajtskiy'ñ ja ku'økytø'øxy jøts ja nayide'en tku'ø'jky, ka'ap ja tyik'u'nkpaajty.

31 Jøts ja midigøøkpi ja twaay ja ku'økytø'øxy jøts ja nayide'en tku'ø'jky. Tum jade'en yjajtkøjxti niwixujk, ni tu'ugin pøn y'u'nk tkayiktaañ.

32 Jøts ja tø'øxyøjk nayide'en y'o'jknimaa.

33 Kuts idø'on ja nøjx jadigojk yjujkpyøkti, ¿pømbits idø'on ja nøjx tñidø'øxy'aty jadigojk, pø niwixujkxi ja tø t'atsnidø'øxy'atti?

34 Xjats ja Jesús ja ñimaajyidøø:

—Yaayi dø'on yø jade'en yjaty, yaayi naqxwiñ jade'en y'amajtskidi ja yaay ja tø'øxy.

35 Pøn paat'ajtidip jøts ja ñøjkxtit jam mā Dios ja tø t'a'ejxi, ku ja yjujkpyøktit jadigojk ka'ap jam pøn t'ukjotmay'ajtnit ja amajtsk'ajtin, ni tka'ukyik'amajtskyinidit y'u'nk y'una'jk jam pøn,

36 ka'ap pøn y'uk'oo'knit y'uktigøøñit. Tum jade'en ja jam chinaañidit sam ankilistøjkti. Tum Dios ja amuum u'nk'ajtidip una'jk'ajtidip, ja'agøjxp ku dø'on ja jemchinaa'yin tø tpaatti ku ja jadigojk tø yjujkpyøkti jap oo'kpi agujkpy ja nwindson'ajtimøjxp.

37 Kø'øm paatxi Moisés ja xuknija'windi jøts ku oo'kpi yjujkpyøkti jadigojk ku ja jam ojts t'ixy ja ximum ñitøøwyidity. Pø yide'enxi ja jam tmadøøy jøts ku ja Abraham, jøts ku ja Isaac, jøts ku ja Jacob ja tdios'atti ja Dios Teety.

38 Kidi oo'kpipts ja ñidios'ajtpy, pø ja'axi ja ñidios'ajtpy jøts ja tyikjujky'att øy pøn.

39 Winets ja kajpxwejpitøjk winaaagin ñømdøø:

—Janch tiigyajpxy, windsøn.

40 Jøts ja ka' y'uknay'a'ejxiniyidi jøts ja tyiktøø'adø'øtstit, ne'egi ja y'amondøø.

¿Janch idø'on ku ja David t'ap'aty ja Cristo?

41 Xjats Jesús ja tnimaay:

—¿Jøts sudso jade'en mwa'andi jøts ku David ja Cristo t'ap'aty?

42 Pø yide'ents ja David tyikwa'añ ja nøky ku ja tjaay ja Salmos:

Yide'en ja nwindson'ajtim ja Dios Teety ñimaajyøø:

“Putsinaaky øts n'aga'ñ'ampy,

43 kunim øts yø nmimajadakøxt pøn jaty mmidsep'ajtip.”

44 ¿Sudso'ampyts ja David t'ap'aty ja Cristo, pø wyindsøn'ajtpyts ja kø'ømbaat?

Ku ja Jesús tñigajpxi ja kajpxwejpitøjk ja kya'øwyinmaa'ndyi

45 May jaa'y idø'on ixam amidodujktip ku ja Jesús tnimaay ja pyabøjkpitøjk:

46 —Øyim mnay'ejx'etidit, ejxim yø kajpxwejpitøjk mdawin'ññidi kya'øwyinmaa'ñ, jade'en yø ñachøkyidi jøts wyet yø tyeky'ok'am paat tpajidøttit, jøts ja' yø chojktip ja nawyindsø'øgi jøts yø yikajpxpoo'kxtit jam mayjaa'y agujk, jøts ku yø tsaptøjkjøtpy tyøkidi tum ja tsinaabyajt yø

tyatsinaawyandip midi jam tsaptøjk'okp, jøts ku kyaamyidi tum jam yø ñaxti tsinaabyi ma dø'øn yø myøjtøkidi.

⁴⁷ Nayø'øxi ku'øktø'øxy ja pyikta'aky tpøjkxidip jøts ñadyiji ñadyagubøjkyidi ja Dios'ajot'ajtin. Ja ti pøn ja', ja ti pøn ñadyiji jeky'ampy tsapkajpxtip, nayø'øxi ja'adi pøn ka' ti tyiknigaxø'økti, ñadyiji øy jaa'y'atti. Yø yjade'embijaa'yts idø'øn Dios møj yik'ayo'op.

21

Ku ja ku'økyø'øxy tpiktaajky lyimunsi

¹ Xjats idø'øn ja Jesús ojts t'ixy jap tsaptøjkjøtpy ku ja kumeeñ jaa'y jam wyinaty tkugonidi ja lyimunsi jam meeñ'abøjk'i'ñjotp.

² Jøts ku'økyø'øxy majtsk ja pyujxmeeeñu'nk jam tkugo'onimøø;

³ winets ja Jesús ja pyabøjkpitøjk tnimaay jøts ja wyaañ:

—Janch meets idø'øn nnøjmi, jøts ku yø ku'økyø'øxy ayoobi ne'egi myinajpxy lyimunsi yø jam Dios wyingujkp øy idø'øn yø kyamaabaadi sam o pøn yja' tpikta'akti.

⁴ Ja' yø iij yojxtip midi yø winda'anxiyidip yam yø ku'økyø'øxy ayoobi ne'egi tpikta'aky ja yiktuujnik ja ñidsinaajyik.

Ku ja Jesús tnigajpxy jøts ku ja tsaptøjk yjett

⁵ Jøts idø'øn niwinaagin jam wyinaty tnimadya'akti ja tsaptøjk, ku ja janch tsuj kyaxi'iky, ku tsaa ja jade'en janch tsuj tmøø'taty, jøts ja nayide'en chujkaxi'iky midi jam wyinaty pøngapøn tø tyoxti. Xjats ja Jesús wyaañ:

⁶ —Ja'atp ja tiemp ku ya'at kyuja'wigyøxt ixa jade'en x'ejxti, ku yø tsaa ni tu'ugin kyata'ant nikiibyety.

Ku ejxa'an jawyeen yikpikta'akt ku wyinaty ja tudyu'unin xøøw wyingøñ

⁷ Winets ja tyiktøødøø jøts ja tnimaadyøø:

—¿Juuni windsøn idø'øn ja jade'en yjatt? ¿Ti dø'øn ja yiktanijawip jøts ku dø'øn ja wyinaty jade'en yjatwa'añ?

⁸ Jøts ja Jesús wyaañ:

—Øyim mnay'ejx'etidit, jøts kidi mee tø mniyajtni ñiwyindaay'ajtk. Kumi may ja mye'endit pøn øts nxøøw nugo nadyanikajpxidip ku ja ñø'ømdit: “Cristo øts”; “Tø kya'pxy ja tiempi.” Kidits mets ja xpanijky jaty.

⁹ Jøts ku xnimado'attit ja tsep, uk tyiktigtatsti ja kyutujk adsepkojpx, kidits me mdsø'øgi; pø jawyeenxi dø'øn ya'at jade'en ñajxkøxt, ka'anims idø'øn wyinaty kya'pxy jøts kyugøxit ja naxwii'ñit.

¹⁰ Winets ja tjaaknimaay:

—Ja møj ja mutsk kajp nøjkx ñañibidi'igyidi, jøts ja windsøndøjk cheptu'undit ja xem ja yam pøn jaty ja naajx ja kajp tñitanaadyip ya naxwiiñ.

¹¹ Møk'ampy ujx ñaxt, yuu pa'am ñaxkida'akt øy maðsoo, adsø'jkyibim ja tuki'iyi myiktuk'ejxtit ku ja Dios ejxa'an møk tpikta'akt jam tsajpwemp.

¹² Jawyeents mee myikmajtsmukøxwa'ant, myik'ixa'adit o maðsoo. Kuts myikpaattit jøts myikwanøjkxtit jam tsaptøjkjøtp ma myiktudyu'undit, myikti'idyit myiktsu'umdit puxøjkjøtp, ja møj windsøndøjk myiktawinguwawidit pøn jaty yikutujktip, ja'ats idø'øn ja mdukpøky'atidip ku øts nja' xpabøjkidi.

¹³ Jats meets idø'øn ja nja' xnigubojkit.

¹⁴ Kidits meets ja xwandijy pøni sa mee mnagyubokit ku mee mnagyu'adsowiyit.

15 Øts meets ja wijy'ajtin nmo'op, øts meets nyik'ayukpaatp sa mee mwa'ant jøts ja mmidsep nisudso'ampy kya'adsojimbettit, jadi'iñi ja tmi'amo'ondit.

16 Mdeety paat mdaak paat mee nga'ødyuniyit. Tits ja chow ja mmigu'uktøjkti jøts ja'adi pøn mminamyaaajyidip, myik'oogidip winaagin meets ja'.

17 Tum midsep meets o pøn m'ejxit ja'agøjxp ku mee xjanchjawi.

18 Ka'ats meets jadi'iñi myik'ejxigø'øty, ni tu'ugin meets mwaay kyawindigø'øty.

19 Pøni mmidanaadyip tu'ugyi amumjoojt, mbaatpts meets ja nitso'ok'ajtin jøts meets m'anmija'win yjuky'att xemikøjxp.

20 'Ku x'ejxtit yø Jerusaléngit kajp jøts ku amuum tseptumbitøjk tø ñi'awidejtñiyi, jade'ents meets ja xñijawit jøts ku yø kajp wyinaty tsojk kyudigøøwya'añ.

21 Pøni pønts jam Judeit naxjotp wyinaty, wants ja tkaknøjkxti jam kōjpkøjxp; pøn jaty jam Jerusaléngit kajpjotp, wan ja jam tkakpidsømdi, jøts pøn jaty jam o muum awa'ats etjotp widejttip, kidi ja winet et wyimbetti jøts ja ñøjkxtit jam kajpjotp.

22 Ja'abi xøøw idø'on ja ayo'on mye'ent, jaa dø'on ja jade'en yjatt kyubatt sa jaty Dios kyajpxy wya'añ.

23 iAyo'ijxyim ja tøøxyøjk yjattit pøn jaty ja myutsk jam wyinaty tnikøjxp'ajttip, pøn jaty ja myaxu'nk jam wyinaty tø kyaxø'økti! Pø ji'iyim ya'axyimxi dø'on ya naxwiin yjatt, møk ja jaa'y ayo'on tpaattit t'ejxtit.

24 Pømbi ookitip jam tseptundaajkjotp, pømbits yikmatstip jøts ja yiktsu'umdit o magajp, øy yø Jerusaléngit kajp øy sa yiktu'unt, øy ja ja'at jaa'y øy sa tyuniyit, kunim ja y'ayo'on yø ttanajxkøxt winetnimts yø yikmajtstu'utt.

Sa mye'ent ja naxwii'ñit jaa'y myøjkudanaabyi

25 'Wenk yø xøøw yø po' yjatt, yø maadsa' nayide'en; jøts naajx kajp jadi'iñi tya'andit, niti tabyajtin tkapaattit, øy ja tsø'øgi yik'o'jkniiyidit ku tmdado'odit ja mey tyojmjø'økt øy maðsoo.

26 Yik'oo'kjimbetidip jaa'y tsø'øgi ku ja tnmado'odit jøts ku jade'en naxwiin yjatwa'añ; jøts ku ja'abaat jade'en yjatt ti jaty jam tsajpwemp ejtp.

27 Jaanims ø x'ejxtit, ja naxwii'ñit jaa'dyi myøjkudanaabyi, ku nmime'ent yootsjøtpy ja nmøk'ajtin, jajpim tsamambim ja n'aju'uk nyikaxø'økt.

28 Ku dø'on ja jade'en yjatt'ukwa'ant, møk mnabyikta'agidit jøts xjøp'ejxtit jøts ku tsojk mye'ent pøn myiknitso'ok'atidip.

29 Ñayi tyamimadyakpajtiyi'ñ ja' jadu'uk ejxpajtin madya'aky jøts ja wyaañ:

—Ku x'ejxti ja iigi kipy uk øy ti kipy kya'adigach ja y'aay.

30 Ku kujk xyimumni, jats ja wa'ats xñijawidi jøts ku poot wyingøñ ku ja nøø ja tuu myenwani.

31 Nayide'ents idø'on ja' ku x'ejxtit jade'en ja ayo'on, jade'ents ja xñijawidit jøts ku wyingøñ ja Dios kyutujk midit ja tyani'tanaapy yjaa'y.

32 Janch øts idø'on nwa'añ jøts ku dø'on ja jaa yjatt namga'anim y'oo'kixy pøn jaty ja ixyam jujuky'ajttip.

33 Najxp y'ity ja naajx ja tsajp, øy yø juuni kyudigø'øty, jøts øts n'ayuujk niyuuni yø kyakixy kyanaxy.

34 'Øyim mjaa'y'attit, kidi m'aaw mjojt xamiyoxti midit yiktundigøøpy, kidi ja nøø ja mu'uk xunk'atti, kidi meets ja ne'egi xajotigøydi ti jaty ja ejtp naxwiin jøts jade'en adsu'jky mgayikubaadidit

³⁵ sam naky myukyın, jade'en ja yiknime'endit pøn jaty jujky'ajttip øy madsoo ya naxwiiñ.

³⁶ Jøp'ejxtits meets, ajot'at'etti ja Dios jøts mniwa'adsidit ja ayo'on midi tunip jatip, jøts ø xwinguwa'agidit amgujuk jotkujuk, ja naxwii'ñit jaa'y myøjkudanaabyi.

³⁷ Xinaxy idø'on ja Jesús jam yik'ixpiky tsaptøjkjotp, jøts ja koots ñijkxy jam kojpkøjxp midi yiktejp Olivos.

³⁸ Jøts ja mayjaa'y jam tsaptøjkjotp ejtp xyuminøjkxti jøpyi jøts ja jam pyatmadøyi.

22

Ku ja Jesús yikajpxy'aty jøts ja yikmatst

¹ Ja paski xøøw idø'on wyinaty pyatpy ku ja tsapkaaky yikay jadi'iñi midi kalevaduri møøt.

² Jøts ja teetywindsøndøjkti jøts ja kajpxwejpitøjkti tjanch'ixa'adi ja taay sudsonim ja t'ukyik'ookit ja Jesús, ja mayjaa'yts ja chø'jkidip.

³ Xjats ja Judas Iscariote ja miku' tyatøjkxyøø, ja' idø'on ja pabøjkpitøjk møøt kya'pxti nimakmajtsk.

⁴ Jøts ja ojts tñinijkxy ja teetywindsøndøjkti møøt ja tajk mayut, jøts ja ojts tminagyajpxyi, ojts ja tkajpxy'atti sudso ja tkøyakt ja Jesús jøts ja tmatstit.

⁵ Jøts ja jade'en yjotkujuk'atti, ojts ttami'awanidi meeñ ja Judas, jøts ja ttamiju'udyit ku ja tkøyakt ja Jesús;

⁶ kyupøjk ja jade'en jøts ja t'ixaadyøjkxyi'ñ ja taay, jøts ja winet tkøyakt ku ja mayjaa'y jam kya'ettit.

Ku ja nwindsøn'ajtim yjaak'uk'a'ux'ajtni ja pyabøjkpitøjk

⁷ Xjats ja xøøw tpaajty ku ja tsapkaaky kyayikay levaduri møøt, xjats idø'on ja borreegi maxu'nk wyinaty y'ookwa'añ, jøts ja' idø'on yikyøxy'ajtp ku ja paski xøøw ñaxy.

⁸ Winets ja Jesús tkejxy ja Pedro møøt ja Juan, yide'en ja tnimaay:

—Nøjkxti jøts ja paski a'ux xyik'awejxtit.

⁹ Jøts ja tyiktøødøø yide'en:

—¿Mamts øøts ja xuk'a'ejxiwya'añ?

¹⁰ Jøts ja Jesús ja y'adsoojidøø:

—Ku net jam mgajtpøkidit, jam inet tu'uk xpaattit jaa'y pøn jam wyinaty nøø twejtsp tsiijøtpty. Ja'ats mbanøjkxtip jam tyøjkjotp, pøni ma yja'aty jamts mja'attit,

¹¹ jøts ja kudøjk xnøjmidit: “Yide'en ja windsøn wya'añ: ¿Mak idø'on ja tøjkjoojt ma ja tmøøt'a'ux'att ja pyabøjkpitøjk, mak idø'on ja tka'adyit ja paski a'ux?”

¹² Winets meets inet ja tøjkjoojt myiktuk'ejxtit jap nipatøjkijxy a'ejxi abaadi; japts xyik'awejxtit ja a'ux.

¹³ Xjats idø'on ja ojts ñøjkxti jøts ja jam jade'en tjanchpattøø sa Jesús ja wyinaty tø ñi'mxyidi, jøts ja jam t'a'ejxidøø ja paski a'ux.

¹⁴ Kuts ja a'ux'ajtk tpaajty, xjats ja Jesús møøt ja kyudanaabyitøjk twinguwa'adsiyi'ñ ja kaabyajt.

¹⁵ Jøts ja tnimaay:

—Ixyañnim meets inet ja paski a'ux jade'en nmøøtkaamyuky sam ø ndyim-chøkyin namga'anim ø n'øøky!

16 Janch øts idø'øñ nwa'añ jøts ku meets ixya^m jade'eñi njaakmøøtkay jaanim jadigojk ku mye'ent ja Dios kyutujk midi ja tyanitanaapy yjaa'y.

17 Winets ja tnixajiyii'ñ tu'uk uujk'ii'ñ, jøts ja jawyeen ttukmøja'wiyii'ñ ttukunuu'kxyja'wiyii'ñ ja Dios Teety, jøtsniim ja wyaañ:
—Axajidi ya'at jøts x'ukwa'kxtit;

18 øts kø'øm wamp jøts ku ø ka'ap tsojk n'uk'uknit yø uvi tsa'am nøø'u'nk, jaanim jadigojk ku Dios ja kyutujk tyikme'ent midi ja tyanitanaapy yjaa'y.

19 Jøts ja tnixajiyii'ñ tsapkaaky, ojts nayide'en ttukmøjawit tukunuu'kxyjawi ja Dios Teety, jøts ja t'adujkpa^jkxi ja kyudanaabyitøjk jøts ja tmø'y, yide'en ja tnimaay:

—Kaydi ya'at, yø' øts idø'øñ ñamyayi nne'kx'ajtpy midi meets mnitsoojkingøjxp inet mniyoxp. Mdu'undip ya'at jade'en øts nja'myajtsingøjxp.

20 Nayide'en ja uujk'ii'ñ ja ttuun ku ja y'a'ux'ajtkøjxtøø, jøts ja wyaañ:

—Ya'at tsapnøø'uujkin idø'øñ ixyam tamp ejxpajtin ku ja Dios Teety ja wyanda'aky tyik'aduky samdam ja ttami'awa'anii'ñ ja naxwii'ñit jaa'y ja nitso'ok'ajtin. Ixyamts idø'øñ ja cho'onda'aky ku øts ja nni'jpy inet wyidsu'unt wyidaxt.

21 Pønts ø xkøya^kp, pøn ø xka'ødyunwamp, ixya øts ja møøt ngay, kidi majip ja'.

22 Ja' ø nbadumpy midi ø tø nyiktanipiky; jja' ayo'ijxyim jajtp pøn ø xkøyakwamp!

23 Jøts ja ñayiktøønaxwa'jkidøø agø'ømyi, pøn idø'øñ jade'en ka'øy'adø'øtswamp.

Ku ja Jesús kyudanaabyitøjk tkajpxy'atti pøn idø'øñ jawaani møj pidsø'ømp

24 Xjats ja xem yam tkajpxy'ajtpinibøjkidøø pømbi dø'øñ jady-imy'ukmøjtøkip.

25 Jøts Jesús ja ñimaajyidøø:

—Jade'en møj windsøn t'ana'amdi ja naajx ja kajp pøni sa ja ttsokti; jøts pøn jaty tñigubajk'ajttip o ti, ja'ats yiktejtjip jøts ku ja t'ødyundi øy pøn.

26 Ka'ats meets idø'øñ jade'en mjaa'y'attit; pøni pøn møjtojkjip, pøni pøn ana'amp, kidi ja jawyeen namyiduni ttsøky; ja' idø'øñ paa't'ajtip ja myigu'uk tpuðøkip.

27 ¿Pømbi dø'øñ møjtojkjip? ¿Ja' pøn yikwindsø'jkjip, uk ja' pøn windsø'jkjip ma ja kaadyaajk jam? ¿Kidi ja'ajip møjtojkjip pøn jam tø twinguwaadsa ja kaabyajt jøts ja yikwindsø'øgi? Ixyats meets jade'en nmøøtwidity sam ja' pøn ja myigu'uk wyindsø'jkjip.

28 Tøts meets xmøøt'ayo'ombaaty, tø nayide'en xmidanidi wine'enin øts ixyam xmøøtwidetti.

29 Paty meets mbaat'aty; nmo'ot ja Dios Teety kyutujk midi ja tyanitanaapy yjaa'y, nayide'en sam øts ja tø xmøøyin,

30 jøts mga'adyit m'uuktit øts ngaabyajtkøjxp ku øts ja njaa'y ja kutujk ndanitanit, jøts m'ixa'aktit ma ø nyikutukt jøts xiidyu'undit ja Israelit jaa'y niduki'iyi.

Ku ja Jesús kø'øm tñigajpxy jøts ku ja Pedro ja kyu'øøniyit

31 Nayide'en ja nwindson'ajtim wyaañ:

—Simón, Simón, tyimdyø jøts miku' yja' myøjtøkit. Tø ja t'amidøy ja Dios Teety ja tiy'ajtin jøts meets ja øy øy myik'ayo'ombaadit, yikxon meets ja mduktani'eixwa'añi;

³² tɔts me nni'amidowɪ jɔts kidi yikmimajada'aky ja mjanchja'win ku jade'en m'ukjatt m'ukubatt. Kuts ja m'ajot'ajtin jadigojk tu'ugyi xyik'ett, kajpxjot'amɔjkits ja mmigu'uk pɔn jaty ɔ nja'ajtpy.

³³ Jɔts ja Simón wyaaǎn:

—Windsøn'ajtim, ku me m'ukyiktsu'umt, nayide'ents ɔts nyiktsu'umt, ʒti ti ɔ nnida'amp? Mjadyimya'ɔɔky mets, nmɔɔt'ookpts mets.

³⁴ Winets Jesús ja ñimaajyɔɔ:

—ɔts Pedro d'ɔn wamp jɔts ku tsapni'aaw wyinaty ka'anin y'ayajxi'ikñim, ku mets wyinaty tigɔɔk ojk tɔ xku'ɔɔ'ni jɔts ku me xka'ijxy'aty.

Ku Jesús tñimaay kyudanaabytɔjk jɔts ku ja tyagɔda'akwa'añidi ja ayo'on

³⁵ Xjats Jesús ja yiktɔɔjidɔɔ:

—Ku meets ojts nguexy jadi'ñi, ku ja pejn ngadukwejtstɔɔ, ku ja meefi abɔjk'ii'ñ ngadukondɔɔ, ku ja mgɔ'ok paat xkakondɔɔ, ʒsats meets ojts mdyimyjaty? ʒTi ojts mguidyim'ijtxyidi o d'ɔn ja jade'en xkakondɔɔ?

Jɔts ja yjanchwandɔɔ:

—Janch ka'ap ɔɔts ojts ti xka'ejtxi.

³⁶ Winets ja ñimaajyidɔɔ:

—Yamnims inet ja pejn xwetstit pɔni pɔn yja' jam, nayide'en ja meefi abɔjk'ii'ñ; pɔni pɔn ja chujx ka'ejtxip, wan ja ñijan tɔɔky jɔts ja ttaju'uty.

³⁷ ɔts wamp, wan id'ɔn jade'en tjaty, jabi kuwanyimxi jade'en yjatt sa Dios kyajpxy wya'aǎn: “Mɔɔt ka'ɔy jaa'y ja yik'amachomujky.” Jade'ents ɔts id'ɔn nyiktu'unt sa ɔts jap tɔ nyiknigajpxy. Ka'pxy id'ɔn ja jade'en yjatt kyubatt.

³⁸ Jɔts ja wyandɔɔ:

—Windsøn'ajtim, pɔ ɪxyats majtsk tsujx.

Jɔts ja y'adsɔɔy:

—Amɔñidi.

Ku ja Jesús t'ajot'aty ja Dios Teety jam Getsemani

³⁹ Xjats ja Jesús chɔ'jñ, jɔts ja ñijxxy jam kojpkɔjxp midi yiktejp Olivos ma d'ɔn ja jam xyumi'ɔ'oy'lity; jɔts pyabɔjkpitɔjk ja pyadso'onɔɔ.

⁴⁰ Kuts ja jam yja'jty, jɔts ja ñimaajyidɔɔ:

—Ajot'atti Dios Teety, jɔts kidi myikmajada'akti.

⁴¹ Jɔts ja ojts yjy'ɔ'oy nadyu'uk, ñajtsy'ɔ'yiyii'ñ nijagam. Jamts ja ñagyuxendyaajkɔɔ, jɔts ja jam Dios Teety t'ajot'ajty

⁴² yide'en:

—Dios Teety, pɔni mdsɔjkpy, jɔts ɔ ka' jadine'en n'ayo'ombaatt; kidi ɔtsipts nja' kɔ'ɔm nyiktumpy, ja' ɔ nbadumpy pɔni sa me xamidsɔky.

⁴³ Winets ankilis ja tu'uk ñimejnɔɔ midi tsajpjɔtpy tso'omp, jɔts ja myɔjaawmɔɔjyɔɔ.

⁴⁴ Tyimchaachja'wipts ja mɔk ku d'ɔn ja jade'n yjatwa'aǎn, jɔts ja ojts tjaaktyimyɔktuñ tjaaktyimy'ajot'ajty ja Dios Teety amumjoojt. Janch yikxon ja yja'anuu'kxiñi, jade'en y'anuu'kxi ja wyixe'kxy sam ni'jpy kom kom wyixe'kxyin.

⁴⁵ Kuts ja Dios'ajot'ajt'abajtyii'ñ, jɔts ja ojts tñimiñ ja pyabɔjkpitɔjk ma ja jam wyinaty. Maadip ja jam ku ja tpaajty, ja jotmay ja jadi'ñi yikjotkɔjxidip.

⁴⁶ Winets ja tñimaay:

—ʒTigɔjxp ku mma'adi? Pidɔ'okti, jɔts ja Dios Teety x'ajot'attit jɔts kidi mibaat mik'u' yja' mmimajada'agyidi.

Ku ja Jesús yikmajch

⁴⁷ Nay ixam ja Jesús wyinaty jade'en kyajpxy ku yja'jty may jaa'y. Ja Judás ja twinyo'opy pøn ja pabøjkpitøjk wyinaty nimakmajtsk møøt tø y'uka'pxti, jøts ja twingume'eniyi'ñ ja Jesús jøts ja ojts ttsu'kxy.

⁴⁸ Winets nwindson'ajtim ja tnimaay:

—Judás, ¿jade'eñi øts idø'on xkøyaky ku ø xtsu'kxy?

⁴⁹ Jøts pøn ja Jesús jam wyinaty møøtwidejtjip, ku ja jade'en t'ejxtøø, winets ja yiktøøjøø:

—Windsøn'ajtim, ¿nadyagubojkim yø tsujx?

⁵⁰ Jøts ja nidu'uk tyiktsaachiyi'ñ ja teetywindsøn tyumbi, ojts y'aga'ndyatsk ja tkajtspo'jtji.

⁵¹ Ka'ap Jesús ñiimy, yide'en ja wyaañ:

—Majtsu'utti; wan jade'eñigøjy.

Jøts ja tkønixajøø ja soldadi tyatsk jøts ja tyiktsøøjky.

⁵² Xjats ja tnimaay ja teetywindsøndøjkti, ja kajpxwejpitøjkti, ja møjaa'dyøjkti wine'enin ja jam winaty tø myendø jøts ja yiktsoonwa'añi:

—Ja tsujx, ja kipy meets yam xanimemp. ¿Ti øts yjawi tø nduni? ¿Tø øts yjawi nmaa'tsni?

⁵³ Ku meets jam y'ijty nxumiminabyaadyi jabom jabom jam tsaptøjkjotp, niwine'eninits meets y'ijty sa xkatuñ xkanøjmi; yamts meets winet tø mnaxwa'aky ku ja et tø chuu'ji kyoodsi jøts miku' yja' jade'en myajada'aky.

Ku ja Pedro tku'iñ jøts ku ja ka' t'ijxy'aty ja Jesús

⁵⁴ Winets ja tmajstøø ja Jesús, jøts ja tyiknøjkxtøø jam teetywindsøn tyøjkwindum; jøts Pedro ja ojts tpanijky ix'oojk, jagam ja tpayø'øy.

⁵⁵ Jøts jøøn ja jam tajkyujk'am tyikmøjidøø, jamts ja tnidsinay'awidejttøø jøts ja Pedro nay jam y'ixakmøø.

⁵⁶ Winets tø'øxyøjk ja tu'uk y'ejxøø pøn jam wyinaty tump, jøts ku jøøn ja jam twindsøøni, winets ja tiyim wyin'ejxøø jøts ja wyaañ:

—Yø'øts ja Jesús y'ijty tmøøtwidejtjip.

⁵⁷ Ka'ats Pedro ja tkupiky, yide'en ja wyaañ:

—Ka' ø migu'uk ja n'ijxy'aty.

⁵⁸ Jøts jawaandøki y'ijty, xjats jadu'uk y'ejxpajtøø, jøts ja wyaañ:

—Mets yø y'ijty møøtwidijtpy, ¿kidi?

Ka'ats ja Pedro ñiimy, yide'en ja wyaañ:

—Mixy, ka'ap ja y'øtsi, ka' øts ja nmøøtwidity.

⁵⁹ Tø wyinaty tukoori ñaxy ku ja jadu'uk møkta'aky wyaañ:

—Janch yø' tam yø y'ijty myøøtwidijtpy, pø nayi Galileit jaa'yts yø'.

⁶⁰ Xjats ja Pedro wyaañ:

—Migu'uk, nguidyimñija'wip øts pø ti mets jade'en mmadya'kpy.

Jøts nay jatyi nay ixamni ja jade'en kyakajpx'abaadi ku ja tsapni'aaw tu'uk y'ayajxy.

⁶¹ Jøts ja nwindson'ajtim t'ejxjimbijty ja Pedro, winets ja Pedro tja'myejch ku nwindson'ajtim ja wyinaty tø ñi'mxyi: “Ku tsapni'aaw inet y'aya'axt, tø mets wyinaty tigøøjk øjk xku'øø'ni jøts ku me ka' x'ijxy'aty, jøts ku me ka' xnijawi.”

⁶² Xjats ja Pedro yø'øpyidsiimy janchniyaxni.

Ku ja Jesús yiktaxi'iky yiktagyaty

⁶³ Jøts ja jaa'dyi pøn ja Jesús wyinaty tkøø'øm'ajttip, ojts ja ttaxe'ekti ttaya'axti, jøts kawine'en twinwopti tjøpwopti.

⁶⁴ Ojts ja twindsumdi jøts ja twingoxti tjøpkoxti, yide'en ja tnøjmidi:

—iUknajtsjawi pøn yjawi tø mgøxyi!

⁶⁵ Kawine'enin ja tjemnimaadyøø ttenimaadyøø.

Ku ja Jesús yikwaanijxxy jam kutujktaajkjotp

⁶⁶ Xjats ku xyiiindyajky jøts ja jamit mōjaa'dyøjk ñamyujkidøø mōøt ja teetywindsøndøjkti, mōøt ja kajpxwejpitøjkti, jøts ja tyiknøjkxtøø ja Jesús ma ja myøjkutujktaajk ja jamdi. Jøts ja jam tyiktøødøø yide'en:

⁶⁷ —Tukmadook øøts, ¿janch mets idø'on myiktejp Cristo midi yiknitsokp?

Jøts ja y'adsoojidøø:

—Ku net njanøjmidit jøts ku ja y'øtsi, ka'ats meets inet xmibøkt.

⁶⁸ Kuts meets inet nyiktø'øtt, ka'ats meets inet x'adsojimbett, nijade'en meets inet xkamajtstu'utt.

⁶⁹ Nay ixymyits øts inet ja Dios Teety nbu'ixaagit kyutujktaajk jøp'am, pøn ja myøk'ajtñ kamaabyim.

⁷⁰ Winets ja niduki'iyi wyandøø, niduki'iyi ojts yiktiyi:

—¿Janch mets idø'on Dios U'nk?

Jøts Jesús y'adsøøy, yide'en ja tñimaay:

—Øts idø'on ja', nagyø'ømm meets ìxa jade'en tø mwa'añ.

⁷¹ Jøts ja wyandøø:

—¿Ti ejxpi ti nija'wibi jaaktsojkiyip? Tøxi adøm yø yam kø'øm ndy-
imyadø'øyin sa yø kø'øm wya'añ.

23

Ku ja Jesús twinguwa'jkyyi'ñ ja Pilato

¹ Winets ja tyanagyukigyøjxtøø, jøts tyiknøjkxtøø ja Jesús jam Pilato wyingujkp.

² Jøts ja jam tni'øø'ninaaxwa'aktø yide'en:

—Tø øøts yø jaa'y ngubaadi, yø' tkajpxma'tp adøm ja nmigu'uk. Yide'en yø wya'añ jøts øøts ja yjadu'ukpi windsøn ngamigubatt mididi ya'at naajx kajp tñitanaapy. Nayide'en øøts yø xnimaamyi jøts ku yø' Cristo, tyimy ja møj windsøn mididi yiknitsokp.

³ Xjats Pilato ja tyiktiy:

—¿Janch mets idø'on israelit jaa'y mniwindsøn'ajtpy?

Winets ja Jesús y'adsøøy jøts ja wya'añ:

—Janch øts ja', ka' me nugo mwa'añ.

⁴ Jøts ja Pilato tñimaay ja teetywindsøndøjkti mōøt ja mayjaa'y:

—Niti pøky yø jaa'y, niti tundigø'øyin yø tkatuñ.

⁵ Tiii møkta'aky ja tyimñømdi:

—Yø', Judeit jaa'y nugo tkajpxma'tp ku kyø'øm wyinma'añ yø ttuk'ixpiky. Jam yø ojts Galilea jade'en y'adøtspinaxwa'aky, jøts yø ìxyabaat jade'en tpañ, ìxyabaat jade'en tkamajtstu'uty.

Ku ja Jesús twinguwa'jkyyi'ñ ja Herodes

⁶ Kuts Pilato ja jade'en tmadøøy, xjats ja tyiktiy pøni janch Galleit jaa'y idø'on ja'.

⁷ Kuts ja ñømdøø jøts ku jade'en, winets ja ojts ttaninijxxy ja Herodes pøn wyinaty møjkudunk'ajtp jam Galilea, tyimbyøn ja wyinatymi jam Jerusalén ja'abi xøøw.

⁸ Kuts ja Herodes twingu'ejxyi'ñ ja Jesús, jøts ja yjantymxyondaajky; jekyip idø'on ja wyinaty tyimyjawin'ejxwa'añ jøts ja jadine'en ka'

twin'ijxn̄im, t̄o ja wyinaty yiktamimadya'aky j̄ots ja jade'en tnijawi, jyj̄op'ijxpyts ja t'ejxit̄ oy juuni ja myilagri'aj̄itn.

⁹ Kawine'en ja t̄tiibyiky, j̄ots ja Jesús kyidyimy'adsoop ja'.

¹⁰ Exam id̄o'̄on ja teetywinds̄ond̄ojk wyinatyi m̄ōot ja kajpxwejp̄it̄ojkti, ja'ats jam m̄ok'ampy jantyimy'̄ō'ndip.

¹¹ Xjats ja Herodes m̄ōot ja tyumbit̄ojk ta'ajkin'ampy tjemdundi ttedundi ja Jesús, j̄ots ja t̄nixe'ekti t̄taxe'ekti, ojts wet ja ttuktat̄okidi sam m̄oj winds̄on wyetin, j̄ots ja Herodes ja t̄taniguejxy ja Pilato jadigojk.

¹² Winets ja ñamyigu'ukp̄ojkid̄ōo jadigojk ja Pilato m̄ōot ja Herodes, namyidsep'aj̄tidip id̄o'̄on ja wyinaty.

Ku ja Jesús ñidujkyi'ñ j̄ots ja y'oookt

¹³ J̄ots ja Pilato t̄waamujky ja teetywinds̄ond̄ojkti, ja kudunkt̄ojkti, m̄ōot ja mayjaa'y,

¹⁴ j̄ots ja t̄nimaay:

—Meets ȳo jaa'y ya t̄o xanimiñ j̄ots mn̄omdi j̄ots ku ȳo' tkajpxma'aty ja jaa'y; t̄ots xmadowdi ku t̄o n̄jatiibyiky, j̄ots n̄iti tundiḡo'̄oyin̄ ōts ȳo ngadap̄oky'ijxy, ōy meets ȳo jade'en xjani'̄ōoni.

¹⁵ Nayide'en Herodes ȳo n̄iti tundiḡo'̄oyin̄ tkapaaj̄txi, ixyats ja t̄o tka-jxjimb̄ejtnimi jadigojk. Exats id̄o'̄on x'ejxti j̄ots ku ka' pyaāt'aty j̄ots ȳo y'oookt.

¹⁶ Nyik'ayo'opts̄ ōts inet ȳo' j̄otsnim̄ ōts inet ȳo nyik'awa'at̄spids̄o'̄omt.

¹⁷ Xumijade'ents id̄o'̄on ja ttundi ku ja x̄ōw t̄paaty, kuwani d̄o'̄on ja Pilato tu'uk ja p̄okyjaa'y tjadyimyk'awa'at̄spids̄o'̄omt.

¹⁸ J̄ots ja ni'ijtyi m̄ok'ampy wyambinaxwa'akt̄ōo:

—iYikjiwa'ak ȳo', j̄ots ȳo Barrabás ne'egi xyik'awa'at̄spids̄o'̄omt!

¹⁹ Tsep'ejxp id̄o'̄on ja Barrabás jam wyinaty jam kajpjotp j̄ots ja t̄o yikjaa'y'̄ōoky, ja'ats ja kyubux̄ojkt̄ojkyi'ñ, ja' ja wyinaty t̄o yiktagudsumi.

²⁰ Yik'awa'at̄spids̄o'̄mwampy Pilato ja Jesús, j̄ots ja ojts t̄nigajpxy jadigojk ja mayjaa'y;

²¹ ¿maa'?, jawaani m̄ok'ampy ja wyand̄ōo:

—iYikruspat! iYikruspat!

²² Xjats ja Pilato midiḡōok ojk wyaañ:

—¿Tims̄ ȳo tyimgyubatp? ¿Ti tundiḡo'̄oyin̄ ad̄om̄ ȳo t̄o xtyimdyu'unx̄im? Ka ōts ȳo nb̄oky'ixy ti ȳo tyimgyu'oogip. Ja'ayi ōts ȳo nyik'ayo'ot j̄ots ōts ȳo nyik'awa'at̄spids̄o'̄omt.

²³ J̄ots ti d̄o'̄on ja tjantyimdyejti, m̄ok ja tyimdyanidi j̄ots ja t̄n̄ojm̄idi wan tyikruspety; yjanchka'uk'amonidi ja', j̄ots id̄o'̄on ja teetywinds̄ond̄ojk ja jade'en t̄nanktyuujnid̄ōo sam id̄o'̄on ja wyinaty tyimyjotkida'akti.

²⁴ Winets ja Pilato ja tkupijky sa ja wyinaty t̄o wya'andi,

²⁵ j̄ots ja jade'en tyik'awa'at̄spids̄o'̄im̄y ja jaa'y p̄on ja wyinaty t̄o t'a'ejxidi. J̄ots ja pyids̄o'̄omt ja' p̄on jam wyinaty tsumy'ejtp̄ pux̄ojkjotp, p̄on jam wyinaty jade'en t̄o tkubety ja tyundiḡo'̄oyin̄ ku ja wyinaty t̄o t̄nankchep'ijxyi ja kajpjaa'y j̄ots ku ja yikjaa'y'̄ōoky. Xjats id̄o'̄on ja Jesús yik̄oyajky j̄ots ja yiktaḡod̄ojkyi'ñ ja mayjaa'y, wan ja ttundi p̄oni sa ja ttundi chojkinḡojxp.

Ku ja nwinds̄on'aj̄tim Jesús kyiruspejty

²⁶ Kuts ja wyinaty jam tyikn̄ojkxti ma ja tyikruspattit, winets ja tu'uk t̄majtst̄ō ja jaa'y p̄on kugajp'aj̄tp Cirene, Simón'aj̄tp ja'. Kyamjotp ja wyinaty ch̄ōoñ j̄ots ja t̄taguwa'anid̄ōo j̄ots Jesús kyirus ja t̄paḡojyit j̄ots ja ix'oojk t̄tabaȳo'̄oty.

27 Janch may jaa'y idø'øn ja jam wyinaty payø'øyyip, may ja tø'øxyøjk yjanchya'axti ku ja jotmay ja tyatøkiyidi, ku ja jade'en tyimyiktuñ.

28 Jøts Jesús ja ojts y'ijxyidi jøts ja ñimaajyidøø:

—Meets Jerusaléngit tø'øxyøjkti, kidi ø xkuyaaxidi, kø'ømyi mee mnabyaya'axit jøts ja m'ejxtip ja m'u'nk m'unaj'jk, ja mbaya'axtip.

29 Ja'atp ja et ja xøøw ku pøn wya'ant: “Nekim yø t'ejxti pøn ka'u'nkpattip, pøn niijuuni kayikwidse'etstip, pøn niijuuni y'u'nk tkatsimylejttip.”

30 Jøts ja jaa'y wyambinaxwa'aktit: “Ok øts yø tun yø kojpk ne'egi xnijaanit.”

31 Jade'en sam øts ixyam n'ayo'ombaaty niti pøkyøjxp, isats ja tyimy'ayo'onbaattit ja Jerusaléngit jaa'y!

32 Namajtsk pøkyjaa'y ja pyaa'yø'øyi ja Jesús jøts ja t'atsmøøt'ookt.

33 Kuts ja jam yja'jtøø mā ja et jam txøøw'aty Calavera, jamts ja tyikrus-pajttøø ja Jesús møøt ja yjanamajtskpi pøkyjaa'y, tu'uk jaty ja adsow aduuk kyiruspajttøø.

34 Kuts ja ixam wyinaty jade'en yikruspatti, xjats ja Jesús wyaañ:

—Dios Teety, maa'kxuk, ka' yø tñijawidi pøni ti yø tyundip.

Jøts ja soldaditøjk ja wet tñiguyajttøø midit ja Jesús y'ijty wyet'ajtpy, jøts ja jami agø'ømyi twejtswa'kxtøø.

35 Ixam idø'øn ja mayjaa'y y'a'ejxukti jøts kudunktøjk paat ja ñixi'igyit ytaxi'igyit, yide'en ja wya'andi:

—Tøxi wyenkpi tyiktsø'øky, wants inet yø kø'øm tñankchø'øgyi, pøni janch ja Cristo tam idø'øn yø' pøn ja Dios tø y'a'ejxyi yiknitsokpi.

36 Nayide'en soldaditøjk ja ñixejkmiyøø tyaxejkmiyøø, jam ja wingon wyingunøjkxyi jøts ja ttuk'uukwa'andi ja vino ta'am,

37 yide'en tñøjmidit:

—Pøni mets tam idø'øn mjanchwindsøn'ajtp yā israelit jaa'y ñaxjøøjty kyajpjøøjty, nankñitso'ogits mets jøts mga'ookt.

38 Jøts letri ja jam y'agubajkp yikøxjaay kawinaak jøøjp ja ayuujk, jade'en griego, jade'en latin, jøts hebreo, yide'en ja wya'añ: “Ya'at idø'øn tñiwindsøn'ajtp israelit jaa'y.”

39 Jøts ja pøkyjaa'dyi pøn jam wyinaty kudiydi, ja'ats ja nidu'uk migajpxigøøyøø, yide'en ja ñimaajyøø:

—Pøni mCristo tam mets, çti kuts mganankwyinakyi jøts øøts nayide'en xyikwinakt?

40 Jøts ja yjadu'ukpi ojts twi'øjy ja myigu'uk, yide'en ja tñimaay:

—çKa' mets ja Dios x'uktsø'jkiñi? Jabi nayide'ents jam yjawi mja'ayo'ombaati.

41 Jøts xpaat'ajtim adøm jade'en jøts adøm jade'en ngu'ayo'owant ja nga'øy'ajtin ti jaty adøm tø ndu'uñin, mats ya'at niti yø tkatuñ ti dø'øn yø jade'en kyubejtpy.

42 Jøts ja yjaakwaañ:

—Jesús, xja'myatšpim øts ku mja'att jam mgutujktaajk jøp'am.

43 Jøts Jesús ja y'adsooøø:

—Janch øts idø'øn nwa'añ jøts ku øts inet nayami xmøøtnøjkxt jap tsajpjøtpy.

Ku ja nwindson'ajtim Jesús y'ø'jky

44 Ja dø'øn ja xøøw wyinaty kyuki ku jotmøn kyoodsiyi'ñ, jøts ja et kugoots tyaañ, jaanim xiijñi jadigojk tigøøk yaxp.

45 Kuts ja xøøw wyíngoodsiyíí'ñ, jats ja tsaptøjk awejtstuk kujkwa'kxy, winet tyakø'jtsiyíí'ñ.

46 Jøts ja Jesús møk'ampy wyaañ:

—Dios Teety, pøjkjø'øgik øts n'anmija'win.

Ja'ayi ja jade'en yjaakwaañ jøts ja y'ø'jky.

47 Xjats kuts ja romit soldadi mayut ja tuki'iyi jade'en ojts t'ixy sa jaty idø'on yjajty kyubejty, jøts ja tmøja'wiyíí'ñ tkunuu'kxyja'wiyíí'ñ ja Dios, yide'en ja wyaañ:

—Janch øy jaa'y tam idø'on yø', ka'ap yø pyøkyjaa'dyi.

48 Pøn jaty jam wyinaty, pøn jaty ja jade'en t'ejxtøø tnija'widøø, niyaxni ja jam cho'onidøø.

49 Jøts pøn jaty ja Jesús ijxy'ajtpj, jøts ja tø'øxyøjkti pøn ja jam Galilea wyinaty tø pyadsøøñiyi, ja'ats idø'on jam jagam ojts t'a'ejxukti ti jaty tuujnøø jajtøø, wa'ats ja t'ejxkøjxtøø.

Ku ja Jesús ñine'kxy yikpiktaajky jap oo'kpi tsaa jutjøtpy

50 Jamts wyinaty tu'uk ja jaa'y midi janch øy jaa'y'ajtp, ka'ap ja pøn tmidundigøw, José ja xyøøw'ajtpy, jam ja Arimatea kyugajpi, nayjam idø'on ja kajp tyañ Judeit etjotp. Nay jamts idø'on ja tyuñ jam kutujktaajjotp ma ja israelit jaa'y kyutujk'adsøøñidi.

51 Y'awijxpyts idø'on ja José ja' ja Dios kyutujk midi ja tyanitanaapy yjaa'y, jade'ents ja ka' tkupiky sa ja møøtkutujk'adsinaabyi wyinaty tø y'adø'øtsti.

52 Ja'ats ojts tñinijky ja Pilato jøts ja t'ats'ijxy jøts ja t'amidoojøø ja Jesús ñine'kx.

53 Kuts ja tyikruswinajky, winets ja tpoopwet'amøjch jøts ja tpiktaajky ma oo'kpi jut ja wyinaty yikxon tø tyik'øyi, tøjku'ngin ja wyinaty tø tpejxkjuty ja tsaa, nipøn oo'kpi's jap kyayikpikta'akñim, tyimñay'amaay ja y'ity.

54 Ja'abi xøøwts ja øy ti tjaaktyimdyungøxti jøts t'amaay'atti kyimjabom ja poo'kxin xøøw.

55 Jøts ja tø'øxyøjk ñøjkxtøø pøn wyinaty tø tpadsoondi ja Jesús jam Galilea, jøts ja t'ats'ejxtøø ja oo'kpi jut, ojts ja t'ejxti ku ja oo'kpi jap yikpiktaajky.

56 Kuts ja wyimbejtnidøø, ñøjknidi jam tyøjkjotp jøts ja ojts t'a'ejxidi ja pa'akxuu'kpi møøt ja aceite, jødsyim ja t'amaay'atti ja poo'kxin xøøw sam wya'lañ ja Dios kyutujk.

24

Ku ja nwindsøn'ajtim Jesús yjukpyijky jadigojk

1 Kuts ja yjadu'ukpi samaan tyøjkijiyíí'ñ, ku myidukxøøw'ajty, winets ja tø'øxyøjk wyimbejtnidøø jøts ja ñøjktøø jøpyi jøpyi ma ja oo'kpi jut jam, jøts ja ojts tyiknøjkxti ja pa'akxuu'kpi midi ja wyinaty tø tyik'øyidi; ojts ja yjadu'ukpi tø'øxyøjk ja tmøødidi.

2 Kuts ja jam yja'jttøø, jøts ja oo'kpi jut ja tpattøø jøts kudam y'agø' ja kya'uknayjamini;

3 tøjkidøø dø'on ja jam jøts ja ka'ap t'ukpaajtniyidøø ja nwindsøn'ajtim ñine'kx.

4 Jøts ja yjanchø'jkidøø, nisudso'ampy ja kya'ukwinmaa'nbyatnidi pø ti dø'on tyu'undip jøts ku ja tjaaktyimy'ejxpattøø namajtsk ja jaa'y jap wingon wyindaniyidi, janch jajp tsamamp ja wyet tmigaxø'økti.

5 Kumi janch tsø'jkidip ja wyinaty jøts ja nugo ñaxkoodøø, yide'en ja ñimaajyidøø:

—¿Jadits ya x'ixá'adi oo'kpi agujky midi tø yjukpyøkni?

⁶ Ka'ap ja ya pøn, tø ja yjujkyiky. Ja'myatsti sa ja mnimaajyidøø jam Galilea ku ja jaak nay jam wyinaty,

⁷ ku ja wyaan jøts ku ka'øy jaa'y ja yiktagidøkit, ku ja kyiruspatt, jøts ku ja kidigøøk xøøw yjujkyøkt.

⁸ Jøts idø'on ja tjanchja'myajtstøø ja Jesús y'ayuujk sa ja wyinaty tø wyaan,

⁹ jøts ja jam cho'ondøø ma ja oo'kpi jut jam jøts ja wyimbejtnidøø, ka'pxy ttamimadyakøjxtøø ja yjanimaktu'ukpi kudanaabyidi jøts pøn jaty jam wyinaty.

¹⁰ Ja María Magdalena, jøts ja Juana, jøts ja yjadu'ukpi María midi ja Jacobo tyaak'ajtpy, jøts jadu'uk ja tø'øxyøjkti, ja' dø'on jade'en ojts yjatti jøts ja ttamimadyakøjxtøø ja kudanaabyitøjkti.

¹¹ Jøts ja kudanaabyitøjkti ka'ap ja tmibøkti ku ja tø'øxyøjk ja jade'en tyamimadya'agyidi pø sa ja tijy yjatti.

¹² Xjats ja Pedro chøø'n jøts ja ojts pyujtnijkxy ma ja oo'kpi jut jam. Kuts ja kyu'ejxiyi'n jøts ja t'ejxpaajty ja poop wet jøts ku ja jagam wyøjnaani. Kuts ja wyimbijty tyøjkjotp jøts ja janch ñigyumaap tja'wiyi'n ku dø'on ja wyinaty jade'en tø yjaty.

Ku ja nwindson'ajtm Jesús ñanky'ijxyi jam Emaús tuu'am

¹³ Winets ja pabøjkpitøjk namajtsk nay ja'abi xøøw ñøjkxti jam ma kajp txøøw'aty Emaús, tuk'ajopyø'øyu'ngin idø'on ja tyø'ødyi ku choondi jam Jerusalén jøts ja jam ñøjkxti.

¹⁴ Ja' ja jam wyinaty ñigajpxtip ñimadyaktip sa dø'on jade'en wyinaty tø yjaty;

¹⁵ ixam idø'on ja kyajpxti myadya'akti wyinaty, ja' ja jam kyajpxy'ajttip ku Jesús ja ñimejnidøø wingon jøts ja myøøtyø'øydøø.

¹⁶ Yja'ejxtip ja wa'ats, jadi'liñits ja yikmøñidi yiktukyidi pø pøn ja jade'en.

¹⁷ Xjats Jesús ja yiktøjidøø:

—¿Ti dø'on ja jaa mgajpxy'ajttip ku ixa jade'en mduu'yø'ødyi? ¿Ti mdajot-may'oo'ktip, sa mjatti?

¹⁸ Xjats ja nidu'ugin y'adsoodøø, ja Cleofas idø'on waan:

—Tyumnija'widip ja jaa'y ixyam ti tø tyuñi yjaty jam Jerusalén. ¿Kidi mets mjam'ajty, pø mets inet idø'on ja nadyu'uk mganija'wip?

¹⁹ Jøts ja ñimaajyidøø:

—¿Tims jam ti yjaty?

Jøts ja tnimaadyøø:

—Ja Jesús øøts idø'on ndijpy, ja Nazaretit jaa'y, midi Dios Teety yikmøjkugajpxy'ajtp ku ja tkajpxwa'kxy ja y'ixpøjkin u ku ja ti tuuñ. ¿Ti ja kya'ukjajtpy? Myinajxpts ja jam Dios wyingujkp, jøts nayide'en ma naxwii'ñit jaa'dyi.

²⁰ Ja teetywindsøndøjk ja tø tkøyakti møøt ja nwindsondøjkti jøts ja yiktaguwanit ja o'jkin jøts kyiruspatt.

²¹ Ja' øøts ja jaa ndyimy'ukjöp'ijxpy jøts ja jekyip tnigubøky yø Israelit naajx yø Israelit kajp. Ixyamts ja tyigøøkkøøwip jade'en yjajtni.

²² Øy øøts ja tø'øxyøjk winaagin tø xjanøjmi adsø'jikibim, ku ja tø y'ats'otsti ixyam jøpy ma ja oo'kpi jut jam,

²³ ka'abik ja tø tpaatti ja Jesús ñine'kx, jøts øøts ja tø xninijkxy, tuki'iyi tø xamimadyakixy jøts ku ja tø t'ejxti namajtsk ja ankilis jødsik ja tø ñii'mxyidi jøts ku ja Jesús yjujky'aty.

²⁴ Winets øøts ja nmigu'uk winaagin jatyi tø yjanøjkxti ma ja oo'kpi jut jam, jødsik ja jam jade'en tø tjanchpaatti sa ja tø'øxyøjk tø tnigajpxti, ka'adsik ja ma tø t'ejxti ja Jesús.

²⁵ Xjanimts Jesús ja ñimaajyidøø:

—iNiwine'enin mjanchkaja'gyukidi, meets tsaachkujuunjaa'dyi, jeky meets ja xøøw ja jumøjt ja xukminaxy jøtsnim meets ja xjanchjawit sa jaty ja Dios kyugajpxy wyandøø!

²⁶ Jabi kuwañmxi tyimbyaat'aty ja Cristo jøts ja jawyeen y'ayo'ombaatt jøtsnim ja tpaatt ja windsø'jkin winja'win o madsøo.

²⁷ Xjats ja Jesús tyukmadoobinaxwa'jkidøø sa ja Dios kyajpxy wya'añ ma jaty ja jap yiknigajpxy tøøyip, ja' ja ñigajpxøjkii'ñ sa wya'añ midu ja Moisés ja Dios tukjajyøø jøts ja tnigajpxkijxy sa jaty ja yjadu'ukpi kugajpxy wyinaty ja Dios tø tyukjaadyañidi.

²⁸ Kuts ja jam kyajptøjkidøø ma dø'on ja jam wyinaty yja'atwa'andi jøts ja Jesús yjaaktyimñøjkxwa'añ, tyimñaxwamp ja jam.

²⁹ Jøts kuwani tyiktandøø, yide'en ja tnimaadyøø:

—Møøt tank øøts ya, pø tøts chuu'jini, koodsiwyanipts.

Xjats ja Jesús ja jam jade'eñi myøøtaajnidøø.

³⁰ Kuts ja tmøøt'ixaktøø, tø wyinaty twinguwaadsidi ja kaabyajt, ixam ja chinaañidi ku ja tnixajyii'ñ ja tsapkaaky, jøts ja ojts tkunuu'kxy, jøts ja t'adujkpajky, jøts ja tyagiko'oniyidøø.

³¹ Winets wyeen ja nay jaty y wyatstøø, jøts ja t'ejxkajptøø jøts kudam ja' Cristo; jøts ja nay jaty ñanky'ejxiø'øñiyi.

³² Jøts ja ñawyaajnidøø:

—Kidi janchjotkujk adøm yø tø xyikajtyim ku tuu'ajy tø xamimadyaajkyim ja Dios kyajpxy.

³³ Xjats ja niwine'enin kyata'anidøø kya'amøjkidøø, jaty ja jadigojk tyuu'døjkidøø jøts ja wyimbejtøø jam Jerusalén, jamts ja tpatøø ja ñimaktu'ukpi kudanaabyidi, tø ja jam wyinaty ñamykyidi møøt ja myigu'uktøjkti.

³⁴ Jøts ja ñimaajyidøø:

—Janch tøts ja nwindson'ajtim yjujkyiky, yø Simón tø tyimy'ixy.

³⁵ Jøts yja' ja tnimadyakmidøø sa ja wyinaty tø yjatti kyubatti jam tuu'am, jøts sudso ja wyinaty tø t'ejxkapti ja Jesús ku ja t'adujkpajky ja tsapkaaky.

Ku ja nwindson'ajtim Jesús ñanky'ixxy ma ja pyabøjkpitøjk jam

³⁶ Ixamni dø'on ja wyinaty jade'en ñawya'añidi ku ja Jesús jam ñanky'ejxøø jadigojk ja' y'agujk'amdi ma ja jam wyinaty, jøts ja ojts kyajpxpoo'kxidi, yide'en ja ñimaajyidøø:

—Dios mjagpepyidi.

³⁷ Jadi'iñi ja myondi tyukti, tsø'øgi ja jadi'iñi yikmajadaktip, jade'en ja wyinmaydi pø nugo ja tijy y'ejxjooxti.

³⁸ Yide'en ja Jesús ja ñimaajyidøø:

—¿Tigøjxp ku mdsø'øgidi, ti mdsø'jkidip? ¿Tiku xkajanchjawidi?

³⁹ Ejxidik øts ngø' ndeky. Pø øtsts idø'on kø'øm. Tondik øts, ejxtik øts; pø ka'ats ejxma'jtin ñine'kx møødi, ni pyajk niti ja jade'en kya'ejtxi, sam meets ixyam x'iixy tuki'iyi nmøøt'aty.

⁴⁰ Kuts ja jade'en tyukmadojyidøø jøts kyø' tyeky ja tñanky'ejxøø.

⁴¹ Kumi nika'animts ja wyinaty yikxon ttajotkukidi jøts ja tjanchjawidit, jade'en ja xyonda'akti, jade'en ñigyumaap tja'wi'adø'øtsti, xjats Jesús ja ñimaajyidøø:

—¿Ka'ap ja ti jii'kxy xmøødidi?

⁴² Jøts ja tmøødyøø tukpidasi ja ajkxtsa'ayu'nk møøt ja jømbya'aku'nk,

⁴³ jøts ja t'axajiyii'n jøts ja ojts jamyi tjii'kxy ja' wyindumdi.

⁴⁴ Winets ja ñimaajyidøø:

—Jade'en øts idø'øn tø njaty sa meets ojts ndukmadøyin ku meets ja y'ijty njaakmøøtwidity, jøts ku øts jade'en wyinaty njatwa'añ sa øts jap nyiknigajpxy ma ja kutujk Moisés Dios tyukjajyøø, jøts nayide'en jap nøkyjøtpy midi ja yjadu'ukpi kugajpxy yjaadyandøø, jøts nayide'en sa ja nøky tnigajpxy jap Salmosjøtpy.

⁴⁵ Xjats ja Dios kyajpxy ja tyukja'gyukiyidøø,

⁴⁶ yide'en ja ñimaajyidøø:

—Jade'en jap yja'ayi jøts ku ja Cristo y'oøkt, kyidigøøk xøøwts ja yjukpyøkt ku o'jkin ja tja'uk'ext;

⁴⁷ jøts ja yiknigajpxwa'kxt o mañaajx o magajp, ku ja ya Jerusalén cho'onda'akt jawyeen, jøts ku ja'agøjxp yiknøjmidit o pøñ, wan ja chinaa'yin tyiktigatsti jøts yikpojkipimaa'kxtit.

⁴⁸ Meets, wa'ats mdyimy'ijxpy mdyimñija'wip sa jaty tuki'iyi tyuñi yjaty.

⁴⁹ Madowdits, ndanigaxp meets ja' midi øts ja Dios Teety tø xamiwandaagi; yaayits meets m'awext ya Jerusaléngit kajpjøøjty kunim ja mbaadidit ja møk'ajtín midi jap tsajpjøtpy kidakp.

Ku nwindson'ajtim Jesús chajpejty

⁵⁰ Xjats idø'øn Jesús ja jam kajpjotp wyaabidsøøjmidøø, jøts ja yiknøjksidøø jam Betania, ojts kyø' ja tyanixajyidi jøts ja kyunuu'kxidøø.

⁵¹ Kuts ja jade'en kyunuu'kxidøø, jøts ja myajtstujtidøø, jøts ja chajpejty.

⁵² Jøts ku ja wyinaty tø t'ukwindsø'øgidi t'ukwinjawidi, xjats ja ojts wyimbejtnidi ñøjkxnidi jotkujk'atyim jam Jerusalén,

⁵³ xumijam'ajttip idø'øn ja' jam tsaptøjkjotp jøts ja jam tmøjajwidi tkunuu'kxyjawidi ja Dios. Jade'en ja y'ejxi tyiyi.

JA ØGYAJPYX JA ØMYADYA'AKY MIDI JA JUAN YJAAŸ

Ja' pøn xuk'ejximp xuknija'wimp ja Dios Teety

¹ Jaayim ja wyinatyni pøn xuknija'wimp ja Dios ku tuki'iyi cho'ondakijxñim; Dios ja møøt tyimy'ity jøts nayi Dios ja kø'øm.

² Tso'onda'agyip ja møøt y'ity.

³ Jøts ja' ja Dios Teety tukyik'ø'yiyi ja tsajp jøts ja naajx jøts tuki'iyi; pø ka'axi ja naxwii'ñit jeexyip cho'ondaajky ku jeexyip kya'ity ja'.

⁴ Ja' tyiktso'ondaajk ja tsinaa'yin jøts ja jujky'ajtin, jøts nayide'en xuknija'windi ja tyiiby'i ja yjanchpi, midi tyik'øyip midi tyikwinaa'nbyatp ja naxwii'ñit jaa'y.

⁵ Møk ja tyikmajada'aky ja myøk'ajtin ku xyikudøø'kxaaajka'am ma pøn wimbeets kugoots, jøts ka'ap ja miku'yja' myajada'aky.

⁶ Jats idø'øn jaa'y tu'ukmi pøn Dios ojts kyexyi, Juan ja xyøøw,

⁷ midi testigi'ajtpi meen jøts ja tñigajpxt jøts ja tñimadya'akt pøn xyikujajtaajkimp xyikudøø'kxaaajkimp, jøts ja øy pøn ttiyjawit tjanchjawit pøni sa jaty ja wya'añ.

⁸ Kidi ja Juanipxi ja' pøn xyikujajtaajkimp xyikudøø'kxaaajkimp; nugo testigi'ajtpi ja ja'ayi yikexy jøts ja' tñigajpxt.

⁹ Tyimy ja' idø'øn wyinaty memp ja'tp ya naxwii'ñit pøn tyik'øyip tyikpaadip, pøn tyikwinmaa'nbyatp ja naxwii'ñit jaa'y.

¹⁰ Ixa ja wyinaty tø yja'tni ya naxwii'ñit jøts ja ojts nipøn kyagupikyiyi pøn jaty jaadi, øy ja wyinaty kø'øm tø yjadukyik'ø'yiyi ja naxwii'ñit.

¹¹ Kyø'øm ja' ja yjanimimpy jøts kyø'ømigu'uktøjk paat ja ka'ap kyupøjkiyøø.

¹² Jats winaagin pøn ja kupøjkiyøø jøts pøn ja janchja'wiyøø; ja'ats ja tiy'ajtin ja ojts tmø'øy jøts Dios Teety ja y'u'nk'atidit.

¹³ Tiy'ajtingøjxp ja jade'en Dios y'u'nk'atyidi, ka'ap ja jade'en sa jaa'y y'u'nk y'una'jk tpaatti.

¹⁴ Jøts ja' pøn xuknija'wa'am ja Dios, ojts ja jaa'yin y'atsøøni y'atstani, jøts ja ojts ñiyjeki xmøøt'ijtyindi xmøøtsinaa'yindi. Tø adøm myøk'ajtin ja nja'ijxyindi midi ja kyø'ømøk'ajtin'ajtpy ja Dios U'nk. Tu'ugyi Dios Teety ja yjanchjaakjagypyi, janch pa'ayoop, jøts tum ja tiy'ajtin janch'ajtin yajkpy.

¹⁵ Ja'ats ja Juan ojts tñigajpxy jøts ja yide'en wya'añ:

—Yø'øxi øts idø'øn ndijpy ku ø nwa'añ: “Ja' pøn oojknim me'emp, ja' idø'øn møj jøts ka'ap øts. Jøts kumi jaayim yø' wyinatyni, kidinim øts.”

¹⁶ Kajaa adøm Dios kyunuu'kxin xmøøy'ijtyindi ni'ijtyi. Juuni ja tkayaky.

¹⁷ Tøts ja Moisés kyutujk xuknija'wa'am sa ja Dios kyutujk; icyats ja nwindsin'ajtim Jesucristo pøn xuknija'wa'am ja Dios pya'ayo'owin jøts ja tiy'ajtin yjanch'ajtin.

¹⁸ Nijuuni pøn tka'ijxñim ja Dios; yø'øts midi jam møøt y'ity, yø Dios U'nk, yø' xuknija'wa'am sa ja Dios Teety.

Ku ja Juan Bautista tñigajpxy ku ja nwindson'ajtim Jesucristo myeenwa'añ

¹⁹ Winets ja israelit jaa'dyi midi jam kugajp'ajttip jam Jerusalén, ojts tkaxti ja teetyøjk møøt ja levijit jaa'dyi midi t'ejx'ejttip ja tsaptøjk, jøts ja t'atstiibyøktit ja Juan pøn idø'øn ja';

²⁰ jøts ja ojts wa'ats tñigajpxy, yide'en ja wya'añ:

—Ka øtsip ja' midi yiktejp Cristo.

²¹ Xjats ja tjaaktyimdyiibyøjktøø:

—¿Pønts mets idø'øni? ¿Mets idø'øni Dios kyugajpxy midi yiktejp Elías?

Jøts ja Juan wyaañ:

—Ka'ap ja y'øtsi.

Jøts ja tjaaktyimdyiibyøjkt'adø'øtsti:

—Jøts, ¿metsimts idø'øni ja' midi dø'øni menwamp midi ja Dios kyugajpxy'ajtpy?

Jøts ja y'adsøøy:

—Ka'.

²² Winets ja yiknimaay:

—¿Pønimts mets? Kuwanixi øøts ja nnijawit jøts øøts ja ndukmado'ot pøn øø tø xkexy. ¿Sa me m'ukwa'añ ku mga'uknañigajpxy'?

²³ Jøts ja Juan ja t'adsøøy:

—Øts ja' midi yikmadoop y'ayuujk jam abak etjotp, mā niti kya'ity: “Yiktøwdi yiktuda'akti ja mwinmaa'ñ jøts xkupøktit ja nwindson'ajtim” —nayide'en sam ja Isaías wyaañ, ja Dios kyugajpxy.

²⁴ Ja fariseotøjk ja wyinaty tø kyexyidi midi idø'øni ja Juan jam jade'en møøt ñagyajpxy.

²⁵ Xjats idø'øni ja Juan yiktiibyijky jøts ja yiknimaay:

—Pøni ka'adam me mCristo, ni mga'Elías, jøts ni Dios me mgagugajpxy'aty, ¿tits ku myiknøbety?

²⁶ Jøts ja Juan tñimaay:

—Nøø øts iiy nduktanøbejtpy; jats ya tu'uk midi ka' x'ejkaptinim;

²⁷ oojknim ja mye'ent, ja' tu'uk møj, nugo øts jawyeen nyiktuu'awa'ach. Nijuuni øts ja møøt nganamyibaat'atyyit.

²⁸ Jam idø'øni ja jade'en yjajty mā ja et jam txøøwi Betábara, midi tãmp xøbidsimy jam nøø agø'øm midi txøøw'ajtp Jordán, mā ja Juan jam ojts yiknøbety.

Ja Jesucristo yiktamiyoxp ja Dios Teety adømgøjxp

²⁹ Xjats ku kyimjabom'ajty winets ja Juan ojts t'ixy ja nwindson'ajtim Jesús ku ja jam wyinaty ñimiñiyi, jøts ja Juan wyaañ:

—Ejxti, yø' idø'øni jade'en jatwamp kubatwamp sam ja borreek u'nk yikyøxyin adøm nbojki: køjxp, jøts yø' naxwii'ñit jaa'y tyikpøkwyatsp.

³⁰ Yø' øts idø'øni ndijpy ku ø nwa'añ: “Ja tu'uk jaa'y myiñ, ja' idø'øni møj jøts kidi øts, jøts jaayim ja'ani.”

³¹ Nika'ap øts yø' y'ity nnijawi pøni pøn yø'. Tøts ø nmiñ jøts øts Israelit jaa'y nøø nduktanøbatt jøts nduknijawidit pøn ja'.

³² Nayide'en ja Juan wyaañ:

—Tø øts ja Espiritu Santo n'ixy jøts ku kyida'aky jam tsajpwemp sam tsapakin, jøts ja tø kyøxke'eky yø' kyubajkp.

³³ Ni nganijawi øts yø' pøni pøn yø'; jøts øts idø'øni ja Dios Teety ojts xnøjmi midi øts nøø xukyiktump ku nyiknøbety, yide'en øts ja xnimaay: “Ku x'ext ja Espiritu Santo kyida'akt jøts y'ixa'akt jam tu'uk jaa'y kyubajkp, ja'ats idø'øni ja wyinaty midi ja Espiritu Santo xmø'øyimp ku ja yiknøbatt.”

³⁴ Tøts ø n'ixy, jøts øts testigi jøts ku yø' Dios U'ngi.

Ja jaa'y pøn ojts jawyeen tpabøkti ja Jesús yja'

³⁵ Xjats ku kyimjabom'ajty, ixam ja Juan wyinaty køjmyi møøt namaajtsk pyabøjkpi.

³⁶ Jøts ku ja Juan ojts t'ixy jøts ku jam wyinaty ñaxy ja nwindson'ajtim Jesús, winets ja wyaañ:

—Ejxti, yø' idø'on jade'en jatwamp kubatwamp sa borreek u'nk yikyøxyin adøm nbøjkpi køxjp.

³⁷ Ku ja' tmadoodøø midi ja Juan pyabøjkpi'ajtpy, midi jam wyinaty namajtski ku ja Juan jade'en wyaañ, xjats ja ojts tpanøjkxti ja nwindson'ajtim Jesús.

³⁸ Winets ja nwindson'ajtim Jesús y'ejxjimbijty, jøts ojts t'ixy jøts ku jam yikpayø'øy, jøts ja ojts tnøjmi:

—¿Ti m'ixaadyip?

Jøts ja ojts t'adsowdi:

—Windsøn, ¿ma me ndsøøni?

³⁹ Jøts ja nwindson'ajtim Jesús y'adsojimbijty:

—Men x'ejxti.

Xjats ja ojts ñøjkxti jøts ja ojts t'ejxti ma chøøni, jøts ja jam ojts tmøøtkudsuu'idi. Ja dø'on ja xøøw wyinaty jawaani kyagidåkni.

⁴⁰ Ja Andrés idø'on ja', ja Simón Pedro y'uch, midi idø'on ja jade'en tmadoodip namajtsk ku ja Juan jade'en wyaañ. Jøts nay ja' idø'on jade'en tpanøjkxtip ja nwindson'ajtim Jesús.

⁴¹ Jøts ja Andrés tyimñayjaty ja ojts t'ats'ixa'ay ja y'ajch Simón, jøts ja ojts t'atsnøjmi:

—Tø øøts ja Mesías nbaaty midi Dios kyejxpy, midi Cristo yiktejp.

⁴² Xjats ja Andrés ojts twaanijxky ja Simón ma ja nwindson'ajtim Jesús jam wyinaty, jøts ku ja ojts y'ijxyi jøts ja ojts ñii'mxyi:

—Mets Simón, ja wa'axi me m'u'nk'ajtip ja Jonás. Cefas inet icyam mxøøw'atp.

Jade'en ja ñii'mxyi ja nwindson'ajtim. Cefas jade'en tyijpy Pedro sam ja t'ayuujk'atti.

Ku ja Jesús twaqdsøøy ja Felipe jøts ja Natanael

⁴³ Jøts ku kyimjabom'ajty, jam ja nwindson'ajtim Jesús wyinaty ñøjkxwa'añ Galilea etjotp, ku ja tminabyaajti ja Felipe jøts ja tnimaay:

—Møødik øts.

⁴⁴ Jam Betsaida ja Felipe kyugajp'aty nay jam ma ja Andrés kyugajpi møøt ja Pedro.

⁴⁵ Winets ja Felipe ojts ñijxky jøts ja ojts t'ats'ixa'ay ja Natanael, jøts ja ojts t'atsnøjmi:

—Tø øøts ja jaay' n'ixy midi ja Moisés ñigajpxpy jap nøkyjotpy ku ja kutujk ja ojts tja'ay, jøts nayide'en midi ñigajpxtip ja Dios kyugajpxtyøjkti, ku ja ojts tjaadyandi. Ja Jesús ja' midi ja José y'u'nk'ajtpy, midi jam kugajp'ajtp Nazaret.

⁴⁶ Xjats ja Natanael wyaañ:

—¿Wan ndejin y'øybi jam y'ukpidsømni Nazaret?

Jøts ja Felipe y'adsøøy:

—Men xtyimy'ixy.

⁴⁷ Kuts ja nwindson'ajtim Jesús ojts t'ixy jøts ku ja Natanael jam ñimiñiyi, winets ja wyaañ:

—Ixya net myiñ tu'uk nmigu'uk israelit jaay' y'ajtp, midi ka' tyaayi.

⁴⁸ Winets ja Natanael ja ojts yiktyiyi:

—¿Sudso'ampy me x'ijxy'aty?

Jøts nwindson'ajtim Jesús ja ojts ñii'mxyi:

—Tøyimxi me wyinaty n'ejxni ku mets yø Felipe ka'ananim wyinaty m'atswayinim, ku mets ixajp iigi patki'py.

⁴⁹ Winets ja Natanael wyaañ:

—Windsøn, mets idø'øn Dios U'nk, jøts mets idø'øn mniwindsøn'ajtpy israelit jaa'y.

⁵⁰ Jøts nwindson'ajtim Jesús ja ojts yide'en y'adsøyi:

—¿Jaty me xtyimyjanchjawí ja'agøjxp ku me tø nnøjmi jøts ku me tø n'ixy jap iigi patki'py? M'ejxpnim mets ja myøjpi y'øyi midi ø ndu'ump midi ka'ap yjade'eni sam ya'adin ku me tø n'ixy.

⁵¹ Jøts ja nwindson'ajtim Jesús yjaaktyimwyaañ:

—Meets yam ndyimñimaapy, jøts ku x'ejxtit ja tsajp y'awa'ats, jøts ku Dios y'ankilis pyattit wyinaktit jøts øts ja xnigida'aktit, ja' kuxi øts ja naxwii'ñit jaa'y ngudani Dios Teety wyingujkp.

2

Naxyøduujnidip ja jaa'y jam Galileit etjotp

¹ Kyimdigøøk xøøw wyinaty tø y'ity ku jaa'y y'amajtskidi ma ja kajp txøøwi Caná, jam Galileit etjotp. Ixam idø'øn ja nwindson'ajtim Jesús wyinaty tyaak.

² Jøts nayide'en ja nwindson'ajtim Jesús wyinaty tø yikwaamidí migaabyi mi'ukpi møøt ja pyabøjkpitøjk jøts ja nay jam ñøjkxtit.

³ Xjats ja vino tyimgyixy, winets ja nwindson'ajtim Jesús ja tyaak ñimaajyøø:

—Tø tyimgyugøxidi, ka'ap vino ukteeni.

⁴ Jøts ja nwindson'ajtim Jesús y'adsøøy:

—¿Ti øtsimts taak yø xpatp? ¿Tiku øts yø xukmadøy? Pø ka'ananimxi øts nja' xpaaty midi ø ndu'ump.

⁵ Jøts ja tyaak wyaañ, yide'en ja tnimaay ja jaa'y pøn jaty jam wyinaty windsø'jkidip:

—Mdu'undip idø'øn jade'en tuki'iyi pøni sa wya'añ.

⁶ Jamts wyinaty tudujk ja tsaadu'jts midi ja israelit jaa'y yiktundip ku Dios ja twindsø'øgidi jøts ja pyøkwyatstít. Makta'pxy uk magø'pxy enteerin ja y'uch tu'uk tu'uk, jade'en nøø ja yikta'adami.

⁷ Xjats ja nwindson'ajtim Jesús tnimaay ja jaa'y pøn jaty jam wyinaty windsø'jkidip:

—Yik'utskøxti yø tu'jts. Adamidi nøø.

Jøts ja ojts yikxon tyimyik'utsti,

⁸ winets nwindson'ajtim Jesús tnimaay ja jaa'dyi:

—Aja'aptu'uttits inet waani, jøts xaninøjkxtit midi yø xøøw tø tniwaamuki.

Jøts ja ojts jade'en ttundi.

⁹ Ojts ja tjä'gyapy midi ja xøøw tniwaamujkip jøts ja tsujkx nøø tø ja vino yjajtni, nika'ap ja tñijawi pø ma ja chøøn; ja'ayi ja nugo tñija'widip pøn windsø'jkidip, pø ja'axi ja nøø wyinaty tø tjaapti. Xjats ja twaadsøøy ja jemyaay

¹⁰ jøts ja tnimaay:

—Tum jawyeen øy pøn t'uuky yø vino y'øyi, jøts ku ja mi'ukpi ja kom tø t'uknidi winets ja yu'nkpi yikyakñim. Jøts mets, tø mets ja møk vino ne'egi xjaakwik'awixy, jøts mets yø yammim ne'egi xyaky oojknim.

¹¹ Yø'øbi milagri'ajtin idø'øn ja nwindson'ajtim Jesús tyimyjawyeen nanky'ejxøø jam Caná, jam Galileit etjotp, midi yiknigaxø'jk ja myø'ajtin, winets ja pyabøjkpitøjk ja ojts yjaakjanchjawiyi.

12 Xjats ku ja jade'en y'ukjajty, winets ja ojts ñijkxy ma ja kajp jam txøøwi Capernaum, møøt ja tyaak, møøt ja myigu'uktøjk, jøts møøt ja pyabøjkpitøjk. Jøts ja jam tyaa'nidøø ñigyawinaak xøøw.

Ku ja Jesús tpawojpkijxy ja too'kpitøjkti jam tsaptøjk agø'øm

13 Ja paski xøøwts wyinaty tymbyatnip midi ja israelit jaa'y tyundip, winets ja nwindson'ajtim Jesús ojts ñijkxy jam Jerusalén.

14 Jøts ja jam tsaptøjk'agi'py tkubajtiyi'ñ ja jaa'dyi pøn too'ktip ja tsakaa, pøn too'ktip ja borreek, pøn too'ktip ja pak, jøts nayide'en pøn ja myigu'uk myeeñ tyikwa'kxidip, ja' jam wyinaty tsinaadyip mayim ja jam tunk'atti.

15 Ku ja nwindson'ajtim Jesús ja ojts jade'en t'ixy, xjats ja tyik'øyi'i'ñ tu'uk pawojp, jøts ja jam tpawojpkijxy niduki'iyi ja jaa'y jam tsaptøjk agø'øm, møøt ja byorreek møøt ja chakaa. Jøts ja meeñ yikwa'kxpidi ojts ja myeeñ ja yik'ixko'odi, jøts ja myesi ja ojts yiktejimbetti.

16 Jøts ja tnimaay ja jaa'y midi paktø'ktip:

— ¡Yikjiwa'akti yø ya! ¡Kidi nDeety tyøjk maadyøjk xyikwa'andi!

17 Winets ja pyabøjkpitøjk nay jatyi tja'myajtsidøø ja nøky ma ja David yide'en wyaañ: “Møk øts nba'ayø y ja mdøjk.”

18 Xjats ja israelit jaa'y ttiibyøjktøø ja nwindson'ajtim, jøts ja tnimaadyøø:

— ¿Ti ty'ajtin øøts xuk'ejxp jøts ku xjagyepy ja kutujk ku jade'en m'adi'ich?

19 Jøts nwindson'ajtim Jesús ja ojts t'adsøy:

— Yikidawdi yø tsaptøjk, kidigøøk xøøw øts yø jadigojk nyikwa'kukit.

20 Winets ja israelit jaa'y wyandøø, jøts ja ojts ñii'mxyiyi:

— Wixijkxydujuk jumøjt yø tø yiktunk'aty yø tsaptøjk jøts yø tø y'øyi; ¿jøts me mwa'añ jøts ku mets yø kidigøøk xøøw xyikwa'k'øyt jadigojk?

21 Ku ja Jesús ja tsaptøjk tkajpxy, pø kyø'ømne'kx ja jade'en tyijpy.

22 Pø patyxi ku ja nwindson'ajtim Jesús ojts yjujkyijky jadigojk jap oo'kpi jutjøty, yø'øts ja pyabøjkpitøjk yja'myatstøø ku ja wyinaty jade'en tø wya'añ. Xjats ja tjantyimyanchja'widøø ja Dios kyaajpxy, jøts nayide'en tmibøjkidøø ja nwindson'ajtim y'ayuujk sa jaty ja wyinaty jade'en tø wya'añ.

Wa'ats ja Jesús tnijawi sa jaty jadu'uk jadu'uk wyinmay

23 Kuts ja nwindson'ajtim Jesús jam wyinaty tyiknaxy ja paski xøøw jam Jerusalén, jøts may ja jaa'y ja jam yjanchja'wiyøø tyiyja'wiyøø ku ja t'ejxti ja myilagri'ajtin midi ja tyumpy.

24 Jøts ja nwindson'ajtim Jesús ka'ap ja nugo tymñagyiyakyi, kumi wa'ats ja t'ejxkapy ja niduki'iyi sa pønjabøn.

25 Ka'ap ja chøkyiyi jøts ja pøn tyukmadowit sa jaty jaa'y jadu'uk jadu'uk yjaa'y'aty. Wa'ats ja kø'øm tymñijawi sa pøngapøn y'am yjotp wyinmay.

3

Ja Jesús jøts ja Nicodemo

1 Jamts idø'on tu'uk fariseit jaa'y pøn txøøw'ajtp Nicodemo, jøts ja idø'on ja israelit jaa'y wyindsøn'ajtip.

2 Ja'ats ojts koots y'atstøk'ayø'ø y ma ja nwindson'ajtim Jesús jam wyinaty, jøts ja ojts t'atsnøjmi:

— Windsøn, nnija'wip øøts jøts ku Dios tø mguexyi jøts øøts xyik'ixpøkt. Ka'ap me jeexyip jade'en xyiktuñ ja Dios myøk'ajtin mīlagri'ajtingøjxp sam ixyam xyiktuñin, ku jeexyip møøt mga'ity ja Dios.

3 Xjats ja nwindson'ajtim Jesús ja tnimaay:

—Janch ɔts idø'ɔn nwa'añ, jøts ku ka' pøn tpaatt ja Dios kyutujk midi yjaa'y ja tyanitanaapy pøni ka'ap pøn nayide'en kyaxi'iky jadigojk sam tø kye'exyin.

⁴ Winets ja Nicodemo tyiktiy jøts ja tnimaay ja nwindson'ajtim Jesús:

—¿Sudsots ja møj jaa'y nayide'en jadigojk kyaxø'økt sam ja tø kye'exyin? ¿Pø sudso'ampy jadigojk tyøkit tyaak yjotp jøts kya'axkojmit?

⁵ Jøts ja nwindson'ajtim Jesús ja yide'en t'adsøøy:

—Janch ɔts idø'ɔn nwa'añ, pøni ka'ap pøn jade'en kye'exy ejxim ja jaa'y kye'exyin, jøts nika'ats ja Dios myøk'ajtin myø'øyi, ka'ats pøn mibaat tyøkit ma Dios ja kyutujk ttanitani ja yjaa'y.

⁶ Ku ndeety ndaak xyikaxø'jkyim, nugo yø' xmo'øyim ja jaa'y'ajtin; jøts ku ja Dios x'u'nk'ajtyim, ja'ats ja myøk'ajtin ja y'Espíritu Santo xmo'øyim.

⁷ Kidi nigyumaap xjawi jøts ku jade'en nnøjmi: “Niduki'iyi jaa'y pya'at'atyidi ja chinaa'yin tyiktigatstít, ka'axigajtstípts ja ñamyayi jade'en.”

⁸ Pojp øy madsoo pyøjy; wa'ats nmadøø'yim sa wyina'añ ja poj, ka'ats nnija'wa'an pøni ma chøøn jøts pøni ma ñijky. Nayide'ents idø'ɔn ñamyayi ja'adi pøn ja Dios myøk'ajtin yikaxø'jkiyidip.

⁹ Winets ja Nicodemo tjaaktiibyijky:

—¿Sudso yø ndejin jade'en?

¹⁰ Xjats ja y'adsoji ja nwindson'ajtim Jesús:

—¿Pø møj maestrimts mets ya israelit kajpkijxy, jøts mets yø yjade'embi xkanimadøy?

¹¹ Janch ɔts idø'ɔn nwa'añ, jøts ku øøts ja' nnigajpxy midi øø nnija'wip, jøts nay ja' øøts nidestigi'ajtpy midi øø tø n'ixy; jøts meets ja xkajanchjawi sa øø njawa'añ.

¹² Nika' xjanchjawidi ku ɔts ja'abaat ndyimyjanigajpxy ti jaty ya naxwiiñ, ¿ti ja'ats mee mjaakjanchjawip ja tsajpjøtpyit yja' ku meets njadukmadot'ot?

¹³ 'Ka'axi jap pøn y'ats'øch jap tsajpjøtpy, ɔts idø'ɔn jap tsoo'mp kumi ɔts jap'ajtp jap tsajpjøtpy; jøts ɔts ja naxwii'ñit jaa'y ngudanaapy.

¹⁴ Jøts nayide'en ø nyiktu'unt sam ja Moisés ojts ttuñin ja tsaa'ñ jam abak etjotp ku ja ojts køjxp tiyji'iky,

¹⁵ jøts ja kyawindigø'odyit pøni pøn ø xjanchja'widip, xemikøjxp ja tpaattit ja kunuu'kxy jujky'ajtin ja kunuu'kxy chinaa'yin.

Pya'ayøøpy ja Dios ja naxwii'ñit jaa'y

¹⁶ 'Janch møk ja Dios tsojkin tjagyepy, jøts tpikta'aky ja pya'ayo'owin ya naxwiiñ ku ja y'U'nk tkexy midi tu'umchi, jøts ja kyawindigø'odyit pøni pøn ja tjanchja'widip, jøts ja xemikøjxp ja kunuu'kxy chinaa'yin ja kunuu'kxy jujky'ajtin tpaattit.

¹⁷ Kidi ja'ajip ja Dios y'U'nk tyaniguejpxy ya naxwiiñ jøts ayo'on ja ttukpaatt ja naxwii'ñit jaa'y, jade'en'ampy ja tkexy jøts ja tyiknitso'ok'att ja naxwii'ñit jaa'y.

¹⁸ 'Pøni pøn tjanchja'wip ja Dios U'nk, ka'ap ayo'on ja yiktaguwani; pønts tkajanchja'wip, ja' y'ayo'on kutujkp xemikøjxp ja'agøjxp ku tkajanchja'wyidi ja Dios y'U'nk midi tu'ugyi.

¹⁹ Pøni pøn tyimyjade'en'ajttip, tø y'ayo'on ja kyutujknidi, ku ja myiiñ ya naxwiiñ midi ja jaa'y øy tsuj tyikwinmaa'nbyatp, ka'ap ja yikupijky. Ne'egi ja kube'ets'ajtin kugoots'ajtin ja ne'egi chojktip, ja'agøjxp ku ja tyumjaka'øybi ttunwa'andi.

²⁰ Niduki'iyi pøn ja tyumjaka'øybi ttundip, kawin'ijxyim ja tjawidi ja yik'øwyinmaa'nbyatpi. Niwine'enin ja tkamijotwa'andi ja'agøjxp jøts kyanigaxø'øktit ja kya'ødyu'unindi.

21 Põnts ttsinaadyip ja tyiibyi yjanchpi, ja'ats tmijotwandip midi øy tsuj tyikwinmaa'nbyatp ja jaa'y, jøts ja tyiknigaxø'øktit ja Dios yja' ti jaty ja tyundip.

Ku ja Juan Bautista jadigojk tkajpxpaaty ja Jesús yja'

22 Kuts idø'øn ja jade'en y'ukjajty, xjats ja nwindson'ajtim Jesús ojts tmøødi ja pyabøjkpitøjk jam Judeit naxjotp. Niyyeky ja jam tyaa'nidøø jøts ja jam møøt yiknøbjattøø.

23 Jøts ja Juan nay ixam ja wyinaty yiknøbatmi ixam Enón midi ja Salimit kajp myiwingon'ajtpy, ja'agøjxp ja jam yiknøbety ku ja nøø jam janch kom; jams ja jaa'y myendi jøts ja jam y'atsnøbatti.

24 Jawyeenip idø'øn ja jade'en yjaty, ka'anim ja Juan wyinaty yikpikta'aky puxøjkjotpy.

25 Jøts nay winet ja Juan pyabøjkpi winaa'in tnadyamigajpxyidi møøt ja myigu'uk israelit jaa'dyi, ja' ja tnadyamigajpxyidip sa ja pøky wya'ach.

26 Nay winets ja Juan y'atsyiknimaay:

—Windsøn, ixam ja ixyam yiknøbety pøn mets jam wyinaty møøt xøbidsimy ma ja Jordångit nøø, ja' pøn mets ojts xnigajpxy jøts niduki'iyi jaa'y ja yjanchpabikyiyi.

27 Xjats ja Juan ja tnimaay:

—Ka' pøn ti tniyjaty pøni ka'ap Dios myø'øyi.

28 Meetsxi ojts wa'ats kø'øm xtyimiyadøy ku ø nwa'añ jøts ku øts ka' nCristo, jøts ku ø nja'aji pøn jawyeen yikajxp nugo.

29 Janch tsuj øts, janch xondakp øts, jade'en ejxim ja tø'øxmyiyø'øbyi tyik'amajtski myigu'uk; jade'en øts nnayjawiyyi kuts nmadøy ja Jesús y'ayuujk.

30 Yø' møjtokipnim jøts øts kuwani n'amutskit, kuwani n'ixnøjkxt.

Ja' pøn tsoo'mp jap tsajpjøtpy

31 Ja' pøn tsoo'mp jap tsajpjøtpy, tum ja' tuki'iyi tnitanaapy. Jøts pøn ya naxwiiñ'ajtp, ja naxwiiñ'its ja ja'ajtip, jøts tum ja'ayi ja ñigajpxpy ti jaty ja ejtp. Põnts tsoo'mp jap tsajpjøtpy, ja' tuki'iyi tnitanaagyøjxp,

32 Jøts tum ja' ja ñigajpxpy midi ja tø t'ixy, midi ja tø tmadøy; jøts ka'ap ja pøn tjanchjawi midi ja ñigajpxpy.

33 Kuts øy pøn tjanchjawi, ja'ats wa'ats tyikniga'axp jøts ku Dios tkajpxy ja tyiibyi yjanchpi;

34 Dios kyajpxy Dios y'ayuujk ja kyajpxip pøn ja Dios kajxip, kumi amuum y'Espíritu Santo ja myø'øyi.

35 Chøjkpy ja Dios Teety ja y'U'nk, jøts tuki'iyi tø ttagidøjkigyixy ti jaty ejtp ka'ejtp.

36 Pøni pøn ja Dios U'nk tjanchja'wip, xemikøjxp ja nøjkk tpaaty ja kunuu'kxy juiky'ajtin ja kunuu'kxy tsinaa'yin; põnts tkajanchja'wip, kawindem xøøw ja nøjkk tpaaty ja yjade'embi juiky'ajtin, ja Dios myøk'ayo'on ja nøjkk kyupøjkip.

4

Ja Jesús jøts ja Samariit tø'øxy

1 Xjats ja fariseotøjk tniija'widøø jøts ku ja nwindson'ajtim Jesús may pyabøjkpitøjkni, jøts may jawaani ja jaa'y tyiknøbety jøts nigidi ja Juan jade'en;

² ɔy idø'ɔn nwindson'ajtim Jesús ja kø'om tkidyimyiknøbety, ja pyabøjkpítøjks ja tyiknøbajttip.

³ Xjats ku ja tñimadøøy jøts ku ja fariseotøjk tø ñijawiyi, winets ja chøø'ñ jam Judeit naxjotp, jøts ja ojts ñijkxy jam jadigojk Galileit etjotp.

⁴ Ja Samariit et ja tyanaxp ku dø'ɔn ja jam ñijkxy.

⁵ Xjats ja yja'jty ma ja kajp jam tu'uk Samariit etjotp midi txøøw'ajtp Sicar, jam wingon ma ja Jacob ja y'u'nk José wyinaty tø tmø'oy ja ñaajx.

⁶ Jamts idø'ɔn tu'uk ja nømu'tu'uk midi yiktejp Jacob nømu'tu'uk. Jøts kumi jotkøjxp ja nwindson'ajtim Jesús wyinaty ku ja yø'oy, xjats ja y'ixaajky jam nømu'tu'uk agø'om. Ja dø'ɔn wyinaty ja xøøw kujky.

⁷⁻⁸ Winets yja'jty tu'uk ja tø'oxyøjk jam nømu'tu'uk agø'om pøn ku'etip kugajpip jam Samaria, jøts ja nøø ja tjuutwa'añ, xjats nwindson'ajtim Jesús ja ojts ñii'mxyi:

—Møøky øts nøø.

Jøts ja pyabøjkpítøjk, jam ja wyinaty tø ñøjkxti jam kajpjotp, jøts ja t'atsju'udyit ja kaaky ja jii'kxy.

⁹ Xjats idø'ɔn ja samariit tø'oxy tñimaay ja nwindson'ajtim Jesús:

—¿Sudso mets nøø x'amidøy jøts m'israelitjaa'yits mets jøts øts samariit jaa'y?

(Kumi ka'ap ja israelit jaa'y tminamyayidi ja samariit jaa'y.)

¹⁰ Winets ja yide'en y'adsojøø ja nwindson'ajtim:

—Kuk xjanchñijawit midi ja Dios yajkpy, uk xñijawit pøn nøø ixa m'amidøjyip, ¿ja ti jajik me xka'amidøy jøts me nmo'ot ja øybi nøø ja wa'atspi?

¹¹ Jøts ja tø'oxyøjk ja ñimaajyøø:

—Ni mdanøja'ap paat mets kya'ity, jøts køjnk yø nømu'tu'uk. ¿Mats idø'ɔn xpøkwa'añ ja nøø midi mdiippy øy wa'ats?

¹² Ja ndeety'ap Jacob øøts yø nømu'tu'uk xukmidaan ma jaa ja y'ijty kø'om y'uuky, jøts y'u'nk y'una'jk, jøts yjiyujk chakaa nayide'en. ¿Ti mjaaktyimbyønts me ndejin?

¹³ Jøts ja nwindson'ajtim Jesús ja t'adsøøy:

—Pøn jaty ya'at nøø t'uktip, tøødsidip ja jadigojk;

¹⁴ pønts t'ukp ja øybi ja wa'ats nøø midi ø nyajkpy, ka'ap tøødsi ni juuni y'ukpaajtniyit. Kumi jade'en ja nøø pyidsø'ømt jam y'anmija'w'ingøjxp midi øts ja nmoøpy, sam kom nøø pyidsimyin. Ja'ats ja xemikøjxp tukpaadiyip ja jujky'ajtin jøts ja øy'ajtin.

¹⁵ Winets ja tø'oxyøjk ja ñimaajyøø:

—Yø'øbi nøø øts teety xmo'op, jøts ø nga'uktøøjtsiñit ni juuni, jøts ø nga'ukmenit nøgombi ya nømu'tutjøøjty.

¹⁶ Jøts ja nwindson'ajtim Jesús tñimaay:

—Nøjkx mniyaa'y x'atsway jøts ya mme'ent.

¹⁷ Xjats ja tø'oxyøjk y'adsojøø:

—Ka' øts nniyaa'y.

Jøts ja nwindson'ajtim Jesús tñimaay:

—Janch tiigyajpxy idø'ɔn mwa'añ jøts ku ka'ap mniyaa'y pøn;

¹⁸ kumi nimagoxk tø xyiknaxy ja yaa'dyøjk, jøts pøn ixyam møøt, ka'ats ja xniyaa'yi. Jøts ku jade'en tø mwa'añ, janch tiigyajpxy idø'ɔn yø'.

¹⁹ Kuts ja tø'oxyøjk jade'en tmadøøy, jøts ja wyaañ:

—Mets teety, wa' mets idø'ɔn yjawi Dios mets idø'ɔn kyugajpxy.

20 Wine'enin 00 nsamariitjaa'y'aty, ya 00ts ja n'apt0jk twinds0'0gidi ja Dios ixya kojpkijxy, meetsts wine'enin mee m'israelitjaa'y'aty, jade'en mee mwa'añ j0ts 00ts ja jam nwindso'0git Jerusalén.

21 J0ts t'ads00y ja nwindson'ajtim Jesús, j0ts ja t0'0xy0jk yikn0jmi:

—0y xkamib0kt, wingomp id0'0n j0ts meets xwindso'0gidi 0y ma0soo ja Dios. Ka' pyaat'aty; j0ts kuwani mdyimye'endit ya kojpkijxy uk mn0jxktit jam Jerusalén.

22 Meets samariit jaa'y, ka' mee xnijawi p0ni ti mee mwinds0'jkip; 00ts, nnija'wip0ts 00ts midit 00 nwindso'jkip; jabi israelit jaa'yts ñik0jxp myiñ ja nitso'ok'ajtim.

23 Ixyamts ja x00w ja jum0jt t0 yja'aty, j0ts ku nayi Dios my0k'ajting0jxp nay ja' tyiy'ajting0jxp yikwindso'0git ja Dios Teety, p0ni p0n tjantyimwyinds0'jkidip ja Dios. Jade'en ja tts0ky j0ts ja jade'en ttu'undit p0ni p0n ja winds0'jkiyip.

24 Tu'ugyi tum jade'en Dios j0ts my0k'ajtim; j0ts p0n ja winds0'jkiyip, nay ja m0k'ajtints ja yiktu'undip m00t ja tyiiby; yjanchpi.

25 Xjats ja t0'0xy0jk wyaañ, j0ts yiknimaay ja nwindson'ajtim:

—Nnijawip 0ts j0ts ku mye'ent ja Mesias —midit tyijpy Cristo, midit memp yiknitsokpi—; j0ts ku ja mye'ent, ja'ats tuki'iyi xukmadoog0jxim.

26 J0ts nwindson'ajtim Jesús ja tnimaay:

—0ts ja', 0tsxi d0'0n, eix id0'0n ixya nmigajpxy.

27 Winets ja nwindson'ajtim pyab0jkit0jk yja'tt00, j0ts ja ñigyumaap tja'widi ku t0'0xy0jk ja m00t myadya'aky. Ka'ats p0n ñay'a'eixiyi j0ts ja tyikt0'0t ti ch0jky uk ti ja t0'0xy0jk m00t ñadyamigajpxyi.

28 Xjats ja t0'0xy0jk jamiy; tñikejky ja chiyy, j0ts ja ojts ñijkxy jam kajpjotp. Jamts ja jaa'y ja ojts t'atsn0jmi:

29 —Mendi j0ts jaa'y tu'uk x'ats'ejxtit p0n 0 t0 xukmad0y tuki'iyi sa jaty 0 t0 n'adi'ich. ¿Kidi ja Cristip id0'0n ja ndejin, midit ja Dios tkajxp?

30 Winets ja jaa'y choo'nd00 jam kajpjotp, j0ts ja ojts tnin0jxkti ja nwindson'ajtim Jesús ma ja jam wyinaty.

31 J0ts id0'0n pyab0jkit0jk ja ixam ñii'mxyiyi m0k'ampy:

—Winds0n, 0y iyy wine'enin mga'aty.

32 Yide'ents ja ojts ñii'mxyidi:

—Ja 0ts ngaaky njii'kxy midit 0ts inet nga'apy nj00'kxp, ka' meets ja xnijawi.

33 Xjats ja pab0jkit0jk ag0'0myi ñayikt00binaxwa'jkid00, j0ts ja ñawyaajnid00:

—¿Wan ndejin p0ngap0n ja kyaaky t0 tyanimiñi?

34 Yide'ents ja nwindson'ajtim Jesús ja tnimaay:

—Ja' 0ts id0'0n ngaaky'ajtpy njii'kxy'ajtpy ku 0ts ja nbaduujnit ja y'ana'amin p0n t0 xkexy j0ts 0ts tyunk ja nyik'abajtiyt.

35 P0 yide'enxi mee mwa'añ: “Ja maktaxk po' kya'ity j0ts pikta'aky pyid0'0kt”; 0ts0ts wamp j0ts mee nn0jmi: Ejxti y0 kam midit ni'ipy, t0 pikta'aky my0jaag0jxni j0ts pyid0'0knt.

36 Yikmijuupy ja' p0n ttunk'ajtp ja pikta'aky j0ts ja tyikpidi'iky; j0ts ja pikta'aky midit yikpidi'kpy, ja' ja wya'añ j0ts ja xemik0jxp tyu'unt. J0ts ja jade'en ni'amuki ttajotkujk'attit p0n neptip j0ts p0n tyikpid0'ktip ja pikta'aky.

37 P0 janch tamxi d0'0n ja' ku ayuujk wya'añ: “Wenkpi ja pikta'aky tnepp, j0ts wenkpi ja tyikpid0'0kp.”

38 Jamts meets id0'0n nguexy j0ts ja pikta'aky xyikpid0'0kttit ma ka'ap t0 mne'epti; jabi wenkpi t0 yjatundi yjap0kti j0ts meets tyunk ja xaxojniyi.

39 Mayts idø'øn ja jamit jaa'y tjanchja'widøø ja nwindson'ajtim Jesús pøn idø'øn jam kugajp'ajttip ja'abi kajp midi jam Samaria, ku ja tø'øxyøjk ja wyinaty tø tyimñii'mxyidi tiy janch, ku ja wyinaty yide'en tø wya'añ: "Tø øts ja tuki'iyi xukmadooguixy sã jaty ø tøn'adi'ich, sã jaty njaa'y'aty."

40 Xjats ku dø'øn ja samariit jaa'y jam myendøø, jøts ja møk tnimaadyøø ja nwindson'ajtim Jesús jøts ja jam myøøtaa'niiyidit. Winets ja nwindson'ajtim Jesús jam tyaa'niiyii'n majtsk xøøw.

41 Jøts ja jaa'y may tjaa'kyimyjanchja'widøø ku ja tyimyadowdi sã jaty ja kø'øm ñii'mxyidi.

42 Jøts ja tnimaadyøø ja tø'øxyøjk:

—Ndyimyjanchja'wipnim øøts inet. Kidi ja'ajip øøts nugo njanchja'wip sã jaty mee tø mwa'añ ku øø tø xukmadø. Pø tøxi øøts yø yam kø'øm njaa'kyimiyadø sã yø wya'añ. Tøts øøts nnijawi jøts ku yø janch Cristo, pøn naxwii'ñit jaa'y tyiknitsokp.

Ku ja Jesús tyiktsøøjky tu'uk ja windsøn y'u'nk

43 Xjats ku kyimajtskxøøw'ajty, jøts ja nwindson'ajtim Jesús chøø'ñ jam Samariit etjotp, jøts ja ojts yjaa'kyimñijky jam Galileit etjotp.

44 Jøts idø'øn ja jade'en yjajty sam ja nwindson'ajtim Jesús wyinaty kø'øm tø wya'añin, jøts ku ja Dios kyugajpxy ne'egi ka'ap yikupiky jam kyø'ømgajpkøjxp.

45 Kuts ja nwindson'ajtim yja'jty jam Galileit etjotp, jøts ja jamit jaa'y, chojktip ja' ku ja jam yja'jty, kumi tø ja wyinaty y'atsxøøbaatnidi Jerusalén ku ja paski xøøw jam wyinaty tø ñaxy. Tøts ja wyinaty tuki'iyi t'ejkxøxti ti jaty jam wyinaty tø ttuñ ja nwindson'ajtim Jesús ku ja xøøw jam ñjaxy.

46 Xjats ja nwindson'ajtim Jesús ojts ñijky jadigojk jam Caná midi nay jam Galileit etjotp, ma ja wyinaty ja tsujxk nøø tø t'ukyikvinojaty. Jøts jamts idø'øn tu'uk møj windsøn tyumbimi midi nayide'en windsøn, ja'ats idø'øn y'u'nk jam wyinaty pøjkp Capernaum.

47 Xjats ku ja tnimadøøy jøts ku ja nwindson'ajtim Jesús jam wyinaty tø yja'aty Galilea, jøts ku ja chøøñ Judeit etjotp, winets ja ojts t'ats'ixy jøts ja møk t'atsnøjmi jøts ja tmøødit jam tyøkwindum, jøts y'u'nk ja yiktso'ogiyi pøn wyinaty tyim'yooki'imni.

48 Jøts nwindson'ajtim Jesús tnimaay ja jaa'y:

—Ka' meets janchja'win xjagyepy. Yø'øyi meets ja'ayi m'ijxpy yø milagri'ajtin.

49 Yide'ents ja ñimaajyøø ja jaa'y pøn ja windsøn tyumbi'ajtpy:

—Men teety tsojk, namga'anim øts n'u'nk y'øøky.

50 Winets ja nwindson'ajtim tnimaay ja jaa'y:

—Wimbejni, nøjxni jam mdøkwindum. Jujky'ajtp inet ja m'u'nk.

Xjats ja tjanchja'wiyii'ñ ku nwindson'ajtim Jesús ja jade'en ñimaajyøø, jøts idø'øn yjanchnijky.

51 Jøts ku ja wyinaty yja'atwani jam tyøkwindum, winets ja tyumbitøjk ja ojts pyatsøiyi, jøts ja ojts ñii'mxyiyi:

—Jujky'ajtp m'u'nk.

52 Jøts ja tyiktiy ti hori dø'øn ja y'u'nk wyinaty kujk tø myøkpøjk'okwa'añ, jøts ja tnimaadyøø:

—Uxø'øyip ja'ani, ja dø'øn ja xøøw wyinaty waani yjøpta'aky ku ja jøøn wyinajkiixy.

53 Xjats ja u'nkteety ojts tjaa'myech jøts ku nay ja'abi hori ja nwindson'ajtim Jesús wyinaty tø ñii'mxyi: "Jujky'ajtp ja m'u'nk"; jøts niduki'iyi wine'enin

y'u'nk ñidø'oxy y'u'nk y'una'jk ja jam møøt, jadine'en ja ojts tjanchjawidi ja nwindson'ajtim Jesús.

⁵⁴ Jøts idø'øn jade'en mimajtsk ja milagri'ajtin kujk ttuñ ja nwindson'ajtim Jesús jam Galilea. Tø ja wyinaty chøøñ Judea.

5

Ku ja Jesús tyiktsøøjky tu'uk køxujxpi pakxujxpi

¹ Xjats ku dø'øn jade'en y'ukjajty, jamts idø'øn israelit jaa'y wyinaty ttumidi xøøw, winets ja nwindson'ajtim Jesús wyimbijty, jøts ja ñijkxy jadigojk jam Jerusalén.

² Jam tøjka'aw tu'uk ja 'abi kajp midi yiktejp Borreek Tyøjk'aaw, jøts nay jam wingon tu'uk ja pili midi hebreit ayuujk yiktejp Betesda, magoxk ja tøjka'aw ja tmøødi.

³ Jamts ja maabyamaa'y kyo'knidi; pøn winapti, pøn pakma'atti, pøn køxujxtip pakxujxtip. Jøts ja jam t'awejxti ja nøø kunim ja y'adø'tst.

⁴ Atskidakpts idø'øn ja ankilis jam tu'uk pili agø'øm, jøts ja t'atsyik'adi'ich ja nøø. Kuts pøn pamaa'y jawyeen ñidøki, najxpts idø'øn pya'am ja', øy ja ti pa'am yjadyimyjapiky.

⁵ Jøts pamaa'y jam wyinaty tu'uk pøn wyinaty ee'pxmajktuktujk jumøjtíp ja pa'am pyaadyi.

⁶ Xjats ku nwindson'ajtim Jesús ja ojts t'ejxpaaty jøts ku ja jam kyo'kni, jøts ja t'ejxkajpy jøts ku pa'am ja wyinaty jadine'en jeky tmi'eitni, jøts ja ojts tnøjmi:

—¿Mdsøjkpy tsoojkin?

⁷ Jøts ja pamaa'y ja ojts yide'en y'adsøyi:

—Me teety, tyimñipøn øts pøn ø xnøyiktøkip jap nøøjøtpy ku yø nøø yja'ats'adi'ich. Yam ø njatøkiwyami jøts jatyi wenkpi ñdøøki.

⁸ Jøts ja nwindson'ajtim Jesús tnimaay:

—Pidø'øk, wejtsjø'øk yø mmaabajt jøts mnøjkxnit.

⁹ Jøts nay jatyi chøøjky ja jaa'y, ojts tyikpidi'iky midi ja jam tyamaapy jøts ja ojts yø'øcho'oni. Jøts kumi poo'kxin xøøwts wyinaty,

¹⁰ winets ja israelit jaa'y tnimaadyøø ja jaa'y pøn wyinaty tø myøkpiky:

—Poo'kxin xøøwxi yam; jøts ka'ap pyaat'aty: xtsømwidett yø mmaabajt.

¹¹ Xjats ja t'adsøoy:

—Ja' ø tø xnøjmi pøn ø tø xyiktsø'øky: “Yikpidø'øk yø mmaabajt jøts mnøjkxnit.”

¹² Jøts ja yiknimaay:

—¿Pøn idø'øn tø mni'mxyi: “Yikpidø'øk yø mmaabajt jøts mnøjkxnit?”

¹³ Jøts ja jaa'y pøn idø'øn wyinaty tø chø'øky, ka'ap ja tnijawi pøni pøn idø'øn ja wyinaty tø yiktsø'øgyi. Jøts janch may jaa'yts jam, jøts ja nwindson'ajtim Jesús tøyim ja jam wyinaty cho'oni.

¹⁴ Jøts ja nwindson'ajtim Jesús jadigojk tpaajty ja jaa'y jap tsaptøjkjøtpy midi ja wyinaty tø tyiktsø'øky, jøts ja tnimaay:

—Øyim yikxon xmado'ot, ejx idø'øn ixa tø mdsø'øky, kidi m'ukpøkyuni jøts kidi ti mjatyi ku jawaani ka'øy mdyimy'ukjajtnit.

¹⁵ Winets ja ñijkxy pøn tø chø'øky, jøts ja ojts ttukmadøy ja israelit jaa'y, jøts kudam idø'øn ja yja'aji ja Jesús, pøn ja wyinaty tø yiktsø'øgyi.

¹⁶ Ja'agøjxp idø'øn ja israelit jaa'y y'ijty tpawidetti ja nwindson'ajtim Jesús, jøts ja ttuku'oogiwya'andi ku dø'øn ja jade'en y'adi'ich poo'kxin xøøw.

17 Yide'ents nwindson'ajtim Jesús ja ñimaajyidøø:

—Yam paat øts idø'øn ndeety tyuñ, paty øts idø'øn nayide'en nduñ.

18 Yø'øts idø'øn ja israelit jaa'y masi tyuku'oogiwyañdip ja nwindson'ajtim Jesús. Kidi nugo ja kutujkipxi ja kyamø'ijxpy ku ja poo'kxin xøøw, pø nayide'enxi ja ñabyikta'agyí sam ja Dios, ku ja wya'añ jøts ku Dios ja tyimdyeedyi.

Jade'en ja Dios Teety ja kyutujk tmø'øy ja Dios U'nk

19 Winets ja nwindson'ajtim Jesús ja ñimaajyidøø:

—Janch øts idø'øn nwa'añ jøts ku Dios U'nk ka' ti ttu'unt kyø'øm kutujkøjxp. Ja tyeety ja pyaduujnpi yja' pøni sa ja kø'øm tnajtstuni. Tuki'iyi pøni ti tyumpy ja Dios Teety, nay ja'ats tyumpy ja Dios U'nk.

20 Pø yjantymchøjkpyxi ja Dios Teety ja y'U'nk, jøts ja tuki'iyi ttuk'ixy pøni ti jaty ja kø'øm tyumpy. Jøts yjaaktyimdyuk'ejxadø'øtspnim ja' ja myøjpi ja y'øybi, midi meets ñigymaaap mjawidip.

21 Kumi nayide'en sam ja Dios Teety tyikjukpyiky ja oo'kpi jadigojk, nayide'ents ja Dios U'nk tyaky ja juky'ajtin pøni pøn ja tyamidsøjkpy.

22 Jøts ka'ap Dios Teety tpayø'øy pøn, ja Dios U'nk ja tø ttaguwanit jøts ja' ja tø tmø'øy ja møk'ajtin jøts ja pyayø'øty,

23 ja'agøjxp nayide'en ja windsø'jkin yikmo'ot sam ja Dios Teedyin. Pøn tkamøjpiktakp ja Dios U'nk, nay ja Dios Teety ja kyamøjpiktakpy pøn tkajxp ja Dios U'nk.

24 Tyiibyí yjanchpi øts idø'øn nwa'añ: Pøni pøn øts ngajpxy n'ayuujk xyikmo'jyiyip sa jaty ø nwa'añ, jøts ku ja tjanchjawi pøn ø kxajxp, pyaatp ja xemikøjxp ja kunuu'kxy'ajtin; jøts ka'ap ja yiktaguwanit jøts ja y'ayo'ot, tø ja ttanaxy ja o'jkin jøts ja tpaaty ja kunuu'kxy juky'ajtin ja kunuu'kxy tsinaa'yin.

25 Janch øts idø'øn nwa'añ, jøts ku ixyam y'horipaaty ku ja jaa'y tmdojidit ja Dios U'nk kyajpxy pøn jaty tkjanchja'widipnim; jøts kuts tmimado'odit, pyaattips ja kunuu'kxy juky'ajtin ja'adi.

26 Ja ku Dios Teety tjagyepy ja møk'ajtin jøts ja kø'øm tyaky ja'abi juky'ajtin, jøts nayi tøts møk'ajtin ja tmø'øy ja y'U'nk jøts ja tyakt nay ja'abi juky'ajtin.

27 Jøts tø ja tkutujkmø'øy jøts tiidyu'unin jøts payø'øyin ja ttu'unt, ja'agøjxp ku ja naxwii'ñit jaa'dyi tkudani.

28 Kidits yā'at ñigyumaap xjawidi, pø ja'atpxi dø'øn ja xøøw ja jumøjt ku ja jaa'y tmdojidit Dios U'nk y'ayuujk pøn windigøy ejtnidip,

29 jøts ja pyidsø'ømdit jap oo'kpi jutjøtpy. Pøn øy tø y'atsnaxwiiñ'aty, pidso'ømdipts ja' jøts ja tpaattit ja kunuu'kxy juky'ajtin; pønts tø kyanaxwiiñ'aty øy, jukjpyøktipts ja nayide'en jøts ayo'on ja yiktaguwanidit.

Y'ejxi tyiyi sa Jesús kyutujk tjagyepy

30 'Niti nguidyimdyuñ ngø'ømwinmaa'ngyøjxp. Jade'en ø nduñ pøni sa nyik'ane'emy, jøts nima kyadigøy øts ja ndiidyu'unin, øts ja nbayø'øyin. Jøts niti nguidyimdyuñ ngø'ømdsojkingøjxp, ja' øts idø'øn ndumpy pøni sa ttsøky ja Dios Teety midi ø kxajxp.

31 Kuts ø kø'øm nnañitesti'atit jøts ø kø'øm nnankmyøjiwya'aniyit pøni sa ø njawa'añ, ka'ap yø ti tiy'ajtin tjagyepy.

32 Jaaxi ja' pøn ø xnitesti'ajtp, jøts øts ja xpudøki; jøts pøni sa ja wya'añ, nnija'wipts øts ja' jøts ku tiy janch ja wya'añ.

33 Meetsxi ojts xiibyiky ja Juan, jøts tiy janch ja' sa ja wya'añ ku ja y'adsøøy.

³⁴ Kidits ja'a'ajip ø nmøk'ajtpy øy pøn jaa'y ja tiy'ajtin tjayaky; jade'en'ampy øts idø'øn jade'en nwa'añ jøts mnitso'ok'ajtin xpaattit.

³⁵ Jade'en idø'øn ja Juan y'ijty sam jaj yjajyin, jøts meets yjaj ja waani tø x'uktaxondakojiyi.

³⁶ Njagyejpyts øts tiy'ajtin jawani ka'pxy sam øts ja Juan ojts xkanigajpxyin. Tuki'iyi ti jaty ø ndumpy, nay ja' idø'øn yø' midi øts Dios Teety tø xa'ane'emy jøts øts ja ndu'unt, yø'øts tyanigaxø'kp jøts ku tyiyi yjanchi ku øts Dios Teety tø xkexy.

³⁷ Ñayi yajkpy ja Dios Teety tiy'ajtin nayide'en jøts ku øts ja xkexy, øy meets ja nijuuni xka'ijxñim, øy meets ja nijuuni xkamadøynim.

³⁸ Jand'e'nts ja y'øgyajpxy ja y'øy'ayuujk ka' xja'gyukidinim, ja'agøjpx ku ja ka' xjanchjawidi pøn ja Dios Teety tø tkexy.

³⁹ Janch ni'e'jxi nibaadi meets Dios kyajpxy x'ixpøjkiyi, kumi jap meets ja xtyimyjapaatwa'añ ja kunuu'kxy jujky'ajtin midi xemikøjpx; jøts øts Dios kyajpxy jap xnimadya'aky,

⁴⁰ jøts meets ka' xpabøkwa'añ ku njadukpaatwa'andi yø'øbi jujky'ajtin.

⁴¹ 'Ka' øts naxwii'ñit jaa'y y'agujkwindsø'jkin ngupøjkiyi.

⁴² jøts njaaktyimñija'winip meets jøts ku meets Dios ka' xtsøky.

⁴³ Ja Dios Teety ø ngudanaapy ku ø nmiñ, jøts meets xkagupiky; kuts mye'ent jadu'uk kyø'ømdsojkingøjpx, mgupøkpts meets ja ne'egi.

⁴⁴ ¿Ma meets ja janchja'win xmøø't'ajtnit, kumi mnagyupøjkip meets ja windsø'jkin xem yam, jøts ka'ap ja tu'ukpi Dios yja' y'ixajyidi jøts ja xyiktu'undit?

⁴⁵ Jøts kidi mwa'andi jøts ku mee nni'øønit jam Dios Teety wyingujk; ja Moisés ja' mee kø'øm mni'øø'niyip, pøn mee møk mjøp'ijpxy.

⁴⁶ Kuk meets ja jeexyip xjanchjawi sa wya'añ ja Moisés, nayi tøts meets jeexyip nayide'en xjanchjawi, pø ja'axi ja Moisés ojts tja'ay jøts øts ja xnigajpxy.

⁴⁷ Pøni ka'ats ja xjanchjawidi midi ja yjaay, ¿mats meets ja xjanchja'winit midi mee ndukmadøøpy?

6

Ku ja Jesús tyikaay ja nimagoxk milbi jaa'y

¹ Xjats ku dø'øn ja wyinaty jade'en tø jyaty, winets ja nwindson'ajtim Jesús ojts ñijkxy jam Galileit mejy pya'am, jam jaduktamajñ. Nay yø'øbi mejy idø'øn yiktejp Tiberias.

² Jøts may jaa'y ja jam ojts myøødiyi, kumi tø ja wyinaty yik'ixy ja myilagri'ajtin ku ja tyiktsø'øky ja pa'amjaa'y.

³ Jøts ja nwindson'ajtim Jesús pyatøjkiyii'ñ ma kojpk jam, jøts ja jam tmøø't'ixaajky ja pyabøjkipitøjk.

⁴ Pyaatwanipst wyinaty ja paski xøøw midi ja israelit jaa'y xyø'ajttip. (Ja' xøøw yja'myajtstip sam ojts y'awa'atspidsømdi jam Egipto y'etjotp.)

⁵ Jøts ku nwindsin'ajtim Jesús ojts t'ixy jøts ku may jaa'y ja pyamiñiyi, winets ja tñimaay ja pyabøjki Felipe:

—¿Mamts inet jadine'en njuu'yindit ja kaaky ja jii'kxy jøts yø jaa'y niduki'iyi kya'adyit?

⁶ Jade'en'ampy ja jade'en wya'añ jøts ja t'uk'ijxy sa ja Felipe jyaty-imy'ukwa'ant; jøts kumi Jesús, ñija'wipts ja kø'øm pøni sa dø'øn ja ttu'unt.

⁷ Xjats ja Felipe ja y'adsoøjøø:

—Ku tsapkaaky majtsk magø'pxy denario juyin, niwine'en ja kyidy-imñibaadit øyik pøn wine'enin yiin waan tyaja'adiyit.

8 Winets ja pyabɔjkpi jadu'uk wyaaŋ pɔn Andrés'ajtp, ja Simón Pedro y'uch:

9 —Ixyadam tu'uk mutsk mixyu'nk, magoxk cebadi tsapkaaky tmøodi jøts ajkxu'nk majtsk. ¿Ti windem yø mayjaa'y yø ndapaajtnam?

10 Xjats ja nwindson'ajtim Jesús wyaaŋ:

—Nøjmidi niduki'iyi yø jaa'y jøts wan t'ixa'akti.

Janch miyjooit idø'øn jam ja et, jøts ja yaa'dyøjk nimagoxk milin y'ixaktøø. Nika'ap ja tø'oxyøjk yikmachøy møøt ja y'u'nk y'una'jk.

11 Winets ja nwindson'ajtim Jesús tniyajiyi'ñ ja tsapkaaky, jøts ku ja ojts jawyeen ttukmøjawi ttukunuu'kxyjawi ja Dios Teety, jøts ja ojts tmøøñim ja pyabɔjkpitøjk. Ja'ats ja ojts tyikwa'kxti, jøts ja ojts tmo'odi niduki'iyi ja jaa'y pɔn jam wyinaty tø y'ixa'akti. Nayide'en ja ojts tyikwa'kxti ja ajkx, jøts ja ojts tmøøgyøxti wine'enin ja kø'øm ttsokti.

12 Jøts ku y'abajtidøø kyujxidøø, jøts ja nwindson'ajtim Jesús tniimaay ja pyabɔjkpitøjk:

—Pøkmukti tuki'iyi yø abu'xk midi jaty tø wyindañ, jøts kidi nugo ti wyindingøy.

13 Winets ja tpøkmuktøø, jøts ja makmajtsk kach ujts t'abøjkidyøø ja kaaky abu'xkuna'jk, midi wyinaty tø wyindañ ja magoxkpit cebadi tsapkaaky.

14 Xjats ja jaa'y wyandøø ku ja t'ejxtøø jøts ku ja nwindson'ajtim Jesús jade'en wyinaty tø ttuñ ja milagri'ajtin:

—Janch yø' tam idø'øn Dios kyugajpxy'ajtpy pɔn yiktejp me'emp ya naɣwiñ.

15 Jøts kumi yja'wiyi'ñts ja nwindson'ajtim Jesús, jøts ku ja jaa'y ja wyinaty aguwan i yiknøjkxwa'añi, jøts ja yiktøkiwya'añi møj wwindson, winets ja ojts nadyu'uk yjiwa'aky jøts ja ojts ñijxy jam kojpkøjxp.

Ku ja Jesús ojts yø'øy jam mejwyingøjxp

16 Xjats ku ja et wyinaty tø kyoodsiñi, winets ja nwindson'ajtim Jesús pyabɔjkpitøjk kyidaktøø jam mejy agø'øm.

17 Jamts ja ojts tyøkidi barkiøtp, jøts ja ojts ttanaxwa'andi ja mejy, jam idø'øn ja nyøjkxti Capernaum. Jøts janch xaachkootsni dø'øn, jøts ka'anims wyinaty ja nwindson'ajtim Jesús wyimbejni.

18 Winets janch møk pyojpinaxwa'knøø, janch jadi'iñi ja nøø pyidø'kni.

19 Jøts ku dø'øn ja jam wyinaty ñaxti, magoxk uk tudujk mil xajkin tø yø'øñidi, winets ja t'ejxpattøø ja nwindson'ajtim Jesús jøts ku jam wingon ja barki tniimiñ. Yø'øpy ja nøø wingøjxp, jøts ja jyantymchø'jkidøø.

20 Yide'ents ja ñimaajyidøø:

—Jøts idø'øn, kidi mdsø'øgidi!

21 Xjats ja yjotkukidøø, jøts ja ejtni xoni tyiktøjkidøø jap barkiøtpy, jøts ja pojn ojts yja'atti ma dø'øn ja wyinaty ñøjkxti.

Ku ja Jesús ja mayjaa'y ojts y'ixa'ayi

22 Jøts ku kyimjabom'ajty, jøts ja jaa'y pɔn jam wyinaty tø tyandi jam mejy'am, jøts ja ojts tnijawidi jøts kudam ja nwindson'ajtim pyabɔjkpitøjk wyinaty tø cho'onidi, jøts ku ja barki ja wyinaty tø ttanøjkxti midi jam wyinaty tu'ugyi, jøts ku nwindson'ajtim Jesús ja nika'ap tmøødidyøø.

23 Jøtsnim ojts yja'atti wenkpi barki midi jam tso'ondip ma ja kajp jam txøøwi Tiberias, jam wingon ma ja jaa'y jam wyinaty ja tsapkaaky tø yikmo'odi, ku ja nwindson'ajtim wyinaty jawyeen tø ttukmøjawi tø ttukunuu'kxyjawi ja Dios Teety.

²⁴ Xjats ku ja jaa'y t'ejxtøø jøts ku ja nwindson'ajtim Jesús jam ka'ap pøn, jøts ni ja pyabøjkpitøjk jam kya'etti, winets ja ttatøjkidøø ja barki midi jam wyinaty tø yja'atti, jøts ja ojts ñjøkxti jøts ja t'ats'ixa'awa'andi jam Capernaum.

Ja Jesús amuum xyikjujky'ajtimp

²⁵ Jøts ku ja ojts yja'atti jam mejy agø'øm, jøts ja ojts tpaatti ja nwindson'ajtim Jesús, jøts ttiibyøjktøø:

—Windsøn, ¿windii mja'aty ya?

²⁶ Jøts nwindson'ajtim Jesús ja ñimaajyidøø:

—Janch øts idø'øn nwa'añ, jøts ku meets ja'agøjxp x'ixa'ay ku mee ku'uxy'i ojts mgay, jøts nigidi meets xja'gyukidi tigøjxp øts ojts ja mlagri'ajtin nduñ.

²⁷ Køjxp najxp kaaky jii'kxy y'ity, jøts kidi ja'abi xnidundi. Ja' ne'egi mnidu'undip midi xemikøjxp jajkp midi mmo'ojidip ja kunuu'kxy jujky'ajtin. Yø'øbi kaaky yø'øbi jii'kxy øts idø'øn nyajkpy, pø øtsxi ja na'xwii'ñit jaa'dy'i ngudanaapy.

²⁸ Winets ja jaa'y tyiktøødøø jøts ja tnimaadyøø ja nwindson'ajtim:

—¿Tits øøts idø'øn ndu'ump jøts ja yiktu'unt pøni midi dø'øn ja Dios chøjkpy jøts øøts ja ndu'unt?

²⁹ Jøts nwindson'ajtim Jesús ja y'adsoojidøø:

—Midi mdu'undip, ja' Dios chøjkpy jøts ja xjanchjawidit pøn ja tø tkexy.

³⁰ Jøts ja tjaa'kyimdyiibyøjktøø, yide'en tnimaadyøø ja nwindson'ajtim Jesús:

—¿Ti ejxa'ants mbikta'akp midi øø n'ejxp jøts myikjanchjawit? ¿Ti dø'øn mdu'ump? ¿Ti dø'øn myik'øyip?

³¹ Ojtsxi adøm ja n'aptøjk tjøø'kxti ja jii'kxy jam abak etjotp sam ja Dios kyajpxy wya'añin ku ja ñimy: “Ojts Dios ja tsapkaaky ja tyukayidi midi tso'omp tsajpjøtpy.”

³² Winets ja nwindson'ajtim Jesús ja ojts yide'en y'adsøyidi:

—Janch øts idø'øn nwa'añ ku mee nnøjmi: Jøts kidi ja Moisésip ja', kidi ja'ajip ja ojts myø'øyidi ja tsapkaaky midi tso'omp jap tsajpjøtpy, pø ja Dios Teetyxi ja' pøn tyajkp tyimya'abi tsapkaaky midi tso'omp tsajpjøtpy.

³³ Ja tsapkaaky midi Dios yajkpy, ja' idø'øn tø kyida'aky jap tsajpjøtpy. Ja'ats yajkpy ja kunuu'kxy jujky'ajtin pøn jaty ya na'xwii'ñ'ajttip, pøn ya yjanchja'widip.

³⁴ Winets ja tnimaadyøø ja nwindson'ajtim:

—Teety, møøy'ejtik øøts yø'øbi tsapkaaky.

³⁵ Jøts nwindson'ajtim Jesús ja ojts ñii'mxyidi:

—Øts idø'øn ja' sam ja tsapkaaky midi tmøøpy ja jaa'y ja kunuu'kxy jujky'ajtin. Pøni pøn ø xnimemp, pøn ø xpabøkp, nijuuni yuuj xøøw ja tka'ext; pøni pøn ø xjanchja'wip, nijuuni tøødsi ja tkagupøkt.

³⁶ Jade'ents sam tø nnøjmidi, ka' mee xjanchjawi øy mee tø xja'ixy.

³⁷ Niduki'iyi øts ja xnimendi pøn øts ja Dios Teety xagødøjkp; jøts ja'adi pøn øts idø'øn jade'en xnimendip, ka' øts ja mibaat ngajxpidisimy.

³⁸ Kaja'ajip øts jap tsajpjøtpy tø nnidsøñ jøts øts ja ngø'ømwinmaa'ñ nyiktu'unt, pø ja' Dios Teetyxi øts ja yja' nduujnip pøn ø xkajxp.

³⁹ Jøts ja' idø'øn ja chøjkpy jøts ø ni tu'ugin nga'ejxigø'øty pøn jaty øts ja tø xagødøki, jøts øts ja nyikjujkyøktit ku wyinaty ja na'xwii'ñit kyøjxnit.

⁴⁰ Jøts nay ja' ja chøjkpy jøts niduki'iyi tpaattit ja jujky'ajtin midi xemikøjxp pøni pøn t'ejxtip tñija'widip, pønts tpaøktip ja Dios U'nk, jøts øts ja ñiyikjujkyøktip ku na'xwii'ñit kyøxt.

41 Winets ja israelit jaa'y tyabagajpxpinaxwa'akti ja nwindson'ajtim Jesús ku d0'on ja wyaan: "0ts id0'on ja', ja tsapkaaky midi kidakp jap tsajpj0tpy."

42 J0ts wyand00:

—¿Kidi ja Jesúsip y0' p0n José myajnk'ajtpy? P0 nnija'wimts ad0m tyeety tyaa'k y0'. ¿Sudso y0 jade'en wya'an j0ts ku y0 tsajpj0tpy kyida'aky?

43 Xjats ja nwindson'ajtim Jesús ja tnimaay:

—Majtstu'utti y0 pagajpxk.

44 Ka'ap 0ts p0n nugo ajawi xtyimniimiñ p0ni ka'ap 0ts Dios Teety ja k0'0m xag00ki p0n 0 xkajxp; j0ts 0ts ja jaa'y nyikjujky0kt ku wyinaty ja naxwii'nit kyixy.

45 Yide'en ja Dios kyugajpxy ñ0ky wya'andi: "Dios ja niduki'i'yi yik'ixp0kidip." Jade'ents 0ts ja xnimendi p0n jaty ja Dios Teety y'ixp0jkin tmadoj0ip, p0n jaty ja tnija'widip.

46 Ka'axi p0n t'ixy ja Dios Teety; p0 ja'ayixi ja nadyu'ugyi t'ejxp p0n nay jam tso'omp ma Dios.

47 J0ts tyiibyi 0ts id0'on nwa'añ j0ts mee nn0jmi, p0ni p0n 0 xjanchja'wip, ja'ats id0'on tpatp ja tsinaa'yin midi xemik0jxp.

48 0ts id0'on ja' sam ja tsapkaaky. 0ts nyajkpy ja kunuu'kxy tsinaa'yin ja kunuu'kxy jujky'ajtin.

49 Ojtsxi ja m'apt0jk tkaydi ja tsapkaaky jam abak etjotp, j0ts ja jade'enbaat y'o'jk0jxt00 niduki'i'yi;

50 ja tsapkaakys midi 0 ndijpy ja tsajpj0tpy kidakp, j0ts ku ja p0n tka'adyit, ka'ats ja y'anmija'win wyindig0'0dyit.

51 0ts id0'on ja k0'0m y0'0bi tsapkaaky midi t0 kyida'aky jap tsajpj0tpy; j0ts ku p0n tka'aty y0'0bi tsapkaaky, xemik0jxp ja yujky'att. Ja'abi tsapkaaky 0ts id0'on ñamyayi nyakp, ku 0ts ja nne'kx ku 0ts ja nni'jpy ndag0m00yit ja naxwii'nit jaa'y j0ts tpaattit ja nitso'ok'ajtin.

52 Winets ja israelit jaa'y ag0'0myi tkajpxy'ajtpinib0jkidy00, j0ts ja ñawya'añidi:

—¿Sudso ñe'kx sudso ñi'jpy y0 xm00wya'añin j0ts ja nga'ayin nj00'kxin tsapkaagyin?

53 Winets ja nwindson'ajtim Jesús ja ojts ñii'mxyidi:

—0ts id0'on wamp, p0ni ka' 0ts nne'kx xj00'kxidi nni'jpy x'uukti, ka'ats ja nitsoojkin xpaattit.

54 P0ni p0n nne'kx xj00'kxip nni'jpy x'uukip, ja'ats ja kunuu'kx jujky'ajtin tpaattip; 0ts nyikjujky0ktip ja' ku naxwii'nit ky0xt.

55 Kumi jade'en'ampy ja m0k'ajtin xjagyaptit 0ts nne'kxk0jxp nni'jpyk0jxp.

56 P0ni p0n 0ts nne'kx xj00'kxip nni'jpy x'uukip, xemik0jxp 0ts nm00tt n'ett.

57 Ja Dios Teety p0n 0 xkajxp, ja' tm00t'ajtp ja jujky'ajtin, ja'ag0jxp 0ts njujky'aty; j0ts nayide'en p0n 0ts nne'kx nni'jpy xj00'kxip, nay 0ts k0jxpxi y'etti.

58 Ja'abi tsapkaaky 0ts id0'on nnigajpxpy midi kidakp jap tsajpj0tpy. Ka'ap y0 ñayide'eni sam ja tsapkaaky midi meets ja m'apt0jk ojts tkaydi, j0dsyim ja ojts niduki'i'yi yjadyimy'ookti; p0nts tkaapy y0'0bi tsapkaaky midi 0 ndijpy, pyaattpts ja jujky'ajtin ja' xemik0jxp.

59 Jam id0'on ja nwindson'ajtim Jesús y0 yjade'embi ixp0jkin tyajky ma ja jaa'y ñamyukyidi tsapt0jktotp, jam Capernaumit kajpk0jxp.

Yaq'at ayuujk xuknija'wimp ja 0chinaa'yin midi xemik0jxp

60 Kuts ja pyabøjkpitøjk jade'en tmadowdi ja ixpøjkin pøn jam wyinaty tpawidejttip ja nwindson'ajtim Jesús, jøts ja wyandøø:

—Ku yø jade'en wya'añ, janch tsep yø' jøts yø yikupøkt; ¿pøn yø jade'en tijj ukmøjpikta'akip?

61 Xjats ja nwindson'ajtim Jesús tja'wiyii'ñ, jøts ku ja jade'en tjanch'ayojo ku ja wyinaty jade'en tø wya'añ, winets ja tyiktiiy:

—¿Yø' m'ayoojidip?

62 ¿Sa mdejtit winets jøts ku ø nbatøjkinít nay jap ma øts jap ijty ndsøøni?

63 Ja anmija'win ja' idø'on jujky'ajtp; ¿ti yø ne'kx?, ka'ap yø ti wya'añ. Jøts ti jaty ø tøgajpxy, yø' idø'on ja Dios tyiy'ajtin'ajtpy, jøts yø' idø'on yikjujky'ajtp xemikøjxp.

64 Jøts ja meets ixa winaaagin pøn yø tkajanchja'wip.

Tø dø'on ja nwindson'ajtim Jesús ja wyinaty tnija'wiñi pøn jaty ja'adi pøn tkajanchja'widip, jøts ja' pøn ja køyakiyip.

65 Jøts ja yide'en yjaakwaañ:

—Ja'agøjxp meets jade'en nnøjmi jøts ku ø ka'ap pøn nugo ajawí xnimiñ, pøni ka'ap Dios Teety ja kø'øm xagidøki.

66 Winets may jaa'y myajtstuujtiniyi ja nwindson'ajtim Jesús, ka'ap ja t'ukmøøtwidejtnidi.

67 Xjats ja nwindson'ajtim Jesús ojts tyiktiiy jøts ojts tnøjmi ja ñimakmajtskpi jaa'y pøn ja pyabøjkpi'ajtpy:

—¿Mnøjkxwamip meets nayide'en?

68 Jøts ja Simón Pedro ja ojts yide'en y'adsøyi:

—¿Pønimts øø teety njaaktyimñinøjkxp? Tum ja'ats me mgajpxpy midí xemikøjxp yikjujky'ajtp.

69 Tøts øøts yø njanchja'wiñi jøts nnija'wip øøts jøts ku me Cristo, ja Dios U'nk, midí jujky midí kunuu'kxy.

70 Winets ja nwindson'ajtim Jesús t'adsøøy:

—¿Ti kidi mee tø nwi'ixy ñimakmajtsk? Ixats mee nidu'ugin miku'aty.

71 Ku dø'on ja jade'en wya'añ ja nwindson'ajtim Jesús, ja Judas Iscariote dø'on ja jade'en tyijpy pøn ja Simón myajnkpi, pø ja Judasxi ja wyinaty køyakwajni, øy idø'on ja ñimakmajtsk møøt yjaka'pxy ja pyabøjkpitøjk.

7

Ka'ap ja Jesús ja myigu'ukyjanchjawiyi

1 Xjats ku dø'on ja jade'en wyinaty tø y'ukjaty, jøts ja nwindson'ajtim Jesús jam ja wyinaty wyidity Galileit etjotp. Judeit etjotp idø'on kyawidetwaañ ku ja ja'it jaa'y jam wyinaty yik'ookwaañiyi.

2 Jøts kumi ja xøøwts wyinaty tymbyatpy midí ja israelit jaa'y tyundip ku ja tyik'øyidi ja waxnaky, nayide'en sam ojts y'etti y'apteety jam abak etjotp,

3 winets idø'on ja nwindson'ajtim Jesús ja myigu'uktøjk ñimaajiyi yøø:

—Ka'ap ya mda'ant; jam mnøjkxt Judea, jøts ja mbabøjkpitøjk nayide'en jam m'ejxmiyt sa jaty mduñ.

4 Ku pøn ttsøky jøts yiknijawit, ka'ap ja ti amaa'tsk ttuñ. Ejx mets yø jade'en xuñ. Tunts mets yø jade'en øy madsoo, jøts mets yø øy pøn xuk'ext.

5 Niwine'eninxi dø'on ja myigu'ukti ja kyajanchjawiyi.

6 Xjats ja nwindson'ajtim Jesús ja tnimaay:

—Ka'aním øts ndiempi tpaaty jøts ø nnøjkxt; jøts meets, øy meets øy juuni mnøjkxt.

⁷ Ka' meets ya pøn mmi'ekiyi; øts, yikmi'ajkip øts ja'agøjxp ku øts ja tuki'iyi nnigajpxy sa jaty kya'øyjaa'y'atti.

⁸ Nøjkxts mee m'atsxøbaaty; ka'ap ø nnøjkxt, kumi ka'aním øts njujky'ajtin pyaat'atynim.

⁹ Kuts ja jade'en wyaañ, jøts ja jamyi Galilea tyaañ.

Ku ja Jesús ojts ñijkxy xø'ajtpi

¹⁰ Xjats ku ja myigu'uk wyinaty tø choondi, jøts ja nwindsøn'ajtim Jesús nayide'en ñijkxy ma wyinaty jam ja xøøw, øy idø'øn ja ka'ap yjadyimñanky'ijxyi jam mayjaa'yjotp. Yu'uch idø'øn ja wyidity.

¹¹ Jøts idø'øn ja israelit jaa'y ja yjadyimy'ixa'ayi ku ja xøøw tyuñi, yide'en idø'øn ja wya'andi:

—¿Ma net ja jaa'y midi Jesús nadyejip?

¹² Jøts jam mayjaa'yjotp jam ja may pøn ja nimadyajkiyip. Pømbi jam nøp: “Øy jaa'yxi ja”; jøts jadu'uk wyamidi: “Ka'ap ja y'øyjaa'yi, nugo jaa'y ja twiniñ.”

¹³ Jøts ka'ap pøn nugo ajawí møk tñimadya'akti ja'agøjxp ku ja israelit jaa'y wyindsøn jamdi, ja' ja chø'jkidip.

¹⁴ Kujkwa'kxnip ja xøøw wyinaty ku ja nwindsøn'ajtim Jesús tyøjkiyíñ jam tsaptøjkjotp, jøts ja jam yik'ixpøjk'okwaañ.

¹⁵ Jøts idø'øn ja israelit jaa'y ja ñigyumaap tyimyjawidi, yide'en ja wya'andi:

—¿Sudso yø jadine'en tjaty, jøts ka'ats y'ixpikyí?

¹⁶ Xjats ja nwindsøn'ajtim Jesús t'adsøøy:

—Yø ixpøjkin ka' øts yø nja'aji, ja' yø' yja' pøn ø xkajxp.

¹⁷ Pøni jam pøngapøn, pøn jade'en ja tsojkin tjagyajp jøts tpadunwa'añ sa Dios ttsøkyin, ñijawipts ja' pøni kidi jamip øts n'ixpøjkin chøøñ ma Dios, uk kidi ngø'øm ja' øts jade'en ngajpxy.

¹⁸ Pøn kyø'øm ja' nugo tkajpxp, jade'en'ampy ja jade'en ttuñ jøts ja jaa'y ja yikmøjtøkyit; pøni pøn ttsojpk jøts tyikmøjtøkit ja Dios Teety yja' midi ja tø tkexy, tiy janch ja wya'añ, ka'ap ja tyaayi.

¹⁹ ¿Ti kidi ja yjançi jøts ku meets ja Moisés ojts mmø'øyi ja kutujk? Jøts ka'ats niwine'enin xpadundi ja kutujk. ¿Tigøjxp ku xyik'ookwa'andi øts?

²⁰ Jøts ja mayjaa'y ja y'adsoojiyi:

—Pø tø mets miku' mdatøkyi; ¿pøn idø'øn myik'ookwajnip?

²¹ Jøts ja nwindsøn'ajtim Jesús ja tñimaay:

—Tyimya' idø'øn ku tuk'ojkyi ojts jade'en n'adi'ich yam yjapoo'kxinxøøwi, ja'ats mee mga'øyja'wip.

²² Ojts meets ja Moisés mdanigutujk'atyi jøts meets mutsk una'jk ja chuu-jku'nk xjøptsuktuujit midi yiktejp circuncisión (øy ja tyeety'aptøjk ja tjayik-tso'onda'aky, pø nigidi ja'ajipxi ja kø'øm tyiktso'onda'kp), ¿tigøjxp meets ja mutsk mixyuna'jk xuujni ja circuncisión wan tjapoo'kxinxøøwi?

²³ Jabi mduujnipts meets ja mutsk mixyuna'jk ja circuncisión øy ja poo'kxinxøøwi, ¿ti kuts øts ja xami'ambiky ku øts ja jaa'y amuum tø nyik-tsøky ku poo'kxin xøøw?

²⁴ Kidi meets øy sagasa mbayø'øy pøni sa øy tigati x'ejxti. Ku mbayø'øwya'andit, yikxon xu'undit tiy'ajtingøjxp.

Ku ja Jesús tñigajpxy pøn ja kajxip

²⁵ Xjats winaggin pøn wyinaty tø choondi jam Jerusalén, jøts ñay'amidoojiñaxwa'jkidøø:

—¿Kidi ja'ajip yø' midi yik'ixaapy, midi yik'ookwandi?

²⁶ Ixats yə kyajpxy mayjaa'y agujky, mats yə pən sə kyanima'añiyi. ¿Wan ndejin kudunktəjk tjanymyjančjawidi yə'əbi jaa'y jəts ku yə Cristo?

²⁷ Jabi wa'atsxi adəm yə nnija'wam mə yə chəəñ; kuts ja Cristo mye'ent, ka'ats ja yiknijawit pəni mə ja choont.

²⁸ Ja'ayi ja nwindson'ajtim Jesús ja jade'en ojts tmadəy, pə ixamxi ja wyinaty tsaptəjkjətp yik'ixpiky, xjats ja mək wyaañ:

—Ja'aa wa'ats tam meets x'ijxy'aty, jəts mnija'wip tam meets yə' pəni mə ə ndsəəñ! Kidits ngə'əmwinnmaa'ngyəjxpipxi ə nmiñ, ja' ə xkajxp jəts əts ja ngudanit midi də'ən tyimyjanch'ajtp, midi mee mگا'ijxy'ajtpy.

²⁹ Wa'ats əts ja n'ijxy'aty kumi jam ə ndsəəñ, ja'ats ə xkajxp.

³⁰ Winets ja ojts tjadyimya'ukmatswa'andi jəts ja tssu'umdit; nika'apts ja ojts pən ñixajiyi kumi ka'anım ja wyinaty xyəga'pxy.

³¹ Jamts ja maydi pən ja janchja'wiyəə, pən wandip:

—Ku ja mye'ent ja Cristo, ¿ti milagri'ajtin ja jawaani yjaaktyimdyu'unt, ti ti yə jaa'y yam kyatumpy?

Ku ja fariseotəjk t'ana'amdi ja chaptəjk jəts ja Jesús yikmatst

³² Xjats ja fariseotəjk tmadowdi sə jaty ja nwindson'ajtim Jesús ja jaa'y ñimadya'agyiyi; winets ja t'ana'amdəə ja tsaptəjk pən tump jap tsaptəjkjətpy, jəts tyimykmatst ja nwindson'ajtim. Ja teetywindsəon idə'ən ja jade'en məət jadə'əstsi.

³³ Winets ja nwindson'ajtim Jesús wyaañ:

—Tyimyjawaani meets yam njaakwindsəəni, jəts əts ja n'awimbejtyinıt pən ə tə xkexy.

³⁴ Xjadyimya'ixa'ap meets, ka'ats mee mə xpaatt. ¿Ja ti ja meets jap mnəjkxt mats jap n'ett?

³⁵ Xjats ja israelit jaa'y agə'əmyi ñayiktəəbinaxwa'jkidəə:

—¿Ma də'ən yə ñəjkxwa'añ, sudso də'ən yə wya'añ jəts ku adəm yə nga'ukpaajtna'ant nima? ¿Wan yə ndejin jam tninəjkxwa'añ ja israelit jaa'y pən jadi'ini tə yə'əwya'kxnidi, məət tə ñamyidəjkniyidi ja griegit jaa'y? ¿Ja' ndejin yik'ixpəkwampy?

³⁶ ¿Ti də'ən yə jade'en tyijpy ku yə jade'en tə xnima'ayin ku wya'añ: “Xjadyimya'ixa'ap meets, ka'ats mee mə xpaatt, ja ti ja meets jap mnəjkxt mats jap n'ett”?

Ja kunuu'kxy jujky'ajtin midi ja Jesús yajkpy

³⁷ Ja yjadu'ukpi xəəw midi ja xəəw tyamigugəjxinip, ja' idə'ən ja tyim'y'ukməjnəjnəpnip, winets ja nwindson'ajtim Jesús wya'kukiyi'ñ, jəts ja mək'ampy wyaañ:

—Pəni pən ja kunuu'kxy jujky'ajtin ttsojpk jade'en sam ndəəjtsant, wants ə xnimiñ jəts ə nmo'ot.

³⁸ Pəni pən ə xjanchja'widip, jade'ents ja yjattit sam wya'añ ja nəky jəts ku ja jam y'anmija'winjətp jade'en myu'ut ja nəə midi yikjujky'ajtp xeməkəjxp.

³⁹ Jade'en idə'ən ja nwindson'ajtim Jesús tətijy, pəni pən ja janchja'wiyip, ja'ats ja Espiritu Santo pyaattip; ka'anım idə'ən ja Espiritu Santo wyinaty myiñ, kumi ka'anım ja nwindson'ajtim Jesús wyinaty tmimadəkixy ja ayo'on jəts chajpatt.

Ku ja jaa'y ojts ñawyanwa'kxniyidi ja nwindson'ajtim Jesús kəjxp

⁴⁰ Xjats jam mayjaa'y agujkp winəəgin wyandəə, ku ja jade'en ojts tmadowdi:

—Tyimyjanchja'adam idø'øñ yø jaa'y ja Dios kyugajpxy midì idø'øñ yik'awejxp.

41 Jøts jadu'uk wyamidi:

—Ja Cristo yø'.

Jøts wyenkpi wyamidi:

—¿Sudso ndejin ja Cristo jam kyaxø'økt Galilea?

42 Yide'ents jap nõkyijxpy jaabyety wyā'añ jøts ku ja rey David ja' y'apjaa'y Cristo'atp, jøts ku ja jam choont Belén, nay jam mā ja David y'ijty kyugajpi.

43 Xjats idø'øñ ja jaa'y jade'en ñawyānwā'kxniyidi ja nwindson'ajtim Jesús køjxp.

44 Jam winaagin pøn ja tjadyimy'ukmatswandøø, nika'apts jade'en pøn y'adijch.

Ku ja windsøndøjk ojts tkajanchjawidi ja Jesús y'ayuujk

45 Jøts ja tsaptajktøjk ojts wyimbejtñidi ñøjkxnidi mā ja fariseotøjk jam wyinatyi møøt ja teetywindsøndøjkti, ja'ats ja ojts ñi'ixmxyidi:

—¿Tigøjxp ku tø xkayikmendi?

46 Jøts ja tsaptajktøjk y'adsowdi:

—iKa'anīm mā pøn jade'en kyajpxy sam yø jaa'y kyajpxyin!

47 Winets ja fariseotøjk ja ñimaajyidøø:

—¿Meebaat nayide'en tø myikwin'øø'nidi?

48 ¿Ti tø adøm winaagin ja nwindson t'ukjanchjawidi, uk tø ja yjawì tu'ugin ja fariseit t'ukpabøkti?

49 Yø mayjaa'dyi pøn tkamøja'widip ja kutujkin, yø' kawindiy'ajttip ku ja tpabøkti.

50 Ja Nicodemo pøn ja nwindson'ajtim Jesús ojts koots ñinijxxyi, nay ja fariseit ja', ja'ats ja myigu'uk ojts tnøjmi:

51 —Jade'en sam adøm ja ngutujk tyikutujkyim, ka' pyaat'atyì jøts adøm jaa'y ja ayo'on ndyimdyanigajpxkojin ku ja ka'anīm nmadø'øyindi jawyeen pøni ti dø'øñ ja tyumpy.

52 Jøts ja ojts yide'en yik'adsøy:

—¿Nayi Galileit jaa'y mets? Ìxpøk waani ja Dios kyajpxy jøts xnijawit jøts ku ni tu'uknīm ja Dios kyugajpxy jam kyayiknijawinīm Galilea.

Ja ka'ødyø'øxy

53 Jøts ojts ñøjkxnidi mā jaty pøn tyøjk.

8

1 Jøts ja nwindson'ajtim Jesús jam ja ojts ñijxxy Olivos kojpkøjxp,

2 xjats ku yjajtaajky kyimjabom, winets ja ojts ñijxxy jam tsaptøjkjotp. Jøts ja jam øy pøn ñimejniyøø, winets ja y'ixaaajky jøts ja yik'ixpøjktøjkiyī'ñ.

3 Jøts ja kajpxwejpitøjkti møøt ja fariseotøjkti, ja' ojts twaamendi tu'uk ja tø'øxyøjk pøn ja myigu'uk ñiyaa'y myøøt'ajtip. Jøts idø'øñ ja jam ojts yikpikta'aky mayjaa'y agujkp pøn jaty jam wyinatyi,

4 jøts ja tnīmaadyi ja nwindson'ajtim Jesús:

—Windsøn, jap ya'at tø'øxyøjk tø tyimykubaadi ku ja myigu'uk ñiyaa'y tmøøt'ajti.

5 Yikutujkpy ja Moisés kyutujk jøts adøm yø'øbi tø'øxyøjk nga'tspa'oo'kint. ¿Sā me m'ukwā'añ?

6 Jade'en'ampy idø'on ja ojts jade'en wyā'andi jøts ja tkajpxy'ejxwā'andi, jøts ja jade'en tigati ttukpøky'atwā'andi. Winets ja nwindson'ajtim Jesús wyindaajky, jøts ja ojts ja kyøtsa'jx ttajaabyinaxwā'jky ja naajx.

7 Jøts kumi yiktiibyøjk'adøtsp ja', winets ja kyookukiyi'ñ jøts ja tnimaay:

—Pøni jam pøn kapøkmyøøt, wan ja jawyeen tkonji'iky ja tsaa jøts ttaka'atst yø tøxyøjk.

8 Jøts ja nayide'eñim ñaxkoogojmi, ja naajx ja yjay'adichpy.

9 Jøts ku ja ojts jade'en tmadowdi, jøts ja yjanchnabyøkyjawi'idøø, jøts ja ojts wyā'kpidsømnidi nidu'uk jaty. Ja møjaa'dyøjk jawyeen pidsømnidøø; xjats ku ja wyinaty tø pyidsømgøxti, jøts ja nwindson'ajtim Jesús nadyu'uk tyaañ møøt ja tøxyøjk.

10 Winets ja nwindson'ajtim Jesús kyookukiyi'ñ jøts ojts t'ixy ku ka' pøn, ja tøxyøjkyi jap wyinaty, jøts ja tnimaay:

—¿Ma net ja'adi pøn mni'øø'niyidip? ¿Ka' pøn sa tø mduniyi?

11 Jøts ja ñimaajyøø:

—Ka' windsøn'ajtim pøn.

Jøts nwindson'ajtim Jesús ja tnimaay:

—Ni øts mets sa ngatu'unt. Nøjkxni, kidi m'ukpojkituni.

Ja Jesús xyikujajimp xyikudøø'kximp

12 Xjats ja nwindson'ajtim Jesús ojts jadigojk tmigajpxy ja mayjaa'y, jøts ja tnimaay:

—Øts tu'uk tu'uk ja naxwii'ñit jaa'y nyikujajtaajkip nyikudøø'kxaajkip; pøni pønøts øxjotmay'ajtp, pøni pøn øts ja nja' xpabøjkkip, ja'ats idø'on yikmo'op ja wejin ja kajin jøts ja tyukpaadit ja kunuu'kxy jujky'ajtin, nijuuni ja wimbeets kugoots kyajattit.

13 Winets ja fariseotøjk ja ñimaajyøø:

—Kø'øm mets jam øy mnanktyiidyøkiyi, ka'ap yø ma tyuñ.

14 Jøts ja nwindson'ajtim Jesús ja t'adsøøy:

—Jade'en sa ø nwā'añ, tump yø' øy ø kø'øm nnanktyiidyøkiyi. Øts ja nñija'wip ma ø ndsøñ jøts ma ø nnøjkxt. Meets, ka' xnijawidi pøni ma ø ndsøñ uk pøni ma ø nnøjkxt.

15 Jade'en meets øy ti xpayø'øy sam ja naxwii'ñajtin ja kyutujkin. Ka'ap øts øy pøn ti ndabayø'øy;

16 jøts kuts nbayø'øty øts, tiy øts ja ndiidyu'unin nbikta'akt, kumi ka' ø nadyu'uk ndiidyu'unt, nayide'en øts ja møøt ndiidyu'unt ja nDeety pøn ø xkajxp.

17 Jade'en jap kyøxa'ayi jap nøkyjøtpy midi mee mgutujk'ajtpy, ku ja testigi'ajtpi namajtsk tum jade'en wyā'andi, ja'ats idø'on yja' yikjanchjawidip.

18 Jade'ents øts yam kø'øm nañidestigi'ajtip, jøts jadu'uk ja nDeety pøn ø xkajxp, ja' ø xnidestigi'ajtp.

19 Winets ja nwindson'ajtim yiktiibyijky:

—¿Ma dø'on ja mDeety?

Jøts ja nwindson'ajtim Jesús t'adsøøy:

—Meets, ka' mee xnijawidi, jøts ni ja nDeety mee xkanija'wiyi; ku øts jeexyip xnijawidi, mnayinija'widipts meets jeexyip ja nDeety.

20 Jade'en idø'on ja nwindson'ajtim Jesús wyaañ ku ja ixam wyinaty yik'ixpiky jam tsaptøjkjotp, ma ja limunsi meeñ wyinaty ja ñigajuun. Nika'apts ja ojts pøn myachi, kumi ka'anin ja wyinaty xyøga'pxy.

Nømp ja Jesús: “Ka'ap meets jap mibaqt mniykxy pøni ma ø nniykxy”

21 Jøts idø'øn ja nwindson'ajtim Jesús tnimaagyojmi ja mayjaa'y:

—Nøjknip øts, øy mee xja'ixa'at mi'ookpts meets yø mbøky; jap mā ø nniikxy, ka'ap meets jap mibaat mnøjkxt.

22 Winets ja israelit jaa'y wyandøø:

—¿Wan yø ndejin ñankpya'ookwa'aníyí, patyts yø wya'añ ku adøm jap nganøjkxin mā yø ñiikxy?

23 Jøts nwindson'ajtim Jesús ja ñimaajyidøø:

—Meets, ya mee mdsøñ, ya mee mgaxi'iky; øts, jam ø køjxp ndsøñ. Ya mee mnaxwiñ'aty, øts ka'.

24 Paty meets idø'øn nnøjmi jøts ku mbøky xmi'ookit; ku ka' xjanchjawidi pøni pøn øts, mmi'ooktipyimts idø'øn ja mbøky jade'en.

25 Winets ja nwindson'ajtim Jesús yiktibyijky:

—¿Pøn mets idø'øn?

Jøts nwindson'ajtim Jesús t'adsøøy:

—Jaayim øts yø nnigajpxy ity ku nyik'ixpøjktøkiyi'ñ.

26 May øts ja winmaa'ñ njagyepy midí ø ngajpxwampy, jøts mee nbayø'øwya'añ nayide'en. Tiy'ajtingøjxp ja kyajpxy pøn ø xkajxp, jøts pøni sa ø nnøjmi ja naxwiñ'it jaa'y, jade'en øts idø'øn ja tømadyø jøts ku ja jade'en wya'añ.

27 Ka'apts ja tja'gyukidi jøts kudam ja ja' yiknigajpxy ja Dios Teety.

28 Ja'agøjxp ja ojts ñi'mxyidi:

—Ku meets jam kruskøjxp xpikta'akt, jaanimts meets x'ejxkapt jøts ku øts idø'øn ja wyinaty sa tømawa'añ, jøts ku ka' ja ngø'ømwinmaa'ñ nyiktuñ; ja'ayi øts idø'øn ngajpxy midí øts ja nDeety tøm xuknijawi.

29 Pøn øts xkajxp, møøt øts ja n'ity; ka' øts ja nDeety nadyu'uk xmajtstu'uty, pø tum ja'axi ø ndumpy midí ja tyajotkujk'ajtpy.

30 Ku ja nwindson'ajtim Jesús jade'en ojts wya'añ, winets may jaa'y ja ojts janchjawi.

Ka' nduknaxa'amp, jaa ja Dios yja' jøts ja miku'yja'

31 Xjats ja nwindson'ajtim Jesús tnimaag y ja israelit jaa'y pøn ja wyinaty tøm janchjawi:

—Pøni mnadyamiyojxidip tu'ugyi sa ixa nnøjmidi, meetspits idø'øn tiy xjantyimbyabøjkpi'atp;

32 winets ja tyi'byi jyanchnpi xnijawidit, jøts ja myik'awa'atspidsømidip.

33 Jøts ja ojts yide'en t'adsowdi:

—Ja Abrahamxi øøts ndeety'amøjip, jøts ka'animts øy pøn windi xyiktuñ nugo ajawi. ¿Sudsøts me mnimy jøts ku øø n'awa'atspidsøømt?

34 Jøts ja nwindson'ajtim Jesús ja tnimaag y:

—Janch øts idø'øn nwa'añ ku mee nnøjmi, niduki'iyi pøni pøn pøkyundip, ja pøky ja ñamyayi yja'bøjknip. Pøkpyatki'py ja ñamyayi y'ejtnidi.

35 Tu'uk ja tumbi pøn yikø'ømit'ajtnip, ka'ap ja nayide'en ja kutujk tjagyepy sam ja jaa'y ja y'u'nk y'una'jk tjagyepyin.

36 Jade'ents øts ja Dios Teety x'U'nk'aty jøts ku mee nyik'awa'atspidsøømt, xemikøjxpts ja jade'en.

37 Øy meets ja Abraham xja'aads i xjakojpki, xyik'ookwamppts meets nayide'en winaa'gin, ja'agøjxp ku meets ø n'ayuujk xkagupøjki pøni sa njawa'añ.

38 Pø ja'ats ø ngajpxy midí øts nDeety tøm xukjaty; jøts ku meets, pø ja'axi mee nayide'en mbadumpy midí meets mdeety mdani'ana'amip.

39 Jøts ja ojts yik'adsøøy:

—Ja Abraham øø ndeety'amøjip.

Yide'ents ja nwindson'ajtim Jesús ja ojts ñii'mxyidi:

—Ku meets jeexyip ja Abraham mjanch'u'nk'atyiyi mjanch'unaj'k'atyiyi, nayide'en meets jeexyip mja'a'y'aty sam ja ojts yjaa'y'atyin.

⁴⁰ Ni jade'ents, o meets ja tyiiby'i yjanchpi tø njadukmadøy sam øts Dios Teety ja tø xjaduknijawin, ne'egi xyik'ookwamp meets. iNi ja Abraham ojts jade'en kya'adi'ich sam meedsin!

⁴¹ Nayide'en mee m'adi'ich sam ja mdeety y'adi'ichin.

Winets ja wyandøø, jøts ja nwindson'ajtim Jesús yiknimaay:

—Ka'ats øøts jadi'iñi ngaxi'iky; ja Dios øø tu'ugyi nDios Teety'ajtpy.

⁴² Winets ja nwindson'ajtim Jesús ja tnimaay:

—Ku jeexyip ja Dios Teety xDios Teetyjawidi, xtsojpk meets jeexyip, pø jamxi ø ndsøñ ma ja Dios jam ku øts ixyam nya'a'aty. Kidi ngø'ømwinmaa'ñipxi ø nmimimpy, pø ja Diosxi ø xkajxp.

⁴³ ¿Tiku wine'enin nguidyimya'gyukidi sa ø njawa'añ? Ka' xtyimyoowajniidi ja ngajpxy ja n'ayuujk.

⁴⁴ Ja miku' ja' mee mdeety'ajtpy; ja' mee mgøjø'ømit'ajtip jøts ja' mdunwandip ti jaty ja ñanktyunwajnip. Tso'onda'agyip ja miku' yikjaa'y'oo'knibøjkini. Nijuuni ja tkayiktuñ ja tyiiby'i ja yjanchpi, jøts nijuuni tiy janch kyakajpxy. Ku ja tyaay'aty, jade'eñi ja kyajpxy sayim idø'on ja myiku'atyin, ja'agøjxp ku yjantyimdyaa'y, jøts ja' idø'on tnwindson'ajtp ja taay'ajtk ja win'ø'nk.

⁴⁵ Kuts øts yam tiy janch njawa'añ, ka'ats meets ø xmibiky.

⁴⁶ ¿Pøn jam winaagin ukwa'anwamp jøts ku øts pøky nmøødi? Kuts tiy janch nwa'añ, ¿tigøjxp ku ø ka' xjanchjawidi?

⁴⁷ Pøn Dios ja'ajtip, myadoowajnip ja' ja Dios y'ayuujk; jøts kumi ka'ats meets Dios mja'aty, patyts meets ja ka' xpatmadoowajni ja y'ayuujk.

Jaayim ja Cristo ku ja Abraham yja'ajty

⁴⁸ Xjats ja israelit jaa'y ja ojts ñii'mxyiyi:

—Tyimdyiyimxi øøts idø'on njadyimyjawa'añ ku øø nnimy jøts ku me msamariitjaa'y, jøts ku ja miku' tø mdatøkyyi.

⁴⁹ Jøts ja nwindson'ajtim Jesús ja ojts yide'en t'adsøy:

—Niwine'enin øts miku' xkadatøki. Ja' øts ja'ayi ndumpy jøts øts Dios Teety nwindso'øgi, ja' mee xkadamo'e'jxp.

⁵⁰ Ka'øtsip ngø'ømja' n'ixaapy, øyi ja yjaa'a'aji pøn øts nja' x'ixaajyip. Ja'ats tpayø'øpy pøn ødyump ka'ødyump.

⁵¹ Jøts janch øts idø'on nwa'añ, pøni pøn tmøjpiktakp sa ø nwa'añ, nijuuni ja kya'ooktit kyawindigø'ødyit.

⁵² Winets ja israelit jaa'y ja y'adsoojiyøø:

—Tønims øøts inet yam ndyimyanchjawanim jøts ku ja miku' tø mjanch-tatøkyyi. Sa ja Abraham tø y'øøky møøt niduki'yyi ja Dios kyugajpxtyi, jøts me mwa'añ: “Pøni pøn tmøjpiktakp sa ø nwa'añ, nijuuni ja kya'ooktit kyawindigø'ødyit.”

⁵³ ¿Ti me ndejin mjaaktyimdyajinajpxy jøts ku ka' myajada'aky øøts ja ndeety'amøj Abraham? Sa ja y'ø'jky jøts sa nayide'en y'oo'ktøø ja Dios kyugajpxy, ¿pønts mets idø'on mdsaañadyiyi?

⁵⁴ Jøts ja nwindson'ajtim Jesús ja t'adsøøy:

—Ku ø kø'øm nnankmyøjtøkiwya'anit, ka' ma tyuñ øts ja ngø'ømja'. Ja Dios Teetyts ja' ø xyikmøjtøjkip midi mdejtjip jøts ku ja' xDiosidi.

⁵⁵ Meets, ka' meets ja xnijawidi. Øts, wa'ats øts ja nnijawi, jøts ku ø nwa'ant jøts ku øts ja ka'ap nnijawi, janchtyimdyaaay øts idø'øn wyinaty nayide'en sam meedsin. Njanchtyimni'ja'wipts øts ja' jøts nmimadøøpy øts ja' pøni sa ja wya'añ.

⁵⁶ Jøts ja Abraham, pøn meets idø'øn m'aadsidip mgugojidip, xaxondaajk øts ja' ku tnijaw'aty kuts nmenwa'añ ya naxwiiñ; x'eix øts ja' jøts janch øy tsuj ja ñayjawiyi.

⁵⁷ Winets ja israelit jaa'y tnimaadyøø ja nwindson'ajtim Jesús:

—Ni kyaja'atynim ja mjumøjt wixijxmyajk, çjøts mjanch'uknimy jøts ku ja Abraham tø x'ixy?

⁵⁸ Xjats ja nwindson'ajtim Jesús t'adsøøy:

—Tiy janch idø'øn nwa'añ, jøts ku øts jaayim wyinatyni ku ja Abraham kyaxi'jky.

⁵⁹ Winets ja tnixajidi ja tsaa jøts ja ttaka'atswa'andi ja nwindson'ajtim Jesús; nayu'jtsi ja', jøts ja ojts pyidsømni jam tsaptøjkjotp, jam ja mayjaa'y ja ttanajxy, jøts ja ojts jade'en cho'oni.

9

Ku ja Jesús ojts tyikwin'ejxwa'kxy ja winap jaa'y

¹ Xjats ku ja nwindson'ajtim Jesús jam wyinaty ñaxy, winets ja ojts t'ixy tu'uk ja yaa'dyøjk pøn wyinaty winap, jade'en ja tyingye'exy.

² Jøts ja nwindson'ajtim Jesús ja pyabøjkpitøjk ñimaajiyiøø:

—Windson, çsudso yø jaa'y jade'en winap tø kye'exy? Çjade'en idø'øn n'ukwa'anint, ja tyeety idø'øn ndejin jantyimbyøkmøøtti, uk kyø'ømbøky idø'øn yø jade'en tuujnip?

³ Winets ja nwindson'ajtim Jesús ja ñimaajiyidøø:

—Kidi kyø'ømbøkyip yø jade'en kyuwanjajtip, jøts nigidi ka'ap tyeety yø tpøkyi; jade'en'ampy idø'øn yø jade'en yjaty, jøts yø' ñikøjxp yiktuk'ejxtit øy pøn midi ja Dios tyu'ump.

⁴ Wants øts ja tyunk tjaaqtyimdyuujni jaaktsojknim; jotmøñ ø n'ukugoodsiñit kuts ja wyinaty ja tyunk ngatungøjxi pøn ø xkajxp.

⁵ Pøni wine'enin ø njaaktsøøni ya naxwiiñ, njaaktyimdyu'umbyimts øts jade'en sam ja jaj kyujajy kyudii'kxy. Jade'en øts ja naxwii'ñit jaa'y ñamyayi nyikujajtaagidit nyikudøø'kxaagidit.

⁶ Kuts idø'øn ja jade'en wyan'abajtiyii'ñ ja nwindson'ajtim Jesús, jøts ja ojts chujy tyiknaxkida'aky jam naxkøjxp, jøts ja naajx ja yii'nim ojts ttamimo'otsyø'øyi ja chujy. Mo'ontsu'nk tyik'øiyiyii'ñ, ja'ats ja ojts yik-tawinjaaxy ja winap jaa'y.

⁷ Jøts ja tnimaay:

—Nøjx m'atsnawyimbujyi jam nømu'tjotp midi yiktejp Siloé —jade'en idø'øn ja Siloé y'ayukpidsimy: ja' pøn tø yikexy.

Xjats ja winap jaa'y jam ojts ñijky jøts ja ojts ñawyimbujyi, jøts ku dø'øn ja ojts wyimbijty, win'ejnip ja'.

⁸ Winets ja jaa'dyi pøn ja jam myigujøønip myigudøjkp, jøts ja'adi pøn jaty ja wyinaty tø y'ijxyiyi jøts ku ja wyinapi, ja'ats idø'øn wandøø:

—Çkidi ja'ajip yø' pøn ja y'ijty xumi'ixakp, pøn ja y'ijty xumilimuns'amidoop?

⁹ Jam winaagin wyandi:

—Janch ja' yø'.

Winaagin ja wyamidi:

—Ka'ap ja yø'øji, jantymñayide'en tam tyimy'ixy.

Kø'ømts ja jaa'y yide'en wyaañ pøn wyinaty tø wyin'ejxwa'kxy:

—Pø øtsimpts ja'.

¹⁰ Winets ja yiktii'byjky:

—¿Sudsomts yø mween tø yjaty, pø mwın'ejxnıpts yjawi?

¹¹ Jøts ja t'adsøøy:

—Yø jaa'y midı Jesús txøøw'ajtp, yø' mo'onts tø tyik'øyi jøts øts ja tø xawınjaaxy, yide'en ø xnımaay: “Nøjkx m'atsnawyımbujyi jam nøø'agø'øm midı yıktejp Siloé.” Xjats ø tø njanchnijky jøts kuts ø tø nnawyımbujyi, jøts øts yø nween tø y'ejxwa'kxy.

¹² Jøts ja ojts tjaakyıktøwdı:

—¿Ma net ja jaa'y?

Jøts ja tnımaay:

—Ka' nnıjawi.

Ku ja fariseotøjk tyıktøwdı ja winap jaa'y sudso wyın'ejxwa'kxy

¹³ Winets ja ojts twaanøjkxtı ma ja fariseotøjk jamdı.

¹⁴ Tyımbyoo'kxin xøøwts idø'øn wyınaty ku ja nwindson'ajtım Jesús tyik'ø'yıyü'ñ ja mo'onts midı wyınaty tø ttuktatsø'øky ja winap jaa'y,

¹⁵ paty ja fariseotøjk jam ttübyøjkøjmıdı ja jaa'y sudso'ampy idø'øn ja wyeen ja wa'ats y'ejxni. Jøts ja y'adsojımbıjty ja':

—Mo'onts øts ja tø xawınjaaxy, xjats ø tø nwımbujy, paty øts ıxyam wa'ats n'ejxni.

¹⁶ Winets wınaagin ja fariseotøjk wyandøø:

—Ja jaa'y pøn jade'en tø y'adi'ıch, ka' inet Dios ja tja'aji, kumi ka'ap ja twındsø'øgi ja poo'kxin xøøw.

Jøts wınaagin wyaamıdı:

—¿Sudso mılagrı'ajtıın ja ndejın jade'en ttu'unt, pøni janch pojkpıtumbı jaa'y tam ja wyınaty?

Jøts agø'ømyı jade'en ñawyanwa'kxnıyıdı ku kyanagyupıkyıdı,

¹⁷ jøts ja jadıgojk tyıktøøgojmıdı ja jaa'y pøn wyınaty winap uk'ejt:

—¿Jøts mets, sa mets idø'øn mwä'añ, pøn idø'øn yjawi ja jaa'y midı tø myıkwın'ejxwa'kxyıyı?

Jøts ja wyaañ:

—Øts wamp, Dios ja' kyugajpxy.

¹⁸ Jøts ja israelıt jaa'dyı ka'ap idø'øn ja tjanchjawıwya'andı ku dø'øn ja jaa'y y'ıjty wyınapı, jøts ku ja tø wyın'ejxwa'kxni. Yıknajtswaa'wıyıbaat ja tyeety ja tyaak,

¹⁹ jøts ja ojts tnøjmıdı:

—¿Meets idø'øn ya'at mmajnk? Janch winap idø'øn yø tø kyaxı'ıky, pø mnømdıpxı. ¿Sudso'ampyts yø wa'ats wyın'ejxni?

²⁰ Winets ja u'nkteety y'adsoodøø:

—Sudsomts øøts yø n'u'nk nganıjawi, pø winapxı dø'øn yjanchke'exy.

²¹ Ni øø nganıjawi sudso'ampy yø tø wyın'ejxwa'kxy, jøts nıja' øø nganıjawi pøni pøn yø tø yıktøjkyıyı yø wyeen. Yıktøwdı jade'en kø'øm; pø møjaa'ñıxı yø', wan kø'øm mdukmadøyıdı.

²² Jade'en'ampy idø'øn ja tyeety tyaak ojts jade'en wya'andı, tsø'jkıdıp ja', pø tøxi ja israelıt jaa'y wyındsøndı wyınaty tkajpxy'ajtındı, ku ja abıky yıkpıktä'aktıt pøni pøn wamp jøts ku ja nwindson'ajtım Jesús Cristo'aty, midı ja Dios tkajpx.

²³ Paty ja møjaa'y wyandøø: “Yıktøwdı kø'øm, pø møjaa'ñıxı yø', wan kø'øm tnıgajpxy.”

24 Winets ja israelit jaa'y twaadsowdi jadigojk ja jaa'y pøn idø'øn y'ijty winap, jøts ja ojts tnøjmidi:

—Tukmadook øøts tiy janch sam Dios t'ijxyin; jade'en øøts yø nnijawi jøts ku yø pyojkpitumbijaa'y pøn tø myiktsø'øgyi.

25 Jøts ja t'adsøøy:

—Ka'ap øts yø nnijawi pøni pøn yø', pøni pojkpitumbi jaa'y uk kapojkpitumbi jaa'y yø'. Yø'øyi øts nnija'wip jøts ku øts y'ijty nwinapi, ixyam wa'ats ixyam nwin'ejxni.

26 Jøts ja tyiktøøgojmidi:

—¿Sa ja tø mduñi? ¿Sa ja tø ttuñ jøts ku ja tø myikwin'ejxwa'kxyiyi?

27 Jøts ja yide'en t'adsøøy:

—Tø meets ja njadukmadøøy jøts meets ja ka' xmøjpiakta'aky; ¿winaak ojk nnigajpxt? ¿Uk ja' mdsojktip jøts ja yja' xpabøkwajnmidi?

28 Winets ja y'amykniimaay chaachyikniimaay, yide'en ja wya'andi:

—Yø jaa'y me mbabijkpy, øøts ja Moisés øøts yja' nbabøjkp.

29 Nnija'wipxi øøts ja' ku ja Moisés ojts myigajpxyi ja Dios; yø jaa'y, nguidy-imñija'wip øøts yø' pøni mā yø chøøñ.

30 Jøts ja t'adsøøy, yide'en ja tnimaay:

—Yø' idø'øn tiy janch nima'at yikja'wip, ku meets yø xkanijawi pøni mā yø chøøñ, jøts tøts øts yø xyikwin'ejxwa'kxy!

31 Wa'atsxi yiknijawi jøts ku Dios ka' ja' tmadøøy pøn pojkpitumbijaa'y'ajttip; ja'ayi ja myadooip yja' pøn ja windsø'jkiiyip, pøn ja padu'unxiiyip ja yja'.

32 Ka'axi yjawi mā pøn nmadøynim ku tu'uk ja winap jaa'y ja jaa'y tyikwin'ejxwa'kxy midi winap tyimgya'jx.

33 Ku yø jeexyip Dios tkaja'aji, niti yø jeexyip tkatuñ.

34 Xjats ja yikniimaay:

—Jøts mets, ku mets pøkyjotpy tø mgue'exy, ¿jøts mets idø'øn jade'en yik'ixpøkwā'añ?

Jøts ja jap ojts yik'ixkajxpidsimy.

Pøn tkanija'widip ja Dios yja'

35 Jøts ja nwindson'ajtim Jesús tnmadøøy jøts ku ja winap jaa'y jap wyinaty jade'en tø yikajxpidsimy; jøts ja ojts tminabyaadyi, winets ja ojts tnøjmi:

—¿Mmøja'wip mjanchja'wip Dios U'nk?

36 Jøts ja ojts ñii'mxyi:

—Windsøn'ajtim, tukmadook øts pøn ja', wan ø tmøjawi tjanchjawi.

37 Jøts ja nwindson'ajtim Jesús ja t'adsøøy:

—Tø mets ja x'ejxni; pø øtsxi dø'øn ja', ixya kø'øm møøt mmadya'aky.

38 Winets ja jaa'y ñagyuxendyaajkøø, jøts ja twinguxanaay ja nwindson'ajtim Jesús, jøts ja tnimaay:

—Windsøn'ajtim, nmøja'wip njanchja'wip mets.

39 Jøts ja nwindson'ajtim Jesús wyaañ:

—Ja' øts ya naxwiiñ tø nnimiñ jøts ja payø'øyin tyunit tiy'ajtingøjxp; pøni pønts wimbeets kugoots, win'ejxwa'kxtipts ja' jøts ja t'ejxtit tñijawidit; pønts tja'ejxtip tñanija'widip jøts tkamibøkti, ja'ats tandip wimbeets kugoots ejxim winap jaa'yin.

40 Winets winaagin ja fariseotøjkti pøn jaty jam wyinaty, ku ja jade'en tmadowdi, winets ja ojts tnøjmidi ja nwindson'ajtim Jesús:

—¿Uk wan øøts idø'øn nayide'en nwimbeedsi?

41 Jøts ja nwindson'ajtim Jesús t'adsøøy:

—Ku meets jeexyip mwimbeedsi kugoodsi, ka' meets jeexyip myik-tapøky'ejxti ja mbøky. Kumi mnømdip jøts ku x'ejxti xnijawidi, mdaja'atidipts meets ja mbøky.

10

Jade'en ja Jesús n'ukpiktaajkint ejxim tu'uk ja øybi kurajt n'ejxint

1 'Janch øts idø'øn nwa'añ, pøn jap katøjkip ma ja borreek ja kyemy'aaw, pøn abiky'ampy tøjkip, ja maa'tspi dø'øn ja'.

2 Jøts ja jiyujk'ejxpi, ja' jap najxp ma ja kemy'aaw jap.

3 Ja yiktøjk'awatspi, ja' ja yik'awajtsxiyip ja tøjkaaw jøts ja tyøki, jøts wa'ats ja byorreek ja yukmadøyi. Xyømøøpy ja tu'uk jaty jøts ja tyikpidsimy jap kemyjøtpy.

4 Kuts ja tø tyikpidsømguixy tuki'iyi ja yjiyujk jøts ja jawyeen twinway, payø'øyip ja' kumi wa'ats ja yukmadøyi.

5 Ka'apts ja nugo ajawi tpanøjkxti ja wyenkpi; ne'egi yjaaktyimkyajkidip ja', kumi ka'ap ja tyukmadowdi ja wenkjaa'y.

6 Ja'agøjxp ja nwindson'ajtim Jesús ojts jade'en tmimadya'aky ja jaa'y, jøts ja ttuktamimadowiwa'añ sa ja yja' yjaa'y'atti, ka'apts ja ojts tmadoodowdi pøni ti dø'øn ja jade'en yjatijpy ku ja jade'en ñi'mxyidi.

Jade'en ja Jesús n'ukpiktaajkint ejxim tu'uk øybi borreek'ejxpi

7 Winets ja nwindson'ajtim Jesús jadigojk tñimaagyojmi ja jaa'y:

—Janch øts idø'øn nwa'añ: Jøts ku øts idø'øn jade'en ñamyayi nnabyikta'agyi sam tøjkaawin, ma ñaxtit øts ja nja', sam ja borreek ja tyøjk'aaw t'ayø'øyi.

8 Jøts ja win'øø'mbi pøn tø y'atsmendi jøts wya'andi ku Dios tø kyexyi, jade'en idø'øn yjamendi ejxim ja maa'tspin; øts njaa'y, ka'ap ja ñagyiyajkidi nugo ajawi.

9 Øts idø'øn jade'en sam ja tøjkaaw; pøni pønts jap tøjkidip, ja'ats idø'øn nitso'ok'attip. Jøts øts ja ndanitanit ja nja', ejxim ja borreek u'nk yiknitani jap kyemyjøtpy.

10 'Ja'ayi ja maa'tspi ñimimpy jøts ja myeech, jøts ja yikjaa'y'øøky jøts ja yikudigø; øts, ja' ø nnimimpy jøts meets øy yikxon xpaattit ja kunuu'kxin ja jujky'ajtin.

11 Jade'en øts idø'øn sam ja jaa'y pøn øy borreek'ejxp. Ku dø'øn ja øy t'ixy ja byorreek, øy sa tmiwanjaty ja kø'øm, nugo ku byorreek ja kya'øøky.

12 Pøni pøn mijuy tump, ja'ayi ku ja t'ixy jøts ku ja myiñ ja awa'añ miy'uk, jøts ja japyi tñike'eky ja byorreek jøts kyakni, kumi ka'ap ja tyimya'aji mididi ja jiyujk ñi'ejxpi'ajtpy, jøts nika'ats ja tkø'ømja'aji. Xjats ja miy'uk tmajtsni ja borreek, jøts ja jadi'iñi tyik'ayø'øbyaky.

13 Jade'en'ampy ja'abi jaa'y kye'eky kumi mijuy ja tyuñ, patyts ja ka'ap tkwenti ja borreek.

14-15 Øts idø'øn øy jiyujk'ejxpi'ajtp. Sam øts ja Dios Teety xnijawin jøts wa'ats øts ja nnijawi; nayide'ents øts idø'øn ja njaa'y wa'ats nnijawi, jøts øts ja nayide'en wa'ats xnija'wimiyidi. Øts yø nguwanjatip.

16 Jøts jap øts ja borreek abiky njaakmøødi mididi kajap'ajtp ya kemyjøøjty; nyikme'empts øts jaa ja nayide'en. Jøts xmimado'odip øts ja', jøts tu'ugyi ja ñi'ejxpi yjagyajpniyit.

17 'Ja'agøjxp øts ja Dios Teety xtsøky kuts ngu'oogidit yø'ødi, jujkpyøkpts øts jadigojk.

¹⁸ Nipøn ø mibaat xkayik'øøky, kø'øm øts ja nnajtsjawit jøts ø nnagyøyakit ngø'ømdsojkingøjxp. Tiy'ajtingøjxpts øts nnagyøyakiyit, jøts nay tiy'ajtingøjxpts øts njujkyøkt jadigojk. Tøxi øts ja Dios Teety jade'en x'ane'emy.

¹⁹ Xjats ku ja israelit jaa'y jade'en ojts tmadowdi ja kajpxy ja ayuujk, jøts kø'ømyi ñawyanwa'kxkojmiiydi.

²⁰ May ja jamdi pøn wandip:

—¿Tiku yø xtsaamyøjpikta'akti, pø miku'ts yø tø tyatøkiyi, pø loki jajtpts yø'?

²¹ Jøts wyenkpi wyamidi:

—Ka'ap jeexyip pøn jade'en kyajpxy, ku jeexyip pøn ja miku' tø tyatøkiyi. ¿Ti ma ja miku' tø t'ukyikwin'ejxwa'kxy ja winap jaa'y?

Ku ja israelit jaa'y ojts twindsowdi ja Jesús

²² Yu'aats nep'aats idø'øn wyinaty pyatpy, jamts idø'øn Jerusalén ja xøøw wyinaty tyuñi, ku ja yikja'myech yikxøduñ ja tsaptøjk.

²³ Jøts idø'øn ja nwindson'ajtim Jesús jap wyinaty wyidity tsaptøjkjøtpy, ma ja tøjkaaw jap midi yiktejp Salomón ja Tyøjkwimbo'kx.

²⁴ Jøts ja israelit jaa'y ja ojts ñawya'k'awidityiyi, jøts ja yiknimaay:

—¿Ejtp øøts idø'øn jade'en xyik'etwa'añ maapy tajp? Pøni mets tam idø'øn janch Cristo midi Dios tkajxp, ixyamyits øøts xtyimdyukmado'ot.

²⁵ Jøts ja nwindson'ajtim Jesús ja t'adsøøy:

—Tø mee njadukmadøy, jøts meets ja ka' xmibiky. Tuki'iyi ti jaty ø ndumpy, ti jaty ø xanigutujk'ajtp ja Dios Teety, yø'øts ja wa'ats tyimyjayiknigaxø'kp;

²⁶ meets, ka' meets xjanchjawi, kumi ka' mee mnayja'aji midi ø nja'ajtpy, sam aamyi tø nnøjmidi.

²⁷ Jade'en øts ja nja' xyukmadøy sam ja borreek ja ñi'ejxpi tyukmadøyin, jøts wa'ats øts ja nnijawidi. Xpaduujnidipts øts nja' ja'adi.

²⁸ Øts ja nmøødyip ja kunuu'kxy jujky'ajtin midi xemikøjxp, jøts nijuuni nøjx kyawindigøydi, jøts nipøn øts ja xkapøjkxit ku øts ja ngøjø'ømit'atti.

²⁹ Ja Dios Teety øts ja xagødøjkip, ja' tu'uk møj, ka' pøn jade'en, pønts ja mibaat uk kønaxip jøts ja yikpøjkxit.

³⁰ Øts møøt Dios Teety tu'ugyi øøts.

³¹ Winets ja israelit jaa'y jadigojk tkonjø'øktøø ja tsaa, jøts ja ttaka'atswa'andi.

³² Xjats ja nwindson'ajtim Jesús ja tnimaay:

—Tø mee kawinaak ojk ja mwingujky nduujni ja ødyu'unin Dios Teety myøk'ajtingøjxp. ¿Ja'ats meets yam xagubatwamp ku meets yam xka'atswa'añ?

³³ Winets ja israelit jaa'y y'adsoodøø, jøts ja nwindson'ajtim yiknimaay:

—Kidi ja'ajip mets yam myiktaguga'adsiwyamp, ku mets ja ødyu'unin tø xjadyimjabikta'aky, pø ja'axi yam myiktagubatwamp ku ja Dios kajaa xtyimyigajpxigøy. Pø nugo jaa'lyxi mets, jøts jade'en mnabyikta'agyi sam Dios.

³⁴ Jøts ja nwindson'ajtim Jesús tnimaay:

—Jade'en meets ja ngutujk jap yja'ayi jøts ku Dios yide'en wyaañ: “mDios meets.”

³⁵ Janch yiknija'wip jøts ku Dios kyajpxy jap yide'en wya'añ, ka'ap ja pøn tkagupiky; ja' ja Dios ojts diostijy ja jaa'y pøn ja ojts tyiknaxy ja kyajpxy ja myadya'aky.

³⁶ Jøts kuts øts Dios tø xwiwich abiky, jøts øts ja ya tø xkexy naxwiin, ¿sudsots meets jade'en mwa'añ jøts ku øts ja tø nmigajpxigøy, ku tø nwa'añ jøts ku ø nDios U'ngi?

³⁷ Pøni ka' øts ja' nduñ midi ja Dios Teety tyumpy, kidits mee xjanchjawí.

³⁸ Kuts øts ja nduñ, øy mee xjagajanchjawí janchja'widik øts ja ndunk, jøts jade'en xnijawidit jøts ku øts ja Dios Teety xmøø'tity, jøts øts ja nayide'en nmøø'tejtmi.

³⁹ Winets ja jadigojk tjadyimyjatsumwandøø, kajkts ja nwindson'ajtim Jesús.

⁴⁰ Jøts ja ojts wyimbejtñimi ñøjkxñimi jam xøøbidsimy'ampy, mā ja møj nøø midi yiktejp Jordán, jøts ja jam tyaañ mā ja Juan y'ijty yiknøbety.

⁴¹ Janch namay ja jaa'y ja ojts t'ats'ejxti jam, jøts ja wya'andi:

—Tyimdyiy tyimyjanch tam idø'øn, øy idø'øn ja Juan Bautista ojts tkatuñ ja milagri'ajtin, ka'pxts ja y'ayuujk pyidsimy sa tñimadyaajky ya'atpí jaa'y.

⁴² Jøts ja'abi etjotp janch namay ja jaa'y ojts tmibøkti ja nwindson'ajtim Jesús.

11

Ku ja Lázaro y'ø'jky

¹ Ja dø'øn tu'uk ja jaa'y, yaa'dyøjk, midi pøjkíp. Lázaro ja xyøøw, jam ja Betania kyugajpi, nay jam mā ja María jøts ja y'uch Marta jam kyugajpidi.

² Yø María dø'øn ja' pøn yø Lázaro chø'øjip, ja pamaa'y, ja'ats idø'øn ojts ja aceite pa'akxuu'kpi tpiktaajkxiyi ja nwindson'ajtim Jesús tyeky, jøts ja wyaay ja ojts ttuktati'ich jadigojk.

³ Ja'ats idø'øn møøt ja y'uch tkajpxy ñigajxidøø ja nwindson'ajtim Jesús:

—Windsøn'ajtim, janch pøjkíp ja mmigu'uk.

⁴ Xjats ku ja nwindson'ajtim Jesús ja jade'en tmadøøy, winets ja wyaañ:

—Ka'ap yø pa'am myajada'akt jøts ja tyimyk'ookt; jade'en'ampy idø'øn ja jade'en yjaty jøts ja Dios myøk'ajtin wyingaxø'økt, jøts yø'øbi pa'amgøjxp yiktuk'ejxtit ja jaa'y jøts ku ja Dios U'nk nayide'en tmøø'taty ja møk'ajtin.

⁵ Øy ja nwindson'ajtim Jesús tjanchjaba'ayøy ja jaa'dyi, ja Marta, ja María, jøts ja Lázaro,

⁶ ku ja yiktukmadøøy jøts ku ja Lázaro pøjkníyi, jøts ja jam majtsk xøøw yjaaktyimdy'a'aniyi'ñ mā dø'øn ja jam wyinaty.

⁷ Winetnims ja tñimaay ja pyabøjkpitøjk:

—Wan jam tjaa'myindi jadigojk jam Judeit najjotp.

⁸ Jøts ja pyabøjkpitøjk ja ñimaajjyiyøø:

—Windsøn, pø jamts ja israelit jaa'y jawaani mgaka'ats'o'jkøø; ¿jøts nay jam mnøjkxwa'añ jadigojk?

⁹ Jøts ja nwindson'ajtim Jesús wyaañ:

—Ka' pøn sa xu'unt ku ka' kya'pxñim. Niti tsø'øgi ngamøø'taty sam nwidejtin xinaxy, awa'ats ja nøø' ja tuu' ja' ku tyuk'ejxpaaty ja ya'it naxwii'ñit jaj;

¹⁰ kuts ja koots'ajtin yja'aty, janchjøptsø'øgi jøpjawí nwidejtint, pø ja jajxi xka'ejtxa'am.

¹¹ Jøts ja nwindson'ajtim Jesús wyaañ:

—Maanip ja nmigu'uk Lázaro; n'atsyuxpts øts inet ja'.

¹² Winets ja pyabøjkpitøjk ja ñimaajjyiyøø:

—Windsøn'ajtim, pøni tø tam idø'øn ja mya'oo'kni, pø møk'pøkwanip idø'øn ja'.

13 Jade'en'ampyts ja nwindson'ajtim Jesús ja tijj, jøts ku ja Lázaro wyinaty tø y'oo'kni, jøts ja pyabøjkpitøjk jade'en ja wya'andi, jade'en ja tijj wya'añ jøts ku ja nugo mya'ay.

14 Xjats ja ojts wa'ats tyukmadøyidi ja nwindson'ajtim Jesús:

—Tø ja Lázaro y'oo'kni.

15 Ne'egi xondakp øts jade'en jøts ku ø tø ngajam'aty, tyimy'øy'ajtp ne'egi jade'en jøts mee xjanchjawit. Wants tjaa'myindi jøts n'ats'eixint.

16 Winets ja Tomás, pøn yiktejp xeeñ'u'nk, ja'ats tnimaay ja myibabøjkpitøjk:

—Wan adøm nayide'en tjaa'myindi, jøts yø nmøøt'oo'kint.

Ja Jesús tyuk'awimbejtíp ja jaa'y ja juky'ajtin jøts ja' juky'ajtin'ajtp kø'øm

17 Jøts ku ja nwindson'ajtim Jesús jam yja'jty, jøts ja tpaajty ja Lázaro, jøts ku ja wyinaty myaktaxk xøøwip tø ñajxøjkiñi.

18 Wingon ja Betaniit kajp tyañ ma ja Jerusalén jam, majtsk kilometro jagujkpin ja yjagami.

19 Jøts namay ja israelit jaa'y jam wyinaty tø y'atstøjk'ayø'odyi ma ja Marta jam møøt ja María, jøts ja tkajpxjot'amøjkidi ja'agøjxp ku ja myigu'uk ja wyinaty tø y'ookni.

20 Xjats ku ja Marta tnimadøøy jøts ku ja nwindson'ajtim Jesús jam wyinaty yja'atwa'añ, winets ja chø'lñ jøts ja tjøpkubajtyi'ñ; jøts ja María jap ja tyøjkjøtpy tyañ.

21 Jøts ja Marta tnimaay ja nwindson'ajtim Jesús:

—Windsøn'ajtim, kuk jeexyip tø mya'aty, ka'abik øts jeexyip ja nmigu'uk tø y'øøky.

22 Jade'ents ø nnijawi jøts ku mets ja Dios Teety mmo'ojit pøni ti mets ja m'amidøøpy.

23 Winets ja nwindson'ajtim Jesús ja ojts ñi'mxyi:

—Juky'atp ja mmigu'uk jadigojk.

24 Xjats ja Marta wyaañ, jøts ja tnimaay:

—Janch jade'en, nnija'wip øts jøts ku ja jadigojk t'awimbetit ja juky'ajtin, ku ja pyidøømt jadigojk ma oo'kpi, jaanimts ja'abi xøøwnim ku Dios tyika'pxt.

25 Winets ja nwindson'ajtim Jesús ja tnimaay:

—Øts idø'on ja' pøn ttuk'awimbejtíp ja jaa'y ja juky'ajtin, jøts øts juky'ajtin'ajtp kø'øm. Pøni pøn ø xjanchja'wip, øy ja yja'øøky, juky'ajt kunaxpts ja ejtp.

26 Jøts pøni pøn ja jaakjuky'ajttip jøts pøni xjanchja'widip øts, ka'ats ja y'anmija'win nøjx wyindigøy. ¿Mjanchja'widip?

27 Jøts ja tnimaay:

—Windsøn'ajtim, njanchja'wip øts. Ndyimyjanchja'wip øts ku me mCristo, ja Dios U'nk, midi'iyip idø'on y'ity ya naxwiin menwamp.

Ku ja Jesús ojts twinya'axy ja Lázaro ku tø y'øøky

28 Xjats ku ja Marta jade'en y'ukwaañ, winets ja ojts t'atsyajxi ja chø' María, jøts ja ojts amaa'tsk tnøjmi:

—Ixa ja windsøn ya, jøts ixap mwaadsøyi.

29 Ja'ayi ja jade'en tmadøøy, jøts ja María jatyi pyidi'jky jøts ja ojts t'atsixy ja nwindson'ajtim Jesús.

30 Ka'anim ja nwindson'ajtim Jesús wyinaty kyajptøki; nay ixjamnim ja wyinaty ma ja Marta ja møøt tø ñabyaadyi.

³¹ Jøts ku ja t'ejxtøø ku ja María pyidi'jky ku ja wyinaty putyi tø pyidsimy, jøts ja israelit jaa'dyi midi jam wyinaty tøjktotp tkajpxjot'amøkidip ja ku'oogi, xjats ja tpadso'ondøø, jade'en ja wyinmaydi jam ja tijy yaxpi ñijky ma ja oo'kpi jam wyinaty tø ñaxøki.

³² Winets ja María, ku ja yja'ljty ma ja nwindson'ajtim Jesús jam wyinaty, jøts ja ojts ñagyuxendya'agyi nwindson'ajtim tyekyø'm, jøts ja tnimaay:

—Windsøn'ajtim, kuk jeexyip tø mya'aty ka' øts jeexyip ja nmigu'uk tø y'øøky.

³³ Xjats ku ja nwindson'ajtim Jesús ojts t'ixy jøts ku ya'axy ja María jøts ja israelit jaa'y nayide'endi midi ja María jam wyinaty tø pyadsøøñiyi, winets ja nwindson'ajtim ja jotmay ojts pyaadyiyi jøts ja ojts tymchaachjawi.

³⁴ Winets ja tyiktiy:

—¿Ma tø xyiknaaxøkidi?

Jøts ja yiknimaay:

—Windsøn'ajtim, men x'ats'ixy.

³⁵ Xjats ja nwindson'ajtim Jesús yjanchyajxy.

³⁶ Jøts ja israelit jaa'y winet wyandøø:

—Ejxti yjantyimchøjkpy tam yø tø y'ity.

³⁷ Jøts ja jade'en winaagin wyandøø:

—Pø yø'øxi ja winap jaa'y tø tyikwin'ejxwa'kxy, ¿sudso yø niwine'enin sa tø tkatuñ ja Lázaro jøts ja jeexyip tø kya'øøky?

Ku ja Lázaro yjujkyiky jadigojk

³⁸ Jøts ja nwindson'ajtim Jesús ojts ja jotmay jadigojk tyatøkiyi, jøts ja ñijky ma ja oo'kpi jam wyinaty tø ñaxøki. Tøjkaawin ja tsaa jam, jøts nayi tsaa ja tø yjaaktyimyikta'agi'iyi.

³⁹ Jøts ja nwindson'ajtim Jesús wyaan:

—Jigø'odi yø tsaa.

Winets ja Marta, midi ja oo'kpi y'uchip, ja'ats ja ojts ñii'mxyi:

—Windsøn'ajtim, pø janchxuu'knip inet yø', pø myaktaxk xøøwipts yø y'oo'kni.

⁴⁰ Jøts ja nwindson'ajtim Jesús ñimaajyøø:

—¿Ti kidi ø tø nnigajpxy jøts pøni ku xjanchjawi, winets x'ejxit ja Dios myøk'ajtin?

⁴¹ Winets ja tjigiidiyi ja tsaa. Jøts ja nwindson'ajtim Jesús jam tsajpwemp ojts pyat'ixy, jøts ja wyaan:

—Dios Teety, dioskujuyip ku øts ja n'ayuujk tø xmadojiyi.

⁴² Nnija'wip øts jøts ku mets ejtp ja nja' xmadojiyi, jøts ja' øts jade'en xyikwamp jøts yø jaa'y ja øy'ajtin tpaattit pøn jaty ixaadi, jøts tjanchjawidit jøts ku mets xkexy.

⁴³ Xjats ku ja jade'en wyan'abajtiyi'ñ, jøts ja møk wyaan:

—¡Lázaro, pidsøm jap!

⁴⁴ Jøts ja oo'kpi pyidsimy køpity pakpity, jøts ja wyeen y'aaw twinwets'aty ja wet. Winets ja nwindson'ajtim tnimaay ja jaa'dyi:

—Køkajti pakajti jøts xmajtstu'uttit, wan tñijky.

Ku ja jaa'y tkajpxy'ajttøø jøts yikmatst ja Jesús

⁴⁵ Ja'agøxpts ja israelit jaa'y namay tjanchja'widøø ja nwindson'ajtim Jesús midi ja María jam wyinaty myøøt, jøts ja' ojts t'ejxti ku ja nwindson'ajtim Jesús jade'en ttuun.

⁴⁶ Winaagin tninøjkxtøø jøts ja ojts t'ats'ejxti ja fariseotøjk, jøts ja ojts ttamimadya'akti sa ja nwindson'ajtim Jesús wyinaty tø y'adi'ich.

47 Winets ja fariseotøj k jøts ja teetywindsøndøj k møøt ñamyukidi ja kutujk adsinaabyidi, jøts ja ojts ñõmdi:

—¿Sudso ndaabyajitindit? Janch kawine'en yø jaa'y milagri'ajtin tjantyuni jøts ja ejxa'an tpikta'aky.

48 Ku yø jade'eñi n'ixmajtsindit, janch niduki'iyi jaa'y yø yjanchja'winiiyt, jøts ja romit kudunktøj k myenidit, jøts ja tyukudigøøñidit adøm yø ndsaptøj k jøts adøm yø ngajp.

49 Nay ja'abi jaa'y txøøw'ajtp Caifás, pøn wyinaty teetywindsøn'ajtp ja'abi jumøjt, ja'ats ja ojts ñii'myxidi:

—Mguidyimñija'wip mee ti,

50 ni xkanijawidi kudam adøm njayik'ødyunwa'añindi ku tu'ugyi ja jaa'y tku'oogit ja ñaajx ja kyajp, jøts kidi tuki'iyi kyudigøøgyøxt wine'en ja naajx ja kajp.

51 Kidi kyøømwinmaa'ñipts ja Caifás yiktumpy ku ja jade'en wya'añ: jade'en'ampy idøøn ja', kumi ja' wyinaty teetywindsøn'ajtp ja'abi jumøjt, xjats ja Dios ja ojts yikwa'añi jøts ku ja nwindsøn'ajtim Jesús y'ookt tkudanit ja israelit kajp ja israelit naajx;

52 jøts kidi tyimy ja kajp tyimy ja naajx, ja'ayip nayide'en jøts ja niduki'iyi ja Dios y'u'nk y'unaj'k tylykyø'omyukwangøjxi pøn wyinaty tø yø'øwya'kxnidi.

53 Winet ets ja israelit kudunktøj k tñiwinmaa'yidøø jøts ja nwindsøn'ajtim Jesús tyimy'ookt.

54 Ja'agøjxp ja nwindsøn'ajtim y'ijty ka' nugo ajawi y'ukwidejtni jam may israelit jaa'yjotp, ojts ja jam cho'oni Judeit etjotp, jøts ja ojts ñijkxy ma jam wingon ja abak et midu nugo tsayjoojt. Jam ja ñijkxy ma ja kajp txøøwi Efraín, jamts ja ojts tmøøtsøøni ja pyabøjkpitøj k.

55 Tyimdyøts jøts tpatnit ja paski xøøw midu ja israelit jaa'y tyundip, jøts idøøn ja mayjaa'y yjantymñøjkxti Jerusalén, jøts ja jam ttunwa'andi tpadunwa'andi ja kostrumbri, jøts pyøky ja wya'atstít ku ka'aním ja paski xøøw tpaaty.

56 Jøts ja nwindsøn'ajtim Jesús jam yjanchyik'ixa'ay ku ja jap tsaptøj kjtptyi, jøts ja xem yam ñawya'añidi:

—¿Sa mee m'ukwa'añ? ¿Me'emp ja yjawi xøbatpi uk ka'?

57 Jøts ja fariseotøj k, jøts ja teetywindsøndøj k, tø ja wyinaty tni'ana'amdi jøts ku pøn t'ext tñijawit ja nwindsøn'ajtim Jesús jøts ja jatyi tñigajpxt, winets ja nwindsøn'ajtim Jesús yikmatst jøts ja yiktsu'umt.

12

Ku ja Jesús ojts yiktagujaaxy ja pa'akxuu'kpi

1 Xjats ku wyinaty ja paski xøøw tkapaatynim jadudujk xøøw, winets ja nwindsøn'ajtim Jesús ojts ñijkxy jam Betania ma kyugajpi ja Lázaro, pøn ja wyinaty tø tyikjujkyiky jadigojk.

2 Jamts ja a'ux y'øyiyi'ñ jøts ja nwindsøn'ajtim Jesús ja yiktawindsø'øgi; ja Marta ja jam ojts wyingi'iyi, jøts ja Lázaro ja tmøøtkay møøt pøn jaty jamdi.

3 Winets ja María tyikmiiñ kujkwa'kxy lyitrin ja aceite midu pa'akxuu'kp, jøts janch tsowi ja', ja'ats ja ojts ttaja'jxiyi ja nwindsøn'ajtim Jesús tyeky, jøts ja ñayjawaayy ttuktatiijch. Amuum ja tøjkjoojt pya'akxuu'kpøjkijxy.

4 Jøts ja Judas Iscariote, midu ja Simón myajnkíp, midu ja nwindsøn'ajtim Jesús pyabøjkpi'ajtpy, jøts midu ja wyinaty køyakwajnip, ja'ats jade'en waan:

5 —¿Tiku yø pa'akxuu'kpi ne'egi tø kyayiktøøky? Tigoøk magø'pxy denariin jeexyip tsow'aty, jøts ayoobi jaa'y ja jeexyip yiktabudøki.

6 Kaja'agøjxpiip ja Judas jade'en wya'añ ku ja tpa'ayøy ja ayoobi jaa'y, pø ja meeñxi ja ne'egi pya'ayøøpy. Ja winmaa'ñ ja yikyø'øpy ku ja myeech, jøts kumi jam ja wyinaty tkjøø'm'aty ja meeñ'abøjk'i'ñ mid'i'ibi ja myibabøjkpitøjk myøøt'ajttip, jøts ja amaa'tsk tyukpiky tyukøñ ja meeñ mid'i yik'ejttip.

7 Jøts ja nwindson'ajtim Jesús tnimaay:

—Majstuu't, ja' yø ixa tø tpiкта'aky mid'i tump ku ø nnaøxøkiñit.

8 Ja'atpyim ayoobi jaa'y, øy juuni jaty xmay'attit xpudøkidit; jøts øts, ka' meets ja xumiwin'ejxkunaxt.

Ku ja Lázaro yikajpxy'aty ku tyik'ookwa'andi

9 Jøts ja israelit jaa'y may tñimadowdi ku ja nwindson'ajtim Jesús jam wyinaty Betania, jøts ja ojts tñinøjkxti, kidi ja nwindson'ajtim Jesús nadyu'uk yik'ejxwamp, nayide'en ja t'ejxwā'andi ja Lázaro pøn ja nwindson'ajtim Jesús wyinaty tø tyikjujkyiky.

10 Winets ja teetywindsøndøjk tkajpxy'ajtti jøts ja nayide'en tyimyik'ooktit ja Lázaro,

11 kumi ja' ñamyayi ja pøky tjagyajp ku ja israelit jaa'y ñawya'kxyidi, jøts ja may pyuwajtsniyidi jøts ja tjanchja'wiñidi ja nwindson'ajtim Jesús.

Ku ja Jesús kyajptøjkjy'i'ñ jam Jerusalén

12 Xjats idø'on ja jaa'dyi may ja jam wyinaty tø yja'atti Jerusalén, jøts ja xyøbaatwā'andi ku ja paski xøøw; jøts ku kyimjabom'ajty, jats ja ojts tñijawidi jøts ku ja nwindson'ajtim Jesús jam wyinaty yja'atwā'añ ja'abi kajpkøjx.

13 Winets ja tixy ja ojts tpootti, jøts ja ojts tpatatsowdi ja nwindson'ajtim Jesús, yide'en ja wyandøø:

—iMøj Dios kyunuu'kxin! iøy wā'ats yø' mid'i ixyam Dios Teety kyejxpy, mid'i israelit jaa'y wyindsønip!

14 Jøts ja nwindson'ajtim Jesús tpaajty tu'uk ja buur jøts ja ojts ttawa'atspety, tymbyatpy idø'on jade'en sam jap jaabyety nøkyijxpy:

15 Meets Siøn kajpjotpit, kidi mjotmay'ookti; ejx, pø ixats myiñ ja mwindsøn, yixxon buuru'nk ttaku'xni.

16 Ka'ap ja pyabøjkpitøjk ja jaty tja'gyukidøø yø'øbi winmaa'ñ, østi jaanim ku ja nwindson'ajtim Jesús wyinaty tø chajpajtni. Jaanimts yø tja'myajtstøø jøts kudam yø tñigajpxy ja nwindson'ajtim ku ja jap jade'en yja'ayi, jøts tyimyjade'ents ja wyinaty tø jyaty kyubety.

17 Jøts ja jaa'dyi mid'i ja nwindson'ajtim Jesús jam wyinaty møøt, ku ja tyaxpidsiimy ja Lázaro jap oo'kpi jutjøtpy, ku ja wyinaty tø tyikjujkyiky jadigojk, ja'ats idø'on jam tñimadyaktip sa jaty ti jaty ja wyinaty tø t'ejxti.

18 Patyts idø'on ja jaa'y ojts tpatatsowdi ja nwindson'ajtim Jesús, kumi tø ja wyinaty tñijawidi ja miłagri'ajtim mid'i ja nwindson'ajtim wyinaty tø ttuñ.

19 Xjats ja fariseotøjk agø'ømyi ñawajnidøø:

—Tøxi ixa xja'ejxti sa yø yjawi ñityu'unint. Ejxti, ejx niduki'iyi jaa'y pyanijkxyiyi.

Ku ja griegit jaa'y t'ejxwā'andi ja Jesús

20 Jøts ja jaa'dyi mid'i jam wyinaty tø ñøjkxti xøbatpi Jerusalén, jam ja winaagindi pøn griegit jaa'dyi.

21 Ja'ats jam tñimendi ja Felipe pøn kugajpipp Betsaida jam Galileit etjotp, jøts ja ojts tñøjmid'i møkta'aky:

—Ja Jesús øø teety n'ejxwampy.

²² Xjats ja Felipe ojts tninijxxy ja Andrés jøts ja ttukmadøøy; winets ja namajtsk tninøjkxti ja nwindson'ajtim Jesús, jøts ja ojts ttukmadowdi.

²³ Jøts ja nwindson'ajtim Jesús ja ojts ñiï'mxyidi:

—Tø tpaaty ku nxøga'pxy ma øts yikxon nyikwinjawit nyikwindsø'øgit, pø Dios Teety ø xkajx jøts ja naxwii'ñit jaa'dyi ngudanaapy.

²⁴ Tiy janch ø nwa'añ ku mee nnøjmi, jøts ku tu'uk ja ariinbajk kyaka'ay naxjøtpy jadi'iñi ja ñaxy; pøni midi'its ka'ap naxjøtpy, ne'egi may ja wyimbijty ku ja wyindigø.

²⁵ Nayide'en idø'on meetsmi. Pøn kasajatyim nay'ejxip, pøn nabya'ayojip, ka'ap ja mibaat ja nitso'ok'ajtin tpaaty; pønts kanabya'ayojip, wan tjaty sa yjaty øts køjxp, ja'ats idø'on tpaatp ja nitso'ok'ajtin.

²⁶ Pøni pøn øts xpabøjkpi'atwamp, wan ya tmiñ jøts ø xmøøtwidettit xmøøtsøønidit. Yikajxa'akpts idø'on ja' jam Dios wyingujkp.

Ku ja Jesús tnigajpxy ja y'o'jkin

²⁷ Janch tø øts ixyam ndyimyjotmaadyøki; ¿jøts ti sa ø nwa'ant? ¿Ja ti ja ø nwa'ant: “Dios Teety, ka' øts jade'en xyikjatt xyikubatt sa øts ixyam njatwa'añ ngubatwa'añ”? Pø ka'axi øts ja' tø nnimiñ jøts øts jade'en ngajatt.

²⁸ Metsts Dios Teety tu'ugyi ja mja' majada'akp.

Winets yikmadøøy ja ayuujk jøts ku jap yjawi tsajpjøtpy wya'añ:

—Tø øts ja jade'en nduñ, jøts ndunwampy øts ja jade'en jadigojk.

²⁹ Jøts ja jaa'y midi jam wyinaty amidoodujktip, yide'en ja wya'andi jøts ku ja y'anaawi midi jade'en wyinaty tø wyina'añ, jøts pømbi wamidip:

—Ja ankilis yø tø myigajpxy.

³⁰ Winets ja ñimaajyidi ja nwindson'ajtim Jesús:

—Ka' øts køjxpi yø ayuujk jade'en tø yikmadøøy, meets køjxp yø jade'en wya'añ.

³¹ Ixyats idø'on tø tyimya'aty ja xøøw ja jumøjt ku ya'atpi naxwii'ñit jaa'y yikti#dyu'undit, jøts ku nayide'en yikpawopt ja miku' midi ya naxwiiñ tnigubajk'ajtp ja kya'øbyi.

³² Jøts ku øts jam nøjx nyikpikta'aky jam kruskøjxp, ñijawidip ja øy pøn jøts øts xjanchjawidit.

³³ Ja'ats idø'on ja jade'en yjatijpy sudso ja wyinaty y'ookwa'añ.

³⁴ Xjats ja mayjaa'y ja yide'en y'adsooøø:

—Tø øø nnimadøøy ku pøngapøn tkajpxy øøts ja ngutujk, jøts ku ja Cristo yjujky'att xemikøjxp. ¿Sudsøts me mwa'añ jøts ku mets myikpikta'akt jam kruskøjxp? ¿Pøn idø'on ja' midi tsoo'mp tsajpjøtpy, midi ja naxwii'ñit jaa'y tkudanaapy?

³⁵ Winets ja nwindson'ajtim Jesús ja tnimaay:

—Mjaakujajidip mjaakudøø'kxiidip meets ja jaj, tyimdyøts jøts ja kya'uk'ejtñit. Jaakyiktundits ejx yjaakja'atynim, jøts kidi kube'ets kugoots mjatti; ja jaa'y pøn jade'en jajttip, ka'ap ja tnijawidi pø sa ja yjattit kyubattit.

³⁶ Janchja'widik øts nja', pø øtsxi dø'on ñamyayi jade'en sam ja jaj, jøts jaaktyimñayamnims øts x'ejxti xnijawidi jøts mee njaakja'bøkt.

Ja'ayi ku ja nwindson'ajtim Jesús ojts jade'en y'ukwani, jøts ja cho'onaa jøts ja jadi'iñi yø'ødyigøøñi.

Yq'at tnigajpxp tigøjxp ja israelit jaa'y ojts tkajanchjawidi ja Jesús

³⁷ Øy idø'on ja nwindson'ajtim Jesús wyinaty kawine'en tø tjatuñ ja milagri'ajtin jam mayjaa'y wyingujkp, jøts ni jade'en ja kyayikjanchjawi.

38 Ja ti jats ja jade'en kyajatt sa wyinaty tɔ wya'añ ja Dios kyugajpxy Isaías, ku ja yide'en tjaadyaañ:

Dios Teety, çpøn adøm ja ngajpxy ja n'ayuujk tɔ x'ukupøkya'am?

Øy ja Dios Teety ja myøk'ajtin tɔ tnanky'ijxyi, ka'ap ja pøn tmøjpikta'aky.

39 Jøts idø'øn ja jade'en ka'ap tjanchjawiidi, nayide'ents ja Isaías wyinaty tjaadyaami:

40 Dios ja jade'en tuujnidip, jøts ja jade'en wimbeets kugoots yik'tiyidi, jøts ja ka' tkupøkti,

jøts ja wyeen ja tkada'ejxtit øy ja wa'ats tyimyja'ejxti,

jøts ja nika' ja ja'gyukin tjagyaptit,

jøts ja nika' ñabyøkjawiyidit øy øts ja wine'en njayikpøkwa'atswa'andi.

41 Jade'en'ampy ja Isaías jade'en wyaañ, kumi tɔ ja wyinaty jekyip Dios Teety tyuk'ijxyi jøts ku jade'en ja Jesús ja y'øy'ajtin xuk'ejxint, jøts ja ojts jade'en patki'jyi tnigajpxy.

42 Jøts øy idø'øn ja yjadade'eni, may ja israelit jaa'y tjanchja'widøø ja nwindson'ajtim Jesús, østi windsøndøjk paat winaagin tjanchja'widøø; ja'ayi ku ja pøn ka' ttukmadowdi, ja'agøjxp ku ja ttsø'øgidi ja fariseotøjk jøts ja ka'ap tyukmajtstu'udit ja tyunk.

43 Ja jaa'y yja' ja ne'egi yikmøjtøjkidip, jøts ka'ap Dios yja'.

Ja Jesús y'ayuujk payø'øyiyip ja jaa'y pyøky

44 Jøts ja nwindson'ajtim Jesús møk wyaañ:

—Ja' pøn ø xjanchja'wip, kidi øtsip ja tu'ugyi xjanchja'wip, nayide'en ja ñamyayi tjanchjawi ja Dios Teety midit ø xkajxp.

45 Jøts pøn øts ixa x'ejxp xnija'wip, nayide'ents ja t'ixy tnijawi pøn ø xkajxp.

46 Jøts ku øts ñamyayi jade'en sam ja jaj, ja' ø tɔ nnimiñ ya naxwiiñ pøni pøn ø xjanchja'widip, jøts kidi øts ja wimbeets kugoots nyiktandi.

47 Pøni pøn ø xmadøjip ja n'ayuujk jøts ka' tmøjpikta'aky, kidi øtsip ja ndabayø'øpy ja pyøky; kaja'ajip ø tɔ nnimiñ jøts øts ja naxwiiñit jaa'y ndabayø'øyt ja pyøky, pø ja'axi ø nnimimpy jøts øts ja nyiknitso'ok'attit.

48 Pøni pønts øts nja' xkatsojkip jøts ka' tmøjpikta'aky sa ø nwa'añ, jats ja' pøn ja ttabayø'øyip ja pyøky, nayø'øyi ja nøjxx kø'øjm ni'øøniyip sa jaty ø tɔ nwa'añ, ku kyøxt ja naxwiiñit.

49 Kidi ja'ajip ø ngajpxy sa ø kø'øm nwinmay; ja' midit ø xkajxp, ja Dios Teety, ja' øts yø xanigutujk'ajtp jøts øts jade'en ngajpxt, jøts øts jade'en nyik'ixpøkt.

50 Jøts wa'ats ø nnijawi, jøts ku ja' wya'añ ja Dios Teety y'ana'amin sudso yikpaatt ja jujky'ajtin xemikøjxp. Jade'ents idø'øn, pøni sa jaty ø tɔ nwa'añ, jade'en øts idø'øn ja tɔ ngajpxnaxy sam øts ja Dios Teety ja tɔ xanigutujk'aty.

13

Ku ja Jesús pakpujy ja pyabøjkpitøjk

1 Tyimdyø jøts ja paski xøøw tpatnit, jøts ja nwindson'ajtim Jesús wa'ats ja tnija'wiñi jøts ku tɔ kya'pxy ja hori jøts ku ja tmajtstu'utt ja naxwiiñ'ajtin, jøts ja Dios Teety ja tninøjkxnit. Ejtp ja tpa'ayøøy ja pyabøjkpitøjk, xjats ja jade'en tpikta'aky møk ja ejxa'an, jøts ja tnanky'ijxyi mabaat ja pa'ayo'owin ja tjagyepy.

2-4 Jøts ja Simón myajnk, ja Judas Iscariote, tɔ ja miku' ja wyinaty tyatøkiyi, jøts ja tyukwinmaa'ñ'atyi sudso ja tka'ødyu'unt ja nwindson'ajtim Jesús. Wa'ats ja tnijawi ja nwindson'ajtim Jesús jøts ku ja nay jam ñijkxy ma ja Dios Teety ja tɔ yiktsøøñi, jøts ku ja amuum tɔ kyutujkmø'øyi. Xjats ku dø'øn ja

jam wyinaty y'a'ux'atti, winets ja tyanaagyukiyi'ñ jam kyaadyaajk jøp'am, jøts ja twejstaajky ja wyet, jøts poop wet ja ojts ñadyatenwøø'niyi.

⁵ Xjats ja nøø t'ada'amiyi'ñ jam købuj'ii'ñjotp, jøts ja pyabøjkpitøjk ja tta-pakpujpinaxwajky, jøts ja nay jatyi ttuktati'ich ja poop wet midi ja jam wyinaty tyenwøø'najtpy.

⁶ Jøts ku ja wyinaty tpakpujwa'añ ja Simón Pedro, winets ja ojts ñii'mxyi:
—Windsøn'ajtim, ζmets ne'egi ndeky xpujip?

⁷ Jøts ja nwindsøn'ajtim Jesús ja t'adsøøy:

—Ka' mets yø icyam xja'gyuki, mja'gyukipnimts mets yø nøjkk.

⁸ Jøts yide'en ja ñii'mxyi ja Pedro:

—Ka' me mibaat ndeky xpujit.

Winets ja nwindøn'ajtim Jesús ja tnimaay:

—Pøni ka' øts yø mdeky nbujy, ka'ats me n'ukmigu'ukwanit.

⁹ Winets ja Simón Pedro wyaañ, jøts ja nwindsøn'ajtim Jesús yiknøjmi:

—Winets ø windsøn'ajtim amuum xpujiyit ja ngø' ngubajki; jøts ka' nugo ja ndeky.

¹⁰ Jøts ja nwindsøn'ajtim Jesús ja tnimaay:

—Øy ku ja'ayi tyeky tpujt pøn tse'abajtipnim, kumi wa'ats ja amuum.

Nayide'ents meets m'anmija'win wya'adsid øy kidyimñiduki'iyi.

¹¹ Jade'en'ampy ja wyaañ ku ja ñiimy: “Øy ka' niduki'iyi mdyimwya'adsidi”, ja'agøjxp ku ja wa'ats tñjawi pøn ja wyinaty køyakwajnip.

¹² Xjats ku ja jade'en y'abajtiyi'ñ tpujkøjxiyi ja pyabøjkpitøjk tyeky, winets ja ñadyanijajni ja wyet jadigojk, jøts nay jam y'ixaajky ma ja mesi jøts ja tnimaay ja pyabøjkpitøjk:

—ζMnija'widip tigøjxp jade'en tø ndundi?

¹³ Meets, xmaestri'ajtp meets, xwindsøn'ajtin'ajtp meets, janch tiigyajpxy kumi janch jade'en.

¹⁴ Pøni øts tamts maestri, jøts pøni øts tamts windsøn'ajtim, tøts ja mdeky nbujidi, nayide'ents meets idø'on xuumit xem yam.

¹⁵ Tø nduk'ejxti jawyeen, jøts nayide'en xu'undit sam ø tø ndunjøpi.

¹⁶ Jøts janch øts idø'on nwa'añ, jøts ku ka' pøn tumbi tjinaxy ja wyindsøn; uk ja ja'a'y pøn kexy yøøpy, ka'ap ja tjinaxy pøn ja kajxip.

¹⁷ Jøts pøni mja'gyukidip yøøbi winmaa'ñ jøts jade'en xu'undit, jotkujkts x'ejxtit.

¹⁸ Jøts kidi niduki'iyip meets jade'en ndijy; nnija'wip øts ja' pøn jaty ø tø nwi'ixy. Kuwanits jade'en yjatt sam jap jaabyety nøkyijxy: “Jats ja tu'uk tø x'ukmidsepøjkni pøn ø møøt gay n'uuky.”

¹⁹ Patki'iyi øts ya'at yam nnigajpxy jøts ku jade'en nøjkk yjaty, jøts xiyjawidit xjanchjawidit jøts pøni pøn øts.

²⁰ Janch øts idø'on nwa'añ, jøts ku øts ja xkupiky pøni pøn ø xkupøjkp ja ngudanaabyi; jøts pøni pønts øts jade'en xkupøjkp, ñayi kyupijkypts ja nayide'en pøn ø xkajxp.

Ku ja Jesús tñigajpxy sa ja Judas kyøyakiyit

²¹ Xjats ku ja wyinaty jade'en tø wya'añ, jøts ja tyimchaachjot-maadyøjkii'ñ, jøts ja ojts yikxon wa'ats tñigajpxy:

—Tiy janch mee nnøjmi, jøts ku meets ja nidu'ugin pøn ø xka'ødyunwamp.

²² Winets ja pabøjkpitøjk xem yam ñawyin'ejxjø'jkidøø, jadi'iñi tkamidaabyaatti pøni pøn idø'on yiktejp.

²³ Winets ja tu'uk, midi ja nwindsøn'ajtim Jesús janchminamyajjyip, jam ja wyinaty pyukø'øm tmøøt'a'ux'aty.

²⁴ Ja'ats ja Simón Pedro amaa'tsk ñimaay jøts tyiktø'øt pøn idø'on yiktejp.

²⁵ Winets ja wingon tpuwa'adsiyii'ñ ja nwindsøn'ajtm Jesús, jøts ja tnimaay:

—Windsøn'ajtm, ¿pøn idø'on mdijpy?

²⁶ Jøts ja nwindsøn'ajtm Jesús ja ojts yide'en y'adsøyi:

—Wan øts tsapkaaky tukpidasi t'uknimuji, jøts pøni pøn øts inet ja nmøøpy, ja'ats idø'on ja wyinaty.

Xjats ja ojts jade'en tñimuji ja tsapkaaky, jøts ja ojts tmø'øy ja Judas Iscariote midi ja Simón myajnkjip.

²⁷ Jøts ku ja Judas ja'ayi t'axajiyii'ñ ja tsapkaaky, jøts ja miku' ja ojts tyatøkiyi. Winets ja nwindsøn'ajtm Jesús ja tnimaay:

—Jaty' dø'on xungojt midi mdunwampy.

²⁸ Jøts nipøn ja tkamadooguki tigø'jpx idø'on ja nwindsøn'ajtm Jesús jade'en tnimaay ja Judas.

²⁹ Ja Judasts idø'on wyinaty tkø'j'ømit'ajtp ja meeñ abøjk'ii'ñ, jøts winaagin jade'en wyinmaydi pø ja'ajik idø'on tijj ja nwindsøn'ajtm Jesús tyijpy, jøts ja Judas t'atsju'uty ti jaty tsojkjip ti jaty tunwamp ku ja xøøw, uk tmo'ot tigati ja ayooi jaa'y.

³⁰ Xjats ku ja Judas wyinaty tø tkaagyixy ja chapkaaky, jøts ja ojts chøøñ. Koodsni wyinaty.

Ja jemy ana'amin

³¹ Xjats ku ja Judas wyinaty jade'en tø chøøñ, winets ja nwindsøn'ajtm Jesús wyaañ:

—Yamnimts inet tiy yik'ext yikni'jawit ja nmøk'ajtm, jøts nay ja Dios Teetyts myøk'ajtm nanky'eixip.

³² Jøts kumi nanky'eixip øts ja Dios Teety myøk'ajtm, nayide'ents ja tnanky'eixmiiyt øts ja nmøk'ajtm, jøts tsojk ja jade'en ttu'unt.

³³ Ka' meets u'nk jeky n'ukmøøtsinaañit. Nayide'en meets yam ndukmadoowa'añ sam adøm ja nmgju'uk israelit jaa'y nnimaadyøø, jøts ku ja jap ka'ap ñøjkxtit ma ø nniikxy øy øts wine'en xja'ixa'ay.

³⁴ Ixyamts nmo'odi ja jemy ana'amin: jøts ku xem yam mnamyi'øy'atidit mnamyiyuy'atidit. Nayide'en sam mee njanchøkyin, nayide'ents idø'on mnachokidit xem yam.

³⁵ Pøni mdundip jade'en, tyumnijawidipts jade'en øy pøn jøts ku mee ø xpabøjkpi'aty.

Ku ja Jesús ojts tni'gajpxy jøts ku Pedro kyanigajpxiyit

³⁶ Xjats ja Simón Pedro tyiktiy ja nwindsøn'ajtm Jesús:

—Windsøn'ajtm, ¿ma dø'on mnøjkxwa'añ?

Jøts nwindsøn'ajtm Jesús ja y'adsøøjøø:

—Jap ma ø nniikxy, ka'ap ø mibaat ixyam jap xpanøjkxt; xpanøjkxp øts, ja' ku jaanim.

³⁷ Winets ja Pedro wyaañ, jøts ja nwindsøn'ajtm Jesús yiknøjmi:

—¿Tigø'jpximts windsøn'ajtm ku øts ka' ixyam ndsoont? Ixyats øts, øy me ngu'oogit.

³⁸ Jøts ja nwindsøn'ajtm Jesús t'adsøøy:

—¿Janch idø'on mwa'añ jøts ku ø xku'oogi'wya'añ? Øts wamp, ka'aním wyinaty tsapni'aaw y'aya'axy ku mets wyinaty tigøøk ojk tø xkagupiky ku me x'ijxy'aty.

14

Jesús kòjxp ja Dios Teety yikpaatt yik'ext

¹ 'Kidi mmaydi mdajti, ajot'atti Dios Teety, jòts ajot'ajttik òts nayide'en.

² Mā chòoni ja Dios Teety may tsinaadyaajk ja jap tmòodi; ku jeexyip ka' yjade'eni, tò meets ja jeexyip ndukmadooni. Jòts wants ø tniykxy jòts òts ja n'a'ejxit mā mdsòonidit.

³ Jòts kuts òts wyinaty tò nniykxy, jòts kuts òts ja wyinaty tò n'a'ejxi ja tsinaadyaajk, winets ø nme'ent jadigojk jòts mee nmòodiñit, jòts nay jap mjujky'attit mā òts idø'on jap ndsinaawya'añ.

⁴ Mnija'widipxi pòni mā ø nniykxy, jòts mnija'widipts ja tuu'.

⁵ Winets ja Tomas tnimaay ja nwindson'ajtim:

—Ka'ap øø windsøn'ajtim ja nnijawwi pòni mā me mnòjkxwā'añ; ¿sudso'ampy øøts ja tuu' nnijawit?

⁶ Jòts ja nwindson'ajtim Jesús ja t'adsøoy:

—Tum òts amuum ja tuu', ja tyiibi yjanchpi òts nayide'en, jòts ja kunuu'kxy jujky'ajtin nyajkpy. Øts kòjxp ja Dios Teety yikpaatt yik'ext.

⁷ Kuk òts jeexyip xnijawidi pòni pòn òts, nayi mnija'wipts meets jeexyip nayide'en ja Dios Teety; jòts tòts idø'on ja ixa xjanija'wiñidi, mja'ejxtipts idø'on ja'.

⁸ Winets ja nwindson'ajtim ñimaajyøø ja Felipe:

—Windsøn'ajtim, ja'ayi ku øø xtyimdyuk'ext ja Dios Teety, wan øø t'ijxy.

⁹ Jòts ja nwindson'ajtim Jesús ja yide'en t'adsøoy:

—Windi'ixyip mee Felipe nminabyaajtniyidi, ¿jòts ni jade'embaat me xka'ijxy'ajtni? Pòni pòn ø x'ejxp, ñayi y'ijxpy ja nayide'en ja Dios Teety; jòts, ¿sudso'ampyts me x'amidøoy jòts mee nduk'ext ja Dios Teety?

¹⁰ ¿Ka' xmibiky ku òts Dios Teety mòøt n'ity, jòts ku òts ja nayide'en xmòøt'ejtmi? Tuki'iyi sa jaty nnøjmidi, kidi ngø'ømwinmaa'ñjòtpyip òts yø njuuty. Ja Dios Teety midit ø xmòøt'ejtp, ja' kø'øm tyunk tump.

¹¹ Jòts janchja'wik øts jòts ku òts Dios Teety mòøt n'ity, jòts ku òts ja nayide'en xmòøt'ejtmi; uk pòni ka'ats, øyts øts ja'ayi xajanchjawit, pø m'ijxpyxi ti jaty ø ndumpy.

¹² Jòts tiy janch mee nnøjmi, pòni pòn ø xjanchja'wip, ñayi yjatp ñayi tyu'ump ja nayide'en ti jaty ø njajtpy, ti jaty ø ndumpy, jòts ja tyikne'egidit tyikaja'adit ja'agøjxpts kuts ja Dios Teety nmòøt n'ett.

¹³ Jòts tuki'iyi pòni ti jaty mee m'amidøopy ku ø xkajpxpaattit, øtsts ja kø'øm jade'en ndu'ump, jòts øts jade'en nyikwìngaxø'jkit ja Dios Teety myøk'ajtin y'øy'ajtin.

¹⁴ Ndu'ump òts jade'en pòni ti jaty mee m'amidøopy jòts ku òts xakajpxtit.

Ku ja Jesús wya'añ jòts ku ja Espíritu Santo tkaxt

¹⁵ Pòni xtsojqp tam meets, paduujnidik meets ja n'ana'amin.

¹⁶⁻¹⁷ Jòts nnøjmip òts ja Dios Teety jòts ja mdanigaxidit tu'uk pòn mbudøkìyidip, pòn myikjot'amòkpøkìyidip, pòn ja tyiibi yjanchpi myøøt'ajtpy. Jòts ja'ats meets mòøt m'ett kunaxt. May jaa'y ja kyagupøkit ja'agøjxp ku ka' t'ejxti tnijawidi. Jòts meets, tò meets ja xnijawwi, pø ixaxi ja xmòødidi, jòts ja'ats mee mòøt m'ett.

¹⁸ Ka' mee nadyu'uk nyiktañ, nniwimbett meets jadigojk.

¹⁹ Wìngonip ja xøøw ku ø ka' mā n'ukyik'ejxnit; jòts meets, x'ejxp meets; kumi jujky òts, mjujky'atpts meets.

²⁰ Jaanìmts xja'gyukidit jòts ku òts ja Dios Teety mòøt n'ity, jòts meets xmòøt'ejtmi, jòts mee nayide'en nmòøt'ejtmi.

21 Pøn tø tñijawì jøts pøni xpaduujniyìp øts ja n'ana'amin, jade'en ja tyiknigüe'exy jøts ku øts ja xjanchøky. Jøts ja'ats ja Dios Teety chokp pøni pøn ø xtsojqp, jøts ndsokp øts ja nayide'en, jøts ja'ats ø x'ejxp, ja'ats ø xnijawìp ku nnanky'ejxit øts nja'.

22 Winets ja yjadu'ukpi Judas ja ñimaajyøø (nigidi Iscariotibi wamp midi ja Jesús køyap):

—Windsøn'ajtim, ¿tigøjxp ku øøts ja ja'ayi n'ext ku mnanky'ejxit, jøts nika'ap niduki'iyi ja naxwii'ñit jaa'y?

23 Jøts nwindsøn'ajtim Jesús y'adsøøy:

—Pøn ø xtsojqp, pyadumpy ja' sã ø nwa'añ, jøts ja'ats idø'øn tsokip ja Dios Teety; jøts ja'ats ø nnime'emp møøt ja Dios Teety, jøts øøts ja xemikøjxp nmøø'tett.

24 Jøts pøn ø xkatsojqp, ka'ap ja tmøjpikta'aky sã ø nwa'añ. Yø kajpxy yø ayuujk ixa xmadowdi, ka'øtsip yø' nja'; ja' yø' yja' midi ø xkajxp, ja Dios Teety.

25 'Ndukmodoogøjxtip yam tuki'iyi, njaaktyimyoøtsinaadyipnim yam;

26 ja Espíritu Santots midi ja Dios Teety mdanigaxiyidip jøts øts ja xku-danit, ja' idø'øn mbudøkiyidip, ja' idø'øn mgajpxjot'amøjkiyidip jøts ja mdukjajtkøxidit tuki'iyi, jøts nay ja' mdukja'myaajtskøxiyidip tuki'iyi sã jaty mee tø nnøjmi.

27 'Jotkujk nnawya'kxa'andit. Nyajkpy øts ja øy'ajtin tsuj'ajtin. Ka'ap øts jade'en nyaky sam øy pønin nugo wya'añ. Kidits mmaydi mdajti, ka' mee mdsø'øgit.

28 Tøxi xmadowdi ku ø nnimy jøts ku ø nnijkxy, jøts ku ø nme'ent jadigojk jøts mee nmøøtsøønit. Kuk meets jeexyìp xjanchøky, mjanchxondakp meets jeexyìp ku tø xnijawìdi jøts ku nninijkxy ja Dios Teety; kumi ja' idø'øn jawaani møj jøts nigidi øts.

29 Patki'jyi ya'at jade'en ndukmadowdi jøts ku wyinaty jade'en yjaty jøts xjanchjawìdit.

30 'Ka' mee møøt jeky n'ukmøøtnagyajpxniyit; ja'agøjxp ku ja wyingøñ ja Satanás pøn yikutujqp ya naxwii'ñ. Øy øts nmøk'ajtin ja xjagamimajadaajkiyi,

31 jatpts jade'en jøts jade'en tñijawìt ja naxwii'ñit jaa'y jøts ku ø ndsøky ja Dios Teety, jøts ku øts ja nbaduñ sã øts ja tø x'ane'emy. Tanidits jøts wan ya ttsø'ñindi.

15

Ja uvi tsã'am kipy

1 'Jade'en øts idø'øn ñamyayi sam uvi tsã'am ñiguipy, jøts ja Dios Teety jade'en sam ja jaa'y midi ja uvi kipy t'ejx'ejtp.

2 Jøts ja tyikwinajki ja y'awaj ja y'axeeñ midi katøømip; jøts midi tøømyip, yikxon ja tyikwa'ach twibøøty twibiky ma ja jam t'ijxy sã yjatwa'añ, jøts ja jawaani may yjaaktyimdyøømit.

3 Nayide'ents meets idø'ønmi; tø mee mwatsni, ja ixpøjkin mee tø myikwa'achi midi mee tø nmø'øy.

4 Kidi mee xmajtstutni, kumi ka'ap mee nmajtstu'uty. Ka'axi kipy awaj tyøømi jadi'iñi ku ja kya'ity ja ñiguipy; nayide'ents meets idø'ønmi, ¿ti mee nadyu'uk mnityu'ump ku mee wyinaty ja nja' tø x'ixmajtsniyi?

5 'Øts idø'øn jade'en sam ja ujts ñiguipyin, jøts meets jade'en sam ja' y'awaj y'axeeñin. Pøni pønts ø xkamajtstutp, jøts ku øts ja nayide'en ka' nmajtstu'uty, ja'ats idø'øn ja yja' møj wingaxø'økp; jøts ka' mee ti nadyu'uk mayi ku ø nga'ett.

⁶ Pøni pønts ja nja' xkaminamyaa'jyiyip, ja'ats jade'en yik'ixjibep sam ja kipy awaj midi ka'ø'y, jøts kuts ja tyø'øtst jøts ja jønjøtpy yikpikta'akt, japts ja tyø'øty.

⁷ 'Pøni ka' mee xmajtstu'uty, pøni ka' meets ja n'ixpøjkin xja'dyigøjyidi, amidowdits pøni ti ndsojktip jøts meets ja myikmo'ot.

⁸ Ku yikxon xpadundi ja Dios Teety yja' sa ttsøkyin, jade'en'ampyts ja y'øy'ajtin myøk'ajtin yikpa'ixy, jøts nayide'en idø'øn yiknijawit ku meets idø'øn xjanchpabøjkpi'aty.

⁹ Jade'en mee ndsøky sam øts Dios Teety xtsøkyin; tun'ejtik meets yø nja' ku meets ja tsojkin ndami'ity.

¹⁰ Pøni xpaduujnidip øts ja n'ana'amin, jade'en'ampyts mee møøt m'ettit jøts ja ndsojkin, nayide'en ñamyayi sa øts ja nDeety y'ana'amin nbaduujniyi, jade'ents øts idø'øn ja chojkin nmøøt n'ity.

¹¹ 'Jade'en'ampy meets jade'en nnøjmi, jøts mjojkujk'attit nayide'en sam øts, jøts ejtni xoni x'ejxtit.

¹² Yā'at øts idø'øn n'ana'amin'ajtpy: øy yikxon xem yam mnamyayidit mnachokidit, nayide'en sam øts ja tsojkin nbikta'aky sa mee ndsøky.

¹³ Jade'en idø'øn ja tsojkin møj yikjagypy pøn amuum nayojxip, jøts ja myigu'uktøjk tkudani jøts juky'ajtin ja tpaattit.

¹⁴ Meets idø'øn nmigu'uk'ajtpy pøni mdundip jade'en sa ixa n'ana'amdi.

¹⁵ Ka' mee ndijj jøts ku mee mdumbi, kumi ka'ap ja tumbi tnijawi pøni ti jaty tyumpy ja wyindsøn. Nmigu'uktijpyts meets yam, ja'agøjxp ku tuki'iyi tø nduknija'wigyøxti sa jaty øts ja Dios Teety tø xnøjmi.

¹⁶ Kameedsipxi tø xpikta'aky; pø øtsxi mee kø'øm tø nwi'ixy, jøts mee tø ndanipiky jøts nøjka ja mdunk yikxon xyikwিংaxø'økti, jøts wan tmøji wan tkaja'aji. Jade'ents ja Dios Teety mmo'ojidit pøni ti jaty m'amidoodip ku ø xkajxpaaattit amumjoojt.

¹⁷ Yø' idø'øn nda'ana'amdip, jøts xem yam mnabya'ayowidit jøts ja tsojkin xjagyaptit.

Ku ja ka'øyjaa'dyi tkatsokti ja Jesús møøt ja pyabøjkpitøjk

¹⁸ 'Pøni mmi'ajkiyidip ja' pøn ya naxwiiñ, mnija'widipxi jøts ku øts ja jawyeen nayide'en tø xufi.

¹⁹ Ku meets jeexyip nayide'en m'adi'ich sam pøn ya naxwiiñ wyinmaydi, nayide'ents meets ja jeexyip mdsøkyiyi sam ja ttsøkyin pøn nayide'endi sam ja'ajindi. Øts meets ya tø nwi'ixy ya naxwiiñ ma nayide'en chøøni pøn jade'en winmaadyip, jøts ja'agøjxp myikmi'ekyidi kumi ka'ap ja'abi winmaa'ñ x'ukyikyø'øñidi sam o pøn naxwiiñ.

²⁰ Ja'myatstits sa tø nnøjmidi, jøts ku ka'ap ja tumbi ñamyøjiyt sam ja wyindsønin. Tøbaats ø nyikpawidity ku ngayikupiky, nayide'ents meets idø'øn myiktumit; jøts pøni xpaduujnidipts øts ja n'ixpøjkin, nayide'ents meets ja m'ixpøjkin yikpadumit.

²¹ Øts køjxp idø'øn jade'en myiktu'undit ja'agøjxp ku ka' tnijawidi pøn ø xkajxp.

²² 'Ka'ap ja jeexyip ti pøkyi, kuk øts jeexyip ngamiñ, kuk øts ja jeexyip ngaduknijawidi. Ixyam ti ñikyajpxtip jøts ja pyøky kyayiktagubatit;

²³ ja' pøn ø xmi'ajkip, ñayi myi'ajkip ja nayide'en øts ja nDeety.

²⁴ Ka'ap yø jeexyip ti pøkyi kuk øts yø jeexyip ka' ti nduk'ejxti midi ø tø nduñ yø' wyingujktyi, sam ka'ap pøn jade'en tø tyuk'ijxyidi; tø yø t'ejxnidi, ja ti ja'ats yø myija'widip, pø xmi'ajkidipxi øts yø', jøts ñayi myi'ajkidip yø nayide'en ja Dios Teety.

²⁵ Ja'agøjxpts ya'at jade'en yjaty kumi ka'pxy jade'en yjatt sa ya'at ka'pxy ayuujk wya'añ, midi jap køxja'ay yø' kyutujkjøtptyi: "Nadøki øts yø xmi'ekyidi."

²⁶ Paty øts ja Dios Teety xukaxt ja Espíritu Santo jøts øts ja nja' xkajpxiyit, pøn pudøjkíp kajpxjot'amøjkíp, pøn nayide'en tmøøt'ajtp ja tyi'byi yjanchpi.

²⁷ Jøts mee nayide'en ja nja' xkajpxmийit, pøtøxi meets ja x'ixy sa jaty y'ejxi tyiyi, sa jaty tø ngajpxwa'kxtso'ondaajkyim østi ixyambaat.

16

¹ Jade'en'ampy jade'en nnøjmidi jøts kidi nugo winmayjimbetti winmay'adøjti.

² Myikwojpidso'ømp myikajxpidsø'ømp meets jap tsaptøjkjøtpty, østi yja'at paat ja xøøw ku ja jaa'y wya'andit jøts ku Dios yja' ja tpaduujnidi ku meets ja myik'oogiyit.

³ Ja'agøjxp ja jade'en y'adø'øtstit ku ja nijuuni tkanijawidinim pøni pøn ja Dios Teety, jøts pøni pøn øts.

⁴ Jøts ja'agøjxp ya'at jade'en ndukmadowdi ku wyinaty jade'en yjatwa'añ, jøts xja'myatstit jøts ku yø tø ndukmadoonidi.

Ti dø'øn ja Espíritu Santo tyumpy ya naxwiñ

'Ka' meets yø jade'en patki'jyi ndukmadøøy, kumi ja'ajt øts kø'øm.

⁵ Ixyamts ø nnøjkxwani tsinaabyi mā ja jap midi ø xkajxp; jøts øts ja nmøøtsinaamyit jøts nipøn tamts mee nidu'ugin tkayiktiy pøni mā øts idø'øn nnijky.

⁶ Jotmay mee ne'egi jinaxy tø mjaaktyimdyatøkiyi, ja'agøjxp ku yø jade'en tø ndukmadowdi.

⁷ Janch idø'øn nnøjmidi jøts ku ne'egi jade'en m'øy'ajtxidit jøts ku nnøjxt. Ku ø nganøjxt, nijuunits ja kyamiñ midi mbudøkiyidip midi mgajpxjot'amøjkiyidip. Ku nnøjxt, kø'ømts øts ja ngaxt.

⁸ Jøts ku dø'øn ja nøjkk myiñ, ja' ja tyu'ump jøts ja naxwii'ñit jaa'y ja ttukjawit ja pyøky jøts ku yjanchpojkipitumbijaa'yidi, jøts ku ja tu'ugyi ja winmaa'ñ sudso tyø'ødit sudso tyuda'aktit, jøts ku Dios ja pyayø'øyidit.

⁹ Ja'agøjxp pyojkpitumbijaa'y'atti ku ø ka' xjanchjawidi;

¹⁰ ñija'widipts nøjkk sa y'ejxi tyiyi midi'ibi øy midi'ibi paat'ajtidip, kumi jam ø nnijky mā Dios Teety, jøts ka' mee x'uk'ejxnit,

¹¹ jaanimts tjä'gyukidit ja Dios pyayø'øyin jøts ku tyiy'ajtingøjxp yikutuky, pø tøxi wyinaty ja tyi'ajtin tyaky, jøts ja miku' yikastigimo'ot midi møy'yity ya naxwiñ.

¹² Jap øts may ja madya'aky njajagyepy midi ndukmadoowandip, ka' inet xja'gyukidit ixyamyi.

¹³ Kunim mye'ent ja Espíritu Santo, ja'ats ja tuki'iyi mduk'ixpøjkøxidip sudso tyiyi yjanchi; ka'axi kyø'øm ja' ja tyiktu'unt pøni sa jaty ja wya'añ, ja' ja kyajpxp pøni sa jaty pøni ti jaty ja myadøøpy, jøts ja mdukmadowidit ti jaty tunwajnipnim.

¹⁴ Jade'en'ampyts øts ja winja'win windsø'jkin nbaatt, kuts ja ngajpxy ja n'ayuujk xpadu'undit sa mduknijawiyidi ja Espíritu Santo. Øts ja ngajpxmyo'op.

¹⁵ Nayide'ents ja Dios Teety kyajpxy ja y'ayuujk sam øts nja'ajin, paty øts jade'en nwa'añ jøts ku nayide'ents nmo'ot ja ngajpxy ja n'ayuujk, nayide'ents yø mduknijawiyidit.

Xondaajkin ja nøjx wyimbidsimy ku njotmay'o'jkindit

¹⁶ 'Ka' y'ukjajknit ku mee ka' x'uk'ejxnit, ku wyinaty waani tō ñaxy ja tiempi jaanims tō x'ejxtit jadigojk, pō jamxi tō nniikxy mā jam Dios Teety.

¹⁷ Winets ja pyabøjkpitøjk winaagin nixem niyam ñawyajnidøø:

—¿Ti yō jade'en tyijpy ku yō xnamaa'yin jøts ku ka' y'ukjajknit, ku yō ka' n'uk'ejxna'ant, jøts ku waani ñaxt winetnimts ja n'ejxindit jadigojk ja'agøjxp ku ñiikxy jam mā ja Dios Teety?

¹⁸ ¿Ti dø'øn yō jade'en tyijpy jøts ku “ka' y'ukjajknit”? Ni kyayikja'gyuki niwine'en pōni ti dø'øn yō jade'en tyijpy.

¹⁹ Jøts ja nwindson'ajtim Jesús ojts ja t'ixy jøts ku ja pyabøjkpitøjk yjawi tyiibyøkwā'añiyi, jøts ja tnimaay:

—Tōxi nnøjmidi jøts ku ka' y'ukjajknit ku mee ka' x'uk'ejxnit, kuts wyinaty waani tō ñaxy ja tiempi jaanims tō x'ejxtit jadigojk. ¿Kidi yø'øjip meets ixja mnayiktøøjiyidip?

²⁰ Jøts tiy janch øts idø'øn nwā'añ ku mee nnøjmi, jøts ku nøjx ja yajxin x'ejxti, ku nøjx ja jotmay'o'jkin xpaatti yam ja naxwii'ñit jaā'y xyonda'akti. Jøts ka'ats yjade'eni, øy mee mabaat mjantymyjajotmay'øøky, xondaajkin ja nøjx wyimbidsimy ku jade'en njotmay'ookti.

²¹ Jade'en idø'øn ñamyayi jyaty sam ja tø'øxyøjk ku ja kya'axwā'añ, janch winmay jotmay yjaty ku tō tpaaty ja tiempi ku ja y'u'nk pyøjkjø'økni; ku tō tminawya'kxniyi ja maxu'nk nika'ap ja t'ukja'myajtsni jøts ku y'u'nk ja tō pyiky, ja'agøjxp ku ja xyonda'aky ku ja tō tyikaxi'iky tu'uk maxu'nk ya naxwiiñ.

²² Nayide'ents meets idø'øn mjajtnimi, mjanchjotmay'oo'ktip ixyam; wimbetp øts jøts mee nminabyaadit jadigojk, winetnimts ja xondaajkin xpaattit yikxon, jøts nipøn ja mgapøjkxiyidit.

²³ Jøts ja'abi xøøw ka' ø ti x'ukyiktøønidit. Janch meets idø'øn nnøjmidi, jøts ku ja Dios Teety tuki'iyi mmo'o'jidit pōni ti jaty ja m'amidowdip øts køjxp.

²⁴ Østi ixyambaat ka'anim ti x'amidowdi øts køjxp; amidowdi pøktsowdi, mbaattip ja' jøts jade'en mxonjattit.

Tøts ja Jesucristo tmimajada'aky midit ja naxwii'ñit jaā'y yikwindigøøpy

²⁵ 'Madya'akyøjxp ya'at yam nugo tō ndukmadowdi jøts xamimadoodowidit; ja'atp ja xøøw ku ka'ap jade'en nøjx n'ukmigajpxnidi abiky madya'akyøjxp, wā'ats meets ja ndyimdyukmadoonit nøjx pōni sã ja Dios Teety y'ejxi tyiyi.

²⁶ Jøts ja'abi xøøwts øts køjxp ja Dios Teety x'amido'odit xpøktso'odit ja øy'ajtin; jøts nika'ap øts yam ndyimwya'añ jøts ku øts n'amido'ot ja Dios Teety jøts mee nni'amidowit. Ka'ap chøkyi jøts kø'øm n'amido'ot,

²⁷ pō mdsojkp meets ja Dios Teety. Jade'engøjxpts ja mdsøkyidi kumi xtsøjkp meets nayide'en, jøts tōts xjanchjawidi jøts ku øts Dios Teety xkexy.

²⁸ Jam ø tō ndsøøn mā Dios Teety jøts øts ya tō nmiñ ya naxwiiñ, ixyamts øts inet nmajtstu'utwangojmi ja naxwii'ñit, jøts ø n'awimbetiwyā'añ jadigojk ja Dios Teety.

²⁹ Xjats ja pyabøjkpitøjk wyandøø:

—Ixyamnim inet tiy janchwā'ats xnigajpxnim, ka' x'ukyiktuni ja abiky myadya'aky midit kayiktamamadodøø'wip.

³⁰ Ixyamnims øøts inet njanch'ixy njanchnijawi jøts ku tuki'iyi xnija'wigyixy, jøts ku ka' chøkyi jøts ku øy pøn kuwanī mdyimdyiibyøkiyit. Ja'agøjxp øø njanchjawī jøts ku jam mdsøøn mā Dios Teety.

31 Jøts nwindson'ajtim Jesús yide'en t'adsøoy:

—¿Jøts xjanchja'wiñidip øts ixyam?

32 Ja wyingøn jøts tø yja'aty ja xøow ja jumøjt, jøts tyimñay'ixyamyi, ku meets inet m'agakpaktit pø ma pønjabøn ñøjkxt, jøts øts inet nadyu'uk xnika'aktit. Ka'ap ø nadyu'ugi, jats ja Dios Teety xmøøt'ity.

33 Ndukmadoogøjxtip ya'at yam tuki'iyi, jøts ja øy'ajtin jotkujk'ajtin xpaattit ku ø x'ajot'attit. M'ayo'ombaattip ya naxwiin; jotmøks mnabyikta'agidit, tøts øts inet nmimajada'aky midit ja naxwiin yikwindigøopy.

17

Ku ja Jesús tni'amidowi tniøktsowi ja pyabøjkitøjk, jøts ja ttukmadøy ja Dios Teety

1 Xjats ku ja nwindson'ajtim Jesús jade'en wyan'abajtiyi'ñ, jøts ja ojts jam tsajpwemp pyat'ixy, winets ja wyaan:

—Dios Teety, tø ja hori kya'pxy. Yikmøjtøjkikts øts, kunuu'kxyja'wikts øts, jøts me nayide'en nyikmøjtøkit, jøts me nayide'en myikunuu'kxyjawit.

2 Metsxi tø xmø'øy ja kutujk jøts øts naxwiin'ñit jaa'y ja ni'ijtyi nda'ana'amdit, jøts ja tpaattit ja jujky'ajtin xemikøjxp pøn jaty me tø xkømø'øy.

3 Jøts jade'en'ampy yikpaaty ja jujky'ajtin xemikøjxp ku tu'ugyi mets Dios Teety myikjanchjawi, sam nayide'en ja Jesucristo, pøn mets ya tø xkexy naxwiin.

4 Tø øts ja ndunguixy jade'en midit me tø xa'ane'emy, jade'engøjxpts myikmøjawi myikunuu'kxyjawi ya naxwiin.

5 Møøkyts øts jam mwingujky nay ja'abi møk'ajtin midit øts y'ijty nmøøt'ajtpy møøt mets ku ka'anin wyinaty naxwiin'ñit y'øyinim.

6 Jøts ja jaa'dyi midit me kø'øm tø xwiwich ya naxwiin midit me tø xagødøki, tøts øts ja nduknija'wigyøxti pøni pøn mets. Jøts mets ja y'ijty mjaa'y'ajtpy, jøts mets ja tø xagødøki. Tøts ja tpadundi mets ja m'øgyajpxy mets ja m'øy'ayuujk.

7 Ñija'winidip ja ixyam wa'ats ti jaty me tø xmø'øy jøts ku mets ja xja'aji.

8 Tøts øts ja ndukmadowdi ja øgyajpxy ja ømyadya'aky midit me tø xukmadøy, jøts tøts ja tkupøkti, tøts ja tñijawidi jøts ku ja yjançi jøts ku øts jam ndsøøn ma mets jam. Tø ja tjanchjawidi jøts ku me tø xkexy.

9 Yø'øts ø nni'amidoo'widip pøn jaty me tø xmø'øy ja agøjxp ku ja xja'aji; jøts nigidi ja'abi nni'amidoo'wip pøn øts tø xkabadundi.

10 Midit jaty ø nja'ajtpy, nayi mets mja' ja', jøts nay ja'ats ø nja'ajtmip; jøts nayi øts nmøk'ajtin nay øts ngunuu'kxin ja xyiktuujnidip.

11 Øts, ka'ap øts n'ukyaa'ajtnit ya naxwiin; yø'øts ja tandip, jøts me nninøjkxnit møøtsinaabyi. Kunuu'kxy Dios Teety, agø'øduk axajtuk mmøk'ajtingøjxp pøn jaty ø tø xagødøki jøts ni'amuki ni'aga'pxi y'ettit, kyanamyajtstu'udidit nayide'en sam adømin.

12 Ku øts yø ya y'ity nmøøt'etti ya naxwiin, n'eix'ejtipp øts yø', ja møk'ajtin ø nyiktumpy midit me tø xmø'øy, ja'ats øts yø nda'agø'ødujktip nda'axajtuujktip. Ni tu'ugin yø tø kyawindigøydi, ja'ayim idø'øn jade'en tø yjaty midit'iyim y'ijty windigøy'ejtnip, jøts jade'en ka'pxy tpaaty sa ja mgajpxy sa ja m'ayuujk xyiktaan.

13 Ixyamts me nninøjkxnit ma mets jam; jøts ku njaaknaya'a'aty ya naxwiin, ja agøjxp øts jade'en nwa'añ jøts ja mja' yjotkujk'attit sam ø njotkujk'atyn.

14 Tø øts ja ndukmadoogøxti ja m'øgyajpxy ja m'øy'ayuujk, ja'ats mm'ajkiyidip pøn ja ka'øwyyinmaa'ñ tjagyajp. Ja' yiktam'ajkidip ku ja jade'embj winmaa'ñ tka'ukyiktunidi, nayide'ents øts ka' nyiktuñ ja yja'adi.

15 Kaja'ajipts ø n'amidøøpy jøts xwaaabidsø'ømt ya naxwiiñ, ja' n'amidøøpy jøts xkuwa'ant xkubokt, jøts miku' yja' kidi myajada'aky.

16 Nayide'en ja'adi sam øts, ka' nyiktuñ ja kya'øwyyinmaa'ñ.

17 Pøkjø'øks ejxjø'øks mdiy'ajtingøjxp mjanch'ajtingøjxp; pø tiy janchxi ja mgajpxy ja m'ayuujk.

18 Nayide'ents sam me tø xaniguexy ja naxwii'ñit jaa'y, nayide'ents øts ja yam ndanipøkti ndani'ejxti pøn ya naxwiiñ ja ka'owyyinmaa'ñ tjagyajptipnim.

19 Amumjoojt øts njaaktyimñadyamiyoxiyit yø'øgøjxpti, nayide'ents ja ñadyamiyoxiyidit ku ja mgajpxy ja m'ayuujk ttu'undit midit tiy midit janch.

20 'Kidi ja'ayip ø nugo ndyimñi'amido'owidip, nayide'en ja'amidip pøn ø xjanchjawiwyañdipnim ku ja myigu'uk ja tmadoojudit ja øgyajpxy ja ømyadya'aky.

21 Jøts ja' øts yam n'amidøøpy jøts tu'ugyi ja wyinmaa'ñ tyik'ettit; jøts tu'ugyi y'ettit møøt adøm, nayide'en Dios Teety sam mets xmøø'tity jøts sam me nmøø'tity. Jøts wan tu'ugyi ja wyinmaa'ñ tpikta'akti jøts jade'en tukjanchjawidit ku me tø xkexy, pøn ja ka'øwyyinmaa'ñ tjagyajptip.

22 Tø øts ja nmo'odi nay ja'abi møk'ajtin midit me tø xmø'øy, jøts tu'ugyi wyinma'adyit nayide'en sam adøm nja'. Tu'ugyi nayide'en mets mja', jøts nayide'ents øts nja'ami.

23 Øts ja møøt nnamayayidit, jøts mets xmøøtnamyaayimiyit jøts ja tu'ugyi y'ettit, jøts jade'en ja naxwii'ñit jaa'y t'ejxtit tñijawidit jøts ku me tø xkexy, jøts ku mets ja xjanchøky sam me xtsøkyin.

24 'Dios Teety, metsxi ja tø xagødøki, jøts ja'ats ø ndsøjkpy jøts ja yjap'attit ma øts jap ndsinaawya'añ, jøts t'ejxtit ja møk'ajtin ja øy'ajtin midit me tø xmø'øy; jaayim me xtsøky ku ka'anim wyinaty naxwii'ñit y'øyinim.

25 Mets Dios Teety tiy'ajtin janch'ajtin mmøøt, jøts ka'ats ja naxwii'ñit jaa'y mnijawiyi; jøts øts, nnija'wip mets; jøts yø pabøjkpitøjk, ñija'winidip yø' jøts ku me tø xjanchøky.

26 Tø øts ja ndukmadowdi mbøn mets jøts njaaktukmadoowandipnim øts. Jade'ents sa mets xpa'ayøyin, nayide'ents taba'ayoomidit ja myigu'uktøjk. Nmøø'teppyim øts yø' y'agujkpti jade'en.

18

Ku ja Jesús ojts yikmach

1 Xjats ku ja nwindson'ajtim Jesús jade'en wyinaty tø wya'añ, winets ja tmøøtsøø'ñ ja pyabøjkpitøjk, jøts ja ñøjkxwa'andi jam jaduktamajñ ku ja ttanaxtit ja nøø midit yiktejp Cedron. Jam tu'uk ja kam ma y'ity øy ti tsa'am, jamts ja nwindson'ajtim Jesús tmøøtkuyø'øyiyi'ñ ja pyabøjkpitøjk.

2 Jøts ja Judas, pøn ja wyinaty ixam ka'ødyunwajnip, wa'ats ja t'ijxy'aty ja'abi et, pø jamxi ja nwindson'ajtim Jesús wyinaty kawinaak ojk tø ñamyukyidi møøt ja pyabøjkpitøjk.

3 Jade'en'ampyts ja Judas jam ojts tmøøtja'aty tukpiky ja soldaditøjk møøt ja jaa'dyi midit t'ejx'ejttip ja tsapøjk, ja teetywindsøndøjk ja fariseotøjk ja kajxidip, tumda'o'jk møøt ja jam yja'ttøø kunø'øky.

4 Ñija'wiñip ja nwindson'ajtim Jesús ja wyinaty sa jaty ja yjatwa'añ kyubatwa'añ, winets ja twinguwa'jkiyi'ñ, jøts ja tyiktiyi:

—¿Pø̃n dø'ø̃n m'ixaadyip?

⁵ Jøts ja ojts yide'en y'adsowdi:

—Ja Jesús øø n'ixaapy, ja Nazaretit jaa'y.

Jøts ja nwindson'ajtim Jesús ja t'adsøøy:

—Øtsimts ja'.

Jøts ja Judas midi ka'ø'y'adøtsp, ixam ja tmøødi ja mayjaa'y.

⁶ Jøts ku ja nwindson'ajtim Jesús wyaañ: “Øtsimts ja'”, winets ja jadi'iñi y'ixnøjkxtøø jøts ja kya'tsjimbejtøø.

⁷ Winets ja nwindson'ajtim Jesús ja jadigojk tyiibyøjkidøø, jøts ja ñimaajyidøø:

—¿Pø̃n dø'ø̃n m'ixaadyip?

Jøts ja wyandøø:

—Ja Jesús, ja Nazaretit jaa'y.

⁸ Jøts ja nwindson'ajtim Jesús ja tnimaay:

—Tøxi nnigajpxy jøts ku ja y'øtsi. Pø̃ni øts tam x'ixaadyip, majtstu'uttits øts yø nbabøjkpitøjk.

⁹ Jade'en'ampy ja jade'en yjaty, jøts ja jade'en ka'pxy tyimyjaty ku ja nwindson'ajtim Jesús wyinaty yide'en kø'øm tø wya'añ: “Pø̃n jaty øts ja Dios Teety tø xagødøki, ni tu'ugin ja tø kyawindigøydi.”

¹⁰ Jøts ja Simón Pedro jam wyinaty tø tnixaji tu'uk ja tsujx, ja'ats ja ojts tjuuty, jøts ja ttaxikpo'otuujty ja jaa'y midi txøøw'ajtp Malco, ojts y'aga'ndyatsk ja tyimgyajtspo'tjiyi, ja teetywindsønødk idø'øn ja tyumbi jade'en jaitp.

¹¹ Yide'en ja nwindson'ajtim Jesús tnimaay ja Pedro:

—Pikta'ak yø mdsujx nay jap mā tø xjuuty. ¿Sa me mwinmay, uk ja øts idø'øn xijy ngagupøkt ja ayo'on midi øts ja Dios Teety tø xanibiktaagi?

Ku Jesús yiknajtswaa'wiyi'ñ jam mā teetywindsøn

¹² Xjats ja soldaditøjk, møøt ja' pø̃n tnigubajk'ajtp jøts møøt ja tsaptajk, ojts tmatsti ja nwindson'ajtim Jesús, jøts ja ojts tkøwøøndi tkøxojtsti.

¹³ Jøts ja tyiknøjkxtøø mā ja Anás jam tyøjk midi ja Caifás tyeety myøjt'ip, midi jam wyinaty ja'abi jumøjt teetywindsøn'ajtp.

¹⁴ Nayi Caifás idø'øn wyinaty yide'en tø tnø̃jmi ja israelit jaa'y, jøts ku ne'egi jade'en tyimy'ø'y'att jøts tu'ugyi ja jaa'y tku'oogit ja kajp.

Ku ja Pedro tku'ñi jøts ku ja ka' t'ixy'aty ja Jesús

¹⁵ Jøts ja Simón Pedro møøt jadu'uk ja myibabøjkpi tpanøjkxti ja nwindson'ajtim Jesús. Jøts yik'ixy'ajtp ja' ja yjadu'ukpi, iixy'ajtip ja teetywindsøn ja', ja'ats jap tyimyøøtøjkimyaā ja nwindson'ajtim Jesús jap windsøn tyøjk'agui'py;

¹⁶ Jøts ja Pedro jap tyaañ mā yiknidøki ja tøj. Ja'ats ja yjadu'ukpi jap ñibidsøøm midi iixy'ajtp ja teetywindsøn, jøts ja ojts tminagyajpxyi ja tø'øxyøjk midi jap tøj'adinaapy, jøts ja tyiktøjkii'ñ ja Pedro.

¹⁷ Winets ja tø'øxyøjk midi tøj'adinaapy, y'amidoøjøø ja Pedro:

—¿Kidi metsip yø jaa'y mbabøjkpi'ajtpy?

Jøts ja Pedro t'adsøøy yide'en:

—Ka', ka'axi ja y'øtsi.

¹⁸ Jøts kumi xujxpts wyinaty, jøts ja tumbitøjk jøts ja tsaptøjkajk jap ja wyinaty tø tyikmø̃jidi ja jøø̃n, ja'ats ja jap wyindanaadyip jøts ja jap xyamdi. Jøts ja Pedro ixam idø'øn ja tmøøtxami.

Ku ja teetywindsøn tyiktøøbinaxwa'aky ja Jesús

19 Xjats ja teetywindsøn tyiktøøbinaxwaaajky ja nwindson'ajtim Jesús pøn jaty idø'øn pyabøjkpitøjk'ajtpy, jøts ti dø'øn ja ñanky'ixpøjkjip.

20 Jøts ja nwindson'ajtim Jesús ja t'adsøøy:

—Tø ø ngajpxy mayjaa'y'agujky øy madsoo; ejtp ø nyik'ixpiky mā jaty tsaptøjk, jøts nayide'en mā ja møj tsaptøjkmi mā israelit jaa'y ñamyukyidi, jøts ka'ap øts øy ti n'amaa'tsk'aty ku ø ti nnigajpxy.

21 ¿Tigøjxp ku øts ja xyiktiy? Ja' mets ja myiktø'øp pøn jaty ø tø xmadooji, jøts wan ja tñigajpxti pøni sã jaty øts idø'øn ja tø nnøjmidi. Ja' ja tñija'widip pøni sã jaty øts ja tø nnøjmidi.

22 Xjats ku ja nwindson'ajtim Jesús jade'en wyaañ, jøts nidu'ugin ja tsaptajk ja ojts wyingugoxiyi, jøts ja ñii'mxyiyi:

—¿Jade'en yø m'aaw xa'adsøy jøts jade'en xnøjmit yø teetywindsøn?

23 Jøts ja nwindson'ajtim Jesús ja yide'en t'adsøøy:

—Pøni tødām ø ngajpxigøy, nigajpxts midil'ibi dø'øn mga'ømyadøøpy; jøts pøni øydam jade'en sã ø tø nwā'añ, ¿tits ku øts xkøxy?

24 Winets ja Anás ja ojts kyexyi wiñ ke'kxy, jøts ja jam ñøjkxt mā ja Caifás, midit teetywindsøn'ajtp.

Ku Pedro jadigojk wya'añ ku ja ka'ap t'ejxi ja Jesús

25 Exajp idø'øn ja Pedro tyani, yjoo'kxpiky jap jøn'ajpy, ku ja yiknimaay:

—¿Kidi metsip yø jaa'y mbabøjkpi'ajtpy?

Jøts ja Pedro ja ka' tkupiky, yide'en ja wyangojmi:

—Ka', ka'axi ja y'øtsi.

26 Winets ja yiktøøji tu'uk ja teetywindsøn tyumbi midit ja jaa'y myigu'luk'ajtpy, midit ja Pedro wyinaty tø txiktsajtstu'uty jøts ja tyatsk tyimykwinajkiyøø, ja'ats waañ:

—¿Kidi metsip jap tø n'ixy jøts ku mets ja jap y'lity xmøødi jap tsa'amgamjøtpy?

27 Jøts ja Pedro ja jadigojk ka' tkupøjkjomi, winets nay jatyi y'ayaajxy tu'uk tsapni'aaw.

Ku Jesús twinguwa'jkiyii'ñ ja Pilato

28 Jøts ja nwindson'ajtim Jesús ojts yikwaadsøøñ jam Caifás tyøjkjotp, jøts ja yikwaanijky mā ja møj windsøn kyutujktaajk jam. Xiijñiwyaniip, jøts ja israelit jaa'y nika'ap tyøjkidøø jap kutujktaajkjøtpy, jøts ja ka'ap tyiktigøøwya'andi ja kyostumbri, pøky idø'øn ja' ku ja jade'en y'adø'øtstit, ka'ap ja t'ukaanidit ja paski xøgaaky ja paski xø'uuky ku ja a'ux ja tyiknaxtit.

29 Ja'agøjxp ja møj windsøn Pilato jam ojts pyidsimy jøts ja myigajpxwa'añidi, yide'en ja ojts ñii'mxyidi:

—¿Ti yø jaa'y mdani'øø'nidip?

30 Jøts ja y'adsoodøø:

—Ku yø jeexyip kyapøkyjaa'yi ka' mets yø jeexyip yã tø myiktægøðøki.

31 Winets ja Pilato ja ñimaajyidøø:

—Møødidi, jøts xiidyu'undit jade'en pøni sã ja mgutujk wya'andi.

Jøts ja israelit jaa'y y'adsoodøø:

—Øøts, ka'ap øøts xpaat'aty jøts øøts øy pøn nyik'ookt.

32 Jade'en ja ojts ka'pxy jyaty sã ja nwindson'ajtim Jesús ja wyinaty tø tñigajpxy jøts ku ja jade'en y'ookt.

33 Xjats ja Pilato jap jadigojk tyøjkijii'ñ jap kyutujktaajkjøtpy, jøts ja ojts tyajxi ja nwindson'ajtim Jesús, jøts ja t'amidøøy:

—¿Mets idø'øn israelit jaa'y mjanchwindsøn'ajtip?

³⁴ Jøts nwindson'ajtim Jesús ja tnimaay:

—¿Kø'øm mets jade'en mwinmaj jøts mets jade'en xyiktiy, uk pøn jade'en tø mdamimadya'agyi jøts ku ø nja'aji?

³⁵ Jøts ja Pilato ja y'adsoojøø:

—¿Ti israelit jaa'yimts øts? Kø'ømxi yø mmigugajp jøts yø teetywindsøndøjk yä myikmiñiyi jøts mets yä nyiktagødøki. ¿Ti dø'on tø xuñ?

³⁶ Jøts nwindson'ajtim Jesús ja yide'en t'adsøøy:

—Windsøn'ajtp øts, ka' øts nja' yjade'eni sam pøn yja' yä naxwiñ. Ku jeexyip jade'en, tø øts nbabøjkpitøjk jeexyip xnitseptunidi, jøts øts jeexyip ngayiktagødøki ja israelit jaa'y. Kayaa'ip øts ngutujk.

³⁷ Winets ja Pilato ja ojts ñii'mxyiyi:

—¿Jøts mjanchwindsøn mets idø'on?

Jøts nwindson'ajtim Jesús ja t'adsøøy:

—Ja' øts sa ixa mwa'añ, windsøn øts. Tø ø ngaxi'iky ku øts yä naxwiñ tø nmiñ jøts ø nnigajpxt ti tøy'ajtin'ajtp, ti janch'ajtin'ajtp. Pøn jaty ja xmimadoodip, xmadoidipts øts nja' ja' sa jaty ø nwa'añ.

³⁸ Jøts ja Pilato ja ojts ñii'mxyi:

—¿Jøts ti dø'on tøy'ajtin'ajtp janch'ajtin'ajtp?

Ku Jesús ñidujkiy'ñ jøts ja y'oookt

Jøts ku ja Pilato jade'en t'ukyiktiy, jøts ja ojts pyidsimy jøts ja tminagayjpxw'añi ja israelit jaa'dyi, jøts ja tnimaay:

—Ka' øts yø jaa'y nbøky'ixy.

³⁹ Jade'ents mee xkostumbri'aty jøts øts nidu'ugin nyik'awa'atspidsø'ømt ja pøkyjaa'y, ku meets ja x'amidøy ku paski xøøw: ¿Jøts mdsojktip jøts wan øts yø mwindsøn tnajtsmatsi jadi'iñi?

⁴⁰ Winets ja niduki'iyi møk wyandøø:

—iKa' yø' xyik'awa'atspidsø'ømt! iYø Barrabás myik'awa'atspidsø'ømp!

Jøts møj maa'tspi dø'on ja Barrabás.

19

¹ Xjats ja Pilato ojts tnankmyachi ja nwindson'ajtim Jesús, jøts ja ojts tnankwyøpyi.

² Jøts ja soldadi ja ojts ttagujandi tu'uk ja windsøn kujan, jøts tum kujp awiity, jøts tsuu'nk wet ja ojts ttaxoxti.

³ Jøts ja ojts wingon twingunøjkxidi, jøts ja ojts tnøjmidi:

—iMøj mets, pøn ja israelit jaa'y wyindsøn ukmayip!

Jøts ja ojts twingoxti tjøpkoxti wyemp y'am.

⁴ Winets ja Pilato ojts jadigojk pyidsimy, jøts ja ojts ñii'mxyidi:

—Ejxti nijawidi, nyikpidsimpy øts yø yä jøts xnijawidit jøts ku øts yø niti ngadapøky'ixy.

⁵ Jøts ja nwindson'ajtim Jesús pyidsimy, iexam tkujan'aty ja kujp awiity jøts ja tsuu'nk wet ja twet'aty. Jøts ja Pilato ja ojts ñimaagyojmiyidi:

—iXya dø'on ja jaa'y!

⁶ Xjats ku ja teetywindsøndøjk ja t'ejxtøø jøts ja tsaptajk, winets ja tjanch-tayajxidøø møk'ampy:

—iYikruspat! iYikruspat!

Jøts ja Pilato ja tnimaay:

—Wawdi jøts mee xyikruspat, kumi ka'ap øts yø ti pøky ndapøky'ixy.

⁷ Yide'en ja israelit jaa'y ja y'adsoojiyøø:

—Jap øøts tu'uk ja kutujk nmøødi, jøts jade'en ja tyikutuky jøts wan t'øøky, ja'agøjxp ku yø tø ñabyikta'agyi Dios U'ngin.

8 Xjats ku ja Pilato ja ojts jade'en tmadøy, jøts ja jade'en yjaaktyimyk'adsø'jkijii'ñ.

9 Jøts ja jap kyutujktaajkjøtpy tyøjkijii'ñ jadigojk, jøts ja ttiibyiky ja nwindson'ajtim Jesús:

—¿Mets, ma mdsøñ?

Jøts ja nwindson'ajtim Jesús niwine'enin ja tkidyimy'adsøy.

10 Winets ja Pilato ja ojts ñii'mxyiyi:

—¿Jøts ø ka'ap x'adsø? ¿Ti ka' xnijawi jøts ku øts kutujk njagyepy, jøts me nyikruspatt uk jøts me nyik'awa'atspidsø'ømt?

11 Jøts nwindson'ajtim Jesús ja t'adsøy:

—Ti kutujk mets jeexyip mdsaaahjagejpy ku Dios Teety ja jeexyip jade'en tkayikjaty; paty ja' møj pøky tyimdyaja'adyi pøn øts ya tø xkøyaky jøts me tø nyiktagøðøki, waani mets mja' mdaja'adyi.

12 Winets ja Pilato nay jaty tja'ixaay ja taay, jøts ja t'ixmatst jadi'iñi ja nwindson'ajtim Jesús; xjats ja israelit jaa'y ja møkta'aky ñimaajiyi:

—iPøni myik'awa'atspidsimpy inet, ka' xmigu'ugi wyinaty ja møj windsøn César jam Roma! iPøn jade'en namyøjpiktaajkip, myidsep'atpyts ja César!

13 Xjats ku ja Pilato jade'en tmadøøy, winets ja ojts tñankyikpidsimyi ja nwindson'ajtim Jesús jøts ja y'ixaajky jam kyutujktaajkjøp'am midy yiktejp Gabata ku hebreit ayuujk, jade'en ja tijy ma tsaba'kxy.

14 Jaa døøen ja xøøw wyinaty kujky ku wyinaty tymbyatni ja paski. Winets ja Pilato tñimaay ja yjaa'y midy jamdi:

—iXyaaði ja mwindsøn!

15 Yide'en ja møk wyandøø:

—iWan tpa'øøky! iWan tpa'øøky! iYikruspat!

Jøts ja Pilato ja tñimaay:

—¿Øts ndejin ja mwindsøn nyikruspatp?

Ja teetywindsøndøjk ja yide'en y'adsøjyøø:

—Ka'ap øts pøn jadu'uk nwindson midy øø nwindson'ajtpy, ja'ayi tu'ugyi ja møj windsøn César.

16 Ku ja Pilato jade'eñi yiknimaay, jøts ja ojts tkøyaky ja nwindson'ajtim Jesús jøts ja tyikruspattit, winets ja tyiktso'ondøø.

Ku ja Jesús kyiruspejty

17 Xjats ja nwindson'ajtim Jesús tyiktso'ondøø, jøts ja ttukapti ja kyirus, jøts ja jam ñijky ma ja et yiktijy Oo'kpi Kyubajk Pajk, midy yiktejp hebreit ayuujk Gølgota.

18 Jamts ja ojts tyikruspatti møøt namajtsk pøkyjaa'y, tu'uk jaty ja yikpiktaktøø adsow aduuk, jøts ja nwindson'ajtim Jesús agujk'ajpy.

19 Jøts ja Pilato jam ojts tñankpyikta'agy'i ja letri kruskøjxp midy nømp: "Jesús, Nazaretit jaa'y, israelit jaa'y wyindsøn."

20 Jøts may jaa'y ojts t'ejxti ja letri, pø kajpwingonxi ja jam ma ja nwindson'ajtim Jesús ojts kyiruspety, jøts ja letri jade'en ja kyøxja'ayi hebreit ayuujk, jøts griegit ayuujk, jøts latin.

21 Paty ja israelit teetywindsøndøjk tñimaydi ja Pilato:

—Kidi jade'en xja'ay "Israelit jaa'y wyindsøn"; ne'egi jade'en xpikta'akt "Køøøm ñadyijiyi jøts ku israelit jaa'y twindsøni."

22 Yide'en ja Pilato ja ojts y'adsøyidi:

—iMidi tø nja'ay, jade'en yø ty'a'ant!

23 Xjats ku ja soldaditøjk wyinaty tø tyikruspatti ja nwindson'ajtim Jesús, winets ja ojts twejtsjø'jkidi ja wyet, jøts ja ojts ñadyanipaadyidi jøts

ja ñawya'kxit maktaxkpiiky, kitu'uk ja soldadi ja tpo'ktit. Jots nayide'en tñaxajidyoo ja nijan, jots kumi ka'ats ja y'axuumyuky, ja'ayi ja amuum tymdyuko'kubety,

²⁴ Xjats ja soldadi nixem niyam ñawya'jnido:

—Ka' yoo ndakoo'tsa'ant; ne'egi yoo nnguyajint, jots n'ejxint poon jady-imy'uktaja'adip yoo wet.

Jots jade'en ojts ka'pxy yjaty sam jap jaabyety no'kyijxpy: “Too o'ts nwet ja xwejtswa'kxidi, too ja tñiguyatti.” Jade'ents idoo'on ja soldaditoo'k y'adootsoo.

²⁵ Jots ma ja nwindso'n'ajtim kyirus jam, ixam ja tyaak ja', jots nayi ixamts ja'amidi miidi ja tyaak y'uchip, jots ja Cleofas ñido'oxy miidi Maria'ajtp, jots nay jam ja Maria Magdalenimi.

²⁶ Xjats ku ja nwindso'n'ajtim Jesus ojts t'ixy ja tyaak, jots ku ja pyabokpi nay jam tyanaamyi miidi ja jantymy'namyaajyip, winets ja tñimaay ja tyaak:

—Taaq, ixa ja m'u'nk.

²⁷ Jots ja pyabokpi ja tñimaamyi:

—Ixa ja mdaak.

Jots nay jatyi ja'abi pabokpi ttaakpijky miidi ja nwindso'n'ajtim Jesus tyaagip, jots ja jade'en yikjagyepy sam kyoo'omdaagin.

Ku ja Jesus y'oo'jky

²⁸ Xjats ku ja jade'en wyinaty too y'ukjaty, jots kumi ñija'wipts ja nwindso'n'ajtim Jesus ja wa'ats jots ku wyinaty jade'en tuki'iyi too kya'pxy, jots idoo'on ja jade'en tyimyjatt sam jap jaabyety no'kyijxpy, winets ja wyaan:

—Jantymdyo'jtsip o'ts.

²⁹ Jamts wyinaty tukmo'najts'oo'y ja vino miidi jeky too pyu'uch; ja'ats ojts yiktabdsiich ja tanimuu'kpi, jots ja yikpiktaajky jam hisopo kipy awaj joo'lam, jots ja yikta'ayokxy ja nwindso'n'ajtim Jesus.

³⁰ Xjats ja twixi'jch ja tanimuu'kpi jots ja vino ka'oybi jade'en t'uuky, winets ja wyaan:

—Too tuki'iyi yikpaduñ ka'pxy.

Jots ja kyubajk ja jadi'iñi kyuwajtsnajxy, jots ja jade'en y'oo'jky.

Ku ja Jesus yikuomy kyachpuki'jy

³¹ Jots tymbyaatwanipts ku ja paski xooow kyujajy, jots ja' ja israelit jaajy kyatsojktip jots ja oo'kpi jam y'awejxtit krusko'jxp ku poo'kxin xooow, jots yats idoo'on ja'abi xooow jaaktyimyo'jxooowni. Ja'agoo'jxpts ja tñimaydi ja Pilato, jots wan ja tñankpyakwojptokixyi poon jatyi jam wyinaty too kyiruspatti, jots wan ja tñankyikwinajkixyi jam ja oo'kpi ñine'kx.

³² Winets ja soldadi ñoo'kxtoo, jots ja ojts tjanchpakwojptokooxti miidi ja nwindso'n'ajtim Jesus jam wyinaty mooot too kyiruspety. Ojts ja yjawyeembi tyimykpakwojptokoo'y, jots ja yjadu'ukpi nayide'en miidi jam jaduktamajñ.

³³ Xjats ku ja twingunokxidoo ja nwindso'n'ajtim Jesus, jots ja t'ejxpattoo jots kudam ja too y'oo'kni, patyts ja ka' nayide'en t'uktunido.

³⁴ ¿Ja ti winets ja ñajxy? Ojts ja soldadi ja nidu'ugin tyakumy; ja takuu'm jots ja tyimy'awajch ja kyachpuki'jy, jots nay jatyi ja ni'jpy pyidisimy mooot noo.

³⁵ Ja'ats miidi ixam njaadyampy, too o'ts idoo'on jade'en n'ixy nñijawi miidi'ibi tiy janch, jots mee nayide'en xiyyawit xjanchjawit.

³⁶ Jade'enxi do'on ja yjajty jots jade'en ka'pxy tyimyjaty sam jap jaabyety no'kyijxpy: “Ni tu'ugin pyajk ja kyatojt kyamoott.”

³⁷ Jots jap abiky wyami: “Y'ejxtip ja ko'om ku tyiktsaachidit.”

Ku ja Jesus ñine'kx yikpiktaajky jap mo'j tsaajutjotpy

³⁸ Xjats ku dø'øñ ja jade'en wyinaty tø yjaty, jøts ja José midi kugajp'ajtp jam Arimatea, pyabijky ja' nwindson'ajtim Jesús øy idø'øñ ja ka'ap øy pøn tjadyimdyuknijawi, ja'agøjxp ku ja ttsø'øgi ja myi'israelit jaa'y. Ja'ats idø'øñ t'amidoow ja Pilato ja may'ajt, jøts ja myo'ojyit ja nwindson'ajtim Jesús ñine'kx. Xjats ja Pilato yikjajt ja jade'en, winets ja José ojts ñijky jøts ja ojts tyikso'oniyi.

³⁹ Jøts ja Nicodemomi midi wyinaty jekyip tø tmøøtmadya'aky ja nwindson'ajtim Jesús koots, ja'ats jam tmija'jt ee'px majk kilin jaabya'ak midi pa'akxuu'kp, majtsk jøøjp ja', ja mirra tø t'abøjkmuky møøt ja áloes.

⁴⁰ Jøts idø'øñ ja José jade'en møøt ja Nicodemo tñixajiyidøø ja nwindson'ajtim Jesús ñine'kx, jøts ja tta'abejtøø ja wet midi ja wyinaty tø tpiktaajkidi ja ja'abi pa'akxuu'kpi midi jade'en abøjkmuky. Jade'en ja ttundøø sam idø'øñ ja israelit jaa'y kyostumbridi ku ja y'oo'kpi ja tyiknaxøkidi.

⁴¹ Jøts mā ja nwindson'ajtim Jesús wyinaty tø kyiruspety, jam wingon tu'uk ja kam mā y'ity øy ti tsā'am. Jamts tu'uk oo'kpi jut ja'abi kamjotp midi tyimyjemy'øyipnim, ka'anīm jap pøn tyimyipikta'aky.

⁴² Japts ja tpiktaktøø ja nwindson'ajtim Jesús ñine'kx, pø wingonxi ja jam tyañ ja oo'kpi jut, jøts tyimdyøts jøts ja israelit jaa'y pyoo'kxin xøøw tymcho'ondaknit.

20

Ku ja Jesús yjukpyijky jadigojk jap møj tsaa jutjøtpy

¹ Xjats ku midukxøøw cho'onda'akñim ja yjadu'ukpi samaan, winets ja María Magdalena ojts jøpyi ñijky jam mā ja oo'kpi jut jam wyinaty, ka'anīm yixkon yjajta'aky; jøts ja ojts t'ixy jøts ku ja oo'kpi jut jam tka'uk'agø'ajtni ja tsaa midi ja wyinaty tø yikta'agi'y.

² Winets ja ojts putyi ñijky mā ja Simón Pedro jam wyinaty møøt øts midi yø nøky tjaapy, midi ja nwindson'ajtim Jesús jantyimyinamyaajyip, jøts øøts xnimaay:

—Tøts ja nwindson'ajtim jap yikjidøjtpidsømni jap jutjøtpy, jøts ka'ap øø nnijawi pø mā net tø yikpikta'aky.

³ Xjats øts møøt ja Pedro nnijky mā ja oo'kpi jut jam.

⁴ Jøts øøts namajtsk janch putyi nnijky; jøts øts jawaani møk njantyimbyujt jøts ja Pedro nnikejky, jawyeen øts jam nja'lty mā ja oo'kpi jut.

⁵ Jøts øts jap ngu'eixiyii'ñ, ja wetyi jap n'ejxpaajt midi ja nwindson'ajtim wyinaty tø yikta'abity jøts ku ja jap wyøjni, jøts nika'ap ndøjkiyii'ñ.

⁶ Jøtsnim ja Simón Pedro ix'oojknim yja'lty, jøts ja tyøjkiyii'ñ jap oo'kpi jutjøtpy. Jøts ja nayide'en jap ojts t'ixy jøts ku ja abet jap wyøjni;

⁷ jøts ja tjaaktyimy'ejxpaajty ja wet midi ja nwindson'ajtim Jesús wyinaty tø yiktagupity, jøts nigidi ja jam møøt ja wet midi ja amuum yikta'abejt, axaach ja jam abiky tø yikpikta'aky.

⁸ Winets øts ndøjkyimyaā mā dø'øñ ja oo'kpi jut jam, jøts n'ixy jøts kudam ja wyinaty jade'en tø yjaty, xjats ja njanchja'wiyii'ñ.

⁹ Jøts ka'animts idø'øñ øøts wyinaty nja'gyuki midi jap nøkyijxpy jaabyety wya'añ, jøts ku ja nwindson'ajtim Jesús yjukpyøkt jadigojk jap oo'kpi y'agujkp.

¹⁰ Jøts øøts jade'en namajtsk nwimbejtñaā jøts nnøjknāā jam ndøjkwindump.

Ku ja Jesús ñanky'ejøø jadigojk mā ja María Magdalena jam wyinaty

11 Jòts ja María jamy: jut'agø'øm tyaañ, ñiyaxni ja jam kyu'ejxiyii'ñ ma ja jut,

12 winets ja ojts t'ixy namajtsk ja ankilis, tum amuum poop ja xyøxyidi, jòts ja jam chøønidi ma ja nwindson'ajtim Jesús wyinaty tø y'ukyikpikta'aky ja ñine'kx; tu'uk jam chøøni agubajkp, jòts jadu'uk teky'ok'am.

13 Jòts ja ankilis ja ñimaajyøø, ja tøøxyøjk yiknimaapy:

—¿Ti mjajtip, tiku mya'axy?

Jòts ja tnimaay:

—Ja'agøjxp ø nya'axy ku øts ja nwindson'ajtim ya tø yikwejtspidsømni, jòts øts ja ka' nnijawi pø ma ja tø yikpikta'aky.

14 Ja'ayi ja jade'en wyaañ, jòts ku ja y'ejxjimbijty winets ja t'ejxpaajty jòts kudam ja nwindson'ajtim Jesús jam tyani; jòts ka'ap ja tyimwya'añ jòts ku ja yja'aji.

15 Winets ja ojts kø'øm ñii'mxyi, jòts ja tøøxyøjk yiktiibyiky:

—¿Tiku mya'axy? ¿Pøñ m'ixaapy?

Jòts ja tøøxyøjk jade'en ja wyinmay, ja tsa'am kam ejx'ejtpik idø'øn ja tijy, jòts ja tnimaay:

—Teety, pøni mets ja tø xyikpidsimy, tukmadooks øts ma tø xpikta'aky jòts øts ja n'atsyiktsoont.

16 Winets ja ñimaajyøø ja nwindson'ajtim Jesús:

—¡María!

Xjats ja y'ejxjimbijty jòts ja tnimaay hebreit ayuujk:

—¡Raboni! —midi tyijpy yik'ixpøjkpi.

17 Jòts ja nwindson'ajtim Jesús ja ñimaajyøø:

—Kidi ø xøñ, majstutk øts, pø ka'anixi ø nnijkxy jam ma ja nDeety jam. Nøjkxts x'atstukmadøy pøn jaty øts nja' xpabøjkidip, jòts ku øts jap nnijkxy ma øts ja nDeety jap, midi mee mDios Teety'ajtpy.

18 Winets ja María Magdalena ojts ñijkxy, jòts ja ojts t'atstukmadoji ja nwindson'ajtim Jesús pyabøjkpitøjk jòts ku ja wyinaty tø t'ixy ja nwindson'ajtim, jòts ku ja wyinaty jade'en tø ñii'mxyiyi.

Ku ja Jesús ñanky'ejxøø jadigojk ma ja pyabøjkpitøjk jam wyinaty

19 Jòts nay ja'abi xøøw ku midukxøøw cho'ondaq'akñim ja yjadu'ukpi samaan, nay ja'abi ux ku ja pabøjkpitøjk jam wyinaty tø ñamyukyidi jòts ja wyinaty tø ña'ni'agiibyetyidi, ja israelit ja'ay ja chø'jkidip. Winets ja nwindson'ajtim Jesús tyøjkiiyii'ñ jòts ja jam y'aguik'am wya'k'øiyiyii'ñ, jòts ja ojts yide'en kyajpxpøø'kxyidi:

—Øy'atti jotkujk'atti.

20 Xjats ku ja jade'en y'ukwaañ, jòts ja ojts tyuk'ijxyidi ja kyø' jòts nayide'en ja kyachpuki'jyit tsaachi. Jòts ja pabøjkpitøjk jyantyimxyondaktøø ku ja t'ejxtøø ja nwindson'ajtim.

21 Jòts ja nwindson'ajtim Jesús ja jadigojk ñimaajyidøø:

—Øy'atti jotkujk'atti. Nayide'en sam øts ja Dios Teety tø xkexyin, jòts nayide'en meets yam nguexy.

22 Xjats ja tnibixujiyii'ñ ja pyabøjkpitøjk jòts ja tnimaay:

—Wan ja Dios y'Espiritu Santo mdatøkiyidi.

23 Jòts pøni mgajpxwa'kxtip jòts ku ja yikpojkpimee'kxy pøn nabyøkyja'wiyidip, jòts øts nja' ja xpabøjkiiyidit; uk pøni ka'ats, mdukmodo'opts meets ja nayide'en jòts ku ja pyøky ja ka'ap mibaat yikmee'kxy, pøni ka'ap ja ñabyøkyjawiyidi niwine'en.

Ku Tomás ojts t'ixy ja Jesús ku tø yujkpyiky

24 Jøts tu'uk ja nwindson'ajtim pyabøjkpi midi Tomás'ajtp, midi yiktejp xeeñu'nk, ja' wyinaty ka'ejtpe mā ja jamdi ku ja nwindson'ajtim Jesús wyinaty tō ñanky'ijxyi.

25 Xjats ja oojknim ttukmadowdi ja nwindson'ajtim Jesús pyabøjkpitøjk, jøts ja tnimaadyi:

—Tø øøts ja nwindson'ajtim n'ixy.

Ja Tomás yide'en ja ojts ñii'mxyidi:

—Ka' øts ja njanchjawit pøni ka' øts kyø' ja n'ejxi jøts ku ja klabis ja tō yiktsaachiyi; ku øts ngøtsa'jx jap kø'øm ka' ndyimgyudejit mā ja klabis ja tō yiktsaachiyi, pøni ka' øts jap nguxaji mā ja kyachpuki'jy tō chaachi, ka'ats øts ja njanchjawit.

26 Xjats ku kyiduktujkxøow'ajty, winets ja pabøjkpitøjk ñamyujkidøø jadigojk jam tøjktotp, jøts ja Tomás ixjam ja wyinaty tmøødidi. Winets jadyimja'aduky ja tøjkwynaty yikxon ku ja nwindson'ajtim Jesús tyøjkii'ñ, jøts ja jam agujk'am tyanay'øiyii'ñ. Jamts ja ojts kyajpxøø'kxyidi, yide'en ja ñii'mxyidi:

—Øy'atti jotkujk'atti.

27 Jøts ja Tomás nay jatyi yiknimaay:

—Kudeji yø mgøtsa'jx yap, jøts øts yø ngø' x'ejxit; jøts yak yø mgø' jøts yap mguxajit øts ngachpuki'jy. Jøts kidi nugo xkuwinmayi, janchjawi dø'øn.

28 Xjats ja Tomás y'adsøø yøts ja wyaañ:

—iMets nwindson'ajtpy ndios'ajtpy!

29 Jøts nwindson'ajtim Jesús ñimaajyøø:

—Tomás, ja'agøjxp yam xjanchjawinim ku ø tō xtyimwyemp'ijxñim. Jotkujk'atyim ja'adi pøn tmibøktip pøn tjanchja'widip jadi'iñi, øy øts ja xjaga'ejxti.

Ya'at nigajpxp ja tiy'ajtin midi yø nøky myøøt'ajtpy

30 Jøts may ja nwindson'ajtim Jesús ojts tpiкта'aky ja ejxpajt, ku ja ojts ttuñ ja milagri jam pyabøjkpitøjk wyingujkpi midi ka' kyøxja'ayi ya'at nøkyjotpy.

31 Ja'agøjxp ya'at jap jade'en tō yikujayi, jøts xiyjawidit xjanchjawidit jøts ku ja' yiknitsø'øky, jøts ku ja' Cristo ja nwindson'ajtim Jesús, ja Dios U'nk. Jøts ku ja xjanchjawidit, mbaatpts meets ja jujky'ajtin xemikøjxp sam pya'at'atyidi pøn tjanchja'wiyidip.

21

Ku Jesús ñanky'ejxyi niwixujk pyabøjkpi windump

1 Xjats ku dø'øn ja wyinaty jade'en tō y'ukjaty, winets ja nwindson'ajtim Jesús ñanky'ejxi jadigojk jam mā ja pyabøjkpitøjk, jam mejy'am midi yiktejp Tiberias. Yide'en idø'øn ja y'ejxi tyiyi:

2 Ja Simón Pedro jam wyinatyi møøt ja Tomás midi yiktejp xeeñu'nk, jøts ja Natanael midi jam kugajp'ajtp Caná midi Galileit etjotp, jøts ja Zebedeo y'una'jk, jøts møøt abiky janamaajtsk nay ja nwindson'ajtim Jesús pyabøjkpi.

3 Ja'ats ja Simón Pedro ñimaajts:

—Nijkxy øts t'ats'ajkxma'aky.

Jøts ja wyandøø:

—Pø tsoomp øø nayide'en.

Xjats idø'øn ja ñøjktøø, jøts ja ojts ttatøkidi tu'uk ja barki, ni tu'ugin ja ajkx ja tkamaktøø ja'abi koots.

4 Jøts ku wyinaty xyijñiwyani, winets ja nwindson'ajtim Jesús jam mejy'am wyä'kaxi'jky, ja pyabøjkpitøjk ka'ap ja twinmaydi jøts ku ja yja'aji.

⁵ Jøts ja ñimaajyidøø:

—Mixy, ¿tø dø'øñ ja ajkx iij xmatsti uk tyimgya'anim?

Jøts ja yide'en t'adsoodøø:

—Ni tu'uk.

⁶ Xjats ja nwindson'ajtim Jesús ja ojts ñii'mxyidi:

—Niwøjpatti yø mda'ajkxmajk ixa barki puki'jy aga'ñ'ampy, jøts ja ajkx inet jap xpaattit.

Jøts ja ojts jade'en ttundi, jaanims idø'øñ ja tiy ka'ap ja tya'ajkxmajk y'ukmaa'yniyidi jøts ja jap nøøjøtpy tjuuttit, ja'agøjxp ku ja ajkx jap janch'ujts'abøki.

⁷ Winets øts midi ja nwindson'ajtim Jesús yjanchminamaajyip tñimaay ja Pedro:

—Ja nwindson'ajtimts yø'!

Ja'ayi ja Simón Pedro ja jade'en tñimydøøy jøts ku ja yja'aji ja nwindson'ajtim, winets ja ñikijxyit nijan ja ttatøjkijyii'ñ (pø tøxi ja wyinaty tjeñ) jøts ja ñidøjkijyii'ñ.

⁸ Jøts øøts jam mejy'am ja barki nyikja'jty, jøts ja nda'ajkxmajk ja nbajidity janch ujts abøki ja ajkx, pø jadukmagø'pxy xajkxi dø'øñ ja jam wyinaty yjaaka'ity jøts øøts nbaatnit ja naajx.

⁹ Xjats ku øøts jam nwinajky, jøts øøts nbaajty ja jøndsabajk yikxon tø kya'kxy, jøts ja ajkx tu'uk tø yikjingoni, jøts tsapkaaky abiky.

¹⁰ Winets øøts xnimaay ja nwindson'ajtim Jesús:

—Yikmendi tu'uk majtsk ajkx midi ixjanim tø xjuutti.

¹¹ Jøts ja Simón Pedro pyejty jam barkijotp jøts ja tjidøjtpidsiimy ja ta'ajkxmajk, janch ujts abøki tum ja møjaty ajkx, tukmagø'pxy ja wixijkxmyaktigøøk; jøts nika'ap ja xuummy yjapøøjty øy idø'øñ ja tyimyjajadine'eni.

¹² Jøts ja nwindson'ajtim Jesús wyaañ:

—Men m'ajop'atti.

Jøts ja pabøjkpitøjk ni tu'ugin ja sa kyawa'andi pøni pøn idø'øñ ja', pø tøxi ja wyinaty tñijawidi jøts ku ja yja'aji ja nwindson'ajtim.

¹³ Winets ja nwindson'ajtim Jesús ja wingon ñimejnidøø, jøts ja tñixajyiyii'ñ ja tsapkaaky, jøts ja ojts myø'øyidi møøt ja ajkx.

¹⁴ Ya'at idø'øñ møøt myidigøøk ojk yjaty ku ja nwindson'ajtim Jesús ñanky'ijxyi ma ja pyabøjkpitøjk jam, ku ja wyinaty tø yjujkpyiky jadigojk.

Ku Jesús møøt ñagajpxyi ja Simón Pedro

¹⁵ Xjats ku ja y'ajop'ajt'abajtidøø, winets ja nwindson'ajtim Jesús tñimaay ja Simón Pedro midi ja Jonás myajnkjip:

—Simón, ¿xtsojpk øts jawaani sam øts ya'at xtsoktin'?

Jøts ja Pedro ja t'adsøøy:

—Ndsøjkpy me nwindson'ajtim, wa'ats mets ja xnijawi jøts ku me ndsøky.

Winets ja nwindson'ajtim Jesús ja ñimaajyøø:

—Winets ø xnøø'møøjyit xuu'møøjyit ja nbabøjkpitøjk.

¹⁶ Jøts ja mimajtsk ojk kujk yiktiibyiky ja Jonás myajnk, yide'en ja yiknimaay:

—Simón, ¿xtsojpk øts?

Jøts ja Pedro ja t'adsøøy:

—Ndsøjkpy nwindson'ajtim, wa'ats mets ja xnijawi.

Jøts ja ojts ñii'mxyi ja nwindson'ajtim Jesús:

—Winets ø xnøø'møøjyit xuu'møøjyit ja nja'.

17 Jøts ja midigøøk ojk yiknimaay ja Jonás myajnk:

—Simón, ¿xtsojpk øts?

Winetnimts ja Pedro yjotmay'oo'kpijky, ku ja midigøøk ojk yide'en yiktøøji ja nwindson'ajtim pøni chøjkpy ja', jøts ja tnimaay:

—Windsøn'ajtim, mets tuki'iyi mnija'wip. Mnija'wipxi wa'ats jøts ku ndsøky.

Jøts ja nwindson'ajtim Jesús wyaañ, jøts ja ñimaajyøø:

—Mets ndanipijky amuum, jøts xnøø'møøjyit xuu'møøjyit ja nbabøjkpitøjk.

18 Janch idø'on nnøjmi, jøts ku y'ijty mjaak'una'jk'atynim, yikxon y'ijty mjaaknaxyøxyi jøts mniikxy pøni ma køø'm xtsøky; kuts ja mōjaa'y'ajtin xpatnit, jøts mxajtøønit, wyenkpits mets ja mwet mmo'ojyiyip jøts ja myiknøjkxit ma me ka'ap mjanøjkxwa'añ.

19 Ku ja nwindson'ajtim Jesús jade'en wyaañ, ja' idø'on ja yjatijpy sa ja Pedro ja o'jkin tpaatt ku yikøyakt, jøts ja Dios jade'en yikmøjawit yikunuu'kxyjawit. Jøts ja ojts ñii'mxyi:

—¡Paduujnik øts yø nja', kidi øts xmajtstu'uty!

Ja Jesús pyabøjkpi midí janchminamyaajyip

20 Xjats ku ja Pedro y'ejxjimbijty, jøts ja ojts t'ixy jøts ku øts nbamiñ midí ja nwindson'ajtim Jesús janchminamyaajyip. Øts ja nwindson'ajtim Jesús jam wyinaty nbutsinaapy ku øøts wyinaty xøjøøjty n'a'ux'aty, jøts øts wyinaty nwindson'ajtim n'amidøøy: "Windsøn'ajtim, ¿pøn idø'on mga'ødyunwajnip?"

21 Jøts ku dø'on ja Pedro ja ojts y'ijxyi, winets ja Pedro tnimaay ja nwindson'ajtim Jesús:

—Windsøn'ajtim, jøts yø', ¿sats yø yjatt?

22 Jøts ja nwindson'ajtim Jesús ja ojts yide'en y'adsøyi:

—¿Ti mets yø xunk'aty, njadyimyjayikjujky'aty øts yø' nay jaa ku ø nme'ent jadigojk? Tujnik øts yø nja' tu'ugyi.

23 Xjats ja ayuujk yøøgyøjy, jøts ja jade'en tnimadow'atti pøn jaty ja nwindson'ajtim Jesús ya' pabøjkpi, jøts ku ja'abi pabøjkpi ka' y'oook. Ka-jade'enipts ja nwindson'ajtim Jesús wyinaty tø tnøjmi ja Pedro jøts ku ja'abi pabøjkpi ka' y'oook, pø yide'enxi ja wyaañ jøts ku ka' ttunk'attit pøni sa ja yjatt.

24 Øts idø'on Juan, midí'its idø'on ya'at ayuujk njaadyampy, pø tiy janchxi dø'on yø'. N'ejx nnija'wiyii'ñ øøts ku jade'en yjajty.

25 Jaanim yø may ti jaty ja nwindson'ajtim Jesús tyuun, ku ja jeexyip jade'en tø tyimykja'ay piy køñ, mayts nøky jeexyip chøkyi jøts yikjaagyøxt sam yjajty kyubejty. Jade'en idø'on ja yjajty.

SA CHINAADYI JA JESÚS KYUDANAABYI

Ku ja Dios Teety ttamiwandaagi ja naxwii'ñit jaa'y ja Espiritu Santo

¹ Migu'uk Teófilo, ja nõky midí øts ojts nj'a'y mijawyeen, ja' øts jap nguja'ayigyøjx ti jaty Jesús tyuun ku ja tpadøjkiy'iñ ja tyunk, sa jaty ja tyik'ixpijky

² kunim ja chajpajtñi. Ku ja wyinaty ka'aním ñijky jap tsajpjøtpy, winets ja jawyeen twiwejtskijxy twigongijxy ja jaa'y pøn idø'on ja wyinaty nadyagu-gaxwajniyip, ojts ja tkajpxwijy sa jaty idø'on ja y'adø'øtstit ku ja tyu'undit, Espiritu Santo ja ja'gyujkin ja møøjyidi.

³ Xjats ku ja Jesús wyinaty tø yja'oo'kni, ojts ja tpaaty ja kyudanaabyi jadigojk jade'ením sayim idø'on ja yjaa'y'atyin, wixijkyøøw ja jam ñanky'ejxiyøø, jøts ja jade'en wa'ats ttuk'ixy ja ty'ajtin ja kyudanaabyi ku ja ejtp yjujky'aty; jade'en idø'on ja jam ttukmadoogijxy ja kyudanaabyi sa jaty ja y'ejxi tyiyi, ja Dios kyutujk midí ja tyanitanaapy ja yjaa'y.

⁴ Ku dø'on ja jade'en tjaakmøøtsinaay ja kyudanaabyi jøts ja t'ane'ljmy jøts ja ka'ap ñøjkxtit ma ja kajp txøøwi Jerusalén. Yide'en ja tnimaay:

—M'awejtixt ip idø'on ja' midí øts nDeety tø mdamiwanda'agyidi, midí kawinaak ojk meets tø ndamimadya'aky.

⁵ Janch idø'on ja' ku ja Juan ttuktanøbejty ja nøø, jøts tsojk meets nøjkk nduktatøkidi ja Espiritu Santo.

Ku ja Jesús chajpejty

⁶ Xjats ku ja pyabøjkpitøjk jam wyinaty tø tminabyaadyidi ja wyindsøn, winets ja tyiktøødøø jøts ja tnimaadyøø:

—Windsøn, zγamnín inet ja Israelit kajp xmo'ot jøts ja kø'øm jadigojk ñay'ana'amiyidit, jøts ja kø'øm ñankyutujkxiyidit pøni ti ja kø'øm tyunwandip?

⁷ Xjats ja Jesús y'adsøø jøts ja wyaañ:

—Ka' meets ja mbaat'aty jøts meets ja xnijawit pøni juuni ja Dios Teety jade'en y'adø'øtst, pøni ti xøøw pøni ti po' ja jade'en ttunwa'ant. Ja' ti tu'ugyi tñija'wip, jøts ja' tu'ugyi tmøøt'ajtp ja møk'ajtin jøts ja jade'en ttu'unt.

⁸ Ku meets ja Espiritu Santo wyinaty tø mnimiñi, winets meets ja nøjkk jatyi mmø'øyi ja møk'ajtin jøts øts xniga'ama'adyit jawyeen jam Jerusalén, nayide'enmi tuki'iyi wine'enin jam chøønidi Judeit etjotp, sam nayide'en jam Samariit etjotp, winetnimts øts xniga'ama'adyit ømyadsowi mabaat naxwii'ñit y'øjx y'oojk.

⁹ Tø ja Jesús wyinaty jade'en wya'añ, wa'ats idø'on ja pyabøjkpitøjk ja wyinaty ixjam y'ijxy ku ja chajpejty; jøts ja jadi'iñi yoots yik'adigø'øñiyøø, jøts ja pyabøjkpitøjk ja jade'en nima kya'uk'ejxpajtñiyøø.

¹⁰ Ixjam idø'on ja wyinaty øy pyat'ejxti ku ja Jesús jade'en chajpejty, winets yaa'dyøjk namaajtsk adsu'jky kyaxø'ktøø ma ja jam wyinaty, ankilis ja'adi, jøts tumboop wet ja wyet'ajttip,

¹¹ xjats ja yide'en ñimaajyidøø:

—Meets Galile'it jaa'dyi, ztiku yø tsajp jade'en xpat'ejxti? Tøxi x'ejxti ku ja Jesús tø pyatøki jap tsajpjøtpy, z'kidi? Nayide'en ja nøjkk jadigojk myiñ sa ja tø pyatøki tsajpjøtpy.

Ku ja Matías yikpiktaajky jøts ja tkudanit ja Judas oo'kpi

12 Xjats ja jam kojpkøjxp choo'ndøø midi txøøw'ajtp Olivos, jøts ja ojts ñøjkxti Jerusalén, jade'enin ja ojts tniyø'øyiidi waani sã ja yø'ødyi ku ja poo'kxin xøøw tpaaty.

13 Xjats ku dø'øñ ja jam yja'ttøø kajpjotp, winets ja kyøxpajttøø jap nipatøkijxpy ma ja Pedro jam wyinaty tø yja'ta'akti møøt ja Jacobo, møøt ja Juan, møøt ja Andrés, møøt ja Felipe, møøt ja Tomás, møøt ja Bartolomé, møøt ja Mateo, jøts møøt ja yjadu'ukpi Jacobo pøn ja Alfeo y'u'nk'ajtpy, jøts møøt ja Simón zelote, jøts nayide'en møøt ja Jacobo y'uch Judas.

14 Niduki'iyi dø'øñ ja jam jade'en xyiminamyukyidi jøts ja Dios'ajot'ajtmukti jøts ja wyinmaa'ñ ja tu'ugyi tyik'etti møøt ja Jesús myigu'ukti, møøt ja María midi ja tyaak'ajtpy, jøts møøt nayide'en winaagin ja tø'øxyøjkti, jade'en idø'øñ ja jam wyinaty xyimidios'ajot'ajtmukti.

15 Xjats idø'øñ ja Pedro winet'et tyanaagyukyiyi'ñ jam jaa'y agujkp pøn tjanchja'widip ja Jesús, jam idø'øñ ja jaa'y wyinaty ni mago'pxy ja ee'pxindi, jøts ja Pedro jade'en kyajpxwa'kxy:

16 —Meets migu'uktøjkti, tø dø'øñ ja jade'en yjanchjaty sã ja Dios kya-jpxy wya'añ, ku ja Espiritu Santo jap jade'en kø'øm wyaañ, midi ja David kyajpxnajx ku ja ojts tniadya'aky ja Judas, ja' pøn tuu'waa w ja jaa'y jøts ykmatst ja Jesús.

17 Øøts idø'øñ nmigu'uk ja' ja Judas pøn idø'øñ jade'en adøøjts, nayi ya'atpi tunk ja y'ijty tyumpy midi øø ndumpy.

18 Xjats ja ñøjknãã jøts ja ojts tjuy naajx, ja meeñ ja tyagujuuy midi ja ojts yiktamijuy ku ja Jesús ja jade'en tkøyajky; jøts ja nay jam kyidaay, winets ja kø'øm ñañajtskuwojpiyøø, jøts yjoojt ja kyij'ch jøts ja tyiinch pyidsømgijxy.

19 Xjats ja jaa'y ja jade'en tnija'widøø pøn jam wyinaty tsinaadyip Jerusalén, winets ja tyikxøbajttøø ja naajx Acéldama, midi tyijpy Ni'jpkwym, jade'en ja ttejtti ku kyø'øm ayuujk ja tkajpxti.

20 Jøts ja David yide'en jap ja nøky tyikwa'añ ma ja Salmos jap yikuja'ayi:

Wan ja tyøjk abak ttañ,

wan jap pøn tkidyimchøøni.

Wan tmatstutu tyunk jøts jadu'uk ja jaa'y tyøkit tumbi.

21 Paty øøts ya'at jaa'y nidu'ugin nyiktunwa'añ pøn øøts jeky tø xpawidity, wine'en øøts ja nwindson'ajtim ya tø x'atsmøøtsøøni,

22 jaayip øøts yø jade'en xmøøtwidity ku nwindson'ajtim ja Juan ojts yiknøbetyi, kunim ja tø pyatøki jap tsajpjøtpy. Paty øøts ya'at jaa'y nidu'ugin ndsøky, jøts øøts yø møøt ngajpwa'kxt ku ja nwindson'ajtim tø pyidsimy jadigojk jap oo'kpi jutjøtpy.

23 Ku ja Pedro jade'en wyaañ, xjats ja twi'ejxtøø namajtsk ja jaa'y pøn ja nidu'ugin pyikta'akwandip: ja José ojts yikwawich pøn tigøøk ja xyøøw, Barsabás ja yiktijy jøts nayi yiktejp Justo, ja Matías ja ojts møøt yikwawich.

24 Xjats ja jaa'y yide'en t'ajot'attøø ja Dios U'nk:

—Nwindson'ajtim Jesucristo, mets mnija'wip sã jaty pøn jadu'uk jadu'uk wyinmay, yø jaa'y ixa øøts tø nwiwich namajtsk, tuknija'wik øøts pøni pøn me mdsøjkpy,

25 wan ja tunk tuu'ñ midi ja Judas tø tmatstutu, ja'agøjxp ku tø pyøktuyñ jøts ja tø ñijxxy jap ma ja pyaa't'aty.

26 Winets ojts nidu'uk yikpikta'aky ja ñamajtskpi jaa'y, ja Matías ojts tyaja'adyiyi ja tunk, winets ja ojts yiktabuwetsi ja ñimaktu'ukpi jaa'dyi pøn ja nwindson'ajtim Jesucristo tkudanaadyip.

2

Ku ja Espiritu Santo myiñ

¹ Ku ja Pentecostés xøøw tpaajty, tyimwyinet'et idø'øn ja Jesús kyudanaabyi wyinaty niduki'iyi tø ñamyukyidi jap tøjkjøtpy

² ku adsu'jky tmdoodøø jøts ku y'amu'uy jade'en sam ku møk pyøjyin, japts tsajpjøtpy chøøñ, jøts ja tøj jam amuum ñojktaajky ma ja jam wyinaty tø ñamyukyidi.

³ Winets ja jade'en t'ejxpatti ejxim ja jøøn yowin, tu'uk tu'uk idø'øn ja jade'en tmøøt'atti kyubajkp. Ja tu'ukpi jøøn idø'øn wyinaty tø ñawya'kxyi.

⁴ Xjats ja niduki'iyi tyatøjkijidøø ja Espiritu Santo, jøts wenk ayuujk ja jaty: tkajpxtøø sa jaty ja pøngapøn yik'awijyi ja Espiritu Santo.

⁵ Jamts idø'øn wyinet'et ja jaa'y wyinatyøø jam Jerusalén pøn nayi israelit jaa'dyi, ja ku abikyajp chinaañidi, ka'ap ja jam wyinaty y'ukugajp'ajtnidi.

⁶ Ku ja jade'en tmdoodøø y'amu'uy kyida'aky, winets ja t'anøjkxidøø ma ja tmdoodøø y'amu'uy, kuts jam yja'ttøø, ka'ap ja jam y'ukwinmaa'nbyatnidi, ja'agøjxp ku ja tmdoodøø ja y'ayuujk yikajpxti, pøni sa jaty ja nidu'uk nidu'uk t'ayuujk'atti. (Jade'en ja kyajpxwa'kxtøø ja jaa'y pøn tjanchja'widip ja nwindsøn'ajtim Jesucristo.)

⁷ Xjats ja jadi'iñi myondi y'ookti, jøts ja xem yam nawyajnidøø:

—¿Ti kidi ja Galile'itjaa'yip ya'atti ixa jade'en kyajpxti?

⁸ ¿Sudso yø jade'en tkajpxti yø ayuujk midi adøm nidu'uk jaty ngajpxyindip, sa jaty pøngapøn ja y'ayuujk tø t'anuweji?

⁹ Ixa ja jaa'y ixyamdi pøn kugajp'ajttip jam Partia, jam Media, jam Elam, ma Mesopotamia, jam Judea, jam Capadocia, jam Ponto, jam Asia,

¹⁰ jam Frigia, jam Panfilia, jam Egipto, ma jaty kajp jam Africa, jambaat yø kyugajpidi jam Cirenit kajp ixkø'øm. Nay jats ja romanosti pøn ya tø kya'axti, pønts ya tø yjagaka'axti tø ja israelit jaa'y ja chinaa'yin tpadøjkiñidi.

¹¹ Nay jaa ja jaa'y ya tø yja'atti midi tsoo'ndip jam Creta, jam Arabia; niduki'iyi yø jade'en tø nmadøø'yindi ku yø tñigajpxti tñimadya'akti ja Dios myøk'ajtin, jøts jade'en xmigajpxyindi sa adøm n'ayuujk nidu'uk nidu'uk.

¹² Jade'en ja nawyajnidøø, nigyumaap idø'øn tyimya'widøø, jadi'iñi ja kya'ukwinmaa'nbyatnidi xjats ja xem yam ñañimaajyidøø ti dø'øn tuujnip.

¹³ Jamts ja jaa'y jadu'ukti pøn ttaxektip, yide'en ja ñawyaa'miyidi:

—Mujkidip yø jaa'y, paty yø jade'en y'amu'ugyikajpxti.

Ku ja Pedro ojts kyajpxy jam mayjaa'y agujkp

¹⁴ Ku dø'øn ja jaa'y jade'en ñawyajnidøø, winets ja Pedro wya'kukidøø møøt ja ñimaktu'ukpi myigu'uk, jøts møk'ampy tmigajpxy ja mayjaa'y, jøts tñøjmi:

—Meets Judeit jaa'dyi, jøts nayide'en niduki'iyi pøn jaty ya tsinaadyip Jerusalén, ukja'gyukidi yikxon midi øts ixyam nnigajpxwampy.

¹⁵ Ka'ap øøts nmu'ugyi sa meets nugo mjawinmay, nipøn jøpyi kyamu'ugyi, apeni xøøw ixa pyetyñim.

¹⁶ Jajtp idø'øn ixyam jade'en sam ja Dios Teety tñimaay ja kyugajpxy, pøn txøøw'ajt Joel, ku ja jade'en wyaañ:

¹⁷ Ku wyinaty ja naxwii'ñit tyigatswani,

winets øts ja'abi xøøw møk'ampy ja naxwii'ñit jaa'y nduktatøkit ja n'Espiritu Santo ømyagajpi;

nyikugajpxy'atp øts ja mutskuna'jktøjkti,

jøts ndukwinguma'ap øts ja wajtyøjkti kiixyi'idi sa wyinaty yjatwa'añ ya naxwiiñ,

jøts nayi xwinguma'adip øts ja møjaa'dyøjkti.

18 Xjats øts nay ja'abi xøøw møk'ampy nøjkx nduktatøkidi ja n'Espíritu Santo ja'abi dø'øndi, pøn øts nja' wyinaty amumjoojt xpadunwajniyidip, ja'ats øts n'ayuujk nøjkx møk'ampy xkajpxwa'kxiyidip, øy ja yjaya'a'dyøjki øy ja yjatø'øxyøjki.

19 Nanky'ejxip øts jam tsajpwemp ja nmilagri'ajtin, jøts nayide'en ya naxwiin nnanky'ejxit ku ja ni'jpy yø'øty, jøts ja jøøn mye'ent, winets yjojkt'a'atst.

20 Jøts ja xøøw y'ookt, jøts ja po' ni'jpyin kyaxø'økt, ku dø'øn jade'en yjatt winets ø nme'ent, pø øtsxi mee xwindsøn'ajtp, jøts nyikjatt ja xøøw sam nijuuni xka'ejxtinim.

21 Jøts niduki'iyi pøni pøn jaty ø xminuu'kxakp, ja'ats ø nyiknitso'ok'attip. Jade'en ja Joel ja Dios kyajpxy y'ayuujk tyiknajxøø.

Xjats ja Pedro yide'en tjaaknimaay ja myigu'uk:

22 — Jaak'ukmadowdi meets Israelit jaa'y midi øts njaaknigajpxwampy: Ja Jesús Nazaretit jaa'y, tø ja Dios Teety ja myøk'ajtin myø'øyi, jøts janch tsuj janch møj ja milagri'ttuñ, jøts may ja ejxa'añ jade'en mmø'øyidi Dios Teety myøk'ajtingøjxp, paty xnijawidit ku ja Dios Teety møøt y'ity.

23 Xjats ku meets ojts myikø'mø'øy, ti nduu'nimp, tø yjaty kyubety tuki'iyi pøni sa ja Dios Teety kø'øm tpiктаajky jekyip, jøts nay ja' meets ojts xmach jøts xtsumdøø xäidyøø, jøts ja ka'øybi jaa'y xukyik'ookti jam kruskøjxp.

24 Xjats ja Dios Teety ojts jadigojk tyikjujkyiky, jøts tyik'awa'atspidsiimy jap oo'kpi jutjøppy; ja'agøjxp ku ka' pyaat'aty; jøts ja o'ljkin xemikøjxp tkupøkt.

25 Yide'en ja rey David ojts ja Dios Teety yikugajpxy'aty; sa ja Jesús kyajpxy y'ayuujk:

Mets Teety, ejtp me møøt njuky'aty m'aga'ngyø'ampy;

jøts ka'ap øts pøn x'adsø'øgit.

26 Paty øts n'anmija'win janch jotkujk nnayjawiyi, jøts øts ja nxondaajkin jade'en nnigajpxy.

Øy n'ookt, ka' ti jotmay njagyapt;

27 ja'agøjxp ku mets ka'ap ja n'anmija'win xyikta'ant ma oo'kpi yja' tyandi, jøts nika'ap øts nnine'kx xyikwindigøøjyiyit, pø øtsxi me xtsøky'ajtp.

28 Tø øts xuknijawi ku njukyøkt jadigojk ku wyinaty tø n'øøky,

jøts nayide'en xyikxonjatt ku mets xemikøjxp nmøøt'ett.

Jade'en ja David tyiknaajx ja Jesús kyajpxy.

Xjats ja Pedro tjaaknimaay yide'en ja myigu'uk:

29 — Migu'uktøjkti, wa'ats yiknijawi ku adøm n'apteety'amøj David ojts y'øøky jøts ñaxøkiy'ñ, nay ja n'ijxyindi ma ja yjut ma ojts ñaxøki.

30 Ja David, ja' Dios kugajpxy'ajtiyøø jøts ñija'wip sa wyinaty ja Dios møk wyanda'aky, ku wyinaty tu'uk y'ap yikpikta'aky yiknitsokpi ya naxwiin, jøts nayide'en yikutukt sami David kyutujkin.

31 Jade'en idø'øn ja David jekyip tnijawi, jøts jade'en tnigajpxy ku ja Cristo yjukpyøkojmit jøts ni ja ñine'kx kyawindigø'øty.

32 Pøn ja David ñigajpx ñimadyaajk, ja Jesús idø'øn ja', ja' idø'øn ja Dios Teety tø yikjukpyiky, pø tøxi øøts ja wa'ats n'ixy, pø tøxi øøts ja wa'ats nnijawi.

33 Jøts ja Dios Teety ja nayide'en yiktsajpajtøø jøts pyiktaajkøø y'aga'ngyø'ampy, jøts jade'en ja møj kutujk myø'øyiyi; jøts ja' tkajxp ja Espiritu Santo ya naxwiin midi ja Dios Teety wyinaty kø'øm tø twanda'aky, jøts ja' idø'øn ja myøk'ajtin yø' midi ixa m'ejxtip mmadoodip.

34 Pø kidi ja Davidipxi kø'øm tsajpajt, ja'ayi ku David ojts yide'en wy'a'añ ku ja nwindsøn'ajtim Jesús ja Dios Teety yide'en ñimaajyiyi:

“Ʒa'ak, jøts ø xputsøønit n'aga'ñ'ampy,

³⁵ jøts øts yø mmidsep nmimajadaøkøxt.”

³⁶ Meets Israelit jaa'y kuwani niduki'iyi ka'pxy xnijawidit, jøts ku ja Jesús pøn meets kø'øm mdukyikruspajt ja abiky jaa'y, ja' yø' pøn ja Dios icyam tø kø'øm tpikta'aky møj windsøn jøts yiknitsokpi.

³⁷ Ku dø'øn jade'en tmadowdi ja Pedro kyajpxy, winets ja jotmay ty-atøjkijidøø, xjats ja Pedro yiknimaay møøt ja ñimaktu'ukpi myigu'uk:

—Migu'uktøjkti, ¿sudso'ampy øø ndu'unt?

³⁸ Xjats ja Pedro t'adsojimbijty jøts tnimaay:

—Yø mbøkyu'unin mmajtstu'uttip, jøts mnøbattit nidu'uk jaty Jesús xyøøgøxp, jøts jade'en myikpojkipimaa'kxtit; jøts nayide'en ja Dios Teety mduktatøkiyidit ja y'Espiritu Santo.

³⁹ Meets m'øy'ajtjn yø', møøt m'u'nk møøt m'una'jkti, jøts nayide'en pøn jaty jagam tsinaadyip; uk niduki'iyits ja'adi pøni pøn jaty ja Dios Teety kø'øm wyiwetswampy.

⁴⁰ Yide'en idø'øn ja Pedro ojts tkajpxwijy ja jaa'y, jøts tnimaay:

—Majtstu'utti yø'øbi jaa'y pøn ja nwindson'ajtim Dios yja' tkajanchja'widip.

⁴¹ Xjats ku ja Pedro jade'en tnimaay, winets ja jaa'y ñøjkxtøø nøbajtpi pøn jaty tmibøjktøø ja Pedro y'ayuujk; ja'abi xøøwts ja Jesús yja' ojts ñamay nidigøøk mil.

⁴² Niduknaç idø'øn ja t'ixpøkti sa ja Jesús kyudanaabyi y'awa'andi, jotkujk idø'øn ja jam tu'ugyi chøønidi, jøts ku ñamyukyidi dios'ajot'ajtpi, jøts ja tsapkaaky tkaydi Jesús y'oo'kingøjxp.

Sa chinaadyi ja myijawyembi ja Jesús janchja'wibidi

⁴³ Xjats ja jaa'y ñigyumaap idø'øn ja tja'widøø ku ja Jesús kyudanaabyi ja mamylagri tnanky'ijxyidi.

⁴⁴ Tu'ugyi ja wyinmaa'ñ ja tyik'etti pøn jaty ja Jesús yja' tpabøjkijip jøts ñadyagumayidi ja pyikta'aky;

⁴⁵ jøts ttookti pøni ti jaty pøn myøøt'ajtpy, xjats jade'en ja nimeeñ tyikwa'kxidøø pøni sa jadu'uk jadu'uk yja' kya'ity.

⁴⁶ Jabom jabom idø'øn ja jap ñamyukyidi møj tsaptøjkjotp, jøts nayide'en awingujk tøjkjøtpy, jøts ja chapkaaky jap tyikwa'kxti, jøts jade'en ejtni xoni kyaydi, jøts jade'en nipøn kyanamyøjpikta'agyiyi.

⁴⁷ Jøts ja Dios Teety jade'en tjanchkajxa'akti jøts ja kajp jaa'y jade'en yjanchøkyidi; jabom jabom idø'øn ja nwindson'ajtim Jesús tyikmayi ja yja' pøn jaty yikpojkipimaa'kxtip.

3

Ku ja pakma'at jaa'y choknaa

¹ Tuk'ojk idø'øn ja Pedro ojts tmøøtnijkxy ja Juan jam tsaptøjkjotp, wyinaky xøøw ja ñøjxtøø wine'enin ja jaa'y jam wyinaty xyuminamyukyidøø dios'ajot'ajtpi.

² Jamts idø'øn wyinaty tu'uk ja jaa'y pøn ja tyeky ma'at. Ejtp idø'øn ja jam xyumiyikwaanijkxy jam tsaptøjk agø'øm ma ja tsaptøjk'aaaw jam midit txøøw'ajtp Hermosa. Jamts ja myigu'uk yiktaajniyi, jøts ja jam yiklimunsimuky ku jam pøn tyøki tsaptøjkjotp.

³ Xjats ku ja pakma'at jaa'y ojts t'expaaty ja Pedro møøt ja Juan, ku ja jam wyinaty tyøkiwya'andi tsaptøjkjotp, winets ja t'amidøø ja limunsi.

4 Xjats ja Pedro møøt ja Juan twin'ejxjø'øktøø ja pakma'at jaa'y, jøts ja Pedro wyaañ:

—Win'ejxk øøts.

5 Xjats ja jaa'y yjanch'ejxji'jky, yide'en ja wyinmaay, yikmo'op idø'on ja tijy øy ti yiin waan.

6 Winets Pedro ja ñimaajyøø:

—Kidi meeñip øø nmíwídiijtpy, ja'abi øø ndumpy midí øø xukmíwídejtp ja nwindson'ajtim Jesús pøn ojts chøøni jam Nazaret, pidø'kni jøts myø'øñit.

7 Xjats ja Pedro ja jaa'y tmajch y'aga'ngyø'køjxp jøts ja twejtsji'jky, ja'ayi ja jade'en ttuuñ winets ja tyeky ja jatyí wya'kmøkiyíñ, jatyí tyekyo'kt ja myøpkijky.

8 Xjats ja pakma'at jaa'y jade'en kanimøjaaw yjanchwo'onji'jky, jøts ja tyanaagyukiyíñ, jatyí ja ojts yø'øyyi'iky. Xjats ja tmøøtøjkidøø jap tsaptøjkjøtpy, ñiyukwo'oni ñichajpwo'oni ja jap t'ajot'aty ja Dios.

9 Niduki'iyi jaa'y ja ojts t'ejxti ku ja pakma'at jaa'y jade'en yø'øy, jøts ku ja jade'en tjanchtukmøjawi tjanchtukunuu'kxyjawi ja Dios.

10 Xjats ja ñigyumaap tyimya'widøø pø mā ja tyimñayja'widøø ku dø'on jade'en wyinaty tø yjaty. Ja'widip tsø'jkidip idø'on ja jamdi, kumi ñija'widip ja wyinaty ku ja yja'aji pøn jam wyinaty xumiyikmujkp jam tsaptøjk agø'øm, mā ja tsaptøjk'aaw jam midí txøøw'ajtp Hermosa.

Ku ja Pedro kyajpxwa'kxy jam møj tsaptøjk agø'øm midí yiktejp Salomón Tyøjkweenk

11 Ja pakma'at jaa'y pøn idø'on wyinaty tø myøpkiky, ka'ap ja t'ukmajtstutni ja Pedro jøts ja Juan, winets ja jaa'y pyujtmendøø mā dø'on ja jam wyinaty, jadi'íñi ja myondi tyukti paty ja jam myendi tsaptøjk agø'øm midí txøøw'ajtp Salomón Tyøjkweenk.

12 Xjats ku ja Pedro jade'en ojts t'ixy ja jaa'y, winets ja tñimaay:

—Israelit jaa'dyi, ¿tiku ñigyumaap xjawidi? ¿Tiku øø xwin'ixy, yide'en meets idø'on yjawi mwani, øøts idø'on yø xijy kø'øm møk'ajtin tø nduktatsø'øky yø jaa'y ku yø tø yø'øbyiky, uk ja' øøts idø'on yø xijy tø nduktatsø'øky ku øøts ja Dios janchtsuj n'ajot'aty?

13 Ka'ap yjade'eni, ja Dios Teety jade'en tø tmø'øy møk'ajtin ja y'U'nk Jesús, ja Dios Teety pøn adøm n'apteety'amøj Abraham Dios'ajtip, møøt n'apteety'amøj Isaac, jøts nayide'en møøt ja Jacobo. Ja' y'U'nk ja myøk'ajtin jade'en tmøøt'ajtp, ja Jesús pøn ja Dios Teety y'U'nk'ajtpy, ja' pøn meets mgøyajk jam yikutujkpi wyindum. Jøts ku ja Pilato ja wyinaty tjamajt-stu'twə'añ, ka'ats meets ja xnankyikpidsøjmi.

14 Ja' mee ne'egi myik'awa'atspidsøøm pøn wyinaty tø tyundigøy, jøts meets ja ka'ap xnankmyajtstuujtøø pøn wa'ats, pøn katundigøøpy niwine'enin.

15 Jade'ents meets ja xyik'ø'jky ja yikjujky'ajtpi. Jøts tø Dios ja jadigojk yikpidi'igyí jap oo'kpi jutjøtpy, tø øøts idø'on ja jade'en ndyimybyaaty ndyimy'ixy, øøts idø'on ñamyayi nøjxpx testigi.

16 Ja' idø'on yø jaa'y jade'en tø yikmøpkiky ku yø tø t'ajot'aty, ku yø tø tmø'øpikta'aky ja Jesús. M'ijxy'ajtip mnija'widip yø pakma'at jaa'y jøts ku tø yikmøpkiky, jøts ixa dø'on jade'en x'ejxti møk møjaaaw.

17 'Migu'uktøjkti, wa'ats øts ja nnijawi ku meets ja mwindsøn møøt mnabyudøjkiyidøø, jøts meets ja Jesús xyik'oo'ktøø, nugo ja jade'en xundøø, ni xkanijawi meets ja' pø tigøjxp jade'en m'adøtstøø. Ka'ap meets ja xnijawi pø tidam meets idø'on mjatumpy.

18 Xjats ja Dios tø tjanchyik'aduky ja wyanda'aky ku myagyajpxnaxpi ja tyikwaañ: jøts ku ja yiknitsokpi wyinaty jade'en y'ayo'ombaatwa'añ.

19 Paty mbøktyu'unin xmajtstu'uttit xyiktigatstít ja mdsinaa'yin, ja'myatsti ja Dios Teety jøts ja tyakt ja øxyøøw ja øyjumøjt,

20 jøts ja tkaxt ja Jesús pøn ja wyinaty jekyip tø ttanibiktaagi jøts adøm ja xyiknitsok'ajtindit.

21 Øy idø'øn ja Jesús icyam ndejint tø yjatañ jap tsajpjøtpty, jaanim ku ja Dios Teety ja kø'øm tyik'øyigyøxt pøni ti dø'øn ja tyunwampy, jade'en sa ja myagyugajpxy ja kø'øm t'agajpxiyi'ñ ku ja jade'en wyandøø pøn jaty tsinaadyøø jekyip.

22 Jade'en adøm n'apteety'amøj ojts yiknimaa'yindi ku Moisés ja ojts ñii'mxyidi: "Mdanigaxidip ja Dios Teety tu'uk ja kugajpxy, meets mgø'øm migu'uk nøjxk kø'øm yikpikta'aky jade'en sa ø kø'øm nyikpiktaajky. Mimado'odip idø'øn ja' pøni sa jaty ja wyinaty mñii'mxyidi,

23 pøni pøn ja wyinaty tkamimadoop, ka'ap ja t'ukmøøtsinaañidit ja myigu'uk, kuwani ja jaty wyindigø'ødyit."

24 Jade'en idø'øn ja Dios kyugajpxy wyandøø, ja' idø'øn ja ñigajpxtøø sa jaty yjatt kyubatt, ti jaty tunip ya'atpi jumøjt, jaayip ja jade'en wyangaktøø ku ja Samuel jade'en jawyeen wyaañ.

25 Tum meets ja Dios kyugajpxy m'u'nk'ajttip, jøts paty ja Dios ojts tpiakta'aky tu'uk ja kutujk midí ja aptøjk ojts yikmo'odi, jøts meets kidi xyikwindigøy ja m'anmija'win jam Dios wyindum, yide'en idø'øn ja Abraham Dios ojts ñii'mxyi: "Tuki'iyi ja teety ja taak, ja u'nk ja una'jk nøjxk yikunuu'kxkøxti mets m'ap mets m'una'jkøjxp."

26 Ku ja Dios tyikpidsiimy jadigojk ja y'U'nk Jesús jap oo'kpi jutjøtpty, jawyeen ja ojts mdaniguexyidi jøts ja mgunuu'kxidit, jøts niduki'iyi xmajtstu'uttit ja mga'ødyu'unindi.

4

Ku ja Pedro møøt ja Juan ojts twingunøjxkidi ja kudunktøjkti

1 Nay ixam idø'øn ja Pedro ja jaa'y wyinaty tmigajpxti møøt ja Juan, ku ja teetyøjk jam myendøø møøt ja tsaptøjk ejx'ejtpi windsøn, jøts møøt ja saduceotøjkti.

2 Tø dø'øn ja wyinaty yikxon yjanch'ambøkti, ja'agøjxp ku ja Pedro møøt ja Juan tyik'ixpøkti ja jaa'y, ku ja wya'andi jøts ku oo'kpi pyidsø'ømdit jadigojk jap oo'kpi jutjøtpty, kumi tø ja Jesús wyinaty kø'øm pyidsimy jadigojk jap oo'kpi jutjøtpty.

3 Xjats idø'øn ja ojts yikmajtsnidi jøts ja yiktsumnidøø, kyimjabomnim ja yiktiidyundøø kumi tsuu'nip wyinaty ku ja yiktsumdøø.

4 May jaa'y idø'øn wyinaty tø tjanchjawidi ja øgyajpxy ja ømyadya'aky, pøn jaty ja wyinaty tø tpatmadowdi; jawaani kamagoxk mil ja yikma-choopidsiimy ja yaa'dyi pøn tjanchja'widi ja nwindson'ajtim, ku ja wyinaty tø tmadowdi ja øgyajpxy ja ømyadya'aky.

5 Xjats ja'abi xøøw winets ja windsøndøjk ñamyujkidøø jam Jerusalén midí t'ana'amdip ja kajp, nay ojts idø'øn ja mayjaa'y jam myendøø, møøt ja kajpxwejpitøjkti midí tundip jam tsaptøjkjøtp;

6 nay jam idø'øn ja Anás wyinatymi pøn ja teetywindsøn'ajtip møøt ja Caifás, møøt ja Juan, jøts møøt ja Alejandro, niduki'iyi ja jam wyinatyi niwinø'øn ja pyaat'atyidi ja teetywindsøn'ajtk.

7 Xjats ja Pedro yiknajtswa'widøø møøt ja Juan, jøts ja ojts yikpikta'akti jam agujk'am, winets ja yiktiibyøjktøø, yide'en ja ojts yiknøjmidi:

—¿Pøn yø jade'en tø mdanigutujk'atyidi jøts jade'en m'adø'øtstit, pøn jade'en tø m'ane'emyidi?

8 Xjats ja Pedro y'adsøøy, kumi tø ja Espíritu Santo ja wyinaty amuum tyatøkiyi, jøts ja tnimaay:

—Meets windsøndøjkti, meets møjaa'dyøjkti pøn jaty tsinaadyip yä Israel:

9 ku øøts idø'on jade'en tø xyiktiiy sä tø chø'øky yø pamaa'y, sä yø tø yik'ødyuñ,

10 n'adsojimbetp øøts ja m'ayuujk, nnigajpxp øøts yä mayjaa'y agujky, jøts tnijawidit niduki'iyi pøn jaty tsinaadyip yä Israel, jøts yø jaa'y ixa tyani mee mwinduujy møk møjaa'w. Ja nwindson'ajtm Jesucristo ja' yø tø yiktsø'øgyi pøn kugajp'ajtp jam Nazaret, ja' midi meets ojts xyikruspety, jøts ja' Dios Teety tø yikpidsimyi jadigojk jap oo'kpi jutjøtpy.

11 Jade'en idø'on ja Jesús ñamyayi tø ñøjknxi ejxim ja tsaa' midi meets jagam m'ixjibejp, midi mee mgayiktuun jam pøchkyøjxp, jøts ja' ixyam ne'egi tø pyidsimy jadigojk jawaani øy, midi tmach'etkøjxp tuki'iyi ja pøch'aa'w.

12 Nipøn jadu'uk xkayiknitso'ok'ajtm sä adøm Jesús xyiknitso'ok'ajtyindi, pøn ja Dios tu'ugyi tø ttanibiktaagi yä naxwiñ.

13 Xjats ku ja kudunktøjk t'ejxti ja Pedro møøt ja Juan, ku ja jade'en møk'ampy wyingugajpxiyidi, winets ja t'ejxkajptøø kudam ja kya'ixpikyidi, ku ja ñugojaa'yidi, jøts ja jade'en nugo myaydi tyajti, winets ja t'ejxkajptinim jøts kudam ja yja'adi pøn ja Jesús wyinaty tø tmøøtwidetti.

14 Jøts ja jaa'y midi wyinaty tø chø'øky, jam idø'on ja wyinaty tmøøtanidi, paty ja kudunktøjk ka' t'ukmidsepwanidøø.

15 Xjats ja yikajpxidsømdøø mä ja mayjaa'y jam wyinaty tø ñamyukyidi, jøts ja kudunktøjk ja agø'ømyidi tkajpx'øyidøø.

16 Yide'en ja ñawyajnidøø:

—¿Sä yø jaa'y njanchtuu'nindit? Pø tyumnija'winidipxi yø' pøn jaty yä tsinaadyip Jerusalén jøts ku yø jade'en tø tyiktuujnidi ja Dios myøk'ajtm, ¿ti jats adøm ja ngagupijkyim ku dø'on ja jade'en tø yjanchjaty?

17 Wan yø tkajpx'adsø'jka'andi, jøts ja Jesús ka'ap ja yja' y'ukyikajpxyø'øñit jam mayjaa'y agujkp.

18 Xjats ja twaadsøøø ja Pedro møøt ja Juan, ja møk'ampy t'ana'amdøø jøts ja kidi jade'en ja jaa'y t'ukyik'ixpøjknidi, ka'ap ja jade'en t'ukajpxwä'kxinidit ja Jesús yja'.

19 Winets ja Pedro y'adsoøøø møøt ja Juan, jøts ja wyandøø:

—Ukwinmaagyukidim kø'øm pøni tiy tam jade'en, pøni øy tam ja Dios jade'en tjawi ku mee ne'egi myikmimado'ot, jøts ja kyayikmimado'ot.

20 Nijuuni øøts ja ngamajstutt'utt midi øøts jaa'y nduk'ixpøjky, kumi tø øøts ja jade'en kø'øm ndyimyadøy, jøts kumi tø øøts ja jade'en kø'øm ndyimy'ixy.

21 Winets ja kudunktøjk ja ojts kyajpx'adsø'øgyiyidi jøts nigidi'iyam ja ojts tyimykmatsti, yikmajstuttøø ja jadi'iñi. Nigidi ja yikmawinmaa'nbyajtidøø sudso ja tyik'ayo'ombaattit, kumi tsø'jkidip ja', niduki'iyi ja kajp jaa'y wyinaty tkajxaknidi ja Dios.

22 Jade'en idø'on ja pakmä'at jaa'y chøøjky, jam idø'on ja jaa'y yjumøjt ja wyinaty wixijkxy myajtskin pøn ja Dios yiktsøøjkiyøø.

Ku ja Jesús yjanchja'wibi t'amidøøø ja møk'ajtm

²³ Xjats ku ja Pedro møøt ja Juan y'awa'atspidsømdøø, winets ja myigu'uk ja tninøjkxtøø mā ja jap wyinatyi, jøts ja ojts ttamimadya'akti sã jaty teetywindsøn sa jaty mõjaa'dyøjkti ja wyinaty tø ñii'mxyidi.

²⁴ Xjats ku ja myigu'uk ja jade'en tmadoodøø, winets ja niduki'iyi ja Dios t'ajot'ajttøø:

—Kuuyi me Dios Teety jadu'uk møk'ajtin møk xmøødi. Tø xyiknajt-skojigyixy tuki'iyi winø'on ja pikta'aky y'ity naxwiiñ, wan tsajpi, wan tnaajxi, wan tnøøji tmejyi. Tum mets yø mja'ajtpy amuum.

²⁵ Nayi mets ja David ja Espiritu Santo mdukyik'agajpxiyi'ñ ku ja xyikwaañ yide'en:

¿Tigøjxp ku jaa'y kajp kajp nugo jøtkøjxpm t'ejxti pøn ya jagagugajp'ajttip, pønts ya kugajp'ajttip, jøts yø tmidundigøøwymidi ja nwindson'ajtim?

²⁶ Ja windsøndøjkti mididi yikutujktip ya naxwiiñ, ja' tø tmidsepøkti ja nwindson'ajtim,

jøts ja jaa'y mididi t'ana'amdip ja kajp, tø ja ñamyukyidi may'ampy,

jøts ja tnibidø'kti ja Dios Teety, nayide'en ja tmidsepøkti ja yiknitsokpi mididi ja Dios Teety kyejxpy.

²⁷ Jøts janch tø dø'on yjaty, kumi jade'en ja Herodes møøt ja Poncio Pilato tø tminamyukyidi ja wenk jaa'y jøts nayide'en yø israelit jaa'dyi ya mõj kajppjøøjty, ja' idø'on jade'en tø yikmidsepiky ja m'U'nk Jesús pøn janch tsuj janch wa'ats, pøn me kø'øm tø xanibiktaagi yiknitsokpi.

²⁸ Tø dø'on ja jaa'y ja jade'en yjanchtuñi sã mets ja wyinaty kø'øm tø xanibiktaagi jøts ku ja jade'en yjatt, tøts idø'on ja jade'en yjaty.

²⁹ Dios Teety, ejx icyam sã tkajpx'adsø'øgidi ja jaa'y, yikjotmøkpøk yø mdumbi jøts kyatsø'øgidit ku tkajpxtit ja mgajpxy ja m'ayuujk.

³⁰ Mo' møk'ajtin, mo' pudøjkin jøts tyiktso'oktit ja pamaa'y jøts tyikwingaxø'øktit ja Jesús myøk'ajtin.

³¹ Xjats ku ja chapkajpx'abajtidøø, winets ja Dios tyikmiiñ ja uyx mā ja jam wyinaty tø ñamyukyidi; xjats ja jade'en ja Espiritu Santo yikjotmøkpøjkidøø, jøts tkajpxwa'kxidøø amumjoojt ja Dios kyajpxy mā jaty ja wyidejttøø.

Ku ja Jesús pyadumbitøjk amuki ja pyikta'aky tja'ajtti

³² Ja mayjaa'y mididi wyinaty tø tjanchjawiidi ja øyajpxy ja ømyadya'aky, tu'ugyi ja wyinmaañidi, ka' pøn wenk wyinmay, nitu'ugin nipøn ja pyikta'aky tkaja'adijy, tyumja'ajttip idø'on ja niduknax, ka'ap ja pøn tja'aty nadyu'uk.

³³ Jøts ja kudanaabyi: jøtmøk'ampy ja tnigajpxti tnmadya'akti ja nwindson'ajtim Jesucristo, sã ja pyidsiimy jadigojk jap oo'kpi jutjøtpy. Dios idø'on ja yikxon pudøjkin møøjyidip.

³⁴ Jøts nipøn niti kya'ijtxyi, kumi tyoo'ktip ja ñaa'jx ja', kumi tyoo'ktip ja tyøjk ja' pøni pøn jaty jam ja pyikta'aky tmøøt'ajtp, jøts ja ñimeeñ ja tyikmenidi,

³⁵ jøts ja ttagødøkidi ja kudanaabyitøjkti. Ja'ats ja tyikwa'kxtip, jøts ja ttagumaydi pøni pøn jam tigati ka'ejtxiyip.

³⁶ Jamts idø'on wyinaty tu'uk ja israelit jaa'y pøn ja Levi y'apteety'amøjip, José dø'on ja xyøøw, jam ja wyinaty tø kye'exy mā ja naajx jam mõj mejyotp mididi txøøw'ajtp Chipe. Ja'abi jaa'y ja kudanaabyitøjk yikxødigatstøø, jøts ttejtøø Bernabé mididi tyijpy kajpxjot'amøjkibi;

³⁷ ja'ats idø'on tto'jk ja ñaa'jx jøts ja tyikmiiñ ja naxtsow, jøts ja ttagødøjkii'ñ ja nwindson'ajtim kyudanaabyi.

5

Ku ja Ananías jøts ja Safira tmidundigøødyøø ja Espíritu Santo

¹ Jamts idø'øñ wyinaty jadu'uk ja jaa'y pøn txøøw'ajtp Ananías, jøts ja ñidø'øxy Safira txøøwi, ja'ats idø'øñ tto'ktøø ja ñaa'jx tukam.

² Xjats ja kujkwa'kxy tmidanidøø naxtsow, jøts ja ojts kujkwa'kxy ttaninjikxy ja kudanaabyitøjkti, jade'en ja ttanikajpxy jøts ku ja jam ka'pxy, ka'ap ja jade'en ttukmadøy, wa'ats ñidø'øxy ja møøt tnijaw'i ku ja jade'en y'adø'øtsti.

³ Xjats ja Pedro tnimaay ja yaa'y:

—Ananías, ¿tiku miku' tø mdatøk'i'y'i jøts jade'en xjawin'øñwa'añ ja Espíritu Santo, kidi kujkwa'kxyip tø xyikmiñ?

⁴ ¿Ti kidi ja kam xkø'ømnaajxi? Jøts ku tø xøøky, ¿ti kidi ja meeñ xkø'ømja'aji jøts xkøyakt pøni winø'øñ kø'øm xkøyaka'añ? Dios tø xawin'iiñ, kidi øødsip.

⁵ Ja'ayi Ananías jade'en tmadøøy, winets ja jaty'i øøky ñaxkidaajky. Ku ja jaa'y ja jade'en niduki'y'i tmidadoodøø jøts ja yjancho'jikidøø.

⁶ Xjats ja una'jk jaa'y myendøø, jøts ja t'abejtøø ja oo'kpi jøts ja t'atsyiknaaxøjkiidøø.

⁷ Tigøøk oorinin idø'øñ ja wyinaty jade'en tø jyaty, ku tyøjk'i'y'iñ ja Ananías ñidø'øxy nay jam, ka'ap ja tnijaw'i pøni tidam idø'øñ wyinaty tø tyuñi.

⁸ Xjats ja Pedro ja tyiibyøjkøø, jøts ja ojts ñi'mxyi:

—Nigajpx, ¿jade'en idø'øñ ja naajx tø xjanchookti winø'øñ tø xanitejti?

Winets ja y'adsøøy jøts ja wyaañ:

—Jade'en øøts ja tøndøøky.

⁹ Xjats Pedro ja tnimaay:

—¿Tiku jade'en tø xkajpxy'atti ku ja Dios Teety y'Espíritu Santo jade'en xwin'øøndi? İxa ja jaa'y tøk'agi'y'y myendi mid'i ja mniyaa'y tø y'atsyiknaaxøkiyi, jøts mets inet m'atsnaaxøjkiimyip.

¹⁰ Winets ja tø'øxy jaty'i øøky ñaxkidaajky jam Pedro tyekyjø'øm. Xjats ku ja una'jk jaa'y tyøjkidøø, øøky ja jap tpattoø ja tø'øxyøjk, winets ja ojts jaty'i tyikpidsømdi, jøts ja ojts t'atsnidajidi nay jam ñiyaa'y pyukø'øm ma ja jam wyinaty tø yiknidaj'i.

¹¹ Winets ja Jesús yja' niduki'y'i yjancho'jikidøø, jøts nayide'en pøn jaty ja ojts jade'en tñimadowdi.

Ja mamylagri mid'i ja Jesús kyudanaabyi ñanky'ejidøø

¹² Møk idø'øñ ja Jesús kyudanaabyi ja milagri ttundi jam mayjaa'y agujkp; jøts niduki'y'i dø'øñ ja Jesús yja' jam yø'ømyukti møj tsaptøjk agø'øm mid'i yiktejp Salomón Tyøjkweenk.

¹³ Janch chøky'ajttip idø'øñ ja kajp jaa'y ja', ka'apts ja niduki'y'i ja jotmøkwinmaa'ñ tjagyapti, jøts jap ñøjkxtit ma ja Jesús yja' jap ñamyukyidi.

¹⁴ Namay idø'øñ ja Jesús y'ayuujk yikmibijky, jade'en ja yaa'dyøjk jøts nayide'en ja tø'øxyøjk.

¹⁵ Ja'agøjxpts ja pamaa'y jap yikiidyaktøø jap ma tuu' ñaxy, nay jap ja yikpikta'akti myaa'abajtkijpxy jøts tø'økyøjxp, jøts ja cho'oktit ku ja Pedro jap wyinaty ñaxy, øy ja y'aga'ax ja'ayi tyapaadiyidit.

¹⁶ Jøts nayide'en ja wenk kajp mid'i ja Jerusalén myiwingon'ajtpy, ja'ats tyikmendøø ja pyamaa'y jøts nayide'en pøn jaty wyinaty tø møk'ampy myachiyi ja miku'; xjats jade'en niduki'y'i choktøø.

Ku ja Pedro møøt ja Juan yikjemdundøø yiktedundøø

17 Winets ja teetywindsøn mōøt ja saduceit jaa'y ojts nawyinaxi tjawidi,

18 winets tmatstøø ja Jesús kyudanaabyidi, jøts jap tsumdøø mā ja kajp jaa'y pyuxøjk jap.

19 Xjats nwindson'ajtim ja puxøjk agaj ojts tyik'awa'ach jøts tyikpidsiimy, jøts ojts tnøjmi:

20 —Nøjkxti jam møj tsaptøjkjōtpy, tukmadowdi jam ja jaa'y ja øy'ayuujk midi ndajujky'ajtindip.

21 Xjats ku dø'on jade'en yiknimaydi, winets jøpyi ñøjkxtøø jam møj tsaptøjkjōtpy, jøts ja jaa'y ja jam tyik'ixpøjktøjkidøø.

Yam idø'on ja teetywindsøn jap wyinaty udy'a'aky twaadsoodinim niduki'iyi ja mōjaa'dyøjkti midi ja Israelit jaa'y yikutuujk'adsinaadyip, jøts ja Jesús kyudanaabyi nayide'en yikwaadsowa'andi pøn wyinaty tø yiktsumdi.

22 Xjats tkejxy ja teetywindsøn ja tyumbi, jøts ku jam yjaja'ttøø jam puxøjk agø'øm, nitu'uk ja ojts tkapaatti pøn idø'on jayiktanigaxtip; winets ja jadi'iñi wyimbejtnidøø

23 jøts ttukmadooøø ja teetywindsøn, jøts yide'en tnimaadyøø:

—Ku øøts jam tø nja'aty, aduky øøts ja puxøjk jam tø nbaaty, jam idø'on ja soldadi y'ejx'etti puxøjk agø'øm; xjats ku øø tø nyik'awa'ach, nipøn øøts jap nitu'uk tø ngapaaty.

24 Xjats ku dø'on jade'en tmadooøø ja ayuujk ja møj teetywindsøndi, jøts mōøt ja tsaptøjk adsinaabyi, winets ñawya'añidi: “¿Sudso'ampy nmidaabyajtindit, sudso'ampy yjōpkøxt yø jade'embī winmaa'ñ?”

25 Jøts winet jatyi tu'uk yja'jty ja jaa'y, jøts ja wyaañ:

—¿Kidi xñijawidi? Pø ja'axi yik'ixpøjkti jam møj tsaptøjkjōtp midi meets tø x'uktsumy.

26 Winets ja tsaptøjk adsinaabyi tmøødiy'iñ ja tajkti, jøts ojts twaawidi ja Jesús kyudanaabyi, nisa dø'on ja tkatundi, tsø'jkidip ku ja kajp jaa'y myi'ambøkiiyidit jøts ku jotmøn chaa'ga'adsiiyidit.

27 Ku dø'on tyikja'ttøø, winets ttawingugajidøø mā ja israelit jaa'y kyutuujk adsinaabyidi, winets ja teetywindsøn tnimaay ja Jesús kyudanaabyidi:

28 —Tø øøts nnigajpxy jøts ku øøts ojts nyikutuky, jøts ku meets ja Jesús yja' yā niwine'enin xkananky'ixpøkiyidit. ¿Ti dø'on icyam jade'en tø xundi? Meets icyam jinaxy tø xuknija'wiguixy ja m'ixpøjkin yā Jerusalén, jøts øøts xukpøky'atwa'añ nayide'en ja Jesús y'o'jkin.

29 Winets ja Pedro t'adsojimbettøø mōøt ja myigu'uk:

—Kuwanī øøts ja Dios yja' nbaduujniyi jøts ka'ap ja jaa'y yja'.

30 Ja Dios Teety pøn adøm n'apteety'amøj Dios'ajttøø, nay ja' kø'øm tø tyikjujkyiky ja Jesús, pøn meets kruskøjxp mmiwopajt kyøjø'øm tyekyjø'øm, jøts jade'en xyik'oooktøø.

31 Tø ja Dios ja kø'øm tpihta'aky møj windsøn y'aga'ngyø'ampy jøts yikutukt, jøts nayide'en yā tyiknitso'ok'att ja na'xwi'iñit jaa'y, paty Dios jade'en t'ayo'ixy ja Israelit jaa'dyi, jøts jade'en yikpøjpmāa'kxtit ku tmatjstu'uttit ja pyøkyu'unin.

32 Wa'ats øøts idø'on ja nñijawi ku ja Dios Teety idø'on jade'en ttuñ, jøts y'ijxpy nayide'en ja Espiritu Santo midi ja Dios Teety tyuktatøjkp ja yjaa'y, pøn jaty ja kyajpy paduujniyip.

33 Xjats ku dø'on y'ajty jade'en ja kyutuujk adsinaabyi tmadooøø, jøts ja Jesús kyudanaabyi yikmi'ambøktøø jøts yik'ookwajnidøø.

34 Jamts wyinaty nidu'ukti ja kutujk adsinaabyidi pøn yiktejtíp fariseit jaa'y, ja' xyøøw Gamaliel midi tnanky'ixpøjkiyip ja Moisés kyutuujk, jøts

janch tsojkiyip idø'øn ja kajp jaa'y ja'. Ja'ats ttanaagyukiyiiñ, winets tka-jxpidsimgijxy ja Jesús kyudanaabyi, jøts ja jap mimøj t'atsyik'awixy abiky tsoo.

³⁵ Xjats yiknimaadyi ja kutujk adsinaabyidi:

—Meets Israelit jaa'y, kidi yø jaa'y nugo ajawi sa xundi.

³⁶ Ja'myatsti ku ojts tu'uk ja jaa'y ñamyøjpikta'agyi windsøn pøn txøøw'ajtp Teudas, jøts ja kyutujk ojts ttawin'iiñ ja jaa'y nimaktaxk magø'pxy. Winets ja soldadi ojts yik'øøgyi ja kya'øwynmaa'ngyøjxp, xjats ja jadi'iñi wywindigøøgyøjxti pøn jaty wyinaty tø tpabøkti.

³⁷ Xjats jadigojk yjajtkojmi nayide'en ku ja gobierni tmachomujky ja yjaa'y, winets nay ja'abi tiempi tu'uk ja Galileit jaa'y ojts kø'øm ñamyøjwindsønbihta'agiyi jøts namay ja jaa'y nayide'en ttukmibijky; winets ja soldadi nayide'en yik'ø'jkiyøø, xjats ja jade'en kyutigøøy ja kyutujk.

³⁸ Paty ø nwa'añ jøts xmajtstu'tuttit yø'øbi jaa'dyi, ka'ap nugo xatøjkiyidit ja wyinmaa'ñ. Pøni kyø'ømwinmaa'ñ yø'ødi, kudigø'øpyts yø tsojk;

³⁹ pøni Dios yja' yø', nijuunits meets yø xkayikudigø'øty. Øyim mnay'ejx'etiyidit; kidim Dios møøt nugo mdseptundi.

⁴⁰ Xjats ku dø'øn ja Gamaliel jade'en kyajpxy'abajtiyiiñ, jøts ja kutujk adsinaabyitøjk udy'a'aky tmibøjkøjxtøø. Winets twaa'dsoodøø ja Jesús kyudanaabyitøjk jøts tyik'ayo'ombagattøø, xjats tnimaadyi jøts ka' nugo tjaakajpxwa'kx'adø'tsttit ja Jesús y'ixpøjkin; winets jadi'iñi tmajtstu'ttøø.

⁴¹ Xjats ja Jesús kyudanaabyi jap pyidsømdøø ma ja israelit jaa'y kyutujk adsinaabyi japti, jotkujk idø'øn ja ñayjawiyidi kumi tø ja Dios ja wyinaty tyanibiktaagiyidi, jøts ja jade'en y'ayo'odit Jesús køjxp.

⁴² Ejtp idø'øn ja jabom jabom tnigajpxti tkajpxwa'kxidi ja Jesús yja', jøts ja jaa'y jade'en ttuk'ixpøkti jap møj tsaptøjkjøtpy jøts nayide'en awingujky tøjkjøøjty, nijuuni dø'øn ja tkamajtstu'ttøø.

6

Ku ja niwixujkpi yaa'dyøjk yikpiktaktøø ejx'ejtpi

¹ Nay ja'abi et, nay ja'abi jumøjt idø'øn ja jaa'y ñamay'i'adø'tstøø pøn jaty ja Jesús yja' pyaduunidip. Jøts ja' midi tkajpxtip ja griego ayuujk, ja' idø'øn ojts y'øø'mbinaxwa'akti jøts tni'øøniidi ja myigu'uk pøn tkajpxtip ja israelit ayuujk, ja'agøjxp idø'øn ja y'øøndi ku ja kyu'økytø'øxy ja kyayik'ejxti yikxon, ku ja jii'kxy jabom jabom yjawa'kxy.

² Ja' idø'øn ja ñi'øøndip, winets ja nimakmajtskpi jaa'y pøn tkudanaadyip ja nwindsøn'ajtim Jesucristo, ja' ojts niduki'iyi tñankñamyukyidi ja Dios yjaa'y, jøts ja tnimaadyøø:

—Ka'ap jade'en y'øyi ku øøts ja jii'kxy nyikwa'kxt, jøts øøts ja Dios y'øgyajpxy y'ømyadya'aky nga'atskajpxwa'kxiti, çti juuni øøts ja n'atstuñ?

³ Migu'uktøjkti, paty øøts yikxon ndyimñigajpxy, ixa'adi niwixujk jaa'y, nay jaayi dø'øn kø'øm mnawyi'ejxidit, ja' idø'øn m'ixa'adip pøn windsø'øgi'ejttip, pøn ja'gyukidip, jøts pøn ja Espiritu Santo tmøøt'ajttip, ja'ats yø tunk mdaguwanidip jøts ja jii'kxy ja jade'en tyikwa'kxiti.

⁴ Øøts dios'ajot'ajtwamp øøts, njaaktyimdyuk'ixpøjkwampy øøts jaa'y ja Dios y'øgyajpxy y'ømyadya'aky.

⁵ Xjats niduki'iyi ñagayjpxkyupøjkidøø, winets ja Esteban yikpihtaajky yikjii'kxwya'kxpi, ja jaa'y pøn idø'øn ja Dios møk tjanch'ajot'ajtp, pøn tmøøt'ajtp ja Espiritu Santo. Ja'ats idø'øn jade'en yikwiwejtstøø møøt ja Felipe, møøt ja Prócoro, møøt ja Nicanor, møøt ja Timón, møøt ja Parmenas,

jøts møøt ja Nicolás pøn tsoo'mp jam Antioquía, ja' midi wyinaty jekyip tø t'ukpabiky ja israelit jaa'y chinaa'yindi.

⁶ Xjats ja jam wyinaty tø tyikmendi ma ja nwindson'ajtim kyudanaabyi jamdi, jøts ja tkunuu'kxtøø jøts ja jade'en tkønixajtøø.

⁷ Xjats ja Dios kyajpxy jade'en myøjtak'adijch, mayi'adøtsp idø'øn jade'en ja Dios yjaa'y jam Jerusalén, kø'ømbaat ja teetyøjkti tjanchja'wiñidi, kø'ømbaat ja t'ajot'ajtnidi ja nwindson'ajtim Jesucristo.

Ku ja Esteban yiktsumnaq

⁸ Jamts idø'øn ja jaa'y wyinaty tu'uk midi txøøw'ajtp Esteban, ja' idø'øn ja Dios myøk'ajtin amuum myøøt'ajtpy, Dios idø'øn ja kyunuu'kxin nayide'en amuum myøøt'ajtpy, jøts ja jade'en ttuun ja myilagri Dios myøk'ajtingøjxp jam mayjaa'y agujkp.

⁹ Nay jamts idø'øn ja jaa'y wyinatymidi winaagin, pøn xuminøjktip ma tsaptøjk jam yikxødijy Esclavos Libertados. Jam wyinaty ja'adi midi tsoo'ndip Cirenit etjopt, jøts Alejandriit etjopt, jøts Ciliciit etjopt, møøt Asiit etjopt. Ja'ats idø'øn tnibidø'øktøø ja Esteban, jøts ja jade'en xe ya ñadyamigajpxnibøjkidøø;

¹⁰ jøts nigidi dø'øn ja tmidanaadyøø sa ja Esteban ojts wya'añ, kumi wijy'ajtin ja yiktumpy, jøts nayi Espiritu Santo ja pudøjkiyip.

¹¹ Xjats ja mayjaa'y winaagin tmijuudyøø ja myigu'uk, jøts idø'øn ja wya'andit jøts ku ja Esteban wyinaty tø tka'ødyijy ja Moisés jøts ja Dios.

¹² Xjats idø'øn ja jade'en jotkøjxpim tuk'ejpxinaxwa'akti ja myigu'uk, niduki'iyi ja møjaa'dyøjkti møøt ja kajpxwejpitøjkti; jøts ja t'adinaadyujktøø ja Esteban, xjats idø'øn ja jade'en tmajtstøø jøts ja tyiknøjktøø jam møj kutujktaajkjotp.

¹³ Nay ojts idø'øn ja tpiktakmidi ja testigi pøn tnidaay'ajtp ja Esteban, yide'en ja wyandøø:

—Yaa't jaa'y nijuuni yø tkamajtstu'uty ja kya'øy'ajtin, xumi jade'en yø tpaagajpxy tpaxi'iky yø tsaptøjk, nayide'en yø ttuun ja Moisés kyutujk.

¹⁴ Ti yø jade'en ñadyijyi, pø tøts øøts yø jade'en kø'øm ndyimyadøy ku yø jade'en wya'añ, jøts ku Jesús (ja Nazaretit jaa'y) tyikudigø'øty yø tsaptøjk møøt yø tsinaa'yin midi ja Moisés yiktaan.

¹⁵ Ixam ja jade'en wya'andi, winets ja mayjaa'y pøn jaty jam wyinaty tsinaadyip, ja'ats ojts t'ejxti ja Esteban jøts ku wyeen y'aaw ja jade'en kyaxi'iky sam ankilisin.

7

Ku ja Esteban kø'øm yjanagyugajpxøø

¹ Winets ja teetywindsøn ttiibyijky ja Esteban, yide'en ja tnimaay:

—¿Janch jade'en mets tø m'adi'ich?

² Xjats ja yøn'ampy t'adsøøy, jøts ja wya'añ:

—Mee migu'uktøjkti winø'øn myikteedyidi myiktaagidi, madowdi waani. Ku adøm n'apteety'amøj Abraham jap chinaay ma et txøøwi Mesopotamia, jøts ka'anin ja wyinaty ñijky tsinaabyi jam ma et txøøw'ajtmi Harán. Xjats ja Dios Teety pøn janch wa'ats janch møj ojts ñanky'iixyiyi,

³ jøts ja Abraham yiknimaay: “Majtstu'ut yø mdsinaadyaajk jøts nayide'en ja mmigu'uktøjkti, jøts mnøjkt jam ma ja tsinaadyaajk n'atstuk'ext.”

⁴ Xjats ja Abraham choo'ndøø jam chinaadyaajkjotpti ma txøøw'aty Caldea, jøts ñøjktøø tsinaabyi jam Harán. Xjats ja tyeety jam y'oo'knaa, winets ja Dios Teety twaaqsøøy ja Abraham ma ixyam ndsinaa'yindi.

⁵ Jøts ku ja jade'en yja'aty niwinø'ōnin ja ñaajx ja kyayikmøø, nugo ja chinaay; jøts nay ja Dios Teety kø'øm tyikutujk jøts yikmo'otnim ja ñaajx ma chøønidit ja y'u'nk ja y'una'jk øy ja Abraham wyinaty yja'øøky; ka'anim ja y'u'nk te ku ja Dios jade'en wyandaajky.

⁶ Jøts nayide'en ja Dios Teety tjaaknimaay ja Abraham, jøts ku ja y'u'nk y'una'jkti, y'apti y'okti ñøjkxtit tsinaabyi abikyajp, jøts jap jaa'y ja yjanchyik-tunidit ejxim jiyujkin. Ku ja jap yja'attit, winets ja jaa'y kyayik'ødyunidit maktaxk magø'pxy jumøjt.

⁷ Xjats ja Dios nayide'en wyaañ: "Øts ndiidyu'ump ja jaa'y pøn mga'ødyunidip, pøn myiktunidip jiyujkin, jøts ngajxpidisø'mømdit kyø'mnaxjotpti, jøts ø xwindsø'øgidit nay ya."

⁸ Jøts nay yø Dios Teety møøt ja Abraham tkajpxy'ajty sa jaty ja ejxpajt ja ejxa'an ku ja yikmo'odit ja naajx. Jøts tpiktaajkøø sa mutsk mixyu'nk yiktu'undit ku kya'axtit. Paty idø'øn ku ja Abraham y'u'nk kyaxi'jky midit txøøw'ajt Isaac, winets jade'en ttundi sa tkajpxy'ajttøø jøts ja ejxa'an tpiktaajki ñe'kxkøjxp, kyiduktujk xøøw ja jade'en ttuun. Nayide'en ja Isaac ttuun ja y'u'nk midit txøøw'ajt Jacob, jøts nayide'en ttuun ja Jacob ja y'u'nk y'una'jkti nimakmajtsk pøn y'apteety'ajttøø ja Israelit jaa'y.

⁹ Ya'at Jacob y'u'nk y'una'jkti midit adøm n'apteety'ajttindøø, myi'ajkidip ja y'uch José ja'adi, paty ja ojts ttoo'knidi jøts tyiknøjkxtøø jam Egiptit jaa'y y'etjotp. Jøts ja José, ka'ap ja Dios myajtstu'udyi niujuuni.

¹⁰ Nay yø Dios pudøjkiyip ku y'ayo'ombaaty. Jøts nay ja' ja møøjyip ja wijy'ajtin, ja'agøjxp chojkiyøø ja Faraøn midit møj windsøn'ajtp jam Egipto. Nay ja' tpiktaajk ja José gubernador jøts ja yikutukt jap kutujktaajkøjtpy, jøts nayide'en jap Faraøn tyøjkjøtpy.

¹¹ Winets ja yuu myiun jøts janch may ayo'on pyajttidøø jam Egipto etjotp jøts nayide'en jam Canaán, paty adøm n'apteety'amøjti ka'ap tpaattøø ti yjøø'kxtip.

¹² Xjats ku ja Jacob tnija'wøø jøts ku jap Egipto y'lity ariin, winets jap tkejxy ja y'u'nk y'una'jkti pømbi adøm n'apteety'ajtyindip. Jade'en ojts y'otsti mijawyeen.

¹³ Ku myimajtsk ojk ñøjkxtøø, winets ja José kø'øm ñanky'eixiyøø, jøts jade'en ja Faraøn tnija'wøø kudam ñamyigu'uk'atyidi.

¹⁴ Xjats ja José twaadsøøy ja tyeety jøts niduki'iyi ja myigu'uktøjkti, nidugui'pxy myakmokx niduki'iyi y'ejttøø.

¹⁵ Jade'en ja Jacob yja'jty ku yikwaadsøøy tsinaabyi jap Egipto. Jap y'oo'knaa møøt adøm n'apteety'amøjti.

¹⁶ Xjats ku jam y'oo'ktøø, winets jam tyiknøjkxtøø Siquem y'etjotp ma ja Abraham jam wyinaty ja jut tø tjuy, midit ja Hamor y'u'nk tyoøktøø.

¹⁷ Xjats ku ja Israelit jaa'y myayinidi jam Egipto ñaxjotp, winets ja Dios ja wyanda'aky y'adukwani midit wyandaajk Abraham køjxp.

¹⁸ Winets ja Egiptit jaa'y tpiktaktøø tu'uk ja møj windsøn, pøn tkanija'wip pøni sa ja José wyinaty tø y'atswindsøn'aty.

¹⁹ Ja'ats idø'øn twindaay'ajt adøm nmigugajpti jøts tjemduun tteduun adøm n'apteety'amøjti, yide'en idø'øn ttuun jøts ku aguwani'køjxp ttukmajtstu'uty ja teety ja taakti ja myaxu'nkti jøts y'oøktit.

²⁰ Ja'abi xøøw ja'abi jumøjt idø'øn ja maaxu'nk kye'jxy midit txøøw'ajt Moisés, jøts janch tsojki ja Dios ja'. Xjats ja Moisés ja tyeety tyaak yikya'jkiyøø tigøøk po'.

21 Winets yikmajstutnaa kuwani, xjats nay yø Faraón ñøøx ojts tpaaty, jøts tyikye'jky ejxim ja kyø'øm'u'ngin.

22 Xjats ja Moisés jap wyijy kyejy y'ixpijky, jøts midi ja Egiptit jaa'y yjajttip, nay jap ja Moisés yikta'awaan. Ku ja jade'en y'ixpijky, kajpxwa'kx ja janch øy janch tsuj, jøts yjanchtumpy idø'øn ja kø'øm jade'en.

23 Xjats ku ja Moisés wyinaty ja jyumøjt wixijkxy, winets ja t'atspaatwa'añ ja myigugajp ja israelit jaa'y.

24 Winets jap ojts t'ejxpaaty ja myigu'uk ku ja jap wyinaty ja egiptit jaa'y yjemduñi tyeduñi. Winets ja Moisés ja myigu'uk t'ayo'ijxy jøts tñigubøjky, paty ja tyik'ø'jky ja' egiptit jaa'y.

25 Kumi jade'en ja yjawnmay jøts ku ja myigu'uktøjk tñijawidit, jøts ku ja Dios myo'owa'añidi ja awa'ats'ajtin, jøts nagyø'øm ja twindsøn'attit; jøts ja myigu'uk ka'ap ja tñija'widøø.

26 Xjats kymjabom'ajty, winets ja Moisés tpaaty ja myigu'uk namajtsk, nache'jkidip tam ja wyinaty, xjats ja Moisés wyinmaay jøts ñamyiyujy'atidit, jøts tñimaay: “¿Tiku jade'en mnayjemduñidi mnadyeduñidi, kidi mdukjaa'yip meets?”

27 Xjats ja' midi ja myigu'uk wyinaty tjemdumpp ttedump jøts ja Moisés yiknajsttejmaya, jøts ñimaajyøø: “¿Pøn mets tø mbikta'agyí yikutujkpi jøts øø x'ana'amt?”

28 ¿Xyik'ookwamp øts nayide'en sam ja xyik'ø'jky ja' egiptit jaa'y uxøø?”

29 Xjats ku ja Moisés jade'en tmadøø ja ayuujk, winets jatyi kyeejky ku yiknimaay jøts ku uxøø wyinaty ja jaa'y tø tyik'øøky, winets ñijky jap tsinaabyi mā et jap txøøwi Madián. Japts chinaay sami ja'atjaa'y, winets jap ja y'u'nk tpaajty namajtsk tum mixy.

30 Tø ja wyinaty chinaañi wixijkxy jumøjt, winets ñijky widejtpi jam tø'øts etjotp, wingon et mā kojpk jam midi txøøw'ajtp Sinaí, xjats jam t'ejxpaajty tu'uk ja ankilis jam jønjotp midi ujtsximungøjxp tøøpy.

31 Xjats ja Moisés ñigyumaap tja'wiyii'ñ ku ja jøøn t'ejxpaajty, jøts ku tjaakwungunøjkxøø wingon, winets tmadøø ja Dios Teety y'ayuujk ku ja wya'añ:

32 “Øts mets m'apteety'amøj xdios'ajtp nayide'en ja Abraham, ja Isaac, jøts nayide'en ja Jacob.” Xjats ja Moisés chø'øgidyøjkiñaa, jøts ka' y'uknadya'a'ejxinøyøø jøts twin'ext.

33 Winets ja Dios Teety ñimaajyiyøø: “¿Tiku yø mgø'øk xkajeñ, kumi tø øts yø nwi'ixy ya'at et?”

34 Kø'øm øts tø n'ixy ja njaa'y ku jam y'ayo'ombaatti Egipto, tø øts nayide'en nmadøø sa yjø'ødi sa ya'axti, sa yjatti sa kyubatti, ja' tø nñimiñ jøts nyik'awa'atspidsø'ømdit. Mada'ak, jøts jam mnøjkxt Egipto.”

35 Øy ja Moisés wyinaty tø yjayiknøjmi jøts ku ja ka' wyindsøn'att, jøts ku ja ka' tyiidyu'unt, Diosts ja kø'øm kajxiyi jøts ja tyik'awa'atspidsø'ømt, jøts nayide'en tñiwindsøn'att ja myigu'uktøjk, ja'agøjxp ku ja ankilis jam tyukmadoji ujts ximungyøjxp jøøn agujk.

36 Nay yø Moisés idø'øn tyikpidsøøm adøm n'apteety'amøjti jam Egipto, jøts nayide'en yjanchtuun ja milagri jøts ja Dios myø'ajtin tyiktuujnøø, jade'en ttuuiñ jam Egipto, jøts nayide'en mā ja Tsajpts Mejy, jøts jam tø'øts etjotp, winet ku jam jade'en chinaay wixijkxy jumøjt.

37 Nay yø Moisés idø'øn tñimaay ja israelit jaa'y: “Myiktanigaxtip ja Dios Teety ja kyugajpxy tu'uk, nayide'en idø'øn ja mye'ent sam øts ja jawyeen tø xkejxyin, jøts nay adøm idø'øn ja nmigu'uk ja'. Ja'ats idø'øn mbadu'unindip.”

38 Nay yø Moisés idø'øn kyudanaay ja yjaa'y jam tø'øts etjotp mā ja kojpk txøwī Sinai, ku ja ankilis myøøjyøø ja øygajpxy ja øy'ayuujk midī ndaju-jky'ajtīndip; jøts adøm ja nayide'en nnija'wint.

39 'Xjats adøm n'apteety'amøjti ka' tpadundøø pøni midī ja Moisés yjananktyunwajnp, jam ja ne'egi jadigojk ñøjkwā'andi nay jam Egipto, jøts ja Moisés jade'en yikmajstutuwa'añ.

40 Winets tñimaadyøø ja Aaron: "Yikojk øøts nwenkdīsti jøts øøts ja' xuu'wa'at, kumi ka'ap øøts nnijawī pøni sã ja Moisés yjaty ku øøts nichøky'ampy xyikpidsiimy Egipto."

41 Xjats tyik'a'øyiñaxti ja løjch, jøts tyik'oo'kti namay ja jiyujk, ja' idø'øn tyamiyoxtip tyawindsø'jkidip ja løjch awanax, winets ja' ttaxondaktøø midī kø'øm yik'øydøø.

42 Xjats ja Dios Teety myajtstuijtidøø jøts ja wyaañ, wan yø wenk dios yja' tpaduujnidi, wan tmaadsa'ji wan tti'ji. Yide'en idø'øn ja Dios Teety kyugajpxy jap ñøkyjøtpy tjaadyandi:

Ku meets jam mduu'yø'øy tø'øts etjotp wixijky jumøjt,

¿myik'o'jkik meets ja jiyujk may'ampy øts nwindso'jkingøjxp?

43 Pø ka'axi yjade'eni, pø jinaxyi meets ja wenk dios yja' ixyam xpaduujniyi, ku ja Dios Moloc møøt ja tyøjk xkiwiydejtiyidi ja tø'øts na'xjotp.

Nayide'en jadu'uk ja wenk dios Renfán myaadsa' xpaduujnidi ja yja', yide'en idø'øn ja kø'øm xyik'øydøø jøts xwindso'jkidøø.

Ja'agøjxp meets ngajxpidsømwaanidi jøts jam mnøjxktit Babilonia jixkø'øm, jamts nayide'en m'ayo'ombaattit.

Yā'at idø'øn ja Dios ja kyugajpxy tyukjaay, xjats ja Esteban yjaakwaañ:

44 'Nayide'en jam tø'øts etjotp ja n'apteety'amøjti tmøøt'ajttøø ja wetøjk tu'uk mā tpøkjø'økti ja kyutujkti, tsaagøjxp idø'øn ja yja'ayi, Dios idø'øn ojts tyuk'ijxyi ja Moisés sudso wetøjk y'øyt.

45 Xjats ku ja tiempi ñajxy jeky jumøjt, winets ja møjaa'dyøjkti tkøyajknidøø ja wetøjk møøt ja wyindsøn Josué. Winets ja myidsep tmimajadaktøø pøn jaty ja wyinaty tsinaadyip, kumi kø'øm ja Dios ja kyexyidi jøts ja chinaadyajk ja yikmo'odit. Nay ja wetøjk wyinaty yiktundip ku ja David yikutujky.

46 Jøts ja Dios ja ojts y'a'ejxyi, paty ja tu'uk tkøjwa'añ ja tsaptøjk mā ja chøønit ja Dios Teety pøn ja Jacob ojts Dios'ajtmi;

47 jøts ni ka'abyim ja tkøjy ja tsaptøjk; winets ku ja Salomón tyøki windsøn, ja'anims tkøj ja tsaptøjk.

48 Jøts øyim ja Dios jap kyidyimchøøni kuwani jap tsaptøjkjøtpy midī ja jaa'y yik'øydip, kumi yide'en ja Dios ja y'ayuujk ttukmiyø'øy ja kyugajpxy ku ja yide'en wya'añ:

49 Tsajpjøtpy ø ndsøøni, jøts nayide'en na'xwiñ.

¿Ti ndøjk meets idø'øn myik'øyip, jøts ti tsinaadyaajk meets idø'øn xmo'owamp?

50 ¿Kidi øtsip jade'en tuki'iyi tø nyik'øyi?

51 Xjats ja Esteban tjaaknimaay yide'en ja myigu'ukti:

—Meetsxi mgamadoop mgaja'gyujkidip, jøts ni juuni meets ja Espiritu Santo xkagupøjkti. Jade'en mee nugo mjanch'ity sami n'apteety'amøjti.

52 Ja'axi tjemdundip ttedundip ja Dios Teety kyugajpxy, jøts tyik'oo'ktøø pømbi yjøjw'idip ku ja myenwa'añ ja yiknitsokpi, pøn janch øy janch wā'ats. Ixyamts ja yiknitsokpi yjanchmiñ, pø meetsxi ja mgøyajk jøts ja jaa'y yik'oo'gyit.

⁵³ Pø tøxi meets ja ʔnkilis ja Dios kyutujk mjamø'øyi jøts nika'ap ja xpadundi.

Ku ja Esteban y'ø'jky

⁵⁴ Xjats ku jade'en yiknimaadyøø ja windsøndøjkti, winets yikxon tjanchty-imy'i'ambøjktøø ja Esteban.

⁵⁵ Kumi ja Espiritu Santo ja Esteban yjanchmøøt'ajtpy, winets ja chajp'ljxy jøts t'ejxpaa'jty ja tsuj'ajtin ja øy'ajtin ma ja Dios Teety, jøts nayide'en t'ljxy ku ja Jesús jam tyani Dios Teety aga'ngyø'øm.

⁵⁶ Xjats tnimaay pøn yik'ookwajniyidip:

—jUk'ejxti! Awə'əts øts yø tsajp ø n'ixy, jøts nayide'en n'ejxpaa'jty ja Cristo tyani Dios Teety aga'ngyø'ampy.

⁵⁷ Xjats ja jaa'dy'i ka'ap ja tmadowdi, y'amatstip ja tyatsk ja', niyaxni niyjokni dø'øn tñibidøktøø jøts tmatstøø.

⁵⁸ Jøts tyikpidsømdøø aguwaniøkøxp jap kajpjøtpy; winets ja ni'øø'nibidi jawyeen ja chabixy tjandøø jøts ja ttuk'ejx'etti ja mixy Saulo, xjats idø'øn jatyi twika'tsnibøjkidøø ja Esteban.

⁵⁹ Yika'tsp wyinaty ja Esteban, jøts ja chapkajpxy jøts ja wyaəñ:

—Nwindsøn'ajtim Jesús, mets ndagøðøjkip ø n'anmija'win.

⁶⁰ Xjats ku jade'en wyaəñ winets ñagyuxendyaajkiyøø jøts møk wyaəñ:

—Kidi xukpøky'aty nmigu'uktøjkti yø n'o'jkin.

Kuts wyaanguijxy jade'en, winets y'oo'knəə.

8

Ku ja Saulo tjemduuñ tteduuñ ja Jesús yjanchja'wibidi

¹ Jøts ja mixy Saulo yjotkujk'ajty ku ja tyik'oo'ktøø ja Esteban. Xjats nay ja'abi xøøw, winets ja tsep cho'ondaajky møøt ja' pøn ja Jesús yjanchja'widip jam Jerusalén. Paty yide'en niduki'i'yi cho'onjøkñidøø pøn ja tsep tkawandip, jøts jam ñøjxiti nay Judeit kajp wingon, jøts nayide'en Samaria y'etjotpti. May idø'øn choo'nidøø, ja'ayi dø'øn tøndøø ja Jesús kyudanaabyi pøn nimakmajtskjaə'y'ajttip.

² Xjats winaəgin jaa'y pøn ja Dios kyajpxy tpadundip, ja' tyiknajxøjkidøø ja Esteban jøts nayide'en tjanchpaya'əxti.

³ Xjats ja Saulo txumika'ødyuñ ja myigu'uk pøn ja Jesús yjanchja'widip, jøts t'ixaañibøjkøø tøjx tøjx. Kuts ja tpaajty, jøts ja t'ixjidøjtpidsimy tyøjkjøtpy wan tjayaə'y'i wan tjatø'øxyi, jøts ja tyikpuxøjktøki.

Ku ja øgyajpxy ja ømyadyə'aky ojts yikajpxwa'kxy jam Samariit etjotp

⁴ Xjats niduki'i'yi midi tsoo'nidøø Jerusalén jøts ja ñøjxktøø omagajp, ja'ats ja Dios kyajpxy tkajpxwa'kxidøø midi anmija'win tyiknitso'ok'ajtp.

⁵ Xjats ja nidu'ukti, pøn txøøw'ajt Felipe, ja'ats nøjx abikyajp jam Samariit y'etjotp, winets ja jam tkajpxwa'kxy sa yjajty sa kyubejty ja Jesús.

⁶ Winets ja jaa'y yjanchñamyujkidøø namay, jøts ja tjanchpatmadowdi sa wya'əñ sa kyajpxy ja Felipe, jøts ku nayide'en miłagri ttuuñ.

⁷ Winets tyikpidsiimy ja mamyiku' midi ja jaa'y wyinaty tø tyatøkiyidi, jøts møk idø'øn ja tjanchmiyaəxti ku pyidsømdøø ja miku'; nay ja' tyiktsoojk may ja køxujpxi pakxujxpidi, jøts nayide'en tyiktsøøjky ja pakma'at jaa'dyi.

⁸ Paty idø'øn yjanchjotkujk'ajttøø ja jamit jaa'y.

⁹ Jøts nay jamts idø'øn ja yaa'dyøjk tu'uk y'ljty pøn txøøw'ajtp Simón, ja'ats jam yik'adujkp jøts nayide'en xyimay, ja'agøjpx idø'øn ja tjanchmøjəwidi ku ja jade'en ñamyøjpikta'əgyi ja Simón.

10 Xjats ja niduki'yiyi ja møj ja mutskti tpatmadowdi pøni sã jaty ja Simón wyaañ. Winets wyandøø jøts ku tjanchmyøødi ja Dios myøk'ajtin.

11 Jøts tpaduujnidøø ja yja' ku ja xyimay jøts ku ja yik'aduky, may jumøjt idø'on ja wyin'øø'nidøø.

12 Xjats ku ja Felipe tñigajpxkijxy ja øgyajpxy ja ømyadya'aky pøni sã yjajty kyubejty ja Jesús, jøts ku ja tñigajpxy ja Dios kyutujk midi ja yjaa'y ja tyanitanaapy, winets ja yikpabøjknãã, xjats ja yaa'y ja tø'øxy ñøbajttøø.

13 Nayide'en ja Simón tñabøjknãã, jøts ja ñøbajttãã, jøts ja tjamyøøt'ajty ja Felipe, winets ja ñygyumaap tjanchja'wøø ku ja Felipe tjanchpikta'aky ja mĩlagri, jøts ja Dios myøk'ajtin tyikwingaxi'iky.

14 Xjats ku ja Jesús kyudanaabyi pøn jam jaaktaandøø Jerusalén tñja'widøø, ku ja Samariit jaa'y winaagin tø wyinaty tkupøjkti ja Dios kyajpxy y'ayuujk jøts ku ja tpadu'undit, winets ja yjaakyikajxtøø ja Pedro møøt ja Juan.

15 Jøts ku jam yja'ttøø, winets tku'amidowdi ja Samariit jaa'y midi tpadundip ja Jesús yja' jøts tyatøkiyidit ja Espíritu Santo.

16 Ka'aním wyinaty ja Espíritu Santo tyatøkiyidi ja Samariit jaa'dyi; ja'ayi wyinaty tø ñøbattøø Jesús xyøøgøjxp.

17 Xjats ku ja tkønixajtøø ja jamit jaa'dyi, winets ja tyatøkiyidøø ja Espíritu Santo.

18 Ku ja Simón tjanch'ijxy ku ja Jesús kyudanaabyi ja Espíritu Santo ttuktatøki ja jaa'dyi, winets ja juy t'amidøøy,

19 jøts tñimaay:

—Tiku meets xkadamidøøky yø Dios myøk'ajtin midi mee mmĩwidijtpy, jøts ø nayide'en øy pøn ngønixajt, jøts nayide'en nduktatøkit ja Espíritu Santo.

20 Xjats ja Pedro tñimaay:

—Pøni jap ja meeñ xmøødi, wan ja møøt mgudigøy, jade'enxi mets yjawi mwinmay jøts yø yiktøøky midi ja Dios yajkpy.

21 Ka'ats mets yø mbaat'atyiyi ya'at midi øø nmĩwidijtpy, ka' mets mwinmaa'ñ y'øyi pyaadi Dios wyingujky.

22 Majtstu'ut yø mga'øwvinmaa'ñ, minuu'kxa'ak ja Dios pøni maa'kxujkiyip midi tø xwinmay m'am mjotp.

23 N'ijxpy øts yjawi ku ka'øwvinmaa'ñ xmøødi, yø'øts myikjem'adøøjtsip myikte'adøøjtsip.

24 Xjats ja Simón y'adsøøy:

—Ku'ajot'ajtik meets, jøts øts ja nbøky ngagu'ayo'ombaadit.

25 Xjats ku ja Juan møøt ja Pedro tñigajpxkøxtøø ja Dios kyajpxy y'ayuujk, jøts nay ja' tkajpxwa'kxtip jam magajpjotp nay ja Samariit y'etjotp, yide'en ja wyandøø sudso'ampy yø anmija'win ñitso'ok'aty, winets wyimbejtnidøø nay jam Jerusalén.

Ku ja Felipe møøt nabaajtyyøø ja Etiopiit jaa'y

26 Xjats ku ja jade'en wyimbejtnidøø, jøts ja nwindson'ajtim y'ankilis ojts ja Felipe myigajpxyiyi, jøts ñimaajtyyøø:

—Pidø'øk mets jøts mnøjkxt abatko'øm'ampy, ja tuu' midi nãxp Jerusalén jøts nayide'en Gaza.

Jade'en idø'on ja ankilis ñimaajtyyøø ja Felipe. Ja'abi tuu' idø'on nãxp tø'øts etjotp mã ka'apøn chøøni.

27 Xjats ja pyidi'jky jøts ja chøø'ñ; winets tpaajty jam tuu'am tu'uk ja Etiopiit jaa'y, pøn ja Dios Teety jap t'atswindsø'jkip Jerusalén. Ja jaa'y isaabiky ja', jøts

møj yikutujkpi ja', jøts nayide'en t'ejx'ejtmijøø ja myeeñ ja tø'øxy pøn jam møj windsøn'ajt Etiopía, Candace ja xyøøw ja tø'øxy.

²⁸ Kyajpkøjxp idø'øn ja wyinaty wyimbejtñi kyarretijøtpy, jøts jade'en tuktuu' tkajpx'adi'ich ja Isaías ñøky pøn ja Dios kyugajpxy'ajt.

²⁹ Winets ja Espiritu Santo myigajpxiyøø ja Felipe, jøts ja ñimaajyøø:

—Wingonjawi puwa'agi yø karreti.

³⁰ Xjats ku ja wingon tpuwa'jki, jøts tmadøy ku ja ñøkyajpxy, jøts ja tyiktiiy ja Felipe:

—¿Mnimadøøpy idø'øn midi ixja mgajpxpy?

³¹ Xjats ja wyaañ ja nøkyajpxpi:

—¿Sudso øts yø' nwinmado'ot, pø ka'ats ø pøn, pøn øts xukwinmado'op?

Winets ja Felipe yikway jøts tyøkit jap karretijøtpy jøts tmøøtsøønit.

³² Midi ja Etiopiit jaa'y wyinaty kyajpxpy, ya'at idø'øn ja':

Ku jaa'y yik'o'jkøø kyupiky'ajt ja', jade'en ja y'ijty kidim ja borreegi maxu'nk y'øøky;

ka'ap ja sa wya'añ, uum ja' jade'en ejxim borreegi ku yikeepy.

³³ Jade'en idø'øn ja jaa'y yik'ayoojijøø, jøts nika' kø'øm ñanky'ayowiyit;

ku ja jade'en yiktuñ, ¿pøn ja kugajpxiyip?

Tø dø'øn jabaat kyixy ja chinaa'yin ya naxwiñ.

Yide'en idø'øn jap yja'ayi midi ja Etiopiit jaa'y kyajpxpy.

³⁴ Xjats ja jaa'y yiktøøjøø ja Felipe:

—Tun ja may'ajt, nigajpx waani, ¿pøn idø'øn yø jade'en ñimadyakpy, kø'ømyi yø jade'en ñañimadya'agi, uk wenkpi dø'øn yø ñimadyakpy?

³⁵ Xjats ja Felipe ttuk'ixpøjknibøjkøø sa yjajty sa kyubejty ja Jesús.

³⁶ Xjats ku ja jade'en yø'ødyi, winets ja møj nøø tpaattøø, jøts ja Etiopiit jaa'y wyaañ:

—Ixats ja nøø yjawi, ¿ti kidi ndejint y'øyt ku nnøøbatt?

³⁷ Xjats ja Felipe t'adsøøy:

—Pøni mjanchja'wip ja Jesús tu'uk amumjoojt, o me nyiknøøbatt.

Winets ja t'adsojimbijty:

—Njanchja'wip øts ku ja Jesucristo yjanch'u'nk'aty ja Dios Teety.

³⁸ Xjats ku ja jade'en wyaañ jøts ja karreti tyikwa'k'øydøø; winets ñøjktøø jam møj nøøjotp, jamts ñøbejty ja Etiopiit jaa'y.

³⁹ Kuts jam pyidsømdøø møj nøøjotp, jøts ja Espiritu Santo yiknøjksøø abiky et ja Felipe, jøts ja Etiopiit jaa'y nika'ap ja t'uk'ejnnaa; jøts ja tyuu' tñøjksnaa jøtkujk.

⁴⁰ Jøts ja Felipe jap yja'aty ma kajp jap txøøwi Azoto. Kajp kajp idø'øn ja tkajpxwa'kxwidity sa dø'øn ja anmija'win ñitso'ok'att. Xjats ojts jap yja'tni ma kajp jap txøøwi Cesarea.

9

Ku ja Saulo tyiktigajch ja chinaa'yin

¹ Xjats ku ja jade'en, jødsyim ja Saulo tkidyimyjā'dyigøy ja o'jkin, kuwani tyimdyanekwa'añ ja' pøn yjanchja'widip ja Jesús yja'. Paty ojts tñinijky ja teetywindsøn,

² jøts t'ats'amido'ot ja nøky ja tiy'ajtin. Ja'ats ja myinøjkkp jøts ja ttuk'ext ja teety pøn jam ttundip tsaptøjkjotp ma txøøwi Damasco, winets ja t'ixa'at pøni pøn ja Jesús yja' pyaduujnidip, jøts jam ja tyiknøjkt kø'tsumy Jerusalén, wan tjayaa'yi wan tjatø'øxyi.

³ Kuts jam yja'atwaani Damasco, winets ojts jotmøñ ja jaj ñawidityi midi kidakp tsajpjøtpy, janch tsamamp ja jaj.

⁴ Winets ja Saulo kyidaay, jøts tmadøoy ja ayuujk ku ja yide'en wya'añ:

—Saulo, Saulo, ¿tiku ø xjemduñ xeduñ?

⁵ Xjats ja Saulo tyiktiy:

—¿Mbønims me teety idø'on?

Jøts ja y'adsoojøø:

—Øts idø'on Jesús, nay yø' midi mjemdumpy mdedumpy. Kø'øm me mnay'ayo'onduñiyi jade'en kidi tsakaq ku ja ti tnepy, jøts ja kø'øm kujp ñadyukyø'ødyiyi.

⁶ Xjats ja Saulo yjanchmibejpøjknaq ku jade'en yiknøjmi, jøts wyaañ:

—¿Tims me teety xamidsokp, ti ø ndu'ump?

Winets ja nwindson'ajtim ñimaajyøø:

—Pidø'øk jøts jam mnøjkxt kajpjotp, jamts myiktukmado'ot pøni ti mdu'ump.

⁷ Xjats ja Saulo yjamyøøt nayide'en yjanchø'jkidøø ku ja Saulo y'ayuujk ja jade'en tmadojidi, jøts ka'ap ja t'ejxtøø pøni pøn ja myigajpxpy.

⁸ Winets jatyi ja Saulo pyidi'jky, jøts ku ja yjawin'ejxwa'kxy, ka'ap ja ti t'ejxpaaty. Winets ja myigu'uk y'ukwejtsniyidøø, jøts ja yiknøjkxi Damasco.

⁹ Jamts chinaay tigøøk xøøw jøts niti tka'ijxy, ni kyakay ni kya'uuky, niti tkatuñ.

¹⁰ Jamts idø'on tu'uk chinaamyi yaa'dyøjk pøn tjanchja'wip ja Jesús, Ananías, idø'on ja xyøøw, winets ja nwindson'ajtim ojts tninijkxy ja Ananías, jøts ja tnimaay:

—jMets Ananías!

Xjats ja Ananías t'adsøoy:

—¿Ti, teety?

¹¹ Xjats nay jatyi ñimaajyøø:

—Pidø'øk jøts mnøjkxt ma ja tuu' yiktijy Tiidyuu', jøts ku jam mja'att Judas tyøjkwindum, jamts xyiknidøøwit ja Tarsit jaa'y midi txøow'ajt Saulo. Dios'ajot'ajtp inet ja jam,

¹² jøts tø ja nayide'en tnijawi agumaa'gyøjxp, ku me mnøjkxt jøts ja wyin'ejxwa'kxkojmit wa'ats ku xkønixajt.

¹³ Kuts ja jade'en tmadøoy ja Ananías, jøts ja wyaañ:

—Janch namay, teety, idø'on ja jaa'y tø xukmadowdi ku yø Saulo tjanch-jemduñ tjanchteduñ ja' pøn mets mjanchja'wiyip jam Jerusalén.

¹⁴ Ixyamts ja tø tmija'aty nay ya ja tiy'ajtin, midi ja teetywindsøn ja ojts t'amidøy jøts ja tyiktsoont midi me mbaduujniyip.

¹⁵ Winets ja nwindson'ajtim wyaañ:

—Nøjkx x'ats'ixy ja Saulo, tø øts ja nwi'ixy, nyiktunwampy øts ja', abikyajp øts ja ngaxwa'añ. Japts øts x'atsnigajpxt x'atsnimadya'akt, jøts ja ttukmado'ot ja jamit jaa'dyi møøt ja' wyindsønøjkti jøts nayide'en ja ya'at israelit jaa'dyi.

¹⁶ Nduk'exp øts ndukmado'op øts sudso jawyeen tyu'unt, jøts kuwani nayide'en tmi'ayo'ot øts ngajpxy øts n'ayuujk ku ja jaa'y yjemdunit tyedunit.

¹⁷ Xjats ja Ananías ojts tninijkxy ja Saulo. Kuts ja yja'jty, jøts ja ja'ayi ojts tkønixajy jøts yide'en tnimaay:

—Migu'uk Saulo, øts tø xkexy ja nwindson'ajtim Jesús, nay ja' midi ojts x'ixy jam tuu'am, ja'ats øts tø xkexy jøts me nyikwin'ejxwa'kxt jadigojk, jøts ja Espiritu Santo nayide'en mdatøjkiniyit.

18 Xjats jotmøñ kya'ay wyeengøjxp jade'en jajtp ja t'ixy ejximi ajkx jimeeñin, winets wyin'ejxpjiky jadigojk. Xjats ja Saulo pyidøknaa, jøts ojts ñøbety.

19 Jøts ja jadigojk kyaabyjiky, winetnimts ja myøjaaw tpjiky, jøts jap yjaaktsinaay ja majtsk xøøw ja tigøøk xøøw møøt ja' pøn tjanchja'widip ja Jesús jam Damasco.

Ku kyajpxwa'kxy ja Saulo jam Damasco

20 Xjats ja Saulo tkajpxwa'kxnibøjkøø jam tsaptøjkjotp, yide'en ja wyaañ ku ja Jesús y'U'nk'aty ja Dios Teety.

21 Xjats ja ñigyumaap tjanchja'widøø pøn jaty ja jam patmadojyøø, jøts ja xem yam ñagyajpxidøø, jøts yide'en ñawya'añidøø:

—¿Kidi nay ja jaa'yip yø' midi jam Jerusalén y'ijty tkamaa'kxp ja myigu'uk ku ja tpabøkti ja Jesús? ¿Kidi ja'ajip yø tø t'ukniñ jøts tmajtsmukøxt ja Jesús yjanchja'wibidi, jøts ttawinguwaawit ja møj tiidyumbidi?

22 Xjats ja Saulo jinaxy yjaaktyimkyajpxwa'kxy, jøts ja yikxon tyimñigajpxy jøts ku ja Jesús ya tø yjanchyikexy yiknitsokpi, jøts ja israelit jaa'y jadi'iñi myondi y'ookti pøn jaty jam wyinaty tsinaadyip Damasco, niiti kajpxy niiti ayuujk ja'adi.

Ku ja Saulo ayu'uch kyeejky

23 Xjats kyimjekñim ja israelit jaa'y tkajpxy'ajtnidøø jøts ja tyik'ooktit ja Saulo;

24 jaty Saulo ja tnija'wiyi'ñ. Winxøøw windsuu ja myidsep y'awejx'ityi ma pidsømdaajk jam, jamts ja tyimyik'oogiyit.

25 Winets ja Saulo ja myigu'uktøjkti pyiktaajkiyøø kachjøtpy jøts ttanikiñaxti ja pøch midi nawidity tukajpaa', jøts nika'ap jam ja pyidsimy ma ja myidsep y'awijxyi, paty idø'øn ja kya'ø'jky.

Ku ja Saulo jam yja'jty Jerusalén

26 Xjats ku ja Saulo jam yja'jty Jerusalén, jøts ja tminamyukwa'añi pøn ja Jesús tjanchja'widip. Janchtsø'jkidipti ja', kumi ka'ap ja tjanchjawidi jøts kudam ja Saulo nayide'en tjanchjawi ja Jesús.

27 Paty idø'øn ja Bernabé wyajiyøø, jøts ttukwinguwa'jkøø ja Jesús kyu-danaabyidi. Jøts nay ja' ttukmadoow sudso wyinaty tø t'ixy ja Jesús jam tuu'am, jøts nayide'en sa ja myigajpxiyøø, jøts nayide'en ja ttukmadøøy sa ja ojts jam jotmøk tkajpxwa'kxy ja y'ayuujk Jesús køjxp.

28 Xjats ja Saulo jam jade'en tyaañ Jerusalén, jøts ja møøt wyidejtni pøn jaty ja Jesús yja' pyadundip.

29 Jøts ja ka' ti tkumayjawi, jotkujk ja tkajpxwa'kxi ja nwindson'ajtim yja', jøts ja ttamimadya'aky ja israelit jaa'dyi pøn ja griegit ayuujk tkajpxtip; yikxon ja ñadyawingugajpxiyidi ku ja ja xe ja ya tum jade'en kyanagyupijkyiyidi ja wyinma'a'ñ, ja'ats ja israelit jaa'y ñiwinma'ayidip jøts ja tyik'ooktit.

30 Xjats ku ja myigu'uk jade'en tnija'widøø, winets ja yikwaanaa jøts yiknøkxiyøø jam Cesareit kajpjotp, jøts yikejxñim jøts ja ñøjkxt kyajpkijxpy midit txøøwip Tarso.

31 Xjats ja janchja'wibidi pøn jaty tsinaadyip jam etjotp midi yiktejp Judea, Galilea, jøts Samaria, nekim ja jam chinaañidi, jøts ñija'wi'adøjtsidip ja Jesús yja' ja'adi. Jøts juuni ja tka'ukwindsø'ogidi, ejtp ja twindsø'ogidi jøts namayi'adøtstip ja nayide'en, ja Espiritu Santo ja amuum pudøjkiyidip.

Ku ja Eneas chøøjky

³² Xjats ku ja Pedro wyinaty t'ayø'øy mā jaty ja janchja'wibi chøønidi, nayide'en ojts t'ixy ja janchja'wibi pøn jam tsinaadyip mā ja kajp txøøwi Lida.

³³ Jamts tu'uk tpaajty ja yaa'dyøjk mididi txøøw'ajt Eneas, tyuktujk jumøjtjip ja pa'am ja wyinaty tø pyajtniyyi, kyidyimpyidi'iky jøts køxuxyi pakxuxyi pa'am idø'øn ja myøøt.

³⁴ Xjats ja Pedro ja tnimaay:

—Eneas, Jesús myiktsojkip. Pidø'øk, wejtsjø'øk yø mmaabajt.

Xjats ja Eneas pyidi'iky jaty,

³⁵ xjats niduki'iyi ja jaa'dyi pøn jaty kugajp'ajttip jam Lida jøts jam Sarón kuuyi ja tnija'widøø, winets ja tyikutigøødyi ja mōjaa'chinaa'yin mididi ja wyinaty chinaadyip, jøts ja nwindson'ajtm yja' tpaabøjknidyidøø.

Ku ja Dorcas yjujkyjky jadigojk

³⁶ Nay ja'abi xøøw nay ja'abi jumøjt idø'øn chinaay tu'uk ja tø'øxyøjk jam Jopit kajpjojp, Tabita dø'øn ja xyøøw, yide'en yiktijy griegit ayuujk, Dorcas. Jøts nayi Jesús idø'øn ja yjanchja'wimiyip paty ja tjanchpudøki pøn ayooop pøn winmaapy.

³⁷ Winetsik idø'øn ja pa'am pyaajtniyyaa jøts ja tyimiyik'o'jkiyøø; jøts ku yikpujnaa, jøts ojts yikpikta'aky myiduknipatøjkixpy.

³⁸ Xjats kumi wingonts ja kajp mididi txøøw'ajtp Lida, mā jap wyinaty ja Pedro t'ayø'øy ja myigu'uktøjkti, jøts kumi tø ja wyinaty ja Dorcas myigu'uk tnijawidi ku ja jam wyidity, winets ja ñagyajxidøø namajtsk jøts ja t'atstukmado'odit ja Pedro jøts mye'ent putyi.

³⁹ Xjats ja Pedro jatyi tmøødi ja kugajpxtyi. Ku jam yja'ttøø, jøts jap tyimwyaanøjkiyøø mā ja oo'kpi jap, winets ja Pedro ja ku'øktyø'øxyti ñawa'kwidejtiyøø, jøts ja tyuk'ijxyi ja wet mididi wyinaty ja Dorcas tø tyik'øyi.

⁴⁰ Winets ja Pedro tkajxpidsømguixy ja jaa'dyi, jøts ja ñagyuxendyaajkøø, jøts kuts ja twindsapakajpxkijxy ja oo'kpi, xjats ja tnimaay:

—Tabita, pidø'øk.

Winets ja oo'kpi wyin'ejxwa'kxy jøts ja Pedro yikwin'ixy, winets chinaagyukøø.

⁴¹ Jøts ja kyø' ja tmajtstøø jøts ja jade'en pyidi'jky; winetnømts ja twaadsøøy ja Pedro ja myigu'ukti mididi ja kyajxpidsøøm jøts nayide'en ja ku'øktyø'øxyti, xjats ja twin'ejxtøø, tødäm yjujkyjky ja oo'kpi wyinaty.

⁴² Ñija'wigyøxtøø niduki'iyi ja Jopit kajp jaa'y, xjats namay tjanchja'widøø ja Jesús.

⁴³ Nay jam idø'øn ja Pedro tyaa'ni kawinaak xøøw jam po'ogoo'tspi tyøjkwindump, ja' idø'øn ja xyøøw Simón.

10

Ku ja Pedro tmigajpxy ja soldadi windsøn pøn yiktejp Cornelio

¹ Jam idø'øn tu'uk y'ijty ja yaa'dyøjk mā kajp jam txøøwi Cesarea, Cornelio dø'øn ja xyøøw, ja'ats idø'øn ja soldadi tukupiky tniwindsøn'ajtp pøn yikxøømøødyøø Italiāni.

² Xjats ja Cornelio møøt ja y'u'nk møøt ja ñidø'øxy, yjanchja'myatstip idø'øn ja Dios Teety ja', jøts nayide'en twindsø'øgidi. Ajot'ajttip idø'øn ja Dios jabom jabom, jøts nayide'en tjanchtabudøjkidøø ja myeeñ ja ayooibi jaa'y.

³ Tu'uk idø'øn ja xøøw sa yjajty sa kyubejty ja Cornelio, ku ojts wa'ats t'ixy awinmaa'ngyøjxp ja Dios Teety y'ankilis, tigøøk yaxpin idø'øn wyinaty ku ojts ñidøkiyi mā ja jap wyinaty, winets ja xøøw ja tyamigajpxiyøø:

—iMets Cornelio!

⁴ Winets ja Cornelio tsə'ogijaw i twin'ixy, jəts t'adsəy:

—iTi, teety?

Xjats ja ankilis ojts ñi'mxyiyi:

—Tə ja Dios Teety ja m'ajot'ajtin mgupəjkxiyi, jəts ku tə xpudəki nayide'en ja ayooi jaa'dyi.

⁵ Kax mgugajpxy jəts jam ñəjkxtit Jope, wan ja Simón t'atswawdi pən nayide'en yiktejp Pedro.

⁶ Jam ja myidsəəni po'ogoo'tspi wyindump pən yiktejmip nayi Simón, pən jam tsinaapy mejy wingon. Ja'ats mdukumadoowiyip pəni ti mdu'ump.

⁷ Xjats ku ja ankilis ñəjkxnaə, winets ja Cornelio twaadsəy ja tyumbi namajtsk. Wyaadsəw nayide'en ja soldađi tu'uk pən ja məət ñamyayi, jəts pən nayide'en twindsə'jkip ja Dios Teety.

⁸ Xjats ja ttukumadoogijxy ja kyugajpxtyi sə jaty ja ankilis ja wyinaty tə ñi'mxyiyi, winetnimts tkejxy.

⁹ Xjats ku kyimjabom'ajty, jawaani jam kyaja'tnidi kajpjətp mə ja yikaxtəə kugajpxy'ajtpi, winets ja Pedro pyejty jam təjkəjxp dios'ajot'ajtpi, kujk xəəw et idə'əw wyinaty.

¹⁰ Janch yu'oo'knip idə'əw ja wyinaty jəts ja kyaawya'añ; japnimts ja kaaky wyinaty y'əyi, ku jotməñ t'əjxpəajty jade'en kidi jaa'y kyumaə'y,

¹¹ ku ja tsajp y'awa'əch jəts t'ixy ñaxkida'əky, jade'en ja t'ixy kidim ja məj manti, jəts tum wendi maktəxk iskiin.

¹² Jəts jam mantikəjxp mayjəəjp ja jiyujk t'ixy, jam ja tsaa'ñ, jam ja joon, jəts jam nayide'en ja maktəxkpi tekpyi jiyujk.

¹³ Winets tmadəy ja ayuujk midi tsoo'mp tsajpjətpy, jəts ja yide'en ñi'mxyi:

—Pidə'ək Pedro, yik'ook inet yə jiyujk tu'uk jəts xtsu'utst.

¹⁴ Xjats ja Pedro t'adsəy:

—Ka' teety jade'en; niwindii əts jade'en ngatsu'uch ja kya'əybi kyawa'ətspi, midi kapaat'ajtiyip yiktsu'utst sam ja Moisés kyutujk.

¹⁵ Xjats jadigojk tmadəy ja kajpxy ja ayuujk, jəts wya'añ:

—Kidi jade'en xka'ədyij, tum mbaat'ajtip yə jiyujk tsu'uch midi Dios Teety tə ttanibktaəgi.

¹⁶ Tigəək oj k idə'əw ja manti wyimbijty y'adijy, jəts pyatəjkifnaə nay jap tsajpjətpy.

¹⁷ İxjam ja Pedro jade'en wyinaty myay tyajy, ti də'əw ja tyijpy jade'en midi wyinaty tə t'ixy ku ja Cornelio kyugajpxy yja'ttəə, tə ja wyinaty tyiknidəəwidi ja Simón tyəjk.

¹⁸ Kuts ja jam yja'ttəə tək'agi'py, winets mək tkugajpxidəə pəni jap ja Simón midi nayide'en yiktejp Pedro.

¹⁹ Kumi ja' wyinaty ja Pedro myimaapy myidəjpnim midi wyinaty tə t'ixy, winets ja Espiritu Santo ñimaajyəə:

—Nidigəək ixyam ja jaa'y m'ixa'ayiyi.

²⁰ Pidə'ək, winək jəts xməədit yə jaa'y, kidi ti xpawinmay, nay əts yə' ngugajpxy.

²¹ Xjats ja Pedro tniwinajky mə wyinaty ja Cornelio kyugajpxy y'awejxti, jəts ja tniəay:

—Əts meets idə'əw x'ixaapy. iTi də'əw mmimendip?

²² Xjats ja kugajpxy t'adsəəə:

—Ja Cornelio øø xyikugajpxy'ajtp, janch øy jaa'y ja' jøts nayi wyindsø'jkip ja Dios ja', xjats nayide'en janch tsojkip ja' ja israelit jaa'dyi. Nay ja Dios Teety idø'øn y'ankilis ja tnimaajyøø jøts me myikwa'at, jøts jam njaa'mint ma ja chøøni ja Cornelio, jamts mets x'atstukmado'ot pøni ti jaty me mnija'wip, jøts ti jaty mmadya'akwampy.

²³ Xjats ja Pedro tkuwaa'wiñaä tyøjkjōtpy, jøts jamyi myaadøø. Xjats ja kyimjabomnim choo'ndøø, winets ja Pedro twaay ja myijanchja'wibi winaagin midi jam Jope tsinaadyip.

²⁴ Jøtsnim kyimjabom yja'ttøø jam Cesarea, ma ja Cornelio y'awixxyiyi niduki'iyi møøt ja myigu'uktøjkti, midi wyinaty tø twaadsowdi jøts ja tpat-mado'odit ja Pedro kyajpxy y'ayuujk.

²⁵ Kuts ja jam tyimya'ttøø ja Pedro, xjats ja Cornelio y'adsoojyøø jøts ja pyidsimy tyøjkjōtpy, xjats ja jatyi ñagyxendyaajki ja Pedro wyingujky, jøts ja jade'en yikwindsø'øgi ejxim ja diosin.

²⁶ Winets ja Pedro jatyi twejtsji'iky, yide'en ja wyaañ:

—¿Tiku ø xwinguxaani? Pidø'øk, pø nay jaa'yts øts nayide'en sa mets.

²⁷ Jøts nay madyaktipnim idø'øn ja wyinaty, ku jap tyøjkidøø tøjkjōtpy ma wyinaty ja jaa'y jap yjanch'awejxti namay.

²⁸ Xjats ja Pedro tnimaay yide'en:

—Meets migu'uktøjkti, mnija'wip meets jøts ku øøts wenk n'israelitjaa'y'aty, ka'ap øøts n'øyjawi jøts øøts nmigu'uk tmøøtnabyaattit ja wenk jaa'dyi uk tyøkidit ja' tyøjkjōtpi, ka'ap øøts ja n'ødyijy, ka'ap øøts ja nwa'atstijy. Tøts øts Dios xuknijawi, jøts ku ka'ap jade'en y'øyi jøts øts jade'en nwinma'aty.

²⁹ Ja'agøjpx ø nmiñ jatyi ku mee xwaaðsøøy. Jøts nnijawiwypy øts ixyam ti meets idø'øn xamigajpxwamp ku meets xwaaðsøøy.

³⁰ Xjats ja Cornelio t'adsøøy, yide'en ja tnimaay:

—Ixym myimaktaxk xøøwiñi ku øts yide'en njajty, ya øts wyinaty ndøjkjōjty n'ayuu'aty, jøts ja Dios wyinaty n'ajot'aty winakxyøøw, ku øts jotmøñ n'ejxpaajty tu'uk ja yaa'dyøjk, jøts janch tsamamp ja wyet amuum kyaxi'iky.

³¹ Winets øts yide'en xnimaay: “Mets Cornelio, tø ja Dios Teety ja mdios'ajot'ajtin mgupijkyiyi, jøts ku tø xpudøki nayide'en ja ayooobi jaa'dyi.

³² Kax mgugajpxy jøts jam ñøjkxt Jope, wan ja Simón t'atsway pøn nayide'en yiktejp Pedro. Jam ja myidsøøni ja po'ogoo'tspi wyindump midi jam tsinaapy mejy wingon. Ja'ats mdukmadowiyip pøni ti mdu'ump.” Jade'en øts idø'øn ja ankilis xnimaay.

³³ Paty øts ngugajpxy jatyi nguejxy jøts me m'atsyikwa'at, pø janch øy ku tø xpaduñ ku tø mmiñ ya. Wa'ats ja Dios Teety x'ijxyim xnija'wa'am ku adøm ixyaadi, ku øø nbatmadoowa'añ ja nwindson'ajtim kyajpxy y'ayuujk midi ja tø mdamigaxiyi, jøts mets ja ya jade'en xnigajpxt.

Ku ja Pedro kyajpxwa'kxy jam Cornelio tyøjkwindump

³⁴ Winets ja Pedro kyajpxnibøjkøø, jøts ja yide'en wyaañ:

—Ixym njanch'ixy njanchnijawi ku ja Dios Teety chøjkpy ja' øpyønjaa'yi, ka'ap ja' tka'øyjawi,

³⁵ kyupijky ja' pøni pøn windsø'jkiiy, jøts y'øyjaa'y'attit nayide'en.

³⁶ Dios Teety idø'øn jade'en ojts ttukmadøy ja Israelit jaa'y, ku xmi'øy'atwa'añindi jadigojk ja Jesucristo køjpx pøn nwindson'ajtyindip niduki'iyi.

³⁷ Pø mnija'wipxi meets niduki'iyi sa yjajty sa kyubejty jam israelit jaa'y y'etjotpti, jam idø'on cho'ondaajky ma et txøøwi Galilea, tø wyinaty ja Juan Bautista jawyeen kyajpxwa'kxy, xjats ja jaa'y ja nayide'en namay tyiknøbejty.

³⁸ Ja pø mnija'wipxi meets nayide'en ku ja Dios Teety ja Jesús ttuktatøjkøø ja Espiritu Santo møøt ja myøk'ajtin, jøts nayide'en sa jaty ja wyidity ku ja t'ødyuñ ja jaa'y, jøts ku ja tyiktsø'øky pøni pøn ja miku' møøt y'itynim. Ja'agøjpx ja jade'en ttuuñ ku ja Dios Teety ja ejtp tmøøt'ity.

³⁹ Øøts idø'on tø n'ixy, øøts idø'on tø nnijawi, sa jaty ja Jesús ttuuñ jam Israelit kyamwemp kyamjotpti, jøts nayide'en jam Jerusaléngit jaa'y myøkajjotpti. Jøts nay tø øøts ja n'ixy sa jaty ja yjajty ku yik'o'jkiyøø ja jaa'y, jøts sa yikmitsumbejty jam kruskøjpx.

⁴⁰ Winets ja Dios Teety ojts kyidigøøk xøøw tyikpidsimy jap oo'kpi jutjotpy ma ñajxøjkøø ja Jesús, xjats øøts ja xukyikwingaxi'jky.

⁴¹ Ka'ap ja yiktuk'ejxtøø ja mayjaa'dyi, øøts yide'en yø xukyikwingaxi'jky, kumi tø øøts ja wyinaty jawyeen xwi'ixy, jøts øøts ja n'ext, jøts øøts ja nnijawit. Xjats ku ja jade'en jadigojk yjujkpyijky, jøts øøts ja ngaay jøts øøts ja n'uuky møøt.

⁴² Xjats øøts ja xani'ane'emy ja kajpxwa'kxk, jøts øøts ja jaa'y ndukmado'ot nduknijawit ku ja Dios Teety ja kø'øm tpiktaajky ja Jesús, jøts ja jujkpyi ja øøkpyi ttiidyu'unt.

⁴³ Nayide'en idø'on wyinaty jekyip ja Dios Teety kyugajpxy tø tkajpxti tø tmadya'akti ja Jesús, jøts pøni pøn tjanchja'wip ja Jesús, winets yik-maa'kxuktif ja pyøky. Jade'en ja Pedro ja tnimaay ja jaa'y.

Ku ja Espiritu Santo ttatøjkøø pøn ka'israelit jaa'yidi

⁴⁴ Ñagyajpx'adøtsp wyinaty ja Pedro, ku ja Espiritu Santo tyatøjkiyidøø niduki'iyi ja jaa'y pøn jaty jam wyinaty patmadojyip ja Pedro.

⁴⁵ Xjats ja israelit jaa'y pøn ja Pedro tpadsoo'niyidøø ku ojts ja kugajpxy jam wyayidi, winets ja ñigyumaap tjanchja'widøø ku ja Dios tyuktatøjkiyidøø ja Espiritu Santo øpyønjaa'lyi, pøn ka'ap israelitjaa'yidi.

⁴⁶ Ja'agøjpx idø'on ja ojts yiknijawi ku ja adsu'jky ojts tjanchkajpxti tum ja wenk ayuujk, jøts ku ja nayide'en tjanch'øyja'widøø ja Dios.

⁴⁷ Xjats ja Pedro tnimaay ja myigu'uk midi myøøtwidijtpy:

—¿Ti pøn mibaat xkadukyiknøbajtimp yø jaa'y, pø tøxi Espiritu Santo ty-atøkiyidi jade'en sam adøm?

⁴⁸ Xjats ja Pedro tni'ane'jmy jøts ja ñøbattit ja nwindson'ajtim Jesucristo myøk'ajtingøjpx. Jøts ja Pedro møkta'aky yiknimaay, jøts ja jam yjaakta'anit ja winaak xøøwin.

11

Ku ja Pedro ttamimadyaajky ya'atpi ayuujk pøn tjanchja'widip ja Jesús jam Jerusalén

¹ Xjats ja tnija'widøø ja Jesús kyudanaabyidi pøn jam tandi Judeit y'etjotp, jøts ku ja wenk jaa'y wyinaty tø tkupiky ja Dios kyajpxy y'ayuujk pøn ka'ap y'israelitjaa'yidi.

² Xjats ku ja Pedro jadigojk wyimbijty jam Jerusalén, winets ja twindsø'ødyøø ja Pedro:

³ —¿Tiku ja tø x'ats'ixy ja wenk jaa'y pøn ka' y'israelitjaa'yidi, tiku møøt tø m'atskay m'atsjikxy?

⁴ Xjats ja Pedro tnimadyajktøjkøø sa ja yjajty sa ja kyubejty ku ja ojts yikway yikwich, jøts ja wyaañ:

5 —Jam ø wyinaty Jopit jaa'y kyajpjotp, jøts Dios'ajot'ajtpi wyinaty, jøts jade'en nja'wøø kidi ja jaa'y kyuma'ay, jade'en n'ejxpaajty ejxim ja møj manti, ku n'ijxy kyida'aky tsajpwemp tum wendi maktaxk iskiini, jøts wyingøøn ma øts jap wyinaty.

6 Xjats nwin'ijxy yikxon ti dø'on jap mantijøtpy, winets jap n'ejxpaajty janch mayjøøjp ja jiyujk, jap wyinaty tsaa'n, jap wyinaty joon, jøts nayide'en ja jiyujk midi maktaxk ja tyeky, jøts nayide'en midi janch'awa'andi.

7 Winets nmadøøy ja ayuujk ku ø xnimaay: “Pidø'øk, Pedro; yik'ook inet yø jiyujk tu'uk jøts xtsu'utst.”

8 Jøts ø n'adsøøy: “Ka' teety jade'en. Niwindii øts jade'en ngatsu'uch ja kya'øyi kyawa'atspi, midi kapaat'ajtiyip yiktsu'utst sam ja Moisés kyutjkin.”

9 Winets øts jadigojk xmigajpxy jøts øts xnimaay: “Midi ja Dios tø tyikwa'ach kidi xka'ødyijy.”

10 Tigøøk ojk idø'on ja manti wyimbijty y'adijy, jøts pyatøjkiñaa nay jap tsajpjøtpy.

11 Xjats ku øts jade'en najty, winets nay jatyi yja'ttøø nidigøøk ja yaa'dyøjktøø ma øts ja wyinaty, Cesarea dø'on ja choondi jøts jam ñøjxkti ma øts ja xpaattøø.

12 Winets øts ja Espiritu Santo xnimaay jødsik øts ja kugajpxy nmøødidit, jøts ku nayide'en ka'ap ti nbawinma'aty. Winets ø xpadsø'ondi niddujuk ja Jopit jaa'dyi pøn tjanchja'widip ja Jesús. Xjats ku øøts jam nja'jty Cesarea, winets øø niduki'iyi ndøjkøø Cornelio tyøjkjotp pøn ø xnigajxøø.

13 Winets øøts ja xukmadøøy sa ja yajty sa ja kyabejty jam tyøjkjotp, ku ja ankilis tu'uk t'ejxpaajty, jøts ku ja ñimaajyøø: “Kax mgugajpxy jøts jam ñøjxkt Joep, wan ja Simón t'atsway midi nayide'en yiktejp Pedro.

14 Ja'ats mdukmadowiyidip sudso m'anmija'win y'awa'atspidsø'ømdit møøt mmigu'uktøjkti.” Jade'en ojts ñi'mxyi.

15 Xjats ku ojts nmigajpxnibøki niduki'iyi, winets ja Espiritu Santo tyatøjkiyidøø, nayide'en sam adøm xatøjka'andøø ku ojts myiduk'ojk tyimyiñ.

16 Xjats ku øts jade'en n'ijxy, winets øts jatyi nja'myejch ja nwindson'ajtim y'ayuujk sa ja wyaañ ku ja Juan Bautista mayjaa'y nøø ttuktanøbejty, jøts ku ja wyaañ: “Wenk mee mjatt, jade'en ku Espiritu Santo mdatøkiyidit.”

17 Pøni tyukatøkiwyampy ja Dios Teety ja y'Espiritu Santo ja wenk jaa'dyi jade'en sam adøm xuktatøjka'andøø, kumi adøm njanchja'windip ja Jesús, ¿ti øts ja jade'en ngaduktunip? Tsaachtyi øts idø'on, pø kø'ømxi ja jade'en ttunwa'añ.

18 Ku ja jade'en tmadoodøø ja Pedro y'ayuujk, winets y'amongøjxtøø jøts jotkujk'ajttøø, jøts ja Dios Teety tmøjpiktaajktøø, jøts yide'en wyaandøø:

—Tø ja Dios Teety ttanibiktaagi jøts nayide'en yikunuu'kxtit øpyønjaa'yi ku ja tmajtstu'uttit ja kya'ødyunk, winets ja tsinaa'yin xemikøjxp tpaattit!

Ku ja jaa'y ja Jesús tjanchja'wi'okwa'añ jam Antioquia

19 Ku ja Esteban t'ukyik'oo'ktøø, winets t'ixaañibøjkidøø pøn ja Jesús tjanchja'widip, xjats ja winaagin kyaknøjkxtøø Fenicia, Chipre, jøts nayide'en Antioquia. Japts ja tkajpxwa'kxtøø ja øgyajpxy ja ømyadya'aky. Ka'ap ja nugo ajaw tndyukmadowdi o pøn, agø'ømyi ja tnadyamimadya'agyidi tuk'israelit jaa'dyi.

20 Xjats winaagin ja'adi midi jam tsoo'ndip Chipre jøts nayide'en Cirene, ku ja nay jam yja'ttøø Antioquia winets ja nayide'en tkajpxwa'kxtøø ja øgyajpxy

ja ømyadya'aky, midi anmija'win tyiknitso'ok'ajtp, ja'ayi tyukmadoodip pøn ka'israelit jaa'dyi.

²¹ Janchkunuukxidi ja Dios ja' ku ja kyajpxwa'kxti, winets ja japit jaa'y tjanchyiktigatstøø chinaa'yindi, jøts ja nwindson'ajtim yja' tpabøjkiñidøø.

²² Xjats ku ja jade'en tnija'widøø ja Jesús yjanchja'wibidi pøn jam tsinaadyip Jerusalén, winets ja tkaxti nay ja' myigu'ukti pøn txøw'ajt Bernabé, jøts jam ja ñijxy Antioquia.

²³ Xjats ku jam yja'lty, jøts ja t'ijxy jøts ja tnija'wøø sa ja Dios Teety wyinaty tø tkunuukxy ja Antioquiit jaa'y ku ja chinaa'yin wyinaty tø tyiktigatsti, winets ja janch yjotkujk'ajty yjanchxondaajky. Xjats ja tkajpxjot'amøkøø jøts amumjoojt ja nwindson'ajtim yja' tpaduujnidit, jøts niyuuni tkamajstu'uttit.

²⁴ Janch yuyj idø'on ja Bernabé, yjanchmøø'tajtpy ja Espiritu Santo, jøts nayide'en ja Dios t'ajot'ajty. Xjats jade'en ja namay jaa'y tpabøjkidøø ja nwindson'ajtim yja'.

²⁵ Xjats ku ja jade'en yjajty kyubejty ja Bernabé, winets ja ñøjkkøjmaa mā txøwi Tarso jøts ja t'ats'ixa'at ja Saulo. Kuts ja jam tpaajty, winets ja twaanijxy mā ja wyinaty tø tñidsøøñ jam Antioquia.

²⁶ Japts chinaadyøø tu'uk jumøjt ka'pxy møøt ja janchja'wibidi jøts ja tyik'ixpøktøø. Nay jam idø'on Antioquia mā ojts ja Jesús yjanchja'wibi yiktejtij mijawyeen cristianos.

²⁷ Nay ja'abi xøw nay ja'abi jumøjt ku ja Dios Teety kyugajpxy ojts ñijxy nay jam Antioquia, pøn jam tsoo'ndip Jerusalén.

²⁸ Xjats ku yja'ttøø, jøts tu'uk txøwi Agabo, ja' idø'on jam ojts tyanaay'øyi mayjaa'y agujkp, jamts ja kyajpxwa'kxy Espiritu Santo myøk'ajtingøjxp, jøts wyaañ jøts ku ja yuu møk'ampy myeenwa'añ ya naxwiñ. Janch tiy yide'en, janch jajt idø'on ja jade'en winet ku Claudio wyinaty myøjwindsøn'aty.

²⁹ Xjats ku ja jade'en ja janchja'wibi tmadoodøø ku ja yuu myenwa'añ, winets ja tkajpxy'ajttøø jøts pudøjkin ttanigaxtit ja myigu'uk pøn jam tsinaadyip Judea, jade'en pøni sa kø'øm tmo'owa'andi nidu'uk nidu'uk.

³⁰ Jade'en ja tundøø, jøts ja ttamigaxidøø ja Bernabé møøt ja Saulo, jøts jam tkømo'odit ja jamit møjaa'dyøjkti.

12

Ku ja Herodes tñankiyik'o'jkøø ja Jacobo jøts ja Pedro ja'ayi yiktsuumy

¹ Xjats nay ja'abi xøw nay ja'abi jumøjt ja møj windsøn Herodes tjem-dunibøjki ttedunibøjki winaagin ja Jesús yjanchja'wibidi.

² Jøts ja ttukta'ø'jky ja yøñchujx ja Jacobo, ja Juan y'ajch,

³ jøts ja t'ijxy ku ja israelit jaa'y ja yjawi jade'en ttaxonda'akti ku ja jade'en y'adi'ich. Xjats ja Pedro yjaaktyimykmaçh paski xøøøjty, winet ku ja tsapkaaky jadi'iñi yikay midi kalevadurimøøt.

⁴ Xjats ku jade'en ja Pedro yikmaçh, winets ja windsøn Herodes ja pyiktaajkiyøø puxøjkjtpy, japts soldadi ja y'ejx'ityiyi maktaxk piky jøts maktaxk soldadi tukpiky jaty. Jade'en ja Herodes yjawinmaaay jøts ja tyikpidsøømt ja Pedro paski xøøguixy, jøts ja mayjaa'y ttuk'ejxwa'añ ttuknijawiwya'añ.

⁵ Jap wyinaty ja Pedro tsumy, jøts nayide'en ejtp idø'on ja y'ejx'ityiyi ja soldadi, winets ja Jesús yjanchja'wibi tni'amidowidi tñibøktowidi ja Pedro amumjoojt, jøts ja ttukmadoodøø ja Dios.

Ku ja Dios Teety y'ankilis ojts tyik'awa'atpidsimy ja Pedro jap puxøjkjtpy

6 Nay ja'abi tsuu ku wyinaty tyimbyaatwaani ja kajpx'aats ku ja yikpidsomiyit jøts ja kajp jaa'y y'ejxit ñijawiyit, jøts jaakmaap jap wyinaty ja Pedro. Jap wyinaty adsov aduuk ja soldadi ñama'ayiyi, puxkadeen koxøch wyinaty ja Pedro, jøts nayide'en ja soldadi t'ejx'etti ja tøk'aaw.

7 Winets jatyi ñimejnyøø ja nwindson'ajtim y'ankilis, jøts jap puxøjkjøtpy jajpøjkijxy. Xjats ja Pedro yikjijxy jøts ku tyikniwijy, winets tnimaay yide'en: —Pidø'øk putyi.

Kuts ja pyidi'iky jøts ja kadeen jade'eñi kø'øm kyajnaa,

8 xjats ja ankilis ñimaajyiyøø yide'en:

—Nachumjønnyi yikxon, jøts tawa'agi yø mgø'øk.

Xjats ku ja Pedro jade'en tpaduun, jøts ja ankilis yjaaknimaajyøø:

—Tatøki yø mxox jøts øts ix'oojk xpayø'oty.

9 Xjats ja Pedro ix'oojk tpadso'ñ ja ankilis, ni tkanijawi pø janch kajanch ku ja yik'awa'atpidsomwa'añiyi. Jade'en jajtp ja tjawi ja Pedro kidi jaa'y kyuma'ay.

10 Xjats ku ja jade'en yiktsoo'niyøø ja ankilis, jøts jam ñaxti ma myidukupiky ja ejx'ejtpidi, jøts nayide'en twinaxti ma ja myimajtsk pikpyi ejx'ejtpidi, jøts jam yja'ttøø ma pux'agaj jam tuu' pa'am, winets ja pux'agaj kø'øm y'awaajch jøts pyidsomdøø. Xjats ku jade'en y'awa'atpidsomdøø, jøts yjaagyø'dyi jadu'ukpi tuu', japnimts ja Pedro ojts yikmajstuty nadyu'uk.

11 Xjats ja tjanchja'wøø ku y'awa'atpidsimy, jøts yide'en wyaañ:

—Pø janch jade'endamxi dø'øn ku ja nwindson'ajtim tø tjanchkexy ja y'ankilis jøts øts ja xyik'awa'atpidsø'ømt jap puxøjkjøtpy, jøts ja israelit jaa'y møøt ja wyindsøn Herodes jade'en tø xkamimajada'akti pøni sa øts ja' xtyimya'uktunwa'andi.

12 Jade'en ja Pedro wyinmay, xjats ja ñijxy jam María tyøkwindum midi ja Juan tyaa'gip, ja Juan midi nayi yikxøømoøpy Marcos. Ja' idø'øn ja tyaa'k tyøkwindum ñijxy ja Pedro ma ja mayjaa'y jam wyinaty tø ñamyukyidi, jøts idø'øn ja jam Dios'ajot'atti.

13 Kuts ja Pedro twingøjxy ja tøk'agi'pyit agaj, winets ja kiixy Rode pyidsimy tyøjkjøtpy, jøts ja ojts tpatmadøy pøni pøn ja'.

14 Xjats ku ja ojts tyukmadøy kudam ja Pedro kyajpxy, nika'ap ja tøk tyik'awaajch, janch jotkujk ja wyimbijty yukwøøñ chapwøøñ, jøts ja myigu'uk ja t'atstukmado'ot ku ja Pedro jap kyajpxy.

15 Xjats ja myigu'uk ñimaajyiyøø:

—iPø mguma'aymadyakp mets!

Jøts ja kiixy ja tyimyanimaay ku ja tyimdyiy tyimjanchi. Xjats ja ka'ap tyimybøkti tyimwyandip ja':

—iKa'ap inet yø yja'aji; pø ja y'ankilis yø' midi nitanaajyiyip!

16 Ixap ja Pedro jøp'ijxy tyøkwingøxy. Jøts ku ja tyik'awatstøø ja tøk'aaw, jøts pø ma ja tyimya'jttøø ku ja twingu'ejxidøø jøts kudam ja yjanchja'aji.

17 Ja'ayi ja Pedro ja kyø' tñanky'ejxøø jøts ja tukween y'ettit amøñ, winets ja tnimadyajknibøjkøø sa ja yjajty sa ja kyubejty ku ja nwindson'ajtim ojts yjuudyi jap puxøjkjøtpy; xjats ja nayide'en t'uknimaañaa jøts ja ttukmado'odit ja Jacobo, nayide'en ja Jesús yjanchja'wibidi, jøts ja tñijawidit.

Xjats ku jade'en t'uknigajpxkøxnāa, winets ja choo'nāa jøts ja ñijxy abikyajp.

18 Xjats ku kyimjabom'ajty ku xyiijñøø, winets ja soldadi ñigyumaap ñajya'wiyidøø ku ka'ap ja Pedro jap ukpøni.

19 Xjats ja Herodes møk pyagajxyidøø jøts ja t'ats'ixa'adit, ka'ats ja ma t'ukpaatnidøø. Xjats ja Herodes wyaadsojxyidøø niduki'iyi jøts ja

tyuknigajpxwa'añidi sudso'ampy ja Pedro pyidsiimy, winets ja Herodes ja yik'oo'kiniðøø. Xjats ku ja jade'en y'adiijch, winets jam choo'næg Judeit y'etjotp, jøts ñøjknæg tsinaabyi jam Cesarea.

Ku ja Herodes y'øjky

²⁰ Xjats ja møj windsøn Herodes janch mi'ajkip ja jaa'y ja' pøn jam tsinaadyip Tiro jøts nayide'en Sidón. Xjats ja Tirot jaa'y møøt ja Sidóngit jaa'y tkajpxy'ajtnidøø sudso ttu'undit sudso tyaabyaattit. Winets ja kyugajpxy tkajxtøø jøts ojts tpaatti ja Herodes kyudsinaabyi pøn txøøw'ajt Blasto, ja'ats ojts tnøjmidi jøts tnøjmit ja wyindsøn Herodes, jøts ka'ap cheptu'undit jøts jotkujk chøønidit, ja'agøjxp ja jade'en tnimaadyøø ku ja yji'kxy jam tjuydi tkajpxti ma Herodes yikutuky.

²¹ Xjats ja Herodes twaadsøø ja namayjaa'y, jøts jap mye'endit ma kya'amaadyaajk, xjats ku ja jade'en myengøjxtøø ja jaa'y, winets ja ttatøjki ja xyox midì amuum tsamamp, winets kyajpxwa'kxnibøjkjøø jam mayjaa'y wyingujkp.

²² Xjats ja mayjaa'y jade'en ñigyumaap tjanchja'widi ku ja jade'en kyajpxwa'kxy, jøts ja xem yam møk yjanchnøømdi:

—Yø' ixja kyajpxwa'kxy ka'ap yø yjaa'y, dios yø'.

²³ Xjats ku jap wyinaty kyajpxwa'kxy, winets ojts jatyi ja nwindsøn'ajtim y'ankilis yikpa'ambaadyiyi, ja'agøjxp jade'en yjaty ku kø'øm ñamyøjpikta'agyiyi, jøts ku ja Dios ne'egi tkamøjpikta'aky. Ku ja jade'en pyiky, tinø'øk idø'øn jam y'am yjotp tøjkiñæg, ja'ats jadi'iñi tsu'tskøjxniyøø.

²⁴ Winets ja nwindsøn'ajtim y'ayuujk myøjtak'adøtsnæg, yikajpxwa'kx ja omagajp.

²⁵ Xjats ku ja jade'en tyungøjxtøø ja Bernabé møøt ja Saulo, ku ja tminaxti tmidøkidi ja pudøjkin, winets ja jap choo'nidøø jøts ñøjknidøø Jerusalén møøt ja Juan midì nayide'en yiktejp Marcos.

13

Ku ja Bernabé møøt ja Saulo myiduk'ojk choo'ndøø kajpxwa'kxpi

¹ Jam Antioquia wyinaty namay ja Jesús yjanchja'wibidi, jam ja kyuga-jpxy'ajtpi jøts nay jam ja yik'ixpøjkipidi. Yä'at idø'øn jade'en yiktejtíp Bernabé, jøts ja Simón (midì nayide'en yiktejp Negro), nayide'en ja Lucio ja Cirenit jaa'y, jam ja Manaén (midì yaakti tuknæg møøt ja Herodes midì windsøn'ajt jam Galilea) jøts jam nayide'en ja Saulo.

² Tu'ukpi xøøw idø'øn ya'at jaa'y jade'en ñamyujkidøø jøts ja nwindsøn'ajtim twindsøn'jkidøø, ayuu'ajttip idø'øn wyinaty ku ja Espiritu Santo wyaañ:

—Jigaxti yø Bernabé møøt yø Saulo, jøts ttu'undit midì øts yø tø ndaniwaadsowidi.

³ Xjats ku jade'en Dios'ajot'ajt'abajtidøø ayuu, xjats ja myigu'uk t'ukønixajkjøxnidøø, winets ja yikajxtsoo'nidøø.

Ku ja Jesús kyudanaabyi kyajpxwa'kxtøø jam Chipre

⁴ Xjats ku jade'en ja Saulo møøt ja Bernabé yiktsoo'niñidøø ja Espiritu Santo, winets ñøjktøø ma jam txøøwi Seleucia. Jamts ja barki ttatøjkidøø jøts ñøjktøø jam Chipre.

⁵ Xjats ku jam yja'ttøø ma ja barki wya'k'øyøø ma jam txøøwi Salamina, winets ja tkajpxwa'kxnibøjkjidøø ja Dios kyajpxy jam tsaptøjkjotp. Jøts nay jap ja Juan tmøødidi, ja'ats ja pudøjkiyidøø.

6 Xjats ja jade'en ja Chiprit naajx ttayø'øñaxtøø, jøts jam yja'ttøø mejy wingon ma txøøwi Pafos. Jamts tpaattøø tu'uk ja israelit jaa'y pøn txøøw'ajt Barjesús, yik'adujkp ja' jøts nayide'en xyimay. Dios idø'øn kyugajpxy ja ñadyijyi jøts ja jaa'y tjanchwin'ññ.

7 Jam idø'øn ja tyuñ møj windsøn wyindump pøn txøøw'ajt Sergio Paulo, janch wijy janch keji idø'øn ja windsøn. Winets ja tñigajxøø ja Bernabé møøt ja Saulo, yjanchmadoowampy idø'øn ja' ja Dios kyajpxy y'ayuujk jøts ja tyukmadowiyit.

8 Xjats ja yik'adujkpi midi nayide'en yiktejp Elimas t'agajpxøø ja møj windsøn, ku ka'ap tkupøkt pøni sa wya'andi ja Bernabé møøt ja Saulo.

9 Xjats ja Saulo pøn nayide'en yiktejp Pablo, yjanchmøøt'ajtpy ja Espiritu Santo ja', paty ja tjanchwin'ijxy tiiyim ja yik'adujkpi,

10 jøts ja yide'en tñimaay:

—iMets windaayibi jaa'y, kawindiy jaa'y mets, miku' mdeedyip, mi'ajkip mets ja' pøn øy tsinaadyip! ¿Tiku xyikutigøøwya'añ ja nwindson'ajtim kyajpxy y'ayuujk?

11 Ixym idø'øn ja nwindson'ajtim myik'ayo'ombaaadiyt; kunim me mda'ant winjoox jøts may xøøw idø'øn jade'en xkawin'ext ja xøøw.

Xjats tyimyjaty tyaañ jade'en kugoots, winets t'ixaay pøni pøn tuu'wetsiyip.

12 Xjats ku ja jade'en t'ijxy ja møj windsøn sa ja yjajty sa ja kyubejty ja yik'adujkpi, winets ja jaty' tjanchja'wøø pøni sa jaty ja tyukmadoojyøø ja Saulo møøt ja Bernabé. Janch tyimñigumaap idø'øn ja tja'wiyi'ñ ku ja yik'adujkpi jade'en yjajtnaa ja nwindson'ajtim Jesús myøk'ajtingøjpx.

Sajyajttøø sa kyubajttøø ja Pablo møøt ja Bernabé jam Antioquia midi tamp Pisidiit y'etjotp

13 Xjats ja Pablo møøt ja yjamyøøt jam tyøjkidøø Pafos barkijotp, jøts jam ja ñøjkxti ma txøøwi Perge, nay jam Panfilia y'etjotpti; jøts ja Juan jamyi ja tminawya'lkxidøø Pafos jøts ja ñøjkxnaa Jerusalén.

14 Xjats ku jam ja jade'en yja'ttøø Perge, winet jam choo'ngojmidoø jøts yja'ttøø Antioquia, nay Pisidia y'etjotpti. Xjats poo'kxin xøøw winets tyøjkidøø jam tsaptøjkjotp, japts y'ixaktøø.

15 Xjats ku ja jade'en yikajpxkijxy ja nøky midi ja Dios kyutujk myøøt, jøts nayide'en sa wyandøø ja Dios kyugajpxtyi, winets ja tsaptøjk windsøn ojts ñimaajyidi ja Pablo møøt ja yjamyøøt:

—Meets migu'uktøjkti, kidi wan meets jap xmimiñ xmija'aty ja kajpxwejin, kidi wan meets xukmadowandip yø jaa'y, tukmadowdits.

16 Winets ja Pablo tyanaagyukøø jøts ja kyø' ja'ayi tñanky'ijxyi, ja' tyijpy jøts ja jaa'y y'amo'ondit jøts tpatmado'odit, xjats ja yide'en wyaañ:

—Ukpatmadowdi meets Israelit jaa'y pøni pøn jaty ja Dios twindsøn'jkidip:

17 Meets Israelit jaa'y niduki'iyi pøn adøm ndios'ajtyindip, ja' ojts twi'ixy adøm n'apteety'amøjti jøts ja tpiktakti adøm ndsinaadyaajkti janch møj, winet ja yjajty ku wyinaty nay jam chøøniidi Egiptit jaa'y y'etjotpti jade'en ejxim ja ja'at jaa'y; xjats ja møk'ampy jadigojk kø'øm ja Dios tyimyikpidsøøjmiyidoø nay jam,

18 jøts ja tyiknaxtit jam tø'øts etjotp wixijkxy jumøjt, kuwañim ja Dios ja yikujky'ajtidi øy ja tpadundi tkabadundi ja Dios y'ayuujk.

19 Jøts ja nayide'en tyikudigøøy wixujk ja møj kajp midi jam wyinaty ejttip ma txøøwi Canaan, jøts ja n'apteety'amøj yikmo'odit ja ñaajx.

²⁰ Xjats jade'en maktaxk magø'pxy jagujkp jumøjts ñitanajyidøø kunim ja kugajpxy kyaxi'iky mido t'xøøw'ajt Samuel.

²¹ Xjats ja kø'øm t'amidoonidøø tu'uk ja windsøn pøn ja nitaniyidip, winets ja Dios tu'uk myøøjyidøø pøn t'xøøw'ajt Saúl, ja Cis y'u'nk, nay ja Benjamín y'ap, ja'ats wixijxy jumøjt ttuun.

²² Winets ja Dios jadigojk pyøjkiyøø ja windsøn'ajtk, jøts ja nagyø'øm tpiktaajk ja David, xjats ja Dios wyaan: "Tø øts nbaaty ja David, mido ja Isai y'u'nk'ajtpy, yø' janch yujy janch tuda'aky, xpaduujnip øts yø' nja' pøni sa ø ndsøky."

²³ Xjats ja Dios nayide'en tnaajskajxøø ja Jesús mido adøm n'Israelit jaa'y tyiknitso'ok'atp, yø' idø'øn ja David myigu'uk'ajtpy, kuts ja Jesús myiñ pø kø'ømxi wyinaty ja Dios tø wyanda'aky.

²⁴ Xjats ja Jesús namga'anim wyinaty tyundøki, winets ja Juan Bautista jawyeen tkajpxwa'kxy jøts ja Israelit jaa'y tukmadøøy, jøts pyøktyu'unin tmaajstuttit jøts ñøbatkøxtit.

²⁵ Xjats ku ja Juan Bautista y'oo'knaa, tø ja wyinaty tñøjmi ja Israelit jaa'y, jøts ku ja ka'ap yja'aji pøni sa ja wyinaty tñijawidi ku ja yiknitsokpi myiñ, jøts ja tñimaa'y: "Ix'oojknim ja mye'ent pøn øts nijuuni møøt nganamyaat'atiyit."

²⁶ Xjats ja Pablo yjaakajpxwa'kxy, yide'en ja wyaan:

—Meets migu'uktøjkti, pøni pøn jaty ja Abraham myigu'uk'ajtpy, jøts nayide'en pøni pøn ja Dios twindsø'jkidip, yø kajpxy yø ayuujk yø' adøm ndanitsø'ok'ajtindip mido øts ixyam nnigajpxwampy.

²⁷ Ukmadooda'am, ja' pøn jaty jam tsinaadyøø Jerusalem nayide'en pøn ja wyindsøn'ajttøø, ka'ap ja tñija'widøø ku ja Jesús wyinaty tø kyexyi ja Dios Teety, jøts kyidyimwyinmadoodøø dø'øn ja kajpxy ja ayuujk mido ja Dios kyugajpxy wyinaty tø tjaadya, ja' idø'øn xyumikajpxtip etip ku ja poo'kxin xøøw jam kyø'øm tsaptøjktøpti; winets idø'øn ja kø'øm ttami'ambøjktøø ja Jesús, jøts ja jade'en ttuundøø sa ja Dios kyugajpxy tyiktaa, ja ayuujk.

²⁸ Xjats ku ja kø'øm tkamiwinmaa'nbyaattøø ti ja tyukpøky'ajttip jøts tyik'ooktit, winets ja tñimaadyøø ja Pilato jøts ja Jesús tñankyik'oogyit.

²⁹ Xjats ku ja jade'en ttundi tuki'iyi sa ja Dios kyugajpxy tjaadya, jap nøkyjøtpy, winets tyikwinajktøø jam kruskøjxp jøts tyiknaxøjkidøø.

³⁰ Ja Dios Teetyts øjts kø'øm tyikjujkyiky jadigojk jap oo'kpi jutjøtpy.

³¹ Xjats ku pyidsiimy, winets øjts jeky ñanky'ijxyiyi jam jaa'y wyindump mido myøøtwidejt ku choo'ndøø Galilea jøts ñøjktøø Jerusalem. Ja' idø'øn ixyamdi pøn tkajpxtip tñadyaktip ja Jesús jøts ttukmado'odit ja jaa'y.

³² Jøts øøts nayide'en ixyam nnigajpxy nñimadya'aky, jøts meets ndukmado'ot ja øy ayuujk sa ja Dios Teety tpiktaajky ja wyandaajkin adøm n'apteety'amøjkøjxpti.

³³ Ja agøjxp ku adøm ja n'apteety'amøj'ajtyindi, paty ja tø tpaduñ ja Dios Teety ja wyanda'aky jøts ku ja tø tyikpidsimy jadigojk ja Jesús jap oo'kpi jutjøtpy, jade'en sam jap wya'añ myimajtsk salmojøtpy ku yide'en wyaan: "Øts me n'u'nk'ajtpy, jøts tø mets mjuky'ajtin ixyam nmø'øy."

³⁴ Xjats ja Dios jade'en wyinaty tø ttanibiktaagi jøts ku ja tyikpidsø'ømt ja Jesús jap oo'kpi jutjøtpy, jøts nayide'en ku ka'ap ja ñine'kx wyindigø'øty, jade'en idø'øn jap wya'añ ja Dios kyajpxy jap nøkyjøtpy: "Nayide'en meets ngunuulxkt sa øts ja David tø nnøjmi."

³⁵ Paty nayide'en jadu'ukpi salmo wya'añ: "Ka'ats me Dios Teety ja xyikjatt jade'en jøts øts nñine'kx wyindigø'øty, pø xtsøky'ajtpxi mets."

36 Janch tiy idø'øn ja' ku ja David ja yjaa'y ojts tpuðøki sa ja Dios ja wyinmaa'n myøøjyøø, xjats y'oo'knaa jøts nay jam ñajxøkikiy'i'n ma ja y'apteety'amøj wyinaty tø ñajxøkidi, jøts ja ñine'kx nayide'en wyindigøøy.

37 Pønts ja Dios Teety kø'øm tø tyikjujkyiky jadigojk, ka'ap ja ñajxnine'kx ja jade'en tø wyindigøøy.

38 Meets migu'uktøjkti, kuwani xnijawidit ku ja Jesús ja' tu'ugyi xpo-
jkipimaa'kxindip pøn meets ixyam myiktukmadoop.

39 Ja'ayi dø'øn tu'umchi niduki'iyi tpojkpimaa'kxp pøni pøn ja janchja'wiyip ja y'ayuujk, jøts ni ja Moisés kyutujk jade'en kyapojkpiimee'kxy pøni pøn ja tpadump.

40 Øyim mnay'eix'etidit jøts ka'ap jade'en mjattit sa ja Dios kyugajpxy tjaadyandøø, ku ja yide'en wyandøø:

41 Meets nixekpi taxekpidi, pø nigyumaap mee xjawit sa n'adø'tst; pø ka' xjanchjawidit øy ja pøn kugajpxy mjadukmadøøyidi, pø jade'en ne'egi jøts mdyimgyudigø'ødyit.

42 Xjats ja Pablo jade'en ttukmadoogixxy ja israelit jaa'y sa ja Dios kyajpxy wya'añ, winets ja myigu'uk jap tmøøtpidsømnaa jam tsaptøjkjotp. Xjats ku jap pyidsømdøø, winets ja Pablo ñimaajyøø pøn ka'israelit jaa'dyi, jøts nayide'en tñigajpxt nay ja'abi ayuujk jadu'ukpi poo'kxin xøøw.

43 Xjats idø'øn jade'en ñawya'kxidøø jam tsaptøjkjotp, jamts wyinaty namay ja israelit jaa'y, jøts namay ja abikpyi jaa'y midi nayide'en tpadundip ja israelit chinaa'yin, ja'ats niduki'iyi tpanøjkxtøø ja Pablo ja Bernabé, winets ja ojts yikajpxwejt jøts yiknimaadyøø: "Ejtp idø'øn ja Dios kø'øm xtsøky'ajtyim paty ja Dios amumjoojt ja y'øgyajpxy xpaduujniyidit, jøts nijuuni xkamajt-
sututtit."

44 Xjats ku ja tpaatkojmaa jadu'ukpi poo'kxin xøøw, ku ja tjanchpatmad-
owa'andi ja Dios kyajpxy, winets jawaani kyameengixxy niduki'iyi ja kajp.

45 Xjats ku dø'øn ja israelit jaa'y jade'en t'ejxtøø, winets ja Pablo yik-
tam!ama'at'ajttøø ja namay jaa'y jøts yikmi'ambøktøø, xjats yiknimaadyøø ku ja jaa'y nugo twindaay'atti.

46 Xjats ja Pablo ja Bernabé møk'ampy ojts tmigajpxti, jøts tñimaadyøø:
—Meets israelit jaa'y, jade'en mjapaat'atyidi jøts meets jawyeen myik-
tukmado'ot ja Dios kyajpxy; ka'ats meets ja xkupøkwa'andi, jade'en nugo mwa'andi jøts ka' pyaat'atyidi jøts ja Dios y'øy'ajtin xkupøjkiyidit, jam øøts ne'egi nøjx ngajpxwa'kxy ma jaty ja jaa'y kya'israelitjaa'yidi.

47 Kumi jade'en øøts ja nwindson'ajtim tø x'ane'emy ku yide'en wya'añ:
Tø me nbikta'aky jøts øts n'øgyajpxy n'øy'ayuujk xukmado'ojit tuki'iyi ja
naaxwii'ñit jaa'y,
jøts xnijawidit sudso'ampy ñitso'ok'attit.

48 Xjats ku dø'øn jade'en tmadoodøø pøn ka'israelit jaa'dyi, winets ja yjanchxondaktøø jøts ñawya'añidi kudam ja Dios kyajpxy janch'øy; jøts niduki'iyi ja' tmbøjkøxtøø pøn wyinaty ja Dios kø'øm tø tpiakta'aky, jøts nijuuni xøøw ja y'anmija'win kyawindigø'ødyit.

49 Jade'en idø'øn jam ojts yikajpxwa'kxy ja Dios kyajpxy ma jaty ja kajp jam.

50 Xjats ja israelit jaa'dyi ojts møøt tkajpx'øyidi winaagin ja yaa'dyøjk midi ja kajp tñitanaadyip, jøts møøt nayide'en ja tø'øxyøjkti midi ja kajp jaa'y windsø'jkiyidip jøts midi ja israelit jaa'y tpaduujnidip ja yja', ja'ats ja kajp jaa'y yik'ambøjktøø, xjats ja Pablo ja Bernabé ojts yikjemandi yiktedundi kunim ja tyikpidsømdøø ja'abi etjotp.

⁵¹ Winets ja Pablo møøt ja Bernabé twinaptøø ja pu'ux jam tyekyøjxp, jøts jade'en ttuk'ejxtit ku jade'embj jaa'y ja tka'øjyawidi, winets jam ñøjknidi ma ja kajp txøøwi Iconio.

⁵² Xjats ja Jesús yjanchja'wibi pøn jap Antioquia tyandøø, janch ejtni xoni ja ñayjawiyidi ku wyinaty tø tyatøkiyidi ja Espiritu Santo.

14

Sa yjattøø sa kyubajttøø ja Pablo ja Bernabé jam Iconio

¹ Ku ja Pablo ja Bernabé jap yja'ttøø Iconio jøts jam tyøjkidøø tsaptøjkjotp, winets ojts kyajpxwā'kxti møk'ampy jøts may tpabøjktøø, nayide'en ja israelit jaa'y jøts may pøn jaty jam wyinaty midi' ka' y'israelitjaa'yidi.

² Xjats ja israelit jaa'y pøn tkababøjktip ja Dios kyajpxy, ja'ats t'agajpxidøø pøn ka'israelit jaa'dyi jøts ja tyikwinmaamya'tni ja jaa'y pøn ja Jesús tjanchja'widip.

³ Paty ja ojts tyaa'nidi jeky'ampy ja Pablo møøt ja Bernabé, jøts ku ojts møk tkajpxwā'kxti sa ja Dios Teety ttamidsøjky ja naxwii'ñit jaa'y, winets nay ja' myøk'ajtin møøjyidip jøts milagri'ajtin ttu'undit jøts nayide'en ja ejxpajt tpikta'aktit, paty ja'agøjxp ojts yiknijawi kudam ja yjanchi midi ja kyajpxwā'kxtip, jøts kudam ja Dios Teety xjanchøjkyindi.

⁴ Jøts ja kajp jaa'y ka'ap ja wyinaty tu'ugyi ja wyinmaa'ndyi, jam wyinaty ja israelit jaa'y yja' jøts ja Jesús yja'ami. Majtsk jøøjp jap wyinaty ja wyinmaa'ndyi.

⁵ Jøts ja israelit jaa'y kajpxy tundøø møøt pøn ka'ap y'israelitjaa'yidi jøts ñøjktøø ma ja kudunktøjk, jamts tkajpx'øydøø møøt ja kudunk jøts tmi'ambøjktøø tpağa'atswidetwā'andøø ja Pablo møøt ja Bernabé.

⁶ Kuts ja Pablo ja jade'en tnija'widøø møøt ja Bernabé, xjats ja kyaknøjktøø jam Lистра jam Derbe, jade'en ja kajp xyøøw midi jam Licaonia etjotp tandip, jøts wine'enin ja abikyajp jam ni'awidity midi jam abiky etjopti,

⁷ jamts ja tkajpxwā'kxti ja Dios y'øgyajpxy y'ø'yayuujk midi xyiknitso'ok'ajtindip.

Ku ja Pablo jam Lистра yika'jch

⁸ Nay jam ma ja kajp txøøwi Lистра, jamts wyinaty chøøni tu'uk ja yaa'dyøjk pakma'at midi wyinaty niwine'enin kyidyimyø'øpy, tyimyjade'en idø'øn ja kye'jxy.

⁹ Jøts ja pakma'at jaa'y myadøøpy ja' tuki'iyi pøni sa ja Pablo tyikwā'añ, winets ja Pablo twin'ijxy ku yjawi t'ajot'aty ja pakma'at jaa'y ja Dios ku cho'okwā'añ.

¹⁰ Winets ojts møk tjanchmigajpxy jøts tnimaay:

—Tatani yø mdeky tiiy.

Jøts ja yaa'dyøjk wya'kukøø tukwo'onji'igy: xjats jade'eñi yø'øbyijky.

¹¹ Jøts ja mayjaa'y t'ejxtøø ku ja Pablo jade'en tyiktsøjky, winets ja jaa'y yjanchwangaktøø jøts tyandøø:

—iTø namajtsk ja Dios xjanchnigidaajkyindi nayide'en ejxim adøm njaa'y'ajtyim!

Tum ja Licaoniit ayuujk kyajpxtip.

¹² Xjats wyandaktøø ku Bernabé ja' Dios Júpiter, jøts ja Pablo Dios Mercurio, ja'agøjxp ku ja kya'amay.

¹³ Xjats ja teety midi jam tump Júpiter chaptøjkjotp kajp'am, ja'ats ojts tyiknijxy ja tsakaa namajtsk janch xøxy janch pijyi ma ja Pablo

møøt ja Bernabé jam wyinaty; yjanchtawindsøøgiwyandip ja tsakaa, tyamiyoxwandip ja tsakaa kitu'uk.

¹⁴ Ku tnija'widøø ja Jesús kyudanaabyi ja Bernabé ja Pablo jøts yjot-may'oo'kpøknidøø, jøts ja wyet tkøø'tstøø waani ja'agøjxp ku jade'en yikwindsøøgidi ejxim ja Diosin, winets tyøjkidøø mayjaa'y agujkp jøts møk yide'en wyandøø:

¹⁵ —jMigu'uktøjkti! ¿Tiku jade'en m'adø'tstøti? Pø nay jaa'yts øøts ejxim meedsin, yø' øø nnimimpy jøts mee ndukmado'ot jøts xmajststøuttit yø'øbi tunk, ka' yø tyuñ. Pabøjkidi Dios yja' pøn juky'ajtp, pøn tuki'iyi tyik'øyyiiñ ja tsajp jits ja naajx jøts ja mejy, tuki'iyi midi ya naxwiiñ ejtp.

¹⁶ Kuwani Dios Teety yuj'yaty ku ja naxwiiñit jaa'y ojts y'ø'y'adø'tstøti kya'ø'y'adø'tstøti.

¹⁷ Ejtp idø'øn ja Dios Teety ja ejxpajt tjayaky, jøts jade'en yiknijawit pøni pøn idø'øn ja' ku ja janch'ø'y. Ja'agøjxp idø'øn ja tuu tkejxy, jøts pyidsimy ja moojk ja xøjk midi adøm ndajuky'ajtyim, jøts ejtni xoni nnayja'wandit.

¹⁸ Øy idø'øn ja mayjaa'y møk jyayiknimaadyi, ka' pøn tmadøøy, kuwani tyimyk'ookwa'andi ja tsakaa jøts ja Pablo møøt ja Bernabé jade'en yik-tawindsøøgiwy'a'andi ejxim ja Diosin.

¹⁹ Winets ja israelit jaa'y winaagin jam choo'ndøø Antioquia jøts Iconio, jøts jap yja'ttøø Listra ma ja Pablo møøt ja Bernabé wyinaty. Ja'ats idø'øn ja kajp jaa'y t'agajpxidøø, winets ja kajp jaa'y y'ambøjktøø, jøts ja Pablo yikxon tsaagatstøø. Tyimwyandip idø'øn ja jaa'y jøts ku dø'øn ja wyinaty tø tyimyk'ookti, winets ja t'ukpawejtsnidøø, jøts ja kajp pa'am tyiknøjktøø.

²⁰ Winets ja jam ñamyujkidøø Pablo wyindump pøn tjanchja'widip ja Jesús, xjats ja Pablo pyidi'jky jøts wyimbijty jadigojk nay jam kajpjotp; winets kymjabom choo'ndøø møøt ja Bernabé, jøts ñøjktøø ma kajp txøøwi Derbe.

²¹ Winets jam ojts tkajpxwa'kxti sudso'ampy ja Jesús xyiknitsø'ok'ajtindit, ma ojts ñamayidi pøn ja Jesús yja' tmibøjktip, jøts ja Pablo ja Bernabé wyimbejttøø ma kajp txøøwi Listra, Iconio jøts nayide'en Antioquia.

²² Ku ja Pablo møøt ja Bernabé jam yja'jty tu'uk tu'uk ja'abi kajp, winets tkajpxjot'amøjkidøø pøn jaty ja Jesús yjanchja'widip, jøts ku Jesús yja' tu'ugyi tpaduujnidit, nayide'en yiknimaadyøø kuwani ja ayo'on yikpaaty ku jap ndøkiwy'a'anint ma Dios kyutujk, midi ja naxwiiñit jaa'y ja tyanitanaapy.

²³ Jøts ja Pablo møøt ja Bernabé nayide'en tpiktaktøø ja møjaa'dyøjk ma jaty ja tsapøjk wyinaty, jøts ku ja wyinaty tø Dios'ajot'atti tø y'ayuu'atti, winets ja Dios ja ttægøøjkidøø jøts kyunuu'kxidit, pø tøxi ja wyinaty tjanchjawidi.

Ku ja Pablo møøt ja Bernabé yja'jty jadigojk Antioquia jam Siria etjotp

²⁴ Xjats ku ja ñajxtøø jam Pisidia etjotp, jøts ja yja'jttøø jam Panfilia etjotp.

²⁵ Ojts ja tkajpxwa'kxti ja Dios kyajpxy jam Perge kajpkøjxp, jødsnim ja ñøjktøø jam Atalia.

²⁶ Jamts ja ttatøjkidøø barki jøts ja ñøjktøø Antioquia, jam kajpkøjxp ma ja wyinaty tø yikugajpxaagidi tø yikunuu'kxaagidi, jøts Dios ja kyunuu'kxidit ku ja wyinaty jade'en ja tyunk tyiktso'onda'akti midi ixyam wyinaty tø tyik'abajtiñidi.

²⁷ Jøts kuts ja jam Antioquia kajpkøjxp yja'jttøø, winets ja jam tñankñamyujkidøø pøn jaty ja Jesús tjanchja'widip jøts ja ttamimadyakøjxtøø sa jaty Dios ja wyinaty tø yikjatyidi yikubetyidi ku ja kyunuu'kxyidi, jøts ja nayide'en ttamimadyaktøø sa Dios wyinaty tø yik'awaajtsxyiyidi nøø' tuu' pøn ka'israelit jaa'dyi, jøts ja nayide'en ñitso'ok'attit ku ja tjanchjawidit ja nwindson'ajtim.

²⁸ Xjats ja Pablo jøts ja Bernabé jam jeky tyaa'nidøø, jeky tmøøtaa'nidøø ja jamit jaa'dyi pøn tjanchja'widip ja Jesús.

15

Ku Jerusalén ñamyujkidøø ja møjaa'dyøjk

¹ Nay ja'abi tiempi winaagin ja jaa'y choo'ndøø jam Judeit naxjotp jøts ñøjxktøø ma ja kajp txøøwi Antioquia, jam tta'awanibøjkidøø ja jaa'y pøn wyinaty ja Jesús tjanchja'widip, jøts tnimaadyi ku ja yaa'dyøjk kuwani yikmo'odit ja ejxpajt ñe'kxkøjxp sami Moisés jekyip tyikyø'øy ja y'ana'amin, winets ja jade'en yiknitso'ok'atidit ja Dios.

² Winets ja Pablo møøt ja Bernabé møk'ampy ojts møøt ñagyajpxyidi ja jaa'y, jøts ku ka' jade'en y'øyi yø'øbi winmaa'ñ. Winets ja Pablo ja Bernabé yikpiktaktøø møøt winaagin ja jaa'y jøts jam ñøjxktit Jerusalén, jamts tjaak'atskajpx'øyidit ja'abi winmaa'ñ møøt ja'adi pøn jaty ja Jesús kyudanaabyi'ajtpy, jøts møøt ja møjaa'dyøjkti pøn jaty jam møjaa'y'ajttip tsaptøjkjotp.

³ Xjats kyajxtsoo'niyidøø ja janchja'wibidi jam Antioquia, xjats choo'ndøø jøts jam ñaxti ma ja et txøøwi Fenicia jøts Samaria. Jamts tñigajpxtøø tñimadyaktøø, jøts ku namay ja jaa'y wyinaty tø tñajstutnidi ja møjaa'chinaa'yin pøn jaty ka'israelit jaa'dyi, jøts tpaøøjktøø tu'ugyi ja Dios yja'. Xjats ja yjanchxondaktøø ja myigu'uktøjk ku ja jade'en tñija'widøø ja'abi ayuujk.

⁴ Kuts yja'ttøø ja Pablo møøt ja Bernabé jam Jerusalén, winets ojts kyajpxpøø'kxyidi ja mayjaa'y jøts ja Jesús kyudanaabyi møøt ja møjaa'dyøjkti. Xjats ja tñigajpxti tñimadyakti sa ojts ja Dios møk tyukpudøkiyidi pøn ka'israelit jaa'dyi.

⁵ Xjats winaagin ja fariseit jaa'y pøn wyinaty ja Jesús yja' tpaduujnidip, wya'kukidøø jøts wyandøø:

—Kuwani yø tpaduujnidit Moisés kyutujk pøn ka'israelit jaa'dyi øy yø Jesús yja' yjayikpaduñ, jøts kuwani ejxpajt yikmo'odit ñe'kxkøjxp.

⁶ Winets jadigojk ñamyujkidøø ja Jesús kyudanaabyi jøts ja møjaa'dyøjkti sudso'ampy yikajpxwimbett yik'adsojimbett.

⁷ Tø wyinaty jeky tkajpx'øyidi, jøts ja Pedro tyanaagyukiyi'ñ jøts tñimaay:

—Meets migu'uktøjkti, mee mñija'wip jøts ku øts ja Dios jekyip xwiwich, jøts øts ndukmado'ot ja jaa'y pøn ka'israelit jaa'dyi, sudso'ampy ja nwindson'ajtim xpojkmimaa'kxindit jøts ja tñibøktit.

⁸ Wa'ats ja Dios t'ixy sa jadu'uk jadu'uk nwinmaa'yindi, jøts yide'en'ampy yiknija'wi ku Dios ja tø kyupikyidi ja'abi jaa'y, ku tø tyuktatøkiyidi ja y'Espiritu Santo nayide'en ejxim adøm ojts xmø'øyim ja kunuu'kxin.

⁹ Ka'ap ja Dios pøn tsoøky tkatsøky, tyumkupiijkpy ja' wan tpøni, ka'ap ja t'ixy wan pøn t'israelitjaa'yi uk wan pøn tka'israelitjaa'yi, patyts ja nayide'en tø yikpojkmimaa'kxti pøn ka'israelit jaa'dyi ku ja tø tjanchjawidi.

¹⁰ Migu'uktøjkti, ¿tiku xmimaydi xmida'jti pøni sa ja Dios tø tpikta'aky, jøts ja' xapaatti pøn ja Jesús tjanchja'widip? ¿Tiku kawinaak winmaa'ñ xaguwaanidi? Nika'ats adøm ja ka'pxy n'ukpaduu'na'andi, ni ja n'apteety'amøø adøm ja ka'pxy tø tka'ukpaduunidi.

¹¹ Pø ka'axi jade'en y'øyi, njanchja'wa'amp adøm ja' ku ja Jesús xyiknitso'ok'ajtyindi kyø'ømdsøky, nayide'en sam ja' pøn ka' y'israelitjaa'yi.

12 Xjats niduki'iyi y'amongøxtøø, jøts tpatmadoodøø ku ja Pablo jøts ja Bernabé tñimadya'akti sa ja Dios møk pyudøjkiyidøø, ku ja myilagritundi jøts ja Dios y'ejxpajt tpaduujnidøø ja' y'etjotpti pøn ka'israelit jaa'dyi.

13 Ku ja Pablo jøts ja Bernabé kyajpx'abaajtøø, jøts ja my'igu'uk midì Jacobo txøøw'ajtmip, ja'ats waan:

—Meets migu'ukti, ukmadowdi waani:

14 Tø ja Simón Pedro tjanigajpxy sudso'ampy ja Dios tø tmø'øy ja may'ajt myiduk'oijk pøn ka' y'israelitjaa'yidi, jøts ku ja Dios ja nayide'en t'u'nk'aty t'una'jk'aty ja'abi jaa'dyi.

15 Kuwani icyam jade'en yjaty kumi jade'en ja Dios kyugajpxy ojts tjaadyañ, ku ja Dios yide'en wyaañ:

16 Wimbejtkojmip øts jadigojk, jøts nbiktà'akt nayide'en sam y'ijty ja David tjaгыepy ja kutujk;

jøts øts nja' niduki'iyi xpaduujnidit pøn ka'israelit jaa'dyi,

17 jøts niduki'iyi ja naxwii'ñit jaa'dyi pøn jaty ø nja'ajtpy.

18 Jade'en idø'øn wyaañ ja nwindsøn'ajtim Dios, pøn tyuknija'wiyii'ñ yø'øbi winmaa'ñ jekyip.

19 Xjats ja Jacobo tjaaknøjmi ja jaa'y jøts wyaañ:

—Ka' nugo xmigajpxtit pøn ka'ap y'israelitjaa'yidi, pøn ja Jesús yja' tu'ugyi tpadunwajnidip, pøn tø tmajtstutnidi ja myøjaa'chinaa'yin.

20 Øy'ajtp ja nøky ngajxindit, jøts ja'ayi ndukmadoo'indit jøts kidi ja ttsu'utsti midì ja tsamaxan yiktawindsø'jkip, jøts nayide'en ka'ap ja ñiyaa'y ñidø'øxy ñabyøjkxidit, jøts nayide'en ka'ap ja jiyujk tsu'uch ttsu'utstit midì ka' tyaxy, jøts midì yuktsummy'oo'kp, jøts nayide'en ka'ap ja ni'jpy tjøø'kxtit.

21 Wan yø'øyi, pø jaayimts ja Moisés kyutujk xyumiyikajpxwa'kxy, ti magajp ja kya'ukyiknigajpxy ma jaty ja tsaptøjk jam, ejtpts ja yiknigajpx'ity wimboo'kxin xøøw.

22 Winets ja Jesús kyudanaabyi møøt ja møjaa'dyøjkti jøts niduki'iyi pøn jaty tjanchja'widip ja Jesús, jats ñawyiwjejtsidi namajtsk ja jaa'y pøn tmøødidøø ja Pablo jøts ja Bernabé jam Antioquia. Ja'abi jaa'y midì yikwindsø'jkij'ejtptip, tu'uk txøøwi Judas Barsabas jøts jadu'uk txøøwi Silas,

23 ja'ats tminøjkxtøø ja nøky jøts yide'en ja nøky wya'añ:

“Øøts idø'øn ja' pøn jaty ja Jesús kyudanaabyi'ajtpy, møøt ja møjaa'dyøjkti jøts niduki'iyi ja nmøøtjanchja'wibidi, øøts idø'øn ja kajpxpoo'kxin nguejxpy, ngajpxpøø'kxpy øøts niduki'iyi ja nmøøtjanchja'wibidi pøn ka' y'israelitjaa'yidi, pøn jam tsinaadyip Antioquia, jøts jam Siria, jøts nayide'en Cilicia.

24 Tø øøts nnijawi ku winaagin ya'it jaa'y ojts ñøjkxti ma meets jam, jøts ojts nugo myikwinmaamya'adyidi, ku jade'en mniimxyidi jøts ku kuwani ja mixyuna'jk yikmo'odit ja ejxa'an ñe'kxkøjxp, jøts ku kuwani ja Moisés kyutujk xpaduujnidit. Migu'uktøjk, kidi øødsipts ja jade'en ngajpxmyøøpy.

25 Paty øøts yikxon ngajpx'øyi, jøts øø nbiktà'aky namajtsk ja kugajpxy midì mee m'ats'ejxiyip, ja'ats myøødidip ja Pablo jøts ja Bernabé pøn øøts ndsøky'ajtpy,

26 jøts pøn tø tyimñadyamiyoxiyi amumjoojt ja nwindsøn'ajtim Jesús.

27 Ya'at øø nguejxpy midì txøøw'ajtip Judas jøts Silas, jøts møøt m'ukmadya'aktit jøts mdukmadowiyidit ya'at tuki'iyi.

28 Tø ja Espiritu Santo t'øyjawi, nayide'ents øøts, jøts ka'ap meets mayjøøjp ja winmaa'ñ nmø'øy, øy ku ya'at xpadu'undit:

29 ka' xtsu'utstit midi ja tsamaxan tɔ yiktawindsø'ogi; jøts nayide'en ka'ap ja ni'jpy xjøø'kxtit, ka' xtsu'utstit nayide'en o ti jiyujk midi yiktsumy'oo'kp, nayide'en ka'ap ja mniyaa'y mnið'øxy mnabyøjkxidit. Pøni mbadundip yø'øbi winmaa'ñ, tsuj mduu'baattit meets jade'en. Yø'øbi ana'amin øø nguejxpy, Dios mgunuu'kxidip."

30 Xjats choo'ndøø ja kunøky jøts ñøjkxtøø jam Antioquia. Winets ñamyujkidøø ja jaa'y pøn ja nøky yiktanigaxtip jøts yikømoødyøø.

31 Ku ja tpa'ejxtøø, jøts yjanchxondaktøø ku jade'en ja winmaa'ñ yikmo'odi.

32 Kumi yjajttip wyinaty nayide'en ja Judas ja Silas sudso tkajpxwa'kxidit ja Dios kyajpxy. Xjats ttukja'gyukidøø, jøts ja janchja'wibiði yjanchxondaktøø ku ja jade'en kyajpxjot'amøjkiyidi.

33 Ku jap waani y'uktaa'nidøø, winets ojts tja'ukminawya'kxyidi ja myigu'uk, ojts ja y'ukmø'øñiyidi ja kajpxpoo'kxin jøts ja Dios kyunuu'kxidit, jøts nay jam wyimbejti ma jam choo'ndøø.

34 Xjats ja Silas wyinmaa'y, winets ja jam tyaañ.

35 Nayide'en ja Pablo jøts ja Bernabé jap tyaandøø Antioquia, namay ja myigu'uktø møøt, yik'ixpøjktøø tkajpxwa'kxtøø ja Dios kyajpxy.

Ku ja Pablo myimajtsk ojk chøø'ñ kajpxwa'kxpi

36 Tø wyinaty ja tiempi waani ñaxkojmi ku ja Pablo tnimaa'y ja Bernabé, jøts wyaañ:

—Wan tjaa'myim jadigojk jam magyajp ma jaty ja Dios kyajpxy tø nmiwidijtyim, jamts nmigu'uktøjk n'ats'ejxint sa jam yjatti kyubatti.

37 Xjats ja Bernabé twaawa'añ tu'uk ja jaa'y pøn txøøw'ajt Juan Marcos;

38 ka'ats ja Pablo ja twinjawwi jøts ja' tmøødit, kumi tø ja jam wyinaty t'ukykitañ ma et txøøwi Panfilia, ka'ap ja wyinaty tyikyø'øy ja Jesús kyajpxy.

39 Xjats ñagyajpxidi jeky ja Pablo møøt ja Bernabé, ka' ja wyinmaa'ñ y'uknabyajtniyidi jøts jade'eñi ñawa'kxiniiydøø; winets ja Bernabé tmøødiy'iñ ja Marcos, jøts tyøjkidøø barkijøtpy jøts ñøjkxti ma et txøøwi Chipre,

40 xjats ja Pablo ojts twaaji'iky ja Silas. Jøts ja janchja'wibiði ñimaa'jyiyøø: "Nøjkk møøt ja Dios, Dios mgunuu'kxidip."

41 Xjats ja choo'ndøø, jøts ñajxtøø ma et txøøwi Siria jøts Cilicia. Jamts tkajpxjot'amøjkidøø ma jaty ja tsaptøjk jam wyinaty.

16

Ku ja Timoteo tjamyøø'ajty ja Pablo møøt ja Silas

1 Xjats jam yja'ttøø ma kajp txøøwi Derbe jøts Listra. Jamts tpaattøø tu'uk ja janchja'wibi, Timoteo ja xyøøw. Ja tyaak, israelit jaa'y ja' jøts yjanchja'wip ja Jesús ja'; jøts ja tyeety, griegit jaa'y ja'.

2 Ja mixy Timoteo janchtsojkp ja janchja'wibiði pøn jap wyinaty tsinaadyip Listra jøts Iconio.

3 Xjats ja Pablo tmøødiwya'añ ja Timoteo jøts pyudøkiyit, jøts ja Pablo wyinmaa'y jøts ku kuwani jawyeen yikmo'ot ja ejxpajt ñe'kxkøjpx, jøts kidi y'ejxma'adyidi ja israelit jaa'y ku jam yja'attit ja' y'etjotpti, wa'ats ja wyinaty tñijawidi ku ja Timoteo tyeety ka' y'israelitjaa'y.

4 Xjats choo'ndøø ñajxtøø ma jaty wyinaty ja kajp jam. Jamts tñigajpxti tñimadya'akti ja janchja'wibiði, jøts t'uktukmadoodøø ti jaty wyinaty tø tkajpx'øyidi ja Jesús kyudanaabyi møøt ja møjaa'dyøjkti jam Jerusalén, jøts sudso'ampy ja jaa'y øy tsuj yjaa'y'attit pøn ka' y'israelitjaa'yidi.

5 Xjats tu'ugyi ja wyinmaa'n tpiaktaknidøø amumjoojt ja janchja'wibidi, mayi'adøtstip ja jabom jabom.

Ku ja Pablo ojts t'ixy agumaq'ijjotpy tu'uk ja Macedoniit jaa'y

6 Xjats ja Pablo møøt ja Silas jøts ja Timoteo choo'ngojmidoø, jøts kumi ka'ap ja Espiritu Santo ojts tyikutuky jøts jam ñøjkxtit kajpxwa'kxpi ma et jam txøøwi Asia, winets jam ñajxtøø ma et txøøwi Frigia jøts Galacia,

7 jøts jam yja'ttøø tsawa'an'am ma et jadu'uk txøøwi Misia, jam wyinaty yjatøkiwya'andi ma et jadu'uk txøøwi Bitinia, nika' ja Espiritu wyaañ jøts jam tyøkidit.

8 Winets ttayø'øñaxti yøñ'ampy ja Misia y'et ñaajx, jøts jam kyidaktøø jam mejy'am ma tu'uk ja kajp txøøwi Troas.

9 Jamts ja Pablo koots twingumaay tu'uk ja Macedoniit jaa'y, windanaajyip tam ja jaa'y jøts yjanchminuu'kxa'agiyi, jøts ñii'mxyi: "Tun ja may'ajt, na x jam ma ja Macedonia et, pudøjkik øøts."

10 Xjats ku ja Pablo jade'en kyumaay, winets øø nnay'a'ejxiyøø jøts øø ndsøø'ñ. Øts idø'on Lucas pøn ya'at nøky tjaapy, øts idø'on ja nayide'en nmøøtsøø'n, jøts øøts ojts nniikxy jam Macedoniit etjotp. Nja'gyujkip øøts wyinaty ku øøts ja Dios xwaadsøy, jøts øøts jam nøjkx ngajpxwa'kxy ja øgyajpxy ja ømyadya'aky midi xyiknitso'ok'ajtindip.

Sa yjajttøø sa kyubajttøø ja Pablo møøt ja Silas jam Filipos

11 Winets øø ndøjkxyi'ñ barkijotpy, jøts øø tiy nniikxy jam mejy agujkp ma ja naajx lii'nim txøøwi Samotracia, jøts kyimjabomnim øøts ja mejy ndanajxy jøts øøts jam nja'lty Neápolis.

12 Jam øø ndsøø'ñ tekyjø'øm, jøts øø nniikxy ma kajp txøøwi jadu'uk Filipos, ja' midi ja romanit jaa'y kø'øm pyiktaktøø. Møj kajp idø'on ja', nima ja kajp jam jade'en wingon kyamøji. Jam øøts kawinaak xøøw n'uktaa'niyi'ñ.

13 Jamts øø ngajpidsømnaa poo'kxin xøøw et, jøts øøts jam nniikxy møj nøø windump ma ja jaa'y kuwani ejtp ñøjkxti Dios'ajot'ajtpi. Jamts øø n'ixaajky, xjats øø ndukmadøøy ja Jesús kyajpxy ja tø'øxyøjkti pøn jam wyinaty tø ñamyukyidi.

14 Jamts ja tø'øxyøjk pøn txøøw'ajtp Lidia, pøn tsoo'mp jam Tiatira kajpjotp; wetoo'kk ja tyunk'ajtpy, tum ja øybi tsuu'nk wet idø'on ja tyøø'kpy. Ja'ats idø'on ja Dios tjanch'ajot'ajtp, jøts nwindson'ajtim ja yikwinmaa'nbyaajtiyøø jøts tjanchjawit sa jaty ja Pablo wyaañ.

15 Xjats ojts ñøbety møøt ja myigu'uk, winets øø xminuu'kxaajky jøts wyaañ:

—Tundi may'ajt jaa'mindip øts ndøjkjotpy, jap m'atsja'ada'aktit pøni mjanchwamp meets jøts ku øts nwindson'ajtim kyajpxy tø njanchpaduujniyi.

Xjats øø kuwani xyiktaa'ñ.

16 Winets yide'en yjajty ku øø wyinaty nniikxy ma jaa'y jam Dios'ajot'atti, xjats øø nminabyajtiyi tu'uk ja kiixy midi wyinaty ximaapy, ja miku' wyinaty myøøt'ijtpy, ane'emy idø'on ja y'ity. Ku ja jade'en myiximay janchnimeenbyøjkijip ja wyindsøn ja' pøn ja y'ijty ana'amiyip.

17 Ja'abi kiixy øø xpawidejtøjkiñaa, xjats ojts møk yjanchwa'añ jam mayjaa'y agujkp:

—Ya'atpi jaa'y møk tjanchmidundip ja Dios midi jap tsajpjotpy, yø' tkajpxwa'kxtip ja Dios kyajpxy sa ja xyiknitso'ok'ajtindit.

18 Ku jade'en pyawidejtiyidøø kawinaak xøøw, xjats ja Pablo møk y'adsipyiyi jøts t'ejximbijty, jøts tnimaay ja miku' midi ja kiixy wyinaty myøøt'ajtpy:

—Jesús myøk'ajtingøjxp mets miku' majtstu'tut yø kiixy. iPidsøm!

Xjats ja miku' t'majtstuuity nay jaty.

¹⁹ Ku ja kiixy ja wyindsøn tja'ejxnidi ku tø ja wyinmaa'n tyigatsni, ku ka'ap ja kiixy y'ukmeenbyøjkni, winets ja Pablo jøts ja Silas yikmatstøø, jøts yiknøjxidøø kunduk wyindump jam møj maayjotp.

²⁰ Ku jam yikja'tidøø tiidyumbi wyindump jøts ja tnimaadyøø:

—Yā'at jaa'dyi, israelit jaa'y yø'ødi, møk øøts xjanch'adsipy ya kajpjøøjty,

²¹ ku ja kyø'ømdsinaa'yin øøts kuwani xukpadunwa'añ midi øø ka' njanch-jagupøkwa'añ, jøts ja'abi tsinaa'yin ka'ap øøts ja nnijawī. Abiky øøts, romanit jaa'y øøts.

²² Xjats ja mayjaa'y yjanchpidø'køjxtøø, jøts ja tiidyumbidøjk t'ana'amdi ja jaa'y jøts wan tyiknijandi tyik'ixjandi, jøts wan ja nawyopi t'ukupøkti namajtsk ja Pablo møøt ja Silas.

²³ Xjats ku yikwojp'abaajtøø, winets ja tyiknøjktøø puxøjkjotp, jøts ja t'ana'amdi ja puxøjk adsinaabyi jøts tnimaadyi jøts waani t'ymjaty'eix'etit.

²⁴ Ku ja puxøjk adsinaabyi jade'en ojts yik'ane'emy, winets tyiktøjkiy'iñ jøts kawinaak puxøjk'aaw ojts tyiknaxy, jødsnim ojts yikni'agiibyatti jam okp. Ku jade'en jam yikpiktaktøø, winets ojts ja kipy yiktanaxkø'ødi ja tyeky kadeni møøt.

²⁵ Xjats ja Dios'ajot'ajttøø jøts t'øødøø ja Dios kyajpxy jap puxøjkjotpy, møk ja Dios ja tja'myajtstøø. Tsuu'miwyamp wyinaty ku ja Dios jade'en t'ajot'ajttøø, jøts ku ja myibuxøjk jaa'y ja nugo pyatmadøyiidi.

²⁶ Xjats ku chuu'miyi'iñ, winets ja uyx møk yjanchmiñ, winets ja puxøjk møk yjantyimy'adijch. Jøts ja puxøjk'aaw tuki'iyi y'axetutkøjxnaa, jøts ja puxøjk jaa'y pyaktsum nayide'en wyinaakøjxtøø.

²⁷ Xjats ja puxøjk adsinaabyi ojts ñiwijy, jøts ja t'eixpaajty ja pyuxøjk'aaw jøts kudam ja wyinaty tø y'awatskøxni, xjats ja jade'en wyinmay tø ja puxøjk jaa'y t'ijy pyidsømgøxnidi, winets ja yønchujx ja tju'jty jøts ja kø'øm ñanky'ookwa'añiyi.

²⁸ Xjats ja Pablo ojts t'eixpaaty ja puxøjk ejx'ejtpi ku ja wyinaty jade'en ñadyunwa'añiyi, xjats tnimaay:

—Kidi jade'en mnadyuñiyi, ka'ap øø ngue'eky, tum ixyp øøts niduki'iyi.

²⁹ Xjats ja puxøjk ejx'ejtpi t'amidøøy ja jaj jøts ja ojts pujtp tyøkī jap puxøjkjotpy. Xjats ja yjanchmibejpi jøts ja ojts ñagyuxendya'agyi jam Pablo tyekyjø'øm jøts ja Silas.

³⁰ Xjats ja tyikpidsiimy jøts tyiktiy, yide'en ja tnimaay:

—Migu'ukti, zti ø ndu'ump, sudso'ampy ø nnitso'ok'att?

³¹ Xjats ja Pablo møøt ja Silas ojts t'adsojimbetti, xjats tnimaadyøø:

—Møjawi amumjoojt ja nwindson'ajtim Jesucristo, jøts myiknitso'ok'atiyidit niduki'iyi møøt ja m'u'nk møøt ja mnidø'øxy.

³² Xjats ja Pablo jøts ja Silas ttukmadooøø ja Dios kyajpxy ja puxøjk adsinaabyi møøt niduki'iyi pøn jaty ja jam wyinaty tyøjkjotpy myøøtsinaapy.

³³ Nay jatyits ja puxøjk adsinaabyi tyikwajtsøø ja Pablo jøts ja Silas chaachi, winets ñøjkxtøø nøbajtpi niduki'iyi møøt ja y'u'nk jøts ja ñidø'øxy.

³⁴ Winets ja puxøjk adsinaabyi twaay kaabyi jap tyøjkjotpy, janch øy janch tsuj wyinaty ñayja'wiñidi niduki'iyi møøt ja y'u'nk ja ñidø'øxy, kumi tø ja wyinaty ja Dios tjanchjawidi.

³⁵ Xjats kyimjabom'ajty, winets ja tiidyumbidi ttaniguejxy ja kyugajpxy ja puxøjk adsinaabyi, jøts ku ja' tyikutuky jøts tyik'awa'atspidsømniit ja Pablo jøts ja Silas.

³⁶ Xjats ja puxøjk ejx'ejtpi tnimaay ja Pablo:

—Tø n'atsyik'ane'emy, ja tiidyumbitøjk kø'øm ja kyajpxy tkajxtip jødsik meets jadi'iñi nyikpidsømni; nøjknidits jotkujk, tø mee m'awa'atpidsømni.

³⁷ Xjats ja Pablo ka' tkupiky, winets tnimaay ja kugajpxy:

—Nay romanit jaa'y øøts, tiku øøts jade'en nyiktuñ jøts ku øøts jade'en mayjaa'y agujkp nyikwøpy, nika'ap øø nyiktiiyuñ jøts jatyi øø nugo nyikpikta'aky puxøjkjøtpy; ¿sudso'ampy øøts ndejint ayu'uch jadi'iñi nyikmajtstu'utwani? ¡Ka' y'øyi! Wan ja kø'øm tmendi ja tiidyumbidi jøts øøts xyikpidsø'ømt.

³⁸ Jøts ja kugajpxy wyimbejtñidøø, jøts ttukmadoodøø ja tiidyumbi sa ja Pablo ja kajpxy t'adsojimbijty, winets ja tiidyumbi yjancho'økiñidi ku tnija'widøø jøts kudam ja Pablo jøts ja Silas nayide'en romanit jaa'yidi.

³⁹ Winets ja kudunktøjk tninøjkxtøø t'atminuukxaktøø ja Pablo møøt ja Silas. Xjats tyikpidsømdøø jap puxøjkjøjty, jøts møk tnimaadyøø:

—Tun may'ajt pidsømdi ya waani kajpjøøjty.

⁴⁰ Xjats ja pyidsømdøø puxøjkjøtpy, jøts ñøjkxti ma ja Lidia tyøjk, jamts ja tminabyajtñidøø ja myøøtjanchja'wibidi, kuts ja tkajpxjot'amøjkidøø, winets ja choo'ñidøø.

17

Ku ja Tesalonikit jaa'y yjancho'ambøjktøø

¹ Xjats ku jam choo'ndøø, jøts ñaxtøø ma kajp txøøwi Anffpolis jøts nayide'en Apolonia, majtsk ja kajp ttanaxtøø jøts jam yja'ttøø møj kajpjotp midit txøøw'ajtp Tesalónica, jam wyinatya ja tsaptøjk.

² Winets ja Pablo tyøjkidøø kajpxwa'kxpi jam tsaptøjkjotp, sayim ja ttuñ øy maðsoo ma jatyi ja wyidity, tigøøk samani jam tyik'ixpijky ja jaa'y wimboø'kxin xøøw.

³ Yide'en ja ojts ttuk'ixpiky pøni sa ja Dios Teety kyajpxy ojts yik-jaadyañ, jøts kuwani mye'ent ja yiknitsokpi, jøts kuwani y'ayo'ombaañ jøts y'oo'kimbaañ, jøts kuwani yujkpyøkt jadigojk. Yide'en idø'on ja wya'añ:

—Jade'en ja Jesús yjajty midit mee ndukmadøøpy, nay ja' ja Dios Teety kyejpxy yiknitsokpi.

⁴ Ku ja Pablo ja ixpøjkin jam jade'en t'ukyiktandøø, winets ja israelit jaa'y winaagin tmibøjktøø, jøts ja møøt ñabyøjkniiydøø ja Pablo jøts ja Silas, jøts nayide'en namay ja griegit jaa'y pøn ja Dios Teety twindsø'jkidip. Nayide'en namay ja griegit tø'øxyøjk tmibøjkti pøn jam windsø'øgi'ejtty.

⁵ Winets ja israelit jaa'y niduki'iyyi y'ambøjktøø pøn jatyi ja Pablo kyajpxy y'ayuujk tkagupøjkxidip, ja'ats twaamuktøø ja ka'øybi jaa'y pøn jap nugo widejtty kajpjøtpy. Xjats nugo wyidejtnibøjkidøø jøts ja jaa'y tu'uk tu'uk tyik'ambøjktøø. Winets yja'ttøø tu'uk ja jaa'y tyøjkjøtpy pøn txøøw'ajtp Jasøn, xjats awa'an'ampy tyøjkidøø tøjktøpy tajpi kaa'pi. Ja Pablo jøts ja Silas ja' idø'on jade'en yik'ixaadyip jøts tyikpidsømw'a'andi jøts ja tyiknøjkxtit mayjaa'y agujkp.

⁶ Kumi ka'ap ja tpaatti jap tøjktøpy, winets ja tmatstøø ja kudøjk møøt ja myøøtjanchja'wibidi, xjats tpawetstøø tpakoo'tstøø, kudunk wyindump tyiknøjkxtøø, xjats ja Pablo jøts ja Silas yixxiguyaxtøø, jøts jade'en wyandøø:

—Ja'abi jaa'y pøn widejtty jøts tuki'iyyi ja naaxwi'ñit jaa'y tyikwinmaa'nmyatkøxti, tønim ja ya nayide'en yja'tmidi,

⁷ jøts ya'at Jasøn ja tø tyikja'ada'aky tyøjkjøtpy. Yø'øbi jaa'y tuki'iyyi y'ixwetswangøjxtip ja møj windsøn César kyutujk midit adøem ngajp

xnitanaajyamp. Jade'enxi wya'andi ku ja ja møj windsøn jadu'uk pøn txøow'ajtp Jesús.

⁸ Ku ja tmadoodøø ja jaa'y møøt ja kudunktøjk, winets niduki'iyi yjanch'ambøjktøø.

⁹ Xjats ja Jasón kuwani tmøøy ja meeñ ja kudunk jøts ja yikmajtstu'uttit; jøts yiknimaadyøø ku kuwani tyimbyidsø'ømdit ja Pablo møøt ja Silas jam kajpjøtp jawyeen, jaanims ja myeen ja jadigojk wyimbett. Winets jade'en yikmajstuttøø møøt ja myigu'uk.

Sa yjajttøø sa kyubajttøø ja Pablo møøt ja Silas jam Berea

¹⁰ Xjats nay jatyi koots ja Pablo møøt ja Silas ja myøøtjanchja'wibi kya-jxtsoo'nidøø jøts jam ñøjktxi ma kajp txøøwi Berea. Ku jam yja'ttøø winets nay jatyi ñøjktxi jam tsaptøjktøp.

¹¹ Yujyts ja ne'egi yjaa'y'atti ja'abi israelit jaa'dyi, ka'ap ja tyimyjade'enidi sam ja'adi pøn jam tsinaadyip Tesalónica. Choiktjip ja øy wine'en tmado'odit ja Jesús y'øgyajpxy y'ømyadya'aky, jøts ja ejtp winjabom txumi'ejxti ja nøky ma ja Dios kyajpxy jap yja'ayi, pøni tiy janch idø'on ja' sa ja Pablo ja ñii'mxyidi.

¹² Xjats ja namay tjaa'gyukidøø jøts tmibøjktøø, jøts nayide'en namay ja griegit jaa'y tpabøjktøø pøn ana'amdip, ja yaa'y ja tø'øxy.

¹³ Xjats ku ja israelit jaa'y pøn jam tsinaadyip Tesalónica tnija'widøø ku wyinaty ja Pablo tkajpxwa'kxy nayide'en ja Dios kyajpxy jam Berea, winets ñøjktxi ja israelit jaa'y jam Berea, jøts jamts jaa'y nugo tyikjot'ambøjktøø.

¹⁴ Jøts ja Pablo ja janchja'wibidi jatyi kyajxtsoo'nyøø jøts ja ñijkxy jam mejy'am, xjats ja myigu'uk japyi t'ukyiktaanaa midi txøow'ajttip Silas jøts Timoteo.

¹⁵ Xjats ja Pablo yikjamyøøt'ajty jøts tmøødidøø jagambaat ma kajp txøøwi Atenas. Xjats ja Pablo tkajxjimbity ja ayuujk jøts ñøjktit ja Silas møøt ja Timoteo pojyi'iky, jøts ja jam tminabyaadedit ma ja wyinaty.

Sa yjajty sa kyubejty ja Pablo jam Atenas

¹⁶ Exam idø'on ja Pablo wyinaty t'awixy ja Timoteo jøts ja Silas, jøts ja ka'ap yjanchjotkuki ku jap kajpjøtpy t'ixy janchmay ja awanax ja tsamaxan midi'ibi ja dios'ajttip.

¹⁷ Kumi ka' yjotkuki, winets jam ñijkxy tsaptøjktøp, jamts møøt kyajpxy myadyaajky ja israelit jaa'y, jøts ja' møøt pøn jaty Dios Teety t'ajot'ajttip, jøts nayide'en jabom jabom ja ñijkxy maajjøtpy, japts nayide'en møøt kyajpxy myadyaajky pøni pøn jaty jap pyajtpy.

¹⁸ Jamts wyinaty ja ixpiky jaa'dyi winaagin midi y'ixpøjktip ja epicureo y'ixpøjkin, jøts jam nayide'en jadu'uk midi y'ixpøjkmidip ja estoico y'ixpøjkin, ja'ats ojts tpatmadowdi ja Pablo ku ja tkajpxwa'kxy pøni pøn idø'on ja Jesús'ajtp, jøts ku kuwani ja naxwii'ñit jaa'y wyimbettit jadigojk pøn jaty tø y'øøky. Winets ja ixpiky jaa'y winaagin yide'en nawyajnidøø jøts wyandøø:

—¿Ti dø'on yø chaachnigajpxy yø yaa'dyøjk, yikmibøjkp idø'on yø tijy ku jadinø'on yjanchkajpxy?

Jøts jadu'uk t'adsojimbity:

—Wa' yø yjawi kyajpxyø'øpy ja wenkpi dios y'ayuujk.

¹⁹ Xjats ja Pablo yikwetsøø'ñ, jøts jam yiknøjksøø ma ja tjagyapti juni tundaajk. Ja' ja et xyøøw Areópago, jamts tyiktdøødi mmiimaadyøø:

—Ja' øøts nnijawiwypy yø wenk ixpøjkin midi mmimimpy.

²⁰ Wenkts yjawi xkajpxy, nnijawiwypy øøts ti jade'en tyijpy ku jade'en mwa'añ.

21 Paty ja Pablo yik'amidøøp jade'en, kumi jade'en tuki'iyi ja Atenas jaa'y yjujky'atti, jøts nayide'en pøn jaty jam ja'atjaa'y'ajttip, ja' nugo ejtp chøky'ajttip jøts ñanktyuknigajpxidit sa ja kø'øm wyinmaydi, winets ja jemy xpøjkin tpaatti jade'en.

22 Winets ja Pablo wya'kukiyi'ñ jam mayjaa'y agujkp ma jam yjuntitundi, jøts ja wyaañ:

—Meets Atenas jaa'y ukmadowdi, wa'ats øts n'ixy ku meets xjanchwindsø'øgi ja mdiosti mididi mdiost'ajttip.

23 Kuts øts jam wyinaty n'et'ixy ma meets mdiost xwindsø'øgi, jamts ø ndayø'øbejty tu'uk ja altajr mididi jap wyinaty ja letri tmøøt'ajtp mididi yide'en wamp: “Ja Dios ya'at y'altajr mididi kayiknija'wip.” Øy'ajtp, ja'abi dios mididi mee mwindsø'jkip jøts ka' xnijawidi pøni pøn ja', ja'ats meets idø'on yam ndukmadøøpy pøni pøn ja'.

24 Ja'abi Dios tø tyik'øyi tuki'iyi tuktsajp'agida'aky, jøts nay ja' tuki'iyi tniwindsøn'ajtkøjxp wa'n ttsajpi wa'n tnaajxi. Jøts ka'ap ja Dios kuwani tu'ugyi chøøni tsaptøjkjøtpy mididi jaa'y yik'ø'yip,

25 jøts ka' Dios ti tyigø'y'ajtxi mididi'ibi ja naxwii'ñit jaa'y ja mo'owajniyip, pø ja'axi tuki'iyi xmøø'yindip ja nmøø'ajtin, jøts pøni ti jaty ndajujky'ajtyindip.

26 Tu'uk ja Dios Teety tpiktaajky adøm n'apteety'amøj mididi niduki'iyi ja naxwii'ñit jaa'y y'apteety'amøj'ajttip. Tø ja ttanibiktaagi nayide'en juuni ja kya'axtit, nayide'en ja chinaadyaajk tmo'ot ma jaty ja chøønidit.

27 Ja'agøjxp ja Dios ttuñ jøts ja adøm nwinmaa'nmyee'nindit pøni pøn ja'. Øy udy'a'aky nbaajtindit, ka' yjagami Dios, wingon ja møøt n'lijtyindi.

28 Pø Diosxi xyikjujky'ajtyindip ku nnajxindi ndøjkindi; pø nayide'enxi meets mmig'u'uk wya'añ winaagin pøn wijtyi, ku yide'en wya'landi ku ja Dios x'u'nk'ajtyindi.

29 Pøni janch jade'ents jaa ku ja Dios x'u'nk'ajtyindi, ka'apts ja Dios jade'en nnajtsja'wandit jøts ku ja y'oori ne'egi, uk pyuxplati ne'egi, uk chaadsechi sa jaty ja jaa'y ja kø'øm wyinmaa'ñjøtpy tyikpidsømdi.

30 Dios ka' ja y'lijty ttunk'aty ja jaa'y kya'øwyyinmaa'ñ pøn tø ñaxti, jøts ixyam tuki'iyi t'ane'emy ja ñaxwii'ñit jaa'y øy yjamadsowi jøts wan tmatjstu'utti ja kya'ødyunk.

31 Kumi tø ja Dios Teety ttanibiktaagi ti xøøw ti et ja nøjxk ttidyuñ ja naxwii'ñit jaa'y; jøts tø ja tpikta'aky ja ejxa'an ku ja ojts tyikjujky'ajtyindi ja nwindson'ajtim Jesús, jøts ja naxwii'ñit jaa'y jade'en ttuknijawi jøts ku dø'on ja yja'aji pøn idø'on me'emp.

32 Xjats ku ja Pablo jade'en ja ayuujk tyiknaxjy ku jaa'y yjujky'ajtyindi jadigojk oo'kpi jutjøtpy, winets ja Atenas jaa'y winaagin yjanchtaxekniðøjkidøø, jøts jadu'uk winaagin ñømdøø:

—Wan jade'eñi, ja wyinaty jadu'ukpi: xøøw xjaaknigajpxy.

33 Xjats ja Pablo jade'eñi tmatjstuujty.

34 Jamts ja jaa'y wyinaty winaagin pøn tja'gyukidøø ja ayuujk, jøts ojts tpaduujnidi ja Jesús yja'. Ja'abi jaa'y nidu'ugin txøøw'ajt Dionisio pøn jam windsøn'ajtp ma ja junti tundaajk txøøw'aty Areópago. Jøts jam nayide'en tu'uk txøøw'aty ja tø'øxyøjk Dámaris, jøts jam ja niwinaagin ja myigu'uk.

18

Sa yjajty sa kyubejty ja Pablo jam Corinto

1 Xjats ja Pablo chøø'ñ jam Atenas jøts ñijxxy ma kajp txøøwi Corinto.

² Jamts tu'uk tminabyajttøø ja israelit jaa'y pøn txøøw'ajtp Aquila midi jam kugajp'ajtp ma et txøøwi Ponto. Ja'ats wyinaty namdsø'ondipnim jam Italia møøt ja ñidø'øxy pøn txøøw'ajtp Priscila, jøts ñamja'atinim Corinto. Claudio dø'øn ja wyinaty jade'en tø tyuñidi pøn ja italiit jaa'y wyindsøn'ajttip, ja'ats tyikutuky jøts yikajxpidsømgøjxnidøø niduki'yji ja israelit jaa'y pøn jaty jam wyinaty tsinaadyip Roma. Xjats ja Pablo ojts t'atsmigajpxy ja Aquila jøts ja Priscila,

³ jøts ja jam tmøøtään tmøøtsinaay, ojts tmøøtuñ kumi nay ja'abi tunk ja tyunk'ajtpy ja wetøjkxuuky.

⁴ Jøts ja Pablo wimboø'kxin xøøw ñijkxy tsaptøjkjotp ma ja jam tñigajpxy tñimadya'aky ja Jesús yja', jøts jade'en ttukmibiky øy pøn jaa'y, wan ja t'israelitjaa'yidi tka'israelitjaa'yidi.

⁵ Xjats ku ja Silas jøts ja Timoteo ñamdsøondøø jap Macedonia, jøts ñamja'tti Corinto ma Pablo jam wyinaty, winets ja Pablo tu'ugyi tpadøjkjy'i'ñ ja kajpxwa'kxin, jøts ka'pxy ttukmadøy ja israelit jaa'y jøts ku ja Jesús yiknitsokpi'aty pøn ja yjajøp'ejx'ejttip.

⁶ Ku ja Pablo jade'en wya'añ, winets yikmi'ambiky jøts ja ojts yikmidsepiky, ojts yiktsepkajpxy. Winets ja Pablo ja wyet twixijty, ja eja'an jade'en tmø'øy jøts ku jade'en jaayibaat tmajtstu'utt, winets wya'añ:

—Mgø'ømbøky meets wyinaty ku m'anmija'win wyindigø'ødyit; øts ka' mee n'uktun'ajtni. Ejxti sa x'ejxti, ixyaø øts jam ne'egi nnøjkxt kajpxwa'kxpi ma pøn kya'israelitjaa'yidi. Tø net jaabaat nmajtstu'utti.

⁷ Winets jam chøø'ñ tsaptøjkjotp, jøts ñijkxy kajpxwa'kxpi ma tu'uk ja jaa'y chøøni pøn txøøw'ajtp Justo, pøn jam tsinaapy tsaptøjk pa'am. Yjanch'ajot'ajtpy ja Dios ja nayide'en.

⁸ Jøts ja Pablo jade'en kyajpxwa'kxy Justo tyøjkjotp, winets ja jaa'y tu'uk tmibøjktøø ja Dios kyajpxy møøt ja y'u'nk ja ñidø'øxy, pøn ja tsaptøjk niwindson'ajtp, ja' xyoøw Crispo. Xjats nayide'en namay ja Corintit jaa'y tmibøjktøø ja Dios kyajpxy, winets ñøbajtkøxti.

⁹ Xjats ja Pablo tu'ukpi koots ja nwindson'ajtim ñimaajyøø, jøts ja jade'en tja'wiyi'i'ñ kidi jaa'y kyuma'ay ku ja ñii'mxyi:

—Kidi mdsø'øgi; jaa'kajpxwa'kx, kidi m'amøñ.

¹⁰ Ka'ap pøn sa mduñi, ixya me møø n'ity. Ja øts ja jaa'y ya may kajpjøøjty njagyepy pøn øts n'ayuujk xmibøjkwajñiyip.

¹¹ Winets ja Pablo jam tyaañ Corinto tukjumøjt jagujkp, jøts ja jaa'y ttuk'ixpiky ja Dios kyajpxy.

¹² Xjats tu'ukpi xøøw yjajty ku ja Galiön wyinaty myøjwindsøn'aty jam Acaya, winets ja israelit jaa'y tmi'ambøjkti ja Pablo, jøts tyiknøjkxti ma ja kutujktaajk jam,

¹³ jøts ttukmadoodøø ja møj windsøn yide'en:

—Ya'at jaa'y ttukmibøjkp ja jaa'y jøts ku ja jade'en t'ajot'attit ja Dios sam ka' tyim'yukpaat'ajtniyi. Ka'ats adøm ngutujk jade'en t'ukupøjkni.

¹⁴ Xjats ku ja Pablo wyinaty tyimgyajpxwa'añ, winets ja Galiön tñimaay ja israelit jaa'y:

—Ku jeexyip ja kajaa winmaa'ñ, uk ja møk ayo'on jee tø tyuñi, øts ja jeexyip nyikwingukip meets israelit jaa'y;

¹⁵ kumi ka'ats yjade'eni, jabi nugo ayuujkxi yø' jøts mgø'ømgutujk meets yø', ka'ap øts yø x'ukpaat'ajtni, yikwingukidi yø pøni sa xyikwingukidi. Ka'ap øts yø'øbi ndiidyunwa'añ.

¹⁶ Xjats ja israelit jaa'y yikajxpidsømgøjxtøø ja' kutujktaajkjopty.

¹⁷ Winets ja griegit jaa'y tmajtstøø ja Sóstenes, pøn windsøn'ajtp jam tsaptøjkjotp, jøts jami tnaixmiwojpidøø jam yikutujkpi tøjka'agø'øm, jøts ja møj windsøn Galión ka' tyimdyunk'aty niwinø'nin.

Ku ja Pablo jadigojk yja'jty jam Antioquia, winets ja myidigøøk ojk chøø'n kajpxwa'kxpi

¹⁸ Xjats ja Pablo yjaaktaa'niyi'n jeky. Winets ja myigu'uk tjaak'ukajpxpoo'kxkøjxnaa niduki'iyi ku ñøjkwæ'andi barkijotp jam Siria, møøt ja myigu'uk Aquila jøts ja Priscila. Xjats yja'ttøø tekyjø'øm jam mejy'am ma txøøwi Cencrea, winets ja Pablo kø'øm ñabyiktaajkxiyi ja ejxa'an, jøts ja wyaay tke'jpy ku wyinaty tø tuki'iyi tpaduñ midi wyanda'aky'ajtpy. Winets barkijøtpy tyøkinidøø.

¹⁹ Jøts yja'ttøø ma kajp jam txøøwi Efeso, jamts ja Pablo ja myigu'uk t'ukyiktaañ jøts jam ñijky tsaptøjkjotp ma ja ojts tminagyajpxyi ja israelit jaa'y pøn jam namyujkidip.

²⁰ Winets ja Pablo øy yjayikminuu'kxaajky jøts jap waani tyaa'nit, ka'ats ja tkupijky.

²¹ Xjats ja møøt y'uknagajpxpoo'kxiniyøø, xjats tniimaay:

—Ja'agøjxp øts yam ñijky ku øts jam Jerusalén nyiknaxwa'añ ja xøøw midi wingomp; kuwani øts jadigojk nme'ent jøts mee n'ats'ext ku Dios wya'ant.

Xjats jadigojk tyøjkiyi'n barkijøtpy, jøts chøø'n jam Efeso.

²² Xjats ku ja yja'jty ma kajp txøøwi Cesarea, winets jam choo'ngojmā tekyjø'øm jøts ja ñijky Jerusalén, jam ja t'atskajpxpøø'kxy ja myøøtjanchja'wibi, winets yjoptaajky ma kajp txøøwi Antioquia.

²³ Jants øjts kawinaak xøøwin tyaa'ni Antioquia, winets chøø'n jadigojk jøts t'ayo'øgyixy jadigojk ma wyinaty tø wyidity ma et txøøwi Galacia jøts Frigia, jøts ja myøøtjanchja'wibi tkajpxjot'amøki.

Ku ja Apolos ojts kyajpxwa'kxy jam Efeso

²⁴ Winet'ets ojts nay ja'abi tiempi yja'aty jam Efeso tu'uk ja israelit jaa'y pøn txøøw'ajtp Apolos, jøts pøn kugajp'ajtp Alejandria. Ja'abi jaa'y janch tsuj janch øy ja kyajpxwa'kxy, janch ñija'wip idø'on wa'ats ja Dios kyajpxy.

²⁵ Tø ja wyinaty t'ixpiky ja Dios kyajpxy ma wya'añ jøts ku ja nwindson'ajtm tsojk myeenwa'añ ya naxwiñ. Ja'ayi xpojkjin ja ñigajpxpy sa Juan Bautista ojts yik'ixpiky, jøts tigøjxp ku jaa'y ja tyiknøbejty.

²⁶ Xjats ja Apolos møk kyajpxøjkxiyi'n jam tsaptøjkjotp; kuts ja Priscila jøts ja Aquila ja jade'en tmadowdi, winets ja abiky tjiwaawdøø, jøts ojts ka'pxy ttukmadowdi ku ja Jesús tø wyinaty y'atsmeni, jøts ti jaty ja ojts ttuñ.

²⁷ Xjats ku ja Apolos jam wyinaty ñaxwa'añ ma et txøøwi Acaya, winets ja janchja'wibi pøn jam Efeso ja nøky tyik'øvidøø, jøts ja janchja'wibi tkajpxwa'kxy ñigajxidøø pøn jam Acaya, jøts øy tsuj jam tyikja'attit ja Apolos. Kuts ja jam yja'jty Acaya, winets møk tjaakpudøjkxiyi'n pøn jaty ja Dios tø wyinaty y'ayo'ejxngøjxp tyukjanchja'wi ja nwindson'ajtm Jesús,

²⁸ jøts ja jam kyajpxwa'kxy mayjaa'y agujkp, jøts wa'ats ttukmadoogixy midi ka' mibaat pøn tkajpxyo'ont. Tyukmadoow tuki'iyi ku ja israelit jaa'y kyatiwiyinmaydi, jøts pøni sa ja Dios kyajpxy jap yjaadya'ni ku ja Jesús yiknitskpi'aty, pøn ja israelit jaa'y yjajøp'ejx'ejttip.

1 Ku ja Apolos jap wyinaty Corinto jøts ja Pablo jam ñajxy kojpkjotp, jøts yja'jty jam Efeso ma tpaajty namay ja myigu'uk pøn jaty ja Dios tja'myajtstip.

2 Winets ja Pablo jam tyiktiy jøts tñimaay:

—¿Tø meets ja Espiritu Santo mdatøkiyi ku ojts xjanchjawiidi ja Jesús?

Jøts ja t'adsojimbettø:

—Omik øøts idø'øn ja nnijawit jøts kudam ja Espiritu Santo jaa.

3 Winets ja Pablo jadigojk tyiktiy:

—¿Sudso'ampyts ojts mnøbatti?

Xjats ja t'adsojimbettø:

—Jade'en øø nnøbejty sami Juan Bautista ja jaa'y tyiknøbejty.

4 Xjats ja Pablo wyaan:

—Nugo eja'an idø'øn ja Juan Bautista myøøy ja jaa'y ku ja yiknøbety, jade'en'ampy ja jade'en ttuun jøts ja jaa'y jade'en yiknijawidit jøts ku ja tjanchyiktigatsti ja chinaa'yin. Nayide'en ja tñimaay jøts ja amumjoojt t'ajot'attit pøn wyinaty menwampnim, ja Jesús idø'øn yiktejp wyinaty menwamp yiknitsokpi.

5 Xjats ku jade'en tmadoodøø ku ja Pablo jade'en tñigajpxy, winets ojts ñøbatti ja nwindson'ajtim Jesús køjxp;

6 ku ja Pablo jade'en kyønixajidøø, jøts ja Espiritu Santo ñimejnidi, winets ja abikpyi ayuujk ojts tkajpxti, jøts tkajpxwa'kxti ja Dios y'ayuujk pøni sa ja Dios wyinmaa'nmyø'øyiidi.

7 Nimakmajtsk ja wyinaty yjaa'y'atti.

8 Tigøøk po' ja Pablo jap yø'ø'yijty jam tsaptøjkjotp ma jam møk'ampy kyajpxwa'kxy, jøts ttukmibiky jade'en ja jaa'y sudso'ampy ja Dios ja nitanaa'yin tpiakta'aky.

9 Jamts winaagin pøn tkamibøjktip, ja'ats møk ja wyinmaa'n tpiaktaktøø jøts jam mayjaa'y agujkp tjanchtaxe'ekti ja Dios kyajpxy. Xjats ja Pablo ja møøt ñamyatstuujtniyøø pøn ja ka'øy ayuujk tjagyaptip, winets ja tmøødiñaa ja myøøtjanchja'wibi jøts tmøødiyii'n ma jaa'y tu'uk txøøwi Tiranno pøn ja xpojktaajk wyinaty tjagyepy, jamts ja Pablo jabom jabom ja myigu'uk ttuk'ixpiky ja Dios kyajpxy.

10 Jade'en idø'øn ja jam tyuun majtsk jumøjt, ja'agøjxp idø'øn ja jaa'y ojts tñija'wigyøxti jagambaat ja Jesús kyajpxy, jade'en ja israelit jaa'y jøts nayide'en pøn ka'israelit jaa'dyi, pøn tsinaadyip Asia etjotp.

11 Jøts ja Dios møk tmø'øy ja myøk'ajtin ja Pablo jøts ja milagri ja ttuun,

12 jøts ja Pablo yjanchyiktapaaty ja paay jøts ja wet, jøts ja tminøjkxti ma pamaa'y jaa'y jap, winets ja pamaa'y jaa'y ja'ayi ttatsoktøø, jøts ja miku' jade'en'i myajtstuujtidøø.

13 Jam wyinaty niwinaagin ja israelit jaa'y pøn nugo widejttip kajp kajp. Ja' ja tyunk'ajttip ja miximaaky ja mimuu'kk, jøts jade'en ja miku' ttukma-jtstu'utti ja jaa'y, nay ja Jesús myøk'ajtin yiktunwajnip, jøts tñøjmi ja miku':

—Øts wamp, majtstu'ut yø jaa'y Jesús myøk'ajtingøjxp midi kyajpxyø'øpy ja Pablo.

14 Tu'uk ja israelit jaa'y pøn txøow'ajtp Esceva, pøn ja teety tñiwindsøn'ajtp, ja'ats idø'øn ja y'una'jk jade'en adøtstip, niwixujk wyinaty yjaa'y'atti.

15 Xjats ku ja jade'en ttundi, winets ja miku' y'adsojimbejtijidøø, jøts yiknimaadyøø:

—Ja' ø n'ejxkapy pøn txøow'ajtp Jesús, jøts nayide'en ja' pøn txøow'ajtp Pablo; jøts meets ka' mee n'ejxkapy pøn ja mbøn meets.

16 Winets ja jaa'y pøn wyinaty ja miku' tmøøt'ajtp, jøts møøt ñamyajtsiyøø ja niwixujkpi jaa'y, jøts ja jade'en myimajada'agyidi ja miku', jøts niduki'iyi

yikakøjxidøø janchwindsaachi jøptsaaachi, niwa'ats ixwa'ats idø'on ja yjanchpidsømnidøø jap tøjkjøtpy.

¹⁷ Ku dø'on ja jade'en yjajty jam Efeso, winets niduki'iyi tnija'widøø ja kajp jaa'y pøn jaty israelit jaa'y, jøts nayide'en pøn ka' y'israelitjaa'yidi. Ku tnija'widøø jade'en ja ayuujk, winets niduki'iyi ja jotmay yjanchpaajtidøø, jøts tu'ugyi ja nwindson'ajtm yja' tmøjpiaktajktøø.

¹⁸ Xjats nayide'en namay pøn jaty tmibøjktøø ja Jesús yja' winets ja pyøky tuki'iyi tkajpxnaxkøjxtøø, sa y'ijty kya'ø'y'adø'øtsti.

¹⁹ Jøts nayide'en may pøn jaty y'ijty tyundip ja miku' tunk winets ja kya'ø'ñøky tuki'iyi tniðøgyøxnidøø jam mayjaa'y y'agujkp. Xjats ku tpayø'odyøø ja nøky ja chow, wixijxkmyajk mil idø'on tpayø'odyi tum ja plati meen.

²⁰ Jade'en idø'on ja nwindson'ajtm Jesús ja myø'ajtm møj tnanky'ijxyiyi.

²¹ Xjats ku dø'on jade'en yjajty, winets ja Pablo jade'en wyinmay jøts jam t'ats'ejxwa'añ ja myøøtjanchja'wibi jam Macedonia y'etjotp, jøts nayide'en Acaya y'etjotp, winets jam yja'atwa'añ jadigojk Jerusalén. Jøts nayide'en wya'añ, ku jam y'uknaxt Jerusalén jøts nayide'en ñøjkt Roma.

²² Xjats ku jade'en wyinmaay ja Pablo, winets ja pyudøjkibi tkejxy namajtsk jam Macedonia. Timoteo ja xyøøw ja pyudøjkibi jøts jadu'uk Erasto, jøts ja Pablo jam jawaani yjaaktaa'niyü'ñ Asia.

Ku ja Efesit jaa'y yjanch'ambøjktøø

²³ Winet'et ja Efesit jaa'y tyiktsept'a'akwa'andi ja Jesús yja'.

²⁴ Tu'ugyi dø'on ja' pøn jade'en tyiktso'ondaajk ja ayuujk, Demetrio ja xyøøw. Ja'abi tunk idø'on ja yjagyepy, tum ja plati dø'on yiksandi'øyip, jøts nayide'en ja mutsk tsaptøjkuna'jk tyik'a'øyiñaxy nayide'en sami dios Diana chaptøjk t'ixy. Janch nimeenbyøjktip idø'on ja tyunk ja' pøn jaty jap møøt tyun.

²⁵ Xjats ja Demetrio twaadsøøy niduki'iyi pøn jaty nay yø'øbi tunk tmøøt'ajttip, xjats ja tnimaay:

—Migu'uktøjkti, mnija'widipxi ku yø'øbi tunk nduktanajxindi janch øy janch tsuj ku ya njanchmeembyijkyindi;

²⁶ kumi m'ijxpy meets, mmadøøpy meets ku ja Pablo jade'en tkajpxyø'y jøts wya'añ ku ka' yø' Diosi midì jaa'y yik'ø'yip sa adømin; jade'en ja Pablo ja jaa'y namay tø ttukmibiky, kidi yayip nugo yjaty, niduki'iyi dø'on ja Asiit jaa'y ja tnija'winidi.

²⁷ Ka' yjanch'øyi, janch tsø'øgi møøt yø', tsojk adøm ndunk jade'en wyindigø'oyindit, jøts nayide'en yø dios Diana chaptøjk tsojk yø nayide'en kya'ukyikmøjpiaktaknit pøn yø twindsø'øgidi pøn jaty ya Asia tsinaadyip, jøts pøn jaty tsoo'ndip o manaajx o magajp.

²⁸ Ku ja mayjaa'y jade'en tmadoodøø ja Demetrio y'ayuujk, winets ja yjanch'ambøjktøø jøts niduki'iyi wyandøø:

—Janch møj adøm ndios Diana jøts ka' kyudigø'øty!

²⁹ Xjats ja kajp jaa'y xem yam yjanch'adøtsnibøkidøø, jøts ja Macedoniit jaa'y namajtsk yikmajtstøø pøn txøøw'ajttip Gayo jøts Aristarco midì ja Pablo myøøtwidijtpy. Xjats yikpawejtstøø yikpakoo'tstøø, xjats yiknøjxidøø jap møj tøjkjøtpy ma ja kajp ja yjunti tundaajk jap tjagyarti.

³⁰ Jamts ja Pablo nayide'en tyøkiwya'añ jøts ja myigu'uk t'atskugajpxwa'añ pøn wyinaty tø yikmatsti, xjats ja nay ja myøøtjanchja'wibi pøn møøt wyidity ka'ap ja myajtstuujtidøø.

³¹ Winets ja Pablo myiwin'ijxy nayide'en tkajxtøø ja y'ayuujk pøn jam windsøn'ajttip Asia, jøts ku ka' jam tpadøkit ja myigu'uk.

³² Xjats ja jaa'y jam junti tundaajkjøtpy nugo yjanchkajpxjø'økti, øy sa tu'uk jadu'uk yjanchwa'andi kumi tø ja jaa'y wyinaty namay yjanchyø'ømyukti, jøts ni tkanijawidi namay pøni tigøjxp idø'on yø'ømyukti.

³³ Xjats tu'uk ja israelit jaa'y ja myigu'uk tyukmadoojøø pøni ti ayuujk idø'on jap ñiyø'ømyuktup, ja' xyøøw Alejandro, ja'ats ja myigu'uk ojts kuwani ñajtswetsiyi jøts jam kyajpxt mayjaa'y agø'øm. Winets ja Alejandro xyaji'jky, ja' tyijpy ku chajpxajy jøts ja niduki'iyi y'amo'ondit, ja' kyugajpxwampy ja myigu'uk midi tø yikmatsti namajtsk.

³⁴ Ku ja Alejandro yik'ejxkajpy kudam ja y'israelitjaa'yi, winets ojts jinaxy yjanchjaakajpxjø'økti. Kajpxti ja majtsk hora'an, xjats wya'andi:

—janch møj adøm ndios Diana jøts ka' kyudigø'øty!

³⁵ Xjats ja eskribaän ojts kø'øm tyik'amøn ja mayjaa'y, jøts tnimaay:

—Meets Efesit jaa'y, ukmadowdi. Ñija'widip niduki'iyi ja naqxwii'ñit jaa'y ku yø Efesit jaa'y t'ejx'etti adøm nmøjdios Diana chaptøjk, jøts nayide'en yiknijawi ku n'ejx'ijtyim ja y'awanax midi kidaajk tsajpjøtpy.

³⁶ Kumi janch idø'on ja yjajty, kidits nugo mdsø'øgidi, ka' pøn ti ttuñ, tukween meets et, tsuj mjaä'y'attit

³⁷ kumi ya'at jaa'y midi meets ya tø xyikmiñ ka' yø ti ttundi, jøts nika'ap yø tjemdejti ttedejeti adøm ndios Diana.

³⁸ Jøts Demetrio møøt ja tyumbi, pøni jaa ja'adi pøn møøt ñañi'øøniwya'andi, mibaat yikpayø'ødyit jam kudunk wyindump, jøts tnigajpxtit kija' ja pyøky sudso'ampy ñañi'øøniyidi.

³⁹ Pøni wenk winmaa'ñ yø' midi meets ixyam m'amidøøpy, mibaat myø'ømyuktit jøts yikxon ngajpx'øyi'indit møøt ja kudunktøjk;

⁴⁰ tø ja wyinaty kya'øyi ku jotmøn jam nyikni'øø'na'andit jam møj windsøn wyindump, jøts ku ja jotmøn wya'ant ku adøm ja møøt ñachep'ijxya'am. Niti winmaa'ñts adøm sudso'ampy n'adsojimbejtindit, ku jotmøn t'amido'ot tigøjxp ya jade'en n'adaijchindi ngajotkujkindi.

⁴¹ Xjats ku ja eskribaän jade'en kyajpx'abajtyii'ñ jøts yø'øwya'kxnidøø niduki'iyi ja jaa'y.

20

Ku ja Pablo wyidiyty Macedoniit etjotp jøts nayide'en Greciit etjotp

¹ Xjats ku ja mayjaa'y jade'en ñiyjotkukidøø, winets ja Pablo ja myigu'uk twaadsoogijxy jøts ja ojts tjaak'ukajpxwejni, ojts ttukmadøy midi ja wyinmaa'ñ'ajtpy; winet møøt y'uknagajpxpoo'kxiniyi jøts jam ñijky ma et txøøwi Macedonia.

² Winets jam ojts tkajpxpoo'kxkixy tjot'amøkajpxkixy niduki'iyi ja myigu'uk ma jaty jawyeen wyinaty tø ñaxy, winets jam choo'ngojmää jøts jam yja'jty ma ja Grecia et.

³ Jamts y'uktaa'niyi'ñ tigøøk po', xjats ku jam choonwani barkijøtpy jøts ñøjkwaa'añ Siria, winets nay jami tñija'wiyii'ñ kudam ja israelit jaa'y ñiwinmayiyi jøts yikmatst jap barkijøtpy. Winets wyinmaa'y jøts ne'egi ñøjkxt tekyjø'øm, paty jadigojk nay jam wyimbijty Macedoniit etjotp.

⁴ Ja' ja wyinaty yjamyøøt'ajtpy niwixujk ja myigu'uk pøn txøøw'ajttip Sópater pøn kugajp'ajtp Berea, jøts ja Aristarco, jøts jadu'uk Segundo pøn kugajpidip Tesalónica, jøts ja Gayo pøn kugajpip Derbe, jøts jadu'uk txøøwidi Timoteo, jøts ja Tíquico, jøts jadu'uk Tróximo pøn jam kugajp'ajttip Asia.

5 Ku jam yja'tti Filipos, jamts øts wyinaty n'awixy, øts Lucas nxøøw midi ya'at nøky tjaapy. Xjats ja niwixujkpi jaa'y cho'onjawyeenidøø, jøts øøts jam ndaañ møøt ja Pablo, jøts øøts jamnim x'awixy jadigojk ma kajp txøøwi Troas.

6 Nay jamyi øøts ja xøøw njaaktyimy'ukyiknajxy jam Filipos, ja'abi xøøw ku tsapkaaky yikay midi kalevaduri møøt. Xjats øøts jam ndsøø'ñ xøguixy jøts øøts ja barki jam ndatøjkiñaa, jødsnim øøts kyimagoxk xøøw nja'jty jam Troas ma øøts ja nmigu'uk nnajtspajtyi'ñ, jamts øøts ojts ndaa'ni wixujk xøøw.

Ku ja Pablo ja myigu'uk ojts tmigajpxy jam Troas

7 Ku dyomingixøøw'ajty jøts ja Jesús yja' yøømyukti, jøts ja tsapkaaky tyikwa'kxwa'andi sa ja nwindson'ajtim ojts tnajtstuni jøts tñankyayi, xjats ja Pablo jap nayide'en kyajpxwa'añ. Kumi kyimjabom ja wyinaty choonwani paty idø'on ojts jeky'ampy kyajpxy kunim myøjtssuu'miyi'ñ.

8 Jap ojts ñamyukyidi tigøøk nipatøjkijpxy ma jap wyinaty lampiri may yjajy;

9 jøts tu'uk ja mixy jam wyinaty chøøni wentani'am pøn txøøw'ajtp Eutico. Kumi jeky ja Pablo kya'amaay, winets ja mixy jamyi mya'uu'yjoknaa jøts tu'ugy; ojts tyimyaanijky, winets jam ojts kyunaxy jam nipatøjkøjpx jøts ñaxkidaajky najxkøjpx, jam øøky yikwejtsji'jky.

10 Jøts ja Pablo tniwinajky jøts jam ñagyøxmuujtsøø oo'kpi ñikøjpx jøts tkøbatxajyi'ñ, jøts tñimaay ja myigu'uk:

—Kidi mdsø'øgidi; jujky yø'.

11 Winets ja Pablo jadigojk pyatøjkigyojmi jap nipatøjkijpxy; japts ja tsapkaaky ttukwa'kxy, jøts kyaadyøø; winets yja'aka'amaay kunim xiijñiyi'ñ, jøts ñøjkxnaa.

12 Xjats ja jaa'y tjanchtaxondaktøø ku ja mixy ja øy tsø'øky tyiknøjkxnidi.

Ku ja Pablo chøø'ñ jam Troas jøts ñijky Mileto

13 Winets øø ndsoonjawyeenyi'ñ barkijøtpy, jøts øøts jap n'aweixwa'añ ja Pablo ma kajp txøøwi Asón, tekyjyø'om ja yø'øwya'añ ku ja jam ñøjkxwa'añ.

14 Ku øøts ja nminabyajtyiøø jam Asón, winets øøts ja møøt barkijøtpy ndøjkijyi'ñ, jøts øø nmøøtnijky mejñinaxy ma kajp txøøwi Mitilene.

15 Jøts øøts jam ndsøø'ñ jadigojk, jøts øøts kyimjabom jam nnajxy ja' y'awemp ma et jam txøøwi Quío, winets øøts nja'jty jadu'ukpi xøøw ma kajp txøøwi Samos. Jøts øøts nnijky poo'kxpi ma kajp txøøwi Trogilio, jøts nay kyimjabomgøjmyi øø njatkojmi ma kajp jam txøøwi Mileto.

16 Jade'en idø'on yjajty kumi ka'ap ja Pablo jeky tyikna'xwa'añ ja xøøw jam Asia etjotp, paty kyanijky Efeso; kumi ja' ku tsojk yja'atwa'añ Jerusalén jøts jam tyikna'xwa'añ ja Pentecostés xøøw.

Ku ja Pablo ttukmadøøy ja Efesit møjaa'dyøjk ya'atpi ayuujk

17 Ku øø njam'ajty Mileto, winets ja Pablo twaadsøøy pøn jaty jam møjaa'dyøjk'ajttip ma tsaptøjk jam Efeso,

18 xjats ku ja yja'ttøø jøts tñimaay:

—Meets mnija'wip sa øts ya Asiit etjøøjty n'øyjaa'y'ajty ku øts ya miduk'ojk ojts nmiñ, jøts ixymbaat jade'eñim njaa'y'aty.

19 Mnija'widip sa øts ejtp nbaduñ ja nwindson'ajtim Jesús y'ayuujk jøts ka'ap øts nnamyikexyiyi, njanchkuyaajxip øts ku ja jaa'y tkatsokti ja Jesús yja'. Jøts nayi mnija'wip meets sa øts ya ojts n'ayo'ombaaty ku øts ja nmigu'uk israelit jaa'y xjemdundi xedundi.

20 Ka'ats meets ndamajststu'uty ja øgyajpxy midi meets kø'øom myiktu'ump, ku ø nnigajpxy nayide'en mayjaa'y agujkpx jøts adøjkjøjty nayide'en.

21 Niduki'iyi ɔts ndukmadooguixy jade'en ja israelit jaa'y jɔts nayide'en pɔn ka'israelit jaa'dyi, jɔts ku tmajstuttit ja kya'ɔdyunk amumjoojt mɔɔt ja Dios, jɔts tmɔjɔawidit tjanchjɔawidit ja nwindson'ajtim Jesucristo.

22 Ixyam ɔts kuwani nnijkxy Jerusalén ja'agɔjxp ku ja Espiritu Santo mɔk xwaaadsøy, ka'ap nnijawi pɔni sa ɔts jam nɔjkk njaty.

23 Jade'eñi nnijawi pɔni magajp nnijkxy nja'aty, jade'en ɔts ja Espiritu Santo xuknijawi jɔts ku kuwani nyiktsu'umt jɔts jam mɔk n'ayo'ombaaft.

24 Ka'ats ɔts yɔ nmɔjpikta'aky; wan ɔ t'ɔɔky, ka'ap ɔ nnabya'ayoyi ja'agɔjxp jɔts ɔts ɔy jotkujk kuwani nyikyɔ'ɔwya'añ yɔ ndunk, kunim yjɔpkɔxt midi ɔts nwindson'ajtim Jesús tɔ xmɔ'ɔy, jɔts ɔts ja jaa'y ɔy tsuj ndukmado'ot ku ja Dios kɔ'ɔm tpa'ayɔy ja ñaxwiw'ñit jaa'y.

25 Tɔ ɔts ya ngajpxwa'kxy ja Dios myɔk'ajtin sa ttanitani ja yjaa'y, ixyam inet najtsja'wip ɔts jɔts ku meets ka' n'ukniwimbejtnit.

26 Paty meets ixyam ndukmadowa'añ jɔts ku nipɔn nganadyapɔkyjawiyit pɔni jaa winaagin tyuu'tigɔɔdyi.

27 Kumi tɔ ɔts nnigajpxy tuki'iyi pɔni sa ja Dios ja wyinmaa'ñ tpiktaajky, ka'ap ɔts midi n'ayu'uch'atɔy.

28 Jɔts nayide'en meets kɔ'ɔm mnay'ejx'etidit, jɔts niduki'iyi nayide'en ja migu'uktɔjk x'ejx'ettit, kumi tɔ meets ja Espiritu Santo mbikta'agiyi jɔts mdaandi ejx'ejtpi pɔni pɔn jaty ja Jesús yja' tpaduujnidip, pɔn ja nwindson'ajtim Jesús kɔ'ɔm kyu'ɔ'jkimbaajtip.

29 Nija'wipts ɔts ku ɔts ya ndsoont jɔts mye'endit wenkpi jaa'y, jɔts myikwinmaa'nmya'atwa'anidit, jɔts tyikutigɔɔwya'ant ja Jesús yja'. Jade'en idɔ'ɔn y'adɔ'ɔtswa'andit kaakey miy'uk tyikutigɔy ja borreegi'u'nk.

30 Jɔts nayide'en meets winaagin nɔjkk xwin'ɔɔndi ja mmɔɔtjanchja'wibi, jɔts ja xukmibɔktit midi ka' tyiyi yjanchi.

31 Paty ɔyim mnay'ejx'etidit; ja'myatsta'am ku meets tigɔɔk jumɔjt xinaxy tsunaxy ngadamajstutty ja kajpxwejin ayo'ejxingɔjxp.

32 'Meets migu'uktɔjkti, Dios mɔk mbudɔkiyidip, jɔts nayide'en myiktiwiyinmayiyidit y'ɔy'ayuujkɔjxp midi xamidsojkindip sa ja x'ayo'ijxyindi, jɔts nayide'en myikmo'odit ja ɔy'ajtin ja tsuj'ajtin mɔɔt ja'adi niduki'iyi pɔn jaty ja Dios wyinaty tɔ tyikpɔkwyja'ach.

33 Ka' meets ya ti n'amidɔy, ni meeñ, ni wet, niti.

34 Wa'ats xnijawidi ku ɔts kɔ'ɔm ojts nnay'amiduniyi, jɔts ɔts kɔ'ɔm nbaajty pɔni ti jaty ɔts xka'ejtxɔɔ, ndukpaajt ɔts nayide'en ja nmigu'ukti ja yja' pɔn jaty ɔ mɔɔt nwidijty.

35 Ejtp ɔts ja nnigajpxy jɔts ku jade'en mnamyidunidit, jɔts xpudɔkidit ja mmigu'uk pɔn ja yja' ka'ejtxip, ja'myatsti ja nwindson'ajtim Jesús y'ayuujk sa ja wya'añ yide'en: "Ne'egi mɔj ja xondaajkin ja wyimbidsɔ'ɔmxiyi pɔn windsɔ'jkip, jɔts ka'ap ja' pɔn yikwindsɔ'jkip."

36 Xjats ku ja Pablo jade'en kyajpx'abajtyi'ñ, winets mɔɔt ñagyuxendyaajkɔɔ ja myigu'uktɔjk jɔts ja Dios t'ajot'ajttɔɔ.

37 Winets niduki'iyi ja myigu'uk wyinmaa'ñ yjanchmendɔɔ jɔts yjanchyaxtɔɔ, xjats ja Pablo yikyukxajnajx jɔts yiktsu'kxy.

38 Janchjotmay'oo'knidip idɔ'ɔn ja wyinaty ku ja Pablo jade'en wya'añ jɔts ku ka' nijuuni xɔɔw y'ukyikniwimbejtnidit. Winets tmɔɔtnɔjxxtɔɔ ma wyinaty ja barki jam.

21

Ku ja Pablo ñijkxy jam Jerusalén

¹ Xjats ku øø nmajststuupty ja nmigu'uk jam, winets øøts barkijøtpy ndøjkiñaa, jøts øø tiy ndyimñijkxy ma ja et txøøwi Cos jam mejkyujk'am, jøts øø kyimjabom nja'aty ma txøøwi Rodas, jamts øøts jadigojk ndsøø'ñ jøts øø nja'aty mejy'am ma txøøwi Pátara.

² Jamts øø nbaajty jadu'ukpi barki midi wyinaty nøjxpx ma et txøøwi Fenicia, winets øøts jap ndøjkiyi'ñ.

³ Jøts øøts jam nyø'øy mejyotp, winets øøts n'ixy anajy'ampy tu'uk ja et midi jam mejkyujk'am, ja' xyøøw Chipre, jøts øø nja'jty Siria ñaxjotp. Ja ku ja barki wyinaty tyiktanwa'añ ja tsimy ma kajp txøøwi Tiro, xjats øøts jam n'uk'awidijty.

⁴ Nay jam øø nminabyaajtyøø ja nmøøtjanchja'wibidi, xjats øøts jam nmøøtaañ wixujk xøøw; winets ja nmigu'uktøjkti tnimaadyi ja Pablo jøts ku ka' ñøjxkt jam Jerusalén, kumi tø ja wyinaty ja Espiritu Santo tyuknijawiyidi ku jam sa yjatt.

⁵ Ku øøts wixujk xøøw n'uktsinaay winets øø ndsoonwani. Xjats øø niduki'iyi ja nmigu'uktøjk møøt ja ñidø'øxyti jøts møøt ja y'una'jkti øø xpadsøø'ñ, xjats øøts ojts xnajtskaxi jam mejy'am, winets øøts ja møøt n'ukuxanaañaa, jøts øøts møøt ndios'ajot'ajty.

⁶ Winets øøts jam ja møøt n'uknagyaajpxpoo'kxiniyøø, xjats øø ndøjkiyi'ñ barkijøtpy, jøts ja wyimbejtñidøø tyøjkwindump.

⁷ Xjats øø ndsøø'ñ jam Tiro, jøts øø nja'jty ma kajp txøøwi Tolemada, jamnim øøts nminawya'kxiyøø ja barki jøts øøts ja nmigu'uk n'ukmigajpxy, xjats øøts ja møøt n'uktāa'niyi'ñ tukxøøw.

⁸ Winets øø kyimjabom ndso'ongojmaa møøt ja Pablo pøn jaty øø møø nwidity, jøts øø nja'jty jam ma kajp txøøwi Cesarea. Winets øøts nñijkxy jam tu'uk jaa'y tyøjkjotp pøn txøøw'ajtp Felipe, jøts pøn ja øy'ayuujk tmíwídejt, jøts nayide'en y'ijty tunk'aty tyikwa'kxy ja jii'kxy, ja'ats øøts jam møøt ndaañ.

⁹ Ja Felipe jam ja wyinaty ja nimaktaxk ja ñøøx pøn ka'aním y'amatskidi, ja'ats tkajpxnaxtip ja Dios y'øgyajpxy pøn ti jaty ja ttukajpxnaxwajniyi'dip.

¹⁰ Tø øøts jam wyinaty ndaa'ni jeky ku tu'uk ja Dios kyugajpxy yja'jty pøn txøøw'ajtp Agabo, jøts pøn tsoo'mp jam ma et txøøwi Judea.

¹¹ Ja'ats øøts ojts xmigajpxy, jøts ojts ja Pablo chum yiknixaji winets ñadyabaktsujmiyøø jøts nayide'en ñadyakøtsujmiyøø, jøts jade'en ja ejxa'an ja Pablo yikmøøy, jøts yiknøjmi:

—Ja Espiritu Santo dø'øn wamp jøts ku ja israelit jaa'y jam jade'en nøjxk mduñiyi Jerusalén, jøts myikøyakt ma ja yikmøjikutujkpi pøn ka'israelit jaa'dyi.

¹² Xjats ku øøts jade'en nñimadøøy møøt nmigu'uk pøn kugajp'ajtip Cesarea, winets øøts ja Pablo møk njananchjanimaay jøts ka' ñøjxkt jam Jerusalén.

¹³ Xjats ja Pablo y'adsojimbijty:

—¿Tiku mya'axti jøts øts nugo xyikjotmay'ookti? Wan twanjaty, ngupøkp øts wan øts tyikøtsummy tyikpaktsummy. Jøts pøni xyik'ookwandip øts jam Jerusalén, ngupøkp øts ja nayide'en nwindson'ajtim Jesús wyinmaa'ngyøjxp.

¹⁴ Xjats kumi ka'ap øøts ja Pablo xkajpxkyupiky, winets øøts jade'eñi n'amøøñ, xjats øø nwaañ:

—Wan tjaty pøni sa Dios kø'øm tyamidsøkyi.

¹⁵ Ku dø'øn jade'en y'uknajxy ja kajpxy, winets øøts ndsimy nyik'øyiyi'ñ, jøts øøts jam nnøjkwā'añ Jerusalén.

16 Winets øøts ja nmigu'uk winaagin xjamyøøt'ajty midì tsinaadyip Cæsarea, jøts tu'uk midì kugajp'ajtp Chipre, ja' xyøøw Mnasón midì wyinaty jekyip ja Dios kyajpxy tø tpabøjkniyi, ja'ats øøts xyikja'ada'akwamp jam Jerusalén ma wyinaty ja tyøjk tjagyepy.

Ku ja Pablo ojts tmigajpxy ja Jacobo

17 Xjats ku øøts jam nja'jty Jerusalén, jøts ja nmøøtjanchja'wibidi janch ejtni xoni øø xyikja'jty.

18 Winets øøts kyimjabom nmøøtnijkxy ja Pablo jam Jacobo tyøjkwindump ma wyinaty ja møjaa'dyøjkti niduki'iyi.

19 Xjats ja Pablo tkajpxøø'lkxy niduki'iyi pøn jaty jam wyinaty, jøts jatyi ttamimadyakniøøjkøø tuki'iyi sa jaty yjajty ku ja Dios ja myøk'ajtin jade'en tnanky'ijxyiyi jam ma jaty ja jamdi pøn ka'israelit jaa'dyi.

20 Xjats ku døø'n jade'en tmadoooidøø ja Pablo kyajpxy, winets yjanchxonjajtøø ja myigu'uk jøts tmøjpiktaktøø ja nwindson'ajtim Dios, xjats tnimaadyøø:

—Øy'ajtp migu'uk, tø xnijawi ku ja israelit jaa'y mill'ampy tø tmibøkti ja Jesús yja', jøts nay ja' niduki'iyi wandip jøts ku kuwani ja Moisés kyutujk yikpadu'unt.

21 Jøts wandip ja' ku mets ja israelit jaa'y jade'en xukmadøy midì jagamgajp tsinaadyip, jøts ku ka' ttunk'attit midì Moisés kyutujk'ajt jøts ku ka' ja mutsk mixy'una'jk ja ejxa'añ yikmo'ot ñe'kxkøjxp, ni ngatu'unindit ja ngø'ømdsinaa'yin.

22 ¿Sudso'ampy yø ndu'unindit? Janchnamyukidip inet ja nmigu'uktøjkti ku tnijawidit ku ya tø mja'aty.

23 Øy'ajtp ne'egi jade'en xpadu'unt: Ja ya nimaktaxk nmigu'ukti pøn ja wyanda'aky jap tjagyaptip tsaptøjkjøtpy.

24 Møødi jøts ja wa'ats'ajtin xpaattit, jøts xkujuuyit ja wyanda'aktyi jøts nayide'en jap xnankyaaabiyit, jøts yiknijawit ku ja wyanda'aky tø tyik'adukti, jøts tnijawidit pøni ka'adam meets ja Moisés kyutujk xjanchpaduujniyi.

25 Jap øøts ayuujk jadu'uk njaakjagyepy, kumi tø øøts ja nøky jade'en nguexy ma jaty ja Jesús yja' pøn ka' y'israelitjaa'yi, jøts øø ndukmadøy jøts ka'ap nugo tmijotmay'oøktit ja israelit jaa'y chinaa'yin. Ja'ayi øø ndukmadøy jøts ku ka'ap ja tsu'uch ttsu'utstit midì ja tsamaxan yik-tawindsø'jkip. Nayide'en ka'ap ja ni'jpy tjøø'kxtit, jøts nayide'en ka'ap ja jiyujk tsu'uch ttsu'utstit midì ka'øy'oo'kp, jøts nayide'en kidi ja ñiyaa'y ja ñidøøxy ñabyøjkxyidit.

Ku ja Pablo yikmajch møj tsaptøjkjøtpy

26 Xjats ja Pablo tmøødiyi'ñ ja nimaktaxkpi jaa'y, jøts kyimjabom ojts tyiktso'onda'akti sudso tpaattit ja wa'ats'ajtin. Xjats møøt tyøjkxyi'ñ jap møj tsaptøjkjøtpy jøts ttukmadoowa'andi ja teety juuni yjøpkøxt ja'abi jotmay. Øy' tyijpy ku døø'n ja yjøpkøxtit winets nidu'uk nidu'uk tyikme'endit ja yojxin.

27 Xjats ku wyinaty wixujk xøøw tyika'pxwanidi ja yjotmay sudso tpaattit ja wa'ats'ajtin, winets ja Pablo ja israelit jaa'y jap y'eixpaajtiyøø jap tsaptøjkjøtpy pøn tso'ondip Asia. Ku ja Pablo jade'en yiknija'wiyi'ñ, winets ja jaa'y ñanky'ambøjkøxidøø ja xem ja yam, winets tmajtswa'andi ja Pablo,

28 jøts tjanchtaya'axti tjanchtajokti jøts wya'andi:

—¡Meets Israelit jaa'y, pudøjkik øøts! Wan tmajchindi ya'atpi yaa'dyøjk pøn kajp kajp widejtp, jøts ja jaa'y jade'en ttuk'ixpiky jøts ku ka'ap adøm ndsinaa'yin y'øyindi, jøts ja Moisés kyutujk nayide'en t'abaajxi jøts nayide'en

adom ndsaptøjk; jøts jinaxy ıxyam tyimyjaak'adi'ich ku ja griegit jaa'y ya tjaaktyimgyuwaa'wi, jøts jade'en tyikma'aty adom ngunuu'kxchaptøjk.

²⁹ Jade'en ja israelit jaa'y wya'andi ku ja Pablo jade'en tø yik'a'ejxnaxy jap kajpjøtpy, ku jap tmøøtwidity tu'uk ja griegit jaa'y pøn kugajp'ajtp Efeso, ja' xyøøw Trófimo. Jøts jawandıpyim idø'øn ja jade'en tø net ja Pablo tmøøtniıjky ja griegit jaa'y jap tsaptøjkjøtpy.

³⁰ Xjats ja kajp jaa'y yjanch'ambøjknibøjkidøø, winets ja Pablo yikjidøjtpidsıımy jap tsaptøjkjøtpy, jøts ja tsaptøjk jatyi tyik'adujktøø.

³¹ Tyimyik'ookwandıp ja wyınaty, ku ja soldadı nıwındsøn tnıja'wıyıı'n ku ja kajp wyınaty nugo yjanch'adøtsnıdı.

³² Winets ja myıwındsøn ja ttuknıja'wıgyıxy jøts ja puıtp yjanchja'ttøø jap ma ja mayjaa'y jap wyınatyi. Kuts ja yik'ejxpaattøø møøt ja masyoldadı, winets ja Pablo jade'eııı yikmajstıuıty jøts ka' y'ukyıkwoıpnıaı.

³³ Xjats ja wındsøn twınguyø'øıyıı'n ja Pablo, winets ja Pablo yikmajch, xjats ja wındsøn tyıkutujky winets ja Pablo adsow aduuk yıktagøtsuımy ja puxkadeen, xjats ja wındsøn tyıktııy pøn jaa'y ja', ti tundıgø'øıın ja wyınaty tø ttuı.

³⁴ Xjats ja jaa'y ja xem ja yam nugo yjanchkajpxø'ktøø, nı sudso'ampy ja wındsøn tjanchkamadooguki, winets tyıkutujky jøts jap tnınyıkıknıjkyı ma ja soldadı kyutujktaajk japtı.

³⁵ Ku jap wıngon tyıkja'ttı ma eskalerı jap, winets ja jaa'y tjanchjaakwoıpwı'andi ja Pablo ambøjkingøıxp, paty ja soldadı oıts køıxp tsapkø'ødı ja Pablo;

³⁶ janch mayjaa'y idø'øn ja wyınaty pameejnıp, jøts tjanchtaya'axtı tjanch-tajoktı:

—ıWan tpa'øøky!

Ku ja Pablo yjanagyugajpxøø mayjaa'y wyıngujkpy

³⁷ Ku wyınaty ja Pablo jap tyøkiwıyııı soldadı kyutujktaajkjøtpy, winets ja Pablo tjanøımi ja wındsøn:

—ıKıdı y'øı'att ku nmıgajpxtı?

Xjats ja wındsøn t'adsoımbııty yıde'en:

—Øı'ajtp pøııı mıajtpy griegit ayuıjk.

³⁸ ıKıdı ja eıptıtıjaa'yıp mets, pøn ja tsep namnııı jawaanı tkayık-tso'ondakp, pøn ja yıkjaa'y'oo'kpi jam oıts tmøøtsøøııı nıııaktaxk mıl jam tø'øts'etjotp?

³⁹ Xjats ja Pablo t'adsøøıy jøts tnıııaay:

—Israelıt jaa'y øts. Jam ø ngue'jxy Tarso mıdı jam møj kajp'ajtp Cılıcııt etjotp; tun ja may'ajıt jøts øts yø jaa'y nmıgajpxtı.

⁴⁰ Xjats ja wındsøn tyıkutujky jøts jaa'y tmıgajpxtı, winets ja Pablo jap eskalerıkıjxyıy wıya'k'øıyııı'n, jøts ja'ayı xajı'ıky jøts ja jaa'y y'amø'ondıt. Xjats ku ja jaa'y y'amongøxtøø, winets ja hebreıt ayuıjk ja tkajpxøjkıyıı'n:

22

¹ —Meets mıgu'uktøjktı jøts møjjaa'dyøjktı, ukmadoojıdık øts n'ayuıjk mıdı ngajpxwampy.

² Xjats ku ja jaa'y tmadowdı jøts ku ja Pablo tkajpxy ja hebreıt ayuıjk, winets nıdıki'ııyı y'amondøø, jøts ja Pablo tnıııaay:

³ —Israelıt jaa'y øts, jam ø ngue'jxy Cılıcııt etjotp ma kajp txøøwı Tarso, jøts øts ya tø nyeeıy Jerusalén, jøts øts ja' xyık'ıxpıjky mıdı txøøw'ajtp Gamalııl,

wa'ats øts ja xuknijawi adøm ndsinaa'yin pøni sa ja møjaa'chinaa'yin. Ojts øts idø'øn ja Dios yja' ka'pxy nbaduñ amumjoojt jade'en sa meets ixyam xuñin.

4 Øts y'ijty nmøjmidsep'ajtpy pøn jaty ja Jesús yja' tpaduujnidip, nyik'ooktibaat øts ja y'ijty, jøts nyiknijkxy ja yaa'y ja tø'øxy jap puxøjkøtpy.

5 Wa'ats ja teetywindsøn tñijawidi møøt ja møjaa'dyøjk, kumi kø'øm øts ja xmo'odi ja kutujk jøts øts ja jam nmijnjky Damasco ma wyinaty adøm nmi'israelit jaa'dyi. Jøts øts ja jam n'ixa'ay pøn jaty wyinaty tpaduujnidip ja Jesús yja', jøts øts ya nyikmeenwa'añ aguwanikøjxp jøts nyik'ayo'ombaatawa'añ.

Ku ja Pablo tñimadyaajky ja chinaa'yin ku ja tyiktigajch

6 'Xjats ku øts ojts nmijnjky ja'abi winmaa'ñ, jam wyinaty wingon nja'atwani Damasco kujkxøøw et, winets øts ojts jøtmøñ ja jaj xnawidity midi janch møk tsamamp, jøts n'ijxy ku kyidaajk tsajppøtpy.

7 Winets øts jamyi nnaaxkidaajky, jøts øts nmadøøy ja ayuujk ku øts yide'en xnimaay: "Saulo, Saulo, ¿tiku ø xjemdunwa'añ xedunwa'añ?"

8 Xjats øts nyiktiy jøts xnimaay: "¿Windsøn, pøn mets?" Jøts ø x'adsøøy: "Øts Jesús Nazaretit jaa'y, ja' pøn mjemdumpy mdedumpy."

9 Xjats øts njamyøøt yjancho'jikidøø ku ja jaj t'ejxpaattøø, ja' ka'ap ja tmadoodøø ku øts nyikmigajpxy.

10 Xjats ku øts idø'øn jade'en nyikmigajpxy, winets ø xnimaay: "¿Ti windsøn ndu'ump, sudso'ampy ndaabyaatt?" Winets nwindsøn'ajtim xnimaay: "Pidø'øk jøts mnøjkxt jam Damasco, jamts tuki'iyi myiktukmado'tot pøni ti jaty mdu'ump."

11 Kumi tø øts wyinaty ja jaj xyikwinjøøxy xyikwinapy, winets ja nmigu'uk jam x'ukwejtñidøø, jøts øts xyikja'ttøø jam Damasco.

12 'Jam wyinaty tu'uk ja jaa'y pøn txøøw'ajtp Ananías, ja' idø'øn tiy tjanch-padump ka'pxy ja Moisés kyutujk. Xjats niduki'iyi ja israelit jaa'y pøn jaty jam tsinaadyip Damasco, yjanchojktip idø'øn ja' ja Ananías.

13 Xjats øts ja Ananías ojts x'ixy, jøts øts xnimaay: "Migu'uk Saulo, tawin'ejx yikxon yø mween jadigojk." Jøts øts jaty'i ojts nwin'ejxpiky, xjats nmigu'uk n'ejxpaajty.

14 Jøts ø xnimaay ja Ananías: "Ja Dios Teety pøn adøm n'apteety'amøj pyadundip jekyip, ja' kø'øm tø mdsøkyi jøts me mduknijawiyit ja y'øwyyinmaa'ñ, jøts ñanky'ijxyiyi ja nwindsøn'ajtim Jesús pøn tum tsuj ja winmaa'ñ tmøøt'ajtp, ja'ats kø'øm ja y'ayuujk mdukmadooliyip.

15 Ja'agøjxp ja Dios jade'en ttuñ, jøts mets nøjxk xkajpxwa'kxy ja kyajpxy y'ayuujk, jøts xuknijawit tuki'iyi ja naaxwi'ñit jaa'y sa tø x'ixy jøts sa tø xmadøy.

16 Jøts ixyam, ¿tiku nugo mgo'kni? Pidø'øk jøts mnøbatt, janchjawi amumjoojt ja nwindsøn'ajtim Dios yja' jøts myikpøkwy'a'adsiyit."

Ku ja Pablo tñimadyaajky sudso'ampy ojts yikexy jam ma jaa'y ka' y'israelitjaa'yidi

17-18 'Ku øts idø'øn jade'en njajty, winets øts jadigojk nwimbijty ya Jerusalén, jøts øts jap nmijnjky tsapøjkøtpy Dios'ajot'ajtpi. Japts øts ja nwindsøn'ajtim xmigajpxy, jade'en øts ja n'ixy kidim ja jaa'y kyuma'ay, jøts ø xnimaay: "Putyi ya tsoon Jerusalén, ka'ap inet ja tmøjpikta'aktit sa øts inet n'ayuujk xjakajpxiyit."

19 Xjats ø nnimaay: “Mets teety, ñija'widip ja' ku øts jam y'ijty nnijkxy ma jaty ja tsaptøjk, jøts øts jam nmach pøn jaty tpadundip mets mja', jøts øts ja ndagubety, yikxon njanchwiwøpy jøts nyiknijkxy puxøjkjøtpy.

20 Nija'widip ja nayide'en ku øts jam wyinaty ku ja Esteban jam y'ø'jky midi mets m'ayuujk ojts tkajpxwa'kxy, jam øts wyinaty nayide'en ndani, jøts øts nwaan nayide'en jøts tyik'ooktit. N'ejx'ejtidoø øts ja yik'oo'kpi ja wyet.”

21 Xjats øts ja nwindson'ajtim xnimaay: “Putyi, jagam me ngajxwa'añ kajpxwa'kxpi ma jaty pøn ka' y'israelitjaa'yidi.”

Ku ja Pablo ja soldadi windsøn yikpuxøjktøjkijøø

22 Xjats ku ja Pablo jade'en yjakajpxy, winets ja mayjaa'y møk'ampy yjanchkajpxjø'ktøø, xjats wyandøø:

—iWan tpa'øøky yø'øbi jaa'y! iKa'ap y'ukpaat'ajtiñi jøts yjaaktsøønit!

23 Xjats ja mayjaa'y tjanchtayax'adø'øtsti jøts ja wyet tjanchajpwøjti, jøts ja pu'ux nayide'en tjanchwijø'økti,

24 paty ja windsøn nayide'en tyikutujky jøts ja Pablo jap yikpøkjø'økt jap windsøn kyutujktaajkjøtpy. Xjats ja windsøn tyikutujky jadigojk jøts yikwopt, jøts kuwani ttukni'gajpxwa'añ tigøjxp ku ja mayjaa'y jade'en myidsep'atyiyi.

25 Xjats ku ja Pablo tø wyinaty yikøtsumni yikpaktsumni jøts yikwopwa'añ, winets ja Pablo tnimaay ja soldadi pøn jap wyinaty:

—¿Mbaat'ajttip meets jøts meets ja romanit jaa'y xwopt midi ka'anim yiktiidyuñ?

26 Ku jade'en tmadøøy pøn ja soldadi t'ana'amp, winets ja jaty tni'ijky ja wyindsøn, jøts tnimaay:

—Ejxim ku jade'en m'adø'øtst, ¿kidi xnijawi ku yø' romanitjaa'y'i?

27 Winets ja windsøn twingunøjkxyii'ñ ja Pablo jøts tyiktiiy:

—¿Mjanchromanit jaa'y mets?

Xjats ja Pablo t'adsojimbijty jøts tnimaay:

—Paty ja' øts.

28 Xjats ja windsøn tnimaay ja Pablo:

—Janch kajaa øts nmeen tø nyiktuñ ku øts ya nromanitjaa'y'atwa'añ.

Xjats ja Pablo tnimaay:

—Ka'ap øts ya ti jade'en tø ngujuy, ja' ku øts ya tø ndyimgye'exy.

29 Xjats ku dø'on jade'en yjajty, winets ja soldadi jadi'iñi yjiyø'øgyøxnidoø pøn ja Pablo t'ukwopwandip. Xjats ja windsøn ojts nayide'en chø'øgi kudam ja' ryomanitjaa'y'i pøn wyinaty tø tkøwøøndi tpa'kwøøndi.

Ku ja Pablo yiktanay'øyiyøø ja israelit jaa'y myøjkutujk adsinaabyi wyingujky

30 Xjats ja windsøn kuwani tni'jawi'wya'añ tigøjxp ku ja Pablo ja israelit jaa'y ñi'øøniyi. Xjats kyimjabom tñankwyinajkiyøø ja puxkadeen, jøts tñankwyaamujkiyøø ja teetywindsøn jøts nayide'en ja israelit jaa'y kyutujk adsinaabyidi, winets ja Pablo jap yikwaanijkxy jøts tyikajpxwa'añ jap windsøn y'agu'iptyi.

23

1 Xjats ja Pablo twinguwa'jkiyii'ñ pøn jaty jap wyinaty møj windsøn'ajttip, jøts tnimaay:

—Migu'uktøjkti, wa'ats Dios t'ixy ku øts ka'ap ja Dios nmidundigøy, ejtp øts jotkujk nnayjawi.

² Winets ja møjteetywindsøn tyikutujky midī txøw'ajtp Ananías, jøts tnīmaay pøn ja Pablo jap wyinaty wingon møøt tyani, jøts ja Pablo yik'akoxjø'økt.

³ Xjats ja Pablo t'adsøøy ja møjteetywindsøn:

—iTi windsøn mets idø'øn jade'en, nayide'en ja Dios mduniyit! Pøni mgutujk'adsinaapy tam mets, çsudsots øts jade'en xnankyoxwā'āñiyi pøni jap tam ja kutujk xmoødi?

⁴ Xjats ja y'adsoodøø pøn jaty ja Pablo jap wyinaty møøt wingon y'ity, jøts ja Pablo yiknīmaay:

—çJade'endam idø'øn xmigajpxigøy ja møjteetywindsøn?

⁵ Xjats ja Pablo y'adsøøy:

—Migu'ukti, ka' øts yø nnijawi kudam yø myøjteetywindsøni; janch jade'en ja Dios kyajpxy wya'āñ ku wya'āñ: “Kidi xmigajpxigøy pøn jam yikutujktip mgajpkøjxp.”

⁶ Winets ja Pablo jam t'ejxkajpy ku majtsk piky ja windsøndøjk jamdi. Jam wyinaty pøn ja' tpadundip ja saduceit ixpøjkin, jøts nay jam ja'amidi pøn tpadundip ja fariseit ixpøjkin, paty ja Pablo møk ojts kyajpxwa'kxy, jøts wyaāñ:

—Meets migu'uktøjkti, fariseit jaa'y øts jøts fariseit jaa'y øts ndeety. Ja' meets ixyam xatīdyump ku øts n'awijxy'aty jøts ku ja oo'kpi jadigojk yjujkyiky jap oo'kpi jutjøtpy.

⁷ Xjats ku ja Pablo jade'en wyaāñ, winets ja' pøn ja fariseit ixpøjkin tjagyaptip jøts nayide'en pøn ja saduceit ixpøjkin tmøøt'ajttip, ja'ats ojts møk ñadyamigajpxyidi kunim majtsk piky ja wyinmaa'ñ yjajttøø.

⁸ Ja saduceit jaa'y wamp jøts ku ka'ap ja oo'kpi yjujkyiky jadigojk jap oo'kpi jutjøtpy, jøts ku nayide'en ka'ap ja ankilis mā, jøts ni anmija'win jøts ni miku' niti kya'ity. Jade'en idø'øn ja saduceit y'ixpøjkin; xjats ja fariseit y'ixpøjkin tuki'iyi ja tjanchjawidi.

⁹ Xjats niduki'iyi kyajpxjø'ktøø; winets winaagin ja kajpxwejpi wya'kukiyi'ñ pøn tnija'widip ja Moisés kyutujk, jøts pøn ttsojktip ja fariseit y'ixpøjkin, ja'ats ojts wya'andi:

—Yā'at jaa'y ka' ti tundigø'yin tjagyepy, jotmøñ ku yø tø myigajpxyi tu'uk ja ankilis uk øy ti, ka' y'øyi ku ja Dios yja' nugo ndatøjka'andit.

¹⁰ Xjats kumi janch møk idø'øn ja jeky ñagyajpxidøø, winets ja soldadi windsøn tjøpjawi ku ja Pablo jotmøñ ja mayjaa'y'y'uknujkwā'kxniyit. Winets ja soldadi ja twaadsøøy, jøts ja Pablo jam yikwejtspidsiimy mayjaa'y agujkp, jøts jap jadigojk tyiknijky soldadi kyutujktaajk agui'py.

¹¹ Xjats ku kyoots'ajty, winets ja Pablo t'ixy kuma'ayjotpy ja nwindson'ajtim Jesús, jøts ñi'i'mxyiyi:

—Pablo, jotmøk nabyikta'agi, nayide'en jam nøjx mgajpxwa'kxy mā ja møj kutujktaajk jam Roma, nayide'en sam øts n'ayuujk tø xkajpxwā'kxiyi ya Jerusalén.

Ku ja Pablo yiktanibiktaajkøø jøts ja y'amaa'tsk'ookt

¹² Xjats ku jade'en ja Pablo kyumaay, winets ja israelit jaa'y winaagin tkajpxy'ajttøø ja Pablo jøts tyik'ooktit, møk'ampy idø'øn tyimñawajnidøø, ka'ap ja tkugayidit tku'uugidit kunim ja Pablo tyimyk'ejxnaxt, kunim ja tyimyk'ooktit.

¹³ Wixijky ñaxy idø'øn ja jaa'dyi pøn idø'øn ja Pablo jade'en tkajpxy'ajttøø.

¹⁴ Winets ja ñiwixijkxpyi jaa'y jap ñøjxktøø mā ja teetywindsøn jap wyin'aty møøt ja møjaa'dyøjkti, jøts tnīmaadyøø:

—Tø øøts idø'øn ndyimñagyajpxyi, ka'ap øøts ngugaayiwya'añ ngu'uugiwya'añ, kunim øøts ja Pablo ndyimyejxtnim øøky.

¹⁵ Meets niduki'iyi pøn jaty ya kutujk adsinaadyip, amidowdi ja soldadi windsøn jøts jabom ya ja Pablo tyikme'ent mee mwindujy, jade'en xwindaayidit ja windsøn jøts ku ka'pxy yikpayø'owya'añ ja pøky, jamts øøts wyinaty tuu'am n'aweix'ity, jøts jam yø y'ookt.

¹⁶ Xjats ja Pablo pyøøpy tñija'wiyi'ñ ja ayuujk ku ja yjamy ja jaa'y yik'ookwa'añi, winets ja yjamy ja ojts ttukmadøy ma ja soldadi kyutujktaajk jap.

¹⁷ Xjats ja Pablo twaadsøoy tu'uk ja soldadi, jøts tñimaay:

—Møøt nøjkx ya'at mixy jap windsøn wyindujpy, jap ayuujk yø tu'uk tkajpxwa'añ.

¹⁸ Winets ja soldadi tmøødiy'i'ñ ja mixy jøts ttukmadøoy ja wyindsøn, jøts tñimaay:

—Tø øts ja Pablo xyaajxi mido jap tsumy, jøts øts tønøjmi jøts øts ya'at mixy nyikme'ent, jap ayuujk tu'uk tkajpxwa'añ.

¹⁹ Winets ja mixy kyøjø'øm ja windsøn y'ukwejtsøø, yiknijkxyi abiky jøts yiktøjji:

—¿Ti øts idø'øn xamigajpxwamp?

²⁰ Xjats ja mixy t'adsøoy:

—Jade'en ja israelit jaa'y ayuujk tø tpikta'akti jøts tø tkajpxy'atti, jøts mets myik'amido'ot ja Pablo jøts jabom xyiknøjkxt jap yikutujkpidi y'agui'py, ja'agøjpx tijy ku ka'pxy tpayø'owya'andi ja pyøky.

²¹ Taayidip ja', kidi xmibiky, jap ja jaa'y yu'uch y'aweixwa'andi niwixijkxy ñay jap tuu'agui'py. Tø dø'øn ja møk tyimñawya'añidi jøts ka' tku-gaayiwya'andi tku'uugiwya'andi kunim ja Pablo tyimiyik'ooktit; jam inet idø'øn ja y'aweixti, ja'ayi mets ja nugo x'uk'adsojimbett.

²² Winets ja mixy ja windsøn y'ana'amiyøø jøts ku ka'ap pøn ttukmado'ot, xjats jade'eñi møøt ñawya'kxøø.

Ku ja Pablo yiktanikejxy ja møj windsøn Félix

²³ Xjats ja møj soldadi windsøn tyaajxiyi'ñ nimajtsk ja syoldadi jøts t'ane'emy, jøts ja syoldadi nimajtsk magø'pxy ñayjøp'ejxidit pøn tekyjø'øm yø'ødyip, jøts ja nidugui'pxy myajk ja kawaagyøjxpidi, jøts nayide'en nimajtsk magø'pxy ja takuu'møøtpidi. Ja'ats jam nøjkxtip Cesarea jøts choondit koots taxujk yaxp.

²⁴ Xjats ja windsøn nayide'en t'ane'emy jøts ja Pablo kyawaay nayide'en yikmo'ot, jøts nayide'en t'ane'emy jøts ja Pablo yik'ejx'ett, jøts møk møjjaaw yikøyakt ma ja møj yikutujkpi Félix jam.

²⁵ Xjats ja windsøn ja nøky tyik'øyyi'ñ jøts ja soldadi ja yiktamigajxiyi'ñ, yide'en ja nøky wya'añ:

²⁶ “Øts nxøøw Claudio Lisias mido møj soldadi windsøn, øts mets ja kajpxpoo'kxin ndaniguejpxy mets møj yikutujkpi Félix. Tu'uk øts ja ayuujk nguexy.

²⁷ Jade'en ja israelit jaa'y tø y'adø'øtsti, tu'uk ya'at jaa'y ttsumdøø mido mets ixyam ndagødøjkp. Yø' wyinaty yik'ookwandip, xjats ku øts ojts nnijawi kudam yø' ryomanitjaa'yi, winets ø nninijkxy møøt ja soldadi, ja'agøjpx ja jaa'y kyayik'o'jkøø.

²⁸ Xjats kumi nnijawiwyampy øts tiku yikni'øøni, jøts nyiknijkxy jam ma ja israelit jaa'y myøjkutujk'adsinaabyidi,

²⁹ ja'agøjxp yjawí ojts yikni'òòni ku ja ojts tkamimadøy ja israelit jaa'y kyø'omgutujkti, ka'ats pyaat'atyí jøts ku tyik'ookit, jøts ni kyapaat'atyí jøts puxøjkjotp y'ett.

³⁰ Tø nyiktuknijawí ku ja israelit jaa'y ñiwinmayíyí jøts yik'oogiyít, paty øts ixya nnajtskajxi, paty øts nayide'en tø ndukmadøy pøn tni'òò'nidíp yø Pablo, wan jam tyikwingukidi jam mets mwindump. Yø'øyi kajpxy me ndanigüejspxy. Dioskujuyíp."

³¹ Ku dø'øn jade'en ja soldadi ja kutujk yikmøødyøø, winets koots tmøøtso'ondøø ja Pablo jøts jam tmøøtja'ttøø ma kajp txøøwi Antipatris.

³² Winets ja soldadi jam kyimjabom wyimbejtñidøø midí tekyjø'øm yø'ødyíp, jøts ja kawaachinaabyídi tjaakmøøtnøjktøø ja Pablo

³³ jam Cesarea, jøts jam tkøyaktøø ja nøky ma ja møj yikutujkpi jam jøts nayide'en ja Pablo yikøyajky.

³⁴ Xjats ja møj yikutujkpi tpa'ijxy ja nøky, winets tyiknidøøjøø pønít jaa'y ja Pablo, xjats t'adsoodøø ku ja Cyiliciitjaa'yí,

³⁵ xjats ja Pablo yikniimaay:

—Jaaním øts nmado'tot ja mgajpxy ja m'ayuujk kuním ja mye'endít pøn mni'òò'niyíp.

Winets tyikutujky jøts ja Pablo yikpøkjø'økt ma Herodes ja møj kyutu-
jktajk jam, jøts jam tñanky'eix'ityiyí.

24

Ku ja Pablo yjanagyugajpxiyøø møj windsøn Félix wyingujkp

¹ Xjats kyimagoxkxøøw'ajty, winets ja møj teetywindsøn Ananías yja'ttøø jam Cesarea møøt ja møjaa'dyøjk, jøts tu'uk ja kajpx'øyibi pøn txøøw'ajtp Tértulo. Jade'en ja møj yikutujkpi jam twinguwa'lkidøø, jøts ja Pablo tni'òòniwya'andi.

² Xjats ja Pablo jap nayide'en tyikmendøø, winets ja Tértulo ttami'íñ ja møj yikutujkpi Félix sa Pablo kya'øy'adi'ich, jøts wyaan:

—Mets møj yikutujkpi, dioskujuyíp. Tsuj jotkujk xjagyepy ja mgajp, ka' ma tí tsep tyuñi mets mwij'ajtingøjxp.

³ Ejtp øøts jotkujk xmø'øy jøts øøts jotkujk nnaxy ndøki ømyadsowi, janchkunuu'kxy øø njawí mets møj yikutujkpi.

⁴ Mets m'ukmaa'kxp, jøts ka'ap øts mdiempi nugo nyikwindigø'øty. Jøts njanchminuu'kxakpy jøts ja tsojkin xjagyapt, jøts øøts n'ayuujk waani xmadoojit.

⁵ Tø øøts wa'ats nnijawí ku ya'atpi jaa'y tu'uk nugo y'ayo'onduñ, jøts tñankñawya'kxyí ja israelit jaa'y wyinmaa'ñ ma jaty yø wyidity, jøts yø' tñigubajk'ajtp pøn tpadundíp tu'uk ja nazaretit jaa'y y'ixpøjkin.

⁶ Nayide'en ya'at jaa'y tkuwaawi ja griegit jaa'y jøts øøts ndsaptøj jade'en nugo xyikma'jtíyí; paty øøts idø'øn yø tø nmach jøts øø njatiidyunwa'añ sa øøts ngutujk wya'an;

⁷ ja soldadi windsøn Lisias øøts jade'en nugo xump jøts ttatøki øøts nwinmaa'ñ, jøts aguwaniøkøjxp yikpiky yø Pablo,

⁸ jøts øøts xnøjmi pøni pøn nañi'òò'niyíp wan ya tmendi me mwindujy, jøts me xpayø'øty jøts xnijawít tuki'yí sa øøts ja øø'nin nbikta'áky.

⁹ Xjats ja Tértulo jade'en kyajpxkijxy, xjats ja myigu'uk israelit jaa'dyí pøn jaty jap wyinaty nayide'en tø wya'andi jøts ku ja janch wya'añ ja Tértulo, ka'ap ja tyaayi.

10 Winets ja gobernador Félix ja Pablo tyikajpxy, xjats ja Pablo yide'en wyaañ:

—Mets møj yikutujkpi, nay ø ndsøjky øts jøts nwindanit ja nbøky mets mwindujy, kumi nnija'wip øts ku mets ya jeky yjumøjtyip tø myikutujkt-soo'ni.

11 Mets kø'øm m'ukyiktidyøkip øts n'ayuujk pøni ka' xjanchjawī, ku øts jam wyinaty myakmajtsk xøøwipnim tø nja'aty jam Jerusalén Dios'ajot'ajtpi.

12 Ka'ap øts jam wyinaty pøn møøt nnachepkajpxyi, nisa øts ja jaa'y ngayik'adi'ich jam møj tsaptøjkjotp, ni jam mā jaty ja chaptøjk ja'adi, ni jam møj kajpjojp.

13 Ya'atpi jaa'dyi niti tkananky'ejxidit midī øts yø xani'øø'nidip.

14 Yø'øyi øts wā'ats nnigajpxy jøts ku nbaduñ ja Dios midī øøts ejtp nbadumpy. Ka'ats øts yø nmigu'uk israelit jaa'dyi t'øyjawīdī sã nbaduñ.

15 Njanchja'wip øts ja Dios nayide'en sam yø tjanchjawīdī ku øø njøp'ixy ku ja Dios ja oo'kpi jadigojk tyikujkpyiky, øy ja oo'kpi y'øyi kya'øyi pøni sã ja y'atsøøndī.

16 Ja' ndsøjky jøts øts ja Dios ejtp nmi'øy'ajtnit jøts nayide'en ja naxwii'ñit jaa'dyi.

17 Tø øts mawyeen n'atswidity kawinaak jumøjt, jøts øts jadigojk tø nwimbity Jerusalén, jøts øts nmigu'uk nmay'atwā'añ n'ayo'ejxwā'añ, jøts ja Dios nayide'en nwindso'øgiwya'añ.

18 Ja'ats øts jap wyinaty ndumpy tsaptøjkjotpy sudso ø nbaatt nwa'ats'ajtin, ku øts ja israelit jaa'y jap xpaajtøø midī tsoo'ndip Asia, ka'ap øts ja mayjaa'y wyinaty nmøødi, ka'ap pøn tī ttuñ.

19 Ja'abi dø'øn ya mibaat me'endip pøn øts jap ojts xpaatti jøts øts ya xni'øønidit, pøni ñija'widip ja' ku øts jap ndundigø y tsaptøjkjotpy.

20 Uk ku ka' mye'endit sã øts idø'øn nwa'añ, wan ya'at tnigajpxti pøn jaty ixyaadi, pøni ojts øts ja nbøky nyiktapaaty ku øts ojts nyiktiidyuñ jap kutujk adsinaabyi wyindujpy.

21 Uk jotmøñts øts jade'en xukpøky'atti ku øts ojts møk nmigajpxjø'økti, jøts øts yide'en nnimaay: “Meets ixyam xiidyump ja'agøjxp ku øts njøp'ixy jøts ku ja oo'kpi jadigojk yjukpyiky jap oo'kpi jutjøtpy.” Jade'en øts nnimaay.

22 Xjats ku ja møj yikutujkpi Félix ja Pablo y'ayuujk tmadooji, winets jaayi tkajpxuky ja payø'øyin ja'agøjxp ku nayide'en tñijawī sã ja Jesús yjanchja'wibi yjaa'y'atti, paty jade'en tnimaay:

—Wan t'uk'awijxñim jade'en kunim ja mye'ent ja møj soldadi windsøn Lisias, ja'ats øts xjaaktukmado'opnim ka'pxy yø'øbi winmaa'ñ.

23 Winets ja møj yikutujkpi t'ane'emy ja soldadi jøts ja Pablo chumy'ettnim, jøts tnøjmi nayide'en jøts ja Pablo ja myigu'uk kuwani y'atsmigajpxit, pøni pøn jaty mendip kidi ja tkayiknajxnidi.

24 Xjats ja Pablo jap tyaañ winaak xøøwin, winets ja møj yikutujkpi tmøøtja'aty jadigojk ja ñidø'øxy Drusila, pøn nayide'en israelit jaa'y, winets ja Pablo yikyaxtsøø y jøts tnigajpxt sudso'ampy ja Jesús yja' yikjanchjawī.

25 Xjats ja Pablo yikxon jade'en tnigajpxy sudso n'øyjaa'y'ajtindit sam ja Dios ttsøkyin, jøts kø'øm nayide'en nnay'ejx'ejti'indit, jøts ku Dios ja naxwii'ñit jaa'y nøjx ttīdyuñ. Winets ja møj yikutujkpi ojts ja' tkudsø'øgi jøts ja Pablo yiknimaaay:

—Nøjxni ixyam, kunim ø n'awatsit jøts jadigojk nwaadso'ot.

26 Xjats ja møj yikutujkpi may ojk ja Pablo twaadsøø, jade'en ja yjawinmay jøts ja myeenmyo'ojit ayu'uch, winetnimts ja tmajtstu'utt.

²⁷ Majtsk jumøjt idø'øñ jade'en ñajxy, nugo tjaximiwaadsow'ity ja Pablo. Winets ja møj yikutujkpi tyigajtsnaa, jøts jadu'uk tyøjkiiy'i'ñ pøn txøow'ajtp Porcio Festo. Jøts kumi ka'ap ja møj yikutujkpi Félix tmidsep'atwa'añ ja israelit jaa'y, ja'agøjxp idø'øñ ja Pablo jap tyaañ tsumy.

25

Ku ja Pablo twingunøjkxøø ja møj yikutujkpi Festo

¹ Xjats ja Festo tyøjkiiy'i'ñ møj yikutujkpi jam Cesarea, jøts kyidigøøk xøow chøø'ñ jøts jam pyatøjkiiy'i'ñ Jerusalén.

² Jamts ja teetywindsøndi møøt ja israelit møjaa'dyøjkti twinguwa'jkidøø ja møj yikutujkpi Festo jøts ja Pablo yikni'øøni.

³ Xjats ja møj yikutujkpi yik'amidøø ja may'ajt, jøts ja Pablo tñigaxit jøts jam tyikme'ent Jerusalén. Jade'en ja israelit jaa'y wyinaty tø tjanwinmayidi jøts ja Pablo y'oøkt tuu'ajy.

⁴ Xjats ja møj yikutujkpi Festo t'adsojimbijty jøts ku ja kø'øm tsojk wyimbetwa'añ jadigojk jam Cesarea, kumi ixjam ja Pablo tsumy y'ity.

⁵ Winets tñøjmi ja israelit jaa'y møøt ja teetywindsøndi:

— Wa'n tjaa'myindi ne'egi niduknax pøn jaty ku'aa'w'attip, jamts xni'øønidit pøn tødam ja'abi jaa'y tyundigøø.

⁶ Xjats ja Festo waani tyaa'niiy'i'ñ Jerusalén tuktujk xøowin uk majk xøowin, winets wyimbijty jadigojk. Xjats kyimjabom ttawa'jtsiyi'i'ñ ja kyutujktaajk, winets tñankñajtswa'a'wiyøø ja Pablo.

⁷ Xjats ku ja Pablo twinguwa'jkiiy'i'ñ ja møj yikutujkpi, winets ja israelit jaa'y nayide'en twinguwa'jkidøø pøn jam wyinaty tø choondi Jerusalén. Xjats ja Pablo mayjøøjp møk yjanchyiktani'øøni ja tyundigøøyin, niti tiy'ajtin tkananky'ijxyidi.

⁸ Xjats ja Pablo kø'øm ñaguyajpxyiyi jøts tñimaay ja møj yikutujkpi:

— Nipøn niti ngamidundigøø, ni ja israelit jaa'y kyutujk jøts ni ja chaptøjk, jøts ni ja romanit jaa'y myøjyikutujkpi ngamidundigøø.

⁹ Xjats ja Festo, kumi tyunwajnip ja may'ajt ja israelit jaa'y jøts y'øyjawiyidit, xjats ja Pablo tyiktiy jøts yiknimaay:

— ¿Mnøjkxwamp jam Jerusalén? Jamnim øts nbayø'øty ja mbøky.

¹⁰ Winets ja Pablo t'adsojimbijty jøts tñimaay:

— Paat'ajtp øts yaayi nyiktiidyu'unt, kumi ja møj windsøn César ya kø'øm tø tpikta'aky yø kutujktaajk. Wa'atsxi me xnijaw i ku øts ka' yø israelit jaa'y ti ndamidundigøø pøn jap wamp jøts øts ja nbøky ngu'oogit,

¹¹ ka'ap ø nwa'añ jøts øts ngapupøkt ja o'jkin; jøts pøni ka'adam yjanchi midi øts yø' xani'øø'nidip, nipøn kyapaat'atyiyi jøts øts xkøyaktit ma israelit jaa'y. Wamp øts jøts ja møj windsøn César øts kø'øm xiiidyu'unt.

¹² Xjats ku ja Pablo jade'en kyajpxkijxy, winets ja møj yikutujkpi møøt tkajpx'øyiyi'i'ñ ja pyutanaabyi, winets yiknimaay ja Pablo:

— Tø kø'øm mwa'añ ku ja møj windsøn César mdiidyuniyit. Ja'ats idø'øñ mninøjkxp.

Ku ja Pablo twingunøjkxøø ja rey Agripa

¹³ Xjats ku ja Pablo jade'en yiknimaay kuts tu'uk majtskin ja xøow ñajxy, winets ja rey Agripa ojts ñinijkxyiyi møøt ja Berenice, ja'ats t'atskajpxpoo'kxtip ja Festo.

¹⁴ Winets jam ojts kawinaak xøow tyaa'nidi, xjats ja Festo ttamimadyaajky ja rey sa ja Pablo pyøky jap, jøts tñimaay:

—Ja ya tu'uk ja jaa'y midi ja møj yikutujkpi pasadi puxøjkjøtpty yiktaań.

¹⁵ Ja'ats møk pyayø'odyip ja teetywindsøndi møøt ja israelit møjaa'dyøjkti. Xjats ku øts ojts n'øch Jerusalén, winets øts jam ojts xwinguwa'agidi, jøts øts møk'ampy xnimaadyi jøts øts nnankyik'oogit yø Pablo.

¹⁶ Xjats øts nnøjmi jøts ku ka'ap jade'en ja romanit kyutujk wya'ań, ka'ap pøn ayu'uch nugo ñanky'oogidit, kuwani ja payø'øyin tyunit jøts kø'øm ñawyindaniyidit pøni ti pønjabøn ñi'ii'mpy.

¹⁷ Ku ya yja'ttøø ja israelit jaa'y, ka'ap øts tiempi nugo nyikwindigøøy, jatyi kyimjabom ja ngutujktaajk ndawa'jtsiyii'ń jøts ja Pablo nnankyikmejni.

¹⁸ Ku ja myendøø pøn jaty øø'ndip, ni tu'uk ja tka'uktapaatnidi ja pyøky midii'ibi øts idø'øn n'ukjøp'ijxpy.

¹⁹ Ja'ayi nugo yiktani'øø'nip ja chinaa'yin, jøts nayide'en pøn txøøw'ajtp Jesús, pøn ojts y'øøky jøts ja Pablo wya'ań ku ja yjuyky'aty.

²⁰ Jøts øts ka' nmidaabyaaty sudso'ampy øts kø'øm nyikjøpkøxt yø'øbi winmaa'ń, paty øts yø Pablo n'amidøøy pøni nøjkxwamp Jerusalén jøts jam yiktiidyunt.

²¹ Kumi yø' kø'øm waań jøts jam yiktiidyunt ma ja møj windsøn César Augusto, paty øts jap nyiktsummy'ity kunim øts jam ngaxt møj windsøn windump.

²² Xjats ja rey tnamaay ja Festo jøts ku ja nayide'en tpatmadoowa'ań ja Pablo kyajpxy. Xjats ja møj yikutujkpi t'adsojimbijty, jøts tnamaay:

—Jabom ja x'ukmado'ot.

²³ Xjats kyimjabom'ajty, winets ja rey Agripa yja'ttøø møøt ja ñidø'øxy Berenice, xjats ojts yjanchyikmøjpikta'akti jøts jap tyøjkidøø møj tøjkjøtpty møøt ja soldadi windsøndi, jøts nayide'en ja møjaa'dyøjkti pøn jaty jam kugajp'ajttip. Winets ja Festo twaaðsøøy ja Pablo,

²⁴ jøts ttukmadøøy niduki'iyi ja windsøndøjkti, jøts tnamaay:

—Mets rey Agripa, jøts tuki'iyi pøn jaty ya tø myendi, ixya dø'øn ja jaa'y midi ixyam mbatmadoowajnidip y'ayuujk. Tø øts idø'øn ja israelit jaa'y namay øy xmi'øøndi ya'at køjxp jade'en ya jøts nayide'en jam Jerusalén, ejtp ø xnøjmidi jøts mibaat ku yø tyimy'ookt.

²⁵ Ka'ats yjawi ti møj tundigøø'yin tjagyepy jøts ja' tku'oogit; kø'øm yø t'amidøøy jøts jam nøjkx yiktiidyun ma ja møj windsøn Augusto jam, paty øts nayide'en jam ndyimgyajxwa'ań.

²⁶ Meets migu'ukti, ka'ap øts nmidaabyaaty ti pøky øts ndapaatp ya'atpi jaa'y, sudso'ampy øts nøky nyik'øyt jøts tñijawit ja nmøjwindsøn, jøts paty øts ixyam nyikmiń mee mwinduujy, jøts me rey Agripa x'ukpatmado'ot jøts øts xuknijawit midii'ibi ayuujk øts idø'øn ngaxp.

²⁷ Janchnigyumaap ø njaty ku øts ja pøkyjaa'y nugo njanch'ukaxt, jøts ni ngatukmado'ot øts nmøjwindsøn pøni ti pøky yiktani'øø'nip.

26

Ku ja Pablo tñigajpxy ja chinaa'yin jam rey Agripa wyindump

¹ Winets ja rey Agripa tnamaay ja Pablo:

—Mbaat'ajtip jøts me kø'øm mgajpxt.

Xjats ja Pablo ja kyø' tyikpidi'jky, jøts yide'en kyajpxøkjii'ń:

² —Njanchtaxondakpy øts ku øts xyikajpxwa'ań ya mets mwinduujy, jøts øts kø'øm nwindanit tuki'iyi pøni sa jaty øts ja israelit jaa'y xka'ødyejti.

³ Øy'ajtp nayide'en kumi mets mnija'wip tuki'iyi øøts ndsinaa'yin sa øø n'israelitjaa'y'aty, jøts ti jaty øøts ejtp nnadyamigajpxiyip. Paty mets n'amidøy jøts waani x'ukmado'ot øts ngajpxy.

Sa ja Pablo chinaaqy myjawayeen ku ka'anīm tyiktigach ja chinaq'yin

⁴ Nija'widip nmigu'uk israelit jaa'y niduki'iyi sa øts njaa'y'ajty jam ndigam ku nmutsk'ajty, jøts nayide'en sa øts njaa'y'aty jam Jerusalén ixymbaadyim.

⁵ Pøni nigajpxwandip wan tnigajpxti, kumi nija'widip yø' nayide'en ku øts mutskyi ja fariseit ixpøjkin nbadøjkiyi'n midī ka'pxy tpadundip ja Moisés kyutujk.

⁶ Ja'agøjpx øts nyikni'øøni ku øts njøp'ixy ku ja Dios Teety ja oo'kpi jadigojk tyikjujkyiky jap oo'kpi jutjøtpy, kumi jade'en ja Dios Teety kø'øm ja wyandaajkin tmø'øy øøts n'apteety'amøj jøts jade'en ttu'unt.

⁷ Jøts niduki'iyi makmajtsk kajp ja israelit jaa'y tjøp'ejxtit jøts ku ja Dios ja wyandaajkin tyikjøpkøxt, paty ejtp t'ajot'attit ja Dios jøts tj'a'myatsti jøpy ux. Mets rey Agripa, nay yø'øbi winmaa'n øts idø'on yø nmigu'uk israelit jaa'y xkada'øyja'widip, jøts øts xani'øøni.

⁸ ¿Ka' mee nayide'en xjanchjawi jøts ku ja Dios ja oo'kpi tyikjujkyiky jadigojk?

Sa ja Pablo jawyeeen tjemduuñ tteduuñ ja Jesús yjanchja'wibidi

⁹ Øts kø'øm ojts nwinmaa'mbyaaty jøts øts ja Jesús Nazaretit yjanchja'wibidi ojts o sa nduujniyi, jøts ø møk nyik'ayo'ombaattø.

¹⁰ Jade'ents øts idø'on jam n'adiijch Jerusalén ku øts ja teetywindsøn xmo'odi ja tiy'ajtin jøts øts ja Jesús yjaa'y namay ndsujmiyt; jøts nayi waan øts idø'on jøts y'ooktit.

¹¹ Kawinaak ojk øts idø'on kø'øm ja møk nyik'ayo'ombaattø, jøts kuwani ndukmajstu'utti ja yjanchja'win. Jade'en øts idø'on n'adiijch mā jaty ja chaptøjk, janch awa'an'ampy øts idø'on nbawidijty jagamgajp paat.

Ku ja Pablo jadigojk tñimadyaqjky sa ja chinaq'yin tyiktigajch

¹² Nay yø'øbi winmaa'n øts wyinaty nminijxpy jam Damasco sa øts ja teetywindsøn wyinaty ja kutujk tø xmo'øy.

¹³ Winets ø kujkxøw et jam tuu'am ojts n'ejxpaaty tu'uk ja jaj midī tsajpjøtpy kyidaajky, janch møk idø'on ja yjajy nika'ap ja xøw jade'en yjajy, jøts øøts ja jaj ojts tuki'iyi xnowidity pøn jaty øts jam wyinaty nmøøt.

¹⁴ Winets øøts niduki'iyi nnaxkidaajky, jøts øts nmadøy tu'uk ja hebreit ayuujk ku ø xnimaay: "Saulo, Saulo, ¿tiku ø xjemdunwa'añ xedunwa'añ? Kø'øm mnay'ayo'onduniyi jade'en kidi tsakaa ku ja ti tnepy jøts ja kø'øm kujp ñadyukyø'ødyiyi."

¹⁵ Winets nnimaay: "¿Windsøn, pøn mets?" Winets øts jaty nwindson'ajtim xnimaay: "Øts Jesús Nazaretit jaa'y, nay ja' pøn mjemdumpy mdedumpy.

¹⁶ Pidø'øk wa'kuki, ja'agøjpx øts ixyam kø'øm nnanky'ijxyi jøts øts xmīdu'unt, jøts mgugajpxy'att pøni ti jaty ixyam nduk'ijxy, jøts pøni ti jaty me njaaktuk'exp.

¹⁷ Øts mets nnøø'mo'op nduu'mo'op jam israelit jaa'y etjøtp, jøts nayide'en mā ja jaa'y kya'israelitjaa'yidi mā mets ixyam ngajxwa'añ.

¹⁸ Yide'en idø'on jam nøjkx mduñ, jøts ja jaa'y xkajpxwejt jøts ja ka'øy winmaa'n tñajtsu'uttit, jøts ja tsuj winmaa'n tñabøktit. Kidi ja miku' y'ana'amīn t'ukupøjkiniyidi, ja Dios yja' tu'ugyi pyaduujnidip; jade'en xukmado'ot jøts ku øts nja' xjanchja'widit, jade'en'ampy yikpojkipimaa'kxtit, jøts

nayide'en yikmo'odit ja øy'ajtin ja tsuj'ajtin møøt ja'adi niduki'iyi pøn jaty ja Dios tø wyinaty tyikpøkwyā'ach."

Ku ja Pablo tpaduñ ja ayuujk midi tsoo'mp tsajpjøtpy

¹⁹ Mets rey Agripa, nbaduujni øts idø'on tuki'iyi sã jaty øts ja Jesús xnimaay ku øts ja y'ayuujk nmadoojoø midi jap tsoo'mp tsajpjøtpy.

²⁰ Winets øts jam n'uktukmadowdi jawyeen pøn jaty jam wyinaty Damasco jøts nayide'en Jerusalén, jøts jam nayide'en tuki'iyi pøn jaty Judea etjotp, winets øts n'uktukmadowdi pøn ka'israelit jaa'dyi, jade'en øts jam n'uktukmadøø jøts ja pyøktyu'unin tmajtstu'uttit jøts ja Dios yja' tu'ugyi tpaduujniyidit, nayide'en tsuj yjaa'y'attit jøts jade'en tnanky'ejxidit ku ja chinaa'yin tø tyiktigatsti.

²¹ Ku øts ja jaa'y jade'en ngajpxwejtiti ja'agøjxp øts ja israelit jaa'y jap xmajtstøø tsaptøjkjøtpty jøts øts ja' xuku'oogiwyā'andi.

²² Møj øts ja Dios ja pudøjkin xmø'øy ku øts ixymbaajt ja kyajpxy y'ayuujk ngajpxwa'kxiyi, jøts ø ndukmadøø niduki'iyi pøn jaty ixpiky pøn jaty ka'ixpiky. Nijuuni øts ja jaa'y ja wenkpi ayuujk ngadukmadøø, yø'øyi ngajpxy nayide'en sã ja Dios kyugajpxy jøts sã ja Moisés ojt wyā'andi,

²³ ku ja yiknitsokpi kuwan y'ayo'ombaatt jøts ku ja wyinaty tø y'øøky, ja'ats myijawyeen tunjøpip ku ja yujukpyøkt jadigojk jap oo'kpi jutjøtpty, jøts jade'en øøts njaa'y ttuknijawit ja wa'ats'ajtin møøt tuki'iyi ja naxwii'ñit jaa'y.

Ku ja Pablo tjadukmibøkwañ ja rey Agripa jøts tpadu'unt ja Jesús yja'

²⁴ Xjats ku dø'on ja Pablo jade'en ñagyugajpxiyi, winets ja møj yikutujkpi Festo møk'ampy yjanchkajpxy, jøts ja Pablo yiknimaay:

—Mjanchmo'tp me Pablo! Yø m'ixpiky'ajtin me nugo myikmo'jtip.

²⁵ Xjats ja Pablo t'adsojimbijty jøts tnimaay:

—Mets øy møj yikutujkpi, ka'ap øts nmø'øty; tiy øts idø'on nwa'añ midi øts ngajpxpy.

²⁶ Ixya dø'on ja rey Agripa pøn yø'øbi winmaa'ñ wa'ats tnija'wip, paty øts ya jotmøk ngajpxy yø' wyinduujy; wamp øts idø'on ku yø' tnijawit tuki'iyi, kumi ka'ap ja jam ayu'uch yjajty midi øts idø'on nnigajpxpy.

²⁷ ¿Mjanchja'wip mets rey idø'on sã ja Dios kyugajpxy wyā'andi? N'ijxy øts ku yjawi xjanchjawi.

²⁸ Xjats ja rey wyaañ:

—Kuk øts jeexyip jawaani xjaaktukmadøø, tøk øts yø jeexyip ngupiky.

²⁹ Xjats ja Pablo y'adsøøy:

—Øyi ja waani uk øyts ja yjamayi ya'atpi ayuujk, ka'ayi mets ja'ayi nadyu'uk xjanchjawit, wa'ambim ja Dios niduki'iyi tjanchjawidit pøn jaty øts n'ayuujk ya tømadooji.

³⁰ Ku dø'on ja Pablo jade'en kyajpxkijxy, winets ja rey niduki'iyi wyā'kukidøø møøt ja møj yikutujkpi, jøts møøt ja ñidø'øxy jøts pøn jaty jap wyinatyi,

³¹ winets abiky ñøjkxti jøts jap tkajpx'øyidi ja Pablo pyøky, jøts yide'en ñawyajnidøø:

—Ka'ap yø'øbi jaa'y yjawi ti ttuñ jøts yø' tku'oogit, jøts ni nayide'en kyapaat'aty jøts jap puxøjkjøtpty y'ett.

³² Winets ja rey Agripa tnimaay ja møj yikutujkpi Festo:

—Tø yø jeexy yikmajtstu'uty ku yø jeexy kø'øm tka'amidøø jøts ku ja møj windsøn César tyiidyuniyit.

27

Ku ja Pablo yikejxy Roma ma ja møj kutujktaajk

¹ Xjats ja møj yikutujkpi twinmaadyøø, winets ja Pablo yikajxwä'andi jam Italia møøt ja myibuxøjk jaa'y pøn jaty jap wyinaty tsumdyi, jøts nayide'en øts nmøødi pøn ya'at nøky tjaapy. Winets ja soldadi pyøkjø'jkidøø midi txøøw'ajtp Julio jøts midi tñigubajk'ajtp tukpiky ja soldadi, ja' xyøøw ja soldadi tukpiky Augusto.

² Jam wyinaty nayide'en tu'uk ja Macedoniit jaa'y midi kugajp'ajtp Tesalónica, ja' xyøøw Aristarco. Winets øø tuknax ndøjkijyi'n møøt ja Pablo jap barkijøtpy, jam ja barki wyinaty tø chøøñ Adramitio, jøts ñøjkxwä'añ ma jaty ja kajp jam Asiit etjotp.

³ Xjats øøts jam ndsøø'ñ Cesarea, jøts øø kyimjabom nja'aty ma kajp txøøwi Sidón, jamts ja soldadi Julio t'ayo'ixy ja Pablo, jøts ja myigu'uktøjk t'atstukmigajpxy jøts ja myigu'uktøjk yikpoo'kxiyi.

⁴ Xjats øøts jadigojk ndsøø'ñ Sidón, winets øøts ja poj møk'ampy xjøpkuyø'øyiyi'n, paty øø kuwani nnayø'øy aga'n'ampy ja et midi txøøw'ajtp Chipre, ma ja poj tuda'aky yø'øy.

⁵ Xjats øøts ja mejy ndanajxy jam Cilicia y'et'amidiy jøts nayide'en Panfilia y'et'amidiy, winets øøts nja'jty ma kajp txøøwi Mira jam Licia y'etjotp.

⁶ Jamts ja soldadi tu'uk t'ixaay ja barki, jøts ojts t'ejxpaaty tu'uk midi tø wyinaty chøøñ Alejandria jøts jam ñijkxy Italia, jøts øøts jadigojk xyiktøjkijyi'n xjats øø ndsøø'ñ.

⁷ Kawinaak xøøw øøts idø'øn jade'en udy'a'agy i n'awidijty, jøts øøts awisa jam njanchja'jty jam Gnido kajp y'amidiy, kumi ka'anim wyinaty ja møk poj y'amøki winets øøts jade'en'ampy jadigojk n'awidity Salmón kajp y'amidiy. Xjats øø nnayø'øy ma ja mutsk naajx jam mejy kujk'am midi txøøw'ajtp Creta.

⁸ Xjats øøts jade'en awisa njanchjanayø'øy ja naajx mejyjotp, xjats øøts awisa nja'jty ma kajp txøøwi Buenos Puertos jam Laseit kajp wingon.

⁹ Tø øøts wyinaty jeky ndaa'niñi mejyjotp, janch tsø'øgi møøt wyinatyni, jade'en'ampy ku wyinaty ja xuxpyoj myenwani paty ja Pablo tjanimaay ja yikbarkiyø'øbyi,

¹⁰ jøts wyaañ:

—Meets migu'uktøjkti, ka' yjawi y'øyt ku ndso'ongojmi'indit, nnajtsja'wip øts ku yjawi mayjøøjp n'ayo'ombaajtindit, windigø'opy yø barki møøt ja pyikta'aky, nayi kø'ømbaajt yjawi adøm nwindigø'oyindit.

¹¹ Ka'ats ja soldadi ja Pablo y'ayuujk tmibøjkøø, ja' ne'egi pyabøjk ja barki wyindsøn jøts ja yikyø'øbyi.

¹² Janch møk idø'øn xyuxy jøts yjanchpøyy jam Buenos Puertos, paty namay yjanchwandøø jøts øy'ajtp øøts jam ne'egi ndsoont, jøts pøni majadap øøts jøts nja'att Fenice midi nay jam tæmp Creta y'etjotp, jamts øø nyiknæxt ja xuxtyuu ja'agøjxp ku ja poj ka'ap jam jadine'en tyøki.

Ku ja poj yik'adøtsnibøjkiñaa ja mejy

¹³ Xjats ku ojts waani y'amøki ja poj, winets pyojkeejky jaduktamajñ jøts ja jaa'y wyandøø øy'ajtp jøts yjaakyø'ødyit. Xjats øø ndsøø'ñ, jøts øø nyø'øy mejpy'am et, jøts øø nnajxy Creta wingon.

¹⁴ Kuts waani y'ijty, winets ja poj møk'ampy yjanchmiiñ midi yiktejp Nordeste.

15 Ja'ats ja barki mək tʃɔpkuwojɔpθθ jɔts nugo wyejtsma'jtijθθ, jɔts ni sudso'ampy ja kya'ukyikmajadaajknijyi ja poj, xjats θθts ja ndyim'y'ukmajtstutni, wan tyiknijkxy pəni ma tyiknijkxy.

16 Xjats θθts jam nnajxy ja y'jɔxkθ'əm ma ja naajx lii'nim mejkyuk'am mididi txəw'ajtp Clauda, ma jam ka'ap jadine'en mək pyəjy. Jamts ja mutsk barki mididi yikpajidəjtp, ja'ats θθts awisa njanchyiktəjkijyi'n jap məj barkijəjtpy.

17 Kuts θθts jade'en nyikpatkijxy ja mutsk barki, winets ja məj barki ja məj tejpxy yikta'awθθ'nmujky. Xjats kumi tsə'əgidip ja jaə'y ku ja barki jam tyəkkit pu'jotp mididi txəw'ajtp Sirte, winets ja majpxy məj wet twejtstəθdθθ mididi ja poj mθət tminamyajtsip,

18 jɔts θθts ja tsimy jamyi tuki'iyi nguwojɔnaxkijxy mejyotp;

19 jɔts kyimdigəθk xəwəw ixanimts θθts ndyim'y'ukuwojɔnaxkəjxni tuki'iyi ti jaty ja barki jap wyinaty myθət'ajtpy.

20 Kawinaak xəwəw θθts jade'en nugo agubajkpy njanchyθ'əy, niti θθ nga'ijxy ni xəwəw ni maadsa', ja'agəjxp ku mək yjanchtuuyəθch. Ka'ap θθ n'ukjəp'ejxni jɔts θθts jam jujky nbidsə'əmt mejyotp.

21 Xjats θθts jade'en kawinaak xəwəw n'ayuu'ijty, winets ja Pablo ojts wya'kuki jam jaə'y agujkp jɔts wyaəñ:

—Migu'uktəjkti, əy'ajtpik jeexy kuk əts n'ayuujk xmadəjθdθθ, winetsik ngatso'əñindθθ jam Creta jɔts ya'atpi ayə'on jeexy jane'en ngapaajtyindi.

22 Kidi mjotmay'ookti, əy yə barki wyinaty yjawindigəy, nipənts kya'ookt.

23 Mnija'wip meets ku əts ja Dios Teety nmθət n'ity, jɔts ku əts ja y'ayuujk nbaduujniyi, ixyamgoots əts nwindson'ajtim tu'uk tə xaniguexy ankilis

24 mididi əts tə x'atsnəjmi: “Ni mgatsə'əgit Pablo, kuwəni jam Roma xwinguwa'əgit ja məj windsən César, ja'agəjxp ja Dios myiknits'ok'atidit niduki'iyi, jɔts nipən tu'ugin kya'ookt ya barkijəjtpy.”

25 Paty migu'uk ixyam nnigajpxy, məkpihta'akti mwinmaa'ñ, njanchja'wip əts ja Dios jɔts nnijawu ku kuwəni jade'en tyikjatt sa əts ja ankilis tə xnəjmi.

26 Ja' ku kuwəni ja mək poj jam nəjkx xnajtsjibejpi'indi ma ja naajx jam mejyotp.

Jade'en idə'ən ja Pablo tnimaay ja myigu'uk.

27 Majts saməni θθts idə'ən wyinaty tə nwidity barkijəjtpy, winets θθts jam ojts koots nja'aty ma məj mejy txəwəw Adria, mək idə'ən ja poj ja barki jam tjanchyik'adi'ich. Xjats ku chuu'm'ajty, winets ja yikbarkiyə'əbyi tnajtsja'widθθ ku ja barki ja naajx yjawu tpaatwəni.

28 Winets tkejpxti ja nəθ kyəjnk'ajtin, xjats t'ejxti ku ja ee'pxmaktujt metri kyəjnki; xjats jawaani yjaakyə'ədyəθ jɔts jadigəjk tkejpxkəjmididi, xjats t'ejxti ku ja ee'pxtaxujk metri kyəjnki.

29 Winets chə'jkidəθ ja yikbarkiyə'əbyi ku jotməñ ja barki jam wyinguwojit məj tsaəgəjxp, winets ja yikbarkiyə'əbyi ja məj pux'ajo'jk twendidəθ maktaxk, xjats ja tnəwəjθdθθ kunim ja jap nəθbatki'py muum y'ajə'əky, xjats ja barki jade'en wya'k'aməkijyi'n. Janch tsə'əgijawu də'ən ja jam tyiknaxti ku pojini yjanchkaxijni.

30 Jɔts wyinmaydi ja yikbarkiyə'əbyi jɔts kya'akwə'andi jam məj barkijotp, winets jam nəjkxti barkijəp'am, jade'en nadijyiti ttunwə'andi jɔts ja pux'ajo'jk tjaakpihta'akwə'andi jap mejy'ok'ajpy, ja'agəjxp ojts tyikpidsəmwə'andi ja mutsk barki jɔts jade'en kya'akwə'andi.

31 Xjats ja Pablo t'ejxpaajty, jɔts jade'en ttukmadəθy ja soldadi jɔts nayide'en ja myisoldadi, jɔts tnimaay:

—Ku yø yikbarkiyø'øbyi ya kyata'andit, ni sudso'ampy adøm ya ngapidsøø'mindit.

³² Winets ja soldadi tmidsujkidøø ja mutsk barki jøts nøøjotp tyiknaxkidaktøø, ja'agøjxp jøts nipøn kyaka'akt.

³³ Xjats ku xiindyaaajky, winets ja Pablo tnimaay ja myigu'uk jøts o winø'ønin kya'adyit, jøts tnimaay:

—Tø yjawi myajtsk syamaniñi ku jade'en mgama'adi jøts ni mgakaydi.

³⁴ Øts wamp jøts winø'ønin mga'adyit jøts ja møjaaaw xpøktit, pø icyam inet nipøn inet tu'ugin kyawindigø'øty.

³⁵ Xjats ku ja Pablo jade'en tkajpxwiyj ja myigu'uk, winets tnixajiyi'ñ tu'uk tsapkaaky jøts ja Dios ttamøja'wiyi'ñ jam myigu'uk wyingujkp, jøts ja kø'øm kyaay.

³⁶ Xjats ku ja myigu'uk t'ejxtøø, winets ja yjotkujkidøø jøts kyaadyøø nayide'en.

³⁷ Majtsk magø'pxy ja tugui'pxmyaktujt øøts jap wyinaty njaa'y'aty barkijøtpy.

³⁸ Xjats ku kyaagyøxtøø, jøts ja ariimbajk kunchi'am tuki'iyi jamyi t'ukniwibejpatkøxnidøø mejjotp, jøts jade'en ja barki tyiktøø'tskyidøø.

Ku ja barki mya'jty jam mejy'am

³⁹ Xjats ku dø'øn xiindyaaajky, winets ja yikbarkiyø'øbyi ni tka'ejxkapti ja naxwii'ñit pø ma dø'øn jam wyinaty tø tyaandi, ja'ayi ku t'ejxpaatti ja mejpyaa' ma ja nøø ja poj jam møk kayik'adi'ichiyi, winets wyinmaydi jøts ja barki nugo tyikyø'øpyidsømwa'andi ma ja nøø jam t'ejxti ja pyaa'.

⁴⁰ Xjats tmidsujkidøø ja pux'ajo'jk midi ja barki tmach'ejtp, jøts ja japyi tyiktaandøø mejy'ok'ajpy. Winets ja jøpmiweenguipy tkajo'ongøxtøø midi ja barki twejtsyø'øpy, jøts ja majpxwyet nayide'en jam tkudiidyøø barki jøp'am. Xjats ku ja poj ja tmajch, winets ja barki jam udy'a'aky y'ukyø'øpyidsømwa'añ jam mejpya'am.

⁴¹ Xjats jam ojts adsu'jky tyøki ma ja nøø jam ñawyinaxyiyi, winets ja barki yjøøjp jam ojts møk'ampy kyutopi pul'jotp, ma ja nøø jam wyinaty yø'øy'awidity. Jamts niwinø'ønin kya'ukyu'u'kxni, xjats ja mejy møk'ampy ojts pyetyiyi jam y'ix'am'ampy, jøts ja barki'øjx jade'eñi ja nøø tyakø'jtsigyø'jxiyøø.

⁴² Xjats ja soldadi wyinmaydi jøts tyik'ookwa'andi ja pøkyjaa'y, ja'agøjxp ku jotmøñ kya'aktit jam mejjotp.

⁴³ Ka'ats ja soldadi wyindsøn ja Pablo tnankyik'ookwa'añ paty ka' tyikjajty, ja'ayi t'ane'emy pøni pøn tjajtp ja nøøyumk wan ja jawyeen tnødøkidi jøts myejpyidsøømdit.

⁴⁴ Jøts nayide'en t'ane'emy pøn jaty tkajajtp ja nøøyumk, wan ja pu'gyøjxp tyø'ødyi, uk øy'ajtp nayide'en barki pidasikøjxp. Xjats idø'øn jade'en niduki'iyi jujky myejpyidsøømdøø.

28

Sa yjajty sa kyubejty ja Pablo jam ma naajx txøøwi Malta jam mejjotp

¹ Ku øøts idø'øn jade'en tum jujky jam nbidsiimy mejjotp, xjats øø nnija'wiyi'ñ kudam ja et jam txøøwi Malta midi jam mejkyuk'am.

² Winets øøts ja Malta jaa'y jam janch tsuj xwindsø'jkiyi'ñ, jøts ja jøøn tyikmøjidøø janch møj, ja'agøjxp ku yjanchxuxy ja et jøts ja tuu nayide'en. Winets øøts nyikyaajxiyi'ñ niduki'iyi, jøts øø nnay'ajo'kxiyit.

³ Winets ja Pablo nayide'en t'atskajpmuky ja t'ø'øts ja'axy, ja'ats wyinaty yjøn'o'jxip winets ja awa'andsaa'ñ jam tu'uk pyidsimy ja'ax agujkp ku ja jøøn y'ikyiyi. Xjats ja Pablo yiktsu'jch kyøj'ø'm.

⁴ Xjats ku ja kugajp t'ejxpaatti ku ja jiyujk jam tyiñi Pablo kyøj'ø'm, winets ñawyajnidøø:

—Yikjaa'y'oo'kpi ya'at yjawī, øy jap mejyjtøpy yjabidsimy jujky, ixyamts kø'ø'm ja Dios ja t'idyu'unin t'ø myø'øyi jøts y'ookt.

⁵ Xjats ja Pablo t'jønwejtsiyi'ñ ja tsaq'ñ jøts jade'en myatstuujt'iyøø, nisa d'ø'n ja Pablo kyø' kyajajty.

⁶ Tum jade'en id'ø'n ja jaa'y ja t'jøp'ejxti juuni ja kyø' kyexpøkt, uk juunits yik'oogiyit. Ku d'ø'n ja jade'en t'ajøp'ejxtøø, xjats t'ejxti ku ja Pablo niti kyajatyiyi, winets ja wyinmaa'ñ jatyi tyiktigatstøø jøts ñawyajnidøø ku ja Pablo Dios ja'.

⁷ Xjats ku d'ø'n jam jade'en yjajty, jamts wyinaty tu'uk wingon chøøni ja jaa'y pøn ja kajp jaa'y t'niwindsøn'ajtp, ja' xyøøw Publio, ja'ats øøts jam xwaaw tyøjkjotp, jøts øøts jam tigøøk xøøw janch tsuj xyikja'adaajky.

⁸ Jamdam wyinaty Publio tyeety pyiky jøømba'am, jøts nayide'en ja ni'jpya'am tmøødi, winets ja Pablo ojts t'ninijky jøts t'atsmigajpxy. Ja'ats ojts tkudsapkajpxy jøts ja pamaa'y jaa'y myøp'ijky ku ja ojts tkønixajy.

⁹ Winets ja Pablo niduki'iyi ja pamaa'y jaa'y ñimejniyøø pøn jaty jap wyinaty kugajp'ajttip jøts jade'en choktøø.

¹⁰ Winets øøts may ja may'ajt jadi'iñi nyikmøø'y, xjats ku øøts jap barkijøtpy ndsoonwaani, xjats øøts tuki'iyi xmøøy pøni ti jaty øøts xka'ejtxip.

Ku ja Pablo yja'jty jam Roma

¹¹ Tø øøts jam wyinaty tigøøk po' ndsinaa'ñi jam Malta, jøts øøts ja tu'uk ndatøjk'iyi'ñ ja barki midi jam nayide'en tyiknajx ja xuxpyoj. Jamts ja'abi barki majtsk ja dios awanax txox'aty midi tyejt'ip dios Castor jøts ja dios Pólux; ja'abi barki d'ø'n ja wyindsøn kugajp'ajtp Alejandría.

¹² Xjats øøts jade'en ndsøø'ñ, winets øø nja'jty ma kajp Siracusa, ma øøts ndaan tigøøk xøøw.

¹³ Jamts øøts ndsøø'ñ jadigojk jøts øø nniikxy Regio. Jøts øø kyimjabom ndsøø'ñ, winets ja wimbatpoj myiñ, ja'ats øø møk xpadej jøts øøts jam nja'jty kyimajtsk xøøw ma kajp txøøwi Puteoli.

¹⁴ Jamts øø nbaajty winaagin nmigu'uktøjk pøn ja Jesús yja' t'paduujnidip, ja'ats wandøø jøts øøts ja jam nmøøtaa'nit tu'uk samani, winets øøts jam tekyj'ø'm ndsoo'naa jøts øøts nniikxy Roma.

¹⁵ Tø øøts ja wyinaty xnijawi ja nmøøtjanchja'wibidi, ja'ats jam tsoo'ndøø Roma jøts øøts x'atspatsøy tuu'am ma kajp txøøwi Foro de Apio, jøts nayide'en øøts jam ojts ja winaagin xpatsøy ma ja'taajk txøøwi Tres Tabernas. Xjats ku ja Pablo ja myigu'uk twin'ijxy, winets ja ttamøja'wiyi'ñ ja Dios jøts jotkujk ja ñayja'wiyøø.

¹⁶ Xjats ku øøts jam nja'jty Roma, jøts ja soldadi windsøn tkøyajky ja pøkyjaa'y jam ma ja puxøjk adsinaabyi windsøn. Winets ja Pablo yiknimaay jøts ja tyøjk abiky t'ixa'at, ja'ayi ku nugo tu'uk ja soldadi y'ejx'ityiyi.

Ku ja Pablo kyajpxwa'kxy jam Roma

¹⁷ Xjats ku d'ø'n jam jade'en ja Pablo chinaay tigøøk xøøw jam tyøjkjotp, winets t'waadsøy ja israelit jaa'y ja myøjaa'dyøjkti, xjats ja ñamyujkidøø, jøts ja Pablo t'nimaay:

—Migu'uktøjkti, niti øts ngadamidundigøy ja nmigu'uk israelit jaa'dyi, jøts nika'ap øts nayide'en nmidundigøy ja møjaa'chinaa'yin, kuwanits adø'm

nmigu'uk israelit jaa'y xmajch jam Jerusalén, jøts øts ojts xkøyaky puxøjkjotp ma romanit jaa'y kyutujk jam.

¹⁸ Ku øts nyiktiidyuuñ, winets øts jadi'iñi xmajststu'utwandi ja'agøjxp ku øts nbøky ni tu'uk xkapaajtidi mid'iibi øts xuku'oogiwyandip.

¹⁹ Ka'ats ja' israelit jaa'y tyikjatwa'andi jøts jadi'iñi nyikmajststu'utt, ja'agøjxp øts kuwani n'amidøø jøts øts ya xäidyu'unt ja romanit møj windsøn. Ka'ap øts ja' ya nnimiñ jøts øts nmigu'uk israelit jaa'y ja' ndani'øønit.

²⁰ Yø' meets ixyam ndaniwaadsøøpy, jøts meets ka'pxy ndukmado'ot tigøjxp ku øts jade'en puxkadeen køwiiñ n'ity; ja'agøjxp ku adøm niduki'iyi israelit jaa'y njøp'ijxyindi ku ja Dios ja oo'kpi jadigojk tyikjujkpyiky jap oo'kpi jutjøtpy.

²¹ Xjats ja møjaa'dyøjk t'adsojimbettøø, jøts wyandøø:

—Ni tu'uk øøts ja israelit jaa'y ñøky ya xkapaaty mets køjxp, jøts ni tu'uk adøm nmigu'uk israelit jaa'y nisa kyawa'añ. Ka'ap pøn mga'ødyijyiyi pøn jam tsoo'mp jøts ya tø yja'aty.

²² Nija'wip øøts ku yø' o madsoo yikpagajpxy pøn yø jemy ixpøjkin tjanchja'widip, paty øøts ndsøky'aty jøts øø xukmado'ot.

²³ Winets tkajpxy'ajttøø ti xøøw jadigojk ñamyukidit, xjats ku tpaajty ja tiempi winets ja jaa'y may ñamyukidøø ma Pablo jap wyinaty tø yja'ada'aky. Winets ja Pablo jøpy kyajpxøjkiiyññ kunim chuu'iyiññ ja xøøw. Jøts jade'en ttukmadøøpy sa nwindson'ajtim Dios ja ñaxwii'ñit jaa'y ttanitani ja kyutujk. Ja'ats tyukmadøøpy sa ja Moisés kyutujk, jøts nayide'en sa ja Dios kyugajpxy ojts ttukjaadyañ, jade'en idø'øn ja udy'a'aky tjadukja'gyujkiwyaañ ku ja Jesús ja yikniðokpi pøn ja israelit jaa'y yjøl'ejxtip.

²⁴ Xjats winaaagin tja'gyukidøø, jøts niwinaagin ka' tmibøjktøø sa ja Pablo tjanigajpxy;

²⁵ xjats kumi ka'ap ja niduknað tmibøjktøø, winets ja choonwanidøø, jøts ja Pablo jadigojk tñimaagyojmi:

—Janch tiydam idø'øn ja Espiritu Santo wyaañ midi ja Dios kyugajpxy Isaías tyukmadoow ja n'apteety'amøjti, ku ja yide'en wyaañ:

²⁶ Nøjkk x'atsnøjmi yø'øbi jaa'y:

Wa'ats meets xjamado'ot, jøts ka' xmøjpkta'aktit, nayide'ents wa'ats xja'ejxtit, jøts ka' x'ejxkaptit;

²⁷ jabi yø'øbi jaa'y kawine'enxi kyujuunidi,

janch wenk myadowdi,

jøts wimbets ñabyikta'agyidi;

paty ka'ti tmøjpkta'akti,

jøts ni tkadamadowdi ja tyatsk,

niwinø'ønin ja kyubajk kyaja'gyukidi,

jøts ni tkadyimyikwimbetti yø wyinmaa'ñ ok nbøjpkimaa'kxt.

²⁸ Nijawi meets ku ja Dios ja yikniðso'ok'ajtin øøts ixyam ngajpxwa'kxtsoo'ni ma jaa'y kya'israelitjaa'yidi, ja'ats ne'egi tja'gyukidip.

²⁹ Xjats ku ja Pablo jade'en wyaañ, winets ja israelit jaa'y choo'nidøø, ja'ats møk'lampy ja xem ja yam nugo nadyakajpxidøø ja'abi ayuujk.

³⁰ Majtsk jumøjt ja Pablo jam ka'pxy tyaa'niyiññ ma ja tyøjk jam t'ajuudyuky, tyajotkujk'ajtpy ja Pablo pøn jaty jam atsmigajpxiyip.

³¹ Jotkujk idø'øn ja tkajpxwa'kxy ka' ti jotmay, tyuk'ixpijkpy ja jaa'y sa ja Dios Teety ja kyutujk ttanitani ja yjaa'y, jøts nayide'en ttukmadøø sa yjajty kyubejty ja nwindson'ajtim Jesús, xjats jade'en nipøn kya'adsejpiyøø.

JA NØKY MIDI JA PABLO TYANĪGAJX JA ROMĪT JAA'Y

Ku ja Pablo tnijayi: pøn tjanchja'widip ja Jesucristo jam Roma

¹ Pabla'ajtp ɔts, jɔts ɔts ja nwindson'ajtim Jesucristo nmidumpy. ɔts ja Dios tɔ xwi'ixy jɔts ɔts yide'en ngudanaabyi'att. Yide'en idɔ'ɔn wa'ats kajpxy nbiktaajkin, ja' ɔts idɔ'ɔn tɔ xanibiktaagi jɔts ɔts ja ngajpxwa'kxip ja kyajpxy ja y'ayuujk midi nitso'ok'ajtin xukpaajtimp.

² Pɔ ma windi'ixyip Dios Teety yɔ tnigajpxni, jɔts ja kyugajpxy ttuyiknaxy yɔ'ɔbi winmaa'ñ yɔ'ɔbi ixpɔjkin jap ma y'ity ja kyajpxy ja y'ayuujk,

³ jɔts tnigajpxy ja Dios U'nk pøn nwindson'ajtim Jesucristo'ajtp. Ku ja tnigajpxi ja yjaa'y'ajtin ja ñaxwiiñ'ajtin, ja rey David idɔ'ɔn ja y'apteety'ajtpy;

⁴ kuts ja dios'ajtin, jats ja tyiknigaxi'jky ku xemikɔjxp jadigojk yjujkyjky jɔts kyutujky mɔk'ampy, jɔts ku dɔ'ɔn ja Dios U'ngi.

⁵ Ja nwindson'ajtim Jesucristo kɔjxp ɔɔts ja Dios Teety tɔ xmɔ'oy ja kunuu'kxin jɔts ɔɔts ja ngudanit, jɔts ya ñaxwiiñ yja'attit pøn tjanchjawidip pøn tpaduujnidip ja Dios yja' o ma'et o magajp.

⁶ Jɔts meets idɔ'ɔn nayide'en mja'a'y'ajtmi, nayi tɔxi ja Dios mwi'ijxyidi jɔts meets ja Jesucristo mja'atidit.

⁷ Meets idɔ'ɔn nnija'ayidip niwine'enin jam mdsɔnidi mdanidi Romit kajpkɔjxp, niwine'enin ja Dios mdaba'ayɔyidi ja chojkin, jɔts ja mdamidsɔkyidi jɔts ja amuum mnadyamiyoxidit. Mbattipts ja kunuu'kxin jɔts ja ɔy'ajtin midi ja Dios Teety yajky mɔɔt ja nwindson'ajtim Jesucristo.

Ku ja Pablo Roma y'ats'otswa'añ

⁸ Jawyeen ɔts ja Dios Teety ndukmɔjawi ndukunuu'kxyjawi ja nwindson'ajtim Jesucristo kɔjxp, ku mee ni'ijtyi myiknigajpxti myiknimadya'akti ɔy madsoo sɔ ja janchja'win xjagyapti.

⁹ Diosts testigi'ajtp pøn ɔts ja y'U'nk ja kyajpxy ja y'ayuujk ngajpxwa'kxip amumjoojt, ku meets ejtp nja'myech ku ɔts ja Dios nmidsapkaajpxy.

¹⁰ Ejtp ɔts ja Dios n'amidɔy nbɔktsɔy jɔts tyik'amɔjatt jɔts mee n'ats'ext, ja' kɔ'ɔm kyunuu'kxingɔjxp.

¹¹ Ja ku nbaatwa'andi n'ejxwa'andi jɔts nmo'owa'andi yiin waan ja pudɔjkin sɔ Dios ttsɔky, jɔts yjaakmɔjit yjaakmayit ja m'ajot'ajtindi.

¹² Jade'en'ampy ɔts idɔ'ɔn ndijj jɔts nixem niyam nnagyajpxjot'amɔjka'andit nyiknigaxɔ'jkindit, jade'engɔjxp sɔ jadu'uk jadu'uk njagyeyjyindi ja janchja'win.

¹³ Uknimadowdi migu'uktɔjkti, kawinaak ojk ɔts jam tɔ njanch-janɔjxwa'añ jɔts mee n'ats'ext, ni ixymbaatnim ɔ nganijky. Jade'en'ampy ɔts jam njanɔjxwa'añ jɔts meets ndukmadowa'añ ja Dios yja', jɔts ɔ n'ext sɔ wyingaxi'iky ɔts ja ndunkjɔjxp, sam ɔ tɔ n'ixy abikyajp ma jaty ɔ tɔ nwidity.

¹⁴ Xpaat'ajtpxi ɔts niduki'iyi pøn ka'israelit jaa'dyi, wan ja t'ixpikyidi tka'ixpikyidi;

¹⁵ jɔp'ijxy ɔ nnanky'ityi jɔts mee nayide'en ndukmado't ja Dios y'ɔgyajpxy ja Dios y'ɔmyadya'aky, pøn jaty jam Roma tsinaadyip.

Sɔ ja mɔk'ajtin tjagyepy ja Dios y'ɔgyajpxy ja Dios y'ɔmyadya'aky

¹⁶ Ka' ɔts ja Dios y'ɔgyajpxy y'ɔmyadya'aky ndatsɔ'ɔdyuujnyiyi, pɔ ja'axi ja' myɔk'ajtin ja'axi ja yiktumpy, jɔts ja ñitso'ok'atti pøn tjanchja'widip

ja nwindson'ajtim, ja israelit jaa'y tyimyjapaajtidip, nayide'ents pøn ka'israelitjaa'yimidi.

17 Yø'øbi øgyajpxy ømyadya'aky tñigajpxp jøts ku janchja'wingøjxp ja Dios xkupijkyindi, janchja'wingøjxp ja'ayi sam ja Dios kyajpxy y'ayuujk tyiktaań ku wyań yide'en: "Pøn kupøjkp ja Dios, ja yjanchja'win ja ttukpaatip ja xemikøjxpit tsinaa'yin."

Ja naxwii'ñit jaa'y pyøky

18 Jap tsajpjøtpy ja Dios tyiktsøøñ ja møj ayo'on, jøts ja ttuktagida'aky ja kawindiyjaa'dyi ja ka'øyjaa'dyi, pøn kya'øy'ajtingøjxp kyanankñijawiwyañnidip ja Dios yja'.

19 Yjanija'widip wa'ats jøts tigøjxp pyaat'atyi ku ja Dios yiknijawit, pø tøxi ja kø'øm tyuk'ijxyidi

20 sa ja myøk'ajtin y'ejxi tyiyi øy ja yjagagaxi'iky. Jade'en'ampyts ja yik'ixy yiknijawi ku yik'ixy sa ja tø tyik'øyi ja naxwii'ñit, jøts ku ja' tu'ugyi Dios'aty ku ja myøk'ajtin xemikøjxp myajada'aky; paty ja ka'ap pyaat'atyidi ja'abi jaa'y jøts ja yiktamaa'kxtit jøts ku dø'øn ja Dios ja tkanijawidi.

21 Øy ja tjanijawidi ja Dios jade'en, ka'apts ja twindsø'øgidi, ka'ap ja tmøjawidi tkunuu'kxyjawi sam ja Dios pyaat'atyin. Ne'egi wimbet'ampy ja ne'egi wyinmaydi, ja' tyajotkøjxtip mididi niti kawamp jøts ja wyinmaa'ñ kya'øyidi, wimbeets kugoots y'ejtnidi.

22 Øy ja yjawa'andi jøts ku ja wyijyaa'yidi, jade'ents ja yjatti pøn niti tkajajtip;

23 tøts ja t'ixwejtsidi ja Dios kyunuu'kxin, mididi nijuuni kawindigøøpy, jøts ja tyikmøjtøkidi ja jaa'y yja' ja awanax mididi windigøøpy ejtp, joon paat y'awanax, tsaa'ñ paat y'awanax, uk nayide'en øy mididi jiyujk mididi maktaxk ja teyek.

24 Yø'øgøjxpts idø'øn Dios ja tø myajst'udyidi, jøts ja tø tpanøjkxti ja kyø'øm tsojkin ja kya'øwyinmaa'ñ (mididiyim ja y'ijty y'ukjagyajptip), jøts jade'en tsø'dyumbim y'adø'tsti nixem niyam;

25 ja ku ka'ap tjanchja'widi ja Dios tyiy'ajtin. Ja' ne'egi myibøjktip ja tum ja taay, jøts ja ja' tø twindsø'øgidi ja pikta'aky mididi ja Dios tø t'ødyuñ, jøts ni ja Dios ne'egi kø'øm kyayikwindsø'øgi, pøn paat'ajtip amuum ja windsø'jkin. Jade'en idø'øn ja y'ejxi tyiyi.

26 Patyts idø'øn Dios ja tø y'ixmachidi jøts ja jade'en y'am'adø'tsti chaach'adø'tsti; ja tø'øxyøjk paat ja tyiktigajtsnidi ja tyø'øxyøjk'ajtin, tum wimbet ttundi sam ka'ap pyaat'atyidi jøts ja jade'en y'adø'tsttit.

27 Jøts yaa'dyøjk nayide'enmidi; ja yaa'dyøjk'ajtin ku ja tø'øxyøjk møøt, kø'ømyi ja tukyaa'dyøjk ñay'ejxkiyidi nixem niyam. Tukyaa'dyøjk ja axøøk y'adø'tsti, ja ayo'onts idø'øn ttagidajkidip jøts jade'en tyuktuñidi ku tkamøjpikta'akti ja Dios.

28 Kumi ka'ap ja Dios tñijawiywa'andi, patyts ja tø myajst'udyidi jøts ja y'axøøkwinmaa'ñ tyikmajada'akti, jøts jade'en y'adø'tsttit sam ka'ap pyaat'atyidi.

29 Tum ja ka'øyi winmaa'ñ yjagyajptip, ja kawindiy'ajtin ja axøøk'ajtin, y'ama'at'ajtkøjxtip o ti, ja ka'øy'ajtin y'amidip yjotpidip, windii'ñjaa'y'ajttip, yikjaa'y'o'ktip, kudsep yjaa'y'ajttip, win'øø'ndip jøts tum wenk øy pøn tñimadyaagidi.

³⁰ Ja pagajpxk ja' tyunk'ajttip, ka'ap ja Dios ttsokti, yjemjaa'yidi tyejaa'yidi, namyikaxi yjaa'y'atti. Tum ja ka'øybì wyinmaa'n'ajttip, ka'ap tyeety tyaak tmimadowdi,

³¹ ka'ap yja'gyukidi, ka'ap y'ayuujk tpadundi, ka'ap yujy'ajtin tjagyapti, ka'ap tjatti jøts myaa'kxuktit jøts ka'ap pøn t'ayo'ejxti.

³² Yjanija'widip wa'ats sa Dios tyikutuky; wa'ats tjanijawidi pøn jade'en adøtstip jøts ku ja kyudigø'ødyit xemikøjxp. Jøts nijade'en tkadamajstustu'tti, tyun'adøtstip jade'en jinaxy. Tyaxondaktip ku t'ejxti nayide'en y'adøtsmidi jadu'uk jadu'uk.

2

Tiy'ajtingøjxp ja Dios tyiidyuñ

¹ Ja'agøjxp ka' mbaat'atyì jøts ja myiktamaa'kxt øy sa mjawa'añ, metsxi mbayø'øpy jadu'uk øy pøn, mdyimyjapøni mets. Ku jade'en m'adi'ich kø'øm mnadyanipikyì ja ayo'on, mbayø'øpy jadu'uk jøts m'adøtspts jade'en kø'øm.

² Nnija'windipts adøm jøts ku Dios tiy'ajtingøjxp tyiidyuñ ku ja ttukniduki ja ayo'on pøn jade'en adøtstip.

³ Jade'en mets yjawi mwani mduknìwa'adsip mets ja Dios xijy ja ayo'on, metsxi mdanipijkpy ja mmigu'uk ja ayo'on pøn jade'en adøtstip, mja'adøtstip meets jade'en kø'øm.

⁴ Uk ka' idø'øn xtsojki ja Dios y'ø'y'ajtin ja Dios tyuda'aky'ajtin, ni xkamøjpikta'aky jøts ku ja'abi øy'ajtin tyuñ jøts xmijotjimbett ja Dios jøts tyigatst ja mdsinaa'yin.

⁵ Møk ja mwìnmaa'n' xjagyepy jøts ka'anìm xmijotjimbity ja Dios jøts xyiktigatst ja mdsinaa'yin. Kø'ømyì ja m'ayo'on xyikmiweni xyikajaji, midì nøjkk yikpatp yik'ejxp ku ja Dios ja tyiidyu'unin tiy'ajtingøjxp tyikme'ent,

⁶ ku ja ttagubatt tu'uk tu'uk sa jaty pønjabøn tø y'adi'ich.

⁷ Pøn tpaatwändip ja kunuu'kxin ja øy'ajtin xondaajkin midì xemikøjxp, jade'en'ampy ku ejtp øy yikxon yjaa'y'atti, ja'ats idø'øn Dios mo'ojidip ja jujky'ajtin midì xemikøjxp;

⁸ pønts nay'amā'at'ajtiyìp jøts ka' tpadundi ja tyiibyì yjançhpi, tum ja ka'øybì tyundip, ja'ats ambøjkin'ampy Dios tiidyunidip.

⁹ Møk y'ayo'odit niduki'yì, y'amjattit chaachjattit pøn ka'ø'y'adøtstip, ja israelit jaa'dyi jøts nayide'en pøn ka'israelit jaa'dyi.

¹⁰ Pønts øyjaa'y'ajttip wan t'israelitjaa'yidi uk tka'israelitjaa'yidi, ja'ats ja Dios mo'ojidip ja kunuu'kxin ja øy'ajtin jøts ja windsø'jk'ajtin.

¹¹ Kumi ka' Dios pøn t'ø'y'ixy tka'ø'y'ixy wan ja tpoñi;

¹² pøni pøn tkanija'widip ja kutujk midì ja Moisés ja Dios Teety møøjyì piri pøkyundip, nayide'en ja nøjkk wyindigøydi, ni ja kutujk kyatsokit; pønts tjanija'widip ja Moisés kyutujk jøts pyøktyun'adø'øtsti, nay ja'abi kutujk ja jaayi nøjkk yiktatiidyundip.

¹³ Ka'ap ja Dios tkupiky pøn nugo tmadoodip ja kutujk jøts ka' tpadundi.

¹⁴ Ku abiky jaa'dyi, pøn ja Moisés kyutujk tkanija'widip, tyundipts ja øybì midì ja Moisés kyutujk y'ane'emy øy ja ja'abi kutujk tjagajyapti, kyø'ømgutujk ñamyayi yiktundip,

¹⁵ jabi yikwingaxø'ktipxi ja' sa jaty ja yjaa'y'atti jøts ku ja kutujk tjagyapti. Ja kyø'ømwinmaa'n' ni'ø'øniyidip sa y'ø'y'adø'øtsti kya'ø'y'adø'øtsti.

16 Ja'abi xøøw yiknijawit ku ja Dios Teety tpikta'akt ja Jesucristo jøts ttiidyu'unt niduki'iyi ja jaa'y ti jaty pønnapøn tø ttuñ ayu'uch, sam ø tø nnigajpxi ja yiknitsokpi ayuujk.

Sa ja israelit jaa'y ja Moisés kyutujk ñadyamøjjiyi

17 Mets wamp jøts ku me israelitjaa'yi, jøts ku xpaduujni ja Moisés kyutujk jøts mnadyamikajxi ja mDios.

18 Wa'ats xnijaw i sa Dios ttsøky, jøts wa'ats mduknijawiyi ja kutujk mid i'ibi øy mid i'ibi tsuj.

19 Mnay'aja'wiyip jøts ku xjaty xnøø'mo'ot xuu'mo'ot ja jaa'y pøn wimbeets kugoots ejttip.

20 Mnay'aja'wiyip jøts ku xjaty sa xyik'ixpøkt pøn tkanija'widip pøn tkaja'gyukidip, pø japxi kutujkjøtpy xkajts'ixy ja wejin kajin, ja tyi'byi yjanchpi.

21 Myik'ixpijkpy ja mmigu'uk, ζti kuts kø'øm xkatunjøpi sa ja m'ixpøjkin xyikyø'øy? Ku mgajpxwa'kxy, jade'en mwā'añ ku ka'ap y'øyi ja maa'tsk, maa'tspts mets kø'øm, ζtigøjxp ku kø'øm mmeech?

22 Mets mwamp jøts ku ka'ap pyaat'aty i jaa'y ñiyaa'y ñidø'øxy ñabyøjkxiyidit, jøts ζti'ajtp ku jawyeen jade'en kø'øm m'adi'ich? Ni mets kø'ømbaqt xkatsøky ja awanax, mwimaa'tsidipts ja chaptøjk ti jaty ja yjagyeypy.

23 Mnadyamikajxi mets ja kutujk, mmidundigøøpyts ja Dios ku ka'ap jade'en xuñ sa ja kutujk wya'añ.

24 Paty idø'on ja Dios kyajpxy wya'añ: "Pøn ka'israelit jaa'dyi, ja' tka'ødyejt i p ja Dios ku meets tum jiwimbet xunguixy."

25 Pø wan wine'enin xjanchyiktuñ ja Dios y'ejxpajt mne'kxkøjxp ku xpaduñ ja Moisés ja kyutujk, kuts ja ka'ap xpaduñ, jade'en ja tpaaty ejxim ja ejxpajt jeexy i p xkamøø'taty.

26 Pønts ja ejxpajt kyamøøt jøts pyadumpy sa ja kutujk wya'añ, jade'en ja tpaaty jøts ku ja ejxpajt ja jeexy i p tmøødi, øy ja windii ja ejxpajt yja-gayiktu'unxinim.

27 Pønts ja ejxpajt ka'ejt i p jøts pyadumpy ja kutujk øy ja kø'øm tka'ixpiky, mdabayø'øyip mets ja' ku xkabaduñ ja kutujk, øy mets ja jap xja'ixy jøts ku ja jap kyøxja'ayi jøts øy mets ja ejxpajt xjamøø'taty.

28 Ka'apts ja jade'en tijy jøts ku ja y'israelitjaa'yi pøn jade'en nugo nikijxy nan ky'ejxi p, jøts ni ja' ka' yik'ejxpajtijy mid i nikijxy ja'ayi yiktump.

29 Ja' idø'on israelit jaa'y pøn amuum tpadump, jøts ja' ejxpajtin'ajtp mid i yikwinmaapy am jotp, jam anmija'wingøjxp, mid i ka'ap ma kyøxja'ayi, mid i ka'ap ma kyaxi'iky. Pøn jade'en tpadump, kupiky ja y'ity jam Dios wyingujkp, kidi jaa'y wyingujky i p.

3

1 ζTiku yikajpxy ja israelit jaa'y? ζTi wya'añ ja ne'kxkøjxp i t ejxpajt?

2 Janch møk yjapaat'atyidi ja'agøjxp ku ja' ja Dios kyajpxy y'ayuujk tyami'ajot'ajti di jøts ja tpadu'undit.

3 ζTits idø'on ja'adi? Øy ja tkabadundi jade'en, ζwinets ja Dios tmajtstu'utt ja y'øy'ajtin?

4 i Niwindem! Jinxxy ja Dios tyiktuñ ja tyi'byi yjanchpi, øy ja jaa'y niduki'iyi yjataayidi; jabi yide'enxi ja Dios Teety kyugajpxy tnmadyaajky ja Dios Teety: Ja mgø'øm'ayuujk me Dios Teety myika'pxy i t i dyumb i pidsøjmi p, ku wyinaty nugo mwinnaa'ñ i jxyidi ja'adi pøn mgamøjpi ktaajkiy i p.

⁵ Sam winaagin wya'andi yide'en: ku adømbøkyøjxp tijj ja Dios ja y'øy'ajtin tyiknigaxi'iky, ¿sats adøm idø'on ja'abi ayuujk nja'gyukandit? ¿Ka' idø'on ja Dios y'øyi ku ja nyikjotmajtyindi, jøts ja ayo'on xjaniguejxyindi?

⁶ Niijuuni ka' yjade'eni! Ku Dios jeexyip kya'øyi, ¿sudsots ja jeexyip ttidyuñ ja naxwii'ñit jaa'y?

⁷ Jøts kuts øts nbøky jeexyip yjanchtuñ jøts ja Dios tyiy'ajtin tyikwingaxø'økt, ¿sudsots ø nyikpøky'ixy jøts ku øts nbojkrpitumbijaa'y'i?

⁸ ¿Winets ja tum øy wyimbejtxit ku pøn ttuñ tum ja ka'øybi? Jade'en ja jaa'y winaagin kya'øwysinmaydi jøts wya'andi, jøts ku ja'abi øøts jade'en ndukni'ixpøki. Yø'øbi jaa'y paat'ajtidip ja ayo'on.

Niduki'iyi ja pøky xaja'jtyindi

⁹ ¿Tits adøm idø'on? ¿Ku adøm n'israelitjaa'yindi, paty adøm jawaani njaaktyimy'øyindi, jøts nika' pøn jade'endi? ¿Ka'ap yjade'eni! Pø tøxi nnigajpxy jøts ku tum ja pøky yik'adsøøni, wan t'israelitjaa'yidi uk wan tka'israelitjaa'yidi.

¹⁰ Ja'agøjpxxi jap nøkyijpxy yide'en wya'añ: Ka' pøn y'øyi, nitu'ugin kya'ity pøn øy;

¹¹ nipøn kyaja'gyuki, nipøn tkanijawiwya'añ ja Dios.

¹² Tum ja wenk tuu' tø tpøjknidi, windigøy ni'ijtyi yjatti.

Ka' pøn tjomay'aty ja øwysinmaa'ñ, ok idø'on tu'ugin ja'abi twinmaa'ñ'att.

¹³ Tum ja axøøk kajpxy pidsømp y'aawjøtpy yukjøtpy; ja win'øø'nk ja'ayi majyip.

Wingajpxnajxpm kyajpxy;

¹⁴ tum ja ka'øybi kyajpxpidsømdip, kixy kyubety wya'andi.

¹⁵ Jøts ja'ayi majyidip ku tnibutti tniga'akti ja yikjaa'y'oo'k;

¹⁶ ja' tyunk'ajttip ku yikudigø'ødyit ku y'ayo'ondu'undit,

¹⁷ jøts ka' tnijawidi ja øy'ajtin ja tuda'aky'ajtin.

¹⁸ Niwine'enin tkawinmaydi jøts twindsø'øgidit ja Dios.

¹⁹ Jøts yiknija'wip sã jaty ja Moisés kyutujk wya'añ, ja'ats ja yikta'ana'amdip ja israelit jaa'dyi pøn ja tø yiktanibiktaagidi, ja'agøjpxts ne'egi amøni tyimy'ettit, jøts jade'en niduki'iyi ja naxwii'ñit jaa'y tpaattit ja Dios tyidyu'unin;

²⁰ nipøn ja Dios tka'øy'ext øy ja tø tjabaduñ midi ja kutujk ñi'ane'empy, jøts ja'ayi ja ñigajpxy ku adøm nbojkrpitumbijaa'yindi.

Janchja'wingøjxp ja nitso'ok'ajtin yikpaaty

²¹ Jats jadu'uk ja winmaa'ñ sã Dios xkupøjkin. Yjadyimyjanigajpxy ja Moisés ja kyutujk ja kø'øm, jøts nayi tø ja Dios kyugajpxy ja nayide'en tnigajpxti.

²² Ja' idø'on ja Dios Teety kyupijky pøn tjanchja'widip, pøn t'ajot'ajttip ja nwindsøn'ajtim Jesucristo; kyupijky ja øy pøn, ka'ap ja pøn jadu'uk jadu'uk twenk'ixy,

²³ niduki'iyixi jaa'y pyøkyundi, jøts ka'ap pøn tminaxy ja pyøky jam Dios wyingujkp. Jagam jixkø'øm ndsinaa'yindi, ni sudso'ampy ja ñitso'ok'ajtin ja ngapaajta'am.

²⁴ Ejxim ja Dios Teety y'øyi ku ja jaa'y tyiknitso'ok'aty nwindsøn'ajtim Jesucristo køjxp, jøts jade'en tmay'aty ku tkupiky.

²⁵ Ja Cristo ja Dios Teety pyiktaajk jøts ja tkudanaajyt ja naxwii'ñit jaa'y pyøky ku ja tku'oogit. Winets wyingaxi'ikñim adøm ja nitso'ok'ajtin

ku ja njanchja'win, jøts ja Dios Teety jade'en xuknija'win ja y'øy'ajtin ja tyuda'aky'ajtin, jøts ku ja tkadagubety ja pøky midi tø yiktuñ jawyeen ku ja nwindson'ajtim tkagu'ooginim ja pøky.

²⁶ Ja'agøjxp jade'en yjaty jøts nnija'win jøts ku Dios Teety y'øy'ajtin tyiy'ajtin tyik'awa'añ, jøts ejtp jade'en øy juuni tkupiky pøn tjanchja'widip ja nwindson'ajtim Jesús.

²⁷ ¿Mats ja namyikaxi tyuñ? Pø ka'axi ja tyuñ ku ja janchja'win njagyajpin, ku njanchja'wyin ja nwindson'ajtim. Ja' ja tyiktundip pøn tta'ødyøkwyandip ja tunk ma Dios, ku ja kutujk nadyijyi tpadundi pøn ja janchja'win tkajagya-lptip.

²⁸ Jade'ents yik'ixy yiknijawi jøts ku janchja'wingøjxp ja jaa'y yikupiky jam Dios wyingujkp. Ka'ap ja yikpayø'øy pøni sa ja tø tpaduñ tkabaduñ ja kutujk sa ja y'ane'emy.

²⁹ ¿Ti ja israelit jaa'y nugo ja Dios Teety y'eix'ijtpy, jøts ja ka'ap t'eix'tity pøn ka'israelit jaa'dyi? Ka'ap yjade'eni, pø tum ja'axi amuum tja'ajtp.

³⁰ Tu'ugyi Dios, ka'ap ja Dios kyawinaagi; jøts pøni pøn tmøøt'ajtp ja janchja'win, ja'ats ja Dios kyupijky, wan tmøøt'aty uk tkamøøt'aty ja ejxpajt ñe'kkkøjxp sam ja israelit jaa'dyi.

³¹ ¿Ja'agøjxp adøm ja kutujk nga'ukpadu'unindit ku ja janchja'win nmøøt'ajtyindi? Ka'ap yjade'eni, jabi jade'eni ne'egi ka'pxy ja kutujk yikpaduñ ku ja Cristo njanchja'wint.

4

Sa ttunjøpi ja Abraham

¹ ¿Ti adøm n'apteety'amøj Abraham tyuun jøts Dios ja ojts kyupiky?

² Ku jeexyip ja Abraham ja'agøjxp ja Dios kyupiky ku ja wyinaty tø ttuñ tigati, nadyamøjyipts ja jeexyip.

³ Yide'ents jap nøkyijxpy wya'añ: "Ojts ja Abraham tjanchjawi ja Dios, ja'ats ja Dios y'øyja'wiyi'ñ jøts ja ojts tkupiky."

⁴ Ku pøn øy ti tunk ttuñ jøts ku ja yikmijuy, ja tyunkts ja yiknimiju'uyip, ka'ap ja niñamyay'ati tpaaty, ja' ja kyudøjkp ku ja tø tyuñ.

⁵ Pønts ja tunk tkada'ødyøjkp ma Dios, øy ja ti tjagatuñ, jøts ku ja ja'ayi tjanchjawi ja Dios ku ja pojkpitumbi jaa'y ja tpojkpimee'kxy, ja'ayi ja Dios tyajotkujk'ajtpy ku ja tjagyepy ja janchja'win, jøts ja tmay'aty jade'en ku ja tkupiky.

⁶ Nayide'en ja David ojts wya'añ ku ja ojts tnigajpxy sa ja jaa'y xyonda'aky pøn ja Dios kyupijky, jøts ja ka' tmøjpkta'aky pøni sa ja jaa'y tø y'adi'ich.

⁷ Yide'en ja wya'añ:

Nekim ja jaa'dyi pøn ja Dios ttamaa'kxidip ja tyundigø'øyin, jøts ja ka'ap myøjpktaajkxiyidi ja pyøky.

⁸ Nekim ja' pøn ja nwindson'ajtim pyojkpimee'kxpy.

⁹ ¿Ja'ayi dø'øn nugo jade'en nekim t'ejxtip pøn ttundip ja ejxpajt ñe'kkkøjxp, uk nayide'en idø'øn ja'amidi pøn tkatundip ja ejxpajt? Nnija'windipts jøts ku ja Abraham ja'agøjxp ja Dios ojts kyupiky ku ja ja'ayi tjanchja'wi.

¹⁰ ¿Juunits idø'øn ja jade'en yikupiky? ¿Tø wyinaty ja Abraham jawyeen ja ejxpajt yikpktaajki, uk ka'anim? Ka'anims ja wyinaty ttuñ ja ejxpajt.

¹¹ Oojknim ja Abraham ojts yikpktaajki ja ejxpajt ku ja ojts yikt-suky ja ñe'lx, ejxa'an ja wya'añ jøts ja yiknijawi ku Dios ja tø kyupiky yjanchja'wingøjxp. Jade'ents ja Abraham ttunjøpiyi'ñ, jøts ja nayide'en

niduki'yiyi janchja'wingøjxp yikupøkti øy ja tmøøt'atti tkamøøt'atti ja ejxpajt ñe'kxkøjxp.

¹² Janch jade'en ku ja Abraham idø'øn kyudanaabyi'ajtp pøn ja ejxpajt tmøøt'ajttip, kidi ja'agøjxpij ja ja'ayi ku ja tø yiktu'unxidi ja ejxpajt. Jade'en'ampy ja tijy jøts ku ja tpa'ejxti, jøts ja nayide'en tjagyapti ja janchja'win sa ja Abraham, ku ja wyinaty ka'anim ja ejxpajt yiktu'unxi.

Jaa ja Dios y'aduky ja kyajpxy ku ja yikjanchjawi

¹³ Jade'en ja Dios wyanda'aky, jøts ja Abraham møøt niduki'yiyi wine'enin ñajtska'axidi yikmo'odit amuum ja naajx kajp wine'en y'ity naxwiiñ; kaja'agøjxpipts ja wanda'aky ojts yikpikta'aky jade'en ku ja kutujk ja wyinaty ka'pxy tø tpaduñ ja Abraham, pø jade'en'ampyxi ja jade'en ku Dios ja tjanchja'wi, jøts ja' ja wyinaty tø tyagupiky.

¹⁴ Jøts ku jeexyip ja'ayi yikupøkti pøn tpadundip ja Moisés kyutujk, jøts ja'ayi jeexyip yikmo'odi ja Dios y'øy'ajtin, ka'ats jeexyip tyuñ ja janchja'win, jøts ni ja Dios jeexyip ja wyanda'aky niti kyawa'añ.

¹⁵ Pø tiidyumpxi ja kutujk; mats ja kutujk kya'ity, ka'ap jam ti yikmidundigøy, jabi niti ana'amixi jam.

¹⁶ Jade'en'ampyts idø'øn Dios ja twandaajky ja'agøjxp ku ja janchja'win ojts t'ixy, jøts ja tmay'att niduki'yiyi pøn nayide'en ja janchja'win tjagyajp sa ja Abraham. Kidi ja'ap ja Dios tyamiwandaajki ja y'øy'ajtin pøn tpadundip tkabadundip ja kutujk, pø ja'axi tyamiwandaajki pøn tjanchja'widip ja Dios sam ja Abraham ttunjøpiyiñ. Jade'ents idø'øn ja tpaaty, ja' ñamyayi tñigubajk'ajtp ku ja jade'en ojts tjanchja'wi ja Dios, jøts ja' adøm ñamyayi ndeety'ajtyindip

¹⁷ jam Dios wyingujkp, pø nayi Diosxi ja yjanchja'wiyiñ ku wya'añ ja Dios kyajpxy: "Tø me nbikta'aky møjaa'y'ajtpi o ma'et o magajp." Janch møj ja Dios, øy ja tyikjujkyøkt pøn tø y'oo'kni tyigøøñ, jøts nayide'en tnanky'ijxyi o ti pikta'aky midi ka'eitpni.

¹⁸ Øy ka'ap ti jøp'ejxin, ka'ap ti winmaa'ñ, ojtsts ja Abraham ja tjanchjawi jøts yjöp'ijxpy ja', xjats idø'øn ja jade'en may jaa'y ñamyayi tñigubajk'aty sa u'nkteety y'u'nk y'una'jk tñideety'aty, jade'en sa dø'øn Dios ja wyinaty tø ñii'mxyi ku ja wya'añ: "Janch may ja m'u'nk m'una'jk xpaat."

¹⁹ Magø'pxy ja Abraham wyinaty ja yjumøjt jøts ka'ap ja sa tijy, amuum ja t'ajot'aty øy ja ñidø'øxy Sara ja møøt tø yjamøjaa'yinidi, ka'ap ja y'u'nk y'una'jk t'ukpatnidit.

²⁰ Ka'ap ja sa tijy, ka'ap ja tka'øyja'wiyi ja Dios wyanda'aky, ne'egi ja amumjoojt tpiktaajky ja yjanchja'win jøts ja tmøjawi tkunuu'kxyjawi ja Dios,

²¹ jøts ja tu'ugyi tjøp'ijxy jade'en jøts ku Dios tjagyepy møk'ajtin, jøts ja ttu'unt jade'en sa ja wya'añ.

²² Jade'en'ampy ja Dios ja ojts kyupiky ku y'ijxyi jøts ku myajada'aky ja yjanchja'win.

²³ Jøts ku dø'øn Dios ja jade'en tkupijky ja yjanchja'win, kidi ja Abrahamip ja ja'ayi kyupøjkijp jøts ja jade'en yikjaadyañ;

²⁴ pø nayide'enxi adøm ja xkupijyim ku adøm ja Dios Teety njanchja'want. Pø ja'axi tø tyikjujkyiky jadigojk xemikøjxp ja nwindson'ajtim Jesucristo,

²⁵ pøn ojts yikøyaky jøts y'oøkt adøm nbøkyøjxp, jøts jade'engøjxp ojts xemikøjxp yjujkyiky jadigojk jøts adøm nyikupøjkint jam Dios wyingujkp.

1 Kuts ja Dios Teety xkupøjka'an ja njanchja'win, jøts jade'en ja nmiduda'aky'ajntin ja nwindson'ajtim Jesucristo køjxp.

2 Ja'agøjxp adøm ja Dios Teety møøt n'ijtyindi ku ja nwindson'ajtim njanchja'windi, paty adøm ja xkunuukxyindi. Ja' adøm xyik'ejtindip tu'ugyi ja nwinmaa'n jøts ja xondaajkin xmø'øyindi, jøp'ijxy nyik'ijtyindi jøts ku ja nbaajta'andit amuum ja y'øy'ajtin.

3 Jøts nayide'en adøm ja ka'ap nwandijyindi ja ayo'on, øy adøm ja ngu'ayo'owa'andi jotkujk; pø nnija'wandipxi adøm ku n'ayo'owan winets ja tuda'aky'ajtin nbaajtindit,

4 jøts ja tuda'aky'ajtin ja' øy xyikwingaxø'jkindip, ja' xukjøp'ijxy'ajtindip midi ja Dios tø xanibiktaajkandi.

5 Jøts ka'ap majtsk'aaaw majtskjoojt n'ejtindit, pø tøxi ja Dios amuum xmø'øyim ja y'øy'ajtin ja pya'ayo'owin ku ja tø xuktatøjka'am ja y'Espiritu Santo.

6 Ku adøm wimbeets kugoots nmijajtyim ja nbøky, niti nitso'ok'ajtin kø'øm ngapaajtyim, xjats ja Cristo tø myiñ winet, jøts ja tø tkudani ja ka'øyjaa'y pyøky ku ja tø y'øøky.

7 Ka'ap pøn nugo tnigyu'oogi jadu'uk, ni jade'enbaat øy pøn mabaat yjady-imyja'øyjaa'y; pø wants winaagin pøn ñay'a'ejxyit jøts ja tku'oogit.

8 Xjanchojkimpts adøm ja Dios ku adømøjxp y'øøky ja nwindson'ajtim Jesucristo, øy adøm njapojkpitumbijaa'yandi.

9 Jøts tøts ja Dios xkupijkyim ja nwindson'ajtim Jesucristo pya'ayo'owingøjxp ku ja tø xku'o'jka'andi, jøts ne'egi jinaxy ja nøjcx xuknitso'ok'ajtyindi ja møk ayo'on, jøts ja ka'ap xuku'o'jka'andit ja nbøky, ja'ayu nwindson'ajtim Jesucristo køjxp.

10 Njagami'øy'ajtyindip adøm ja Dios, jøts adøm ja jade'en xjaaktuu'mø'øyindi sudso ja jadigojk nmijotjimbejtindit, ja'agøjxp y'ø'jky ja y'U'nk adøm nbojkpikøjxp. Mats ku ja ixyam yjujky'aty xemikøjxp, jøts ku adøm ja tø nmijotjimbijtyindi ja Dios, zti jats adøm ndejint ja winet xka'ukyknitso'ok'ajtna'ant?

11 Xon'ejtnamdip adøm ixyam ja'agøjxp ku ja nwindson'ajtim Jesucristo tø xukmig'uakwa'añim jadigojk ja Dios Teety.

Ja Adán jøts ja Cristo

12 Jøts tu'ugyi ja jaa'y pøn pøkyun'okwaan ya naẁwiñ, jøts ja o'jkin tigøø'yin jade'en'ampy ñaxkidaajky, niduki'iyi øy pøn pyaadyi ja'agøjxp ku ni'ijtyi nayide'en tø pyojkpitunidi.

13 Ku ja kutujk wyinaty kya'itynim, jaayim ja pøky wyinatyni ya naẁwiñ; jaa ku ja Dios ka' tpayø'øñim, pø ka'anixi ja kutujk wyinaty te.

14 Ku ja et ja xøøw ñajxy midi tso'ondaajk Adán ñikøjxp jøts yjøkixy Moisés ñikøjxp, jøts wine'en pøn pyøkyundøø, ja' idø'on ja o'jkin tigøø'yin mimajadaajkidøø, øy ja tjagajagyapti ja'abi pøky midi ja Adán tyuun ku ja tkamimadøø ja Dios; sa ja Adán tyiktso'ondaajky ja pøky, nayide'ents ja tu'ugyi myenwami wyinaty pøn ja øy'ajtin nitso'ok'ajtin xukpaajtmandip, xjats tø myiñ ja nwindson'ajtim Jesucristo.

15 Windemts ja møøt n'uk'ejkijpxyin ja Adán tyundigøø'yin møøt ja Dios y'øy'ajtin midi ja xmø'øyindip. Tu'ugyits ja jaa'y pøn ja pyøky tø xukno'jka'andi niduki'iyi jøts windigøø n'ejtna'andi; jøts tu'ugyi ja nayide'en ja nwindson'ajtim Jesucristo pøn ja Dios xuknitso'ok'ajtindip ja nbøky, jøts

ka'ap ja pøn tmi'abaaty, namay adøm nyiktamay'ajtyindi ja nitso'ok'ajtin jøts adøm ja xmø'øyindi.

¹⁶ Ti'in ja ndami'a'ejxin ja tu'ukpi jaa'y pyøky møøt ja Dios ñitso'ok'ajtin. Tu'ugyi ja tundigø'øyin ja'ats yikpayø'øpy jøts tø nbøkpyajtkijxyindi; kuts ja Dios xmø'øyindi ja nitso'ok'ajtin, tyamay'ajtpy ja jaa'y ja ñamyayi jøts ja xkupijkyin, øy wine'en tø njapojkpit'uñindi.

¹⁷ Ku ja tu'ukpi jaa'y tø pyojkpit'uñ, ja'agøjxpts ja o'jkin myajada'aky jøts ja yikudigøy, møjts ja Dios jøts ja ttuñ ja may'ajtin, jøts ja tyaky ja myøk'ajtin midì yikjujky'ajtp xemikøjxp ku tu'ugyi njanchja'want ja nwindson'ajtim Jesucristo.

¹⁸ Jade'en sam ja Adán pyøkyøjxp ja jaa'y ttukpaatkijxy ja kudigø'øyin, nayide'en ja nwindson'ajtim Jesucristo y'ødyu'uningøjxp ttukpaajty niduki'iyi ja naxwii'ñit jaa'y ja nitso'ok'ajtin, jøts ka'ap ja møk tiidyu'unin tpaattit pøn jaty tjanchja'widip.

¹⁹ Tu'ukts ja jaa'y pøn kamadoow, jøts ja'agøjxp ja pøky xaja'atkijxyindi; nayide'ents ja tu'ukmi pøn tuki'iyi tmimadoow ja Dios Teety, jøts ja'agøjxp adøm nyikupijkyindi jam Dios wyingujkp.

²⁰ Jøts ku ja kutujk yikpiktaajky, ja' ja yiktanibiktaajkyi'i'ñ jøts ja pøky wa'ats yik'ejxkapt; jøts ja pøky møjta'adøtsp ja', jinaxys ja Dios y'øy'ajtin myøk'ajtin tyikmøji'adi'ich nayide'en.

²¹ Sam ja pøky myajada'aky ku ja tyiknaxkida'aky ja o'jkin tigø'øyin, xjats ja Dios ja y'øy'ajtin nayide'en tyikmajada'aky sudso ja xkupøjkin, jøts ja nwindson'ajtim Jesucristo køjxp xmø'øyindi ja jujky'ajtin xemikøjxp.

6

Ka'ap ja pøky myajada'aky ku ja Cristo yjujky'ajtin nmøøt'ajtyindi

¹ ¿Tits njaaktu'unindip? ¿Jaaktyimbyøkyun'adøjtsindip adøm idø'on ja'agøjxp ku tø nnija'windi jøts ku ja Dios xu'unxim ja may'ajt ku ja xpojkpimee'kxyindi?

² ¡Ka'ap jade'en pyaadyi! Pø tøxi adøm nmajtstuujtyindi ja pøkyu'unin; ¿jøts sudso adøm jade'en nbøkyun'adøjtsin?

³ ¿Ti ka'ap xnijawidi ja nnøbajtin, ti ja tyijpy? Pø ja'agøjxpxi adøm tø nnøbejtyindi jøts nmøøt'ejtindit ja nwindson'ajtim Jesucristo, jøts yiknijawit jøts ku adøm ja nbøky ja tø xmi'o'jka'andi.

⁴ Møøt adøm ja Cristo ñamyayi nnaxøjka'andi jøts ja møøt n'øøky'ijtyindi, jøts ku ja yjujkyjky xemikøjxp jøts adøm nayide'en nbajtma'an ja jemchinaa'yin midì ixyam jøts midì xemikøjxp, sam ja Dios Teety ja tyukmimadaajkøø ja o'jkin, jøts ja myøk'ajtin myø'øyi, jøts ja yjujkyjky xemikøjxp. Nay ja'ats idø'on yiktump ku ja nøbajtin yikpaaty.

⁵ Pøni tødams adøm ja Cristo nmøøt'ø'jkyim nayide'en sam ja o'jkin ja tø tpaaty, nmøøt'ijtyindipts adøm ja', jøts ku ja yjujkyjky xemikøjxp jøts nayide'ents adøm ja nmøøtjujkyjky'ajtkma'andi.

⁶ Nnija'windipts adøm sa jaty tø njaa'y'ajtyindi, jøts ja' ja Cristo myi'o'jk jam kruskøjxp, jøts adøm ja nbøky xniwaajchim jade'engøjxp ku ja y'ø'jky, jøts ja ka'ap x'ukmimadaajkna'am, jøts ja ka'ap jade'en n'ukmidu'una'ant sa jaa'y ja wyindsøn tmiduñ, jade'en ja pøky ñamyayi yikmiduñ.

⁷ Pønts tø y'øøky, tøts ja pøky ja ñiwaajtsniyi.

⁸ Pøni nmøøt'ijtyindip ja Cristo øy ja møøt nja'ø'jkyim, njøp'ijxy'ajtyindipts ja' jøts ku ja møøt njujky'ajtindit xemikøjxp,

⁹ pø nnija'windipxi jøts ku ja Cristo tø yjujkpyiky xemikøjxp, nijuuni kya'uk'oo'knit, nijuuni kya'ukmimadaajkniiyt ja o'jkin.

¹⁰ Tuk'ojkyi ja ja'ayi ttuku'o'jkiyi'ñ amuum ja pøky; jøts ja ixyam xemikøjxp yjujky'aty amuum ja Dios Teety tmøøt'ity.

¹¹ Jøts nayide'ents meets idø'ønmidi, øøky tigøy ndejint mnabyikta'agiyidit jøts ja pøky jade'en xkayikmøj'attit, wijy kejy meets ne'egi mnabyikta'agiyidit ku ja Dios yja' xpaduujnidit, ja'agøjxp ku ja nwindson'ajtim Jesucristo xmøøt'atti.

¹² Paty ka'ap mbaat'atyidi jøts nugo xyikmajada'aktit ja mbøky ja mga'øwvinmaa'ñ, øy sã mduktunwa'añidi pøni sã ja ttsøky.

¹³ Kidi mnagyøyakyidi ma pøky, jøts ja kidi mduktuñidi ja ka'øy'ajtin. Ne'egi amuum mnayoxidit ma Dios, jøts ja mduktunidit tum ja øy'ajtin. Ka'ap meets ja pøky xukmijujky'ajtnit, jabi tøxi meets ndejint tø m'ats'øøky, jøts tø mjujkyøkti jadigojk, jøts ja jujky'ajtin tø xpaatti midit xemikøjxp.

¹⁴ Jøts ja pøky ka'ap meets ja m'ukmimajadaajkniiyt, pø kidi ja Moisés kyutujkipxi meets mnitanaajyip, ja Diosxi meets ja kyunuu'kxin mdanitanaajyiyip.

Ja ejxpajt madya'aky ku ja jaay ja wyindsøn aguwanì tmiduñ

¹⁵ ¿Sudsots adøm? ¿Jaaktyimbyøkyun'adøjtsindip adøm ja'agøjxp ku ja Dios xanitanaa'yindi ja y'øy'ajtin, ku adøm ja kutujk ka'ap xiidyu'uñindi?

¹⁶ Jøts mnija'widipts wa'ats ku tu'uk ja windsøn x'ukmidundøkidit, tu'ugyits ja xwindsøn'attit jøts ja' kuwani mmimado'odip, pø ja'axi wyinaty mdumbi'ajtidip. Nayide'ents idø'øntpaaty ndejint ku ja pøky xmimado'odit, ja' meets idø'ønt ndejint windsønbojknip øy ja yjayik'øøky yjatyiktigøy, uk nayide'ents ku tu'ugyi ja Dios xmimado'odit jøts jade'en xu'undit sã ja ttsøky.

¹⁷ Janch møj ja Dios ku ja y'ixpøjkin xpaduujnidit midit tø myiktagidøkidit, jøts ja pøkytunk tø xmajtstu'utti midit y'ijty niwa'añ myik'ejtniyidip.

¹⁸ Tøts ja pøky mniwa'achidi ku ja ka'ap m'uknimajadaajkniiyidi, jøts tø xpatwa'jkidi ja øy'ajtin midit ja Dios yja'ajtpy.

¹⁹ Jade'en ndukmadowdi sã ø najtsjawì xmadodø'ødit, jøts nayide'en xnadyamiyoxidit ja Dios. Sam y'ijty mnagyøyakyidi amuum jøts xundi ja ka'øy'ajtin ja axøøk'ajtin, nayide'ents idø'ønt amuum ja Dios xnadyamiyoxidit, jøts xuujnidit ja y'øy'ajtin jøts amuum xmøøt'ettit ja Dios, tu'ugyi xagødøkidit ja mdsinaa'yin.

²⁰ Ku meets ja pøky y'ijty mganiwa'achinim, ka' meets y'ijty xuujni ja Dios yja', ja tiy'ajtin øy'ajtin;

²¹ Jøts ¿ti jade'en tø xpøkti? Mdatsø'ødyundip ja ixyam jadigojk, pø ja'ayixi ja yajkpy ja o'jkin tigø'øyin.

²² Kuts tø mniwa'achidi ja pøky jøts ja Dios y'øy'ajtin tiy'ajtin tø xpadøjkiyidi, yø' tiy myiktu'undip, yø' mmo'ojidip sudso xmøøt'ettit sudso xmidu'undit amuum ja Dios, jøts xpaattit x'ejxtit ja jujky'ajtin xemikøjxp.

²³ Ja o'jkin tigø'øyin, ja' ja pøky ja'ayi yajkpy. Kuts ja Dios møøt, ja jujky'ajtin ja Dios xamay'ajtim midit xemikøjxp yikpatp, ku møøt n'ejtin ja nwindson'ajtim Jesucristo.

7

Amajtsk'ajtingøjxp tu'uk ja ejxpajt madya'aky pyisimsy

¹ Mee migu'uktøkkti, meets mnija'wip sã ja kutujk wya'añ, jøts mnija'wip jøts ku ja ya ja kutujk tmøøt'aty ja møk'ajtin ku jaay jaagya yjujky'attinim.

² Ku n'ukpiktaajkint, ku tu'uk ja tø'øxyøk y'amajtsk'aty, kutujkøjxpts ja tmøøt'amajtsk'aty ja ñiyaa'y pøni jaakjujky'ajtpnim ja'; kuts ja y'øøky ja ñiyaa'y jøts ja nayide'en ja kutujk ñiwa'a'achi, ku y'øøky pøn ja y'ity møøt y'amajtsk'aty.

³ Kuts ja tø'øxy jadu'uk yaa'dyøk t'adsøy jam ja ñiyaa'y yjajujky'atynim, pøkyts ja tyumpy; kuts ja kyu'øøgyi, niwaaajtsip ja kutujk ja', øy ja møøt jadu'uk ja yaa'dyøk y'amajtskit, jøts ka'ap ja pyøkyi.

⁴ Jade'ents mee migu'uktøk idø'ønmididi pøni niwine'en ja Cristo mja'atyidi, myikniwa'a'ats'ajtniyip meets ja Moisés kyutujk, tøxi mee ñamyayi ku'øøky mdañ ku ja pøky tø wyindigøy jøts ja wenkpi xpadøkidi. Ja Cristo meets ixyam mja'ajtniyidip pøn jukpyøjk xemikøjxp, ja'agøjxp ja yjajty jøts jade'en'ampy nmidu'unindit ja Dios.

⁵ Ku adøm y'ijty pøky y'agujkp ndsinaa'yimnimidi, jøts ja kutujk ja' ja wya'añ jøts ja tyikjinaxy adøm ja nga'øwyinmaa'ñ, ku ja ngabadu'uñindi jøts ja niti nitso'ok'ajtin xkadukjøp'ijxyindi.

⁶ Ixyamts tø xniwaaajchim ja'abi kutujk, tø ja ñamyayi ngu'ø'jkyim jøts ja tø xuk'ixmajchim ja myøk'ajtin; jøts adøm tø n'awa'a'atspidsø'ømyindi, tu'ugyits nmidu'unint ja Dios jøts ja y'Espíritu Santo ja jemy jujky'ajtin xukmi'ejtint mididi xemikøjxp, jøts ka'ap ja'abi møjaa'gyutujkin x'uk'ana'amnandit mididi y'ijty nbadu'uñindip.

Ja pøky mididi xmi'ejtp

⁷ ¿Wa'ananim jøts ku ja kutujk pyøkyi? ¡Ka'ap! Ku jeexyip ja kutujk kya'ity, ka' øts jeexyip nnijawi ti pøky'ajtp, ku ja jeexyip tkanigajpxy kudam ja pyøkyi ku ja nmigu'uk pyikta'aky njanchpøkwa'anxant.

⁸ Ja'agøjxpts ja pøky tø myøjtøki jøts ja myøj'aty. Pøni sã ja kutujk yja'ane'emy jade'ents øts ja nnijawi mididi'ibi ka'øy, jøts øts ja jinaxy nduñ sam øts y'ijty nga'adi'ich ku øts ja kutujk nganijawinim. Ku ja kutujk kya'ity, ka'ats ø nnijawi mididi pøky.

⁹ Tø øts jade'en njaty ku ja kutujk ka' nnijawinim, tøøp ø njawi n'adi'ich, ka' njawi ja pøky. Kuts ø tø nnijawi sã kutujk y'ane'emy, jøts øts ja nbøky njawi yjaaktyimyjadak'adi'ich, jøts øts ja kawindem paadyim xuk'ijxy ja øy'ajtin ja kunuu'kxin.

¹⁰ Wimbet øts ja nduñ sã ja yja'ane'emy, mididi'ibik øts idø'øn xukpaatp ja øy'ajtin, tø øts ja ne'egi xyikpøkyety.

¹¹ Ja pøky ne'egi nankmyøjtøkiyip pøni sã ja kutujk y'ane'emy jøts øts ja win'øø'nin tø xmø'øy. Nay ja kutujk øts jadigojk xanikajpxp ja o'jkin tigø'øyin.

¹² Ja kutujk, øy ja', jøts øy wa'a'ats yikutuky nayide'en, øy'ajtingøjxp tiy'ajtingøjxp yikutuky.

¹³ Jøts pøni øy tam ja kutujk, ¿sudsøts øts ja xpayø'øy, jøts øts ja ñamyayi xuk'ejxni ja o'jkin tigø'øyin? Jøts øy ja kutujk, ja pøky øts jade'en xyik'ejtnip øøky tigøy, ka' ti jøp'ejxin, jøts øts ja jade'en xuknijawi jøts ku ja' pyøkyi; tamibøki mididi øy, jøts øts ja kutujk jade'en xuknijawi jøts ku ja pøky ni sudso'ampy kya'øyi.

¹⁴ Jøts nnija'windip adøm jøts ku ja kutujk Dios tja'aji. Jøts po-jkpitombijaa'y'ajtp øts, jade'en'ampy øts ja pøky xnimajada'aky.

¹⁵ Ka' øts nja'gyuki pø ti ø xjajtp, tum jiwimbejts ø nduñ, kuts ja njatunwa'añ mididi øy, ja kya'øybi øts ne'egi xnimajada'kp mididi njagatun-wampy.

16 Kuts øts ja nduñ ja ka'øybi midi njagawampy, jade'engøjxp nnijawwi ku ja kutujk y'øyi, ja'abi kutujk ka'axi tyikutuky jøts ja'abi ndu'unint.

17 Kidi øtsip ja kø'øm ñamyayi jade'en ndyimyjatumpy, ja pøky jade'en adøtsp midi ø nnikøjxp'ajtpy.

18 Nnija'wip øts sa jaa'y'ajtin yikjagyepy, niwīne'en ja ka'øy'ajtin kyayik-mødi; njatsøky'ajtpy øts jøts ja øybi ndu'unt, ni ka'apts øts ja nduñ.

19 Ka' øts ja øybi tsujpi nduñ midi njatsøjkpy, tum ja ka'øybi ø ndun'adichpy midi njagatunwampy.

20 Kuts øts idø'øn ja nduñ jade'en midi ø ngatsøjkpy, ka'ap øts ja kø'øm ndsøkyøjxp nduñ, pø ja pøkxyi øts ja jade'en xuktump midi ø nnikøjxp'ajtpy.

21 Jade'en njaty ngubety, ku øts ja njatunwa'āñ midi øy midi tsuj jøts tum ja ka'øybi ø ndumpy.

22 Wamp øts n'am njotp jøts ku øts ndsojki ja Dios kyutujk;

23 kuts ø kø'øm nnay'ijxyi, jøts ø njawi jøts ku ja jaa'y'ajtin ka'ap jade'en ttsøky sam ø njawinmay, ja pøkyts idø'øn xuktump midi ø nnikøjxp'ajtpy, jøts ja' ø xkamajstutp jøts ja øybi ndu'unt.

24-25 Ja Dios øts ndagødøjkp ja nwinmaa'yin jøts øts nbaduujnit ja kyutujk, jøts øts ja njaa'y'ajtin ja' ja y'adsinaapy ja pøktyu'unin, ja' ja mimajadaajkip. ¡Ti ø njanch'ayøøy! ¿Pøn øts ja pøky xuknitso'ok'atp midi øts jam nikøjxp'ajtpy, midi øts xyik'ookwamp xyiktigøwyamp? Kuuyi Dios amuum, nwindson'ajtim Jesucristo køjxp yikpaaty ja nitso'ok'ajtin ja'ayi. ¡Janch møj ja Dios!

8

Ja jujky'ajtin midi Dios xmøø'yim

1 Pøn tmøø'tejttip ja Jesucristo ka'ap Dios Teety ja mibaat tyaguwaniyidit jøts ja y'ayo'odit, kumi ka'ap ja t'ukyikmøj t'ukyikmøjtøjkifniidi ja pøky.

2 Ja Espíritu Santo midi tyajkp ja jujky'ajtin xemikøjxp ku nmøø'tejtint ja nwindson'ajtim Jesucristo, ja' øts ja pøky tø xukniwa'āch midi øts øøky tigøy tø y'ity xyik'ejtnip.

3 Jade'en'ampy ja kutujk y'ijty kyamajada'aky ku adøm n'ambojkipitu'uñim nadsaachpøjkpitu'uñim. Tøts ja Dios Teety tkexy ja y'U'nk, jøts ja nayide'en tñanky'ijxyi sam ja jaa'yin, jøts ja tku'o'jki ja pøky. Xjats ja tø tmimajada'aky jade'en'ampy ja pøky, jøts adøm ja ka'ap x'ukmimajadaajkna'am.

4 Ja'agøjxp ja jade'en tø ttuñ jøts adøm ja kyutujk ja wa'ats nbaduujna'am, pø ja'ayixi adøm ja Espíritu Santo yja' nbawinmaa'jyam, jøts kidi kø'øm winmaa'ñip adøm nyikmajadaajkyim.

5 Pøn kaniwaajtsipnim ja pøky, ja' yjotmay'ajttip sa kø'øm wyinmaydi; pønts tpaduujnidip ja Espíritu Santo yja', nay Diosts chøky'ajtin ja ja'ayi pyaduujnidip.

6 Jøts ku jade'en njotmay'ajtin sa kø'øm nwinmaa'yin, yø yjade'embidø'øn yikwindigøøpy; kuts njotmay'ajtin ja Dios yja', ja'ats xukpaajtimp ja jujky'ajtin xemikøjxp, jøts ja øy'ajtin midi Dios yajkpy.

7 Pøn ja kø'øm winmaa'ñ tyiktundip sa kø'øm wyinmaydi, ja Dios ja jade'en myidsepøjktip kumi ka'ap Dios kyutujk ja ttsojkidi, jøts nika'ats tjajtmidi sa tpadu'undit.

8 Paty idø'øn pøn ja'ayi ttundip ja kyø'ømwinmaa'ñ midi pøkmyøøt, ka'ap Dios ja mibaat jade'en twindsø'øgidit.

⁹ Jøts meets, kumi ka'ap meets x'ukyiktuni ja mgø'ømwinmaa'ñ, ja Diosts meets ja y'Espíritu Santo mjagyajpip, ja' mee myikjujky'ajtniyidi, pø ixamxi ja xnikøjxp'ajtnidi. Pønts tkayiktuujnip ja Espíritu Santo, ka'ap Cristo ja yja'atyi nayide'en.

¹⁰ Pøni mmøøt'ejtidipts meets ja Cristo, øøky windigøyts ja pøky ñamyayi ñjøkxni møøt ja mnine'kxti, jøts ja anmija'win ne'egi yjujky'aty ja'agøjxp ku ja Dios tø mgupikyidi.

¹¹ Pøni mjanchmøøt'ajtidipst ja Dios Espíritu Santo, midi ja nwindson'ajtim Jesucristo ojts jadigojk xemikøjxp yikjujkyiky, nay ja Diosts meets ja mnine'kx kø'øm yikjujkyøkip, jøts jadigojk xemikøjxp mjujky'attit.

¹² Jøts xpaat'ajtidip adøm, migu'uktøjk, jøts ka'ap njujky'ajtidit pøky agujkpy midi ttuktump ja kø'øm winmaa'ñ.

¹³ Pøni mdunwandipst jade'en sa ja pøkyu'unin, øøky mee m'ejtni, kudigøy mee m'ejtni; pøni m'ajot'ajtidipst ja Dios Espíritu Santo jøts ja xukmimajada'akti ja mbøky, mjujky'atpsts meets jade'en xemikøjxp.

¹⁴ Ja' ja Dios Teety y'u'nk'ajtpy pøn ja Espíritu Santo ja tyukpudøkip jøts ja wyinmaa'ñ ja tyiktøøji tyiktudaa'jki.

¹⁵ Ku myikmo'odi ja Espíritu Santo, kidi ja'ajip ja myiktanimøø'yidip jøts meets tsø'øgi jawi myik'etidit, pø ja Espíritu Santoxi meets ja Dios mmøø'yidip jøts m'u'nk'atidit ja Dios, jøts ja' idø'øn xyikwa'anindip amgujk jotkujk ku adøm ja ndeety'ajtyim.

¹⁶ Ja'abi Espíritu Santo majada'kp, jøts adøm ja tu'uk amumjoojt xukjanchja'want jøts ku adøm ja Dios x'u'nk'ajtyindi.

¹⁷ Ja' adøm xja'ajtidip, paty adøm nayide'en ja Dios xmø'øyindit ja jujky'ajtin midi ja tø twanda'aky, midi ja xmøøpwy'a'anindip. Midi ja Cristo yikmøøpy, nay ja'ats adøm yikmø'øyindip. Pøni ngupøjkyindip adøm ja ayo'on sa ja tø y'ayøy, winets adøm ja nay ja'abi øy'ajtin xukpaajtint midi ja yikmøøpy.

¹⁸ Kidi nayide'enip ja' sa adøm ixyam ja ayo'on nbaajtyindi, ka'ap ja jade'en tmi'abaaty midi dø'øn Dios kyunuu'kxin'ajtpy, midi dø'øn jaanim nbaajtidip n'ejxindip.

¹⁹ Tuki'iyi midi ja Dios tø tyikøjy, yjanchja'awejxnip ja nayide'en juuninim yja'att ja et ja xøøw ku ja Dios tyiknigaxø'økt pøn jaty ja y'u'ngip, pøn jaty ja yja'ajtpy.

²⁰ Nayide'en amuum ja naxwii'ñit tø y'ayo'ombaaty Adán pyøkyøjxp, kidi kyø'ømdsojkingøjxpip ja naxwii'ñit ja jade'en yjaty, ja Dios ja jade'en tø tyanibiktaagiyi; yikmøøpyts ja jøp'ijxy'ajtin jøts ja øy juuni ja øy'ajtin jadigojk tpaatt,

²¹ jøts ja Dios ja yiktigajtsmiyit amuum, nay ja'abi øy'ajtin tpaatt midi ja jaay' yikmo'odip pøn jaty ja Dios u'nk'ajtidip, jøts ja ñiwa'adsit nayide'en ku ja tø pyøkpety, ku ja tø wyindigøy.

²² Jade'en ixyam yjaty ja naxwii'ñit midi ja Dios tø tyik'øyi, sam tu'uk ja tø øxyøjk y'amnipiky chaachnipiky ja y'u'nk ku kye'exy, amuum tmigiipxy tmi'øty.

²³ Jøts kidi ja naxwii'ñip jade'en ja'ayi tyimyjajtp, nayide'en adøm njajtma'an ku adøm tø ayo'on nbaajtyim, øy adøm ja Dios ja y'Espíritu Santo tø xmø'øyim ejxpaj'ajtin, ja'agøjxp ku xjaaktukpaatwa'añimnimdi midi paat'ajtyidip pøn jaty ja Dios u'nk'ajtidip. Njantyimyjøp'ijxy'ajtyindip adøm, jøts ku øy juuni yja'att ja xøøw ku adøm ja Dios amuum xja'ajtidit ejxim tu'uk ja u'nkteedyin, jøts ja xyiktigajtsa'ant ja nne'kx.

24 Janchjə'wingəjxp ja'abi nitsoojkin yikpaaty; kuts ja janchjə'win yik-møøt'aty, ja' idə'øŋ tyijpy ku adəm n'awijxyindinim midɪ ngapaajtyindipnim. Jaa ku ja jeexyɪp yikmøøt'ajtɪni, ʒtits idə'øŋ jaakyik'awexp?

25 Kuts adəm idə'øŋ jade'en njəp'ijxyindi midɪ kayikmøø'yindipnim, yiktu-dakpy ja tsinaə'yin jəts ja winmaə'n ja'.

26 Jəts nay ja Dios Espiritu Santo adəm xpudəjkamp mə nayja'wiyam nduu'dujkyim, ku niti winmaə'n, niti aəw, niti ayuujk ngajagyejpyindi, jəts ka' ja winmaə'n nbaajtyindi sudso nmøøtmadyəajkinɪt ja Diosu'nk. Nay Espiritu Santots kə'əm ja Dios Teety t'amidoop ja pudəjkin sə nduu'baajɪnt nduu'ejxint, ja'agəjxp ku tjaty sudso əy ja Dios Teety tmɪnuu'kxə'akt.

27 Jəts wa'ats ja Dios Teety xnija'wa'am sə jaty pənjəbəŋ wyinmay, jəts ja ŋimadəyi Espiritu Santo sə jaty ja wya'aŋ ku ja xku'amido'owam səm ja Dios Teety kə'əm ttamidsəky pəŋ jaty ja yja'ajtpy.

Cristo kəjxp nmajadaajkyindi

28 Nnija'windipts ku ndsojkindit ja Dios, yajkpts ja pudəjkin ja' pəni mə jaty sagasə njajtyindi, jəts jade'en tyik'əpyidsimɪ pəŋ jaty ja tə twi'ixy, sə ja jawyeen tə ttanibiktaəgi kə'əm.

29 Tə ja Dios Teety twi'ixy patki'jyi ja yjaə'y jəts ja tə twiwich. Təəyɪp ttanibiktaəgi jəts yjaə'y'attit nayide'en sə ja Dios U'nk yjaə'y'aty, pəŋ tɪgubajk'ajtp ja jaa'y pəŋ jaty ja Dios Teety ja'ajtidip, tum uch tum migu'uk ja tjawɪ niduki'iyi.

30 Pəŋ ja Dios tə ttanibiktaəgi jade'en patki'jyi, jəts ja tə twaədsəy; kuts ja tə ŋimiŋiyi, jəts ja tə tkupiky, winets ja nayide'en tə ttamini'adsəwi ja əy'ajɪtin amuum.

31 ʒsats adəm ja nwa'anin ndejɪnt? Pə amuumxi adəm ja Dios møøt n'ijtyindi, ʒpənts adəm xnimɪymajadaajkimp jade'en?

32 Ka'ap ja Dios t'amə'at'ajty ja y'U'nk, kyəyajk ja' jəts ja y'ookt adəm nbəkyəjxp; ʒsudso də'əŋ ja ndejɪnt adəm xkaməəgyəjxint tuki'iyi midɪ myəøt'ajtpy, pəni tədam ja kyə'əm U'nk jawyeen tə xaniguejxyim? ʒTiku də'əŋ ja ndejɪnt tkayakt?

33 Əy pəŋ tjani'əŋniwya'aŋ ja jaa'y pəŋ ja Dios tə wyi'ijxyidi, pə Diosxi ja kə'əm tə kyupikyidi,

34 ʒpənts ja mibaət nidyənigutujk'atidip jəts ja tpaattit ja ayo'on? Pə ja Cristoxi ja tə kyu'oogiyidi, jəts nay ja'ats tə yjujkpyiky xemikəjxp, Dios Teetyts ja amuum møøt y'ity, jəts ja' adəm jam xni'amido'owamp pəni sə ndyimɪyjajtyindi ndyimgyubejtyindi.

35 Ku xpa'ayə'əyim ja Cristo, ʒpəŋ adəm ja xnidyukmajtstuuɪtɪmp ja pya'ayo'owin? Nipəŋ adəm ja xkadukmajtstuuɪtɪnt, wan tjati'ayo'oni, əy nja-jotmay'ə'jkyim, əy njayikjəmdu'uŋindi njayiktedu'uŋindi, wan yuu tja'ity, uk ku wet naəmy xka'ejtxindi, uk ku tsep, uk o'jkin tigə'əyin yjayikpaaty.

36 Pə yide'enzi jap nəkyijxpy wya'aŋ:

Ejtp øəts ja jaa'y xyik'ookwa'aŋ ja'agəjxp ku øø nbaduujni ja mja'; jade'en øəts nyiktuŋ sə jiyujk sə borreek y'ookwa'aŋ.

37 Əy adəm jade'en njajajtyindi, ne'egits adəm ja jinaxy ndyimɪymajadaajkyindi ja' myək'ajtingəjxp pəŋ ja pya'ayo'owin tə xmə'əyindi.

38 Jade'ents ə nwa'aŋ jəts ku niti nipəŋ xkadukmajtstuuɪtɪnt mibaət ja Dios pya'ayo'owin, nja'ə'jkyindi njadigə'əyindi, uk njadyimɪyjajuky'ajtyindi. Ni ja ankilɪs ja xkadukmajtstuuɪtɪnt uk yjayikutujkpitəjkidi, yjadyimɪyjaja'ajidi pəŋ jap tsajpjətpy uk yjamajidi. Ni ja xəəw ni ja juməjt midɪ ixyam yə'əpy, uk midɪ memp kidəkpnim, ni ja' adəm ja xkadukmajtstuuɪtɪnt.

39 Wan ti tkøjxpi, uk wan ti tkøjki, wine'en Dios tø tyikøjy niti kyamayi yjade'embj jøts adøm nmajtstuujtindit ja Dios pya'ayo'owin, midi ja tø tyiknigaxi'iky nwindson'ajtim Jesucristo køjxp.

9

Dios ja Israelit jaa'y tø wyi'ijxyidi

1 Tiy janch ø ngajpxy, pø ja Cristoxi øts njanchja'wip, ka'ap ø ndaabyaaty; ja Dios øts y'Espiritu Santo wa'ats xuknija'wip jøts ku øts tiy'ajtingøjxp ngajpxy.

2 Janch jotmay'oo'kp øts, ndyimchaachkyuwinnma'ayip øts kajaa,

3 jøts wamp øts, øy meets ayo'on patki'py ndyimgyu'ettit jøts ja Cristo ngamøt'etnit pøni tsojkip jade'en, nugo ku øts nmigu'uktøjk n'ødyuñ jøts xpaattit ja Dios, wine'en ndukojp'ajtyindi.

4 Ja Israelxi ja tyeety'apidip, jøts ja' Dios tø y'a'ejxyidi jøts yjagyepyidi. Jøts ojts ja kø'øm ja Dios kyunuu'kxin t'ejxyidi tnija'wiyidi, jøts ja' ja møøjyidøø ja tiy'ajtin sudso ja jadigojk ñitanijyidit ja Dios. Jøts nay ja' ja ttagødøjkiyidøø ja Moisés kyutujk, jøts ja windsø'jkin midi ja tyu'undip jam ma ja chaptøjkti. Jøts nay ja' ja Dios ttukmidaajnidøø ja wyanda'aky jøts ku ja y'ødyunidit.

5 Tu'ugyi aats kugoj ja'adi pøn jaty israelit jaa'dyi; jøts nay ja' ja tyety'apidip pøn adøm ndeety'ap'ajtyindip, nayide'ents ja Cristo, pø adømxi ja' ñamyayi njaa'y, jøts køjy ja'ani ku ja amuum tñitanit ti jaty ejtp naxwiiñ, pø Diosxi ja', windsø'øgi winjawi ja y'ity xemikøjxp. Jade'en idø'on ja y'ejxi.

6-7 Kidits nwa'añim jøts ku ja Dios tkayik'adukñim ja wyanda'aky midi ja møjaa'y Israel yiktaniwandaajkøø wine'en y'ap y'ok ja tø ñajtska'axidi. Ka'ap ja Dios ja'ayi tø twi'ixy ja'ayi pøn ja Abraham y'apteety'ajtip; pø yide'enxi Dios ja wyinaty tø ñi'mxyi: "Nayi mets mnigojpk'ajtpy ja Isaac y'u'nk y'unaj'jkti pøni wine'en ja ñajtska'axidi."

8 Jade'ents adøm nnija'wa'am jøts ku Dios ka'ap t'u'nk'aty pøni ma pøn jadu'uk jadu'uk kyugajpi, wan t'israelit jaa'yidi wan tka'israelit jaa'yidi. Ja' dø'on Dios y'u'nk'ajtpy pøn tjøp'ejxtip ja wyandaajkin.

9 Pø yide'enxi ja Abraham ja Dios ñimaajyøø ku ja Dios wyandaajky: "Tiempi køjxp ø nme'ent, u'nkpaatp yø mnidø'øxy Sara."

10 Jøts kidi ja'ayipts nadyu'ugyi yiktamiwandaajki ku ja y'u'nk ja tpaatt. Jabi nayide'enxi ja Rebeca ja y'unaj'jk tpaatmaa pøn ja Isaac tyety'ajti, adøm ja ndeety'amøj.

11-13 Jøts ka'anim ja wyinaty yjaja'atinim, kidyimkya'axtipnim ja wyinaty, ka'anim ja wyinaty yiknijawi sa ja y'adø'øtstit øy ka'øy, jøts ja Rebeca ja Dios ojts ñi'mxyiyi: "Ja myøjpi tmidu'ump ja myutskpi." Nayide'ents ja møøt tuknax tijy ku wya'añ ja Dios kyajpxy: "Nwinja'wip øts ja Jacob, jøts Esaù ka'." Xjats ja Dios jade'en xuknija'wa'am jøts ku ja kø'øm twi'ixy kyø'ømdsojkingøjxp pøni pøn ja y'a'ejxip. Ka' tmøjpktaajkiyi ja y'ødyu'unin kya'ødyu'unin.

14 ¿Tits adøm ñikyajpximp? ¿Ti ja adøm nwa'anint jøts ku Dios ka' tyiy'adi'ich? jPø ka'axi!

15 Pø yide'enxi ja Moisés yiknimaay: "N'ayo'ejxp øts ja' pøni pøn ø kø'øm n'ayo'ejxwampy, pøni pøn ø kø'øm nba'ayoowampy."

16 Jade'en'ampyts ka' chøkysi jøts adøm ngø'ømwinmaa'ñ ndamajadaajkint, pø ja Diosxi kø'øm x'ayo'ejxindipnim.

17 Pø patyxi ja Dios kyajpxy wya'añ ku Dios tnøjmi ja jaa'y pøn windsøn'ajtp jam Egipto: "Ja'agøjxp møj windsøn tø nyikjaty jøts øts ja nmøk'ajtin

nyikwingaxi'iky ku mets nmimajada'aky, jøts øts nxøøw o maðsoo yiknijawit."

18 Xjats idø'øn jade'en ja Dios t'ayo'ixy pøni pøn ja y'ayo'ejxwampy, jøts ja twinmaa'mbyiky pøni pøn ja kyayikmadoguki'wyampy.

19 Winets mee'ts idø'øn x'adsojimbett: "Pøni janch ku yjade'eni, ¿tigøjxp Dios tpøky'ixy ja jaa'y? Jøts ¿pønts mabaat t'ukwindso'op ja Dios?"

20 Jøts jaa'yts adøm, jøts ¿jaaktyimbyøn meets ku meets Dios yja' xk-agupøjikit? ¿Ti ja ja tu'jts tnimaañit ja ñijaa'y pøn ja tø yik'øyi: "¿Tiku øts jade'en tø xyik'øyi?"

21 Pø ja tu'jtsna'abixi kø'øm pajtip pøni sã ja kø'øm tyik'øyi'wya'añ ja na'aknaajx; øy ja tyik'øyt ja tu'jts tu'uk midì øy midì tsuj jøts ja tu'ugyi ttanibiktaagi ti ja wya'ant, uk øyts ja nay ja'abi naajx tna'at jøts ja tyik'øyt jadu'uk ja tu'jts midì øy ti ñiwy'a'ant.

22 Ku ja Dios tmidani jøts tmiduda'aky'aty ja jaa'y pøn ja tø yikjotma'adyi, pøn tyimyjapaajtñiyidip jøts y'ayo'odit uk jøts ja tyimgyudigø'ødyit, ti ja kamaa'niyip, ixè ja ayo'on ja ttuktagida'aky jøts ja myøk'ajtin ja jade'en tnanky'ejxit.

23 Øts ja Dios jade'en ttuun, ka'ats adøm ja jade'en tø xuu'ñim, ja'agøjxp ku adøm ja xpa'ayø'øyi'ndi jøts tnanky'ijxy jade'en mabaat ja tjagyepy ja myøk'ajtin, jøts ja t'ayo'ijxy pøn ja patki'jyip tø twi'ixy jøts ja ttukpaatwa'añ ja y'ø'ajtin.

24 Tø ja Dios kø'øm xwi'ijxy'ndi, ku ja winaaagin twi'ijxy ja israelit jaa'y, jøts nayide'en winaaagin pøn ka'israelit jaa'dyi.

25 Sam ja Dios ja kyajpxy ttamigaxiyi'ñ ja kyugajpxy Oseas, ku ja wyaañ yide'en:

Pøn øts y'ity ngaja'ajtpy, ja' øts nja'bøkp,
pøn øts y'ity ngatsojktip, ja'ats ø ndsoktip.

26 Nay jam et ja xemijukpyi Dios ja kø'øm yja'bøkidit ma ja yiknimaadyøø:
"Meets, ka' mee nja'aty."

27 Kuts ja israelit jaa'dyi, pø yide'enxi ja kugajpxy Isaías wyaañ: "Øy ja Israel mabaat ja y'u'nk y'unaj'k yjamøjidi yjamayidi sam nøø'abu' myayin, niwinaagints ja'adi pøn nitso'ok'attip,

28 jabi ka'pxy ja Dios ja y'ayuujk tpadu'unt sã ja tø wya'añ, ku ja tyiknaxkida'akt adsu'jky ja tiidyu'unin ya naxwiiñ."

29 Sam ja Isaías wyinaty jekyip tø wya'añ:

Ku ja Dios jeexyip tø tkayiknitso'ok'aty winaaagin ja aats ja kugoj midì yikojpk'ajtp,

tø adøm jeexyip jade'en njajtña'am sã Sodomit kajp sã Gomorrit kajp ku ja tø kyudigøøgyøjxti.

Sã israelit jaa'y tka'øyjawidi ja øgyajpxy ja ømyadya'aky

30 ¿Tits adøm ngajpxindip? Yjanchja'wingøjpxxi Dios ja tø kyupikyidi pøn ka'israelit jaa'dyi, yam ja y'ity tkajotmay'atti sã Dios ja kyupøkidit jøts ja ne'egi tø kyupikyidi.

31 Jøts ja israelit jaa'y, pøn ja kutujk tpadundip jøts ja jeexyip ja' ja Dios tyagupikyidi, ka'ap ja ne'egi yikupøkti ja'agøjxp ku ja kutujk ka'pxy tkabadundi.

32 Ka'ap ja twinmaydi jøts ku Dios ja tyagupøkidit ja janchja'win, ja' Dios ja tity tagupøkidip ti jaty ja tyundip. Ja'ayi ja tyamøjti, ja'agøjxpts winguwopi jøpkuwopi tmijatti ku ja nwindson'ajtim tø myiñ.

33 Jade'en yjatti sam yiknigajpxy ma jap nøkyijpxy wya'añ yide'en:

Nyikaxø'øk p øts jam Jerusalén tu'uk midi ja jaa'y nay'adsep i yjawip jøts ka'ap
ja pøn myayit;
pøni pøn ja tjanchja'wip, ka'ap ja windigø yjatt.

10

¹ Møk øts, migu'uktøk, ja tsojkin njagyepy jøts øts ja Dios n'ajot'aty, jøts ø n'amidø y nbøxtsø y jøts ja israelit jaa'y tnitso'ok'attit.

² Jade'en ø nwa'añ jøts ku ja tjatsojkti ja Dios, jade'en'ampy ku ka'ap tjatti.

³ Ka' tñijawidi sudso Dios tkupiky jaa'y; kyø'ømgutujk ja' yiktundip, ja' ja tity tagupøkidip ja Dios, ni tkamøjpikta'akti ja' midi Dios ja tagupøkidip.

⁴ Pø ja'agøjpxxi ja Moisés kyutujk kya'uktuni, pø ixaanixi ja Cristo jøts tum ja'ats ja Dios kyupijky pøn ja tjanchja'wip.

⁵ Jøts ku Dios ja kutujk xagupøjkint, pø yide'enxi ja Moisés ja tjaay: "Pøni pøn tpadunwamp ja kutujk, ka'pxy tpadu'unt winets yikjujky'attit mā Dios."

⁶ Jøts ku Dios xkupøjkin janchja'wingøjxp, yide'enxi ja wya'añ: "Kidi mwa'andi: ¿Pøndam nøjkxp tsajpjøtpy? —jøts ja Cristo mye'ent—;

⁷ jøts ni mgawa'andit: ¿Pøn jap nøjkxp mā ja o'jkin?" —jøts yjujkyøkt ja Cristo xemikøjxp.

⁸ Pø ka'axi yjade'eni, pø yide'enxi ja wya'añ: "Ka'ap yjagami ja nitso'ok'ajtín, ixa ja xmøødidi wingon", ku xjanchjawidit sa ja øgyajpxy ømyadya'aky mduknijawiyidi midi øø ngajpxwa'kxpy.

⁹ Ku mwa'andit jøts ku ja Jesús ja' nwindson'ajtin'ajtyindip, jøts xjanchjawidit amumjoojt jøts ku Dios Teety ja tø yikjujkyiky' xemikøjxp jadigojk jap oo'kpi y'agujkpy, winets xpaattit ja nitso'ok'ajtin.

¹⁰ Ja' ja Dios xagupøjkimp ku ja amuum njanchja'want, jøts ku n'am njotp pyidsø'ømint ja ayuujk, jøts nwa'anint jøts ku ja Jesucristo ja' nwindson'ajtim'ajtyindip, ja' xyiknitso'ok'ajtin.

¹¹ Pø yide'enxi jap nøkyijxy wya'añ: "Pøni pøn ja tjanchja'wip, ka'ap ja windigø yjatt."

¹² Tu'ugyi nwindson'ajtim ja tnitani, wan t'israelitjaa'yidi uk wan ja tka'israelitjaa'yidi; ka'ap ja pøn t'ejxma'aty, myøøpy kyejxpy ja kyunuu'kxin pøni pøn ja t'ajot'ajtp, may'ampy ja tmøøy.

¹³ Jabi yide'enxi wya'añ ja kyajpxy y'ayuujk: "Pøni pøn amumjoojt ja nitso'ok'ajtin t'amidoop nwindson'ajtimgøjxp, ja'ats nitso'ok'attip."

¹⁴ Kuts ja pøn tkajanchjawidinim, ¿sudots ja t'amidojdit ja kyunuu'kxin? ¿Sudso ja tñijanchjawidit ku ja jeexyip kyayiktukmadowdinim pøni pøn ja', ku jeexyip kya'lity pøn ja nidyukmadowidip ja øgyajpxy ja ømyadya'aky?

¹⁵ Pønts tkajpxwa'kxpy ja øgyajpxy ja ømyadya'aky, ¿sudso ja jeexyip tnikyajpxwa'kxty ja øgyajpxy ja ømyadya'aky ku Dios ja jeexyip kyakexyidi? Pø patyxi jap nøkyijxy wya'añ: "¿Ndaxondaajikimp ja jaa'y pøn tkajpxwa'kxpy ja Dios y'øgyajpxy y'ømyadya'aky midi xukmado'owimp ja øy'ajtin ja tuda'aky'ajtin!"

¹⁶ Ka'apts jaa'y niduki'iyi tmøjpkta'akti ja øgyajpxy ja ømyadya'aky. Jade'en ja ttundi sa ja kugajpxy Isafas tñigajpxy ku ja wya'añ: "Dios Teety, ¿pøn ja m'øgyajpxy ja m'ømyadya'aky yjawi tø t'ukjanchjawi?"

¹⁷ Winet ja janchja'win yikjagyepy ku ja tømado'øyim jawyeen ja øgyajpxy ja ømyadya'aky midi ja Cristo nigajpxip.

¹⁸ Ti kuts ø nyiktø'øt, jøts ø nwa'ant: ¿Wan ndejint tøm xkamadowdi ja øgyajpxy ja ømyadya'aky? ¡Pø tøxi xjamadowdi! Jabi ja'agøjpxxi jap nøkyijxy yide'en wya'añ:

Tø ja øy maðsoo yikmadowdi pøn ja tø tkajpxwa'kxti,
tø ja øgyajpxy ja ømyadya'aky øy maðsoo yja'aty ya naðxwiiñ.

¹⁹ Uk nwa'ants øts inet: ¿Wan Israelit kajp ndejint ti tkanijawidi? Jøts tøts ja Moisés ja Dios tyuknigajpxyi ku ja wya'añ:

Mdami'ama'at'atp meets ja wenk jaa'y ja nitso'ok'ajtin pøn kanayide'endi sa meets,

pøn tkanija'widip, ja'agøjxp meets ja xami'ambøkt.

²⁰ Jøts ja Isaías ja Dios yjaaktyimyikwa'animyí yide'en:

Pøn øts y'ijty xka'ixaadyip, tøts øts ja ne'egi ixyam xpaatti;

tø øts ne'egi nnanky'ijxyi pøn øts y'ijty xkanija'widip.

²¹ Jøts ja Isaías ja Dios yjaakyikwa'añi ku ja tñigajpxy ja israelit jaa'y: “Tø øts kawine'en njawaadsø y ja jaa'dyi pøn kawindiy'oo'ktip, pøn niwine'enin kamadoodip.”

11

Ja Israelit jaa'y pøn winaagin tpaattip ja nitso'ok'ajtin

¹ Jøts ø nyiktiidyøki: ¿Tø ja Dios tyimyajtstu'uty ja Israelit kajp, ka'ap ja t'ukupøjki? ¡Pø ka'axi! Israelit jaa'yxi øts kø'øm, tu'ugyi ja Abraham yik'aadsí yikojpki, ja Benjamín ø ndeety'apip.

² Jekyip ja Dios yø tja'biky yø israelit jaa'y; jøts ixymbaat tkamajtstu'uty. ¿Ti ka'ap meets ja Dios kyajpxy y'ayuujk xñija'wiyi, ku yiknimadya'aky ja Elías, pøn ja Dios kyugajpxyip, ku ja øjts Dios t'ajot'aty jøts Dios ja øjts ttukmadø y sa Israelit jaa'y y'adø'øtsti? Ku ja wya'añ yide'en:

³ “Dios Teety, tø mgugajpxy yik'oo'kixyidi, tø yikjeitkixy ma jaty myikwindsø'øgi, nadyu'uk øts njaaktañ, jøts xyik'ookwandip øts nayide'en.”

⁴ Jøts Dios ja øjts yide'en y'adsøyi: “Tø øts abiky niwixujk mil ja jaa'y nwi'ejxti, pøn tkawinguxanaadyipnim ja awanax midi Baal yiktejp.”

⁵ Nayide'ents idø'øn ixyam yjajtkojmi, ja winaagin pøn ja Dios tø wyi'ijxyidi, pøn ja kø'øm tø ttanibiktaagi y'øy'ajtingøjxp.

⁶ Ti tundaajk ja jaa'y øy ti pøn tjatuñ jøts tpaattit ja nitso'ok'ajtin, pø ja Diosxi tanibiktaajkip kø'øm jøts ja tyik'awa'añ ja myøk'ajtin y'øy'ajtin. Ku jeexyip jade'en kø'øm ja' yiktamajada'aky, jade'ents ja jeexyip tpaaty jøts ka'ap ja Dios y'øy'ajtin ti ñiwy'a'añ.

⁷ Xjats ja israelit jaa'y jade'en winaagin tkapaatti sa y'ity yjawinmaydi, tømts ja tpaatti ja øy'ajtin pøn ja Dios kø'øm tø wyi'ijxyidi, jøts jaayi jadu'uk wimbeets kugoots tmijatti, ni tkaja'gyukiyidi ja Dios yja'.

⁸ Jøts idø'øn ja jade'en jyaty sa jap nøkyijpxy wya'añ: “Dios ja kø'øm tuujnidip jøts ja kyadukjawiidi sa y'adø'øtsti; ja win'ejxtip jøts ka' t'ejxpaatti, jamadoodip jøts ka' yja'gyukidi jøts jade'en ixymbaat yjatti.”

⁹ Jøts nayide'en ja David ja Dios yikwa'anmiyi:

Wan ja'ayi ttajotkøxti ja xødu'unin ja miga'ayin mi'uujkin, jøts nay ja'ayi tyapøkyattip jadigojk jøts ja yiktagubattit.

¹⁰ Wan t'etti wimbeets kugoots jøts kyaja'gyukidit,

jøts ja xemikøjxp yiktagubattip.

Sa nitso'ok'ajtin tpaatti pøn ka'israelit jaa'dyi

¹¹ ¿Ku dø'øn ja israelit jaa'y jade'en ja Dios tø tyuñidi, tø ja tyimyingidøøgyøxti? ¡Pø ka'axi! Øy idø'øn ja tø kyamadowdi, tøts ja yjadu'ukpi tpaatti ja nitso'ok'ajtin pøn ka'israelit jaa'dyi, jøts ja tpa'ejxtit, jøts ja nayide'en ja janchja'win tjagyaptit sa pøn ka'israelit jaa'dyi.

12 Ku ja israelit jaa'y jawyeen kə'om tə tkagupəkti ja Dios y'oy'ajtin ja'agəjxpts ja tə yikmo'odi pən ka'israelit jaa'dyi, jəts ja jade'en'ampy pyaat'atyidi ja Dios yja'. Kuts ja israelit jaa'y jadigojk tmijotjimbejtəxtit ja Dios, ʒja ti ka'ats ja naxwii'niit jaa'y ja kunuu'kxin nayide'en jawaani məj tpaattit?

13 Nyiknaxwampy əts nayide'en aaw ayuujk, jəts ə ndukmadoowa'andi meestsit pən ka'israelit jaa'dyi. Pə meestsxi tə nyiktaniguexy ku əts ja Dios tə xkexy, jəts xnijawidit jəts ku əts ja ngajpxwa'kxin ka' niifugoji.

14 Kidi wanik jade'en winaagin niitso'ok'atti ja nmi'israelit jaa'dyi ku mba'ejxidit nayide'en sa mee xpaaty ja niitso'ok'ajtin.

15 Jabi jade'enxi ja naxwii'niit jaa'y tə tpaatti ja nə'ə' ja tuu' sudso ja Dios myaa'kxujkin tpaajtidit, ku ja Dios tə t'ats'ejxma'aty ja israelit jaa'y. ʒTits idə'ə'n tyimyikpaatp ku ja israelit jaa'y ja Dios jadigojk t'awimbetidit? Ja nitsoojkin idə'ə'n ja jadigojk pyatp pən windiy'ejtndidip.

16 Ku ti t'ukja'biky ja Dios, amuumts ja tja'ajtkixy. Pəni myi'ijtpy ja ujts'aats ja ujtskojpk ja', nayide'ents inet ja tmi'ett amuum tuki'iyi məət y'awaj y'axeen.

17 Jade'ents idə'ə'n ngajpxin ja israelit jaa'dyi sa ja kipy awaj midit ja olivo kipy y'awaj'ajtpy, jəts meests jade'en pən ka'israelit jaa'dyi sa jadu'uk pa'olivo kipy y'awaj midit niifugo əy ma ujtsə'əjty ejtp. Kuts ja yikajtsə'əty midit ja israelit jaa'y kipy'ajtip ndejint, jəts meests ja mja' ne'egi jam yikə'ə'əch ma də'ə'n jam ja jadu'ukpi awaj tə wyinaky. Jəts meests ja jade'en xpaat'aty ja jujky'ajtin midit xemikəjxp, tu'ugyi ja m'aats mgojpk niamyayi y'etti.

18 Ka'ats mnadyamikaxidit, kidi xuktaməjidi xuktamutskidi ja israelit jaa'y pən niamyayi ixwejtsidip ja Dios. Pəni m'adə'ə'tswandip jade'en, jawidi jəts ku nayi israelit jaa'y niikəjxp idə'ə'n ja niitso'ok'ajtin tə mnimiiniidi, kidi mə'ə'ə'ə'niikəjxpiti.

19 Mjawa'añ meests: "Janch jade'enimts, təts ja yjiwa'a'akti jəts əəts ja ixyam ngudanaañip."

20 Jade'en'ampyts ja yik'ixwetsti ku tkajanchjawidi ja Dios, jəts meests myikupiky jade'engəjxp ku ja xjanchjawidi. Kidits mnamyikexyidi, əyim yikxonim tuda'əky mnabyikta'agit.

21 Pə m'ejxtipxi mnija'widipxi ku Dios ja israelit jaa'y ja tkadamee'kxy, jəts nayide'ents meests ja mgadamaa'kxmiyit ku jade'en m'adə'ə'tstist.

22 Jəts m'ejxtip mnija'widip jəts ku Dios janch əy, jəts tum ja tiy'ajtin yiktumpy. Mək ja ttiidyuñ pən ja midundigəjyip. Mmi'əy'ajtipts meests ja', jəts tu'ugyi xpayə'əyidit ja y'əy'ajtin; pəni ka'ap jade'en xpadundi, nayide'ents nəjkk mjätti sa ja israelit jaa'dyi.

23 Kuts ja israelit jaa'y jadigojk tmijotjimbettit ja Dios jəts tjanchjawidit amumjojt, kupəkidip ja jadigojk jəts ja jujky'ajtin myo'ojidit midit xemikəjxp; tyu'ump ja Dios jade'en, ti ja ka'ukmajyip.

24 Sa meests ja tə mgupiky, jəts ka'ats meests mja'israelit jaa'yi, jəts təts meests ja mmo'əyi ja niitso'ok'ajtin, iti kuts ja israelit jaa'y kyayikupəktit, pə ja'axi ja y'ity tyimyjapaat'ajtidip!

Ku Israelit jaa'y niitso'ok'attit xemikəjxp

25 Meests migu'yuktəjkti, ndukmadoowa'andip ixyam jəts xnijawidit sa Dios ja wyinmaa'ni tmo'ə'aty, jəts ka' nugo mnay'agajpxidit jəts ku meests wijy'ajtin amuum xmo'ə'ajtkixy: tə Israelit jaa'y niamyayi y'amutski. Ejtpnim ja jade'en kunim ja yikupəktit namay pən ka'Israelit jaa'dyi.

26 Ku nøjx jade'en tō y'ukjaty, winetnimts ja Israelit jaa'y ni'ijtyi ñits'o'ok'attit, pō patyxi jap nøkyijxpy yide'en wya'añ: Kaxø'økp tu'uk ja Israelit jaa'y, ja yiknitsokpi, jøts ja' ttukniwa'ats'atp ja jaa'y ja ka'øybi pøn jaty ja Jacob t'aadsidip tko-jpkidip.

27 Jøts ngajpxy n'ayuuik øts wyinaty jade'en nyik'adujkpy, ku øts ja nyikpøkwy'a'atstit.

28 Pøn israelit jaa'dyi, pøn tkagupøjktip ja øgyajpxy ja ømyadya'aky sudso ja nitso'ok'ajtin yikpaaty, ejxma'jtniyidip ja Dios ja ñamyayi jøts meets ja mgunuu'kxyi; ka'apts ja Dios ja tyimy'ixmachidi, tsojkidip ja' ja'agøjxp ku ja Dios kō'øm tō twi'ixy ja mōjaa'dyøjk.

29 Pō ka'axi Dios ja jadigojk tpiky pōni ti ja yajkpy; pōni tō ja twi'ixy ja jaa'y, çsudsots ja nugoyi t'ixmatst jadigojk?

30 Meetsxi ja Dios y'ijty mga'ukmimadøpy, kuts ja israelit jaa'y ja tō tkamimadowdi, xjats meets ja Dios tō m'ayo'ijxyi.

31 Jøts ja nayide'en yjatti sã meets y'ijty xkamimadøyin ja Dios, ja'agøjxp ja jade'en ttuñ jøts ja jadigojk t'ayo'ext nayide'en sã mee tō myik'ayo'ijxyin.

32 Ja Dios jade'en kō'øm tō ttani'ibiktaagi jøts ja niduknax kyayikmimado'ot, ja'agøjxp ja jade'en ttuñ jøts o pøngapøn tuknax ja ttuk'ext ja pya'ayo'ajtin.

33 iKa'ap jade'en ti tmi'abaaty sa ja Dios ja øy'ajtin tjagyepy, sa ja wijy'ajtin, sa ja ja'gyukin tmøødi! Ka'ap pøn tmi'winmaa'nbyaaty pōni sã wyinmay, pōni midi tyunwampy, mã ñøjkwa'añ yja'atwa'añ.

34 “çPøn tniñija'wip sã ja Dios wyinmaa'nñ? çUk pøn ja tyukjaty jøts ja jade'en ttu'unt?

35 çUk pøn ja Dios jawyeen ti tō tmø'øy, jøts ja ja' ttaguyaki midi ja xmø'øyimp?”

36 Tum ja Dios amuum tja'ajtkøjxp jøts ja' tyik'øyigyøjxp, jøts ja tyik-tunwa'añ pōni ti jaty ja tō tyik'øyi. iKunuu'kxy etpyim ja Dios xemikøjxp! Jade'en idø'øn y'ejxi tyiyi.

12

Midi chøjkpy ja Dios ku ja nnadyagødøjkant

1 Kō'øm mee migu'uktøjk ja Dios amuum mnadyamiyoxit. Øy'ajtp jøts jade'en xu'undit midi ja y'øyja'wip kyunuu'kxyja'wip, ja' ñamyayi mdawindsø'ogidip ja Dios. Ku ja x'ayo'ijxyindi, jade'en mee nminuu'kxa'aky jøts jade'en xu'undit.

2 Kidi jade'en mdsinay'adø'øtsti sã xuktu'uñin ja kō'ømgutujk, ja kō'ømwinmaa'nñ. Mijotjimbetti ja Dios jøts ja mwinmaa'nñ nayide'en tyigatstit, winets ja juky'ajtin xpaattit midi amuum myiktigatsidip jøts jade'en xnijawidit midi ja Dios chøjkpy, ja øybi ja tsujpi midi ja Dios mda'øyja'wiyidip, midi øy wã'ats pidsømp.

3 Yide'en øts ja Dios xanigutujk'aty y'øy'ajtingøjxp, jøts ja' mee ndukmadøpy, kidi nugo mnadyamøjpikta'agyidi pōni ti jam jadu'uk jadu'uk yjajtpy. Pōni mabaat ja Dios kō'øm tō mdukatyidi, ja' mja'gyukidip.

4 Ka' nduknax'ajtyindi, nayide'en sam ja nine'kx yikjagyepy may jøøjp yikmøødi, jøts ka' tum ja y'a'wya'añ pōni ti tu'uk wya'añ,

5 nayide'ents adøm idø'ønmedi, øy adøm mabaat njamaya'am, tu'ugyits adøm ja Cristo xja'ajtyindi, jøts nixem nyam ni'amuki n'ijtyindi sã kō' teky tkamajststuty ja nine'kx.

⁶ Kija' ja Dios xyikwinmaa'nbyaajtyindi pøni sa ja kò'øm ttamidsøky nidu'uk jaty. Wants tyiktunkpaajtyindi øy yikxon. Pøni tø Dios xmø'øyim ja wejin kajin jøts ngajpxnaxja'ant ja y'ayuujk midì ja tø xmø'øyim, ndu'unindipts ja jade'en pøni mabaat ja janchja'win xukjagyepjyindi;

⁷ jøts pøni tøts ja xmø'øyim ja wejin kajin jøts ja nmigu'uk nduujna'ant ja y'øybi, mbadu'unindipts idø'øn ja jade'en. Jøts pøni pøn ja Dios tø myø'øyi jøts yik'ixpøkt, ja'ats idø'øn ja tyu'ump;

⁸ jøts pøni jamts pøn tø yikmø'øy jøts tkajpxjot'amøjkit ja myigu'uk, ja'ats idø'øn ja tyu'ump. Pøni jamts pøn øy ti tyajkwa'añ, ka'ap kyø'ømwinmaa'ñ tyikyø'øty jøts ja ja' ttaguyakit øy ti. Pøni jamts pøn yikmøøpy jøts ja tnøø'mo'ot ttuu'mo'ot ja myigu'uk, yikxonimts t'ext tuda'aky'ampy; jøts pøni pøn tpudøjkidip ja ayoobi jaa'y pøn ti ka'ejtxidip, ejtni xoni dø'øn tpudøkidit.

Sq pyaat'atyì ttu'undit pøn ja Cristo yjanchja'widip

⁹ Nabya'ayowidi nixem niyam. Yikjiwa'akti ja ka'øybi, jøts tundi ja' midì øy midì tsuj, midì ja Dios kyupiky'ajtpy.

¹⁰ Yik'awa'andi ja amigu'uk'ajtin jøts nixem niyam mnamyayidit wine'en Dios mja'atyidi, nawyindsø'øgiyidi nixem niyam, kidi pøn xkamø'ejxti.

¹¹ Jotmay'atti ja Dios, kidi mnuuxidi, amumjoojt xmidu'undit ja Dios.

¹² Taxonda'akti jøts ku ja myikmo'odit midì mjøp'ejxtip; jøts kidi nugo x'ayojidi wine'en mjemjatti mdejatti, jøts kidi x'ixmatsti ja Dios'ajot'ajtin nijuuni.

¹³ Pøni jam ti kya'ijtyxidi pøn ja Dios yjanchja'widip, pudøkidits; øyim yikxon xyikja'attit xyiktsøndit pøni pøn mbaajtidip m'ejxidip mjønjojp mdøjkjotp.

¹⁴ Pøni pøn mga'ødyuujnidip, tagøðkidi ja Dios. Jøts amidowdi wan tyikunuu'kxti jøts kidi meets ja jawyeen xka'ødyijy.

¹⁵ Xonda'akti nayide'en pøni xonda'aktip ja mmigu'uk, tsaachjawidits nayide'en pøni jiidyip yaxtip.

¹⁶ Namyayidi nixem niyam, yikxon mdsøønidit mdanidit. Kidi mnamyikexyidi, møøt'etti pøn ayoobi jaa'y'ajttip. Kidi mw'a'andi jøts ku meets nadyu'uk tuki'iyi xjaty.

¹⁷ Pøni tø pøn mga'ødyuñidi, kidits meets ja nayide'en xunwimbejtmidì. Ejtp xu'undit ja y'øybi øy madsøo.

¹⁸ Yik'amijatti mabaat mmajada'akti, jøts yikxon xmøøtsøønidit xmøøtanidit ja mmigu'uktøjk, amuum ja tuda'aky'ajtin xyiktu'undit.

¹⁹ Kidi mee migu'uk kò'øm xagubety ja mmidsep pøni sa ja mduñidi, ja Diosxi kò'øm yik'ayo'ombaadiditnim; jabi yide'enxi jap nøkyijxpy wya'añ: "Øts xpaat'ajtp jøts øts ja ndiidyu'undit; øts ja ndagubattip, nømpxi Dios."

²⁰ Jøts nayide'en ja wya'añ, jøts ku tijy x'ødyu'undit pøn mmijotma'jtìdip, wan ja tka'uknagyumayidi.

²¹ Kidi ja ka'øybi mmimajada'agyì, jaa ja xmimajada'akt ku tum ja øybi xu'unt.

13

¹ Mimadowdi ja windsøndøjk. Pø Diosxi kò'øm tø tyikutuky jøts ja kudunktøjk yja'attit.

² Pøni pønts ja tkamimadoowampy, ja' idø'øn ja wyinaty kyamimadøøpy pøn ja tø tyikutuky jøts ku ja yja'attit. Pønts jade'en adø'øtswamp, pøky ja taja'adidip jøts ja nøjkx yiktiidyundi.

³ Jøts kidi ja'ajip ja kudunktøjk ñija'ajttip jøts ja t'adsø'ogidit pøn øyjaa'y'ajttip, pø ja'axi ja ñija'ajttip jøts ja tii'dyu'undit pøn tundigøødyip. Pøni ka'ats tsø'øgi jawi mnachøkyi jøts jade'en xwingunøjxkit ja kudunktøjk, jaa'y'ats yikxon jøts ja kudunktøjk niti mgadamatsit,

⁴ pø ja'axi Dios ja tø tyanibiktaagiyidi jøts ja øybi xu'unt. Kuts kø'øm mga'øyjaa'y'att, pøkyjawits mets ja mbøky; pø kidi nugojipxi ja kudunktøjk ja møk'ajtin tjagyapti ku ja tyii'dyundi, pø ja'axi Dios ja tø tyanibiktaagiyidi ku ja tøyikutuky, jøts ja tii'dyu'undit tiy'ajtingøjxp pøn tundigøødyip.

⁵ Ja'agøjxp pyaat'atyi xmimado'odit ja kudunktøjk pø mwinmaadyipxi, kidi ja'agøjxpi ja nugo xundi jøts ja mgatii'dyunidi.

⁶ Nay ja'axi ja Dios tyikutujkp jøts ja kuguju'uyin xmo'odit ja kudunktøjk; pø nay ja Diosxi ja tø tyanibiktaagiyidi jøts ja jade'en ja tyajuky'ajtin tpaattit, jøts jade'en mjaaknigudunk'atiyidit.

⁷ Migubajtkøxtits pøni pøn jaty jam mmijoy'ajttip. Pøni jam pøn kyayakñim kyagubetynim, wants ja tyakti; uk jamts pøn ti tkagujuyñim tkagubetynim, wants ja tkugujuy tkugubety; pøni pøn jam ja windsøjkin tyiktigøøpy, wan ja windsøjkin tjagvepy; jøts pøni pøn jam ja amigu'uk'ajtin tyiktigøøpy, wan t'amigu'uk'aty ja myigu'uk.

⁸ Ka' ti pøn xamiyoy'attit, ja tsojkin ja pa'ayo'owin ja' idø'øn tiiy xem yam mjagyaptip; ku jade'en xu'undit, ja kutujkts meets idø'øn wyinaty jade'en tø xmiomadø.

⁹ Pø nømpxi ja Dios y'ana'amin: "Kidi mnidø'øxy kidi mniyaa'y mnabyøjkyiyidi, kidi myikjaa'y'øøky, kidi mmeech, kidi mdaay'aty, kidi xami'ama'at'aty ja mmigu'uk pyikta'aky"; jøts tuki'iyi ja Dios y'ana'amin tu'ugyi ja yide'en y'ayuujkpidisimy: "Mba'ayo'op ja mmigu'uk nayide'en ejximdam kø'øm mnabya'ayøyin."

¹⁰ Pøn ja tsojkin, pøn ja pa'ayo'owin tjagyajp, ka'ap ja tmidundigøy ja myigu'uk; jade'en'ampy ja Dios tkupik'atkixy ku ja tsojkin nyiktu'unint, jøts jade'en niwine'en ja kutujk kyayikmidundigøy.

¹¹ Jøts tøyimbyaaty ja et ja xøøw, tajotigøjyidi ja Dios yja'. Tyimwyingomp ja ayo'on winets xpaattit amuum ja nitso'ok'ajtin. Nax'adøtsp ja et ja xøøw, ka'ap y'ity jaa'kjade'en ku njanchja'wiy'okwa'añindi miduk'ojk ja Dios y'øgyajpxy ja y'ømyadya'aky.

¹² Ka'pxnip ja et ja xøøw, tyimdyukmibaat'ajtpy ja Dios; wants tmajtstuuityindi ja ka'ødyu'unin ja pøkyu'unin, jøts jøp'ijxy nnanky'eitna'andit, tum ja øybi wa'atspi nyiktu'unindip midu kapøkmyøøt.

¹³ Wan tuda'aky tjaa'y'ajtna'andi sam pyaat'aty pøn tnija'widip ja Dios. Jøts kidi ja' ndunk'ajtyindi ja nøø ja mu'uk, uk ja pøjp ja tsa'pxp, nmiga'ayin nmi'uujkin, uk nnamyøøt'atwa'añindi øy pøn møøt, uk ja tsep ja' njot-may'ajtyimp, uk ndami'ama'at'ajtyindip ja nmigu'uk øy ti.

¹⁴ Kidi jade'en m'adø'øtsti, tu'ugyi nwindson'ajtim Jesucristo xpadu'undit sa ja ya chinaay, jøts kyamøjtøkidit ja mbøkyu'unindi.

14

Kidi mmigu'uk xpagajpxy

¹ Pøni jam pøn myajada'aky kyamajada'aky yjanchja'wingøjxp, kupøktits, kidi sa xejt, øy ja wyinmaa'ñ yjaganayide'endi sam meets ja mja'ajin.

² Ja may pøn tjøø'kxtip øy ñityi, jøts nayide'en pøn amaay'ejttip, pøn nugo u'nkjii'kxy tsujxkjii'kxy ttojktip, jøts wya'andi jøts ku ja' chøkyi Dios wyingujkp.

³ Põnts tjõø'kxp õy ti, ka'ap ja tka'õyjawit põn amaay põn wi'ijxy õy ti tjõø'kxp; jõts nayide'en ja'ami, ka'ap ja pyagajpxmit, ka'ap ja sa ttejmit põn õy ti tjõø'kxp, pø tõi Dios ja kø'øm kyupikyiyi,

⁴ jõts ja'ats midundip. ¿Mjaaktyimbyõnts meets ku meets ja xpagajpxt, yamts ja Dios ja tmiduñ? Wan ja t'õyi uk tka'õyi, ja wyindsõnts ja paajitp põni sa ja kø'øm tyuñi. Jõts yik'õyip ja', ¿ti Dios ka'ukmajyip ku ja tka'ukyik'õyit myøk'ajtingõjxp?

⁵ Jõts jaa jadu'ukmidi põn wandip tu'ugin ja xøøw yik'amaay'att, jõts jadu'uk wyamidi ku ka' pyaat'atyi ni midu xøøw kyayik'amaay'att, tum jade'en ja xøøw tu'ugyi. Kija'ats tnitaniidit ja wyinmaa'ñ tigõjxp ku jade'en wyinmaydi.

⁶ Põn t'amaay'ajtp tu'uk ja xøøw, ja Diosts ja tyawindsõ'jkip; jõts põn tka'amaay'ajtp, nay ja Diosts ja jade'en wyindsõ'jkinmo'op. Jõts põn tjõø'kxp õy ti, nay ja Diosts ja tyukmõja'wip tyukunuu'kxyja'wip; jõts põn amaay'ajtmidip, ka' ti tniyji'kxy, nay ja Diosts ja tyawindsõ'jkip ku ja jade'en ttuñ, jõts ja ttukmõjawi ttukunuu'kxyjawi amuum.

⁷ Ka'ap põn nugo ñiyjujky'aty, ka'ap põn nugo ñiy'õøky.

⁸ Ku njujky'ajtyindi, Dios xyikjujky'ajtindip, jõts põni o'jkindipts, nay ja'ats xkwenti'ajtindip. Jõts jade'en yiknija'wi jõts ku ja amuum xja'ajtyindi õy adøm njajuky'ajtyim, uk nja'õ'jkyim njadigõ'õyim adøm.

⁹ Pø ja'agõjpxxi ja Cristo yjujky'jky xemikõjxp ku ja tmimajadaajky ja o'jkin, jõts ja tu'ugyi ixyam tnitanaagyixy õy midu'ibi.

¹⁰ ¿Tigõjxpts ku mee kø'øm ja nmmigu'uk xabayõ'õy sa y'adõ'õtsti? Jõts ni xkatsokti paat meets ja'. ¿Põnts xijy ta'amp, põn kanaxp jam Cristo wyingujkp? Pø ja'axi xabayõ'õyindip ja nbøky, ja' xñdyu'unindip.

¹¹ Pø yide'enxi jap nõkyijxpy wya'añ:

Õyi maðsoo n'lity, jõts õts nwingujky niduki'iyi; jaa'y kuwani ñagyuxendyakõxidit.

Jõts wya'andit ku õts ja'ayi tu'ugyi ndios'aty.

¹² Jade'ents idõ'õn, kija' idõ'õn ngõyajkint jam Dios wyingujkp põni sa nidu'uk jadu'uk tø njaa'y'ajtyindi ja ñaxwiñ.

Ka'ap ja nmigu'uk nyikwinmaamyajtindit

¹³ Paty ka'ap nnabyagajpxandit nixem niyam. Ne'egi ja' n jotmay'ajtindip sudso ja nmigu'uk ngayikpõkpyajtindit.

¹⁴ Tumwa'ats nwindson'ajtim Jesús tø ttanibiktaagi, ka' ti nugo kø'øm tyimykpõkpyety; kyø'ømwinmaa'ñ ja' põn nõmdip jõts ku õy ti kya'õyi kyawa'adsi.

¹⁵ Jõts ku ja jii'kxy midu kayik'õdyejp kayikwa'atstejp nnadyabagajpxandit nugo, ¿ti pya'ayo'owints jade'en njagyeyjyindip? Paty ka'ap pyaat'aty; jõts ja nyikmõjindit põni ti ja nmigu'uk yjii'kxyindip, jõts jade'en ngaduk'ayoojindit ja nmigu'uk, jõts ka'ap ja yjanchja'win kyudigõ'õty.

¹⁶ Kidi ja' xuñ midu yjawi ja mdsinaa'yin ja mjanchja'win yiktabagajpxp.

¹⁷ Kidi ja kaagyip jii'kxyip xagupõjkindip ja Dios ma ja kyutujk amuum ttanitani ja yja', pø ja øchinaa'yinxi ja chõjky ja tuda'aky'ajtin ja xondaajkin midu ja Espiritu Santo xmõ'õyindip.

¹⁸ Põn jade'en tmidump ja Cristo, ja' Dios chõjky jõts õyja'wiyip ja jaa'y ja'.

¹⁹ Wants tjaaknija'wa'andi sudso nbaajtindit ja tuda'aky'ajtin midu nyiktu'unindip jõts ja nnadyabudõjkandit nixem niyam, jõts jade'en myøktaajkindit ja njanchja'win.

²⁰ Kidi ja ngø'øm ja' adøm nugo nyikmajadaajkindip, jøts adøm ja Dios yja' ngayikmøjtøjka'andit. Øy ni midi jii'kxy yjagayikpøkyety, jade'en ne'egi pyaat'aty jøts ja' xkajøø'kxtit midi ja mmigu'uk kya'øyja'wip jøts ja jade'en xkayikpøkyat.

²¹ Ne'egi øy'atpts ku ja tsu'uch ka' xtsu'utstit, uk xka'uuktit ja vino, uk xkatu'undit o ti, nugo ku ja mmigu'uk xkayikwinmaa'nmya'atti, nugo ku kyapøkyatti jade'en'ampy jøts kyatuu'tigø'ødyit.

²² Dios ja ja'ayi mduknija'wip pøni sa mets ja mwinmaa'n xyikyø'øy. jJotkujk ja jaa'y pøn kyabadumpy midi ja pyøkyja'wip!

²³ Pønts tjøø'kxp øy ti majtsk aaw majtsk joojt, kø'ømts ja ñankpyøkyetyi ku ja tjii'kxy, kumi ka'ap jotkujk tjii'kxy; jøts ti jaty kayiktump jotkujk'atyim, pøky ja'.

15

Ja' mdu'ump midi ja mmigu'uk tya'ødyøkip

¹ Pøn jaty møk tjagyajptip ja janchja'win, xpaat'ajtindip adøm jøts nbudøjka'andit pøn ja yjanchja'win tu'ugyi tkamøøt'ajtpnim, jøts kidi adømyi kø'øm nnabya'ayø'øyindi.

² Nidu'uk jaty adøm xpaat'ajtyindi jøts ja ndabudøjka'am midi ja ødyunidip jøts ja yjanchja'win myøjta'aktit.

³ Pø ni ja Cristoxi ojts kø'øm kyanabya'ayøyi, ne'egi ja yjaaktyimyjaty jade'en sa jap nøkyixpy yide'en wya'añ: "Tum øts ja tø xaja'atkixy sa jaty ti jaty mgayikta'ødyundip mgayikta'øñimaadyip."

⁴ Pø ja'agøjpxxi ja Dios ja kyajpxy tñankyajjyøø jøts adøm ja nnija'wa'an ti jaty ja ñigajpxxy ja y'ixpøjkin, ja'ats adøm ja xmø'øyimpy ja kajpxjot'amøki jøts tuda'aky ngupøjkindit o ti ayo'on, jøts tu'ugyi ja awejx'ajtin yikmøø'tatt ku yikpaatt ja xemikøjxpit jujky'ajtin.

⁵ Ja Dios Teetyts adøm xyikmajadaajkimp o ti ayo'on jøts ja xkajpxjot'amøjka'an. Wants ja mbudøkiyidi jøts mdsøønidit mdanidit yikxon nixem niyam, sam nwindson'ajtim Jesucristo tñajtsu'uni,

⁶ jøts tu'ugyi ni'amuki xja'byaattit xkajpxpaattit ja Dios Teety pøn ja nwindson'ajtim Jesucristo tyety'ajtpy.

Ku ja Dios y'øgyajpxy y'ømyadya'aky yikajpxwa'kxy ma jaa'y kya'israelit jaa'yidi

⁷ Nagyupøkidits nixem niyam, kidi sa mnadyijyidi mnawya'añidi, nagyupøkidi nayide'en sam adøm nwindson'ajtim Jesucristo tø xkupijkyindi Dios Teety wyindsø'jkin wyinja'wingøjxp.

⁸ Pø israelit jaa'lyxi ja Cristo ñimimpy jøts ja tpuðokit, jøts jade'en ja Dios Teety ja wyandaajkin tyik'adujkit midi ja møjaa'dyøjk wyinaty tø yik-tamiwanda'agidi.

⁹ Jøts nayi ñimeen ja' pøn ka'israelit jaa'dyi, jøts ja tja'byaattit tkajpxpaattit ja Dios ku ja pya'ayøyidi jadine'en, pø yide'enxi jap Salmos nøkyjøtpy wya'añ: Nja'byaatt mets ngajpxpaatt mets øy ma naajx øy magajp, ma jaty ja jaa'y chøøni pøn ka'israelit jaa'dyi, jøts n'øø't jøts nxu'uxt mets windsø'jkingøjxp.

¹⁰ Jøts nayide'en wyami ja Dios kyugajpxy: Mxonda'aktit tuknax pøn ka'israelit jaa'dyi møøt ja israelit jaa'y pøn ja Dios ja'ajtyidip.

¹¹ Jøts jap abiky ma jap wyami: Møjaa'wimyidi kunuu'kxyja'wimyidi ja Dios ni'ijtyi pøn ka'israelit jaa'dyi,

kajpxwá'kximyidi ja myøk'ajtin o magajp.

¹² Jòts yide'en Isaías tyukjadya'anmiyøø ja Dios:

Ja Isai ñikøjxp pyidsø'omt pøn ñiwindsøn'ajtmip pøn ka'israelit jaa'dyi; ja' ja tu'ugyi tyamiguy'ejxtip ja ñitso'ok'ajtin.

¹³ Wan ja Dios mmø'øyidi ja xondaajkin ja tuda'aky'ajtin, midi xukjøp'ijxy'ajtindip ja kyunuu'kxin ku ja njanchja'wint, jòts jade'en ja ajot'ajtin tu'ugyi mdukmi'etidit Espíritu Santo myøk'ajtingøjxp.

¹⁴ Migu'uktøjkti, jade'en ø nwa'añ jòts ku meets amuum xjagyepy ja nadyamiyoxi'ajtin jòts ja nijawi'ajtin. Wa'ats ja xnijawidi, jòts n'a'ejxip øts jòts ku xjatti jòts nixem niyam mnagyajpxwejidit.

¹⁵ Ja'agøjxp mee ndanijayi ya'at nøky, jòts ndukja'myatstit tu'uk majtsk ja møj winmaa'ñ midi paat'ajtiyidip ja yikxon ja'gyukin. Tø øts ja Dios xanipiky y'øy'ajtingøjxp jòts øts jade'en ngajpxwejt.

¹⁶ Ja' øts ndamidumpy ja nwindson'ajtim Jesucristo ku øts ngajpxwá'kxi ja y'øgyajpx ja y'ømyadya'aky ma ja jaa'y kya'israelitjaa'yidi jòts ja tpaattit ja nitso'ok'ajtin. Ja'ats øts ndagøðøjkip ja Dios, wan ttajotkujk'atyidi jòts kyupøkidit ku yikpøkwyá'adsidit ja Espíritu Santo.

¹⁷ Ku øts jade'en nmiduñ ja Dios Teety, xondaqk øts jòts øts ja møk ndukmøjawí ndukunuu'kxyjawi, ku øts njanchjawi ja nwindson'ajtim Jesucristo.

¹⁸ Ka'ap øts ti nugo ñikyajpxy midi øts ja Cristo kø'øm xkaduktump xkadukpátp jam jaa'y agujkp pøn ka'israelit jaa'dyi, jòts tmimado'odit ja Dios. Tø dø'øn jade'en tyimyjaty, tø dø'øn jade'en tyimiykmadøy sa ø nnigajpxy,

¹⁹ ku tñank'ijxyi ja myøk'ajtin, tyikaxi'iky ja ejxa'an, tyikaxi'iky ja milagri'ajtin, jòts jade'en yik'ixy yiknijawi ja Espíritu Santo myøk'ajtin. Jade'ents øts nnigajpxkixy øy maðsoo ku ø ngajpxwá'kxi ja Cristo y'øgyajpxy y'ømyadya'aky midi nitso'ok'ajtin xukpaajtin, nwidity ø Jerusalén uk nja'aty øts jambaat llirico etjotp.

²⁰ Ja' øts ndajotigøøpy jòts øts jade'en ja øgyajpxy ja ømyadya'aky tø ngajpxwá'kxy, midi tñigajpxp ja nitso'ok'ajtin, ma niwindii kyayiknimadøynim ja Cristo xyøøw, jòts ka'ap øts nay ja'abi kajp tø n'anøjkxi ma jadu'uk ja jaa'y jawyeen tø tyiktso'onda'aky ja Cristo y'ixpøjkin.

²¹ Jade'en øts tø nduñ sa ja Dios kyajpxy y'ayuujk wya'añ: Ja' ja ne'egi ejxyip nijawiyip pøn ja niwindii kamadobaajtipnim, jòts yja'gyukidip ja ne'egi pøn ja niwindii kanimadoojidipnim.

Ku ja Pablo ttanibiktaagi jòts ñøjkxt Roma

²² Ku øts ja ngajpxwá'kxk ngayiktsojk'abaadi, ja'agøjxp meets tø nga'ajts'ixy, tø øts kawinaak øjk nja'ukniwinmayi jòts ø nnøjkxt ma meets jam.

²³ Tøts øts ja ndunk y'abaadi yam ya'at etjotp ma øts yam, jòts jekyip øts njaniwinma'ayifiñ jòts mee nninøjkxt.

²⁴ Yamnimts øts inet jam n'uknaxt ku ø nnøjkxt jam España jòts mee n'uk'ext, jadya'ts øts jam wyinaty xpudøkidi, jòts øts jam nja'att ma øts idø'øn nnøjkxwá'añ.

²⁵ Jerusalén øts ixyam nniikxy, pudøjkin øts nyikniikxpy jòts øts ja ngømo'owa'andi pøn jaty jam Dios ja'ajtidip, adøm ja nmøøtjanchja'wibidi.

²⁶ Ja' tø tyikmukti meeñ pøn tsinaadyip jam Macedonia jam Acaya, jòts ja ttanigaxti ja ayoobi jaa'y pøn tsinaadyip jam Jerusalén, adøm ja nmi'g'u'uktøjkti pøn ja Dios ja'ajtidip.

²⁷ Tø twinmaydi jøts ku jade'en y'øyi jøts ja jade'en ttu'undit, pø tøxi ja israelit jaa'y ja ñamyayi y'ayo'ijxyidi ku ja tyukpaat'atyidi ja Dios; xjats ja nayide'en pyaat'ajtmiyidi, jøts ja ttatudøkidit ja israelit jaa'y ti jaty ja iij yjagyajptip.

²⁸ Kuts øts yø n'uktun'abaadit ku øts ja wyinaty tø ndagødøkidi ja pudøjkin, winets ø ndsoont jøts ø nnøjkxt jam España, uk naɣpts øts jam ma meets jam.

²⁹ Jøts wa'ats ø nnijawi jøts ku øts ja Dios amuum ja kyunuu'kxin xabudøki, jøts øts ja Cristo ngajpxwa'kxit ja y'øgyajpxy ja y'ømyadya'aky ku øts jam nøjkx nja'aty.

³⁰ Tundits migu'uktøjk ja may'ajt nwindson'ajtim Jesucristo køjxp jøts Espiritu Santo pøn xukja'wimp ja tsojkin ja pa'ayo'owin, jøts meets nayide'en mnadyamiyoxidit øts ndunkjøjpp, ku meets ja Dios x'amido'ot ja may'ajt jøts ø xpudøkit.

³¹ Amidowdi ja Dios wan øts x'agø'duky x'axajtuky, jøts kidi myajada'akti ja jaa'y pøn tkagupøjkiti ja nwindson'ajtim yja' jam Judea, jøts nayide'en x'amido'odit jøts ejtni xoni tkupøktit ja pudøjkin pøn tsinaadyip jam Jerusalén, pøn ja Dios ja'ajtidip, midi øts yam ndaninøjkxwandip,

³² Jøts pøni yikajtpy Dios jøts øts øy jotkujk nja'at ma meets jam, jøts øts jam n'ukpoo'kxt.

³³ Diosts mjagyapidip pøn amuum ja øy'ajtin xondaajkin tyajkp. Jade'en idøøn ja yjatt.

16

Ku ja Pablo tkajpxpøø'kxy ja myigu'uk pøn jam Roma

¹ Mjaty'ejxtip ja Febe, adøm ja nmøøtjanchja'wibi pøn tump jam tsaptøjkjotp jam Cencreat kajpjotp.

² Kupøkti ja' yikxon, tundi may'ajt Dios køjxpit sam pyaat'aty, pø tu'ugyixi ja Dios yikjanchjawi. Pudøkidits jøts xmo'odit ti jaty jam ka'ejtxip, tø ja may'ampy xjanchpudøjkandi, øts paat ja køøm tø xpudøki.

³ Kajpxpoo'kxti nayide'en ja Priscila møøt ja Aquila, pøn tø nmøøtundi jøts øøts ja Jesucristo yja' nyikyø'øyi.

⁴ Ja'agøjxpti øts ixyam njujky'aty ku ja kyø'ømjujky'ajtin ja o'jkin jøp'am tpiaktøø, nugo ku øts ja'ayi jade'en xyiknits'o'kti; xemikøjxp øts ja Dios ja ndamøjawi, jøts nayide'en ja ttamøja'wimiyidi niduki'iyi ja nmigu'uktøjk, pøn tjanchja'widip ja Jesús ma jaa'y kya'israelit jaa'yidi.

⁵ Kajpxpoo'kxti nayide'en ja migu'uktøjkiti pøn namyujkidip jam Priscila jam Aquila tyøjkjotpti. Kajpxpoo'kxidik øts ja nmigu'uk Epeneto, pøn midu'uk tjanchja'wiy'okwaan ja nwindson'ajtim Jesucristo jam Acaya etjotp.

⁶ Kajpxpoo'kxti ja María midi jadine'en tmidump ja Dios ma meets jam.

⁷ Kajpxpoo'kxidik øts ja nmigugajp ja Andrónico jøts ja Junias, pøn øts møøt tø nbuxøjksøøndi; janch'øyjawi ja y'etti sam nayide'en ja Cristo kyudanaabyitøjkti, jøts jawyeen ja ne'egi tjanchja'widi ja Cristo, oojknim øts.

⁸ Nayi mgajpxpoo'kxtip ja Amplias, pøn øts øy møøt namyayi Cristo køjxp.

⁹ Jøts nayi kajpxpoo'kxti ja Urbano, pøn øøts ojts nmøøtuñ ku øøts ja nwindson'ajtim yja' nduujni, jøts kajpxpoo'kxti nayide'en øts ja nmigu'uk Estauis,

¹⁰ Jøts nayide'en ja Apeles pøn kawinaak ojk tø ttamajada'aky ja yjanchja'win Cristo køjxp, øy ja wine'en ja ayo'on yjayiktanipiky. Jøts kajpxpoo'kxti nayide'en ja Aristobulo møøt ja y'u'nk ñidøøxy.

11 Kajpxpoo'kxidik ɔts ja nmigugajp pɔn txøw'ajtp Herodión, jɔts nayide'en ja Narciso, jɔts pɔn jaty jam tsinaadyip ja' tyøjkjotp, pɔn ja nwindson'ajtim tɔ tjanchjawidi.

12 Jɔts nayide'en xkajpxpoo'kxtit ja Trifena møøt ja Trifosa, pɔn amuum tmidundip ja nwindson'ajtim, jɔts nayide'en ja Pérsida, adøm ja nmigu'uk pɔn kawine'en kujk tmiduñ ja Dios.

13 Jɔts nayide'en xkajpxpoo'kxtit ja Rufo, pɔn amumjoojt tjantyimy-janchja'wip ja nwindson'ajtim, jɔts kajpxpoo'kxidi ja tyaak nayide'en, jade'en ɔts ja njawi sam ɔts ngø'ømdaagin.

14 Kajpxpoo'kxti ja Asincrito, ja Flegonte, ja Hermas, ja Patrobas, ja Hermes, jɔts møøt niduki'iyi ja migu'uktøjkti pɔn ja Dios yjanchja'widip, pɔn jaty ja jam møøtti.

15 Nayi kajpxpoo'kxti ja Filólogo møøt ja Julia, jɔts ja Nereo møøt ja myiga'axkiixy, jɔts ja Olimpas nayide'en xkajpxpoo'kxtit møøt niduki'iyi pɔn jaty ja jam møøt, pɔn ja Dios yjanchja'widip.

16 Nadyuknijawiyidi ja kajpxpoo'kxin nixem niyam sa Dios ttsøky. Mdanigajxidip ja kajpxpoo'kxin pɔn jaty ja nwindson'ajtim Jesucristo yjanchja'widip øy maðsoo.

17 Migu'uktøjkti, mjatyimy'ejtibim pɔn yiktseptøjkidip pɔn yiktundigøødyip. Ja tsep ja nugo yiknaækida'akwandip jɔts mee mnawya'kxiti, pø ja'axi ja yikma'atwandip midi meets tɔ myiktukmadøy, pø ka'axi ja yjade'eni midi mee tɔ xjaty midi mee tɔ xnijawi, jade'en ne'egi tymbyaat'aty ku xpuwa'atstii.

18 Ka' yø'øbi jaa'y tmidundip ja nwindson'ajtim Jesucristo, kø'øm yø ñayjotmay'atyidi ti yø ejtxidip ka'ejtxidip, jɔts twin'øøndi ja jaa'y pɔn tkanija'widipnim, øy ja Dios yja' nadyijyi amyuyj tsaachuyjy tmigajpxti.

19 Jɔts ñija'wip øy pɔn sa meets xpaduujni ja Dios yja'; ja'agøjxp mee ndajotkujk'aty. Ja' ɔts ja'ayi ndsøjkpy jɔts xwinmaa'ñ'attit sa xu'undit ja tum ja øybi, jɔts kidi ja ne'egi mjaakmayidi ja ka'øybi.

20 Jɔts ja Dios pɔn ja øy'ajtin xondaajkin amuum tjagyajp, tsojk ja nøjx ja miku' myøk'ajtin tyikwindigøjyi, jɔts ja niti majadaajkin tka'ukpatnit meets mwingujky. Paatti ja nwindson'ajtim Jesucristo ja kyunuu'kxin.

21 Nayi mdanigajxidipts ja Timoteo ja kajpxpoo'kxin pɔn ɔts møøt nduñ, jɔts nayide'en Lucio, møøt ja Jasón, møøt ja Sosípater, ɔts nmigugajp nmigunaajxti.

22 Nayi mgajpxpoo'kxmidi ja Tercio nwindson'ajtimgøjxp, pɔn ɔts ya'at nøky ndukjaapy.

23 Jɔts nayide'en mgajpxpøø'kxyidi ja Gayo. Ja' tyøjkjotp ɔts yam nd-søøni, jɔts nay ja' t'anuu'kxyajkp ja tyøjk ma ñamyukyidi pɔn jaty ja Dios yjanchja'widip. Jɔts nayide'en mdanigajxidip ja kajpxpoo'kxin ja Cuarto jɔts ja Erasto, pɔn ja ya'at kajpmeñ myachomujky.

24 Mo'ojidip ja nwindson'ajtim Jesucristo ja kyunuu'kxin mee niduki'iyi. Jade'ents ɔts idø'øñ ndsøky'aty.

Ku ja Dios y'ukyik'ajot'ajtni

25 Tmøja'windits tkunuu'kxyija'windits ja Dios, wan mbudøkiyidi jɔts ja mjanchja'win tu'ugyi amumjoojt xyik'ettit sam mduknijawiyidi ja øgyajpxy ja ømyadya'aky, sa ja nitso'ok'ajtin yikpaaty midi ɔts ngajpxwa'kxpy, ja Jesucristo y'ixpøjkin. Jɔts ja' yø' midi ja Dios jekñim tɔ tnigajpxy, midi ja jeky tɔ xkaduknija'wa'am jɔts ku ja jayimni jødsnim ja naæwii'ñit cho'onda'aky.

²⁶ Īxyamts ja tø yiknijawinim ku ja kyajpxy y'ayuujk tø ttukjaadyañ ja kyugajpxtyøjk, sa kø'øm tyikutuky ja Dios Teety xemikøjxpit. Jøts ja tuki'iyi yiktuknijawidi ja kajp ja naajx jøts tjanchjawidit jøts tpaduujnidit ja yja'.

²⁷ ĩTu'ugyi Dios Teety mõj jøts ja' tu'ugyi tnija'widyaapy, wants xemikøjxp ja tkupiky'aty tmadø'y'aty adøm ja nwindso'jkin ku ja nja'byaajtindi ngajpxpaajtindi amuum nwindso'n'ajtim Jesucristo køjxp! Jade'ents idø'øn ja y'ejxi tyiyi.

JA MYĪDU'UKPI NØKY MIDI JA PABLO TYANĪGAJX JA CORINTĪ JAA'Y

Ku ja Pablo tñijay; ja janchja'wibi jaa'dy; pøn jam Corinti tsinaadyip

¹ Øts idø'øn Pablo'ajtp. Tø øts ja Dios Teety xamidsøky jøts øts tø xwaadsøy jøts øts ja Jesucristo ngudanaabyi'att. Møøt ja Sòstenes, pøn nayide'en tjanchja'wip ja Jesucristo,

² ixyam ø nnijay; ja Corinti jaa'y pøn jaty ja Dios Teety tø tñijawidi jøts tø tkupøkti ja chojkin ja pya'ayo'owin møøt ja y'ana'amin Cristo Jesús køjxp. Pø ja Dios Teetyxi meets tø mw'i'ijxyidi jøts ja amuum xamiyoxtit ja mdsinaa'yindi møøt nayide'en pøn jaty ja tjanchja'wyimidip, pøn jaty tkajxpatmidip ja nwindson'ajtim Jesucristo, pø tum ja'axi amuki nwindson'ajtyindip nixem niyam.

³ Pajtidi kupøjkidi ja Dios Teety y'øy'ajtin kyunuu'kxin møøt nayide'en ja nwindson'ajtim Jesucristo yja'.

Sa ja kunuu'kxin yikpaaty Cristo køjxp

⁴ Ejtp øts ja Dios Teety ndamøjawi ndakunuu'kxyjawi ku meets ja kunuu'kx'ajtin tø xpaaty Cristo Jesús køjxp.

⁵ Paty meets ja Dios Teety ja møj øy'ajtin janch kajaa tø mmø'øyi jøts øy tsuj xjajtidi uk xnimadyajkidi ja y'øy'ajtin ja kyunuu'kxin ja'agøjxp ku ja Cristo yja' tø xpabøjkidi.

⁶ Tø meets idø'øn ja xjanchyikwindiy sa jaty ja Cristo tø yiknimadya'aky.

⁷ Ku meets jade'en mdsøønit mmo'ojidipts ja Dios pøni ti dø'øn ja ttamidsojqp, ixa mee x'awijxy ja xøøw ja jumøjt ku ja nwindson'ajtim Jesucristo ñanky'ejxpaadyit jadigojk.

⁸ Ja Diosts ja møk'ajtin mmo'ojidip jøts tu'ugyi mdsinaa'yin xyik'ettit, jøts wyinaty niti mgayiktaniwanbatti ku ja nwindson'ajtim Jesucristo jya'att.

⁹ Pyadumpy ja Dios ejtp ja y'ayuujk. Ja'ats tø mwaadsøyidi jøts ja y'U'nk xmøøtsinaajyidit, ja nwindson'ajtim Jesucristo.

Ja' ñi'ane'empy jøts tu'ugyi chøønidit

¹⁰ Migu'uktøjkti, nwindson'ajtim Jesucristo køjxp meets idø'øn n'amidøy jøts ka'pxy xu'undit jøts tu'ugyi mdsinaa'yin xpikta'aktit xyik'ettit. Kidi ki'abiky mdsøønidit, tu'ugyi winmaa'ñi xmøøt'attit jøts tu'ugyi xmøøt'attit midit mdajotigø'odyip.

¹¹ ¿Ti ø migu'uktøjk idø'øn jade'en xyikwamp? Ja'agøjxp øts idø'øn jade'en nwa'añ kuts ja Cloé myigu'uk yø xukmadowdi ku meets jam mnamyijotma'adyidi.

¹² Yide'en øts idø'øn tø nyiktukmadøy ku mee tumdigach ja m'ayuujk; nømbik mum wya'andi: "Øts ja Pablo møøt"; jødsik ñømidit: "Øts ja Apolos møøt"; uk nømidiptsik: "Øts ja Pedro møøt"; jødsik jam ñømidit: "Øts ja Cristo møøt."

¹³ ¿Sudsots idø'øn, uk tø dø'øn ja Cristo may ñawya'kxyi? ¿Ti tø meets ja Pablo mgu'oogiyi kruskøjxp? ¿Uk Pablo køjxp meets idø'øn tø mnøbety?

¹⁴ Ngajxajkpy øts ja Dios kuts ja'ayi tø nyiknøbety ja Crispo jøts ja Gayo, meets ja mjaa'y;

¹⁵ jøts jade'en mgawa'andit ku mee tø mnøbety øts køjxp.

¹⁶ Ixa njaakja'myech jadu'uk jøon jadu'uk tøj kuts ja Estéfanas nayide'en tø nyiknøbety, jøts jade'eñi nipønxi øts jyawi tø njaga'ukyiknøbajtni.

¹⁷ Ja'agøjxp øts idø'øn jade'en tø n'adi'ich ku øts ja Cristo tø xkakexy yiknøbatpi, ja'axi øts ja xaniguexy jøts øts ja jaa'y ndukmado't ja nitsoojkin ayuujk, ka'ats øts ja janchkajajtni nnigajpxy sam ja ixpiky jaa'y myadya'akti, jøts ja Cristo ja y'o'jkin jam kruskøjxp ejtp yikmøjpikta'akt.

Cristo, Dios Teety myøk'ajtin wyijy'ajtin ja'

¹⁸ Ku yjayiknimadya'aky ja Cristo y'o'jkin jam kruskøjxp, løki o'jkin ja jaa'y ja tjeiti pøn tø yiktanibiktaagidi jøts ja øy'ajtin tkapaattit; pønts ja Dios tø tkupøjkidi ja ñitsoojkin ja pya'ayo'owin ka'ap ja jade'en wya'andi, nømp ja wya'andi jøts ku Dios myøk'ajtin jade'en tyiknigaxi'iky.

¹⁹ Pø yide'enxi ja nøky wya'añ midi jap jaabyety ejtp:

Ka' øts ja y'ixpiky'ajtin ja wijy jaa'y nmøjpiktaajkit,

jits ka'ap øngupøjkit ja ñimado'owin ku øts ja nimadoobi jaa'y xjamigajpxmit.

²⁰ ¿Mats idø'øn ja ixpiky jaa'y tyundi, jøts ja yik'ixpøjkpidi, jøts ja jaa'y pøn tnigajpxtip tñimadya'aktip ti jaty ja tuujnip naxwiin? Kawejin kakajinx ja Dios ja tø tyikwimbijty midi ya naxkijxy yiktejp wejin kajin.

²¹ Wa'ats Dios tnijawi jøts ku ka'ap pøn myi'abaadyiyi ja wyijy'ajtin sam ja wijy jaa'y yjawnmaadya'an pøn tkagupøjktip ja'abi winmaa'ñ. Ja' ja ne'egi tyukpaatp tyuk'ejxp ja nitsoojkin pøn ja kupøjkxiyip ja kyajpxy ja y'ayuujk tu'ugyi amumjoojt, øy ja yjadu'ukpi wine'en tja'abaxti ja'abi kajpxy ja'abi madya'aky.

²² Tum ja iixyimbi ka'ixxyimbi ja israelit jaa'y chojktip, jøts ja griegit jaa'y t'amidomidi ja wejin ja kajin;

²³ ja Cristots øø nnigajpxpy ku ja kruskøjxp tø y'øøky. Nach'ødyu'uni ja israelit jaa'y ja tjeiti, jøts ja griegit jaa'y ñømidi ku ja kyawej'ajtin kyakaj'ajtin.

²⁴ Ots ja jade'en yjawa'andi, tøts ja Dios twi'ixy ja israelit jaa'y jøts ja griegit jaa'y pøn ja amuum tyamay'ajtpy ja møk'ajtin ja wijy'ajtin Cristo køjxp.

²⁵ Midi ja jaa'y yjanch'uktejtíp Dios ja kyawejin kyakajin, ja' idø'øn ne'egi kamaabyim pidsømp; midits tyejtíp kajotmøk'ajtin ja'ats kidi mibaat pøn myayiyi, yjaaktyimyjinajpxy ja jawaani øy wine'en ixpikyjaa'y yjanamyukyidi.

²⁶ Migu'uktøjkti, ejxti nijawidi ku Dios tø mwi'ixyidi, o meets jam waani pøn janch'ixpiktyi sam idø'øn ya naxwiin yiktsøky, jøts nayide'en niwaani pøn yikmøjpiktaaktip, uk jam tigati yikta'ejxkapti yjønjojp tyøjkjotp.

²⁷ Tigach ja Dios wyinmaa'ñ, tum ja' ja tø twi'ixy pøn kajotmøjkti jits ja tsø'ødyumbim jyattit pøn jotmøk nayja'widip ya.

²⁸ Ja' ja Dios tø twi'ixy pøn ya naxwiin niti kayiktamøjpiktaaktip jøts jade'en tyikgøxit pøn jaty møjpktaajkidip ja jaa'y ya naxwiin,

²⁹ jøts niti nipøn kyanadyamikaxiyit Dios Teety wyingujkp.

³⁰ Ja Dios Teety idø'øn kø'øm tø ja Jesucristo mdukpaadyidi jøts muki møøt m'ettit; jits nay ja' tø ttuñ jøts adøm ja Cristo ndawejint ndakajint, jøts nay Cristo køjxpts ja Dios Teety xkupijkyindi jøts ja amumjoojt xukmøøt'ijtyindi, jøts ja nitsoojkin xmø'øyint.

³¹ Jabi yide'enxi ja Dios kyajpxy wya'añ: "Pøni pøn nay'agajpxwajnip wan ja nwindsøn'ajtim tnadya'agajpxyiyi."

2

Ja Cristo kyajpxy y'ayuujk pøn tø y'øøky kruskøjxp

¹ Migu'uktøjkti, ku mee nninijxxy jøts ja Dios kyajpxy ndukmadoojiidi, ka'ap øts ja'abi ayuujk nyiktuuñ midi kanimadooni.

² Tu'ugyi øts ojts ja ixpøjkin nbikta'aky ku øts ja Jesucristo ja'ayi nnijawi, jøts jade'en øts ja nnigajpxy ku ja kruskøjxp tø y'øøky.

³ Janch yik'ayo'owim ngaxi'iky jøts tsø'øgi øts yjaw'i xjanchyik'oo'knip ku meets jam nninijxxy;

⁴ kuts mee tø ndamimadya'aky jøts tø nduknijawidi ja Dios kyajpxy y'ayuujk, ka'ap øts wi'ijxpyi ayuujk uk kanimadooni ayuujk nyiktuuñ sa ja møj nija'wibidi.

⁵ Ja Dios Espiritu Santo meets ja tø mduknimadøyiidi jøts ja Dios tø mbudøkiyiidi, jøts meets idø'on xmibøkt kidi ja wijy jaa'y y'ayuujkøjxpip, pø ja Diosxi myøk'ajtingøjxp.

Dios Espiritu Santo køjxp idø'on ja Dios Teety ñankñijawiyi

⁶ Tiy idø'on, janch møj nija'wibim øø ngajpxy ku øøts ja jaa'y nmigajpxy pøn jaty jawaani tø tñija'wiñi ja nwindsøn'ajtim y'ana'amin. Kidi meets jade'en xja'gyuki ku øøts ja ya'at kajin nyiktuuñ sam møj yikutujkpi ya naxwiiñ ttundi, midi tsojk kudigøøñidip. Jabi Diosxi øøts idø'on kø'øm jade'en xyikajpxp.

⁷ Ja Dios wyejin ja kyajin øøts n'ayuujk'ajtpy midi yu'uch yik'ijtpñim, jøts ja' øøts idø'on nnigajpxy ja nitsoojkin midi xemikøjxp ejtp, midi ja Dios yu'uch tø tyik'ity ku wyinaty niti tkayikøjñim.

⁸ Ni tu'ugin ja møj yikutujkpi yø tø tkanimadøy; ka'ap ja nwindsøn'ajtim Jesucristo ja jeexyip tø tyikruspatti kuk ja tja'gyukidyøø.

⁹ Jade'ents idø'on ja tø yjatti sa jap nøkyijxy jaabyetyi:

Nipønim ja tka'ixy, nipønim ja tkamadøy, jøts nipønim ja tkawinmay pøni ti ja Dios tø ttanibiktaagi jøts ja tmo'ot pøn jaty ja chøjky.

¹⁰ Adømts idø'on ja tø xuknija'wa'am pøni ti dø'on ja tyijpy ku ja Dios Espiritu Santo tø xuknija'wa'am, jaa kuxi ja tñija'wiguixy tuki'iyi, jøts nija'wiyip ja Dios Teety ja wyinmaa'ñ nayide'en pøni sa jaty ja wyinmay.

¹¹ ¿Pøn idø'on ja t'uknija'wip pøni ti jam y'am yjotp tu'uk jadu'uk ja jaa'y myøøt'ajtpy? Jabi wyinmaa'ñxi ja kø'øm ejxiyip midi ja ñikøjxp'ajtpy. Ja Dios Espiritu Santo nayide'en nadyu'uk tñija'wimyip pøni ti jaty ja Dios Teety wyinmaa'ñ'ajtpy.

¹² Kidi ja naxwii'ñit winmaa'yints adøm tø nyikmø'øyim pø ja Diosxi adøm ja y'Espiritu Santo tø nyikmø'øyim jøts ja xukja'gyuka'am ja Dios myøjmay'ajtin ja Dios myøjkunuu'kxin.

¹³ Ja Dios Espiritu Santots øø tø xukyikyuyj pøni ti jaty øø nnimadyajkpy, ka'ap øøts ja ngø'øm ixpiky'ajtin nyiktuuñ, paty øøts ja Dios tyiy'ajtin ndukmadøy ja jaa'y pøn ja'abi ayuujk ja'abi winmaa'ñ tñimadoojip.

¹⁴ Pøni pøn ja Dios tyiy'ajtin tkanimadoojip, ka'ap ja tkupøkti pøni ti ja Dios Espiritu Santo yjanigajpxpy, nugo ja tijy kawej'ajtin. Ka'ap tñimadøy, kumi ka'ap ja tñijawi sudso ja tja'gyukit, ja' kuxi ja Dios y'Espiritu Santo tkamøøt'ajtidi.

¹⁵ Pønts ja Dios Espiritu Santo myøøt'ajtpy øy ja tigati tja'gyukit jøts nipøn ja sa kyanø'ømxit.

¹⁶ Pø nømpxi ja kajpxy jap nøkyijxy: "¿Pøn idø'on tø t'uknimadøy ja Dios wyinmaa'ñ? Nipøn kyamayi jøts ja Dios tkajpxwejt." Øy ja yjade'en'aty, ja Cristo adøm ja wyinmaa'ñ nmøøt'ajtyimp.

3

Tu'ugyi øøts ja ndunk ku øøts ja Dios nmiduñ

1 Kuts mee migu'uk ja Cristo y'ayuujk tø ndukmadowdi, ka' meets jade'en nmigajpxy sam idi'in yikmigajpxti pøn ja Dios Espiritu Santo yja' tø ñadyamiyoxkøjxniyiidi, jade'en mee tø nmigajpxy sam ja jaa'y pøn tka-janchja'widipnim, jøts sam yiktukmadowdi ja mutsk una'jk, ja Cristo yja'.

2 Tum ja' mee tø ndukyikyuyj midi jajtni, jade'en mee tø nduñ sami maxu'nk ja'ayi tsejtsk nøø yikmø'øy jøts ka'ap kaaky tojkk; ja'agøjxp ku mee mgamayinin midi tsep sam ja maxu'nk tkagupøkti ja tø'øts kaaky ja tø'øts jii'kxy; nayide'ents meets icyam ook tigøy m'ity, ka'anim mee mmayi ja tseppi,

3 ja'agøjxp ku nayide'en x'ejxtinim sam ja jaa'y pøn ja Dios y'ayuujk tkanija'widipnim, ku mee mnadyami'ekyi tigati; ku mnamyijotma'adyidi jøts mga'uknamiyigajpxwa'aniyiidi jøts nayide'en mga'uknawyin'ejxwa'aniyiidi, nayide'en mee xuni sami nugo jaa'y pøn ja nwindson'ajtim Jesucristo tkanija'widipnim.

4 Pø kuxi mee mnimy: "Øtsi Pablo møøt", jøts jadu'uk ñømi: "Øtsi Apolos møøt", nayide'en mee m'adi'ich sam idø'øn ja jaa'y pøn ni tu'uk ja Dios kyajpxy tkanija'wip.

5 ¿Tyimbyøn ja Pablo? jits ¿Tyimbyøn ja Apolos? Pø ja Diosxi øøts ja'ayi xumbi'ajtp, nay ja'ats øø tø xyiktunkpaaty jøts meets yja' ja tø xmibøjki. Ja ndunk øø tø nduñ midi øøts ja Dios tø xaguwani.

6 Jade'en ja tpaaty, øts idø'øn ndejint tø nni'ipy ja tømt, jøts ja Apolos ja tø tnøguway jøts tø t'eix'ity. Jøts ja Dios, ja'ayits tø tyikmuxe tø tyikyøn ja tømt.

7 Ja Dios idø'øn tu'ugyi møj, jøts ja' idø'øn tuki'iyi tungøjxp, pø ja'axi ja tømt tø tyiktsø'øky jøts niti ja'adi pøn ja tø tjani'ipy uk pøn ja tø tjanøguway.

8 Nipønts kyamøji kyamutski øy ja tø yjani'ipy uk øyts ja tø yjanøway, pø ja Diosxi kø'øm ttanipatp ja mijuu'ñ pøni sã ja tyunk ja ya tyikyø'øy naaxwiin.

9 Tum tumbi jaa'y øøts idø'øn namajtsk. Ja Dios øøts idø'øn xumbi'ajtp, jøts meets idø'øn mgam'ajtp midi ja Dios yja'ajtpy.

Uk nayide'ents n'ukpiktaajkint, meets idø'øn mdøjk'ajtp midi ja Dios kyøjpy.

10 Øts idø'øn ja Dios tø xpikta'aky pojtspi ana'ambi, jøts øts idø'øn ja tøj tø nbots'okwa'añ, jøts ja wenkpi pojtspi tjaakyikyø'øy ja tunk. Tum a'eixits ja tsøky sã pønjabøn pyøch.

11 Nipønxi kyapaat'atyiidi jøts ja pøch ja abiky tyiktso'onda'akt, pø tøxi ja tu'ugyi tyañ midi ja Jesucristo pyøchkojpk'ajtpy.

12 Kuts ja tøj jyaakjayikpøch, øts ja oori yjaakpat, uk ja platits, uk tum tsuj tsaã, uk øyts nayide'en ja pu'uy, uk ja miiyts, uk øyts ja waxkipy,

13 ku wyinaty ja tiidyu'unin tyaaty jamnimts ñigaxø'økt pøni sã pøngapøn tø tyuñ; pø tum jøønxi jam wyinaty tump, ja'ats tyiknigaxø'økp pøni ti ja tøj tø yiktakøjy.

14 Pøni pøn wyinaty tø tyiktuñ midi ja jøøn kamayip, yikmo'opts ja' myijuu'ñ;

15 kuts ja wyinaty tyøy, windigø'øpyts ja tuki'iyi midi ja wyinaty tø tjaapøch øy wyinaty awisã yjanch'awa'atspidsimy pøn idø'øn jade'en tø pyøch.

16 ¿Ka' mee xnijawi ku meets ja Dios Teety mdsaptøjk'atyiidi jøts ku ja Dios Espiritu Santo jam chøøni?

17 Pøni pønts tjejtjip ja Dios ja chaptøjk, yikudigøyip ja Dios ja', ja'agøjxp ku kyunuu'kxyi Dios chaptøjk, meets ja Dios mdsaptøjk'ajttip.

18 Kidi kə'om mnadyuñidi. Pəni jam tu'ugin ixpiky jaa'y ñayjawiyi, wan nayide'en nabyikta'agiyi ejxim ja jaa'y midi niti tkajajtp, jəts jade'en tpaatt ja wejin ja kajin midi kanaxp.

19 Pə janch jawaani kajaaxi ja Dios wyejin jəts nika' jade'en ja jaa'y y'ixpiky'ajtin. Yide'enxi ja Dios kyajpxy wya'añ: "Ja kyə'om ixpiky'ajtin ja jaa'y tabakjo'opidip ja Dios, jəts ja kə'om tyuktagidawiyidit."

20 Nayide'ents wyami: "Ñija'wip ja Dios ja' ku nima kyatuñ ja ixpiky jaa'y wyinmaa'ñ."

21 Paty meets mganadya'agajpxiyidit nipən; pə meetsxi mja'ajtpy jəts əy xyiktunkpaattit tuki'iyi:

22 ɪxa Pablo, Apolos, Pedro, et naxwii'ñit, jujky'ajtin, o'jkin, ɪxym'ajtin, jəts midi memp midi ja'tp;

23 ja Cristots mee mja'ajtidip, jəts ja Dios Teety ja Cristo tja'atmi.

4

Ja nwindson'ajtim kyudanaabyi tyunkjəəjp

1 Paty meets jade'en xja'gyukit jəts ku əəts ja'ayi ja Cristo nbudəki, ja'ats əə ndunk'ajtpy jəts əə nnigajpxt ja Dios y'ayu'uch winmaa'ñ.

2 Pəni pən ti tə yiktaguwani, yiknigaxə'əkp idə'ən ja' ku ja tpadu'unt.

3 Ka' əts ja nməjpikta'aky pəni sə meets xnigajpxy xnimadya'aky, uk pəni sats əts ja xeji xwa'andi pən jaty yə naxwiiñ ja jaa'y tiidyundip. Ni əts paat nganadyunk'aty kə'om pəni sə ə njaa'y'aty.

4 Nitits nganadyapəkyjawiyi, nnija'wip əts wa'ats ku əts ka' axəəp njaa'y'aty, ka'ats ja njəp'ejxin ku əts ja nbəky kya'ity, ja nwindson'ajtimts ə kə'om xidyu'ump.

5 Paty kidi x'əyjawidi xka'əyjawidi ɪxym tigati; awejxtinim wan ja nwindson'ajtim tyiknigaxə'kixy pəni ti jaty kayik'ejxpatp, jəts nay ja Dios tyiknigaxə'əkp pəni sə t'ixy tu'uk tu'uk ja anmija'win, jats ja Dios ja t'əyjawit uk tka'əyjawit.

6 Migu'uktəjkti, meets m'əy'ajtingəjxp əts jade'en nwa'añ jəts xni'ejxu'uttit ja Apolos uk xni'ejxu'uttit əts. Paty əts idə'ən jade'en nwa'añ jəts nayide'en mjaa'y'attit sām əəts. Ka' nugo xu'undit agubajkpy yam ja Dios kyajpxy jade'en kyawa'añ jəts kidi nugo pən xnadyamikexyidi uk xmi'ambəjkmidi pən.

7 ʔUk jaa də'ən tu'uk jaa'y pən jawaani myikwejidip? ʔTi kə'om tə xpaatti midi ja Dios tə mga'ukmə'əyidi? Pəni tum ja Diosts tə mmə'əyi, jadits ku mnadyamikexy pəni ti jaty mmə'ət'ajtpy, jade'enxi me mwani ku mets ja kə'om tə xpaaty pəni ti jam mmə'ət'ajtpy.

8 Kumeen jaa'yin meets yjawi mnayjawiyi pən niti tka'ukta'ayoonidip. Wndsonin yjawi mnayjawiyidi, jəts əə xka'ukja'myatsni. ɪəgidə'ən tyimyjanch mjanchwindson'atti jeexyip, jəts əə nayide'en ja ngutujk xmo'ot!

9 Jade'enxi əts yjawi nja'gyuki, pə tə əəts idə'ən ja Dios tyimyi'xoojk xyiktañ; jəts əəts idə'ən yjawi tə nyiktanibiktaagi jəts əə n'ookt; jəts əəts jade'en ja tsajp ja naajx x'ext xjawit, nayide'en ja Dios y'ankilis məət ja naxwii'ñit jaa'y.

10 Maap mo'tp əə nyiktijy ku əəts ja Cristo yja' nbaduujni yam mee mnadyijiyi məj nija'wibi pən tnmadoəgəjxidip ja Cristo yja'. Ka'ap əə njotməjki yam meets yikxon myikwindsə'əgi.

11 ɪxymbaat əəts yuu ndani'ixy məət təədsi, jəts ka'ap əəts nwet nnaamy te; əy əəts jaa'y sagasa xuñ, ka'ap əəts ndəjk te mə əə nboo'kxt,

¹² Jøts nmijotkijxpy øøts ndunk nbøjk. Xjamigajpxigøøpy øøts jaa'y, ja øy tsuj ayuujk øøts ja nda'adsojimbijtpy. Ngupijxpy øøts pøni xpawojp øøts jaa'y.

¹³ Xjanchjabagajpxp øøts jaa'y, tuda'akts øøts ja n'ane'emy. Pista'agin øø nyiktuñ uk jade'lents øø nyikjaw'i ejxim jaa'dy'iñ jaa'dya'ach.

¹⁴ Ka' mee nnijayi jøts xatsø'ødyu'undit ku jade'en mdsøøni, n'ana'amwampy meets idø'on ja'agøjxp ku mee n'u'nk n'una'jkin njawi pøn ø ndsojktip.

¹⁵ O meets jeexyip xjamøøt'aty namay ja yik'ixpøjkpi, ka' meets jadine'en ñamay mdeety jabi øtsyixi meets ja'ayi tu'umpchi xeety'atp ja'agøjxp ku ja Cristo ñitsoojkin tøn ndukmadowdi jøts ja janchja'win tøn xpaati.

¹⁶ Ixyamts mee n'amidøy jøts ø xpa'ejxtit.

¹⁷ Paty meets ixyam ndaniguexy ja Timoteo pøn ø n'u'nkja'wip nwindson'ajtimgøjxp, jøts pøn ø nayide'en xkamajstutp. Yø' mduka'jmyatsidip sudso ø ndsøøni kuts ja Cristo nmibøjki ja yja' sa o magama ndukykyujti pøn jaty ja Cristo tjanchja'widip.

¹⁸ Jam meets ja mmigu'uk pøn janchnamyikajxnijidip, nømp ja wya'andi kuk mee nga'ats'ext ja'agøjxp ku øts ja' ndsø'øgidi.

¹⁹ Pøni yikutujkpyts ja Dios, nninøjkxtipts pojin. Jamnimts ø n'uk'ext pøni janchtundip idø'on pøn namyikajxidip uk nugo dø'on kyajpxti.

²⁰ Ka'axi dø'on nugo nmadyajkint ku ja Dios yja' nbaduujñindi, pø jatyixi dø'on ja yikpadungojt.

²¹ ¿Sudsots uk mdsojktip jøts øts awa'an nnøjkxt jøts n'atskastigimo'odit, uk ja yujy'ajtin jøts ja tsojkin ø nminøjkxp ku wyinaty n'ats'ejxti?

5

Ja'yiknigajpxp ku ja kya'øyi ku pøngapøn ñamayøøt'atyidi nugo

¹ Jade'en ja kajpxy yø'øy, jamik ja mmigu'uk tu'uk ja kyudaak tmøøt'aty. Janch møj ka'øy jaa'y'ajtin idø'on jade'emb: tsinaa'yin, ni jambaat yø kyayikupiky ma ja jaa'y ja Dios tkanijawidi.

² ¿Jøts niti meets idø'on xkidyimbyøkyjawi ku ja mmigu'uk jade'en y'adi'ich? ¡Meetspik idø'on jeexyip mjotmay'oo'ktøjkp ku mmigu'uk jade'en y'adi'ich! Pøn yaa'dyøjk idø'on jade'en tøn y'adi'ich ka'ap ja y'ukpaat'ajtniyi jøts ja jam xmøøtsøonidit, pawøpy ja pyaat'aty.

³ O meets idø'on njagamøøtsøøni jamts øts ja nwinmaa'ñ nyik'ity; tøts ja ndiidyuni winmaa'ñjotp pøn jade'en tøn y'adi'ich ejximdam øts jam jeexyip ndyimchøøni.

⁴ Namyukidi nwindson'ajtimgøjxp, jam ø wyinaty ja nwinmaa'ñ meets møøt, jøts ja nwindson'ajtim Jesucristo myøk'ajtin mbudøkiyidit.

⁵ Jøts xyikjawa'aktit ja jaa'y, wan ya ja miku' yik'ayo'ombaadyiyi kunim ja nwindson'ajtim Jesucristo wyinaty myiñ tiddyumbi, janimts ja nøjxk yiknitso'ok'ajtxiyi ja y'anmija'win.

⁶ Paty kidi mnadyamikexyidi pøni ti jaty jam mdundip. ¿Ja ka' mee xnijawi ku ja ka'ødyumbi ja yja' nugo tyikniweni?

⁷ Paty kidi xmaa'kxti ja ka'ødyumbi midit tøn wyindigøøni, midit jam nugo myikma'jtidip. Jøts øy wə'ats m'ettit. Pø tøxi kø'øm ja Cristo xku'o'ka'am kruskøjxp, jøts ja tøn wyindsø'jkin'aty adømgøjxp Dios Teety wyingujkp.

⁸ Ja tiy'ajtin ja øy'ajtin adøm idø'on ja Dios ndawindsø'jkij'ejtimp, jøts ka'ap nijuuni nyikmøj'ajtin ja y'axøøkp midit ja anmija'win nugo tyikwindigøøpy.

⁹ Nnimaay meets ku ja nõky ojts tu'uk ndanigaxti, jøts xkamøøtsøonidit pøn jaty ja y'axøøkpi yigaappi pyawinmaadyip jøts tum ja' tyunk'ajttip.

¹⁰ Ka'ap meets idø'øn ja yide'en xja'gyukit jøts ku meets abiky mdy-imñabyiktaajkmiyidit, jøts ja ka'øy jaa'y, jøts ja meengyax jaa'y, jøts ja maa'tspi jaa'y, uk jøts ja tsamaxan windsø'jkip jaa'y xkadyimy'ukwin'ejxnidit; jabi kuwañimxi ja ya x'ejxtit ja'abi jaa'y o madsoo.

¹¹ Yide'en øts idø'øn ja ndijy jøts ku meets mganamyukit møøt ja' pøn nañikajpxiyip Cristo padumbi, yam ja kya'øyjaa'y, uk myeengyaxi, uk tsamaxan windsø'jkibi, uk yja'aji pøn tuki'iyi tkajpxyø'ogyojp, uk pøn ja nøø ja mu'uk ttunk'ajtp, uk myeech. Ja jade'embii jaa'dyi ni xkamøøtka'aty meets idø'øn ja'.

¹²⁻¹³ Ka'ap ø xpaat'aty jøts ø ndiidyu'unt ja wenk jaa'y midi abiktyi, ja Dios ja paat'ajtiyip. Meetsts idø'øn mbaat'ajtidip jøts xiidyu'undit ja mmigu'uk. Paty xyikjiwa'aktit ja pøkyumbi midi jam møøt tsinaadyip.

6

Ku ja kajanchja'wibi juez ja janchja'wibi jaa'y tmi'øøndi

¹ Ku meets mmigu'uk xni'øøniwya'añ, ζtigøjxp meets idø'øn ja xaninijkyx ja juez pøn tkajanchja'wip ja nwindson'ajtim Jesucristo, jøts nika' ja xaninøjkxti pøn ja janchja'win nayide'en tmøøt'ajttip?

² ζUk ka' meets idø'øn xnijawi ku ja' ttiidyu'undit ja naxwii'ñit jaa'y pøn ja Dios yja' tpaduujnidip? Pøni meetsts mdiidyumpy wyinaty ja naxwii'ñit jaa'y, ζka'ats meets idø'øn xjaty sudso xu'undit jøts xiidyu'undit pøni ti jam tuujnip jajtip?

³ ζKa' xnijawidi ku ja ankilis paat ndiidyu'unindit? iPøni jade'ents ja wyinaty, nija'wa'ampts adøm idø'øn sudso ya ndiidyu'unindit naxwiiñ!

⁴ ζSudso dø'øn ja xaninøjkxti ja wenk jaa'y pøni ti dø'øn ja naxwiiñ md-sep'ajttip m'ayo'on'ajttip? Ja' meets ja mdaninijxpy pøn kajanchja'widip.

⁵ Ya'atpi dø'øn ti mjanchtatsø'odyu'undip. ζNi tu'ugin meets ja jam xkamøøt'aty pøn tjajtp ja tiidyu'unin?

⁶ ζTsaach'øy idø'øn ja' jøts namajtsk ja janchja'wibi ña'ni'øøniyidi ma ja jaa'y jam kyajanchjawidi?

⁷ Tso'odyumbimxi mee mjagaxø'kni ku meets jam tukjanchja'wibi jaa'y mnamyidsep'atyidi. Ku ne'egi amøñi xkamidanidi pøni sa myiktundi. Nisä ne'egi mgawa'andit øy mjayikwimaa'tsti.

⁸ Janch tum wimbet'ampy mee ne'egi xuñ, øy meets ja mgø'øm mmigu'uk sa xuñ midi jagati pøky, uk wime'chpts meets ja' ne'egi.

⁹⁻¹⁰ ζUk ka' idø'øn xnijawidi ku ja Dios ja kyutujk wyinaty tkadanitani pøn jaty ja tiy'ajtin tkatundip? Nay'ejx'etidi, ejxim myikwin'øøndi, ka'axi wyinaty ja Dios ttanitani ja kyutujk pøn jaty namyøøt'ajtidip øy ja jyaga'amajtskidinim, ni ja' pøn jaty ja maxandsaa windsø'jkidip, ni ja' pøn jaty ja wenk tø'oxyøjk uk wenk yaa'dyøjk tmøøt'ajttip, ni ja yaa'dyøjkti pøn ja myiyaa'dyøjk tmøøt'ajttip, ni ja' pøn jaty maa'tstip, ni ja meengyaxti, ni ja' pøn tuki'iyi tjanchkajpxyø'ogyøxtip jaty, uk pøn jaty ja win'øø'nk ttunk'ajttip.

¹¹ Jam mee muuma pøn jade'en y'ijty tsinaadyip; ka'ats ja ixyam jade'en y'uksinaañidi pø tøxi ja nwindson'ajtim Jesucristo køjxp pyøkyatsnidi, jøts ja Dios Teety tø yiktagidø'kidi, jøts y'Espiritu Santo køjxp ja tø xkupijkyindi.

Sudso ja nne'kx ndawindsø'jka'ant ja Dios

12 Jade'en ja ayuujk yø'øy ku o tigati nduu'nint, nipøn ja xkadabayø'øyint. Øy idø'øn ja jade'en yjawa'añ ka'ats tuki'iyi y'ødyuñ pøni ti yiktump; jabi ka'axi pyaät'atyiyi jøts ja tu'ugyi nugo ndyimyikmajadaajkin.

13 Janch idø'øn ku ja kaaky ja tojkk ya tø yikpikta'aky jøts ja maatsjotp ñøjkxt, ka'ats ja ne'kk ja' wya'añ jøts ja nugo yiktapøkyu'unt sam ja winaagin ja'ayi ttunk'atti. Kudigøppy y'ity ja kaaky ja tojkk jøts ja maats nayide'en, ne'egi tampts xemikøjxp ku adøm nne'kk ja Dios Teety ndawinja'wa'ant ndawindsø'jka'ant jøts ja nayide'en amuum xmøøt'ejtint.

14 Nayi myøk'ajtin ja yik'awa'amp jøts ja xyikjujkyøjkin jadigojk sam ja nwindson'ajtim Jesucristo ja ojts tyikjujkyiky.

15 ¿Ka' mee xnijawi ku meets yø mne'kk Cristo tne'kk'aty nayide'en? ¿Øy idø'øn jøts ja Cristo ñe'kk nnixajiyit jøts øts ja nmo'ot ja ka'ødyø'øxyøjk midit ttunk'ajttip ja yaa'dyøjk? ¡Nimå wø jade'en kyaty!

16 ¿Uk ka'anin idø'øn xnijawidi ku ja ka'ødyø'øxyøjk yikmøøt'aty jøts tu'ugyi ja ne'kk namyayi wyimbejtni? Pø nømpxi ja nøky wya'añ: "Tu'ugyi ja nøjkk wyimbetti."

17 Kuts tu'uk ja jaa'y ja nwindson'ajtim Jesucristo tmnamyayi, tu'ugyits ja nayide'en wyimbejtnidi.

18 Paty kidi nugo mnamyøøt'atyidi, wingaktu'utti yø'øbi pøky. Øy idø'øn pøky yjaji, yiktump øy midit'ibi jadu'uk pøky, ka'ats ja jade'en tyimbyaaty sam ja jade'embi pøky, pø ja kø'øm ne'kxi pøkyumbajt tyimwyamp kø'ømts ñamyayi ja namyidundigøyi.

19 ¿Ka' xnijawidi ku meets ja Dios Espiritu Santo mdsaptøjk'atyidi? ¿Jøts ku ja Dios Espiritu Santo jam chøøni mne'kkxøjxp? Pø ni yø mne'kxi mee xkaja'aty,

20 pø janch tsowixi ja Dios tø mjuyidi ku ja y'u'nk tø xku'ayo'ombaajta'am. Paty meets idø'øn ja Dios ja mne'kk jøts ja m'anmija'win amuum xawindsø'øgit, jabi tum Diosxi yø' yja'.

7

Sudso ja amajtsk jaa'y'ajtin ñaxt

1 Ixyam øts ja nøky n'adsojimbijty midit mee tø xaniguexy. Ja øy ja' ku jaa'y kya'amajtskidit;

2 jade'ents ne'egi pyaät'atyiyi jøts ja yaa'dyøjk kija' tmøøt'attit ja ñidø'øxy, jøts ja tø'øxyøjk kija' nayide'en tmøøt'attit ja ñiyaa'y, ja'agøjxp ku ja pyøkyi ku jaa'y nugo ñamyøøt'atyidi.

3 Myimado'op idø'øn ja yaa'dyøjk ja ñidø'øxy nayide'en sam ja tø'øxyøjk tmimadoomit ja ñiyaa'y, jøts jade'en nixem niyam ñadyajotkujk'atyyidit.

4 Ka'ap ja tø'øxyøjk nadyu'uk tja'aty ja ñe'kk, ja ñiyaa'y ja paat'ajtyiyip; jøts nayide'enmi ja yaa'dyøjk, ka'ap ja nadyu'uk tja'aty ja ñe'kk, ja ñidø'øxy ja paat'ajtmiiyip.

5 Nagyupøkidip idø'øn ja namajtsk jøts ñamyøøt'atidit; pøni tyundipts ja kajpxy jøts ñay'amaay'atidit ku ja Dios wyinaty t'ajot'atwa'andi, øts ja jade'en ttu'undit. Kuts ja jotmay tyikugøxidit, nayide'ents ja chinaa'yin tyikyø'ogyojmidit, ja' ka'uk'øyni ku kya'uknagyuøjkniiyidi jøts ja mikui winøø'mbi tyuktunidit ja pøky abiky.

6 Ka' mee ndaguwani jøts mga'amajtskidit, amajtski meets pøni jade'en xtsojkti.

7 Jade'en ø njatsøjky jøts mee mga'amajtskit sam øts; ka'ats adøm ja Dios ja winmaa'ñ jøts ja kunuu'kxin tum jade'en tø xmø'øyim, tigach ja tø tyikwa'kxy.

8 Pøn jaty ka'amajtskidipnim, uk pøn tø kyu'o'kiñidi, ja' øts idø'on n'ana'amdip ku yjawi yja'øyi jøts kya'amajtskidit sam øts.

9 Pøni ka'ats tmimajada'akti jade'embj tsinaa'yin, wan ne'egi t'amajtskidi pø ka'axi y'uk'øyifi ku ja wyinaty o pøngapøn t'ukmøøt'ajtni.

10 Pøn jaty amajtsk jaa'y, ja'ats ø n'ana'amdip jøts ja tø'øxyøj k nijuuni xøøw tkamajtsu'utt ja ñiyaa'y. Kidi øtsip idø'on jade'en wamp, ja nwindson'ajtim idø'on jade'en køøm ana'amp.

11 Pøni myajstutpyts ja tø'øxyøj ja ñiyaa'y, ka'ap ja y'amajtskit, uk myøøtnagyajpxipts ja ñiyaa'y jøts jadigojk y'amatskjaa'y'attit. Nayide'ents idø'on ja yaa'dyøj k pyaa't'atyiyi ttu'unt.

12 Yide'ents ø nwami, øy ja nwindson'ajtim jade'en yjagawa'añ, pøni pøn yaa'dyøj k tmøøt'amatski tu'uk ja tø'øxyøj k pøn ja janchja'win tkamøøt'ajtp yam ja yaa'y ne'egi ja janchja'win tmøøt'aty, pøni tøts ja kajpxy ja ttundi jøts ja y'amajtsk'ettit, ka'ats ja yaa'dyøj k ja tmajtsu'utt.

13 Pøni jamts ja tø'øxyøj k tñiyaa'y'aty tu'uk ja yaa'dyøj k pøn ja janchja'win tkamøøt'ajtp yam ja tø'øxy ne'egi ja janchja'win tmøøt'aty, pøni tøts ja kajpxy ja ttundi jøts ja y'amajtsk'ettit, ka'ats ja tø'øxyøj k ja tmajtsu'utt.

14 Pø tøxi ja yaa'dyøj k kunuu'kxy tyañ øy ja janchja'win ja tjagamøøt'aty ku ja tø tpiky tu'uk ja tø'øxyøj k pøn ja janchja'win tmøøt'ajtp. Jøts nayide'en kunuu'kxy tø tyañ ja tø'øxyøj k øy ja janchja'win ja tjagamøøt'aty, ku ja tø tpiky tu'uk ja yaa'dyøj k pøn ja janchja'win tmøøt'ajtp. Ku ja kyajade'enit, tum kajanchja'wip u'nkts meets ja m'u'nk m'una'jk wyimbidsømni; ka'ats, pø tøxi Dios ja y'øyjaa'y'ijxyidi Jesucristo køjxp.

15 Pøni y'amidøøpyts nidu'ugin ja yaa'dyøj k uk ja tø'øxyøj k pøn dø'on ja janchja'win tkamøøt'ajttip jøts ñawya'kxidit, wants tnawya'kxyidi. Niti ayuujkts tka'ukmidanidit ja yaa'dyøj k uk ja tø'øxyøj k pøn dø'on ja Dios tjanchja'widip, pø ja'axi ja Dios xamidsojkimp jøts ka' ja tsep uk ja ayo'on nmidsinaa'yindit.

16 ¿Ja ti me tø'øxyøj k mdanija'wip pøni myiknitso'okp mets ja mniyaa'y ku ja janchja'win ja tkamøøt'aty? uk ¿ti me yaa'dyøj k mdanija'wip pøni myiknitso'okp mets ja mnidø'øxy ku ja janchja'win ja tkamøøt'aty?

17 Ots jyasa'ji, tum jade'en idø'on ndsinaa'yint sa ja nwindson'ajtim ttsøky, jøts pøni sa adøm ja jujky'ajtin ja tø xmø'øyim nay jade'en sam wyinaty njujky'ajtyim ku ja Dios ojts xwaadsø'øyindi. Jade'en øts idø'on n'ane'empy ma jaty ja janchja'wibitøjkti.

18 Pøni wyaadsøøpy ja Dios ja jaa'y pøn ja ejxpajt ñe'kxkijsy myøøt'ajttip sam ja israelit kostumbri, ka'ap ja ttatsø'dydu'unt, wan ja jade'en ttañ; pøni wyaadsøøpyts pøn ja ejxpajt ñe'kxkijsy tkamøøt'ajtp, ka'ap ja kuwanikøjxp yikpiktaajkit ja ejxpajt ñe'kxkijsy.

19 Wan ja tmøøt'aty uk tkamøøt'aty ja ejxpajt jap ñe'kxkijsy nugo ku ja Dios ja tpaduujni ja kyutujk.

20 Jade'en idø'on jaa'y tya'ant sam ja y'ijty t'ixy ku ja Dios y'ejxkajpiyi.

21 Pøni nugots øy pøn wjdsøn mdyimyiktuñiyi sam jaa'y jiyujk tsakaa tjagyepy winet ku ja Dios ojts mwaadsøyi, ka'ats mets ja xkumayjawit ku wine'enin xpaatt ja awa'ats'ajtin. Jatyits idø'on ja xkupøkt, ka'ap ja jeky xpawinma'aty.

22 Pøn idø'øn wyinaty juy ja jaa'y yik'ejttip ku ja yiktamidsøky jøts ja nwindson'ajtim ja tjanchjawit, ja nwindson'ajtimts ja ixyam myidunip kø'ømdsøky, ka' juy, jøts ja jaa'y pøn jaty jade'en tkayiknajxtip nayide'en ja ixyam ja nwindson'ajtim kø'ømdsøky tmidunidi, ja Cristo ja' tyumbidi.

23 Janch tsowi meets ja Dios Teety ja y'U'nk mdagujuyi, paty kidi nugo mnay'ixmachidi jøts ja ka'øchinaa'yin xpadojkiñidit.

24 Jade'ents migu'uktøjkti, jøts jade'eña'am xyikyø'ødyit ja mjuky'ajtin sam ja Dios tø mbaadyidi ku tø mwaadsøyidi.

25 Tits ø nda'ana'amdip pøn ka'amajtsk jaa'dyi, ka' ja nwindson'ajtim ja sa tnigajpxy; øts idø'øn ixyam ngajpxnaxwampy tu'uk ja nwinmaa'ñ sudso dø'øn yjawi tyuu'baatt tyuu'wetst ja tsinaa'yin.

26 Jade'en ø njawa'añ jøts ja yaa'dyøjk jadi'iñi ty'a'ant ja'agøjxp ku ixyam ja tsinaa'yin janch tsep janch aduky.

27 Pøni m'amajtskjaa'yits, kidits x'ixa'ay sudso ja mnidø'øxy møøt mnamyatstu'udit; pøni ka'ats m'amajtskjaa'yi, kidits ja amajtsk'ajtin xpawinmay.

28 Pøni m'amajtskipts ka' me mbøktyuñ; pøni amajtskipts tu'uk kiixe' ka'ats ja nayide'en pyøkyumi. Pøni amajtskidip tsep ja chinaa'yin ja tpaattit; ja'ats øts idø'øn njatsøjkpy ku øts idø'øn jade'en njawa'añ, jøts ja ayo'on xkapaattit.

29 Meets migu'uktøjkti, ja'agøjxp øts idø'øn jade'en nwa'añ ku ja nwindson'ajtim wyingoni. Paty ixyam mdsinaañidit yide'en: Pøn jaty ja ñidø'øxy jam, ja Dios idø'øn ja yja' ja ne'egi tyajotmay'o'jkip jøts ja yjuky'ajtin tyiknaxt ejximdam ja jeexyip nadyu'uk'aty.

30 Pønts yaxtip jiidyip, jade'en ja chøønidit sam ja' pøn kayaxtip kajiidyip; pøn jotkukj'ajttip xondaktip, jade'en ja chøønidit sam ja' pøn kajotkukj'ajttip kaxondaktip; pønts juudyip kajpxtip, jade'en ja yjuy kyajpxy ja tjawidit ejximdam ja jeexyip tkamøøt'atti.

31 Pøn jaty ttaxondip yø naxwii'ñit tsinaa'yin, jade'en ja ñayjawi'yidit sam ja' pøn jaty ja tkadaxondip; jabi kugøxi jøp'amxi yø naxwii'ñit tsinaa'yin y'ity.

32 Ja' meets idø'øn njadamidsøjkpy jøts ka' øy ti nugo xtyimdyajotigø'ødyit ya naxwiiñ. Ku dø'øn ja yaa'dyøjk kya'amajtskjaa'yi, ja nwindson'ajtim ja ja'ayi pyawinmaapy sudso ja tyikjotkukj'att;

33 kuts ja y'amajtskjaa'yi, ja'ats ja pyawinmaapy sudso ja yjuky'ajtin tpaatt jøts ja ñidø'øxy tyikjotkukj'att.

34 Tigach ja tø'øxyøjk tsinaa'yin tyiknaxy midi ka'amajtsk jøts nayide'en ja' midi amajtsk. Midi ka' y'amajtski ja nwindson'ajtim yja' ja tyajotigøjyiyip jøts ja amuum ttamiyøxy ja ñe'kx møøt y'anmija'win; pønts jam ja ñiyaa'y, ja' myijotigøøpy jøts sudso ja ñiyaa'y tyikjotkukj'att.

35 Ka'ap øts ya'at nnigajpxy jøts mee niti xkadyimy'uktunk'atnit, paty øts idø'øn yø nnigajpxy jøts ylxkon mdsøønidit sam idø'øn yjapaat'atyiyi jøts ja nwindson'ajtim yja' xmiijotigø'ødyit.

36 Pøni jamts ja u'nkteety pøn t'øyya'wip jøts ku yjawi y'øyi jøts ja ñøøx ne'egi y'amajtskit ja'agøjxp ku ja yjawi ja yjumøjt ñaxni jøts ja wyinmaa'ñ tyigatsni, wants jade'en ttuñ pøni øy tjawi, pø ka'axi ja pyøkyi.

37 Pøni jamts jadu'uk ja u'nkteety pøn idø'øn ylxkon tpawinmaapy øy tsuj jøts ja ñøøx ne'egi kya'amajtskit, øyts idø'øn ja y'adi'ich jade'en.

38 Paty idø'øn jade'en pøn ja ñøøx tyik'amajtskip, øy adøtsp idø'øn ja wyinaty; pønts ja ñøøx tkayik'amajtskip, jaaktyimwyindøøpts idø'øn ja wyinaty jawaani ku ja jade'en wyinmay.

³⁹ Kutujkøjxp ja tø'øxyøjk tmøøtsøøni ja ñiyaa'y pøni jujky'ajtp ja'; pøni o'kp kudigøøpyts ja', øyts ja pøn tmøøt'amatskiñit, nugo ku nayide'en ja yaa'dyøjk ja janchja'win tmøøt'aty.

⁴⁰ Ne'egi jotkujk ja chøønit pøni ka' y'uk'amajtskiñi. Jade'en øts idø'on ja ngø'ømgajpxwejin nyaky, jøts nmøøt'ajtpy øts idø'on ndijy ja Dios Espiritu Santo.

8

Sudso ttu'undit ku ja windsø'jk'ññ yiktaniwa'adit midi yiktawindsø'jkip ja maxandsaa uk øy ti jadu'uk awanax

¹ Ixyamts ø nnigajpxwa'añ sudso xu'undit ja kaaky tojcx midi tø yiktawindsø'øgi ja maxandsaa. Wa'ats ja njanija'wa'andi sa ja ndu'unindit; ja'ayi ja nugo nnadyamiguejxyindi ku adøm møj nija'wibim, ka'ap ja nmøjpiktaajkyin ku ja tsojkin ja pa'ayo'owin tyikmøji tyikmayi ja winmaa'ñ.

² Pøni jam ja jaa'y pøn nadya'agajpxip ku ja ti yiin wan tñijawi ja'agøjxp ja jade'en wya'añ ku ja kyawijyi kyakejyi.

³ Jabi y'ejxkajpyts ja Dios ja' pøn ja tsojkip.

⁴ Sudsøts idø'on xu'undit, ¿mga'adyip mjøø'kxtip idø'on ja' midi ja maxandsaa tø yiktawindsø'øgi? Nñija'wa'amp ndøm ku ja maxandsaa kya-Diosi, pø tu'ugyixi ja Dios.

⁵ Jaa dø'on ja jaa'y pøn wandip ku dios ja janch namaydi ya naxwiiñ jøts jam tsajpjotp, ja'agøjxp idø'on may ja dios ja jaa'y twindsø'øgidi ku jade'en tjag'yukidi,

⁶ tu'ugyits adøm ja nDios, ja Dios Teety. Ja Dios Teety idø'on tuki'iyi tø tyk'øyi, jøts ja' adøm idø'on nnijujky'ajtyindip jøts ja ndamiyojxin ja ndsinaa'yin. Jats tu'ugy; nayide'en ja windsøn, ja nwindsøn'ajtim Jesucristo, ja'agøjxp idø'on tuki'iyi tø y'øyi, jøts ja'agøjxp adøm idø'on nayide'en tø xyikøjyim ja Dios.

⁷ Jats may ja janchja'wibi jaa'y pøn tkaja'gyukidip ja yjade'emb; tsinaa'yin. Pøn jaty y'ijty ttawindsø'jkidip ja kyaaky ja tjojcx ja maxandsaa ku ja ixyam ja'abi tkaydi ttojxxti jade'eñim ja wyinmaydi ku ja nay ja'abi dios yja' jadigojk ttawindsø'øgidi; kuts ja tpawinmaadyøkidi jøts ja tpøkyjawidi ja'agøjxp ku ja tkaja'gyukidinim.

⁸ Kidi ja' adøm inet jawaani øy nwibejtint pøni kaa'yimp jøø'kximp, nayi ka'ats adøm inet jawaani ka'øy nwibejtint pøni ka' adøm ngaa'yim.

⁹ A'ejxits mee m'adø'øtst, o meets ja xka'aty xojkxt jøts ka'ap ja mmigu'uk ja xukpøkyjawidit, pøni pyøkyjawidipnim ja tuki'iyi ja'agøjxp ku ja yjanchja'win ja ka' yikxon tyuu'døkididinim.

¹⁰ Ku n'ukpiktaajkint, yam mets ja mjanchja'win tø myøji myayi jøts m'a'ejxnaxit tu'uk ja mmigu'uk pøn okwa'añ ja yjanchja'win tyiktsø'ondakpnim, ku mets jam mdsøøni agujk jotkujk jøts xji'kxy ja kaaky ja tojcx midi tø yiktawindsø'øgi ja maxandsaa uk øy ti jadu'uk awanax, ¿ka'ats idø'on ndejin mbaduu'miyit nayide'en ja mmigu'uk pøn m'a'ejxnaxiyip?

¹¹ Jøts jade'en xyiktuu'tigø'øty ja mmigu'uk ja'agøjxp ku kyatiynim kyadudā'akñim ja yjanchja'win, yam ja Cristo ja tø yjagu'oogiyi.

¹² Jade'ents idø'on, ku ja pøky jade'en xu'undit jøts ja mmigu'uk yjanchja'win xyik'amutskiyidit, ja Cristo meets idø'on kø'øm jade'en mmidundigøøpy.

13 Põni ndukpaajtyimpts tam adõm jade'en ja nmigu'uk ja tyuu'tigoo'yin ku yikjii'kxy ja maxan wyindsõ'jk'ii'n, paat'ajtyiypis ne'egi jõts ja ka'ap jade'en n'uktu'una'ant jõts ja nmigu'uk jade'en ja pøky ngadani'ejxa'ant.

9

Ti dõõn paat'ajtyip ja nwindson'ajtim kyudanaabyi

1 Tõ õts idõõn ja Dios xaguwani jõts õts ja ngudanit jõts ja kyajpxy y'ayuujk ja nnigajpxiyit, nipõn jaa'lyts õ xkapaat'aty jõts õts ja ndukmado'ot põni ti jaty õ ndumpy; pø tõi õts ja nwindson'atim Jesucristo n'ixy, meetsts idõõn ndunkjøj'ajtpy ku õts ja nwindson'ajtim tyunk nbadojkiyi.

2 Jaa abiky ja jaa'y põn õ xka'ejxkaptip jõts ku õts ja Dios xkudanaabyi'aty; meetspits mbaat'ajtip jõts õts jade'en x'ejxkaptit, pø õtsxi meets ja nwindson'ajtim tõ ndukmibiky, kuts meets jade'en tõ ndukmadõy ja janchja'win jade'ents idõõn wyingaxi'iky jõts ku õts ja Dios njanchkudani.

3 Yide'en õts idõõn n'adsõy põn jaty õ xpagajpxtip:

4 Xpaat'ajtp õ nyikmo'ot ja kaaky ja uuikin,

5 jõts xpaat'ajtp õ nayide'en jõts ja nnidõõxy midi tjanchja'wip ja Dios nbawaamit sam ja jadu'ukpi kudanaabyitõjk ttundi, mõõt ja nwindson'ajtim y'ajch y'uch jõts nayide'en sam kõõm ttuñ ja Pedro.

6 ¿Ja ti õts yõ mõõt ja Bernabé xpaat'aty jõts õõts ja ngaaky ndojkx nnidu'unt?

7 ¿Ma dõõn ja soldadi kõõm y'uknay'ijxyiyi? ¿Ma dõõn ja jaa'y tka'ukjii'kxy põni ti tõ tni'ipy jõts põni ti tõ tyikpidi'iky? ¿Põn idõõn nugo ukuborreegi'ajtp jõts niti kyagida'anxiiy?

8 Kidits mwinnmaydi ku õts jade'en kõõm n'awijy, nayide'enxi ja Moisés kyutujk wya'añ.

9 Pø yide'enxi jap jaabyety y'ity nõky kyutujkixpy: “Kidi ja mdsakaa ajeñ xyik'okti ku ja xyiktunwa'andit.” Kidi ja'agõjxp ja Dios jade'en wyaañ ku ja tsakaa ja ja'ayi tjomay'aty,

10 pø adõmgõjpxi dõõn ja ejxpajtin ja jade'en tpikta'aky. Paty ja kutujk jade'en yikjaay ku adõm ja y'õy'ajtin ja pya'ayo'owin ja xuktanitsoojkim; pø nayide'enxi ja jii'kxy ja pyaat'atyiyi põn yuup tump sam ja' põn yikpidi'jkpy ja pikta'aky.

11 Tõts õõts ja Dios kyajpxy y'ayuujk namyayi nni'ipy ma meets jam, ¿ka'ats idõõn y'õyi jõts mee n'amido'ot ja pudõjkin? ¿Ti õõ ndajujky'atp ya?

12 Põni m'amidoõjip mee tigati ja wenk jaa'y jõts meets ja xmõõy, jawaani kajats õõ xpaat'aty.

Õyts õõts ja jade'en xjapaat'aty, ka'ats õõts ja nbayõõy kuwani; nnidanaapy õõts ja' põni ti õõts xjajtp põni ti õõts xka'ejtxip jõts õõts jade'en ngayiktuu'duky ja Cristo y'ixpõjkin ja Cristo y'ana'aminn.

13 Mnija'wip meets ku ja jaa'y põn tsaptõjktõp ttundip, tum ja' ja tyaju-jky'ajtip põni ti jam tõjkip. Põn ja altajr jam t'ej'ejttip ma ja jiyujk jam y'õõky midi windsõ'jkin'ajtp, ja'abi tsu'uchts ja yikmõõdyip.

14 Nayide'en ja nwindson'ajtim Jesucristo tõ yjanim jõts ja tyunk ja ttaju-jky'attit põn ja nitsoõjkin ayuujk tniõgajpxtip.

15 Nijuuni ja'abi winmaa'n nugo ngadamajada'aky, ni ja'agõjxp mee nganijayi jõts mee xmõõ't o tigati. jWan õts jade'en ne'egi t'õõky, pø ndajotkujk'ajtpyxi õts ku õts jade'en ndsõõni!

16 Kuts idø'on ja Dios y'øy'ayuujk y'øwyyinmaa'n njanigajpxy, ka'ats øts ja nnadyamøjpikta'agyyi, pø kø'ømx i øts ja tø ngupiky ku øts ja tø nyiktaguwani. jN'ayøø y øts ku øts nganigajpxt!

17 Pøni kø'ø m tsojkingøjxpts øts nduñ, n'awijxpyts øts ja n'øy'ajtin. Ka'ap øts jade'en ja ndunk, jabi kø'ø mx i ja Dios xwi'ixy ku øts ja øybi tunkjøøjp x m ø'øy jøts jatyi ngupøjkøjy.

18 Ja' øts idø'on ndajotkujk'ajtpy ku øts ja nitsoojkin ayuujk nnigajpxy jøts ø niti mijuu'n nga'amidø y, øy ja jade'en xjapaat'aty jøts øts ja' ndajujky'att.

19 Ots ø nipøn njagamiduñ, tøts ø kø'ø m nadyamidøkyi jøts mee nmidu'unt, jøts ja Cristo jade'en ndukpaattit.

20 Kuts ja israelit jaa'y nmøøtsøønidi nayide'ents ø ndsøøni sam ja chøønidi jøts øts ja Cristo jade'en ndukpaattit; ja Moisésxi øts idø'on ja kyutujk n'atskupøjkip øy øts ja'abi kutujk xjagapaat'aty.

21 Kuts øts abiky nnøjxmi ma ja Moisés kyutujk tkayiktuujnidi, nayide'ents ø ndsøøni sam ja chøønidi, øy øts idø'on ja Dios kyutujk ja'ayi nyikmøjtøjkiyi, pø ja Cristoxi øts ja y'ana'amin nbaduujnip.

22 Kuts ø nmøøtsinaamyidi pøn ja yjanchja'win tyiktuu'døjkyidipnim, ka'ap øts ja nugo nyik'amutskidi, ni ja namyikaxi'ajtin ngayiktuñ, nayide'en ø tø nnabyikta'agyi sam ja'adi jøts øts ja jade'en nyikjotkujk'atti. Tøts idø'on tu'uk tu'uk nja'gyuki pøni sa ja chøønidi, jøts øts ja jade'en ndukpaattit ja Cristo.

23 Ja'agøjpx øts jade'en nduñ ku øts ja nitsoojkin ayuujk nnigajpxwa'añ, jøts ø wyinaty nayide'en nbaaty ja kunuu'kxin ja øy'ajtin møøt ja'adi pøn jaty tjanchja'widip ya'atpi ayuujk.

24 Mnija'wip meets ku jaa'y pyujtkejpsti, namay ja yjaputti tu'ugyits ja pujtkejpxpi myajada'aky jøts ja tpiky ja ñibuty. Paty idø'on nayide'en mbuttit jøts ja øy'ajtin xpaattit.

25 Pøn jaty tuki'iyi t'a'ejxigyøjpx ku kyuyatwa'añ jøts kyuyajta'aky yikxon, ka'ats ja sa jyaty ku tyimgyuyajtni. Ja'agøjxpts ja jade'en kyuyata'akti jøts ja tpøktit ñiguyaty midi idø'on ja kuyajtpi pyøjktip ku ja myajada'akti, jøts ka'ap ja xemikøjpx y'ity; ja xemikøjpx pikta'aky adøm ya naxwiiñ nbatnaxjyim midi wyinaty yikmøø'yimp xemikøjpx.

26 Nnija'wip øts wa'ats midi'ampy ø nnijxpxy ka' øts nugo nbuty wimbeets kugoots; nbaatp øts idø'on ja' midi ø nbaatwampy, ka' øts nugo n'adi'ich. Ka' øts jade'en nugo ngojxwidity jøts øts nika' ti ndukpety.

27 Jawyeen øts yikxon nnay'a'ejxiyi jøts øts nne'kx ndukmibiky pøni sa øts idø'on ja ndsøky pøni ti øts idø'on ndunwampy, jøts øts kidi nøjx jawyeen tsø'ødyumbim njaty Dios wyingujkp yam øts ja jaa'y tø ndukmadowdi sudso'ampy ja nitsoojkin ja pa'ayo'owin ja tpaattit, jaa ku øts ne'egi nga'ukpøjknit ja niduñ.

10

Ja' yikni'ana'amp jøts ja maxandsaq uk øy ti jadu'uk awanqx kyayik-diosqawit

1 Mnijawidip migu'uktøjk idø'on ku ja møjaa'dyøjk niduki'iyi ja Dios ja yoots tyaduu'wajidøø, jøts nayide'en niduki'iyi ja Dios øy tyuktanajxidøø ja Tsajpts Mejy.

2 Jade'en idø'on ja ndejint niduki'iyi tpaattøø ja nøbajtin jøts ja tmøø'tetti Moisés.

3 Niduki'iyits nayide'en tjøø'kxtøø ja tsajpjtøpit jii'kxy,

4 Jøts nayide'en niduki'iyi t'uktøø ja tsajpjtøpit nøø. Pø ja'abi nøøjxi ja y'uktip midi jam mu'tp tsagøjxp midi payø'øydip. Ja Cristots idø'on ja myøk'ajtin ñanky'ejxip jam tsagøjxp.

5 Namayts ja'adi pøn ja Dios Teety tkamimadoodøø jøts ja jamyi abak etjotp y'oo'knidøø.

6 Ejxpajtin adøm idø'on ya xmø'øyindip paty idø'on ja jade'en yjatti jøts adøm ja ka'øybi tsinaa'yin ngatsojkint sam ja ttundi.

7 Paty kidi meets ja maxandsaa xwindsø'jkyinidi sam ja ttundøø niwinaagin, jøts sam idø'on ja yiknigajpxy nøkyjotpy: "Winets ja jaa'y kaabyi ukpi y'ixakti jøts twinxødundi ja maxandsaa."

8 Ka'ap adøm idø'on xem yam nugo nnamyøøt'ajta'ant kija' uk tu'ugyi ja amajtsk jaa'y tyik'ettit ja ñiyaa'y uk ja ñidø'øxy, sam ja jaa'y tkamøjpiaktøø winaagin ja y'amajtsk'ajtindi, jøts ja'ayi tukxøøwyi tku'oo'kyidi ja pyøky ni'ee'pxigøøk mil.

9 Ka' mibaat ja Dios tyuda'aky'ajtin ndana'ejxin uk nugo nwinmaa'ñ'ejxwa'anin sam ja jaa'y winaagin y'adøtstøø midi ja tsaa'ñ ojts yixxon chu'tstigøyidi.

10 Jøts nisa xkatejtiti ja Dios pøni sã ja mduñidi. Ka'ap jade'en m'adø'tstiti sam winaagin y'adøtstøø ku ja tka'ødyejti ja Dios, ja' midi ojts tyagida'agyidi ja ayo'on ku Dios ja tyumbi tkejxy midi ja o'jkin ojts tyukpaadyidi.

11 Adømgøjxp idø'on jade'en ja møjaa'dyøjk yjajttøø kyubattøø, jøts nay adømgøjxp ojts jaabyety jade'en tyañ jøts yø n'ejxpajt'ajtint jøts jade'en ngadsinaa'yint sam ja chinaadyøø ixa ja nwindson'ajtim Jesucristo wyingoni ja tyiidyu'unin xøøw.

12 Pøn jaty yjawi nisa kajattip, pøn dø'on yjawi øy tsinaadyip, wants ja tnay'ejx'ityidi jøts ja kyawinmaa'nmya'attit.

13 Nay ja ayo'on midi ixyam mdanajxtip ku yik'ejxmatsti ja mjanchja'windi pøni mjanchpadundip idø'on uk ka'; nayja'abi ayo'on idø'on øy pøn tø tpaaty tø t'ixy. Øyts meets ja Dios x'ajot'att jøts ja m'agø'dukidit m'axajtukidit jøts niyjøjxk xanaxtit ja ayo'on midi kamidanaañi. Kuts wyinaty ja ayo'on tyimyjawani møk mbaadyidi, ja Diosts mmo'ojidip ja wyinmaa'ñ sudso ja xmimada'aktit.

14 Paty migu'uktøjk idø'on ja maxandsaa uk jadu'uk øy ti awanax xka'ukwindsø'jkiñidit, ixmatsti yø yjade'embis tsinaa'yindi.

15 Wa'atsxi xnimadowdi sã mee nnøjmi wijy keji ti sã m'ejxidi. Kø'ømts yixxon x'ukpayø'dyit pøni janch kidi yjade'eni sã ø nwa'añ.

16 Ku adøm ja tsapnøø kunuu'kxy n'uujkyindi ja Dios adøm idø'on jade'en nwindso'jka'am, ja Cristo dø'on ja ñi'jpy namyayi n'uujkyindip; kuts adøm ja tsapkaaky nyikwa'kxyindi ja Cristots adøm ja ñe'kx namyayi nji'kxyindip midi ja y'øy'ajtin kukpaajtimp ku ja ojts xku'o'jka'am jam kruskøjxp.

17 Øy adøm njanamaya'am tu'ugyits adøm ja tsapkaaky ndamujkyindi, patyts adøm jade'en amuum tu'ugyi n'ijtyindi Dios wyingujkp pøn jaty tjanchja'widip ja Cristo.

18 Ejxtits ja Israelit kajp ma ja jaa'y tkaydi tjøø'kxti ja windsø'jk'i'ñ; ja'ats idø'on ja ñamyayi tu'ugyi yik'ejtidip, tu'ugyi ja tumjade'en wyinmaydi nixem nyam.

19 Ka'ap øts idø'on nnimy ku ja maxandsaa uk jadu'uk øy ti awanax yjujkyidi, jøts ka'ap ø nnømi ku ja tsu'uch jawaani øy midi ja yiktawindsø'jkidip.

20 Yide'enxi øts idø'on ja njatijy, pøn jaty ja Dios tkanija'widip jøts ja windsø'jkin ja tpikta'akti tsamaxan uk øy ti jadu'uk awanax wyindum

y'agø'øm, ja miku' dø'øn ja wyindsø'jkidip jøts ka'ap ja Dios; ja'ats meets idø'øn ngadamidsøjkpy jøts ja miku' yja' xkupøjkidit.

²¹ Ka'ap ja mbaat'atyidi jøts mee majtsk jøøjp mdsøønit yam meets ja nwindson'ajtim ñi'jpy xja'uujkiyi, jøts nayide'en x'uujkmiyidi ja miku' ñøø; yamts meets ja nwindson'ajtim ñe'kx xjøø'kxiyi jøts ja miku' yji'kxy xjøø'kxmiyidi.

²² ¿Ja ti adøm tø ndøjkiñam? ¿Nugo taguyajtpi jøts jade'en ja nwindson'ajtim nugo nyik'ambøjkint? ¿Ja tyimyabaat adøm nmøø'ajtin jøts adøm ja ne'egi nyik'amutska'ant?

Ka'ap ja ngø'øm ja' n'ixa'ayint, ja tsojkin ja pa'ayo'owin ne'egi ndamiyojxin ja nmigu'uk

²³ Janch ja jade'en idø'øn sam ja ayuujk wya'añ ku o tigati nduu'nint, nipøn ja xkadabayø'oyint; øy dø'øn ja jade'en yjawa'añ, ka'ats tuki'iyi y'ødyuñ pøni ti yiktump; jabi ka'axi ja Dios yjanchja'win jade'en tuki'iyi xatøjka'ant.

²⁴ Ja nmigu'uk adøm idø'øn ja y'øy'ajtin n'ixaajya'amp jøts ka'ap ja ngø'øm ja' nugo ndunk'ajtin ja'ayi.

²⁵ O mee tigati xjøø'kxt pøni ti jaty mjuudyip maayjotp, ka' xyiknidøwidit ma ja tyiktsoondi, ku nugo mnadyagumayidit;

²⁶ jabi nwindson'ajtimxi ñaxwii'ñit yø' jøts tuki'iyi pøni ti jaty ya ejtp naqxijxy.

²⁷ Pøni mwaajidipts ja jaa'y kaabyi pøn ja janchja'win tkamøøt'ajtp, kupøkti panøjkxti jøts kaydi jøø'kxti pøni ti myikmøødyip jøts ka'ap ja xyiktø'ødit pøni ti pøni pøn yiktawindsø'øgi, jøts niti xkagumayjawidit.

²⁸ Kuts jam tu'ugin ja jaa'y jøtmøñ wya'añt ku ja'abi tsu'uch ja maxandsaa tø yiktawindsø'øgi, ka'ats meets ja xjøø'kxt, jøts ja mmigu'uk xkanankñagyumayiyidit ku ja nugo ñabyøkyjawiyidit ja'agøjxp ku ja janchja'win ja okwa'añ tyiktøwdinim tyiktudā'aktinim.

²⁹ Ja mmigu'uk øts idø'øn ja wyinmaa'ñ nngajpxip, ka' mets mja'. Jamts pøngapøn tyiktø'ødit jøts wya'andit: "¿Sudsots ja wenk jaa'y nyikmøjtøjkiiyt ne'egi ja wyinmaa'ñ jøts øts nja' nika'?"

³⁰ Jabi n'ajot'ajtpyxi øts ja Dios ku ngay nji'kxy, ¿tits øts idø'øn xabagajpxtip kuts ja'abi kaaky ngupøkt'?"

³¹ Ots ja yjade'eni, pøni mgaadyip m'uktip uk pøni ti jatyts mdundip, tum ja Dios køjxp ja xu'undit jøts ja jade'en xyikmøjtøjkidit.

³² Kidi mee xuñ midit ja mmigu'uk tyadigø'ødyip: ni ja israelit jaa'y jade'en xkatu'undit, ni ja' pøn ka'israelit jaa'y'ajttip, ni ja' pøn ja Dios Teety tø myø'øyidi ja janchja'win jøts ja nwindson'ajtim tmibøjktit.

³³ Kuts øts, ja' ø n'ixaapy sudso øts ja nmigu'uk nyikjotkujk'att; ka' øts ngø'øm øy'ajtin n'ixa'ay, jøts øts nmigu'uk yikxon chøønidit jøts wyinaty ja nitsoojkin yikmo'odi.

11

¹ Tundi nayide'en pøni sa ø nnajtstuni, pø nay ja Cristoxi ø nni'ejxuujtp ja chinaa'yin.

Sa yjaa'y'attit ja tø'øxyøjk ma ñamyukyidi ja janchja'wibidi

² Migu'uktøjkti njanchtakajxakpy meets ku ø xja'myatsti, jøts ku nayide'en xpadundi ti jaty tø ndukmadowdi.

³ Ja'ats ndsøjkpy jøts xja'gyukidit ku tu'uk tu'uk ja yaa'dyøjk ja Cristo ñigubajk'aty, jøts ku ja yaa'dyøjk ja ñidø'øxy tñigubajk'ajtmi jade'en sam ja Dios Teety tñigubajk'aty ja Cristo.

⁴ Pøni ka' ja yaa'dyøjk ñagyujuptu'udyi ku Dios t'ajot'aty uk kuts ja Dios yja' tjanigajpxi, kyamøjpiktakpy idø'øn ja Cristo ja' pøn nigubajk'ajtiyip.

⁵ Pøni ka'ats ja tø'øxyøjk ñagyujuuxyi ku ja Dios t'ajot'ajtpi tyøki, uk kuts ja Dios yja' tjanigajpxi, kyamøjpiktakpyts idø'øn ja ñiyaa'y ja', nayide'enxi ja tpatni kidi ja jeexyip tø ñagyukaa'ptu'udyi.

⁶ Pøni ka'ap ja tø'øxyøjk ñagyujuuxyi, wants ne'egi tnagyuka'aptutkixyi. Pøni tyatsø'ødyumpts jade'en ja kyubajk keepy, wants ne'egi tpiakta'aky ja kyujuux.

⁷ Nagyujuptu'udip idø'øn ja yaa'dyøjk pø ja Diosxi ja myøj'ajtin ja chuj'ajtin ja yiknigaxø'jkip ku ja nayide'en tø yik'ø'yiyi sam ja Dios t'ixy. Jøts ja tø'øxyøjk ja ñiyaa'y myøk'ajtin ja yiknigaxø'jkidip.

⁸ Kuxi ja Dios tyik'ø'yiyi'ñ pø ja yaa'dyøjkxi ñikøjxp ja Dios tju'jty ja tø'øxyøjk.

⁹ Yaa'dyøjkøjpxxi ja tø'øxyøjk y'ø'yiyi'ñ, jøts ka' tø'øxyøjkøjxp ja yaa'dyøjk y'ø'yiyi'ñ.

¹⁰ Patyts idø'øn ja tø'øxyøjk ñagyujuuxit jøts ja jade'en tyiknigaxø'økt ku ja yaa'dyøjk ja y'ane'emyi, jøts ja Dios y'ankilis nayide'en yjotkujk'attit.

¹¹ Nnija'wa'ampts adøm, ku ja janchja'win nmøøt'ajtyindi, ku ja yaa'dyøjk jøts ja tø'øxyøjk kuwani tu'ugyi y'etti.

¹² Janch tiyxi dø'øn ja' ku dø'øn ja tø'øxyøjk y'ø'yiyi'ñ, ja yaa'dyøjkts ja Dios yiktuun, nayide'en yjanchi ku tø'øxyøjk ñikøjxp kye'exy yaa'dyøjk ya naqxwiin; ja Diosts jade'en wamp.

¹³ Kø'øm mee x'uknigajpxt pøni øyide'en ku ja tø'øxyøjk ja Dios t'ajot'att kuwa'ats, jabi ka'axi ja y'øyi.

¹⁴ Tsø'ødyumbim ja yaa'dyøjk pyidsimy ku ja wyaay ja tyikyön'anaxy, ka'ap adøm jade'en ngostumbri y'ø'yindi.

¹⁵ Yiktakajxakpts ja tø'øxyøjk ku ja wyaay ja yøñ, pø tøxi ja yiktanibiktaagi jøts ja wyaay ja kyubajk ttanipett.

¹⁶ Pøni pønts tkaja'gyukiwyamp sa øts idø'øn tø njawa'añ, ñijawip idø'øn ja' ku øøts ka'ap ja wenkpi winmaa'ñ nyiktuñ jøts ni ja' jade'en kyawinmaamyidi pøn jaty ja Dios tø wyaamukyidi wyejtsmukyidi øy maðsoo, ja'agøjxp ku ja tø tjanjjawidi ja Dios.

Ku kya'ukyikmøjpiktakni ja nwindson'ajtim kyaajyk y'uujkik midì ja ñajtstu'unip ku ja y'a'ux'ajty

¹⁷ Ku meets yam nnijayi kidi ngajxa'akwampyip meets, ku yjawì mjanamyukyidi niwine'en ja mga'øpyidsø'ømxyidi jøts ni mga'ødyuñidi ja yjawì.

¹⁸ Jade'en øts ja jaa'y xumdamimadya'akti kuk mee mjanamyukyì mnawya'kxibik meets jam jøts mganamyee'kxyidi; nmibijkpy øts idø'øn, pø jade'en idø'øn jam yjanchjaty.

¹⁹ Kuwanidsik idø'øn mnawya'kxidit jøts idø'øn ñigaxø'øktit pøn idø'øn Cristo yja' yjanchpaduujnidip, jøts pøn idø'øn nugo nadyejidip jøts ku Cristo ja tpadundi.

²⁰ Kuts meets idø'øn jade'en mganamyee'kxyi, nika'ats meets ja nwindson'ajtim Jesucristo y'a'ux x'ukja'gyukiniyi, ni xkanijawidi pøni sudso yiktuñ.

²¹ Anaqxupimxi meets jam kø'øm a'ux xninijkxy ku ja ka'ayin tpaaty, jamts muum kyaku'uxyidi jøts muum nugo tyimy'ukmuktigøøñidi.

²² ¿Ti ka' meets mdøjk te ma mga'adyit? Mgamøj'ejtixpi dø'øn ja janchja'wip jaa'dyi ku jade'en m'adø'østi, jøts namyikaxi mwinbidsømdì ku ja mmigu'uk pøn ayoodip jam xwingayidi, jøts ja nugo xuk'ayoojidi. ¿Sats

meets idø'øn nnøjmit? ¿Ndsaačkajxa'akp meets idø'øn ku jade'en m'adø'øtsti? ¡Nijuuni xøøw meets ya'atpi ngadakajxa'akt!

Ku ja nwindson'ajtim yjaak'uk'a'ux'ajtni møøt ja pyabøjkpitøjk

²³ Pø ja nwindson'ajtimxi ø kø'øm tø xmø'øy midi mee tø ndukyikyuyj. Ku dø'øn ja nwindson'ajtim Jesús wyinaty yikøyakwani ux, nay ja'abi uxts idø'øn ja tñxajiyii'ñ tu'uk ja tsapkaaky,

²⁴ kuts ja Dios Teety t'ajot'ajty jøts tkajxajky, winets ja t'adujkpajky ja tsapkaaky jøts wyaañ yide'en: "Kaydi, øts idø'øn ya'at nne'kx midi meets mñitsoojkingøjxp inet yikøyakp. Mdu'undip idø'øn ya'at jade'en jøts øts xja'myajtspaj'tattit."

²⁵ Kuts idø'øn ja wyinaty tø y'a'ux'atti ixjats ja uujk'ii'ñ tu'uk tñxajiyii'ñ jøts yide'en wyaañ: "Ya'at tsapnøø'uujkin idø'øn ixyam tamp ejxpajit ku ja Dios Teety ja wyanda'aky tyik'aduky sam ja ttami'awa'aniyii'ñ ja naxwii'ñit jaa'y ja nitso'ok'ajtin. Ixymts idø'øn ja cho'onda'aky ku øts nni'jpy inet wyidsu'unt wyidaxt. Kuts ya'at tsapnøø'uujkin xumitu'undit, øts nja'myajtšingøjxp yø x'adunidit."

²⁶ Jade'ents migu'uktøjk idø'øn, ja nwindson'ajtim mee mja'myejchp ku meets ja tø mgu'oogyi ku jade'en ja tsapkaaky xka'adyit midi namyayi ñe'kx'ajtpy, jøts ku ja tsapnøø jade'en x'ukunaxit midi ja namyayi ñi'jpy'ajtpy kunim ja mye'ent jadigojk.

Sudso ja nwindson'ajtim kyaajyik y'uujkik yikupøkt midi ja ñajtstu'unip ku ja y'a'ux'ajty

²⁷ Ja nwindson'ajtim Jesucristo yjamidundigøøpy pøn idø'øn yikxon tka-jøø'kxp tka'uukp ja nwindson'ajtim ñe'kx jøts ja ñi'jpy.

²⁸ Patyts idø'øn yikxon jawyeen xpawinma'adyit sa ja mdsinaa'yin xyikyø'ødyi, namga'anin wyinajty xni'awidi ja nwindson'ajtim ñe'kx jøts ja ñi'jpy.

²⁹ Ja kyø'øm ayo'onxi ja y'ixaapy pøn nugo tni'a'wip ja nwindson'ajtim chapnøø'uujkin.

³⁰ Ja'agøjpxi dø'øn may ja mmigu'uk pa'amøøtti jøts kajotmøjkti, jøts muum tø y'ookti.

³¹ Kuts adøm kø'øm a'ejxi ndu'unint, ka'ats ja nwindson'ajtim jade'en xii'dyu'unint.

³² Kuts adøm ja nwindson'ajtim xii'dyu'uñim ja'agøjxp ja ttuñ jøts ja xukja'gyukant jøts ngamøøtkudigø'øyindit ja pojkpitumbi jaa'dyi midi tka-janchja'widip ja Dios.

³³ Paty migu'uktøjk idø'øn, ku mnamyukidit jøts ja nwindson'ajtim ja chapnøø'uujkin x'atsja'myatsidit, nay'awexidi jøts tu'ugyi mdsapnøø'uuktit.

³⁴ Pøni jam pøn yu'øøky, wan jamyi ne'egi kyø'øm tøjktøp t'ukay, jøts ja Dios wyinaty kyadukuwanjatiyi ku ja tsapnøø'uujkin ja nugo tyikwa'ant nanntyamu'ugi nanntyaku'uxi. Midi'ibi jaty myiktødip jaanin øts ja wyinaty nnigajpxy ku mee n'ats'ext.

12

Ja wijy'ajtin midi ja Dios Espiritu Santo yajkpy

¹ Migu'uktøjkti, jaa ja ayuujk midi ø ndsøjkpy jøts meets ja xnijawit ku Dios Espiritu Santo tyaky ja winmaa'ñ ja wijy'atin jøts ja tmø'øy ja jaa'y kija'.

² Mnija'wip mee ne'egi wa'ats ku mee wyinaty xkamibikñim ja nwindson'ajtim Jesucristo, ja maxandsaajimts meets tu'uk tu'uk y'ijty ja'ayi mwindsø'jkidip.

³ Paty meets yam ndukmadø y jøts xnijawidit ku pøn wya'ant: "iMiku' yø Jesús!" kidi ja Diosip y'Espíritu Santo ja wyinaty jade'en yikwaajniyip. Uk jadu'uk pøn nugo wyamit: "iJa Jesús idø'on møj windsøn!" tiyts ja wyinaty yjanchwa'añ pøni Dios y'Espíritu Santo ja wyinaty jade'en yikwaajniyip pøni ka'ats myigajpxigøøpy Dios ja wyinaty.

⁴ Mayjøøjp idø'on ja jaa sa pøn øy tigati tjaty, jøts kija' ja yikmøøt'aty pøni sa pønjabøn ja wijy'ajtin tø yikmøøy, tum Espíritu Santo wyingujkpts ja chøøñ.

⁵ May tunkjøøjp yikmøøt'aty, tu'ugyits ja nwindson'ajtim Jesucristo yik-tamidun.

⁶ Kawinaak jøøjp ja ødyunk nmøøt'ajtyindi, tu'ugyits ja Dios ja xmøøyindi.

⁷ Ja Dios idø'on ja ejxpajtin tu'uk tu'uk tmøøpy ja jaa'y, jøts idø'on ja tyiknigaxø'økt ku ja Dios Espíritu Santo ja tmøøt'aty, jøts ja niduki'yiyi yikta'øy'att.

⁸ Dios Espíritu Santo køjxp idø'on ja Dios Teety ja jaa'y tmøøy ja wyiy'ajtin jøts ja tiy kyajpxwejtít, jøts nayide'en ja jaa'y tmøømyi ja ixpiky'ajtin jøts ja øy yik'ixpøjktit.

⁹ Jamts ja jaa'y pøn ja Dios Espíritu Santo janch møj jøts janch møk ja janchja'win myøøyidi, jamts pøn yikmøødyip ja øybi møk'ajtin jøts ja pamaa'y tyiktsø'øktit.

¹⁰ Jam pøngapøn tmøøy jøts ijxyimbi ka'ijxyimbi ja ttu'unt, jøts jam pøn myøøpy jøts ja Dios kyajpxy Dios y'ayuujk ja tñigajpxidit; jamts ja' pøn ja Dios tø tyamidsøjkyidi jøts ja t'ejxkaptit pøn jaty ja ka'øybi winmaa'n tyiktundip jøts pøn ja øybi winmaa'n tmøøt'ajttip; jamts nayide'en pøn tø yiktamidsøkti jøts kawinaak ja ayuujk tkajpxtit midi ja myigu'uk kyakajpxtip; jamts ja'adi pøn tñimadoodip wa'ats ja ja'abi ayuujk jøts ja tñigajpxti ti dø'on ja tyijpy.

¹¹ Tu'ugyits idø'on jade'en y'adi'ich ja Dios Espíritu Santo, jøts idø'on ja tyikwa'kxy ja wijy'ajtin pøni ti dø'on ja pønjabøn tyukjatwampy køøm ja tø ttanibiktaagi.

Ja nwindson'ajtim tñigubajk'ajtp niduki'yijaa'y pøn tjanchja'widip ja Dios

¹² Jade'en idø'on ja Cristo n'ukpiktaajkint sam tu'uk jaa'y ñe'kx midi janch may tanibiktaagi tum tigach; øts idø'on ja kø' ja teky kija' ja tunk tø yiktanibiktaagi, tu'ugyits ja ñe'kx ja y'ity.

¹³ Nayide'ents adøm idø'on øy yjapøni, yja'israelit jaa'y uk yjaga'israelit jaa'y, yjagreciit jaa'y, yjamidumbi jaa'y uk yjanitøøky jaa'y, ku adøm idø'on tø nnøbejyim tu'ugyits adøm idø'on ja ne'kx namyayi nyik'øya'am Dios Espíritu Santo køjxp; jøts adøm jade'en ja tu'uk tu'uk tø xatøjka'am.

¹⁴ Ka'ap ja ne'kx tukjøøjpyi tmøøt'aty midi jaty ja yiktumpy, pø may jøøjpxi ja tmøøt'aty. Jade'ents ja y'amuum'aty ku ja ka'pxy tmøøt'aty ijxyim ka'ijxyim.

¹⁵ Øy yø teky yjawa'añ: "Ka'ap ø nduñ nayide'en sam ja kø' paty ø nipøn xkatunk'att", kidi ja agøjxpts ja kya'ukpaat'ajtniyit ja ne'kx.

¹⁶ Uk y'ukwamit inet ja tåtsk: "Ka'ap øts ja ween tyunk ndujni paty ø nipøn xkatunk'att", nigidi ja agøjxppts ja ne'kx ja myajtstuujtniyit.

¹⁷ Ku jeexyit tum ween nne'kx'ajtyim, ¿sudsøts jeexyit nmadøøyim? Uk kuts jeexyit tum tåtsk nne'kx'ajtyim, ¿sudsøts jeexyit nxuu'ka'am?

18 Tø dø'øñ ja Dios ttanibiktaajkiyijxy ti jaty jadu'uk jadu'uk ja ne'kx tyu'undip sam ja kø'øm tø tšsøky.

19 Ku jeexyip tukjøøjpyi y'amuum'aty, çmats jeexyip ja maybi tyøkidi mididi tyika'pxtip tuk'amuum ja ne'kx?

20 Jabi nniija'wimpts adøm ku mayjøøjp chøkyi winets njaa'gyaxø'jkindit, pø tu'ugyixi ja ne'kx.

21 Ka'axi dø'øñ ja ween tnøjmit ja kø': "Ka' me nyiktunwa'añ"; ni ja kubajk tkanimaamyit ja teky: "Ka' me n'ajot'aty."

22 Jøts mididi idø'øñ yjawi ka'a'ejxin kaxø'kp ja' idø'øñ ne'egi yikxon yik'ajot'ajtp, ja idø'øñ xyikjujky'ajtindip.

23 Jøts midits yjawi kayiktsojpk ja'ats ne'egi n'ejx'ijtyindip jøts ja nnixøjxyim nnipøjkyim; midits adøm ngananky'ejxwa'añimp ja'ats adøm janch'amaay ndø'øñim nyu'uchimp.

24 Jade'en idø'øñ ja Dios tø xanibiktaajka'am jøts adøm ja ne'egi nmjøtigø'øyint mididi yik'ejxp ka' tyuñ,

25 jøts kidi ki'abikyip nugo øy pøn tyuñ øy sã, pø nabyudøjkiyidipxi dø'øñ ja'adi nixem niyam wan ja sã t'ijxyidi, jøts ja amuum tyikjujky'ettit tuki'iyi ja ne'kx.

26 Pøni tsaachip o magama tukween ja ne'kx, amuumts ja pøjkpi ambi yikja'wigyixy øy madsoo; kuts øy madsoo tukween yikxon yik'ejxy'ejtni kunim ja yikxon chø'øky, tyimñejkpts nayide'en tuki'iyi øy madsoo ja ne'kx.

27 Meetsts idø'øñ ñamyayi ja Cristo mne'kx'ajttip jøts jade'en meets ja mbikta'agyí sam ja kø' teky, ween aaw tyuñ, uk jadu'uk øy ti mididi møøt kya'pxy ja ne'kx.

28 Tøts idø'øñ ja Dios Teety ttanibiktaagi ti tyu'undip nidu'uk jaty ja jaa'y pøn ja Dios tmibøjktip: midu'uk, ja nwindson'ajtm kyudanaabyitøjkti; mimajtsk, pøn tñigajpxidip ja Dios kyajpxy ja Dios y'ayuujk; midigøøk, pøn yik'ixpøjktip pøn kajpxwejtíp; jøts nayide'en pøn ijxyimbi ka'ijxyimbi ttundip, møøt nayide'en pøn ja pamaa'y tyiktsoktip tyikmøkpøjktip, møøt ja pudøjkibitøjkti, jøts nayide'en ja ana'ambitøjkti, møøt ja'adi pøn tkajpxtip ja wenk aaw ja wenk ayuujk pøni sã Dios ja kø'øm yikajpxwa'añidi.

29 çPønts idø'øñ janchja'wibi'ajttip? çNiduki'iyi ja nwindson'ajtm tku-danidi? çTum ja' tñigajpxidip ja Dios kyajpxy y'ayuujk? çTum ja' yik'ixpøjktip? çUk tyumdundip idø'øñ ja ijxyimbi ka'ijxyimbi? Ka' yjade'eni.

30 çTyumøøt'ajttip idø'øñ ja møk'ajtin jøts ja pamaa'y tyiktso'oktit? çUk kyajpxtip idø'øñ niduki'iyi kawinaak ja kanimadooni ayuujk? çUk ñimadoogøxtip idø'øñ pøni sã dø'øñ ja wenk ayuujk wya'añ? Pø ka'axi.

31 Tajotigøyts sudso xpaa'ttit yø'øbi øy'ajtin sudso ja Dios mgunuu'kxidit jøts myikwejidit myikajidit. İxyamts mee nduknijawiwya'añ ja jawaani øybi tuu' sã øy tsuj njaa'y'ajtindit.

13

Ja tsojkin ja pa'ayo'owin

1 Ku njakajpxt kawinaak ja wenk aaw kawinaak ja wenk ayuujk øy jyatsajpjotpit ayuujki uk øyts yjanaxwii'ñit ayuujki, pøni ka'ats øts ja tsojkin pøni ka'ats øts ja pa'ayo'owin nmøøt'aty, nayide'ents ja tpatni sam tu'uk ja tambur tawa'ats mididi nugo jagojpk, uk sam ja platiuyi mididi nugo na'amp.

2 Øy øts jeexyip ja Dios kyajpxy ja Dios y'ayuujk tuki'iyi njanigajpxi, uk njanija'wigyixyts øts tuki'iyi ti jaty memp ti jaty kidakp mididi ka' pøn t'ijxñim mididi ka' pøn tñijawinim, uk njamøøt'atyts øts tuki'iyi ja ixpiky'ajtin ja

wijy'ajtin, uk nja'ajot'atytys øts ja Dios kawine'en ku øts ja ijxyimbi ka'ijxyimbi njatuñ jøts øts ja kojpk ngiidyigach, pøni ka'ats øts ja tsojkin pøni ka'ats øts ja pa'ayo'owin nmøø'taty nitits øts mibaat ngawa'añ, tyimñugo øts iiy.

³ Uk njadagumaagyixpyts øts ja ayooobi jaa'y tuki'iyi ja nbikta'aky, uk njanagyayakyits øts jøts øts ja jaa'y xyiknitøty Dios køjxp, niwine'enin øts ja ngadamajada'akt, pøni ka'ap øts ja tsojkin, pøni ka'ap øts ja pa'ayo'owin nmøø'taty.

⁴ Pøn tsojpk pøn pa'ayoop, tuda'aky ja yjaa'y'aty; jøts øy jaa'y ja', ka'ap myigu'uk ja øy ti tami'ekyi uk niti tkamo'owa'añ; jøts ka'ap ja ñamyikexyi, ni kyanadya'agajpxyi ja' pøni ti ja tyumpy.

⁵ Ka'ap ja ka'øy'ayuujk ja ka'øwynmaa'ñ uk ja ka'øchinaa'yin ja ttunk'aty; jøts nika' ñadyamidsojkixyi tuki'iyi yam ja myigu'uk y'ayøy wyinmay; ka'ap ja tuki'iyi tta'ambiky jøts nika'ap ja ejtp y'ekyi.

⁶ Ja y'øchinaa'yin ja myigu'uk ja tyadaxondakpy, kidi kya'øchinaa'yin ja ojts ttadaxonda'aky.

⁷ Pøn tmidanaapy tuki'iyi pøni sã yiktuñ jøts pøni sã yiknøjmi, jøts jyø'ijxpy ja' ku kuwani ja tsojkin ja pa'ayo'owin myøjtøki, jøts ka'ap ja tigati tta'amutski, ejtp ja tyuda'akyajtin ja ttamajada'aky.

⁸ Nijuuni ja tsojkin ja pa'ayo'owin kyagudigøy. Ja'tp ja et ja xøøw ku wyinaty ja kajpxy ja ayuujk kya'ukyiknigajpxnit midi ja Dios yajkpy, jøts wyinaty nayide'en kawinaak ja wenk aaw ja wenk ayuujk kya'ukyikajpxni, jøts wyinaty ja ixpiky'ajtin kya'uktuni.

⁹ Ka'ap adøm tuki'iyi ka'pxy nnija'wa'am, jøts nika' ka'pxy yiknigajpxy ja Dios chojkin ja Dios pya'ayo'owin midi adøm ja xjadukmado'owimp.

¹⁰ Kudigøøpyts ya'atpi nija'win ku wyinaty tuki'iyi n'ijxyim nnija'wa'am pøni sã dø'øn tyiyi kya'pxyi tuki'iyi.

¹¹ Kuts y'ijty nmutsk'aty, mutsku'ngin øts y'ijty ngajpxy nmadya'aky, mutsku'ngin øts y'ijty nwinmay, jøts mutsku'ngin øts y'ijty nayide'en nja'gyuki. Kuts ø nyaa'knaa'nixmatskøjxni øts ja mutsk'ajtin.

¹² Nayide'ents adøm ka' ka'pxy ja Dios yja' nnija'wa'am, winjo'ximp adøm yjaw i ku ja nja'ejxpaatwa'añim; jaanim idø'øn ja wyinaty øy wa'ats n'ijxyim. Ka'ap øts ixyam tuki'iyi nnijawi, jaanim øts ja nøjxk wa'ats yikxon nnijawinim tuki'iyi sam øts ja Dios ixyam wa'ats x'ixy wa'ats xnijawa'an.

¹³ Jade'ents idø'øn ku n'ajot'ajtin ja Dios, ku njøp'ejxin ja nitsø'ok'ajtin, uk ku nmøø'tajtin ja tsojkin ja pa'ayo'owin, nimidi mibaat kyagudigøy, ettip yø xemikøjxp; tigajstiptis idø'øn nidu'ukjaty, yø tsojkin yø pa'ayo'owin yø ne'egi tyimyjawaani møj, nigidi yø yjadu'ukpi jade'en myajada'akti.

14

Ja kawinaak ayuujk kanimadooni

¹ Kajaats idø'øn xmøø'tattit ja tsojkin ja pa'ayo'owin, amidowdi pøktsowdi jøts ja Dios myikwejidit myikajidit, ja'ats jawaani m'amido'odip sudso ja Dios kyajpxy y'ayuujk xnigajpxidit.

² Pø ja Diosxi ja ja'ayi myigajpxy pøn ja wenk aaw wenk ayuujk tkajpxp, ka'axi ja myigu'uk ja ñimadøyi. Ja Dios Espiritu Santo ja jayik'awejmiiyp, ka'apts ja yiknimadøy ti ja kyajpxy, jøts ti ja jade'en tyijpy.

³ Abikyts ja'amidi pøn ja Dios kyajpxy pøn ja Dios y'ayuujk tu'ugyi tyimdyunk'ajtmiiydip jøts ja ttukmadowdi ja jaa'y pøn tpabøjktip ja Dios jøts ja yjanchja'win ja myøktä'aktit ku ja yikajpxjot'amøjkidi.

4 Nadyu'uk ja yjanchja'win ja tyikmøji tyikaja'aji pøn ja myigu'uk kanimadoojip ku ja tjakajpxy ja wenk aaw wenk ayuujk; pøn̄ts tñigajpxidip ja Dios kyajpxy ja Dios y'ayuujk jøts ja ttukmadowdi ja jaa'y pøn tpabøjktip ja Dios jøts ja jade'en tyikmøjiyidi tyikajaajiyidi ja yjanchja'windi.

5 Njadamid̄søjkpy meets jøts kawinaak ja wenk aaw wenk ayuujk xkajpxtit; jawaani kajaats mee ndamid̄søky jøts ja Dios kyajpxy y'ayuujk xñigajpxtit, ja'axi ne'egi jawaani møj tump; ja tump jeexyip nayide'en pøni yiknimadoop jeexyip pøni ti dø'øn yikajpxp yiknimadyakp wenk aaw wenk ayuujk, jøts ku jeexyip yikxon yiknigajpxy tu'uk tu'uk ti jade'en tyijpy, winetimts ja tiy myøjiyidit mya'ayxiyidit ja yjanchja'win pøn jaty tpabøjktip ja Dios.

6 Pøni n'ats'ijxpy meets jøts meets ja wenk aaw wenk ayuujk ndamigajpxt, ka' meets ti pudøjkin jade'en nmo'ot. Kuts øts ja nñigajpxt midi ja Dios xuknija'wa'amp, uk ja' pøni midit tiy midit øy, uk ja Dios kyajpxy y'ayuujk mee ndukmadøøpy jøts nda'awa'andit, ja'ats idø'øn ti mjanchpudøkiyidip.

7 Wan ja ejxpajt t'ukpiktaajkyim. M'ijxy'ajttipxi xuuix sam ja kapxyuujk uk ja kow; pøni ka'ap nyiksuunipaajtyim, sudsots jaa'y ja tja'gyukit pøni ti yikoop, pøni ti yikxuxp.

8 Kuts ja jaa'y cheptumidi ku ja puxuujx wa'ats kyawinaa'ñ, ka'ats ja tsep pøn t'a'ejxi.

9 Nayide'ents meets idø'øn mjaty; pøni ka' meets ja ayuujk xkajpxy midit yiknimadoop, ¿sudsø dø'øn yiknijawit pøni ti dø'øn mgajpxtip? ja poj mee nugo mmigajpxpy!

10 Janch jaa dø'øn may ya naxwiiñ ja ayuujk tigach, jøts tyumnimadoodip ja' pøn ja'abi ayuujk tkajpxtip.

11 Pøni ka'ats ø nñimadøy ja jaa'y pøn ja wenk ayuujk tkajpxp, wenk kugajp jaa'yts øts ja xejt, jøts nayide'en øts ja ndejmit.

12 Pøni mjanchtajotigøødyip idø'øn jøts ja kunuu'kxwyejin jøts ja kunuu'kxkyajin xpaattit x'ejxtit, ja' dø'øn mmijotigøødyip midit mdabudøkidip ja mmigu'uk jøts ja yjanchja'win ja myøjidit kyajaajidit.

13 Paty idø'øn ja jaa'y t'amido'ot ja Dios jøts yikwejit yikajit sudso ttuknimado'ot ja jaa'y pøni ti dø'øn ja kanimadooni ayuujk tyijpy.

14 Kuts ja wenk ayuujk njadakajpxa'akt, ka'ap øts ja nñimadøy pøni ti ngajpxpy øy øts ja ngajpxaajkin yjatyi.

15 ¿Tits øts idø'øn njaaktu'ump? Njayiktuñ øts ja wenk aaw ja wenk ayuujk ku ø n'ajot'att uk ku øts nwin'øø't ja Dios, ja' ja'ayi tsojkip jøts ku øts nmøø't'att ja ja'gyukin ja madogukin.

16 Sudso meets ja mmigu'uk mñimadowiyit pøn ja wenk ayuujk tkajjttip pøni wenk ayuujk tam meets ja Dios mda'ajot'ajtpy. Kuts ja ka'ap tñimadowdi sa jaty mee mwā'añ øy meets ja amuki møøt xja'ajot'aty ja Dios, ka'ats ja tja'gyukidi sa meets ja Dios xnøjmi.

17 Øy meets ja mdsapkajpxy mabaat yja'øyi, kuts ja ka' yiknimadøy jade'ents ja tpaaty ku meets ka' ti pudøjkin xmø'øy ja mmigu'uk pøn tkanimadoodip ja'abi ayuujk, jøts ja jade'eñi y'etti, ka'ap ja yjanchja'win myøwenidi kyajaajidi.

18 Ngajxajkpy øts ja Dios ku øts ja kawinaak xukajpxy ja wenk aaw wenk ayuujk midit mee ka' xkajpxy.

19 Kuts ø ngajpxy jøts ø n'awa'añ ja jaa'y pøn jaty Dios tja'myajtstip, magoxk aaw øts ja'ayi ne'egi ngajpxy ja ayuujk midit yiknimadoop jøts ka' kawinaak mil ja ayuujk midit kyayiknimadoop.

²⁰ Migu'uktøjkti, ku ja ka'øybi ku ja pøky xpaattit, jade'en mnabyikta'agidit kidi mutskuna'jk ti kyamayidinim. Kuts mwinma'adyit, jade'en mwinma'adyit sam møjaa'dyøjk yikxon wyinmaadya'an.

²¹ Yide'en jap wya'añ nøky ja kutujk: "Wenk aaw wenk ayuujk øts nyiktunkpaatp ku øts ja naawwii'ñit jaa'y øy madsoo nmigajpxt, uk ndanigaxtit øts ja' ja wenk jaa'y midi wenk puix wenk kajp tso'ondip jøts øts ngajpxy jøts øts n'ayuujk ja xyiknaxxidit, nijade'ents øts ja naawwii'ñit jaa'y nøjkk xkamibøkti, jade'en wya'añ ja nwindson'ajtim."

²² Ejxpajtxi dø'øn jayikmøødyip pøn jaty tkamibøjktip ja Dios ku dø'øn ja wenk aaw wenk ayuujk xkajpxti jøts ja Dios ja tmibøjktit, kidi ja'ajip ja jade'en kyujajtip pøn tø tmibøjknidi ja Dios. Abiky yja' ja'amidi ku Dios nayide'en myø'oyidi ja ejxpajt ja yikxon tyukjatyidi sudso ja tningajpxidit ja kyajpxy ja y'ayuujk, kidi ja'ajipts ja jade'en tyanibiktaajkip pøn tkamibøjktip ja Dios.

²³ Kuts mee niduki'iyi mnamyukit jøts mjamadya'aktit jøts tum tigach ja m'aaw m'ayuujk, jøts nipøn kyanañimadowidit, kuts ja jaa'y pøn ja Dios tkanija'widipnim jam tyøkidit ma mee mnamyukyidi jøts ja niti nayide'en tkanimadomidit, zka' meets idø'øn ja mo'tpi jaa'y mdejit?

²⁴ Pøni mgubajtyipts meets ja jaa'y jøts ja tmadøy ku meets ja Dios kyajpxy y'ayuujk xnimadyaajki, pyawinmagyøjxpts ja chinaa'yin ja' jøts pyøky ja tjawit ku ja tmado'ot jøts kudam ja yikpøky'ixy.

²⁵ Jade'ents ja Dios ja tjanchjawit jøts ja tyiknigaxø'køxt pøni sa jaty ja tø chøøni, jøts ja Dios tmøjpikta'akt kuxani, jøts meets ja mnø'ømxit jøts ku meets ja Dios jam xmøøtsøøni.

Tundi tuki'iyi tsuj, jøts tum tanibiktaagi sam pyaat'aty

²⁶ Yide'en me migu'uktøjk idø'øn yjawi xuñ ku mnamyukyidi. Jam niwinaagin pøn ttunk'ajtip ja øøk, jøts niwinaagin y'awa'andi, uk ja'ats ja ñigajpxtip pøni sa ja Dios kyajpxy y'ayuujk wya'añ; jamts niwinaagin kya'amaamyidi, wenk aaw wenk ayuujk ja yiktundip, jamts pøn tkajpxnajxtip ja wenk aaw ja wenk ayuujk. Øy'ajtp ku jade'en xundi, nugo ku xja'myatsti jøts ku nayide'en ja mjanchja'win xyikmøjdit.

²⁷ Ku ja wenk aaw wenk ayuujk xkajpxtit midi kanimadooni, namajtsk nidigøøk ja'ayi mgajpxtit jøts nidu'ukjaty; jøts kuwani tu'uk tkajpxnaxt ja ayuujk.

²⁸ Pøni ka'ats jam pøn, pøn ja ayuujk tkajpxnaxp, ka'ats ne'egi ja wenk aaw wenk ayuujk xkajpxtit, kinadyu'uk ne'egi ja Dios xmøøtmadya'aktit.

²⁹ Nayide'ents xu'undit pøni mnigajpxwandip ja Dios kyajpxy ja Dios y'ayuujk, nayide'ents namajtsk nidigøøk ja'ayi mgajpxkøjt, jøts nayide'en nidu'ukjaty, pønts kakajpxtip wants ja ja'ayi tpatmadowdi jøts t'ejxti pøni tøøp uk ka' tyiy.

³⁰ Pøni wyinmaa'nmyøøpyts ja Dios tu'uk ja jaa'y midi jam patmadoop, wants ja tkajpxmi jøts ja y'amo'ont pøn ukajpxp.

³¹ Jade'ents mee mgajpxt niduki'iyi pøni winmaa'nmyøøjyidip ja Dios, jøts jade'en xem yam mnanky'ixpøkidit jøts mnagyajpxjot'amøkiyidit.

³² Tuda'aky idø'øn, tsuj idø'øn ja kyajpxtit pøn ja Dios kyajpxy y'ayuujk tningajpxidip,

³³ jabi ja øy'ajtinxi ja jotkujk'ajtinxi ja Dios chøjky, ka'ap ja tsep, ka'ap ja nugo o pøngapøn ttatøkit ja madyaajkin.

Nayide'en meets idø'øn xu'unt sam niduki'iyi ma jaty ñamyukyidi ja janchja'wibi jaa'dyi midi adøm nmigu'uk'ajtyindip.

³⁴ Ka'ap idø'øn ja tøøxyøjk xyikajpxtit ku mnamyukidit, pø ka'axi jade'en kyutuky. Mbadu'undip idø'øn ja kuwani sa ja Dios kyutujk wya'añ.

³⁵ Pøni yiktøøwandip tigati, jam tyøjkjotp tyiktøødit ja ñiyaa'y; ka'axi y'øgyaxi'iky ku tøøxyøjk kyajpxy ma mnamyukyidi ku Dios x'ajot'atti.

³⁶ Ja'myatsti migu'uktøjk ku meets jawyeen ka' y'ijty xnijaw i ja Dios kya-jpxy, jøts ku mee ka' nadyu'ugyi xnijaw i ya'atpi ayuujk.

³⁷ Pøni jam tu'ugin tjawi ku tnijaw i sudso ja Dios kyajpxy y'ayuujk tniqajpxit, uk tø tjawi ku ja Dios Espiritu Santo tø wyinmaa'nmyøøyi, paat'ajtip jøts tjä'gyukit ya'atpi ayuujk midi meets ixyam ndaniguejpxy jøts ku nwindson'ajtim yø tkutujki.

³⁸ Pøni ka'ats ja tkutujkjaw i, ka'ats ja nayide'en ja ejxkajpin pyaat'aty.

³⁹ Jade'en migu'uktøjkti, jotmay'atti sudso ja Dios kyajpxy y'ayuujk xnigajpxidit, jøts kidi xpayøødyi pøni kyajpxtip ja jaa'y ja kanimadooni ayuujk;

⁴⁰ tum øy tsujts idø'øn ja xu'undit, ka'ap anaxukpim.

15

Ku ja Cristo yujkpyijky jadigojk

¹ Ja' migu'uktøjk ixyam ndukja'myatswandip midi tø njanigajpxmi, ja Dios ñitsoojkin ayuujk. Ya'at kajpxy ya'at ayuujk meets idø'øn tø xkupiky, jøts nay yø' meets idø'øn ixyam mdsinaa'y'in'ajtpy.

² Ja'agøjxp meets idø'øn nayide'en ja Dios myiknitsøøgyidi, pøni mbadundip idø'øn midi tø ndukmadowdi, jøts pøni tu'ugyi dø'øn ja mjanchja'win xyikyøødyi.

³ Ja' meets idø'øn tø ndukmadøy midi ø nayide'en tø nyiktukmadøy. Tø mee nda'awa'añ ku adøm ja Cristo tø xku'o'jka'am, ku adøm nbøjkpitumbijaa'y'ajtyindi sam jap nøkyijpxy yjaabyetyi jøts jade'en ja wya'añ;

⁴ jøts nayide'en tø ndukmadowdi ku tyikjutøjkidi, jøts ku ja kyimidigøøk xøøw yujkpyijky sam nayide'en ja nøky tniqajpxmi;

⁵ jøts ku ja ojts jadigojk ñanky'ijxyiyi yam ja tø yja'oo'kni jam Pedro wyindum, ja' ja ojts t'ixy jøts jadigojkøjmyi ma ja kyudanaabyitøjk jam wyinatyi.

⁶ Jøts nimagoxk magø'pxñaxy ojts y'ejxmyi ja janchja'wibi jaa'y tuktoñi, may nay jaa yujky'attinim winaaagin tø y'looknidi.

⁷ Jøts ojts y'ejxmyi ja Jacobo midi Santiago yiktejp, jøtsnim niduki'iyi ja kyudanaabyi ojts y'ejxkøjxmyi.

⁸ Jøtsnim ø tyimy'ix'oojk nayide'en tø n'ejxmi, øy øts idø'øn øy tsuj tø njagatso'ondaq'aky n'uktejt sam ja'adi.

⁹ Ja'agøjxp øts idø'øn øy ngamøji ngakøjxpi, pø øtsxi dø'øn ñamyayi jawaani mutsk wimbidsømp, ka'ap øts nayide'en sam ja nwindson'ajtim kyudanaabyidi, jøts ni xjagapaat'aty øts jøts ø nwindson'ajtim kyudanaabyi nyiktejt, jabi ka'axi øt y'ijty nmaa'kxti pøn jaty tjanchja'widip ja nwindson'ajtim.

¹⁰ Tøts øts ja Dios xjanchmi'ø'y'aty, ja'agøjxpts øts ixyam jade'en njaa'y'aty pøni sa øts ja tø xamidsøky, tøts ja chojkin ja ngupøjki, ka'ap øts ja nugo tø xanaxy. Tø ne'egi jawaani kajaa nduñ sam ja tø tkatundi ja nmigudanaabyitøjkti; kidi øtsipts kø'øm tø ndyimyajada'aky, ja Dios øts idø'øn ja myø'ajtin jade'en tø xuktuñ y'ø'y'ajtingøjxp.

¹¹ Ka'ats ja ndunk'ajtin pøni øts jawaani tø nduñ, uk tøts ja yjadu'ukpi nwindson'ajtim kyudanaabyi jawaani tyundi; nugo ku øøts tum ja' tø nnigajpxy ja Dios y'øgyajpxy ja Dios y'ø'y'ayuujk midi mee tø xjanchjaw i.

Ku ja oo'kpi jadigojk yjujkpyøktit

12 Pø njanigaajpxpyts øøts ku ja Cristo tø yjujkpyiky jadigojk, ¿sudso dø'øn jam muum wya'andi ku ja oo'kpi kyajujkpyiky?

13 Pøni ka'ats ja oo'kpi jadigojk yjujkpyøkti, ka'ats ja Cristo nayide'en tø yjujkpyiky jadigojk;

14 pøni ka'ats ja Cristo jadigojk tø yjujkpyiky, ka'ats øøts ja ngajpxy tyuñ midì øø ndijpy Dios kyajpxy Dios y'ayuujk, jøts ni kyatumi meets ja mjanchja'win midì mjadsinaadyip.

15 Kuts idø'øn ja wyinaty janch jade'en, Dios tystigi ataayts øø nwimbidsømni, pø tøxi øø nnimy ku ja Dios Teety jadigojk tyikjujkpyiky ja Cristo; pøni tyts ku ja oo'kpi jadigojk kyajujkpyøkti, ka'ats ja yjanchi ku ja Dios Teety ja Cristo tø jadigojk tyikjujkpyiky.

16 Pøni ka'ap ja oo'kpi jadigojk yjujkpyøkti, ni ja Cristots kø'ømbaät jadigojk tø kyajujkpyiky.

17 Pøni ka'ats ja Cristo jadigojk tø yjujkpyiky, nitits meets ja mjanchja'win kyawa'añ; nayi mbøkyjotp m'ayo'onjotp mee mdsøøni.

18 Pøni jade'ents ja', tøts inet idø'øn tyimy'oo'kti pøn jaty ja Cristo tø tjanchjawidi ku tø yjujky'atti.

19 Pøni yayi adøm njøp'ijxy'ajtyim ja Cristo ñitsoojkin jøts ja nayi yayi ndajujky'ajttint naxwiin, ti adøm n'ayøøy, adøm ne'egi yikxon ayol'ijxyim jajtm, nigidi pøn jade'en ku adøm jade'en n'adøjtsin.

20 Ka'ats ja yjade'eni, tø dø'øn ja Cristo tyimyjanch jadigojk yjujkpyiky; ja' idø'øn kø'øm midu'uk tø ttunjøpi, jøts idø'øn wyinaty nayide'en yjujkpyøkti ja abiky oo'kpidi.

21 Pø tu'ukxi ojts ja jaa'y ja o'jkin tyiktso'onda'aky ya naxwiin, nayi tu'ukts ja' pøn ojts tyiktso'ondakmi jøts ja oo'kpi jadigojk yjujkpyøkt.

22 Jade'en sam niduki'iyi ja jujky'ajtm xemikøjxp yikmo'odi pøn ja Cristo tjanchja'widip.

23 Tanibiktaagits idø'øn ja wyinaty ja xemikøjxpit tsinaa'yin nyikmø'oyindi. Ja Cristo jawyeen pø ja'axi jawyeen tø yjujkpyiky; kuts ja Cristo mye'entnim jaanims wyinaty yikmo'odi ja tsinaa'yin xemikøjxp pøn jaty ja tø yjanchjawiyi.

24 Jats idø'øn wyinaty tuki'iyi kyixy, ku ja Cristo wyinaty tyikudigøøgyixy niduki'iyi pøn jaty jaa windsøn'ajttip naxwiin, jøts pøn wyinaty yikutujktip, ana'amdi, pøn tmidsep'ajttip ja Dios; jøts idø'øn ja Cristo wyinaty ja Dios Teety ttagidøjkigyixy tuki'iyi wine'enin ja tja'aty.

25 Pø jaanims idø'øn ja Cristo wyinaty kuwani yikutuky kunim ja myidsep tteky'a'an'ajtkøxt, ku ja Dios Teety ja jade'en wyinaty tø tyamidsøkyi jøts ja myidsep ja tmimajada'akt,

26 jøts ix'oojknim ja o'jkin ja Cristo t'ukmimajadaknit ku ja jujkpyøjkin tyiknaxkida'akt.

27 Pø tøxi ja Dios Teety ttsøky jøts ja Cristo tuki'iyi tyikutukt. Kuts idø'øn ja nøky jade'en yjawa'añ, ka'ap idø'øn ja Dios Teety tyagida'agiyi jøts ja Cristo ja yikutukiyit, pø ja'axi tø ttsøky jøts ja Cristo tuki'iyi tyikutukt.

28 Kuts idø'øn ja Cristo wyinaty tuki'iyi tø tmimajadakixy, winets ja wyinaty ja Dios Teety kyutujk tkupøjkti, pø ja kuxi ja Dios U'ngi. Jøts idø'øn jade'en ja Dios Teety myøjktujk o madsoo wyingaxø'økt pøn ja Dios U'nk tø tmamidsøky jøts ja myidsep ja niduki'iyi tmimajada'akt.

29 Jam yjawí pøngapøn ja oo'kpi tkunøbatti. ¿Tigøjxpts ku jade'en m'adø'øtsti? Pø nømdipxi ku ja oo'kpi kyajujukpyøktit jadigojk, ¿sudsøts ja xkunøbatidi?

30 ¿Ti øøts jeexyip ndamidanaapy ja ayo'on ku øøts njemjaty ndejaty, pøni ka'adam ja yjanchi ku jadigojk njujkpyøjkint?

31 Janch øø migu'uktøjk idø'øn nwa'añ, wingon øts ja o'jkin jabom jabom n'ixy; ka'ats øts ja nwandijy, ja'ayi øts nugo ndyimdyajotkujk'ajtpy ku meets ja nwindson'ajtim Jesucristo tø xjanchjawidi.

32 Pøni kajpxwamp øts, nø'ømp øts inet ku øts ja jaa'y jawaani xkayikpa'oockti jam Efeso. Tøts øts ja nmimajada'akti, ¿tits øts idø'øn jade'en nbijky? Pøni janch tiy idø'øn ku ja oo'kpi jadigojk kyajujukpyøkti, jade'ents ne'egi ndu'unindit sam wya'añdi: "Wants yikxon tjaaktyimkyaa'yindi tjaaktyimy'uujkyindi ixyam jabi o'jkindipts jabom."

33 Nay'ejx'etidim jøts mgayikwin'øøndit. Sam ja kajpxy wya'añ: "Ja kø'øm ka'ømyigu'uk idø'øn kayu'kxtip pøn tyikma'ttip ja myigu'uk chinaa'yindi."

34 Yiktso'onda'akti jadigojk tiy tsuj ja mdsinaa'yindi, kidi pøky x'uktunk'ajtnidi, pø ka'axi xumnijawidi ja Dios. Paty øts yide'en nwa'añ jøts xtsø'ødyunjawidit ja mga'øwynmaa'ñ.

Sa dø'øn ja oo'kpi jadigojk yujukpyøktit

35 Jamts inet muum ma tyiktø'ødit: "¿Sudso dø'øn jadigojk ja oo'kpi yjujkpyøktit? ¿Sa dø'øn ja ne'kx wyinaty t'ixy?"

36 ¡Xøjknat! ¿Ku me tigati x'ukni'ipy, nay ja tømt idø'øn pidsømp ku ja myuxy? Kuwanixi ja kyudigøy jøts ja ujts myuxy.

37 Ka'axi ja tømt pajk tyimñayide'en t'ixy sam ja ujts midí muxp, øy yja'ariindømt pajki, uk yjamidi tømði.

38 Ja Diosts ttanibiktaajkip jøts ja tømt pajk myuxt pøni sa ja ttsøky, jøts pøni sa dø'øn pyaät'atyí ja tømt midí yiknejp.

39 Tumdigachxi tuki'iyi t'ixy tigati; wenk ja jaa'y ñe'kx t'ixy jøts wenkts ja jiyujk ñe'kx t'ixy, wenk nayide'enmi midí ja kyajnk jamdi, jøts wenk ja ajkx ñe'kx.

40 Jats ja ne'kx midí tsajpjøtpyt'ajttip jøts nayjaa ja'amidi midí naaxwiñ'ajtmidip; midits idø'øn tsajpjøtpyt'ajttip, wenk idø'øn ja chujidi, ka'ap ja nayide'en kyaxø'økti sam ja'adi midí ya tsuj naaxwiñ'ajttip.

41 Wenk yø xøøw tyii'kxy, wenkts yø po' chamami; jøts nayí wenk yø maadsa' tyøø'kxmidi, jøts tigajstip yø maadsa', wenk yø tyøø'kxti tu'uk tu'uk.

42 Nayide'ents idø'øn yjaty ku oo'kpi jadigojk yujukpyøkti. Putsnip ja' midí ñe'kx yiknítajp, jøts midí ñe'kx jadigojk jujukpyøkp nijuunits idø'øn ja kya'uk'oo'knit.

43 Ja' yiknítajp midí yiktatsø'ødyump, jøts yujukpyiky midí janchtax-onda'akyim xemikøjxp. Ja' yiknítajp midí' kamøk, midí kamajada'kp, jøts yujukpyøkt jadigojk midí janch møk møjaaw.

44 Ja ñe'kx yiknítajp midí yikwin'ejxp jøts midí yiktomp yikmajtsp; jøts ja ne'kx yujukpyøkt jadigojk midí kayik'ejxp, kayiktomp, kayikmajtsp. Pøni jats ja ne'kx midí yik'ejxp jøts y'øøky tyigøy, nay jats ja ne'kx midí kayik'ejxp midí ka'oo'kp kadigøøpy.

45 Jabi yide'enxi ja Dios kyajpxy wya'añ: "Ja'ukyikmøøyxi ja mijawyeen jaa'y ja jujky'ajtin, pøn idø'øn Adán'ajt"; ka'ats ja nwindson'ajtim Jesucristo yjade'eni sam ja Adán y'ijty, tyimyikjujky'ajtpi ja ja'ayi myiñ.

46 Jawyeents adom ja ne'kx tō nyikmō'oyim midī ya nmōōt'ajtyindip naxwiiñ; jōtsnim wyinaty ja ne'kx nyikmō'oyindi sam ja nwindson'ajtim ñe'kx t'ijxy ku ja yujkpyijky jadigojk.

47 Naxne'eyxi ja Adán ñe'kx'ajt naxwiiñit jaa'yin; tsajpjotpts ja myiñ ja nwindson'ajtim Jesucristo ñe'kx paty ja jawaani ōy.

48 Tum jade'ents adom nne'kx ya naxwiiñ t'ijxyim sam ja jawyeen jaa'y ñe'kx t'ijxy, midits idō'on wyinaty yikmō'oyimp jade'ents ja t'ext sam ja nwindson'ajtim ñe'kx.

49 Nayide'en sam adom ya naxwiiñ tō n'agojnaxyim ja midu'ukpi jaa'y, kuts jam tsajpjotp nayide'ents adom nōjkx nwindson'ajtim sam ja nwindson'ajtim t'ixy.

50 Yide'en ō migu'uk idō'on njatijy ku yō ne'kx midī nmōōt'ajtyindip midī xixmyōōt midī ni'jpmōōt, kidi yō'ōjip wyinaty twinguwa'jkip ja Dios mā ja amuum ja kyutujk ttanitanit ja jaa'y; midī kataa'nip, midī oo'kp tigōōpy, ka'ap ja pyaat'aty jōts ja xemikōjxpit jujky'ajtin yikmō'ot.

51 Ja'ats meets ndukmadoowampy jōts yikxon xnijawidit midī yu'uch, midī amaa'tsk ejtp, midī ka' pōn nugo ajawī tñijawī: Ka'ap adom niduki'iyi ja o'jkin nbaajtindit; ja'ayi ku tyumdigatst ja ne'kx ku nōjkx ja nwindson'ajtim xnimi'iñim,

52 widsukin idō'on ja tyunit, ku ja puxuujx jadigojky; yjaak'ukyikmadoonit. Winets idō'on ja oo'kpi yujkpyōktit jadigojk mōōt ja ñe'kx midī xemikōjxp myijujky'attip; pōnts wyinaty jujky'ajtipnim ja'ats ja ñe'kx tigatstip.

53 Kuwanixi dō'on tyigatst yō ne'kx midī adom ya naxwiiñ nmōōt'ajtyindip, midī amōjip, midī kōjxp, midī anuu'kxip; jōts ja nyikmō'oyint midī xemikōjxp etp ja'agōjxp ku ja kyakixy ni kya'amōji. Jōts adom wyinaty nmajststuuptyim ja ne'kx midī oo'kp midī tigōōpy, jōts ja nyikmō'oyint midī nijuuni ka'oo'kp midī xemikōjxp ejtp.

54 Kuts adom idō'on wyinaty tō nmajststuuptyim ja ne'kx midī kajajkp, jōts wyinaty ja ne'kx tō nyikmō'ōña'am midī jajkp, jōts ku dō'on wyinaty ja ne'kx tō nmajststuuptyim midī oo'kp jōts wyinaty tō nyikmō'oyim midī xemikōjxp jujky'atp, jaanims idō'on ja Dios kyajpxy tyō'ōt midī jap jaabyety nōkyijxpy ejtp: "Tō ja o'jkin yikmimajada'aky.

55 O'jkin, ¿mā dō'on ja mdukta'o'jk? ¿Mā dō'on ja mōk'ajtin tō xyikwingaxi'iky?"

56 Ja pōky idō'on ja o'jkin xukta'oo'kimp, jōts ja mōjaa'gyutujk idō'on ja tyamōj'ajtpy midī ka'uktunip.

57 Ndamōja'wampys ja Dios Teety ku ja tō xyikmajadaajkyindi nwindson'ajtim Jesucristo pyudōjkingōjxp.

58 Jade'ents migu'uktōjk idō'on, mōk jōts tu'ugyi ja mwinmaa'ñ xjaakpiktakōjtīt jōts ja nwindson'ajtim tyunk xjaakyikyō'ogyojtīt; pō mnija'widipxi ku ka' nugo wyindigōydi ja mdunk midī ja nwindson'ajtim mduktuujnidip.

16

Sa ja pudōjkin myukt

1 Ku xyikmuktīt ja piktā'aky midī mdabudōkidip ja abiky kugajp ja migu'uk midī tjanchja'widip ja Dios, yide'en xu'undīt sam ō nayide'en tō ndukmad-owdi pōn jaty jam Galacia etjotp namyujkidip.

² Kija' idø'øn windomingi xpukondu'uttit ja mijuu'ñ pøni wine'en tø mma-jada'a'akti, jøts ja xpøkjø'øktit a'ejxi, jøts wyinaty abaãdi xyik'awejnidi ku ø nnøjkxt.

³ Kuts øts jam wyinaty nniijkxy winets ø wyinaty nguexy ja jaa'y jam Jerusalén pøni pøn mee mw'i'ijxpy, jøts øts ja nøky ja nmo'odit jøts ja møøt tyiknøjkxtit ja pudøjkin.

⁴ Pøni paat'ajtiy'ip jøts ø nnøjkxt, øyts øts ja wyinaty xmøøtnøjkxti.

Ku Pablo tniigajpxy ma jaty ja wyidetwa'añ

⁵ Kuts jam wyinaty nniijkxy ma meets jam, jawyeen ø nnaxwa'añ jam Macedonia etjotp, jøtsniim øts jam Corinto wyinaty nja'aty.

⁶ Ni kyajaa øts jam yjawi ndaa'nit ma meets jam, jøtmøñ øts jam nyiknaxy ja xuxpyoj jøts mee nayide'en wyinaty x'atskeyy ma ø wyinaty nniijkxy.

⁷ Ka' meets idø'øn nugo pojim n'ukninaxwa'añ, nmøøt'aa'niwyampy meets idø'øn niyjeky pøni yikutujkpy ja Dios.

⁸ Yam øts Efeso kajpkøjxp njaaktaa'niwya'añ kunim Espíritu Santo xøøw tpaatt.

⁹ Øy øts idø'øn may ja jaa'y xjami'ekyidi ya Efeso kajpkijxy, jats ja jaa'y nayide'en pøn ø xmadowandip jøts øts ja ndukmado'odit ndukyikyujtit ja nwindson'ajtim Jesucristo yja'.

¹⁰ Pøni ja'tp ja Timoteo jam, m'ejxtibim jøts jøtkujk jam ñayjawiyit jøts niti tkadajotmay'ookt, pø nayi nwindson'ajtimxi yja' ja tyunk'ajtip sam øts.

¹¹ Paty idø'øn ja tum jade'en xkupøktit, jøts jade'en xpudøkidit jøts øts øy tsuj yam xpaatt, pø n'awijxpyxi øts ja yam møøt ja myigu'uk pøn møøt wyidity.

¹² Tøts øts Apolos njanchjaminsuu'kxa'aky adøm ja nmigu'uk jøts ja jeexyip tmøøtniijkxy ja migu'ukti pøn jaty meets m'ats'ejxwajnip, ka'ats ja ixyam inet myajada'a'akt; jaanim ja ñøjkxt ku y'awatsit.

Ku ja Pablo t'ukyajkni ja kajpxpoo'kxin

¹³ Wijyim mnabyikta'agidit jøts ejtp møk ja mjanchja'win xyik'ettit. Yaa'dyøjkin tuki'iyi xmidanidit jøts jøtmøk mnabyikta'agidit.

¹⁴ Pøni ti jaty mdundip, tsojkingøjxp pa'ayo'owingøjxp ja xu'undit.

¹⁵ Mnija'widip migu'uktøjk ku dø'øn ja Estéfanos møøt ja myigudøjk jawyeen tjanchja'widyi ja Dios kyajpxy y'ayuujk jam Acaya etjotp. Tøts ja ñadyamiyøxyidi jøts ja tpudøkidit ja jaa'y pøn ja janchja'win tmøøt'ajttip nayide'en.

¹⁶ Pøni jade'ents ja tyundi, nayide'ents mee mbaat'aty mdu'unt, jade'ents ø ndsøky jøts meets ja xmimado'ot jøts ja nayide'en xpudøkidit, nayide'en xu'undit ja jaa'y pøn jaty tundip pøn jaty pudøjkidip.

¹⁷ Tøts idø'øn njanchtajotkujk'atti ja Estéfanos, ja Fortunato jøts ja Acaico ku ja ya tø y'atsmendi jøts ø tø x'atspaatti, ja'ats øts ojts ja pudøjkin xmo'odi jøts meets jade'en myikudanaay.

¹⁸ Tøts idø'øn ja xjanchyikjot'amøkpøkti sam ja jam nayide'en myikjot'amøkpøjkidøø. Ngajxajkimp idø'øn ja yjade'embj jaa'dyi.

¹⁹ Mdanigajxidip ja kajpxpoo'kxin ja janchja'wibi jaa'dyi pøn kugajp'ajttip Asia etjotp. Mjanchkajpxpoo'kxidip ja Aquila jøts ja Priscila, jøts nayide'en niduki'iyi ja jaa'dyi midi xuminamyujkidip ja' tyøjkjotpti, pøn nayide'en tø tjanchjawidi ja Dios sam meets.

²⁰ Nayide'ents mgajpxpoo'kxyidi pøn jaty yam tø tjanchjawidi ja Dios. Nagyajpxpoo'kxidi niduki'iyi xem yam sam ja Dios tsøky'aty.

²¹ Pøñ idø'øñ Pablo'ajtp, øts idø'øñ kø'øñ njaapy ya'at nøky jøts ndanigaxidi ya'atpi kajpxpoo'kxin.

²² Pøñi ka' pøñ tkupiky jøts tkatsøky ja nwindson'ajtim Jesucristo, wan wyinaty kø'øñ ttani'ixy. ¡Wingonip ja nwindson'ajtim!

²³ Mmo'ojidip ja nwindson'ajtim ja kyunuu'kxin.

²⁴ Meets niduki'iyi ndanigajxtip ja tsojkin ja pa'ayo'owin Cristo Jesús køjxp. Jade'en idø'øñ ja yjatt.

JA MYHMAJTSKPI NØKY MIDI JA PABLO TYANIGAJX JA CORINTI JAA'Y

Ku ja Pablo tnijayi ja janchja'wibi pøn jam Corinto

¹ Øts idø'on Pablo'ajtp. Tø øts ja Dios Teety xamidsøky jøts ø ngudanit ja Jesucristo. Jøts nayide'en ja Timoteo midi øts møøt ya'at nøky nja'ay jøts øøts ndanigaxi pøn jaty ja Dios Teety ja'ajtidip jam Corinti, jøts nayide'en pøn jaty jam Acaya etjotp tsinaadyip.

² Paatti kupøjkti ja Dios Teety jøts ja nwindson'ajtim Jesucristo kyunuu'kxin jøts ja yjotkujk'ajtin.

Sq Pablo y'ayo'ombaajty

³ Tkajxajkyindi ja Dios midi tyeety'ajtpy ja nwindson'ajtim Jesucristo, jabi jade'enxi dø'on ja tyeety'ajtin tyiknigaxi'iky ku adøm x'ayo'ijxyindi, niijuuni xka'ixmajchindi, ejtp xkajpxjot'amøjkandi Dios'ajtingøjxp.

⁴ Ja'agøjxp ja Dios xkajpxjot'amøjkandi pøni sa jaty nidu'uk nidu'uk n'ayo'ombaajtyindi jøts jade'en nnija'wandit sudso dø'on ja nmigu'uk nayide'en ngajpxjot'amøjkimyandit sam ja Dios tø xpudøjkandi.

⁵ Nayide'en sam adøm kajaa ngu'ayo'ombaajta'andi ja Cristo yja', kajats ja nayide'en ja jot'amøkpxøjkin xmø'oyim.

⁶ Ixyamts øøts nyikjemduñ ja'agøjxp ku meets ndukmadøy ja nitsoojkin ayuujk jøts ku meets nayide'en ngajpxjot'amøjkidi. Ku øøts yø'øbi ayo'on ndanaxy, ja Dios øts tø xkajpxjot'amøjki. Nayi meets m'øy'ajtingøjxp øøts idø'on jade'en tø njaty jøts meets nduknijawit sam nayide'en ja Dios mbudøkiyidit ku nay yø'øbi ayo'on wyinaty xpaatti.

⁷ Njantyimyjøp'ijxy'ajtpy øøts idø'on jøts meets nayide'en ja Dios myikjotkujk'atyyidit sam øøts, øy idø'on nayide'en mja'ayo'ombaatti.

⁸ Meets migu'uktøjkti, jade'en øøts ndsøky jøts meets waani x'ext xnijawit sa øøts idø'on jam ja ayo'on nyiknajxy Asia. Yikxon øøts møk ja ayo'on jam n'ijxy, niti awejxin niti jøp'ejxin øø wyinaty nga'ukmøøt'ajtni, niti madaajkins øøts, ja o'jkin yjøp'am øøts wyinatyni.

⁹ Jade'ents øøts idø'on ojts jam nnayjawiyi sam ja jaa'dyi pøn ja xyøøw tø yiktanimacho'owiñi jøts ja o'jkin tpaattit. Øyts idø'on ja ne'egi ku jade'en yjajty, jabi jaanimxi øts ja Dios idø'on tuki'iyi nmibøkøjxi jøts ku oo'kpibaat ja tyikjujkyiky. Jøts øøts jade'en nja'gyujkiyii'ñ ku adøm niti kø'øm xkama'ayim.

¹⁰ Ja' øøts idø'on x'axajtujk x'agø'ødujk jøts øøts jade'en ja o'jkin xkadukpaajty, jøts nayide'en xyiknitso'ok'ejtint ku ja o'jkin wyinaty xmimajada'akwä'añim.

¹¹ Nayide'en meets idø'on ja mdsapkaaky tyumi ja'agøjxpts adøm idø'on ni'amuki ngajxajkindit ja Dios jøts øøts ja pudøjkin xmøy'ett.

Tigøjxp idø'on ja Pablo ojts kyanijkxy Corinto

¹² Ja'agøjxp øøts n'aaw njojt yjotkujk'aty ku øøts nnijawi ku øøts o madsoo øy tsuj tø nyiknaxy ja ndsinäa'yin, niti taay. Tu'ugyi øøts ja Dios ja y'øy'ajtin tø xabudøki, ka'ap øøts ja ngø'øm wijy'ajtin tø myajada'aky. Meets windumxi dø'on øøts ja ndsinäa'yin øy tø nyiknaxy.

¹³ Jøts nayide'en ja nøky midi meets tø ndanigaxi, niti taay ja tkamøøt'aty, mibøkøxti ja'.

14 N'awijxy'ajtpy øøts ku meets ja njaa'y'ajtin xkupøjkit tuki'iyi sam ixja waani tø xkupø'okwa'andi, jøts jade'en nnadyajotkujk'ajtandit nixem niyam ku wyinaty myeni jadigojk ja nwindson'ajtim Jesucristo.

15 Ja'ayi ndamø'ajtpy ku meets idø'on tø xkupøjki, jøts ø nwa'añ ku meets majts ojk n'ats'ejxwa'añ jøts jade'en n'atsyikjotkujk'attit.

16 Ja'agøjxpts ndanibiktaajkiyiñ jøts ku øts ya nmiñ Macedonia, myijawyeen meets n'uk'ext jøts jadigojk ku nwimbejtnit. Wanik meets xpudøkit jøts øøts nja'tt jam Judea.

17 ¿Ka'ap øts idø'on ja ndejint yikxon ndyimdyanibiktaajkiyiñ ku øts øjts jam nga'uknøjkxni? ¿Sa tø mwa'andi, jade'en øts idø'on xijy sam muum ja jaa'y ja yja' nugo tyikmajada'aky ku ja nugo t'ukupiky jøts ja ka' t'ukpaduni?

18 Pø ka'axi. Wa'ats ja Dios tnijawi ku ka'ap øts jade'en nugo ndaay'aty.

19 Jabi ka'axi ja Dios U'nk Jesucristo tyaa'y'aty midi øøts ja yja' ngajpxwa'kxøø møøt Silvano jøts Timoteo, ma meets jam. Pyadunguijxy ja y'ayuujk ja',

20 jøts ja' tuki'iyi tmidanaagyøjxp pøni ti jaty ja Dios Teety ñi'adsø'owip. Ja'agøjxpxi ja xyøøw ja yikajpxpaaty ku adøm Dios Teety nmøja'wa'am ngunuu'kxyja'wa'am ja myø'ajtin jøts nwa'añim janch tiigyajpxy idø'on yø', nwindson'ajtim Jesucristo køjxp.

21 Nayi Dios Teetyxi adøm idø'on xukmøøt'ejtandip ja Cristo jøts øøts ja tø xjibiky jøts øøts ja jade'en ngajpxwa'kxøt ja yja'.

22 Tø nayide'en ja Espiritu Santo xmø'øyim midi ejxpajt'ajtp ku adøm ja xja'ajtyim, jøts jade'en nnija'windit ku xmø'y'ukwa'añindi ja juky'ajtin midi xemikøjxp'etp.

23 Ñija'widyaapy ja Dios ku meets nga'uknøjkxni jade'engøjxp ku meets ka' nyikjotmay'ooktøkiwya'añ ku møk nwindso'ødyit. Pøni ka'ats yjanch-jade'eni, pø jats øts idø'on ja Dios kø'øm xiidyu'unt.

24 Ku meets wyinaty nninijkxy, ja xondaajkin ja øy'ajtin meets ndaninøjkxwampy. Ka'ap meets nda'aguwaniwya'añ ja janchja'win pø møkxi meets ja xmøøt'ajtni.

2

1 Jabi ja'agøjxpxi meets idø'on tø nga'uknøjkxni ku meets nugo n'atsyikjotmay'ooktøkit.

2 Ja ku meets n'atsyikjotmadyøkit, ¿pønts øts idø'on ndajotkujk'atp? ¿Kidi meedsip? Yamts meets wyinaty kø'øm tø nyikjotmadyøki.

3 Patyxi meets tø nnijayi jawyeen jøts jam tuki'iyi xyik'øyidit xyikpaadidit ku øts jam wyinaty nja'aty jøts meets xaxonda'akt. Jabi jade'enxi nwa'añ ku mee mxondakmit ku meets x'ext jøts ku øts jotkujk.

4 Ku meets ja'abi nøky ndanija'yiyiñ, janchjotmay'oo'kp øts wyinaty, ja ya'axyi ja ji'iyi øts idø'on wyinaty xmimajadap ku meets yjawi ja jaa'y myikwinmaa'nmya'atwa'añidi jøts ø xkagupøktit. Ka' meets nayide'en nyikjotmay'ookwa'añ, ja'axi øts idø'on nanky'ejxwajnip mabaat meets idø'on ndsoky nba'ayø, patyxi meets idø'on ngajpxwijy.

Jade'en pyaat'aty jøts yikmaa'kxukt pøn tø tyundigø

5 Ja jaa'y'nk pøn øts idø'on tø x'ukyikjotmadyøki ka'ap øts ja nadyu'uk tø xyik'ayøw jabi nixem niyamxi meets idø'on ndejint winaggin tø mbaajtmiiyidi nayja'abi jotmay. Ka'ap ø nwa'añ ku nijum.

6 Ka'ap øts ja møk n'ukwindsø'øwani pøn idø'on tø tyundigø. Jabi tøxi meets ja nijum ne'egi kø'øm xkastigimøøñi.

7 Jade'en idø'øn ne'egi pya'at'aty; jøts meets ja xmaa'kxujknit, kajpxjot'amøkidi, ja kuts ja jotmay myimajada'knijit jøts jade'en ja chinaa'yin tyikwindigøøñit.

8 Paty meets ixyam ja may'ajt n'amidøy jøts jadigojk ja tsojkin ja pa'ayo'owin xmo'odit.

9 Tø meets ya'atpi kajpxy ya'atpi ayuujk jawyeen ndanijayi ja'agøjxp jøts ø n'ext nnijawit põni xjanch'ukpaduujnidip øts idø'øn ja ngutujk.

10 Paty xnijawidit, põni põn meets mmee'kxpy, nayide'ents øts ja maa'kxin ja nmøømyi. Pøni tø øts idø'øn tigati nmee'kxy, ja'agøjxpts øts jade'en tø nduñ ku mee n'ayo'ixy, y'ijxpy ñija'wip ja Cristo.

11 Jøts jade'en o tigati tkadamøj'att ja miku'windsøn Satanás, jabi nnija'wampxi adøm wä'äts ku ja o tigati tamibøki tami'ejxi.

Ku ja Pablo ttajotmay'øøky ja Tito jam Troas

12 Ku nja'jty jam Troas jam kajpjotp, nugo øts ndunk jam tyimy'ity øy madsoo jøts øts ja Cristo yja' ngajpxwa'kxit.

13 Yämts øts wyinaty tø nja'uktundsoo'mi, kumi ka'ats øts øy njotkujk'aty ja'agøjxp ku øts ja Tito jam ngapaajty, adøm ja nmigu'uk, patyts øts jam øjts ndso'ongojmi jøts øts ojts nnøjxni jam Macedonia.

Ku ja Cristo møøt nmajada'k'ijtyindi

14 Nmøja'wimp ngunuu'kxyja'wimp ja Dios Teety ku ja ejtp xyikmajadaajkyi tu'ugyi møøt ja Cristo, jøts ja kyajpxy jøts ja y'ayuujk ja xukajpxwa'kxyim øy magama.

15 Y'øjya'wip chuja'wip ja Dios Teety põn ja Cristo møøt y'ity jøts ja yja' tkajpxwa'kxi.

16 Øy ja magama ja y'ixpøjkin wyidity jam muum tkamibøkti, o'jkin tigø'øyin ja yiktatiidyu'undip. Jøts muum tjanchjawidi, ja'ats ja tyajujky'attip xemikøjxp. ¿Pønts idø'øn yø'øbi tunk nugo niyjøjxk tyimy'ukniyajjtp?

17 Jabi ka'axi øøts ja nugo ndameembyiky ku øøts ja Dios kyajpxy ngajpxwa'kxi sam muum y'adø'øtsti, uk ka'baat ka'pxy tnigajpxti tum wimbet ja tnmadya'akti. Ka'ats øøts jade'en n'adi'ich, tiy janch øøts ja nnigajpxy pø tøxi øøts Dios kø'øm xkexy jøts øøts kyajpxy ja ngajpxwa'kxit Cristo pyudøjkingøjxp øy madsoo jam Dios wyingujk.

3

Ku ja Dios ja chojkin ja pya'ayo'owin jadigojk tyiktso'ondaajky Jesucristo køjxp

1 ¿Sa meets idø'øn yø xja'gyuki ku øøts jade'en nwa'añ? ¿Kø'øm øøts idø'øn xijy nnagyajxa'akwa'añi sam ja muum ma ttundi põn ja ixpøjkin wenk tyajktip? ¿Ja ejxpajtin øts idø'øn kuwani ndyimyøøt'atp jøts meets yø n'ixpøjkin xmibøkit?

2 Ka' yjade'eni, jabi meetsxi myiknigaxi'kpy põni sa øts idø'øn ja ndunkjøøjp y'øyi. Jade'en ja ñigaxi'iky ku meets ja Dios yja' tø xmibøjki jøts øy ja põn t'ext tnijawit sa dø'øn ja mdsinaa'yin tø tyigatsti.

3 Kø'ømx i ja Cristo jade'en tø mdanibiktaagiyidi jøts m'ejxpajt'attit jøts øts ja ndunk jade'en wyingaxi'iky. Jabi Diosxi dø'øn kø'øm ja y'Espíritu Santo tø tyaky jøts ja y'ejxpajt'att ja'agøjxpts ja' kyakudigøy. Jawaani møj ja', midi annija'winjotp ja Dios pyiktakpy jøts ka'ap ne'egi ja jawyeembi kutujk midi Moisés kyøxjaay tsaagøjxp.

⁴ Sa jaty øø nwa'añ tiy yø' janch yø', wa'ats øøts nnijaw'i jøts ku øøts ja Dios Teety pyudøjkin amuum xmø'øy Cristo køjxp.

⁵ Ka'ap øøts kø'øm nnankmyajada'agiyi, ja Dios wyingujkpxi dø'on chøøñ ja møk'ajtin jøts øøts ja øybi ndu'unt.

⁶ Jaa ku øøts ja jeexyip tø xkamø'øy ja møk'ajtin sudsøts øøts idø'on jeexyip nnigajpxy sa ja Dios chojkin ja pya'ayo'owin jadigojk tñanky'ijxyi sa ja naxwi'ñit jaa'y ñitso'ok'attit. Ka'ap ja tsinaa'yin yikpaaty ku nbadungøjxint tuki'iyi ja Moisés kyutujk, ja Espiritu Santoxi dø'on tñanky'ejxip ja øgyajpxy ja ømyadya'aky sudso yikpaaty ja jujky'ajtin xemikøjxp. Ja o'jkin tigø'øyin pyatpy ja anmija'win ku ja Moisés kyutujk ngabadungøjxint yam ja Espiritu Santo yja' tyumyikjujky'aty.

⁷ Jade'en idø'on ja Moisés kyutujk ja myø'ajtin kyaxi'iky midi tsaagøjxp yikjaay ku jaaju'uk agujk yikmøøy, janch tøø'l'kxp tsamamp idø'on ja wyeen y'aaw. Jøts janch win'oo'ktip idø'on ja myigugajp israelit jaa'y ku ja yjayik'ejxwa'añ. Waani dø'on ja yaju'uk møj y'atskaxi'iky, pojin ja ñaxkojmi. Sats idø'on ja janchtyimyøj y'atsmiñ ja'abi kutujk midi anmija'win ja o'jkin tyukupiky'ajtpy.

⁸ Kuts ja øgyajpxy ja ømyadya'aky ka'ap ja tmi'abaaty, pø ka'axi ja winmaa'ñ myajada'aky mabaat ja yja'aty ja myø'ajtin ja y'øy'ajtin midi ja Espiritu Santo xuk'ejximp xukñija'wimp.

⁹ Sats idø'on ja kutujk janch møj, yam ja tjayikudigøj ja anmija'win, jsudsøts idø'on ja Dios y'øgyajpxy y'ømyadya'aky jawaani kyidyimy'ukmøjit midi adøm ja xagupøjkimp!

¹⁰ Jabi ka'axi ja Moisés kyutujk møøt ñabyaadyi ja Dios y'øgyajpxy.

¹¹ Øyi dø'on ja kutujk møj tø yjamiñ ka'ap ja Dios y'øgyajpxy ja twinajxi midi ejtp xemikøjxp.

¹² Ja'agøjxp øøts ja njøp'ijxy'aty, paty øøts agujk jotkujk ja Dios yja' nnigajpxiyi,

¹³ Jøts ka'ap y'ukpaat'ajtniyi jøts øøts ndu'unt nayide'en sam ja Moisés ttuñ ku ja y'ijty ñawynjuuxyiyi jøts jade'en ja myigugajp tka'ejxtit ku ja yaju'uk tuda'aky tyigøøñi.

¹⁴ Ja israelit jaa'y ka'ap ja tja'gyukidi tigøjxp idø'on ja Dios ttanibiktaagi ja kutujk midi ja Moisés yikmøøy. Ni ixymbaat ja tkaja'gyukidinim ku ja Dios ñøky tkajpxidi. Jaanim ja ja'gyukin ja tpaattit ku ja Cristo yja' tkupøjkidit.

¹⁵ Yjaakjakajpxidibimts ja Moisés kyutujk ja'adi, jade'en ja tjøp'ejxti jøts ja ñitso'ok'attit ku ja tpadungøxtit.

¹⁶ Kuuyidsik øy pøngapøn tkupøktit ja nwindson'ajtim Jesucristo jatyits ja pyøky ja ñiwa'adsidit jøts ja wa'ats tuki'iyi tja'gyukigyøxtit.

¹⁷ Ja nwindson'ajtimxi tmøøt'ajtp ja jujky'ajtin jøts ja ja'gyukin, pønts ja nwindson'ajtim tjanhja'widip ka'ap ja Moisés kyutujk ja y'ukmimajada'kniyidit, ni kya'ukjujky'ajtnidit ja pøky agujkpy.

¹⁸ Paty adøm ja ja'gyukin nmøøt'ajtna'andi ku ja nwindson'ajtim yikmibiky. Kuts ja ejtp njotmay'ajtnidit ja y'øy'ajtin ja myø'ajtin, nay ja'ats nanky'ejxamp xjats adøm jade'en njajtnant sam ja nwindson'ajtim. Yujky'ajtingøjxp idø'on ja jade'en xpudøjka'am.

4

¹ Paty øøts idø'on nijuuni ngadawindsuun ja ndunkjøøjp midi øøts ja Dios y'øy'ajtingøjxp tø xanibiktaagi.

² Jagam jixkø'om øøts idø'on nbikta'aky midì amaa'tsk midì tsø'odyuñim yiktump. Ka'ap øøts n'ijxy ngøy jøts o pøngapøn nwindaay'att. Ni ja Dios øøts ja y'ayuujk ngakajpxma'jti. Ja tyiibyì ja yjançhpi øøts idø'on ja'ayi nngajjpxpy, jøts jade'en nipøn jaa'y kyawa'ant jam Dios wyingujkp ku øøts n'ayuujk kyatiyi.

³ Ku jaa winaagindi pøn tkaja'gyukidip ja nitsoojkin ayuujk midì øø ngajpxwa'kxpy, ja kyudigø'øyin idø'on ja kø'om y'ixaawyandip.

⁴ Ku ja wyinaty kø'om tkajanchjawidi, ja mikuwindsønts idø'on ja tø yikwinajpniiyidi pøn ja'ayi ya naxwiññ ne'egi diosja'widip, jøts jade'en tkapaattit ja kudøø'kxaagi ja kujajtaagi midì yajkpy ja øgyajpxy ja ømyadya'aky ku ja Cristo y'øy'ajtin myøj'ajtin yiknimadya'aky. Ja Cristots tñanky'ejxip ja Dios Teety pøn y'agojnax'ajtpy.

⁵ Ku øøts ngajpxwa'kxy ka'ap øøts ngø'om ja' nngajjpxy, ja Jesucristoxi øøts ja wyindsøn'ajtin ngajpxwa'kxip, jøts øøts jade'en nyikwimbejtñit ja y'øy'ajtin midì tø tyaky, ku meets nbudøki ja' chojkingøjxp.

⁶ Jabi nay ja'abi Dios Teetyxi dø'on midì ja jaj ja tøø'kx tyiktso'ondaajk, nay ja' adøm tø xmø'øyindi ja kujajtaagi ja kudøø'kxaagi jøts n'ejxindit nnija'windit sà dø'on ja y'øy'ajtin myøji midì ja Jesucristo ñanky'ejxip.

Janchja'wìngøjxp ja tsinaa'yin nyiknaxyim

⁷ Dios wyingujkp ja chøøn ja'abi kujaj'ajtin kudøø'kx'ajtin midì niwindem xøøw tkamøøt'ajtp ja kudigø'øyin, ja' øøts nmøøt'ajtpy njujky'ajtingøjxp. Ka'ap øøts ngø'om møk'ajtin nyiktuñ, ja Diosxi myøk'ajtin idø'on jade'en tyiknigaxø'jkp.

⁸ Øy øøts tsep agujkp aki agujkp ja njujky'ajtin yjanaxy, niwindem xøøw øøts ja nnøø' ja nduu' kya'aduky; øy øø njamay njatajy sudso øø nyiknaxt, nbatpy øøts ja winmaa'ñ sudso tyuu'baat tyuu'wewst.

⁹ Øy øø njayikjemduñ njayikteduñ, ka'ap øøts ja Dios x'ixmach; øy øøts ja nmidsep xjatekpya'an'atwa'añ, ka'ap øøts ja tu'ugyi xmiimajada'aky.

¹⁰ Winjaa windsojk øøts ja jaa'y ja o'jkin xjadukpaatwa'añ sam ja Jesús yjajty. Nay ja'ayi øø kø'om xpudøjkp jøts jade'en tyiknigaxø'iky ku ja ya xemikøjxp yjuyky'aty.

¹¹ Pøn jaty øøts møøt nbaduñ ja Jesús yja', nay ja'agøjxp øøts ja o'jkin jabom jabom x'ijxy xkøy, ja'agøjxp øøts ja xka'ixmach jøts jade'en tyiknigaxø'økt ja yjuyky'ajtin øøts nnikøjxp.

¹² Øy øøts ja o'jkin xumijapaatwan'ity xumijamimajada'akwan'ity, ja xemikøjxpit juyky'ajtin meets ne'egi mbaajtip m'ejxip.

¹³ Njanchja'wìp øøts nayide'en ku yide'en wya'añ ja Salmos nøky: "Paty øø nngajjpxy ku njanchjawi."

¹⁴ Nniija'wìp øøts ku ja Dios Teety tyikjuykpyiky ja Jesús, nayide'ents adøm ja møøt xyikjuykpyøjkint, jøts jam nnøjkxint niduki'iyi ja' wyingujkp.

¹⁵ Midì øø tø ngu'ayowi ja'agøjxp øøts idø'on ja ngupiky jøts meets ja øy'ajtin xpaatt, mayts ja jaa'y Cristo køjxp tpaattit ja Dios kyunuu'kxin ja Dios y'øy'ajtin jøts may nayide'en pøn ttukmøjawiðip pøn ttukunuu'kxyjawiðip ja Dios ja'agøjxp ku ja tkajxa'akti.

¹⁶ Ja'agøjxp øøts idø'on ngadawindsuñ. Øy øøts ja nne'kx yjaga'ukmajadakni, møwenip kajaajip øøts ja njanchja'win jabom jabom.

¹⁷ Yø ya'it ayo'on waani yø ñaxkøjy, ka'ap yø jeky tyaa'ni; jøts yø' øy'ajtin xemikøjxp ne'egi xukpaajtimp ma ja Dios.

18 Jabi ka'axi yik'ixa'ay midi ya naxwiiñ yik'ejxp, ja Dios y'øy'ajtin ne'egi yik'ixaapy midi kagax'kp. Ja pikta'aky midi kax'kp myøøt'ajtpy ja' ja kudigø'yin. Ja øy'ajtin midi kayik'ejxp ka'ap ja y'aats ja kyoyjk ja kyudigøy.

5

1 Nnija'windip adøm ku ja nne'kx kyudigø'yim midi kajajkp sam tu'uk ja tøjk kyudigøy naxwiiñ, jap adøm ja Dios tø xadanibiktaajkindi tu'uk ja tsinaadyaajk tsajpjøtpy. Etp ja xemikøjxp, jabi kidi naxwii'ñit jaa'yipxi ja tø tyik'øyi.

2 Janch jade'en idø'øn yjaty ku adøm nne'kx ja yjujky'ajtin tyiknaxy ya, ka'ap adøm n'øyja'wam, winjaa windsojk adøm nnøjkxwa'añim ma ja tsinaadyaajk ja Dios tø xadanibiktaajka'am,

3 ma adøm n'anmija'win yiknitanaa'yim.

4 Yø ne'kx midi nmijujky'ajtyindip ya naxwiiñ ka'ap yø øy ti xuk'øyja'wam, jøts yiktsojkp ja tsinaadyaajk midi ja Dios tø xanibiktaajkindi, yjagayikwa'añ ja o'jkin. Yø naxwii'ñit tsinaa'yin adøm idø'øn njadayiktigatswa'añimp ja jemchinaa'yin.

5 Ja Dios idø'øn kø'øm tø xanibiktaajkindi jøts tø xuktatøjkindi ja Espiritu Santo midi ejxpajt'ajtp ku adøm ja nyikmø'yindit midi ja yik'awijxpy.

6 Jade'ents adøm idø'øn ndajotkujky'ajtint, jøts nnija'windip ku ya yø nne'kx nmijujky'ajtyindinim ka'ap adøm ja tsinaadyaajk nbaajtyindinim. Ka'anim adøm idø'øn ndyimyja'atyim ma dø'øn ja nwindson'ajtim jam.

7 Janchja'wingøjxp adøm idø'øn nmøøt'ajtindit ja jøp'ejxin øy ja njaga'ijxyindi.

8 Ka'ap ja o'jkin tigø'yin ndsø'jkandit. Jotkujk idø'øn adøm njøp'ejxindit ja o'jkin ku wyinaty xpaat'ajtyindi jøts nnøjkxindit jap ma ja nwindson'ajtim møøt n'ejtint.

9 Paty adøm idø'øn øy madsoo nwindso'jka'ant ja nwindson'ajtim wan ne'kxkøjxp wan anmija'wingøjxp.

10 Jabi kuwanixi ja Cristo tyiidyu'unt jøts jade'en nyikmø'yindit midi xpaat'ajtindip nidu'uk nidu'uk pøni sa wyinaty ja njujky'ajtin ya tø nyiknaxyindi.

Ja kajpxy ja madya'aky midi ñigajpxy sa jadigojk møøt nnamyajyint ja Dios

11 Ja'agøjxp ku øø nnijawi sa ja nwindson'ajtim yikmøjawit yikunuu'kxyjawit y'øy'ajtingøjxp paty øøts ja jaa'y ndukja'gyukiwyanguixy ku øøts tiy janch ja kyajpxy ja y'ayuujk nnigajpxiyi. Nija'wip ja Dios sa øøts ja njaa'y'aty, njøp'ijxpy øøts jøts meets nayide'en xja'gyukit.

12 Ka'ap øø kø'øm nnay'agajpxyiyi, ja ja'gyukinx meets idø'øn ndukmøøt'atwampy jøts jotkuk mnayjawiyidit ku meets ngawindaayi. Jøts jade'en agujk jotkujk x'adsojimbettit ja jaa'y pøn y'anmija'win yjamøøt'ajtpy.

13 Pøni nugo øøts ndyimgyajpxy pøni nugo øøts ndyimy'adi'ich, Dios ja tu'ugyi tnija'wip; pøni øyts, pøni tiyts, pøni ka'px øø nnigajpxy ja yja', meets ja mda'øy'atp.

14 Ja Cristo chojkingøjxp pya'ayo'owingøjxp øøts idø'øn ja ndunk ngama-jtstu'uty jaa ku øøts ndyimyjanchjawi ku niduki'yiyi tø xku'o'jkindi jøts ka' n'uknijujky'ajtna'ant ja pøky.

15 Paty ja Cristo tø xku'o'jkindi jøts pøn jujky'ajttip ka'ap ja kø'øm t'ukjøø'ømit'ajtni ja chinaa'yin, ja Cristo ja ñijujky'ajtnidip pøn ja ojts kyuju-kpyøkiyidi jadigojk.

¹⁶ Paty øøts jade'en nga'uk'abaxni põni sã nidu'uk nidu'uk ja chinaa'yin tyiknaxy; Cristo paat øøts y'ijty n'abexy midì øø nga'øyja'wip ja yja', icyam ka'ap øøts ja'abi winmaa'ñ n'ukyiktuni.

¹⁷ Jade'ents idø'øn, põn ja Cristo møøt y'ity, jemyjaa'y ja'; ja tigøy winmaa'ñ midì y'ijty nmøøt'ajtyindip ka'ap ja y'uktuni, tum ja yjembyi dø'øn tø nbabøjknandi.

¹⁸ Kyø'ømdunkjøøjp ja Dios Teety jade'en tyumpy Cristo køjxp jøts ja møøt nnamyajya'ant. Jøts øøts ja ndunk tø xmø'øy ku niduki'iyi ja jaa'y ja Dios møøt ñamyaa'ñiyit.

¹⁹ Yide'en idø'øn nbiktaajkint, ja Cristo køjxp idø'øn ja Dios Teety niduki'iyi ja naxwii'ñit jaa'y møøt ñamyawya'anìyi. Ka'ap ja pøky tmøjpikta'aky. Jøts øøts xanipijky ya'atpi øy'ajtin.

²⁰ Paty meets xnijawit ku øøts ja Cristo xyikugajpxy'aty, sam idø'øn ja Dios Teety kø'øm jeexyip meets mminuu'kxa'agyi. Paty øøts idø'øn yide'en n'ane'emy ku meets idø'øn ja Dios ja mdsojkin xmøøgyøxt.

²¹ Niti pøky idø'øn ja Cristo tkamøøt'ajty xjats ja Dios Teety tyimñayide'en ja ttuñ sam ja møj pøkyjaa'y yiktuñim, jøts nyikupøjkindit sam ja Dios Teety ttsøky ku ja Cristo møøt n'ejtint.

6

¹ Jade'ents migu'uktøjk idø'øndi, niduki'iyi niwine'en adøm ndunk'ajtyindi ja Dios yja', n'amidøøpy meets jøts kidi nugo ja Dios y'øy'ajtin xyikwindigøjyidi midì ja tø mduk'ijxyidi midì ja tø mduknijawiyidi.

² Jabi jade'enxi ja køøm wya'añ ñøkyijpxy:

Ku ja xøøw ja jumøjt tpaajty nmadoow øts ja mji'iyin ja myajxin;

jøts ku ja yiknitso'ok'ajtin tpaajty winets me nbudøjkiyii'ñ.

Ixyam idø'øn ja mxøøw ja mjumøjt tø yja'tni jøts ja myiknitso'ok'ajtin tø tpatni.

³ Øy øøts idø'øn ja ndsinaa'yin nyiknaxy jøts øøts jade'en ja ndunkjøøjp nipøn xkada'abaxt.

⁴ Jade'enxi øøts idø'øn ne'egi nyiknigaxø'økwa'añ ku øøts ja Dios nmiduñ, tuda'aky øøts ngupiky'aty tuki'iyi ja ayo'on;

⁵ Tø øø nyiktsumy nyikwøpy; tø øøts ja jaa'y namay xamuky, møk øøts ja ndunk nyiknaxy kunim øøts ngø' ndeky kya'ukmajadakni; kawinaak tsuu øøts tø ngamaa'y tø nga'ity, ayuu øøts kawinaak xøøw tø nyiknaxy.

⁶ Njujky'ajtingøjxp øøts nyiknigaxi'iky ku øøts ja Dios nmiduñ. Jøts jade'en kyaxi'iky ku øøts ja Dios y'ixpøjkin ka'pxy nnija'wiyi jøts øøts nduda'akyjaa'y'aty. Tø øøts n'øyjaa'y'aty jøts tø øøts ja Espiritu Santo yja' nyiknigaxø'kmi jøts nayide'en øøts ja tsojkin ja pa'ayo'owin øy pøngapøn tø nmø'øy.

⁷ Ja tiy'ajtin ja janch'ajtin øøts tø nmøøt'aty, jøts ejtp øøts ja Dios ja myøk'ajtin xa'agø'duky xa'axajtuky. Ja ødyu'unin ja tiidyu'unin øøts tø nyiktuñ ku øøts ja Dios yja' tø nyikyø'øyi jøts ku øøts ja y'ayuujk nnitanaa'miyi.

⁸ Juunjaty øø nyikajxa'aky jøts nay jaayi øøts nyikpagajpxy. Øy øøts jaayi n'ukyiknimadya'aky jøts nay jaayi øøts wenk n'ukyiknimadyaknimi. Ja øøts juunjaty nyiknøjmi ku øøts nugo ndaayi jøts nay jaayi wyangøjmidì kuk øøts ja y'øybi tyiiby nngajpxy.

⁹ Juunjaty øøts ngayik'ejxkapy jøts nay jaayi øøts nyik'ejxkampi; ja øøts ja jaa'y juunjaty ja ø'jkin xukpaatwa'añ, jajujky'ajtp øøts idø'øn jade'en. Yikastigimøøpy øøts, ka'ap øø n'øøky.

10 Oy øøts njamay njatajy, xondaƙp øø nnayjawiyyi; ayoobi jaa'y øøts, ja øy'ajntints øøts nyajkpy; øy øøts niiti njagamøødi, jade'en øø nnayjawiyyi ejximdam øøts jeexyip tuki'iyi ndyimyoøt'ajtkøjxni.

11 Meets migu'uktøjkti, tiy'ajtingøjxp meets tø ndamigajpxy; tuki'iyi meets ja ndsojkin ja nba'ayo'owin tø ndamay'aty.

12 Øyimik idø'øn wine'enin ngondukt nbøktukt øts ja ndsojkin øts ja nba'ayo'owin. Meets idø'øn jade'en yjawi ne'egi mdumpy.

13 Sam ja u'nkteety ja myajnk tmigajpxy nayide'en meets nmigajpxwami ku ja mdsojkin ku ja mba'ayo'owin niwine'en xka'ama'at'attit. Tundi nayide'en waani sam øts tø nnajtstuni.

Adøm nikøjxp ja Dios yjujky'ajtyim

14 Kidi mjujky'ajtin xyiknaxti møøt pøn tkajanchja'widip ja Dios, jabi nijuunixi kyanamyayidit ja tiidyu'unin møøt ja tundigø'øyin, sam ja kudøø'kx'ajtin møøt ja kugoots'ajtin.

15 ¿Sudso dø'øn ja Cristo yja' møøt ñamyayidit ja miku' yja'? ¿Uk sudso ja janchja'wibi jaa'y møøt ñamyigu'ukwa'aniyit pøn midsepwajniyip?

16 Ka'ap ja yjujky'ajtin tyiknaxti tu'ugyi ja Dios Teety møøt ja dios midi kø'øm yiktsajstip. Ka'ap adøm njade'enindi jabi kø'ømx i Dios wyinaaã yide'en:

Pøni ma ja chøønidi jam øts ja nmøøtjujky'attit, jøts pøni mid i ja ñøjkxtip ejtp øts ja njamyøøt'attit; øts ja xdios'attip, jøts øts njaa'y ja'adi.

17 Paty ja yide'en yjaakwaaã:

Nanky'abikyidi,
kidi ja kya'øybi xyiktundi;
jøts jade'en ngupøktit,

18 øts meets xteety'atp, jøts øts meets n'u'nk'atp, jade'en idø'øn wya'aã ja Dios Teety.

7

1 Jade'ents meets migu'uktøjk idø'øn xnijawidit ku ya'at øy'ajtin ja Dios tø tyiktaã. Ja'agøjxp adøm idø'øn øy tsuj njujky'ajntint, ka'ap ja nne'kx ka'ap ja n'anmija'win nyik'ejtint pøky agujkp. Dios chø'jkingøjxp adøm idø'øn ja Dios ndamiojxint ja njujky'ajtin.

Sa ja Corinti jaa'y tyiktigatsti ja wyinmaa'ñ

2 Jja'gyukidik øts ndsojkin nba'ayo'owin! Jabi ka'axi meets niiti windigø'øyin tø xkapaatti øøts køjxp. Nipøn øø ngawindaay'aty, nipøn øø ngana'ixy.

3 Kidi meets ya'at xja'gyuki ku meets nugo nbøkñipiky, jabi jade'enxi tø nwa'aã jawyeen ku meets ja ndsojkin ja nba'ayo'owin tø ndamiojxy, jade'en ja tpatni møøt mee ñamyayi njujky'aty jøts møøt mee ñamyayi n'ookt.

4 Njøp'ijxy'ajtpy meets jøts amuum mee ndajotkujk'aty. Oy øøts idø'øn n'ayo'ombaaty janch jotkujk ø nnayjawiyyi.

5 Ja'ayip øø nja'jty ya Macedonia, ka'ap øøts ja poo'kxin nmøøt'aty, øy øøts magama jaa'y xmidsepwa'aã jøts øøts ja tsø'øgi nyikmajada'akwa'aã.

6 Yikjotjimbijtpy ja Dios ja yjaa'y, tøts øøts ja xyikjotjimbity ku ja Tiro tø yja'aty.

7 Kidi ja'ayip øø nugo ndyimdyajotkujk'ajtpy ku ja yam tø yja'aty, jabi ja'axi øø nayide'en ndajotkujk'ajtpy ku meets ja nekim mnimadya'akyiyi mjantyaxondajkip meets ja'. Jade'en øøts ja xamimadya'aky ku

meets xjapaatwa'añ xja'eixwa'añ jøts nayide'en tñigajpxmi ku meets rajotmay'øøky. Jotkujk øts idø'on nnayjawiwi ku meets xja'myech.

⁸ Øy ja nøky tø mja'atsyikjotmaadyøkiyidi midi meets øjts ndaniguexy, ka' øts ja ixyam sa n'ukja'wiñi. Njanch'ayojjii'ñimts øts idø'on ja jawyeen, ku øts n'ijxy ku øts nnijawi ku meets ja nøky yikxon ja jotmay tø mduktatøkiyidi tøts idø'on ja jade'en y'ukjajtkøjy sa n'ukjatka'am.

⁹ Jotkujk øts ixyam nnayjawiwi jøts kidi ja'ajip øts ndajotkujk'ajtpy ku meets ja jotmay møk'ampy tø m'atspaadyiyi, jabi ja'axi ø ndajotkujk'ajtpy ku meets ja mdsinaa'yin tø xyiktigach sam idø'on pyaat'aty. Tøxi dø'on xmidanidi ja jotmay'øøgyi sa ja Dios ttsøky sa Dios tkupiky. Jøts ku øøts ja nøky jade'en tø nguexy kidi ka'øy adøtspip øøts, kidi ayo'onip meets ja mdukpaatwajniyip.

¹⁰ Ja ayo'on midi tuda'aky yikupøjkp sam ja Dios ttsøky'aty, yiktigachp ja tsinaa'yin ja' jøts jade'en yikpaaty ja yiknitso'ok'ajtin. Pøn tkajanchja'widip ja Dios wenk ja tjawidi ja ayo'on jøts ja y'anmija'win tyikudigøydi.

¹¹ Øy meets ja ngajpxy tø m'atsyikjotmaadyøkiyidi, tuda'aky meets ja tø xkupiky sam ja Dios ttsøky'aty. jEjxtits inet ku ja mdsinaa'yin ne'egi tø tyigatsti! Tø meets ja ngajpxy ne'egi myikwinmaa'mbyaadyiyi jøts jaty tø xñigajpxti ti dø'on tø xundi; tø m'atsyikjotma'adyidi, tøts nayide'en xtsaachjawidi. Winets meets jaty xjadyimyigajpxwa'añ jøts nayide'en xiidyunwamidi pøni pøn idø'on tø mmidundigøydi. Ja' meets idø'on myiknigaxi'kpy ku meets tø mgatundigøy.

¹² Ja'agøjxp meets jade'en tø nnijayi ku meets ejtp nja'myech jøts kidi ja'agøjxp øts ja nøky tø nguexy ku øts ja'ayi ngajpxwejwa'añ pøn tø tyundigøy uk pøn tø yikmidundigøy. Pø ja'agøjpxi mee nnijayi jøts ja Dios xuknijawidit mabaat ja mba'ayo'owin myajada'akti ku øø xpa'ayøy.

¹³ Paty øøts jotkujk nnayjawiwi.

Jawaani jotkujk øø nnayja'wiyi ku ja Tito ya tø yja'aty jøts ku meets ja tø xpuðøki jøts ja jotkujk tyiknaxt.

¹⁴ Ka'ap ø nugo tø nwindaayi ja Tito ku meets øy tø mjaa'y'aty samdam øts ja jawyeen ndamimadyaajky. Ka'ap øts ja n'ayuujk nugo tø xyiktsø'ødyuñ, tiy ja tø pyidsimy.

¹⁵ Jabi mdsojkipxi meets ja ne'egi ixyam jawaani møj ku meets ja tuki'iyi tø xpadunguixy pøni ti jam mda'ana'amiyidip, jøts ku meets ja øy tuda'aky tø xwindsø'øgi.

¹⁶ Ka' xnijawidi mabaat øts nxondaajkin yja'aty ku mee nnijawi ku adøm øy tsuj nnayja'gyukiyindi.

8

Ku ja Pablo pudøjkin t'amidøy jøts yiktabadøkidit ja ayoobi jaa'dyi

¹ Ixyam meets migu'uktøjk nduknijawiwya'andi mabaat idø'on ja Dios y'øy'ajtin tø pyudøkiyidi ja Macedoniit janchja'wibidi.

² Øy ja sagasa tjamøjatti øyi myeeñ øyi pyikta'aky yjaga'etti may, jotkujk ja tø tyakoiti ja pudøjkin jade'en samdam ja møj kumeeñ jaa'dyi.

³ Tø ndyimy'ixy tø ndyimñijawi mabaat idø'on tø tyakti ja pudøjkin øy ja niti yjaga'uktaa'nxiniyidi.

⁴ Møk øøts ja tø x'amidøy, tyimdyanuu'kxaktip idø'on jøts pyudøjkin ja yikupøktit midi yiktabadøkiwyandip ja jaa'y midi nayide'en tjanchja'widip ja Dios.

⁵ Jinaxy idø'øn ja ne'egi tø ttundi yam øts ja jade'en ngajøp'ijxy'aty, jabi jawyeenxi ja Dios ñadyamiyojxiyidi jøtsnim øøts ja xpaduñ samdam idø'øn ja Dios ttanibiktaagi.

⁶ Ja'agøjxp øøts idø'øn ja Tito ndaguwanì jøts pudøjkin ja jam tjaakyikmukojt midì mee kø'øm mdsøjkingøjxp myakwampy midì ja jam tø t'ukyikmuksøøfi.

⁷ Agajpxy mee mbidsimy øy yjadyimysudso'ambyi: møk meets ja ajot'ajtin xmøødi møøt ja winmaa'ñ sudso yikxon xyaktit ja Dios y'ixpøjkin, jøts mwijy meets, wa'ats xjatti wa'ats xnijawidi, jøts møk mee xtsøky møk mee xpa'ayøy niwine'en øø nyam'aty. Patyxi øø nwa'añ ku meets agajpxy mbidsømit nayide'en ku ja pudøjkin xyaktit.

⁸ Ka' meets ya'at ndyimdyaguwanì, ja' øøts idø'øn nanky'ejxwajnip sa dø'øn ja Macedoniit jaa'y ja chojkindi pya'ayo'owindi jøts yiknijawit nayide'en jøts ku meets ja mdsøjkin ja mba'ayo'owin tyiyi yjanchi.

⁹ Mnija'widipxi jøts ku ja nwindson'ajtim Jesucristo ja y'øy'ajtin jadine'en tyikmajada'aky, jøts møk ja tsojkin møk ja pa'ayo'owin tmøøt'aty ku ja mguwanjatiyidi ja'agøjxp ku ja mdsøkyidi mba'ayøyidi, jabi jøtkujkxi ja y'ijty tyiknaxy møøt ja Dios Teety. Adømgøjxp ñanky'ayodøjkiyi jøts ja øy'ajtin jade'en nbaajitint Cristo køjxp.

¹⁰ Meets m'øy'ajtingøjxp øts idø'øn yide'en nwa'añ ku meets junkti'jyip ja pudøjkin xyikmuk'okwa'añ janch pe'tpy janch yiyi.

¹¹ Nayide'ents idø'øn ixyam xu'undit sam tø xyiktso'onda'akti. Tuki'iyi ja m'aaw ja mjoøjt xpikta'aktit kunim ja xyik'abaadidit, pøni mabaat nidu'uk nidu'uk myajada'akti.

¹² Jabi ka'axi ja Dios tuki'iyi t'amidooguixy, ja'axi ja y'ijxpy mabaat idø'øn nidu'uk nidu'uk chojkingøjxp tyaky.

¹³ Ka'ap jade'en xja'gyukidit ku meets ja mmigu'uk nduku'ayowidyøkiwya'andi;

¹⁴ Jabi nixem niyamxi dø'øn tuknax nmøøt'ajtindit ja pikta'aky. Exam meets xmøøt'aty midì yø ka'ejtxidip, ja'atp ja xøøw ja jumøjt jøts ku meets yø wyinaty mga'ejtximiyidi winets yø mmø'ømyiyidit. Jøts jade'en ñi'awich'att,

¹⁵ sam ja Dios kyajpxy wya'añ: "Pøn tyumøøt'ajtkijxpy ka'ap ja tø wyinda'anxiyi; jøts pønts waani tmøøt'ajtp, tuki'iyi ja tø ttapatkixy."

Tito jøts ja myigu'uktøjkti

¹⁶ Ja' øts Dios ndamøja'wip ku meets ja Tito nayide'en mba'ayøyi sam øts.

¹⁷ Tø ja tjanch'øyjawi ku meets ja ndanigaxwa'añ, tøyim ja jeexyip ttuñ kø'øm mdsøjkingøjxp jabi mjanch'ejxwajnipxi meets ja'.

¹⁸ Ixyamts ja Tito møøt nguexy tu'uk adøm nmigu'ukti midì øy yiknimadyakp ma jaty ja janchja'wibi jaa'y ñamyukyidi, jade'en ja yiknijawi ku ja øy tiy tñigajpxy ja nitsoojkin ayuujk pøni ma jaty ja tø wyidity.

¹⁹ Kø'ømyi ja Macedoniit jaa'y tø twi'ejxti jøts øøts yø møøt ndu'unt jøts øøts yø møøt njaakyikmukojt ja pudøjkin. Ja'agøjxp øøts yø'øbi tunk nduñ jøts ja nwindson'ajtim jade'en yiktawindsø'øgit jøts jade'en meets xyiknigaxø'økt ja mdsøjkin ja mba'ayo'owin.

²⁰ Ja nabyagajpxi dø'øn kayiktsojpk ku øøts ya'at pudøjkin nyikmuky.

²¹ Paty øøts niti taa'y ngayiktuñ øy øøts yø nminaxt Dios wyingujkp jøts jaa'y wyindump.

²² Nayide'en øøts ixyam ndamigaxi jadu'uk adøm nmigu'uk midì ja Dios yja' øy tsuj pyaduujnip jøts ku meets ja nayide'en mdajotkujk'ajtmiyi.

²³ Ku pøn jam tyiknidøøwit ti dø'øn ja Tito tyumpy, jade'en x'adsojimbettit jøts ku øts yø nmigu'ugi, øts nmøøtumbi yø', øøts idø'øn ndumpy ja pudøjkin pøni pøn tsojpk ja Dios. Jøts pøni yiknidøø'jimyidip ti yø tyundip yø jadu'ukpi migu'ukti, jade'en x'adsojimbettit ku janchja'wibitøjk yø tø kyexyidi jøts ku ja Cristo yø jade'en twindø'øgidi.

²⁴ Paty ø nwa'añ ku jam mbaadiyidit yikxon xuk'ejxtit xuknijawidit sã meets ja tsojkin sã meets ja pa'ayo'owin xmøø'taty jøts ñigaxø'økt jade'en jadits meets ndajotkujkaty.

9

Ku ja Pablo tniagjpxy sudso ja pudøjkin yjaakmukt

¹ Ka' pyaãt'atyiwi ku meets ya'atpi winmaa'ñ jeexyip ndanijayi,

² jabi nnija'wiñipxi øts ku meets ja pudøjkin jatyi xyakøjy. Jotkujk øts idø'øn ja Macedoniit jaa'y nniimay'etti ku meets junkti'jyip ja pudøjkin xyakwani jøts jade'en namay ttunwamidi sã me tø xunjøpi.

³ Ja'agøjpx øts ya'at migu'uktøjk ngaxti jøts mdukja'myatsidit ku ja pudøjkin xyik'awejxtit. Jøts øts jade'en ja n'ayuujk tyø'øt sã me øts yø tø ndamimadya'akti jawyeen.

⁴ Ja kuts jotmøñ ja Macedoniit jaa'y nmøøtnøjkxt jøts ja jam m'atspaadidit yam meets jam wyinaty niti xka'awixy. Tsø'ødyuñimts ja tya'ant ku wyinaty jade'en yjaty yam meets øy tø n'uknimadya'aky. ¿Jaa kidi meets ja tsø'ødyu'unin jawaani møj mbaadiyit?

⁵ Yide'ents øts yjawi ne'egi ndanibiktaagi jawyeen ya'at jaa'y m'ats'ejxidit jøts jade'en mjaakpudøjkigyoyiyidit jøts kya'pxt ja pudøjkin midit meets tø xni'adsowi. Jøts jade'en wyinaty jam mgø'ømdsojkin xyiknigaxø'økti jøts ka' mwa'andit ku øøts nugo ndyimyajada'aky.

⁶ Ejtp ya'at xja'myats'ettit: Pøn waani nepp, nayi waani ja tpiky ja pyikta'aky; jøts pøn may nepp, nayi may ja pyikta'aky ja wyimbijty.

⁷ Kø'ømdsøky'ampy idø'øn ja pudøjkin xyaktit. Kidi adsep'amip ja xu'undit jabi tsojkipxi Dios ja a' pøn xondaajkingøjpx tyajkp ja pyudøjkin.

⁸ Maajyip ja Dios jøts tkaxt køx kida'ak ja kunuu'kxin jøts jade'en xmøø'tat'ettit pøni ti tsojkip, jøts nayide'en ja mmigu'uk xjaaktanipaattit tuki'iyi ja pudøjkin.

⁹ Pø yide'enxi ja Dios kyajpxy wya'añ:

Pøn ttabajaa'ñaxp ja ayo'on, pyudøjkip ja ayoobi jaa'y ja', jøts ja y'øyjaa'y'ajtk niwindem ja kyagugøxi.

¹⁰ Abaadi ja Dios tyaky ja jujky'ajtin jøts adøm jade'en tuki'iyi nmøø'tajtkøjxint jøts ja nmigu'uk nayide'en ja pudøjkin ndanipaajtint.

¹¹ Jøts meets nayide'en køx kida'ak xmøø'tattit ja øy'ajtin jøts øy pøngapøn xmo'odit. Ja pudøjkin midit meets xanigaxip, ja Dios ja tyamøjawidip tyagunuu'kxjawidip ku ja wyinaty yiktanipaatti.

¹² Kidi ja ayip adøm ja nugo ndabudøkiwya'añindip midit ja ka'ejtxidip, jabi ja'axi nayide'en yiktump jøts ja Dios ja tkajxak'ettit.

¹³ Ja'agøjpx ja Dios ja ttamøjawidit ku meets tiy ka'pxy xnimadowdi ja Cristo y'øgyajpxy y'ømyadya'aky sã me nayide'en ttamøjawidit ttangunuu'kxjawidit pøn jatyi wyinaty paajtmiyidip ja pudøjkin.

¹⁴ Jøts meets ja nay jaayi mgugajpxajkmiyidit jabi tøxi meets ja Dios ja myøj'øy'ajtin wyinaty xyiknigaxø'økti.

¹⁵ ¿Janch møj ja Dios ku ja møj kunuu'kxin tø xmøø'øyim! ¡Ka'ap aaw ayuujk yikpaaty sudso ja nniimadyajkin!

10

Sa ja Pablo yikutuky ku ja nwindson'ajtim tkudani

¹ Tyimgyo'om o'ts id'o'on nuu'kxa'aky nayide'en sam ja Cristo jeexyip ko'om tuuñ. Jade'en ja kajpxy yo'oy kuk meets nnijayi, tyimy'ap meets ja no'ky ndanigaxi, jots ka'ap o'ts nayide'en nja'a'y'aty ku o'ts ja jaa'y m'o't nnabyaadyi, ja ts'o'ogik o'ts nyikmajadakpy.

² Paty nwa'añ, ku mee wyinaty n'ats'ixy jots o' xkayik'amboktit ku o'ts ja jamyi n'uknibido'knit pon ja y'aaw ttakajpxtip ku o'ts ng'o'mwinmaa'n nyiktuñ sam oy pon jaa'yin. Ka'ap o' pon nds'o'ogi poni jade'en ja ttsokti.

³ Janch tiy id'o'on ku o'ts nbojkpitudibijaa'yi, ka'apts o'ts mibaat ja poky x'ana'amt. Ja Diosxi o'ts ja yja' xuu'moy'ejtp.

⁴ Ja nmok'ajtin o'ts, ka'ap ja poky agujkpy pyidsimy, Dios wyingujkp ja choon' midit tyikudigoo'py pon ja Jesucristo m'o't kyanamyayi.

⁵ Jade'ents id'o'on, nyikudigoo'py o'ts ja katiiby kajpxy midit nugo nankmyo'tjokiyip ku ja Dios ja yja' tkananky'ejxwajniyi. Jawyeen o'ts ja Cristo nduknijawi sa ponjabon wyinmay jots ja tu'ugyi ja yja' tpaduujnidit poni yikutujkpy ja jade'en.

⁶ Ndiidyu'ump o'ts pon ka'pxy tkabadu'undip ya'atpi ana'amin ku meets wyinaty to' xpadunguixy jawyeen.

⁷ Ku mee x'ixxy ku nds'o'ogi ka' xnijawidi sam ndyimyjaa'y'aty. Ponjabon wya'andi ku ja Cristo yja'atyidi, nayide'en id'o'on tnijawidit ku o'ts ja Cristo xja'ajtimi.

⁸ Wan meets jam winaagin mwa'añ ku o'ts ja nwindson'ajtim kyutujk nugo ndyimyamadaja'aky, niti ngapokyjawi jabi ko'omxi ja nwindson'ajtim tyajky ja kyutujk jots meets jade'en ja mjanchnja'win myo'jit, jots ka'ap meets ja mgudig'o'oyin n'ixajyi jade'engojxp.

⁹ Kidi xja'gyukidi ku meets yo' no'ky nugo nda'ads'o'ogiywa'añ.

¹⁰ Jade'en ja kajpxy yo'oy ku tyimy'ap ja n'ayuujk nguexy jots ja jaayi ko'om nga'uknitanaani, ka'abik o'ts oy tsuj ja madyajkin nmoo'di.

¹¹ Pon id'o'on yide'en ja ayuujk tyiky'o'opy nayide'en id'o'on ja tnijawidit ku o'ts nayide'en ndyimyjaa'y'att meets windump sam o'ts n'ayuujk nguexy jagam.

¹² Ka'ap oo' nnay'a'ejxiyi jots oo' ko'om nnay'agajpxiyit sam jam muum winaagin tuundi. Ja kaja'gyukin ja yikmajadajktip ku ja nixem niyam ko'om yjanchn'uknay'agajpxyidi.

¹³ Nijuuni o'ts ja kutujk ngayiktuñ midit oo' ngamoo't'ajtpy. Ja Dios o'ts id'o'on xuknija'wip mabaat id'o'on ja tunkjo'ojp yja'aty, jots nay ja' o'ts to' xuu'm'o'oy ko'om ku meets jam to' n'atsnija'aty Corinto.

¹⁴ Ku oo' nwa'añ ku o'ts ja kutujk nmoo't'aty jots meets n'ana'amt, ka'ap o'ts ng'o'm ja' nyiktuñ, po' jade'en ja jeexyip yjaty kuk o'ts jam jawyeen jeexyip to' nga'ats'och. Jabi meetsxi jawyeen ndanija'jt ja ogyajpxy ja omyadya'aky sa ja Cristo y'o'y'ajtin xukpaajtant.

¹⁵ Ka'ap oo' ndso'ky jots o'ts nugo nnadya'agajpxit ja wenk jaa'y tyunk ja kajpxwejin midit to' myikmo'odi. N'awixy'ajtpy o'ts ku meets ja mjanchnja'win winjaa windsojk myo'jit myayit mabaat id'o'on pyaat'aty jots mabaat o'ts nayide'en nmajada'aky ku o'ts jam ndu'unt ma' meets jam.

¹⁶ Xjats o'ts jade'en ngajpxwa'kxt ja nitsoojkin ayuujk abiky'et abikyajp meets mjixko'om, jots niijuuni o'ts nganadya'agajpxit ja wenk jaa'y'y'ixp'o'ojkin.

¹⁷ Poni jaa' pon n'ay'agajpxwa'añ ko'om, ka'ap jade'en pyaat'atyiyi, ja Dios id'o'on ja y'o'y'ajtin ja ne'egi ja'ayi y'agajpxip.

18 Ka'ap y'øbyidsimy ja jaa'y pøn kø'øm nay'agajpxiyip, ja'ats ne'egi øbyidsømp pøn ja nwindson'ajtim t'øjja'wip jøts ja t'agajpxy.

11

Pablo jøts pøn ñadyijyi nañikajpxidip Jesús kyudanaabyi

1 Meets migu'uktøjkti, wan meets mwa'ant ku nugo mo'tpìn nmadya'aky, ja'gyuki meets waani wan øts ngajpxy t'ukyiknaxy midì n'am njotp nmøt'ajtpy.

2 Øy mee n'ama'at'aty ja Dios øts idø'øn jade'en kø'øm xyik'adøtsp; jabi tøxi ja Cristo yja' tu'ugyi ndukpabøjkidi jøts ku meets ja ndawinguwaw'iwya'añ. Wa'ats meets jam nyiknøjkxwa'añ, sam pøn ja pøky tkidyimy'ijxy'ajtipnim.

3 Jade'en sam ja Eva ja tsa'a'ñ wyindaayiyøø, wan meets yjawi nayide'en myikwindaay'atwa'añ jøts mwinmaa'ñ tyigatstit jøts jade'en mga'uknadyamiyojxniyidit ja Cristo.

4 Jam pøn ja Cristo y'ixpøjkin wenk tngajpxip, ka'ap nayide'en sam øøts nnigajpxy; jøts meets ja Espiritu Santo yja' nayide'en wenk xnija'wiyi, tigach meets ja yiknitsokpi ayuujk xnijawidi, ka'ap nayide'en sam øø nnigajpxy.

5 Pøn jade'en myikwinmaa'nmya'jtidip ka'ap øts ja mabaat xyik'amutskidi øy ja nugo ñadyijyi yjanañikajpxiyidi ja Jesús myøjkudanaabyi.

6 Øy øts n'aaw n'ayuujk øy tsuj ngamøø'taty, ka'ap øts nwinmaa'ñ ñayide'eni. Tø øøts yø nyiknigaxø'kni ku meets o tigati tø ndabudøki.

7 ¿Tø øts idø'øn ndundigøy ndejint ku meets jadi'iñi tø ndukmadøy ja nitsoojkin ayuujk ku ni tu'uk centabi tø nganibiky, jøts øts jade'en ayo'ijxyim njaty nugo ku mee xpiky ja øy'ajtin?

8 Wenkpi janchja'wibitøjk øts ja myeeñ tø ngupøjkidi ku meets janch nduknijawiwya'añ ja øy'ajtin.

9 Jøts ku øts jam n'uknajxy ma meets jam, ka'ap øts jam ojts pøn nyik'ayø pøni ti jaty ø xka'ejtixip; jabi ja nmigu'ukxi øts ojts xujnidi ja may'ajt pøn tso'ondip jam Macedonia. Jade'ents mee ka' nyikjotkixy, jøts ka'ayim meets nugo nyikjotkøxwa'añ, jade'eñim ø nyiknaxt sayim ø nyiknaxy.

10 Nayide'en sam øts ja Cristo tyiy'ajtin njanchja'wiyi nayide'en ø njawi ku meets nnøjmi, ku jam Acayi y'etjotp ni tu'uk ja jaa'y jam, pøn ø xuk'ixmatsp ja'abi xondaajkin ku øts Dios yja' nnigajpxiyi.

11 ¿Jadits øts n'ayuujk jade'en nyikwa'añ? ¿Ja'agøjxp idø'øn ndejint ku meets nga'uktsojkini? Wa'ats ja Dios tnijawi mabaat øts ndsojkin yja'aty meets køjxp.

12 Jade'eñim øts yø ndunk nyikyø'øy'ett jøts ja kyamøj'attit pøn ñadyijyi nañikajpxidip ku ja nayide'en tyumidi sam øøts.

13 Yø'øbi jaa'dyi nugo yø tyaay'atti ku ja Cristo tkudanidi.

14 Ka'ap yø kumaap nja'wa'ant, jabi kø'ømbaatxi ja miku'windsøn Satanás ñanky'ijxyiyi ejximdam ja Dios y'ankilis kunuu'kxy.

15 Paty nayide'en yø tyumbi ñanky'ejxmiyi samdam ja øybi tumbi jaa'y. Ja chinaa'yin ja yiktatiidyu'undip jade'en sam ja pyaat'atyidi.

Sa ja Pablo y'ayo'ombaaty ku ja Jesús tkudani

16 Ixym mee nnimaagyojmi jøts kidi nugo mwinmaydi jøts ku nmø'øty. Pøni jade'ents xja'gyukidi, wants øts jade'en tmadya'aky jøts øts nadyijyi namyikajxibim nnayjawiit.

17 Kidi mee mwa'añ ku øts ja nwindson'ajtim jade'en xyikmadya'aky, jabi nugo mo'tpixi øts idø'øn, ku njanch'uknay'agajpxiyi.

18 Jaaxi jaa'y pøn nadyamikajxidip ja ñaxwii'ñit tsinaa'yin, wants ø nayide'en nduknamyikajxmiiyi.

19 Jabi møj ja'gyukipxi meets mjaa'y'aty, patyts meets sa xkatijy pøn mo'tpa'an madyakp.

20 Ja' mee ne'egi m'øjja'wip pøn jiyujkin myiktuujnidip, pøn mwindaay'ajtidip, pøn mnijuu'yniyidip, pøn mdekpya'an'ajtidip. Mgupiky'ajttip ja' øy sagasa myiktunidit.

21 i'øy øts ixyam nnabyøkyjawa'iyi ku øts jade'en tøn gajaa'y'aty kudam meets yø' ne'egi jade'en x'øjyawii!

Pøni jaa pøn ap tyimñayjawi'iyi, xmaapy øts ja', øy øts nayide'en njaa'y'att.

22 ¿Ja hebreo ayuujk nadya'agajpxidip? Nnija'wip øts ja nayide'en. ¿Israelit jaa'y ja'adi? Nayide'en øts. ¿Y'apteety'amøj'ajttip ja Abraham ja'? Nayide'en øts ja n'apteety'amøj'ajtmii.

23 ¿Jade'en ja wya'andi ku Cristo tmidundi? Jawaani øy øts ja ne'egi nmiduñ, øy øts jade'en ja tsojkin njagamøt'aty jøts ø nnay'agajpxit kø'øm. Jawaani møk øts ndunk ne'egi tøn nyiknigaxi'iky yam yja' ja ka' ne'egi ñigaxø'økti. Tø øts ngu'ayo'ombaadi ja ndunkjøj, ne'egi ka'ap ja'adi. Ne'egi jawaani may ojk øts idø'øn ja tøn nyiktagudsumi, jøts kawinaak ojk øts ja o'jkin tøn n'ixy jaayi wingon xwindani.

24 Magoxk ojk øts ja ayo'on tøn ngupiky midii øts nmigugajp israelit jaa'y tøn xmø'øy sam ja kyutujk wya'andi ku ee'pxmajk taxujk ojk nyikwøpy.

25 Tigøøk ojk ø tøn nyikipwyøpy, jøts tu'uk ojk tøn nyiktsaaga'ach. Tigøøk ojk øts ja nbarki tøn meyj'okida'aky. Tu'uk ja xøwøw tu'uk ja koots nyiknaxy jam mejkyujk'am, ja kipy pyidasi, ja puu' pyidasi øts iiy xjaakyknøw'ingamp.

26 Jagambaat øts kawinaak ojk tøn nwidity jøts jam muum ja møj nøgom xyikjø'øtwa'añ, jøts ja jaa'y muum xwimaatswami. Ngø'øm migugajp paat øts xni'adani xuu'adani sam nayide'en y'adøtsmidi ja wenkajp jaa'dyi. Nbatpy ø nayide'en ja ayo'on møj kajpjoet samdam abak etjoet uk jam mejjjoet. Nayide'en øts ja xka'ødyumidi pøn ñadyijyi Jesucristo janchja'wibidi nañikajpxidip.

27 Tøn nduñ mabaat øts ja ngø' ja ndeky myajada'aky, øy øts ayo'on ja xadukpaaty; kawinaak ojk ø ngamaa'y nga'ity; ayuu adøøtsi tøn nyiknaxy kawinaak ojk; tøn ndanaxy ja tep ja xux, ni ja nwet ni ja nnaamy tka'ukpatni.

28 Øy øts idø'øn jade'en ya'atpi ayo'on njapaaty uk midii jatyts njayiknaxpy, møjip mayip øts ja njotmay ku øts ja njotmay'ati jabom jabom pøn jaty tjanchja'widip ja nwindson'ajtmii.

29 Pøni jaa pøn ja yjanchja'win kamøj, janch pamaa'yin ø nnayjawi'iyi. Pøni jaa pøn wenkpi winmaa'ñ tpanøjknidip, møk øts ja n'ayooji, møk øts ja ngudsø'ødyuni jøts øts ja nugo njantya'ambiky.

30 Pøni janchpaat'ajtipts idø'øn ja nay'agajpxi ja ngamøk'ajtipts ø ne'egi nadya'agajpxip.

31 Ja Dios Teety midii ja nwindson'ajtmii Jesucristo tyeety'ajtpy midii paat'ajtiyp xemikøjx yikmøjawit yikunuu'kxyjawit, wa'ats ja tnijawi ku øts ejtp ja tyiiby ja yjanchpi nnigajpxy.

32 Jøts ku øts nnaxjy jam Damasco kajpjoet, jam dø'øn tu'uk ja windsøn midii tmidump ja yjadu'ukpi møj windsøn Aretas, ja Damaskit windsønøts idø'øn ojts t'ane'emy ja tyumbitøjk jøts ja tyimyik'adujkøxtit ja tuu' ma jaty ja kajp yiknidøki jøts øts ja xmatstii jøts ø ndyimyiktsu'umt.

33 Ti maṣts ja Dios xuk'ixmajtsint, jabi jamxi nguejky, ma ja moḡ pøch jam, midi ja kajp nawidejtíp. Øts nmigu'uk xkatstiidyoø mutsk ventani agø'øm kachjøtpy. Jade'en øts idø'øn ja xkapøktøø.

12

Sa ja nwindson'ajtim tnanky'ijxyiyi ja yja' Pablo kyumaa'yjøtpy

1 Nnija'wíp øts ku niwine'en kyajami ku nnay'agajpxa'ant kø'øm. Meets ukja'gyuki, kuwani øts idø'øn nnigajpxt sudso nwindson'ajtim ja yja' tø tnanky'ijxyiyi ku ø kø'øm nnay'ijxyiyi kumaa'yjøtpy.

2-3 Ndyimy'ijxy'ajtpy tam øts tu'uk ja jaa'y midi tjanchja'wíp ja nwindson'ajtim Jesucristo midik myakmajkts jumøjtíp ojts yikwaanijkyxyp jap tsajpøtpy. Pø sudso idø'øn ja yikwaanijkyxyp, pø moøt ñe'kx uk nugo y'anmija'wints idø'øn ja nøjkxp Dios tu'ugyi tyimy'uknija'wíp. Ja'ayi ø nnija'wíp

4 ku ojts yikwaanijkyxyp jap tsajpøtpy ma ojts tmadøy ja kajpxy ja madya'aky midi ka' pøn nugo ñiyiktukmadøy.

5 Ti kanadyamiguexyim idø'øn ja yjawi ku øts jade'en sam ja jaa'y, ka'ats øts nnamyikexyiyi pø wanims øts ja ngamøk'ajtim nnadyamikexyiyi.

6 Øyims øts kø'øm njanchjanañigajpxw'a'añiyi, pø ka'axi ja ñugo kajpxy, pø tiy'ajtinxi øts wyinaty nnigajpxyp; ka'ats øts jade'en nduñ jøts kidi pøn nugo wyinmay jøts ku øts ngamaabyi jøts ku øts ka' njade'en sam pøn yamts øts idø'øn ja jade'en ngatuñ sam ja wyinmaydi.

7 Kawinmaañixi dø'øn ja chuji midi øts ja nwindson'ajtim xuk'eix ngumaa'yjøtpy; jøts øts ja nganadyamikaxiyit, winets nja'wigyejky adsu'jky nikøjxp yjajkejky samdam ja kujp xkuu'mint. Ja miku'windsøn Satanás ja tyunkjøøjp jade'en ñanky'eixip.

8 Tigøøk ojk øts ja nwindson'ajtim ojts njanch'amidøy jøts tyiknaxt ja jajin ja tøø'yin;

9 jøts øts ja nwindson'ajtim yide'en ja'ayi x'adsøy: "Ja ndsojkin ja nba'ayo'owin mets ja'ayi mbudøkiyip; jabi jade'enxi øts nmøk'ajtim ne'egi ñigaxi'iky ku nbudøki pøn ja kyø'øm møk'ajtim ka'ejtixip." Jade'en ja wya'añ. Patyxi øts ja ngamøk'ajtim ndajotkujk'aty, jøts jade'en ja Cristo yja' kyaxø'økt.

10 N'øyja'wíp øts ja kamajadajkin, n'øyja'wíp øts ku nyikjemnøjmi nyiktenøjmi uk ku tigati xka'ejtxi, uk ku øts Cristo køjxp nyikmi'ambiky ngu'ayo'ombaaði. Ku nnayjawiyi nmøk'ajtim kyal'ity jats idø'øn nwindson'ajtim ja myøk'ajtim tyik'awa'añ jøts øts ja xuk'ajot'aty.

Ku ja Pablo tpamay tpadajy ja Corintiit janchja'wibidi

11 Janch mo'tpin ø tømadya'aky ku kø'øm tøm nnay'agajpxyiyi, kø'øm meets tøm xyikjaty jabi meestsxik idø'øn jeexyip øy tøm xnimadya'aky jøts øts jade'en jeexyip kø'øm tøm nganay'agajpxyiyi. ¿Tyimyaabaat ja ndejint yja'atti ja wyejin ja kyajin pøn ñadyijyi myøjkudanaabyi'ajtpy ja nwindson'ajtim? Øy øts idø'øn mabaat nguidyimjaty ka'ap øts ja mibaat xwinaxtit.

12 Ku øts ja ndunk tøm nyikyø'øy ma meets jam ejtp øts nnanky'ijxyiyi ku øts idø'øn ndyimgyudanaabyi'aty ja nwindson'ajtim. Ejxpajtingøjxp milagrikøjxp øts idø'øn ja n'ødyunk tøm x'ejxidi tøm xnija'wiyidi.

13 Pøni mwandipts ku meets ka' tuknax myik'ødyuñ sa øts ja jadu'ukpi n'ødyundi ma jaty ø nwidity ma jaty ø nbaatti n'ejxti ja jadu'ukpi janchja'wibidi, janch idø'øn mwa'andi. Xmøøyimdsik meets jam ja kaaky ja maadaajk kuk øts jam n'ats'øjch. ¡Maa'kxti, kidi xka'øyjawidi ku øts yide'en nwa'añ!

14 İxyam nnay'a'ejxiyi nnay'abaadiyi ja' ku meets myidigøok ojk n'ats'ejxwa'añ. Ka'ap meets jam nugo n'atsyik'adujkti'wya'añ. Jabi ka'axi meets ja mbikta'aky n'ixaajyi, meetsxi dø'øn ja m'øy'ajtin ja'ayi n'ixaajyip. Yiknija'wipxi ku ja u'nkteety t'ixa'adi ja meen ja jingaap midi ja y'u'nk nidsina'adyip jøts ka'ap ja y'u'nk ne'egi ja tyeety ja yujky'ajtin tjotmay'attit.

15 Xondaajkin ø nbaatp ku mee ndamiyoxxøxt ja n'aaw ja njoajt mjanchja'wingøjxp; øy meets yjawi xjagatsøky samdam meets ndsøky.

16 Øy winaagin tjaja'gyukidi ku meets jam nugo ngayik'adujkti, jade'en ja wya'andi ku mee nugo tø nwin'iiñ.

17 ζTø meets ndejint ndawindaay'aty ja nmigu'uk pøn jaty meets jam tø ndaniguexy?

18 Kø'øm øts ja Tito n'ane'emy jøts m'ats'ejxidit jøts øts ndamigajxiyiñ jadu'uk adøm nmigu'uk. ζTits, mwindaay'ajtidi ja Tito? ζTi ka' x'ejxti ku øøts tu'ugyi nwinmaa'ñ nyikyø'øy jøts tum jade'en øøts n'øyjaa'y'aty?

19 Wan meets jade'en mwinmay ku øø nugo nnagyubøkiyi. Ka'ap yjade'eni. Wa'ats ja Dios tnijawi ku øøts Cristo køjxp ja ndunk tø nyikyø'øy, jøts meets jade'en ja mjanchja'win myøjit.

20 Ku øts jam wyinaty n'ats'øch jade'en ø njøpawi ku meets yjawi øy ngapaatt samdam øts ja ndsojkin njadyimyjammøt'aty. Jøts mee nayide'en xka'øyja'wyimit ja njaa'y'ajtin samdam meets xjadyimyjatsøky'aty, ku meets xka'øyjawit ja kajpxwejin midi wyinaty nyajkpy. Jabi jade'enxi nnajtsjawi ku meets wyinaty mga'uknamyaa'niyi nixem niyam, jøts xyikmøjtøjkiñidi ja windii'ñ'ajtk, ja aki, ja tami'ama'at'ajtk, ja nabyagajpxi, sam nayide'en ja namyikajxan jøts nixem niyam mga'uknamyimado'oniyidi.

21 Wan øts ja Dios yjawi nmidsø'ødyu'unt ku meets jade'en mjaa'y'ajtni. Wan meets ngujiyt nguyaaxit ku meets wyinaty ne'egi tø xpadøjkiñi ja mga'øchinaa'yin midi ixyambaat mgamajtstu'utwandip. Tum ja axøø'kpi tum ja yigaappi m'amp mjotp mmimajadajkidip.

13

Xjats ja nøky y'abaadi jøts ja kajpxwejin ja kajpxpoo'kxin y'ukyikyajkni

1 İxyam mee myidigøok ojk n'ats'ejxwa'añ, jøts ku øts ja tundigø'øyin jam nyiktiidyøkit pøni pøn jam nugo tymidyunk'ajtnidip ja pøkyunk, tsokip ja a'ejxnajpxi namajtsk uk nidigøok pøn ja wa'ats tnimadyakøxtip sa y'ejxi tyiyi.

2 Ku myimajtsk ojk n'ats'øjch n'ana'amdi øts ja' pøn jam yjawi wyinaty pøky agujkpy tymchinaañidip. Xyamts nwa'añ ku nnøjkxt jadigojk ku nayide'en nbatkojmidiit nay ja' pøn ø tø n'ana'amdi, niwine'en øts ja ayo'ejxin ngamøt'att. Pøni jamidits pøn ja chinaa'yin tyik'ejtnidip pøky agujkpy nayide'en ja pya'at'atyidi jøts tiidyu'unin tyagida'agidit.

3 Jade'ents meets idø'øn xajotkujk'att ku øts ja Cristo xyikmadya'aky jøts meets jade'en mgawa'ant ku ja' kyajotmøjki; jabi ñanky'ejxipts ja myøk'ajtin ma meets jam.

4 Ja kyamøk'ajtin kyu'o'jki kruskøjxp, xemikøjxpts ixyam yujky'aty Dios Teety myøk'ajtingøjxp. Nayide'en adøm idø'øn ja kajotmøk'ajtin njagyejpyim sam ja yjajty. Ku ja xemikøjxp nmøøtjuky'ajtni ja nwindson'ajtim jade'ents ja Dios Teety tyaky ja møk'ajtin midi meets ndabudøjkip.

5 Yikxon meets kø'øm nabyawinmayi, ζmjanchpadundip idø'øn ja mjanchja'windi? ζJa ka' xja'myatsti ku ja Cristo xmøøt'atti? Uk nugo meets idø'øn mnañikajpxyiyi Cristo janchja'wibi.

⁶ Jade'ents øø nwa'añ jøts meets xnijawit ku mee ka' nugo nwindaa'yi ku øøts ja Cristo yja' nbaduujni.

⁷ N'amidøøpy øøts ja Dios jøts meets øy mjaa'y'att. Kidi ja'agøjxpij jøts øøts jade'en ja n'ana'amin myøjtøkit. Ja m'øy'ajtinxi øøts ja'ayi n'ixaapy. Padun meets ja', øy øøts agajpxy njagabidsimy.

⁸ Ka'ap øøts ja møk'ajtin nmøøt'aty jøts øøts nwindson'ajtim ja tyiy'ajtin ngajpxwe'jtiti, ja' øøts ndunkjøøjp'ajtpy jøts ja yiknigajpxt tyi ka'pxy.

⁹ Ndaxonda'akp øøts ku meets ja møk'ajtin xmøøt'att øy øts ja ngutujk njagayiktuñ. Ejtp øøts ja Dios n'amidoo'ett jøts meets ja mjanchja'win jøts meets ja mjujky'ajtin yikxon y'øyit yikxon tyuda'akt.

¹⁰ Namga'anim ø ndsøñ ku meets ya'at nøky ndanigaxi jøts ku meets wyinaty n'ats'ixy ka'ap xjawidit møk ja tiidyu'unin midi ø tø xaguwan ja nwindson'ajtim. Ja'agøjxp øts ja kutujk tø xmø'øy jøts meets ja mjanchja'win myøjit jøts kidi ja'agøjxpij øts ja nmøødi jøts meets ja kudigø'øyin xpaatti.

¹¹ Meets migu'uktøjkti, øy meets. Yikxon meets ndamidsøky xyiknaxtit ja mdsinaa'yin, ixa'adi ja øy'ajtin ja tuda'aky'ajtin, nankyjotkujk'atidi nixem niyam, yikxon mnamyigu'ukwa'anidit yikxon mnamyayidit, jøts jotkujk x'ejxtiti. Winets meets ja Dios xemikøjxp mmøøt'etidit midi tyajkp ja jotkujk'ajtin midi tyajkp ja tsojkin ja pa'ayo'owin.

¹² Nagyajpxpoo'kxidi nixem niyam sadam ja Dios ttsøk'aty.

¹³ Niduki'iyi ja janchja'wibidi midi øøts ixyam møøt, nayide'en ja tkaxmidi ja kyajpxpoo'kxin.

¹⁴ Paatti kupøkti ja nwindson'ajtim Jesucristo kyunuu'kxin, nayide'en ja Dios Teety chojkin ja pya'ayo'owin jøts nayide'en ja Espiritu Santo nima mgamajststu'udidit. Tiigvajpxy idø'øn, jade'en idø'øn yjatt.

JA NØKY MIDI JA PABLO TYANĪGAJX JA GALACHT JAA'Y

Ku ja Pablo tnijayi pøn tjanchjā'widip ja nwindson'ajtim Jesucristo yja' jam Galacia

¹ Øts idø'on Pablo'ajtp, nwindson'ajtim ngudanaapy, nipøn jaa'y ø tø xkakexy, ja Jesucristoxi ø kø'øm tø xpikta'aky møøt ja Dios Teety pøn ja nwindson'ajtim kø'øm tø yikjujkyikyiyi jap oo'kpi y'agujkpy.

² Ixyamts øts møøt niduki'iyyi ja nmigu'uk janchjā'wibitøjkti, meets ndanijayi ya'at nøky mā jaty xpadumidi ja nwindson'ajtim yja' jam Galacia etjotp.

³ Paat meets ja øy'ajtin ja kunuu'kxin midi ja Dios Teety yajkpy møøt ja nwindson'ajtim Jesucristo,

⁴ pøn nagyiyajkiyøø jøts adøm nbøky ja xku'o'jkandi jøts kidi ja axøøkpi tsinaa'yin mibaat xmimadaajkyindi midi yikpatp ya naxwiiñ, tøxi ja Dios Teety jade'en kø'øm ttanibiktaagi.

⁵ Tu'ugyi ja Dios myø'ajtin ndamiguy'eixint xemikøjxp! Jade'ents idø'on ja yjatt.

Ka'ap ja jadu'uk abiky midi tnigajpxp ja yiknitsoojkin

⁶ Tyimñigyumaap ø nnayjawiyi ku meets pojn xmajststutkojmi ja Dios, pøn meets kø'øm tø mwaamiñidi tø mwaadsøyidi ku ja Cristo xpa'ayonajxyindi, jøts meets ja janchpi nitsoojkin xijy xpabiky, ja wenkpidam ja'.

⁷ Ka'ap idø'on ja wenkpi nitsoojkin ya jadu'uk y'ity. Yide'en idø'on yjaty, jaa dø'on jaa'y pøn meets nugo mjanchjaa'midip, ja Cristoxi dø'on ja ñitsoojkin yjayiktigatswandip.

⁸ Tøxi meets tu'ugyi ndukmadøy ja janchjā'win, kuts wyinaty pøn nidu'ugin tyiktigatswā'añ midi øøts jawyeen tø n'uknigajpxy, møkts idø'on ja Dios tya'ambøkkit, jøts møj ayo'on tyukpaadit wan tjapøni ku ttu'undit jade'en, o njadyimya'øtsi uk jyadyimdioskugajpxy'ajtpi, ku wyinaty ja wenkpi janchjā'win tpikta'akwamidi sam muum ixyam yjawi ttunwā'andi.

⁹ Ixyam meets ndukjā'myatskojmidi: Pøni jaa pøn ja wenkpi ixpøjkin mdawindaayiywajnidip, paat'ajtiyip ja' ñigida'agiyit ja Dios myø'ayo'on.

¹⁰ Ti øts idø'on jade'en xijy xyikwamp ku øts idø'on jade'en nwa'añ. ¿Ja' øts idø'on xijy ndsøjkpy jøts øts ja jaa'y kuwani xtyimgyupøkt jøts øts ja kuwani xtyimdyakajxa'aktit uk kuwani øy nayide'en xtyimgyupøkt ja Dios? Pø ka'axi, ku øts ja jeexyip ja'ayi nugo nda'ødyøki ya naxwii'ñit jaa'y wyingujky, ka'ats øts ja Cristo jeexyip x'uktumbi'ajtni pø ja'axi ø tu'ugyi tø nnadyamiyøxyiyi.

Sudso ja Pablo tyøjkiyññ kudanaabyi jøts ja tkudanit ja nwindson'ajtim

¹¹ Nijawi meets ya'at, migu'uktøjkti, ku yø nitso'ok'ajtin midi ø nnigajpxy, ka'ap jaa'y yø twinmaa'ñi.

¹² Kø'øm øts idø'on ja Jesucristo yø tø xuknijawi. Kidi mee mwā'añ ku øts yø øy pøngapøn jaa'y tø xuk'ixpiky.

¹³ Tø meets idø'on ja kajpxy ja madya'aky xnijawidi sã øts y'ijty njaa'y'aty ku øts ja chinaa'yin nbaduujnidi ja israelitøjkti. Mnija'wip meetsmi sã øts idø'on y'ijty awā'an'ampy njemduñ ndeduñ pøn ja Dios tjanchjā'widip jøts ø nyikudigøøwya'andi.

¹⁴ Øts idø'øn y'ijty ja israelit jaa'y chinaa'yin jawaani ka'pxy nbadumpy nika'ap øts ja nmiyaaktøjk ni tu'uk pøn jade'en kyamajada'aky sam øts. Jabi ja'ats øts idø'øn y'ijty n'amip njootpip ja møjaa'dyøjk chinaa'yin.

¹⁵ Tigajts øts ndsinaa'yin. Ka'anim øts wyinaty ya naxwiiñ ngaxi'iky ku øts ja Dios wyinajty tø xwi'ejxni xwigoni, pya'ayo'owingøjxp øts idø'øn tø xwaadsøy. Ku ja xøøw ja jumøjt tpaajty sam ttanibiktaajkiyii'n,

¹⁶ xjats øts idø'øn xuk'ijxy xuknijawiyii'n ja y'U'nk, jøts ngajpxyø'oyit ja nitsoojkin madya'aky ma pøn kya'israelitjaa'yidi, pøn tkanija'widipnim ja nwindson'ajtim Jesucristo. Kuts idø'øn ya'at jade'en yjajty, nípøn øts idø'øn nga'ats'ixy nga'ats'amidøy,

¹⁷ ni nganijkxy øts jam Jerusalén ma jam pøn ja kudanaa'yin jawyeen tpadøjkidyøø. Tiy øts idø'øn ne'egi ndyimñøjkkøjy jam Arabia etjotp, jamts ø nwimbijty jøts ø nja'jty jam Damasco.

¹⁸ Kyidigøøk jumøjtnim ø nniikxy jam Jerusalén; winets øts ja Pedro ojts nminabyaadyiyi jade'en'ampyts øts ja n'ijxy'aty, makmojkk xøøw øts ja jam nmøtsinaay.

¹⁹ Ni tu'uk øts ja nga'ejxtøø jadu'ukpi kudanaabyidi, ja Jacobo øts ja'ayi nbaajt, ja nwindson'ajtim y'uch myigu'uk.

²⁰ Y'ijxy ñija'wip ja Dios ku ya'at tyiyi yjanchi midi meets ndanija'ayip. Ka'ap ø nugo ndaabyaaty.

²¹ Kuts idø'øm jade'en y'uknajxy, jamts ø ndsøø'n jøts ø nniikxy jam Siria etjotp jøts jam Cilicia nayide'en.

²² Ka'ap øts y'ijty x'ijxyidi adøm nmigu'uktøjkti midi tjanchja'wimyidip ja Cristo jam Judeit etjotp.

²³ Ja'ayi dø'øn ja y'ijty tmadowdi ja kajpxy, ku ñømidi: "Ja' pøn y'ijty tkamaa'kxp ja janchja'wibitøjkti ja Cristo yjaa'y, ja' ixyam kø'øm tñigajpxnip øy tsu ja Dios kyajpxy ja Dios madya'aky yam ja y'ijty t'ukyikudigøøwya'añ."

²⁴ Tyamigunuu'kxyja'widip idø'øn ja Dios ja' ku øts ja ndsinaa'yin tø nyiktigach.

2

Ku ja Jesús kyudanaabyi tkupøkti ja Pablo jøts ja nayide'en tyu'unt

¹ Kyimakmajkts jumøjt øts jadigøjk nniikxy jam Jerusalén møøt ja Bernabé, jøts ø nayide'en nbawaay ja Tito.

² Paty øts jam nniikxy ku øts ja Dios xuk'ijxy jøts øts jam nnøjkxy. Jøts øts jam møøt amaa'tsk ngajpxy nmadya'aky pøn idø'øn jam tñigubajk'ajttip ja kudanaabyitøjkti Jerusalén. Jøts nduk'ejxtøø nduknija'widyøø sa øts idø'øn ja nwindson'ajtim y'ixpøjkin nnanky'ijxyi pøn tkanija'widip pøn ka'israelit jaa'dyi. Njøpja'wip øts ja' ku øts ja jotmøñ xkagupøktit paty øts ja jade'en nniigajpxy jøts øts ja ndunk nugo kyanaxt midi øts jam wyinaty ndumpy.

³ Xpudøjkidits øts ja'. Niti nisa ja Tito kyayiktuuñ, ka'ap ja ejxpajt ñe'kxkøjxp yikpiktaajky sam ja israelit jaa'y tssøøni.

⁴ Ka'ap øts ya'at jeexyip ngajpxpaaty sa ja Tito yjajty kuk idø'øn kyanøjkxti ja ejxpi ja kowbi jøts tmadya'akwidettit mabaat adøm idø'øn nga'ukpadu'unindi ja møjaa'byi kutujk midi ja Jesucristo tø xukniwaa'jchim ku møøt n'ijtyim. Ja' idø'øn ja chojktip jøts adøm nbaduujna'andit ja myajaa'byi kyutujk sam ja israelit jaa'dyi.

⁵ Nijuuni øøts ja ngayikmøjtøki jøts ka' meets xwinma'aty ku ja'ayi ejxpajtingøjxp yikpiky ja yiknitsoojkin. Jaa ku øø ndsøky jøts meets tiy xmøøt'ajt'ettitnim ja winmaa'ñ sa ja yiknitsoojkin nbaajtyim.

⁶ Niti nisa' ɔts ja xkanimaadyi pɔn jam tɲigubajk'ajttip ja kudanaabyitɔjkti pɔni sa' ɔts ndunkjɔɔjp nyikyɔ'ɔy; ɔy ja yjamɔjwindsɔnidi tuknax ɔts ja mɔɔt nnayja'wiyidi, jabi tum jade'enxi adɔmdi Dios wyingujkp.

⁷ Ka'ap ɔts ja wenk ana'amin ja x'ukmɔɔñidi, jabi yja'gyukidixi ja' ku ɔts ja Dios kɔ'ɔm tɔ xanipiky jɔts ɔts ja nitsoojkin ayuujk ngajpxyɔ'ɔty ma pɔn kya'israelitjaa'yidi, sam ja Pedro yiktanipɔjkmɪ nayide'en jɔts nay ja'abi ayuujk tkajpxyɔ'ɔty jam israelit jaa'yjotp.

⁸ Nayide'en ɔts ja Dios myɔk'ajtin kudanaabyi tɔ xpiktajkmɪ jɔts ɔts ngajpxwa'kxit ja y'ayuujk pɔn ka'israelit jaa'dyi sam ja Pedro tɔ yikpiktajkmɪ kudanaabyi jam israelit jaa'yjotp.

⁹ Patyxi dɔ'ɔn ja Jacobo, ja Pedro jɔts ja Juan pɔn tɲigubajk'ajttip ja kudanaabyitɔjkti tja'gyukidi ku ɔts ja Dios tɔ xmɔ'ɔy ja ɔy'ajtin jɔts ja yja' tɲanky'ejxit. Ojts ɔɔts n'ukyikɔpatni mɔɔt ja Bernabé, jade'en'ampy ja jade'en ttundi jɔts ku ɔɔts ja xmigu'ukwa'añ jɔts ku ja t'ɔyja'widi jɔts ɔɔts ndunk ɔy nyiknaxt jam ka'israelit jaa'yjotp, yam ja nayide'en ja tyunk tyikyɔ'ɔmyidi jam israelit jaa'yjotp.

¹⁰ Ja'ayi ɔɔts idɔ'ɔn x'amidowdi ku ɔɔts nximija'myajts'ett ja israelit ay-oobitɔjkti. Ya'ats ɔts idɔ'ɔn ne'egi nbadun'ijtpy, ka'ap ɔts yɔ'ɔbi winmaa'ñ n'ixmach.

Ku ja Pablo twindsɔ'ɔy ja Pedro jam Antioquia

¹¹ Ku ɔts jam mɔɔt nnabyaa'jti ja Pedro jam Antioquiit kajjotp, jam ɔts ojts ndawindsɔ'ɔy midi jam wyinaty tyumpy, ku ja ka'ap y'ɔgyaxi'iky.

¹² Ku ja mɔɔt ɔy tyimy'ukaagyɔy pɔn ka'israelit jaa'y jɔts ja jaayi tmajt-stutkojmi, ja'ayi ku winaa'gin ja israelitɔjk yja'atti pɔn wyinaty tɔ tkexy ja ja'abi jaa'y midi tpadundipnim ja mɔjaa'byi kutujk ja mɔjaa'byi tsinaa'yin sam ja y'ijty nayide'en tpadumi.

¹³ Nayide'en ttumidi sam ja Pedro pɔn jaty jam wyinaty ka'israelit jaa'dyi, nayide'en idɔ'ɔn ja Bernabé paat ttumi.

¹⁴ Kuts ɔts idɔ'ɔn ja n'ijxy jade'en ku tkabadundi sam ja ɔgyajpxy ɔmyadya'aky ttanibiktaagi, yide'en ɔts idɔ'ɔn ja Pedro nnimaay jɔts niduki'yiyi tmadoomidɔɔ ja janchja'wibitɔjkti: “¿Tigɔjxp mets ya'at jaa'y xukpadunwa'añ ja israelit jaa'y chinaa'yin? Pɔ tɔts mets ja kɔ'ɔm x'ixmatsni jekyip o mets jam mjadyimyjagugajpi.”

Janchja'wingɔjxp ñitso'okti ja israelit jaa'y sam o pɔn jaa'dyi

¹⁵ Israelit jaa'y adɔmdi ja' ku jade'en tɔ ngue'exyindi, ka'ap adɔm ja pɔky nayide'en ndyimyikmajadaajkyindi sam ja' pɔn ka'israelit jaa'dyi.

¹⁶ Tɔts nnija'windi ku ka'ap adɔm ja Dios xkupɔjkindit ja' wyingujkp ku ja'ayi nbadu'undit ja Moisés kyutujk. Ja Jesucristoxi dɔ'ɔn ja yja' njanchja'wimp patyxi dɔ'ɔn adɔm ja Dios Teety tɔ xkupijkyindi, kidi ja'agɔjxp ku ja Moisés kyutujk nbaduujñindi. Jabi nipɔnxi kyayikupɔkt Dios wyingujkp ku ja Moisés kyutujk ja'ayi tpaduujnit.

¹⁷ Ku dɔ'ɔn ja Dios tɔ x'ukupijkyindi Cristo kɔjxp, jɔts adɔm ja Moisés kyutujk tɔ n'awimbejtigyojmandi, ¿ja Cristo adɔm idɔ'ɔn kɔ'ɔm xyik-tuu'tigɔɔ'yimp? ¡Ka' yjade'eni!

¹⁸ Ku ɔts ndungojmit midi tɔ n'uk'ixmach, ngɔ'ɔmbɔky ɔts ja'.

¹⁹ Ka'ap ɔts ja Moisés kyutujk n'ukyiktuni ja'agɔjxp ku ɔts ja Dios y'ɔy'ajtin jade'en'ampy ngapaaty; tɔ nja'gyuki jɔts ku ja Dios yja' yikpaaty ku njanchja'want ja Cristo.

²⁰ Ka'ap øts nugo n'uktsinaañi, tø øts ja Cristo xku'oogi kruskøjxp; ja' øts idø'øn ndu'ump midi ja Cristo y'øjja'wip jaa ku øts ja chinaa'yin ndajujky'ajti. Janchja'wingøjxp øts ya'at jujky'ajtin nyiknaxy ya naẖwiiñ ku ja Dios U'nk tø xjanchøky xjanchpa'ayøj jøts nayide'en tø xku'oogi.

²¹ Ka'ap øts ja Cristo y'o'jkin nugo nyiknaẖwa'añ; kuts Dios ja jeexyip xagupijkyindi ku ja Moisés kyutujk nbadu'unint, niti jeexyip kyawa'añ ja Cristo y'o'jkin, ka'ap ja jeexyip ma tyuñ.

3

Midi nyikmajadaqjimp: ja Moisés kyutujk uk ja nwindson'ajtim yjanchja'win

¹ ¡Meets gálatas jaa'dyi! ¿Tiku tø mwinmaa'nmya'atti? ¿Jadits ku xka'ukpadunidi ja y'øjbi ja tyiībi, pøn tø myikwinmaa'ndyigøyi? Jabi tøxi meets ka'pxy ndukmadooguixy jøts tø xja'gyukidi ku ja Jesucristo tø xku'o'jkindi kruskøjxp.

² Uk'adsojimbetti meets idø'øn ya'at: ¿Sudso'ampy meets idø'øn ja Dios Teety ja y'Espíritu Santo tø mmø'øyi, ku ja Moisés kyutujk xpaduujni, uk ku ja tø xmibøjkti ja yiknitsokpi ayuujk midi øøts tø nnigajpxy?

³ ¿Tiku xkaja'gyukidi? ¿Sa tø mwá'andi, jade'en idø'øn xiyy jawaani mjanchja'win myøjdit ku xpadunwa'andi ja Moisés kyutujk?

⁴ ¿Ti nugo meets jadi'iñi xyiknaẖwa'añ ja m'ayo'ondi ku myikjemandi myiktedundi ku ja mjanchja'win x'ukyiktso'ondajktøø? ¡Ka'ap jade'en pyaat'aty, myiktunkpaty meets ja ndijj ku kawine'en tø m'ayowdi!

⁵ Kuts ja Dios Teety ja y'Espíritu Santo tø mmø'øyidi jøts ja x'ejxiyidi ja myøk'ajtin ku ja tñanky'ijxyiyi ja ijxyimbi ka'ijxyimbi, ¿tigøjxpts ja jade'en ttuñ? ¿Ja'agøjxp ja ttuñ ku meets ja Moisés kyutujk xujni? Pø ka'axi, pø ja'agøjxpxi ja ttuñ ku tø xjanchjawidi sa øøts tø nnigajpxy.

⁶ Ejxpajtingøjxp idø'øn ja n'apteety'amøj Abraham ku ja tjanchja'wiyiiñ ja Dios, ja'ayits Dios ja tagupøjkiyøø. Ka'ap ja ja'agøjxp yikupijky pøni ti ødyunk ja tyuun.

⁷ Paty meets idø'øn xja'gyukidit jøts ku ja Abraham ñamyayi ja' t'apø t'oki pøn ja janchja'win nayid'en tmøøt'ajttip sam ja ojts tmibiky ja Dios.

⁸ Windi'ixyip idø'øn ja Dios ttukmadowni ja Abraham sa yikjaadyaañ jap nøkyijxpy jøts ku yide'en wyaañ: "Tuki'iyi ja naajx ja kajp ja kunuu'kxy'ajtin tpaattit ku øts xjanchjawidit sa mets tø xunjøpi." Paty ja Dios jade'en wya'añ ku ja janchja'wingøjxp tkupøkt pøn ka'israelit jaa'dyi.

⁹ Jade'ents idø'øn pøn ja Cristo tjanchja'widip, nayide'en ja kunuu'kxin ja tpaatti sam ja Abraham ja kunuu'kxin yikmøøy ku ja Dios ja tjanchja'wiyiiñ.

¹⁰ Pøn tyimjabadunwandip ja Moisés kyutujk jøts ja jade'en ñitsø'oktit, tø Dios ja ttanibiktaajkiñi jøts ja yik'ayo'onmo'odit. Jabi yide'enxi dø'øn ja Dios kyutujk wya'añ jap nøkyjøtpy: "Pøni pøn tuki'iyi tkabadungøjxp ya'at kutujk midi yap tø yikjaadyañ, paajtidip ja møj ayo'on ja' midi øts tø ndanibiktaagi."

¹¹ Ja'gyukits idø'øn tyañ ku ja Dios ka'ap tkupiky pøn wyinaty ja'ayi tø tpaduñ ja Moisés kyutujk, jabi yide'enxi ja Dios ñøky wya'añ: "Pønts ja Dios wyinaty kyupijky janchja'wingøjxp, jujky'ajttipts ja' xemikøjxp."

¹² Ka'ap ja Moisés kyutujk yiknitsø'øky janchja'wingøjxp, yide'enxi ja wya'añ: "Pøni pøn tuki'iyi tpadungøjxp ya'at kutujk, ja'ayi nitso'ok'ajtp."

¹³ Tøts ja Cristo xukniwajchim ja ayo'on sam ja Moisés kyutujk ttanibiktaagi pøn ka'pxy tkabadundip. Yide'en'ampy tsoo ku ja Cristo møj pøkyumbi yiktijj jøts jade'en kø'ømdsøky tpatwa'jkiyiiñ ja møj ayo'on midi adøm

xjpaat'ajtindip, jabi yide'enxi ja Dios ñöky wya'añ: "Pøn jam yikudüpy kipkyøjxp, möj pøktyumbi ja."

14 Paty idø'øn ja Jesucristo y'øjky kruskøjxp jøts ja kunuu'kxin tpaattit pøn ka'israelit jaa'dyi nayide'en sam ja Abraham ja Dios ojts ñii'mxyiyi; jøts jade'en adøm niduknaξ nbaajtindit janchja'wingøjxp ja Espiritu Santo midi ja Dios Teety tø tni'adsowi.

Ka'ap ja Moisés kyutujk tyik'amutski ja may'ajtin mididi ja Dios ñi'adsow'i

15 Meets migu'uktøjk, ku dø'øn n'ukpiktaajkint ku tigati n'ukajpx'ø'yint n'ukajpxpaajtint, kuts ja yikjaadyañ, kuwani dø'øn ja yikpadu'unt, sa tø wyinguki ka'ap ja pøn tyiktigatst.

16 Kuts ja Dios Teety ja may'ajtin tmøøwya'añ ja Abraham, nayide'en ja tmøøwyaami jadu'uk ja jaa'y mididi ja y'apip y'okip pøni wine'en ja tø ñajtska'axyini. Sam ja Dios ñöky wya'añ: "Tu'ukpi jaa'y ja', ka'ap ja ñamayidi." Ja'ats idø'øn Cristo'ajtp.

17 Yide'en øts idø'øn ja ja'gyukin nyakwa'añ: Ja may'ajtin mididi ja Dios ja Abraham ojts tyami'awaniyi, ka'ap ja mibaat niwine'enin tyiktigajch ja Moisés kyutujk mididi meen ix'oojk maktaxk magøpxy ja ee'pxmajk jumøjtnim.

18 Kuts ja Dios ja myay'ajtin jeexyip kuwani xukpadunwa'añin ja Moisés kyutujk, ¿ti may'ajtin idø'øn ja jade'en? Yide'en'ampyts idø'øn ja y'øyi ku ja Dios ja jadi'iñi ttamay'atwa'añ ja Abraham.

19 ¿Tigøjxpts idø'øn ja Moisés kyutujk nyikmø'øyim? Paty idø'øn ja ix'oojknim yikpiktaajky tø wyinaty tni'adsowiañi ja may'ajt jøts ja jaa'y niduki'iyi tñajawidit mididi idø'øn pøky'ajtp. Jaayi tyuñ kunim yja'aty ja Abraham y'apu'nk pøn nayide'en ja may'ajtin yiktami'awa'ananiyi'ñ. Ku ja Dios ja kyutujk tyajky, ja ankilistøjk ja tyamigaxiyi'ñ jøts ja Moisés ja ttagidøkidit, jøts ja ttuk'ext ttuknijawit ja jaa'y.

20 Ku ja Dios ja may'ajtin tmøøwya'añ ja Abraham, ka'ap ja ankilistøjk ni ja kugajpxtyøjk ja tkayiktuñ, kø'ømyi ja nadyu'ugyi ttami'awa'ananiyi'ñ.

Tigøjxp ja Moisés kyutujk yikpiktaajky

21 ¿Sats idø'øn ya'at nja'gyukant? ¿Ka'ap idø'øn ja Moisés kyutujk møøt ñamayyi ja Dios myay'ajtin? Ka'ap idø'øn yjade'eni, jaa ku ja Dios ja kutujk jeexyip tø tyaky nitsoojkin møøt, ja'ayits ja jaa'y jeexyip yiktagupøjktip, ja'ayi jeexyip yikpadump pøni sa ja tyikutuky.

22 Jabi jade'enxi ja Dios ñöky wya'añ ku adøm nijum pøkñiwa'añ n'ejtandi. Kuts ja Jesucristo njanchja'wint, jade'en idø'øn ja'ayi ja nitso'ok'ajtin nbaajtint mididi ja Dios tø tni'adsowi.

23 Tum ja Moisés adøm ja kyutujk wyinaty tø xniwa'anandi ku kyamiñim ja Cristo, pø ka'anixi ja Dios Teety wyinaty xukja'gyukam ja Cristo yjanchja'win.

24 Ja'abi kutujk adøm y'ijty xuu'wa'anindip xuu'wejtsnindip kunim ja Cristo myiñ, kuts ja njanchja'wa'ant jade'ents ja Dios Teety xkupøjkindit.

25 Kuts ja Cristo myiñ, ka'ap adøm ja kutujk x'uk'ana'ammindi.

26 Jabi ixyamxi adøm ja Dios x'u'nk'ajtnindi ku ja Jesucristo njanchja'windi.

27 Ku Cristo køjxp nnøbejtyindi nayide'en adøm ja ndsinaa'yin nyiknajxyindi sam ja tø tjøtuni.

28 Ka'ap y'ukpaat'ajtniyi adøm nnayjiwejtsandit nnayjigajxandit o pøn y'israelitjaa'yidi kya'israelitjaa'yidi, tumbidi yikmidumbidi, sam

ja tø'øxyjkmidi yaa'dyøjkmidi; tu'ukpi jaa'y adømnidi ku ja Jesucristo nmøøt'ajtnandi.

²⁹ Kuts adøm ja jade'en nmøøt'ajtnant, xjats idø'on tyimbyaat'atyiyi ndeety'ap'ajtnant ja Abraham jøts xpaat'ajtindip adøm ja Dios myay'ajtin mididi ja ñi'adsowiyi'ñ.

4

¹ Ukja'gyuki meets ya'at: Ku tu'uk ja u'nkteety y'øøky jøts ttanipaaty tuki'iyi ja pyikta'aky ja myutsku'nk, kuts ja tyimy'ukmutskinim ka'anim ja pyaat'atyi tpoøkt ja maay øy ja tuki'iyi tjaja'ajtkixy.

² Jabi kuwanixi dø'on tjamimado'ot ja y'ejx'etpidi kunim ja yjumøjt tpaatt jøts t'axajit ja tyeety ja myaay.

³ Nayide'en adøm idø'on y'ijty njajtyindi ku ja Cristo kyamiñim. Tum ja møjaa'ychinaa'yin y'ijty nyikmajadaajkyindip øy ja nitsø'ok'ajtin tjagamøødi.

⁴ Kuts ja xøøw ja jumøjt yja'jty, kyajx ja Dios Teety ja y'U'nk tø'øxyøjk ñikøjxp jøts jade'en kye'jxy israelit jaa'yin, pyadungøjx nayide'en tuki'iyi ja'abi jaa'dyi ja chinaa'yin møøt ja kyutujk.

⁵ Paty ja jade'en myiñ jøts ja wa'ats'ajtin xmø'øyindit pøn y'ijty tpadundip ja Moisés kyutujk, jøts jade'en Dios Teety x'u'nk'ajtindit.

⁶ Yide'en idø'on ja tnanky'ijxyi ku adøm ja x'u'nk'ajtna'am ku ja tkexy ja Espiritu Santo adøm n'anmija'wingøjxp; jøts møk ja winmaa'ñ nmøøt'ajtindit ku janch ja Dios Teety ndeety'ajtyindi.

⁷ Ja Dios Teety adøm idø'on xtyimy'u'nk'ajtindip, ka'ap adøm nugo midumbidi. Paty adøm idø'on xtyimbyaat'ajtyindi ja maay mididi ja Dios Teety tø tni'adsowi, jøts mididi ja Cristo xmø'øyindip.

Ku ja Pablo tpamay tpadajy ja janchja'wibitøjkti

⁸ Ka'ap meets y'ijtyip ja Dios Teety x'ijxyi, tum ja awanax agojnax meets y'ijty windsø'jkidip winja'widip, mididi ka'ap ja Dios'ajtin tmøøt'atti.

⁹ Tø meets ja Dios Teety xpatni, uk yide'en'ampyts idø'on ne'egi ngajpxint, tø meets idø'on ja Dios Teety mbaajtniyi, ¿sudso meets idø'on xkupøjkojmi ja wenk tsinaa'yin mididi niti møk'ajtin niti nitsoojkin kyayajkpy, nayide'en sam ja mgø'øm ja'adi mididi tø xuk'ixmatsti?

¹⁰ Jøts ixyam xjanch'ukjøp'ejxti ku ja Dios m'øyjawi'yidit ku x'amaay'attinim ja xøøw ja po', ja xøøw ja jumøjt.

¹¹ A'øy'ampy øts yjawi njøptsø'øgi ku øts ndunkjøøjp meets køjxp tø wyindigøy.

¹² Migu'uktøjkti, tun ja may'ajit jøts xu'undit sam øts idø'on tønjøptuni ku øts ja israelit jaa'y chinaa'yin tøn'ixmajtsni. Kupøjkiø øts n'ayuujk, ka'axi meets niijuuni xmidsepwa'añ.

¹³ Øy meets xkupijky mijawyeen ku øts ja yiknitsokpi madya'aky nnigajpxy øy øts wyinaty njabama'ayø.

¹⁴ Wan øts nba'am meets mja'axiigyidi, ka'ap meets xpawøjpy. Jade'en meets ne'egi xkupijky sam tu'uk ja Dios y'ankilis tnajtškaxi, uk sam ja Cristo yjawi kø'øm tyimyja'aty ma meets jam.

¹⁵ ¿Tiku mga'ukjotkujk'ajtnidi? Tyimyøj meets ja mba'ayo'owin xnanky'ejxøø ku nbamaa'ychinaay. Patyts ø nwa'añ, wanik meets yjawi mgø'ømween xtyimyju'jty jødsik øts ja xamay'ajttøø, jøts øts jade'en ndso'økt.

¹⁶ ¿Xmidsepwandip meets ixyam ku øts ja'ayi tønigajpxy ja tyiiby yjanchpi?

17 Ja winaagin ja israelit jaa'y pøn taagyøjxp yik'ixpøjktip. Ja'ayi dø'øn ja yjanch'awejxtip jøts meets ja xmibøkt jøts x'ixmatstij ja m'øwynmaa'ñ midij meets tøn dukmadø, jøts jade'en ja abiktyuu' xpadøjkiñidit.

18 Ka'ap ja sa'y'ejxi ku meets ja møøt mnamyayiyidit, ja'ayi dø'øn tsojkip jøts yixkon ja y'øwynmaa'ñ y'øy'ixpøjkin tniagjpxit, ejtp jade'en ttu'undit, ka'ap ja'ayi nugu ku meets jam møøt.

19 Meets u'nk meets una'jk, møk meets jadigojk xjanchyikmay xjanchyiktajy. Jaayim øts yø jade'en njawit kunim ka'pxy ja Cristo xpadungøxtit samdam ja ttsøky'aty.

20 Jok meets jam møøt jeexyip ixyam, jøts øts øy tsuj ne'egi ndukmado'ot ya'at winmaa'ñ; jabi ka'axi øts ja ayuujk n'ukpañni pø sudso meets njanchñijayit!

Ja Agar jøts ja Sara ñikøjxp ja ejxpajtin yikajpxidsimy

21 Meetsti, pøn ja Moisés kyutujk tpadunwajnidip, nigajpx meets sa dø'øn wya'añ ja'abi kutujk.

22 Pø nømpxi ja wya'añ ku ja Abraham namajtsk ja y'u'nk tpaajty: tu'uk ja tumbi tyik'u'nkpaajty midij nitøøky'ejtñip, jøts jadu'uk ja kyø'øm nidø'øxy yja'.

23 Ku ja nitøøky tø'øxy y'u'nkpaajty nayide'eñim ja tpaajty sam o pøn tø'øxyøjk, jøts ku ja ñidø'øxy ja y'u'nk tpaajty kidi nugojip ja jade'en yjaty pø ja Diosxi y'ayuujk jade'en ka'pxp sam ja wyinajty tøn tni'adsowi ku ja tø'øxy y'u'nkpaatt møjaa'gyijxñim.

24 Ejxpajtin øts idø'øn ya'at nbikta'aky. Ja namajtskpi tø'øxy wa' idø'øn ja kyudanaadyip majtskpi ky ja pudøjkin sa ja Dios tøn tñanibiktaagi. Midukpiky, ja Agar idø'øn jade'en sa ja Moisés kyutujk, ja' midij yikmøøy jam Sinai kojpkøjxp. Pøn ya'atpi kutujk ja'ayi tpadundip ka'ap ja ñitso'oktit.

25 Kyudanaapy ja Agar nayide'en ja Jerusalén kajp midij ixyam ñajx'ajttip ja israelit jaa'dyi ma dø'øn wya'andi ku ja nitso'ok'ajtin yikpaaty ku nbadu'unin ka'pxy ja Moisés kyutujk. Pøn jade'en tpadundip jade'en ñamyayi pyidsimy sam ja tø'øxy midij nitøøky'ejtñidip. Yikmajadaaktip idø'øn ja' ja'abi kutujk.

26 Ma ja tsajpjtøpit Jerusalén jam ka'ap ja Moisés kyutujk jam tyuñ, jamts adøm idø'øn xpaat'ajtyindi.

27 Jabi ja'axi dø'øn ja Dios kyajpxy tyijpy ku yide'en jap nøkyixpy wya'añ: Mets tø'øxyøjk nøy,

mbaat'ajtyiyip mxonda'akt ja'agøjxp ku xpaatwa'añ ja m'u'nk.

Jotkujk mnayjawiyit o mets nijuuni xjagapaaty xjaga'ijxñim m'u'nk.

Øy ja mniyaa'y tøn waani mja'atmajtsu'udyi, wimbetp ja jadigojk jøts ja m'u'nk may xpaat,

yam ja jadu'ukpi tø'øxyøjk nika'ap jade'endi.

28 Migu'uktøjkti, ni'adsowigøjxp adøm ja Dios x'u'nk'ajtyindi nayide'en sam ja Dios ja Isaac tni'adso'wiyi'ñ midij ja Sara y'u'nk'ajtpy.

29 Jade'en sam Ismael, ja nitøøky tø'øxy y'u'nk, tmidsepwan'ijty ja Isaac, midij ja Sara myajnk'ajtpy, nayide'eñim ixyam ku adøm xmidsep'atwan'ijtyindi ja jaa'y pøn ja Dios yja' tkajanchja'widip, yam adøm ja Espiritu Santo ja myøk'ajtin xyikjujky'ajtyim.

30 Yide'en idø'øn ja Dios ñøky wya'añ: "Jigax ja nitøøky tø'øxy møøt ja y'u'nk, jabi ka'axi pyaat'aty; nay ja'abi maay midij ja Sara myajnk'ajtyiyip."

31 Jade'ents migu'uktøjk idø'øndi, ka'ap adøm idø'øn ñamyayi x'u'nk'ajtyindi ja nitøøky tø'øxy, ja Abraham idø'øn ndejint ja ñidø'øxy ndaak'ajtyindip, ja'agøjxp ku ja Dios tu'ugyi yikjanchjawi.

5

Mimòk'atti pòn mnitso'ok'ajtin mduk'ixmatswajniyidip

¹ Tò adòm ja Cristo xukmajtstuujtyindi ja Moisés kyutujk, ka'ap adòm ja xukja'ajtnandi. Ejx'ettits ja nitsoojkin midì ja Cristo tò xamidsøjkyin.

² Madowdi yikxon. Pòni mdamøk'atwandip ja m'ejxpajt midì ne'kxkøjxp, ja Cristo meets idø'øn ja ñitso'ok'ajtin mgayikmøjtøjkiyidip.

³ Exyam meets ndukja'myech jadigojk ku ja'abi jaa'y pòn ja ejxpajt tkupøjkp ñe'kxkøjxp, kuwani dø'øn ja Moisés kyutujk tyimbyadungøjxit. Kuts jade'en tkatu'unt, ja kudigø'øyin idø'øn ja pyaap.

⁴ Jam meets winaagin winmay ku ja Dios ja xagupøjkindit ku yikpadu'unt ja Moisés kyutujk, ja Cristo meets idø'øn ñamyayi abiky mbiktaknip jøts ja Dios Teety chojkin ja pya'ayo'owin x'ixmajtsidi.

⁵ Jabi adømxì nmøøt'ajtyindip ja jøp'ejxin ku ja Dios Teety xkupøjkindit jade'engøjxp ku ja Espiritu Santo xpudøjkindit jøts ku njanchja'windit ja nwindson'ajtim Jesucristo.

⁶ Kuts ja nwindson'ajtim tu'ugyi nmøøt'ejtindit, wan ja ejxpajt tyikmøøt'aty tkayikmøøt'aty ne'kxkøjxp, niti ja kya'ukwanit. Kuxi ja Cristo njanchja'want ja'axi tump, jøts ja'agøjxpxi adøm nmigu'uk tum ja øybi ndamidsojkyim.

⁷ Øy meets tò m'uktso'ondq'aky jawyeen. ¿Pønts idø'øn tò myikwinmaa'nmya'adyidi ku xka'ukpadunidi ja tyiibyì ja yjanchpi midì ja Cristo yja'ajtpy?

⁸ Jabi ka'axi ja Dios Teety jade'en mduñidi midì tò mmø'øyiidi ja nitso'ok'ajtin Cristo køjxp.

⁹ Pø yiknija'wipxi ku tu'ukpi jaa'y ne'egi namay tyikwinmaa'ndyigøy ja myigu'uk.

¹⁰ Dios køjxp øts ja jøp'ejxin nmøøt'aty ku meets jadigojk x'awimbettit midì jawyeen tò nduk'ixpøkti; pòn meets idø'øn myikwinmaa'ndyigøøwyajnidip, ja' idø'øn ne'egi mòk ayo'onbaatp øyi yjadyimjapøni.

¹¹ Kuts meets jeexyip ndaguwani ku ja ejxpajt ne'kxkøjxp ja'ayi tu'ugyi tyuñ ka'ap øts ja israelit jaa'y jeexyip xmidsepwà'andi xmi'ekyidi. Niti nisa jeexyip kyawa'andi ku øts ja jeexyip n'agajpxmukixy ku ja Cristo tò xku'o'jkandi kruskøjxp, jøts ku nayide'en tyumidi ja israelit jaa'y y'ixpøjkindi. Tu'ugyi øts ja'ayi nnigajpxy ja Cristo yja'.

¹² Pønts meets ya'at tsinaa'yin kuwani mdukupøkwanjidip, paat'ajtyip jøts ja ne'egi kø'øm ñankyudigø'øyiñidit.

¹³ Migu'uktøjkti, tò Dios mwi'ijxyiyidi jøts ka' kuwani x'ukpadunidit ja Moisés kyutujk jøts jade'en ja awa'ats'ajtin xpaattit. Ka'ap yø'øbi awa'ats'ajtin xyikwa'andit ku adøm o tigati ndyimdyu'unandit; ja' ne'egi xyikwa'andit jøts nixem niyam mnachokiyidit sam nayide'en mnabyudøkiyidit.

¹⁴ Ku ya'atpi tu'uk kutujk nbadu'unint, tuki'iyi dø'øn ja ndejnt ja Dios kyutujk yikpadungixy, midì yide'en wamp: "Tsok ja mmigu'uk samdam meets kø'øm mnachøkyi."

¹⁵ Kuts meets mnachepwà'añidi mnachep'ijxyidi, jnay'ejx'etidim, kidi meets kø'øm mnankwysinmaa'ndyigøyidi jøts mjanchja'win jade'en xkayikwindigø'ødyit!

Ja ka'ødyu'unin midì ya naxwiiñ yiktanaxp jøts ja øchinaa'yin midì ja Espiritu Santo yajkpy

¹⁶ Ya'at meets idø'øn ndukmadøøpy: jøts ja mdsinaa'yin xyiknaxtit sam ja Espíritu Santo mdamidsøkyidi, jøts jade'en ka' xyikmøj'attit ja ka'øbyi midi ya'it tsinaa'yin y'amidøøpy.

¹⁷ Ya'atpi ka'øbyi midi ngø'ømdsojkingøjxp nbadunwa'añindip, ka'ap ja Espíritu Santo møøt ñamyayiyi. Tum majada'akwandip ja' jøts ka' xuk-tunwa'añin pøni midì adøm kø'øm njatsøky'ajtyimp.

¹⁸ Pøni janch ja Espíritu Santo meets mduu'møøjyidip, ka'ap meets ja Moisés kyutujk m'ukpaat'ajtniyidi.

¹⁹ Nigaxi'iky ja chinaa'yin ja'adi pøn ja ka'ødyu'unin pyadundip midì ja ne'kx ja kojpk y'amidøøpy. Ya'atpi pøky y'agujkpy yide'en ja yju-jky'ajtin tyiknaxti: øy ja pøn yaa'dyøjk tø'øxyøjk møøt ñamyøøt'atyidi wan tja'amajtskidi tka'amajtskidi, tum ja axøø'kpi yigaappi y'amidip yjotpidip,

²⁰ ja awanax ja agojnax wyindsø'jkidip wyinja'widip, ja miku' tyunk ja kyamimaadip kyami'ejttip. O pøngapøn myi'ekyidi, ja'ayi tyajotkujk'ajttip ku ja myigu'uk tyikjø'ødi tyikya'axti, øy ja myigu'uk ttami'ekyidi ja ñidsinaa'yin. Øy ja tigati ttatsep'ixa'adi, kyø'øm jotkujk'ajtin ja ja'ayi y'ixaadyip, ja'ayi ja chøky'ajttip jøts ja wenk winmaa'yinyøjxp abiky ñabyikta'agiyidit.

²¹ Tyami'ama'at'ajttip o tigati ja myigu'uk, yikjaa'y'oo'k yikjaa'gyudigøøky tyunk'ajttip, ja amu'uky'ajtin kawindiy'ajtin yikmajadaktip. Tum yø'øbi axøø'kpijøtpy yigaappijøtpy idø'øn ja chinaa'yin tyiknaxti. Ixyam meets ndukja'myech jadigojk, pøni pøn ya'atpi tsinaa'yin ne'egi tpadump niwindem xøow ja tkapaattit ja Dios kyutujk ma ja yjaa'y ttanitanit.

²² Ku ja Espíritu Santo ndsinaa'yin xuu'mø'øyint, winets idø'øn wyingaxi'iky ja tsojkin ja pa'ayo'owin nixem niyam, ndaxondaajkindip ja Dios, jøts ja øy'ajtin nmøøt'ajtant, nja'gyujkandit nduda'aky'ajtant, n'amigu'ukjaa'y'ajtant, n'øyjaa'y'ajtindit, jøts ja windaay'ajtk ngayiktu'unindit,

²³ nmiiyujy'ajtindip ja nmigu'uktøjkti jøts ka'ap ja ngø'øm ja' nyikma-jadaajkindit. Nima niwindem, niti kutujk adøm xkadatiidyyu'unint yø'øbi øyjaa'y'ajtk.

²⁴ Pøn ja Cristo ja'ajtyidip, tø dø'øn ja ñamyayi tkrustsumgøjxnidi tuki'iyi ja ka'øyjaa'y'ajtin midì yikmøøt'ajtp.

²⁵ Pø tødam adøm ja Espíritu Santo ja jemchinaa'yin xjanchmø'øyidi, ztits ku adøm idø'øn ja ngamibøjkindit pøni ma ja xuu'waa'wa'añindi?

²⁶ Ka'ap adøm idø'øn niti nnadyamikajxint, niti nganadyami'ajkiyindit. Jagam jixkø'øm n'ixwejtsint ja tami'ama'at'ajtk.

6

Nixem niyam nabyudøkiyidi

¹ Meets migu'uktøjkti, pøn ja Espíritu Santo yja' tmøøt'ajtkøxiyidip, ku xnijawidit ku nidu'uk ja mmigu'uk ja pøky tø myimajada'agiyiyi, pa'ayo'owingøjxp meets idø'øn ja xpudøkidit jatyi, jøts jade'en t'awimbetidit ja øyi tsinaa'yin jadigojk. Mdabajaa'ñaxtip ku meets nayide'en jotmøñ wyinaty ja pøky mmimajada'kniyidi.

² Nabyudøkiyidi nixem niyam jøts ni'amuki jade'en xmimajada'aktit ja ka'øbyi, jabi jade'enxi dø'øn wyinaty xpadundi sam ja Cristo ja kyutujk tnigajpxy.

³ Pøni jaaxi pøn jaa'y midì tymñamyøja'wiyip, nugo ja kø'øm ñawindaay'aty.

4 Nidu'uk nidu'uk adøm idø'on kø'øm nnija'wandit ku ja ndsinaa'yin nyiknajxyindi øy; kuts øy ñayjawiyit kø'øm idø'on ja chinaa'yin ja ñadya'ajawiyit, ka'ap ja myigu'uk yja' ttatøjkiyt.

5 Kija' adøm idø'on ndsinaa'yin ngajpx niwaaajtsin Dios wyingujkp.

6 Tabudøkidi ja mbikta'aky pøn ja øgyajpxy ømyadya'aky ñanky'ejxiyip.

7 Kidi kø'øm mnawyindaay'atyidi, jabi ka'axi ja Dios jadi'ñi yiktañ pøn ja nugo taguyatwajniip. Ku tigati n'ukneepint, nay ja'ayi dø'on n'ejxmukojmamp nbøkmukojmamp ku ja xøøw ja jumøjt wyinaty tpaatni.

8 Nayide'ents idø'on ja tsinaa'yin: ku pøngapøn ja'abi tsinaa'yin nugo tpaduñ midi ja ñe'kx ja kyojpk ja'ayi y'amidøøpy, ja o'jkin tigø'øyin idø'on ja wyinaty pyøkmujknip kyonmujknip ku ja tiidyu'unin mye'ent kyida'akt. Pønts jade'en tpadump sam ja Espiritu Santo ñadyamidsøkyiyi, nay ja'ayi dø'on kø'øm mo'ojyidip ja jujky'ajtin xemikøjxp.

9 Ka'ap adøm idø'on ja xwindsejpidit ku ja øybi tsinaa'yin nnanky'ejxindit, ku jade'en ndu'unindit xjats idø'on nyikmø'øyindit ja kawinmaabyi kunuu'kxin.

10 Paty meets idø'on xun'ett, jøts pøngapøn xpudøkidit winjaa windsojk pøni juuni pyaat'aty. Ja'abi jaa'y idø'on ne'egi mguidyimyja'dyigø'ødyip midi adøm nmigu'uk'ajtyindip tu'ukpi janchja'wingøjxp.

Ku ja Pablo kyajpx'abajtiñi xjats y'ukajpxwejni y'ukajpxpoo'kxni

11 Kø'øm meets ixyam yikxon ndyimñijayi sam idø'on pyaat'aty jøts yikxon xja'gyukidit. Ejxti mabaat øts yø nja'ay myøji.

12 Yø'øbi jaa'y pøn meets mdaguwa'aniyidip ja ejxpajtin ne'kxkøjxp, ja'agøjxp ja ttundi jøts ja øy yik'ejxtit yiknimadya'aktit jøts ka'ap jade'en pøn chep'ejxiyidit chepjawiyidit ku jeexyip ja Cristo yja' ja'ayi tñanky'ixpøjkiyidi ku tø xku'o'jkandi kruskøjxp.

13 Øy ja ejxpajtin ne'kxkøjxp tjamødidi, ka'ats idø'on ka'pxy kø'øm tpadundi midi ja Moisés kyutujk ñigajpxpy. Kuwani meets ja mdukupøkwa'añiyi ja ejxpajtin ne'kxkøjxp, jøts ja jade'en ja'ayi ñadya'agajpxiyidit ñadya'øyjawiyidit ku meets ja yja' tø xpadøjkiniyidi.

14 Jøts øts ka'ap ø niti nnadyamikexyiyi, ja'ayi øts tu'ugyi nmøk'ajtin'ajtpy ku ja nwindson'ajtim Jesucristo tø xku'oogi kruskøjxp. Paty øts ja yi-gaappi na'xwii'ñit tsinaa'yin nga'ukmøkpiktakni, nika'ap øts ja nayide'en xuknimajadakni.

15 Jaa kuxi adøm ja Cristo Jesús møøt nnamyaajyindi, niti kyawa'añ pøni jam ja nmøøt'ajtyindi ngamøøt'ajtyindi ja ejxpajtin ne'kxkøjxp; ja' idø'on ne'egi tump pøni tø ja axøøkpi n'ixmajchindi jøts ja ndsinaa'yin tø nyiktigajchindi.

16 Wan ja tpaatti tkupøkti ja øy'ajtin kunuu'kx'ajtin pøn ya'at winmaa'ñ tpadundip, jøts møøt ja israelit jaa'dyi pøn idø'on ja Dios tyimyja'ajtyidip.

17 Ixyam ø nnigajpxy jøts ka'ap øts pøn xyiktuu'dukt ku nnigajpxt ja Cristo y'ixpøjkin; jabi yamxi øts nmøøt'aty ja ejxpajt ku tø nyikwøpy nyiktsiiky ku øts ja Cristo ngudani.

18 Meets migu'uktøjkti, jade'en ø nwa'añ jøts xpaattit xemikøjxp ja Dios kyunuu'kxin. Tiigyajpxy idø'on, jade'en idø'on ja yjatt.

JA NØKY MIDI JA PABLO TYANĪGAJX JA EFESIHT JAA'Y

Ku ja Pablo tnijayi pøn tjanchja'widip ja nwindson'ajtim Jesucristo yja' jam Efeso

¹ Øts Pablo'ajtpi, Dios ø kø'øm chojkingøjxp tø xpikta'aky Jesucristo kyudanaabyi jøts ø jade'en xyikugajpxy'aty. Ya'at nøky ja' øts yø ndanija'ayidip ja Efesiht jaa'y pøn jaty ja Dios yja'ajtpy jøts tjanchjawidi nayide'en ja nwindson'ajtim Jesucristo.

² Paat meets ja kunuu'kxin ja øy'ajtin midi ja Dios Teety møøt ja nwindson'ajtim Jesucristo yajkpy.

Ja møj øy'ajtin midi nbaajtimp ku Cristo nmøøt'ejtin

³ Ngajxajkindip ja Dios midi tyeety'ajtpy ja nwindson'ajtim Jesucristo, jabi tøts ja kunuu'kxin xmø'øyim ku ja Cristo nmøøt'ijtyim. Ja' y'øy'ajtin tø xanigajxa'andi ma ja chøøni.

⁴ Namga'anim naxwii'niit cho'onda'aky jøts ja Dios Teety kø'øm xwi'ijxyindi xwigø'øñindi Cristo køjxp ku ja xku'ayo'ombaajta'andi, jøts jade'en adøm wa'ats nwingunøjkxa'ant ja' wyingujkp niti pøky niti kadyeey.

⁵ Windi'ixyip idø'øn kø'øm ja Dios Teety ttanibiktaajkiñi jøts ja x'u'nkupøjkint Jesucristo køjxp.

⁶ Paty ejtp ngajxajkindit ja Dios sa tø tnanky'ijxyi ja myøj kunuu'kxin, ku ja y'U'nk tø tnahtskaxi midi kawinmaañi chøjky.

⁷ Ku xtsojknajxyim adøm ja Dios, paty adøm tø xyiknitsøøjkyim ku ja y'U'nk Jesús wyidsuun wyidajxy, jøts y'o'jkingøjxp xpøjkpimee'kxyim.

⁸ Kajaa Dios tø tnanky'ijxyi ja chojkin ku tø xmø'øyim ja wejin ja ja'gyukin,

⁹ jøts jade'en tø tnanky'ijxyi ja yu'uchwinmaa'ñi midi adøm ja kø'øm tø xanibiktaajkim sa dø'øn ja ttunwa'añ.

¹⁰ Jatp idø'øn jade'en sa dø'øn ja wyinmaa'ñ tø ttanibiktaagi, kuts ja xøøw kuts ja jumøjt tpaatt, winets ja Dios Teety tuki'iyi ttagidøjkigyøxt ja nwindson'ajtim Jesucristo ti jaty ejtp øy madsoo, yjanaxwiiñi uk jyatsajpøtpyi, jøts ja amuum kø'øm tngubajk'att.

¹¹ Kuts adøm idø'øn ja Cristo nmøøt'ajtyim, windi'ixyip adøm ja xwi'eixna'andi xwigo'onandi ja Dios Teety jøts jade'en xmø'øyindit midi xamidsojkimp. Tuki'iyi dø'øn ja ttuñ sa ja chojkin tø ttanibiktaagi.

¹² Tø dø'øn ja ttuñ jade'en jøts øøts idø'øn ja Dios ndakajxa'akt ja y'øy'ajtin ja myøj'ajtin, jabi øøsts idø'øn jawyeen tø njanchjawwi ja Cristo.

¹³ Meets nayide'en, ku xmadowdi ja Dios tyiy'ajtin midi tngajpxp ja yiknitsøjkin, jøts ku xjanchja'widøø ja Cristo, jade'en idø'øn ja Dios Teety mdamiguy'ejxidøø ja y'Espíritu Santo, jøts ja myiktami'ejxkapidit jøts ku meets ja Dios mja'atyidi. Jade'ents idø'øn ja y'ayuujk tyikniwaajch sam ja jawyeen tø tngajpxy.

¹⁴ Nay ja Espiritu Santo midi meets m'ejxpajtin'ajtpy, ja' myikta'ejxkaptip ku ja Dios ja myaay tyikwa'kxt. Jade'en ja Dios ttu'unt ku wyinaty tø tyiknitsoojkøjxni midi tø tniwanguixy. Jade'ents ja Dios yikwindsøøgit yikwinjawit myøj'ajtingøjxp y'øy'ajtingøjxp.

Ku ja Pablo t'amidøøy tpoøtsøøy ja Dios jøts ja wejin ja ja'gyukin yikmo'odit pøn ja Dios tpadundip

15 Tø nnijawi ku meets møk ja nwindson'ajtim Jesús x'ajot'aty, ku mee nayide'en oy tsuj ja tsojkin xmø'oy pøn jaty ja Dios ja'ajtiyidip.

16 Ejtp øts ja Dios ndamøjawi ndagunuu'kxyjawi ku ja mgunuu'kxyidi, ka' mee nja'dyigoy, ejtp meets nni'amidowi nnibøktsowi ku ø ndsapkajpxy.

17 N'amidøopy øts ja kunuu'kxy Dios Teety mididi tyeety'ajtpy ja nwindson'ajtim Jesucristo jøts ja mmo'ojiyidit ja wejin ja kajin mididi yikxon mdukja'gyukiyidip sa ja y'ejxi tyiyi.

18 N'amidøopy øts nayide'en ja Dios jøts mgujajiyidit mgudø'kxyidit, jøts jade'en xnijawidit ti dø'øn m'awejxtip mididi tø myiktaniwaadsowidi, ku janch kawinmaani ja maay mididi ja Dios tyagumaawyampy pøn ja yja'ajtpy,

19 jøts nayide'en ø n'amidøpy ja Dios jøts xnijawidit ku niti kya'adaniyi kya'adsø'øgiyi ku kawinmaani ja Dios myøk'ajtin mididi adøm ja xabudøjka'amp ku adøm ja njanchja'wa'andit,

20 nay ja'abi møk'ajtin idø'øn mididi ñanky'ejxi ku Cristo jap oo'kpi agujkpy wyimbijty jujky jadigojk, jøts ku ja nayide'en chajpajtnaa jøts ja Dios Teety y'aga'ngyøjøm ja kutujktaajk myøøji.

21 Jawani møj idø'øn ja Cristo yikpiktaajky, nipøn windsøn nipøn yikutujkpi tkami'aguijpxy'aty ya naxwiiñ jøts tsajpjotp, ixyam jøts xemikøjxp nipøn ja tkamibaat'att.

22 Tuki'iyi dø'øn mididi ja Dios tø tyikøjy, ja Cristo dø'øn tñitanaagyøjxp, ja' idø'øn tñigubajk'ajtp niduki'iyi pøn jaty ja Dios tjanchja'widip.

23 Jade'en sa tu'uk ja jaa'y ñine'kx kyaka'pxyi pøni ka'ap ja kyubajk ja te, nayide'en idø'øn ja janchja'wibitøjk ndejint kyaka'pxyidi pøni ka'ap ja Cristo ja ñigubajk'atyidi, jøts ja ka'ap ja myøk'ajtin myø'oyidi pø ja'axi tuki'iyi tyik'ejtp tyiknajxp ja naajx ja tsajp.

2

Tø ja Dios xyiknitsøøjkyim chojkingøjxp

1 Tø meets m'anmija'win y'ats'oookti ku mdsøonidi pøky'agujkpy, jøts tø yujkpyøjkti ja m'anmija'win jadigojk Cristo køjxp.

2 Ku meets y'ijty xpadundi ja ka'øwyinmaa'ñ mididi tpadundip pøn ja Dios tka'ijxyidip, ku ja miku'windsøn yja' xpabøjkidi mididi tkajxp ja tyumbitøjk jøts ja t'atskajpxjot'amøjkidit pøn ja Dios tkabadundip.

3 Nayide'en øø tø njaa'y'aty samdam meets. Tum ja' øøts y'ijty ndumpy ja axøøk ja kya'øyi mididi ja ne'kx y'amidøopy, jøts tum ja' mididi yigaap pidsømp winmaa'ñjotpy. Paty øøts idø'øn xjapaat'aty jøts øøts ja møj ayo'on nyikmo'ot nayide'en sam o pøn pojkitumbi.

4 Janch møj ja Dios pya'ayo'owin

5 ku tø tyikjukkpyiky adøm ja n'anmija'win Cristo køjxp, øy adøm ja axøøkpi ja yigaappi tø yajyk'o'jknayi ja n'anmija'win. Jade'ents idø'øn niduki'iyi adøm tø nñitsoojknandi ku ja Dios y'øy'ajtin myøøji.

6 Ku ja Dios tø tyikjukkpyiky ja Jesucristo, nayide'en adøm idø'øn ja ñamyayi møøt njujkpyikyim. Nayide'en idø'øn ja tpaaty ndejint ku ja tsajpjotpy pyatøjkiñi møøt adøm ja nniikxyim jøts ja jap møøt n'ejint.

7 Paty yø Dios Teety jade'en ttuuñ jøts t'ejxtit tñijawidit pøni ti pøni pøn wyinaty memp kidakp, jøts jade'en tñanky'ejxit mabaat ja chojkin mabaat ja y'øy'ajtin tø xmø'øyim Cristo køjxp.

8 Jabi ja Dios chojkingøjpxi meets tø mñitsø'øky ku xyiktundi ja mjanchja'win. Ka' meets kø'øm xmøøt'aty ja ñankñitso'ok'ajti, ja Dios ja tyaajkp.

⁹ Ka'ap ja n'øchinaa'yin xyiknits'o'ok'ajtint midì adøm kø'øm njatu'uñindip, paty ja nganadyamikajxandit.

¹⁰ Tø ja Dios Teety xanibiktaajkim Jesucristo køjxp jøts ja øchinaa'yin ndu'unint sayim ja wyinmaa'ñ ja tmøøt'aty.

Ja øy'ajtin midì ja Dios Teety tø xmø'øyim Cristo køjxp

¹¹ Ja'myatsti sà meets y'ijty mjatti mgubatti ku meets ja israelit jaa'y xkamigu'uk'attinim, kø'ømyixi ja y'ijty ñadyamøjawiyidi ja Dios y'ejxpajtin midì pyiktaktip ñe'kxkøjxp. Paty meets wenk myiknimadya'aky wenk myikniwinmayi ja'agøjxp ku xkamøøt'atti ja'abi ejxpajtin.

¹² Agoostujpy aduktyujpy meets ojts mdsøøni, ni xkanijawidi pøni pøn pøni ti ja tø tniimiñ midì tyejtíp Cristo. Aduky meets ja mduu', ts'ikxy meets ja mduu' mǎ y'ukyiknijawit ja øyajpxy ja ømyadya'aky pøni sadam ja Dios t'ødyunwa'añ ja na'xwii'ñit jaa'y. Ja Israelit jaa'y ja ja'ayi y'ijty tmøøt'ajttip, ka'ap y'ijty tu'ugyi ja Dios Teety x'ajot'atti, niti awejxin niti jøp'ejxin xka-jagyapti yǎ na'xwiiñ.

¹³ Ixyamts meets ja Jesucristo mja'ajtiniyidi y'o'jkingøjxp, o meets jagam jixkø'øm ja mdsinaa'yin tø xyiknaxy.

¹⁴ Tøts adøm ja xmø'øyim ja øy'ajtin ja jotkujk'ajtin. Jabi ja'ats idø'øn tø t'awaamuky t'agonmuky ja israelit jaa'dyi møøt pøn ka'israelit jaa'dyi. Jade'en ja tsep tø tyikudigøy.

¹⁵⁻¹⁶ Kuts ja y'o'jky jam kruskøjxp, jade'ents idø'øn tyikudigøjyi ja Moisés kyutujk midì kuwani yikpadump y'ijty, midì tyamøk'ajttip ja israelit jaa'yiyi. Jøts jade'en ja jadu'uk tsinaa'yin tyiktso'ondaajky, jøts jade'en tyiknamyujki ja israelit jaa'y møøt pøn ka'israelitjaa'y'ajttip. Tu'ugyits jade'en yjaa'y'attit jotkujk Cristo køjxp jøts jade'en ja Dios Teety tkamidsep'attit.

¹⁷ Jade'en'ampy ja Cristo myiiñ jøts ja øyajpxy ømyadya'aky tñigajpxy sà dø'øn ja øy'ajtin nbaajttint midì meets y'ijty mganija'wipnim, jøts midì øøts tø ngaja'gyuki, øy øøts ja tø nja'ixy, øy øøts ja tø njamøøt'aty.

¹⁸ Jabi Cristits adøm xuu'mø'øyindip sudso ja Dios Teety nbaajttindit ni'amuki wan t'israelitjaa'yidi wan tka'israelitjaa'yidi, jøts tu'ugyi adøm idø'øn ja Espiritu Santo myøk'ajtin nyiktu'uñimp.

¹⁹ Migugajp ja'winiyidip meets ixyam niduki'yiyi ja Dios janchja'wibidi, ka'ap ukjade'eni sam y'ijty. Ja Dios meets idø'øn mja'ajtniyidip møøt ja'adi pøn jaty ja y'u'nkja'wip.

²⁰ Jade'en idø'øn tpaaty ja Dios kyajp sam tu'uk ja møj tøjk midì møj tsaa tø yiktapojtsøøñ; jøts jade'en ja Cristo sam ja møj tsaa midì yiktapojtsø'omp, jøts ja kyudanaabyitøjk møøt ja kyuaaw jade'endi sam ja mutsk tsaa una'jkindi.

²¹ Adøm idø'øn tsaptøjk'ajtindip ndejnt pøn tjanchja'widip ja Dios. Kuts ja jaa'y pøn tka'ixyidip ja Dios jøts ja tjanchja'wiñidi, jade'ents adøm ja ndsaptøjk myøjandi midì ndejnt tø yikpojtsøøñ Cristo køjxp.

²² Nayide'en meets idø'øn ja Dios mja'ajtmiyidi jøts tø mduktatøjkmiyidi ja y'Espiritu Santo.

3

Ku ja Pablo tñigugajpxy'aty ja øyajpxy ja øy'ayuujk jøts ttukmadøy pøn ka'israelit jaa'dyi

¹ Ixyam ø puxøjkjotpy ndsøøni ja'agøjxp ku meets tø ndukmadøy ja Jesucristo ja yja' ku meets nayide'en mbaat'aty; xpaat ja' y'øy'ajtin.

² Pø mnija'wiñip meets ku øts ja Dios y'ø'y'ajtingøjxp tø xpikta'aky jøts øts ja yja' nngajpxit jøts meets ja øchinaa'yin xyiknajxnit.

³ Sam meets jap nøkyjōtpy jawyeen tø nduk'ixy tø nduknijawu ku øts ja Dios tø xukmadøy ja yu'uch winmaa'n, ku meets nayide'en xpaatt ja' y'ø'y'ajtin sam israelit jaa'y ja tø tpaatti.

⁴ Ku ja nøky xkajpxtit, jap meets idø'øn x'ext xnijawit ku øts ja Dios yu'uch winmaa'n nnija'wiyi midu ja Cristo yja' tnigajpxip.

⁵ Nijuuni ja'abi winmaa'n tø yiknigajpxy tø yiknijawu, ixymnim idø'øn ja Dios jade'en tø ttuk'ixy ja kyudanaabytøjkti ja kyugajpxtyøjkti ku ja Espiritu Santo tø y'agajpxiniyidi. Ja'abi jaa'y ja'adi, pøn ja Dios tø ñadyamiyojxniyidi.

⁶ Ya'at idø'øn yu'uch wyinmaa'n'ajtp midu ja Dios myøøt'ajtpy: ku dø'øn jade'en tjanchjawidit ja øgyajpxy ja ømyadya'aky midu xyiknitso'ok'ajtidip, winets jade'en ni'amukit tpaattit ja Dios myaay ja israelit jaa'dyi sam nayide'en pøn ka'israelit jaa'dyi. Jøts jade'en ñamayaidit jøts tpoøktit ja' midu Dios tø tni'adsowi Jesucristo køjxp.

⁷ Ka'ap øts xjapaat'aty ku øts ja øy'ajtin tø nyikmø'øy jøts øts ja øgyajpxy ja ømyadya'aky tu'ugyi ndu'unt, jabi jade'ents idø'øn ja Dios ja myøk'ajtin tø xamidsøky.

⁸ Meets niduki'iyi pøn ja Dios ja'ajtidip, øts idø'øn nayja'wiyip tyimyutsk, jøts øts jade'en ja Dios tø xanipiky jøts ndukmado'odit pøn ka'israelit jaa'dyi sa ja myøji ja Cristo y'ø'y'ajtin.

⁹ Tø øts ja Dios jade'en xanipiky jøts øts ja naxwii'ñit jaa'y nduk'ext nduknijawit sa dø'øn ja yu'uch winmaa'n windi'ixyip tø ttanibiktaajkiñi, jaayip ku ja naxwii'ñit tyiktso'ondaajky.

¹⁰ Paty idø'øn ja jade'en yjajty, jøts ja yiktuk'ext yiktuknijawidit ja ankilistøjkti jøts nayide'en pøn jaty møj'ajtip jap tsajpjōtpy mabaat idø'øn ja Dios ñijawi'ajtin yja'aty. Jade'en ja tñanky'ijxyi ku ja tpoøkmuky tkonmuky ja øybi ka'øybi jaa'y, tu'ugyi tñankñamyukyi janchja'wingøjxp.

¹¹ Jade'en ja tø ttuñ sa ja windi'ixyip tø ttanibiktaajkiñi ku ja nwindson'ajtim Jesucristo jade'en ja chinaa'yin tñanky'ijxyi tñankñijawiyi.

¹² Ku adøm ja nwindson'ajtim Jesucristo njanchja'wim, agujk jotkujk adøm nwingunøjkxiñant ja Dios Teety, niti tsø'øgi niti jøpjawu ja', ja'ayi nmøk'ajtim ja njanchja'win.

¹³ Paty meets nnøjmi jøts ka'ap mjotmay'oøktit ku øts yap puxøjkjōtpy n'ayøy meets køjxp. Jotkujk meets idø'øn ne'egi mnayjawiyidit, jabi jade'ents idø'øn ja Dios yja' yiknijaty.

Ja Cristo chojkin

¹⁴ Ku nja'myatskixy midu ja Dios tø ttuñ, jats øts jade'en ja Dios Teety y'ø'y'ajtin ngunuu'kxyja'wiyi pøn tyeety'ajtpy ja nwindson'ajtim Jesucristo,

¹⁵ jøts pøn tyajkp ja wyinmaa'n ja yujky'ajtin jap tsajpjōtpy sam naxwiiñ.

¹⁶ N'amidøøpy øts ja Dios Teety ja myøk'ajtin midu myøøt'ajtpy kawinmaañi jøts ttamigaxit ja Espiritu Santo, jøts jade'en myikjotmøk'atiyidit.

¹⁷ N'amidøøpy øts jøts jam m'anmija'wingøjxp y'ettit xemikøjxp ja Cristo jade'en ku janchja'win xmøøt'atti, jøts jade'en ja tsojkin møk xmøøt'attit midu ja Dios mdamiyoxtip,

¹⁸ jøts jade'en xja'gyukidit møøt pøn tpaøjktip ja nwindson'ajtim Jesucristo mabaat idø'øn myøji ja chojkin midu kawinmaañi.

19 Ni'amido'ojip meets jits x'ejxtit xnijawidit ja'abi tsojkin jøts jade'en tuki'iyi mdatøjkigyøjixiyidit ja Dios, øy ja ka' tyimyiknijawigyixy mabaat idø'on ja myøji.

20 Exyams t idø'on pyaat'aty i jøts adøm ja Dios ndagunuu'kxyja'wa'ant ndamøja'wa'ant ja'agøjxp ku møj ja myøk'ajtin midi tø xjamø'øyim. Ka'ap adøm ja nwinmaa'ñ myajadaajkyim, ni ka'baat ja yikja'gyuki mabaat idø'on ja myøk'ajtin myajada'aky midi adøm xyiktu'unimp.

21 iWan twindsø'jka'andi twinja'wa'andi ja Dios Teety xemikøjxp ni'amuki pøn jaty ja janchja'wiyip Cristo køjxp! Jade'en idø'on ja yjatt.

4

Tu'ugyi adøm nnayja'wiyindi Espiritu Santo køjxp

1 Ja nwindson'ajtimgøjxp øts tø nyiktsumy, paty meets n'amidøy nbøktsøy jøts øy yikxon mjaa'y'attit sam idø'on pyaat'aty ttu'undit pøn ja Dios tø wyi'ijxyidi wyigøñidi, ma meets idø'on nayide'en tø myikpiktakmidi.

2 Tuda'aky'atti, møøt'atti ja maa'kxujkin; nachokidi nixem niyam, kidi xa'ambøkti ku ti ku sa mjatti.

3 Tu'ugyi m'ettit, ja Espiritu Santo mbudøkiyidip jøts jade'en xemikøjxp y'ett ja jotkujk'ajtin.

4 Tu'ukpi jaa'y adøm pøn tpadundip ja Dios, tu'ugyi ja Espiritu Santo jøts tu'ugyi nayide'en ja awejxin nmøøt'ajtyim midi ja Dios tø tni'adsowi.

5 Tu'ugyi adøm ja nwindson'ajtim, jøts tu'ugyi ja njanchja'win, jøts ja nnøbajtin,

6 tu'uk ja Dios midi tnideety'ajtp niduki'iyi tuknax. Ja' tngubajk'ajtp niduki'iyi, adømgøjxp ja tnan'ky'ijxyi midi ja tyunwampy, jøts møøt ja y'ity pøn jaty ja yja'ajtpy.

7 Kija' adøm idø'on tø nyiktanibiktaajkindi ja ndunkjøøjp, sam ja Cristo køøm tta'ejxi, jade'en ja tø tyaky.

8 Paty ja Dios jade'en ja kyajpxy wyaan ku ja nwindson'ajtim wyimbijty jadigojk tsajpjøtpy ku tyik'awa'atspidsømgijxy pøn ja miku' wyinajty tø myimajadaajknuyidi jøts tmo'ot ja myøk'ajtin ja naxwii'ñit jaa'y.

9 ¿Tits idø'on jade'en tyijpy ku dø'on ñiimy ku wyimbijty jadigojk jap tsajpjøtpy? Ja' idø'on ku ya myiñ naxwiiñ jøts jade'en ja amutsk'ajtin tpaajty.

10 Nay ja' idø'on patøjkiñi tsajpjøtpy midi ya atsmeen naxwiiñ, jøts jade'en yipiktaajkni møjwindsøn jøts o ma jade'en tyiknigaxø'økt ja myøk'ajtin.

11 Jøts jade'en nidu'uk nidu'uk tmøøy kija' ja jaa'y tyunkjøøjp, jam pøn kudanaabyitøjkti, jam pøn kugajpxtyøjkmidi, pøn ja øyajpxy ømyadya'aky tyikyø'ømyidip tyiknaxmidip, jøts jam pøn kajpxwejmidip yik'ixpøjkmidip.

12 Jade'en ja yjaa'y ja ojts tuu'møøy sudso ja tyunkjøøjp ja tpadu'undit, jøts jade'en myiwenit ja yjanchja'win pøn jaty Cristo yja'ajtpy,

13 jøts kunim adøm ja yikxon ni'amuki ni'aga'pxi nnija'wa'andit ja Dios U'nk janchja'wingøjxp. Winetnims ja nwinmaa'ñ myøktaajkindit jøtsnim idø'on iiy nayide'en ndu'unint sam ja Cristo.

14 Ka'ap adøm ja mutsk winmaa'ñ n'ukmøøt'ajtna'ant sam o pøn tigati tpadungøjy ja'ayi ku tsuj tmadøy, øy ja yjanchi kyajanchi myøjpiktakpy ja'.

15 Ku adøm idø'on ja Cristo n'aduunaxkøjxint, jaanims idø'on nmøøt'ajtin ja tsojkin jøts jade'en nduk'ejna'ant nduknija'wa'ant ja nmigu'uk ja tiy'ajtin, jabi Cristits adøm xnigubajtimp.

16 Ku ja tngubajk'aty, sa dø'on øy ñijky ñaxy. Pøni sats adøm nidu'uk nidu'uk tø nyikmøøyim ja ndunkjøøjp, jade'en adøm ja xpudøjka'amp jøts

øy møk y'ettit ja yjanchja'win, jøts myøjidit myayidit ja wyinmaa'ndyi, ty-
atøjkiniyidit ja tsojkin.

Ja jemchinaa'yin midi ja Cristo tø xmø'øyim

¹⁷ Ya'ats øts idø'øn nnigajpxy nwindson'ajtimgøjpx: jøts ka'ap
jade'en m'uktsinaañidit sam ja chøønidi pøn tka'ejx'ajttip ja Dios, midi
tmøjpiktaajktip ja katumbi winmaa'ñ,

¹⁸ jøts agootstujpy abe'etstujpy ja yja'gyuki tmøø'tatti. Ka'ap ja tmøø'tatti
ja jujky'ajtin midi ja Dios yajkpy, ku ja kø'øm ka' ttsokti ku ja kø'øm ka'
tnijawiwya'andi.

¹⁹ Tø ja chø'ødyu'un'ajtin ja tyiktigøøñidi jøts jam tø ñagyiyajkniyidi ma jam
ja y'axøøkpi yigaappi yiktuñ.

²⁰ Ka' meets jade'en ja Cristo yja' tø mduk'ijxyiyidi tø mduknijawiyidi,

²¹ pøni tødam meets idø'øn ja xjanchpatmadoji ja yja' ku dø'øn ja jade'en ka'
wya'añ, ku dø'øn tø myiktukmadowdi ja tyiy'ajtin.

²² Majtstutnidi tuki'iyi pøni sa y'ijty ja mdsinaa'yin xyiknaxti, ku xpadundi
ja y'øybi kya'øybi midi pidsømp winmaa'ñjøtpy, midi mnadyawindaay'ajtidip
kø'øm.

²³ Myikjemyiñidip meets idø'øn ja m'aaw ja mjoojt sam ja mwinaa'yindi
nayide'en,

²⁴ jøts jade'en xpøjknidit ja jemchinaa'yin sam ja Dios kø'øm tø
mdamidsøkyidi. Jade'ents ja øchinaa'yin ñigaxi'iky ku øy ku tsuj ja
mdsinaa'yin xyiknaxtit, niti pøky niti kadyeey.

²⁵ Paty meets ka' m'uktaay'ajtnit; ku mmigu'uk xmigajpxt tiy janch idø'øn
ja møøt mmadya'akt, jabi tu'ugyits adøm idø'øn ja janchja'win nbaduu'ñim.

²⁶ Pøni m'ambøjktip, kidi mnankpyøkyetyidi; ka'ap ja m'aki xyikta'anidit.

²⁷ Kidi ja miku' xyikmøj'atti.

²⁸ Pøn y'ijty maa'tsp, wan ja tmajtstutni jøts ne'egi tyundøjkiñit, jøts jade'en
ja ødyunk ttu'unt jøts jade'en tpuðøkt pøn ayoop.

²⁹ Ka'ap axøøkpi kajpxy axøøkpi madya'aky xyiktu'undit, ja øybi madya'aky
ne'egi xyiktu'undit jøts jade'en ja mmigu'uk xmo'odit ja tigajtsin jøts ja
kunu'kxy'ajtin.

³⁰ Kidi meets xyikjotmay'øøky ja Dios ja y'Espiritu Santo, ja'ats meets idø'øn
m'ejxpajtin'ajtpy jøts jade'en ja Dios m'ejxkapidit ku meets ja mja'aty, ixyam
sam wyinaty ku mmøøgyøjxniyidit tuki'iyi ja nitsø'ok'ajtin.

³¹ Majtstutnidi tuki'iyi ja m'aki, kidi mjotma'atti, ja pøjpi tsä'pxpi
madya'aky jagam ja yiktanidi sam tuki'iyi ja' midi ka'øy nayide'en.

³² Yikxon meets idø'øn ne'egi m'øy'att, mnabya'ayowidip meets, jøts
nayide'en mnamyaa'kxukiyidit jade'en sam meets ja Dios Teety tø
mmee'kxyiyidi Cristo køjxp.

5

Sq dø'øn ja chinaa'yin ja tyiknaxtit pøn ja Dios u'nk'ajtiyidip

¹ Kawinmaañi meets idø'øn ja Dios Teety mdsøkyidi paty meets idø'øn ja
xpadu'unt sam ja mutsk una'jk tpadundi ja tyeety.

² Nanky'ejxidi ja mdsøjkin nayide'en sam ja Cristo xtsøjkyindi jøts ku ja
xku'ayo'owim adøm nbøkyøjxp. Jade'ents ja Dios t'øyja'wiyi'ñ kø'øm ku ja
jade'en ttuñ.

³ Ixmatskøjxti tuki'iyi ja kya'øybi. Kidi ø pøngapøn møøt mnamyøøt'atyidi, kidi xniwängøjxwa'andi tuki'iyi ja jujky'ajtin mididi ja naxwiiñ najxp, jabi ja Diosxi meets ja'ayi mja'ajtniyidip.

⁴ Kidi ja axøøkpí ja yiktsø'ødyumbi madya'aky xmøøt'atti, jabi ka'axi jade'embí pyaat'atyiyi. Ja Dios meets idø'øñ ne'egi ja y'øy'ajtin mnimadyajkidip.

⁵ Tøts meets xnijawi ku o pøn yaa'dyøjk o pøn tø'øxyøjk ñamyøøt'ajtkøjyidi, ok pønts ja axøøkpí yigaappi tyumpy, ok pønts ne'egi ttsojpk mididi ja naxwiiñit yajkpy, ka'afts ja mibaat pyaat'atyí tpaatt ja Dios kyutujk ma ja Cristo ttanitanit ja yjaa'y. Jabi wenkpi diosxi dø'øñ ndejint y'ajot'ajtnip pøn ja naxwiiñit øy'ajtin ttajotmay'oo'kp.

⁶ Kidi xyikmajada'akti ja win'øø'mbidi pøn wandip ku yø'øbi winmaa'ñ y'øyi jøts xpadu'undit, pø møkts ja Dios ja tyikastigipaatt pøn ja kabaduujnip.

⁷ Ixmatskøjxti tuki'iyi yø'øbi jaa'y.

⁸⁻⁹ Jabi jaj agujkpyts meets mdsinaa'ni kuts ja nwindson'ajtim møøt m'etti. Ka'ap jade'en ja mdsinaa'yin x'ukyiknaxnidi sam y'ijtyin. Ku ja nwindson'ajtim jade'en ja kuno'jkin xmø'øyim, jade'ents idø'øñ nnanky'ejxint nnankñija'wa'ant ja øybi tsinaa'yin, sam idø'øñ ndejint ja øy'ajtin ja tiy'ajtin jøts mididi paat'ajtip ndu'unim. Yikyø'ødyi dø'øñ jade'en ja mdunk.

¹⁰ Tun meets ja may'ajt jøts x'ejxtit xnijawidit mididi ibi dø'øñ ja Dios chøjkpy.

¹¹ Kidi xundi ja' mididi katump, ja' yø ttundip pøn agoostujpy tsinaadyip; ne'egi pudøki meets idø'øñ ja' jøts xukpaattit ja kuxiijndya'aky'ajtin.

¹² Janch tsø'ødyu'unin idø'øñ ja ñaxy ku adøm nnimadyajkindit sa dø'øñ ja chinaa'yin amaa'tsk tyiknaxti.

¹³ Øy idø'øñ ja nayide'en tpaaty ku adøm ndukja'gyukandit mabaat idø'øñ ja chinaa'yin ja kya'øyidi, wan wyinaty jade'en ja Dios o pøn tpabøjkni.

¹⁴ Paty idø'øñ ja wijkyajpxy wyaa'añ:

Wejnidi kajnidi meets;
kidi agoostujpy abe'etstujpy m'uktsinaa'ñidi,
ja Cristits ja kuno'jkin kudøø'kxin tyakp.

¹⁵ Patyts meets idø'øñ øy x'ejxtit sa dø'øñ ja mdsinaa'yin xyiknaxtit. Kidi jade'en mdsøøñidi sam pøn kube'ets kumon, wijy kejy xyiknaxtit.

¹⁶ Wijy kejy mnabyikta'agiyidit jøts tum ja øybi ttundi, jabi ja ka'øybixi yjawi ixyam nankmyøjtøkiwyajniyip.

¹⁷ Kidi mgawinmaa'mbyaatti, ixa'adi nijawidi pøni ti dø'øñ ja nwindson'ajtim tø mdamidsokyidi.

¹⁸ Kidi mnadyamiyøxyidi ja nøø ja pa'ak ja amu'ukyjaa'y'ajtin mididi ja windigø'øyin tyajkp, yikmøj'atti yikmajada'akti, nadyamiyøjxidi ne'egi ja Espíritu Santo.

¹⁹ Ja nwindson'ajtim idø'øñ ne'egi mnimadya'aktip, ku ja Salmos xkajpxtit jøts ja y'øøjik xawin'øødit. Tu'ugyi ja m'aaw ja mjooit xpikta'aktit.

²⁰ Nwindson'ajtim Jesucristo køjxp xamøja'wikyunaxtit ja Dios Teety ku ja kunuu'kxin tyaky køx kida'ak.

Sa dø'øñ chøøñidit ja teety ja taak ja u'nk ja una'jk pøn ja Cristo tpadundip

²¹ Jade'ents ja Dios xawindsø'øgidit ku nixem niyam mnagyupøkidit.

²² Ja tø'øxyøjkti pøn amajtskti ja ñiyaa'y pyadu'undip, nayide'en idø'øñ sam ja nwindson'ajtim tpadu'undit.

²³ Ja yaa'dyøjk tñigubajk'ajtp ja ñidø'øxy, nayide'en sam ja Cristo tñigubajk'aty ja yjaa'y, pøn nayide'en yiknitsøjkpy.

24 Jade'en sam ja Cristo kyupiky'atyiyi ja yjaa'y, nayide'ents idø'on ja amajtsk tøøxyøjkti ja ñiyaa'y tkupiky'ajtmidit tuki'iyi.

25 Ja amajtsk yaa'dyøjkti, choktip ja ñidø'øxy ja nayide'en sam ja Cristo tø tšøky ja yjaa'y ku ttamiyøxy ja yjujky'ajtin.

26 Paty ja jade'en ttuuñ jøts tjibijky tjigøøñ ja yjaa'y niti pøky niti kadyeey, tyikwatsni jade'en nøbajtingøjpx ku ja øgyajpxy ømyadya'aky yikpaduñ yik-janchjawwi,

27 jøts jade'en møøt y'ett jøts jade'en tnanky'ejxit tsuj wa'ats, ni tu'uk kya'øyi tyikwingaxø'økt.

28 Jade'ents idø'on ja yaa'dyøjk ttsoktit ja ñidø'øxy sam t'ejx'etti ja kyøømne'kx ja kyøømgøjpk. Pøn idø'on ja ñidø'øxy tšøjpk kø'øm idø'on ja ñadyamidsøkyi.

29 Pø ka'axi pøn ja ñe'kx tmidsep'aty, y'ejx'ijtpy ja' jøts yjujky'ett chuxk'ett; tymñayide'en idø'on ja Cristo ttunmi møøt ja yjaa'y,

30 jabi ñe'kx'ajtpyxi dø'on ja ndejint ja yjaa'y ma adøm nayide'en tø nyikpiktaajkyindi ma dø'on ndejint adøm nbajk'ajtyindi nxixy'ajtyindi.

31 Sam jap nøkyjpxy wya'añ: "Myajtstu'utp ja yaa'dyøjk ja tyeety ja tyaak jøts jade'en ja ñidø'øxy møøt y'ett ejximdam tu'ukpi jaa'y."

32 Nniija'wip øts ku ya'atpi madya'aky janchtyimchep, ja' idø'on yø wya'añ jøts yikja'gyukit waani sa dø'on adøm ja Cristo møøt tu'ugyi njaa'y'ajtyim.

33 Nayide'ents idø'on tnigajpxmi ku nidu'uk nidu'uk ja yaa'dyøjk ttsoktit ja ñidø'øxy sam kø'øm ñabya'ayøyi, jøts nayide'en ja tø'øxyøjk tkajpxkyupøktit ja ñiyaa'y.

6

1 U'nk una'jkti, ja' meets idø'on mdunkjøøjp'ajtpy ku ja mdeety xpadu'undit. Jade'en xyiknigaxø'øktit ku meets ja Dios xjanchjawwi, jade'en idø'on pyaat'aty.

2 Ja myidu'ukpi ka'ama'ayin midi myøøt'ajtpy ja awejxin, ya'at idø'on ja': "Windsø'øgi ja mdeety jøts ja mdaak,

3 jøts jade'en øy jotkujk xyiknaxt jøts yo'ont ja mdsinaa'yin ya naxwiin."

4 Meets u'nkteetyi, kidi o tigati m'u'nk xa'oiti, ots ja jade'en mmidsepwa'anidit jøts ka'ap m'ukyikajpxkyupøjknidit. Ja'gyuki køjpx meets idø'on ja ne'egi møøt mgajpxt mmadya'akt jøts jade'en xuk'ejxtit xuknijawidit ja nwindsøn'ajtim ja tyi'y'ajtin.

5 Tumbitøjkti, mimadowdi ja mwindsøndi ya naxwiin. Windsø'øgidi, padundi tuki'iyi midi ñi'ane'empy sam idø'on pyaat'atyi nmidu'unint ja Cristo.

6 Tungøjxti ejtp midi y'ane'empy, ka'ap jaayi yijy mnabyikta'agidit ku ja m'ijxyidi jøts jade'en ñadyijyi myikajxa'aktit. Jade'ents idø'on ne'egi xu'undit sam ndejint ja Cristo yikmiduñ, jøts tuki'iyi ja m'aaw ja mjoojt xpikta'aktit, jøts jade'en ja Dios yja' xpaduujnidit midi kø'øm tø ttanibiktaagi.

7 Kidi mdunk xuñ a'aka jot'aka, ja nwindsøn'ajtim idø'on ne'egi mdawindsø'øgip jøts ka' x'ixa'at ja jaa'y kyajxajkin.

8 Pø tøts xnijawidi ku adøm nidu'uk nidu'uk xkumaa'yin ja nwindsøn'ajtim pøni sa adøm ya øy tø ndu'uñim, wan pøn awa'atstum ka'awa'atstum tø tyiknaxy.

9 Meets yiktumbitøjkti, yikxon meets ja mdumbi ana'am, kidi xwinwopti xjøwopti. Ja'myats meets ku meets ja nwindsøn'ajtim nayide'en xmidunmi

midi tsajpjötpy tsinaapy, jöts ka'ap ja' twi'ixy twigöñ, tuknax adömdi ja' wyingujkp, wan tumbi tkatumbi.

Ja nigubojkin midi myöøt'ajttip pøn ja Cristo tjanchja'widip

¹⁰ Ixyam migu'uktöjkti, yikmökidi ja mök'ajtin midi tø mdatökiiyidi ku ja nwindson'ajtim xmöøt'atti.

¹¹ A'ejxidi abaadidi ja mnigubojkin midi ja Dios yajkpy, jöts jade'en mök xwindanidit ja miku' jöts ka' xyikmajada'aktit ja tyaa'y'ajtin.

¹² Ka'axi adöm nmöøtseptuñim ja jaä'y, ja'ats adöm möøt ja tsep nyiknaxjyim pøn kayik'ejxp kayiktomp, midi yiktseptump, ku ja tnigubajk'aty tuki'iyi ja kya'öybi ja na'xwiñ pøn ja Dios yja' tkatsojkip.

¹³ Paty meets x'ejxmukt xkonmukt tuki'iyi ja nigubojkin midi ja Dios yajkpy, jöts jade'en xmimajada'aktit wyinaty ku ja miku' ja kya'öy'ajtin mök tyikmiñ. Kuts ja jade'en xu'undit, mök mda'andit.

¹⁴ Mök mnabyikta'agidit, ja' mök'atti ja tiy'ajtin nayide'en ndejint sam ku nnachujma'ant, mök ndu'unint. Ja øchinaa'yin ja tiichinaa'yin midi mee mdumpy, ja' mnadyagubokiiyidip sam ja tseptumbi: yiknitsø'ögyi ja pujx midi kyachwiñ.

¹⁵ Nay'a'ejxiyidi nay'abaadiyidi jöts xkajpxyø'dyit ja øgyajpxy ja ømyadya'aky midi ja øy'ajtin yajkpy, tyimñayide'en ndejint xu'undit sam ja soldadi ja kyø'øk ttawa'agi jöts jade'en t'a'ejxi ja tsep.

¹⁶ Yø janchja'wints idø'on ne'egi mmöøt'attip jöts ka' sa mjattit o ti o sa mjatuñidi ja miku'. Jade'en idø'on ndejint mnigubokiiyidit sam tu'uk ja möj pujx tkayiknaxy ja tsujxjöøp ja tsujxpaä' ku ja soldadi ja pujx ñadyagubökü.

¹⁷ Janchjawidi ja yiknitsø'ok'ajtin jöts jade'en ja m'anmija'win niti nisa kyajattit, jade'en n'ukpiktaajkint sam tu'uk ja soldadi pyujxkujup y'adaniyi. Tamök'atti ja øgyajpxy ja ømyadya'aky midi ja Espiritu Santo mmöøjyidip jöts jade'en xniguboktit ja tiy'ajtin ja øy'ajtin sam ndejint ja soldadi ja y'espadi ja chinaa'yin yiknitsø'ögyi.

¹⁸ Dios'ajot'ajtingöjxp meets ya'at xungøxt, jöts ja Dios x'amido'odit xpöktso'odit tum ja y'öybi midi ja Espiritu Santo kyupijky. Ku ya'at xu'undit jøp'ejxti jøpjawidi, kidi meets jatyi xaka'akwa'añ, ni'amidowidi nibøktsowidi pøn jatyi ja Dios yja'ajtpy.

¹⁹ Ni'amido'owidik øts nibøktso'owidik øts nayide'en jöts ja Dios xmo'ot ja winmaa'ñ jöts øts agujk jotkujk nnigajpjt ja ñitso'ok'ajtin midi y'ijty ja Dios kyananky'ejxipnim.

²⁰ Tø øts ja Dios xnajtskaxi kugajpxy'ajtpi, ja'agöjxp ø tø nyiktsumy. Amidowdi ja Dios jöts øts tuki'iyi nyiktungøxt ja mök'ajtin sa dø'on pyaat'aty ku øts yø'öbi winmaa'ñ nnanky'ejxiyit nnankñijawiyit.

Ja kajpxpoo'kxin midi tyagugøjxiñip

²¹ Yø Ti'quico, yø' idø'on mduknija'wigyøxiyidip pøni ti pøni sa øts idø'on yam nduñ. Adöm nmigu'uk yø' pøn øts yam mök ja pudøjkin xmöøpy jöts jade'en ja nwindson'ajtim Jesucristo yja' nyikmøjit nyikaja'it.

²² Paty meets ndanigaxi, jöts mdukmadowiyidit sa øøts idø'on yam jöts øøts jade'en xajotkujk'att.

²³ Paat meets migu'uktöjkti ja tuda'aky'ajtin, ja tsojkin möøt ja janchja'win midi ja Dios Teety ñajtskajxip ñajts'ejxip möøt ja nwindson'ajtim Jesucristo.

²⁴ Jöts Dios Teety ja kunuu'kxidip pøn ja chojkin tø ttamiyoxti ja nwindson'ajtim Jesucristo xemikøjxp. Tiigyajpxy idø'on, jade'en idø'on yjatt.

JA NØKY MIDI JA PABLO TYANĠAJX JA FILIPENSIT JAA'Y

Ku ja Pablo jap puxøjkøtpy tnijayi pøn tjanchja'widip ja nwindson'ajtim Jesucristo yja' jam Filipos kajpxkøjxp

¹ Pablo jøts ja Timoteo, øøts nwindson'ajtim Jesucristo nwindson'ajtpy. İxyamts meets ja nøky tu'uk ndanijayi niwine'en ja Dios Teety mja'atyidi jam Filipos kajpjotp, møøt ja windsøndøjkti jøts ja møjaa'dyøjkti, niduki'iyi wine'en møøt m'etti ja Jesucristo.

² Paatti kupøkti ja Dios Teety jøts ja nwindson'ajtim Jesucristo kyunuu'kxin jøts ja yjotkujk'ajtin.

Ku ja Pablo tni'amidowi tniøbøksowi ja janchja'wibitøjkti

³ Ejtp øts ja Dios Teety ndukmøjawı øy mee winaak ojk nja'myech.

⁴ Ku øts Dios n'ajot'aty amumjoojt øts ja Dios n'amidøw nbøksøw jøts ja mbudøkiyidit;

⁵ pø tu'ugyixi adøm ja winmaa'n İxyambaat nyikyø'øyindi midi ja Dios yja'ajip, nayide'en sa ja xpadøjky'okwandøø.

⁶ Øts wamp jøts ku ja Dios Teety tyikmiweni tyikaja'i y'adø'tst ja myøk'ajtin midi ja tøm dukpadso'onda'agyidi, kunim mye'ent jadigojk ja nwindson'ajtim Jesucristo.

⁷ Øwysinmaapy øts idø'on ja'agøjxp ku njanchokti jøts ku nay ja Dios kyunuu'kxin x'adsinaajyiidi. Nitanibyim øts ja yja' jøts wa'lambyim øts jøts ku ja tyiyi yjanchi, øy øts ja tøm njadyimyjagupuxøjktøki uk øy øts wyinaty ja kudunktøjk ja windsøndøjk njadyimyjawinguwa'agidi.

⁸ Pø Diosxi tnija'wip wine'en mee njanchøky nayide'en sa nwindson'ajtim Jesus xtsøjkyim.

⁹ Jade'en øts idø'on n'amidøw nbøksøw ja Dios jøts ku øy tsuj mnamyayidit ku ja tyiiby xwinma'adyit, jøts ku ja ja'gyukin xjagyaptit øy juuni.

¹⁰ Ku jade'en xnijawidit jøts xpadu'undit midi øy midi tsuj, jade'ents xjagyaptit m'anmija'win øy wa'ats jøts niti pøky mgapaadiyidit ku mye'ent ja Cristo.

¹¹ Øy wa'ats wyimbidsø'ømdit ja mdunk midi ja nwindson'ajtim mdamidundip, jøts ja yjade'embı idø'on ja Dios wyindsø'jkinja'wip ja yjade'embı idø'on ja myøja'wip.

Ja Cristo øts xjagyajp amuum jøts ja' øts amuum xyikujky'ajtp øy yjuuni'att

¹² Migu'uktøjk, nimadowdi meets, øy øts idø'on yjawı njemjaty ndejaty, ne'egi nabyudøki ja yjawı tø'tukpatni, jinaxy ø ne'egi ngajpxwa'kxi ja Dios kyajpxy ja y'ayuujk.

¹³ Tyumnija'widip ja tøjka'dinaabyi ja'adi, jøts nayide'en øy pøn, ku øts ja' nyiktagudsumi ku øts ja nwindson'ajtim yja' nyikø'øyi.

¹⁴ Jøts ku jade'en tøm t'ejxti tnijawidi adøm ja nmigu'uk pøn ya'ajttip jøts ku øts yajp tsumy n'ity, ne'egi jinaxy ja tøm yjotmøktø'akti jøts ja jade'en tkajpxwa'kxidi ja Dios kyajpxy ja y'ayuujk.

¹⁵ Jats ya pøn øy'ajtin tsuj'ajtingøjxp tkajpxwa'kxtip ja Cristo yja', jats nayide'en pøn winaagin nugo tsepkojxp ta'ajkingøjxp ttundip,

16 jøts ja kyø'øm ja' tyikmøjtøkidi, jøts ja ja'ayi nugo xjaaktsepnipøkwa'andi ku øts yap puxøjkjøtpy;

17 pønts ttundip y'øwysinmaa'ngyøjxp, ja'agøjxp ja jade'en ttundi ku øts ja xpa'ayowdi, pø ñija'widipxi jøts ku ø nyam'aty, ku øts møk ja Dios yja' nyikyø'øyi.

18 Jøts çtiku øts nugo ndyimya'aty ndyimdyajt? Wan pøn tyikyø'øy y'øwysinmaa'ngyøjxp uk kya'øwysinmaa'ngyøjxp, pø nugo tum ja Cristo yja' tkajpxwa'jkkxidi; yø' ø ndajotkujk'ajtpy.

Jøts jaaktyimxyonda'akp øts yikxon,

19 pø ñija'wipxi øts ku øts ya'at ayo'on tuki'iyi nmimadakøxt, ja'agøjxp ku meets ja Dios x'ajot'aty jøts meets xni'amidowi xnibøktsowi jøts ku øts nayide'en xpudøki ja Espiritu Santo.

20 Ja'ats ø njøp'ijxpy jøts øts ja ka' natsø'ødyu'unt, tu'uk amumjoojt øts ja ngajpxit ja yja'. Ixyam idø'øn pyaät'aty yjaaktyimñigaxø'økt yikxon ja Cristo myø'ajtin mididi ø nyiktumpy, njajujky'aty øts uk nja'øøky njadigø y øts, ka' øts ja nwandijy.

21 Pø ja Cristoxi øts amuum xjagyajp, ja'ats ø nmøk'ajtpy. Nja'øøky øts, jinaxy øts ja øy xwimbidsø'ømxit.

22 Pøni jaakjujky'ajtpst øts ya, nay'øy'ajtpst ja nayide'en, jøts øts ja Dios yja' njaakyikyø'øyt, jade'ents ø ka'ap ñijawit pø mididi'ibi.

23 Tum jade'en tum øy, mididi'ibi øts ngupøkp ngagupøkp: ne'egi jadyimyja'ats'ookwamp øts, jøts øts ja Cristo xemikøjxp nmøøt'ejtñit, ne'egi jadyimyja'øy'ajtp ja jade'en;

24 jadu'ukts ja winmaa'nmyi, ne'egi jinaxy yjawi chøkyi jøts meets ka'ap jade'eñi nmajstsu'utt, jaakjujky'ajtp øts.

25 Patyts ø nwa'añ jøts ku mee njaakmøøtja'ajt jøts njaakpudøkidit jøts xajotkujk'attit ku tu'ugyi janchja'wingøjxp xyikmiwenidit xyikajajidit ja Dios yja'.

26 Jade'ents meets njaakminabyaāditi ja nwindson'ajtim Jesucristo kyunuu'kxingøjxp amuum.

27 Yø' mjadyimy'ejxtip yø mdsinaa'yin, jade'en xu'undit sa ja nwindson'ajtim yja' wya'añ. Øy meets jam nja'ats'ixy kø'øm, uk øy øts jadyimyjama jagam, ja' ø ndsøjkpy jøts øts ejtp ñijawit jøts ku meets ni'amuki mnabyudøkiyidi, tu'ugyi ja mwinmaa'ñ xyik'etti, xem yam ni'ijtyi xniwinmayidi janchja'wingøjxp sa y'øyt sa tyuda'akt ja Dios y'øyajpxy ja y'øy'ayuujk.

28 Ni xkatsø'øgidit pøn ja mdamidsep'ajtidip. Wa'ats yiknijawidi jøts ku ja windigø yjattit; jøts meets, ja nitso'ok'ajtin mee mbaatp mididi ja Dios yajkpy.

29 N'øyja'windip ku nwindson'ajtim njanchja'windi, jøts nayide'en ku ngu'ayo'ombaajtindi.

30 Nay ja' ayo'on mbaattip mididi ø tø nbaaty. Tu'ugyi yø tum jade'en n'adsinaa'yindi jøts ñija'widiptst sa øts ixyam n'ayo'ombat'adi'ich.

2

Ku Cristo yik'ayowim yjaty jøts ku tyik'awa'añ ja myø'ajtin sam ka'ap pøn

1 Jøts pøni myikjotmøktajkidi ja Cristo, pøni mdajotkujk'ajtidip ja y'ayo'ejxin, pøni jap ja Espiritu Santo xmøødiyidi, pøni ñija'widip sa ja chojkin sa ja pya'ayo'owin,

² yikxondaktik øts ku yikxon mdsøøni dmanidi, tu'ugyi tum jade'en mnamyayidi ni'amuki jøts tu'ugyi mwinmaydi.

³ Kidi ti xundi mgøømwinnmaa'ngyøjxp uk xyiktundi ja namyikaxi; yø' øy, ku tuda'aky jøts møj'ejxti ja mmigu'uk.

⁴ Kidi ja ngøømjaja'ajip nugo ndyimyikmøjtøjka'am, pø ja'axi tsojkip sudso ja mmigu'uk nbudøjka'am.

⁵ Yikyøødyi ja winmaa'ñi nayide'en sa ja nwindson'ajtim Jesucristo.

⁶ Øy ja wyinaty amuum ja Dios'ajtin tjajagyepy, ka'ap ja wya'añ jøts ja kuwani tyimñayide'en tmi'abaaty ja Dios Teety.

⁷ Ojts ja køøm tjibiky midi ja wyinaty amuum yja'ajtpy jøts ja jade'en ñabyikta'agyi sa øy pøn tumbi ku ja ya ñaxwiñ'ajty.

⁸ Jøts ku ja jade'en jaa'yin myiñ, ojts ja tkupiky'aty ku ja yjemjaty tyejaty. Ejtp øy tpaduñ jabaat ku ja y'ø'jky, øy tsaach'ijxyim ja o'jkin yjayikmøøy jam kruskøjxp.

⁹ Ja'agøjxp ja Dios Teety ja ojts myøjawiya jøts ja yikmøjtøjkiyøø, ka'ap pøn myi'abaadyi øy yjapøni,

¹⁰ ku pøn myadobaadit ja nwindson'ajtim øy maðsoo, nagyuxendyakøxidip ja ni'ijtyi,

¹¹ jøts ja niduki'iyi t'ejxkaptit jøts ja wya'andit jøts ku ja' wyindsøni ja Jesucristo, tum Dios y'ø'ajtingøjxp.

Sam ja jaj sam ja tøø'kxpi jade'en ja jaa'dyi pøn ja Dios ja'ajtidip

¹² Migu'uktøjkti, nayide'en ndsøky jinaxy xmimado'odit øy øts yam jagam, sam ø xmimadowdi ejtp ku meets jam y'ijty møøt ndsøøni. Windsø'øgi ja Dios, tuda'aky mnabyikta'agidit, jotmay'atti sudso ja nitsoojkin xpaattit.

¹³ Ku ja tsojkin xjagyapti jøts mdunwa'andi, ja Dios jade'en myikwinmaa'ajyidip, jøts nay ja' mbudøkiyidip ku ja xundi jade'en sa ja Dios mdamidsøkyidi øy tsuj.

¹⁴ Ejtni xoni tuki'iyi xu'undit, kidi amikajpxy xpøkti,

¹⁵ jøts ka'ap pøn mbøky'ejxidit, ja' myik'awa'andip jøts ku Dios m'u'nk'atyidi, øy wa'ats mjaa'y'attit ma ja ka'øy jaa'dyi ma ja kawindiy jaa'dyi. Jade'en meets jam mgaxø'økt sam ja xøøw tkujajy tkudii'kxy ma koots,

¹⁶ jade'en'ampy ku ja Dios ja kyajpxy ja y'ayuujk xyikyøøyidit. Jøts ku ja Cristo mye'ent jadigojk, møk mee ndaxonda'akt ku ø nnijawit ku ø ka' nugo tø ñiyikyøøyi ja Dios yja', ka' ø nugo ja ndunk ñiwindigøy.

¹⁷ Øy øts yø pøn xjaduku'oogi, ja' ñamyayi ka'pxp ja windsø'jkin midi ja Dios y'ity mmøødyip ku ja xjanchjawidi. Xondaqp øts jade'en, niduki'iyi nxondaajkindit.

¹⁸ Jotkujk'at mee nayide'en, ja'agøjxp ku øts nayide'en njotkujk'aty.

Yikajxtip ja Timoteo møøt ja Epafrodito

¹⁹ Pøni wamp ja nwindson'ajtim Jesús, ngaxp øts tsojk ja Timoteo jøts ja m'ats'ejxidit jøts ø njotkujk'att ku ja tmime'ent ja kajpxy ja ayuujk sa meets jam.

²⁰ Pø ka'axi jadu'uk pøn nayide'en wyinmay sam ø nwinmayin, sam mee njotmay'atyin jøts ja ø'ajtin xpaattit;

²¹ tum køøm winmaa'ñxi pøngapøn yiktundip jøts ka'ap ja nwindson'ajtim Jesucristo yja' t'uktunk'ajtniyidi.

²² Tøts xniɣawidi sã Timoteo øy tyuñ, sã øts ja møøt ja Dios kyajpxy ja y'ayuujk ngajpxwã'kxiyi, jade'en øts ja xpudøki sam ja jaa'y ja y'u'nk pyudøkiyi.

²³ Jade'ents ø nwinmay pøni sã øts yø nja' y'ukwin'øyi ngaxpts øts ja' jøts m'ats'ejxidit;

²⁴ n'ajot'ajty øts Dios jøts meets kø'øm tsojk n'ats'ext.

²⁵ Paat'ajtipts yjawɨ nayide'en ndanigaxit ja Epafrodito, ja nmigu'uk, pøn øts amuum møøt nduñ, pøn meets ojts xaniguexy jøts øts ja xpudøkit ku ti jaty y'ity kya'ity.

²⁶ Mjanch'ejxwajnidip ja' niwɨne'en mjam'atti, jøts mjanchjotmay'atyidi ja'agøjxp ku tø xniɣawidi jøts ku y'ity pyikyiyi.

²⁷ Tøts ja yjanch'atspikyiyi, jawaani ja tø kya'øøky; tøts ja Dios y'ayo'ijxyi jøts øøts ja tø xpudøki jøts ø nayide'en kyajinaxt ja njotmay, ti øts yam ndaxømpy.

²⁸ Ja'agøjxp meets ja ndyimdyanigaxwã'añ jøts xaxonda'aktit ku jadigojk xpaattit x'ejxtit jøts øts jade'en ka' nugo ndyimyjotmay'ookt.

²⁹ Taxonda'akti ku ja jam yja'att. Jade'en pyaat'aty; tu'ugyi ja Dios xjagyepxindi pøn jaty nayide'en tpadundip sam ja Epafrodito, minamyayidi yikxon;

³⁰ jawaani tø kya'øøky ku tmiduñ ja Cristo. Tø tmiwanjaty yik'ayowim ku øts ja pudøjkin xmø'øy, jøts meets ja ñamyayi mgudanɨyi øy mee mgaya'aty.

3

Ja tsinaa'yin midi tiy janch

¹ Migu'uktøjk, tajotkujk'ajtidi ja Dios kyunuu'kxin. Ka' øts n'adsepjawi øy øts yam jadigojk nja'at nay yø', tø ø nniɣawi jøts ku meets yø xyiktu'unt.

² Øyim mnay'ejx'etidit, jam ja jaa'y pøn ja wenk winmaa'ñ tyikyø'ødyip, pøn ttundip ja ka'øbyi, ja' pøn tta'ødyøkwyandip ja Dios ku ja ttsuki ñe'kx jøts ja ejxpajt jade'en ñabyiktaajkxiyi.

³ Jade'en ne'egi tpaaty, adøm idø'øn nmøøt'ajtyindip ja ejxpajt ja'agøjxp ku adøm ja yja' tu'ugyi nyikmøjtøjka'andi, jøts ku ja Cristo Jesús ndaxondaajkyindi, jøts ka'ap nmi'agijxyindi nmijotkijxyindi ja'ayi midi kaxø'kp iiy ja'ayi nikijxy.

⁴ Wa'ambimts øts inet jøts ku ja nayide'en y'øyi ku jade'en ja nachuki ñaxy kostumbri køjxp. Jawaani ka'pxy øts ja ne'egi ndyimñijawi ja'abi tsinaa'yin;

⁵ ku ngue'jxy kyiduktujk xøøw øts ojts ja ejxpajt nyiktu'unxi, israelit jaa'yxi øts; ja Benjamin øts ndeety'amøjip, jøts hebreit etjotp ø ngue'exy, jøts nay jam øts ndeety ndaak choondi. Fariseotøjk øts y'ijty møøt nnamyayi, nay ja Moisés øts y'ijty nbaduujnip ja kyutujk;

⁶ møk øts ja nnitani, jantymdyøøp øts ja njawi, jøts øts ja jaa'y nbawidetti ndagumatsiwyã'andi pøn jaty ja Cristo tjanchja'widip. Ka' øts y'ijty pøn ja kutujk xawindsø'øy sã ja tyikutuky, nadyijyi tniɣajpxy midi'ibi øy midi'ibi tøøp.

⁷ Midi'its øts y'ijty jade'en nmøja'wip, jade'en øts yø ixyam nja'wiñi jøts ku ka' mã tyuñ, ja'agøjxp ku øts ja nwindson'ajtim Jesucristo tø nnija'wiyi ja pya'ayo'owin.

⁸ Jøts pøni ti øts ja njaak'øyja'wip, tum kudigøøpy øts njawi, mã t'ukmi'abaat ku ja nwindson'ajtim Jesucristo nnija'want. Ja'agøjxp øts tuki'iyi tø n'ixmajtskixy, aayin pista'agin ja tuki'iyi ñøjkxkøjxni, ja'ayi øts tu'ugyi njøp'ijxy ja Cristo

⁹ jøts øts ja møøt n'ett, kaja'agøjxpiip ku øts ja kutujk ka'pxy nbaduñ, jade'en'ampy ku øts ja nwindson'ajtim Jesucristo tyiy'ajtin njanchja'wiyi jøts øts ja Dios Teety jade'en tø xkupiky. Ja'ats ja Dios kyupijky pøn ja janchja'wiyip.

¹⁰ Ja' ø ndsøjkpy jøts øts yikxon ndyimñijawit sa ja nwindson'ajtim tyiy'ajtin jøts øts ja myøk'ajtin ja xmo'ot midi ja yjagyeypy ku ja ojts tmimajada'aky ja o'jkin ku yjujkpyijky xemikøjxp, nja'ayø y ø nayide'en, uk njadyimyja'øøky ø nayide'en sa ja y'ø'jky,

¹¹ jøts øts jade'en njøp'ext ja jujkpyøjkin nayide'en sam ja yjujkpyijky.

Ja' n jotmay'ajtim sudso nbaajtant ja øy'ajtin

¹² Ka' nwa'añ jøts ku øts jade'en tuki'iyi ngøjø'ømit'ajtni, uk ka' nwa'añ jøts ku øts tyimwya'atsni tyimy'øyni; tu'ugyits øts ja nbanøjck'adi'ich, jøts njøp'ijxpy øts ja nbaatt midi øts ja nwindson'ajtim Jesucristo tø xaniwaadsowi patki'jyi.

¹³ Ka' øts migu'uk nwa'añ, jøts ku øts ja jade'en tø ndyimbyatkixy tuki'iyi; nja'dyigøøgyijxpy øts ixyam sa jaty ø tø njaty ngubety ti jaty tø tyuñi, ja' ø ndumpy jøts øts ja njotmay'aty midi mempnim kidakpnim,

¹⁴ jøts nja'jtint ma pyaatt'aty; ma yjøkixy jøts ja Dios ja y'ø'ajtin xukpaajtant jap tsajpjøtpy midi ja xaniwaadsow'wa'amp, jøts adøm ja nyikmø'øyint ja'agøjxp ku ja Cristo møøt n'ijtyindi.

¹⁵ Wine'en ja Dios møk njanchja'wa'andi, paat'ajtip jøts jade'en tu'ugyi nwinmaa'yindit. Pøni sats pøn wyinmay, jam pøn ja wenk winmaa'ñ tpaaty, nay ja Diosts ja tuknijawiyip midi tøøp.

¹⁶ Tu'ugyits yø winmaa'ñ nbøjkindit, jøts yø' idø'ø n nyiktu'unindip amuum sam adøm yø tø nnija'wa'ant.

¹⁷ Pa'ejxtik øts, migu'uktøjk, jøts ejxti nayide'en pøn nay yø'øbi tyiktundip midi mee tø nda'ane'emy.

¹⁸ Jaa may pøn ja nwindson'ajtim Jesucristo yja' tkamøjawidip jøts ja wyinmaa'ñ ja' yiktundip jøts jade'en chøønidi. Tø meets yø kawinaak ojk ndukmadøy, ixyats øts jadigojk yik'ayowim nnigajpxkojmi.

¹⁹ Ka'ap ja wyindø'ødit, windigø y ja nøjck yjatti. Ja kyø'ømwinmaa'ñ sa kø'øm tsokti, ja' yikmøjtøjkidip, ja' ñamyayi dios'ajttip. Ne'egi jinaxy ja ñadyamikexyidi midi'ibik idø'ø n ja yjawi tyatsø'ødyu'undip, ja' nugo yjotmay'ajttip sa jaty ti jaty ya naxwiñ.

²⁰ Ja' adøm amuum xkøjø'ømit'ajtindip jap tsajpjøtpy, jøts ja' adøm njøp'ijxyindip jøts ku ja jap choont ja nwindson'ajtim Jesucristo pøn ja pøky ttuknitso'ok'ajtp.

²¹ Ja' adøm xyikwimbejtindip xyiktigajtsindip jøts nayide'en njajtant sam ja kø'øm amuum ja kunuu'kxy'ajtin tmøødi, jøts nay ja myøk'ajtin ja jade'en yik'awampy ku jade'en xu'unin, pø ja'axi tuki'iyi tnitanaagyøjxp øy ti.

4

Xondakunaxti ku Dios xjagyeypyindi

¹ Njantyimyja'ats'ejxwändip mee migu'uktøjk, mee ndajotkujk'ajtpy, meets jam Dios wyingujkp ndamajada'akp, jøts tu'ugyi jaaktyimy'ajot'atti ja Dios.

² Ngajpxñigaxidip øts ja Evodia jøts ja Sintique jøts ø møk nnøjmi, wan tnayja'gyukiyidi tkajpx'øyidi ti ka'ø'xyidip jøts tu'ugyi ja Dios yja' tyikyø'øyidit, pø tum ja'axi køjø'ømit'ajtidip.

³ Mets migu'uk, pudøki yø Evodia møøt ja Síntique, ja' øts ojts ngajpxwa'kxi ja Dios kyajpxy ja y'ayuujk møøt ja Clemente jøts møøt jadu'ukti pøn jaty øts ojts xmøøtundi. Wa'ats ja Dios ja nija'wiyidi pøn jaty ti jaty ja xyøøwdi.

⁴ Ejtp ja Dios yja' xaxondaajkidit. iNjaaktyimnigajpxy øts yikxon jøts mxonda'aktit!

⁵ Wan øy pøn mnija'wiyidi jøts ku mee tuda'aky mjaa'y'aty. Ja'myats'etti ku tsojk ja nwindson'ajtim myenit.

⁶ Kidi ti x'ayo'onjawidi, tukmadowdi ne'egi ja Dios ku ja x'ajot'attit; ja' m'amido'odip mbøktso'odip ti mga'ejtxidip, jøts tukmøjawidi tukunuu'kxyjawidi ku wyinaty myikmo'odi mididi m'amidoodip.

⁷ Jøts ja mmo'ojidit ja y'øy'ajtin ja tuda'aky'ajtin mididi ka'ap ti tmi'abaaty sa adøm njaninmaa'yam; ja'ats tyikjotkujk'atp ja mwinmaa'ndyi jøts ja m'anmija'windi jøts ku ja nwindson'ajtim Jesucristo møøt m'etti.

Ja' mwinma'adyip mididi øy

⁸ Yø', migu'uktøjk, mjotmay'attip mididi tiy mididi janch, mididi xpaat'ajtindip, mididi øy pidsømp, mididi wa'ats, mididi tsøkyim, mididi øy agajpxy pidsømp o madsoo. Tum ja y'øybi mwinma'adyip mididi ønigajpxni ønimadyakni.

⁹ Yiktundi mididi tø nduk'ixpøkti, sa jaty tø n'ana'amdi, jade'en xu'undit sa øts ojts nwa'añ jøts sa øts ojts kø'øm x'ejxti ku øts ja ojts nduñ: tundits jade'en, winets ja Dios nijuuni mga'ixmatsidit, ejtp ja yjotkujk'ajtin ja mnøøgyunaaxiyidit.

Ku ja filipensit jaa'y tmay'atti ja Pablo

¹⁰ Xyikxondakp øts ja Dios jøts ku meets jadigojk xja'myech. Kidi jade'enip ø ndijy jøts ku meets tø xtyimya'dyigøøni, ja ku ka' nibidsømi juuni mee xpudøkit.

¹¹ Ni ka'ap ø nwa'añ jøts ku øts yam sa ndyimyjaty. Tø øts yø n'ejaxandigøøni. Yø'øyi ø ndajotkujk'ajtpy mididi nmøøt'ajtpy.

¹² Wa'ats ø nnijawi sa yik'ayowim nyiknaxint, jøts nayide'en sa ngumeeñ'ajtant. Tø øts yø nyikyuyj jøts øts øy mididi ngawingudsø'øgit, øy ø ngay øy ø ngakay, uk øy ti y'ity kya'ity.

¹³ Øy ø mididi nwinguwa'agi, ja nwindson'ajtim Jesucristo nmøk'ajtpy, ja' ø xkuwamp.

¹⁴ Øy'ajtpst ku meets ja n'ayo'on nayide'en mnadyapaadyidi jøts øts jade'en xpudøkidi.

¹⁵ Mnayinija'widipts wine'en jam Filipo kajpxkøjx mgugajp'atti, ku øts ja Dios kyajpxy ja y'ayuujk ojts ngajpxwa'kx'okwajni, ku øts ojts nniikxy jam Macedonia kajpxkøjxp, pø meeçixi ojts xaniguexy ja pudøjkin mididi ja Dios mdamiyojxtip ja'agøjxp ku ja wyinaty ja myøk'ajtin tø xpaajtiyidi.

¹⁶ Jøts ku øts jam wyinaty Tesalónica kajpxkøjxp, nayi meetsxi ojts xaniguexy ja meeñ majtsk ojk, jøts øts ja nyiktu'unt ti jaty ø ka'ejtxip.

¹⁷ Kayø'øjip ø nugo njotmay'ajtpy jøts øts ja nugo n'axajit øy ti; ja' ø ndsøjkpy jøts meets yjaaknipatt ja mja' jam Dios wyingujkp.

¹⁸ Tits ø kayikmøøpy, ne'egi o ti tø nyikmøøy. Tyimchaachjam yø kajaa mididi yø Epafrodito tø xamigaxidi. Jøts jade'en ja Dios yø tjawi kunuu'kxy, sa ja poom pya'akxuuky, ja windsø'jkin yø ñamyayi yikmøøpy.

¹⁹ Ja Dios pøn xjagyajpindip, ja' mmo'ojidip, ja' tyikwimbetp tyiktigatsp pøni ti mga'ejtxidip. Ja nwindson'ajtim Jesucristo møøt ja Dios Teety, ja' tjagyajtpip ja kunuu'kxin ja jotkujk'ajtin mididi nijuuni niwindem kagudigøøpy.

²⁰ ;Xemikøjx Dios Teety møj janch ja kunuu'kxin tjagyepy! Jade'en idø'øn ja yjatt.

Ku kyajpx'abaadiwya'añ jøts ja kajpxpoo'kxin t'ukyajkni

²¹ Nguejpxy øts ja kajpxpoo'kxin nwindson'ajtim Jesucristo køjxp jøts xukmado'odit niduki'iyi pøn jaty ja Dios jagyajpidip. Ñayi kyajxidip ja kajpxpoo'kxin ja'adi pøn jaty øts yam nmøøtti.

²² Niduki'iyi pøn ja Dios ja'ajtidip ya, jøts ja'adi pøn namyajyidip ma ja romanit windsøn ja tyøjk, nayi mdanigajxidip ja kajpxpoo'kxin ja'adi.

²³ Ja nwindson'ajtim Jesucristo mgunuu'kxidip niduki'iyi. Tiigyajpxy idø'øn, jade'en idø'øn ja yjatt.

JA NØKY MIDI JA PABLO TYANĪGAJX JA COLOSĪT JAA'Y

Ku ja Pablo tnijayi pøn tjanchja'widip ja nwindson'ajtim Jesucristo yja' jam Colosas kajpkøjxp

¹ Pablo øts, øts ja Dios tø xamidsøky jøts øts ja tø xpikta'aky nwindson'ajtim Jesucristo kyudanaabyi. Jade'en'ampyts øts møøt ja Timoteo

² ya'at nøky nja'ay jøts øø ndanijayi pøn jam Colosas kajpjotp ja'ajtidip ja Dios, pøn jaty jam tjanchja'widip ja Cristo, ja yiknitsokpi. Wants ja Dios Teety ttuñ ja may'ajt jøts ja myo'ojidit ja kunuu'kxin jøts ja myo'ojidit ja tuda'aky'ajtin.

Sa ja Pablo tni'amidowi tniøktsowi pøn jaty ja Dios tjanchja'widip jøts ja tukmadøy ja Dios

³ Ejtp øøts ja Dios ndukmøjawi ndukunuu'kxyjawi midi nwindson'ajtim Jesucristo tyeedyip ku øøts ja' n'ajot'aty meets køjxp.

⁴ Tøts øø nnimadøy jøts ku meets ja nwindson'ajtim Jesús møk xjanchjawi pøn yiktejp Cristo, jøts ku nayide'en xtsokti xpa'ayowdi ja mmigu'uk pøn jaty ja Dios ja'ajtidip,

⁵ ja'agøjxp ku tu'ugyi xjøp'ejxti midi myikmo'owandip midi jap pøkji'iky ejtp jap tsajpjøtpy. Tøts xnijawidi tigøjxp xjagyapti ja jøp'ejxin, ja'agøjxp ku tø xmadowdi ja Dios kyajpxy ja Dios y'ayuujk, ja Dios tyiy'ajtin midi yiknitsokp.

⁶ Nay yø'øbi kajpxy nay yø'øbi madya'aky midi ojts myiktukmadowdi, janch møjtak'adøtsp yø icyam, jøts tum øy wyimbidsimy øy madsoo wine'en ja naxwii'ñit, nayide'en yjaty sam tø mjatti kuyip xmadoo'okwandøø ja Dios chojkin ja pya'ayo'owin, jøts tø xnijawidi jøts ku yø tyiyi jøts ku yø yjanchi.

⁷ Yø'øxi øøts ja nmigu'uk Epafras ojts mduk'ixpikyidi pøn øøts amuum nmøøtumpy jøts yjanchpaduujñip ja nwindson'ajtim yja' ja', jøts ja' meets idø'on jam tø mbudøkiyi.

⁸ Nay ja' øø tø xukmadøy sa meets ja tsojkin xjagyepy midi ja Espiritu Santo mmøøjyidip.

⁹ Patyts ku øøts ja jade'en ja'ayi nnimadøøy, winetyipts øøts ja Dios nijuuni ngamimøn meets køjxp, ejtp øøts ja n'amidøy jøts ja Dios yikxon mduknijawiyidit ja winmaa'ñ sa ja ttsøky, jøts ja mmo'ojidit wine'en ja wijy'ajtin kejy'ajtin, jøts nayide'en sa xnimadojidit ja Dios yja'.

¹⁰ Jade'ents øøts ja n'amidøy nbøktsøy jøts yikxon mjaa'y'attit sam idø'on pyaat'aty ttu'undit pøn ja Dios ja'ajtidip, jøts tum ja' mdu'undip midi ja Dios tyajotkujk'ajtpy, midi øy midi tsuj wimbidsømp m'ødyu'uningøjxpti, jøts yikxon xnijawidit ja Dios.

¹¹ N'amidøøpy øøts ja' jøts ja mmo'ojidit ja kyunuu'kxin ja myøk'ajtin, jøts xmīdanidit øy midi ayo'on, jøts xyiktuda'aktit ja mwīnmaa'ndyi midi ne'egi mdajotkukidip,

¹² jøts ja Dios Teety xukmøjawidit xukunuu'kxyjawidit jøts ku ja tø xanibuktaajka'am ku adøm xpaat'ajtyim jøts adøm ja xmø'øyim mā ja kyunuu'kxin, midi ja yikmøødyip pøn jaty ja Dios ja'ajtidip.

¹³ Pø ja'axi tø xukniwaajchim mā amuum myajada'aky ja wimbeets'ajtin ja kugoots'ajtin yja', jøts ja tø xyiktøjka'am mā ja Dios U'nk ja kutujk ttanītani ja yjaa'y,

14 pøn ojts tyaky ja nitso'ok'ajtin jade'en'ampy ku tø xku'o'jkandi jøts adøm ja xpojkipimee'kxyindi.

Ku ja Cristo ojts xku'o'jkandi adøm nbøky, jade'en'ampyts ja Dios Teety jaadigojk xmi jotjimbijtyindi

15 Ka'ap ja Dios Teety yik'ixy yiknijawi, jade'en'ampyts ojts ñanky'ijxyi ku ja y'U'nk tyikmiñ, pøn tu'uk mõj, ka' pøn jade'en.

16 Ja' Dios Teety tyukyik'øyi yii'ñ tuki'iyi ti jaty ejtp tsajpjøtpy, ti jaty ejtp na xwiin, midi kaxø'jpk midi kagaxø'jpk. Jøts ja tyik'øyi sa ja ankilistøjk ñagyutujkmø'oyidi, ja'ats ja tyik'øyi yii'ñ jøts ja' ja tja'ajtp.

17 Jaayim ja yiknitsokpi wynatyni, ja Cristo, jøtsnim øy ti kyaxi'ikñim, jøts ja' tuki'iyi tkøjø'ømit'ajtp ti jaty ja'ajtp.

18 Ja' tñigubajk'ajtp ja jaa'y pøn ja Dios yja'ajtpy, jøts ja' tjagyajp amuum yø'øbi jaa'dyi. Ja' tyikjujky'ajtp jøts ja' midu'uk tmimajadaajk ja o'jkan ku ja yjujky'ijky, jødsyim ja jøp'am ejtp tyimy'ity.

19 Ja Dios Teetyts ja køøm tyikjajt jøts ja tyikdiosajty ja nwindson'ajtim Jesucristo amuum,

20 jøts nay ja' nayide'en tyikjajt nwindson'ajtim Jesucristo køjxp jøts ñamyi'øy'atidit tuki'iyi midi ejtp tuktsajp'agida'aky, jøts yjotkujk'attit wan tjapøniidi midi ja'ajttip na xwiin, jøts midi jap nayide'en tsajpjøtpy. Jade'en'ampyts ja yjotkujk'ajtin ja ñamyayi tpaatti ku ja nwindson'ajtim Jesucristo y'ø'jky kruskøjxp.

21 Ja mga'øwynmaa'ñ ja mga'ødyunk ja' meets y'ijty myik'ejtidi jagam i xkøøm, jøts m'am mjotp xmi jotma'atti ja Dios; ja Diosts tø myikjotkukiyidi jøts ja tø xmi jotjimbetti,

22 ja'agøjxp ku ja nwindson'ajtim y'ø'jky jøts ja wemp ijxy tyimy'ats'ayo'ombaajty ñikøjxp kyubajkp. Jade'en'ampyts ja jade'en ttuun jøts meets ja Dios Teety xwingunøjkit ku tø mbøkwyatsniidi, niwine'en mga'ukyikpøky'ejxniidi.

23 Jade'engøjxpts chøkyi jøts tu'ugyi amumjojt xyikyø'ødyit ja mjanchja'win tiy'ajtingøjxp. Kidi meets ja xkajøp'ejxni sa tø xnijawidi midi yiknitsokp. Yø'øbi kajpxy yø'øbi ayuujk yikajpxwa'kxp øy sudso ya na xwiin. Pablo øts jøts øts yam tø nyiktanipiky jøts øts ja jade'en ngajpxwa'kxi ja yja'.

Ku ja Pablo yiktanipiky jøts tpudøkit pøn jaty ja Dios tjanchja'widip

24 Jotkujk øts nnayjawi øy mee njagu'ayowi. Nay jade'en ø ñamyayi ja ayo'on nbaaty sa ja nwindson'ajtim Jesucristo ku ja tku'ayo'owiyii'ñ pøn jaty ja janchja'wiyip.

25 Øts tø xaja'aty jøts øts ja nbudøkidit pøn ja Dios tjanchja'widip. Ja' øts ja Dios tø xanipiky jøts meets nmo'ot ka'pxy ja Dios kyajpxy ja Dios y'ayuujk,

26 jøts mee ndukmado'ot midi pøn tkanija'wipnim midi y'ity yu'uch'ejtp, ma windi'ixyip ja jade'en pøn tkanijawi. Ixyamts ja Dios tuknijawiwya'añ ja jaa'y pøn jaty ja paduujniyip ja yja'.

27 Ja'ats ja Dios ja tuknijawiwya'jnidip ti øy'ajtin idøøn ja yjade'embi yjagyepy jøts ja yikmo'odit pøn ka'israelit jaa'dyi. Jøts ja' idøøn y'ity kayiknija'wip jøts ku ja Cristo ja' mee mjagyajp, jøts ja' tyajkp ja jøp'ijxy'ajtin jøts ku nøjx xpaajtidi ja Dios y'øy'ajtin ja Dios chuj'ajtin.

28 Ja Cristo øøts ja yja' nngajpxip, jøts øøts niduki'iyi øy pøn ngajpxwiy jøts øø nyik'ixpiky øy pøn, jøts yikxon tñimado'odit, jøts jade'en nidu'uk nidu'uk tñijawidit yikxon ku tmøø'tetti ja Cristo.

²⁹ Yø'øts ø nduñ'ajtpy jøts øts jade'en amumjoojt nnadyamiyøxyi, øy ø nwanjaty, ja'ats nyiktumpy ja Cristo myøk'ajtin midi øts ja xmøøpy.

2

¹ Ja' ø ndsøjkpy jøts meets xnijawit sa mee ngamijotkuki ku øts ja Dios n'amidøy ja pudøjkin meets køjxp jøts nayide'en pøn jaty tsinaadyip jam Laodicea, nmijotigøøpy øts nayide'en ja nmigu'uk pøn ø xka'ixy'ajttipnim.

² Ja'ats ø ndsøjkpy jøts xjagyaptit ja tsojkin amumjoojt nixem niyam midi ja Dios yja'ajip midi øy midi tsuj pidsømp, ku ja awejx'ajtin xjagyaptit jøts xja'gyukidit sa xnijawidit ja Cristo pøn ja Dios nugo ajawi ka' pøn ttuknijawi;

³ Ja'ats idø'øn tmøøt'ajtp ja øy'ajtin ja tsuj'ajtin, ja wejin ja kajin.

⁴ Jade'engøjxp meets ya'at ndukmadøy jøts kidi pøn mwindaay'atyidi pøn tum jaayi tkajpøxtip.

⁵ Øy ø kø'øm nguidiyimjam'aty, jamts øts ja nwinmaa'ñ nyik'ity, jøts ndaxondakpy øts ku ø nnijawi ku øy yikxon xundi jøts nayide'en ku tu'ugyi xjanchjawidi ja Cristo.

⁶ Paty ja'ayi xu'undit midi tsojkip, sa myiktani'ejxidi myiktaguwanidi ku xjanchja'wiy'okwandøø ja nwindson'ajtim Jesucristo, ja'ats idø'øn tu'ugyi mdu'undip jøts ja jade'en møøt m'ettit.

⁷ Ja' amuum mnadyagidøkiyidip jøts ja' idø'øn mmøk'ajtin'attip. Ja'axi mjanchjawidip sa oits myiktani'ejxidi myiktaguwanidi jøts jade'en ejtp ja Dios xukmøjāwidit xukunuu'kxyjāwidit sam ja tø xnijawidit ku ja ixpøjkin myikmøødyi.

Ja øchinaa'yin midi yikpatp Cristo køjxp

⁸ Øyim mnay'ejx'etidit; kidim ja xmibøkti ja jaa'y pøn mdawin'øønwanjnidip ja ixpøjkin, midi wenk winmaa'ñ tyikyø'ødyip uk midi tyiktundip ja tum ja taay; ja' ja' yiktundip sa ja jaa'y chinaa'yindi sa jaa'y wyinmaa'ndyi, ka'axi ja tyikmøjtøjkiiyidi ja Cristo yja'.

⁹ Pø ja Cristoxi kø'øm amuum tmøøt'ajtkøjxp ja Dios'ajtin,

¹⁰ jøts kumi mmøøt'ijtpy meets ja', tits mee mjaaka'ejtxip. Ja' tuki'iyi tjagyajp jøts ka'ap ja pøn myi'abaadyiyi, wan ja mā tyimyatsoondi, wan tjamiku'ku'pyi uk wan tjanayjapi tsajpøtpy.

¹¹ Ku meets ja jade'en xmøøt'ity ja Cristo, tø meets ja ñamyayi mbiktaajkxiyi ja ejxa'anin kyunuu'kxingøjxp, ka'a'pts ja nayide'en tø mbiktaajkxiyidi sam ja israelit jaa'y ñadyuñidi. Ja' mee m'ejxa'anin'ajtpy ku xpaatti ja nitso'ok'ajtin jøts ja mbøky mniwā'achidi midi yiktump ku ya naxwiiñ njaa'y'ajtyindi.

¹² Ku ja nøbajtin xpaatti, jade'en meets idø'øn ñamyayi ja Cristo møøt m'ø'jky, jøts nayide'en ñamyayi mjujkyøjkti, ja'agøjxp ku tø xjanchjawidi ja Dios, pø ja'axi ja myøk'ajtin majadaajk ku ja Cristo yjujkyijky.

¹³ Jade'en ja ngajpxin, øøky meets y'ijty myik'ejtniyidi ja mbøky ku ka'anin ja ejxa'an xpaatti, midi yikpatp nwindson'ajtim Jesucristo køjxp; xjats ixyam ja Dios tø mmø'øyidi ja jujky'ajtin jøts mee ñamyayi møøt mjujky'aty ja nwindson'ajtim Jesucristo, ja' mee mmaa'kxip tuki'iyi ja mbøky.

¹⁴ Tøts ja Dios tjibiky ja kutujk jøts ka' y'uktunit midi y'ijty myiktanigutujk'ajtp, midi y'ijty xjanch'adsejpindip jøts ja xuktaja'jtyindi ja nbøky jøts adøm ja yiktagubejtyindi. Jade'en'ampy ja Dios ja tyikudigøøpy ku ja nwindson'ajtim kyiruspejty.

¹⁵ Ja'ats ja tyamimajadaajk ja miku' jøts ja tø tyik'amutskiyi ja myøk'ajtin jøts ja jade'en ttuk'ixy ttuknijawi ja naxwii'ñit jaa'y.

Jotmay'atti ja Dios yja'

¹⁶ Jade'en'ampyts ka' pøn xmøjpikta'aktit ku pøn mdabayø'øwya'andit ja mgaajyik ja m'uujkikti, uk ku ja xøøw xkabadundi mididi winsamaaŋ jøts mididi winbo' yiktump.

¹⁷ Ja' yø y'ity wya'añ jøts yø tñigajpxy mididi menwamp, ya'at tsinaa'yin y'ijty tunkpatp ku ja Cristo kyamiñim ku ja jaa'y ja tjøp'ejxti. Kuts ja tø myiñ, ja' idø'øn tu'ugyi yikjanchja'wiñip.

¹⁸ Kidits ja jaa'y mdukmajstst'udyidi ja nwindson'ajtim pøn ñadyijyi janch tuda'aky nabyiktaajkidip, jøts wya'andi ku ja ankilis ne'egi yikwindsø'øgit. Ja' ñigajpxty ñimadyaktip mididi nijuuni kya'ejxtipnim kyamadoodipnim, jøts jade'en øy ñadyamøjpikta'agyidi ja kyø'ømwinmaa'ñ.

¹⁹ Ka'ap ja tmøøt'etti ja Cristo, pøn møj pøn jøp'am, pøn yikmøja'wip, jøts pøn amuum yikjanchja'wip ku ja yja' ja yiknijaw i jøts jade'en tyika'pxy'ity ja jaa'y pøn nayide'en myøøpy ja møk'ajtin, sam ja Dios kø'øm tø ttanibiktaagi.

²⁰ Pøni janch idø'øn ku ja Cristo namyayi møøt tø mjantyimy'ookti, tigtøjxpts ku jade'en mdsinay'adø'øtsti sam ja'ajindi, pøn ja Dios yja' tkabadu-ujnidip? Ja' yikmajadaktip jøts ñadyani gutujk'atyidi ja kyø'øm'ana'amin,

²¹ ku yide'en ñay'ane'emyidi: "Kidi yø' xji'kxy, uk kidi yø yjade'emb i xji'kxy, kidi yø xøñ."

²² Yø yjade'emb i ana'amin, tum ja' yø ñi'ane'empy mididi waani ejtp jøts ja ñajxni jade'en sam o ti pikta'aky mididi tø tyuñ jøts ja ka' ti y'ukwani, jade'ents ja jaa'y ja kyutujk jade'en ja y'ixpøjkin.

²³ Øy idø'øn ja yjaw i njantyijja'wa'ant, jabi øyxi ja yik'ayowim yik- padu'unt tsø'øgi køjxp. Nitits ja kyawa'añ, kaja'ajipxi xpudøjka'am jøts nbøky xniwaajsint.

3

¹ Jøts kumi tø mee ñamyayi mjukpyiky nayide'en ku ja nwindson'ajtim Jesucristo yjukpyijky, ja'agøjxp xjotmay'ajtidit ja nwindson'ajtim yja', pø ja'axi ja Dios Teety amuum tø myø'øyi ja møk'ajtin.

² Ja' ejtp mwinmaa'ñ'attip mididi ja Dios yja'ajip jøts ka'ap ja xyikmøjtøkidit mididi ya naxwiñ.

³ Jade'ents ngajpxin ku ja Cristo y'ø'jky jøts mee ñamyayi nayide'en tø m'øøky, ka' x'uktatøjkiñidit ja ka'øybi mididi ya naxwiñ. Ja nwindson'ajtim mee mgøjø'ømit'ajtniyidip jøts mee mjuky'aty xemikøjxp ma ja Dios,

⁴ jøts ku ja Cristo kyaxø'økt nayide'ents meets ja wyinaty møøt mgaxi'iky jøts meets nayide'en ja y'ø'y'ajtin ja xyondaajkin xpaajtyidit.

Ja øchinaa'yin jøts ja ka'øchinaa'yin

⁵ Paty x'ixmatstt tuki'iyi ja ka'øybi: ka' pøn amajtskjaa'y tmøøt'att ja wenk yaa'dyøjk uk ja wenk tø'øxyøjk, ka'ap ja axøøk winmaa'ñ xyiktu'undit, jøts nayide'en ka' ti x'ama'at'attit. Jade'en yø tuki'iyi tpaaty ku yø xu'undit ejximdam jeexyip xwindsø'øgidi ja awanax ja agojnax.

⁶ Yø'øgøjxp ja Dios tkexy ja ayo'on jøts ja ttuktagida'aky ja yjade'emb i jaa'y pøn ja kamimadojyip;

⁷ jøts ku y'ity ka'anim xjanchja'wiyidi ja Dios yja', tuki'iyi meets yø y'ity nayide'en xuñ.

⁸ Ixyamts, ixmajtskøjxnidi yø ka'øybi, yø ambøjkin, yø axøøk winmaa'ñ, yø ka'ødyu'unin, yø nawyngajpxnaxi jøts yø ka'ø'y'ayuujk.

⁹ Kidi mnawyindaay'atyidi, pø tøxi x'ixmatstt sa y'ijty mjaa'y'atti, ti jaty y'ijty mdundip.

10 Tøts ja Dios myiktigachidi jøts ja yjembyi tø xpadøkidi, pøni sã meets ja yja' xjanchja'wiyi, nayide'ents meets ja myiktigachi kunim yikxon xty-mñijawidit sã ja Dios.

11 Jøts ka' chøkyi wan pøn tgriegitjaa'y, uk t'israelitjaa'y, wan ja t'ejxa'aninmøødidi uk tka'ejxa'anmøødidi, wan ja abiky ma tsoondi uk wan ja tja'ajidi pøn ja Dios tkañija'widipnim. Yjaja'ajidi ja' pøn tmidundip ja windsøn, uk pøn najtspøki ejttip, tum ja nwindson'ajtim Jesucristo ja' yja', jøts myøø'tijtpy ja øy pøn.

12 Mdsøjkp meets ja Dios, ja'agøjxp meets ja tø mwi'ijxyi jøts ja tø mja'bikyidi. Tsøønidits yikxon. Yiktundi ja øy'ajtin amuum, ja ayo'ejxin, ja jotwa'añ'ajtin, ja windsø'jkin, ja wijy'ajtin jøts ja tuda'aky'ajtin.

13 Namyiduda'aky'atidi xem yam jøts namyaa'kxukidi ku pøn ti ttuñ jøts ja myigu'uk tpo'ky'ixy. Nayide'en xu'undit sam ja nwindson'ajtim Jesucristo mbojkipimee'kxyidi.

14 Ka'apts ti jade'en sam ja tsojkin sam ja pa'ayo'owin, ja'ats id'øøn myiktu'undip, pø ja'axi amuum tsojkip, ja'axi øy ti tyik'øgyaxø'kp jøts niti jadu'uk jade'en abiky kyatsøkyi.

15 Ja Diosts ja yjotkujk'ajtin, ja Diosts ja xyondaajkin mwinmaa'nmyo'ojidip, pø ja'agøjpxxi ja Dios tø mdukpabikyidi ja yja' jøts ja'abi jotkujk'ajtin xyiktu'undit ni'amuki niwine'en ja Dios xja'ajtyindi. Tukmøjawidits tukunuu'kxyjawidits ja Dios.

16 Jøts ja'gyukiyidi yikxon ja nwindson'ajtim Jesucristo kyajpxy ja y'ayuujk jøts ja xwinmaa'n'attit. Nadyuk'ixpøkidi jøts nagyajpxjot'amøjkiyidi nixem niyam, ja wejin ja kajin myiktu'undip. Øøjidi ja Salmos, jøts øøjidi ja kunuu'kxyajpxy jøts jade'en xukmøjawidit xukunuu'kxyjawidit ja Dios.

17 Ku ti xunwã'andi uk xkajpxwã'andi, ja nwindson'ajtim Jesús myøk'ajtin myik'awajnidip, jøts jade'en'ampy ja xukmøjawidit xukunuu'kxyjawidit ja Dios Teety, ja' myøk'ajtingøjxp.

Sa yjaa'y'attit pøn tjanchja'widip ja Cristo o madsøo

18 Jøts ja tø'øxyøjk pøn amaajtskti, mimadowdi ja mniyaa'y, jade'en pyaat'atyidi pøn tjanchja'widip ja nwindson'ajtim.

19 Jøts nayide'en ja yaa'dyøjkmidi pøn amaajtskti, yikxon xjagyaptit ja mnið'øxy. Kidi møøt atsep a'aki mdsøøni.

20 Jøts u'nk unã'jkmidi, mimadowdi ejtp ja mdeety ja mdaak, jade'en ja Dios ttsøky.

21 Jøts u'nkteety u'nktaak nayide'enmidi, ka' nugo xyik'ambøktit ja m'unã'jk jøts kidi t'ayojidi.

22 Jøts pøn midundip, mimadowdi ja jaa'y pøn mwindsøn'ajtip, jøts kidi jaay' nugo nadyiyi myuyj'atti ku ja m'ijxyidi jøts ja jade'en nugo m'øyjawiyidit. Mdu'undipxi dø'øn sam pyaat'atyi Dios wyindsø'jkingøjxp.

23 Yikxon xu'undit ku ti xunwã'andi, ja Dios meets ja mdamidumpy jøts kidi ja jaa'yip øy ja' mjayiktuñidi.

24 Tøts xnijawidi jøts ku ja nwindson'ajtim mmo'ojidit ja øy'ajtin jøts meets ja mdukpaa'dit ja kyunuu'kxin. Kumi Cristo meets ja yja' mdu'unxip, nay ja' meets ja kø'øm mmo'ojip.

25 Pønts ja kya'øbyi ttump, nayide'ents ja ka'øy'ajtin ja tikmo'odit. Ka'ap ja Dios ja t'ixy wan ja tjapøni, tuknax ja tum jade'en ttu'unt pøni sã tø yjaa'y'atti.

4

1 Jøts meets windsøn pøn ja tunk tmøøt'ajttip, øy yikxon mjaa'y'attit jøts jade'en xyiktu'undit ja mdumbi sam pyaat'aty. Ja'myatsti jøts ku ja nwindson'ajtim jap tsajpjøt'py midi mee mwindsøn'ajtmip.

2 Kidi mjotmondi, ejtp ja Dios x'ajot'attit, ejtp ja øy ti xukmøjawidit xukunuu'kxyjawidit.

3 Amidowdi pøktowdi jøts øøts ja nwindson'ajtim ja nnøø' ja nduu'xyik'awajtsit, jøts øøts ja ngajpxwa'kxit ja y'øgyajpxy ja y'ømyadya'aky, jøts nayide'en yiknigajpxt wa'ats ja Dios Teety wyinmaa'ñ, sudso ja nits'o'ok'ajtin yikpaaty Jesucristo køjpx, ja'axi øts yam mgudsumchinaa'y'ip, pø ja'axi ngajpxwa'kxpy.

4 Ajot'attits Dios jøts øts ja kyajpxy ja y'ayuujk øy pøn nduknija'wiyit sam idø'on pyaat'aty ndu'unt.

5 Øy yikxon mjaa'y'attit, migu'ukwa'andi pøn ja Dios yja' tkanija'wip jøts ttukmadowdi, kidi ja xøøw ja jumøjt nugo xyikwindigøydi.

6 Øy tsuj ja mmadya'aky xyikpidsø'ømdit, jøts mjattip nayide'en ja adsojimbejtk sã nidu'uk nidu'uk øy pøn x'adso'odit.

Ku kyajpx'abaadiwya'añ jøts ja kajpxpoo'kxin t'ukyajkni

7 Ja nmigu'uk Tiquico meets jam mdukmadowip sã øts yam. Janch øy yø pyudøki, janch tsuj tmiduñ ja Dios. Tø øts yø nmøøt'widity.

8 Paty meets ja yam ndaniguexy jøts ja mgajpxjot'amøjkjyidit, jøts ja nayide'en mdukmadowidit sã øøts yam.

9 Ja Onésimo ja jam møøt ñijkxy, adøm ja nmigu'uk pøn amumjoojt tpaduujnip ja Dios yja'. Meets yø' mjaa'y. Yø'øts meets ja mdamimadya'agip ti yam tuujnip jajtip.

10 Jøts øts ja nmigu'uk Aristarco pøn øts yam nmøøtsumchinaapy, ja' yam nayide'en mdanigajxidip ja kajpxpoo'kxin, jøts ja Marcos nayide'en ja yja' tkajxmi, ja Bernabé ja myigu'uk. Tøts ja myiktukmadowdi ja Marcos; pøni mbaajtidip jam, øy yikxon xkupøktit.

11 Nayi mgajpxpoo'kxidip ja Jesús pøn nayide'en yiktejp Justo. Yø'øyi dø'on israelit jaa'y'ajttip pøn tmidundip ja Dios, pøn ø tø nmøøtundi, jøts yø' øts yam njanchtajotkujk'ajttip.

12 Nayi mdanigajxidip ja kajpxpoo'kxin ja Epafra pøn ja nwindson'ajtim tmidump, nay meets ja mjaa'y. Ejtp ja mni'amidowiyidi mnibøktowiyidi ku Dios ja t'ajot'aty jøts tu'ugyi øy yikxon xpanøjktit ja Dios, uk amuum mnadyamiyoxidit jøts ja xu'undit sã ja ttsøky.

13 Kumi wa'ats ø n'ixy nnijawi sã ja Epafra mdajotigøydi, jøts nayi tyajotigøøpy ja nayide'en pøn tsinaadyip jam Laodicea kajpkøjpx jøts jam Hierápolis kajpkøjpx.

14 Nayi mgajpxpoo'kxidip ja Lucas, pøn tsøyip jøts nayide'en ja Demas.

15 Kajpxpoo'kxtits adøm ja nmigu'uktøjkti pøn ja Dios ja'ajtidip midi tsinaadyip jam Laodicea, jøts nayide'en xkajpxpoo'kxtit ja Ninfas møøt ja'adi pøn ja Dios tjanchja'widip, pøn jam namyujkidip ja' tyøjkjotp.

16 Ku yø nøky x'uk'ejxkøxtit winets ja xanigaxtit jøts wan t'ejxti pøn ja Dios tjanchja'widip jam Laodicea, jøts meets ja nøky nayide'en x'ejxmit midi jam tso'omip.

17 Jøts nøjmidi ja Arquipo jøts ku ka'pxy tpadu'unt sã ja nwindson'ajtim tø tyunkmø'øyi.

¹⁸ Øts njaapy ya'at kajpxpoo'kxin jøts meets ja ndaniguexy. Jøts xja'myatstibim øts ku Dios x'ajot'attit jøts ku øts yam ndsumy'ity. Dios mgunuu'kxidip. Jade'en idø'øn ja yjätt.

JA MYĪDU'UKPI NØKY MIDI JA PABLO TYANĪGAJX JA TESALÓNĪKT JAA'Y

Ku ja Pablo tnijayi; pøn ja nwindson'ajtim tjanchja'widip

¹ Pablo ø nxøøw, jøts øø yam nguejxpy ja nøky møøt ja Silvano jøts møøt ja Timoteo, jøts øøts ja ndaniguexy pøn jaty tjanchja'widip ja Jesucristo yja' jam Tesalónica kajpkøjxp, pøn møøt amumjoojt t'etti ja Dios Teety jøts møøt ja nwindson'ajtim Jesucristo. Nay ja'ats amuum mgunuu'kxidip jøts ja jotkujk'ajtin mmo'o'jidit møøt ja nwindson'ajtim Jesucristo.

Ku ja Tesalónikit jaa'y tyiktaañ ja ejxpajt sa ja Dios yikjanchjawi

² Ejtp øøts ja Dios ndukmøjawi ndukunuu'kxyjawi ku meets ja xjanchjawi, jøts ku øøts ja Dios n'ajot'aty ejtp mee nja'myech.

³ Ku mee ngajpxpaaty ku øøts ja Dios n'ajot'aty ka'ap øøts ja nja'dyigøy ja m'øy'ajtindi, sa ja tsøjkin ja pa'ayo'owin xmøøt'atti, jøts sa ja ajot'ajtin møk'ampy xjagyapti jøts xjøp'ejxti ku mye'ent jadigojk ja nwindson'ajtim Jesucristo.

⁴ Meets migu'uktøjkti, pøn jaty ja Dios janchja'widip, Dios mee mdsojkip jøts nay ja' tø mwi'ijxyidi jøts mee mnitso'ok'att.

⁵ Jade'en'ampy øøts nnijawi ku øøts jam ojts ja Dios y'øgyajpxy ja y'ømyadya'aky ngajpxwa'kxiyi mā meets jam, kidi øødsip ja ojts jade'en nugo ngajpxy, pø jamxi ja Espiritu Santo ja myøk'ajtin ja tmøødiyi jøts ja jade'en wa'ats yiknijawit jøts ku ja'abi kajpxy jøts ku ja'abi ayuujk tyiyi yjanchi. Wa'atsxi xnijawidi jøts ku øøts ja nduun, kidi øødsip ja kø'øm nadyamiduujnip pø ja'agøjpxxi øøts ja nduñ jøts meets ja xyiktu'unt.

⁶ Ja Espiritu Santots mee mmøøjyip ja xyondaajkin jøts meets ejtni xoni xkupøkti ja Dios y'øgyajpxy ja Dios y'ømyadya'aky øy meets ja kawine'en tø xkuwanjati. Xjats meets nayide'en xuñ sa tø xpa'ejxti ku øøts ja ayo'on nmidani midi ja nwindson'ajtim tø ttunjøpi.

⁷ Xjats jade'en tø mbidsømdi jøts ejxpajt mwa'andi jøts ja mni'ejxu'udyidi niduki'iyi pøn jaty ja Dios tjanchja'widip, pøn jam tsinaadyip Macedoniit jøts jam Acayit etjotp.

⁸ Jade'ents idø'øn ja Dios y'øgyajpxy ja y'ømyadya'aky tø xyikwa'kxiyidi, jøts kidi jamyip meets ja jade'en nugo tø xuñ Macedonia uk jam Acaya, yiknija'wip yø o madsoo jøts ku meets ja Dios amuum xjanchjawi. Ti sa øø njaakwa'ant, ti øø njaaknikyajpxp.

⁹ Ja'axi ja kø'øm tmadyaktip jøts ku øøts jam ojts n'øch mā meets jam jøts y'øyja'widip ja' sa meets jam ojts xkupiky, jøts øy ja yikxon tñimadya'akti sa mee xmajstuuity ja'abi winmaa'ñ midi ja Dios kyaja'ajip, jøts ku ja Dios tu'ugyi tø xpabøjkinaxwa'akti pøn xemikøjxp ejtp, pøn tu'ugyi Dios'ajtp.

¹⁰ Jøts ñayiñimadyaktip ja nayide'en sa meets nwindson'ajtim Jesús xjøp'ixy jøts ku ja jadigojk wyimbett jap tsajpjøtpy ja Dios U'nk, pøn ja Dios Teety tyikniwaajts ja o'jkin jøts ja tyikjujkyjyky. Ja'ats adøm idø'øn xuknitso'ok'ajtindi ja' ayo'on midi memp midi wingomp.

2

Sa ja Pablo kyajpxwa'kxy jam Tesalónica

¹ Mnija'widipts migu'uk ja'adi, jøts ku øøts jam n'ats'øjch mā meets jam, ka'ap øøts ja nxøøw nugo wyindigøøy.

² Øy øøts jam wyinaty Filipit kajpkøjxp tø nyikjemduñ, mnija'widipts ja wa'ats jøts ku øøts ja Dios tø xjanchpudøki jøts øøts ja kyajpxy jøts øøts ja y'ayuujk ja tø nyiknajxyi amumjoojt midì xyiknitsø'ok'ajtindip, jøts meets ja tø myiktukmadøy yam idø'øn ja tsep yjanchjatuñi.

³ Jøts ka'ap øøts ngajpxigøy ti jaty øøts ojts ngajpxwa'kxy, jøts kidi wenk winmaa'ñip øø njagejpy ku øøts jam jade'en ojts ngajpxy jøts nika' myikwin'øøndi.

⁴ Pø tiy'ajtinxì yø', tøxi ja Dios kø'øm tyikutuky jøts øøts ja tø xanipiky ja kyajpxy ja y'ayuujk midì yiknitsokp, jøts jade'ents øøts ja tø ngajpxnaxy. Jøts ni ka'ap øøts ja n'ixa'ay jøts øøts ja kuwani ndyimyikta'øy'ext uk ndyimyiktakajxa'akt, pø ja Diosxi yikmidump jøts ja'ats tu'uk tu'uk t'ejxp sà jaty pøngapøn yjaa'y'aty.

⁵ Jøts mnija'widipts ku øø ka' nugo ngajpxy sà jaty ojts myiknøjmidi jøts nigidi taayip øø n'ixaapy sudso øøts ja meeñ nbøkt. Ja Dios yø tnija'wip jøts ja' yø t'ejxp.

⁶ Niwindii øø ngawa'añ jøts øøts ja jaa'y xwindsø'øgit, wan meedsì uk øy tyimyjapøni. Xpaat'ajtpimts øøts, øy øøts ja jeexyip jade'en tø nduñ jøts meets jeexyip ja nwindson'ajtim Jesús kyutujuk møk'ampy tø ndanipiky, pø ja'axi øø nbadumpy.

⁷ Ka'ap øøts jade'en tø n'adi'ich; øy yikxon mee tø nmiyuji'aty sām ja u'nktaak tyikyeeky tyiktsø'øky uk t'ejx'ity ja y'u'nk ja y'una'jk.

⁸ Njanchøjky meets mjanchpa'ayøøpy meets, jade'en pyaat'atyì jøts øøts jeexyip ka'ap ja Dios kyajpxy ja'ayi nugo tø nyajkiyi, ngu'o'jkipaat meets jeexyip ja'agøjxp ku ndsokti ja'agøjxp ku nba'ayowdi.

⁹ Mee migu'uktøjk, wa'ats inet xja'myatsti sà øøts y'ijty nduñ nbiky, sà øøts nnamyiwinmaa'mbyaadyi jøts øø nbaaty ja nidsinaajyk. Ku øø nduñ xinaxy tsunaxy, ngamaa'y nga'ity øøts, jøts jade'en ka'ap myik'adsepti ku myikmo'odi jade'en ja Dios y'øgyajpxy ja Dios y'ø'yayuujk.

¹⁰ Mee nagyø'øm mnija'wip jøts møøt ja Dios, jøts ku ka' ti tundigø'øyin myiktu'unxidi. Yikxon øø njaa'y'aty jøts øøts jade'en ka' ti pøky xaja'aty øy øø pøn xjapøky'ejxwa'añ.

¹¹ Jøts mnayi mnija'widip nayide'en sà nidu'uk jaty tø myik'ayo'ejxti ku myikajpxjot'amøjkidi, jade'en sām ja jaa'y ja tyety yjagyepyiyi.

¹² Tøxi myiktukmadowdi jøts ku øy yikxon mjaa'y'attit sām pyaat'atyì pøn ja Dios ja'ajtidip, pø ja'axi kø'øm wamp jøts meets ja mdaniwaadsowiyi ja kyutujktaajk mā ja amuum xyiktuujnidit ja myøk'ajtin, ja y'ø'y'ajtin jøts ja xyondaajkin.

¹³ Ja'agøjxpts øøts idø'øn ja Dios ja ndukmøjawi ndukunuu'kxyjawi ku meets ja kyajpxy ku meets ja y'ayuujk ja ojts xmadojiyi midì mee ndukmadoow. Ojts ja xjanchkupøkti jade'en jøts ku ja Dios ja tja'aji, kidi nugo jaa'yipxi ja' yja'. Jøts janch tiy janchts idø'øn ja', jøts ku ja Dios ja tkajpxyi jøts ku ja Dios ja t'ayuujki, jøts ja mbudøkiyidi pøn jaty ja tjanchja'widip.

¹⁴ Mee migu'ukti, ku tø xku'ayo'ombaadidi ja Dios, kawine'en ja mmigugajp tø mdagubetyidi, nayide'en tø mjatti sām ja jaa'dyi pøn ja Dios tjanchja'widip pøn ja nwindson'ajtim Jesucristo tjanchja'widip pøn tsinaadyip jam Judea, pø nayide'enxi ja tø yjatti, nayide'en ja myi'israelit jaa'y ja kyamee'kxyidi.

¹⁵ Yø'øbi israelit jaa'yts idø'øn tyik'oo'ktøø ja nwindson'ajtim Jesús. Nayide'en ttungojmidi sām ja tø tyik'ookti ja kyø'øm migu'uk pøn jaty ja Dios

kyugajpx'ajtpy, jøts øøts ja tø xpawøpy. Niwine'en ja Dios ja tkayikjotkujk'atti jade'en, jøts yjanchtumwenk'ejxtip ja jaa'y øy pøn,

¹⁶ jøts ku øøts ja Dios yja' njadukmadoowa'anmiyi pøn ka'israelit jaa'dyi jøts ja ñitso'oktit, ka'ats øøts ja jade'en xuktunwami. Xjats jade'en ja pyøky nugo tyikmiweni'adø'øtsti. Ixymnimts inet ja Dios ja møk ayo'on tø tyuktagida'agidi.

Ku ja Pablo øy tjapaatwa'añ jadigojk ja Tesalónikit jaa'y

¹⁷ Mee migu'uktøjk, ku ojts nnawya'kxyindi jøts waani ñajxy ja et ja xøøw, nja'myajts'ijtpyim meets øy mee njaga'ijxy jøts øøts njanchja'atsnøjkxwa'añ kawinaak ojk jøts mee n'ats'ext.

¹⁸ Ojts øøts njadyimyja'uktsøøñ; øts meets jam kø'øm kawinaak ojk tø njadyimy'ats'ejxwa'añ, jatyi jatyits øøts ja miku' xyiktuu'duky jøts øøts jam nganjikxy.

¹⁹ Jøts tigøjpx øø nxonda'aky, ti øøts idø'on ndaxondakpy, ti øøts idø'on njøp'ijxpy, ti øøts idø'on ndajotkujk'ajtpy, pø meetsxi dø'on ndajotkujk'ajtpy ku mye'ent ja nwindson'ajtim Jesucristo.

²⁰ Meetsxi dø'on ndajotkujk'ajtpy ku øø nxonda'aky.

3

¹ Jade'en'ampy øø tø nwinmay jøts øø nda'ant yam Atenas kajpkøjpx ku øø ka' n'ukmajadakni, kumi ka' øø n'ukmidanaañi jadine'en ja jotmay,

² paty øø tø nguexy tu'uk ja nmigu'uk pøn jam tø m'ats'ijxyidi. Timoteo øøts nguexy, ja'axi ja Dios tmidump jøts ejtr øøts ja tø nmøøtuñ ku øøts ja nwindson'ajtim Jesucristo y'øgyajpxy ja y'øy'ayuujk tø ngajpxwa'kxiyi midu ja nitso'ok'ajtin tyajkp, ja'ats mdukmadowidip jøts ja mgajpxjot'amøjkiyidit jøts ja m'ajot'ajtin tu'ugyi xyik'ettit,

³ jøts jade'en ka' pøn t'ixmatst øy idø'on ja tsep jade'en y'ity. Wa'atsxi kø'øm xnijawidi jøts ku jade'en ja ayo'on nbaajtindit.

⁴ Jøts ku øø nay jam wynaty møøt meets, ojtsxi øø nnigajpxy jøts mee ndukmadøy jøts ku n'amjajtindit ndsaachjajtindit; tøts xnijawidi jøts ku jade'en tø yjanchjaty.

⁵ Paty øts, kumi ka' øts jadine'en n'ukjotkujk'ajtni, ja'agøjpx mee tø ndaniguexy ja jaa'y jøts ja tyiktøøt sã ja mjanchja'win xyik'etti, ja'ats ø ndso'ijkip uk wan meets ja miku' tø mduktuñidi ja yja' jøts jeexyip ja Dios kyajpxy jade'en nugo ñiwyindigøy sã meets ja ojts njadukmadøy.

⁶ Tøts ja Timoteo wyimbity jam Tesalónica jøts ja yam tø tmija'aty ja kajpxy ja ayuujk midu yikjotkujk'atyim jøts ku meets ja janchja'win møj xjagyepy jøts xyiktuujnidi xem yam ja Dios chojkin. Yide'ents ja yam wya'añ jøts ku meets ejtr xja'myech, jøts ku nayide'en ja tsojkin xjagyajpti jøts øø xjapaatwa'añ nayide'en sam mee nja'ejxwami.

⁷ Nijjot'amøkøjkp øø migu'uk yjawi, ku øø nnimadøy jøts ku tu'ugyi ja Dios xjanchjawidi, yam øøts idø'on yjawi yide'en tsep'agujkpy njaty.

⁸ Ku øøts jade'en nnimadøy jøts ku ja Dios tu'ugyi amumjoojt møøt m'etti, jade'en øø nnayjawi tyimxyajimbejtr øøts yjawi.

⁹ Ku meets jade'en xuñ, øy øøts ja Dios møj njanchtamøjawi ku meets jade'en xpadundi ku jade'en xwindsø'ogidi ja Dios.

¹⁰ Xjats øøts yide'en xinaxy tsunaxy ja Dios n'amidøy jøts mee ndyimy'ats'ext, kø'øm ndyimy'atspaattit, jøts ka'pxy myiktukmado'odit ti jaty mjaaka'ejtxidip jøts ja mjanchja'win tu'ugyi t'ettit.

11 Ja' 00 ndsøjkpy jøts øøts ja Dios Teety, jøts øøts ja nwindson'ajtim Jesu-cristo xpudøkit jøts øøts jam nnøjkxt jøts jam m'atsyik'ejxtit.

12 Nay ja Diosts myikmøjtə'agiyidip ja mwinmaa'n jøts ja tsojkin møj xjagyaptit nixem niyam, jøts xminamyayidit øy pøn møøt nayide'en sam mee myiktsoktin sam meets ja tsojkin ndamijagyapi.

13 Nay ja Dios Teety mmo'ojidip ja myøk'ajtin jøts xmidanidit ku sa mjattit, jade'ents ja mja'bikyidi: jøts mgapøky'ijxyidi ku ja nwindson'ajtim Jesús jadigojk mye'ent møøt niduki'iyi pøn jaty ja Dios ja'ajtidip.

4

Sa ja Dios xajotkujk'ajtin

1 Ʒyamts øø migu'uk nnigajpxy jøts mee myiktukmadowdi ja nwindson'ajtim Jesús y'ana'amingøjxp: jøts ku jade'en xun'ettit sa øøts ojts nyik'ixpiky jøts ku mdsøønidit mdanidit jade'en sa ja Dios ttajotkujk'aty. Tun'ettits meets ja jade'en.

2 Mnija'widipxi ja ana'amín midí myikmøødyi, midí øø tø nnigajpxy ku jade'en tyikutuky ja nwindson'ajtim Jesús.

3 Ja' Dios chøjkpy jøts ja tu'ugyi xnadyamiyoxidit; jøts kidi nugo mnamyøøt'atyidi pøni ka'adam ja xníyaa'yidi pøni ka'adam ja xnidø'øxyidi,

4 ku pøn y'amajtskiwya'añ, ka'ap ja patki'iyi nipøn tø'øxyøjk tkamøøt'att. Ja' øy wa'ats pidsømp jøts ja jade'en kø'øm ñawyindsø'øgiyi.

5 Jøts kidi nugo mbøkti ku mnachuj'ijxyidi ja'ayi sam ja jaa'y y'adi'ichin pøn ja Dios tkania'wip.

6 Kidi pøn ja myigu'uk ñidø'øxy twin'øø'nidi, møk nwindson'ajtim mdagu-batidit, pø tøxi øø nnigajpxy.

7 Ja'ats adøm ja Dios tø xanibiktaajka'am jøts adøm øy tsuj njaa'y'ajtindit. Ka'ap ja jade'en wya'añ ja Dios jøts ja kya'øybi ndu'unint.

8 Jade'ents idø'øn, pøni pøn yø'øbi xpøjkin tkamøjpktaq kidi myigu'ugip ja jade'en wyinaty tyumpy, ja Dios idø'øn ja wyinaty jade'en kyamimadøøpy, pøn adøm ja y'Espíritu Santo tø xmø'øyim.

9 Wine'en ja tsojkin wine'en ja namya'ayin xem yam, ka' øts ja ngajpxwa'añ. Ti ja øts ja nugo njaañit, pø tøxi Dios kø'øm mdukjatyidi jøts xem yam mnamyayidit mnachokidit.

10 Ejtp meets ja mmigu'uk jade'en xminamyayi pøn ja Dios tjanchja'widip jam Macedonia. Ja'ayi ø nugo nnigajpxy jøts ja n'øyjaa'y'ajtin møk xjaakyik'awa'andit, jøts myøjit ja m'amigu'uk'ajtidit.

11 Øy jotkujk idø'øn mdsøønidit mdanidit, ja mdunk ja mbøjk ja' idø'øn mjotmay'attip pø jade'enxi øø nxumiwa'añ,

12 jøts ja abikpyi jaa'y mwindsø'øgiyidit jøts kidi ti mga'ijtxyidi.

Sa ja nwindson'ajtim jadigojk mye'ent

13 Mee migu'utøjk, ka'ap øø ndsøky jøts jadi'iñi mda'andit, ni xkanijawidinim sa yjatt añmi'oo'kpi, jøts kidi jade'en mjotmay'ookti sam jadu'uk yjotmay'ooktin pøn ka' ti awejx'ajtin tjagyapti, pøn tkania'widip ja Dios.

14 Pøni nmibijkyimts adøm ja Jesús ku ja tø y'øøky jøts ku ja tø yujkpyiky jadigojk, sudsøts adøm ja ngamibøjkim jøts ku ja Jesús jadigojk wyimbett ku ja Dios Teety ja møøt tyikjujkyøkt ja añmi'oo'kpi pøn jaty ja wyinaty tø y'atsjanchjawiyidi.

¹⁵ Paty idø'øn myiktukmadowdi nwindson'ajtim y'ixpøjkingøjxp, jøts ku adøm, pøn jaty wyinaty juky'ajtipnim ku ja nwindson'ajtim mye'ent, kidi adømp tyimjawyenygojindip jøts nika'anin ja' pøn tø y'ookti.

¹⁶ Pø kø'ømmixi ja nwindson'ajtim kyida'akt jam tsajpjotp jøts ja kyajpxt kyutujkingøjxp, jøts ja kyajpxt sam ja møj ankilis, jøts ja pujxuujx ja tyiktu'unt midi ja Dios yja'ajtpy. Winetnimts ja yjuykpyøktit jawyeen pøn tø t'atsjanchjawidi ja Cristo, pøn tø y'ookti tyigøydi;

¹⁷ jøtsnim adøm pøn juky tandipnim jaanimts adøm ja møøt nnøjxindit yootsjøtpy ma ja nwindson'ajtim nminabyaajtindit jam tsajpwemp. Jøts ja nwindson'ajtim jade'en xemikøjxp nmøøtjuky'ajtindit.

¹⁸ Paty mjadyimñagyajpxjot'amøjkiyidit xem yam, yø'øbi kajpxy yø'øbi ayuujk myiktu'undip.

5

¹ Migu'uktøjk, ka' chøkyi jøts ø nja'at ti xøøw ti jumøjt mye'ent ja nwindson'ajtim.

² Wa'atsxi meets ja xnijawi jøts ku ja nwindson'ajtim yja'att jotmøn tu'ukpi xøøw, yam ja wyinaty ka'ap pøn tjøp'ixy. Jotmøn ja mye'ent sam ja maa'tspi koots y'atsmiñ.

³ Ku jaa'y wya'andit: "Jotkujk ixyam, ka' ti tyuñi, ka' ti kumay", winets ja jotmøn tyaja'atpatidi jøts ja ayo'on myo'ojidit møk, jade'en tyaja'adidit sam ja tø'øxyøjk y'u'nkpikyin pøn ja y'u'nk tnikøjxp'ajtp jøts niwine'en ja chookin ja tkapaattit.

⁴ Jøts meets migu'uktøjk, ka' meets mwimbeedsi mgugoodsi. Me'emp ja juuni xøøw ja nwindson'ajtim jøts ka' nugo jotkumoni mbaadiyidit ejxim ja jaa'y adsu'jky yikwimeech.

⁵ Pø Diosxi mjagyajpidip jøts adøm wimbeets kugoots nga'ijtyindi.

⁶ Paty ka'ap jade'en nugo njotmo'onindit sam jadu'ukpi y'adø'øtsta'an, njøp'ejxindip idø'øn ja' wijy kejy.

⁷ Pøn nugo najtspøki ejtp, ja wimbeets'ajtin ja kugoots'ajtin ja yikmajadakpy; jøts pøn mjujkip kujxip, nay ja' ja yikmajadakpy.

⁸ Jøts kujaji kudøø'kxi adøm, patyts adøm ejtp wijy kejy n'ejtindit. Kuwani njanchja'windit amumjoojt ja Dios yja' jøts nnachojka'andit nnamyajya'andit. Jade'en idø'øn nnadyagubojka'andit ja Dios yja' ejxim ja soldadi nadyagubøky'a'an ja pyujx jøts ja nisä kyajaty. Jøts njøp'ejxindip adøm ja nitso'ok'ajtin, jade'en idø'øn ja ñamyayi tpaaty sam ja soldadi pyujxkujup midi ja kyubajk ja adanaajyiyip.

⁹ Pø kidi ja'ajipxi adøm ja Dios tø xanibiktaajka'am jøts adøm n'ayo'ombaaajtindit, pø ja'axi ja chøjkpy jøts adøm ja øy'ajtin nitso'ok'ajtin nbaajtindit nwindson'ajtim Jesucristo køjxp.

¹⁰ Adømxixi ja nwindson'ajtim Jesucristo tø xku'o'jkindi jøts adøm ja møøt njuky'ajtindit. Nbaajtimpxi ja' xemikøjxp øy njadyimyjajuky'ajtyindinim uk øy wyinaty tø njadyimya'o'jknandi.

¹¹ Paty jotmøk mnabyikta'agidit jøts xem yam mnabyudøkiyidit sam ixa mmendi mbatti.

Ku ja Pablo ja jaa'y tkajpxwijy pøn tø tjanchjawidi ja Dios

¹² Migu'uktøjkti, ndukmadoodip ixyam jøts waani xwindsø'øgidit pøn ttundip ma meets jam, pøn jam nduu'møøjyidip, pøn jam mda'ana'amidip ja nwindson'ajtim yja'.

13 Øy tsuj xaxonda'aktit ku jade'en tyundi, yiktundi ja tuda'aky'ajtin, yikxon namyiyujy'atidi nixem niyam.

14 Jøts nayide'en migu'uktøjk ndani'ana'amdi, jøts xukja'gyukidit pøn katunwandip, kajpxjot'amøjkidi pøn yø'øbi tkadajotkukidi ku ja yikjemdundi yiktedundi, pudøki pøn waani jot'amutsk'ajtpnim jøts tuda'aky'ajtin øy pøn møøt.

15 Øyim mnay'ejxidit jøts kidi pøn nayide'en ttuñ ja myigu'uk sam ja tø kyayik'ødyuñin. Tum ja y'øbyi ne'egi ejtp mdu'undip. Øy xwindsø'ogidit ja mmigu'uk nixem niyam jøts nayide'en øy pøn møøt.

16 Øy jotkujk m'ettit.

17 Ajot'at'etti ja Dios Teety.

18 Pøni ti jaty tuujnip, tukmøjawidi tukunuu'kxyjawidi ja Dios, yø' ja Dios chøjkpy jøts meets jade'en xu'unt pøn jaty tjanchja'widip ja nwindson'ajtim Jesucristo.

19 Kidi ja Espiritu Santo xyiktuu'dujkidi ja myøk'ajtin midi meets ja mdunwa'anxyiip mjujky'ajtingøjxp.

20 Jøts kidi xkagupøkti ja mmigu'uk pøn amuum kunuu'kxip ja Dios jøts ja tkajpxi ja Dios y'øgyajpxy ja Dios y'ømyadya'aky.

21 Yikxon tuki'iyi x'uk'ejxtit, jøts midi øy, ja'ats mbaajtidip.

22 Ixmajtskøxti ja kya'øbyi.

23 Jøts nay ja Dios, pøn ja jotkujk'ajtin tyajkp, nay ja' wa'ats myik'ejtxiyidip ja mjaaj'y'ajtindi kunim ja nwindson'ajtim Jesucristo wyinaty myiñ.

24 Pø tøxi ja Dios mwil'ijxyidi, jøts tiy janch ja wya'añ jøts tuki'iyi ja jade'en ttungøxt sa ja tø wya'añ.

Ku ja Pablo t'ukajxpoo'kxni ja myigu'uk

25 Migu'uktøjkti, ni'amido'owik øøts, nibøktso'owik øøts.

26 Yiknajxidik øøts ngajxpoo'kxin jøts ja mmigu'uktøjk xkajpxpoo'kxiti sam ja Dios tsøkyin.

27 Jøts nayide'en ndanipøkti Dios y'ana'amingøjxp, jøts ya'at nøky xuk-mado'odit niduki'iyi ja mmigu'uk pøn ja Dios tjanchja'widip.

28 Mgunuu'kxidip ja nwindson'ajtim Jesucristo. Jade'en idø'on ja yjatt.

JA MYHMAJTSKPI NØKY MIDI JA PABLO TYANIGAJX JA TESALÓNIKIT JAA'Y

Ku ja Pablo tnijayi pøn ja nwindson'ajtim tjanchja'widip

¹ Pablo ø nxøøw, jadu'uk txøøw'aty Silvano jøts jadu'uk Timoteo. Ja' øts ya'at nøky ndanija'ayidip pøn jaty ja Jesucristo tjanchja'widip jam Tesalónica kajpkøjxp, pøn ja Dios Teety møøt y'etti jøts møøt ja nwindson'ajtim Jesucristo.

² Paatti kupøkti ja Dios Teety y'øy'ajtin ja Dios Teety kyunuu'kxin midi ja jajkpy møøt ja nwindson'ajtim Jesucristo.

Tyidyu'ump ja Dios Teety pøn tø kya'øyja'y'aty ku ja nwindson'ajtim mye'ent

³ Migu'uktøjkti, pøn jaty ja Dios tjanchja'widip, ejtp øøts ja Dios ndukmøjawi ndukunuu'lxyjawi meets køjxp sam idø'on pyaat'aty jøts øøts jade'en ndu'unt. Møjyi y'adøjtsidipxi ja mjanchja'windi jøts nayide'en ja tsojkin midi ja Dios mmøøjyidip jøts ja mmigu'uk xtsoktit xpa'ayo'odit.

⁴ Xondakp øøts, xjats øøts jade'en nnimadya'aky ma jaty ja Dios tjagyepy ja yjaa'y, jøts meets jade'en myiknimadya'akti ku tuda'aky mjaa'y'atti jøts ku ja mjanchja'win xyikmajada'akti øy m'amjatti mdsaaçhjatti uk ja ayo'on xpaatti.

⁵ Jade'ents yø yikja'gyuki jøts ku ja Dios ka' nugo tya'oo'kpety ku tyidyuñ, m'ejxip meets ja' jøts ku mee mbaat'aty jøts meets ja myiktøkiyidit ma ja kyutuuk ja ttanitani ja yjaa'y, pø ja'axi dø'on ixja mgu'ayo'owidip.

⁶ Paat'ajtidipts ja' ku ja Dios yik'ayøyidi pøn mga'ødyuujnidip,

⁷ jøts ja myikpoo'kxidit tuknax møøt øøts, ja'abi xøøw ku ja nwindson'ajtim Jesús wyinaty myiñ, ku tsajpjøtpy tmigida'akt ja myøk'ajtin møøt y'ankilistøjk.

⁸ Ja' ja ñime'emp jøts ja ttiidyu'unt pøn ja Dios tkamøja'widip ni tkabaduujnidi ja y'øgyajpxy ja y'ømyadya'aky.

⁹ Xemikøjxp ja nøjx tyimgyudigøydi, jade'en ja yiktiidyu'undit jøts ja jagam yikpikta'aktit ma nwindson'ajtim ja kya'ejxidit, ma ja tkapaajtidit ja y'øy'ajtin ja myøk'ajtin ku ja mye'ent.

¹⁰ Ku dø'on ja nwindson'ajtim mye'ent ja'abi xøøw jøts ja wyindsø'øgiyit pøn jaty ja yja'ajtpy jøts ja kyajxa'agiyit niduki'iyi pøn jaty ja janchja'wiyip, tøts meets ja xjanchjawi midi øø tø nnigajpxy ku ja tø myiktukmadowdi.

¹¹ Ja'agøjxpts meets idø'on ejtp nni'amidowi nnibøktsowi, jøts øø n'amidøy jøts øø nbøktsøy ja Dios jøts ja m'øy'ejxidit, pø tøxi ja kø'øm m'a'ejxiyidi; jøts nayi n'amidøøpy øøts jøts nayi nbøktsøøpy øøts jøts ja Dios ja myøk'ajtin tyiktu'unt jøts ja jade'en tyik'amøjatt sa meets ja tsojkin xjagyepy ku xunwa'andi midi tum øy jøts midi ja Dios mdamidundip.

¹² Ku jade'en xyiknaxti ku jade'en mjujky'atti, jade'en idø'on ñamyayi ja nwindson'ajtim Jesucristo xwindsø'øgidi, amuumts ja Dios Teety, amuumts ja nwindson'ajtim Jesucristo ja y'øy'ajtin mdakajxa'agidit.

1 Mee migu'uktøk, ku dø'øn ja nwindson'ajtim Jesucristo myenwā'ant ku ja nminabyaajta'andit, ja'ats øts yam nnigajpxwampy,

2 jøts kidi nugo mwinmaamya'atti, ni xkatsø'ogidit paat ja' ku ja wenk kajpxy wenk ayuujk myiktukmadowdi jøts ku ja Dios ja tyaky, uk xmadowdi ja ka'ama'ayin, uk myiktanigaxti ja nøky, ñadyijyi jade'en tpikta'akti jøts ku øøts ja nguexy, ñadyijyi wya'andi jøts ku tø yja'aty ja et ja xøøw ku ja nwindson'ajtim myiñ.

3 Niwine'ents ja yjade'embī taay xkamibøktit. Kuts idø'øn ja et ja xøøw wyinaty kya'pxwani, jawyeen ja yide'en yjatt, tum midsep ja Dios yik'ejxnit, ka'ap ja y'ukyiktsojknit. Ja dø'øn kyaxø'økt ja yikpøkyumbi pøn ja xemikøxpit kudigø'øyin tø yiktanibiktaajkiñi.

4 Ja' idø'øn ja Dios tmidsep'ajtp, ja' ja tka'øjja'wip tuki'iyi midī jaty ja Dios yja'ajtpy, uk midī jaty paat'ajtip jøts ja yikwindsø'ogit. Ja'atp paat ja jap tsaptøjkjøtpy midī ja Dios yja'ajip jøts ja jap y'ixa'akt sami Diosin. Ja' kø'øm nadyejip jøts ku ja Diosi.

5 Ku njam'ajty mā meets jam, zkidi ja xja'myatsti ku øts yø ojts nnigajpxy?

6 Jøts wā'ats meets ja xnijawī tigøjxp ja yjaakta'ani, jøts ja ka' tsojk kyaxi'iky ku ja et ja xøøw ka'anīm tpaat'aty.

7 Jaanits ja' midī ja ka'ødyumbi yja'ajtpy kuuyi ja ja'ayi yjiwā'akt midī ja tyik'amøjkip.

8 Jøts ja jaty kyaxø'økt, ja nwindson'ajtim Jesús ja tyik'ookp, ja'ayi ja tpiuxjt. Jøts ku ja mye'ent amuum kudø'ø'kx møøt, ja'ayits ja tyuktagudigø'øpy.

9 Ja' midī idø'øn ja'atp, ja miku' ja' yja' jøts ja' tmija'atp ja møk'ajtin, jøts ja yikxon tmija'att ja taay jøts ja nadyijyi tñankyja'ejxit ja y'ijxyimbi kya'ijxyimbi.

10 Jøts ja tum ja ka'øybi ja tyiktu'unt jøts ja jade'en twindaay'att pøn nøjkk windigøødyip, tøxi tkawa'andi ja tyiibyī ja yjanchpi midī yiknitsokp.

11 Xjats ja Dios ja nayide'en tyikjaty, wan jade'en tyikwindaay'atti ja'agøjxp ku tø tyundigøydi jøts ja tjanchjawidi jade'en ku yikwindaayidi,

12 jøts jade'en niduki'iyi yiktabayø'ødyit ja pyøky, tøxi tkatijjawidi tka-janchjawidi midī tīy midī janch. Ja' ne'egi chojktip tyumjaka'øybi.

Tø ja Dios ttanibiktaagi jøts ñitso'ok'attit ja Tesalónikit jaq'ay

13 Meets køjxp øøts ja Dios ejtp ndukmøjawī ndukunuu'kxyjawi, mee migu'uktøkti wine'en ja nwindson'ajtim mdsøky'atyidi. Patki'iyipxi ja Dios tø mdanibiktaagiyidi jøts mnitso'ok'attit, ja'agøjxp ja Espíritu Santo wā'ats myik'ijtyidi jøts ku nayide'en tø xjanchjawidi ja tyiibyī ja yjanchpi.

14 Jade'en'ampy ja Dios tø mjotøkiyidi ku øø tø nnigajpxy ja øgyajpxy ja ømyadya'aky midī yiknitsokp, jøts jade'en xpaattit ja kunuu'kxin midī yja'ajtpy ja nwindson'ajtim Jesucristo.

15 Jade'ents migu'uktøk idø'øn, ndukmadowdi jøts tu'ugyi xyik'ettit ja mjanchja'win, jøts kidi xja'dyigøydi ja ana'amīn midī øø tø nyaky ku øøts jam kø'øm n'ats'øjch, jøts nayide'en midī nøkyøjxp tø myiktanigaxti.

16 Ja nwindson'ajtim møøt ja Dios Teety, ja' y'øy'ajtingøjxp tø xtsøjkyindi. Tø ja nayide'en xmø'øyindi ja kajpxjot'amøki midī xemikøjxp, jøts ja yikxon njøp'ejxin.

17 Wants ja nayide'en tyikmøjki ja m'aaw ja mjoojtti jøts tu'ugyi xwindanidit jøts jade'en xnigajpxtit uk xu'undit tum ja y'øybi.

3

Amidowdi pøxtsowdi ja Dios jøts øøts ja kyajpxy nyikyø'øyyiyit

¹ Migu'uktøjkti, ja' øts yam njaaknigajpxwampy jøts øø xni'amidowit xnibøxtsowit wan ja jaa'y tsojk tnmadowdi ja nwindson'ajtim y'øgyajpxy ja y'ømyadya'aky pøn jaty tsinaadyip øy maðsoo, jøts tsojkingøjxp tkupøktit nayide'en sam meets ja tø xkupøkti.

² Jøts nayide'en x'amido'odit ku Dios x'ajot'attit jøts øø x'ixmatst ja ka'øyyjaa'dyi ja kawindiy'ajtpidi, jabi ka'axi niduki'iyi ja jaa'y ja janchja'win tmøðidi sam adøm.

³ Øyts ja nwindson'ajtim, ja' mee tu'ugyi mdukmi'ettip ja winmaa'n jøts ja m'eix'etidit jøts ja miku' mgamimajada'agidit.

⁴ N'ajot'ajtpy øøts ja nwindson'ajtim jøts ku xundi jade'en jøts xun'adø'øtstit sa jaty mee n'ane'emy.

⁵ Wan ja nwindson'ajtim nagyø'øm mbudøkiyidi jøts xjaaknijawidit sa ja Dios xtsøjkyindi jøts nayide'en xjagyaptit ja jotmøk'ajtin ja tuda'aky'ajtin sam ja Cristo.

Paat'ajtiyip tu'ugyi nnadyamiyojxa'ant ja ndunkjøøjp

⁶ Mee migu'uktøjkti, ja nwindson'ajtim Jesucristo køjxp øøts yam n'ane'emy jøts xmajstutittit ja mmigu'uk pøn katunwandip uk pøn tkabadunwandip chinaa'yingøjxp ja ixpøjkin midi tø myiktukmadowdi, midi øø tø nnigajpxy.

⁷ Mnija'widipxi sa mjujky'attit sa mdsøønidit mdanidit jøts xpadu'undit nayide'en sa øø nduñ; ka'axi øø juuni ngatuñ ku øøts jam ndsøøni ma meets jam.

⁸ Uk ngagujuy øøts ja ndsapkaaky, jadi'iñi øøts ja nugo ngay, ka'ats yjade'eni, tump øøts, jotigøøpy øøts xinaxy tsunaxy jøts jade'en nidu'ugin mgayik'adsepti.

⁹ Øy øøts idø'on ja xpaat'aty jøts meets xyakt ja pudøjkin, jøts øøts ja n'amido'ot, ka'apts øøts jade'en nduñ, tump øøts, pøjpk øøts, jøts jade'en myiktuk'ejxti sa xu'undit.

¹⁰ Ku øøts jam ndsinaay ku myikmøøtsinaadyi, yide'enxi øø nyajky ja tiy'ajtin: Pøni pøn katunwamp ka'ats kya'aty.

¹¹ Jade'en øø tø nyiktamimadya'aky jøts ku meets jam winaagin pøn jadi'iñi nugo tyiknajxtip, niti tkatundi. Ja'ayi tyuñ'ajttip sudso niti tkatu'undit, ne'egi ja myigu'uk tyikwinmaamy'a'atti.

¹² Yø'øbi jaa'yts øøts idø'on nni'ane'empy ja nwindson'ajtim Jesucristo kyutujkøjxpit jøts wan ttajotkujk'atti ja tyunk jøts jade'en tpaattit midi tya'ujky'attip.

¹³ Migu'ukti, kidi juuni x'ixmatsti ja ødyu'unin.

¹⁴ Ku jam pøn tkamøjpikta'akwa'ant midi øø nnigajpxy ya'at nøkyjøtpy, øyim x'ejxtit pøn jade'en adøtsp jøts kidi xund'atti, wan iiy wine'enin tsø'ødyunjawidi.

¹⁵ Kidi xmidsøpøkti, jade'en x'ana'amdit sam pyaat'aty ja jaa'y ja myigu'uk t'ane'emy.

Ku ja Pablo y'ukajpxpoo'kxni

¹⁶ Jøts ja nwindson'ajtim tyakp ja øy'ajtin, ja' ejtp mgunuu'kxidip øy maðsoo, øy tigati yjatuñi, ja nwindson'ajtim ni'ijtyi mjagyapidip.

¹⁷ Øts ngøjø'øm meets ya'at kajpxpoo'kxin ixyam ndanijayi. Jøts øts nxøøw nayide'en nbikta'aky sa øts ejtp nduñ ku øts ja nøky nguexy. Pablo.

¹⁸ Ja nwindson'ajtim Jesucristo niduki'iyi mmo'ojidip ja kunuu'kxin. Jade'en idø'on ja yjatt.

JA MYIDU'UKPI NØKY MIDI JA PABLO TYANĠGAJX JA TIMOTEO

Ku ja Pablo ojts tnijayi ja Timoteo

¹ Øts idø'n Pablo'ajtp. Øts ja Jesucristo ngudanaapy sam øts tø xpikta'aky ja Dios Teety midi xyiknitsoojkimp jøts nayide'en ja nwindson'ajtim Jesucristo pøn njøp'ijxyindip jøts ja nitso'ok'ajtin xmo'øyindit.

² Mets Timoteo ya'at nøky ndanija'ayip. Mjagyajpnipxi mets ja janchja'win, jade'en'ampyts myik'u'nktijj myik'u'nkjawi. Ja Dios Teety mgunuu'kxiip møøt ja nwindson'ajtim Jesucristo. Ja' mmo'ojip ja pya'ayo'owin, ja' mmo'ojip ja yjotkujk'ajtin.

Ku yikni'ane'emy jøts kyayikupøkt ja ka'øy'ixpøjkin midi ka' tyiyi yjanchi

³ Tan meets jam Efeso kajpjtøp sam tø nda'ane'emy ku øts jam wyinaty nnøjkxwa'añ jam Macedonia. Ana'am ja jaa'y midi jam winaagindi jøts kidi ja tnanky'ixpikyidi ja winmaa'ñ midi ka' tyiyi yjanchi

⁴ jøts nayide'en kidi nugo tyikmøjtøkidi ja kwenti ja madya'aky midi nisudso'ampy katidyøjkip. Nugo amyøñ tsaachyøñ tnamadya'aky ja aptøjkti. Nugo adøm njakajpxy'ajtyindi sudso tpaaty, nisudso'ampyts kyatiidyøki. Niwine'en adøm ja xkabudjka'andi jøts adøm nbaduujnin ja Dios yja' midi adøm ja tø xanipijkyim midi tø nyikmø'øyindi janchja'wingøjxp.

⁵ Jøts ja'agøjxp ya'at myikta'ane'emy jøts nixem niyam ja tsojkin xjagyaptit midi ja Dios yja'ajip, midi yiktump øy'ajtingøjxp øwyinmaa'ngyøjxp ku ja nadyamiyoxi ñaxy amuum janchja'wingøjxp.

⁶ Tøts yø winaagin tmajtstutnidi jøts nugo ñnankyuu'tigøyidi ku tpaabøkti ja winmaa'ñ midi nisudso katidyøjkip, nugo nadøki tniyayjpxy'atti.

⁷ Ja' chojktip jøts kyajpxwejpi'attit sa ja Moisés kyutujk wya'añ, ni tkaja'gyukidits ja wyinmaa'ñ kø'øm sa jaty wya'andi, ni ja y'ixpøjkinbaat tkanijawidi midi nadyijyi ñigajpxtip amimøjnija'wibim tiy janch.

⁸ Nnija'windip adøm jøts ku ja'abi kutujk y'øyi ku jade'en tyunkpaaty sam tø yiktanibiktaagi.

⁹ Jøts yiknijawit nayide'en jøts ku nima ja kutujk kyayiktanibiktaagi ja øyjaa'y midi katundigøødyip; pø ja'axi ja kutujk wya'añ ku ja tø kyøjy jøts ja tyu'unt ma ja jaa'y pøn tum nay'adsep tja'widip, pøn kamadoodip. Jaa ja tyuñ ma ja ka'øyjaa'dyi, ma ja møjpxøkyjaa'dyi; pøn tkawindsø'jkidip ja Dios, pøn tkawindsø'jkidip ja tsinaa'yin; pøn ja yikjaa'y'oo'k tyunk'ajtpy, øy ja tyeety ja tyaak ja tyik'ooktit tyiktigø'ødyit. Jats idø'n ja kutujk tyunkpaaty jøts ja tpay'øy

¹⁰ pøn namyøøt'ajtidip nugo, yam ja ka'ap y'amajtsk'atti; uk tmøøt'atti myiyaa'dyøjk myidø'øxyøjk; pøn jaa'myaa'tstip, pøn myigu'uk twin'øøndip, pøn ja Dios nugo tniwambajttip jøts ja myigu'uk twin'øøndi. Nayide'ents ja kutujk tpayø'øy pøn ja øy'ixpøjkin tkatsojpk,

¹¹ ja øy'ixpøjkin midi tnigajpxp ja øgyajpxy ja ømyadya'aky, ja Dios yja' midi yiknitsokp, midi øts yam tø nyiktanipiky.

Tyamøja'wip ja Pablo ja Dios ku ja pya'ayoyiyi

¹² Ndukmøja'wipts ndukunuu'kxyja'wipts øts ja nwindson'ajtim Jesucristo pøn ø tø xyikjotmøkt'a'aky jøts øts ya'at ndunkjøøjp ndu'unt. Tøxi øts ja x'ixy jøts ku øts ja nmi'øy'aty, xjats øts ja tø xpikta'aky jøts øts ja jade'en nmidu'unt.

13 Ja' øts idø'øn jade'en kø'øm xump, øy øts idø'øn ja y'ijty nja'axøøkmigajpxy, øy øts idø'øn ja y'ijty njabawidity jøts øts ja nmatswa'lañ ngawindiy'ajtingøjxp jøts øts ja y'ijty nyik'amjaty nyiktsaachjaty. Møj ja Dios ku øts ja xpa'ayøøy, ka'ap øts ja wyinajty njanchjāwinim, ni nganjāwi øts pøni ti øts jade'en ndumpy.

14 Paty øts ja nwindson'ajtim møj ndukmøjawi ku øts ja xukjanchja'wiyi ja yja', jøts jade'en ja nmigu'uk ndsojkindit nminamyajyindit ku møøt n'ejtindit ja Cristo Jesús.

15 Tiy'ajtin yø' jøts niduki'iyi njanchja'wa'ant: ku ja nwindson'ajtim myiñ ja naxwiñ jøts ja tyiknitso'ok'ajty ja pøjkpitumbi jaa'y. Møj tundigøøbyi øts y'ijty, nika' pøn jade'en.

16 Jade'engøjxp øts ja Dios xpa'ayøøy jøts yik'ext yiknijawit sa ja Jesús møj ja tyuda'aky'ajtin tjagyepy ku øts ja xpojkpimee'kxy. Jade'en ø ndunjøpi sudso yikpaatt ja jujky'ajtin midi xemikøjxp ku ja yikpabiky yikjanchjawi.

17 Paty nayide'en nwindso'jka'ant, nmøja'wa'ant n'øyja'wa'ant ja Dios Teety midi nwindson'ajtyindip xemikøjxp, ni kya'øøky ni kyadigøy ja', ka'ap ja yik'ixy. Ja'ayi dø'øn tu'ugyi ejtp, pøn tnija'widyaapy. Jade'en idø'øn ja y'ejxi tyiyi.

18 Mets u'nk Timoteo, mets ya'at ndanipijky jøts yikxon xpadu'undit ja Dios yja' samdam mmimadyajkidi ja Dios kyugajpxtyi. Mjanchjāwip ja nwindson'ajtim amumjoojt jøts øy ja mwinnmaa'ñ xyik'ett.

19 Jaa winaagin jade'en yjajttøø ku ka' tmøjpkiktøø sam tjanijawidi, jade'ents ja yjanchjāwin tø tyuu'tigøydi

20 sam yjajttøø ja Himeneo jøts ja Alejandro. Tøxi øts ja kutujk nmø'øy ja Satanás jøts o sagasa ja y'ayo'on ja tpaajtidit jøts jade'en tja'gyukidit jøts ku ja Dios kyayikwindsøy.

2

Ku Pablo ttukmadøøy ja Timoteo sudso tkugajpxa'akt o pøngapøn jaa'y

1 Ixya meets jawyeen ndukmadøy jøts ndanipøkti jøts møk xukunuu'kxyjāwidit ja Dios jøts x'amido'odit xpøktso'odit jøts tpuðøkit ja naxwiñ'ñit jaa'y.

2 Kuwandaagidi ja windsøndøjk ja kudunktøjk jøts øy tsuj nyiknaxindit agujk jotkujk, jøts ja Dios jade'en ni'amuki xkunuu'kxindit ku amumjoojt nwindso'jka'ant nwinja'wa'ant.

3 Ku jade'en nbadu'unint jade'ents t'øyjāwi ttsujāwi ja Dios midy xyiknitso'ok'ajtimp,

4 Jabi jade'enxi ja ttsøky jøts niduki'iyi nnitso'ok'ajtindit jøts nnija'wa'andit ja tyiiby ja yjanchpi.

5 Tu'ugyi jaa ja Dios Teety, jøts nayi tu'ugyi ja' midy xyiknitso'ok'ajtim jam Dios wyindum: ja nwindson'ajtim Jesucristo, ja' pøn jaa'y'ajtin nayide'en myøøt'ajtpy.

6 Ojts ja nwindson'ajtim Jesucristo ñagyøyakyi jøts ja ojts xku'oo'ka'am adøm nbøkyøjxp jøts adøm nitso'ok'ajtin jade'en nbaajtyindi, xjats ja jade'en enkyi tø yiknijāwinim ku ja xøøw ja jumøjt tø tpaatynim sa ja yjajty kyubejty.

7 Ja'agøjxp øts tø nyikpiktā'aky kugajpxy'ajtpi ku'aaw'ajtpi jøts øts ja janchja'win jøts øts ja tiy'ajtin nduk'ixpøktit pøn ka'israelit jaa'dyi. Tiy janch øts idø'øn nwa'añ, ka' nugo ndābyaaty, pø ja Cristoxi øts amuum njanchjā'wip.

⁸ Paty ø nwa'añ, jøts o ma pøn tja'myatstit ja Dios, ka'ap ja tsep, ka'ap ja aka y'øyi. Tu'ugyi amuum nbiktajkin ja njanchja'win.

⁹ Jøts ja tø'øxyøjk, tuda'aky'ajtin øyjaa'y'ajtin yiktundip. Ka'ap ja ja'abi wet tpikta'aktit mididi namyikaxi kaxø'kp mididi ja myigu'uk nugo tyukta'amutskidip. Kidi namyikajxingøjpx ja wyaay tyik'øyidi tyikpaadidi.

¹⁰ Jade'en ne'egi tpudøkidit ja myigu'uktøjk ku ja øy'ajtin tyiktu'undit sam ja'adi pøn ja Dios tø ñadyamiøxyidi.

¹¹ Ku ja Dios yja' yikajpxwa'kxy, amøñi ja tø'øxyøjk tpatmado'odit, tuki'iyi ja yujy'ajtin tpikta'aktit.

¹² Ka'ap mibaat ja tø'øxyøjk tkajpxwa'kxit ja Dios yja'. Ka'ap ja yaa'dyøjk tyik'amutskit, ja' tsojkip jøts amøñi y'ettit.

¹³ Jabi jawyeenxi ja Dios tyikaxi'jky ja Adán jøtsnim ja Eva.

¹⁴ Jøts ja Adán ka'ap ja yikwin'ii'ñ. Ja tø'øxyøjk ja' ne'egi yikwin'øø'n, jøts ku yikwin'ii'ñ jade'ents ja pøky tpaajty.

¹⁵ Jade'en'ampy ja tø'øxyøjk ja nitso'ok'ajtin tpaatti ku ja u'nktaak'ajtin tyik'awa'andi, ku ja janchja'win tpadu'undit, ku tjagyaptit ja tsojkin jøts ja wa'ats'ajtin, jøts møøt ñadyabudøkiyidit ja ja'gyukin.

3

Sa yjaa'y'attit pøn ana'amp tsaptøjkjotp

¹ Janch tiy'ajtin yø': janch øy yø'øbi tunk pøn tniwindsøn'ajtwamp ja Dios yja'.

² Paty nayide'en øy tsuj yjaa'y'attit jøts ka' nugo o sa yiknøjmidit. Pøni jam ñidø'øxy, tu'ugyi ja tmøøt'att, ka'ap ja kawinaak. Tuda'aky yjaa'y'att, sam ja tyunk tmøøt'aty ja'ats pyadu'ump. Jøts twindsø'øgit twinjawit pøn nimejnip nija'jtíp jam tyøjkjotp; jøts øy tsuj nayide'en yik'ixpøkt;

³ ka'ap y'øyi jøts y'amu'u'kyjaa'y'att jøts ka'ap tsep t'ixa'at. Ka'ap ja myigu'uk nugo twin'øønt jøts ja meñ jade'en tpaatt. Ja' tsojkip jøts ja pa'ayo'owin ttu'unt jøts ka'ap ja meñ nugo pøkpaat tjawit.

⁴ Øy tsuj y'u'nkteety'att sam pyaat'aty jøts tuki'iyi t'ext yjønjojp, jøts ja y'u'nk øy tsuj wyindsø'øgiyt;

⁵ ku jade'en pøn tkatu'unt yjønjojp tyøjkjotp sam u'nkteety'ajtin, ¿sudsots ja t'ana'amt pøn ja Dios tjanchja'widip?

⁶ Ka' pyaat'aty ana'ambi tyøkit pøn tjembyabøjkp ja Dios yja', ku ja nugo ñamyøjpikta'agit, jøts ku nayide'en yjatt sam ja miku' tø tyaja'adyi ja ayo'on.

⁷ Nayide'en chøkyi jøts ttunjøpit ja øy'ajtin ja tuda'aky'ajtin jøts jade'en wyindsø'øgiyt pøn ja Dios yja' tkabaduujnipnim, jøts ka'ap ja jade'en pøky tyaja'adiyt jøts nayide'en ka'ap ja miku' nugo wyin'øøniyt.

Sa yjaa'y'attit ja møjaa'dyøjk pøn tundip tsaptøjkjotp pøn tpudøjkp ja ayoobi jaa'y

⁸ Nayide'en ja møjaa'dyøjk pøn tkumaadyip ja ayoobi jaa'y jøts tyuda'aky'att y'øyyaa'y'att jøts kø'øm ñawyindsø'øgiyt. Ka' ti ttu'undit, ka' ti tkajpxtit. Ka' myuktigø'ødyit jawyeen ja'adi, jøts ka'ap ja meñ nugo pøkpaat tjawidit.

⁹ Øy tsøky wa'ats tñajawidit sa ja Dios yikjanchjawi mididi y'ijty kayiknija'wip, jøts ja wyinmaa'ñ øy tsuj wa'ats tmøøt'attit.

¹⁰ Ja' tsojkip jøts yik'ext yiknijawit pøni ka' ti tundigø'øyin tmøøt'atti, møjaa'y'attipts ja' jøts tkuma'adyit ja ayoobitøjk.

¹¹ Nayide'en ja ñidø'oxy tyuda'aky'ajtmidit y'øyjaa'y'ajtmidit. Ka' nugo yjemgajpxtit pyagajpxtit. Ja' tyu'undip midit tiy'ajtin.

¹² Ja møjaa'dyøjik tu'ugyi ja ñidø'oxy ja tmøø'tatt, jøts øy t'ext ja y'u'nk y'una'jk jam yjønjojp tyøjkojp.

¹³ Ja møjaa'dyøjik pøn øy tsuj tundip sa ja tø yiktanipøkti, jinaxy ja myøjtøkidi jinaxy ja yikwindsø'ogidi jøts ja nayide'en ka' tsep t'ukja'wiñidi tniagajpxtit sudso yikjanchjawi ja nwindson'ajtim Jesucristo.

Sa Dios ja wyinmaa'ñ tñanky'ijxyiyi midit y'ijty kayiknija'wipnim

¹⁴ Tsojk ø nnøjkxt jøts me n'ats'ext; ixyamts mets ya'at nøky ndanijayi.

¹⁵ Ku øts jotmøn nda'anigyajt, jøts xnijawit sa njaa'y'ajtmidit møøt ja nmigu'uk pøn tø tjanchja'wiñidi ja Dios, pøn amuum ja'ajtniyidip ja Dios, ja yikjujky'ajtpi, pøn tniigubojktip ja tyiiby ja yjanchpi.

¹⁶ Janch tiy'ajtin yø', ku janch møj ja Dios wyinmaa'ñ midit y'ijty kayiknija'wip. Ixyamts yik'ixy yiknijawi jabi jade'enxi jap jaabyety y'ity ku:

Jaa'yin ja nwindson'ajtim Jesús ñanky'ejxyi ya naxwiñ;

jøts ja Espiritu Santo tniagajpxy ku ja' tiy'ajtin tmøø'aty

jøts nayide'en ja ankilistøjk y'ejxøø ñija'wiyøø.

Tø yikajpxwa'kxy ja Jesús y'ixpøjkin o magajp,

jøts jade'en tpadundi ja naxwiñit jaa'y

jøts ja chajpajtnaa ma ja Dios Teety jap.

Jade'en ja nøky wya'añ.

4

Sa winaaqin tmajtsu'uttit ja Dios'ajot'ajtk

¹ Tiy'ajtin ja Espiritu Santo wya'añ ku winaaqin tmajtsu'uttit ja Dios'ajot'ajtk ku wyinaty wyingøn jøts kyøxt ja naxwiñit. Jøts ja tpadu'undit ja ixpøjkin midit ka' tyiyyi yjanchi, midit ja miku' yja'ajtpy.

² Ja'abi jaa'y ja tmado'odip pøn taay'ajttip pøn ja pyøky tkaja'widip øy ja tjanijawidi ku møj tø tyundigøydi.

³ Jade'en wya'andit jøts ku ka' n'amajtska'ant jøts ka'ap o ti njøø'kxint øy ja Dios ja kø'øm tø tjabikta'aky; pø tøxi ja Dios ja ttanibiktaagi jøts ja nyiktunkpaajtindit tuki'iyi ja pikta'aky, pøn jaty ja Dios tjanchja'widip pøn jaty tniija'widip ja tyiiby yjanchpi yjøø'kxtipts ja', wan Dios ja ttamøjawidi ttagunuu'kxyjawidi.

⁴ Midit ja Dios tø tyik'øyi, tum øy ja', ka'ap adøm ja ngagupøjkint. Ndamøja'wimp ja Dios ja' ku nyiktunkpaajtint,

⁵ ku ja jade'en ndu'unint kunuu'kxyts ja wyimbejtni ja pikta'aky sam ja kyajpxy wya'añ.

Sa ja Jesucristo øy tsuj yikmiduñ

⁶ Ku ya'at øy xuk'ixpøkt ja migu'uktøjk, øy idø'øn ja Jesucristo wyinaty xmiduñ, jøts m'ajot'atp ja', myiktunkpaatp ja' ja ixpøjkin sudso n'ajot'ajtim ja Dios midit ixyambaat mgamajstutpy.

⁷ Ka' xmøjpikta'akt ja kajpxy ja ayuujk midit ka' tyuñ. Amumjoojt ja Dios yja' xpaduujnit;

⁸ øy nugo njanay'ejx'ejtint jøts møk møjaa'w nyiknaxjint, ja Dios yja' ne'egi møj ku nbaduujna'ant. Ja'ats xpudøjka'amp jøts øy tsuj ndsinaa'yint jøts nayide'en ja øy'ajtin xukpaajtint xemikøjxp.

⁹ Janch yø' tiy yø', paat'ajtip jøts yø niduki'iyi nbadu'unint.

¹⁰ Ja'agøjxp møk ndu'unint øy njagu'ayo'ombaajtindi øy njayik-jemdu'uñindi nyiktedu'uñindi. Ka' ti ngumaa'yindit, jabi tœxi ja Dios xmø'øyindi ja jøp'ejxin jøts niduki'iyi tyiknitso'okt pøn jaty pabøjkiyip.

¹¹ Yø'øbi winmaa'ñ idø'on mni'ana'amp jøts nayide'en xnanky'ixpøkit.

¹² Øy tsuj jawyeen xunjøpit sam pyaat'atyin tpadu'undit pøn ja Dios tjanchja'widip jøts jade'en myikupøkt øy mja'una'jkinim; jøts ja m'ayuujk øy tsuj xyikpidsø'ømt møøt ja m'øyjaa'y'ajtin, møøt ja mba'ayo'owin, møøt ja mjanchja'win.

¹³ Ku øts jam udy'a'agyi nja'att, kajpx ja nøky jam ma mnamyukyidi sa ja Dios kyajpxy wya'añ. Yikxon xukwinjawit ja migu'uktøjk jøts ja yjotmøkt'a'aktit, yikxon waani xyik'ixpøkt.

¹⁴ Yiktuñ ja møk'ajtin ja wijy'ajtin midi ja Dios tømøø'øyi, Dios waan ku ja møjaa'dyøjk ojts mgønixajyi.

¹⁵ Tu'ugyi xu'unt yø'øbi winmaa'ñ jøts jade'en t'ejxtit tnijawidit sa tømøø'øyi xyikmiwēni xyikaja'aji ja mja'gyukin jøts ja mjanchja'win.

¹⁶ Øyim mnay'ejx'ettit kø'ømt midi mwinmaa'ñ'ajtpy, mididi mdu'ixpijky, mididi mduknija'wip ja migu'uktøjk, tu'ugyi xyik'ett mididi mdumpy. Ku jade'en xu'unt mbaatpts ja øy'ajtin jade'en, nayide'en ja'adi pøn tmadoodip ja ixpøjkin.

5

Sa ja Timoteo møøt y'ett pøn ja Dios tjanchja'widip

¹ Ka' xwindsot, ka'ap o sa xnøjmit ja møjaa'dyøjk; ne'egi tudā'aky xkajpxwejt sam ja mdeedyin; nayide'en ja una'jktøjk øy tsuj xjawit sam ja mgø'ømigu'ugin.

² Nayide'en ja møjaa'dyø'øxy xwinjawit xwindsø'øgit sam ja mdaagin, jøts nayide'en ja kiixyuna'jkti sam ja mgø'øm'uchin, jade'en ja mduda'aky'ajtin xyiktu'unt.

³ Pudøki ja ku'økyø'øxy pøn ti kadyimy'ejtixp.

⁴ Pøni jamts ja ku'økyø'øxy møøt y'u'nk y'una'jk møøt y'ap y'ok, jade'en ja una'jk pyaat'atyidi jøts ja tpuðøkidit ja tyeety tyaak jøts ja tyikwimbejtniyidit ku ja tømøø'øyi, yø' Dios y'øyja'wip, jade'en Dios ttsøky.

⁵ Ja ku'økyø'øxy pøn nadyu'uk tømøø'øyi, pøn nipøn ka'ejtp, ejtpts ja Dios ja t'ajot'aty jøts ja pyudøkiyt, ka'ap ja Dios ja tja'dyigøy jøpy ux.

⁶ Jamts nayide'en ja ku'økyø'øxy pøn ja Dios tka'ajot'ajtp. Tyumpy ja' pøni ti ja tyunwampy, øøky ja ñabyiktaajkniiyi.

⁷ Tukmadow yikxon, wan tnijawi jøts ka' pøn øy sa ñøø'mxiyit.

⁸ Jamts winaagin tkajotmay'aty ja myigu'uktøjk, abiky tpikta'aky ja yjømøn ja tyøjk jøts ja t'ixmajtsni ja Dios'ajot'ajtk. Tyimwyenks ja ne'egi pyidsimy, ka'ap jade'en pøn ja janchja'win tkajagyajptinim.

⁹ Yø ku'økyø'øxy yiklisti'atp mididi tugi'pxy jumøjt pøni tøts ja tu'ugyi ñiyaa'y tømøø'øyi, paat'ajtiyip ja mibaat yikpuðøkit.

¹⁰ Mibaat ja yikpuðøkit ja'agøjxp ku tømøø'øyi, pøni tømøø'øyi y'u'nk y'una'jk yikxon tyikyeeke tyiktsø'øky, pøni tømøø'øyi tsuj t'adsøy ja jaa'y pøn tøk'ayø'ødyip, pøni tømøø'øyi twinjawi twindsø'øgi ja myigu'uk pøn tømøø'øyi tkupøjknidi ja Dios, pøni tømøø'øyi amjajtip tsaachjajtip, uk pøni tømøø'øyi ttuñ jadu'uk øy ti may'ajt øy ti puðøjkin.

¹¹ Ka' mibaat yikjaabyatt ja ku'økyø'øxy pøn una'jknim; ja'agøjxp ku jøtmøn y'amajtskit, jade'en'ampyts ja Cristo yja' ka'pxy tka'ukpadu'uniiyt,

12 Jøts yikpøky'ixy ku tø tmajtstutni ja' midi tø t'ukpadøki.

13 Jats ja' pøn nugo ttunk'ajtp ja tøk'ayø'øky, ja nuux'ajtin ja pagajpxk nugo jade'en myi'widijtpy, jøts nugo ttatøki midi jagapaat'ajtiyip.

14 Paty y'øyi jøts y'amajtskit pøn ku'økyø'øxy una'jknim, jøts ja y'u'nk t'ext tjagyapt sam pyaat'aty; jønjøtpy tøjktøtpy n'ejxint njagyajpint, jøts ka' nugo ja jaa'y pyagajpxiyit.

15 Jamts winaagin pøn ja Dios yja' tø tmajtstuujti, ja miku' yja' tø tpanøjkxiyi.

16 Pøni pøn ja Dios yja' tø tkupøjkidi jøts pøni jam ja myigu'uk ku'økyø'øxy, mibaat ja kø'øm tpudøkidit pøni ti ja ka'ejtxip, jøts ja ka' pyudøky'idit ja møjaa'dyøjk midi tundip jap tsaptøjktøtpy. Jade'en'ampyts nayide'en yikpudøkit ja ku'økyø'øxy pøn ja myigu'uktøjk kadyimy'ejttip.

17 Ja møjaa'dyøjk midi tngutujk'ajttip ja janchja'wibidi jøts nwindso'jka'ant nwinja'wa'ant. Jamts ja' midi xuk'ejximp xuk'ixpøjkimp ja Dios kyajpxy, ne'egits ja møj nwindso'jka'ant jøts ja nbudøjka'ant.

18 Jabi jade'enxi jap jaabyety y'ity: "Kidi ja mdsakaa ajeñ xyik'okti ku ja xyiktunwa'andit." Jøts nayide'en: "Ku jaa'y nyiktu'unint kuwani myijuu'n ja ttsøky." Jade'en ja nøky wya'añ midi ixa tø xnijawidi.

19 Ka' xmøjpikta'akt ku yikni'øønit ja møjaa'dyøjk pøni ka'ap ja a'ejxnaxpi te majtskin uk tigøøgin.

20 Pøni tundigøy'adøstip ja møjaa'dyøjk, mibaats ja jam yiktamigajpxt mā ñamyukyidi ja janchja'wibidi jøts jade'en tjøptsø'øgidit tjøpjawidit ku tyundigøydi.

21 Ku ya'at jade'en ndanipiky wa'ats Dios Teety tmadø, wa'ats ja nwindso'n'ajtim Jesucristo tmadø møøt ja ankilistøjkti, jøts øy yikxon idø'øn xpadu'unt yø ana'amin, ka' pøn nugo xukta'oo'kpatt. Pøni pøn tundigøødyip tuknax ja xpayø'øty.

22 Ka' nugo ajawi xpikta'aktit ja møjaa'dyøjk midi tngutujk'atp ja janchja'wibidi, jawyeen yik'ext yiknijawit pøni sa yjaa'y'aty, kuts kya'øyjaa'y'aty jøts ja pyøky ttpaatt ja janchja'wibidi, øyim mnay'ejx'etit jøts ja pøky mgapaadit.

23 Kidi nugo tsuxknøø xumi'uuky, pø pøjk'ejtpxi xijy mjoojt, vino m'uukp waani.

24 Pøn tundigøødyip midi yiknija'wip wa'ats, ja'ats yikpayø'øpy, midi'its kayiknija'wip jaanimts ja yiknijawit ku ja payø'øyin xøøw y'ett.

25 Nayide'en ku ja øybi ndu'unint; øy ja jaty; yjagayiknijawi, kuwani yiknijawi udy'a'gyi. Ka'ap ja jadi'iñi tyañ.

6

1 Yø tumbitøjk øy tuda'aky yjaa'y'attit jøts twindso'øgidit yikxon ja wyindsøndi, jøts ka' nugo ja Dios yikpagajpxt, jøts nayide'en ka' nugo nyiktabagajpxint ja n'ixpøjkin.

2 Nayide'ents ja tumbitøjk pøni jam ja wyindsøn midi nayide'en tpadump ja Dios yja', ne'egi møjts ja twindso'øgidit, pø pyadumpxi nayide'en. Jade'ents ja ne'egi tpudøkidit sam ja tsojkin tjagyapti. Me Timoteo, tukmadow kajpxwa'kx yø'øbi ana'amin midi nnigajpxpy.

Sa ja Dios yja' nbaduujna'ant jøts agujk jotkujk n'ejtint

3 Pøni jam pøn tkajpxwa'kxy ja wenk ixpøjkin midi ka' tminabyaadyi ja nwindso'n'ajtim Jesucristo yja', midi tkawindso'jkip ja Dios,

⁴ nugo ja ñamyikexyi, ka'ap ja tñijaw'i pøni ti kyajpxpy. Nugo tyikjø'øpy ja winmaa'ñ ja ixpøjkin; jøts jade'en nugo ja tsep tyiknaḡkida'aky ku nixem niyam ja ñanky'amutskiwy'a'añidi.

⁵ Nugo ja y'awa'an'ajtk tyiktunidi ku tka'uknija'wiñidi ja tyiibi. Nugo win'øø'ningøjpx nadyijyi ja Dios yja' ttuujnidi. Jade'en ja wyinmaydi jøts jade'en tñij ja kumeeñ'ajtin yikpaatt. Mets Timoteo, majtstu'ut yø' pøni pøn jade'en jaa'y'ajttip, kidi xminamyayi.

⁶ Jade'en'ampy adøm ja jotkujk'ajtin nmøøt'ajtyim ku ja Dios yja' nbadu-ujña'am øy meeñ o ti ngamøøt'ajtyim.

⁷ Ka' ti pøn tñimiñ ku ngaxi'jkyimp ya naḡwiñ, nayide'ents ku nwindigøø'ña'ant, ka'ats ti n'uk'ejxn'a'ant;

⁸ pøni nbaajtyimp ja ngaajyk ja n'uujkik jøts ja nwet ja nnaamy, nda-jotkujk'ajtimpts idø'on ja'.

⁹ Jamts pøn ja kumeeñ'ajtin ttsojqp. Tyumpy, o ti ttu'unt, jøts ja jade'en o sa nugo tpaatt ja meeñ, køømts ja jade'en ñanktyuu'tigøyidi, ka' tja'gyukidi pøni ti tyundip. Køøm ayo'on ja jade'en ñanktyukpaadyidi, jade'ents ja nugo ñankwyindigøyidi.

¹⁰ Ne'egi nugo xyiktundigøø'yint xyikajpxigøø'yint ku ja kumeeñ'ajtin ndsojkin; jamts pøn winaggin nugo tsojk'anaxy jøts ja pabøjkin ja janchja'win tka'ukpaduni, jøts ja jade'en ja ayo'on ñadyukpaadyit.

Sa ja Timoteo yikxon tñigubajk'att ja janchja'win

¹¹ Mets Timoteo, kidi me nayide'en m'adøtsmi, pø Diosxi mets ja yja' mbaduujnip. Yikyø'øpy mets ja mdsinaa'yin øy tsuj, ja m'ajot'ajtin jøts ja mjanchja'win. Jøts xminamyayit øy pøn ja mmigu'uktøjk, jøts ja tuda'aky'ajtin yujy'ajtin xyiktu'unt.

¹² Nitani møk yø janchja'win; kidi xmajtstu'uty midi ja Dios tø mdamidsøkyiyi midi xemikøjpx ejtp, jabi øy tsujxi tø xukmadøpy ja mayjaa'y sa ja janchja'win xjagyepy.

¹³ Ja Dios Teety midi xyikjujy'ajtindip, ñija'wipts ja', sam ixyam n'ane'emy, nayide'ents ja nwindson'ajtim Jesucristo ttukmadøpy ja tiy'ajtin ja Poncio Pilato.

¹⁴ Paty yikxon xpadu'unt jade'en, midi tø myiktanipiky, ka' xyiktigatst, jøts ka' pøn mbøky'ejxyit. Jade'en xu'unt kunim ja nwindson'ajtim Jesucristo mye'ent.

¹⁵ Ku tpaatt ja xøøw ja jumøjt, jøts ja Dios Teety ja tkaxt ja nwindson'ajtim ya naḡwiñ. Tu'ugyi Dios Teety myøji midi ja øy'ajtin ja xondaajkin tmøøt'ajtp. Møk ja kutujk tjagyepy, ka' pøn windsøndøjk jade'en.

¹⁶ Yø' tu'uk møj, ka' y'øøky, xemikøjpx ja y'ity. Jaj agujkpy chøøni ma' ka' pøn mibaat pyaadyi y'ijxyi. iYikwindsø'jkip yikwinja'wip ku ja myøk'ajtin tmøøt'aty xemikøjpx! Jade'en idø'on ja y'ejxi.

¹⁷ Ana'am pøn kumeeñ'ajtp ya naḡwiñ jøts ka'ap nugo ñadyamikaxiyit. Ka'ap yø kumeeñ'ajtin nugo ñadya'agajpxiyit, ka'ap yø y'ity. Ne'egi øy ku Dios t'ajot'tatit amunjoojt, pø ja'axi ejtp xemikøjpx jøts takt'iyyi xmøø'yim ja øy'ajtin ja jotkujk'ajtin.

¹⁸ Nøjmi ja kumeeñ jaa'y jøts yikxon yjaa'y'attit, jøts tpa'ayo'odit ja myigu'uktøjk pøn ti ka'ejtxip.

¹⁹ Ku jade'en tpadu'undit jøts ja øy'ajtin jade'en tpaattit, jøts tmøøt'ettit ja Dios xemikøjpx.

Midi ja Timoteo jaakyiktanipøjkp

²⁰ Mets Timoteo, møjpiḱṱa'ak midi t̄o myiktanipiky. Kidi xmøjpiḱṱa'aky ja ka'oy ayuujk midi ja Dios yja' tkaminabyaajt̄ip, midi ñadyijyi yiktejp ku ja tyiy'ajtin.

²¹ T̄o winaagin tyuu'tigoydi p̄on ȳo jade'emb̄i winmaa'ñ t̄padump. Jade'en ja yjanchja'win tka'ukpadunidi.

Dios mgunuu'kxip, mets Timoteo. Jaṱp id̄o'̄on jade'en.

JA MYĪMAJTSKPI NØKY MIDI JA PABLO TYANĪGAJX JA TIMOTEO

Ku ja Pablo ojts tnijayi ja Timoteo

¹ Pablo øts, jøts øts ja nwindson'ajtim Jesucristo ngudanaapy, øts xkajxp ja Dios Teety sam øts ja tø xamidsøky jøts øts ja yja' ndukmado'ot ja naẖwii'ñit jaaj'ya sa nbaajtint ja øy'ajtin xemikøjxp ku ja Jesucristo møøt n'ejtint.

² Mets Timoteo ya'at nøky ndanija'ayip. Mjagyajpnipxi mets ja janchja'win, jade'en'ampyts myik'u'nktijy myik'u'nkjawi. Ja Dios Teety mgunuu'kxip møøt ja nwindson'ajtim Jesucristo. Ja' mmo'ojip ja pya'ayo'owin, ja' mmo'ojip ja yjotkujk'ajtin.

Sa ja Timoteo tyknigaxø'økt ja Cristo ja yja'

³ Ndamøja'wip øts ja Dios ku me nni'amidoo'wi y'ity jøpy ux. Ja' øts idø'øn ja yja' nbadumpy samdam ja t'øyjawi sam nayide'en ja mōjaa'dyøjk y'ijty ttundi.

⁴ Nja'myejchp øts sa myaajxy ku nnawya'kxyim. Wamp øts o me ma njanch'ejxpaa'tt jøts njotkujk'att.

⁵ Nja'myejchp øts nayide'en sam ja Dios Teety xjanchjawi. Jabi jawyeenxi ja mdigamøj jøts ja mdaak nayide'en tyiktundøø ja yjanchja'win.

⁶ Paty mets ixyam ndukja'myech jøts øy tsuj xyikmiwenit ja mdunkjøøjp midi ja Dios tø mdanipiky ku mets ojts ngønixajy.

⁷ Ka'ap ja Dios Espiritu Santo tø tpikta'aky jøts øy ti ngudsø'jka'ant. Nayi Espiritu Santo ja myøk'ajtin xmø'øyimp jøts amumjoojt ndu'unint jøts ja tsojkin jøts ja øyja'gyukin nmøøt'ajtin.

⁸ Ka' ti xtsø'ødyunjawit sam ja Dios yja' xkajpxwa'kxi, jøts ni øts xkatsø'ødyunjawit ku øts nay ja' nyiktagudsumi. Kupøk o myikjemduñ myikteduñ myikjemnøjmi myiktenøjmi ku tka'øyjawidi ja Dios kyajpxy midi xyiknitso'ok'ajtimp. Jade'en xmidanit sam ja Dios ja myøk'ajtin tyaky.

⁹ Jade'en ja Dios tsoky jøts ja xyiknitso'ok'ajtint jøts nayide'en amumjoojt nnadyamijoxint. Kidi ja'agøjxpip adøm ja xtsøjkyim ku adøm n'øyjaa'y'ajtyim nga'øyjaa'y'ajtyim. Ma windiixyip adøm ja Dios jade'en xamidsøjkyim, ka'anim wynaty ja naẖwii'ñit cho'onda'aky. Ja nwindson'ajtim Jesús køjxp adøm ja nitso'ok'ajtin nbaajtint ku møøt n'ejtint.

¹⁰ Tø ja Dios Teety tnankyja'ijxyi sa ja pa'ayo'owin tjagyepy adømgøjxp ku ja nwindson'ajtim Jesucristo xaniguejxyim. Sa ja y'ø'jky jøts yjujkyijky, nayide'ents adøm nbaajtint sam ja tø tnajtstuni. Jade'ents Cristo køjxp ja ø'jkin xka'ukmimajadaajkna'ant jøts xemikøjxp ja jujky'ajtin nbaajtint ku ja y'ayuuik tnitanaay sam ja wynaty tø ttanibiktaagi.

¹¹ Dios ø tø xpikta'aky jøts øts ya'at ja kyajpxy ja y'ayuuik ngajpxwa'kxit jøts øts yø ngudanit, jøts ø nduk'ixpøkt pøn ka'israelit jaaj'dyi.

¹² Paty øts ixyam øy ti ngu'ayo'ombaadi. Ka'ap ø ti ndsø'ødyunjawi, pø Diosxi øts ja yja' nbaduujnip. Wampøts øts jøts øts ja Dios xpøkjø'knit kunim ja tiidyu'unin xøøw mye'ent.

¹³ Mets Timoteo, sam ø tø nnajtstuni, tu'ugyi ja øy ixpøjkin jade'en xyikyø'øty, ja Dios yja'. Jade'ents ja Dios xjanchjawit jøts ja mmigu'uktøjk xpa'ayo'ot xminamyayit nayide'en sam ja nwindson'ajtim Jesucristo xamidsøjkyim ku møøt n'ijtyim.

14 Ja Espíritu Santo midí adóm nmøø'tajty'indip, ja' pyudøjkingøjxp xpádu'n'ett ja Dios yja' midí tø mdanipikyiyi.

15 Tøxi me xnijáwi sám øts ja Asiit jáa'y xmajstuttøø, ja Figelo møøt ja Hermógenes paát.

16 Diosts ja kunuu'kxiyip ja Onesíforo møøt ja myigu'uktøjkti ku øts ja kawinaak ojk xnimiñ jøts ø xpudøki. Ka'ap ja tsø'ødyu'unin tjagyepy øy ø njatsumy'ity.

17 Ne'egi øts ja x'ixaay yá Roma ku øts ja má xka'ijxy kunim øts ja xpaajty.

18 Wan ja Dios ja pya'ayo'ajtin tmø'øy ku ja tiidyu'unin xøøw tpaatt. Wá'atsxi me xnijáwi sá ojts xpudøjka'am jam Efeso kajpjotp.

2

Sá Timoteo møk tmidanit ja ayo'on Jesucristo køjxp

1 Mets u'nk Timoteo, jotmøpkøk, yiktun ja møk'ajtin midí ja nwindson'ajtim Jesús yajkpy.

2 Ja ixpøjkin midí m'ijxpy midí mnija'wip sám øts ja mayjaa'y nyik'ixpiky, ja'ats nayide'en mdanipøk pøn øy tsuj jáa'y'ajtp, midí øy tsuj yik'ixpøjkn nayide'en.

3 Møk xmidanit ja ayo'on midí mbatpy ku ja nwindson'ajtim Jesucristo yja' xpádujni. Møk nabyikta'agi jade'en sám pøn yikexy tseptumbi.

4 Ka'axi mibaat ja tseptumbi pyaat'aty; jøts nugo ajáwi o ti ttatøkit. Tu'ugyi ja yja' tyikyø'ødyit sá ja wyindson ja y'ane'emyidi.

5 Nayide'en ja kuyajtpi, tu'ugyi ja yja' ja ttu'undit sá ja tø yik'ana'amdi, winets ja tpøktit ja ñiguyaty.

6 Nayide'ents ja kamdumbi nayja' paat'ajtiyip kø'øm tpøkjø'økt ja pyikta'áky.

7 Pawinmaajyk øts yø n'ayuujk, nayi nwindson'ajtimts mbudøkiyip jøts xja'gyukit.

8 Ja'myats ja nwindson'ajtim Jesucristo sá ojts yjujkyiky jap oo'kpi jutjøtpy midí ja rey David y'ap'ajtpy. Yø' øts ja yja' ngajpxwá'kxiyip sá ja øy'ajtin xukpaajtint.

9 Yø' kajpxwá'kxiyøjxp øts øy nyikmi'ekyi, møkts øts yø nwindani, jade'ents ø nyik'ixy ejxim tu'uk ja møj tundigøøbya'an; øy øts njayiktsumy ka'ap ja Dios kyajpxy jaayi tyañ.

10 Ja'agøjxp øts yø ayo'on møk nwindani jøts ñitso'ok'attit pøn ja Dios tø wyi'ijxy jøts tpaattit ja øy'ajtin midí xemikøjxp xmø'øyim ja nwindson'ajtim Jesús.

11 Janch tiy'ajtin yø':

Ku ja Cristo møøt nayide'en n'ø'jkyim, nayide'ents ja møøt njuky'ajtant;

12 pøni ngu'ayo'ombaajta'am ja yja', xmø'øyimpts ja ja' y'øy'ajtin má ttanítani ja yjaa'y.

Pøni ka' ja ngupijkyim, nayide'ents ja xkagupøjkint.

13 Pøni ngamøk'ajtingøjxp adóm ja njanchja'win kyamajadaajkyim, jade'eñim ja Dios tyikyø'øy ja yujy'ajtin jøts ja pudøjkin ja xmø'øyim, ka'ap ja Dios mibaat ñay'ixmajtsiyit kø'øm, paty ja xkaja'dyigø'øyim.

Yikyø'øpy jade'en ja Timoteo sá tø yiktanipiky

14 Mets Timoteo, tukja'myats pøn jaty ja Dios yja' tjanchja'widip jøts kidi nugo kyajpxjimbetti kyajpx'adøjti, kidi nugo tkajpxyøndi midí ka' tyuñ; ñanktyuut'igøjyidip yø jade'en.

¹⁵ Amumjoojt nabyikta'agi sa ja Dios yja' xpaduujnit jøts øy tsuj yø mdunk pyidsø'omt Dios wyingujkp. Ka' ti nugo xtsø'ødyunjawit ku ja tiy janch xkajpxwa'kxi ja Dios tyiy'ajtin.

¹⁶ Kidi xpabiky yø'øbi ayuujk pøn jam nugo o sa kajpxtip. Pøn jade'en ttundip, ja kya'øyjaa'y'ajtin idø'øn ja yikmawenidip.

¹⁷ Pøn jade'en nugo kajpxtip, jade'ents ja kya'øy'ixpøjkin ja myøjidi myayidi jøts ja windigø'øyin nugo tyiknaxkida'akti. Jade'en y'adø'øtsti ja Himeneo jøts ja Fileto,

¹⁸ ku kø'øm tø ñanktyuu'tigøyidi jøts ja wya'andi ku ka' y'uk'ejtnit ja jujkyøjkin ku ja o'jkin nbaajntin ya naxwiñ. Jade'ents ja myigu'uk winaagin tø ttukmajtstu'utti ja yjanchja'win.

¹⁹ Ka'ap mibaat pøn tyiktigatst ja Dios wyinmaa'ñ, jabi yide'enxi jaabyety y'ity: "Wa'ats ja Dios Teety ja t'ixy tñijawi pøn padu'unxip ja yja'"; jøts nayide'en wya'añ: "Wan tmajtstutnidi ja ka'øybi, pøn ja Cristo yja'ajtpy."

²⁰ Jade'en n'ukpiktaajkint ku jaa'y xnime'enint xnija'jtint njønjojp ndøjkjotp, jøts nduktajøø'kxa'ant ja' mididi øy mididi tsuj mididi tsobatp; jøts ja' mididi ka' chobaaty, ja'ats o pøn tyiktu'ump.

²¹ Nayide'ents idø'øn adø'mdi, ku øy tsuj nnay'ejx'ejtindit jøts nja' nayide'en chobaajntin Dios wyingujkp; jade'en'ampyts idø'øn ja xyiktu'unint jøts nmigu'uktøjk nbudøjka'ant.

²² Majtstu'ut yø una'jk winmaa'ñ mididi ka' tyuñ. Tu'ugyi xyikyø'øty ja tiy'ajtin jøts ja mjanchja'win, jøts xminamyayit ja mmigu'uktøjk øy tsuj pøn tu'ugyi t'ajot'ajtp ja Dios.

²³ Nnimaapyts mets jøts ka' xpadøkit yø'øbi ayuujk mididi katump. Mnija'wip ku jade'en ja tsep nugo yikpaaty.

²⁴ Pøn tpaduujnip ja Dios yja' ka'ap ja nugo ajawi o ti ttatøkit ma ja tsep, ma jaa'y o ti ttundi. Ja' ja tyu'ump øy'ajtin tuda'aky'ajtin øy pøn møøt. Ja y'ixpøjkin ja tyuk'exp tyuknijaawip sam ja tuda'aky'ajtin nayide'en tmøøt'att.

²⁵ Jade'ents ja øy tsuj tkajpxuda'akt pøn ja wenk winmaa'ñ tmøøt'ajttip mididi ka' tyiyi, wan ja Dios pyudøkiyi jøts tyigatstit ja wyinmaa'ñ jøts tpadu'undit ja tyiiby' yjanchpi.

²⁶ Wan tmajtstu'utti ja miku' yja' ku ja nugo tø wyin'iifnidi jøts ja nugo tø tyuktuñi pøni sa ja ttsøky.

3

Sa jaa'y wyinaty: ku ja ti dyu'unin xøøw tpaatwani

¹ Me Timoteo, nayide'en xnijawit ku wyingoni ja xøøw ja jumøjt jøts nwindson'ajtim mye'ent, janch tsep ja xøøw ja jumøjt ñaxt.

² Øy sa pøn y'adø'øtsttit. Kyø'øm winmaa'ñ ja nugo yikmøjtøkiwya'andip, meeñ ja nugo may choktip, namyikaxi winmaa'ñ ja nugo yiktu'undip. Tpatit tñaxit ja Dios, ka'ap ja tyeety ja tyaak twindsø'øgidit, niti ja tkamø'ejxtit tkamøjawidit jøts ni tkawindsø'øgidit ja Dios yja'.

³ Ka'ap ja ti tsojkin, ka'ap ja ti øy'ajtin tmøøt'attit. Pagajpxk ja' yø tyunk'attit, ka'ap ja maa'kxujkin tjagyaptit, tyunwandip o ti ttunwa'andit, nugo øy pøn tmidsep'atwa'andi øy wyinaty pøn tuda'akyjaa'y'aty.

⁴ Kyøyakp ja kyø'øm migu'uk, adø'øtsp o sa y'adø'øtst. Kyø'øm ja' y'ixa'ap, ka'ap ja Dios yja' n'egi t'ixaajjit.

⁵ Ejxingøjxp nadyijit ja Dios yja' tpaduujnidit pø sa ja y'am yjojp, ka'ap ja tmøjpiktaajkit ja ñitso'ok'ajtin.

Me Timoteo, ka'ap yø jade'embijaa'y xunk'att.

⁶ Adøtstip o sa y'adø'tstī, tøj k tøjkidip jøts ja tø'øxyøj k twin'øøndit pøn ñadyu'uk'ejxtip pøn y'amutsk'ejxtip. Nayide'ents ja tø'øxyøj k, jaa'y'ajtp ja' o sa yjaa'y'aty. Kyupijky ja nugo,

⁷ ixpøjkin ja jade'en tijy yikmøøpy, nisudso'ampyts ja jade'en tkaja'gyuki ja Dios tyiy'ajtin.

⁸ Nayide'en sam ja Moisés y'ijty kyayikpaduñ ja yja' sa ja yjawa'lañ ku ja kyamibøj køø ja ximaabyi Janes møøt ja Jambres, nayide'ents yø jade'embī jaa'y tkamibøj kmidi ja Dios yja'. Tum wenk ja wyinmaa'ñ yikyø'ødyi, ka'ap ja Dios jade'en kyupikyidi.

⁹ Ka' nugo ajawi myajada'aktit ja yja', kuwani yiknijawi ku ja myo'tpi winmaa'ñ nugo tyikmøjtøkiwya'andi. Nayide'ents yjajtmidøø ja namajtskpi midī twindsøow ja møjaa'y Moisés.

Midi ja Pablo yjaak'uktanipøkniip ja Timoteo

¹⁰ Mets Timoteo, øy tsuj mets ja n'ixpøjkin xyikyø'øyi. Nayide'en mjaa'y'aty sam ø njaa'y'atyin, tu'ugyi ja mwīnmaa'ñ xyikyø'øy, ja øy'ajtin tuda'aky'ajtin jøts ja janchja'win. Nayide'en mjaty

¹¹ sam njajty sam ngubejtyin. Mnija'wip pøni sa njajty jam kajpjotp midī yikejp Antioquia jøts nayide'en jam Iconio møøt ja Listra ku øts ja Dios yja' ngajpxwa'kxi. Jamts øts ja jaa'y xjemduñ xeduñ, jøts øts nwindsøn'ajtm nja'myejch xjats ø møj xpudøjkiyi'ñ.

¹² Janch tiy'ajtin yø', yikjemdu'undip yiktedu'undip pøn ja Cristo yja' nadyamiyoxwajniyip;

¹³ jøts ja' pøn ja myigu'uk nugo twin'øø'ndip kø'øm ja ñanktyuu'tigøyi, nisudso'ampy ja kya'øyi ja yja'adi ku nugo jade'en ñawyin'ñiidi ja xem ja yam.

¹⁴ Mets Timoteo, tu'ugyi mets yø mja' jade'en xyikyø'øty sam tø x'ixpiky sa tø xnijawi. Mnija'wipxi pøn mduk'ejxi pøn mduk'ixpøjki,

¹⁵ ku yø mutskyi xnija'wiyi'ñ yø Dios kyajpxy, midī xyikujajtaajkimp, midī xyiknitsø'ok'ajtm ku njanchja'wa'ant ja nwindsøn'ajtm Jesucristo.

¹⁶ Tu'ugyi ja Dios kyajpxy ja y'ayuujk jade'en y'ity, sa ja tø yikwinmaa'nmyø'øy pøn tø tjaadyañ. Nay yø' xuknija'wamp ja tyiiby; ja yjanchpi. Ku ndundigø'øyint ngajpxigø'øyint nay yø'øts xuknija'wimp ku yø pyøkyi. Xmø'øyimpts yø' ja ixpøjkin sa ja øy'ajtin ja tuda'aky'ajtin njagyajpint,

¹⁷ jade'en'ampyts ja Dios yja' ka'pxy nnija'wa'ant jøts jade'en ndu'unint tum ja øybi tum ja tsujpi.

4

¹ Mets ixyam ndanipijky Dios Teety wyingujk jøts nayide'en nwindsøn'ajtm Jesucristo wyingujk midī nanky'ejxiyip ja møj windsøn'ajtm pøn tiidyu'ump ja jujkpyi jøts ja øøkpyi,

² jøts xkajpxwa'kxiyit ja yja'; tu'ugyi jade'en pojyi'iky xpadu'unt wan pøn mgupiky; mgagupiky. Ana'am pøn tundigøøpy pøn kajpxigøøpy jøts xukja'gyukit. Jade'ents tuda'aky xuk'ext xuknijawit ja ixpøjkin.

³ Pyaatp ja xøow ja jumøjt ku ja jaa'y tkawa'andit yø'øbi ixpøjkin; pyikta'aktip ja' kyø'øm yik'ixpøjkipidi pøni sa ja ttsoktit pøni sa ja tmad-owa'andit.

⁴ Yø tyiiby; yjanchpi ka'ap yø ttsoktit, ja' yø ne'egi choktip ja kwenti ja madya'aky midī kayikja'gyukip.

⁵ Me Timoteo, tu'ugyi mək xyik'ett yə mwinmaa'ñ, mək nabyikta'agi ɔy ja ayo'on yja'ity, nadyamiyoxi amumjoojt ja kajpxwa'kxin sa ja nitso'ok'ajtin nbaajtint, tu'ugyi jade'en xyikyø'oty yə mdunk.

⁶ Jøts øts, tøts øts jade'en nadyamiyøxyi ja Dios yja', jøts øts yjawi tsojk ja o'jkin nbaatt.

⁷ Møk ø tə nwindani ja Dios yja' jøts øts jade'en nyikjøpkøjxni ja ndunk ja nwinmaa'ñ. Tø øts ja njanchja'win jade'en nmi'ity.

⁸ Ja øy'ajtin øts xjøp'ejxp jøts øts ja nbaatt, ja'agøjxp ku øts ja Dios tə xkupiky. Jaanimts øts ja nyikmo'ot ku ja tiidyu'unin ka'pxy xukpaajtint. Ni kidi øtsip ja nadyu'uk yikmo'op, niduki'iyi ja tpaattit pøn tjøp'ejx'ajttip jøts ja nwindson'ajtim mye'ent.

Ku ja Pablo tukmadøy ja Timoteo sa tyu'unt

⁹ Tun wan ja may'ajt jøts tsojk mme'ent jøts ø x'ext;

¹⁰ pø tøxi øts ja Demas xmajststu'uty, kyø'øm winmaa'ñ ja yiktunwampy, jøts tə ñijkxy jam Tesalónikit kajpjotp. Jam øts ja Cresente tə nguexy Galacit y'etjotp, jøts ja Tito tə ñijkxy jam Dalmacia y'etjotp.

¹¹ Ja Lucas øts ixyam møøt njaak'ity. Ixa' jam ja Marcos jøts møøt mme'ent, jøts øts ja xpudøkit.

¹² Nayide'ents ja Tiquico tə nguexy jam Efeso kajpjotp.

¹³ Ku mme'ent, xyikmejnip øts ja nnixox midi jam nyiktaan Carpo tyøjkjotp jam Troas; xja'myajtsip øts ja nlibri jøts øts ja nnøky xjadyimyikmejnit midi nyiktumpy.

¹⁴ Tø øts xmidundigøy møj ja Alejandro midi ka'tsp; Dios wyingujkpts ja tkubatt pøni ti tə ttuñ.

¹⁵ Øyim mnay'ejx'etit møøt ja', jøt'ambøjpk ja' ku ja Dios ja yja' yikajpxwa'kxi.

¹⁶ Ku øts myijawyeen nwinguwa'jkii'ñ ja windsøndøjk ja kudunktøjk, nipøn ø xkabudøjkii'ñ; xmajststutkøjxnidi øts ja' niduki'iyi. Øts wamp jøts ja Dios ja kyadabayø'øyidit.

¹⁷ Ja nwindson'ajtim øts xpudøjkii'ñ jøts øts ja møk'ajtin xmøøy, jøts øts nyikyø'oy ja kajpxwa'kxin sa ja nitso'ok'ajtin nbaajtint, jøts øts ndukmadøy niduki'iyi pøn ka'israelit jaa'dyi. Jade'ents øts ojts ja nwindson'ajtim xuu'mø'oy ma jaty øts n'ayo'ombaaty.

¹⁸ Xyiknitso'ok'ajtip øts ja nayide'en ja n'anmija'win jøts øts ngapaatt ja ka'øybi jøts ø xpøkjø'økt jap tsajpjøtpy ma ja y'ity. iKunuu'kxy'ejtpim ja Dios xemikjøxp! Jade'en idø'øn ja y'ejxi tyiyi.

Ku ja Pablo kyajpxpø'kxy jøts ja kunuu'kxin t'ukyajkni

¹⁹ Kajpxpoo'kx jam ja Prisca møøt ja Aquila, jøts nayide'en ja Onesiforo ja myigu'uktøjk.

²⁰ Tø øts ja Erasto nyiktañ jam Corinto, tə ja Trófimo pya'ambety jam Mileto kajpjotp, paty øts jam tə nyiktañ.

²¹ Tsojk mme'ent ka'anin ja xuxpyoj tpaaty. Møj ja kajpxpoo'kxin mdaniguexyi ja Eubulo møøt ja Pudente. Nayide'ents ja kajpxpoo'kxin mdaniguexyi ja Lino, jøts ja Claudia, møøt niduki'iyi adøm nmigu'uk janchja'wibidi.

²² Møøt ja nwindson'ajtim Jesucristo m'ett, jøts niduki'iyi ja Dios mgunuu'kxidit. Jade'en idø'øn ja yjatt.

JA NØKY MIDI JA PABLO TYANĠGAJX JA TITO

Yide'en yiknijayi ja Tito

¹ Pablo'ajtp øts, Dios Teety ø nmidumpy, jøts øts nwindson'ajtim Jesucristo ngudanaapy, ku øts ja xamigaxi jøts øts ja yja' ja ndukjanchja'wiyit pøn ja Dios Teety tø twi'ixy, jøts nayide'en tñijawidit ja tyiy'ajtin sa ja Dios øy tsuj yikpaduñ,

² jøts jade'en t'awejxtit ja juky'ajtin midi xemikøjxp etp. Ya'atpi tsinaa'yin ja Dios kø'øm tø tni'adsowi namga'anim wyinaty ja naxwii'ñit cho'onda'aky. Niwindem xøøw ja Dios Teety kyawindaay'aty, midi tø ttanibiktaagi, pyadumpy ja'.

³ Ku ja xøøw ja jumøjt tø tpatni sam ja kø'øm tø ttanibiktaagi xjats ja kyajpxy tñanky'ejxit jøts øts idø'øn ngajpxwä'kxt midi øts ja Dios Teety yiknitsokpi tø xanipiky.

⁴ Ixyamts me Tito nnijayi. Ndyimy'u'nkja'wip mets, ja'agøjxp ku tu'ugyi janchja'win ndamujkyim, jade'en øts ja tsojkin nmøøt'aty jøts xpaatt ja kunuu'kxy'ajtin ja pudøjkin jøts ja øy'ajtin midi ja Dios Teety yajkpy møøt ja nwindson'ajtim Jesucristo pøn adøm nyiknitsokpi'ajtyindip.

Ja tunkjøøjp midi ja Tito pyatwa'jkjy#ñ jam Creta

⁵ Ku mets jam nyiktaañ Creta, ja'agøjxp øts ja jade'en nduun jøts mets xyika'pxt xyik'abaadit ja tunkjøøjp midi øts jam wyinaty tø nyiktso'onda'aky. Jade'en ø nwa'añ ku mets tu'uk tu'uk xpikta'akt pøn tñimøjaa'y'atp ma jaty ñamyukyidi kajp kajp ja jaa'y pøn ja nwindson'ajtim tjanchja'widip.

⁶ Ja'abi møjaa'y'ajtpi mbikta'akp pøn øy tsuj tsinaapy, pøn niti windsø'yin, pøn tu'ugyi tmøøt'ajtp ja ñidø'øxy, jøts ja y'una'jk nay ja'abi janchja'win pyadundip, jøts øy tsuj ja chinaa'yin tyiknaxmidi. Myimadoodip ja tyeety, niti windsø'øyin ja jade'en tkapaattit.

⁷ Pøn idø'øn jade'en tñigubajk'ajttip, pø ja Diosxi yja' ja y'ejx'ejt看idip, paty idø'øn pyaat'aty kuwani øy ja chinaa'yin tyiknaxtit. Ka'ap idø'øn ja kyujuun'ajtin ja tyikmajada'aktit. Ka'ap winjaa windsojk y'akidit; ni ja amu'uky'ajtin ni ja tsep'ixaaky ja tkatunk'attit, jøts ka'ap ja meen nugo tjaa'xmukwa'andit.

⁸ Jabi yide'enxi dø'øn ne'egi ja chinaa'yin tyiknaxtit, yikja'ada'aktip o pøn jaa'y jam tyøjkjotp øy tsuj, tum ja øy'ajtin ja myigu'uk ja tyamidsoktip, ja'gyukin idø'øn ja myøøt'attip jøts tum ja' tyu'undip midi øy paat'ajtyip. Pyadungøxtip idø'øn ja', midi ja Dios y'øyja'wip jøts ka'ap ja kyø'øm ja' tyikmajada'aktit.

⁹ Ja'ayi dø'øn ja tu'ugyi tyimyjanchjawidip ja ty'ajtin midi tø nduk'ixpøkti, jøts jade'en ja myigu'uk ttakajpxjot'amøkidit ja'abi tñiby i xpøjkin, nayide'en ttukja'gyukidit pøn wyinaty t'agajpxukp ja'abi xpøjkin.

¹⁰ Jabi mayxi ja jaa'y jaadi pøn tkamimadoodip ja Dios yja', sam winaagin ja israelit jaa'dyi pøn nugo jemgajpxtip tegajpxtip jøts ja myigu'uk twin'øondi.

¹¹ Ja'abi jaa'dyi, amøñi pyaat'aty nyikta'anint, jøts ka'ap ja ka'øybi xpøjkin ttuktawinmaa'ndyigø'ødyit tu'ukpi jøøn tu'ukpi tøj, ja meeñts ja nugo y'ixaadyip ku ja y'ixpøjkin tyakti.

¹² Nay yø kø'øm yide'en ojts ja myigugajp ñimadya'agyidi pøn wa'ats najtsja'wigyøjxp ti jaty tunip jatip, ja' yide'en waan: "Yide'en ja Creta jaa'y

yjuky'atti: o tymdyaayidi, janch awa'andi, nuux'ajtin ja yikmajada'aktip jøts ja yji'kxy nugo ja tta'aa'wiwya'andi."

¹³ Janch idø'øn ja wyaafñ; paty meets idø'øn møk xamigajpxtit ja chinaa'yin jøts jade'en tyikmøkidit ja yjanchja'w'in pøn ja nwindson'ajtim yja' tø tpadøjkiñidi.

¹⁴ Jøts ka'ap jade'en nugo tmibøktit ja madya'aky midi yik'ø'y'idip yikpaajtidip ja israelit jaa'dyi, ni tkamøjpiktaajkidit ja y'ana'amindi pøn jagam jixkø'øm tyiktandip ja Dios tyiy'ajtin.

¹⁵ Pønts ja Dios yja' ja'ayi tpaduujnip, tyum'øy'ejxtip ja' midi ja Dios kø'øm tø tyik'øyi, jamts ja'amidi pøn wamidip ku ja yikpøkpyety; paty ja jade'en ttejtì ku ja pøky ja ja'ayi twinmaa'ñ'atti jøts tum yikpøkpyajtpi t'ejxti; jabi agootstujpxyi ja wyinmaa'ñ ja y'etti jøts jade'en tka'ejxkapti midi øy uk midi'its ka'øy.

¹⁶ Jade'en idø'øn ja chaachwa'andi kuk idø'øn ja Dios ja t'ijxyidi, pø sudso dø'øn ja Dios ja t'ijxyidi; jabi wenkts ja chinaa'yin ja tyiknaxti, ja kyawindi'y'ajtin ja yikmajadaktip, ka'ap ja madoogukin ja wine'enin tmøødidi, nisudso'ampy ja ødyu'unin ja tkayikwingaxø'økti.

2

Ja tii'byi ixpøjkin

¹ Pøni midi mets Tito mnigajpxpy, ja tii'byi ixpøjkin idø'øn ja møøt ñabyaadit.

² Tuknijawi ja møjaa'dyøjkti jøts ejxkujk yjaa'y'attit, tuda'aky yikxon ñabyikta'agidit, jøts ja'gyukidip idø'øn yiktu'undip idø'øn ja wyijy'ajtin; møk tyik'ettit ja Dios'ajot'ajtin møøt ja tsojkin, møøt ja pa'ayo'owin jøts møøt ja tuda'aky'ajtin.

³ Jøts ja møjaa'dyø'øxy nayide'eni yjaa'y'ajtmidit sam pyaat'atyì pøn ja Dios tpadundip. Ka'ap ja jigajpxk pagajpxk ja ttunk'attit, ni ja mu'ugyi ja ku'uxyi tkayikmajada'aktit. Øybi tsinaa'yin idø'øn ja ne'egi ñanky'ejxidip,

⁴ Jøts jade'en ttuk'ejxtit ttuknijawidit ja tø'øxyøjk pøn nam amajtskidipnim sa ja ñiyyaa'y sa ja y'u'nk y'una'jk ja møøt øy yikxon chøønidit tyanidit.

⁵ Myøøt'attip idø'øn ja ja'gyukin ja'adi. Tum ja wa'atspi tum ja øybi tsinaa'yin idø'øn ja pyadu'undip. Ja yjøøn ja tyøjk idø'øn ja' kyamijotkukidip, pøn jam tso'ondip ja'ttip myiduda'aky'attip idø'øn ja'. Pøni ti y'ane'empy ja ñiyyaa'dyi, pyadu'undip idø'øn ja'. Jade'en idø'øn ya'at tpadungøxtit jøts ja Dios y'øgyajpxy ja y'ømyadya'aky kyayikjigajpxt kyayikpagajpxt.

⁶ Taguwani mets Tito ku ja wajtyøjkti ja ja'gyukin tmøøt'attit,

⁷ Jøts idø'øn ja kø'øm jawyeen mjøøtunip pøni sa dø'øn ja øchinaa'yin tpadu'undit. Ku dø'øn ja wyinaty xkajpxwejwa'añ, yikxon idø'øn ja xnigajpxt, niti nixi'iky niti taxi'iky xkajawit.

⁸ Tiy ka'pxy idø'øn ja ixpøjkin xnanky'ejxit jøts ka' nipøn jade'en m'agajpxukiyit. Jøts kø'øm ttatsø'dyu'unt ja jaa'y pøn wyinaty nugo mjigajpxiyip mbagajpxiyip jabi ja'gyukidipxi ja kø'øm ku meets ja tiy'ajtin xnigajpxy.

⁹ Kajpxwej ja tumbitøjkti jøts tpadungøxtit ja wyindsøndi; yikxon idø'øn ja yjaa'y'attit jøts ka' twindsø'odit ja wyindsøn.

¹⁰ Ka'ap idø'øn ja tma'jtsit ja pyikta'aky pøn ja yiktuujnip. Yiknigaxø'økp idø'øn ja y'øyjaa'y'ajtin jøts o pøn jaa'y jade'en tsubawit ja tsinaa'yin midi ja Dios yiknitsokpi yajkpy.

¹¹ Jabi tøxi ja Dios ja øy'ajtin tnanky'ijxyi midi tyiknitso'okwamp tuki'iyi ja naqxwii'ñit jaa'y;

12 Ja'agøjxpts ja Dios ja y'øy'ajtin tnanky'ijxyi jøts xuknija'wint jøts n'ixmajtsint midi ja Dios tkaminamyaajyip sam nayide'en midi n'am njotp xmimajada'akwa'andip, jøts ja tsinaa'yin ya nyiknajxint ja'gyuki køjxp, samdam nayide'en øy tiy ja Dios ttsøky'aty jøts ja tu'ugyi nwindso'jkant nwinja'wint.

13 Nayide'en idø'øn ja xuknija'wim sa dø'øn n'aweixint jotkujk ja øy'ajtin, midi ja Dios kø'øm tø tni'adsowi, ku ja mye'ent kyida'akt aju'ukjotp, ja Jesucristo yiknitsokpi pøn ndios'ajtyindip.

14 Nagyøyajkiyi ja', jøts adømgøjxp ja xku'o'jkindi jøts jade'en axøø'kpi yigaappi agujkyp nga'ejtindit, jøts jade'en nbaajtint tu'ugyi ja wa'ats'ajtin jøts ja'ayi nnadyamiyojxandit, jøts tum ja øybi n'amindip njotpindip.

15 Ya'at mets Tito idø'øn mnanky'ixpøkiyip, mgajpxjot'amøkip idø'øn, jøts nayide'en møk ja mgutujk xamigajpxt pøn tkamimadowandip ja'abi ixpøjkin. Kidi mets ja jaa'y kø'øm myik'amutskiniyi.

3

Sa dø'øn ja chinaa'yin tyiknaxtit pøn ja nwindson'ajtim tjanchja'widip

1 Tukja'myatsti ku tkajpxkyupøktit ja windsøndøjkti samdam nayide'en ja kudunktøjk tmimado'odit, jøts tpadu'undit tuki'iyi ja ødyunk midi wyinaty tø yiktaguwanidi.

2 Nipøn idø'øn ja wenk tkanimadya'aktit, nika' idø'øn ja tsep ja t'ixa'adit. Ja øy'ajtin idø'øn ja ja'ayi yikmajada'aktip, ja tuda'aky'ajtin idø'øn nixem niygam ja myigu'uk tyamay'attip.

3 Jabi nayide'enxi adøm y'ijty ngakajpxkyupijkyim jøts ja Dios yja' ngamimadooja'am jøts jade'en nwidijtyim kube'ets kugoots. Tum ja axøø'kpi yigaappi y'ijty nyikmajadaajkyindip midi n'amindip njotpa'andip; jap adøm y'ijty ja nxøøw ja njumøjt nyiknajxyindi ma wyindsøn'aty ja ka'øy'ajtk møøt ja windi'iñ'ajtk, øy y'ijty pøngapøn møøt ndyimñamyi'ambijkyindi, sam adøm idø'øn kø'øm y'ijty ndyimyjotkidaajkyim.

4 Kuts adøm ja Dios ja yiknitsokpi tnanky'eixxøø ja y'øy'ajtin, sa ttsøky'aty ja naxwiil'ñit jaa'y,

5 jade'en adøm idø'øn ja xyiknitsøjkyim, kaja'agøjxpip ja ttuun ku adøm ja øchinaa'yin wyinaty tø nmøøt'ajtyim, jabi pa'ayo'oningsøjxpxi dø'øn ja ojts xyiknitsøjkyim, xukyikniwaajchim ja nbøky jade'en jøts ja jemchinaa'yin ja Espiritu Santo xukpaajtyim.

6 Ja yiknitsokpi køjxp ja nwindson'ajtim Jesucristo køjxp ja Dios Teety tø xmø'øyim kawine'en ja Espiritu Santo jøts ja xpudøjka'am,

7 jøts ja Dios Teety y'øy'ajtingøjxp xkupøjkindit jøts nyikmø'øyindit ja juky'ajtin midi xemikøjxp etp midi adøm n'aweix'ajtyindip.

8 Tyimdyiy idø'øn ya'at, paty øts idø'øn ndsøk'aty jøts mets winjaa windsojk xkajpxt ya'atpi ixpøjkin jøts jade'en pøn ja Dios tjanchja'widip tunkjøøjp'attit tum ja y'øybi tyiiby. Tyum'ødyunguixpy ya'atpi ixpøjkin, øy yø pøngapøn t'ødyuñ.

9 Kidi xyikmøjtøki nugo ja kugoots madya'aky midi niti kyawa'añ, jøts ka'ap ja apmadya'aky ja møjaa'y ayuujk nugo xunk'att, ni xkadatøkit pøn ja Moises kyutujk nugo ttamadya'akpyattip. Niima ja tiy'ajtin ja' tkamøøt'atti.

10 Pøni jam pøn tnankñawya'kxwa'añidi ja Jesucristo yjanchja'wibitøjkti, tawindsø'øy tuk'ojkin uk majtsk'ojkin, kuts wyinaty mgamimadøyi, jagam ja x'ixwejtsnit;

¹¹ jabi jade'enxi mets xnijawit ku ja'abi jaa'y tɔ ja chinaa'yin ja ka'ɔybi myimajadajkniiy jɔts kɔ'ɔm ja pyɔky ja ñi'θɔniyi.

Ku ja Pablo ttanipiky ja kyθ'ɔm jotmay ja Tito

¹² Ku me wyinaty ndanigaxi ja Artemas uk ja Tiquico, tun ja may'ajtin jɔts ɔts waani wyinaty x'ats'ixy jam Nicópolis, jabi jamxi ɔts tɔ ndanibiktaagi nyiknaxwa'añ ja et ja xθɔw kunim ja mɔk xux ñaxt.

¹³ Tabudɔki ɔy tigati ja nitanaabyi midi yiktejp Zenas jɔts nayide'en ja Apolos, mo' ja pudɔjkin jɔts yjaakwidettit kunim ja tyunk tyik'abaadidit nugo ku ti kya'ijtxyidi.

¹⁴ Nɔjmi ja nmigu'uktɔjkti pɔn jamdi mets mθɔt jɔts mbudɔkiyidit, jɔts jade'en tnijawidit sɔ ja ɔchinaa'yin wyingaxθ'ɔkt ku tpudɔkidit ja myigu'uk pɔn ti ka'ejtxip.

Ku ja Pablo kyajpxpθ'kxy jɔts ja kunuu'kxin t'ukyajkni

¹⁵ Pɔn jaty ɔts ixyam mθɔt, mdanigajxidip ja kajpxpoo'kxin ja'. Tukja'myats niduki'iyyi ja nmigu'uktɔjkti pɔn jaty tu'ugyi ja janchja'win tmθɔt'ajtmidip ku ɔθts ixyam ja kajpxpoo'kxin nguexy. Paat meets ja Dios kyunuu'kxin niduki'iyyi. Jade'en idθ'ɔn ja yjatt.

JA NØKY MIDI JA PABLO TYANĪGAJX JA FILEMÓN

Yide'en ja Pablo tnijayi ja Filemón

1-2 Øts idø'øn Pablo'ajtp. Øts yam tsumy ku nwindsøn'ajtim yja' nbaduujni. Ixyam mee nnijayi møøt yø Timoteo pøn jaty namyukidip jam mdøjkjotp, jøts nayide'en øø nja'myech ja ndsø' Apia jøts Arquipo midi nayide'en tump sam øts nduñ.

3 Paatti meets niduki'yiyi ja Dios Teety jøts ja nwindsøn'ajtim Jesucristo kyunuu'kxin møøt ja y'øy'ajtin.

Sa ja Filemón tjagyepy ja tsojkin ja pa'ayo'owin møøt ja Dios'ajot'ajtin

4 Ku øts ja Dios n'ajot'aty nxumikajxajkpy øts ja Dios ku me nja'myech,

5 ja'agøjxp ku tø nnijawi ku mets nayide'en xtsojki ja nwindsøn'ajtim Jesús yja', jøts pøn jaty ja janchja'wiyip.

6 N'amidøøpy øts ja Dios jøts tja'gyukiyidit yikxon ja y'øy'ajtin midi nbaajtyindip ku njanchja'wa'andi ja nwindsøn'ajtim. Wa'nts tum jade'en ttundi, pøni sa tø xukmadøø pøn jaty tø tpabøkti.

7 Janch jotkujk øts ixyam ku nmadøø ku xpa'ayøø ja mmigu'uk jøts kxajpxjot'amøki, jøts jade'en xyikjotkujk'aty.

Ku Pablo t'amidøø ja may'ajtin jøts yikupøkt jadigojk ja Onésimo

8 Øy øts ja Cristo kyutujk nayide'en njamøøt'aty jøts me n'ana'amt pøni ti jaty mdu'ump, ka'ats mets ixyam n'ana'amwa'añ

9 ja'agøjxp øts ixyam migu'uk'ajtingøjxp tu'uk ja may'ajt n'amidoowa'añ. Møjaa'ñip øts ixyam jøts tsumyim n'ity nwindsøn'ajtingøjxp,

10 paty mets n'amidøø ja may'ajtin jøts xkupøkt jadigojk ja Onésimo midi øts yam tø ndukja'gyuki ja Dios yja'.

11 Ku ojts jawyeen nmøøtsinaay yø Onésimo, ka'ap øy y'ijty ti t'ødyuñ. N'ajot'ajtna'amp ixyam

12 paty ndaniguexy jadigojk jøts xkupøkt, ÷kidents øts jeexyip xkupiky?

13 Jade'en ø njatsøky'aty jøts ja yam jeexyip tyañ, jøts øts ja jeexyip xpudøki sam mets jeexyip kø'øm xpudøki.

14 Ixyamts mets ja ndaniguexy ja'agøjxp ja'ap mibaat ja mgutujk njinajxit, jabi yide'enxi njawa'añ pøni xunwajñip meets ja may'ajtin, ka'ap ja xu'unt ana'amingøjxp, mgø'ømdsojkingøjxp idø'øn ja xu'unt.

15 Pø ja'agøjxp idø'øn ja ojts chøøñ jøts ja mniwimbetyit jadigojk xemikøjxp,

16 jits ka'ap jade'en x'ukyiktunit ejxim jiyujkin, jade'en xjawit ejxim n'uchin ejxim nmigu'ukin. Njanchpa'ayøøpy øts yø', jawaani møk mets yø xpa'ayo'ot, ka' nugo jaa'y x'ext, jade'en x'ext sam adømin, tøxi tpabiky ja nwindsøn'ajtim yja'.

17 Paty ø nwa'añ, pøni xmigu'ukja'wip øts, kupøkt ejxim øts jeexyip xkupiky.

18 Pøni tø mmidundigøyi, uk japts mmijoyiyi, øts ja ngubajtkøjxp.

19 Kø'øm øts ixyam nwa'añ jøts ngubajtkøxt ja yoj, paty ø kø'øm ndyimyja'ay; ka' yjawi njadukja'myajtswa'añ ku me tø mnañito'jknayi. Kidim xjanchja'wiñi, taxi'iky yø'.

20 Sam ø nwa'añ, tun waani ja may'ajt jøts ø xyikjotkujk'att ja'agøjxp ku tu'ugyi njanchja'windi ja nwindsøn'ajtim.

²¹ Nnajtšja'wip øts ku xpadungøxt sã jaty øts ixyam nwa'añ.

²² Jøts nayide'en x'awejxtip øts; jotmøñ mee nninijkxy sã jam ja Dios x'amidowdi.

Ku ja Pablo t'ukyajkni ja kajpxpoo'kxin jøts ja kunuu'kxin

²³ Nayide'en mdaniguexyidi ja kajpxpoo'kxin ja Epafra, pøn øts ixyam møøt ndsumchøøni nwindson'ajtimgøjxp.

²⁴ Nayi kyajxtip ja kajpxpoo'kxin ja Marcos, møøt ja Aristarco, møøt ja Demas jøts ja Lucas, midi øts xpudøjkidip.

²⁵ Mbaajtidip ja nwindson'ajtim Jesucristo kyunuu'kxin ja y'ø'y'ajtin. Jade'en idø'on ja yjatt.

JA NØKY MIDI YIKTANĪJA'AYĪDØØ JA HEBREOS JAA'DYĪ

Dios U'nk køjxp adøm ja Dios Teety xmigajpxyim

¹ Janch tigach idø'øn ja Dios Teety y'ijty ñanky'ijxyiyi, ku dø'øn ja kyugajpxy ttuknijawiwya'añ pøni ti jaty idø'øn ja tyukmadowampy ja møjaa'dyøjkti.

² İxyamnim idø'øn ja kyø'øm U'nk kugajpxy tø tkexy. Y'U'nk køjxp idø'øn ja Dios Teety ojts tuki'iyi tyik'øyi ja naajx jøts ja tsajp, jøts nay ja y'U'nk tø ttagidøjkiguixy køx kidā'ak midi ja wyinaty tø tyik'øyi.

³ Ja Dios U'nk idø'øn tnanky'ejxip ja Dios Teety ja myøj'ajtin, jøts nayi ja' ja tnanky'ejxip sa dø'øn ja Dios Teety t'ixy; nay ja'ats ja myøkwinmaa'ñ ja myøk'ayuujk tpatanaagyøjxp tuktsajp'agida'aky ja pikta'aky midi ja Dios Teety tø tyik'øjy. Ja Dios Teety ja møøt yikutuky y'aga'ngyøj'øm jam tsajpjotp, ku adøm ja yā jawyeen tø x'ukykpøjkpiwaaajchim.

Jawaani møj ja Dios U'nk, ka'ap ja ankilis jade'endi

⁴ Tø ja Dios U'nk jawaani møj wyimbidsimy jøts ja Dios Teety y'ankilis ne'egi ka', ja'agøjxp ku ja Dios U'nk tø tmidañ jawaani møj ja kutujk.

⁵ Jabi nijuunixi ja Dios Teety tkanimaay tu'uk ja y'ankilis yide'en:

Mets idø'øn n'U'nk'ajtpy;

øts mets ja jujky'ajtin ti nmø'øy,

ni ja Dios Teety tkanimaamyi tu'uk ja y'ankilis:

Øts me n'u'nk'atp,

jøts øts me xeety'atp.

⁶ Yide'ents tø wyami ku ja myøjtumu'ts U'nk tø xaniguejxyim yā naẖwiiñ:

Wan niduki'iyi øts ja n'ankilis mwindsø'øgiyi.

⁷ Ku ja y'ankilis tñimadyajkmī, yide'en ja Dios Teety wya'añ:

Øy øts ja n'ankilis o sa nnanky'ejxyit,

nayide'en sam ja pojīn, uk sam ja jøøn yowīn.

⁸ Kuts ja y'U'nk tñimadya'aky yide'ents ja tñimaamyi:

Xemikøjxp me Dios U'nk mgutujk y'ity;

tīy mets mgutujk ja mdiidyu'unin y'ity.

⁹ Mdsøky'ajtpy mets ja tyiiby jøts ka' x'ejxwa'añ ja ka'øbyi;

paty ja mDios Teety jawaani øy ja jotkujk'ajtin tø mmø'øyi,

jøts ni ka'ap jade'en o pøn tø yiktuñ.

¹⁰ Jøts nayide'en wyami:

Mets Dios U'nk, tø xanibiktaajkguixy tuki'iyi ku yø naẖwiiñit tø xyikøjy,

jøts mgø'jotp ja tsajp tø pyidsimy.

¹¹ Køxtip naẖtip yø', jøts mets xemikøjxp me mdañ.

Nayide'en yø yjattit sam wet pyachi;

¹² Jøts mets ja xpøkjø'økt ane'eky ade'kxy, jøts jadigojk xyikjemyit xyik'øyt.

Mets idø'øn xemikøjxp jade'eñim m'ejtp, nijuuni xøøw mets mdsinaa'yin

kyakixy.

¹³ Jøts nijuuni ja Dios Teety tu'uk ja y'ankilis tkanimaay:

Yā yikutuk n'aga'ngyøji'yjy,

kunimts mets mmidsep nduktekpya'an'att.

¹⁴ Dios Teety idø'øn myidundip niduki'iyi ja ankilis, nayi Dios Teetyts kajxidip jøts tpudøkidit pøn jaty ja nitso'ok'ajtin tkupøkwandip.

2

Ka'ap ja nitso'ok'ajtin ngamøjpiktaajkin

¹ Ja'agøjxp idø'øn nyikmøja'am nyikøjxpa'am pøni sa tøn madø'øyim jøts kidi ja nwinmaa'ñ nyiktigajchim, tu'ugyi ja nyikyø'øyim.

² Tø dø'øn ja ayuujk yjanchwindiy midi ja ankilis ja israelit jaa'y tyukmad-owdi, pøn jatyts ja tkabadundøø, yiktiidyundi ja', jøts ja ayo'on yikmøødyøø sam idø'øn pyaat'atyi.

³ Pøni jade'endam ja yjajttøø, ¿sudsots adøm idø'øn ndejint nga'ayo'ombaaajntindit pøni ka'ap adøm ja møj nitso'ok'ajtin nmøjpiktaajkyim? Jabi jawyeenxi ja nwindson'ajtim kø'øm tøn tngajpxy, pønts ja tpatmadoojidøø, tøts ja ayuujk ja jawyeen tiibyøkti jøts ja tøn ttsøonidi, jitsnim øøts ja tøn xukmadøy.

⁴ Tøts ja Dios Teety nayide'en kø'øm tyaky ja ejxpajt ku dø'øn ja y'ayuujk ja wyindiy, ku ixyimbi ka'ixyimbi tyiknaxkida'aky, nayide'en ja Dios Espiritu Santo tøn xmø'øyim ja møk'ajtin sam ja kija' tøn xamidsøjkyim.

Nayide'en ja Jesucristo yjaa'yjajty sam ja myigu'uk naxwii'ñit jaa'y

⁵ Ja tsinaa'yin ja jujky'ajtin midi memp ja'tp Cristo køjxp, midi øts ixyam nnigajpxy, ka'ap ja ankilistøjk ja mibaat tniwindsøn'attit.

⁶ Jabi yide'enxi ja David ja Dios Teety t'ajot'aty jøts ja tøn tjaadyañ:

¿Tyimbyøn idø'øn yø jaa'y'ajtp ku yø niwine'en xkaja'dyigøy?

¿Ti tyimbyøn idø'øn yø naxwii'ñit jaa'y midi oo'kp tigøøpy ku yø xmi jotigøy?

⁷ Tøn yø waani x'atsyik'amutski jøts tøn x'atsmøjpikta'aky ja m'ankilis,

ixyam n'egi jawaani møj tøn xmø'øy ja møj'ajtin jøts ja øy'ajtin,

⁸ jøts tuktsajp'agida'aky tyikutujkøxt.

Ku dø'øn ja Dios tuki'iyi tøn ttagidøjkiguixy ja jaa'y, niti dø'øn ja tøn tkayiktañ midi ja jaa'y kya'ana'amp. Ots ja yjade'eni, ka'anims adøm n'ixyim ku tuki'iyi myimadooguixy.

⁹ N'ixyindipts adøm ja Jesús pøn ja Dios Teety waani tøn t'atsyik'amutski, ni ja ankilis tøn tka'atmibaat'aty. Tøts ixyam tmøøgyojmi ja møj'ajtin jøts ja windsø'jkin jawaani møj, ja'agøjxp ku ja o'jkin ja tøn tkupiky, ku ja Dios Teety ja jade'en tøn tyamidsøkyiyi jøts adøm ja xku'o'jka'ant.

¹⁰ Dios Teety køjxp tuki'iyi y'ijty, jøts tum ja' idø'øn paat'ajtiyip; ja'ats ja Dios Teety chøjkpy jøts nayide'en ja y'u'nk ja myaay tpaattit ja øy'ajtin. Paty idø'øn ja Dios Teety tøn ttamidsøky ja nwindson'ajtim Jesucristo jøts ja y'ayo'owin jøts ja y'o'jkin jade'en ttuktabajañaxy, sa dø'øn ja naxwii'ñit jaa'y y'ejxidi tyiyidi, jits jade'en jawaani øy xukja'gyukant sudso ja nitsoojkin nbaajntin.

¹¹ Jabi nay ja'axi ja tyeety'ajttip pøn jaty tøn pyojkpiwa'atsti, jøts nay ja'ats ja tyeety'ajtmip pøn yikpojkiwa'tsp. Paty ja Dios U'nk tkadatsø'ødyuñ ku adøm ja xmiga'axa'am,

¹² sam jap wya'añ nøkyøtpy:

Mets Dios Teety idø'øn nnimadya'akp ku øts ja nmiga'ax nmigajpxt, jøts tu'ugyi øø wyinaty n'iy mets køjxp.

¹³ Jøts nayide'en jap jaabyety wyami:

N'awejx'etp øts ja Dios Teety.

Jøts abiky nømgojmi:

Ixyam ø møøt n'u'nk n'una'jk, midi øts ja Dios Teety tøn xmø'øy.

¹⁴ Jade'en sam ja naxwii'ñit jaa'y ja jujky'ajtin tmøøt'ajttøø, ja'agøjxp idø'øn ja nwindson'ajtim Jesucristo yjaa'yjajty jøts jade'en ja o'jkin tkupøkt, jøts jade'en tmimajada'aky ja miku' midi ja o'jkin tniwindsøn'ajtp.

15 Jade'en ja nitso'ok'ajtin xuktajotkujk'ajtin jøts jade'eñi dø'øñ ja o'jkin nga'uktsø'jkiñant.

16 Wa'ats yikja'gyuki ku ja nwindson'ajtim ja' tkanimiñ jøts ja ankilis tpuðokit, jabi tum naðwii'ñit jaa'yxi ja ja'ayi ñimimpy, pøn teety'amøjkojpk'ajtip ja Abraham.

17 Ja'agøjxpts ja nayide'en yjaa'yjajty sam ja my'igu'uk naðwii'ñit jaa'y, jøts jade'en t'ayo'ext sam nayide'en ja Dios Teety tpadun'ett, ku ja kyø'øm o'jkin ja ttayikpojkwā'ach ja naðwii'ñit jaa'y. Ja'agøjxp idø'øñ ja amuum ndeety'ajtyindi.

18 Tø dø'øñ ja jawyeen ttanaxy ja ayo'on, ja winmaa'ñ, jøts nayide'en yikxon tø yikwinmaa'ñ'ixy, paty idø'øñ myayi ja puðøjkin pøn jaty nayide'en ya jajtíp kubajtíp.

3

Jawaani møj ja Jesús, ka'ap ja Moisés

1 Kunuu'kxy mee migu'uktøjkti, meetspi dø'øñ mbaat'ajtiyip jøts yikxon x'ejxtit ja Cristo Jesús, pøn tø nyiktaniguexyindi jøts pøn ndeety'ajtyindip, ja'agøjxp ku meets idø'øñ ja Dios Teety tø mw'i'ixyidi jøts ja mja'atyiðit.

2 Ejtp ja Jesús tiy ja Dios Teety tmimadøy pøni ti ja tø tyaguwaníyi, sam ja Moisés nayide'en tu'ugyi tmiduun ja Dios Teety ma ja janchja'wibi jamdi.

3 Jawaani møjts ja Jesús ja wyindsø'jkin pyaadyi jøts nika' jade'en ja Moisés, nayide'en idø'øñ ja tpaaty, sa jawaani møj yikwindsø'øgi ja tøjkojpi jøts nika'ap ja tøj jade'en.

4 Ots idø'øñ ja jaa'y may yjadøjkojti, tum ja Dios Teety tuki'iyi tø ttanibiktaagi wine'en ijty tuktsajp'agida'aky.

5 Janch øy idø'øñ ja Moisés yjatuun, ku ja janchja'wibitøjk ttukmadøoy ja Dios kyajpxy y'ayuujk, pøni ti dø'øñ ja wyinaty tyunwampy ja Dios.

6 Tu'ugyits adim ja Cristo xpawinmaa'yim wine'en adøm njanchja'wa'am, ja'agøjxp ku ja tkøjø'ømit'ajtkixy, pø Diosxi ja' ja y'u'nk. Ja' tsojkip jøts møk ja winmaa'ñ nbiktaajkint, jits jotkujk n'aweixint ja øy'ajtin midí memp midí ja'tp.

Ja janchja'wibi pyoo'kxinxøwdi Dios wyingujk

7 Paty yide'en ja Dios Espíritu Santo wyā'añ, sam jap jaabyety y'ity nøkyixpy:

Pøni mmadøøpy meets ja Dios Teety kyajpxy ixyam,

8 kidi jade'en mgujuun'atti sam ja jaa'y ttundi jam abak etjotp, ku tkagupøjkti ja Dios,

jøts ja yujy'ajtin nugo ttaguyajtdi.

9 Jam øts idø'øñ ja m'apteety m'aptaak xwinmaa'nmyøk'ejxti,

øyi ja tja'ejxti tjanija'widi ja ixyimbi ka'ijxyimbi wixijky jumøjt midí jaty øts jam njatungunajpxy.

10 Paty øts idø'øñ n'atsmi'ambøjkti,

winets ø nwaañ: "Ejtp mee mjadigøy m'anmija'wingøjxp,

jøts ka' xtsojkti jøts øts ja nduu' xpaduujnidit."

11 Ja' øts idø'øñ ja ndami'ambøjkti, jøts ø nwañdaajky ku kyatøkidit ma øts ja n'uktamidsojkti.

12 Migu'uktøjkti, nay'ejx'etidim tu'uk jadu'uk, jøts xkamajststuttit ja Dios ja yikjujy'ajtpi, jøts ja' ejtp xjanchjawidit.

13 Nay jaakjamnim ja xøøw ja jumøjt, nagyajpxjot'amøjkiyidi xem yam jabom jabom, jøts ja pøky mgawin'øønidit, jøts ja Dios ejtp xmimado'odit.

14 Pøni tu'ugyi nyikyø'øyim ja janchja'win pøni sa ja tø nyiktso'ondaajkyim, kuwani ja Cristo møøt nbaajtin ja øy'ajtin.

15 Paty xja'myatstit ku ja ayuujk wya'añ: Pøni mmadøøpy meets ja Dios Teety kyajpxy icyam, ka'ap nayide'en mgujuun'attit sam ja ttundøø pøn ja Dios Teety tkamimadoodøø.

16 ¿Pønts idø'øn ja Dios kyajpxy tjamadoodøø jøts ja tka'ukpadunidøø? Ja' dø'øn jade'en adøtsti pøn ja Moisés yik'awa'atspidsøøm jam Egipto etjotp.

17 ¿Pønts idø'øn ja Dios myijotma'jt wixijky jumøjt? Ja'ats idø'øn jade'en jajtøø pøn jaty pøkyundi, jøts ja jamyi abak etjotp y'oo'ktøø.

18 ¿Pønts idø'øn ja Dios tyamiwandaajki ku ja kyatøkidit ma dø'øn ja Dios wyinaty tø y'uktamidsøkyidi? Ja' dø'øn ja'adi pøn tkamimadowdi ja Dios.

19 Ixyats adøm n'ijxyim, ja'agøjxp ja øy'ajtin ja tkapaattøø ku ja Dios ja tkamibøjktøø.

4

1 Ka'aním ja tpaaty jøts adøm ja Dios Teety nmøøtnøjxna'ant poo'kxpi, paty idø'øn tsø'øgi jawi ndsinaa'yinditnim ja ku wyinaty pøn nidu'ugin kyanaxy.

2 Nayide'en adøm tø nyiktukmadø'øyim ja nitsoojkin ayuujk, sam ja møjaa'dyøjk yjayiktukmadowdi; ka'apts ja ti øy'ajtin tpaatti ja kuxi ja tkamibøjktøø øy ja tjamadoodøø.

3 Adømts idø'øn ja Dios Teety møøt nbaajtint ja poo'kxin ku adøm ja tø nmibijkyim, jabi yide'enxi ja Dios kø'øm tø wya'añ: Ja'agøjxp øts idø'øn ja nmi'ambøjkti ku øts ja xkamibøjktøø, jøts øts ndyimñimy ku nijuuni xøøw xkamøøtpoo'kxtit.

Jade'en idø'øn ja Dios wya'añ, øy ja wyinaty ja tyunk tø tjayik'abajtyini ku ja wyinaty tuki'iyi tø tyikojkixy, jøts t'agajpxujky jøts ja tpaattit ja poo'kxin pøn mmadøøjp;

4 pø japxi nayide'en jaabyety y'ity ti dø'øn ja Dios Teety tyuun kyiwixujk xøøw: Poo'kx ja Dios kyiwixujk xøøw ku ja tyunk tyik'abajtyi'i'ñ.

5 Jøts nayide'en jap jaabyetyimi:

Ka'ap øts ja xmøøtpoo'kxtit pøn xkamibøjktip.

6 Ka'aním ja jaa'y ñiga'pxidi jøts tpaattit ja poo'kxaaajk, øy ja tø tjamadowdi ja nitsoojkin ayuujk, ka'ap ja poo'kxaaajk ja tø tpaatti ku ja tø kyamadowdi;

7 paty ja Dios Teety jadu'uk ja xøøw ja et tø tñigajpxy midí adøm icyam n'ijxyindip ndsinaa'yindip, jabi Davidxi dø'øn ja Dios kyajpxy yiktumpy ku ja wya'añ sa jap jaabyety y'ity nøkyijpxy:

Pøni mmadøøpy meets ja Dios kyajpxy ja y'ayuujk, kidi xkamibøkti.

8 Ku ja Josué jeexyip ja israelit jaa'y ja poo'kxin ti tmøøñi, ka'ap ja Dios Teety jeexyip jadu'uk ja xøøw ja et tñigajpxy ma ja poo'kxin yikyakt.

9 Patyts idø'øn y'aweix'ityiyi ja kunuu'kxy poo'kxin, niduki'iyi pøn ja Dios tjanchja'widip.

10 Pøn ja Dios Teety møøt pyøø'kxy, nayi tø ja wyinaty ya naqxwiiñ tyik-ixy ja y'ødyu'unin. Jotkujk idø'øn ja pyoo'kxnit sam ja Dios pyøø'kxy ku tyik'abajtyi'i'ñ ja tyunk tuktsajp'agida'aky.

11 Kuwanits nmijotigø'øyindit jøts ja'abi poo'kxin nijum nbaajtindit, jøts nipøn tkabadu'unt ja jaa'y pøn tkamibøjkti ja Dios.

¹² Jabi xemikøjpxi ja Dios Teety y'ayuujk y'ity, jøts jawaani wenk yikt-saachi myøk'ajtingøjpx, niti tsujx adsow jøpi jade'en kyayiktsaachi, ja kuxi tyimya'aty anmija'winjotp jøts jade'en tnanky'ijxyiyi pøni ti yiktunwamp uk yikwinmaa'ñ'ajtp.

¹³ Niti dø'øn ja Dios tkayu'uchjawi, tyumnija'wigyijxpy ja' tuki'iyi jøts ja' idø'øn wyinaty nwinguwa'jka'amp jøts ndsinaa'yin ndagidøjkant.

Ja Jesucristo idø'øn tu'uk møjteetywindsøn

¹⁴ Ja Jesús midì dø'øn Dios U'nk'ajtp, ja' adøm idø'øn njawanimøjteety'ajtyindip, ja'ats idø'øn ja Dios Teety tø twinguwa'agi, paty adøm idø'øn ja nDiosja'myajtsin møk nyik'ejtint.

¹⁵ Xja'gyuka'amp adøm ja Jesús midì dø'øn møjteety'ajtp, ja'agøjpx ku ja tnijawi sà adøm ndsinaa'yim ya. Pø tøxi ja nayide'en ja ka'øwynmaa'ñ jyayikmø'øy jøts ja tø tkagupiky, jøts jade'en ja pøky tø tkatuñ.

¹⁶ Tja'myejchims ja Dios, jøts wan tninijxym jotkujk jøts n'amido'owint pya'ayo'owingøjpx ja pudøjkin mā ngamajadaajkyim.

5

¹ Wi'ijxy idø'øn jam israel kajpkøjpx, tu'uk jadu'uk ja teety, jøts tø yikpikta'aky jaa'gyudanaabyi, jøts ja jiyujk'øøky ja Dios ttawindsø'øgidit ttawinjawidit jøts idø'øn ja jaa'y pyøky ñiwa'adsiyit jøts ja Dios tmaa'kxt.

² Kumi nayide'en yø teetyti pyojkpitumbijaa'yidi, paty yø tjä'gyukidi pøn jaty tsuj kadsinaadyip jøts pøn jaty tundigøødyip;

³ ja'agøjxpts idø'øn ja wyindsø'jkin tpikta'akti ku ja nayide'en pyojkpitumbijaa'y'ajtti, jøts ku ja jaa'y tkudanidi.

⁴ Nipøn ja kø'øm kyananktyeetypidsimy; ja Dios Teety idø'øn ja møøjyip, jøts nay ja' idø'øn tkunuu'kxp tkuwamp sam yiktuñ ja Aarón pøn myidu'ukpi møjteety'ajti ja israelit jaa'y.

⁵ Nayide'en yjajty ja Cristo; ka'ap ja kø'øm ñankmyøjteetypidsøjmi, ja Dios Teety ja møøjyi ku dø'øn ja ñimaajyi:

Mets idø'øn n'U'nk'ajtpy;

øts mets ja jujky'ajtin ya tø nmø'øy.

⁶ Jøts ku nayide'en ja Dios Teety wyaamaa:

Mets idø'øn xemikøjpx møjteety'atp,

jøts jade'en mdu'unt sam ja Melquisedec ttuñ.

⁷ Møk ja Cristo ja Dios Teety twingajpxajky tminuu'kxajky ku ya chinaay naxwiiñ, jøts twinjiy twinyaaajxy ja Dios Teety, midì tmøøt'ajtp ja kutujk jøts ja o'jkin tkapaatt tka'ext, jøts ja Dios Teety myadooji ku ja tu'ugyi yikxon t'ajot'aty.

⁸ Kuwani dø'øn ja Cristo ja ayo'on tkupøjki sam adøm, øy ja yjaDios U'ngi, kuwani ja tø tnanky'ijxyi ja mado'owin;

⁹ kuts ja jade'en tjä'gyukiyiñ ja naxwii'ñit ayo'on, jade'ents tmibaat'ajty sudso ja yiknitsoojkin ka'pxy tmo'ot pøn jaty ja mimadojyip,

¹⁰ ja'agøjpx ku møjteetywindsøn ja Dios Teety wyinaty tø pyiktaajkniiy sam ja Melquisedec y'ijty teety'aty.

Yik'ejxtip ja janchja'win ku ja jotmøñ yikmajstutnit

¹¹ Kajaanim ja kyayiknigajpxy ya'atpi ayuujk ja'agøjpx ku meets yjawi xkaja'gyukiwya'añ, jade'en'ampyts inet idø'øn ja yjawi ngajatt sudso nduk-mado'odit.

¹² Meetspik idø'øn jeexyip mdukyikyuujnidip ja mmigu'uktøjkti, kawinaak xøøw ja m'ixpøjkin xjayikyø'øñidi jøts ni jade'enbaat xkaja'gyukidinim ja

ixpøjkin midi ka' mabaat chepi. Ne'egi jade'en meets yjawi mwimbejtñi sam ja mutsku'nk ja'ayi ja che'tsknøø tkupiky, jøts ka'ap ja kaaky ja tojx ja ttsøky.

¹³ Maxu'ngin idø'on ndejint wyinmay pøn tkaja'gyukipnim sudso n'øchinaa'yint, kuts ja nduk'ixpøkwa'anin midi niwyaani tsep ka'ap ja tkupiky, nayide'en idø'on ja' sam ja maxu'nk ja'ayi tkupiky ja che'tsknøø jøts ka'ap ja wenkpi jii'kxy.

¹⁴ Pønts tjajtñip t'ixa'at ja øybi uk ja kya'øybi, ja'ats ja Dios y'ixpøjkin tnijawiwyangøjxp øy ja wine'en yjatsepi jøts yikja'gyukit.

6

¹ Jade'en nyiktaa'nint pøni ti jaty jawyeen tø nyiktukmadø'øyim, ku ja Cristo tønjanchnja'wa'am, jøts ja Dios yja' njaaknija'wigyojint jøts ja ja'gyukin nmøøt'ajtint. Ka'ap ja nugo ngajpxjimbejtint ngajpx'adøjint sudso nma-jtstuujtint ja ka'øy chinaa'yin, midi ja o'jkin tukpa'p, jøts sudso ja Dios njanchja'windit,

² jøts pøni ti dø'on nøbajtn'ajtp, pøni sudso jaa'y tkunuu'kxy ja myigu'uk, jøts sudso ja jaa'y yjujkpyøktit jadigojk, jøts sudso ja tiidyu'unin y'ett.

³ Paty adøm nja'uknijawigyojint pøni ti jaty yiktukmado'owimp, pøni jade'en ja Dios xamidsøjkyim.

⁴ Ku pøn jaa'y tuk'ojkyi tø ttajotkujktøki ja Dios y'ixpøjkin, ku ja Espiritu Santo tø yikwijyidi yikejyidi

⁵ jøts ja Dios kyajpxy nekim tø t'ukupøkti, jøts nayide'en tø tyatøkiyidi ja Dios chojkin ja myøk'ajtn midi ixyam jøts midi xemikøjxp ejtp.

⁶ Pøni tø ja tja'dyigøydi ja Dios jøts ja kyø'øm ka'øchinaa'yin ja tø t'awimbetidi jadigojk, nisudso ja kya'ukjotimbejtnidit ku ja Dios U'nk ja kyiruspajtn jade'en nugo ttaguyajtidi, jits ja nugo o magama ttaxe'ekti.

⁷ Jade'ents ja yjatti sam ja naajx ku tyu'uy, y'uktichp nøø, kuts ja pikta'aky jam yikxon y'ity jøts ja tyikjotkujk'aty pøn jaty tø ñe'epti. Dios idø'on ja kunuu'kxip ja naajx.

⁸ Kuts ja pikta'aky ja tkayik'ity, ku nugo ujts jøts kujp tyik'ity, tits ja wya'ant, ka'ap ja y'øyi. Mi'ambøjkipts ja Dios ja' jøtsnim ja yikni'sa'att.

Jade'en idø'on ndejint ja na'xwii'ñit jaa'dyi.

Ja awejx'ajtn midi jotkujk xyik'ejtimp

⁹ Ots ø migu'uktøjk jade'en njakajpxy, njanchja'wipts øts, ku meets ja Dios tø mgunuu'kxyiyi, ku tø myikmø'odi ja nitso'ok'ajtn.

¹⁰ Pø janch tiyxi ja Dios jits ka'ap ja mdajaa'dyigøyidit pøni ti jaty meets ja tø xuujni, jøts ku ja tø xuk'ejxti wine'enin ja xtsojkti, ku ja mmigu'uk midi nayide'en tjanchja'widip ja Jesús tø xpudøkidi, midi meets ixyam mjaaktun'adichpñim.

¹¹ Ja'ats øø ndsøjkpy, jøts meets jade'en mdsinaa'yin xyikyø'ødyit jotkujk jøts tsuj, kunim ja øy'ajtn xpaattit midi m'awejxtip.

¹² Ka'ap øø ndsøky jøts mee mnuux'oookt, ja' øø ndsøjkpy jøts ja jaa'y xpa'ejxtit pøn jaty ja øy'ajtn tpaattip y'awejx'ajtingøjxp ku ja Dios tjanchjawidi.

¹³ Jade'en ja møjaa'y Abraham yjajty ku ja Dios tyamin'adso'owiyi ja øy'ajtn. Kyø'øm jujky'ajtn ja Dios tyakajpx, ja'agøjxp ku wyinaty nipøn jawaani møj kya'ity;

¹⁴ xjats yide'en ja Abraham yiknimaay: "Ngunuu'kxp mets, jøts ja m'u'nk m'ap nyiknamayit."

¹⁵ Tudá'aky ja Abraham ja t'awejx'ijty midi idø'øn ja Dios ñigajpx, jøts ja Dios ja myøøjyi midi wyinaty tø tyamidsøkyi.

¹⁶ Ku jaa'y tigati ttamøjtøkiwya'andi ttajanchtøkiwya'andi, ja' ja y'agajpxtip pøn jawaani møj, jøts ja nisa kya'ukyiknimaañidit.

¹⁷ Paty idø'øn ja Dios ojts ja kyajpxy tyimyiktañ, jøts ja yikjanchjawit ja y'ayuujk, jøts ku ja tuki'iyyi tpadu'unt pøni ti jaty ja wyinaty tø ttamidsøky ja jaa'y.

¹⁸ Majtsk idø'øn ja winmaa'ñi midi ja Dios myøøt'ajtpy jøts ka'ap ja taay'ajtingøjxp ttuñ; tu'uk ja wyandaajkin midi adøm idø'øn xamidsojkimp, jøts tu'uk ja kyajpxy y'ayuujk midi ja awejx'ajtin xmø'øyimp ku ja wyandaajkin ja tpadu'unt. Jade'ents adøm ja Dios xyikjotkujk'ajtyim, jøts n'awijxyimpts adøm pøni ti dø'øn xmø'øyimp.

¹⁹ Ya'at awejxin adøm idø'øn ja n'amija'win tu'ugyi xyik'ejtindip, sam ja kudiibyajt tu'ugyi tyik'ity ja pikta'aky, midi'its adøm idø'øn nadyagumajtsa'amp jøts adøm ja Dios nbaajtin.

²⁰ Jam idø'øn ja møk y'ity tsajpjotp ma ja Cristo jawyeen tø tyøki jøts ja tuu' tyik'awa'atst, jøts idø'øn ja jade'en xemikøjxp tø tyañ møjteetywindsøn sam ja Melquisedec.

7

Nayide'en ja Jesús tyeety'aty sam ja Melquisedec

¹ Salemit windsøn idø'øn y'ijty ja Melquisedec jøts ja tsajpjotp Dios tnideety'ajtmi. Kuts idø'øn ja Abraham wyinaty ja myidsep tø tmimajada'aky ixats idø'øn ja Melquisedec ojts y'atspaatsøyi jøts kyunuu'kxi.

² Jøts ja Abraham tmøøy tukpiky ja majkpiypy pikta'aky pøni ti jaty idø'øn ja wyinaty tø t'atspiky. "Ka'pxy tiidyumbi windsøn" idø'øn ja Melquisedec y'ayuujkpidsimy; kuts ja tniwindsøn'aty ja Salem kajp midi tyijpy "jotkujk'ajtin", icyats ja Melquisedec wyimbidsømni "ja windsøn pøn kyajp ttamidsojpkp ja øy'ajtin jøts ja jotkujk'ajtin."

³ Ka'ats idø'øn ja tyeety tyaak ja pøn, ni myigu'uk; ku dø'øn ja ñanky'ejxpaajti, ni kyayiknigajpxmi ja kya'axin jøts ja y'o'jkin; paty idø'øn ja Dios U'ngin t'ixy, ja teety midi xemikøjxp teety'ajtp.

⁴ Janch møjts idø'øn ja Melquisedec wyimbidsimy, ku dø'øn ja Abraham, midi adøm ndeety'amøjkojpk'ajtyindip, ja tmøøy tukpiky ja myajkpiypy pikta'aky midi ja wyinaty tø t'atspøjksi ja myidsep.

⁵ Jade'en ja Moisés kyutujk yjawa'añ jøts ja teety pøn yiktso'ondaajkidi ja Leví jøts t'amido'odit ja jaa'y tukpiky ja myajkpiypy pikta'aky, øy ja tjamigu'ugidi, uk tu'ugyi tjakojp'atti ja Abraham.

⁶ Øts ja Melquisedec jade'en yjagateety'aty sam ja'adi pøn yiktso'ondaajkidi ja Leví, y'amidoow ja nayide'en tukpiky ja myajkpiypy pikta'aky ja Abraham pøn wyinaty ja Dios tø tyamiwanda'agiyi ja øy'ajtin. Jøts ja Melquisedec tkunuu'kxy ja Abraham;

⁷ ñipønts sa kyawa'añ, ku ja yjawanimøji pøn kunuu'kxp, jøts ka'ap ja' pøn yikunuu'kxp.

⁸ Tum oo'ktipty ja jaa'y pøn ya naxwiiñ tukpiky ja myajkpiypy pikta'aky yikmøødyip, ka'apts ja Dios kyajpxy jade'en tñigajpxy ku ja Melquisedec tø y'oo'kni, nømp ja wya'añ ku ja yjujky'atynim.

⁹ Nayide'en idø'øn n'ukwa'anint, øy idø'øn ja teetytøjk pøn ja Leví ñigubajk'ajtpy icyam tjayikmukti tukpiky ja myajkpiypy pikta'aky, kuwani dø'øn ndejint kø'øm tjagubajtmidi ja yjade'embí nay winet ku ja Abraham tmøøy ja yja' ja Melquisedec.

10 Ja'agøjxp idø'øn ja ndejint ja ttuũn ku ja tmøjnigøjpk'aty ja Leví pøn wyinaty kaka'xpnim naxwiiñ, ku ja Abraham ja Melquisedec pyaatsoji.

11 Ja Levíit teety idø'øn midi ja Aarón yiktso'ondaajikidi, ja' idø'øn tmøødyi ja kutujk ja Israel kajp. Kudsik idø'øn jeexyip ya'atpi teety ttukpaattøø ja Dios pøn jaty ja kyutujk paduujnidip, ka'ats jeexyip chøjkyi jøts ja teety jadu'uk kyaxø'økt midi tkawindsøn'ajttip ja Aarón, jøts nayide'en tyeety'attit sam ja Melquisedec.

12 Kuwani dø'øn tyigach ja kutujk ku ja teety tyigatsti;

13 ni tu'uknimts ja teety kyabidsimy abikyajpkøjxp, sami ja nwindson'ajtim Jesucristo midi dø'øn jade'en yiknigajpxp jap nøkyijxpy.

14 Yiknija'wipxi ja' ku ja nwindson'ajtim Jesucristo tatskojpk'aty ja Judá, jøts ka'ap ja Moisés tyikutujky ku teety jam Judá etjotp pyidsø'ømdit.

15 Jawaani øyts ja ne'egi wyingaxi'iky, ku yiknijawi jøts ku ja Jesús ja jemdyeety'ajtin ñanky'eixiyi, nayide'en sam ja Melquisedec.

16 Kyø'øm møk'ajtingøjxp ja Jesucristo tpaajty ja teety'ajtin, ja ku tmøøt'aty ja jujky'ajtin xemikøjxp; jøts ka'ap ja pyidsimy jam jaa'y agujkp, pøn jaty idø'øn paat'ajtiyip ja teety'ajtin, sam ja kutujk ja'ayi tñanidiktaagi.

17 Pø yide'enxi ja Dios Teety ja ñigajpxyi:

Mets idø'øn xemikøjxp mdeety'atp,

jøts jade'en mdu'unt sam ja Melquisedec ttuñ.

18 Paty ja Moisés yjawyeen'ana'amín tø kyudigøy, ku ja møk'ajtin tkayaky sudso yikpadu'unt;

19 jøts niwíne'enin ja ka'øchinaa'yin tø tyiktigach. Ixyamts nmøøt'ajtyindi tu'uk ja jøp'ijxy'ajtin midi øy midi møj jøts midi ja Dios xukpaajtimp.

20 Diosts idø'øn kø'øm ja y'aaw y'ayuujk tø tyaky jøts idø'øn ja nwindson'ajtim Jesucristo xemikøjxp tyeety'att.

21 Ja abikpyi teety, ka'ap ja jade'en tø yiktamidsokti sam idø'øn ja nwindson'ajtim Jesucristo tø yiktamidsøky, sam jap jaabyety nøkyijxpy wya'añ:

Pøni tø ja Dios wya'añ ka'ap ja y'aaw y'ayuujk

ja tyiktigatst, ku ñimy:

“Mets idø'øn xemikøjxp mdeety'ajtp,

jøts jade'en mdu'unt sam ja Melquisedec ttuñ.”

22 Paty idø'øn ja Jesús jawaani tø myøjtøki, ku ja jawaani øy ja tyeety'ajtin midi tyajkp ja nitsoojkin.

23 Yam janch namay ja jadu'ukpi teety, jøts tum jøpwetsti y'etti ku y'ookti, wenkpits ja tyunk tmidandip;

24 ka'ats ja Jesús jade'en, nijjuuni xøøw ja kya'øøky, paty ja tyeety'ajtin ja nipøn tkadukmidañ.

25 Ja'agøjxpts idø'øn ja jade'en xemikøjxp tyik'awa'atspidsimy pøn jaty ja Dios t'ixaadyip, ku ja xemikøjxp yjujky'aty jøts ku adøm ejtp xni'amido'owa'am.

26 Yä'atpi teety'ajtpi adøm idø'øn jeky tø n'awijxyim; ja nwindson'ajtim Jesucristo ja' idø'øn øyjaa'y pøn tkamøøt'ajtp ja ka'øwynmáa'ñ, ni ja pøky, pøn ja pojkpitumbi jaa'y tø kyadapaadyi ja ka'øchinaa'yin øy ja tø tjamøøtsøøni, jøts pøn ja Dios Teety møøt yikutuky.

27 Tø dø'øn ja tu'ugyi ja Dios wyindsø'øk'ajtin tyika'pxi, ku ja ayo'on kø'øm tø tkupiky. Ka'ap ja jade'en tø ttuñ sam ja jadu'ukpi teetyti, pøn jabom ja Dios twindsø'øjkidip jøts ja kyø'ømbøky yikmaa'kxtit, jøtsnim ix'oojk ja jaa'y nayide'en tkugajpxti jøts ja pyøky ja wya'atstít.

²⁸ Tum naxwii'ñit jaa'y ja Moisés y'ana'amin yikteety'ajtpy, pøn nayide'en ja pøky øy myimajada'agiyidit; tøts yø'øbi ana'amin kyugøxi jøts ja Dios Teety ja y'aaw y'ayuujk tø tyaky jøts ja y'U'nk, ja nwindson'ajtim Jesucristo, tø tpiakta'aky øy tyety'ajtpi pøn xemikøjxp ja wya'ats'ajtin møøt y'ity.

8

Ja Jesús xkugajpxindip Dios Teety wyingujkp

¹ ¿Midi'libits idø'øn tsojkip yikxon ja'gyuki? Ja' idø'øn ku adøm ja møjteetywindsøn nmøøt'ajtyim jøts ja jam tø y'ixa'aky Dios Teety y'aga'ngyøjøm yikutujkpi,

² jøts ja jam tyety'aty tsaptøjkjotp midi ja Dios Teety kø'øm tø tkøjy, ka'ap ja jaa'y ja tø ttukyikøjy.

³ Windsø'øk'ajtin, tamay'ajtin, ja' idø'øn ja teety tyundip, paty idø'øn nayide'en ja nwindson'ajtim Jesucristo kuwani pyaat'aty jøts ja windsø'øk'ajtin tmo'ot ja Dios Teety.

⁴ Ku ja nay ya jeexyip chøøni naxwiiñ, ka'ap ja yjeexyip tyety'aty, pø jaaxi teety ya pøn jade'en ttundip sami ja Moisés wya'añ.

⁵ Nugo agojnaxts ja abikpyi teetyti myidundip, tum ja' y'agojnax midi jam tsajjotp. Ja'agøjxp ja jade'en yiknijawi ku Moisés ja Dios ñimaa'jy, ku dø'øn ja wyinatp tu'uk ja tsaptøjk tyik'øyiwya'añ, ku yide'en yiknimaay: "Yikxonim x'ext, jøts nayide'en pyidsø'ømt sam tø nduk'ixy kojpkøjxp."

⁶ Ja øy'ajtin, ja tiy'ajtints adøm ja nmøjteetywindsøn myidumpy, ja'agøjxp ku ja tkugajpxy tkudani ja øy'ajtin, midi adøm ja Dios Teety kø'øm tø xamidsøjkyim.

⁷ Kuk idø'øn jeexyip nisa kya'ejxi ja jawyeen kutujk midi ja Moisés ja Dios tukajpxnajxøø, ka'ats jeexyip jadu'uk chøkyi sam ja Cristo yja' tø tñanky'ijxyi.

⁸ Ja kuxi ja Dios tkaka'pxyjawi ja jawyeen kutujk sam ja kø'øm wya'añ jap nøkyijxpy:

Yide'en ja Dios Teety wya'añ: Me'emp ja xøøw ja jumøjt

ku øts ja Israelit jaa'y jøts ja Judajit jaa'y nmo'odit jadu'uk ja kutujk pøni kyupøjktip.

⁹ Ka'ap ja jade'en t'ext sam ja' midi tø njatumi møøt ja myigugajp, midi jekyip tsinaadyøø,

ku øts ja nwaapidsømdi Egipto y'etjotp; kumi ka'ap ja tpadundi, paty øts ja nmajtstuttøø.

¹⁰ Yide'en yjaakwa'añ ja Dios Teety, yide'ents idø'øn ja y'ett, midi øts idø'øn ndunwajnip ja Israelit kajp:

Ndukja'gyukip øts ja øgyutujk ja'adi, jøts øts ja y'anmija'wingøjxp nbiktaajkidit.

Ja'ats øts idø'øn niDios'attip,

jøts øts ja ngajp'attit.

¹¹ Ka' dø'øn pøn wyinaty ja myigu'uk niti tkadukyikyujti pøni ti dø'øn ja tyu'ump;

ja'agøjxp ku øts ja wyinaty ja møj ja mutsk tø nduknijawidi jøts øts ja niduki'iyi x'ejxkaptit.

¹² Nmaa'kxidip øts ja' ja kya'øchinaa'yin, jøts nijuuni øts ja pyøky ja nga'ukja'myajtsniyidit.

¹³ Ku dø'øn ja Dios Teety ja jemy ayuujk ja jemy winmaa'ñ tñigajpxy, mijaa'yinip idø'øn ja myijawyeembi kutujk; kuts ja tø myijaa'yini, pojin ja kyudigøøñit.

9

Ja naxwii'ñit tsaptøjk jøts ja tsajpjotpit tsaptøjk

¹ Jamts idø'on y'ijty tmøøt'aty ja jawyeen kutujk sudso yikwindsø'ogit ja Dios jam tsaptøjkjotp midi yā naxwiiñ.

² Yide'en idø'on y'øyiyiñ ja tsaptøjk yā naxwiiñ, midi dø'on jawyeen yikpatp ku ndøjka'ant, ja' idø'on xyøøw'ajtpy Kunuu'kxy Et, japts idø'on y'etti ja seri adøø'yin, jøts ja pøjkpajt mā ja kunuu'kxy chapkaaky y'etti.

³ Japts myimajtsk adiidyuky jixki'py tyañ, ja amaagyunuu'kxy et;

⁴ mā jap tu'uk ja altajr midi tum amuum oori mā kyøxøøy ja poom, jøts tu'uk ja mutskaaxi midi oori nimøch mā ja kutujk jap y'ity. Japts mutskaaxijøtpy tu'uk ja tu'jtsu'nk midi tmøøt'ajtp ja maná midi dø'on yjøø'kxtøø ja israelit jaa'y jam abak etjotp. Nayi jap idø'on kaaxijøtpy y'ijty ja Aarón ja tyajk midi ojts jadigojk xyimumy, jøts ja tsaa mā jap kyøxja'ayø ja kutujk ja ñi'ayuujk.

⁵ Jamts kaaxi ñikøjxp y'etti ja ankilistøjk ja y'agojnax, midi tyiknigaxø'ktip jøts ku ja Dios jam, jøts ja kyajnk ja ttanimu'uxti mā ja pøky y'ijty yikmee'kxy. Wants ya'at ja'ayi t'ukñija'wam.

⁶ Kuts idø'on ja jade'en tø ttanibiktaagidi, winets idø'on y'ijty ja teety tyøkidi jap mijawyeen tøjkjøtpy midi Kunuu'kxy Et yiktejp, jøts idø'on ja windsø'jkin ja yikjujky'ajtpi t'atsmo'odi pøni juuni ja kø'øm tsojkin'ajttøø.

⁷ Jøts idø'on jap myimajtsk tøjkjøtpy midi yiktejp Amaagyunuu'kxy Et, tuk'ojkyits ja winjumøjt ja møjteetywindsøn jap tyøki; ja jiyujk ni'jpy idø'on ja myidøjkp midi y'atswa'xpy mā ja pyøky jawyeen yikmaa'kxt jøtsnim ja jaa'y ja'ayide'en.

⁸ Yide'ents idø'on ja Dios Espíritu Santo xukja'gyukam ku dø'on jap nipøn nugo kyatøki myimajtsk tøjkjøtpy mā txøøw'aty Amaagyunuu'kxy Et. Japyi ja midu'uk tøjkjøtpy ja'ayi xyumitøkidi.

⁹ Yø' adøm idø'on n'ejxpajtin'ajtimp wine'enin naxwii'ñit jaa'y'ajtyindi, jøts nnija'wa'ant ku ja winmaa'ñ kyawa'aach øy ja wine'en ja wyindsø'jkin tjayika'pxtøø.

¹⁰ Ja' idø'on ja wyindsø'jkin'ajttip sudso kya'adyit sudso y'uuktit, jøts sudso ñanky'øyiyidit ñankchuyiyidit, sam ja møjaa'y chinaa'yin tyikutuky. Niwine'enin ja anmija'win ja tkayikwa'ats'aty. Ja'ats ja jade'en tyun-gunajxtip kunim ja Dios kø'øm tø tyiktigach.

¹¹ Tøts idø'on ja nwindsøn'ajtim Jesucristo myiñ, ja'ats idø'on ixyam tñimøjteetywindsøn'ajtp ja jemchinaa'yin midi yā tø tyañ. Jawaani øy idø'on jøts jawaani tsuj idø'on ja tsaptøjk mā dø'on ja tyuñ, ka'ap ja jaa'y ja tkøjy, paty idø'on ja kyanaxwii'ñit tsaptøjki.

¹² Tø dø'on ja nwindsøn'ajtim Jesucristo ñaxy jap myimajtsk tøjkjøtpy midi xyøøw Amaagyunuu'kxy Et, ka'ats ja t'ukmidøjkiñi ja mutsk chiibi ni'jpy jøts ja løjch ñi'jpy; kyø'øm ni'jpy ja myidøjkp tuk'ojkøjxp ja'ayi, midi adøm idø'on xemikøjxp tø xuktanitsøøjkyim.

¹³ Yikwachptsik idø'on y'ijty ja pøky ja tsigiduuri ni'jpy, jøts ja tsapaxuna'jk ni'jpy, jøts nayide'en ja tsigiwaki jaam midi yiknitøødyip jam altajrkøjxp, ku dø'on ja y'ijty ñadyaninuugyidi nikijxy jøts ja pøky jade'en tyikwa'atswa'andi xjats ja kunuu'kxin ja jade'en tpttøø.

¹⁴ Pøni jade'ents ja', jawaani kajaats idø'on ja nwindsøn'ajtim Jesucristo ja ñi'jpy yikpøkwa'aach jøts kyunuu'kxy, pø patyxi ja Dios Espíritu Santo køjxp ñagyøyajkiyi pakwa'aach, midi ja Dios Teety kyupijky, jøts idø'on ja ñi'jpy ja

tyikwa'atst ja ka'øchinaa'yin midu ja kudig'øyin xukpaajtimp, jøts ja Dios jøts ja yikjujky'ajtpi jade'en nmimado'owin.

¹⁵ Paty id'øon ja Jesucristo mõj yik'ajot'aty ku yjemgyutujk tø tyik-tso'onda'aky, pø ja'axi ja kyu'o'jkip jøts yikpøkmyaa'kxtit pøn jaty tø pyøktundi ku ja mõjaa'gyutujk y'ijty tyuñim, jøts ja jaa'y tpaattit ja xemikøjxpit øy'ajtin, midu ja Dios Teety ttamidsøjkiyidip windi'ixip.

¹⁶ Jabi jade'enxi yiktuñ ku ja maay wya'lxy, jaanim ja wya'lxy ku ja jaa'y y'øøkñim.

¹⁷ Jøts ka'ap ja ayuujk mißaät nugo myøjtøkit pøni nay jujky'ajtpnim ja kumaay.

¹⁸ Kuwanixi ja ni'jpy ojts chuñ xye'lxy ku ja mõjaa'gyutujk cho'ondaajky.

¹⁹ Ku d'øon ja Moisés wyinaty ja kajp tø ttukmadø ja Dios kyutujk y'ana'amin, winets tnixajiyi'ñ tukmutsk øøxy ja ujts aay møøt ja tsajpts wet, jøts ttuktax'øky ja tsigini'jpy ja chiibi ni'jpy, midu nøø wyinaty møøt tø yik'adaamuky, xjats ttanixejtwidity ja kutujk nøky jøts niduki'iyi ja jaa'y nayide'en.

²⁰ Winets wyaañ: "Ya'at ni'jpy id'øon tyikmøjtøjkip ja Dios kyutujk midu mee tø myiktamidsøky."

²¹ Tyaniwä'jx id'øon ja Moisés ja ni'jpy nayide'en ja tsaptøjk, jøts tuki'iyi pøni ti jaty yiktundip, ku d'øon ja Dios ja t'atswinds'øgidi.

²² Jade'en id'øon kyutuky jøts ku ja ni'jpy tuki'iyi tyikwa'atst, kuts ja ni'jpy kya'ett ka'ats ja pøky yikmee'lxy.

Cristo y'ayo'ongøjx ja pøky wya'ach

²³ Paty id'øon chojki ja ni'jpy jøts wya'atst ja pikta'aky jap tsaptøjkjotpy, midu y'agojnax'ajtip ja tsajpjotpyit tsinaa'yin. Jawaani øy pyaat'atyiyi ja tsajpjotpit'ajtin ja winds'øgi, midu ja Cristo kø'øm tø ttuñ.

²⁴ Jøts ka'ap ja Cristo jam tyeety'ajty tsaptøjkjotp midu ya naxwiiñ ja jaa'y tø tkojti, jøts tsajpjotpit tsaptøjk ja' nugo y'awanax. Jamxi d'øon ja tymchajpjotp tø tyøki, ma adøm ja ixyam x'agø'dujkyim x'axajtuikyim Dios Teety wyingujkp.

²⁵ Tuk'ojkyi d'øon ja Jesucristo ja o'jkin tø tkupiky, ka'ap ja jade'en tø ttuñ sam ja jadu'ukpi teetywindsøndi midu d'øon y'ijty winjumøjt ja'ayi tmidøjkip ja ni'jpy jam tsaptøjkjotp jøts ni tkak'ømni'jpyi ja'adi.

²⁶ Ka'ats id'øon ja Jesucristo jeexyip nayide'en ttumi, tøts id'øon ja jeexyip may'ojk y'oo'kni kuyip cho'ondaajky ja naxwii'ñit, ka'ats ja jade'en tø ttuñ. Ixja tø kya'pxy, ixja tø tyiy ja et ja naxwii'ñit, tuk'ojk ja o'jkin ja ja'ayi tø tkupiky jøts ja pøky tuki'iyi xemikøjx tyikwa'atst.

²⁷ Nayide'en sami jaa'y niduki'iyi tuk'ojk y'oo'kti, jøts yiktiidyu'unditnim,

²⁸ nayide'ents ja Cristo tuk'ojkyi tø y'øøky, jøts may ja jaa'y tyikwaajtsit ja pyøky. Kuts id'øon wyinaty jadigojk ñanky'ejxpaadyiyi, ka'ap ja yikpøkwyatspi wyinaty y'ukmeni, ja' ja wyinaty ñimimpy pøn jaty ja awejx'ajtiyip.

10

¹ Ja jemgyutujk id'øon ja' y'aga'ax ja nugo kutujk midu ja Moisés yiktaan, paty id'øon ja kyamajada'aky nijuuni. Øy ja jiyujk ja namay tjayik'ookti winjumøjt, ka'ats ja pøky ja tyikwa'ach.

² Ku dø'øn ja jeexyip ja pøky tyikwa'ach, jøts ja øchinaa'yin jeexyip tyaky, tuk'ojkyits idø'øn ja jeexyip jade'en yjaty. Ka'axi ja jeexyip y'uknabyøkyja'winiyidi.

³ Kumi ka'ats ja yjade'eni pø ximija'myatstipxi ja pyøky ja'adi ku ja winjumøjt tjatundi ja windsø'jkin,

⁴ ja'agøjxpts ja jade'en yjatti ku ja pøky ni ja tsigini'jpy ni ja chiibi ni'jpy tkayikwa'ach nijuuni.

⁵ Paty idø'øn ja Jesucristo ja Dios Teety tnimaay ku ya myiñ naxwiññ:

Ka'ats xtsøky'aty jøts myiktawindsø'øgit ja jiyujk, patyxi øts tø xyikjaa'yjaty jøt øts ja ne'kx jøts øts ja ni'jpy tø xmø'øy.

⁶ Ka' myikjotkujk'aty ku ja jiyujk yjanitøøy, ni ja windsø'jkin midi jayiktump jøts ja pøky xmaa'kxt.

⁷ Winets ø nwaañ: "Ëxyam ø Dios Teety, jøts ø nbadu'unt pøni ti me nmi'ana'amwampy sa jap jaabyety nøkyijxy y'ity."

⁸ Ku dø'øn ja jawyeen tø tnigajpxy ku ja Dios Teety tkadajotkujk'aty ja windsø'jkin ku dø'øn ja jaa'y ja jiyujk tjayik'ookti, jøts ku tigati tjayiktøømyidi jøts ja pyøky wya'atstit sam idø'øn ja yjagutujkyi.

⁹ Winets ja nwindson'ajtim Jesucristo wyaañ: "Ëxyam ø Dios Teety, jøts ø nbadu'unt pøni ti mdsøjkpy." Yikudigøøpyts idø'øn ja nwindson'ajtim Jesucristo ja jawyeengutujk jøts ka kyø'øm windsø'jkin ttawinguwijch.

¹⁰ Tøts adøm idø'øn ja Dios xkunu'u'kxyim, pø tøxi ja nwindson'ajtim Jesucristo xemikøjxp tuk'ojkyi ja ñine'kx tkøyaky midi idø'øn ja Dios Teety tø tmø'øy adømgøjxp.

¹¹ Tum jade'ents ja israelit teety tundinim, nay ja jiyujk ja tyawindsø'jkidip ja Dios, øy ja pøky ja nijuuni tjagayikwa'ach.

¹² Tuk'ojkyits ja Jesucristo ja'ayi tø y'øøky jøts adøm ja nbøkwyaaajtsindit, jøts ja jam tø y'ixa'aky yikutujkpi, Dios Teety y'aga'ngyøj'øm.

¹³ Jamts ja y'awixy kunim ja myidsep yikpikta'akt tyekyji'py jøts ja ttekpya'an'att,

¹⁴ pø tøxi ja tu'ugyi ja wyindsø'øk'ajtin ttamajada'aky ku ja kø'øm tø ñadyagidøkiyi ja Dios Teety, jøts jade'en xemikøjxp tø tyik'awa'atspidsimy pøn jaty ja kunuu'kxin tø tmø'øy.

¹⁵ Jøts ja Dios Espiritu Santots ja kajpxy nayide'en tyiktuu'yø'øpy tyiktuu'wejtsp ku wya'añ yide'en:

¹⁶ Midi øts idø'øn yø jaa'y ndamidsojkip, ku dø'øn ja xøøw ja jumøjt tpaatt, yide'en øts idø'øn ja wyinaty nduñ.

Ndukja'gyukip øts ja ngutujk jøts øts ja nbiktaajkit y'anmija'wingøjxp.

¹⁷ Jøts yjaakwa'añ:

Ka'ap øts ja pyøky ja wyinaty n'ukja'myajtsniyi, ni ja kya'øy'ajtin.

¹⁸ Paty idø'øn nja'gyuka'ant yikxon pøni tø ja pøky xemikøjxp yikmee'kxy, ka'ats y'uktsojknayi jøts ja Dios Teety njaaktawindsø'jka'ant o ti jøts ja xpojkpimaa'kxint.

Møk ja Dios janchja'win nbiktaajkint

¹⁹ Paty migu'uktøjk idø'øn ka' tso'øgija'wi nwingunøjxindit ja Dios Teety jap tsajpjøtpy, pø tøxi ja nwindson'ajtim Jesucristo xkudsu'una'am xkudajxa'am.

²⁰ Ja'ayi tsojkip jøts adøm ja nwindson'ajtim Jesucristo ja yjemdyuu'nguyø'yint midi ttukpatp ja xemikøjxpit jujky'ajtin, jøts midi ja nwindson'ajtim Jesucristo tø awa'ats tyiktañ kyø'øm y'o'jkingøjxp.

21 Ja nwindson'ajtim Jesucristots adom idø'on nmøjteetywindson'ajtyimp jam tsajpjotp;

22 paty idø'on tu'ugyi ja n'anmija'win nbiktaajkint ku ja Dios Teety n'ajot'ajint, jøts tu'ugyi dø'on ja janchja'win amumjoojt nmøøt'ajint; pø tøxi ja xyikpøkwyaaajchim jøts adøm nga'uknabyøkyja'wiña'ant, tøts nayide'en ja nobajtin nøø xyikwaajchindi.

23 Yikxonimts idø'on ja n'aweixint midi ja Dios tø t'agajpxuky ku adøm ja kyutujk ja tø ngupijkyim. Pyadu'ump ja' ja y'ayuujk.

24 Ja' adøm idø'on n'ixa'ayimp sudso xem yam nnabyudøjka'ant jøts nna-chojka'ant.

25 Ka'ap adøm ja jaa'y chinaa'yin nyikmøjtøjka'ant pøn jaty kamendip ku nnamyujkyandi Dios ajot'ajtpi, nagyajpxjot'amøjkamp adøm idø'on ne'egi, ixa ja nwindson'ajtim Jesucristo wyingoni.

26 Ku adøm kø'ømsojkingøjxp ja Dios yja' n'ixmajtsint, ka'ats ja maa'kxujkin yikpaatt, jabi ka'axi ja abiky yiknitsokpi y'ukmenit.

27 Ja'ayits adøm njøp'ejxindip pøni jade'en adøm ndsinaa'yin, jøts ja Dios Teety ja myøktiidyu'unin nbaajint, jøts xemikøjxp ja tø'øyin xmø'øyindit midi dø'on pyaattip pøn ja Dios tmidsep'ajttip.

28 Pø nayide'enxi y'ijty yiktundi pøn tkamimadoodip ja Moisés y'ana'amin, ku namajtsk uk nidigøøk ja a'ejxnaxpi kyajpxti, kuwanits ja y'ijty y'øøky, niwine'en ja kyayik'ayo'ejxti.

29 Jawaani kajaats ja pyaat'atyidi ja ayo'on pøn jaty ja Dios U'nk nugo t'uktaa'nwidejtnidip, jøts ja y'o'jkin tka'ukmøjpiktaajkniiyidi midi tø yikpo-
jkipiwa'achidi, jøts nayide'en ja Dios Espiritu Santo tø t'ukmigajpxigøøñidi yam ja yjaba'ayøyidi. Pø ja y'o'jkinxi ja Cristo y'ejxa'amin'ajtpy ku dø'on ja Dios Teety chojkin tø tnigajpxy, midi tø yjayikpøkwyaa'achidi pøn ja ka'ukmøjpiktaajkniiyidip.

30 Pø nnija'wampxi ku ja Dios Teety tø wya'añ: "Øts xpaat'ajtp jøts øts ndagubattit ja pyøky; øts yø nmo'odip kija' ja y'ayo'on pøni wine'en yø pyaat'atyidi." Jøts nayide'en wyami: "Ndiidyu'ump øts ja ngajp."

31 Janch kawinmaañi dø'on ja y'ayo'on'ixy pøn ja Dios, pøn ja yikjujky'ajtpi tyukpatpy myøk'ajtingøjxp ja y'aki!

32 Kidi mee xja'dyigøy ku ja nwindson'ajtim yja' x'ejxidi jøts ja chinaa'yin xpadøjkidyøø, winets o sagasa xkujajtidøø ja mjanchja'win.

33 Jam mee niwinaagin pøn ja mayjaa'y m'ejxidi ku myikta'ojti jøts myik-
tatsee'kti ja mdsinaa'yin, jøts nayide'en xajotmay'oockti ja mmigu'ukti pøn o sagasa yiktundip.

34 M'ayo'ejx meets ja tsumyjaa'y, jøts mimadaajk meets ja jotkujk ku ja mbikta'aky tuki'iyi myikpøjkigyøxtøø, pø mnija'wipxi meets ku jam tsajpjotp jawaani y'øybi xpaattit midi xemikøjxp etp.

35 Wan ttuñi pøni ti tuujnip, awejx'et meets ja ejtp pøni ti ja nwindson'ajtim tø t'agajpxuky, myikmo'op meets ja kaja.

36 Tuda'aky ja Dios Teety y'ana'amin paduñ tsøky, jøts ja tyakt pøni ti ja tø t'agajpxuky.

37 Pø yide'enxi ja nøky wya'añ:

Jawaani jaak'awejx'etti,

tsojk ja mye'ent ja nwindson'ajtim pøn ja øy'ajtin xmø'øyimp.

38 Midi'lits øts idø'on ngupijky, janchja'wingøjxp idø'on t'awixy'aty ja øy'ajtin, pøni windsi'jkyts ja', ka'ats øts ja ndajotkujk'att.

39 Ka'ats adøm nwindsi'jkyjaa'yandi midi pojın yikmımajadaktip, tum ja'abixi adøm pøn ja janchja'win ttajujky'ajttip, jøts jade'en ja n'anmija'win xemikøjxp nyiknitsoojkindit.

11

Ti dø'øn janchja'win'ajtp

1 Ja' dø'øn janchja'win'ajtp ku amumjoojt tu'ugyi n'awejxınt pøni ti dø'øn yikmø'øymp jøts ku amumjoojt nmibøjkinnt midi nga'ijxyındip.

2 Ja yjanchja'win idø'øn ja ndeety'amøjtøjk yiktakaxajkti.

3 Ja janchja'win adøm xukmibøjkimp ku ja Dios ja tsajp ja naajx jøts tuki'iyi tø tyik'øyi y'ayuujkøjxp ja'ayi, jøts ja' midi ixyam n'ijxyındip ka'ap ja y'ity te.

4 Janchja'wingøjxp ja Abel øy ja Dios twindsø'jkøø, yam ja Caın kajade'en, paty ja Dios ja Abel tkupijky jøts ja'agøjxp ja wyindsø'jkin tkupøjki. Ots ja Abel tø yja'oo'kni, tø ja ejxpajtin ja xemikøjxp tyiktañ ku ja janchja'win ja tmøøt'ajty.

5 Janchja'wingøjxp ja Enoc yiktaniwawi ja xemikøjxpıt tsinaa'yin øy ja o'jkin ja tjagapaajty, jøts ja tka'ukpatnidi ku tja'ixaadyøø pø tøxi ja Dios ja wyınaty pyawa'anıyi. Yide'ents jap nøkyijxy wya'añ ku ja Dios ya naxwiin tyikjotkujk'ajty.

6 Janch tsepts jøts ja Dios nyikjotkujk'ajttint, pøni ka'ap ja janchja'win yikmøøt'aty, ja kuxi ja Dios yikpaatwa'añ, jawyeen idø'øn ja njanchja'want ku dø'øn ja jaa, jøts ku ja nayide'en tkunuu'kxy pøn jaty ja ixaajyiyip.

7 Janchja'wingøjxp idø'øn ja Noé ja Dios tmibijky, jøts tmimadøøy ku ja tyukmadooji pøni ti jaty idø'øn tunwajnip wyınaty, o dø'øn niti kyagaxi'ikñim, jøts ja barki tyik'ø'yiyi'ñ midi yiknitso'ogip wine'enin jam tyøjkjotp yjaa'y'atti. Ja yjanchja'win ja tyamøj'ajtt jøts ja ttuk'ijxy pøn jaty ja pøky ttunk'ajttip, jøts nay ja'agøjxp ja Dios tyaxonda'agyi.

8 Yjanchja'win ja Abraham yikmadooji, ku ja Dios ojts myigajpxyi jøts ja kyajp tmatstuupty, jøts tnidsø'øn ja naajx ja et midi ja Dios ttamidsojki, øy ja tjaganıjawi pøni ma dø'øn ñıjkyx.

9 Ja'agøjxp idø'øn ja Abraham chinaay jam etjotp midi dø'øn ja Dios ttaniwaadsojiyi ku janchja'win ja tmøøt'aty, jøts jabyøø'kxyin ja jam chinaay. O magama ja tyøjk tkojwidettøø sam ja tuu'yø'øbyidi. Jøts nayide'en ja y'u'nk Isaac møøt ja Jacob ttundøø, jabi nayide'enxi ja Dios ja tyamıgyu'ejxidøø ja naajx ja et.

10 Ja'agøjxp ja jade'en ttuun ja Abraham, ku tjøp'ijxy'aty ku tyukpaattit ja kajp midi ja Dios kø'øm yik'øyip yikpaadip, ja tsajpjotpit kajp midi tu'ugyi etp.

11 Nay ja janchja'win ojts ja Sara tyukmıbıkyi ku ja tu'uk ja y'u'nk tpaatt øy ja wyınaty tø yja'amøji kyıdakni. Pyaajtt idø'øn ja y'u'nk ja ja'agøjxp ku tjanchjaa'wıyi'ñ jade'en sa ja Dios ñımaajyøø.

12 Ots idø'øn ja ñıyaa'y Abraham yjadyımyøjaa'yini, ojts idø'øn tnıgojpkteety'aty janch namay ja naxwıi'ñıt jaa'y, ejxim maadsa', uk ejxim pu' mejy'agø'øm kyamachooni.

13 Tum oo'køjxtits yø jaa'y, ixa jade'en tø yikja'myatsti, jøts nika' ja ya naxwiin yikmøøgyıxy pøni ti jaty ja Dios wyınaty tø tni'adsowi; ttuk'ejxidits ja jagamyı ja yjanchja'win midi ja Dios yakwangıjıxy jøts jade'en ttaxondaktøø, jøts ja jade'en tnankñıja'widøø ku ja ya naxwiin nugo ñaxti.

14 Pønts jade'en ttundip, y'ixaadyıpnım idø'øn ja' tu'uk ja kajp ma tu'ugyi chinaa'ııdit.

15 Kuk ja ttajotmay'oo'knidi ja kyajp midu yiktandi, wimbejtitsik ja jadigojk nay jam.

16 Kumi ogyajpts ja jawaani ja chojktip midu dø'on jam tsajpjotp, paty ja Dios jam a'ejxi abaadi tyik'ity tu'uk ja kajp jøts ka'ap ja tyatsø'odyuñidi, kajpja'wiyidip ja'.

17 Nay ja janchja'win ja Abraham ja Dios ttukmimadooji ku myøkwinnmaa'ñ'ejxiyi jøts ja tyu'umts majnk y'amidoojiyi jøts ja Dios ja ttuktawin'oogit. Tø ja Abraham wyinaty tkupiky jøts ja tyu'umts majnk twindsø'jkin'att, o dø'on ja Dios kø'øm wyinaty tø ñii'mxyi:

18 "Yø Isaac mets idø'on myikmayiyip."

19 Ja'agøjxp idø'on ja Abraham jade'en ttuuñ ku ja twinmay ku ja Dios myø'ajtin myøji jøts tyikjujkyøkt ja oo'kpi jaa'y. Oo'kpi agujkpy idø'on ja Abraham ndejint ja y'u'nk wyimbijty jadigojk øy idø'on ja yjaga'øøky.

20 Janchja'wingøjxp ja Isaac t'agajpxuujky ja kunuu'kxin midu ja y'u'nk Jacob jøts ja Esau paadidip.

21 Jøts ku ja Jacob wyinaty y'ookwani, janchja'wingøjxp idø'on ja ttam'awa'anii'ñ jøts ja José y'u'nk y'una'jk tpaattit ja kunuu'kxin. Xjats ojts winda'aky t'ajot'aty ja Dios jøts ja tyajk ojts ñadyagudijiyi.

22 Janchja'win ja José yikwajni, kuk ja israelit jaa'y pyidsø'ømdit Egipto y'etjotp, jøts tni'ana'ami sudso ja pyajk yiktu'unt.

23 Janchja'wingøjxpts ja Moisés ja tyeety tyaak yu'uch yik'ejttø tigøøk po'; ja'agøjxp ku t'ejxti ku ja janch tsuj jøts ka'ap tsø'jkidyøø ja windsøn kyutujk pøn wyinaty tø ñimy jøts ku tuki'iyi ja mutskuna'jk y'ooktit.

24 Jøts nay ja janchja'win ja Moisés kaduktsojki jøts ja Egipto windsøn ñøøx ja taak tejt ku wyinaty tø yaa'dyøjkjatni.

25 Nugo ku ja nayide'en tkupiky pøni sa jaty ja myigu'uk israelit jaa'y yiktundi, jøts ka'ap ne'egi nugo ttaxøøñ ja naxwiiñ'ajtin midu naxp midu tigøøpy.

26 Jade'en ja wyinmaa'y ku ne'egi jawaani øy jøts ja Cristo o sagasa tmijatt, midu dø'on yiknigajpx me'emp, ka'ap ja tmøjpktaajky pøni wine'enin jam ja meeñ jøts ja pikta'aky Egipto; ja' y'awijxpy midu ja Dios mo'ojip.

27 Ja janchja'win ja Moisés yiktsoo'nøø jam Egipto etjotp, ka'ap tsø'jkii'ñ ja windsøn y'aki, nugo ku ja tpadunguixy ja y'øwyinmaa'ñ ejximdam ja Dios ja jeexyip tyimy'ixy.

28 Janchja'wingøjxp ja Moisés tyiktso'onða'aky ja paski xøøw ku tyikutujky jøts ja israelit jaa'y ja ni'jpy ttawinja'adit ja tyøjk'agaj, jøts ja yjagyoobi majnk ka'ap ja Dios Teety y'ankilis yik'oogidit sam ja Egipto jaa'y yjajttøø.

29 Janchja'wingøjxpts ja israelit jaa'y ttanaxti ja Tsajpts Mejy ejxim jaa'y yø'øy tø'øts naxkøjxp; kuts ja egiptit jaa'y nayide'en tjatunwandøø winets ja ñøøø'kxti niduki'iyi.

30 Janchja'wingøjxpts ojts ja Jericó kajp ja ñawaap kyidaagijxy, ku ja israelit jaa'y wixujk xøøw ja kajp tni'awidejttøø.

31 Jøts nayi janchja'wingøjxp ja Rahab, ja ka'ødyø'øxyøjk, ojts møøt kya'øøky pøn tkamimadoodip ja myigugajp, ku ja wyinaty øy tsuj tø twindsø'øgi ja israelit jaa'y pøn kajtpøjkidi ejxpi koobi.

32 ¿Ti jaty ø njaakmadya'akp? Ka'ap ja et ja xøøw ñibaadi ku ø nnimadyaktøkit ja Gedeón, ja Barac, ja Sansón, ja Jefe, ja David, ja Samuel jøts ja jaa'dyi midu y'ijty ja Dios y'aaw y'ayuujk'ajtpy ku ti tnigajpxwa'añ.

³³ Janchja'wingøjxp idø'øn yø tø tmimajada'akti ja wenk kajp, jøts tiy øy tø kyudunk'atti jøts ja Dios ja pyudøjkin tø tpaatti sa ja wyinaty tø tni'adsowi. Ja møj kaa jadi'iñi tø t'apanmujkidi ja y'apajk,

³⁴ jøts ja møj jøøn nayide'en tø tmimajada'akti, jøts tsujx kumy tø kya'ookti. Jøts tø yjotmøkpøkti pøn kajotmøkti, jøts ja y'awa'ambi midsep tø tmimajada'akti.

³⁵ Jam idø'øn ja tø'øxyøk pøn janchja'wingøjxp ja ñiyaa'y tø t'ejxpaatti jadigojk jujky.

Mayts y'oo'kmidi ayo'on agujkp, jade'en idø'øn ja ne'egi ttsoktøø jøts ka'ap ja Dios yja' t'ixmajtsidøø ja'agøjxp ku ja t'aweix'atti ja jujky'ajtin xemikøjxp.

³⁶ Jøts may nayide'en yikxon tø yiktaxe'ekti jøts tø yikwopti, jøts ja pu-xkuwøøn tø yikpitaajkidi jøts tø yiktsumdi.

³⁷ Jøts nayide'en tø tsaaga'ach y'oo'kmidi, uk tapoodits, jøts tø yikmøjwinmaa'ñ'ejxti, jøts tsujxkøjxp tø y'oo'kmidi; jøts ja borreegi'ak jøts ja chiibi'ak yik'ayowim tmiwidejtøø, o sagasa ja ayo'on tpaattøø.

³⁸ Ja'abi jaa'y idø'øn tø wyidetti abak etjotp, kojpkøjxp, jøts tsaā ankjötpy, tsaā jutjötpy. Niwine'en ja naxwiñ'ñit jaa'y ja'abi jaa'y kyapaat'atyi.

³⁹ Ots idø'øn yø øy tsuj tø yik'ejxti yikpaatti ku janch møj ja yjanchja'win, ka'ap yø ti tø yikmo'odi pøni ti dø'øn ja Dios tø t'uknigajpxy;

⁴⁰ pø tøxi ja ttanibiktaagi kø'øm jawaani øy jøts ja y'øbyidsø'ømdit adøm møøt.

12

Ja Jesús adøm n'ejxpajt'ajtimp

¹ Janch mayts adøm ja jaa'y ñnija'wa'andi pøn jaty ja janchja'win tø tmøø't'atti jøts ja tø tnankñigaxi'igyidi. Wants adøm tmajtstuujtna'am tuki'iyi pøni ti jaty xyikjotkøjximp, jøts ja pøky nayide'en nmajtstuujtint midi yjawi xyikpak'amujkna'amp, jøts yikxon njaakpadungojñdit tuda'aky ja øchinaa'yin.

² Ja Jesús adøm n'ejxpajt'ajtimp pøn ja janchja'win tyajkp jøts pøn nayide'en tjaakyik'øyip jøts tjaakyiksujip. Tø ja Jesús jam kruskøjxp y'øøky, ots ja yjatsø'dyufñ, ja'abi o'jkin ka'ap ja tø tmøjpikta'aky, pø ñija'wipxi ja' ku ja ayo'on ja ttanaxt jøts ja tpaatt ja jotkujk'ajtin ja xondaajkin; jøts ja tø y'ixa'aky yikutujkp møøt ja Dios Teety jam y'aga'ngyøjø'øm.

³ Paty mee kidi mjotkixy ni mga'amutskidit, ja Jesús meets ja'myats jøts ja xni'ejxu'uttit ku pojkpitumbi kyøjø'øm kawinø'øn tø y'ayo'ombaaty.

⁴ Ka'aním meets ja pøky xmøøtseptuñ jøts xkudaxit.

⁵ ¿Uk tø meets idø'øn ja xja'dyigøøñi sa adøm Dios Teety y'u'ngin xja'ane'emyindi? Pø yide'enxi ja jaabyety nøkyijxpy:

U'nk, kupøk ja ayo'on midí ndaniguejxpy jøts mdsinaa'yin xyiktigatst, jøts kidi x'ayooji ku me n'ojt.

⁶ Pø tum ja'axi øts ja chinaa'yin tigach ndamidsøjky pøn jaty ø ndsøjky, jøts ja ayo'on nmø'øy pøn jaty n'u'nk'ajtpy.

⁷ Midani meets idø'øn ja ayo'on, pø ja'agøjxpxi meets ja Dios ja mmø'øyi ku y'u'nk y'una'jkin mdsøkyidi. ¿Uk jaa dø'øn ja jaa'y pøn nijuuni ja tyety tø kyakajpxwijyi?

⁸ Pøni ka'ats meets ja Dios mgajpxwijyi sami dø'øn ja y'unck y'una'jk ja ttamidsøjky, mga'u'nktejptis meets idø'øn ja', wenk u'nk meets ja mdiijyi.

⁹ Nayide'enxi mutskyi ja ndeety ndaak tø xkajpxwijyindi, jøts adøm ja y'ijty øy tsuj nmigajpxyindi, yayits ja y'ana'amin ja yjatundi naxwiñ. ¿Sudsots adøm

idø'on ja Dios Teety mididi jam tsajpjotp ngagupøjkint ja kyajpxwejin? Pø ja jujky'ajtinxi adøm ja xukpaatwa'animp.

¹⁰ Ja'ayi adøm ja ndeety ndaak xakajpxwejindip põni sudso dø'on ja tja'gyukidi ku ja tsinaa'yin tyiyi ya naxwiin; kuts ja Dios x'ane'emyindi, tiyts ja y'ane'emy, jøts ja' ja xani'ana'amindip sudso ja wa'ats'ajtin nbaajint nayide'en sam ja'.

¹¹ Nipøn ja ayo'on tjanchjagatsøky ku ja yikpaaty, janch møk ja yikjawi; põnts ja ayo'on põnts ja kastigi tpattip, ku wyejti kyajti, ja'ats idø'on ja chinaa'yin tiy tsuj tyikyø'odyip, ka' ti, ka' sa, ka'ap ja tsep.

Ja ayo'on ku ja Dios kyajpxy kyayikmimadø

¹² Yikmøkpøkti mgø' mdeky põni tø ja y'anuu'kxyinidi.

¹³ Ixa'adi ja tiy'ajtindi jøts ja mmigu'uk põn ja yjanchja'win kamøktinim mba'ejxyidit jøts ja kyatuu'tigø'odyit, jøts ja jade'en ne'egi yjotmøkpøktit.

¹⁴ Øy tsujim ja mdsinaa'yin xyikyø'odyit, tuda'aky ja jaa'y niduki'iyi møøt mdsønidit; ku wyinatya jade'en mgajaa'y'atti sudsots ja Dios x'ejxtit, pø ka'axi jadi'iini nugo ñiyik'ixy ñiyikpaaty.

¹⁵ Yikxonim wanidi, ejxim xka'ukpatnidi ja kyunuu'kxin mididi ja Dios pya'ayo'ajtingøjxp mmo'owajnidip, øy ja jade'en tø yja'ukwa'an ku ja mbudøkiyidit; kidim ta'am ujtsin mnabyikta'agyidi mididi pa'amdump jøts ni xkayiktsokmi ja mmigu'uk.

¹⁶ Kidi nugo mnamyøø'tatyidi põni ka'adam ja xniyaa'yidi xnidø'øxyidi, tum ja Dios yja' ne'egi mjotmay'attip; kidi Esaújin xundi põn nugo y'u'nk ttaguyajt ja yjagyobi, tuktexy ja tokx ja'ayi ttagugøøy.

¹⁷ Mnijawidipxi ja nayide'en ku ja Esaú ja tyeety kya'ukmøø'ñiyi ja kunuu'kxin ku ja tja'uk'amidoona; øy ja wyinmaa'ñ ja tja'uktayaaxnaa ni sudso ja kya'ukyikmøø'ña ja kunuu'kxin.

¹⁸ Ka'animp meets idø'on ja Dios myø'ajtin nayide'en xpaajti sam adøm ndeety'amøj t'ejxti ku ja kojpk Sinaí ñitøøwyidity. Ni ja xaachkoots meets xka'ixxiim ma ja anaaw ja widsuk adsø'jkibim wyidity,

¹⁹ jøts nayide'en ka' xmadowdinim ja pujxujx mididi yjawi xyiknajtimp ku ja nmado'owint, jøts nika' ja ayuujk tø xmadowdinim janch møk mididi dø'on kyamidanaadyi ja jaa'y jøts yjanuu'kxaknidi, jøts jade'en jya'ukyikmigajpxnidit.

²⁰ Ja'agøjxp idø'on ja jade'en ku ja adsø'jkibim ja kutujk yikmøødyi mididi wamp: "Pøni põn yø kojpk tyømpy pyatpy yika'tspa'ookp inet ja', uk yikumba'ookp øyi yjajiyujki."

²¹ Janch adsø'jkibim idø'on ja t'ejxti tuki'iyi, ja sa Moisés paat kø'øm wyaan: "Xjanchyikmibejpnip øts ya'at et."

²² Ka'ats meets, ja Dios kyunuu'kxy'et jade'en tø xpaatti, jabi jotkujkxi meets ja Dios ja yikujky'ajtpi y'ø'y'ajtin tø x'ejxi møøt ja y'ankilis kamachooni

²³ põn ja Dios twin'øøgunajxtip. Tøts nayide'en xpaatti põn ja Cristo tø tjanchja'wimiyidi põn ja ñits'ok'ajtin abaadi awejxnidip. Ja Dios meets idø'on tø xwingunøjkxidi mididi dø'on niduki'iyi ttiðyungøxp, jøts ja øyjaa'y'oo'kpi y'anmija'win mididi ja Dios jam møøt chinaañidi, nayide'en meets ja møøt ja winmaa'ñ xyikyø'øñidi.

²⁴ Jøts ja Jesús tø xpatmididi põn jam Dios Teety wyingujkp xkugajpxindip põn ja ñi'jpy xnitanaa'yindip. Ka' xukpøky'ajtyim ja y'o'jkin, ja maa'kxujkin ja ne'egi yajkpy jøts ka'ap ja Abel y'o'jkin jade'en.

²⁵ Paty idø'on yikxon x'ejxtit jøts ja kyajpxy y'ayuujk xku'oojkidit, pø kuwanixi ja y'ayo'ombaatti põn jaty ja Dios kyugajpxy tkamimadoodøø.

Jawaani kajaats adøm xpaat'ajntint ja ayo'on, põni ka'ap adøm ja Dios kyajpxy nmadooja'am ku adøm ja tsajpjotp kø'øm xjamigajpxyim.

²⁶ Ojts idø'on ja møk ujx ñajxy ku ja Dios kyajpxy jam Sinaí kojpkøjxp. Yide'en ixyam ja y'ayuujk wya'añ jadigojk: "Ku øts wyinaty jadigojk ja ujx nyikmiñ ka'ap ja naajx ja'ayi y'adø'øst, nayide'enxi ja tsajp y'adøtsmit."

²⁷ Ku dø'on ja Dios wya'añ ku tyik'adø'østst ja'ayi jadigojk tuki'iyi, ja' idø'on ja tyijpy ku ja tuki'iyi tyikudigø'øty midi jaty jawyeen tø tyik'øyi. Ka'ats ja sa yjattit midi xemikøjxp ja chinaa'yin tø yiktanibiktaagi.

²⁸ Ja'abi øy'ajntints adøm idø'on ja Dios tø xamidsøjyim, ka'ats idø'on ja nijuuni sa yjatt, xemikøjxp idø'on ja y'ett. Paty adøm ja Dios ngajxajkint, jøts øy tsuj nwindso'jka'ant põni sa dø'on ja pyaat'aty jøts põni sa dø'on ja tso'ky;

²⁹ pø ja' kuxi adøm ja nDios jade'en yikwindigøy sami jøon.

13

Sudso tsinaa'yingøjxp ja Dios nwindso'jka'ant

¹ Kidim xja'dyigøydi, ejtpim mnachokidit xem yam Cristo køjxp.

² Kidim xja'dyigøydi, jøts ejtp xtøjkmo'odit põn jaty mdøjkotp ja'ttip, pø mayxi jade'en tø yjatti ku ja jabyøø'kxy ja tyikpoo'kxti, ja Diostam idø'on ja y'ankilis ja yikpoo'kxtip øy ja tjaganijawidi.

³ Nayide'en ja tsumyjaa'y xja'myatstt ejximdam meets jeexyip mdsumyi. Ja'myatsti põn jaty ja chinaa'yin tø tkuwanjatidi jabi mnija'widipxi põni sa dø'on ja'abi ayo'on.

⁴ Yikxonim x'ejx'ettit m'amajstk'ajntin jøts øy tsuj mnamyøøt'atidit, tyidyumpy ja Dios ja wyinaty põn jaty namyøøt'atidip jadi'iñi yam ja tkaniyaa'yi uk tkanidø'øxyi.

⁵ Kidi ja meeñ ni ja pikta'aky nugo mganadyapikmyo'ojidit; tajotkujk'atti põni ti jam mmøøt'ajttip pø tøxi ja Dios wya'añ: "Nijuuni me ngaja'dyigø'øty, ni nga'ixmatst."

⁶ Paty adøm nwa'anint jotkujk:

"Ja ndeety'ajntim øts idø'on xpudøjkip, ka'ap øts ja ndso'øgit põni sa xunwa'añ tu'uk ja jaa'y."

⁷ Kidi xja'dyigøydi põn jaty tø mgajpxwijyidi jøts ja Dios y'ayuujk tø mdukmadøyidi; pawinmaydi sa ja chinaa'yin tø tyikøxti tyikubatti, jøts tundi jade'en sa ja yjanhja'win ja'adi.

⁸ Tu'ugyi dø'on ja Jesucristo y'ity, nay ja' jekyip, nay ja'ats ixyam, nay ja'ats wyinaty xemikøjxp ejtp.

⁹ Paty idø'on xkamibøktit põni ti jaty abiky jøts tigach mjayiktukmadoodip. Dios y'øy'ajntingøjpxxi ja anmija'win y'øy'aty jøts ka'ap ja ja'agøjxp ku yikpaduñ sudso kya'pxy ja ka'ayin ja uujkin, jabi nijuunixi ya'atpi tsinaa'yin ja øy'ajntin tø tyukpaadyidi põn jaty ja øy tjanchjabadundip.

¹⁰ Jawaani øy adøm nwindso'jkin jøts ka' mibaat twindsø'jkin'attit ja mõjteetywindsøndi põn ja mõjaa'gyutujk tyiktundipnim.

¹¹ Ku ja mõjteetywindsøn tyoxti ja jiyujk ni'jpy Amaagyunuu'kxy Tøjkjotp jøts ja pøky wya'atst, kajp pa'am ja jiyujk nine'kx ja tyiknøjkxti jøts ja jam tyiknitødyi.

¹² Nayide'ents idø'on ja Cristo kø'øm y'ø'jky kajp pa'am jøts ja na'xwii'ñit jaa'y ttagunuu'kxy ja kyø'øm ni'jpy.

¹³ Wants t'ixmajtsnandi ja mõjaa'gyutujk jøts ja Cristo n'anøjkxandit, øy ja sa njaguwanjajtandi sam ja yjajty.

14 Pø ka'axi adøm ya naxwiiñ ja tsinaa'yin xemikøjxp nmøøt'ajtyindi, n'ixa'ayindipnimxi adøm ja' midi dø'øn me'empnim ja'atpnim.

15 Ja Jesucristo adøm ja y'o'jkin xpudøjka'amp jøts ja Dios Teety ejtp nyikjotkujk'ajtint ku ja kyø'øm U'nk ja ndawindsø'jka'ant; jøts nayide'en ja Dios ja n'aaw ja n'ayuuik ndadaxondaajkint.

16 Jøts kidi xja'dyigøydi ku ja Dios nayide'en twindsø'jkinjawi ku ja mbikta'aky xem yam mnadyabudøkiyidi.

17 Mimadowdi pøn jaty mgajpxwejidip; pø ja'axi dø'øn m'anmija'win t'eix'ejtipp jøts ñija'widip ja' ku ja Dios ja wyinaty nay ja' tyamachidi. Pudøkidi jøts jotkujk mmøøtunidit, kidi ayowim xundi, pø ni meetsxi wyinaty jotkujk mgatsøøni.

18 Ni'amido'ojik øøts, nibøktso'owik øøts, nitiixi ngapøkyjawi jøts jade'en øøts ja ndsojkin wya'añ ku ja n'anmija'win wa'ats jade'eñim y'ett.

19 Tundi may'ajt jøts øts jawaani møk xni'amidoowidit jøts wyinaty nnabyaatkojma'andi tsojk.

Yikyajkp ja kunuu'kxin jøts ja kajpxpoo'kxin

20-21 Ja Dios Teety, pøn ja øy'ajtin tyajkp, ja' mgunuu'kxidip mguwa'anidip, jøts nwindson'ajtim ja y'o'jkin mdabudøkiyidit jøts øy tsuj mdsøønidit mdanidit jøts ndungøjxindit pøni ti tø xamidsøjkyim. Mutsk borreegi u'ngin adøm idø'øn ja nwindson'ajtim Jesucristo x'eix'ijtyindi pøn ja ñi'jpy tø tyaky jøts ja Dios Teety kyajpxy tø tyik'adujki, pøn adøm idø'øn xkøjø'ømit'ajtimp, øy ja ti xmø'øyint pøni ti jaty ja xamidsojkimp. Øy'ajtin agujkp ja Cristo xemikøjxp y'ett. Jade'en idø'øn ja y'ejxi.

22 Migu'uktøjkti, tuda'aky waani ya'at nøky xpa'ejxtit jøts xja'gyukidit ti dø'øn nda'ana'amdip. Winmadowdi waani ya'at ayuuik, øy idø'øn yø wine'en kyidyimgyajaaji.

23 Nijawidi ku adøm nmigu'uk Timoteo tø pyuxøjtkøjkpidsimy; pøni nabyaajtip øø pojin, nmøøtnøjkxp øts ja wyinaty.

24 Kajpxpoo'kxti pøn jaty m'ana'amidip jøts niduki'iyi ja janchja'wibitøjkti. Nayide'en mguejxyidi ja kajpxpoo'kxin ja Italiit jaa'y.

25 Mbaattip ja Dios kyunuu'kxin niwine'enin jam mdsøøni. Jade'en idø'øn ja yjatt.

JA NØKY MIDI JA SANTIAGO YJAAY

Ku ja Santiago tnijayi ja israelit jaa'y pøn tø ñawyq'kxniyidi

¹ Santiago'ajtp øts. Øts ja Dios Teety, øts ja nwindson'ajtim Jesucristo nmidumpy. Ixyam mee nnijayi jøts øts ngajpxpøø'kxy niðuki'iyi ja israelit jaa'y pøn jaty tø choondi ya jøts tø ñøjkxti tsinaabyi abiky tsoo.

Ja wijy'ajtin ja nija'win midi ja Dios yajkpy

² Meets migu'uktøjk, mbaat'ajtip meets ka' ti xkumayjawidit øy yjadyimyiñ o midi ayo'on.

³ Nnija'windipts ku ja ayo'on ja myiñ, jade'ents ja Dios x'eixint xnija'wint ku tu'ugyi ja nwinmaa'ñ nyik'ijtyindi, kuts ja Dios amumjoojt njanchja'windit jøts jade'en'ampy ja øy'ajtin ja tuda'aky'ajtin njagyajpindit.

⁴ Øy ka'pxy yikxon mwinma'adyit, winets nayide'en yikxon mwimbidsøømxiiyidit ja m'øwynmaa'ñ jøts xjagyaptit ja ja'gyukin, kidi mwa'andi jøts ku ti mga'ijtxyidi.

⁵ Jøts pøni jats meets winaagin pøn ka'ejtxidip ja wijy'ajtin, ja ja'gyukin, amidowdits ja Dios jøts ja mmo'ojidit, pø ja'axi tuki'iyi tyajkøjxp, ka'ap ja ti t'amā'at'aty jøts ka'ap ja ti tyamigajpxy.

⁶ Ja'ats idø'on tsojkip jøts tu'uk amumjoojt n'amido'owint, ka' nwinmaa'yint majtsk aaw majtsk joojt.

⁷ Pøni pøn jade'en winmaapy, ka'ap ja Dios ja ti y'ukmøø'ñiyit,

⁸ Ja'agøjxp ku ixyam ti t'uktsøky jøts jabom ja wyinmaa'ñ tyiktigatskojmi, ka' tu'ugyi ja wyinmaa'ñ tyik'ity.

⁹ Jøts pøni pønts ayoop winmaapy, pøn tpaduujnidip ja Dios yja', jotkujk idø'on t'ejxnidit, tyaxonda'aktip idø'on ku Dios nøjkk wyaadso'oniyidi jøts ja yiknitso'ok'atidit.

¹⁰ Jøts nayide'en pøni jam pøn kumeeñ'ajtp jøts pøni pyaduujnidip ja Dios yja', jotkujk idø'on ja ñayjawiyidit øy myeeñ ja yjagayiktamø'ejxti. Jabi yiknitso'ogidipts ja Dios ja' ku wyinaty twingunøjkxiñidi.

¹¹ Tigøøpy ja kumeeñ jaa'y ja myeeñ ku ayo'on myiñ. Nayide'en ñamyayi jyaty sam ja ujts pijy u'ngin jyaty ku ja xøøw cha'ayiyi jøts ja tyøtskojxni ja pyijy.

Ku ja ka'øybi x'amutsk'ejxwā'añindi

¹² Janch jotkujk meets ku tuda'aky mjaa'y'atti øy ja ayo'on xjapaatti; ku jade'en mmajada'akti, winets ja mmø'øyidi ja Dios ja jujky'ajtin midi xemikøjxp, midi ja Dios mdamidsojkiyidip, jade'en'ampy ku ja Dios xtsojkti.

¹³ Ku pøn ñayjawiyi ka'øybi ttunwa'añ, kyø'øm winmaa'ñ ja yiktump, ka'ap ja Dios yø'øbi winmaa'ñ tyaky; ka'axi ja Dios twinmaa'ñ'aty jøts ja axøøkpi yiktu'unt, jøts nipøn ja jade'en tkawinmaa'nmyø'øy jøts ja jade'en ttu'unt.

¹⁴ Ku pøn jade'en ttunwa'añ ja ka'øybi, kyø'øm winmaa'ñ, kyø'øm tsojkin ja jade'en pyadundip.

¹⁵ Yø'øbi ka'øwynmaa'ñ, pøky yø'; jøts ku ja pøky yikmøøt'aty, ja o'jkin tigø'øyin ja yajkpy.

¹⁶ Migu'uktøjk, kidi mnawyin'iiñidi;

¹⁷ tuki'iyi ja øybi tsujpi midi nmøøt'ajtyindip, Dios yø tyajkp, tøxi ja tpikta'aky ja jaj ja tøø'kx jam tsajpwemp. Tu'ugyi ja', ka'ap ja tyigach.

18 Tø ja Dios xmø'øyim ja øy'ajtjn midj xemikøjxp ku njanchja'wa'am ja kyajpxy ja y'ayuujk, ja tiibyj ja janchpi, ja'agøjxp ja jade'en ttuñ jøts adøm nyiktso'ondak'okwa'anint pøn ja pyabøjkpi'ajttip, sam ja ttamidsøkyin.

Sa yikpaduñ ja Dios yjanchja'win

19 Paty, migu'uktøjk, njaaknigajpxy jøts tuda'aky mjaay'attit. Yikxon xmadow'ettit ja mmigu'uk sa wya'añ, kidi mnay'øøjyidi, jøts kidi mmigu'uk xmi'ambøkti.

20 Nisudso'ampy idø'øn ja Dios xkadajotkuj'ajtyindi ku ja nmigu'uk nmijot'ambijkyindi.

21 Paty mastu'utti tuki'iyi midj ka'øy, ja ka'øwyinmaa'n jøts ja ka'ødyunk. Møj pikta'akti yikxon ja Dios kyajpxy midj tø myiktukmadøwdi; pø yø'øxi tyanitso'ok'attip ja n'anmija'windi.

22 Padundi dø'øn pøni sa jaty ja Dios kyajpxy wya'añ, kidi ja'ayi nugo xmadøwdi. Nawyin'øø'nindip nugo ku ka'nbadu'unint.

23 Pøni pøn jade'en adøtsp, jade'en ja ñamyayi n'ukpiktaajkint ejxim ja jaa'y pøn tku'ejxip ja wyeen ja y'aaw jap ejxjøtpy

24 jøts ku ka' wya'adsi. Ku ñijxxy, ka' tjä'myech jøts wyimbujt.

25 Jotkujk idø'øn ja ñayjawi'yidit pøn ja Dios kyutujk tpaduujnidip midj xyik'awa'atspidsø'ømimp, ka'ap ja ja'ayi nugo tpatmadøw.

26 Pøni mwandip jøts ja Dios yja' xpaduujnidit, jøts nay jaty ja mdoojts nugo xyik'awidetti yam nadyijyi ja Dios yja' xpaduujnidi, jade'ents nugo mnawyin'iñidi jøts ka' x'ukpaduunidi jade'en.

27 Ja' ja Dios Teety kyupijky ku nbudøjka'ant ja ku'øky'u'nk jøts ja ku'økyø'øxy pøn ayoodip, jøts nayide'en ka' nugo nbøkyu'unint yä naxwiñ.

2

Ka'ap pøn ñay'øy'ejxidit kyanay'øy'ejxidit wan tjaþøni

1 Meets migu'uktøjkti, pøn jaty tjanchja'widip ja nwindson'ajtim Jesucristo ku ja wa'adsi ku ja myøji, kidi meets pøn x'øy'ejxti xka'øy'ejxti wan tjaþøni.

2 N'ukpiktaajkimp tu'uk ja madya'aky, pøni tøjkidip ja jaa'y jap ma meets mnamyukyidi, tu'uk kumeeñ jaa'y janch xyøxy janch wyeti janch ñaamyi, jøts jadu'uk ayooi jaa'y nipach ixpach,

3 jøts ku ja'ayi øy tsuj xkajpxpoo'kxti, ja' pøn janch kumeeñ pøn janch xyøxy, jøts ja øybi tsinaabyajt xmo'odi, jøts ja ayooi xkamøjpikta'akti jade'en xnøjmidi jøts wan ttani uk najxkijxy chøønit,

4 pø yide'en'ampxyi yik'ixy yiknijawi ku tu'uk x'øyjawi jøts jadu'uk xka'øyjawi. Ka'ap jade'en'yøyi, mbøkyundip jade'en.

5 Ukmadøwdi, migu'uktøjk, jøts ja'gyukidi ya'at: Ja ayooi jaa'y pøn ejttip ya naxwiñ, ja' idø'øn ja Dios Teety tø wyi'ijxyidi jøts ja tjanchjawidit ja Dios yja' jøts yikmo'odit ja y'øy'ajtjn midj ja Dios ja yjaa'y tyanitanaapy, pø tøxi ja ttamidsøky jøts ja tmo'ot pøn tsojkijyp.

6 Jøts meets, jade'en meets ja ayooi jaa'y nugo xtsø'ødyundi ku xkamøj'ejxti. Nayide'en meets ja kumeeñ jaa'y mjatu'umiyidi ku myikni'øø'nidi jam kudunk wyindump.

7 Yø' nayide'en tka'ødyejtjip tka'øñimadyaktjip ja nwindson'ajtim Jesus pøn adøm xyiknitso'ok'ajttindip.

8 M'øy'adøtsp meets wyinaty pøni mbadundip ja Dios Teety y'ana'amin midj yide'en wamp: "Tsok ja mmigu'uktøjk, windsø'øgi ja mmigu'uktøjk,

jade'en xtsokt jøts jade'en xwindsø'ogit sã kø'øm mnachøkyi jøts sã kø'øm mnawyindsø'ogiyi."

⁹ Pøni jamts meets ja mmigu'uktøjk x'øy'ejxti xka'øy'ejxti wan tjàpøni, mbøktuyndipts idø'øn jade'en, ka'ap ja Dios y'ana'amin jade'en xpaduujnidi.

¹⁰ Øy ja Dios kyutujk ka'pxy njabadunwã'ãñindi jøts jam tu'uk y'ana'amin kyayikpaduñ, pøktuy'unindipts adøm idø'øn ku ka' ka'pxy yikpaduñ.

¹¹ Nay ja' midì tyikutujk, jøts yide'en ñiimy: "Kidi mmigu'uk ñiyaa'y ñidø'øxy xpøjkxi", nay ya'at tyikutujkmaa jøts: "Kidi myikjaa'y'øøky." Øy pøn ja myigu'uk ñidø'øxy ja tjagapøjkxi jøts ja ne'egi yikjaa'y'øøky, pøktuympst ja jade'en ku ja Dios yja' ka'pxy tø tkabaduujni.

¹² Øy yikxon ngajpxint ndu'unint sam ja Dios ttsøky, jabi nay ja'abi kutujkxi xidyu'unimp midì ja nitso'ok'ajtin nayide'en tyajpk.

¹³ Pøni pønts ja myigu'uk tø tka'ayo'ixy, nayide'ents ja Dios ja nøjkx ka'ayo'ijxyim tyiidyuñiyi; pønts ja myigu'uk t'ayo'ejxp, pyaatpts ja' ja øy'ajtin ku ja tiidyu'unin ñaxt.

Ja janchja'win jøts ja ødyu'unin

¹⁴ Migu'uktøjkti, çti ja ñiwyã'ant ku ja'ayi nwa'ãñim ku ja Dios njanchja'wa'am jøts nika'ap ja øybi n'ukpadu'una'am? Ka'ap jade'en ja nitso'ok'ajtin nbaajtin.

¹⁵ Ku n'ukpiktaajkint ku tu'uk nmigu'uk ti kya'ijtxyi ejxim ja kyaaky ja wyet,

¹⁶ jøts nnimaa'yint: "Mbaatp ja mwet ja mnaamy ja mji'ikxy", jøts ka' ti nmø'øyint pøni ti yjatsøjkpy. çTi ja ñiwyã'ant jade'en?

¹⁷ Ku ja Dios njanchja'wa'am jøts nika'ap ja nmigu'uk n'ukpudøjkina'am, ka'ap ja janchja'win jade'en tyuñ.

¹⁸ Jamts pøn jawamp: "Mets ja Dios mjanchja'wip, jøts ka'ap ja mmigu'uk xpudøki; jøts øts, øy øts ja Dios ngajanchjawì, nbudøjkip øts ja nmigu'uk." Jade'en'ampyts idø'øn ja janchja'win yik'ixy yiknijawi ku nbudøjka'am ja nmigu'uk, kuts ja nmigu'uk ngabudøjka'ant nisudso'ampyts ja Dios jade'en ngajanchja'wa'andi.

¹⁹ Mjanchja'widip meets ku jaa tu'uk ja Dios, øyi jade'en; nayide'enxi ja miku' tjanchjawì ku jaa ja Dios, kyudsø'jkips ja'.

²⁰ Kidi nugo mgujuun'aty, çka' xnijawi ku ja njanchja'win jade'en wyingaxi'iky ku ja nmigu'uk nbudøjka'ant?

²¹ Jade'en'ampy ja n'apteety'amøj Abraham ja Dios kyupøjki ku ja tpaduun sam ja Dios ttsøkyin jøts ja y'u'nk Isaac ttamiyoxt.

²² Ja'gyukidi meets jade'en jøts ku ja Abraham jade'en tnanky'ijxyi ja yjanchja'win ku jade'en tpaduun, jøts jade'en ttuk'abaaty ka'pxy ja yjanchja'win.

²³ Y'abaajt idø'øn jade'en ja Dios kyajpxy ku wya'ãñ: "Ojts ja Abraham tjanchjawì ja Dios, ja'ats ja Dios y'øyja'wiyi'ñ jøts ja ojts tkupiky." Paty ja Dios myigu'ukjawiyi ja Abraham.

²⁴ M'ejxtip mnija'widip ixja sã ja Dios tkupiky ja jaa'y ku ja tpaduun, jøts ni kidi ja'ayip tu'ugyi sam ja yjanchjawì.

²⁵ Nayide'en ja ka'odyø'øxy Rahab ja Dios kyupøjkøø jade'engøjxp ku ja t'odyuun ja Dios kyugajpxy; ku tjønmoøy ttøjkmøøy jøts abiky tyuu' tajøpkajxyi'ñ ku ja myidsep wyinaty pyayø'øyi.

²⁶ Ka'ap jade'en tyuñ ku ja Dios njanchja'wint ku ngabadu'unint sam ja ttsökyin. Jade'en ja tpaaty sam ja jaa'y'öøgyin, ka'ap ja ñine'kx tyuñ ku y'anmija'win kya'uk'ejtñi.

3

Sam nugo yø toojts yiktakajpxy

¹ Meets migu'uktöjk, ka' pyaat'aty jøts mee niduki'iyi myik'ixpøkt. Pøn t'ejxtip pøn tnija'widip, ja' ka'pxy tpadundip. Nay jade'ents ja møk yiktabayø'dyit ku ja ka'pxy tkabadu'undit.

² Tum jade'en ja tundigø'öyin yikjagyepy; winaagin ja' pøn katundigøødyip kakajpxigøødyip, ja' idø'øn janch'øy jaa'y ku ja tpaduñ ku ja ñay'ejx'lityiyi.

³ Jade'en'ampyts ja kawaay kyajpxy kyupiky ku ja axots tmøø'taty y'aa'wjøtpy mididi yikwä'k'öyip, øy mididi'ampy nduknøjkxint.

⁴ Ku n'ukwinma'ayint nayide'en sam tu'uk ja barki yø'øy; øy janch jamø j ja' jøts ja poj ja wyetsmiñi wyetsxøpyi, mutskts ja pujxu'nk mididi ja jaa'y yikyø'øpy, jøts ja tyikyø'øy pøni ma ja ttsøky.

⁵ Nayide'en yø toojts; win'li'nxyip ja' mididi xyikajpxigø'øyimp. Jade'en yø' kidim ja jøøn tyøøbyikyin jøts ja tyøømyøji, jøts ja et tyøøyi.

⁶ Jade'en yø toojts ejxim ja jøøn tyøøyin. Yø' amuum xyikma'jtimp ku xyikajpxigø'øyint xyiktundigø'øyint. Miku' yø jade'en xuktu'unimp.

⁷ Yikyujpy ja jaa'y o mididi jiyujk, wan tjooni wan tsaa'ñi jøts ja' mididi tsinaadyip mejjotp.

⁸ Ka' pøn mibaat jade'en ja toojts tmimada'aky, tundigøøpy yø nugo.

⁹ Nayi toojts xyikajpximp ku ja Dios nja'myejchim n'ajot'ajtyim, nayø'øts ja nmigu'uktöjk xukmigajpxigø'øyimp, Diosts jade'en ñamyayi nmigajpxigø'øyimp ja y'agojnajxy mididi kø'øm tø tpiktä'aky.

¹⁰ Nayi aawjøtpy pyidsimy ja øgyajpxy tsujkajpxy, jøts nay jaayi pyidsimy ja axøøkajpxy. Migu'uktöjk, ka'ats idø'øn jade'en yjapaat'aty.

¹¹ Ku n'uk'ejxint ma ja wa'ats nøø pyidsimy, tu'ugyixi ja wya'atsnøø'aty, ka'ap jam ja tyä'mtspi, ka'ap jam ja pyä'akpi.

¹² Migu'uktöjk, ¿m'uk'a'ejxip meets tyøømit jam iigi kipyjøjpx ja wenk tsä'am? Ka'axi mibaat nayide'en ja nøø pyidsimy jam nøømu'utjotp ja tyä'mtspi ja pyä'akpi.

Ja ja'gyukin mididi ja Dios yajkpy

¹³ Pøni jap pøn tmimadøy tnijawi, wan tnanky'ijxyi sa ja y'øy'ajtin ja y'øyjaa'y'ajtin, wan jade'en ja ja'gyukin tyiktuñ jøts ka' ñamyikaxit.

¹⁴ Pøni ja meets ti mnadyami'ama'at'atyidi ku nugo kø'øm jade'en xwinmaa'ñ'atti, ka' ja ja'gyukin jade'en xnanky'ijxyidi, taay yø jade'en pyidsimy.

¹⁵ Ka'ap ja Dios jade'en xuknija'wim jøts jade'en n'adøøjtsint, ja' jade'en adøøststip pøn ka'øyjaa'dyi ku ja miku' jade'en tyuktuñidi.

¹⁶ Ma y'ity ja windi'liñ'ajtin jøts ja nadyami'ama'at'ati, nay jam y'ity ja tsep jøts o ti axøøk'ajtin.

¹⁷ Pøn ja ja'gyukin ja Dios møøjyip, ja'ats øyjaa'y'ajttip, wa'ats chinaa'yin ja tyiknaxti; ka'ap cheptundi chepkajpxti, myøøt'ajttip ja tuda'aky'ajtin jøts ja ja'gyukin. Tsaach'ejxtip jøts ja øy'ajtin ttundi; ja myøkwinmaa'ñ pyadundip, ka' twindaay'atti ja wyinmaa'ñ.

¹⁸ Pøn tjä'gyukip tkajpxkukip, ja'ats ja øy'ajtin ttukpatp ja myigu'uk.

4

Ka' nmīnamyaa'yint ja ka'øy'ajtin midī ya naxwīīn

¹ ¿Mā chøøñ ja tsep ja aka midī mdundip? Køømyi xyiktso'onda'akti ku ti mnadyami'ama'at'atyidi.

² M'animp̄y m'adsøjkpy pøni ti mmigu'uk myøøt'ajtpy, kuts ja xkapaatti winets ja tsep xyiktøkidi, jøts jade'ents ja mmigu'uk xyik'ookti. Ka'ap agujk jotkujk m'etti ja'agøjxp ku ja Dios xka'amidowdi xkabøktowdi midī mdso-jktip.

³ Pøni m'amidoodip mbøktsoodip jøts ka' myikmo'odi, jade'engøjxp ku øy ka'øy x'amidowdi jøts xyiktunwa'andi nugo mā ka' pyaat'atyī.

⁴ ¡Meets mga'øwīnmaadyip! ¿Ti kidi meets xnijawī ku øy møøt nnayja'win ja' midī ja Dios kyatsøjkpy, jade'en'ampyts idøøn adøm ja Dios nmīdsepøjkna'am jøts nga'ukja'myajtsna'am?

⁵ Yide'en jap nøkyixpy wya'añ: “Øy xtsojk'anajxyim ja Espīritu Santo midī ja Dios xukmī'ejtimp̄ jøts ka' t'øyjawi ku wenkpi nbadu'unint.”

⁶ Dios ne'egi xmay'ajtimp̄ xpudøjkimp̄ sam ja kyajpxy ja y'ayuujk yide'en wya'an: “Myi'ambijkpy ja Dios pøn namyøjpiktaajkiyip; pønts tuda'aky'ajtp øy'ajtp, pudøjkiyipts ja Dios ja'.”

⁷ Amumjoojt mnadyamiyoxidit ja Dios. Møk windanīdi ja mīku' jøts mniwā'adsiyidit.

⁸ Wingunøjkxidi ja Dios jøts ja ne'egi mnīmeniyidit. Yikwa'atsti ja mbøky, meets, ku nugo ja Dios majtsk'aaw majtskjoojt xtsokti, ku xpadundi nayide'en ja ka'øybi.

⁹ Jotmay'ookti, taya'axti ja mbøky. Kidi jotkujk mnayjawiidi ku tøm mbøkyundi. Yikmendi ja mwinmaa'ñ jøts xjagyaptit ja jotmay.

¹⁰ Nabyikta'agidi yik'ayowim nwindson'ajtim wyingujkp, jade'ents ja ñitso'ok'ajtin ja møj mmo'ojidit.

Ka' nugo nbayø'øyint ja nmøøtjanchja'wibi

¹¹ Meets mīgu'uktøjk, kidim mnabyagajpxyidi nidu'uk ja nidu'uk. Pønts jade'en pagajpxp, pønts ja myīgu'uk jade'en tøkøy'ejxp, ja Dios ja kyutujk ja jade'en wyindsojip mā wya'añ jøts ku ja nmīgu'uk ndsojkint, tiidyumbits ja ne'egi nugo ñabyikta'agyī jøts ni tkabaduñ køøm ja kutujk.

¹² Tu'ugyi ja' pøn ja kutujk tmøøt'ajtp, nay ja'ats xpayø'øyimp, ja'ats nayide'en xyiknitso'ok'ajtimp, nay ja' xyikwindigø'øyimp. ¿Mbøen mets ku xpøkpyayø'øwya'añ ja mmīgu'uk?

Ka'yīknijawī pøni ti memp jabom wixøjkp

¹³ Ukmadowdi meets sa x'ukwinmaydi: “Jabom wixøjkp njaa'mint abikyajp jøts jam tukjumøjt n'ejtint. Najxint ndøjka'ant, jamts ja meeñ jade'en nbaajtint”,

¹⁴ nīpøn tkanijawī pøni ti memp kidakp jabom wixøjkp. Jade'en adøm n'ijtyindi ejxim ja yoots n'ejxint, jøts nay jaayi n'ejxint, tøm tyigøøgyojmi.

¹⁵ Yide'en ne'egi mwa'andit: “Pøni xpudøjkimp ja Dios, winets jade'en ndu'unint pøni ti jaty ndunwa'añimp.”

¹⁶ Meets ja mgøøm winmaa'ñ mee myiktunwampy jøts ja namyīkaxi; ka'øyts idøøn yø jade'en pyīdsimy.

¹⁷ Pøn wa'ats tjanija'wip jøts ja ka'pxy tkabaduñ, pøkyundipts ja jade'en ne'egi.

5

Sa ja kumeeñ jaa'y yikajpxwejt

¹ Madowdi meets kumeeñ jaa'y! Mdaya'axtip ja mwinmaa'ñ ku ja ayo'on xpaattit x'ejxtit.

² Tuki'iyi ja mjujky'ajtin jadi'iñi pyutskøjxnit jøts ja m'øybi wet ja m'øybi naamy ja kipkyaa'tspi jadi'iñi tyikwindigø'øty.

³ Towigyøjxp ja oori ja plati midi mmøøt'ajttip, jade'ents idø'on m'ukyik'ejxtit m'ukyiknijawidit ku møøt mwindigø'ødyit ja mbikta'aky. Tøxi ja mgumeeñ'ajtin øy xpaatti, wingompxi ku ja tiidyu'unin mye'ent.

⁴ Ja kamdumbi pøn tø xkamijuudyi, ja' myiktabayø'ødyip. Wa'ats ja nwindson'ajtim ja t'ixy tñijawi ku ja mdumbi jade'en xkamijuudyi.

⁵ O meets ya naxwiiñ jotkujk xyiknaxti, o ti kø'øm tø mnadyamay'atyidi, wingompts ja xøøw ku ja tiidyu'unin mye'ent.

⁶ Tø ja xmidundigøydi pøn ti tkatump pøn ti tkanija'wip, jade'en idø'on ku nugo tø xpayø'ødyi jøts xyik'ookti ku ka'ap ja møk'ajtin tjagyapti.

Ja tuda'aky'ajtin jøts ja dios'ajot'ajtin

⁷ Meets migu'uktøjk awejxti tuda'aky, kunim ø nwindson'ajtim mye'ent, nayide'en sam ja kamdumbi tuda'aky t'awixy ja tuu jøts ja pyikta'aky tøkmukt.

⁸ Nayide'ents meets x'awejxti tuda'aky, kidi nugo mjetigøydi, wingomp jøts mye'ent ja nwindson'ajtim Jesucristo.

⁹ Meets migu'uktøjkti, kidi nugo mnagyajpxyidi mnay'øjyidi jøts ka' myikpayø'ødyit; wingompxi ja Dios pøn ja naxwii'ñit jaa'y tiidyunidip.

¹⁰ Migu'uktøjkti, windanidi ja m'ayo'on nayide'en sam ja Dios Teety kyugajpxy twindanaay ja yja'.

¹¹ Jotkujk ja'adi pøn tø tyiknaxti amumjoojt ja y'ayo'on. Pø tøxi xnijawidi sam ja Dios kyugajpxy Job ja ayo'on t'ijxy, jade'ents ja øy'ajtin ja Dios myøøjyi; x'ayo'ejximpts xpudøjkimpts ja Dios jade'en.

¹² Meets migu'uktøjk, yø' mdu'undip ku ti xkajpxtit ku ti xu'undit, tiy'ajtin mgajpxtip. Kidi nugo xuk'ejxti ja Dios ku nwa'anint "Tiy ja!", tiy'ajtints ja'; kuts nwa'anint "Ka'ap ja tiy'ajtin", tyimwya'animpts jade'en ku ka'ap tiy'ajtin, ka'ats ja Dios jade'en xpayø'øyint.

¹³ Pøni jam pøn y'ayøw wyinmay, wan ja Dios t'ajot'aty. Pøni pønts agujk jotkujk tyiknajxp, wants ja t'øwdi ja kunuu'kxy ayuujk.

¹⁴ Pøni pøn pøjkip, wants ja twaadsøy ja møjaa'dyøjk pøn tundip tsaptøjkjotp, jøts ja kyugajpxidit jøts aceite tpikta'aktit nwindson'ajtim køjxp.

¹⁵ Ku amumdu'uk t'ajot'attit ja nwindson'ajtim, tso'okpts ja pamaa'y. Pøni tø tyundigøy, yikpojkipimaa'kxpts ja'.

¹⁶ Paty nayide'en mnadyamimayatsidit ja mbojkipi nidu'uk ja nidu'uk, jøts ajot'atti ja Dios pøni pøn pøjkip jøts cho'okt. Pøn øyjaa'y'ajtp jøts amumjoojt ja Dios t'amido'ot tøktsø'ot, jade'ents ja Dios myøk'ajtin myajada'akt.

¹⁷ Ja Dios kyugajpxy pøn txøøw'ajt Elias nayide'en ja y'ijty sam adømin; ku ja Dios ja t'amidøøy jøts kyatu'ut, winets ja tuu kya'ukmenaa tigøøk jumøjt jagujkp.

¹⁸ Jøts ku jadigojk t'ajot'ajty ja Dios jøts tyu'ut, xjats myiñ ja tuu jadigojk xjats ja pikta'aky y'øyiyi'ñ.

¹⁹ Migu'uktøjkti, pøni jaa pøn tka'ukpaduni sam jawyeen tø t'ukpaduñ, jats ja' pøn ja nayide'en tukpaduniyip,

²⁰mnijawidipts nayide'en ku tø tyiknitso'ok'aty ja mmigu'uk y'anmija'win
jøts yikmaa'kxtit ja pyøky.

JA MYËDU'UKPÏ NØKY MIDI JA PEDRO YJAAY

Ku ja Pedro tnijayi ja janchja'wibitøjk pøn tø ñawya'kxniyidi

¹ Øts idø'øn Pedro nxøøw'ajtpy, øts ja Jesucristo ngudanaapy. Ja' ø tø xkexy xjats øts ya'at nøky yam nja'ay, jøts meets ndanijayi wine'enin jam muum abikyajpkøjxp mdsinaañidi, ku jam tø mgakwä'kxnidi mgajpkøjxp jøts jam tø mnøjkxti jam Ponto, jam Galacia, jam Capadocia, jam Asia jøts Bitinia.

² Tøyip meets ja Dios Teety mw'iejxniyi jøts ku meets ja m'u'nk'atiyit sayim ja tniwinma'ayiyi'ñ. Yø Espiritu Santo meets ja mdabudøjkijiyip, jade'en'ampyts meets ja Jesucristo yja' xpaduujniyi ja'agøjxp ku ja tø myikwaajtsiyidi ja mbøky, pø adømxï nbøky ja xkubajta'am ku ja chuuñ tyajxy. Dios mjanchkunu'kxidip jøts øy tsuj xyiknaxtit.

Ja tsinaq'yin midi awejxingøjxp nyiknajxyimp

³ Tkajxajkyim ja Dios Teety pøn ja nwindson'ajtim Jesucristo tyeety'ajtpy, ku ja xjanchpa'ayø'øyindi jøts ja jadigojk xukpaajtyin ja juky'ajtin xemikøjxp. Xjats ja jade'en tø xja'bijkyindi jøts ja xukjøp'ijxyindi amumjoojt ja'abi juky'ajtin, kumi tø ja Jesucristo ttunjøpi ku ja y'ø'jky ku ja jadigojk pyidsimy juky'ajtpi xemikøjxp.

⁴ Paty tu'ugyi njøp'ejxin jøts ku ja Dios ja myaay xmø'øyim, pø tøxi ja t'a'ejxi jap tsajpjøtpy pøni ti ja xmøøwya'animp midi tum øy, midi nisa kajajtp.

⁵ Jøts kumi m'ajot'ajtpy meets Dios amumjoojt, jade'ents meets ja myø'ajtin ja mdabudøkiyi kunim meets ja juky'ajtin xtyimbyaatt midi xemikøjxp, jøts jaanim ja tnanky'ejxit wiingyubety ti jaty ja jap tø t'a'ejxi.

⁶ Paty meets idø'øn ejtni xoni m'ett øy idø'øn ixyam xjanch-jagu'ayo'ombaadiidi yø'øbi winmaa'ñ.

⁷ Nayide'enxi dø'øn ndamija'gyukin ja m'ajot'ajtindi sam ja oori: kuwanimxi net ja jaweyen y'atswidø'oty winets ja yik'ijxñim pøni janchtyimy'øbyujx idø'øn ja'. Nayide'ents ku ja janchja'win møk nmøøt'ajtin ku ja tmimajadakixy ja ayo'on pøni sa ndyimyjagujajta'am ja øwyinmaa'ñ, ja'ats idø'øn jawaani tyimy'øy pø ka'axi ja jade'en wyindingøø sam oori. Jade'en meets ja mjanchja'win yikmøk'ixy ku xmidanaagyøxtit ja ayo'on, ja'ats mee myiktagupøkp, nay ja'ats mee myiktawindsø'øgip myiktamøja'wip jam nwindson'ajtim wyingujkp ku ja jadigojk ñankñigaxø'øgiyit.

⁸ Mwampy mdsøjkpy meets ja nwindson'ajtim Jesucristo, m'ajot'ajtpxi meets ja' øy meets ja xjaga'ijxñim, patyts meets xmøøt'aty ja kunuu'kxin,

⁹ jøts ku xnijawidi ku ñitsø'ok'atti ja m'anmija'windi xemikøjxp; jats idø'øn m'ajot'ajtin tyundi, jade'en idø'øn ja wyingaxi'iky.

¹⁰ Tøyip Dios Teety kyugajpxy tpamaydi tpadajti yø'øbi nitsoojkin ayujk, jøts tniagjpxti jøts ku meets Dios y'øy'ajtingøjxp mmo'owa'añiyim yø yjade'embi.

¹¹ Ja Espiritu Santo midi ja Cristo tkajxp, ja' ja kugajpxy ttukmadoojidøø sa jaty ja Cristo yiknitsokpi wyinaty yjatwa'añ ku ja y'ayo'ombaatt, jøts sa nayide'en yikwindsø'øgit yikwinjawit. Ja'ats ja nugo pyamaadyip pyadajtip ja tyimy'ukpøn idø'øn ja' jøts juunim idø'øn ja yjatymy'ukme'ent ku ja Espiritu Santo ja jade'en tyukmadøyiidi.

¹² Ku ja Espiritu Santo ja jade'en tyukmadøyiidi jøts ku ja ka' tpaattit t'ejxtit midi wyinaty ttunwajnip, adømnimts inet ja ixyam nbaajtyim n'ijxyim jøts

ja myiktukmadowdi ja nitsoojkin ayuujk nayide'en sa jaty ja Espíritu Santo ja tō tyuknijawiyidi pōn jaty kajpxwa'kxtip jōts ku dō'ōn ja jade'en tō yjaty. Ankilis paat ja tjantyimy'ejxwa'andi tjantyimñijawiwya'andi sudso'ampy adōm nnitso'ok'ajtyindi.

Xwaaḍso'ojimp ja Dios jōts ja ndsinaa'yin wa'ats tsuj nyiknajxint

¹³ Paty ōy jawyeen xwinma'adyit ku ti xunwa'andit, kidi mōj kamōj o ti xjāwidi, jade'ents mdsinaa'yin ōy xyikyō'ōdyit. Amumjoojt meets ja Dios y'ōy'ajtin ja kyunuu'kxin xjōp'ejxidit midī ja yakwampy ku nwindson'ajtim Jesucristo mye'ent jadigojk.

¹⁴ Madowdi, jade'en mmado'odit sam jāa'y y'u'nk myimadōyin. Kidi jade'en m'uktsinaañidi sa y'ijty mga'ōchōōnidi ku Dios wyinaty ka'anīm xpabōjkidi ja yja'.

¹⁵ Ōy tsuj mjaā'y'attit jōts jade'en x'aduunaxtit ja Dios Teety wya'ats'ajtin y'ōy'ajtin, pōn idō'ōn tō mwi'ijxyidi;

¹⁶ pō yide'enxi jap nōkyijxpy wya'añ: "Ōy tsuj mjaā'y'attit sam ōtsin, kumi ka' ō nbōkmyōōdi."

¹⁷ Pōni mdeetyja'wip meets ja Dios Teety, windsō'ōgip meets idō'ōn ja ejtp, pō ja'axi ka'pxy tiidyu'ump sa pōnjabōn ja chinaa'yin tyikyō'ōy, ka' pōn ja tiidyu'unin tkapaat.

¹⁸ Jabi ja Dios Teetyxi meets tō mduknitso'ok'atyidi ja ka'ōchinaa'yin midī adōm ja n'apteety'amōj tō tpamendi tpabatti; mnija'widipts wa'ats jōts kidi oorip plātip ja yiktaguyajkip, windigōy'ejtpxi yō'.

¹⁹ Ja' ja yiktaguyakiyi'ñ ku ja nwindson'ajtim jade'en wyidsuūñ wyidajxy, ōy ja niti pōky tjagamōōdi sam ja borreeg'u'nk y'ijty yiktamīyōxy ja Dios Teety.

²⁰ Windi'ixyip ja tanibiktaagi y'ejtni, nanga'anīm ja naxwii'ñit cho'onda'aky, xjats ja yamnim tō myiñ ku kyōjxwa'añ ja naxwii'ñit jōts ja xa'ōdyōkidit mā ja Dios Teety.

²¹ Ja nwindson'ajtingōjxp meets ja Dios Teety xpabiky midī tō tyikju-jkpyiky jadigojk xemikōjxp; jade'en'ampy ja tō tmō'ōy ja myōk'ajtin, ja kyutujk, jōts ja njanchja'win amumjoojt, jōts tu'ugyi njōp'ejx'ejtin ja Dios.

²² Jade'ents ja m'anmija'win wa'ats y'etti ku ja Dios tyiy'ajtin xmimadojidi midī ja Espíritu Santo xuknija'windip. Jade'en'ampyts mnabya'ayowidit, tsokti, wa'andi ja mmigu'uk sa Dios ttsōkyin.

²³ Jade'en idō'ōn tpaaty, tō meets jadigojk mga'axigach, ka' meets ja ñamyayi x'ukteety'ajtni ja jāa'y midī oo'ktip tigōōdyip, ja Dios meets ja kyajpxy tō myikujky'atigachidi midī nijuuni sa kajajtp.

²⁴ Kumi nōmp ja':

Jade'en idō'ōn naxwii'ñit jāa'dyi sam o ti ujtšin, jōts ja tyunk jade'en sam ujtspijy midī ja tyiknigaxō'kp.

Paty tuki'iyi wyindigōy, ti ti uktamp ku ujtš tyi'ich, pō nayide'enxi ja pyijy wyindigōy;

²⁵ jōts kuts ja Dios ja kyajpxy, ejtp ja xemikōjxp, ka'ap ja kyudigōy.

Yō ōgyajpxy ō myadya'aky mee myiktukmadoop.

2

¹ Paty x'ixmatsttit tuki'iyi ja mga'ōdyu'unindi, ja mga'ōwynma'andyi, wine'en mwin'ōō'ndi, wine'en o ti mnadyawindaay'atyidi, wine'en x'ama'at'atti, xka'ōdyejti, xka'ōbyikta'akti pōngapōn.

² Nayide'en sam tu'uk ja maxu'nk ñangaxi'iky jōts ja chetsk tsojk mābaadyim tpaatwa'añ, jade'ents meets idō'ōn xtsoktit ja Dios

kyajpxy y'ayuujk, midi øy midi wə'ats, jøts jade'en ja mjanchja'win myiweni'adø'øtstit, jøts ja nitso'ok'ajtin xpaattit,

³ pøni tødam idø'øn xjanchnijawidi ku ja nwindson'ajtim yja' y'øyi.

Ja Cristo dø'en ja xemikøjxpit juky'ajtin tyajkp

⁴ Mbaattip m'ejxtip ja nwindson'ajtim Jesús, yø' xyikjujky'ajtim xemikøjxp, jade'en ja myøk'ajtin tjagyepy ejxim tu'uk ja jønts tsaa'in. Jats may pøn tkatsojkip pøn tkaja'gyukip, tøts ja Dios Teety yø twi'ixy jade'en ejxim ja pojtspi ja øybi tsaa twi'ixy midi yiktunwampy.

⁵ Nayide'en meets sam ja pojtspi ja øybi tsaa twi'ixy midi yiktumpy ku tsaptøjk tyk'øyi. Jade'ents meets ja Dios Teety myiktunwa'añiyi jøts xpaduujnidit ja yja' ku ja amuum mnadyamiyoxidit jøts ku nayide'en ja mbikta'aky xamiyoxtit, ja' idø'øn ja jade'en mdawindsø'øgidip, jøts ja Dios Teety xkupøjkindit ku jade'en ndu'unindit Jesucristo køjxp.

⁶ Paty ja Dios kyajpxy wya'añ:

Nbiktakpy øts jam Sion jade'en tu'uk ja ejxpajt ejxim ja tsaa ma pøch cho'onda'aky, tu'ugyits ja yikpa'ext jade'en;

pøn ja tpadump jade'en, ka'ap ja wyinguwopi yjøpkuwopi, pyaätp ja øy'ajtin ja'.

⁷ Pøn yø tmøja'wip tjanchja'wip, møj yø', yø' xyiknitso'ok'ajtim; pønts tkamøjpikta'kp, pøn tkajanchja'wip jatyi, jatpts idø'øn ja yide'en sam ja Dios kyajpxy wya'añ:

Ja tsaa midi ja pojtspi kya'a'ejxip tyiktunwa'añ, ja'ats ne'egi ja Dios tø t'a'ejxi jøts ja ne'egi yikxon tyiktuñ.

⁸ Xjats nayide'en ja Dios kyajpxy wya'añ:

Jade'en yø', ejxim tu'uk ja tsaa midi ja jaa'y tyagidaapy.

Jade'en yø yjätti wyinguwopidi yjøpkuwopidi ku tkabadundi ja øy ayuujk midi ñigajpxy ja nwindson'ajtim yja'; jade'en ja Dios tø ttanibiktaagi jøts jade'en yjättit.

Pøn ja Dios ja'ajtyidip

⁹ Tum ja' meets pøn ja Dios tø wyi'ixyidi, meets mmidumpy ja nwindson'ajtim Jesucristo yja', jade'ents meets wa'ats mjaa'y'atti jøts tu'ugyi ja Dios mja'atyidi pøn ñiwindson'ajtpy ja tsajpjotpit jøts ñaxwii'ñit, ja'agøjxp jade'en tø myikwi'ejxti jøts xkajpxwa'kxtit xkajpxyø'dyit sa ja Dios janch øy janch møj. Nay ja'ats ojts øy tsuj myikujajtaajkidi myikudo'kxaajkidi ku y'ijty m'etti agoostujpy.

¹⁰ Ka'ap meets ja Dios y'ijty m'u'nk'atyidi, ixyamts meets ja mja'ajtniyidi. Ka'ap y'ijty pøn mba'ayøyidi, mba'ayojidipts ja Dios ixyam.

Yikxon xpadu'undit ja Dios

¹¹ Meets migu'uktøjk, tøg'ayø'øbyi adøm n'ijtyindi ya, tsajpjotpy adøm ngugajp'ajtyindi xemikøjxp paty mee møk nmīnuu'kxa'aky, kidi xyikmajada'akti ja ka'øyjaa'y'ajtin midi tmimada'akwamp winjaa windsojk ja anmija'win.

¹² Jagyapti ja tuda'aky'ajtin ja øyjaa'y'ajtin ma pøn ja Dios tkanijawinim. O meets ja wine'en mjabagajpxyidi jøts mee myiktijy ka'øyjaa'dyi, kuts t'ejxti ku tnijawidi ku tsuj mjaa'y'atti winets ja Dios ja twindsø'øgidi twinjawidi jøts jade'en ja nitso'ok'ajtin tpaattit ku wyinaty ja tīdyu'unin xøøw yja'aty.

¹³ Ja nwindson'ajtim Jesús køjxp xkupøktit xmimado'odit ja kudunktøjk jøts ja møj windsøn,

14 jøts ja tyumbi nayide'en midi tpayø'opy ja tundigøøbyidi ja kajpxigøøbyidi, midi'lits øyjaa'y'ajttip tuda'akyjaa'y'ajttip, ja'ats y'øyja'wip.

15 Jade'ents ttsøky ja Dios jøts øy tsuj mjaa'y'attit jøts jade'en xyik'amo'ondit pøn nugo agubojidip, pøn tkanija'widip.

16 Tø meets ja øy'ajtin myikmøøñidi, jøts ka' ti nugo ajawi mmimajada'agidit. Ka' mwa'andit jøts øy sagasa m'adøøtsnidit ku ja øy'ajtin tø xpaatti. Ja' tu'ugyi mbadu'undip midi ja Dios ñi'ane'empy.

17 Windsø'ogidi winjawidi niduki'iyi sam pyaat'atyin. Tsokti ja mmigu'uktøjkti pøn nay ja'abi janchja'win pyadundip midi meets, windsø'ogidi winjawidi ja Dios, jøts nayide'en ja windsøndøjk kudunktøjk.

Ja ejxpajt midi ja Cristo tø xmø'øyim ku y'ayo'ombaaty

18 Tumbitøjkti, kajpxkyupøjkkøjxti niti jot'aka ja mwindsøndi, wan tj'awa'anidi tka'awa'anidi, wan ja tj'gyukidi tkaja'gyukidi.

19 Jabi øyxi ja' ku ja Dios tuki'iyi xamijawidit ja m'ayo'on ku myikjemdundi myiktetundi niti pøkyøjxp, paty ja amgujk jotkujk xmidanidit.

20 Ku meets xku'ayo'ombaattit o ti o ma øy tsuj tø xkayik'øyidi, ζti øy'ajtin meets idø'on mdsaaçpaatp? Kuts meets øy tø mjatuñ jøts kuwañim myik'ayo'ombaadyidi pøn m'ana'amidip, ya'at idø'on ja Dios y'øyja'wip ku meets tuda'agy xkupiky'aty ja ayo'on.

21 Paty meets ja Dios tø mwaadsøyidi, jabi tøxi Cristo y'ejxpajt tyiktañ ku y'ayo'ombaaty niti akikøjxp jøts meets ja xpadu'undit jade'en.

22 Niti pøky ja tkaatuñ, niwindem xøøw ja jaa'y ja tkawindaay'ajty;

23 ku ja y'ijty yikmi'akikajpxy, ka'ap ja nayide'en y'adsøy; ku ja y'ijty tyik'ayo'ombaatti, ka'ap ja tmidsepiky pøn jade'en tuujnidip. Dios Teety ja ne'egi tyanipijky ja ka'pxy tiidyunk.

24 Kø'øm idø'on ja Cristo adøm ja nbøky tuki'iyi tku'o'jkigyijxy jam kruskøjxp, jøts ka'ap adøm nyikmø'ajttint ja nbøky jøts jade'en øy tiy ja ndsinaa'yin nyiknajxint. Pyaajt ja tsaachi'ajtin ja', jøts adøm jade'en nniitsoojkindit.

25 Jabi jade'enxi y'ijty sam ja borreegi tyigøyin, tøts meets jadigojk xniwimbity ja nwindøn'ajtim Jesucristo pøn m'ejx'ejtidip jøts pøn ttunk'ajtp ja m'anmija'windi.

3

Sq dø'on pyaat'aty chøønidit ja amaajtsk jaa'y

1-2 Jade'en meets tøøxyøjkti, kajpxkyupøkti ja mgø'ømniyaa'dyi jøts xuk'ejxtit xuknijawidit ja tiy'ajtin ku meets ja mjaa'y'ajtin tuda'aky xyiknaxy. Jats idø'on winaaçin ja yaa'dyøjkti pøn tkagupøjktipnim ja øgyajpxy ja ømyadya'aky, ja'ayi meets ja jade'en xukupøktit mjaa'y'ajtingøjxp, niti kajpxy niti madya'aky.

3 Jøts ka'ap meets ja mdsuj'ajtin xmijatt xmi'lookt midi ja'ayi nikijxy kaxø'kp ku tum ja oori, tum ja wimbatjaaxy wimbatwøøky, jøts tum ja tsowi'ibi wet xjotmay'attit.

4 Jabi wa' tsuj'ajtinxi meets idø'on ne'egi myiktu'ump midi m'am mjoojtp yik'øyjaa'y'ajtp, ja'abi midi kawindigøøpy. Janch øy ñaxy idø'on ja jam Dios wyingujkp.

5 Jade'ents idø'on y'ijtyip ñajxmi ja tøøxyøjkti pøn ja Dios yja' tpadundip ku ja nayide'en tmøøt'ajtti ja tuda'aky chinaa'yin. Yjanchja'widip idø'on ja Dios ja y'ijty jøts ja ñiyaa'y tuki'iyi tkajpxkyupøjkidi nayide'en.

⁶ Jade'ents idø'øn ja Sara yjaa'y'ajty, tuki'iyi tkajpkyupøjkijxy ja ñiyaa'y Abraham, jade'en ja tpikta'aky sam tu'uk møj øy windsøn. Pøni øy meets mjaa'y'aty, nayide'ents meets idø'øn xu'unt sam ja Sara tø tjøptuni jøts jade'en ja mniyaa'y xkatsø'øgidit.

⁷ Nayide'en meets yaa'dyøjkmí, ja'gyukidi ja mnidø'øxtyi, windsø'øgidi sam ja pyaat'atyidi. Kidi meets ja xamøj'aty ku ja nayide'en kyamøkidi sa meets, jabi nay ja'abi øchinaa'yinxi dø'øn ja Dios tø myø'øyiidi midi meets tø xpaaty y'øy'ajtingøjxp. Tundi jade'en, jøts ka'ap ja Dios mgamo'ojidit midi jaty m'amidoodip mbøktsoodip.

Ku ja øy'ajtin yiku'ayo'ombaadi

⁸ Jade'ents idø'øn xyknaxtit ja mdsinaa'yin: øy tsuj mnachokidit sam tu'uk jaa'yin, nabya'ayowidi nixem niyam jøts xyiknigaxø'øktit jade'en ja mduda'aky'ajtin.

⁹ Kidi meets ja kya'øbyi nayide'en xyikwimbity jøts ja mmigu'uk xuk'ayojwya'andi ja ka'øgyajpxy ja ka'øy'ayuujk. Ni'amidowip meets idø'øn ja ne'egi ja kyunuu'kxin, pø ja'axi adøm tø nyiktaniwaa'dsø'yim jøts ja Dios kyunuu'kxin nbaajtindit.

¹⁰ Jabi yide'enxi dø'øn ja Salmos wya'añ: Pøni pøn idø'øn øy tsuj ja xøøw ja tsinaa'yin yiknaxwampy, y'eix'etp idø'øn ja tyoojts ja', jøts ja yigaappi y'axøøkpi ja tkakajpxt jøts ja y'aaw tkadataay'att.

¹¹ Paat'ajtp idø'øn ja t'ixmatst ja yigaappi jøts ja y'øbyi chujpi tpadu'unt ne'egi, y'ixa'ap idø'øn ja øy'ajtin jøts tuki'iyi tpanøjkt.

¹² Jabi Dios Teetxyi idø'øn t'eix'etp pøn øy jaa'y'ajttip jøts nay ja' tmado'op ja tsapkaipxy, ka'ats idø'øn ja møøt ñamyayi pøn ja y'axøøkpi yigaappi yikmajadaktip.

¹³ ¿Pønts meets idø'øn ndejint mdamidsepwa'aniyidip ku ja y'øbyi chujpi xunwan'ettit?

¹⁴ Pøni jats pøn wyinaty mjanchtuku'ayo'ombaadiyidi ku ja y'øbyi xjatu'undit, øyjawidi kunuu'kxyjawidi meets idø'øn ja ne'egi, jabi møjxi ja Dios y'øy'ajtin tyikwimbejtnit. Patxyi meets idø'øn niti nipøn xkatsø'øgidit,

¹⁵ nadyamiyoxiyidi ja Cristo pøn adøm nwindson'ajtyimp. Aweix'et meets idø'øn ja', ku pøn tyiknidøøwit tiku xpaduñ ja mjanchja'win jade'en, ku x'adsojimbettit, tsuj tudā'aky meets idø'øn ja xu'unt.

¹⁶ Yikxon meets idø'øn m'øy'att jøts xmøøt'attit jade'en ja m'aaw ja mjooit jotkujk, jøts ku wyinaty pøn mdamigajpxyidi ja Cristo yjanchja'win, kø'øm ja kyajpxy ja myadya'aky ja ttatsø'ødyu'undit ku meets ja jade'en nugo mnitaayibyetyiyidi.

¹⁷ Øyts ja ne'egi ku ja øy'ajtin ngu'ayo'ombaajta'ant pøni jade'endam ja Dios kø'øm ttsøky jøts idø'øn jade'en ne'egi ngatu'unint ja axøøkpi ja yigaappi.

¹⁸ Jabi nayide'enxi Cristo kø'øm tø y'ayo'ombaatmi adøm nbøkyøjxp, tuk'ojkyi ja tø ttanaxy ja ayo'on. Øy ja y'lijty yja'øyjaa'yí, ayo'ombaajt ja' adømgøjxp wine'en nga'øyjaa'y'ajtyindi, jøts jade'en ja Dios Teety xukwingunøjksa'andi. O dø'øn ja ñine'kx wyindigøøy, juky'ajtpst ja ixyam jadigojk.

¹⁹ Ja Espíritu Santo myøk'ajtin ja yiknøjksøø mā dø'øn jap namay anmija'win t'aweixti ja y'ayo'ondi, jøts ttukmadøøy ja nitso'ok'ajtin.

²⁰ Yā'atpi jaa'dyi ku yjuky'ajttøø ka' idø'øn ja tmøjpiktajktøø ja Dios sa ja Noé tjanigajpxy yam ja Dios ja yjanchja'awijxyidi. Ixyam idø'øn wyinaty ja

Noé tyik'oyi tyik'abaadi ja møj barki ma dø'øn niwaani ñitsokti, niduktujk idø'øn ja'adi ka'pxy pøn jap barkijøtptyi yikanaanwidejtidi ja møj nøø, jøts jade'en sa kyajajttøø.

²¹ Yø'øbi nøøjts ndamiguy'ejxa'amp ja nøø midi tump ku nnøbajntin midi tø xukpaajtyim ja nitso'ok'ajntin. Ka'ap ja nøbajntin ja' wya'añ jøts ja ne'kx ja'ayi wya'ats'ejtindit. Ku dø'øn nnøbajntin, ja Dios idø'øn n'amido'owimp jøts ja nbøky xyikwaajtsa'ant. Jade'en'ampyts idø'øn ja nøbajntin tyuñ jøts ja nwindson'ajntim xukniwaajtsim ja ka'øybi pø ja'axi ja kyujukpyøkyiññ jadigojk xemikøjxp.

²² Jøts ja ojts chajpety, ojts tpu'ixaagi ja Dios Teety y'aga'ngyøjøm, ja tniwindson'ajtp ja ankilistøjk jøts wine'en y'etti niduki'iyi ja yikutujkpitøjkti, tum ja' amuum paajtip.

4

Jade'en nbadu'undit sam ja Dios ja ndunkjøøjp tø xmø'øyindi

¹ Tøxi ja Cristo y'ayøy, nayide'en meets idø'øn xkupiky'att ja ayo'on. Ku jade'en xu'undit tø wynaty ja pøky xkayikmøj'atti,

² jøts jade'en mjaaktsøønidit ya naxwiñ sam ja Dios køøm ttsøky'aty, jøts ka'ap ja mgøøm ja' xu'undit, ja kya'øybi.

³ Tø meets xyikjotkidakøjy jekyip ku xpadundi y'ijtyip pøn ja Dios tka'ejxidip. Ja' y'agujkpy meets y'ijty mdsøøni ma ja axøøkpi yigaappi, ma ja awanax agojnax nayide'en xwindso'øgidi xwinjawidi, midi idø'øn kapaat'ajtyip nbadu'unint.

⁴ Ja'abi jaa'dyi, kumaap ja tjawidi ku meets ja xka'ukpadu'unxiniyidi ja y'axøøkpi yigaappi tsinaa'yin, paty meets myikjigajpxy myikpagajpxy.

⁵ Ka'ap meets ja xmøjpikta'akt, kyøyaktip ja køøm ja tøy'ajntin jøts ja yiktiidyu'undit, ja' ja nøjxk tiidyuujnidip pøn ttiidyump ja oo'kpi jøts ja jujkpyi.

⁶ Ja' pøn tø y'oo'kni, tø yiktuk'ixy yiktuknijawi sudso dø'øn ja y'anmija'win xemikøjxp ndejint y'uktsøønit møøt ja Dios. Jaayip idø'øn ja ñamyayi tpadso'ondakni ja xemikøjxpit jujky'ajntin ku ja Dios yja' tkupøkyiyidi, øy ja kawine'en yjayiktiidyuundi ya naxwiñ, tjapaatti tja'ejxti ja kajkin ja o'jkin ja'adi.

⁷ Wingonipxi jits kyudigøøgyøjxint tuki'iyi ja pikta'aky, paty meets ja y'øybi winmaa'ñ xyiktu'undit jøts xamija'myatsidit ja Dios.

⁸ Ja tsøjkin meets idø'øn ne'egi mmøøt'ajtp, jabi yajkpxyi ja maa'lxujkin ja', jøts ka'ap ja tsep ni ja aki ja tkayikmajada'aky.

⁹ Nagyupøkidi mjønjothp mdøjkjotp, pøni pøn jam memp ja'tp, kidi ti x'ama'at'atti.

¹⁰ Kija' meets idø'øn xu'unt ja mdunkjøøjp sam ja Dios tø mmø'øyidi jøts jade'en mnadyabudøkyiyidit nixem niyam pøni sa Dios ja kunuu'kxin køx kidā'ak tø mmø'øyidi.

¹¹ Pøni jaa pøn tniagjpxwa'añ ja Dios yja', ja Dios idø'øn ja y'ayuujk ja wyinmaa'ñ ja yiktuujnip. Pøni jaa pøn myigu'uk tpuðøkiwya'añ tuki'iyi dø'øn ja tyiktungøxt ja møk'ajntin midi ja Dios yajkpy. Jøts jade'en ja Dios Teety ndamøja'wa'ant ndagunuu'kxyja'wa'ant ja ndunkjøøjp nwindson'ajntim Jesu-cristo køjxp, pøn tu'ugyi ja øy'ajntin ja møk'ajntin tmøøt'ajtp xemikøjxp. Jade'en idø'øn yjatt.

Ku ja Cristo nbadu'unint, ayø'ombajntimp

12 Meets migu'uktøjk, kidi kuma'ayin xjawidi ku møk m'ayo'ombaatti, kidi mnømdi ku jade'en kyapaat'aty.

13 M'øyjawip meets idø'on ne'egi ku meets idø'on Cristo møøt m'ayo'ombaaty, jøts nayide'en wyinaty xaxondaknidit ku tñanky'eixit ja myøj'ajtin ja y'øy'ajtin ku wyinaty myeni jadigojk.

14 Jotkujk meets idø'on mnayjawiyidit ku myikwingajpxtit myikpagajpxtit Cristo køjxp; jabi ja Diosxi meets ja y'Espíritu Santo mmøøt'ajtip. Axøøk yigaap ja nwindson'ajtim ja tñimadya'akti, ka'ap meets nayide'en, ja'axi meets mwindsø'jkip mwinja'wip.

15 Møk tsø'ødyu'unin møk payø'øyin ne'egi ñaxy ku nyikjaa'y'o'jkint ku nma'jtsint, ku tigati ndatøjka'ant ndakajpxa'ant midi'ibi adøm xkapaat'ajtim.

16 Ka'ats ja ne'egi chø'ødyu'uni ku ja Cristo yja' ngu'ayo'ombaajta'ant. Ndamøja'wa'amp ndagunuu'kxyja'wa'amp adøm idø'on Dios ja ne'egi.

17 Ixyam adøm idø'on ndiidyunk tyuu'na'amp pøn jaty ja Dios ja'ajtidip. Møkts adøm ja ndiidyunk ñajxindit, ¿sats idø'on ja yja' mye'endit kyida'aktit pøn ja Dios tkabadundip?

18 Jabi ja øyjaa'yts ja ñitsoojkin ñiyjøjxk tkapattip, ¿sats idø'on ndejint tyimyjattit pøn ja Dios tkamimadoodip, pøn ja chinaa'yin tyiknajxtip pøky'agujkpy?

19 Patyts pøn ja Dios yja' tmi'ayo'ombaajtidip sam ja kø'øm tø tyamidsøkyidi, ka'ap ja mibaat t'ixmatstet ja y'øybi, tyun'etibyim ja'adi, amuum ja y'anmija'win ttamioyxtit ja Dios pøn yikojidip yiktsoojkidip, nijuuni ja kyamajtstu'udyidi.

5

Ku ja Cristo yjanchja'wibi yikajpxwejt

1 Ixyam ngajpxwejwa'añ pøn jam mnigubajk'ajtiyidip, ja møjaa'dyøjkti, jabi nayja'abi tunkxi nmøøt'ajtpy, ja ku øts idø'on kø'ømyi ndyimy'ijxy sa dø'on ja Cristo y'ayo'ombaajty. Nbaatp øts nayide'en ja øy'ajtin sam nayide'en ja møjaa'dyøjkti, ku wyinaty ja nwindson'ajtim tø ttukmibaat'aty.

2 Paty øts ixyam mee møjaa'dyøjk nnøjmidi jøts yikxon x'ejx'ettit pøn ja Dios yja' tpaduujnidip midit meets tø myiktagidøki; kø'ømdsøky idø'on meets ja xu'unt sam idø'on ja Dios kø'øm ttsøky'aty, ka'ap akikøjxp jøts ni meengyøjxp ja xkatu'undit.

3 Kidi meets ja mgutujk nugo xamajada'aky, tuda'aky idø'on ja xuu'mo'odit jøts ja m'øchinaa'yin xuk'ejxpajtin'attit.

4 Kuts jade'en wyinaty myeni ja møj ejx'etpi jøts meets xpøkt ja møj øy'ajtin midit niwindem xøøw ja kyudigø'øyin kaja'tp.

5 Ixyam meets una'jktøjkti ngajpxwejwamidi, mimadoow meets idø'on tuki'iyi ja kyutujk ja møjaa'dyøjkti, sam meets niduknax nixem niyam mnagyupøkidit. Jabi jade'ents ja wijkyajpxy wya'añ ku ja Dios ka' ttsøky pøn kø'øm namyøjpiktajkidip, jøts ja' tpuðøki y'øy'ajtingøjxp pøn tmøøt'ajtp ja tuda'aky'ajtin.

6 Ku xmiduda'aky'attit ja Dios myøk'ajtin, nay ja'ayi dø'on kø'øm mgunuu'kxyidip ku ja xøøw jumøjt wyinaty tpaaty.

7 Tagidøkidi ja Dios tuki'iyi midit mbamaadyip mbadajtip jabi ja'axi ja tyunk'ajtpy jøts adøm ja xtsojkint.

⁸ Nay'ejx'etidim, wijy kejj nabyikta'agidi; jabi oxı ma y'ixy kyoy ja miku', ja mmidsep pøn mduk'ixmatstawjniyidip ja mjanchja'win.

⁹ Mimøk'atti, tamøk'atti ja mjanchja'win, ja'myatsti ku nayide'en ja mmigu'uktøk y'ayo'ombatmıdi o madsoo sam meets.

¹⁰ Ku adøm wyinaty tø n'uk'ayo'ombaajtyindi waani, xjats adøm idø'øn ja Dios xyik'øø'yandit jøts xmøøgyøjxındit ja møk'ajtin jøts jade'en nısa nga'ukjajtnındit. Xpa'ayo'ondip idø'øn ja Dios ku kawınmaañi xkunuu'kxındi, jøts ku kø'øm tø xwaadsøø'yim jøts adøm n'ejxındit nbaajtındit ja y'ø'yajtin ja myøj'ajtin xemikøjxp møøt ja Jesucristo.

¹¹ Tu'ugyi dø'øn ja Dios Teety myøk'ajtin møj midı niwindem xøøw ja kyugøjx'ajtin kamemp. Jade'ents idø'øn ja yjatt.

Ja kajpxpoo'kxin midı tyagugøjxiñip

¹² Yjanchpadumpy tuda'aky'ampy ja janchja'win yø Silvano adøm nmıgu'uk. İxyamts øts ja ndamıgaxı tu'uk ja nøky midı tø nja'ay jøts meets ngajpxwejwa'añ jøts ku Dios kyunuu'kxin tø mmø'øyidi jøts jade'en'ampy tñanky'ıjxyı pøni ti jatı tø xpaatti x'ejxtı. Mdsojkıdip meets ja Dios jøts kidi mıbaat x'ixmatsti, tu'ugyi yikxon xpanøjkxtit.

¹³ Mdanıgajxidip øts ja kajpxpoo'kxin ja Babilonia janchja'wıbıdi pøn ja Dios tø t'awaawmujkmi nayide'en sam meets. Nayide'en ja ngajpxpoo'kxmıyidi ja mıxy Marcos midı n'u'nkja'wıp pøn øts xpudøjkıp.

¹⁴ Nagyajpxpoo'kxıdi nıxem nıyam sam tu'ugyi ja jaa'y ñamyayıdi Cristo chojkingøjxp.

Jade'en ø nwa'añ jøts ja øy'ajtin xmøøt'attit pøn ja nwindson'ajtim Jesu-cristo yja'ajtpy. Jade'ents idø'øn yjatt.

JA MYĪMAJTSKPI NŌKY MIDI JA PEDRO YJAAY

Ku ja Pedro tnijayi pøn tjanchja'widip ja nwindson'ajtim Jesucristo

¹ Ōts idø'øn Simón Pedro nxøw'ajtpy. Ōts ja nwindson'ajtim Jesucristo nmidump jøts øts ja nayide'en ngudanaapy. Ixyam meets ja nøky ndanigaxi pøn nayide'en tø xpaatti ja janchja'win sam øøts ja nja', ja'agøjxp ku ja nwindson'ajtim Jesucristo tyiyi kya'pxyi.

² Jade'en sam x'ejxtit xnijawidit ja Dios Teety jøts ja nwindson'ajtim Jesús, nayide'en idø'øn mdaja'adiyidit ja y'ø'y'ajtin kyunuu'kx'ajtin.

Ja' midi yiknigajxø'øgiyip pøn tjanchja'widip ja Cristo

³ Myøk'ajtingøjxp adøm ja Dios Teety xmø'øyim køx kida'ak midi xka'ejtxa'amp jøts jade'en øy tsuj ja ndsinaa'yin nyiknajxint, sam ja ajot'ajtin nayide'en yikmo'ot, jabi tøxi Cristo xuk'ijxyim pøn tø xwi'ijxyim xwigø'ønim y'ø'y'ajtingøjxp myøk'ajtingøjxp.

⁴ Nay yø'øbi køjxp adøm nayide'en tø xmø'øyim ja y'øybi, ja awejx'ajtin sam idø'øn ku tijy xyiknitso'okwa'añim ya naxwiiñ, ma ja tigø'øyin kadye'eyin y'ity, jøts jade'en ja kyunuu'kxy y'ø'y'ajtin xukpaajtint.

⁵ Pøni nbaatwa'añimp idø'øn ya'at, ja janchja'win idø'øn nmøøt'ajtim; ku ja wyinaty nmøøt'ajtyimp, winets ja tiichinaa'yin ja øchinaa'yin n'ixa'ayint; ku ja wyinaty tø nbaajtyim xjats idø'øn nbadøjka'ant sudso ja Dios yja' nnija'wa'ant midi tø ttanibiktaagi;

⁶ Kuts ja wyinaty nmøøt'ajtna'am, jøts ja yja' jade'en nbaduujna'ant jøts adøm ja ngø'øm ja' n'ixwejtsint; kuts ja wyinaty jade'en tø ndu'uñim xjats idø'øn ja maa'kxujkin nbadøjka'ant jøts nyiktu'unint nixem niyam, jøts ja Dios yja' køx kida'ak jade'en nnadyamiyojxa'ant;

⁷ Kuts idø'øn nmøøt'ajtna'ant xjats idø'øn ja nmigu'uk adøm nixem niyam møøt nnamyaajya'ant; jøts jade'en ja tsojkin nmøøt'ajtin midi kamastu'udyim yikja'wip.

⁸ Kuts ya'at xyikmøjdit xyikyajkidit midi mmøøt'ajttip, zja ti nugo meets ndejint tø x'ejxn i xnija'wiñi ja nwindson'ajtim Jesucristo? Jabi ka'axi ja mdsinaa'yin nugo xyiknaxtit ya.

⁹ Pønts ya'atpi winmaa'ñ tkaba'ayoodip, jade'en idø'øn tyimyjaty sam tuk'uk ja jaa'y kube'ets kugoots y'etwa'añ kø'ømdsojkingøjxp; ka'ap ja t'ukja'myajtsni ku ja nwindson'ajtim Jesucristo ja pyojkpi tø tku'oogi jøts ku yam yjapaat'ajtniyi jøts ja chinaa'yin tyiktigajtsni.

¹⁰ Jade'ents mee migu'uktøjkti, nan'ky'ejxidi dø'øn ku meets ja Dios tø mw'i'ijxyidi tø mwigø'ñidi, jøts jade'en niti nima ja mjanchja'win kyawinguwopidit.

¹¹ Jøts jade'en wyinaty agujk jotkujk mdøjkiñidi ma ja nwindson'ajtim Jesucristo ja kyutujk ja yjaa'y ttanitani, ma ja yiknitsokpi xemikøjxp xyik'ejnt.

¹² Paty meets ya'at ejtp ndukja'myats'ett, øy yø xanija'wiñidi øy yø xjadamøk'ajtnidi Dios tyiy'ajtin midi mmøøt'ajttip.

¹³ Øy øts idø'øn ja njawi ku meets njaakajpxwejt, ku njaakjujky'att,

¹⁴ Jabi tøxi øts ja nwindson'ajtim Jesucristo xuknijawi ku øts tsojk ya'at naxwii'ñit nmajstutnit.

¹⁵ Tuki'iyi øts yø n'aaw njoajt nbikta'akt, jøts xja'dyangøxtit yø' kajpxwejin, jøts jade'en ku wyinaty tø nja'oo'kni njadigø'ñi, ejtp yø xja'myats'ettit.

Pøn t'ejxtøø wyemp y'amp sa Cristo tnanky'ejxøø ja myøj'ajtin

16 Øy meets mwā'ant ku myikwindaa'y'atti ku meets tø ndukmadø y ja xpøjkin midī ñigajpxy ja nwindson'ajtim Jesucristo myø'ajtin jøts ku ja mye'ent jadigojk. Ka'ap øøts yø kø'øm tø nyik'øyi yø' madya'aky, jabi tøxi øøts idø'øn kø'øm ndyimy'ixy ja nwindson'ajtim y'ø'y'ajtin ja myøj'ajtin.

17 N'ejx øøts ku ja Dios Teety tyikjajty jøts ja Cristo ja windsø'jkin winja'win tpaatt, ku ja ñine'kx tyigajch jøts ku amuum chamaambijky aju'uk agujkp. Nmadoow øøts nayide'en ja Dios Teety y'aaw y'ayuujk ku yide'en wyaan: "Øts ya'at n'U'nk midī kawinmaañi ndsojknajpxy, midī øts ixyam øy yikxon ndajotkujk'ajtpy."

18 Kø'ømxi øøts idø'øn ndyimyadøø y ja Dios Teety y'ayuujk midī tsajpjøtpy kidaajk, jabi jamxi øøts wyinaty kojpkøjpx midī kunuu'kxy, møøt øøts ja nwindson'ajtim jam wyinaty.

19 Kidi yø'øyipxi dø'øn ja'ayi nugo ejxpajt'ajtp, pø tøxi ja Dios Teety ja kyajpxy tpaduñ midī ja kyugajpxy windi'ixyip yjaadyandøø. Øy'ajtp idø'øn jade'en ku jade'en xu'unt ku xunk'attit yø'øbi kajpxy, yø'øbi ayuujk, midī ja wejin ja kajin xmø'øyimp jøts ja kugoots'ajtin jade'en xmajststujtint. Jade'ents Cristo ja yja' xagujajamp xagudøø'kxamp kunim ja mye'ent jadigojk jøts kø'øm ñanky'ejxiyitnim.

20 Ja ku dø'øn jawyeen kuwani xñijawidit jøts ku ja Dios kyajpxy ka' nugo øy pøngapøn nugo ajawi tja'gyuki,

21 jabi ka'axi ja Dios kyugajpxy kyø'øm winmaa'ñ ttakajpxtøø. Dios Teety miyøxy ja'adi, jøts tnigajpxidi ja yja' sa jaty ja Espiritu Santo wyinmaa'nmyøøjyidi.

2

Pøn ñanky'ixpøjkidip ja taay'ajtin

1 Nayide'en idø'øn Israelit jaa'y y'ejtmidi pøn ñadyijyi nañikajpxidip ja Dios kyugajpxy; nayide'en meets idø'øn winaagin xñitaayiyajtmidit ja Dios yja', pøn idø'øn kø'øm t'ejxma'tnidip ja nwindson'ajtim midī tø yiknitsø'øgyidi; kø'øm idø'øn ja myøj'ayo'on wyinaty tsojk t'ixa'adi.

2 Namay idø'øn jaa'y ja tpabøktit ja y'axøøkpi tsinaa'yin, jøts ja'agøjxpti wenk yiknimadya'akt ja Dios kyajpxy midī yiknitsoojkp.

3 Kuts ja meen ja t'amidit tjotpidit, jade'en meets idø'øn mwigaadsidit mwibøkidit, ku o tigati kajpxy mdawindaay'atidit meengyøjpx; ja'atp idø'øn ja myøj'ayo'on ja'adi, niti nitsoojkin, jabi jekyixpi dø'øn tø yiktanibiktajkiñidi ku jade'en yjattit.

4 Ka'ap ja Dios tmaa'kxuujky ja y'ankilistøjkti pøn kamimadoojyidi, jagam idø'øn ja tñajtswojpiy'iñ mā ayodaajk jap, jøts jap kube'tsits kugoots tsumy t'awejxti ja tiidyu'unin.

5 Nika'ap nayide'en ja Dios tmaakxuujkmi ja jaa'y pøn jekyip tsinaamyidøø ku ja Noé yjujky'ajty. Ja kom tuujxi dø'øn tyanigajx, jøts jade'en tuki'yiyi ja naqxwii'ñit ñijaa'xni ñigomni, jøts jade'en y'o'jkøjxtøø ja ka'øyyaa'dyi. Ja'ayi tyiknitsøøjky ja niwixujkpi jaa'y jøts ja Noé pøn ja tiichinaa'yin tnigajpx.

6 Nayide'en tyikutujkmaa jøts kyudigø'ødyit ja kajp midī txøøw'ajtøø Sodoma jøts Gomorra, jade'en tyikudigøø, nugo jaam tyiktaañ, jøts jade'en t'ejxpajt'attit ja ka'øy jaa'y pøn wyinaty ja chinaa'yin tyiknaxwandipnim.

7 Yiknitsoojk ne'egi ja Lot, pøn y'ijty øyjaa'y'ajtp jøts pøn nayide'en tjanchø'ødyunja'widip ja y'axøøk tsinaa'yindi.

8 Jabom jabom idø'øn ja y'ijty yjotmay'øøky ku t'ixy tñijawī sa ja'abi jaa'y yjanch'adø'øtstøø.

9 Jade'ents idø'øn, maajyip idø'øn ja nwindson'ajtim jøts ja xpudøjka'ant ma ja yigaappi y'axøøkpi xnimajada'akwa'añim wine'en adøm tø nadyamiyojxna'andi ja nwindson'ajtim yja', jøts nayide'en myaa'miyi tyik'ayo'ombaatt øy pøn tundigøøbyidi ku wynaty ja tiidyu'unin myiñ kyida'aky.

10 Yik'ayo'ombaattp ja Dios ja'adi dø'øn pøn kø'øm ja y'axøøk tsojkin tpadundip jøts pøn tteky'a'an'ajttip ja nwindson'ajtim kyutujk. Namyikajxidip ja', ap tyimñayjawiyidi; ka' ñadyiyi tyimchø'øgidi jøts tka'ømyigajpxti tka'ødyeti ja kutujk'ajtin midi jap tsajpjøtpy,

11 yam ja ankilistøjkti niti nisa kyawa'andi jam nwindson'ajtim wyingujkp, jawaani møkts ja ne'egidi ja kyutujk.

12 Nayide'en idø'øn ja'adi sam ja jiyujkidi, niti ja'gyukin tkamøøt'atti, nugo ja yjuky'ajtin yikjuky'atyidi, ja'ayi t'awejx'atti sa ja myigu'uk tmatstip uk yikmatstip kø'øm, sa ja o'jkin tigø'øyin tpaattit. Tum wimbet ja tmadoojidi ja Dios yja'. Ka'ap ja tjagyapi ja madoogukin; tyimñayide'en idø'øn ja y'oooktit sam ja jiyujkti nugo ñaxti,

13 kyu'ayo'ombaadidip sam ja myigu'uk tø tyik'ayo'ombaatti. Jotkujk idø'øn ja tjanch'ukjawidi ja y'øbyi yjøkchpi midi pojñ nājxp; nugo dø'øn ja chø'ødyundi ku meets ja mxøduñ møøt, jøts ñadyiyi yjanch'ukñankyotkujk'atyidi jøts meets ja jade'en xpabøkt.

14 Ka' idø'øn ja tø'øxyøjk ja nugo t'ejxtit, ja' idø'øn ja wynmaa'ñ'attip jøts tmøøt'attit; ka' idø'øn ja pøkytunin yjotnaxyidi. Ja win'øø'nik ja'ayi tyunk'ajttip jam ma pøn ja yjanchja'win kyamøjkidinin; tuki'iyi tñiwa'anwa'angøjxti ti jaty ja myigu'uk yja'ajttip; ja dø'øn møk ayo'on ja Dios ttukpaadidip.

15 Abiktyuu' idø'øn tø tpabøknidi ku ja tiidyyu' tø t'ixmatsti. Wa' idø'øn ja y'ejxpajtin pyaduujnidip ja Beor myajnk midi Balaam xyøøw, pøn ñadyiyi kyajpxnajx ja Dios yja'. Ya'at jaa'y, o dø'øn ja tigati ttunwaañ, jøts jade'en ja meenjingaap taagyøjxp tpaaty,

16 kunim idø'øn ja Dios tu'uk ja jachu' tyikajpxt jøts ja pyøky yik-tawindsø'øty jøts jade'en ja kyujuun'ajtin tka'ukyikmajadañni.

17 Jade'en idø'øn ya'at jaa'dyi sam tu'uk ja tø'øts nøømu'ut ni tukxa'kx ja ñøø. Nayide'en ja'adi, sam ja poop yoots midi katuup, nugo pyojwidity; jap idø'øn ja kyastigi agootstujpy tø yiktanibiktaajkiñidi.

18 Jabi tum wenkxi ja myadya'aky ja'adi, tum ja katumbi kyajpxy'ajttip, jøts ja jaa'y twindaay'atti ku ja y'axøøk winmaa'ñ ttukpadundi yam ja wynaty nanmim tø tja'uk'ixmajtsmidi ja'abi tsinaa'yin.

19 Ja tsinaa'yin ja tyaguwa'anidip ma øy sa y'adøtsnidit. Tø ja kø'øm tñimiywanjajtnidi jiyujkin ja axøøkpi tsinaa'yin. Ku pøn nugo tyimyikmajada'aky yø yjade'embi, janch amøñi dø'øn ja tpaduñ øy yjawī sa tmijajtni.

20 Jawaani møk idø'øn ja ayo'on tpaattit pøn ja nitso'ok'ajtin tø t'ukpaaty nwindson'ajtim Jesucristo køjxp, jøts jadigojk ja kya'øy'ajtin tpadundøjkigyojmidi.

21 Ne'egi øy jeexyip tpaaty ku jeexyip tkanijawidi ja tiichinaa'yin, jøts jade'en jeexyip tka'uk'ixwejtsni ja Dios kyutujk midi øy midi wa'ats, midi wynaty tø y'ukyikmo'odi.

22 Jabi tōxi dō'ōn ja' ayuujk tyiy ku jaa'y y'ukwa'añ ku ja uk ja y'ich jadigojk tniwimbity, jōts ku ja kuch midi namdseepnim jits ja jadigojk nay jaayi ja mo'onts tseemujkojmi. Jade'en idō'ōn yō ndejint yō'ōbi jaa'dyi.

3

Ku ja nwindson'ajtim mye'ent jadigojk

1 Meets migu'uktōjkti, ya'at idō'ōn myimajtsk nōky midi mee ndanija'ayip. Nayide'ents meets icyam ndanijayi sam jawyeen, jōts ku meets x'ejxkapt ja tiiwycinmaa'ñ midi ngajpxpatpy.

2 Jade'en o nwa'añ ku meets xja'myatst ja Dios kyugajpxy sa ja y'ayuujk tyikwaañ pōn ja Dios tō ñadyamiyōxyidi, jōts nayide'en xja'myajtstmidit ja nwindson'ajtim kyutujk pōn yiknitsoojkp, sam oōts tō nnigajpxy pōn ja kyudanaabyi'ajtip.

3 Jawyeen idō'ōn tymbyaat'atyi meets xnijawit ya'at: ku wyinaty myeni kyidakni ja tiidyu'unin, winets idō'ōn ja jaa'y kyaxō'ōtkit midi tyaxe'ektip tuki'iyi ja Dios yja', jōts nugo tniidsōōnidit midi axōōk wyinmaa'njyōtpy myōōt'ajtip.

4 jōts yide'en wya'andit: “¿Samts idō'ōn ja Cristo y'ayuujk tō yjajtni kuts idō'ōn ja tity wyimbett jadigojk? ¿Windemnimts idō'ōn ja yjatt? Jabi nitits kyamiñ kyaja'aty, jade'eñim y'ity sayim ja n'apteety tyiknaxtōō.”

5 Kyaja'myajtstip idō'ōn yō' ku naxwii'ñit kawinaak ojk tō yjadigach, jabi windi'ixyipxi ja tsajp ejtni jōts ja naajx pyidsimñim nōōjōtpy, Dios Teety y'ana'amingōjpx.

6 Kyaja'myajtstip idō'ōn nayide'en ku ja Dios kawinaak xōōw anaduu' tkejxy, jōts ja naxwii'ñit jaa'y jade'en kyudigōōgyōxtōō.

7 Y'awixy'ajtip idō'ōn yō', jawaani mōj ja ayo'on midi wyinaty memp sam ja kō'ōm tō ttanibiktajkiñi ku tnajtskaxit ja jōnyow. Ja'abi jōōn idō'ōn yiktōōyidip ja ka'ōyjaa'dyi ku wyinaty ja tiidyu'unin ñaxy.

8 Mnija'wip meets nayide'en ku ka'ap ja nwindson'ajtim ja xōōw ja jumōjt tmōjpikta'aky, jade'en ja t'ixy ja tu'ukpi xōōw sam ja tukmilbi jumōjt.

9 Kidi meets mwinmay sam winaagin wya'andi ku ja nugo tyaa'ni ku kyamiñ jadigojk sam ja kyajpxy tō tpikta'aky, mōk idō'ōn tyuda'aky'ajtim ja tyikmajada'aky jōts ja jadine'en xmaa'kxujkyim. Ja' chōjky jōts ka'ap pōn nugo wyindigō'ōty jōts ja ndsinaa'yin nyiktigajtsint.

10 Jade'en idō'ōn ja nwindson'ajtim jotkumoni ja tyidyu'unin tmōōtja'att, jade'en sam maa'tspa'an adsu'jkyi koots myiñ yam niti kyayikjōp'ixy. Kuts ja nwindson'ajtim yja'att jade'en, winets idō'ōn tsajp pyōmenga'akt ku ja kyudigō'ōyin tō myeni. Winets tyōōbyōjkōxnidit tuk'ojkyi ja tōō'kxpi tsamambi midi jam tsajpwemp, jōts yō naxwii'ñit tuki'iyi tyigōōñit jōnyow agujkpy.

11 Jabi jade'enxi dō'ōn ja ayo'on ñaxkida'akt ya naxwiiñ, ijadits adōm idō'ōn nganadyamiyojxa'ant ja Dios!

12 Yikyijyidi ja mxōōw ja mjumōjt jōts ja yja' xyikmayidit, jōts jade'en chojkit ja xōōw ja jumōjt ku wyinaty kyudigōōgyixy jōnyow agujkpy tuki'iyi midi jam tsajpwemp jōts ya naxwiiñ;

13 ja'ats idō'ōn adōm n'aweixindip ja jembyi tsajp ja jembyi naajx midi ja Dios tō tni'adsowi kō'ōm, mā dō'ōn niduki'iyi ja jaa'y ja y'ōybi ja tyiibyitu'undit.

¹⁴ Paty meets migu'uktøjkti, ku ya'at xjøp'ijxy'attit, tum ja' meets mdu'ump midi ja Dios chøjkpy, tsokti ja tuda'aky'ajtin, nixem niyam mnamyayidi jøts jade'en ja Dios mbaadiyidit niti pøky niti kadyeey.

¹⁵ Ja'gyukidi ku ja nwindson'ajtim tsojk kyamiñ, paty idø'on ja ttuñ jøts nyikmøja'ant nyikmaya'ant ja nitso'ok'ajtin, ja tyuda'aky'ajtin idø'on ja jade'en yiknigaxi'kpy. Nayide'en meets idø'on tø mdanija'ayimidi yø'øbi winmaa'yin ja Pablo, adøm nmigu'uk, ku tyiktuñ ja ja'gyukin midi ja Dios tø myø'øyi.

¹⁶ Tum ya'atpi ixpøjkin idø'on kyajpx'ijtpy ma ja nøky ja jaa'y ttanijayi, øy idø'on ja muum tsep ku nja'gyukiwya'anint, jaa dø'on ja kaja'gyukibidi, jøts pøn ja yjanchja'win kamøktaktipnim tum wenk idø'on ja ixpøjkin ja tjuutti, ka'ap jade'en ja Pablo yjawa'añ ñøkyjøtpy. Nayide'en idø'on ja ttumidi tuki'iyi ja Dios kyajpxy kyø'ømgudigø'øyingøjxpti.

¹⁷ Paty mee migu'uktøjkti, jabi mnija'wiñidipxi meets ya'at tuki'iyi. Nay'eix'etidi jøts ka' xpabøktit sa yø' jaa'y wya'andi, ku taagyøjxp myikpøjkiwya'andi ja mjanchja'win.

¹⁸ Ne'egi ja' pawinmaydi sa ja nwindson'ajtim Jesucristo ja tyiy'ajtin xnija'wiyidi. Yikmøjidi ja tsojkin ja pa'ayo'owin midi ja yiknitsokpi tø xmø'øyim, pøn ja y'øy'ajtin myøj'ajtin xemikøjxp ejtp. Jade'ents idø'on yjatt.

JA MYĪDU'UKPI NŌKY MIDI JA JUAN YJAAY

Ja' midi xyikjujky'ajtindip

¹ Ya'atpi nŏky ōŋ ngejxpy, jŏts mee ndukmadŏy ja Jesucristo, ku ja jaayim wyinaty ku cho'ondakijxy tuktsajp'agida'aky. Nay ja' ōŋ tŏ n'ixy tŏ nmadŏy jŏts nayide'en ōŋ tŏ ndukpaaty ja ngŏ' ndeky; yŏ' y'ayuujk yŏ' wyinmaa'yin adŏm ndajujky'ajtyindip.

² Tŏ ja űankűigaxi'igiyi, ōŋts tŏ n'ixy ōŋts tŏ nnijawi, paty mee ndukmadŏy ixyam ku ja ejtp mŏŋt chŏŋni ja Dios Teety, tŏts idŏ'ŋn ixyam xnimi'iűiűi.

³ Tyiűbyi ōŋts ndyiműigajpxy midi ōŋts idŏ'ŋn tŏ ndyimy'ixy ndyimyadŏy; paty mee ndukmadŏy jŏts meets m'ett amuki mŏŋt ōŋts, kumi tyimdyiy tyimyjanch ku ōŋ mŏŋt n'ity ja Dios Teety jŏts nayide'en mŏŋt ja y'U'nk Jesucristo.

⁴ Yŏ'ŋbi ayuujk yŏ'ŋbi winmaa'yin meets ixyam ndanija'ayip jŏts yikxon ejtni xoni mwinmaa'űi y'ettit.

Janch wa'ats ja Dios ejxim ja jajin

⁵ Yŏ' ōŋts nnigajpxwampy yŏ' ōy'ayuujk yŏ' ōmyadya'aky midi ōŋts ja tŏ xukmadŏy: jŏts ku ja Dios Teety janch ōy janch wa'ats ejxim ja jajin, jŏts niwine'enin ja ka'ŏy'ajtin tkamŏŋdi.

⁶ Kuts nwa'a'űiűiűi ku ja Dios Teety nmŏŋt n'ijtyindi jŏts nika' n'ukpaduu'na'andi ja n'ayuujk, nugo adŏm ja nmidundigŏy adijchindi. Yŏ' idŏ'ŋn mŏj taay ku jade'en nugo nwa'a'űiűi.

⁷ Kuts ndsinaa'yindit ōy wa'ats ejxim ja Dios Teety chŏŋni, winets nixem niyam tu'ugyi ja winmaa'űi nmŏŋt'ajtyindit, jade'en idŏ'ŋn ja y'U'nk Jesús xyikpŏkwyajchindi midi jaty ndu'uűindip ku ja wyidsuuű wyidajxy.

⁸ Xjats ku nugo nichŏky nwa'a'űiűiűi jŏts ku ka' ndundigŏŏ'yindi, nugo kŏ'ŋm nnawyindaay'ajtya'andi jŏts tiy ngakajpxyindi.

⁹ Kuts ndamimadyakŏxindit ja Dios Teety nbŏky, njŏp'ejxindip ja' ku ja ttu'unt midi paat'ajtip, jŏts nay ja xpojkpimaa'kxindip jŏts nay ja' jatyi xyikwaajtsindip midi jaty adŏm ndundigŏŏ'yin'ajtyindip.

¹⁰ Kuts nugo nwa'a'űiűiűi ku ka'ap nbŏky nmŏŋt'ajtyindi, jade'en idŏ'ŋn ja nbiktaajkyindi jŏts ku ja tyaayi ja Dios Teety, niwine'enints jade'en ngamimadŏŏ'ja'ant ja kyajpxy ja y'ayuujk.

2

Jesucristo amuum xűikajpxuujtimp

¹ Meets u'nkti unaj'jkti, ya'at meets ndukmadŏŏpy tuki'iyi ku ka'ap mbŏktyu'undit, jŏts pŏni pŏn wyinaty sa tyimyjajtp paty xnijawidit ku jaa nmŏŋt'ajtyindi tu'uk ja nikajpxutpi jam Dios Teety wyingujpk, ja Jesucristo dŏ'ŋn ja' pŏn janch, pŏn tiy.

² Tŏ ja Jesucristo tku'ayo'ombaaűi adŏm ja nbŏky, jŏts nigidi adŏmyipti, niduki'iyi dŏ'ŋn nayide'en ja na'xwii'űiűi jaa'y.

³ Pŏni nbadu'uűindip ja Dios ja kyutujk sa ja tŏ xuk'ijxyindi xuknija'wa'andi, jade'en'ampts adŏm ja x'u'nkja'wa'ant.

⁴ Jŏts pŏni pŏn wamp ku ja y'u'nk'atyiyi ja Dios jŏts nika'ap ja tpaduujniyi ja kyutujk, ja' nugo kajpxigŏŏpy, nugo ja tyaayi.

⁵ Jøts pøni pøn amumjoojt nadyamidšøky'ajtíp ja Dios, ja'ats tpaduujnip ja Dios kyutujk; jade'ents ja yiknijawi ku nwindšøn'ajtim ja møøt y'ity.

⁶ Pøni pøn tyimwyamp ku møøt tyimy'ity ja Dios, wants nayide'en tyiknaxy sami Jesús tyiknajxy.

Nbadu'unimp ya'at jembyi ana'amin

⁷ Migu'ukti, ka'ap meets ja jemgyutujk ixyam ndanijayi; nay ja' yø' midí mee tø xmadowdi xnijawidi ku ja mdsinaa'yin xyiktšø'ondaktøø jadigojk.

⁸ Yø' meets ixyam njaaktukmadøøpy, yø kutujk, midí janch øy janch tump, øgyajemgyutujk, ja ku ja xem ja yam nnachojkíndit jade'en sa ja Cristo ttuun, jøts mbaat'ajtiyíp meets nayide'en xu'unt. Yø'øbi winmaa'n tyikudigøøpy ja ka'ødyunk, jade'ents ja tsinaa'yin y'øyi pyaadi.

⁹ Jøts pøni pøn nugo wamp ku ja tpaduñ ja jemchinaa'yin, yam ja myigu'uk ja tmi'ambikñim tmijotma'atynim, ja ka'ødyunk ja wyinaty pyadun'adichpnim.

¹⁰ Pøni pøn twamp ttsojpk ja myigu'uktøjkti øpyøni, ja' idø'øn tpadding ja øchinaa'yin jøts niwine'enin ja pyøky kyanadyukpaadyi jade'en.

¹¹ Jøts pøni pøn ja myigu'uktøjk tmi'ajkidíp, ja' nugo tsinaapy ka'ødyunk agujkpy, ka' tñijawi pøni ti tyumpy kyajpxpy, jade'en ja wyimbejtñi ejxim ja kugoots jaa'y.

¹² Meets u'nkti meets una'jkti, ixyam mee nnijayi jøts ndukmadowdi ja'agøjxp ku ja Dios Teety tø mbojpkimee'kxyidi Jesucristo køjxp.

¹³ Teetyi taakti, nayide'en meets ixyam ndukmadø yä'at ayuujk kumi tø mee xpabilky ja Jesús yja' midí jaayim wyinaty ku cho'ondakijxy tuktsajp'agida'aky. Meets wajtyøjkti meets kiixye'edi, ixyam mee ndukmadø yä'at ayuujk kumi tø xmimajada'akti ja miku' yja'.

Nayide'en meets u'nkti meets una'jkti ndanijayi yä'at ayuujk, kumi tø m'u'nk'atyidi ja Dios Teety.

¹⁴ Meets teetyi taakti, jade'en meets ixyam ndanijayi yä'at ayuujk kumi tø xjanchpabøjkti ja Jesús yja' midí jaayim wyinaty ku cho'ondakijxy tuktsajp'agida'aky. Nayide'en meets wajtyøjkti kiixye'edi ixyam ndanijayi yä'at ayuujk ku ejtp mjanchmøkwinmaydi jøts ku ja Dios Teety kyajpxy y'ayuujk tø xpabøjkidi amumjoojt, jøts nayide'en ku tø xmimajada'akti ja miku' yja'.

¹⁵ Kidi nugo xtsojkti ja pøkyunk ni ja pikta'aky midí ya ejtp naxwiin. Jøts pøni pøn t'anømp t'adsojpk ja pøkyunk jøts nika' ja Dios Teety ne'egi ttsøky'aty jade'en.

¹⁶ Yide'en idø'øn ja naxwii'nit jaa'y tjanchojkti ja pøkyunk midí winmaa'njotpy mee'nxidíp, jøts midí tyimchuj'ejtíp tyimchuja'widíp. Ja'ats nugo ja pikta'aky nadyamøja'wiyidíp, ja' ja nugo pyawinmay'ejtíp midí jaty jaa kayik'ødyump yä naxwiin, yamts ja Dios Teety ja jade'en tø tkadanibiktaagi.

¹⁷ Windigøøpy y'ity midí yikpøkyump yä naxwiin, midí nugo yiktsojk anaxp; jøts pøni pøn tpadding sa jaty ja Dios ttsøky, ja'ats y'anmija'win xemikøjxp juky'atp.

Pøn mibøjkíp ja Cristo, jøts pøn ja kamibøjkíp

¹⁸ Meets u'nkti una'jkti, tø jabaat tpaaty ja et ja xøøw ku myenwa'lañ tu'uk ja jaa'y pøn ja Cristo møk myidsep'atwampy, pøn meets nayide'en tø xnijawi xnimadø y; ixyamts nayide'en tø kyaxø'knidi namay pøn tmidsep'ajttíp ja Cristo, paty jade'en yiknijawi ku tø jabaat ja et ja xøøw tpaaty.

¹⁹ Nay adøm nmigu'uk jade'en winaagin adøtstip pøn adøm tø xmajtstuu-tyindi paty ja tmidsep'atwa'andi ja Cristo; nigidits ja' pøn adøm nwinmaa'ñ møøt tuknaxti, ku jeexyip ja'adi, tø ja jeexyip møøt ndaa'ñindi. Jade'en idø'øn yjaty ku winaagin xpuaajchindi, paty wa'ats yiknijawi ku ka' yikxon tmøø'tatti ja winmaa'ñ sa adøm nja'.

²⁰ Adømts ja Cristo tø xuktatøjka'andi ja Espíritu Santo, ja'agøjxp icyam nnija'wa'andi ja tyiiby; ja yjanchpi.

²¹ Paty meets icyam nnijayi ku xnijawidi midi tiy midi janch, ka'ap ø nwa'añ ku ka' xnijawidi; wa'ats mee xnijawi ku ja tyiiby; ja yjanchpi ka' nayide'en sa ja taay.

²² ¿Pønts idø'øn taay'ajtp? Ja'ats idø'øn pøn wamp ku ja Jesús ka' yiknitso'ok'aty. Pø ja'axi tkawamp tkatsojpk ja Dios Teety møøt ja y'U'nk Jesús.

²³ Pøni pøn tkawandip tkatsoktip ja Dios Teety y'U'nk, ja Dios Teety idø'øn wyinaty jade'en kayiktsojpk; jøts pøni pøn twandip ttsoktip ja y'U'nk Jesús, ja Dios Teety idø'øn wyinaty jade'en yiktsojpk.

²⁴ Paty øøts idø'øn nnigajpxy jøts xwinmaa'ñ'attit ja øgyajpxy ja øy'ayuujk midi tø xpabøkti jøts midi yajkpy ja øchinaa'yin; pøni mwinmaa'ñ'ajttip yø', jade'en ja Dios Teety jøts ja y'U'nk Jesús møøt n'ijtyindi.

²⁵ Kumi Jesús kø'øm ñi'adso'owi ku ja xmø'øyint ja øchinaa'yin midi xemikøjxp yikmøø'tatp.

²⁶ Ja'agøjxp mee nnijayi ku nugo myikwindaa'yidit.

²⁷ Pø tøxi ja Jesucristo mmø'øyindi ja Espíritu Santo, paty ka' pyaat'aty; jøts pøn jadu'uk mgajpxwejiyidit, pø ja Espíritu Santoxi mee kø'øm myikwejiyip myikajiyip midi tiy midi janch jøts ka' tyaa'y. Meets migu'uktøjkti, jade'en idø'øn y'ejxi tyiyi jøts yikxon mdsøønidit mdanidit amuki møøt ja Cristo, jade'en sa kø'øm mdukjatyidi ja Espíritu Santo.

²⁸ Jøts jade'en wingujk jotkujk njøp'ejx'ejtindit ku ja mye'ent ja Jesús, jøts jade'en ka' nmitsø'odyu'unindit.

²⁹ Pø tøxi meets xnijawi ku ja Jesucristo y'øyi tyiyi, jøts kuwani xnijawidit nayide'en jøts ku pøn øy tiy yjaa'y'aty, ja'ats ja Dios u'nk'ajtiyip.

3

Sq ja Dios x'u'nk'ajtyindi

¹ Ejx ja Dios Teety xjanchøjkyindi, jøts ja wya'añ ku ja x'u'nk'ajtyindi x'unaj'k'ajtyindi, pø janch jade'enxi adømdi. Pø patyimxi adøm ja ka'ødyumbi xka'ejxkajpyindi xkanija'windi kumi ka'ap ja t'ejxti tnijawidi pøni pøn ja Dios Teety.

² Migu'uktøjkti, tø dø'øn ja Dios x'u'nkpijkyindi xmaa'yijkyindi; ka'animts xuknija'wa'andi pøni sudso njaa'y'ajttindit wiingyubety. Ja'ayi nugo nnija'wa'andi jøts ku ja Jesús ñankñigaxøøkwa'aniiy; jadigojk, jøts jade'en njaa'y'ajttindit njujky'ajttindit nayide'en sam ja', pø yik'ejxpxi ja' sam idø'øn ja chøøni tyani.

³ Pøni pøn tjøp'ejxp jade'en, ja'ats nay'ejx'ejtjip jøts ja pøky kyapaadit, jøts ja jade'en chøønit sami Jesús wya'ats'atyin.

⁴ Jøts pøni pøn tundigøy'ejtjip, ja' Dios kyutujk kyamøjpiktaajkidip, pø yø'øxi tundigø'yin'ajtp ku ja Dios kyutujk kyayikmimadøy.

⁵ Pø tøxi mee xnijawi ku ja Jesucristo ya tø myiñ naxwiñ jøts adøm xyikpøkwyaa'jtsindit, jøts nayide'en xnijawidi ku ja janch wa'ats, ni tu'uk ja pøky tkamøødi.

6 Jade'en idø'øn, pøni pøn møøt y'ity ja Jesús, ka'ap ja jade'en y'ukpøkyun'adøtsnidi sam ja jaa'y pøn tkidyimñija'widip ja Jesús.

7 Meets u'nkti una'jkti, kidi nugo myikwindaayidi; pøn y'øybi tyiiby tpadump, yø' idø'øn øy jaa'y'ajttip nayide'en sam ja Cristo y'øy'ajtin wya'ats'atyin.

8 Pønts ejtp tyimdyundigøøpy, ja miku' yja' pyaduuñidip, pø ja'axi jade'en tyiktso'ondaajk ja pøkyu'unin ja win'øø'nin. Paty idø'øn ja Jesús øjts myiñ jøts ja tyikudigø'øty ja miku' pyøkyu'unin, ja wyin'øø'nin, sa jaty ja y'adi'ich.

9 Ka'ap y'ukpøkyunidi pøn ja Dios u'nk'ajtniyidip, pø ja'axi kø'øm møøjyidip ja myøk'ajtin; paty ka' nugo y'ukpøkyun'adøtsnidi, pø Diosxi u'nk'ajtniyidip.

10 Yide'en'ampy idø'øn yiknijawi pøn ja Dios u'nk'ajtidip jøts pøn ja miku' u'nk'ajtidip, kumi ka'ap ja Dios ja tja'aji pøn ja myigu'uk tkatsojktip, jøts pøn tundigøy'ejttip.

Nachojkindip ja xem ja yam

11 Yø'øbi kajpxy yø'øbi ayuujk midi mee tø xnijawi ku ja m'øchinaa'yin xyiktso'ondaktøø, yø' idø'øn tyijpy ku nnachojka'andit nixem niyam.

12 Jøts ku ka'ap jade'en njaa'y'ajtindit sam ja Cain ku ja y'uch ja tyik'øøjky, ja' pyadumpy ja miku' yja'. ¿Ti ja tyuku'o'jkøø? Ja'agøjxp ku ja tkabaduñ ja miku'.

13 Meets migu'uktøjkti, kidi sa xjawidi ku mmi'ambøjkidit yø ka'ødyumbidi.

14 Tø adøm nmajstuuptyindi yø ka'ødyunk jøts ja øchinaa'yin tø nbabi-jkyindi, jade'en idø'øn yiknijawi ku nixem niyam nnachøjky'andi. Pøni pøn tkawamp tkatsojky ja myigu'uk, ja' pyadun'adichp ja ka'ødyunk.

15 Jøts nayide'en pøn tmi'ambøjky tmi'ajotmatp ja myigu'uk jade'en ja pyidsømni sa yikjaa'y'ookpi, pø mnija'wipxi meets ku ka'ap ja yikjaa'y'ookpi y'anmija'win y'ity xemikøjxp, windigøøpy ja'.

16 Nnija'windip sa Jesucristo xtsøjkyindi amumjoojt, paty adøm ja xku'o'jkandi; jøts nayide'en adøm ja xpaat'ajtyindi ndsojkindit ja nmigu'uktøjkti sam adøm tø nyiktsojkyindi sam adøm tø nyiku'o'jkandi.

17 Pøni pønts jotkujk tyiknaxp, yja'ijxpy ku ja myigu'uk y'ayøwinyam, niwine'enin tkidyimdy'a'ayo'ixy ja pyikta'aky midi ja myøøt, ¿sudsots ja nugo wya'añ jøts ku Dios ja twa'añ ttsøky?

18 Meets u'nkti una'jkti, ka'ap y'øyi ku nugo nwa'anindit jøts ku nmigu'uktøjk ndsøjkyindi; yø' ne'egi øy ku ndyimbyadu'unindit tiy janch. Yø'øts jade'en wingaxø'kp ku ja nachoki amumjoojt yikmøøt'aty.

Sudso jotkujk nnayja'wa'ant Dios wyingujkp

19 Jade'en idø'øn yiknijawi jøts ku nbadu'uñindi ja tyiiby ja yjanchpi, jøts jade'en idø'øn niti ngagamaa'yindit Dios wyingujkp;

20 kuts kø'øm nnañi'øø'na'andit, ku nmaa'yindit ndajindit ku ja Dios tø x'u'nkpijkyindi, pø kø'ømxi ja jade'en tø xtsøjkyindi jøts møj ja', ja' tuki'iyi tnija'wip sa adøm njawinmaa'yindi.

21 Jøts ku ngamaa'yindit ngatajindit winets ngatsø'jka'andit jam Dios wyingujkp.

22 Ja' adøm tuki'iyi xmøøyindip ti jaty adøm n'amidowa'añindip nbøktsowa'añindip ja'agøjxp ku nbadu'uñindi sa ja x'ane'emyindi pøni sa ja ttsøky.

23 Yide'en idø'øn ja y'ana'amin ku njanchja'windi ja y'U'nk Jesucristo, jøts nayide'en nachojki'indit nixem niyam sam ja Jesús kø'øm xa'ane'emyindi.

24 Põnts jade'en tjanchpadundip ja y'ana'amìn, ja'ats ja Dios tmøøt'ejttip jøts ja nayide'en myøøt'ityidi. Jade'en'ampy nnija'windi kudam ja tø xukatøjka'andi ja y'Espiritu Santo jøts ja jade'en køø'm xmøøt'ijtyindi.

4

Ja Espiritu Santo jøts ja' midi tkaminamyajyip ja Cristo

1 Mee migu'uktøjkti, kidi nugo xmibøjkti ja jaa'y pøn wandip jøts ku ja tnigajpxidi ja Dios y'øgyajpxy ja y'ø'y'ayuujk, ejxti yikxon pøni janchpi tyiibyidøøn ja kyajpxtip, pø may adøstipxi ja jaa'y ya naxwiin pøn windaay'ajttip.

2 Yide'ents meets ja xnijawidit: ja' idøø'n ja wyinatyi pøn tjanchja'widip jøts ku Jesucristo ya y'atsnanky'ejxøø tyimyjaa'yin, ja'ats idøø'n ja Dios Teety møøt'y'ity.

3 Põnts jade'en tkamibøjkp ja Jesús, ja'ats idøø'n ja Dios Teety kamøøt'ejtyip; ja ka'øwycinmaa'n ja ne'egi yiktumpy midi tkaminamyajyip ja Cristo. Tøxi xnimadowdi jøts ku ja mye'ent ja ka'ødyumbi øy juuni; tøts idøø'n ja yjanchmiñ, pø jaanixi ja wyinmaa'n ja ya naxwiin.

4 U'nkti una'ljkti, Dios mee mja'ajttip, tøxi ximajada'akti pøn mwindaay'atwajnidip; pø tyimyøkxi ja' pøn mee mmøøt'ejtyiyip jøts nika'ap ja jade'en myøki ja ka'ødyumbi yja'.

5 Ja' ja nugo tyunk'ajttip ja ka'ødyunk ja ka'øwycinmaa'n paty ja tum jap ttuk'ixpøkti ja jaa'y jøts ja jade'en yikmøjawidit.

6 Diost adøm xja'ajtidip jøts ja xmibijkyindi pøn jaty ja Dios møøt'ejtidip. Ja'ats xkamibøjkindip pøn kamøøt'ejtidip ja Dios; jade'en'ampyts nnija'wa'an pøn tpadundip ja y'øybi ja tyiiby jøts pøn tpadundip ja taay'ajtin.

Dios amuum ja tsojk'ajtin myøøt'ajtpy

7 Mee migu'ukti, xpaat'ajtidip ejtp nixem niyam nnachojkandit, jabi Dios wyingujpxi chøøn ja øhøjkin. Pøn ja myigu'uk ttsojkp, pøn ja myigu'uk tpa'ayoop, ja'ats idøø'n ja Dios tjanchja'wip jøts ja jade'en y'u'nk'atyiyi.

8 Pøn tkatsojkp tkaba'ayoop ja myigu'uk, ja'ats tkidyimyjanchja'wip ja Dios, kumi ejtp ja Dios ttsøky ja jaa'y, ejtp ja tpa'ayøy.

9 Jøts adøm ja ojts xani'ejxa'andi sa ja xjanchøjkyindi xpa'ayø'øyindi ku ja tyu'umtspì U'nk ja ojts xaniguejxyindi, jøts ja øchinaa'yin xmøø'yindi y'oo'kingøjxp.

10 Yide'en'ampy idøø'n ja Dios chojkin ja pya'ayo'owin y'ejxi tyiyi: pø nigidi adømxi ja tø ndsøjkyindi nba'ayø'øyindi jawyeen, pø ja'axi adøm køø'm tø xtyimchøjkyindi jøts ja y'U'nk ja xaniguejxyindi jøts ja xku'ayo'owandit ja nbøky.

11 Migu'uktøjkti, pøni tødam ja Dios xtsøjkyindi, ti kuts adøm nganachøjkyindi nayide'en ja xem ja yam.

12 Pøn ja Dios tø t'uk'ixy, nipøn ja tka'ixy; pøni nachojka'andipts nabya'ayo'owa'andipts nixem niyam jade'en ja xmøøt'ijtyindi jøts ja jade'en njaaktyimchojkint.

13 Nnija'windip ku ja Dios møøt n'ijtyindi jøts xnamyøøt'ejtindip ja nayide'en, ja'agøjxp ku ja tø xukatøjka'andi ja y'Espiritu Santo.

14 Tø øøts n'ixy, tø øøts nnijawi wemp'am, paty øø nwa'añ jøts ku ja Dios Teety tø tjanchkexy ja y'U'nk yiknitsokpi ya naxwiin.

15 Põnts tjanchja'wip jøts wya'añ ku ja Jesús Dios U'ngi, ja'ats ja Dios tmøøt'ejtp jøts nayi møøt'ejtp ja nayide'en.

16 Jade'en'ampy adøm ja tøm nnija'wa'andi jøts ku xjanchojkyindi xpa'ayo'øyindi ja Dios. Pø ja'axi ejtp tsojpk, pø ja'axi ejtp pa'ayoop; pønts ja tsojkin yikwingaxi'kpy, ja' ja Dios møøt'ejtíp.

17 Ku jade'en nbadu'unint, jade'en ja nyikmøjtæajkint ja øwyyinmaa'ñ, jøts ja jade'en ngawingudsø'jkant ku ja mye'ent tæidyumbi; ja'agøjxp ku ja nayide'en xukwinmaa'yimp ja tsojkin ja pa'ayo'owin sam ja xtsøjkyindi sam ja xpa'ayo'øyindi.

18 Niwine'enin ja Dios chojkin ja Dios pya'ayo'owin xkayiktsø'jkandit. Yjaaktyimykigtøøgyijxpy ja tsø'øgi ja ne'egi, jøts pø yiku'ayo'owixpi ja tsø'øgi ku pøn chø'øgi, ja'ats idø'øn tkayikmøjtøjkipnim ja Dios chojkin ja Dios pya'ayo'owin.

19 Ja'agøjxp adøm ja Dios ndsøjkyindi kumi jawyeen ja jade'en tøm xtsøjkyindi.

20 Pøn nugo wamp: "Ndsøjky øts ja Dios", jøts ni ka'anindimts ja myigu'uk ja twa'añ tsojky, ja'ats idø'øn taayip. Sudso'ampyts ja Dios tjaaktyimchokt, pø ka'axi ja kyaxi'iky, ti ja' net ja yjaaktsokp pø ja myigu'ukxi ja kyatsøjky pøn yja'ijxpy wiin'ajy.

21 Jøts ja Dios yide'en xmø'øyindi ja y'ana'amín: pøni pøn ja Dios ttsojpk, nayide'en ja myigu'uk ja twa'ant tsojkt.

5

Sudso'ampy ja ka'ødyumbi yja' xkamimajadaajkint

1 Pøn jaty tjanchja'widip ku ja Jesús yikejxy ya naxwiin yiknitsokpi, ja'ats ja Dios Teety u'nk'ajtiyidip; pøni chojktip tam ja Dios Teety jade'en, nayide'ents idø'øn ja ttsojktit tpa'ayo'odit pøn jaty ja Dios Teety y'u'nk'ajtpy.

2 Kuts ja Dios ndsojkindit jøts ja jade'en ndyimbyadu'unindit sa ja y'ana'amín ja wya'añ, jade'ents ja nnija'wa'ant ku ja nayide'en ndyimchojkyindi pøn ja yja'ajtpy.

3 Kuts jade'en ndsojkindit ja Dios, ja' idø'øn ja tyijpy ku dø'øn ja y'ana'amín nbadu'uñindi, jøts ka'ap ja mabaat chepi.

4 Jøts pøn jaty ja Dios møøt y'ity, ka'ats ja tmibøjkidi ja ka'ødyumbi yja'. Pø paty ja Dios janchja'win xuktamajadaajkyindi jøts ja xkadukmibijkyindi ja ka'ødyumbi yja'.

5 Pønts tkamibøjkti ja ka'ødyumbi yja', ja'ats idø'øn tjanchja'widip ja Jesús jøts ku ja Dios U'ngi.

Ku ja Jesús yiknigajpxy ku ja Dios U'ngi

6-7 Nnija'windip adøm ku ja Jesús Dios U'ngi, jabi kø'ømxi ja Dios Teety ja tyimnigajpxy ku ja Jesús ñøbejty jøts ku nayide'en wyinaty y'ookwaanimi; jøts ja Espíritu Santo ejtp nayide'en tñigajpxmi, jabi myøøt'ajtpy ja ty'ajtin ja'.

8 Tigøøkts adøm idø'øn ja exxpajtin nmøøt'ajtyindi midit tñigajpxtip ku ja Jesús Dios'u'nk'aty. Ja myidu'ukpi, ja Espíritu Santo kyajpxy y'ayuujk ja' midit xuknija'wandip ja tyiiby ja yjançpi. Ja myimajtskpi, ja Dios Teety y'ayuujk ja' midit yikmadoow ku ja Jesús ñøbejty; jøts ja myidigøøkpi, nay ja Dios Teety y'ayuujk ja' midit yikmadoow tsajpøtpy kyida'aky ku ja Jesús wyinaty y'ookwani.

9 Sa ja jaa'y tyi'ajtin ngupijkyindi, ¿ti Dios idø'øn ja tyi'ajtin njaakidyimgyupøjkin? Pø ja'axi jawaani tyimdyiy tyimyjanch ku ja tñigajpxy sa ja y'U'nk ja yjajty kyubejty.

¹⁰ Pøn tjanchja'wip ja Dios U'nk, kə'ømts ja tja'gyuki ja tiy'ajtin; jøts pøn tka-janchja'wip ja Dios ku ja tniǵajpxy sǵ y'U'nk yjajty kyubejty, ja'ats taǵadyejp ja Dios.

¹¹ Ya'at tiy'ajtin xukniǵa'windip jøts ku Dios tə xmə'øyindi sǵ n'anmija'win xemikəjxp yjujky'ajtindit, ja y'U'nkts ja'abi jujky'ajtin tmøøt'ajtp.

¹² Pønts møøt y'ity ja Dios U'nk, yikmøøpyts ja'abi jujky'ajtin ja'; jøts pøni ka'ap jade'en yikmøøt'ity, niwindem jade'en ngapaajtindit ja'abi jujky'ajtin.

Ku ja kajpxwejin jøts ja kajpxpoo'kxin y'ukyikyajkni

¹³ Ya'at mee ndanija'ayip wine'enin jam xjanchjawidi ja Dios U'nk, jøts xnijawidit ku ja jam xməøøt'ajtnidi ja jujky'ajtin midit xemikəjxp.

¹⁴ Jade'ents ngawingudsə'jkindi ja Dios ku n'amido'owin nbəktso'owin pøni ti ja kə'øm xamidsojkindip, ja' ja myadøøpy.

¹⁵ Tøts inet nnija'windi ja Dios kudam ja tmadøy ja amido'owin ja pəktso'owin, jøts nay jatyi x'adsowimbijtyindi pøni ti də'øn tə n'amidə'øyindi.

¹⁶ Pøni n'ijxyindip nnija'windip ja nmigu'uk ku ja ttundi ja pəky midit ttukja'dyigəøpy ja Dios, jatyits ngu'amidoo'wandit jøts ja Dios ja myaa'kxukiyit. Jabi jaaxi ja kajabəky midit ja anmija'win tyikwindigəøpy jøts ja Dios tyukja'dyigəy, kidi ja'apts ndijpy.

¹⁷ Tumbəky yə tundigə'øyin kajpxigə'øyin; jamts ja winaəgin midit tkayikwindigəøpy anmija'win.

¹⁸ Nnija'windipts ja' pøn ja Dios Teety møøt y'ity, ka'apts ja pəky'agujkpy çøøni; pə Dios U'nkxi axajtujkiyip jøts ja miku' ja sǵ kyatuniyit.

¹⁹ Pə nnija'windipxi adəm ja' ku adəm ja Dios xja'ajtyindi, jøts may ja'amidi pøn ja miku' tə niwəngəjxniyidi.

²⁰ Jøts nay yikniǵa'wip ja' ku ja Dios U'nk tə xnimii'ñindi, jøts ja tə xukniǵa'wandi midit tu'ugyi ndios'ajtyindip. Ja' tu'ugyi møøt n'ijtyindi ja y'U'nk Jesucristo. Ja'ats idə'øn tu'ugyi ndios'ajtyindip, ja'ats tyajkp jøts ja n'anmija'win xemikəjxp yjujky'ajtindit.

²¹ U'nk unə'jkti, nay'ejx'etiyidi yikxon, kidi nugo o ti xdiospikta'akti, kidi jade'en o ti xwindsə'øgidi. Jade'en idə'øn ja yjatt.

JA MYĪMAJTSKPI NØKY MIDI JA JUAN YJAAY

Ja tiy'ajtin, ja tsojkin jøts ja pa'ayo'owin

¹ Mets u'nk Ciria, mōjaa'y'ajtp øts, ixyamts meets ya'at nøky ndanijayi mōøt m'u'nk m'una'jkti wine'enin ja Dios tō m'a'ejxiyidi jøts ja jade'en mja'atyidi. Jade'ents mee ndsøky, jade'ents mee nba'ayøy, jøts kidi øtsip tu'ugyi, pø nayide'enxi meets ja mdsøkyidi mba'ayøyidi pøn jaty ja y'øybi tyiiby tpadundip.

² Ja' øts jade'en xyik'adøtsp ja ku nmøøt'ajtyindi ja y'øybi tyiiby jøts nijuuni adøm ja xkamajstuuptyindi.

³ Dios Teety jøts ja Dios U'nk, ja'ats mee mgunuu'kxidip mba'ayoojidip jøts mmø'øyidi ja øy'ajtin ja jotkujk'ajtin tiy janch sa ja ttsøjkyin.

⁴ Jade'en øts ja m'u'nk ja m'una'jk winaagin njanchtaxonda'aky ku øts ja nbaaty ku øts ja n'ixy tpadundi ja y'øybi tyiiby jade'en sam ja Dios Teety ja tō xa'ane'meyindi.

⁵ Mee migu'uktøjkti, mdyimdyu'undip ja may'ajt jøts ja xem ja yam nmigu'uk ndsojkindit nba'ayo'owindit. Kidi ixyamnim yø jade'en yikmadøy, jaayip yø yikmadoodso'ondakni ku ja ndsinaa'yin nyiktigajchindi.

⁶ Yø' idø'øn tsojkin'ajtp, yø' idø'øn pa'ayo'owin'ajtp ku ja Dios kyutujk nbadu'unin; jøts yø' idø'øn kyutujkin'ajtpy midi tō xmadowdi ku mdsinaa'yin tō xyiktigatsti, jøts xem yam mnachokidit mnabya'ayowidit.

Pømbi win'øø'ndip

⁷ Jats may ixyam ja win'øø'mbidi pøn tkajanchjawidip ja Jesucristo ku ja y'atsnanky'ejxøø jaa'yin. Pønts jade'en win'øø'mp, ja'ats idø'øn tkawamp tkatsojpk ja Cristo.

⁸ Øyim mnay'ejx'etedit, kidi xkamøjpkta'akti ja ixpøjkin midi mee tō nduk'ixpiky. Jade'en Dios øy ti mmo'ojidit pøni ti ja mdamidsojkidip.

⁹ Pønts nugo tyimwyinmay'anajxp nika'ap ja t'uktajotkujk'ajtniyi ja Cristo y'ixpøjkin, ja'ats kamøøt'ejtp ja Dios; pønts jade'en tjantymbyadump sa ja y'ixpøjkin wya'añ, ja'ats idø'øn mōøt'ejtiyip ja Dios Teety jøts ja Dios U'nk.

¹⁰ Kuts pøn mninøjksidit mjønjothp mdøjkjotp, yamts meets ja xanijawi jøts ku wenk ixpøjkin ja tmøødi, kidi meets ja xyiktøki jam mdøjkjotp, jøts kidi meets ja xmo'odi ja kajpxpoo'kxin;

¹¹ pønts ja tkajpxpoo'kxp, ja'ats idø'øn tpadump ja ka'øy ixpøjkin.

Sa ya'at ayuujk yjøpkixy

¹² Maynim øts ja winmaa'ñ nmøødi midi mee ndukmadoowampy, jøts ka' meets ja nugo ndanijayi wya'añ; ndyimninojkwampy mee kø'øm jøts ixy windani ndukmado'odit, jøts jade'en ndyimdyajotkujk'ajtindit.

¹³ Ja m'uch pøn ja Dios tō y'a'ejxiyi, ja'ats ja y'u'nk ja y'una'jk yam mdanigajxiyip ja kajpxpoo'kxin. Jade'eñi øts ja ayuujk nguexy, jade'en idø'øn yjatt.

JA MYĪDĪGØØKPI NØKY MIDI JA JUAN YJAAY

Øy tsuj ja Gayo yikniġajpxy

¹ Møjaa'y'ajtp øts, ixyamts øts ya'at nøky ndanijayi mets miġu'uk Gayo, ja'agøjxp ku niġuuni ngaja'dyigøy.

² Miġu'uk, wamp øts jøts øy yikxon xyiknaxt møk møjaaaw, nayide'en sam ja Dios øy tsuj myk'ityi.

³ Njanch'øyja'wipts øts, njanchuja'wipts øts, jøts ku øts ja jaa'y winaaġin xnimendøø pøn nmigu'uk'ajtyindip, jøts øts ja xamimadya'akti jøts ku mets øy tsuj mjaa'y'aty sam ja Dios kyajpxy wya'añin.

⁴ Midi'ibi øts idø'øn njaaktyimy'øyja'wip njaaktyimchuja'wip pø nmadøøpxyi øts jøts ku øts nmigu'uk ja møj ja mutsk tpaduujniði ja Dios kyajpxy.

⁵ Miġu'uk, øy'ajtp ku øy tsuj mjaa'y'aty ku jade'en nmigu'uk xpudøki pøn jaty tminaxtip tmidøkiðip ja Dios kyajpxy øy ja xjaga'ixxy'aty.

⁶ Tøts øøts ja winaaġin xukmadowdi sa mets ja xtsøky sa mets ja xpa'ayøy. Jaaktyimdyun ja may'ajt jøts ja xjaakpudøkit sam ja Dios tkupikyin, ku ja jam jade'en yja'attit choondit.

⁷ Pø ja'axi ja tø tniðsoondi jøts ja jade'en tmiwidejtitið ja Dios kyajpxy, jade'ents ja ka'ap tkupøkti ja pudøjkin midi ja jaa'y ja møøjyidip pøn jaty tkanija'widipnið ja Dios.

⁸ Patyts adøm xpaat'ajtyindi jøts ja ndyimbyudøjkandit ku ja jade'en tmiyø'dyi tminaxti ja y'øybi ja tyiibi.

Ka'ap y'øyjaa'y'aty ja mixy Diótrefes

⁹ Tø meets ja nøky ndanijayi jøts mee ndukmadøy yø'øbi winmaa'ñ, ja' ku ja mixy Diótrefes tkamøjpikta'aky ja n'ayuuġk ja n'ana'amin, ja'ats ne'egi kø'øm nabyiktaajkip windsøn jøts niwine'enin øts ja xkamimadøy.

¹⁰ Paty ku jøts wyinaty nniġkxy, møk øts ja ndawingugajpxit ku adøm ja xwingajpxyindi xpagajpxyindi ku ja xnidaay'ajtyindi. Nayide'ents ja tkadajotkujk'aty, yjaaktyimy'ane'empy ja myiġu'uk ja', jøts ja ka'ap tkupøktit pøn jaty tmija'ttip tniðso'ondip ja Dios kyajpxy, pønts ja jade'en tjagabadunwamp, jatyits ja tpawøpy jøts ja ka' t'uktuktatøjkiñi ma ja Dios kyajpxy yikpatmadøy.

¹¹ Miġu'uk Gayo, niġuuni jade'en xkatu'unt sam ja ka'ødyumbi ttuñ, tum ja øybi mdu'ump. Pøn jade'en øy jaa'y'ajtp, ja'ats ja Dios ja'ajtyip, pønts ka'øy'ajtp, ja'ats idø'øn tka'ejxp tkanija'wip ja Dios.

Janch øyjaay'ajtp ja Demetrio

¹² Øy tsuj yiknimadya'aky ja Demetrio. Ñanky'ejxip ku ja tpaduñ ja y'øybi ja tyiibi. Nayide'ents øø nwaami, nyiktiidyøjkip øøts ja nayide'en, pø mnija'widipxi ku øø ka' ndaayi.

Ja kajpxpoo'kxin midi ya'at nøky tyagugøjxp

¹³ Maynim øts ja winmaa'ñ nmøødi midi me ndukmadoowampy, jøts ka' mets ja nugo ndanijayi wya'añ;

¹⁴ ndyimñinøjkwampy me kø'øm jøts ixy windani nnagyaajpxindit.

¹⁵ Øy yikxon xyiknaxt. Hxyam mmigu'uk mdaniguexyiyi ja kajpxpoo'kxin pøñ jaty yam tsinaadyip. Tunts ja may'ajt jøts nayide'en xkajpxpoo'kxt pøñ jaty jam nmigu'uk'ajtyindip.

JA NØKY MIDI JA JUDAS YJAA_Y

Ku ja Judas tñijayi pøn jaty ja Dios tø twi'ixy

¹ Judas'ajtp øts. Øts ja Jacob nmiga'ax'ajtpy. Nmĩdumpy øts ja nwindson'ajtim Jesucristo jøts meets ya'at nøky ndanijayi pøn jaty ja Dios tø tyamidsøkyiyi jøts ja yja'atyyit, ku ja tø y'agø'dukiyi y'axajtukiyi ja nwindson'ajtim Jesucristo, ku ja møøt y'etti.

² Mbaattip yikxon ja Dios kyunuu'kxin jøts øy tsuj mba'ayowiyidit jøts ja øy'ajtin myikmo'odit.

Pøn nugo jawindaay'atwamp

³ Meets migu'uktøjk, o meets ja nøky kawinaak ojk tøn jadanijayiwya'añ sã dø'øn y'eixi tyiyi ja nitsø'ok'ajtin midi njagyeypyindip, ixyamts mee nnijayi jøts tu'ugyi xyik'ettit ja mjanchja'win midi ja Dios tu'ugyi tø xmo'øyim, ku ja xja'ajtyindi.

⁴ Jabi tøxi ja jaa'y jam tmidøki ja win'øø'nin jøts meets ja mdukpadunwa'añidi midi ja tiy'ajtin kyamøøt. Pø wampxi ja Dios kyajpxy jøts ja tyik'ayo'ombaatt sam pyaat'atyyiyi ku ja kya'øyjaa'y'atti, wandipts ja' øy ja ti ttu'undit maa'kxukidip ja Dios ja'. Ka'ap ja Dios Teety yja' ttsojkidi pøn xja'ajtindip møøt ja nwindson'ajtim Jesucristo.

⁵ O meets ja xjanijawi, nduknijawiwypy meets ja jadigojk jøts ku ja Dios Teety ojts tyik'awa'atspidsimy ja Israelit jaa'y jam Egipto, xjats tyikwĩndigø y ja' pøn ja kamibøjkiyi kabaduujniyi.

⁶ Jøts nayide'en ja ankilistøjk winaagin ja yja' ka' t'ukpadunidi sam pyaat'atyi, Diosts ja tø myachi jøts ja tø pyikta'agyi agootstujpy, jam ja y'awejxti ku ja tiidyu'unin mye'ent.

⁷ Nayide'ents ja yjajtmidi ja Sodoma kajp jøts Gomorra kajp, jøts midi jaty jam kajp wingon ejttøø. Øy sã y'adøstøø, yaa'dyøjk namyøøt'ajtidip tukyaa'dyøjk, tø'øxyøjk namyøøt'ajtidip tukto'øxyøjk. Jade'ents ja ka'øybi ttundøø. Jøts ja Dios xemikøjxp tø yik'ayo'ombaadyidi mã xemikøjxp tyøy. Jade'ents yø xuk'ijxyimp xuknija'wimp jøts ka'ap jade'en n'adøøjtsint.

⁸ Øyi tjanijawidi pøn meets ixyam nugo mwĩn'øø'nip, kyø'øm winmaa'njøtpy ja jade'en ttundi ku ja kya'øyjaa'y'atti jøts ka' tmøjpikta'akti ja Dios kyutujk. Nugo twindsø y ja ankilistøjk midi ja Dios myøøtsinaapy.

⁹ Janch wenk idø'øn ja Dios yø'øbi jaa'y twindsowdi, nika'ap ja møj ankilis Miguel twindsø y ja miku' jade'en ne'egi, ku ja Moises ñine'kx tyiktsepjajtidi sudso dø'øn ja yiktu'unt. Ne'egi yide'eñi ja'ayi tñimaay, "Dios paat'ajtyip pøni sã ja mdunwa'añi."

¹⁰ Yø jaa'y midi mwĩn'øø'nidip ku yø ti kø'øm tkaja'gyukidi, ja'ats yø kyajpxtip ka'øy; ja'ayi nugo ñija'widip jøts yø jade'en y'adø'øststit ejxim jiyujkin, kø'ømts yø nugo jade'en ñankwyindigøyidi.

¹¹ Ayo'ombaattip ja'adi ku nay ja' tpadundi sam ja Cain yjaa'yajty ku ja myigu'uk ja tyik'ø'jky. Tundip nayide'en sam ja Balaam jøts ja meeñ patp tjawidi. Jade'en nøjkk wyindigøyidi sam ja Coré ku y'ookøxti ku ja Dios tmidsejøjktøø.

¹² Nugo mdsø'ødyuñidi meets mã mee mgaadyi m'uukti tukpabøjkpitøjk, ku meets yø ka'ap mnimiñidi amumjoojt, jøts ku yø nugo ku'uxyi kyaydi y'uukti jøts yø jade'en nugo mdaxi'ikyidi, niti windsø'jkin tkabikta'akti, kø'øm ja ne'egi ñay'eix'ityidi, ka'ap ja t'ixy pøni ti ja tø yiktaguwanidi.

Jade'en ja'adi ejxim ja yoots n'ejxint midi ka' tyu'uy, jøts nayide'en ejxim tu'uk ja tsa'amguipy midi katøomip, øy ja tyøøm'ajtin ja tjapaaty, windigøy y'ejtndipts ja jadi'ini.

13 Tum ja ka'øybi tyundip jøts ne'egi o sa tyimy'adø'øtswa'andi tsø'ødyumbim. Jade'ents tø tyuu'tigøødyi jøts xemikøjxp jap y'ettit agooststujpy.

14 Ja møjaa'y Enoc pøn myiwixujk najtskaxi, ku ja Adan jawyeen, ja' ja Dios kyugajpxy'ajt jøts yide'en tnigajpxy ja ka'øy jaa'y, jøts wyaañ: "Jøts ø n'ijxy ja nwindson'ajtim ku ja mil'ampy tmøøtmiñ ja pyabøjkpitøjk,

15 jøts pøky pyayø'øwya'añ pøn ka'øyjaa'y'ajttip, pøn tø tyundigøydi kyajpxigøydi jøts ku tø twindsowdi ja nwindson'ajtim."

16 Yø'øbi jaa'y nugo ña'amdi nugo pyagajpxti, ja y'øy'ajtin yø nugo yjayik-tunwandip jøts ja jaa'y øy tsuj nadyijyi tmigajpxti ja'agøjxp ku nugo tka-jpxwetswa'andi.

Ku ja pabøjkpitøjkiyiktukmadøy sa yjaa'y'attit

17 Meets migu'uktøjk, ja'myatsti sa ja nwindson'ajtim Jesucristo kyudanaabyi mdukmadoojiðøø

18 ku wyandøø yide'en: "Ku wyingøñ jøts ja nwindson'ajtim mye'ent jats kyaxø'øktit ja jaa'y pøn tka'ødyejtíp tka'øgyajpxtip ja Dios yja'. Ka'øyjaa'y'ajttip ja' jade'en sa ja kø'øm ñadyamidsøkyidi."

19 Yø' nugo tyikwinmaa'nmya'atwamp ja jaa'y; ja'ayi chojktip ja kya'øybi jøts ka'ap Espiritu Santo ja tmøøt'atti.

20 Meets migu'uktøjkti, tu'ugyi mnabyikta'agidit jøts tu'ugyi xyik'ettit ja mjanchja'win midi ja Dios yajkpy. Ku ja Dios x'ajot'attit, ja Espiritu Santo mbudøkiyidip.

21 Xtsojkindip ja Dios, xpa'ayo'owindip ja Dios, paty øyim mnay'ejx'etidit sam ja ttsøkyin. Njøp'ejx'ejtindip ku ja nwindson'ajtim Jesucristo xmø'øyint ja øy'ajtin midi xemikøjxp.

22 Yikjotkujk'atti ja' pøn pyamaapy pyadajpy pøni midi'ibi pyabøkp.

23 Tuu'mo'odi kajpxwejt ku tyundigøydi jøts ka'ap ja ayo'on tpaattit; jøts xpa'ayo'ot nayide'en pøn ka'øyjaa'y'dyi, øyim mnay'ejx'etidit kø'øm, jøts ka'ap jade'en xu'undit sam ja'adi.

Ku ja Judas tkajxa'aky ja Dios jøts tyikjøpkijxy ja ñøky

24-25 Tu'uk ja Dios møj, pøn tnija'wip, pøn xyiknitso'ok'ajtimp, ja'ats ja myø'ajtin xa'ejx'ejtimp jøts ka' ndundigø'øyint, jade'en'ampyts agujk jotkujk xukwinguwa'jka'ant ja' wyindump, ku niti pøky ngamøøt'ajtint. Ja'ats tmøøt'ajtp ja øy'ajtin ja møk'ajtin nwindson'ajtim Jesucristo køjxp, jaayip ku ja tyiktsø'ondakijxy tuki'iyi, jøts kunim ja nayide'en tyikjøpkøxt. Jade'en idø'on ja y'ejxi tyiyi.

YA'AT AYUUK JA JESUCRISTO TYUKNĪJA'WĪ KUMAA'YJŌTPY JA JUAN

Ku ja Jesucristo ttuk'ixy ja Juan sɑ ja naxwii'ñit yjatt

¹ Ya'at idø'øn tiy'ajtin midī ja Dios Teety tyukmadoow ja Jesucristo, jøts ja pyadumbi pyabøjkpi ttuk'ext ttuknijawit sɑ nøjxx yjatt kyubatt tsojk ya naxwiiñ. Nay øts ja tiy'ajtin tuki'iyi tø xuk'ixy tø xuknijawi sɑ tu'uk y'ankilis tø xukmigajpxy.

² Xjats øts njaadyangijxy tuki'iyi pøni ti jaty ja Dios Teety møøt ja nwindson'ajtim Jesucristo tø xuk'ixy xukmadø.

³ Tya'øy'ajtidip ja Dios kyunuu'kxin pøn ya'at nøky t'ejxp jøts tpadu'unt, nayide'ents ja' pøn tmadoop, pø wingompxi dø'øn jøts jade'en yjatt sam yø nøky wya'añ.

Ku ja Juan tnija'ayiyi'ñ pøn jaty ja Dios tjanchja'widip ja niwixujkpi kajp

⁴ Øts Juan, øts meets ya'at nøky ndanija'ayip pøn ja Dios tjanchja'widip, ja niwixujkpi kajp midī jam Asia y'etjotp. Paat meets ja kunuu'kxin øy'ajtin midī ja Dios yajkpy, ja' midī xemikøjxp jujky'ajtp, nayide'ents mgunuu'kxidit ja niwixujkpi ja'win midī møøt y'ity ja Dios Teety.

⁵ Wan mgunuu'kxyidi nayide'en ja nwindson'ajtim Jesucristo pøn tnanky'ejxip ja tiy'ajtin, jøts pøn myijawyeen tø yjujkyøjkojmi jap oo'kpi jutjotpy. Ja'ats nayide'en tnigutujk'ajtp niduki'iyi ja møj windsøndøjkti yɑ naxwiiñ. Nayide'en ja Cristo xpa'ayø'øyimp sɑ tø xyikpøkwyaaajchim ku tø wyidsuñ wyidaxy adøm nbøkyøjxp.

⁶ Tøts ja xpiktaajkyim jade'en øyjaa'y møjaa'y, jøts nbadu'unindit ja Dios Teety yja' midī tyeety'ajt nwindson'ajtim. iWan tja'myejchim xemikøjxp ja Dios y'øy'ajtin myøk'ajtin! Jade'en idø'øn ja yjatt.

⁷ iMeets, uk'ejxti ukmadowdi, jade'en idø'øn ja Cristo mye'ent yoot-sjotpy! Jøts niduki'iyi n'ejxint, nayide'en ja'adi pøn ja nwindson'ajtim yik'ayo'ombaajti kruskøjxp; janch ya'axtip janch ji'idyp ja naxwii'ñit jaa'y ku jade'en t'ejxtit. Jade'en idø'øn ja yjatt.

⁸ Yide'en ja Dios Teety wya'añ pøn ja myøk'ajtin møj, jøts pøn xemikøjxp jujky'ajtp: "Øts idø'øn ja tso'ondaajkin jøts øts nayide'en ja jøpkøjxin'ajtin nyajkpy."

Ku ja Juan t'ixy ja Cristo

⁹ Øts Juan, meets nmigu'uk'ajtpy ku ixyam nayide'en ngu'ayo'ombaajtindi ja nwindson'ajtimgøjxpit, paty adøm xmø'øyim ja øy'ajtin ja tuda'aky'ajtin jøts ja xyik'ejtint mā ja kyutujk xanatanaa'yimp. Jam øts wyinaty ndsumchøøni mā txøøw'aty Patmos jam mejy kyujk'am, ja'agøjxp ku øts ja Dios kyajpxy ngajpxwa'kxi jøts ja Jesucristo yja' nnigajpxi.

¹⁰ Domingi xøøw wyinaty ku øts ja Espiritu Santo adsu'jky xatøki, jøts kumaa'yjotpy møk øts xjiguyaaaxi ejxim tu'uk ja puxujx,

¹¹ yide'en ja wya'añ:

—Øts idø'øn nyiktso'ondaajk tuki'iyi jøts nay øts nyikjøpkøxp. Midī jaty m'ejxp mnijawip, tanijayi pøn ja Dios ja'ajtip mā niwixujkpi kajp jam Asia y'etjotp. Ja' xyøøw ja kajp: Efeso, Esmirna, Pérgamo, Tiatira, Sardis, Filadelfia jøts Laodicea.

12 Xjats n'ejxjimbijty pøn øts xmigajpxp, jøts n'ejxpaaty wixujk ja kandeleeeri midi tum oori.

13 Jam wixujkpi kandeleeeri kujk'am n'ijxy tu'uk ja jaa'y jade'en sam adømin, jade'en ja wyet tyek'ok'am paat kyida'aky. Tum oori ja chum kyaxi'iky midi ja'tp kyachwiin.

14 Ja kyubajk, janch amuum poop ja wyaay kyaxi'iky ejxim ja poop pixyin, ejxim tsap'øøpkyin, jøts ja wyeen jade'en kyaxi'iky ejxim jønyowin.

15 Ja tyeky, jade'en kyaxi'iky janch amuum tsamamp ejxim ja pujx n'uk'ejxint midi janch tøø'kxp, midi øyip ornijøtpy; ku ja kyajpxy, møk idø'øn nmadoo'wint, jade'en ejxim ja møj nøø y'iichin.

16 Jam y'aga'ngyøjø'øm tmach'ity wixujk ja maadsa', jøts y'aawjøtpy pyidsimy tu'uk ja yøñchujx midi janch jøpxuu'ñ jøts adsow jøøjp. Jade'en kyaxi'iky ja wyeen ja y'aaw ejxim ja xøøw møk y'añin.

17 Ku øts n'ijxy jade'en, winets øts ojts øøky nayjawiyi nnaxkida'aky ja' tyekyjo'øm, jøts øts ojts y'aga'ngyø' xanixajy jøts ø xnimaay:

—Kidi mdsø'øgi; øts idø'øn, tø nyiktso'onda'aky tuki'iyyi nayide'en sa nyikjøpkøxt.

18 Jujky'ajtp øts idø'øn øy tø nja'øøky, xemikøjxp njujky'aty jøts øts ja møk'ajtin njagyejpy, jøts øts nyikjujkyøkt pøni pøn tø y'ookti tyigøydi.

19 Jaadyangøx tuki'iyyi midi ixyam m'ijxpy, midi ixyam mnija'wip, jøts midi jatwamp.

20 Jade'en idø'øn ja twandijy midi tø x'ixy, ja wixujkpi maadsa' n'aga'ngyøjø'øm jøts ja wixujkpi kandeleeeri nayide'en: ja wixujkpi maadsa', yø' twandejp pøn ø ngugajpxy'ajtpy ma øts ja njanchja'wibitøjk jamdi ma wixujkpi kajp jam, jøts ja kandeleeeri ja janchja'wibitøjk ja'adi, pøn jam'ajttip.

2

Ya'at ayuujk ja nwindson'ajtim tyaniguejxpy ja yjaa'y ma ja wixujkpi kajp: Yide'en jawyeen yiktanija'ayiyi'ñ ja Efesit jaa'y

1 'Nijayi øts ngugajpxy midi jam Efeso sa øts ixyam nnigajpxy: "Yide'en ja wya'añ pøn jam y'aga'ngyøjø'øm tmach'ejtp ja wixujkpi maadsa' jøts pøn jam tanaapy wixujkpi kandeleeeri kujk'am:

2 Wa'ats ø nnijawi tuki'iyyi pøni ti mdumpy; nnija'wip ø tuki'iyyi sa møk mduñ øts køjxp, jøts sa mduda'aky'aty, nayide'en ø nnijawi ku xkagupiky pøn ka'øyjaa'y'ajttip. Tøxi x'ixy tu'uk jaty pøn nugo nadyejidip øts ngudanaabyitøjkti, ka'ap ja tyiy'ajtin wyingaxi'iky, nugo ja wyindaayidi.

3 Øy møk ja maa'kxujkin tø xjagyepy ku tø xpaduujni øts nja', jøts ku tø xku'ayo'ombaadi øts køjxp, jøts ka'ap ja jotkøjxin tø xmøøt'aty.

4 Tu'uk øts nga'øyjawi mets ja mjaa'y'ajtin: ku mets ka' nayide'en x'uktsojknri sam xyiktso'ondaajky.

5 Paty ø nwa'añ, ja'myats pøni ma tø mduu'digøy, jøts xyiktigatst ja mwinnmaa'ñ, jøts nayide'en xu'unt sam jawyeen tø xuñin. Pøni ka' xuñ jade'en, nbøjknip øts yø kandeleeeri midi mmøøt'ajtpy.

6 Ots idø'øn yjade'eni, mjagyejpy nayide'en ja øy'ajtin ku nayide'en xkatsøky ja nicolaítas y'ixpøjkin sam ø ngatsøkyin.

7 Madowdi yikxon sam ja Espíritu Santo tmigajpxy pøn ja Dios ja'ajtp, yide'en ja wya'añ: Pøni pøn tmimajadap ja miku' yja', ja'ats nmo'op ja øy'ajtin xemikøjxp ma Dios y'ity."

Yide'en ja Esmirnit jaa'y yiktanija'ayiyi'ñ ja ayuujk

8 'Nijayi nayide'en øts ngugajpxy pøn jam ejtp ma øts njanchja'wibitøjk jam Esmirna kajpjotp: "Yide'en ja wya'añ pøn tuki'iyi tø tyiktso'onda'aky jøts pøn nayide'en tyikøxp, ja' pøn o'jk jøts yjujkyøjkøjmi oo'kpi y'agujkpy:

9 Nnija'wip ø tuki'iyi pøni ti mdumpy; pøni sa m'ayøy mwinnmay, øy yø meeñ kyidyim'yity, tø ja Dios mdsuj'ixxyi mdsujaw'iyi ja' wyingujkp. Nnija'wip øts ku mjemigajpxyi mdemigajpxyi winaagin pøn nugo nadyejip israelit jaa'y, yø' yide'en nugo tjayikmajada'akwajnidip ja miku' yja', pø ka'axi Dios ja tja'aji.

10 Kidi mdsø'øgidi pøni sa mjattit mgubattit; yø miku' mnankchumwajniydip jøts nidu'uk nidu'uk myikjot'ejxtit, jøts xmajtstu'tuttit ja Dios yja'; øy yø mjayik'etidit majk xøøw puxøjkjøtpy, tu'ugyi ja mwinnmaa'ñ xyik'tetit o' mjadyimyo'okti, tø meej nmo'op ja jujky'ajtin midu xemikøjxp.

11 Madowdi yikxon sa yø Espíritu Santo tngajpxy pøn ja Dios ja'ajtip, yide'en ja wya'añ: Pøni pøn tmimajada'kp ja miku' yja', ka'ap ja tpaatt t'ext ja ayodaajk. Ka'ap ja y'anmija'win sa yjatt."

Yide'en ja Pérgamit jaa'y yiktanija'ayiyi'ñ ja ayuujk

12 'Nijayi nayide'en øts ngugajpxy pøn jam ejtp ma øts njanchja'wibitøjk jam Pérgamo kajpjotp: "Yide'en ja wya'añ pøn tmøø'tajtp ja yøñchujx yjøpxuu'ñ adsow jøøjp:

13 Nnija'wip ø tuki'iyi pøni ti mdumpy jøts ku jam ja miku' møk y'ane'emy ma mdsøøni, ka' xja'dyigøy ja mjanchja'win øy øts njanchja'wibitøjk yjadyimyo'jk pøn txøøw'ajt Antipas, pøn øy tsuj xpaduujni øts n'ayuujk.

14 Ya'at øts n'øyljxpy nga'øyljxpy pøni ti mdumpy: jam meets winaagin jam Pérgamo, pøn tkamajtstu'utwamp sam ja Balaam ja y'ixpøjkin jekyip tyik'ity, ja'ats ojts t'agajpxi ja Balac jøts ttukmado'ot ja israelit jaa'y sa tyundigø'ødyit. Ojts ttukmadøy jøts tjøø'kxtit midu tø wyinaty yiktamiyøxy ja maxandsaa, jøts nayide'en o sa pøn ñamyøø't'atyyidit.

15 Nayide'en meets jam winaagin pøn tkamajtstu'utwamp ja nicolaítas y'ixpøjkin midu øts ngatsøjkpy.

16 Paty ø nwa'añ, jøts tyiktigatstít ja wyinnmaa'ñ; pøni ka'ats, tsojks ø nnøjkxt jøts ndatseptu'unt ja nyøñchujx midu pidsømp n'aawjøtpy.

17 Madowdi yikxon sa yø Espíritu Santo tngajpxy pøn ja Dios ja'ajtip: Pøni pøn tmimajada'kp ja miku' yja', ja'ats nmo'op ja jii'kxy midu yiktejp maná midu yu'uch ejtp; nayide'ents ø nmo'ot ja mutsk tsaa'u'nk midu poop, japts tu'uk ja xøøw kyøxja'yai midu jemy jøts midu ka' yik'ixy yiknijawi, ja'ayi tu'uk tnija'wip pøn ja yikmøø'py."

Yide'en ja Tiatirit jaa'y yiktanija'ayiyi'ñ ja ayuujk

18 'Nijayi nayide'en øts ngugajpxy midu jam ejtp ma øts njanchja'wibitøjk jam Tiatira kajpjotp: "Yide'en ja Dios U'nk wya'añ pøn ja wyeen jade'en kaxø'kp ejxim ja jøn'ayowin, jøts ja tyeky ejxim tu'uk ja pujx midu janch tøø'kxp tsamamp:

19 Nnija'wip øts tuki'iyi pøni ti mdumpy, sa mmigu'uk xpa'ayøy, sa ja Dios kyajpxy xpaduujni, sa xpuðøki pøn ti ka'ejtip jade'en sa mduda'akya'aa'y'aty. Tø øts nja' xyikmiweni xyikaja'aji jawaani øy yam, ka'ap jade'en sam jawyeen tø xyiktso'onda'aky.

20 Ya'at ø n'ixxpy nga'øyja'wip mets køjxp: ku xkupiky ja ka'ødyø'øxy Jezabel, pøn ñadyijyi ja Dios kyajpxy tkajpxip, nugots ja y'ixpøjkin ja ttawin'iñ øts ja njanchja'wibitøjk kuk idø'øn øy o sa pøn ñamyøø't'atyyit jøts ku tjøø'kxtit midu tø yiktamiyøxy ja maxandsaa.

²¹ Tøts øts nayide'en njanøjmi jøts tyiktigatst ja wyinmaa'n sam pyaat'aty, ka'ats ja tpadunwa'añ: ka' tmajststu'utwa'añ ja kya'øy'ajtin.

²² Øts ja nwandu'ump sa ja yuu ja pa'am pyaadiyt, nayide'en niduki'iyi pyaatkøxiyt ja ayo'on pøn jaty møøt tø tyundigøy.

²³ Nwandu'umpts øts nayide'en ja y'u'nk ja y'una'jk pøn ka'ødyø'øxy'ajttip. Jade'en idø'on t'ejxtit tnijawidi niduki'iyi øts njanchja'wibitøjk sam øts wa'ats n'ejxkapy sam pøn tu'uk jadu'uk wyinmaa'n tjagyepy y'am yjotp. Nidu'uk nidu'uk meets ndiidyu'undit pøni sa jaty pøn tø y'adø'øtsti.

²⁴ Ka'ap øts sa nwa'andijy ku ja ka'ødyø'øxy yja' tø xkabaduujni ku ja miku' kyootswinmaa'n tø xkayikmajadaajkidi.

²⁵ Padun'etti xemikøjxp ja winmaa'n midi myiktundip kunim ø nme'ent.

²⁶ Pøni pøn tmimajadakp ja miku' yja' jøts nayide'en ttu'unt sam ø ndsøkyin, ja'ats nmo'op ja møk'ajtin jøts tnivindsøn'att niduki'iyi ja naqxwii'nit jaa'y.

²⁷ Yø'øbi møk'ajtin midi øts ja Dios Teety tø xmø'øy, nay yø'øts mdaba'ejxtip mdabayø'ødyip ja naqxwii'nit jaa'y.

²⁸ Nayide'ents meets nmo'ot ja øy'ajtin jøts meets møøt n'ett xemikøjxp.

²⁹ Madowdi yikxon pøni sa jaty ja Espiritu Santo tnøjmi ja janchja'wibitøjk pøn ejtip jam ma niwixujkpi kajp."

3

Yide'en ja Sardisit jaa'y yiktanija'ayiyi'n ja ayuujk

¹ Nijayi nayide'en øts ngugajpxy pøn jam ejtp ma øts njanchja'wibitøjk jam Sardis kajpjotp: "Yide'en ja wya'añ ja' pøn tkajxp ja niwixujkpi kugajpxy jøts midit tøk'ø'kp ja wixujkpi maadsa': Wa'ats ø nnijawi pøni ti mdumpy. Ots myiktijy myikwa'añ ku øy tsuj mduñ, nnija'wip øts ku ka' mduñ.

² Jawidi, nay'ejx'etidi, jøts ka' jadi'iñi mwindigø'ødyit; n'ixjpxy nnija'wip øts midit mdumpy ku ka'ap tyiy'aty Dios wyindump.

³ Ja'myatsti ja øy'ayuujk ja øy'ajpxy midit tø xmadowdi tø xukpøkti; nay yø' mbadu'undip jøts ja mwinmaa'n xyiktigatst. Ku xkatu'unt sam nwa'añ, winets ø nme'ent adsu'jky sam ja maa'tspi myiñ, nika'ap ja xnijawit pøni juuni nme'ent ejxpi payø'øbyi.

⁴ O meets yø'øbi winmaa'n tø xjababiky, jamts winaagin pøn øy wa'ats jaa'y'ajttip, ja'ats ø møøt n'ity xemikøjxp sam pyaat'aty.

⁵ Pøni pøn tmimajadakp ja miku' yja', ja'ats ja wa'ats'ajtin tsuj'ajtin tpaatp, ka'ats øts ja xyøøw nyiktigøjyi midit tø yikja'ay jap nøkyjøtpy ma jap y'ity ja jaa'y xyøøw pøn juky'ajttip xemikøjxp. Ngajpxkaxø'jkixjpxy øts ja jam Dios Teety wyindump jøts jam y'ankilis wyindump.

⁶ Madowdi yikxon pøni sa jaty ja Espiritu Santo tnøjmi ja janchja'wibitøjk pøn ejtip jam ma niwixujkpi kajp."

Yide'en ja Filadelfiit jaa'y yiktanija'ayiyi'n ja ayuujk

⁷ Nijayi nayide'en øts ngugajpxy pøn ejtp jam ma øts njanchja'wibitøjk jam Filadelfia kajpjotp: "Yide'en ja wya'añ ja' pøn øy'ajtp wa'ats'ajtp, ja janchpi ja tiiyi, nayide'en ja møk'ajtin tjagyepy jade'en ejxim ja rey David y'ijty yikutuky: Ku ja tuu' nyik'awa'ach ka' pøn mibaat tyik'awa'atst.

⁸ Nnija'wip øts tuki'iyi pøni ti mdumpy. Tøts ja mduu' nyik'awa'ach midit ka' mibaat pøn tyik'adukt; øy ja møk'ajtin waani tø xjagyepy tøts ja n'ayuujk xmøjpiaktaajki, ka'ap ø tø xkagupiky.

9 Jamts winaagin pøn nugo nadyejip israelit jaꝗ'y jøts øts nja' ñadyijyi xyiktuujni. Ka' tyiy'ajtin, taay ja pyiktakpy ku ja miku' yja' tyiktuujni, nay øts ndukupøkp jøts mwindsø'øgiyit, m'ejxkapiyit ku mee ndsøky.

10 Tø øts n'ayuujk xpaduujni ku øy tudā'aky mjaa'y'atti sꝗ dø'øn nda'ane'emy, nayide'ents nbøkji'kpy n'ejxji'kpyts meets m'ø'y'ajtin. Jats yik'ext ku ja møk ayo'on ku ja tīdyu'unin ñaxkida'akt jøts ja payø'øyin tyunit pøn jaty tø y'ø'y'atti yꝗ naxwiiñ.

11 Me'emp øts tsojk. Yik'etim yø mwinnmaa'ñ jade'en sꝗ tø xpaduñ, ka' pøn mibaat ja Dios yja' mbøkxiyit.

12 Pøni pøn tmimajadaꝗp ja miku' yja', ja'ats møjtoꝗip mā ja Dios, nijuuni ja tkamajstuttit; nayide'ents meets ja Dios xyøøw ndawinja'att jøts ja kyajp midī yiktejp jemy Jerusalem, yø' tsoomp jam Dios wyingukp; ndawinja'apts meets njemxyøøw nayide'en.

13 Madowdi yikxon sꝗ yø Espīritu Santo tnøjmi pøn ja Dios ja'ajtip mā niwixujkpi kajp."

Yide'en ja Laodiceit jaꝗ'y yiktanija'ayiyi'ñ ja ayuujk

14 'Nijayi nayide'en øts ngugajpxy pøn ejtp jam mā øts njanchja'wibitøjk jam Laodicea kajpjoꝗp; "Yide'en ja wya'añ ja' pøn tyꝗp ja tiy'ajtin, pøn tyiktso'ondakøjx tuki'iyi:

15 Nnija'wip øts tuki'iyi; pøni ti mdumpy, ku nugo ejxingøjxp øts nja' xpaduujni, ka'ap amunjoojt. iø'y'ajtp ku tu'ugyi xpadu'undit, pøni ka'ats, majtstu'utkts øts!

16 Kumi ka' xnijawidi pøni midī ndunwandip, nugo mee møk xyikjotkixy, ndyimyajtstu'utwampy mee ne'egi.

17 Nømp mee mwā'añ jøts ku meets jotkujk xyiknaxy, ku niti mgadiꝗø'oxyi; ka'ats mnayjawiwi ku niti mga'ijtxyi, ku nugo wimbeets kugoots xyiknaxy.

18 Yide'ents idø'øn ja kajpxwejin nmøø'y, jøts ø x'amido'ot xpøktso'ot midī øts nmøøt'ajtpy, jade'ents xpaatt ja ø'y'ajtin, ja wā'ats'ajtin jøts ja ja'gyujkin.

19 Jade'engøjxp meets ixyam møk n'ane'emy ku mee nba'ayøy. Møk xwindanidit jade'en sam øts xmi jotimbettit.

20 Ejx ku meets yꝗ ngugajpxi y'ity yꝗ mdøk'agi'y; pøni pøn øts n'ayuujk xmadøjip jøts øts nja' xkupøjkit, ejtpsts øts ja møøt n'ett.

21 Pøni pøn tmimajadaꝗp ja miku' yja', møøts øts ja n'ett, jøts øts ja kutujk nmo'ot nayide'en sam øts ja Dios Teety tø xmø'øy ku øts ja miku' yja' nmimajadaꝗjki, møøts øts ja Dios Teety n'ity.

22 Madowdi yikxon sꝗ ja Espīritu Santo tnøjmi ja janchja'wibitøjk mā jam ja niwixujkpi kajp."

4

Sꝗ ja Dios Teety yikajxa'aky jap tsajpjoꝗtpy

1 Ku tø jade'en y'ukjaty jøts n'ejxpaaty ja tsajp y'awa'adsī ejxim ja tøjkaawin; jøts ja ayuujk nmadøøy møk sam ja trompeta'an midī øts jawyeen xmiꝗajpx, jøts øts xnimaꝗy:

—Pat yꝗm, jøts nnanjke'ejxit tuki'iyi sꝗ yjatwā'añ kyubatwā'añ.

2 Tø øts wyinaty ja Espīritu Santo xatøki, kumaa'yjøtpy n'ixy jade'en tu'uk ja tsinaabyajt jap tsajpjoꝗtpy ejxim ja møj windsøn yja'ajin, jamts chøøni tu'uk ja jaꝗ'y

³ midì jade'en kaxò'kp ejxim ja tsaa midì janch tòò'kxp tsamamp, sa ja jaspe tsaa, uk ja cornalina tsaa; jamts i'jch tò ñawididity, jade'en tyi'kxy sam ja esmeralda tsaa.

⁴ Mā ja møj tsinaabyajt jam, jamts ø n'ixy ee'pxmaktaxk ja tsinaabyajt nawidity, jamts ja møjaa'dyòjk ni'ee'pxmaktaxk chòò'nidi, amuum poop ja wyetti jòts tkujup'atti ja koroni janch amuum oori.

⁵ Mòk ja anaaw ja widsujk pyidi'iky mā møj tsinaabyajt jam; nay jam wyingujkp wixujk ja jøøn tyøøbyiky, ja niwixujkpi ja'win idø'on ja' midì ja Dios Teety mòøt y'ity.

⁶ Nay jam møj tsinaabyajt wyindump kyaxi'iky tu'uk ja mejy, janch wā'ats janch tòò'kxp ejxim keega'an.

Jòts jam nayide'en ja møj tsinaabyajt ñawididity namaktaxk ja jiyujk midì may ja wyeen tmòøt'ajttip, kaxò'kp yjòxki'py kaxò'kp wyinduujy.

⁷ Ja myidu'ukpi jiyujk, jade'en ja kyaxi'iky ejxim tu'uk ja kaajin: ja myimajtskpi jiyujk, jade'en ja kyaxi'iky ejxim ja tsakaajin; ja myidigòøkpki jiyujk, jade'en ja wyeen ja y'aaw kyaxi'iky ejxim ja jaaj'in; jòts ja myimaktaxkpi jiyujk kyaxi'iky ejxim ja weejts kyakwidityin.

⁸ Tu'uk jaty ja jiyujk tudujk ja kyank tmòøt'aty, may ja wyeen nayide'en kyaxi'iky yjòxki'py jòts wyinduujy; xinaxy tsunaxy ja Dios tjā'myatsti jòts ñòm'etti:

Janch øy janch wā'ats me Dios Teety,
Mets tu'ugyi ja mòk'ajtin mjagyejpy,
jòts xemikòjxp mjujky'aty.

⁹ Xjats ku ja jade'en ja nimaktaxkpi jiyujk ttundi, ku ja jade'en tjā'myatsti ja' midì xemikòjxp ejtp, midì tsinaapy møj tsinaabyajt kòjxp,

¹⁰ xjats ja ñi'ee'pxmaktaxkpi møjaa'dyòjk jaty ñagyuxendya'agyidi, jòts ja kyoroni tkii'dyakti jam møj tsinaabyajt wyingujkp jòts wyā'andi:

¹¹ Mets Dios Teety, mets amuum møj sam pyaat'aty myikwindsø'ogit myikwinjawit.

Pø tøxi xyiktso'ondakijxy tuki'iyi mdsojkingòjxp jòts jade'en y'ett.

5

Ja nøky jòts ja Borreek U'nk

¹ Xjats n'ijxy ja' pøn jam tsinaapy møj tsinaadyajkòjxp ku jam tmach'ity y'aga'ngyòjò'øm tu'uk ja nøky abidity midì ja'ay jòtpy jòts ñikòjxp, wixujk weents ja cha'ayi, jòts ja jade'en y'adukyi.

² Winets ø n'ijxy tu'uk ja møj ankilis jòts ja mòk t'amidøy:

—¿Pøn paat'ajtip tyik'awa'atst yø nøky, jòts t'agø'øtstu'tutt yø seeyi?

³ Nipøn ja tkanadyaja'ejxiyi tyik'awa'atst, ni tsajpòtpy ni naxwiiñ ni naxpatkipy, nipøn ja tkawin'ejxwā'añ.

⁴ Xjats øts nyaaxni njiñi, nipøn kyayikpaaty pøn tyik'awa'atst ja nøky jòts yik'ext yiknijawit, nipøn ja tka'ukwin'ejxwani.

⁵ Xjats øts xnimaay ja møjaa'y tu'uk:

—Kidi mjanchya'axy, jaa tu'uk pøn tnigubajk'ajtp ja Judajit jaa'y, jòts pøn ja rey David y'apip, yø'øts tø myajada'aky jòts t'agø'øtstu'tutt ja wixujkpi seeyi jòts tyik'awa'atst ja nøky.

⁶ Xjats ø n'ijxy tu'uk ja Borreek U'nk tyani mā møj tsinaabyajt jam, ja' kyujk'am mā ja møjaa'dyòjkti, jòts mā ja nimaktaxkpi jiyujk jam. Jamts ja yik'ijxy kyaxi'iky sam ti jyaty kyubety y'ayo'ombaaty. Wixujk ja wyaj

tmøøt'aty jøts wixujk ja wyeen; jade'en yø tijy yø wixujkpi ween sam ja niwixujkpi ja'win midi ja Dios tø tkexy ya naxwiin.

⁷ Xjats ja Borreek U'nk tniinjky pøn wyinaty tsinaapy møj tsinaabyajtkøjxp jøts tpojk ja nøky midi wyinaty myøøt'ajtpy y'aga'ngyøj'øom.

⁸ Ku ja tpijky ja nøky, winets ja nimaktaxkpi jiyujk jøts ja ni'ee'pxmaktaxkpi møjaa'dyøjk ñagyuxendyajkidi jam Borreek U'nk wyingujk. Nidu'uk nidu'uk ja møjaa'dyøjk tmøøt'atti ja kow midi yiktejp arpi, jøts nayide'en tkondi ja poom tøøy'i'ñ, tum oori ja', jade'en yø poom tijy sam ja Dios'ajot'ajtin midi kyajpxtip pøn jaty ja Dios Teety ja'ajtip.

⁹ Jamts yide'en ja jemy ñy tyikwandøø:

Mets idø'n mbaat'ajtip yø nøky jøts yø seeyi xkøøtst;

ja pø tøts xniwanguixy niduki'iyi ja jaa'y, o midi kajp o midi ayuujk, jade'engøjxp ku tøm'ayo'ombaaty ma tømdu'unt tømdu'unt.

¹⁰ Tø øøts xyikmøjtøki jøts øø nbadu'unt sam ja Dios tsøkyin, jøts øø nwindson'att ja naxwiin'it.

¹¹ Winets ø n'ixy ja ankilis namay tni'awidetti ma ja møj tsinaadyaajk jam, nay jamts wyinaty ja nimaktaxkpi jiyujk jøts ja møjaa'dyøjki,

¹² møk y'øøwdi tum jade'en jøts wya'andi:

Janch øy ja Borreek U'nk midi tøm'ayo'ombaaty,

paat'ajtip jøts tpaatt ja møk'ajtin ja øy'ajtin, ja wejin ja kajin.

Paat'ajtip yikwinjawit yikwindsø'øgit.

¹³ Xjats nmadøy nayide'en ku y'øøwdi niduki'iyi ja naxwiin'it jaa'y jade'en tsajpjøtpy naxkijxy, jøts jade'en øy ja ma jøts wya'andi:

Janch øy janch møj ja Borreek U'nk,

paat'ajtip yikwinjawit yikwindsø'øgit xemikøjxp.

¹⁴ Xjats nayide'en ja nimaktaxkpi jiyujk wyandøø:

—iOts jade'en!

Xjats ja ni'ee'pxmaktaxkpi møjaa'dyøjk niduki'iyi ñagyuxendyajkøxidi jøts twindsø'øgidi ja Dios.

6

Ja wixujkpi seeyi

¹ Jøts ø n'ijxy ja Borreek U'nk ku ja myidu'ukpi seeyi t'ago'otstu'uty ja wixujkpi seeyi, jøts nmadøøy tu'uk ja ñimaktaxkpi jiyujk ku møk yjanchwina'añ jade'en sam ja anaawin, jøts yide'en wya'añ:

—iMen x'uk'ixy!

² Jøts ø n'ijxy tu'uk ja poop kawaay, pønts ja tyatsinaajyip, arki ja tu'uk pyagajpy. Tu'uk ja koroni yikmøøy ku tøm'yajada'aky ma tsep, tyun'adø'øtswampy jøts cho'ongojmi.

³ Xjats ja Borreek U'nk ja myimajtskpi seeyi t'agø'øtstu'uty, jøts ja myimajtskpi jiyujk wya'añ:

—iMen x'uk'ixy!

⁴ Jøts jadu'uk ja kawaay kyaxi'iky, tsajpts ja' ñine'kx. Pøn ja ttatsinaapy ja'ats yikmøøy tu'uk ja amøjtsujxyøn jøts yiktanipijky jøts ja cheptu'unt, jøts niduki'iyi ja naxwiin'it jaa'y ñañibidøkøxyit, xem ja yam ñanky'oogiyidit, ka'ap ja jotkujk'ajtin ma.

⁵ Xjats ja Borreek U'nk ja myidigøøkpi seeyi t'agø'øtstu'uty, jøts ja myidigøøkpi jiyujk wya'añ:

—iMen x'uk'ixy!

Winets ø n'ixy tu'uk ja yøk kawaay, pøn ja ttatsinaapy, tati'yin ja wye-
jts'ijtpy kyøjø'øm.

⁶ Jats ja ayuujk nmadøøy jam ñimaktaxkpi jiyujk kyujk'am, ku wya'añ
yide'en:

—Wimbatp nøjx ja trigo jøts nayide'en ja cebada midi amuum tump;
aceite jøts ja vino ka' wyimbatt.

⁷ Xjats ja Borreek U'nk ja myimaktaxkpi seeyi t'agø'øtstu'uty, jøts ja
myimaktaxkpi jiyujk wya'añ:

—iMen x'uk'ixy!

⁸ Winets ø n'ixy tu'uk ja pu'ts kawaay, pøn ja ttatsinaapy ja'ats yiktanipøjk
jøts ja yikjaa'y'oookt. Ix'oojk ja pyamiñi pøn tkudanaapy ja ayodaajk. Xjats
ja yiktaguwa'anøø jøts tyik'ayo'ombaqt jawaani kagujkwa'kxy ja naxwii'ñit
jaa'y, jade'en'ampyts ja tyik'lookt ku tkaxt ja tsep, ja yuu, ja pa'am jøts ja
awa'an jiyujk.

⁹ Jats ja Borreek U'nk ja myimagoxkpi seeyi t'agø'øtstuujty, jøts n'ijxy altajr
patki'py may ja anmija'windi pøn tø tku'oogidi ja Dios yja'.

¹⁰ Ja'ats kajpxtip møk, jøts ja Dios yiknimaay:

—Janch øy janch wa'ats me Dios Teety, jøts xuñ ja tiy'ajtin. Juunim
xpayø'ty xiidyu'unt ja jaa'y pøn øøts tø xyik'øøky ya naxwiiñ.

¹¹ Jøts yikmøøy ja poop wet jøts yiknimaadyi jøts pyoo'kxtit y'awejxtitnim
øy winø'ønin. Wan t'uknamyukyidi ja migu'uktøjk pøn tku'ookwajni'pnim ja
Cristo yja'.

¹² Xjats ku ja Borreek U'nk t'agø'øtstuujty ja myidudukpi seeyi, xjats ja
tsaachmøk uix ñajxy. Jøts ja xøøw amuum yøk yjajty ejxim tu'uk ja yøk wetin,
jøts ja po' tsajpts kyaxi'jky ejxim ja wa'ats tsajpts ni'jpyin,

¹³ jøts ja maadsa' kya'y naxkixy, jade'en ejxim ja tsaachmøk poj tyikajt-
skø'øy ja ujts tøm.

¹⁴ Jøts ja tsajp jadi'iñi ñawya'kxkøjxniyi, jade'en ja yjajtni ejxim ja nøky
jadi'iñi y'abidejtmuky, jøts ja kojpk jøts ja naajx midi mejy kyujk'am tuki'iyi
tyigatskøjxni ma ja y'uk'ijty.

¹⁵ Xjats ja jaa'y kyakwidejtnidi, t'ixaabyi naxwa'knidi ja nayu'utstaajk,
tyøjkiñøø tsaa jutjøtpy tsaa ankjøtpy øy ma. Jajttip ja windsøndøjk ja
kumeendyøjk, ja møj ja mutsk. Jajttip ja soldadi wyindsøndøjkti, nayide'ents
ja jaa'y pøn mijuy kamijuy tundip.

¹⁶ Jøts wyanidi ku ayo'on jade'en t'ejxti:

—iWan ja kojpk wan ja tsaa ne'egi xyik'o'jknindi jøts jade'en
xka'ukwin'ejxna'ant ja' pøn jam tsinaapy møj tsinaabyajt køjxp, jøts
nayide'en ja Borreek U'nk ka' x'ukmøø'ña'ant ja møj ayo'on!

¹⁷ Tøxi ja xøøw jade'en kya'pxy ku ja møj ayo'on jade'en yik'ijxy, ni'pøn ja
jade'en tkamimajada'aky.

7

*Ku ja Israelit jaa'y yikmøøy ja ejxa'an pøn jaty ja Dios tyami'ejxip
tyamidsojkip*

¹ Ku ja jade'en yjajty jøts ø n'ijxy nimaktaxk ja ankilis ku ja wyinaty tyani
naxwii'ñit eskiini køjxp, jamts ja poj ja t'axajtuky jøts ja møk poj niwine'en
kya'naxkida'akt naxwiingvi'jxy mejkyijxy, jøts ja aay jøts ja kipy kyapojwidett.

² Jamts ø n'ijxy jadu'uk ja ankilis xøbidsimbyi myiñ, jap ja Dios syeeyi
tmøø'tajtti pøn xemikøjxp jujky'ajtp. Nay ja'ats møk tnimaay ja nimaktaxkpi

ankilis midi wyinaty tɔ yiktanipiky jɔts tuki'iyi tyikwindigøgyøxt tuktsajp'agida'aky, jɔts wya'añ:

³ —Uk'awejxti. Kidi xkaxti ja ayo'on kunim øøts ja ejxa'an nbikta'akt jaa'y wyimbojkøjxp nidu'uk nidu'uk, pøn jaty ja Dios yja' tpaduujnidip. Jaanims tyikwindigø'oty ja naajx, ja mejy jɔts ja aay ja kipy.

⁴ Jade'en ø nnimadøy ku tukmagø'pxy ja wixijkxy myaktaxk mil tɔ yik'ejxandi ja israelit jaa'y pøn ja nimakmajtskpi y'apteety'ajttøø.

⁵ Nimakmajtsk mil idø'øn yik'ejxandi pøn tyatsk'apip ja møjaa'y Judá. Nimakmajtsk mil yik'ejxandi pøn tyatsk'apip ja møjaa'y Rubén jɔts nimakmajtsk mil nayide'en pøn tyatsk'apip ja møjaa'y Gad,

⁶ nimakmajtsk mil yik'ejxandi pøn tyatsk'apip ja møjaa'y Aser, nimakmajtsk mil yik'ejxandi pøn tyatsk'apip ja møjaa'y Neftalí, nimakmajtsk mil yik'ejxandi pøn tyatsk'apip ja møjaa'y Manasés,

⁷ nimakmajtsk mil yik'ejxandi pøn tyatsk'apip ja møjaa'y Simeón, nimakmajtsk mil yik'ejxandi pøn tyatsk'apip ja møjaa'y Levi, nimakmajtsk mil yik'ejxandi pøn tyatsk'apip ja møjaa'y Isacar,

⁸ nimakmajtsk mil yik'ejxandi pøn tyatsk'apip ja møjaa'y Zabulón, nimakmajtsk mil yik'ejxandi pøn tyatsk'apip ja møjaa'y José, jɔts nimakmajtsk mil yik'ejxandi nayide'en pøn tyatsk'apip ja møjaa'y Benjamín.

Ja møjaa'y pøn ja poop wet wyet'ajttip

⁹ Ku jade'en nnimadøø jɔts ø n'ijxy janch may jaa'y nikyamachooni. Choondi o magajp, o ti ayuujk tkajpxti pøni sa jadu'uk ja nidu'uk ja kajp ja y'ayuujk tjagyepy; jam twindanidi mā møj tsinaabyajt jɔts nay jam mā Borreek U'nk, poop wet wyet'ajttip jɔts tixy'aay tkøñidi.

¹⁰ Niduki'iyi dø'øn tja'myatsti ja Dios jɔts møk wya'andi:

Yø Dios Teety xyiknits'ok'ajtim,
pøn jam tsinaapy møj tsinaabyajtkøjxp,
nayide'ents ja Borreek U'nk.

¹¹ Jamts ja ankilistøjk nawidity tnadanidi mā møj tsinaabyajt jam, mā ja møjaa'dyøjk jɔts mā ja nimaktaxkpi jiyujk, jɔts ñagyuxendyaajkidi ja wyingujkp mā ja møj tsinaabyajt jam; møj tjanchja'myajtsti ja Dios,

¹² jɔts wyandøø:

Nmøja'wip øøts, njanchja'wip øøts Dios Teety.

Mets ja møk'ajtin, ja ja'gyukin jɔts ja øy'ajtin mmøøt'ajtpy xemikøjxp. Jade'en idø'øn xemikøjxp y'ejxi.

¹³ Jɔts nidu'uk ja møjaa'dyøjk wyaañ jɔts x'amidøøy:

—¿Pøn idø'øn yø'ødi ixja poop wetxøødi, mā dø'øn yø choondi?

¹⁴ Jɔts ø nnimaay:

—Mets møjaa'y, mnija'wip mets yø'.

Jɔts ø xnimaay:

—Yø' dø'øn jap tɔ ñaxti mā ja møj ayo'on jam, ja Borreek U'nk ñi'jpy tɔ yikpøkwyə'achidi.

¹⁵ Paty idø'øn jam y'etti møj tsinaabyajt wyingujkp mā ja Dios chøøni, jamts ja tpaduujnidi ja Dios yja' xinaxy tsunaxy; jɔts ja pyøkjø'øgidit xemikøjxp ja wyingujkp.

¹⁶ Ka'ap ja ayo'on t'uk'ejxnidit, kya'ukyu'ooknidit kya'uktøøjtsiñidit, ni an niti kya'ukpaajtniyidit,

17 jade'engøjxp ku ja Borreek U'nk t'ejx'ity jøts ttukpaatwa'añ ttuk'ejxwa'añ ja wa'ats nøø midì xyikjujky'ajtim xemikøjxp; nayide'ents ja Dios tyiktig'øty ja yjotmay'o'jkindi.

8

Ja myiwixujkpi seeyi jøts ja poomdø'øy'ii'ñ midì tum oori

1 Ku ja Borreek U'nk ja myiwixujkpi seeyi t'agø'østtuupty, jøts kujkp hora'an y'amongøjxti niduk'i'iyi jam tsajpjotp.

2 Nay jaty n'ijxy ja niwixujkpi ankilis midì jam tanaadyip Dios wyingujkp ku ja yikmøødyi nidu'uk nidu'uk ja puxujx.

3 Jøts jadu'ukpi ankilis myiñ jøts jam tyanaay'øyiyi'ñ altajr wyingujkp midì tum oori, poomdø'øy'ii'ñ ja myimeen, jamts yikmøøy altajr wyingujkp may ja poom, jade'ents ja altajrkøjxp ttawinjøjky; jøts jamts ja nayide'en y'ity y'amido'owin pyøktso'owin ja'adi pøn jaty ja Dios ja'ajtp.

4 Jøts ja poom jok jam yja'aty Dios wyindump møøt ja y'amido'owindi ja pyøktso'owindi pøn ja Dios tmøja'widip tjanchja'widip.

5 Xjats ja ankilis tnixajiyi'ñ ja poomdø'øy'ii'ñ jøts tpiktaajky ujts ja jøndsabajk midì wyinaty altajrkøjxp, jøts tko'widijty jam naxkøjxp; winets ja møk anaaw jøts ja widsuk y'adi'ich, jøts ja tsaachmøk ujx.

Ja niwixujkpi puxujx

6 Xjats ja niwixujkpi ankilistøjk tjøp'ejxti ttaxu'uxwa'andi ja puxujx.

7 Ku ja myidu'ukpi ankilis xyuujxy, jøts ja møk tuu myiñ jøts ja tøst jøts ja jøøn møøt ja ni'jpy ñaxkidaajky. Jade'en tyøøy ja naxwii'ñit jawaani kyagujkwa'kxy, møøt ja kipy møøt ja ujts kyudigøøy.

8 Ku ja myimajtskpi ankilis xyuujxy, winets yjawi tigati ñaxkidaajky jam mejyjotp ejxim ja møj kojpkìn, ja'ats jam tøøbyøjk; jøts ja mejy wyimbijty jawaani kagujkwa'kxy wa'ats ni'jpyin.

9 Jawaani kagujkwa'kxy ja jiyujk kya'ookøxti midì jam wyinaty tsinaadyip, jøts ja barki nayide'en wyindigøøy.

10 Ku myidigøøkpi ankilis xyuujxy, winets tu'uk ja maadsa' tsajpwemp kyatska'ay, tyøøy jade'en ejxim ja møj jøønìn. Naxkidaajky mā may ja møj nøø yø'ødyi jøts mā ja kom nøø pyidsimy.

11 Ja'abi maadsa' txøøw'ajtp Ajenjo, jøts ja nøø ja tyikma'tnaa. May ja y'ooktøø pøn jaty ja t'uktøø, janch ta'am ja wyimbejtnaa ja nøø.

12 Ku ja myimaktaxkpi ankilis xyuujxy, xjats ojts waani wyindigøøy ja xøøw, ja po' jøts ja maadsa'. Nayide'en ojts xyaachkugoodsigyijxy sam yø xøøw yø po' wyindigøøyìn.

13 Winets n'ejxpaaty tu'uk ja ankilis ñaxy tsajp kujk'am, jøts ja møk wy'a'añ: —iMeets naxwii'ñit jaa'y, mjanch'ayo'odip meets ku xmado'odit ja puxujx ku ttaxu'uxtìt ja nidigøøkpi ankilis!

9

1 Ku ja myimagoxkpi ankilis xyuujxy, jøts n'ijxy tu'uk ja maadsa', tø wyinaty ñaxkida'aky naxwingijxy. Xjats yikmøøy ja ni'awaajts mā ja møj jut jam midì nøjxkp ayodaajk.

2 Xjats ja møj jut tyik'awaajch xjats ja jok yikxon jap pyidsimy sam møj orni jøtpyin; jøts ja xøøw tyikwingoodsi'ña, ni poj niti tka'ukyikyø'øñi.

³ Japts jokjõtpy may pyidsõmdi ja mõj mu' jõts tuki'iyi ja naxwii'ñit twinguyõ'õyigyõjxnaa; jade'en ja yikejxy sam ja kajpyin jõts ja naxwii'ñit jaa'y tyik'ayo'ombaat.

⁴ Ka'ap ja jade'en tõ yikejxy jõts ja aay ja ujts ja tyikwindigõ'õty ya naxwii'ñ. Ja' ja pyayõ'õpy põn jaty ja Dios y'ejxa'anin tõ kyabikta'agy midi yikpiktaktip wyimbojkwemp.

⁵ Ka'ap ja jaa'y tjadyimyik'õõky, ayo'on ja myõõpy jõts ja jajyi ja tõõyi tukmiba'am tsõõni magoxk pol'jin; jade'en ja pya'am ja tjawidi ejxim ja kajpy xõjpint.

⁶ Mõk ja tjawidi, jadyimwyandip ja' jõts tyimy'ookit; o kõ'õm ñanky'oogidit, ka'anims ja y'o'jkin kya'pxti.

⁷ Jade'en ja mõj mu' kyaxõ'õkti ejxim ja mõj kawaayin midi nay'a'ejxiyip tseptumbi nõjxktip; tum jade'en ja kyubajk kyaxõ'õkti koroni kujupy midi amuum oori, jõts ja wyeen ja y'aaw jade'en kyaxi'iky ejxim ja jaa'yin.

⁸ Jade'en ja wyaay tmõõt'atti ejxim ja tõ'õxyõjkin, jõts ja tyõõjts jade'en t'ixy ejxim ja kaajin.

⁹ Tum puix ja amuum y'ak'ajttip, jõts ku kyajkwidetti jade'en mõk yikmadõy ejxim ja maakyareti midi kawaay myinõjxktip tseptumbi.

¹⁰ Jade'en ja tyu'tst tmõõt'atti ejxim ja kajpyin. Ja'ats ja tyukta'ayo'ombatpy ja jaa'y jõts tukmiba'am tsõõni magoxk po'.

¹¹ Jamts tu'uk ja ankilis midi tso'õmp jap ayodaajkjõtpy, ja'ats tniwindsõn'ajtp ja mõj mu'; ja'ats txõõw'ajtp Abadón ja hebreit ayuujk, jõts ja griegit ayuujk Apolión midi tyijpy põn yikwindigõõpy.

¹² Jade'en idõ'on ja myidu'ukpi ayo'on ñajxy; naxkida'akpts ja mimajtskpi ayo'on.

¹³ Xjats ja myidudujkpi ankilis ttaxuujxy ja puxujx, winets pyidsiimy ja ayuujk jam nimaktaxkpi tsakaa waj aguujk jam altajrkõjxp jam Dios wyingujkp.

¹⁴ Xjats ja myidudujkpi ankilis yiknimaay midi ja puxujx tmõõt'ajtp:

—Migaji ja ñimaktaxkpi ankilis midi jamdi ma ja mõj nõõ midi yiktejp Eufrates.

¹⁵ Xjats ja jade'en yikmigajidõõ jõts tyik'ookti jawaani kagujkwa'kxy ja naxwii'ñit jaa'y. Jabi a'ejxiyi y'ejtni jõts ja jade'en yjattit ja'abi xõõw ja'abi jumõjt.

¹⁶ Namajtsk magõ'pxy millones idõ'on ja ankilis cheptumbi midi idõ'on jade'en yikjaa'y'ookit, midi kawaagyõjxpti.

¹⁷ Yide'en õ ñ'ijxy kumaa'yjõtpy ja kawaay, jõts ja' põn ttatsinaadyip, puix ja myõõt'ajttip kyachwiiñ, tsajpts, tsujk jõts pu'ts jade'en ja kyaxi'iky. Ja kawaay kyubajk jade'en ja kyaxõ'õkti ejxim ja kaajin jõts ja y'aawjõtpy pyidsimy ja mõj jõnyow mõõt ja jok jõts jõky.

¹⁸ Jõts jade'en'ampyts ja mayjaa'y y'ookõxti, jawaani kagujkwa'kxy idõ'on kyawindigõõgyõxtõõ.

¹⁹ Ja'ats idõ'on ja kawaay tya'awa'an'ajtpy ja y'aaw jõts ja tyu'tst; jade'en ja tyu'tst ja t'ixy tsaa'ngyubajkin, jade'ents ja jaa'y ja tyik'ayo'ombaaty.

²⁰ Põnts jaaktandi ka'abyim ja tmatjstu'utti ja ka'õdyunk ja ka'õwyinmaa'ñ. Wyindsõ'jkiy'ejttip ja miku'tõjkti jõts õy ti awanax agojnax. Nayide'en twindsõ'õgidi ja nugo dios agojnax midi oori õyip, midi plati õyip, midi bronce õyip jõts nayide'en midi kipy õyip, ka'ap ja y'ixy, ka'ap ja yõ'õy, jõts ka'ap ja myadõy.

21 Ni jade'en ja tkamøjpiktaajky ku ayo'on tø yjinaxy, yik'ook'adichpim ja myigu'uk ja', jøts ja miku' tunk ttun'adø'øtsti, ñamyøøt'atyidi øy pøn møøt myigu'uktøjkti, jøts myaats'adø'øtsti.

10

Ja ankilis midi tkon'ejtp tu'uk ja mutsk libri'u'nk

1 Kuts jade'en yjajty jøts ø n'eixpaaty tu'uk ja møj ankilis. Yoots'agujkp kyida'aky jam tsajpwemp jøts ja i'jch jam kyaxi'iky y'agubajkp. Jade'en ja wyeen ja y'aaw t'ixy ejxim ja xøøw y'añin, jøts ja tyeky jade'en ejxim ja jønyowin.

2 Jam tu'uk ja libri'u'nk tmøøt'aty jøts ja t'agiibyajky kyøjøøm, jøts ja y'aga'ndyeky ttawinwa'aky ja mejy jøts ja y'anajtyeky naxwingixy.

3 Jøts ja chap'aay møk ejxim ja møj kaa myu'uyin jøts nay jatyi wixujk ojk ja anaaw pyijy.

4 Ixyam øts wyinaty njaadyanwa'añ sa ja anaaw wya'añ jøts ø nmadøøy ja ayuujk midi kidakp tsajpwemp jøts ø xnimaay:

—Amaa'tsk'at yø' sam tø wya'añ yø anaaw, kidi xjaadyañ.

5 Jøts ja ankilis midi tuktamajndyeky tawa'kpajt ja mejy jøts jaduktamajndyeky ja naxwii'ñit, ja'ats y'aga'ngyø jam tkonjø'jk,

6 jøts ja tkajpxwa'kxy ja Dios tyiy'ajtin pøn tø tyiktso'ondakijxy tuki'iyi tuktsajp'agida'aky, jøts yide'en wya'añ:

—Ka' y'ukyø'øñit ja xøøw ja jumøjt;

7 kuts xyu'uxt ja myiwixujkpi ankilis, tø wyinaty kya'pxy ja Dios wyinmaa'ñ midi ja'ayi tyuknijä'wiyii'ñ ja kyugajpxtyøjkti. Ka'ap ja o pøn nugo ajawi ttuknijawi.

8 Xjats ja ayuujk nayide'en nmadoogojmi midi tsajpjøtpty tsoo'mp, jøts ja jadigojk xmigajpxkojmi jøts wya'añ:

—Nøjxk atspøjkit ja libri'u'nk midi jam agiibyaky kyii'yijtpy ja ankilis, ja' midi tanaapy mejkyøjxp jøts naxkijxy.

9 Jøts ja ankilis nninijky xjats ja libri'u'nk n'amidøøy jøts ø xmo'ot, jøts ø xnimaay:

—Ixya ja libri, maçs jøts x'ixpøkt. Øy tsuj mnayjawiit ku x'ixpøjk'okwa'ant, ku x'ixpøjkøxnit jøts ja jotmay'øøgyi xpatnit.

10 Xjats ja libri n'axajiyii'ñ jøts ja n'ixpijky, janch øy janch tsuj øts nja'wiyii'ñ, kuts ja nyikøjxnäa ja libri, jøts ja jotmay'øøgyi xpatnäa.

11 Jøts ø xnimaagyojmi:

—Kuwan i jadigojk xkajpxwa'kxt ja Dios yja' sa chøønidit sa tyanidit niduki'iyi ja naxwii'ñit jaa'y, wan tmøøji wan tmutski.

11

Namajtsk ja jaa'y pøn testigi'ajttip

1 Jøts tu'uk ja kapy nyikmøøy midi yiktakejpxp, jøts ø xnimaay:

—Tani jøts xkejpxit ja Dios chaptøjk møøt ja altaji, jøts nayide'en xmacho'ot pøn jaty jap twindsø'jkip ja Dios.

2 Ka'ap yø xkepxt yø tsaptøjk aaw, tsaptøjk øjx jøts ja tsaptøjk paa' ja'agøjxp ku wenk jaa'y myenwa'andi jøts jap wyidettit, jade'ents ja tyikma'attit ma jaty ja wyidettit jap Dios kyajpjøtpty, wixijky myajtsk po' y'ettit jade'en.

3 Ngaxp øts namajtsk ja ngugajpxy midi tum yøk wet twet'ajttip, ja'ats xkajpxip ja nja' tigøøk jumøjt jagujkp.

4 Ja namajtskpi kugajpxy, jade'eñi n'ukpiktaajkin ejxim ja olivi kipyin, jøts nayide'en ejxim ja majtskpi kandleeri midi jam ejtp nwindson'ajtim wyingujkp.

5 Pøni pøn midundigøowyajnip, yikpidsømdip ja jøøn ja y'aawjøtpy, jade'eñits ja myidseptøjk tyik'ookøxtit tyikwindigøogyøxtit.

6 Yø namajtskpi kugajpxy yjagyajpti ja møk'ajtin jøts ka'ukyiktunit winø'ønin ja Dios yja' tkajpxwa'kxidit. Nayide'en ja nøø tyikjajtnidit wa'ats ni'jpyin, jøts tkaxtit kawinaak jøøjp ja pa'am sa ja kø'øm t'a'ejxidit.

7 Kuts ja jade'en tkajpxwa'kxkøxtit ja Dios yja', winets tu'uk ja møk awa'an jiyujk pyidsø'ømt jam ayodaajkotp jøts ja namajtskpi kugajpxy yik'oogiyit.

8 Jamts ja oo'kpi jadi'iñi tya'ant, jam ja wyibejpnit jam tuu' kujk'am, nay ja kajp ma ja nwindson'ajtim Jesucristo kyiruspejty. Nugo dø'øn jade'en yø kajp yiktijy Sodoma jøts Egipto.

9 Tigøøk xøøw jagujkp yik'ejxtit yiknijawidit ja oo'kpi. Øy pøn jaa'y o magajp mye'endit jøts ka' tñankyikpidi'igy i ja oo'kpi.

10 Xjats ja naxwii'ñit jaa'y jade'en agujk jotkujk ñajjawiyidi, janch nixem niyam o ti ñadyamay'atyidi ja agøjxp ku tø y'ookti ja'adi pøn møk tø yik'ayo'ombaadyidi pøn ja Dios yja' tkajpxwa'kxidip.

11 Xjats ku myidigøøk xøøw jagujkp'ajty, winets ja Dios tyikjujkyiky jadigojk ja oo'kpi. Janch tsø'jkidøø ja'adi pøn jaty jam wyinatyi.

12 Winets ja namajtskpi kugajpxy møk yikmigajpxti, tsajpjøtpy ja kyajpxy, jøts yiknimaydi:

— Pat yam.

Jøts chapajtnidi tsajpjøtpy yoots'agujkpy jøts ja myidseptøjk y'ejxidøø ñija'wiyidøø.

13 Jøts nay jaty i ja møk ujj ñajxy, jøts wixujk mil ja jaa'y y'ookti ku ja kajp kyuja'wiyi'ñ kyujejtyi'ñ. Janch tsø'jkidip ja' pøn jaty jaaktandøø, jøts ja Dios ja tjanchja'myajtsti midi jap tsajpjøtpy.

14 Jade'en ja myimajtskpi ayo'on ñajxy; tsojks mye'ent ja myidigøøkpi.

Ja myiwixujkpi puxujx

15 Xjats ku ja myiwixujkpi ankilis ttaxuujxy ja pyuxujx, jøts møk yikmadø may ja ayuujk jap tsajpjøtpy jøts wya'añ:

Øyam ja kutujk ñaxkida'aky midi ja Dios Teety jøts nwindson'ajtim Jesucristo yja'ajttip;

jøts xemikøjxp ja tyiktu'undit ma y'ijty ja naxwii'ñit jaa'y yja' tyiktundi.

16 Xjats kyuxanidi jøts ñaxkowdi ja ni'ee'pxmaktaxkpi møjaa'dyøjk pøn jam tsinaadyip Dios wyingujkp, jøts ja Dios tmøjawidi twindsø'øgidi,

17 jøts yide'en wya'andi:

Janch møj me Dios Teety,

tu'ugyi me m'ity xemikøjxp.

Møj øøts nmøjawi ngunuukxyjawi ku tø xyikmajada'aky ja mmøk'ajtin jøts ja mgutujk ma ja naxwii'ñit jaa'y.

18 Jøts ja naxwii'ñit jaa'y mmijot'ambikyiyi,

tø kya'pxy jøts ja ayo'on xmo'ot jøts nayide'en xiidyu'unt ja oo'kpitøjk.

Jøts xmo'ot ja øy'ajtin pøn jaty ja mja' tøn mbadu'unxyi pøn jaty tø tkajpxwa'kxy wan tmøji wan tmutski.

Tø kya'pxy jøts nayide'en xyikwindigø'øty pøn jaty tø tmidundigøy ja naxwii'ñit jaa'y.

¹⁹ Xjats ja Dios chaptøjk y'awaajch jap tsajpjøtpty jøts yik'ixy ja kaaxi ma jap y'ity ja Dios kyutujk. Xjats ja møk uix ñajxy jøts ja anaaw, jøts ja widsuk jøts ja møk tøst ñaxkidaajky.

12

Ja tø'øxyøjk jøts ja awa'andsaa'ñ

¹ Xjats winet kyaxi'iky tu'uk ja møj ejxpajt jam tsajpwemp: jamts tu'uk ja tø'øxyøjk tyani po' kyubajkp. Jade'en yø møk chamamy sam ja xøøwin, jøts tkujup'aty tu'uk ja koroni midi makmajtsk maadsa' tjagyajp.

² Jøtptyts ja tø'øxyøjk wyinaty, ka'axwampts jøts møk ja y'u'nk ja yik'ayøyi jøts kyaxø'økt.

³ Winets jam tsajpwemp n'ijxy jadu'uk ja ejxpajt: jamts tu'uk ja awa'andsaa'ñ, amuum tsajpts ja ñine'kx jøts wixujk ja kyubajk, majk jaty ja wyaj nidu'uk nidu'uk ja kyubajk tmøø'taty, jøts ja koroni nayide'en tu'uk jaty tkujup'aty.

⁴ Jøts ja tyu'tst ttabajaa'xkijxy may ja maadsa' jam tsajpwemp, jøts naxkijxy ja tñajtswøjiyii'ñ. Jam tyanaay'øyi'ii'ñ ma ja tø'øxyøjk jam kya'axwa'añ jøts ja y'u'nk jaty: tsu'jtsit ku ja kya'axt.

⁵ Ka'ax ja', mixyu'nk ja', ja'ats nøjkx niwindsøn'aty møk'ampy ja naxwii'ñit jaa'y. Xjats ja y'u'nk ja Dios tøjknaa jøts ja tyiknijky ma ja møj tsinaabyajt jam;

⁶ Jøts ja tø'øxyøjk kyeejky, jøts jam ja ñøjkxni ma abak et, ma ja Dios jam wyinaty ja y'et tø'ta'ejxi, jamts ja kya'aty agujk jotkujk, jade'ents jam chøønit tigøøk jumøjt jagujkp.

⁷ Xjats ku jade'en yjaty winets ja tsep tyuujni jap tsajpjøtpty. Ja møj ankilis Miguel møøt ja y'ankilistøjk minamyajtsi ja awa'andsaa'ñ møøt ja y'ankilistøjk ja' møøtmi.

⁸ Ka'ap ja myajadaktøø ja awa'andsaa'ñ; ka'ap ja ma y'uk'etnibajtniyi tsajpjøtpty.

⁹ Jøts ja jade'en yikpawojpnaa, yikaxni naxwingijxy. Yø' dø'øn ja møj miku' windsøn midi yiktejp Satanás midi twin'øø'n ja naxwii'ñit jaa'y.

¹⁰ Winets nmadøøy møk ja kajpxy jap tsajpjøtpty midi yide'en wamp:

—Tø ja Dios ja naxwii'ñit jaa'y tyiknitso'ok'aty. Tøts ja myøk'ajtin tñanky'ijxyiyi jøts ja kutujk tmøøy ja Cristo sa ttanitanit ja yjaa'y; tøts ja nayide'en tpawøpy ja' midi xinaxy tsunaxy tni'øø'nip jam Dios wyindump ja' midi tø y'ookti Dios køjxp.

¹¹ Tø tmimajada'akti ja miku' yja', ja'agøjxp ku ja Borreek U'nk tø tkudsuni tkudaaxi ja naxwii'ñit jaa'y, jøts ku tø tñigajpxkøxti sa tjanchjawidi ja Dios yja', wan tjaty pøni sa yjaty.

¹² Ejtni xoni meets pøn jap tsajpjøtpty, jøts janch yik'ayow meets pøn ya naxwii'ñ tyiknajxtip. Tø meets ja miku' mnimee'niyidi jøts awa'an'ampy mga'ødyunidit, ñija'wipxi ja' ku tsojk kya'pxt.

¹³ Xjats ku ja awa'andsaa'ñ tja'wiyii'ñ ku ja ya naxwii'ñ tø yikajxni, xjats ja tø'øxyøjk ja tpayø'øy pøn ja y'u'nk wyinaty tø tyikaxi'iky.

¹⁴ Winets ja tø'øxyøjk yikmøøy majtsk ja weejts myøjkajnk, jøts ja kyajkni-jkxy ma ja y'et ja jam abak etjotp. Jade'en ja tñikejky ja awa'andsaa'ñ. Jamts ja kya'aty yjøø'kxt amgujuk jotkujk tigøøk jumøjt jagujkp.

¹⁵ Jøts ja awa'andsaa'ñ ja møj kom nøø tyikpidsii'my y'aa'wjøtpty, jade'ents ja tø'øxyøjk ja tyikjø'øtwa'añ;

¹⁶ jøts ja tø'oxyøjk ja naxwii'ñit pyudøjkiyi. Møj et aaw awaajts, japts ja nøø jadi'iñi tyøtskøjxnaa.

¹⁷ Jade'ents ja awa'andsaa'ñ møk tmi'ambijky ja tø'oxyøjk, jøts ja tmidsepiky ja y'ap ja y'ok. Jade'en idø'øn ja'adi pøn ja Dios yja' tpaduujnidip sam ja nwindson'ajtım Jesucristo tnigajpxy.

13

Namajtsk ja møj ka'øy jiyujk

¹ Jam ø mejy'agø'øm nwa'k'øyi'i'ñ jøts ø n'ijxy jam pyidsimy tu'uk møj ka'øy jiyujk. Wixujk ja kyubajk tmøøt'aty jøts majk ja wyaj. Tu'uk tu'uk ja wyaj tmøøt'aty ja koroni, jøts jam kyubajkøjxp yikja'ay ja letri midi ja Dios kya'øyja'wip.

² Jade'en ja kyaxi'iky ejxim ja møj kuxibyiyin, jøts ja tyeky kyaxi'iky ejxim ja osa'an, jøts ja y'aaw ejxim ja kaajin. Ja'ats ja awa'andsaa'ñ møøjyi tuki'iyi ja myøk'ajtin ja kyutujk midi ja wyinaty myøøt'ajtpy.

³ Jade'en ja kyubajk tu'uk kyaxi'iky ku janch møj tø chaachi, ty-imyik'ookwajnip. Ka'ats ja yik'o'jki, tsoojk ja'. Kuts ja t'ejxti ja naxwii'ñit jaa'y, ñigyumaap ja tja'widyøø xjats ja tpadundi ja yja'.

⁴ Nayide'ents ja tmøjawidi twindsø'øgi ja awa'andsaa'ñ, ja'agøjxp ku wyinaty tø tmø'øy ja myøk'ajtin ja kyutujk ja møj ka'øy jiyujk, jøts ja nayide'en yikwindsø'øgi. Yide'en ja wya'andi ja naxwii'ñit jaa'y:

—iPøn jade'en t'uktu'ump sam yø møj ka'øy jiyujk, pønts jade'en ukma-jada'akp!

⁵ Xjats ja møj ka'øy jiyujk yikmøøy ja tuu' jøts ja møk'ajtin jøts tjemnøjmit tenøjmit ja Dios yja', wixijky myajtsk po' y'ett.

⁶ Jade'en idø'øn ja ttuuñ; tuki'iyi tmigajpxigøøy midi ja Dios yja'ajtpy jøts ja xyøøw jøts ja chinaadyaajk, jøts midi ejtp tsajpjøtpy, tuki'iyi ja yikmigajpxigøøgyixy.

⁷ Nayide'en yikmøøy ja tuu' jøts tmøøtseptu'unt pøn jaty ja Dios yja' tpaduujnip kunim ja tmimajada'akt; jade'en ja kyutujk yikmøøy jøts tniwindsøn'att niduki'iyi ja naxwii'ñit jaa'y.

⁸ Jøts ja naxwii'ñit jaa'y jade'en twindsø'øgi ja møj ka'øy jiyujk, ja' tpadundip jade'en pøn jaty kajaabyety jap nøkyjøtpy kuuyip ja naxwii'ñit cho'ondaajky. Yø' nøky ja Borreek U'nk myøøt'ajtpy midi tø y'øøky adømgøjxp.

⁹ Øy yikxon madowdi.

¹⁰ Pøni pøn ja myigu'uk tsump, nayide'ents ja yiktsu'umt; jøts pøni pøn ja myigu'uk tyik'ookp, nayide'ents ja yjatt. Paty chøkyi mduda'akyjaa'y'attit jøts x'ajot'attit ja Dios sam pyaat'aty pøn ja Dios yja' tpaduujnip.

¹¹ Jøts jadu'uk ø n'ijxy møj ka'øy jiyujk pyidsimy naxjøtpy. Majtsk ja wyaj tmøøt'aty jade'en sam ja borreegi wajin, jøts jade'en kyajpxy sam ja møj awa'andsaa'ñ.

¹² Nayide'en ja kyutujk tjagyepy sam ja myiga'øy jiyujk midi ja kyubajk tsaachiyi'ñ, jøts yø tnøjmit ja naxwii'ñit jaa'y jøts yikwinjawit yikwindsø'øgit.

¹³ Nayide'ents ja myilagri'ajtin tnanky'ijxyi, møj jøøn tyiktsøøñ tsajpwemp jøts naxkixy tyiknaxkida'aky, jøts ja jaa'y ttuk'ixy wyemp amp.

¹⁴ Jade'en'ampy ja jaa'y twin'iñ ku myilagri'ajtin tnanky'ijxyi, xjats ja naxwii'ñit jaa'y tnimaay jøts tyik'øyt ja tsamaxan ja awanax midi t'ejxp jade'en sam ja møj ka'øy jiyujk midi tsaachiyi'ñ.

15 Xjats ja yikmøøy ja møk'ajtin jøts tyikjujkyøkt tyikajpxt ja tsamaxan, pønts ja kawindsø'jkiyip, yik'ookp ja'.

16 Xjats nayide'en ja møj ka'øy jiyujk ja y'ejxa'anin tpiktaajky kyøjø'øm uk wyimbojkwemp tuki'iyi ja naxwii'ñit jaa'y, wan tmøji wan tmutski, wan tkumeeñ jaa'yi, wan t'ayoobi jaa'yi, øy ja yjawindsøndøjkidi, øy ja yjatumbitøjkidi.

17 Ka'ap pøn mibaat ti tjuy, ti tkajpxy, ti ttøøky, ku ja y'ejxa'anin tkamøøt'atti midi ja møj ka'øy jiyujk tø tpikta'aky. Ja' y'ejxa'anin'ajtpy ja xyøøw jøts ja ñumeri.

18 Yø'øbi numeri ka'ap yø o pøn tnijawi; ja' yø tnija'wip pøn yikxon t'a'ejxip. Yø jade'emb; numeri, jade'en yø kyajpxy ejxim ja jaa'yxøøwin, tudujk magø'pxy ja tugi'pxyudujk jade'en ja'.

14

Ku ja tukmagø'pxy wixijky myaktaxk milbi jaa'y y'øøwdi

1 Kuts jade'en yjajty jøts ø n'ejxpaaty ja Borreek U'nk jam tyani kojpkøjxp ma yiktijy Sión. Tukmagø'pxy ja wixijky myaktaxk mil ja jaa'y tmøødi pøn wyinaty wyimbojkwemp tø yikpikta'aky ja Dios Teety xyøøw jøts ja Borreek U'nk yja'ami. Ja'ats idø'øn ja y'ejxa'anin'ajttip.

2 Jøts nmadøøy møk wyina'añ tsajpjøtpy ejxim ja møj nøø y'iichin jøts ja møk anaawin; jade'en yikmadøøy wyinaa'ñ ejxim ja maagyow midi yiktejp arpi.

3 Jamts ja jemy'iyy t'øøwdi ma ja møj tsinaabyajt jam, ma ja nimaktaxkpi jiyujk jam jøts ja møjaa'dyøjkti. Nipøn ja'abi iyy tkajaty, ja'ayi tjajttip pøn nitso'ok'ajtti ya naxwiiñ, tukmagø'pxy ja wixijky myaktaxk mil jade'en ja'adi.

4 Wa'ats øy tsuj yjaa'y'atti jøts ka'ap ja o pøn tø'oxyøjk tmøøt'atti, tu'ugyi tpadundi ja Borreek U'nk pøni ma ja ñijky. Yø' dø'øn ojts jawy- een ñadyamiyøxyidi ma ja Dios Teety jøts ja Borreek U'nk, jade'en yø ttanitso'ok'atti.

5 Ka'ap ja win'øø'nin, ka'ap ja taay'ajtin tjagyapti, øy tsuj wa'ats yjaa'y'atti Dios wyingujkp.

Kyugajpxy'atti ja nidigøøkpi ankilis

6 Winets ø n'ejxpaaty jadu'uk ja ankilis midi kajkwidejtp jam tsajp kujk'am. Ayuujk myimimpy jøts tkajpxwa'kxwa'añ sa ttanitso'ok'attit ja naxwii'ñit jaa'y o magajp o ma'ayuujk.

7 Jøts møk kyajpxy yide'en:

—Windsø'øgidi winjawidi ja Dios, tø kya'pxni jøts ja tiidyu'unin ñaxkidakniit. Jade'ents xwindsø'øgidit ja Dios pøn ja tsajp ja naajx tyik'øyiyi'ñ tuki'iyi.

8 Xjats jadu'uk ja ankilis pyamiñi midi waan:

—Tø ja møj kajp Babilonia wyindigøy, ja'agøjxp ku tuki'iyi ja naxwii'ñit twin'iin jøts ttuktuñ sam ja kya'øyjaa'y'atti.

9 Xjats ja ankilis jadu'uk pyamengojmiiyi, jøts ja møk nayide'en wya'añ:

—Pøni pøn ja twindsø'jkip ja ka'øy jiyujk jøts ja y'awanax, jøts jade'en yik'ejxa'andit wyimbojkwemp uk kyøjø'øm,

10 yø'øts ja ayo'on yikmo'odip ja'agøjxp ku ja Dios tø tyikjotma'atti; jade'ents ja jøøn jøts ja jøky tyukpaadidit tyuk'ejxidit Dios y'ankilis wyindump jøts ma ja Borreek U'nk jam.

¹¹ Xemikøjxp ja ayo'on jap t'ejxtit, nijuuni ja poj xyuxy'ajtin tkapaajtidit. Xinaxy tsunaxy ja y'etti pøn tō twindsø'øgidi ja ka'øy jiyujk jøts ja y'awanax, sam ja tō yik'ejxandi nidu'uk ja nidu'uk.

¹² Jade'ents yø chøkyi jøts møk y'ettit tyudā'aky'attit pøn ja Dios ja'ajtidip jøts ja y'ana'amin tpaduujnidi, jøts pøn ja Jesús møøt tu'ugyi ettip.

¹³ Winets nmadøøy møk kyajpxy tsajpjøtpy jøts ø xnøjmi:

—Ja' ya'at: “Pyaattipts ja øy'ajtin xondaajkin ku y'ookit tyigø'ødyit pøn ja nwindson'ajtim Jesucristo tjanchja'widip.” Nayide'en ja Espiritu Santo wya'añ jøts y'ejtnit ejtni xoni jøts ja y'øy'ajtin pyudøkyyit nayide'en.

Sa ja Dios tt#dyunwa'añ ja naxwii'ñit jaa'y

¹⁴ Xjats ø n'ejxpatkojmi, jam ø n'ixy tu'uk ja jaa'y chøøni poop yootskøjxp, koroni kyujup'ajtpy midit tum amuum oori, jøts ja møj tsujx tkap'ity.

¹⁵ Jøts jadu'uk ja ankilis pyidsimy mā ja Dios chinaadyaajk jøts møk tmigajpxy midit jam yootskøjxp tsinaapy:

—Kajpjø'øk yø tsujx jøts xyikpidø'økt yø pikta'aky; tiempi yø' jøts pyidø'knit, tō yø myijaani yø pikta'aky midit naxwii'ñit'ajtp.

¹⁶ Xjats ja' midit tsinaapy yootskøjxp, nay jatyits ja møj tsujx ttaapo'otmujky ja pikta'aky.

¹⁷ Xjats jadu'uk nayide'en ja ankilis pyidsimy mā ja Dios chinaadyaajk jap tsajpjøtpy, jam tu'uk ja møj tsujx janch jøøjp nayide'en tkapi.

¹⁸ Altajr wyingujkp jadu'uk ja ankilis chøøñ midit t'eix'ejtp ja jøøn jam altajrkøjxp. Ja'ats møk tyajxyi'ñ midit ja tsujx tmøøt'ajtp, jøts tnimaay:

—Kajpjø'øk yø møj tsujx jøts xyikpidø'økt yø uvi tsa'am kumi tō yø myijaani.

¹⁹ Jøts ja ankilis ja tsujx tyiktuuñ naxkijxy, jade'ents ja uvi tsa'am tyikpidi'jky, japts ja t'abøjkijyi'ñ y'abøjk'i'ñjøtpy mā yikmøø'kxt, jade'en idø'øn yø tijy ku ja Dios møk ja ayo'on tyiknaxkida'akt.

²⁰ Jam kajp wingon ja uvi tsa'am yikmii'kxy, jøts ja ni'jpy kom'ampy pyidsimy. Kawaay y'aawgijxy ja yja'aty jadine'en ja kyøjki, jøts yø'øy tigøøk magø'pxy kilometri.

15

Ja wixujk ayo'on midit ja ankilistøjk yikme'endip

¹ Kuts jade'en yjajty jøts n'ixy tsajpwemp jadu'uk ja ejxpajt, janch adsø'jikibim: jade'ents ja niwixujkpi ankilis tmimiñ ja wixujkpi ayo'on midit tō yiktanipiky, kuts ja ayo'on ñaxt jade'ents ja Dios y'ambøjkin yjøpkøxt.

² Jøts ø n'ejxpaaty tu'uk ja mejy janch wa'ats, janch tøø'kxp, jønyowin kyaxi'iky. Jamts mejy'agø'øm tyanidi niduki'iyi pøn tō tkabadundi ja ka'øy jiyujk yja' jøts ja y'awanax, sam nayide'en ja ñumeri tō tkagupøjkidi. Jamts ja kow ja tmøøt'atti midit ja Dios tō myø'øyidi.

³ Jøts ja t'øwdi ja mōjaa'y Moises y'iiy pøn ja Dios kyugajpxy'ajit, jøts ja t'øømidit ja Borreek U'nk yja', midit nømp: Tu'ugyi me Dios Teety ja møk'ajtin xjagyepy. Jøts midit tō xyik'øyi, janch øy janch tsuj jøts kamidaabyaadyim; janch tiy'ajtin ja' midit mdumpy midit mbiktakpy, jøts xnideety'aty xnimōjaa'y'aty ja naxwii'ñit jaa'y.

⁴ Jøøn Dios Teety mga'uktsø'øgiyip, jøts pønts mga'ukwindsø'øgiyip?

Pø tu'ugyixi mets mwā'adsi.

Mwinjawiyip mjanchjawiyipts niduki'iyi ja naxwii'ñit jaa'y, ja'agøjxp ku mdiy'ajtin xnanky'ijxyi sa mduñ sa mbiky.

⁵ Nay winets ø ne'jxpaajty ku ja Dios chinaadyaajk y'awajch jap tsajpjøtpy ma yikpøkji'iky ja Dios kyutujk.

⁶ Nay japts pyidsømdi ja niwixujkpi ankilis midi myimendip ja wixujkpi ayo'on. Ja' wyet'ajttip ja øybi wet midi janch tøø'kxp janch tsamamp. Midi chum'ajtpy, amuum oori ja', kyachwiiñ ja chum yja'aty.

⁷ Nay winets ja ñamaktaxkpi jiyujk nidu'uk ja niwixujkpi ankilis tmøøy kitu'uk ja kopi midi amuum oori. Ujts ja ayo'on ja tmøøt'aty midi ja Dios yajkpy, midi xemikøjxp jujky'ajtp.

⁸ Jøts nayide'en ma ja Dios chinaadyaajk tø ja jok kawinø'on jap tø tya'tspøjkni. Ja Dios myøk'ajtin jade'en adøtsp jøts niþøn jap miþaat kya'uktøjkiñi kunim yjøkøxt ja wixujkpi ayo'on midi ja niwixujkpi ankilis yiktamigajxidip.

16

¹ Kuts jade'en yjajty xjats nmadøøy møk kyajpxy jap ma ja Dios chinaadyaajk, xjats ja niwixujkpi ankilis tniimaay:

—Nøjkx atsyiktawaagtstip yø wixujkpi kopi jam naẏwingøjxp, ja ayo'on yø myøøt'ajtpy midi ja Dios yajkpy.

² Winets ja myidu'ukpi ankilis tyiktawaajch ja kyopi jam naẏwingøjxp, jøts ja jaa'y pyatkøjxniyi ja tsamaax jøts ja ka'øbyu'uts. Ja' jajttip niduki'iyi pøn ja ka'øy jiyujk ja y'eja'anin tmøøt'ajttip jøts pøn twindsø'jkidip ja y'awanax.

³ Xjats ja myimajtskpi ankilis mejyotp ja kyopi tyiktawaajch, jøts ja yjajtnaa wa'ats ni'jpy ejxim ja jaa'y ni'jpyin ku pøn chaachi, jøts ja y'oo'køjxni niduki'iyi midi jaty jam tsinaapy mejyotp.

⁴ Jøts ja myidigøøkpi ankilis ja kyopi tyiktawaajch møj nøøjotp jøts ma jaty ja nøømu'ut. Nayide'ents ja wyimbejtñimaa wa'ats ni'jpy.

⁵ Winets nmadøøy ja ankilis midi tniwindsøn'ajtp ja nøø ku wya'añ:

—Me Dios Teety, tiy'ajtin ku jade'en xuñ. Janch øy janch wa'ats mets, jøts xemikøjxp me m'ity,

⁶ ja'agøjxp jade'en yjatti ku mets ja mjanchja'wibitøk yikjemandu yiktedundi, tø tyik'ookti, kawinø'on tø tyiktsuñ tyiktaxy. Paty mets ja nøø xyikwimbejtñi wa'ats ni'jpy jøts yø t'uukti; jade'ents yø pyaat'atyidi.

⁷ Nmadøøy nayide'en ku jap altajrwimpy kyajpxy yide'en:

—Mets Dios Teety, tu'ugyi mets ja møk'ajtin xjagyepy, ku naẏwii'ñit jaa'y jade'en tø xpayø'øy, tiy'ajtingøjxp idø'on ja tø xuñ.

⁸ Jøts ja myimaktaxkpi ankilis tyiktawaajch ja kyopi jam xøøw wyingøjxp, jøts ja xøøw ja myøk'ajtin tpijky, jøts ja jaa'y chaaba'oo'kniyi ja xøø'an.

⁹ Øy ja kawinø'on ja xøø'an yjatsa'yidi ni jade'embaats ja wyinmaa'ñ ja tkayiktigatsti. Ni jade'embaat ja Dios tkaja'myatsti ku ayo'on tja'ejxti, ne'egi ja Dios tmigajpxigøy'adøøtsti.

¹⁰ Jøts ja myimagoxkpi ankilis tyiktawaajch ja kyopi ma ja møj ka'øy jiyujk ja myøjtsinaabyajt jam, jøts tuki'iyi kyoodsigyixy winø'ømbaat t'ane'emy ja yjaa'y. Øy ja ayo'on ja møk tja'ejxti, jadi'iñits ja tjantyimyimajada'akti. Nugo ja tyoojts ja tjanch'atsu'utsmukti;

¹¹ Ni jade'embaats ja tkamajtsu'uty ja kya'øy'ajtin midi ja tyundip, ne'egi ja tmigajpxigøy'adøøtsti ja Dios pøn jap tsajpjøtpy, ja'agøjxp ku ayo'on ja jade'en ttuk'ijxy.

¹² Xjats ja myidudu'ukpi ankilis tyiktawaajch ja kyopi møj nøøjotp midi yikejp Eufrates. Ku jade'en ttuun jøts ja tyijch, jøts ja tuu' jam y'awaajch, jøts ja møj windsøndøk jam ñajxti midi tsoo'ndip xøøbidsimdsø'ampy.

¹³ Winets ø n'ijxy ku ja miku' pyidsimy jap awa'andsaa'n y'aawjõtpy. Nayide'en pyidsømi jap møj ka'øy jiyujk y'aawjõtpy, jøts nayide'enmi jap kugajpxtjøjk y'aawjõtpy midu nadyejidip ku ja Dios tkugajpxy'atti jøts twindaay'atti nugo ja jaa'y. Nidigøøk ja miku' jade'en pyidsømdi ejxim ja pokleenin.

¹⁴ Yø'øbi miku' jade'en ja møj ejxpajt ñanky'ejxip jøts niduki'iyi ja møj windsøndøjk tyiknamyukøxwa'añi pøn ya naxwiiñ. Jade'ents ja tsep t'a'ejxidit ku ja xøøw tpaatt jøts ja Dios tmime'ent ja myøk'ajtin midu ka' pøn tmi'abaaty.

¹⁵ Yide'en ja Dios wya'añ: "Ukmadowdinim, adsu'uky ø nme'ent ejxim ja maa'tspa'an, nipøn tkanijawi. Tya'øy'ajttip ja Dios kyunuu'kxin pøn nay'ejx'ejtidip nabyøkjø'kidip. Ka'ap øts xmidsø'ødyu'unt ku nme'ent."

¹⁶ Jøts ja møj windsøndøjk ñamyukøjxidøø ma jam hebreo ayuujk teji Armagedón.

¹⁷ Xjats ja myiwixujkpi ankilis tyiktawaajch ja kyopi pojotp jøts yikmadøøy møk kyajpxy midu tsoo'mp jap tsajpjøtpy ma ja Dios chinaadyaajk, jøts wya'añ:

—Tø y'øyigyixy jøts tyunit jøts yjatit.

¹⁸ Jøts møk ñaxkidaajky ja widsuk, jøts wyinanguejky ja anaaw, jøts ja tsachmøk uxx myiñi midu ka'aniam windii yik'ijxy yikñijawi ya naxwiiñ.

¹⁹ Xjats ja møj kajp Babilonia y'ajaabajky tigøøk ween. Jade'en'ampy jade'en ja Dios tyuñidi ku ja kya'øyjaa'y'atti jøts jade'en ambøjkin'ampy tyukji'kxyidi ja ayo'on. Tuki'iyi ja kajp wyindigøøgyixy jøts yjaajø'kixxy ya naxwiiñ.

²⁰ Wyindigøøgyixy ja naajx midu jam mejkyujk'am jøts ja kojpk nayide'en yjajty.

²¹ Nayide'en ja jaa'y pyajtigøøjyøø ja tøst midu je'mch'ajtp wixijxxy kili tu'uk tu'uk. Ni jade'en ja jaa'y tkaja'myatsti ja Dios øy yø sa wyan'adø'øtsti, øy ja ayo'on møk tø yjayikmo'odi.

17

Ku ja ka'ødyø'øxy tø pyajtniyi ja myiw'in'øø'mbi

¹ Kuts jade'en yjajty, jøts myiñi nidu'uk ja ñiwixujkpi ankilis midu tmøøt'ajttip ja wixujkpi kopi, jøts ø xnimaay:

—Men, jøts ø n'uktuk'ext sa y'ayo'ombaatt ja ka'ødyø'øxy pøn jam tsinaapy mejwyingøjxp.

² Yø møj windsøndøjkti pøn ya naxwiiñ, tø yø tmøøtpøkyundi yø ka'ødyø'øxy. Jade'ents ja naxwii'ñit jaa'dyi tø ttuktuñ ttuknijawi ja kya'øyjaa'y'ajtin, jøts jade'en tu'ugyi tø yikwin'øø'nidi.

³ Nayi kumaa'yjøtpy ja Espiritu Santo xuk'ijxy ku øts ja ankilis xyiknijxxy jam møj abak etjotp, jamts ø n'ijxy tu'uk ja tø'øxyøjk tatsøøni tu'uk ja møj ka'øy jiyujk, tsajpts ja' jøts wixujk ja kyubajk, majk ja wyaj tmøøt'aty, amuum nija'ay ja y'ak midu kya'ødyamigajpxy ja Dios.

⁴ Jøts ja tø'øxyøjk ja wyet twet'aty tsuu'nk jøts tsajpts, amuum oori xyox'ajtpy, jam n'ijxyimbi nga'ijxyimbi. Jamts ja kopi tu'uk tmach'ity midu amuum oori, ujts ja kopi nayide'en tmøøt'aty midu kyada'øyjaa'y'ajtpy;

⁵ Jøts wyimbojkwemp ja letri tmøøt'aty midu ka' nugo ajawi yikñijawi. Yide'en ja tijy: "Ja møj Babilonia midu tñigubajk'ajtp ja ka'ødyø'øxyøjkti, ja ka'ødyunk jøts ja ka'øwvinmaa'ñ."

⁶ Jøts nay jatyi n'ijxy ku ja ka'odyø'øxy myu'ugyi, ja ni'jpy tam ja muujkip pøn ja Dios ja'ajtp ku ja Jesús yja' tø tku'oogidi. Nigyumaap njawi ku jade'en n'ijxy.

⁷ Xjats ja ankilis xnimaay:

—¿Tiku nigyumaap xjawi? Ixyam n'uktuknijawit sudso'ampy idø'øn yø jade'en tijy yø tø'øxyøjk jøts yø ka'øy jiyujk midu ja tø'øxyøjk tyatsinaapy, midu wixujk ja kyubajk jøts majk ja wyaj.

⁸ Yø ka'øy jiyujk midu ixyam m'ijxpy, jekyip yø jaayi y'ijty. Ka'ap yø ixyam ma y'ukyik'ejxni; øy jade'en tø yjaty, pidsømgøjmip jap ayodaajkjøtpy jøts ñøjkxt ma wyindigø'øty xemikøjxp. Jøts ja jaa'y pøn ja xyøøw kayikja'ay jap nøkyjøtpy ma jap y'ity ja jaa'xyøøw midu juky'ajttip xemikøjxp, yø'øts nigyumaap tjawidip ku ja t'ejxkojmidit ja ka'øy jiyujk ku ja nay jaa yujky'aty.

⁹ 'Ukmadow yikxon midu ndukmadowampy: Yide'en yø wixujkpi kubajk twandijy yø wixujkpi kojpk ma yø tø'øxyøjk chøøni.

¹⁰ Nayide'en yø wixujkpi kubajk twandijy niwixujk ja windsøndøjkti. Tø wyindigøy nimagoxk, jøts nidu'uk ixyam wyindsøn'aty, jøts jadu'uk ka'anim ja myiñ. Kuts ja mye'ent, ka'ap ja jeky y'ett.

¹¹ Jøts ja ka'øy jiyujk midu ya ejt naxwiñ jøts ka' ixyam ma y'uk'ejtni, ja' idø'øn etp myiduktujkpi windsøn. Ja' idø'øn ndejnt yjapatpy ja ñiwixujkpi windsøn pøn øy sã tø yikajpxpaaty, jøts jade'eñi ja kyudigø'øyin ñaxt.

¹² Ja majkpi waj midu tø x'ixy, ja' wyandijpy nimajk ja windsøndi, ka'anim ixyam ja kutujk yiktanipøkti; pyøktipts ja kyutujk jøts tu'uk hori ja'ayi møøt wyindsøn'attit ja ka'øy jiyujk.

¹³ Tu'ugyi ja wyinmaa'ñ tyik'etti yø nimajkpi windsøndi jøts tmo'odit ja myøk'ajtin ja ka'øy jiyujk.

¹⁴ Xjats møøt cheptu'undit ja Borreek U'nk, mimajada'akidipts ja' ja'agøjxp ku møk ja myøk'ajtin tjagyepy; nipøn ya naxwiñ kyajade'eni, pøn ja møøtti kø'øm ja Dios Teety ja tø wyi'ixxyidi jøts ja tø yajxyidi, myiduda'aky'ajttip ja'.

¹⁵ Jøts ja ankilis nayide'en xnimaay:

—Yø mejy midu tø x'ixy ma yø tø'øxyøjk chøøni, yø' wyandijpy niduki'iyi naxwiñ'ñit kajp.

¹⁶ Jøts ja nimajkpi windsøndøjkti midu wyandijpy ja ka'øy jiyujk wyaj, ja'ats kyadami'ejxiwyampy ja ka'odyø'øxy jøts tyiktuu'duktit; jøts jade'eñi tyikwindigø'ødyit jønjøtpy.

¹⁷ Tundi jade'en sam ja Dios kø'øm tø mwinmaa'nmyø'øyidi sam ja kø'øm ttsøky, paty tkajpxmuktit ja windsøndøjk jøts ja kyutujk tmo'ot ja ka'øy jiyujk kunin yø ttu'undit jade'en sam ja Dios tø ttanibiktaagi.

¹⁸ Yø ka'odyø'øxy pøn tø x'ixy, jade'en yø' sam yø møj kajp Babilonia midu niduki'iyi ja naxwiñ'ñit ja windsøndøjk y'ane'empy.

18

Ku ja møj kajp Babilonia wyindigøy

¹ Xjats ku jade'en yjajty winets n'ijxy tu'uk ja ankilis ku ja tsajpjøtpy kyidaajky, møk ja kyutujk tmimiñ jøts ja naxwiñ'ñit tyikjajtaajky ku ja møk tyii'kxy chamamy.

² Xjats ja ankilis møk kyajpxy jøts wya'añ:

—Tø ja møj kajp Babilonia wyindigøy. Miku' tsinaadyaajk tø wyimbejtni jøts tum ja ka'øy jiyujk jam tsinaadyip.

³Ja'agõjxp jade'en yjajty ku ja naḡwii'ñit jaa'y tõ ttukpaduñ ja kya'õy'ajtin. Tõ ja windsõndõjk mõõt y'õyjaa'y'aty kya'õyjaa'y'aty. Põnts atstooktip atsyaktip tõ ja ttamõktõjkiñidi ku ja ttookti midi yiktundip ja põktyumbi.

⁴Xjats õ nmadõõy jadu'uk ja ayuujk midi tso'omp tsajpjõtpy, xjats wya'añ: —Pidsõmdi meets jam kajpjotp põn jaty õ nja'ajtpy. Kidi nugo ja põky xpaatti jõts kidi nayide'en ja ayo'on nugo xpaatti.

⁵Tõ yõ jade'embj kajp ja pyõky ñipajtni, xjats ja Dios ka' tja'dyigõy ku jade'en kya'õyjaa'y'atti.

⁶Wan yõ tjaty nayide'en sam yõ tõ tka'õdyuñ ja naḡwii'ñit jaa'y. Wan jawaani mõj tkubety ja kya'õy'ajtin.

⁷Põ õxyi ñamyikejxyi, mõj ñayjawiyyi, wants t'ixy tnijawi nayide'en ja ayo'on. Wampts ja' y'am yjotp: “Windsõn'ajtpyim õts ixyam; ka'ap õ nmay ndajy sam ja ku'õktyõ'õxyin, ka'ap õ sa njatt.”

⁸Ja'agõjxp tuktõñi nõjkk ñaxkida'aky mayjõõjp ja ayo'on: ja o'jkin, ja yuu, ja pa'am, jõts nayide'en nõjkk tuki'iyi tyõõyõ'kõxti; ja Dios janch mõj ku ja ayo'on jade'en myo'ojidi.

⁹Jõts ja naḡwii'ñit windsõndõjkti tpaya'axtit tpajõõdit ja kajp ma ja tõ pyõktyundi, ku t'ejxtit ku ja tõ yjõnmajtsniyyi, jõts ja jok nugo pyidõ'kni.

¹⁰Jagam ja tsõõgi y'a'ejxuktit, ja ku ja nayide'en yjattit, jõts yide'en wya'andit:

—iMjanch'ayõõy meets Babilonia! Janch mõk ja mõk'ajtin y'ity xmõõt'atti. Põ tõxi tuktõñi mwindigõy.

¹¹Nayide'en ja too'kpi ajuubyitõjk, pyaya'axtip ja', ja'agõjxp ku ka' põn jade'en y'ukjuuñit sam y'ijtyin, ja tyõõky myimaadyip myidajtip ti jaty ja myõõ'tajtip:

¹²jap oori, jap plati, jap n'ijxyim nga'ijxyim, jap ja õybi wet, tsuu'nk jõts tsajpts; jap nayide'en mayjõõjp ja kipy midi pa'akxukp, jap tsaaõdech tsaaõgeegidi, jap bronze jõts ja nugo pujx,

¹³japts nayide'en ja kanela, to'kx tsõõy, poom, mirra, jõts ja pa'akxukpi, jap ja vino, aceite, y'õybi ariin way jõts ja ariinbajk; jap nayide'en ja jiyujk midi tsimchõmp, jap ja borreegi, jap ja kawaay jõts ja karreti. Nay jap ja tumbi jaa'y tyõõgyi põn tundip sam ja jiyujkin.

¹⁴Xjats ja too'kpitõjk wya'andit:

—Tõ wyindigõõgyixy tuki'iyi midi y'ijty mdsojktip; tõ tyigõõgyixy ja mgumeeñ'ajtin ja mjujky'ajtin, nijuuni jadigojk kya'ukyikpatnit.

¹⁵Jõts ja too'kpitõjk, tsõõ'jkidip ja', jõts jagam y'a'ejxuktit ku nayide'en y'ayo'õmbaattit, pyaya'axtip pyajõõdip ja',

¹⁶jõts wya'andit:

—iMjanch ayõõy meets Babilonia kajp! Janch tsuj meets mgajp y'ijty sam tu'uk ja tõ'õxyõjk tsuj ñaxyõxyin, ku õybi wet tpikta'aky wan tsuu'ngi wan tsajpts, kuts o midi'ibi xox tpikta'aky wan ja oori jõts ja tsaaõð'kxpi.

¹⁷iPõ tõxi tuktõñi kyugõxi ja mgumeeñ'ajtin ja mjujky'ajtin!

Jõts nayide'en põn jaty jam tundip barki jotp, jagamyi ja tyandõõ.

¹⁸Jõts t'ejxpaattõõ ja jok ku tõ tyõõbyõjkni ja kajp, jõts mõk wyandõõ:

—iNimã jade'en ja kajp ejxim ya'at tõ y'ityin!

¹⁹O sa yja'adõ'tsnidi o sa ñadyu'uniiyidi, ja' mõk yja'widip ku ja kajp jade'en yjaty, chap'aawdi, jõts wya'andi:

—iMjanch'ayøøy mee Babilonia kajp! iJa mgumeeñ'ajtin ja mjujky'ajtin øø tø ndamajada'aky pøn jaty ja barki tmøøt'ajttip yam mejyjøøjty, jøts jotmøñ tø mdyimgyudigøødyi!

²⁰ Taxonda'akti meets pøn jap tsajpjøtpy, meets kugajpxtyøjk, meets janchja'wibitøjk, pø tøxi ja wyindigøy ja ka'øgyajp jøts jade'en ja Dios tø tpayø'øy ku tø myika'ødyundi.

²¹ Xjats tu'uk ja møj ankilis tkijyi'iky tu'uk ja amuum møj paandsaa jøts ja mejyjotp tkuwibejpiyi'ñ, jøts ja wya'añ:

—Jade'en yø Babilonia kajp wyindigøy ejxim yø tsaa yikuwibejpi mejyjotp, jøts nijuuni xøøw kya'ukyik'ejxnit.

²² Nima jadigojk ti kya'ukyikmadooni kajpjøøjty ja xuxpi ja kowbi; nima pøn ti tka'uktunidi, nima pøn kya'ukjøtsnidi.

²³ Niti jaj niti tøø'kx kya'ukaxø'kni jøts niti jade'en kya'ukyikmadooni sam ti y'ityin xyødundi. Tø yø kajp wyindigøy, øy ja too'kpi yajkpidi tø tjamøøt'atti møj, øy tuki'i'yi ja naqxwii'ñit kajp tø tjawin'øø'nguixy møøtpi ja kya'øy'ajtin.

²⁴ Ja'agøjxp yø kajp jade'en tø yjaty ku jam tø tyik'ookti ja Dios kyugajpxy jøts ja Dios yjanchja'wibitøjk. May ja jaa'y tø tyik'ookti o magajp.

19

¹ Kuts jade'en yjajty jøts nmadøøy ku mayjaa'y kyajpxti jap tsajpjøtpy jøts møk wya'andi:

iTu'ugyi adøm nDios Teety janch møj janch øy! Ja'ats tu'ugyi xyiknitso'ok'ajtindip.

² Tiy'ajtingøjxp ja Dios ttädyuñ; t'ayo'onmø'øy ja ka'ødyø'øxy, ja'agøjxp ku ja naqxwii'ñit jaa'y tø tyikma'aty ja' kya'øy'ajtingøjxp; paty ja Dios ja tpayø'øy ku jade'en tø tyik'ookti ja yjanchja'wibitøjk.

³ Xjats jadigojk wyangojmidi:

—iJanch møj ja Dios! Nijuuni yø kajp kyatøøy'amø'øty, jok'ejtp yø'.

⁴ Xjats ja ñi'ee'pxmaktaxkpi møjjaa'dyøjk jøts ja nimaktaxkpi jiyujk ñagyuxendyaajkidi jam Dios myøjtsinaadyaajk wingujkp, Dios tjä'myatsti jøts wya'andi:

—iJade'en, ku Dios janch møj!

⁵ Jøts yikmadøøy ja kajpxy ja ayuujk ma ja møj tsinaabyajt jam, midi wamp yide'en:

Winjawidi kunuu'kxyjawidi meets ja Dios, pøn tpadundip pøn twindsø'jkidip wan tmøjidi wan tmutskidi.

Ku ja Borreek U'nk yikxødu'unt

⁶ Xjats nmadøøy nayide'en ejxim ja mayjaa'y kyajpxyin, sam ja møj nøø øø'tspin wyina'añ jøts ja tsaach møk anaaw, jøts wya'añ yide'en:

iJanch møj ja Dios! Tø ñaxkida'aky ja kyutujk jøts jade'en xniwindsøn'ajtindit.

⁷⁻⁸ Wan t'øy'ajtyim wan txondaajkyim, wan twinja'wa'am wan twindsø'jka'am.

Tøxi tpaaty ja yja' midi yiktejp Borreek U'nk jøts tmøøtsinaawya'añ tmøøt'etwa'añ ja yjanchja'wibitøjk pøn øy'ajttip wa'ats jaa'y'ajttip.

Jade'en idø'øñ yø tijy sam ja jaa'y ja xøøw ttundi ku y'amajtskidi.

⁹ Xjats ja ankilis xniimaay:

—Ja' jade'en: "Tya'øy'ajttip pøn tø yikway ma ja Borreek U'nk xyøduñ."

Jøts ja yjaakwa'añ:

—Yø' ayuujk midi tø xjaadyañ, tiy janch yø', Dios tyiy'ajtin yø'.

¹⁰ Xjats ø nagyuxendyaajki ankilis wyingungup jøts nwindsoøgiwya'añ, jøts ø xnimaay:

—Ka'ap jade'en m'adsoøtst; pø tu'ugyixi ja Dios Teety yikwindsøøgi. Nayide'enxi øts ja nwindson'ajtim Jesús yja' nbaduujni sam metsin, sats ja mmijanchja'wibitøjkindi. Ja Jesús kyajpxy y'ayuujk nbagajpxa'amp pøn jaty ja Dios ja'ajtiyip.

Ja jaa'y pøn ttatsinaapy ja poop kawaay

¹¹ Xjats ø n'ejxpaaty ja tsajp y'awaajch; jamts kyaxi'jky tu'uk ja poop kawaay, ja'ats ja ttatsinaapy pøn øy pøn tiy'ajtin møøt, jøts tpayøøwya'añ ttiidyunwa'añ ja naxwii'ñit jaa'y.

¹² Janch tøø'kxp ja wyeen ejxim ja jønyowin, jøts kyubajkøjxp may ja koroni tmøøt'aty. Jamts ja xyøøw yja'ayi wyimbojkwemp, øy ja pøn tja'lijxy ka'ap ja pøn t'ejxkapy, ja' kø'øm tnija'wip.

¹³ Amuum ni'jpy ja wyet midi wyet'ajtpy, jøts ja xyøøw, Dios kyajpxy ja' Dios y'ayuujk ja'.

¹⁴ May ja myøøtseptumbi pyayøøyi pøn tso'ondip jap tsajpjøtpy. Amuum poop, øybi wet, wa'ats wet wyet'ajttip jøts tum poop kawaagyøxpti.

¹⁵ Japts y'aawjøtpy pyidsimy tu'uk yøñchujx, janch jøøjp ja', ja'ats tyayikt-saachip ja naxwii'ñit jaa'y ku ja møk tniwindsøn'atwa'añ ja naajx ja kajp; møk ja ayo'on ja payøøyin tyiknaxwa'añ ku ja Dios Teety tø yjanchjot'ambiky.

¹⁶ Yjixki'py ja xyøøw yja'ayi jøts pyuugyixy. Jade'en ja twandijy ku møk ja kutujk tmøøt'aty, nipøn ya naxwiiñ kyajade'eni.

¹⁷ Winets ø n'ijxy tu'uk ja ankilis jam xøøw wyindump, jøts tmigajpxy ja jiyujk midi kajkwidjttip tsajpwemp, jøts wya'añ yide'en:

—Mendi namyukidi jøts xka'adyit x'a'uxidit ja Dios yja',

¹⁸ jøts xtsu'utstit xjøø'kxtit ja windsøndøjk ja soldaditøjk. Nayide'en xtsu'utstit ja kawaay jøts pøn ja tatsinaajyip. Niduki'iyi xjøø'kxtit pøn ja jaa'y yiktuujnip jøts pøn midundip, wan tmøji wan tmutski.

¹⁹ Xjats ø n'ijxy ja møj ka'øy jiyujk jøts ja windsøndøjk pøn ya naxwiiñ møøt ja syoldaditøjk, ja agøjxp tø ñamyukyidi ku cheptunwa'andi møøt ja' pøn ttatsinaapy ja poop kawaay.

²⁰ Jøts ja ka'øy jiyujk yiktsuumy møøt ja' pøn nugo win'øø'ndip ñadyijyi ku Dios ja tkajpxnaxpi'aty. Jade'en ñadyijyi tnanke'ejxi ja myilagri'ajtin jøts jade'en ja jaa'y twin'iiñ jøts yikmo'odit ja møj ka'øy jiyujk y'ejxa'anin jøts jade'en twindsøøgidit ja y'awanax. Xjats ja møj ka'øy jiyujk møøt ja' midi nugo win'øø'mp yikuwibejpidyi mejyotp, ma yjanchtøøy yjanča'ay ja nøø.

²¹ Ja'ats ja tya'ookøxti ja myigu'uk midi ja yøñchujx tmøøt'ajtp y'aawjøtpy, jøts ja jiyujk ja yjø'kxkøiyidi midi kajkwidjttip.

20

Sa ja kutujk midi tukmil jumøjt etp

¹ Xjats ø n'ijxy tu'uk ja ankilis midi tso'omp tsajpjøtpy, jøts ja tkøñ'ity ja ñi'awaajts ja ayodaajk jøts nayide'en tu'uk ja møj pujxkadeen.

² Myajts ja ankilis ja møj ka'øchaa'ñ midi yiktejp møj miku' ja Satanás, jøts yikøxøjch, yikpaxxøjch jøts tukmil jumøjt y'ett

³ y'ayo'ot ma yikuwibejpiyiiñ ayodaajkjøtpy. Jap ñi'adujkpejty jøts ja seeyi yikpiktaajky ja agaj, jade'engøjxp jøts ka'ap ja naxwii'ñit jaa'y nugo ajawi t'ukwin'øø'nit. Tukmil jumøjt y'ayo'ot, winets yikmajtstu'utt øy winøønin.

⁴ Winets ø n'ijxy ja møj windsøndøjck chøønidi jam møj tsinaabyajtkøjxp. Tø yikmo'odi ja kutujk ja møk'ajtin jøts tidiyu'unin ttu'undit. Nayide'en ja yik'ijxy ja anmija'windi pøn ja kyubajk tø wyinaqti, ku ja tkajpxwa'kxti ja nwindson'ajtim Jesús yja'. Jade'ents ja Dios yja' tø tpaduujni. Ka'ap ja twindsø'ogidi twinjawidi ja møj ka'øy jiyujk jøts nika'ap ja y'ejxa'anin yikpikta'akti wyimbojkøjxp jøts kyøjø'øm. Yik'ijxy ku ja yujkpyøkøxti jøts tukmil jumøjt møøt wyindsøn'attit ja Cristo.

⁵ Yø'øts jawyeen jujkpyøktøø, pønts jaaktandøø jaanimts ja yujkpyøktit kunin ja tukmil jumøjt ñaxt.

⁶ Tya'øy'ajtip tyaxondaajkip ja Dios yja' pøn jawyeen jade'en jujkpyøktøø. Ja'ats ja Dios ja'ajtidip jøts ka'ap ja y'ayo'odit ku ja myimajtskpi o'jkin ñaxt. Pyadundip ja Dios yja' jøts møøt wyindsøn'attit ja Cristo tukmil jumøjt.

⁷ Ku wyinaty tø kya'pxy tukmil jumøjt winets yikmajtstu'utt ja Satanás.

⁸ Ku pyidsø'ømt, wyin'øø'mp ja' ja naqxwii'ñit jaa'y. Nøjck twin'iiñ nayide'en ja kajp ma yiktijy Gog jøts Magog, jøts ñamyukidit ja tseptumbi niduki'iyi ja syoldadi. Janch namay ja'adi, ka'ap ja myachooni.

⁹ Namyujkidøø jam møj jøgyøjxp jøts tnawidejtkøxti ma jam y'etti pøn jaty ja Dios ja'ajtidip, pøn ja chøjky. Xjats ja Dios ja jøøn tñajtskajxiy'ñ jap tsajpjøtpy jøts niduki'iyi tyøøgyijxy.

¹⁰ Xjats ja miku' nayide'en yikmaajch ja'agøjxp ku ja jaa'y nugo twin'iiñ. Nay jam yikpiktaajky mejyjotp ma yjanchtøø yjanča'ay ja nøø. Møøt ja' ja møj ka'øy jiyujk, jøts ja' midi nadyejip kugajpxy pøn nugo twin'øø'mp ja naqxwii'ñit jaa'y. Jamts y'ayo'odit xemikøjxp xinaxy tsunaxy.

Ku ja Dios tidiyu'unt ja jaa'y ma ja pyoop tsinaabyajt jam

¹¹ Jøts ø n'ijxy tu'uk ja møj tsinaabyajt, poop ja', jam ja Dios chøøni. Xjats ja tsajp, xjats ja naajx tuki'iyi wyindigøøgyijxy Dios wyingujkp, nima niti kya'uk'ejtnei.

¹² Jøts ø n'ijxy ja jaa'y, Dios wyingujkp tyanidi pøn tø y'ookti, ja møj ja mutsk ja'adi. Jamts ja nøky yik'ijxy sa tø yjaa'y'atti nidu'uk nidu'uk. Nayide'ents ja nøky jam yik'ejxmi ma ja xyøøw jap yjaabyetyidi pøn jaty ja Dios yja' tø tpaduujni, xjats jade'en niduki'iyi yikpayø'ødyi.

¹³ Jam ja'adi pøn tø y'ookti mejyjøtpy jøts nayide'en pøn tø y'ookti naqxijxy. Jamts ja yikpayø'ødyi tu'uk tu'uk pøni sa tø yjaa'y'atti.

¹⁴ Winets ja Dios tyikjøpkixy ja o'jkin tigøøyin jøts ka' pøn y'uk'ooknit jadigojk. Ja' tøødyip pøn tø tyundigøydi jap mejyjøtpy ma yjanchtøø yjanča'ay ja nøø.

¹⁵ Ja' jade'en yikpiktaktip jam, pøn ja xyøøw jap ka'ejttip nøkyjøtpy, pøn tkabadundip ja Dios yja'.

21

Ku ja tsajp ja naajx jadigojk y'øyiy'ñ jemy

¹ Nay winets ø n'ijxy ja jemchajp ja jemñaajx jadigojk; pø tøxi ja tsajp ja naajx wyindigøy midi jawyeen ejt. Nayide'ents ja mejy kya'uk'ejtnea.

² Xjats ø n'ijxy tu'uk ja jemgyajp kyida'aky tsajpjøtpy, kunuu'kxy Jerusalén xyøøw'ajtpy, Dios wyingujkp ja chøøñ. Janch tsuj janch xøxy ja kajp, jade'en ja kyaxi'iky ejxim ja jaa'y pyøkw'a'ñin.

³ Winets nmadøøy møk kyajpxy jap tsajpjøtpy, xjats wya'añ:

—Ejx sa ja Dios tmøøtsinaawya'añ ja naqxwii'ñit jaa'y. Ja' amuum ja'ajtidip jøts ja ja' xemikøjxp tmøøt'ett.

4 Yiktig'øpy ja yjotmaydi ja yjotmay'o'jkindi. Ka'ap ja o'jkin y'uk'ejtnit y'ukpaajtniyit, ka'ap ja jajyi tøøyi t'uk'ejxnit; sam tø y'uk'ityin, tø ja ñaxy.

5 Xjats ja wyaañ pøn jam tsinaapy mõj tsinaabyajtkøjxp:

—Uk'ejxim sã øts tuki'i'iyi jemy nyik'øyigyøxt.

Xjats jade'en wyangojmi:

—Jaabyat ya'at ayuujk ja'agøjxp ku tyi'yi yjanchi, ka' ma ndagudsø'jka'ant.

6 Winets øts xnimaagyojmi jøts yide'en wya'añ:

—Tø y'øyigyixy. Øts idø'øn nyikts'o'ondaajk tuki'i'iyi jøts nayide'en nyikjøpkøxt. Pøni pøn tøøjtsip, øts ja nøø ja nmo'op midi yikjujky'ajtp xemikøjxp, jøts may'ajt ja'.

7 Pøni pøn tmimajadaajkip ja miku' yja', ja'ats nmo'op ja øy'ajtin; jade'ents øts ja n'u'nk'att jøts nmøø'tett xemikøjxp.

8 Pøn tkawamp øts nja', pøn tkamibøjkkp, pøn xkatsojkip øts nja', pøn yikjaa'y'o'kpp, pøn ka'øyjaa'y'ajtp, pøn ja miku' yja' tyiktuujnip, pøn twindsø'jkip ja maxandsaa, pøn taay'ajttip, ja' nøjkkøxtip xemikøjxp jam mejyjotp ma yjanchtøø yjancha'ay ja nøø.

Tsuj kyaxi'iky ja jemgyajp Jerusalén

9 Winets tu'uk myiñ ja ñiwixujkpi ankilis midi ojts tyikmiñ ja wixujkpi ayo'on ya naxwiñ, jøts ø xnimaay:

—Men, jøts ø nduk'ext ja janchja'wibitøjk pøn møøt y'ettit ja Borreek U'nk.

10 Nayi kumaa'yjotpy ja Espiritu Santo xuk'ijxy, ku øts ja ankilis jam mõj kojpkøjxp xyiknijkxy, jøts ø xuk'ijxy ja kunuu'kxy jemgyajp, ja Jerusalén midi kidakp tsajpjotpy jam Dios wyingujkp.

11 Janch tsuj janch tøø'kxp ja kajp sam ja Dios chinaadyaajkin, jade'en chamamy ejxim ja wa'ats tsaadøø'kxpa'an, tajajna xp jade'en sam ja wa'ats keega'an.

12 Køjxp nabojts'awidity ja kajp jøts makmajtsk ja agaj tjagyepy, jamts ja ankilis tyanidi ma jaty ja agaj. Jam agajkøjxp kyøxja'ayidi ja xyøøw pøn ja Israelit jaa'y y'aadsip kyugojp, namakmajtsk idø'øn ja'adi jøts tu'uk tu'uk ja agaj ja xyøøw tmøø'tajtti.

13 Tigøøk ja agaj tyañ aga'ñ tso'ampy, jøts ja jadigøøkpi agaj tyañ anajy tso'ampy. Xjats ja jadigøøk agaj tyanmi wĩndujy tso'ampy, nayide'en jadigøøk agaj tyañ jixkø'øm tso'ampy.

14 Makmajtsk ja tsaa yiktapojsøø'ñ ja pøch, jøts tu'uk jaty ja tmøø'taty ja xyøøw pøn jaty ja Jesús kyudanaabyi'ajtpy.

15 Ja ankilis midi ø xmimadyakp jam ja takejpx ja tmøødi, tum oori, xjats ttakijpxy winø'ønin ñabojs'awidity ja kajp, jøts nayide'en winø'ønin myøji ja agaj.

16 Kwadradi ja kajp, ni sudso'ampy kyayøñi kyakoni. Majtsk mil ja majtsk magø'pxy kilometri tuktamajñ jaty, jøts nayide'en kyøxpi.

17 Winets nayide'en tkijpxy ja pøch, tugui'pxy myaktaxk metri ja myajpx'ajtin tjagyepy. Jade'en ja ankilis tkijpxy sam adøm nguijpxy in.

18 Amuum jaspe tsaa tø ttaapøch, jøts ja kajp amuum oori ja', jøts wa'ats keegi kyaxi'iky.

19 Ma ja makmajtskpi tsaa tø yiktapojsøø'ñ, mayjøøjp ja øybi tsaa'u'nk tø yiktaxøxy. Ja myidu'ukpi tsaa tmøø'taty ja jaspe, jøts ja myimajtskpi tsaa tmøø'taty ja zafiro. Ja myidigøøkpi tmøø'taty ja ágata, jøts ja myimaktaxkpi tmøø'taty ja esmeralda.

20 Ja myimagoxkpi tsaa txox'aty ja ónice, jøts ja myidudujkpi tsaa txox'aty ja cornalina. Ja myiwixujkpi tsaa txox'aty ja crisólito jøts ja myiduktujkpi

txox'aty ja berilo. Ja myidaxujkpi tsaa txox'aty ja topacio jøts ja myimajkpi tsaa txox'aty ja crisoprasa. Ja myimaktu'ukpi tsaa txox'aty ja jacinto jøts ja myimakmajtskpi txox'aty ja amatista.

²¹ Tum perla ja makmajtskpi agaj, jøts amuum oori ja møj tuu' midi najxp kajpjotp, jajp tsamamp ja'.

²² Ka'ap ja tsaptøj jam yik'ijxy jemgyajpjotp. Ka'ap ja chøkyi, kumi amuum ja Dios ja tkajp'aty møøt ja Borreek U'nk.

²³ Ka'ap ja chøkyi jøts ja xøøw ja po' jam y'a'nt kajpjotp. Køøm ja Dios Teety jøts ja Borreek U'nk ja y'aju'uk ja y'ajaj tyikjajt tyiktøø'kxt.

²⁴ Nay ja' tkudøø'kxidip tkujajidip ja naxwii'ñit jaa'y pøn tø ñitso'ok'atti, jøts nayide'en ja windsønøjkti pøn ja y'øy'ajtin jam tø tminøjkxti.

²⁵ Awa'ats jam y'ity ma ja pøch agaj jam. Nijuuni jam kyakoodsi, xiijn jam y'ity.

²⁶ Xjats jam tminøjkxti ja naxwii'ñit jaa'y ja y'øy'ajtin ja wya'ats'ajtin;

²⁷ ka'ap jam tyøkit pøn ka'øy'ajtip, pøn ja myigu'uk nugo twin'øø'mp twindaay'ajtp jøts o ti tkadami'eixiwyaa'ñ. Ja'ayi jam tøjkidip pøn ja xyøøw jap jaabyety jap nøkyjøtpy, ma jap y'ity ja jaa'y ja xyøøw pøn jujky'ajttip xemikøjxp. Ja'abi nøky tmøøt'ajtp ja Borreek U'nk.

22

¹ Xjats ø xuk'ijxy ja ankilis tu'uk ja møj nøø. Midi yik'ukp janch wa'ats ja', ja'ats xyikjujky'ajtim xemikøjxp. Janch ti'kxy ja', jøts ja jam pyidsimy ma ja Dios Teety chøøni møøt ja Borreek U'nk.

² Jamts ja møj tuu' kujk'am yø'øy ja nøø. Adsow aduuk ja kipy jam yøñ nøøba'am. Ja' tyøøm yiktajujky'ajtp xemikøjxp. Wimbo' wimbo' ja tyøøm'aty jøts ja y'aay tsøøy'aty ja naxwii'ñit jaa'y.

³ Pøn jap tsinaadyip ka' pøn y'ukjemñimaa'yñiyi y'uktenimaa'yñiyi. Ja Dios Teety jam tu'ugyi ejtp møøt ja Borreek U'nk, ja'ats windsø'jkijidip ja yjanchja'wibitøjk.

⁴ Ejxiyidip nijawiyidip wemp'am ja Dios Teety, jøts nay ja xyøøw myøøt'ajtidip wyimbojkwemp.

⁵ Ka'ap ja koots'ajtin jam y'uk'ejtnit; ka'ap ja jaj ka'ap ja xøøw t'ukyiktunit; Dios Teety tkujajip tkudøø'kxip, ja'ats jam windsøn'attip xemikøjxp.

Wingomp ja' ku ja Jesucristo mye'ent

⁶ Winets ja ankilis xnimaay yide'en:

—Tiy janch ya'at ayuujk midi ixyam tø xjaadya'ñ, ka' nugo xkudsø'øgit. Nay ja Dios Teety pøn y'ijty tyukajpxwa'kxpy ja kyugajpxy, tøts ja nayide'en tkejxy ja y'ankilis jøts ttukmado'ot ja pyadumbi pyabøjkpi sa tsojk yjatwa'añ kyubatwa'añ.

⁷ Nøøm ja nwindson'ajtim:

—iMe'emp øts tsojk! iTya'øy'ajttip tyajotkujk'ajttip pøn ja Dios kyajpxy tmøøpjiktajkip sa yap nøkyjøtpy yjaabyety!

⁸ Xjats øts nmadoøy n'ijxy køøm sa øts ya'at nøkyjøtpy tø njaadya'ñ. Winets øts ja ankilis wyingujky nagyuxendyaajki sam øts ja xuk'ijxy jøts øts ja nwindso'øgit.

⁹ Jøts øts ja xnimaay:

—Ka'ap jade'en m'adø'øtst; pø tu'ugyixi ja Dios Teety yikwindsø'øgi. Nayide'enxi øts ja nwindson'ajtim Jesús yja' nbaduujni sam metsin, sats ja mijanchja'wibitøjkindi, jøts niduki'iyi pøn jaty tmøøpjiktakp midi yap nøkyjøtpy jaadya'ñ.

¹⁰ Jøts nayide'en ja ankilis xnimaay:

—Ka' nugo x'amaatsk'att ja Dios kyajpxy midi yap nøkyjōtpy jaadyañ. Wingompxi jøts yjatt kyubatt jade'en.

¹¹ Wan jade'en tjaa'y'atti pøn ka'øy'ajttip, jøts pøn ja Dios yja' tpaduujnip, wañim ja tyikyø'ødyi jade'en ja yjaa'y'ajtin.

¹² Yide'ents ja nwindson'ajtim wya'añ:

—Tsojk ø nme'ent jøts ø nmime'ent ja øy'ajtin. Ja'ats ndamay'atp nidu'uk nidu'uk sa tø yjaa'y'atti.

¹³ Øts idø'øn nyiktso'ondaajk tuki'iyi jøts nayide'en nyikjøpkøxt.

¹⁴ Tya'øy'ajttip tyajotkujk'ajttip pøn tø ñitso'ok'laty. Awa'ats ja tyuu'di jøts ja tyøkidit jam kunuu'kxy kajpjotp. Jamts tpaattit ja kipy midi jam yiktajujky'ajtp xemikøjxp.

¹⁵ Ka'ap jam tyøkidit pøn ka'øyjaa'y'ajttip pøn ja miku' yja' tpaduujnidip, pøn maa'tstip, yikjaa'y'oo'ktip, jøts pøn ja myigu'uk nugo twin'øø'mp.

¹⁶ —Tø øts ja n'ankilis nguexy jøts tuki'iyi yiknigajpxkøxt ya'at Dios kya-jpxy, jøts jade'en yiknijawit pøn jaty ja Dios ja'ajtidip jam niwixujkpi kajp. Øts ndeety'ap'ajtpy ja møj windsøn David. Jade'en øts ja naxwii'ñit jaa'y nyikujajtaagi sam ja møj jaxyøøw midi jøpyidsømp.

¹⁷ Xjats ja Espiritu Santo jøts ja nwindson'ajtim yjanchja'wibitøjk wya'andi jøts ø nwindson'ajtim yiknøjmi:

—iMen!

Pøn jaty tmadoop yø'øbi ayuujk wan nayide'en twa'andi:

—iMen!

Jøts pøn ttsojpk ja øy'ajtin ja xondaajkin wan tmiñ jøts tpaatt ja may'ajt.

¹⁸ Ixyam ø nnigajpxy pøn jaty yam tmadoop ja Dios kyajpxy sam yap nøkyjōtpy yjaabyetyi: Pøni pøn nugo tyiktigajtsp ya'at ayuujk jøts ne'egi tiy tijy midi ka' tyiy'ajtin, Diosts ja ayo'on mo'ojip sam yap nøkyjōtpy yja'ayi.

¹⁹ Pøni pøn yø Dios y'ayuujk tyiktigajtsip jøts ka'pxy tka'ukajpxnidi sam yap nøkyjōtpy yja'ayi, Diosts ja øjkiñip ja y'øy'ajtin jøts ka' tyøkidit ma ja kunuu'kxkyajp jam midi yø nøky ñigajpxpy.

²⁰ Xjats ja nwindson'ajtim wya'añ pøn ya'at tnigajpxp:

—Tsojk nme'ent.

Jøts ø n'adsojimbijty:

—Øy jade'en. iMen, nwindson'ajtim Jesús!

²¹ Ja nwindson'ajtim Jesucristo mgunuu'kxidip meets niduki'iyi. Jade'en idø'øn ja y'ejxi tyiyi.